

Abailard A. H. 23/18









38-2617

A492277





PETRI

A492277

ABAEIARDI,

FILOSOFI ET THEOLOGO,

ABBATIS RUYENSIS,

ET

HELOISAE CONIVGIS EIVS,

PRIMÆ PARACLETENSIS ABBATISSÆ,

OPERA,

NUNC PRIMUM EDITA EX MMS. CODD. V. ILLVST.

FRANCISCI AMBOESII, Equitis, Regis in sanctiore
Consistorio Consiliarij, Baronis Chartræ, &c.

*Cum eiusdem Præfatione Apologetica, & Censura
Doctorum Parisiensium.*




PARISIIS,

Sumptibus NICOLAI BVON, via Iacobæa, sub signis
sancti Claudij, & Hominiſ Silueſtris.

M. DCXVI.

CVM PRIVILEGIO REGIS.





ALPHABETIC

FILOSOFI ET THEOLOG

ABBATIS RYLAND

ET

THEOLOGICAE CONIVGII

PRIMUM PARACLETICUM ABBATIS

OPERA


AVO TITIVS ET ALIIS

FRANCISCO ABBATIS RYLAND

CONIVGII CONIVGII

CONIVGII CONIVGII

CONIVGII CONIVGII



CONIVGII CONIVGII

CONIVGII CONIVGII

CONIVGII CONIVGII

CONIVGII CONIVGII



APOLOGETICA PRÆFATIO PRO PETRO ABAELARDO:

A D

ILLVSTRISS. AC SAPIENTISS.

DOMINVM D. NICOLAVM BRVLARTIVM,

Equitem, Sillerij Dominum, Marinarum

Baronem, Franciæ & Nauarræ

Cancellarium.


PER FRANCISCV M AMBOESIV M

Equitem, Regis in sanctiore Consistorio

Consiliarium.



VM studiosi viua voce præceptorum sapissimè fuerint destituti, aut eos quales voluerunt adprimè eruditos, non ita facile & in promptu habuerint; factum est vt Bibliothecæ ab Optimatibus, aut claris & locupletibus viris sint institutæ, in quibus tanquam promi condi munere, optimorum & veterum Auctorum Libri repositi adseruantur, & à quibus tanquam à diuite penu scientiarum cupidi suo tempore doctrinarum exquisitos thesauros petere possent. Hinc Atheniensis Pisistratus, Eumenes Pergamenus, Ptolomeus Filadelfus, quod conquisitos ad ducenta ferè milia libros ex autografo describi magna impensa curassent, benè de posteritate meriti nomen suum immortalitati consecrarunt. Nec minorem apud Romanos L. Lucullus, Asinius Pollio, Traianus, C. Plinius, Tacitus A. comparatis numerosorum voluminum ornatissimis Bibliothecis, splendoris ac magnificentiæ laudem sunt assecuti. Quod si in his Poëtarum, Philosophorum duntaxat, & Historicorum reliquiis conquirendis & colligendis tantam curam adhibuerint adhuc profani, & cæcitatibus erroribus, sæditque dæmonum tenebris & præstigiis involuti; quid censendum putamus de pia Heroum nascentis Ecclesiæ sollicitudine in re haud absimili: quantum eorum laus iustior, quod propenso animo in hanc curam incubuerint,



postquam divini Verbi semina toto orbe dispersa sunt: ut Profeticæ Canoniceque primùm Scripturæ, deinde Orthodoxorum Conciones & Interpretationes non incuriosè descriptæ, in templorum adytis & sacrariis collocarentur, tanquam in armamentariis ex quibus certissima tela parari possent adversus ingruentes hæreseôn insultus. Adnissus est sua ætate Constantinus Magnus magna diligentia, zeloque ardentissimo, suæque auctoritate perfecit, ut authentica exemplaria ab ipsis fontibus repeterentur; Profetarum monumenta Hebræa, Apostolorum Græca lingua, quæ scripta primùm fuerunt in mundum redigerentur, apocrypha à Canonicis, quæ Meliton & Origenes ad notatam **xxi** numerum retulerant, ita discernerentur, ut suis cuique honos factus tectus remaneret: neque adulterini pro veris, carbones pro thesauris supponerentur. Ex quo certè effectum vidimus, ut doctrinæ puritas, unitas, antiquitas, & universalitas nullas novitates admitteret, nulla se in frustra minutatim secari sineret: quas certissimas esse Ecclesiæ notas, tum Petri *et magis dei* indicat Liripensis; & ut quod Marcion similisve farinæ homines tentaverant, in sedis sacratissimis corrumpeendis, id tandem successibus caruerit, manserintque illæ inter publicas & cedrinæ tabulas ab omnibus impostorum insidiis illasæ, ita ut nihil in his sit repertum, quo suam Arius, Eutyches, Nestorius causam fulcire possent; & cum Sardicenses Canones pro Nicænis obtrudere quidam male feriatæ ausi fuissent, deterius est totus hic fucus per incorruptos Canonum Nicænorum Codices, qui manuscripti in Bibliothecis Constantinopoli, Alexandria & Antiochiæ sunt reperti. Meminit etiam Eusebius Hierosolimitanæ & Cæsariensis Bibliothecæ. Et harum omnium imitatione Ecclesiæ Occidentales publicas & privatas etiam erexere, ut his uti frui liceret, iis, qui sacris initiandi sese totos Bibliorum & Patrum lectioni addicerent: curabantque Episcopi, ut quisque libros eos fideliter descriptos domi haberet, & nocturna diurnaque manu versaret. Et ad id parabantur diligenter librarij notarum & siglarum periti, quos Irenæus Lugdunensis & alij cordati Doctores, cum Libros aliquos ederent, sæpè per omnia sacra sunt obtestati; ut quod in archetypo esset exemplari bona fide describerent, nihilque vel detraherent, vel adderent, vel immutarent. Sed nocuit sequentium temporum barbaries, quæ Librariis vsa est indoctis, & idiotis, plerumque etiam Cœnobitis, quos sui Abbates, ne otio marcescerent, ad id cogeant, ut aliquot horas exscribendis Libris impenderent: quin & ad id mulierculæ & puellæ operas suas locarunt, magno rei literariæ detrimento & dedecore, priusquam singulari Dei beneficio ars Typografica inventa est ante seculi decimiquinti initia. Itaque ex illis scriptis, quæ veteres reliquerunt; è multis, quæ adjumento ad vitam rectè instituendam, & ad plurimarum artium cognitionem esse possent, pauca servata sunt; sed ita depravata & mutila, ut vix legi, & intelligi possent, & brevi tempore per Chalcografos in lucem erupit stupenda sine delectu Auctorum moles, qui diu cum blattis & tinea erant luctati: sed multo plures fato Auctorum in illo Manuscriptorum pulvere & situ delituerunt, donec paulatim diligenti solertia curiosorum eruerentur. Quod si quisquam est, cui cordi semper fuerit Bibliothecas illas veterum perquirere, inspicere, rimari, in

his profecto nomen meum semper ab adolescentia sum professus, siue meorum æqualium exemplo, ut iacentem literatorum laudem pro viribus sublevarem maculis eorum detergendis, siue quod Criticam plus æquo fortasse adamaverim, siue quod varia illa & promiscua lectione delector. Arque ita accidit, ut in manus meas inciderint aliquot Epistolæ doctissimi Petri Abaelardi, & Heloissæ eius vxoris; quæ cum primò arripissent, postea etiam relectæ summopere placuerunt. Cœpi etiam reliqua eius Auctoris Opera conquirere, quorum nonnulla reperi in membranis exarata, minutissimis characteribus, & lectu difficillimis, & ex collatione diversorum emendavi, emendatūque vnum exemplar semel atque iterum curavi transcribendum: sed laborem vicit voluptas legentis, & utilitas cum publica, tum priuata, quam percepturi sunt, qui ad ea legenda volent animum appellere. Fuit enim Abaelardus, vel Bailardus, ut cum Accursio & Alciato loquar, vel Balardus ut cum Genebrardo: siue mavis Abailardum vocitare, de apiculæ Gallico nomine, siue ab Abailardū, nam hoc posterius in Chronico Ioannis Crispini reperi; ut apud nostrates vsus est frequens ab pro de ingentium nominibus vsurpare: non aliter quàm si ego, qui de Ambæsia vernaculè nuncupor, Abambæsius indigitarer: Fuit, inquam, Petrus iste iuuenis Palatij castelli dominus ad S. Nazarium in Nannetensi diocesi ad Ligerim, patre equite Berengario, matre Lucia; qui ambo nobilibus proavis orti, post aliquot liberorum creationem, post Petri Abaelardi, quem Roselini præceptis informandum tradiderant, educationem, Religionis nexibus sese mancipandos tradiderunt, Filius eorum iussu Lutetiam missus, in sinu tam celebris Academiæ, ut Erichronius in Minervæ sinu educatus, in magnum virum evasit, & non solum Polyhistor & scientiarum omnium encyclopædia instructus; & omniscius; sed & Philosophorum & Theologorum coryfeus, & in suo genere princeps, primusque Theologiæ Scholasticæ seu disputatricis auctor creditus, unde illæ Nominalium & Realium apud Vignerium sectæ. De quo Samson Rhemorum Archiepiscopus cum suis suffraganeis, dum eum ad Papam deferrent, retulerunt nihil esse quod eum lateret, siue in profundo maris, siue in excelso suprâ: qui in promptu de vniuersa Philosophia, de Mathematicis, & etiam de quæstione qualibet respondebat, qui invitatus à condiscipulis, ut in obscurissimæ Ezechielis Prophetiæ interpretatione specimen ingenij ederet, impetrato brevis noctis spatio, toti Academiæ se admirabilem præbuit. Sed & Iurisconsulti nostri eum in salebris Iuris Iustiniani exercuerunt, ita ut suprâ nominatus glossator ad legem, *Quinque pedum præscriptione*, quæ est Imppp. Valentiniiani, Theod. & Arcad. C. *fin regund.* in verbo *præscriptione*, de eo sic scripserit. *Sed Petrus Bailardus qui se iactavit quod ex qualibet quantumcumque difficili littera traheret sanum intellectum, hic dixit, NESCIO.* Quid mirum, si & Azo, & ipse Accursius, qui rati sunt nihil videri in iure quod à se penitus perspectum non fuerit, ita hallucinati sint, ut magnus ille Andreas Alciatus, in illo quem de quinque pedum præscriptione scripsit Tractatu, postquam Petrum Bailardum celebrem sua tempestate professorem laudauit, quod ingenuè falsus esset eam legem à se non intelligi, ipse suorum doctorum interpretationem eludit & reprehendit, eorumque sequaces Baldum, Paulum & Sa-

licetum, qui ex ea hanc regulam elicere conantur, non reddi solitum olim iudicium de quinque pedibus, id est de re levissima; cum variaz constitutæ sint actiones de modica glande, de pisce, de onno, *l. 1. ff. de glande leg. §. Gallinarum instit. de rerum divis. l. si proprietarius. ff. de damno infecto*, cumque verior interpretatio sumi debuerit ex *l. xii. tab.* qua cautum ut inter vicinorum prædia constitutis finibus, quinque pedum spatium relinqueretur, quo ire, agere, uterque dominus posset, eiusque spatij vsucapio lege Mamilia prohibita est, ut apud Tullium *1. de L. L. & Ag. Urbicum de limitibus*. Quibus experimentis constare arbitror tanta Abaelardum fuisse ingenij pernicitate & dexteritate, ut potuerit in qualibet scientia, præsertim verò in ea quæ aliarum Regina dicitur, brevi tempore multum profecisse, & ad metam pervenire, citius quàm alius ex carceribus exisset: sed de eo postea amplior dicendi patebit campus.

Heloïssa verò, ut altera Susanna aut Esther, pulchra & Deum timens, vetustissimos illos Mommorantios legitima agnatione contingens, Canonici Parisiensis non notha, sed neptis, Psalmos Hebraicè personare ab incunabulis docta, clarum sexus sui sydus & ornamentum, tres illas linguas, necnon Mathesin, Philosophiam & Theologiam à viro suo edocta, illo solo minor fuit: in qua tantas ingenij dotes, prudentiæ, pietatis, patientiæ, humilitatis, virtutumque omnium, & pudicitæ chorus illustrabat, quæ religiosè coluit post brevem & furtivum aliquot mensium iusti connubij vltum, viri sui etiam immerito execti & absentis amantissima: ut dubites, plùsne exemplo matronis an virginibus profuerit, vel cum Argentolienfibus, vel cum Paracletensibus præfuit. Si ad matronale decus, ad linguarum aut scripturarum cognitionem inspicias, alteram Paulam; si ad custodiam perpetui pudoris, morumque asperitatem, Eustochium videre videberis: quam Episcopi quasi filiam, Abbates sororem, laici matrem diligebant; ita ab omnibus in cultu & admiratione habita, ut cum vir eius invidiæ & calumniæ telis premeretur, liuor in ea eiusque moribus non inuenerit, quod dente Theonino carpere posset. Eius Epistolarum facundiam simul inspexi, ut Fidiæ signum simul probavi; ingenij verò acumen, magnumque in sacræ Scripturæ, Patrumque lectione profectum satis indicant Problemata illa, siue dubia, quæ domino suo præceptoris & coniugi in scriptis proposuit discutienda: quæ qui attentè legerit, agnoscet esse verum quod ab Aristotele est vulgatum, non minus esse difficile quæstionem benè ponere, quàm benè soluere. Prætereo quàm subuliter hæc Heroïna duo Bernardo Abbati in Paracleti Cænobio hospitanti, etsi ille parùm candidè de Abaelardo sentiret, satisfecerit percontanti, cur in Orationis Dominicæ publica recitatione verba illa vsurparet, *Panem nostrum supersubstantialem*, cum ceteræ Ecclesiæ vulgò *quotidianum* dictitent; illa contra Græcorum discretionem fulta, quorum, ut ait Ambrosius, auctoritas maior est, solum Matthæi textum adduxit, τὸν ἄρτον ἡμῶν τὸν ἐμμένον, maluitque translationem ex Hebræo, quam propriæ linguæ scripturam sequi, prout videre licet Epistolâ v. secundi Libri, quæ est ad eundem D. Bernardum. Felix, ô nimium felix coniugū par, & benè concordans in dissimili fortunâ matrimonium, nec ipsa in morte divulgum, si ille tam benè liuoris insultus, quàm illa in sequiore

sexu declinare potuisset! O diuina viri vxorisque ingenia omnibus doctri-
 nis excultissima, quibus nec præcedens æuum, nec sequens vlla alia protu-
 lit adæquanda! Etsi verò Heloissa tanta fuerit mansuetudine, vt nullus vn-
 quam maleuolentiæ jacula in eam ausus fuerit contorquere, nullus eius
 mansuetudini obstrepere, tamen quam multa dictu graua, perpessu aspera
 in illam irruisse putamus: cum illa per latus viri, quem toto amabat pecto-
 re, sæpius sit petita, icta, & quasi transfossa: in suo corde sæpè perpessa est,
 quicquid in sponsi terrestriis famam & corpus potuit liuidorum & inimi-
 corum maleuolentia & crudelitas. Quæ speris huius mundi blandimē-
 tis sese totam consecravit IESU sponso cœlesti, sua sponte carnem pro-
 priam crucifigens; femina verè fortis, & similis Prudentibus, quas Evange-
 lium memorat sibi multis operibus pietatis prospexisse, ne deficeret oleum
 in lampadibus. Batava Syren scripsit ad Virgines Colonienſes sub nomi-
 ne Machabæorum consecratas, comparisonem Virginis & Martyris, as-
 seritque veram Continentem minimum abesse à Martyre; quòd Martyr
 patiatur à carnifice cedi carnem suam, Virgo vel Continens quotidie mor-
 tificat carnem suam, ipsa sui quodammodo carnifex. Martyr tradit corpus
 suum, Virgo vel vidua subigit, & in spiritus seruitutem redigit, domatque.
 Ea certè aptari possunt nostræ Heloissæ, quæ concupiscentiis, opibus, deli-
 ciis, fastui, luxui, gemmis, purpuræ, voluptatibus in hac vita renunciavit, ni-
 hil amans in hoc seculo, mortua mundo, soli viuens CHRISTO, cuius vt
 stringeretur amplexibus, columbinos edebat gemirus, precibus, psalmodiis,
 sacra lectione, silentio, ieiuniis, piis occupationibus corpus in serui-
 tutem redigens, quod in Continente non minus est laudabile quàm in Vir-
 gine, cum maior sit virtus placitis abstinuisse bonis. Licet contra sentiat
 Hieronymus difficiliorem videri pudoris custodiam in Virgine, quæ quod
 non est experta, majus & suauius esse suspicatur. Ipse Petrus Epistola,
 quam toti Operi præposuimus, pauca & modestè de adamata vxore & so-
 rore locutus, historiam propriæ vitæ, miseras suas, & ærumnas, imò etiam
 mortes narrat, vt ab avunculo & cōsanguineis vxoris nocte dormiens ir-
 manissima & pudèrissima vltione verpus factus fuerit: vt Monachi habitu
 in Cænobio D. Dionysij suscepto malè habitus sit à fratribus, quòd ex Bedæ
 secundo scripto in Acta Apost. controuersiam illam mouisset de duobus
 Dionysijs, altero Arcopagita, altero Corinthio: qua de re nos Cardinalem
 Baronium potius secuti, quàm Gregorium Turonensem, sententiam no-
 stram exposuimus in illa Præfatione, quam ad Historias dicti Gregorij
 præfiximus, eiusque defensionem contra Flaccij calumnias. Recitat etiam
 vt Tractatum de vnitæte & Trinitate diuina, in favorem Scholarium suo-
 rum compositum, qui humanas & Filosoficas rationes requirebant, Sue-
 sione coram Legato exhibuerit, & compulsus fuerit sine discussionis exa-
 mine propria manu in ignem iniicere: quod quàm grave fuerit, illi diju-
 dicent, qui norunt Auctores non minus Librorum suorum esse amantes,
 quàm patres liberorum. Cætera quæ in hac Epistola non sine acerrimo
 sensu doloris & patientiæ documento de suis calamitatibus recitat, de suo
 in solitudine secessu, de jactis primis Paracletensis eremi fundamentis, de
 pravis Fratrum quibus præfuit Ruyensium moribus, Tyrannique vicini

oppressione, ea melius ab ipso Auctore, quàm à me repeti possunt; cùm meum potius sit consilium vindiciis meum Abaelardum, si non ab errore, qui in idoneum cadere potest, saltè à servitute hæreseos falso insimulata asserere.

Hæc me iustissimæ causæ impulerunt, ut quotquot exemplaria nancisci potui in variis Provinciis conquiescerim, collegerim, legerim, relegerim, optimæ certè notæ frugisque non expertia: consiliumque ceperim ea in vulgus emittendi, tum ut R. P. sacrae literariæ prodessem, tum ut Galliam nostram ab illorum imposturis vindicarem, qui negant perpetuo verum esse, quod ex Plinio adstruit D. Hieronymus, eam solam carere monstris. Quid enim potius facerem, quàm Monachi saltem in extremis innocentissimi viri nomen è flammis eripere, eruditissimique Scriptoris Opera magnis sudoribus vigiliisque elucubrata, nostræ ætati, ac posteritati consecrare? Itaque vnum exemplar Epistolarum nactus sum in Armorica, in qua iuvenis prima auspicia cœpi laticlavij & meæ Senatoriæ dignitatis: Alterum ex Filippo Portæ Abbate Tyronio Poeta excellentissimo & mihi amicissimo, qui affirmabat se accepisse ab hæredibus Stefani Gormeleni Curiosolitæ: Tertium ex Monasterio Paracletensi, ad quod profectus sum, ut quæ ibi ex eius Operibus reperire poteram, in vsum publicum convasarem, ibique comiter sum exceptus, & ad contigua fundatoris & fundatrici sepulchra manu ductus benignitate Reverendæ D. Mariæ Rupifocaldæ Diaconissæ sapientissimæ cognatæ meæ: eius enim paterna avia Antonia Ambæsia, quæ Equiti Torquato Barbesio nupsit, Vidi Ambæsiæ filia unica, Karoli Calvimontis D. Franciæ Marescalli neptis & hæres totam vetustissimam familiam crevit, & primogenita nostra ad Rupifocaldos transtulit. Ea etiam mihi communicavit divini officij Homilias toto anni curriculo legendas stylo Abaelardico exaratas, cum Collectis & Hymnis, in quibus magna Catholicæ pietatis lux seu legenti, seu canenti affulget. Opuscula varia ex Navarrana Bibliotheca, Homelias ex Sorbonico Gymnasio celeberrimo, in Epistolam ad Romanos quinque Libros Commentarios ex Cœnobio S. Michaelis de Monte, seu in Periculo maris, quos dedit vtendos A. Quercetano doctissimus P. Iacobus Sirmondus Theologus è Societate IESU: Introductionis ad Theologiam Libros treis, reconditoris doctrinæ ex M. S. Cod. Bibliothecæ Canonorum Regularium sancti Victoris propè nostros muros: alia etiam aliundè, ut suis locis indicavi. Quæ Opera nisi Patres illi cognovissent esse fidei Catholicæ, Apostolicæ & Romanæ professoribus vtilia, ea certè vlticibus vrenda flammis dedissent; quæ tanto studio divinitus conservata nobis transcribenda & in medium proferenda dederunt. His volutandis, & ex collatione emendandis non exiguam operam locavi, ut me voto exsoluerem, quo pridem obstrictus eram, cùm Libellum de Concilio in publicum vulgari passus sum: & si quid durius inveni, cum germano meo R. D. Adriano Ambæsi Episcopo Trecorenfi inter Theologos eminentissimo communicavi, & cum aliis etiam amicis, nec aut ab illis aut à me in his Operibus aliquid est repertum, quod esse posset lectionis instructuosa. Prius tamen, ne tacito vel aperto linguæ aut cogitationis convicio verberari possem, accusationes

contra

contra Abaelardum, ac pro eo proscriptiones ac depulsiões in publicum proferre dectevi, & rationum ponderibus ac momentis adamussim examinare, ne quid temerè, aut perperam fecisse me quisquam obganniat. In arenam producuntur athletæ, immò bellatores fortissimi, quibus ingenij vires ac famæ, & plus quàm vitæ, sunt periclitandæ,

— nec enim leuia, aut ludicra petuntur,

Premia, sed Tarni de vita & sanguine certant.

Et ut ille de Hectore Iliados χ.

Πρόσθε μὲν ἑσθλὸς ἔειπε δῖος ἦ μιν μὲν ἀμείνον,

Καρπαλίμως, ἐπὶ καὶ ἰσχυρόν ἔσθ' ἔστιν

Ἀρπύδιον τι ποῖον ἀέθλια γίνεται ἀνδρῶν,

Ἀλλὰ σφὶ ψυχῆς θύον ἥκτορος ἱπποδάμοιο.

Hic igitur cursu, hic fugiens, ille acriter vrgens,

Delati, bonus & fortis pede concitus anteit,

Insequitur melior: nec enim pro tergo re tauri,

Pro bone, nec certamen erat, quæ præmia cursus

Esse solent: sed pro magni vitæque animæque

Hectoris

Sistendus est igitur, Nomofylax illustrissime & perfectissime, ad tuæ dignitatis tota Europa augustissimæ Tribunal, ad Galliarū Præfecti Prætorium, à quo appellare nefas, cui reliqui supremorum Senatum & Curiarum Provincialium Iudices, fasces submitunt, ad tuæ divinæ Themidis trutinam, hic Doctor infelix inter reos & proscriptos adnumeratus, qui causam dicat quasi ex vinculis, & ad criminum gravissimorum capita respondeat magnis delatoribus, vel potius accusatoribus non tam deterritus, quàm causa bonitate fretus, & vitæ morumque innocentia, per quam à Legato S. S. Prouinciæ quæ Rhemensis Antistitibus persona non est damnata, sed in scripto comburendo eius æca obedientia comprobata, & ab jis qui Senonis coadunati erant, nihil aliud quam damnationem Capitulorum quæ non agnoscebat sua retulit, ipse non auditus, ad sacrosanctam Sedem appellauit. Ab Innocentio verò Pontifice Opt. Max. ad quem totum negotium reuissum fuerat, plenæ absolutionis resseram, honorificumque Cluniaci ut petierat Prytaneum meruit: à tuis etiam Oraculis æquissimis & Diplomatis, in integrum restitutionem impetrabit, cum iure liberè legationis; ut cum tui fauoris aura per omnium ora, per Academias Orbis totius celebres, per Doctorum Bibliothecas,

Laudetur, vigeat, placeat, relegatur, ametur.

& sicut D. Augusti de Æneide retinenda, ita D. Brulartij de Abaelardi lucubrationibus non abolendis Edictum publicetur. Poterit enim tua amplitudo, vel solo aspectu facile sanare famam adfectam Philosophi & Theologi in hunc vsque diem non minus languentis, quàm illi qui ad Æsculapij sanum transeuntibus conspiciendi exponuntur. Tu enim es Brularti Silleri, cuius in manu legum ferendarum & abrogandarum jus omne consistit; qui in magistratuum, & in honorum omnium culmine & soliticio (ut ita dicam) excelso, & pleno stellarum, illustri & claro loco præsides; & quem Sol splendorem mundo, cum huic regno exhibes, ex quo splendi-

diffimo candore inter flammæ elucente circulo, tanquam è sublimi specula te Cynosuram honestis disciplinis præbes : qui bonis omnibus plaudentibus. vulnera superiorum iniquitate temporum Galliarum inflicta curasti, qui rixarum & litium præsertim aulicarum semina, quibus nulla capitalior peccatis esse potuit, si non radicitus euulsi, saltem magna ex parte circumcidiisti & amputasti: qui rem Francicam sæpe aduersa fortuna nutantem confirmasti, interdum etiam dissidijs propè extinctam & euersam vnus ipse non modo restituit, verum etiam magnoperè auxisti: qui publicè iustitiam, priuatim temperantiam, & abstinentioniam ab ineunte ætate semper coluisti: qui triplici legatione, Nauarrana, Heluetica, Romana, quàm esset publico bono natus demonstrasti, cùm virtutibus magnis fortunam adæquasti: & ut alia non modò in Reges, sed & in patriam, aut in singulos haud vulgaria merita omittantur, mirandum non est si tanto patre genitus, antiquis gentis vetustissimæ stemmatibus fulgens, domesticis tamque claris exemplis permotus, nihil non egregium, nihil non amplum, non proavis equitibus & patricijs dignum aut cogitasti aut fecisti: De quo patre tuo, quia de te filii iubes, hoc tantum dicam, ad te fatali ordine & iure hæreditario fuisse delatum annuli Regij scrinium, cuius administrationem ob egregias & heroicas D. Præsidis Bernij virtutes, omnes boni deberi clamitabant tuo illi parenti nostri seculi Catoni integerrimo, quem duobus illis Romanis, vel trecentis Socratibus longè antecessisse, qui eius sapientiam & constantiam norant, & mirati sunt, & consentunt. In quorum memoria viuet, quamdiu probitati, consilio, innocentia, sapientia locus erit. Virtuti enim, quam ducem semper habuit, comitem adiecit bonam existimationem, sine qua vivere sapienti esset injucundum. Quo magis gratulandum tibi censeo, Iustitiæ Antistes dignissime, qui hanc veram & solidam laudis paternæ possessionem tam libenter occupes, veteremque majorum tuorum de omnibus benè merendi consuetudinem heroicis virtutibus, eloquentiâ, doctrinâ, solertiâ, rerum maximarum vsu cumulatam, constanter retines: eamque ut officio solito erga hunc Auctorem testatam relinquant, te etiam atque etiam obtestor.

O te igitur beatum Abaelarde, qui cùm atrocioribus percussis ictibus olim in eo fueris miserrimo statu constitutus, ut te cùm malè à quamplurimis audires, omnes qui benè non norant, quasi vomitu nauseantis fortunæ rerum natura exsputum crederent: occurrit tibi maximus ille Brulartius, salutaris & tutelaris Genius, ad cuius sacram anchoram accurristi, sub qua nullos fluctus, quamvis decumanos, nullas procellas aut tempestates, tibi putes pertimescendas. Vide quàm non formidare debeas tanto iudice, vide quanta lux clementia & æquitatis tuis oculis cooriatur.

Age veniant tui siue æmuli, siue adversarij, siue irrisores, criminibusque tecum vel decertent etiam maledictis. Quod enim maledictum acrius, quàm si hæreticus audias, cùm vbicumque latueris te semper invenerit invidia. Nam hîc referre non placet, quæ Successione per invidiam acta sunt: cùm Abaelardus adhuc inter Sodales Regalis Cœnobij Dionysiani militaret, ubi sese obsequentem filium Ecclesiæ demonstravit, Legato sanctæ Sedis causam suam approbans, cum eius nutu suum Commentarium de Tri-

nitatem (in quo nihil contra fidem contineri putabat) manu tamen propria comburere maluit, quàm scandali occasionem præbere. Ingens certamen erit in antiqua Senonum ciuitate, in qua falangem ducet Primipilus fortissimus, testis idemque Auctor omni exceptione maior D. Bernardus Tesselini F. Clarævallensis primus Abbas, sui Ordinis lumen & cosumen: qui ex discipulo Sylvarum Doctor Ecclesiæ verè Theodidactos est appellatus, miraculis ante & post obitum claruit, & in Calitum numeros ab Alexandro III. est relatus, cuius tanta fuit, vigetque nunc adhuc fama & auctoritas, ut de eo nemo hanc formulam jure possit usurpare, *Hunc nolo, timidus est*: cui statim non assentiri stultum; velle in aliquibus refragari, aut fidem derrahere, impietati proximum videatur. Ille ubi Abaelardum ex S. Gildasij, quod ejuraverat, Cœnobio reversum audivit, & aliquot Opuscula partim verè partim falso ei attributa legi, iras se dignas concepit, & Proceres Ecclesiæ ad Synodum Senonensem movit, literisque convocavit, apud quos Abaelardum inter reos violatæ religionis detulit: & ad Cardinales summumque Pontificem Innocentium capita gravissimæ accusationis misit.

Hoc classico multi ad arma spiritualia excitati sunt. Sed præstat audire clangorem ipsius tubæ, nempe Epistolæ, quæ inter Bernardinas est ordine CLXXXVII. cum hac inscriptione: *Ad Episcopos Senonas convocandos. Ex hoc sermo inter multos, & credimus ad vos pervenisse, quomodo videlicet apud Senonas in Octavis Pentecostes vocamur & provocamur ad litem pro defensione fidei: cum servum Dei non oporteat litigare, sed patientem esse ad omnes. Abstineo à sequentibus quæ Lector poterit reperire libro II. huius Operis. Parum erat nisi vitæ Dei à natura potius quàm ab arte ad facundiam instructus, Episcopos & Cardinales in Curia Romana residentes hoc galli cantu experrexisset alteri à Epistolâ, cui initium: Nulli dubium quin ad vos spectet tollere scandala de regno Dei, in qua hos aculeos contra Petrum districtos reperietis lib. II. pag. 270. Legite si placet librum, quem dicit Theologia, legite & alium quem dicunt Sententiarum eius, nec non & illum qui inscribitur, Scito te ipsum, & animadvertite quanta ibi sit vesca segetes sacrilegiorum & errorum. Pax sit rebus, cetera non apponam, quin potius liber exclamare,*

—tante ne animis celestibus ira?

Nam eodem tenore, imo fervore mittit per Nicolaum suum servum & nuntium ad Innocentium II. Epistolam, cuius initium: *Necesse est ut veniant scandala. Necesse est, sed non sua ve.* In qua post captatam in exordio benevolentiam, narrationem breviter contexit rerum apud Senonas coram Rege Ludovico VII. gestarum in confessu Episcoporum, Abbatum, & plurimorum Religiosorum ac Clericorum: Ex quibus inferre licet Abaelardum stantem non fuisse auditum: sed quædam cœpisse legi, quæ nolens audire, exierit, provocaveritque ad sanctam Sedem Apostolicam: quod non putat Bernardus ei licere, ad moveretque faces incendij, ut damnationem ab eo extorqueat: *Leonem, inquit, evasinus, sed incidimus in draconem.* pag. 274.

His non contentus, Capitula hæreseon colligit, quisquillas undique verrit ex schedis, lectionibus & scriptis, quæ partim Abaelardi erant, partim sub ejus nomine circumferebantur, & à malevolis etiam accepta ali-

qua, vir quidem sanctus, sed qui dum in carcere esset falli poterat, pro veris & compertis ad Innocentium misit: quæ etsi in Epistolis sub nomine Bernardi editis non reperiuntur, tamen quia in quodam MS. reperi, (ne quid dissimulem) bona fide transcribenda curavi: non quod putem tam perversæ mentis fuisse Abaelardum, aut quenquam alium, ut tam absurdis & impijs sententijs voluerit debacchari: sed ut quod magis absona & impia sunt illa dogmata; eo magis judicentur aliena, & multis parasangis distantia à mente & intellectu tam pij & benè morati Monachi, qui libros, ex quibus excerpta est major ac periculosior Articulorum pars numquam agnovit. Quod si ex veris eius dictatis quædam arguantur, oportuit ad verum eius sensum recurrere, & non contra eum verba decurtata retorquere. Nihil est enim, quod malè narrando haud possit depravari: & sæpè accidit ut si Doctor aliquis quæstionem aliquam problematicè & in utramque partem tractarit, malè feriat sciolus rationes dubitandi sumat pro rationibus decidendi: quod sæpè contigisse vidimus, & nuper ad Fontis-Bellaudi castrum in dissertatione coram Rege & celeberrimo Franciæ Procerum Conventu. Quis enim poterit non ridere, aut potius stomachari, si in Summa Theologiæ Angelici illius Thomæ Aquinatis quæst. 111. art. 1. hæc legerit: *Utrum Deus sit corpus: videtur quod sic. Corpus enim est quod habet trinam dimensionem. Sed sacra Scriptura eam attribuit Deo: dicitur enim Job xi. Excel-sior cælo est, profundior inferno, ergo Deus est corpus?* Si quis ista nobis obtruderet tanquam Thomæ doctrinam, nonne cælum terræ, & mare cælo misceret? cum conclusio eiusdem Doctoris, quæ impostor reticere voluerit, ex diametro pugnet. Est enim talis: *Cum Deus sit primum movens immotum, ac primum ens, & omnium nobilissimum, impossibile est corpus esse. Ad primum ergo dicendum est, quod sacra scriptura tradit nobis spiritualia & divina, sub similitudinibus corporaliū, &c.*

Veniamus igitur ad supradicta Capitula, quæ magnus ille D. Bernardus Claravall. Abbas misisse dicitur Innocentio II. Papæ, reperta, si credere fas est, partim in libro Theologiæ, partim in libro Sententiarum, partim in libro, cui titulus est, *Scito teipsum*: quos duos postremos libros Abaelardus negavit à se scriptos. De his erroribus detestandis quivis potest hoc usurpare: Heu cadit in quemquam tantum scelus!

Quod Pater sit plena potentia, Filius quædam potentia, Spiritus sanctus nulla potentia.

Quod Spiritus sanctus non sit de substantia Patris aut Filij.

Quod Christus non assumpsit carnem ut nos à iugo diaboli liberaret.

Quod nec Deus & homo, neque hac persona, quæ Christus est, sit tertia persona in Trinitate.

Quod liberum arbitrium per se sufficit ad aliquod bonum.

Quod ea solummodo possit Deus facere vel dimittere, vel eo modo tantum, vel eo tempore quo facit, & non alio.

Quod Deus nec possit nec debeat mala impedire.

Quod non contraximus culpam ex Adam, sed pænâ tantum.

Quod non peccaverunt qui Christum ignorantes crucifixerunt, & quod non culpa adscribendum est quidquid sit per ignorantiam.

Quod in Christo non fuerit Spiritus timoris Domini.

Quod potestas ligandi atque solvendi Apostolis tantum data sit, non successoribus.

Quod propter opera nec melior nec peior efficiatur homo.

Quod ad Patrem, qui ab animo non est, proprie vel specialiter attineat operatio non etiam sapientia & benignitas.

Quod diabolus immitat suggestiones per operationem lapidum vel herbarum.

Quod adventus in fine seculi possit attribui Patri.

Quod anima Christi per se non descendit ad inferos, sed per potentiam tantum.

Quod nec opus, nec voluntas, neque concupiscentia, neque delectatio cum movet eam, peccatum sit, nec debemus eam velle extinguere.

Non credo quenkum esse aquâ baptismatis ablutum, & pingui ut aiunt, Minerva mysterijs fidei imbutum, cui in mentem veniat tam absurdas enunciationes, tam à symbolis fidei alienas, tam horrendas defendere ac tueri. Neque puto nimis elaborandum esse ut hæc opinio minuatur: cum abaelardi vita piè & in timore Dei transacta nullum dogma redoleat nisi sanctum, cum sacræ Scripturæ, Patrumque interpretationibus congruū & conveniens: si verum est quod fides ostendatur, ac se prodat ex operibus: cum ipse sibi debellandas hereses singulari certamine sumpserit: cumque si qua fortè secus dicta in libro Theologiæ eius reperiuntur, publica fidei Confessione à se edita retractaverit, vel virtute rationis, vel auctoritate Scripturæ correctus.

Sequitur Epistola alia eiusdem D. Bernardi ad eundem Pontificem Innocentium, eiusdem argumenti cum præcedentibus (nisi quod in accusando & disputando prolixior est) cuius initium: *Oportet ad vestrum referri Apostolatium. Habetis, inquit, in Francia novum de Magistro Theologum, qui ab ineunte ætate sua, in Dialectica lusi: nunc in Scripturis sacris insanit. Qui dum omnium quæ sunt in cælo sursum, & quæ in terra deorsum nihil præter se solum nescio quid nescire dignatur, ponit in calo os suum. Cætera quia nihil aliud continent, quàm quæ in suprâ scriptis Articulis recitantur, malo æquus & curiosus Lector requirat ex ipsa Epistola bene longa & erudita: quam qui totam legerit, definitivam non ferat sententiam, nisi prius brevi responsione perlecta.*

*Qui enim statuit parte inaudita altera,
Æquum licet statuerit, haud æquus fuit.*

Nec contentus fuit egregius Cænobiarcha sub persona sua iustæ magnitudinis Libellum edidisse, in eumque stilum cum tot tantisque aculeis tamque acerbis strinxisse, nisi Samsonem Archiepiscopum Rhemensem, & tres ex eius Suffraganeis excitarer, tanquam ad commune restringendum incendium Dictavit enim Epistolas sub eiusdem nomine ad Papam, ut per eas maioris ponderis esset accusatio. Adduntur appendicis loco duæ commendatitiæ: altera ad Cardinalem Vidum de Castello, qui Petrum in Theologicis audierat, & postea electus in Papam Cælestini nomen assumptum: altera ad Yuonem etiam Cardinalem, quæ est eiusdem argumenti. In pñore obiectat semper libellum illum *πρόθεσμον*, quem pernegab

vit Petrus à se scriptum. Hoc tanto criminationis hiatu magni ille nominis accusator omnia quæ rei poterant esse auxilia præoccupavit. At quas deinde probationes subiicit? nullas, aut penè nullas: brevia enim sunt Epistolia. Quæ ergo dixit verbo tenus, Scaurus verbo negat. Nam si accusare sufficeret, quis vnquam erit innocens? Tritum etiam illud: Vt vit vnus, vit nullus; ita testis vnus, testis nullus. Quòd si quis quæsierit, quis tam crebrarum scriptionum, tantique laboris spontanei fructus & profectus? Duplex sane: nam Innocentius Christi Vicarius, summus de Fide arbiter, cui nemo Orthodoxorum refragari, ac ne quidem mutire audeat, Rescripto suo Dogmarum ad se missorum Capita, quæ Petro Abaelardo adscribebantur, non tamen ipsam Petri personam hæreseos damnavit de plano, & nondum parte altera audita, quæ si Romæ iudicio se sustens ad diluendas objectiones aliquot horas aut dieculas, aut comperendinationes habuisset, fortasse aliud erat alea recasura. At accusatores potentissimi, tanquam albis equis triumphantes, lætum Præna cantarunt, victoriamque suam toto orbe disseminarunt: Ita vt miser ille inauditus apud probos quamplurimos male audiret, & eius exemplaria, quæ Galliam, Italiamque splendore collustrarent, tanquam horrendi criminis carmina, vel voracibus rogis cremanda traderentur, vel in situ, squalore, & cinere veterum Bibliothecarum latitantia putrescerent: nec iam Trifoni, ceterisque Librarijs, veris suis medicis curanda mādarentur: periissentque stirpitus, nisi bono aliquo genio & divino impulsu ad ea conquirenda, è pulvere eruenda, emendanda, publicanda fuisset excitati, eorum præsertim testimonijs, quos benè de illis sensisse & scripsisse, variaque eius scripta in delicijs & admiratione habuisse infra ostendemus. Quorum vna eademque vox extitit, non fuisse eam mentem Abaelardi, vt aliquid scriberet contra fidem receptam Ecclesiæ: quòd si quidpiam tale irrepsisset, credendum aliunde provenisse, aut forte à culpa Libratorum, neque Lectorem vbi plura nitet in Opere, paucis offendi debere maculis,

— *quas aut incuria fudit,
Aut humana parum cavit natura.*

Siquidem neque multiplex bonum exiguo malo, neque vtile inutiles vitatur.

*Et mala sunt vicina bonis, errore sub ipso
Pro vitiis virtus crimina sæpe tulit.*

Nec eo deveniendum est temeritatis, vt hunc nunquam errasse audeamus asserere; sed si quid ab eo sit erratum, id non heretica pravitate (sola enim pertinacia Ecclesiasticæ doctrinæ & auctoritati resistens hereticum facit) sed humanæ naturæ imbecillitate, aut forsan nimis ingenij viribus admisisse, culpamque si qua erat resarcisse, vt se posset tueri *ll. xii. Tab.*
SANATIBVS IDEM IVRIS, QVOD FORTIBVS.

Interea placet D. Bernardo forti bellatori, quasi succenturiatos proferre aliquos Scriptores illorum & subsequenitium temporum, qui eius sententiæ sunt adstipulati, tanquam si ex eius ore aut scriptione penderent: ne quis eos me vel nescisse, vel putet silentio tegere voluisse. Familiam itaque ducat Godofredus Claraualensis Monachus vitæ Bernardicæ

Scriptor luculentissimus, famæque Præceptoris propugnator acerrimus, cuius hæc sunt verba lib. III. cap. v.

Fuit in diebus illis Petrus Abailardus Magister insignis, & celeberrimus in opinione scientiæ, sed de fide perfide dogmatizans. Cuius cum blasphemias plena gravissimis volitare undique scripta cœpissent, profanas novitates vocum & sensuum viri eruditi arque fideles ad Dei hominem, S Bernardum, detulerunt: qui nimirum solita bonitate & benignitate desiderans errorem corrigi, hominem non confundi, secreta illum admonitione convenit. Cum quo etiam tam modestè tamque rationabiliter egit, ut ille quoque compunctus ad ipsius arbitrium correcturum se promitteret universa. Cæterum cum recessisset ab eo Petrus idem, consiliis stimulatus iniquis, & ingenij sui virib. plurimòque exercitio disputandi infelicitè fides, resiliit à proposito saniori. Expetens denique Senonensem Metropolitani, quod in eius Ecclesia celebrandum foret in proximo grande Concilium, Clarævallensem causatur Abbatem suis in occulto detrahare libris. Addit quoque paratum se esse in publico sua defendere scripta, rogans ut prædictus Abbas dicturus si quid haberet ad Concilium vocaretur. Factum est ut postulavit Sed vocatus Abbas venire penitus recusavit, suum hoc non esse renunciens. Postea tamen magnorum virorum monitis flexus, ne videlicet ex ipsius absentia scandalum populo, & cornua crescerent aduersario, demum pergere acquieuit, tristis quidem, nec sine lacrimis annuēs, sicut in Epistola ad Papam Innocentium ipse testatur, in qua plenius lucidiusque negotium omne prosequitur. Affuit dies, & Ecclesia copiosa convenit, ubi à Dei famulo Petri illius in medium scripta prolata sunt, & erroris capitula designata. Demum illi optio data est aut sua esse negadi, aut errorem humiliter corrigedi, aut respondendi si posset obijciendis sibi rationibus pariter & sanctorum testimoniis Patrum. At ille nec volens resipiscere, nec valens resistere sapientiæ & spiritui qui loquebatur; ut tempus redimeret, sedem Apostolicam appellavit. Sed & postea ab egregio illo Catholice fidei aduocato monitus, vel iam sciens in personam suam nihil agendum, responderet tam liberè quàm securè, audiendus tantum, & ferendus in omni patientia, non sententia aliqua feriendus: hoc quoque omnibus modis recusavit. Nam & confessus est postea suis, ut aiunt, quod ea hora maxima quadè ex parte memoria eius turbata fuerit, ratio caligaverit, & interior fugerit sensus. Nihilominus tamen Ecclesia quæ convenerat dimisit hominē, multavit abominationem, à persona abstinens, sed dogmata prava condemnans. Quando verò Petrus ille refugium inveniret in sede Petri tam longè dissidens à fide Petri? Et ipsum ergo auctorem eadem sententia cum erroribus suis Apostolicus Præsul inuoluens, scripta incendio, scriptorem silentio condemnavit.

Quod si interrogetur Abaelardus, Quid ad hæc? Respondebit fortasse, Nolo hunc, reprobo hunc, domesticus est.

Secunda acie procedit nulli secundus, qui tamen à præcedentibus quam scribit desumit, Vincentius ille Bellovacensis in Speculo Historiali lib. xxvii. cap. xiii. ubi sic ait: *Eo tempore fuit Petrus Abaelardus, Magister insignis celeberrimus in opinione scientiæ, sed de fide perfide dogmatizans. Huius scripta*

incendio, & scriptorem silentio condemnauit Innocentius Papa. Capitula in libris eius reprehensibilia annotauit B. Bernardus in Epist.

Vincentium per omnia sequutus Antonius Floretus diui Bernardi vitam & miracula multis sigillatim prosequutus: & paucis mutatis, demptis, vel additis eadem transcribuntur in Chronico Hirsaugiensi, in continuatione Sigeberti, apud Anton. Sabellicum Ennead. IX. & Bergom. & B. Platinam. Nihil moror proletarios istos neotericos Annalium sarcinatores, præsertim manu scriptos, qui omnes in eodem ludo edocti ex ijsdem explicati sunt lacunis trichias in sua Chronica relatas, ijsdemque verbis: ut iam nonnisi vnus testis loco sint habendi, non quidem oculati, sed tantum auriti, atque idè eadem exceptione perpetua submovendi.

Hinc colligere licet quàm variij varia. Nam noster post appellationem à conventu Senonensi interjectam, se itineri accinxit Romano, ut ad pedum Apostolicorū oscula admitteretur, sed præuentus est reconciliatione & benedictione, permissusque cum pace in Cluniacensi Cœnobio manere, vbi cum Petro Venerabili mansit, Scholasticæ cathedræ præfectus, primo post Abbatem loco sedere iussus: in humilitate tamen præcipuus silentij observator, nisi cùm aut Scripturas interpretari, aut concionari iubebatur, ut ex Epistolis eiusdem Petri infra patebit: tandemque ingravescente ægitudine & morbo, Cabilonum ad S. Marcelli Martyris missus, piam animam Deo reddidit.

Aventinus Rozelinum & Abaelardum novi Lycæi conditores fuisse ait: qui scientiam vocum siue dictionum instituerunt, novam filosofandi viam invenerunt, ijs auctoribus duo Peripateticorum genera esse cœperunt, vnum illud verus, locuples in rebus procreandis, quod scientiam rerum sibi vendicat, quam obrem sectatores Reales vocantur: alterum novum quod eam ad nomina trahit, Nominales idè isti nuncupati, quod avari rerum, prodigi nominum atque notionum, verborum videntur esse assertores. Hæc ex eius VI. Annal. quæ Vignerius in sua Bibliot. Histor. transcripsit.

Ioannes Monachus S. Victoris prope & extra Mœnia Lutetiana: Senonis, inquit, contra Petrum Abaelardum iussu Regis Ludovici facta est congregatio Episcoporum & Abbatum totius regni: qui quadam profana reborum & sensuum novitate in Ecclesiâ scandalum generabat. Igitur præsentis Ludovico Rege & B. Bernardo est interrogatus de multis, & cùm esset responsurus, de iustitia & veritate timens, Sedis Apostolicæ audientiam appellavit. Vnde sic e vadens non multo post Cabilone apud S. Marcellum obiit. Hic in Comitatu Campania fundavit Ecclesiâ Conventualem Sanctimonialium de Paraclete. Hic autem Petrus Magister subtilis & famosus, & celeberrimus in opinione scientia, sed de fide perfide dogmatizans. Huius scripta incendio, & scriptorem silentio Papa Innocentius condemnavit. Capitula in libris eius reprehensibilia annotauit S. Bernardus in Epistola, quæ de ipso scripta ad Innocentium Papam. Libri tamen eius à multis habentur. Ego ipse, inquit Helinandus, multa in eis reprehensibilia inveni.

Huius Petri aliquando fuerat discipulus Gaufridus Autissiodorensis, qui multo tempore fuit Notarius S. Bernardi, &c. Et quia meminit Helinandi, dicam obire eum fuisse Picardum Belgam, Poëtam Gallicum sui temporis subtilissimum,

lissimum, qui elegantem Tractatum De morte richmis vernaculis panxit, tandemque pertæsus vanitatis huius seculi, elegit vitam solitariam in Cœnobio Frigidi-montis Ordinis Cisterciensis sub Episcopo Bellovacensi, huic & Siluaneſſenſi, vicinis suis carissimus. Plura de eo reperies apud Trithemium in catalogo Benedictinæ gentis & familiarum sub ea.

De Trithemio injecta mentio elicit à nobis excerpta ex eius libro de Scriptor. Eccleſ. Petrus, inquit, Dialecticos Parisiensis, dictus Abaelardus, natione Gallus, vir in seculari filosofia eruditissimus, & in divinis scripturis nobiliter doctus, gaudens noſſe terminorum, & altiora se scrutari tentans, oppressus à gloria in plures incidit errores, & agense sancto Abbate Bernardo in Senonensi Concilio cum prædis suis doctrinis condemnatus. Ab hoc tempore filosofia secularis sacram Theologiam sua curiositate inutili sedare cœpit. Scripsit autem Petrus iste nonnulla Opuscula, quibus si errores non miscuisset, utilitati posteritatis profuisse poterant. Ex quibus extat Volumen Dialectica obscuritate subumbratum multis sententijs varium, quod prænotare voluit Theologiam suam lib. 1. & quadam alia. Clauit sub Conrado Imperatore III. anno Domini MCXL. Eadem totidem verbis Conradi duo, Gelnserus nempe, & Lycosthenes in Biblioth.

Ioannes Naclerus Volum. III. à Christo nato, generatione 39. Sub Innocentio condemnatur Petrus Abaelardus, ut refert in Speculo Vincentius, de quo ad Innocentium S. Bernardus, Habemus, inquit, in Francianoſum de Veteri Magiſtrum Theologum. Plura non adjungam quæ ipsemet Chronografus se à D. Bernardo & Gaufrido suprâ citato accepisse fatetur: eademque columna refert ingens miraculum, quod coram Conrado Imp. magnæque populi frequentia & concursu in Spirensi Basilica accidisse affirmat de D. Bernardo ter Virginem matrem salutante multis audientibus, & ab eadem semel resalutato.

Paulus Aemilius Veronenſis, Historicus Francorum clarissimus lib. v. in Ludovico Iuniore: Petrus Abaelardus Britannus, cœtus discipulorum frequentissimos habebat, qui omnium liberalium artium studia amulabantur. Ad eum undique concursus fiebat, nec ipse contentus erat sui seculi gloria, eruditioneque, de Deo religionēque Christiana differens, à cæteris Scholis sensibusque desceſcebat. In primis offendeſſe, quod in definitione sanctæ Fidei, contra ac sancti Patres tradidissent esse verabat, ita ut videretur falsam persuasionē, opinionemque ancipitem fide Theologica contineri censere, quod si reciperetur, de firmitate, certa que ac inexpugnabili sententia pietatis nostra actum foret. Vini vocum, quam disciplinam nominum vocitabat, ea ratione Theologicis studiis conjungebat, ut conceptione verborum Deum Opt. Maximum eundem & unum prædicans, re oppugnare refellereque videretur. In Senonibus Conuentus Gallicorum Patrum ad versus ejus placita habitus est. Coactus est ille scripta sua coram igni dare. Nec idcirco juvenis studia amittens ab eo defecit. Die rursus dicta, cum questio repeteretur, condemnareturque, Pontificem Max. appellavit. Is & sectam illam damnavit, & silentium homini indixit. Vignettus in Bibl. Histor. nil aliud de Abaelardo adfert, nisi quod ab alijs se accepisse fatetur, inter quos præcipuum Gilbertum Genebrardum, qui postea Archiepiscopus Aquensis fuit, laudat auctorem.

Bernardus Girardus Hallanus Burdegalenſis, qui Gallicanam Historiam Karol IX. iussu & sumptibus eleganter literis mandavit, hæc de nostro in

Ludouico Iuniore: *Armoricanus quidem, inquit, Abaelardus, aut Abbayelardus, Magister summus in Dialectica creditus, sui temporis doctissimus, quamplurimos habebat discipulos & affectas, qui pendebant eius ab ore, ut addiscerent liberales disciplinas, ad eumque omni ex parte fiebat concursus, & his non contentus penetravit in abdita Theologia, de Religione pertinaciter disputans, & nominum significatione abutens.* Et paulo post, *Damnatus in Prouinciali Synodo summum Pontificem appellatus, qui ei silentium imposuit.* Subjungit deinde Gallicarum rerum Scriptor totam de eius & Heloissæ amoribus narrationem, fugam, puerperium, nuptias: deinde ut illa apud Argentolium, ille apud S. Dionysium ad Sequanam tria vota emisserint: utque ille prope Novigentum Paracleti Cœnobium ædificauit, eique postea uxorem suam præfecerit, migraritque ipse ad patriam, præfuerit S. Gildasio Ruienti, eamque Abbatiam, ut tranquilliori vitæ genere frueretur ejurarit. Cujus quidem Conuentus Ruentis ipse Girardus nostra memoria fuit Abbas commendatarius, & me adolescentem senex inter amicos præcipuos habuit, Carmine meo Panegyrico laudatus;

Franciscus verò Belliforestus Convenas; item meus familiaris, Girardi coartancus & æmulus, quem etiam versibus celebravi in magnorum Annalium Operis bipartiti lib. III. Cap. XLVII. ut est copiosus & Asiaticus, ne dicam redundans, multa de hoc nostro ingerit partim comperta, partim etiam ignorata: Eum videlicet exquisita literarum humaniorum & Philosophiæ reconditoris cognitione tumidum, eò arrogantia progressum, ut ex suo, non Ecclesiæ sensu plurima ausus sit in sacris Scripturis pervertere, nova dogmata introducere, novam etiam & Christianis perniciosissimam de fato Stoicorum & Poetarum opinionem tueri. Alios errores, quos à B. Bernardo mucrone verbi divini transfossos recitat, prætereo, ne actum agere videar. Sed illud ratum habere non possum quod sub Pontificatu Lucij adstruit, eum coram Rege Ludovico, Cœcilioque Nationali palinodiam cecinisse, & errores agnovisse & abjurasse: quod quaecumque sub Innocentio accidisse satis superque probatum est. Hallucinatur etiã in eo quod dicit post illum vomitum transisse ad Monasticam vitam; cum ex supra scriptis constet, eum adhuc juvenem Ordini Benedictino nomen dedisse statim postquam canterius siue spado factus est. Quod si ita esset ut dicit, non idè vituperanda esset sera pœnitentia. Rectè Seneca,

Nam sera nunquam est ad bonos mores via:

Quem pœnitet peccasse, pene est innocens.

De Heloissæ uxore postmodum Abbatissa, candidè fatetur eam vitæ & mortis sanctitate fuisse insignem: sed perperam abutitur stylo & ingenio, cum reprehendit ultimam Epitaphij clausulam, quod fuerit gnauiter impudens & arrogans Abaelardus, qui omnia quæ sciri possent, sibi soli paruissime jactitaret. Quasi vero ipse sibi vivens Epitaphium condiderit, cujus Petrus Venerabilis se auctorem agnoscit, assiduus auditor doctissimarum eius Concionum, testis piæ eius conversationis & in Christo dormitionis.

Vltimum verò hoc non ferendum, quod cum Belli-forestus agnoscat eum Ecclesiæ reconciliatum, ex filio iræ in filium dilectionis transisse,

summo Pontifici acceptum, in Fidei constantissima professione animam Domino reddidisse: tamen comminiscitur ossa eius longo post tempore è monumento extracta, & igne incensa & consumpta fuisse. Huius nullum citat neque habet Auctorem opinionis, nisi forte Argentæum, quæ facillè Necrologio Paracletensi, & Epistolis Petri ipsius Mauriacensis refellere convinci potest, quibus testatur illum inter manus Cluniacensium Cabiloni animam exhalasse, eius cadaver ad S. Marcelli honesto sarcophago conditum, postea ad Heloissam remissum, quæ in fano seu Sacello Paracletensi virum suum humandum curavit, & ei postquam ipsa fato functa fuisset, comes individua mortis ut vitæ adiungi voluit. Visiturque hodie amborum tumulus communi titulo dedicatus in Oratorio Paracletico, cum dierum anniversariorum adnotatione, ad quorum recursum utriusque fundatori solvuntur parentalia, nempe in Doctoris memoriâ xi. Kal. Maias, qua die transivit ad Dominum anno vitæ climacterico lxxii. in memoriam verò Diaconissæ & verè matris pietissimæ xvi. Kal. Iunias.

Hactenus ad aquarum stillicidium productiore tempore vix circumscriptum accusandi modum mensi sumus, immò & patienter tulimus, *ἡ γὰρ τὴν τοῦ ἰσχυροῦ ἐκ χειρὸς αὐτοῦ ἐκίπτε*. Par erat, cum sint favorabiliores rei, tribus clepsydri quatuor addere, ut apud Plinium. Depulsiones tamen colligemus brevius quàm res tanta dici poterit, productis aliquot testibus, quibus hæc causâ fulcitur, & Abaelardus absolvitur: de quo quidem falsi sumus, cum hominem fuisse, labi, decipi, errare potuisse in quibusdam, non in omnibus, quæ illi imputantur: At non hæreticum propterea fuisse, qui sacram Ecclesiæ Hierarchiam semper agnoverit, summo Pontifici Dei Vicario se suæque vota submisserit, pœnitudinisque tam clara documenta dederit: quarum rerum citabo testeis quamplurimos præcedentibus doctrina & fide non inferiores. Nam D. Bernardum semper excipio nemini sanctitate comparandum, & sui seculi Fœnicem, qui cum nondum ex efebis excessisset, ex domo paterna in solitudinem Cisterciensem migravit cum xxx. sociis, inter mappalia & vepra delitescens, à nullo præterquam à Deo doctus est: ita ut *Θεοδιδασκός* crederetur, plus favoris in humilitate adeptus, quàm Salomon in omni gloria sua, ita omneis in sui admirationem, tum doctissimis Commentariis in obscurissima Scripturæ ænigmata, tum disertissimis Concionibus, profundique sensus Meditationibus, ad famam sui nominis, ad sui amorem & observantiam rapuit, ut ad eum totius Orbis vota concurrerent, ut ab eius monitis & exemplis tota res Monastica & Ecclesiastica pēdere visa sit, ut ab eius Oraculis Præfules, Principes, Populi consilium expeterent, cumque induciarum ac pacis arbitrum agnoscerent, & se eius orationibus omnes Ordines cupiverint esse commendatos. Quin in illa sui abnegatione, & eremi austeritate, multa diuinæ virtutis signa ac prodigia eo adhuc in terris degente refulserunt. Nam eius precibus meritisque puer per osculū sanatus, claudus erectus, paralyticus curatus, leprosi mundati, energumeni liberati, schismatici communioni sacræ restituti, plurima Cœnobîa erecta, septingentæ & eo plures animæ Deo lucrata. Multa quoque postea evenerunt, ab eo in spiritu profetico prævisa & prædicta, præsertim verò in felici illius dormi-

tionem. Quibus permotus Alexander III. Pontifex Max. vndecim ab excessu D. Bernardi annis cum in Sanctorum catalogum retulit, quod visitato Canonizare dicunt verbo, quia tales sancti disquisitione habita iudicantur ab Ecclesia digni, qui intra Canonem Romanum in consecratione recitari solitum redigantur: sicut & Iuriscōsulti aliquam Legem D. aut C. esse canonisatam notant, quæ per Gratianum Corpori Decretorum & Canonum fuerit inserta. Par est omneis Catholicos iudicio S. R. Ecclesiæ submitti: Sed hæc sanctitas, & ut ita dicam, canonizatio, quam amplector lubens, ejus suffragia apud Christum exposcens, non concludit necessario, ea omnia esse rata, quæ à D. Bernardo, dum in terris ageret, dicta, facta, disputata, scriptaq; sunt; sicut nec omnia Patrum venerandæ antiquitatis, utpote D. Hilarij. Qui cum fuerit Arriano-mastix, tamen ejus scripta suspensio gradu legenda monet D. Hieronymus. Duo enim dixit Hilarius, propugnator fidei Trinitatis, in quibus ab Ecclesia non auditur. Prius quod Christum nil doloris in passione sensisse putat: alterum quod nullum incorporeum sensit esse creatum. Cōtra quos errores gladium strinxit Claudianus Lugdunensis. Sed non ob hoc scientia sanctitasq; Doctoris Gallicani perdidit meritū Confessoris, cui mater bono filio indulgit. Augustinus & Hieronymus se mutuis moribus imperunt. Hic contra Iovinianum, ex his verbis, *Sanum est mulierem non tangere*, & ex his Apostoli, *κρείσσειν γαμήσι, ἢ πύποις*, inferre conatur malum esse mulierem tangere, & inhumanius de nuptijs disputat: contra quem Pammachius Senator mucronem intorquet. Et hæc damnata opinio est in Gangrensi Concilio. Ille Eucharistiam infantibus non minus necessariam quàm baptismum, cum Innocentio primo multis locis pronunciat: quod Ecclesiæ reprobat. Sed sufficit quod suis erroribus ipsemet sanctus vir non fauerit, qui ideo Retractionum libros secundas curas sapientiores vulgavit. Nec ipse quidem Angelicus Doctor D. Thomas Aquinas, cum omnes Philosophos & Theologos multis spatijs transcurreret, primusque è carceribus ad metam doctrinæ & sapientiæ pervenerit, vllum ex discipulis aut sectatoribus reperire potuit, qui ita jurare vellet in ejus verba, ut non eis contradici possit, ut non multa reperiantur in tam laboriosis voluminibus, quæ multi non probent: imò quæ neque à Nauarræo Collegio aut Sorbonico, nec ab ipsa quidem Prædicatorum Sodalitate, sub qua meruit, pro certis & compertis habeantur.

Pace igitur sancti Abbatis liceat dicere, quod de eo ausus est Annalibus mandare ejus discipulus Clarevallenensis quondam Monachus, demum Abbas Morimontanus, Otho Episcopus Frisingensis, Leopoldi Pij Marchionis Austriæ filius, Frederici I. Enobarbi, cujus vitam scripsit, patruus, qui quamvis Abbatem suum in magna habuerit veneratione, tamen scribit eum ex Religionis Christianæ fervore zelotypum, & ex habituali (sic enim loquitur) mansuetudine quodāmodo credulum, ut Magistros, qui humanis rationibus & seculari sapientiæ confidenter nimium inhærebant, abhorreret; & de talibus sinistrū quid recitari facile aurē præberet, juxta illud Festi, τὰ πολλὰ χεῖματα εἰς μακίαν μετέσπει. Quo fieri potuit, ut sibi in animū induxerit, quædam esse dicta aut scripta ab Abaelardo quæ non essent, aut quæ in pejorē partē accipi nō deberent. En Teucer noster sub Ajacis clypeo

septēplici testus. Sed & protectores alij nō desunt, inter quos familiā ducit Petrus ille Moritius, aliās Mauriacenus IX. Abbas Cluniaci, qui apud suos sancti nomen adeptus, tamen in Martyrologio Romano Venerabilis cognomento contentus fuit. Hic est ille, quem cum toto Ordine suo non dubitavit D. Bernardus cestro suæ iracundię pungere, ut videre licet in ejus Epistola i. in qua ob nepotem ex fratre, ab se & à Claravalle abductum, & Cluniacensibus mancipatum, quosdam ex iis ait venisse in vestimentis ovium, intus autem fuisse lupos rapaces.

Huius ergo magni Patris & Doctoris testimonium cum Othone conjunctum, si non majori, at certè parilance ad libram Critolai exploratum stabit. Tritum illud, Papinianus vincit singulos, sed vincitur à duobus: præsertim cū hic messem in falcem alienam iniecisse videri possit. Non enim noster Benedictinus, qui Abbatiali annulo consecratus erat, ditiori Cisterciensium vlllo modo subjacebat, non imminebat Ægyna Pyræo, cū bonus ille Burgundio in extremis Campaniæ finibus ad Albam fluvium gregi suo, noster verò ad tractum Oceani Aremorici suo itidem præsetter; nec par in parem, Abbas in Cœnobiarcham vlllum haberet imperium, nec aliunde Britoni nostro creatum esset periculum, nisi ex magna potius quàm ex mala fama. Quod si D. Bernardus Ecclesiasticus nihil Ecclesiastici à se alienum putavit: si huic nostro fuit resistendum in faciem, quia reprehensibilis videbatur: certè exercendum erat judicium illud Divinationis apud Romanos vñtatum, de idoneo accusatore deligendo, dandusque actor selectus è Turonensi, non è Provincia Senonensi, multo etiam minus ex Provincia Lugdunensi. Nam Claravallis Lingonibus adjacet & subjacet, qui sunt sub dirione Archiepiscopali Primatis Lugdunensis, quem idèd majores nostri excelsiore loco supra Celtrarum Præfules collocarunt, quod Lugdunum Munatij sub Augustis Romanis fuisset sedes Præfecti Prætorio Galliarum, situ & aditu opportuna Gallis, Hispanis, Britannis: quæ dignitas etiamnum hodie viget in Primatu Lugdunensi per Senonensem, Tyronicam, & rothomagensem Provinciam, exclusis & exemptis Rhemis seu Belgis. Nec tamen id fuit perpetuum. Nam sub Karolo Magno, eiusque filio, & nepotibus, Senonensis, titulo Primatis Galliarum & Germaniarum erat conspicuus.

Demus hoc tamen ferventissimo zelo, & insigni probitati sancti Patris, qui cū esset Prælatus in Ecclesia Dei, tertiusque in illa numerosa sobole Archimandritarum Cisterciensium, sæpissimè ad Aulas Regum & Principum consilij causa evocatus, quique inter præclaras peregrinationes, quas religionis ergo susceperat, hoc confecerat apud Vvillelmum Aquitaniz ducem, Pictaviæ Comitem, ut ab Anacleti Antipapæ conspiratione nefaria, eum ad veri Patrum Patris obedientiam, & ad pœnitentiam reduceret: Demus, inquam, ut ei licuerit legatione pro Christo hac in parte fungi. Demus etiam, ut tacentibus Canibus ad custodiam gregis deputatus, & latrare non valentibus, illi fuerit licitum clangore suo Capitolij custodes evocare & expergiscere. Illud sane laudibus prædicandum, quod Abaelardi neque flumen aureum dicendi, neque fulmen linguæ reformidavit, quod excelsso & infracto animo post Arnoldum de Brixia & Petrum

Brusium, confutatos Gilbertum Porretanum Pictonem Episcopum à suis Archidiaconis delatum, qui nova quædam de fide Trinitatis interserere crederetur, ad examen vocavit, anathema etiam illi intentaturus coram Eugenio III. P. Lutetiz tunc sedente, qui pro sua suprema potestate rem totam ad suum Rhemense Concilium remisit, prout idem Otho recitat aliquot Capitibus libri 1. de gestis Friderici.

Fuit, fuit hic catulus, quem cum mater Aletha vxor Tesselini in utero gestaret, somnio vidit prælagium futuri partus, Catellum scilicet se parituram totum candidum, in dorso subrufum & clarè latrantem. Cui de illo terriculamento anxie & sciscitanti respondit Religiosus quidam vaticinij spiramine afflitus: Optimi catuli mater eris, qui Domus Dei custos futurus, validos pro ea contra inimicos fidei editurus est latratus. Hæc Vvillermus lib. 1. eius vitæ. Firmavit vaticinium eventus: nec enim vlli pepercit, ne quidem Patribus & Proceribus, qui in Curia Romana rerum potiebantur, neque minima assentatiuncula cuiusvis præpotentis favorem voluit aucupari. Nec tamen illi fibra cornea fuit, neque odium cum vlllo Vatinianum, neque simulates diuturnæ, cum sciret indulgendum quidem iræ brevi, sed non peccandum, habendumque stimulum iræ tantum pro cote fortitudinis Christianæ.

Ira fci facilis, tamen vt placabilis esset.

Passus est enim, vt ille Romanus dictator, Petrum hunc, & illum Gilbertum propter Deum redire secum in gratiam, & veniam errorum humanorum deprecatos, Ecclesiasticæ communioni vnde dejecti fuerant, velut ex Prætoris edicto restitui. Sapienter Maximus ille Augustinus: *Ecclesia*, inquit, *Catholica materno sinu recepit quamplurimos ex filiis, tanquam Petrum post fletum negationis & gallicinium admonitum, aut tanquam eundem post pravam simulationem Pauli voce correctum.* Et alibi: *Petrus præficitur postquam sentatus est, quod Petrus negavit, profuit, quia emenda vit.* Et D. Ambrosius: *Etiâ Sanctorum lapsus utilis est, nec nocuis labecula aspergi.* Vsq; aded in rebus humanis nihil est tam purum, tam sanctum, tam firmum, quod non aliquando possit inquinari, labefactari, aut convelli, nisi Dei Opr. Max. providentia, quæ suis temporibus nunquam non adest, milites strenuos & in acie principes, è diverticulis in veram viam per Spiritum sanctum subito revocaret, reduceret, & retraheret. Vtenim Adamantium illum Origenem taceam, qui vt Ethiopis turpitudinem, quam ipse non facturus, sed perpessus erat, evitaret, thura idolis adolevit, pusillanimitatemque illam longis lachrimarum decursibus lavit: Quam multa in ejus scriptis aureis absona, & absurda reperiuntur, quæ tamen leguntur & retinentur: Quamvis de illo hoc jactetur: *Vbi Origenes malè, nemo pejor: Vbi bene, nemo melius.* Sic Basilius Episcopus, Græcanicæ Ecclesiæ Doctor, tot Monachorum per Orientem Pater, ne suis quidem per omnia probatus est. Tertullianus verò cum verè Florens de hæreticis innumeros triumphos reportasset, nonne in Catafrygum hæresim vergente iam ætatis vespere prolapsus, multas venenatas & pestíferas herbas, sicut de Ægypto cecinit Homerus, salutaribus animæ medicamentis miscuit? De Marcellino Papa & Martyre quid agnoscet dicere, nisi quodd Deus permisit illum crebris passionibus deterri,

rum, ad tempus cadere, & ad horam titubare, sed non confringi: qui post transgressionem convocatis fratribus Coëpiscopis, in seipsum sententiam tulit depositionis? Quid attinet etiam memorare Hosium & Luciferium, qui suis lapsibus documenta dederunt fragilitatis, humanæ & arcani imperscrutabilis?

Frustra esset, si in hoc argumento diutius vellem immorari, cum ipse Liberius Petri Sedis successor & infirmitatis, in hoc illū imitatus sit, quod circa sui Pontificatus initia Legatos suos contra Athanasium Alexādrinū miserit, & eum tanquam iudiciū detrectantem condemnarit, ei que tot sententiis absoluto, communione sacra interdixerit. Quin & postea Epistolæ Sirinio à synodo ad Orientaleis missæ, & radio exilij, suæque Sedis recuperandæ præfractō desiderio subscripsit, quo nomine Hilarius æstu fidei abreptus illj anathema impingere voluit. Nōne Ursatio & Valente instantibus sub Constantio A. coactum est Ariminense pseudo-Concilium, contra Nicæni Tractatus formellam, & trecentorum octodecim Episcoporum decretum, *ὅτις ὁ ὁμολογῶν*, itavt totus orbis ingemuerit, & se fere Arianum, vt cum Hieronymo loquar, sit demiratus, nisi fides Nicæna reparata & rursus stabilita fuisset, mundusque à Sathanæ faucibus ereptus per illum eundemque Liberium, qui ad meliorem mentem reversus, egregiam operam deinceps navavit, pristinae & orthodoxæ fidei restaurandæ, stabiliendæ, conservandæ, per se & per illōs R. P. Christianæ Trium-viros Athanasium Alexādrinum, Hilarium Pictaviensem, & Eusebium Vercellensem ab exilio reversos, *μαρτυροῦν τῶν ἁγίων διονόχους*. Nec vnum aut alterum, sed plures in apice Catholicæ Ecclesiæ sessitantes permisit Deus in via virtutum ad tempus errare, vt illi meliores redditī discerent veri Patres nec peccantibus filijs superbè insultare, vel reverti cupientib. non difficile ignoscere.

Sed vt ad nostrum Abaelardum redeamus, immensas Deo agere gratias debemus, nec vnquam intermorituras, quod propter illas Senonensis tempestates turbasque vndique exortas, & invocationem Tribunalis Apostolici, non est valde neque diu peticlitata D. Petri Nauicula, quæ serenam tranquillitatem cito per pœnitudinem Abaelardi recepit, Deusque secundum præscientiam seculorum, omnia vt inquit Hermas Pastor, etiam si quæ pessima essent vertit in bonum. Quod vt facilius innotescat, precor vos qui testimonia in Abaelardum audistis, audiatis etiam auctoritates elogiorum, & iudicia benevolentia virorum summorum illius & sequentis seculi, pro eius emendatione, purgatione, vel innocentia. Præcedat agmen totius depulsionis princeps ille Otho Frisingæ Præsul, quondam Cisterciensis instituti, qui quamvis Imperatoriam genesim haberet, primos annos adolescentiæ egit sub ferula D Bernardi; & Othoni succenturiatus accedat P. Mauricius Abbas verè venerandus. Verba igitur Othonis ex 1. Hist. de gestis Friderici I. A. cap. XLVII. XLVIII. XLIX. hîc transferenda curavi, vt in illis plus sit ponderis.

CAP. XLVII. *Erat autem Bernardus Claraualensis Abbas, tam ex Christianæ religionis fernore zelotypus, quam ex habitualis mansuetudine quodammodo credulus; vt & Magistros qui humanis rationibus, seculari sapientia confisi,*

nimum inherebant, abhorreret, & si quicquam ei Christiane fidei absonum de talibus diceretur, facile aurem praberet. Ex quo factum est, ut non multo ante hos dies, ipso auctore, primò ab Episcopis Gallie, post à Romano Pontifice PETRO ABAELARDO silentium impositum fuerit. Petrus istæ ex ea Gallie Provincia, quæ nunc ab incolis Britannia dicitur, originem trahens: (est enim prædicta terra Clericorum acuta ingenia & artibus applicata habentium, sed ad alia negotia penè stolidorum ferax, quales fuerunt duo fratres Bernardus & Theodoricus viri doctissimi), is, inquam, litterarum studiis, aliisque facilius ab incunte ætate deditus fuit, sed tam arrogans, suoque tantum ingenio confidens, ut vix ad audiendos Magistros ab altitudine mentis suæ humiliatus descenderet. Habuit tamen primò præceptorem Rozelinum quendam, qui primus nostris temporibus in Logica sententiam vocum instituit: & post ad grauissimos viros Anselmum Laudunensem¹, Guilhelmum Campellensem Catalauni Episcopum migrans, ipsorumque dictorum pondus, tanquam subtilitatis acumine vacuum iudicans, non diu sustinuit. Inde Magistrum induens Pharrisso venit, plurimum in inuentionum subtilitate non solum ad Philosophiam necessariarum, sed & pro commouendu ad iocos animis hominum vilius valens. Vbi occasione quadam satis nota non benè tractatus Monachus in Monasterio S. Dionysij effectus est. Ibi diu nocturnæ lectioni ac meditationi incubans, de acuto acutior, de literato efficitur literatior: intantum ut post aliquod tempus ab obedientia Abbatis sui solutus ad publicum prodiret, docendique rursus officium assumeret. Sententiam ergo vocum seu nominum in naturali tenens facultate, non cautè Theologia admiscuit. Quare de sancta Trinitate docens & scribens, tres personas, quas sancta Ecclesia non vacua nomina tantum, sed res distinctas, suisque proprietatibus discretas, hætenus & piè credidit, & fideliter docuit, nimis attenuans, non bonis vsus exemplis, inter cetera dixit: Sicut eadem oratio est propositio, assumptio, & conclusio: ita eadem essentia est Pater, & Filius, & Spiritus sanctus. Ob hoc Suebionis Provinciali contra eum Synodo sub præsentia Romane Sedis legati congregata, ab egregijs viris, & nominatis Magistris, Alberico Remense, & Leutaldo Nouariense, Sabellianus hereticus iudicatus, Libros quos ediderat propria manu ab Episcopis igni dare coactus est: nulla sibi respondendi facultate, eo quod disceptandi in eo peritia ab omnibus suspecta haberetur, concessa. Hæc sub Lodovico seniore Francorum Rege facta sunt.

CAP. XLVIII. Post hæc, dum rursus pluribus diebus legeret, maximamque post se sociorum multitudinem traheret, sedente in vrbe Roma Innocentio, in Francia verò Lodovico superioris Lodovici filio regnante, ab Episcopis Abbasque Bernardo denuò ad audientiam apud Senonas evocatur, præsentibus Lodovico rege Theobaldoque Palatino Comite, & aliis Nobilibus, de populoque innumeris. Vbi dum de fide sua discuteretur, seditionem populi timens, Apostolica Sedis præsentiam appellavit. Episcopi verò, simul & Abbas, missa ad Romanam Ecclesiam legatione, ac eis pro quibus impetebatur Capitulis, damnationis eius sententiam in litteris reportaverunt, quarum exemplar hoc est, Reuerendissimo Domino & dilectissimo Patri, Dei gratia summo Pontifici Innocentio, &c. vide integras infra, pag. 296. Rescriptum verò Innocentij tale, Innocentius Episcopus servus servorum Dei, venerabilibus fratribus Henrico Senonensi, Rainaldo Remensi Archiepiscopis, &c. integrum quoque require postea pag. 299.

CAP. XLIX. Petrus damnationem sui dogmatis à Romana Ecclesia confirmatam

matam cognoscens, ad Cluniacense Canobium se contulit, Apologeticum scribens, praeceptorum Capitulorum partim verba, ex toto autem sensum negans.

En Abaelardus ex ingenio & doctrina filosofica à laudato viro laudatus, en ille Alexander inter doctos ab Apelle & Lisippo pictus & fictus, cum suis etiam nãvis: Habemus enim Abbatis Cluniacensis treis Epistolas eius Operibus insertas, quæ Opera maximam partem absolvunt operosi Voluminis Bibliothecæ Cluniacenz, nuper à viro docto Andrea Quercetano collectæ & editæ, à quo etiam me adjutum in conferendis, emendandis & edendis his exemplaribus non diffiteor. Eas Epistolas quia Lector inf. fol. 335. & seqq. facile reperiet, nō in illis immorabor: sed tantum digitos ad fontes intendam. In prima siquidem, quæ est ad Innocentium II P. ait Abaelardum, quem Magistrum Petrum vocat, gravatum vexationibus quorundam, qui illi nomen hæretici, quod valde abominabatur, imponere volebant, Majestatem Apostolicam appellasse. Abbatem Cisterciensem de pace inter ipsum & Clarævallensem egisse, eos esse collocutos sancita per mutuos & fraternos amplexus amicitia, tractatum inter eos, ut postmodum si quæ Catholicas aureis offendentia in scriptis eius reperirentur, obducta spongia abraderentur. Quod est factum. Ipseque Magister à Deo inspiratus, relictis Scholarum tumultibus, in Cluniaco perpetuam mansionem sibi sponte elegit. Rogat itaque tam ex parte Petri & Cluniacensium fratrum, quam ex sua, ut reliquos dies senectutis suæ liceat illi in Cluniaco consummare, & ut scuto Apostolicæ defensionis protegatur.

Alterâ Epistolâ ad Heloissam Abbas in encomio sapientissimæ Diacônissæ aliquot paginas absūmit, & in enumeratione eius virtutum insignium, immoraturque in explicatione aliquot vocum linguæ sanctæ, quam ut Græcam & Romanam illi feminæ primariæ notissimas esse non diffiteatur: sed ita eam laudat, ut facile quivis prospicere possit, non velle eam palpo insciam percutere, sed ut illam ostendat fuisse dignissimam connubio semper cum honore nominandi Abaelardi, verè Christiani Philosophi, quem credit à divina dispositione transmissum ad ædes Cluniacas, ut eas in ipso, & de ipso, super omne aurum & topazium munere cariore ditaret. Asserit enim numquam ei visum similem in humilitatis habitu & gestu: *Intantum ut nec B. Germanus abjectior, nec ipse B. Martinus pauperior appareret.* Et paulo post. *Lectio ei erat continua, oratio ad Deum frequens, silentium jure, nisi aut fratrum familiaris collocutio, aut ad ipsos de divinis publicis sermo cum loqui urgeret. Sacramenta celestia, immortalis agni sacrificium Deo offerendo prout poterat frequentabat. Imò postquam literis & labore meo Apostolica gratia redditus est, penè consuevit. Et quid multa? mens ejus, lingua ejus, opus ejus semper divina, semper filosofica, semper eruditiora meditabatur, docebat, fatebatur. Tali nobiscum vir simplex, rectus, timens Deum, & recedens à malo, conversatione, ultimos dies vitæ cōsecrauit Deo. Quia corporis incommoditatibus gravabatur, Cabilonum à me missus est. Ibi libris semper incumbere, & sicut de Gregorio legitur, momentum vllum non sinebat præterire, quin semper aut oraret, aut legeret, aut scriberet, aut dictaret. In his sacrorum operum exercitijs eum ad ventus illius Evangelici Visitatoris reperit. Attulit ille secum lampadem plenam oleo, h. conscientiam refertam sanctæ vitæ testimonio. Tunc verò quàm sancte, quàm devote, quàm Catholice primo fidei, de-*

hinc peccatorum confessionem fecerit, quanto inbians cordis affectu viaticum peregrinationis, ac vitæ æternæ pignus corpus scilicet Redemptoris Domini acceperit, quam fideliter corpus suum & animam heic & in æternum ipsi commendaverit, testes sunt religiosi Fratres, & totus illius Monasterij, in quo corpus S. Marcelli Martyris jacet, conventus. Hoc Magister sine dies suos consummauit: qui singulari scientiæ magisterio toti pene orbi terrarum notus, & ubique famosus erat, in illius discipulatu, qui dixit: Discite à me, quia mitis sum & humilis corde; mitis & humilis perseverans ad ipsum, ut dignum est credere, sic transiit. In fine Epistolæ epistola amici sui subiungit.

Eat nunc, si quis tam gravi testi fidem derogare, si quis conceptam semel opinionem & frustra vulgatam de Petro velit retinere: eat, si quis à lectione Operum sacrorum tam Catholici Monachi velit studiosos arce-re. Sed quia de Martyre Marcello injecta mentio est, dicam obiter illum esse, qui brachijs manibusque ad quatuor arbores alligatus, recurrentibus sursum ramis in frustra discerptus pro Christo & membratim laniatus est: cui templum, quod nos venerati sumus, solo totius Burgundiæ amœnissimo Cabilone, prope urbem quidem, sed Arari interfluente est erectum, & magnis opibus ditatum, quod Cluniacenses Sodales possident: de quo Marcello & eius miraculis videndus est Gregorius Turonicus lib. 1. de gloria Martyrum.

Tertiâ Epistolâ Abbas pollicetur Heloissæ, facturum se ut Astralabio Abaelardo eius filio in aliqua nobilium Ecclesiarum de præbenda provideatur: qua de re etiam postea ad Papam scripsit. Mittitque Magistri absolutionem in Charta descriptam, & sigillis munitam, sub hac formula.

Ego Petrus Cluniacensis Abbas, qui Petrum Abaelardum in Monachum Cluniacensem recepi, & corpus eius furtim delatum Heloissæ Abbatisæ & Monialibus Paracleti concessi, auctoritate omnipotentis Dei & Sanctorum omnium, absolvo eum pro officio ab omnibus peccatis suis.

Quod si certissimum est in eo statu, in quo nos invenimur, i. morimur, in eo nos esse judicandos; quis est qui non speret, & in charitate non ficta confidat, Petrum nostrum post supradictam professionem & confessionem absolutum, in sinu Abrahamæ receptum, in extremis audita hac suavi voce, *ἐμπροσθεν μου ἵστασθαι τὸν ποταμὸν* Siquidem dictum est discipulis, Matth. 18. *Quacumque solveritis super terram, erunt soluta & in cælo.* Et Ioan. 20. *Quorum remiseritis, &c.* Et D. August. i. de doctrina Christiana: *Has claves dedit Ecclesiæ suæ Christus, ut quæ solveret in terra, soluta essent in cælo, quæ ligaret in terra ligata essent in cælo: scilicet ut quisquis crederet in Ecclesiâ, seque à peccatis correctus converteret, in Ecclesiâ gremio constitutus, tandem fide atque correctione salvaretur.*

Sed ne putemus unum è multis Venerabilem, sanctitatis epitheto Abaelardum decorasse, sunt & alij illorum temporum proximi, qui ad eius sanctitatis famam etiam miracula edita retulerunt. Proferam enim verba Chronici MS. Turonici: *Construxeras, inquit, Petrus Abaelardus Cænobium in territorio Trecaffensi, in prato quodam ubi legere solitus fuerat, quod Paracletum nominavit, in quo Sanctimoniales plurimas congregavit, & quandam religiosam feminam quandam uxorem suam, literis Latinis & Hebraicis eruditam eis Abbatis-*

ſam præfecit. Quæ verè ipſius amica, magnam ei poſt mortem in aſſiduis precibus fidem ſerva vit: corpusque eius de loco ubi ebierat, tranſtulit ad prædictum Canonicum, in cuius tumulo hoc Epitaphium eſt inſerum.

Eſt ſatis in titulo, Petrus hic jacet Abailardus.

Cui ſoli paruit ſcibile quicquid erat.

Hæc namque, ſicut dicitur, in ægritudine ultima poſita præcepit, ut mortua in ſuæ mariti tumulum poneretur. Et ſic eadem deſuncta ad tumulum apertum deportata, maritus eius, qui multis diebus ante eam deſunctus fuerat, elevatis brachijs illam recepit, & ita eam amplexatus brachia ſua ſtrinxit.

Libet hoc loco exclamare: O altitudo divitiarum ſcientiæ & ſapientiæ Dei! Ecce enim, qui cum iniquis quodammodo erat deputatus, poſt obitum miſericordiæ diviniæ ſigna dat manifeſta, ut ubi abundaverat forte delictum, abundaverit & gratia. Mirandum ſanè quod mortuam uxorem ad ſe venientem ipſe brachijs expansis ſuſceperit, dilectaque in vlnas ſuas receptâ, iſdem compreſſis, ſcæderis conjugalis non intermortui argumentum dederit: ſive hoc Deus artè pœnitentiæ tributum voluit, ut oſtenderet ſe à reſiſcentibus non abhorre: ſive hoc datum ſanctitati Heroinæ noſtræ, quam nemine penitus discrepante omneis prædicant fide, exemplo, & doctrina, omnibus ſui ſeculi feminis præluxiſſe, & inter beatas certò annumerandam. Simile quidpiam miraculi memini legiſſe apud Gregor. Turon. de duorum Amantium caſtitate & ſepultura, lib. 1. Hiſtor. Franc. & lib. de gloria Confefſorum: qui conjugati multos annos in vno ſtrato recumbentes vixerunt, cum virginitate mirabili; & cum virgo migraret prior ad Chriſtum, ſponſusque eam in ſcrobe reponeret, in hæc verba ſtupens erupit: *Gloriaſtibi, Domine æterne, ago, quia hunc theſaurum ſicut à te commendatum accepi, ita immaculatam pietati tuæ reſtituo.* Ad hæc illa ſubridens: *Quid, inquit, loqueris quod non interrogaris?* Addit Hiſtoricus Arvernorum alumnus, hunc maritum non multo poſt ſubſecutum fuiſſe conjugem ſuam: porro cum utriuſque ſepulchrum è diverſis parietibus collocatum fuiſſet, miraculi novitas, quæ eorum ſanctam caſtitatem manifeſtaret, apparuit. Nam manè cum ad locum populi accederent, invenerunt cadavera juncta ſimul in eodem loculo, quæ longè inter ſe diſtantia reliquerant: ſcilicet ut quos tenet ſocios cælum, ſepultorum hîc corporum non ſeparat monumentum. Hos uſque hodie ſanctos duos Amanteis loci incolæ vocitare conſueverunt, ſummòque venerantur honore, ſuntque templa in Arvernia in eorum honorem incognito nomine, Deo dedicata, & nos vnum etiam vidimus duobus Amantibus conſecratum ad ripam Sequanæ non longe à Rothomago. Similem quoque hiſtoriam refert idem Turon. Senatorem Hilarium apud caſtrum Divionem, qui ex uxore filium ſuſceperat, & juxta Apoſt. honorabile coniugium & thorum immaculatum conſervaverat, obiiſſe, & ſepulturæ ex marmore Pario mancipatam: ejuſque mulierem deducto anni circulo, in eodem tumulo collocatam juxta virum, qui elevata dextera conjugis cervicem amplexus eſt.

Quòd ſi ad hæc magnalia Dei aureis ſurdeſcant, cordaque indureſcant quorundam, qui Patrum ſcripta ſi non ludibrio, at deſpectui habent, nihilque ſe credere fatentur, niſi quod in utraque veteris & novi Teſtamen-

ti pagina expressissimis monumentis litterarum consignatum reperiunt, en profero textum 4. Reg. 13. *Mortuus est Heliseus, & sepelierunt eum. Quidam autem sepelientes hominem, projecerunt cadauer in sepulchrum Helisai, quod cum tetigisset ossa Profeta, re-vixit homo, & stetit super pedes suos.*

*Quæ maiora putas miracula? summus Virisque
Auctor inest*

Deus nempe ille æternus mundi fabricator, principio antiquior, sine diuturnior, cuius manus numquam est abbreviata, qui Ioan. xiv. dixit. *Qui credit in me, opera quæ ego facio, & maiora horum faciet.* Pergamus ad reliqua testimonia, ea tamen lege ne legem ordinemque temporum exactè sequi cogamur.

Videamus quid in Chronico Roberti Autissiodorensis Monachi.

Anno Domini MCXL. Senonis, presente Rege Ludovico, Episcoporum & Abbatum religiosorum sit Conventus contra Petrum Abailardum. Hic ingenio subtilissimus, mirabilisque Philosophus, qui cõstruxerat Cænobium in territorio Trecaßino in prato quodam ubi legere solitus fuerat. In quo Sanctimoniales plurimas Episcopali auctoritate congregavit, quod Paracletum nominavit. Quibus Sanctimonialibus HELOISSAM quondam uxorem suam religiosam feminam, & litteris tam Hebraicis quàm Latinis ad primæ eruditam præfecit Abbatissam. Quæ verè ipsius amica magnam ei post mortem in assiduis precibus fidem conservavit, corpusque ejus de loco, ubi obierat, transtulit ad prædictum Cænobium.

Supplementum Supplementi Chronicorum Fr. Iacobi Philippi Heremitanæ. Bailyardus natus in Francia, Peripateticus & in omnibus scientiis doctissimus, floruit illis temporibus in civitate Parisiensis, composuitque multa Opera lectu dignissima. Ille in quibusdam articulis fidei cum videretur hæsitare, in præsentia Ludovici Junioris, & Congregatione Prælatorum doctissimorum coactus est recantare. Itaque non solum ab illis dubijs aut erroribus liberum sese præstitit, sed arcta devotione in vero Monachatu reliquo Vita spatio permansit, cum aliquot discipulis in eremo permanens, vixitque & obiit in magna sanctitate.

Sequentes etiam Historicos adscribam, qui cum nullius criminis Abailardum insinularint, pro eo fuisse videntur. Annales Moriniensis Cænobij lib. II. *Petrus Abailardus Monachus & Abbas, vir erat religiosus, excellentissimarum Rector Scholarum, ad quas penè de tota Latinitate Viri litterati confluebant. Idem ferè Manuscr. S. Petri in Vico, quem perperam Vivum nominant, ubi annum obitus notat cum epitafio.*

Henricus de Gandavo lib. de Viris illustrib. meminit nostri Petri duobus in locis, quem Dialecticæ peritiæ, immò omnium liberalium artium, & Theologicæ Scholæ Rectorem vocat.

Chronicum etiam Archiepiscoporum Senonensium MS. Anno, inquit, MCXLII. *Magister Petrus Abailardus, aliàs Abailardus, primò Canonicus maioris Ecclesiæ Senon. obiit, qui Monasteria monialium reformavit, specialiter Abbatiam de Paracleto, in qua à se fundata sepelitur, cum uxore sua. Uxoratus enim primò fuerat, & postea Canonicus.*

Merito sanè Monasteria Virginum ab eo reformata dicit, quia ab He-loissa rogatus, ut de Origine & dignitate Monialium scriberet, utque ei & Sodalibus Regulam religiosè Deo serviendi præfinitionem, utrumque ele-

ganter gemina Epistolâ executus est. Priore enim, quæ septima in ordine est, professionem Monasticam à primitivæ Ecclesiæ cunabulis, imò & ab ipso Messia sacro deducit Collegio, & à primis Ascetis; sexusque feminei & virginitatis laudes latissimè percurrit. Posteriore, quæ octava est, Libri-que nomen ex Patrum sententijs adunati melius meretur quàm Epistolæ. Paracletensibus Virginibus Regulam præscripsit, & tripartito Tractatu de Continentia, de Paupertate, & Silentio saluberrima præcepta dat, cætera-que munia ad vitæ Monasticæ ordinem pertinentia sapientissimè disponit. Quem Libellū verè aureum omnes Sanctimoniales nocturna diurna-que manu versare deberent, & nos in Gallicum idioma transferri curavimus. Nec enim cedit Regulis à S. Basilio, S. August. S. Benedicto traditis, quas Erasmus, Melantho, & Centuriatores veras, & ab iis conscriptas non diffi- tentur. Cæsarius Episcopus Arelatensis, ut est apud Greg. Turon. regulas viris, & Cæsaria ejus soror Virginibus scripserant, quæ in Galliis aliquo tempore floruerunt in viridi observantia. Sed D. Maurus à D. Benedicto in Gallias missus ad reformanda Deo servientium Cænobia, pro illis ve- teribus novam & strictam Præceptoris sui Regulam supposuit, qua ferè omneis utuntur utriusque sexus in hunc vsque diem, exceptis Canonicis S. Augustini, & fratribus in Eremitio, & sodalibus utriusque Francisci Assis- sinatis & de Paula.

Franciscus Petrarcha Florentinus, reflorescentis literaturæ injuria se- culorum inquinatæ restauratur lib. II. de vita solitaria, Abaelardum in- ter illustreis & sapientes Philosophos, Deoque amabiles recenset, his ver- bis: *Iungam, inquit, tot Veteribus Philosophis unum recensio-rem, nec val- de semotum ab ætate nostra; quàm recte nescio, sed apud quosdam, ut audio, susce- pta fidei, & profecto non humilis ingenij, Petram illum cui Abaelardi cognomen est. Qui ut in Historia suarum calamitatum longa oratione ipse meminit, in vidua cedens solitudinis Trecensis abdita penetra- vit: eisi non sine magno Undique studiosorum conventu, quos ex multis Urbibus sibi solitario discipulos doctrina celebris fama con- traxerat; sine requie tamen optata, quam sibi radicatus tenax livor odiumque con- vulserat.*

Platina siue Bartholomæus, siue Baptista, olim Cancellariæ R. Abbre- viator, post verò Historiæ Pontificiæ Collector celeberrimus, ea quæ de nostro Abaelardo alij ad tempora Innocentij II. referunt, ille ad Lucij II. Pontificatum retrahit: de Abaelardo tamen satis candidè loquitur: *Ejus, inquit, id est Lucij, consensu in Gallia Synodus Episcoporum quorundam & Ab- batum coacta est contra P. Abaelardum Philosophum Peripateticum, virum multa do-ctrina, non bene in quibusdam cum fide nostra sentientem, qui præsertim etiam Lodo- vico Rege rationibus victus, non modo sententiam mutavit, sed etiam monasticam vitam & Religionem induit, ac deinceps unà cum discipulis quibusdam in loco de- serto sanctissimè vixit.*

In hunc Platinæ errorem seu *μνημονικὸν ἀμάρτυμα* impegit Seueri- nius Binius, seu quis alius doctus & diligens sarcinator magnæ illius Con- ciliarum editionis Colon. an. 1606. qui sub Lucio celebratum fuisse illud Concilium Senonense scribit, parum memor quod paulò ante attribue- rat Innocentio. Nam Lucij Pontificatus, si Abbati Ursperg. credimus, &

Onufrio vix VI. aut ad summum XI. mensium fuit, & in annum MCXLV. excurrit. At Innocentius XIII. plus minus annos sedet, & in Gallia peregrinatus est. Sed alius sequitur anachronismus eiusdem Binij Tom. 3. Concilior. part. 2. cū duo quæ vocat privata Concilia, Sueffionense nempe, & Senonense, contra Abael. eodem anno ait fuisse celebrata MCXL. Nam inter utrumque XX. annos intercessisse, temporum series & supputatio, convincit. In quo miror doct. Gilb. Genebrardum professorem Regium etiam errasse, qui inter hæc duo vnus tantum anni spatium ponit. Congregatio illa Sueffioni indicta est, vt ipse Abaelardus Epist. 1. narrat, procurante Rodulfo Archiep. Rhem. rogantibus ejus æmulis, occasione sumpta quoddam Connanus Episcopus Prænестinus S. R. E. Legatus, tunc in Gallijs erat aliorum Conciliorum & negotiorum causa; & rogatus est vt ei præesse non grauaretur, quem sibi favere studuisse narrat Abaelardus in illa Epistola totius huius rei internuntia. Ille Connanus ter aut amplius in consessu nostrorum Præsulum pro summo Pontifice legatione functus est, decessitque ex Gallijs circa annum MCXX. neque post illud tempus ad nos remigravit. Quo tempore Abaelardus subiacebat adhuc ferulæ Abbatibus Dionysiani, erat florente juvenia fervidus, neque adhuc se contulerat ad Theobaldum Comitem Palatinum Campaniæ & Brisgeij, vt ab eo aliquot jugera terræ & præri impetraret, in quibus jaceret fundamenta Cellulæ Paracletensis: quæ omnia transacta sunt priusquam accerferetur ad Ruyensis Abbatæ regimen. Sed cū evocatus est ad illam Senonensem congregationem, jam illi deterior ætas canis aspergi poterat, etsi hoc de Eunuchis negant: jam sexaginta annos attigerat. Per me excusetur licet solers ille antiquitatis Conciliorum indagator, si in longo & difficili Opere levis somnus ei irrepsit:

Quod ad Centuriatores Parthenopolitanos attinet, etsi varijs in locis nostri hujus honorificam mentionem fecerint, nihilque diligentæ & solertæ in eo prædicando ex Auctorebus illius ævi præterierint: tamen quoddam Ecclesiasticæ Historiæ massam veterem & optimam novo suo fermento corruerint, libens eos prætereo: nihilque hic decerpendum puto ex verissimis Annalibus magni illius Cardinalis Baronij, cujus animæ ob vigilias & labores, quos Ecclesiæ causa tot annos perferre voluit, omneis bene precari debent. Multa ille de Petro nostro ejusque felici obitu prolixè recenset Tom. XII. quæ ipse ex supradictis, præsertim ex Petro Abbate Clun. pænè transcripsit.

V. Cl. Bertrandus Argentæus Præses Rhedonensis, I. C. acutiss. & Historiarum Britannicæ Celticæ Scriptor luculentiss. qui me senex & veteranus dilexit, cū ego Neoptolemus prima tyrocinia Magistratus in Senatu illius Provinciæ experiret, & quem ego vnicè colui, & vt patrem sum veneratus, Annalium suorum duobus in locis, hujus nostri Britonis, ejusque ingenij honorificè meminit. Primo quidem libro Cap. X. vbi magnos viros & celebres ex Arémoricis ortos vel oriundos recenset, primasque in Filosofia & Theologia ei attribuit. Et lib. III. cap. IX. in vita Connani III. vbi eum vniuersalis, id est omniſcij nomine decorat: quod vult ita accipi, vt non omnia sciverit (quod in quemquam cadere non potest) sed

comparatione habita ad reliquos omnes, quos longo spatio antecit, cuius doctrinae fiducia, fundamenta fidei sanctae in demonstrationibus humanis voluit collocare. Haec Argentraus, qui postquam totam historiam hanc prosecutus est, queritur eum non fuisse auditum in Concilio contra eum coactum; quod omnes quantumvis docti & subiles, ejus acumen ingenij, linguae versatilis volubilitatem, eloquentiae flumen aureum, vel potius fulmen igneum, & trifidum, syllogismorum gryfos & contorta entymemata reformidarint: D. Bernardum ex nimio zelo & solitudine ad credulitatem & iram primum, dicit eum eo simultates gravissimas exercuisse, ita ut literas acrimoniae plenas scripserit ad varios, ei refragante, ut inquit, Abbate, quem Guillelmum vocat, perperam; cum Abbas ille discipulus Petri non Guillelmus, sed Petrus Berengarius fuerit vocitatus, qui Britonem nostrum claro patrocinio tutatus est. Ad ultimum dicit eum tam perspicuam interpretationem suis enuntiationibus attulisse, ut quae primo aspectu ancipitem curam cogitandi afferebant, intellecta ejus interpretatione, postea vera, liquida, certa, & fidei orthodoxae consona judicarentur; in qua quidem testatur illum obiisse, Christianamque sepulturam cum uxore doctissima, Graecis Hebraicisque literis ornata, & numquam satis laudata femina.

Eadem penè refert Io. Papirius Massonus familiaris meus, & Historicus confidentissimus, Annal. III. in Ludovico Iuniore: ubi ortum eius in Armorica, studia Logicae, dein Theologiae, Lutetiae instituta, amores inter illum & Heloissam patitur, ut illa ventrem tulerit, fugerit, pepererit; Petro reversa clam nupserit, ut ejus pater vel patruus injuriam sectione ultus sit: ut ille in Monasterio Dionysiano Monachi cultu, illa Monachae in Argentolienensi latuerit, ut ille in perfectissimum Theologum, illa in eruditissimam & modestissimam Diaconissam evaserit, ut docendi munus repetere coactus, postmodum livori cedens secesserit in solitudinem Novigetanam, ubi Paracleticum Oratorium Anachoretis potius quam Cœnobitis construxit, in quo postea sociam thalami praefecit virginibus: Ut ad Oceani Britannici oras Veneticosque sinus, Monachis duræ cervicis praefectus onus illud sponte abjecerit. Addit de confessorio in Senonensibus adversus illum habito, ut non auditus Innocentium appellaret, ut Cluniaci humaniter exceptus est à Mauriaceno Ordinis Generali, qui eum D. Bernardo ac sacrosanctæ R. Sedi reconciliavit, arctæque poenitentiae ab eo peractæ, & transitus verè Christiani testimonium perhibuit. Hæc & plurima in favorem hujus Doctoris leguntur in ruitis & cæcis seu ruderibus Massoni illius architecti non poenitendi: quæ quantus hic vir fuerit, quàm Deo charus, quàm Ecclesiae humiliter & sincerè obediens, satis declarant.

Sed aurem mihi vellunt duo nostrates Poetæ vetustissimi, quorum unus anonymos, qui circa annum MCCCLX. vivebat, hos rithmos fudit, ex quibus apparet Abaelardum de libero hominis arbitrio cum universali Ecclesia idem sensisse & credidisse: quam liberi Arbitrij fidem Erminius qui à nobis defecerat hisce ultimis annis in aliquot Bataviae oppidis renovavit, maximè vero in urbe Roterodamæa ex qua Erasmus ortus.

*Pierre Abaillard en vn chapitre
Où il parle de franc arbitre,
Nous dit ainsi en verité,
Que c'est vne habilité*

*D'une volonté raisonnable,
Soit de bien ou de mal prenable,
Par grace est à bien faire encline,
Et à mal quand elle decline.*

De hac quæstione difficillima vidēdæ sunt aduersus servum Luth. arbitrium, Diatribæ D. Erasmi. Guillelmus de Lorisio paulò antiquior, sed Poetarum sui seculi princeps, complexus est Historiam Abaelardi in illo Poemate, vt illa ferebant tempora Epico, cui Romani de Roza inscriptionem dedit. Quod opus varia & promiscua doctrina refertum, sed nondum ad vmbilicum perductum Ioannes de Magduno ad Ligerim, dictus Clopinellus, quod scæzontem notar, Mathematicus insignis, quadraginta post annis absolvit. Versus in laudem vtriusque non ausim apponere.

Cùm verò Abaelardus juvenis plurimos oratorio stylo rithmos vernaculos, quasi hybridas pro Heloissa sua fuderit; vellem licuisset mihi eadem vetusta lingua, quæ nobis opica dici potest, his elogijs inferere similes rithmos, quibus verus Poeta conatur viros à vinculi vxorij desiderio retrahere, eos dehortans ne maritali capistro colla subdant, nisi velint libertatis iacturam subire. Adfertque ad probationem huius dicti memorabilem Heloissæ sententiam, quam laudat vt feminam doctam & sapientem; quæ quamvis ardentem virum suum dilexerit & deperierit ex quo mater filium susceperat, qui patrem ore referret; tamen quantum in illa fuit, egit magnis precibus cum illo, quem post Deum suspiciebat, ne, vt honori puerperæ consuleret, eam ex amica redderet vxorem solemnī ritu & benedictione nuptiali: satis esse dictitans, si illa intimo pectoris amorem mutuum servans, illum videret mitra & infulis Pontificalibus, quibus dignus erat, ornatum. Sed Poëta in alium sensum hoc detorquet, quasi illa innuere voluerit suaviores esse amantium, quàm legibus connubialibus nexorum, amplexus: quod non eò trahendū est, vt inde credatur ea animum à thalami iuribus alienum & abhorrentem habuisse, aut præferre voluisse concubinatus libertatem conditionibus quantumvis amplis & magnificis nuptiarum regiarum; sed quod tanto amore, tantæque reverentiâ sit prosecuta Dominum suum, vt non dubitarit pro eo Monasticam asperitatem, perpetuamque continentiam & obedientiam eligere & vovere, potiùs quàm obice & interventu suarum nuptiarum, impedimento esse, ne Abaelardus factus vxorius frustraretur præmio excellentis ingenij, admirabilisque doctrinæ, puta purpurâ & galero, quibus tunc temporis soli viri eruditione præstanteis ornabantur, & his solis gradibus ad solsticia honorum Ecclesiasticorum evehebantur. Sed parum proficiebat eruditio sine cœlibatu. Et hac causa Iason Mainus IC. cùm Papiæ Gallus ille legem *Gallus, D. de lib. & post.* publicè in suggestu magna audientium caterva interpretaretur in aurata toga, coram Rege Gallo Ludovico XII. quinque Cardinalibus, & centum Proceribus subsellia implentib. dixit se, quod beatum isti putant, numquam vxorem duxisse, vt Rege commendante, qui Genua subacta de Liguribus triumphabat, Iulius II. Pontifex ad galerum purpureum illum habilem esse sciret. Hæc Iovius.

Hinc est, quodd secunda Epistolâ Heloissa fatetur se juvenulam ad Monasticam

naſticæ converſationis aſteritatem non tantùm religionis devotione, ſed Abælardi cauſſa primò pertractam. Itaque non nimis contra eam premenda ſunt hæc ejus verba, *Si me Auguſt. orbis Imperator vxorem expeteret, mallet, inquit, tua eſſe meretrix, quàm orbis Imperatrix*: figurate id quidem dictum, & poëtice, vt apud Catullum,

Nulli ſe dicit mulier mea nubere malle,

Quàm mihi, non ſi ſe Iupiter ipſe velit.

Nam in hæc verba erupit ex contemptu diuitiarum, honorum, & rerum fortuitarũ, & exuberantiâ cõjugalis amoris ac pudicitia matronalis. Deinde etiam ex reverentiâ & obſervantiâ, quam in animo fœminæ pepererat admiratione ejus divini ingenij, doctrinæ incomparabilis, fidei, probitatis, cõſtantia; vt ſi pro marito fuerit mors præſentanea oppetenda, facile Evadnem, Penelopem, Alceſtim, Porciam Bruti, aut Arriam Parti pietate fuerit ſuperatura, aut illas omneis de quibus ſunt hi Elegi Propertiani.

Felix Eois lex funeris vna maritis,

Quos Aurora ſuis rubra colorat equis.

Namque vbi mortifero juncta eſt fax vltima lecto,

Vxorum ſuſis ſtat pia turba comis.

Et certamen habent lecti, qua vira ſequatur

Conjugium, pudor eſt non licuiſſe mori.

Ardent viſtrices, & flamma pectora præbent.

Imponuntque ſuis ora peruſta viris.

Pene omiſeram Elogium de utròque optimi ſenis & V. Cl. ac vndecumque doctiſſ. mei præceptoris Stef. Paſcaſij, qui dum hæc ſcriberem ferè nonagenarius magno omnium mœrore placidè in Deo expiravit, ille alter Varro & diligens Antiquitatum investigator quinti Diſquiſitionum Francicarum Libri Caput decimumnonum dedicavit, & totum impendit deſcribendis Abælardi & Heloiſſæ amoribus, langoribus, & ærumnis, necnon in pangendis eorum laudibus, conſtantia & aliarum virtutum, & doctrine ſuper omnia admirandæ, quibus ſibi magnam celebritatem quaſierunt & gloriam, & ex ea ille invidiae flammas acerrimas, ex quib. ope divina crepitus eſt: in quarum rerum promiſcua & perpetua narratione nervos omneis ſuæ facundia mirus ille encomiaſtes explicuit. Multam enim in caſum Abælardi enumeratione, temporum varietate, fortunæque viciffitudine lectori delectationem, ſi non cum dolore, at ſaltem cum miſeratione conjunctam, res tanquam oculis ſubjecta foret, atque admirationem, ſtuporem, lætitiâ, ſpem ingerit; præſertim cum notabili exitu materies tota concludatur. Pix nempe Abælardi, poſt acerbam pœnitudinem, in Chriſto obdormitionis, & ſepulturae, quam conſecutus eſt in gremio dilectæ, ſicut ipſe præoptaverat, ſupremiſque tabulis mandaverat. De Heloiſſa verò ita dicit, vt neque veram ei laudem detrahat, neque falſam aſtingat: ei denique tantum impartitur gloriæ, quâ tum nobili & primarię femine, omniſcientiarum genere excuſiſſimæ, viri ſui amantiſſimæ, in ejus adverſis conſtantiſſimæ, votorum ſuorum ac præcipuè caſtitaſtis tenaciſſimæ, Diaconiſſæque vigiliſſimæ debeat. Qua dere qui plura deſiderabit, poterit decerpere, non ex his noſtris Adoneis hortulis, ſed ex amœniſſimis & ſua-

PRÆFATIO APOLOGETICA

olentibus areolis, pergulis, rosetis, plantaribus, & pomarijs variarum Disquisitionum Pascasij: quem ego testem fortissimum hoc loco extremum posui, quodd eius virtutes semper habuerim imo corde reconditas, hincque factum est ut recēs in cælo receptus, extremus pectoris mei scrinio exierit.

His tantis testimoniis & clavis elogiis, quis est qui tam excellentis Doctoris, tam sanctæ & doctæ mulieris post secula victuras chartas ab incendiis nostro labore creptas & conservatas, ab omnique interitu vindicatas non gratuletur?

At enim si objiciet aliquis, illum errasse in quibusdam articulis, & in Synodo Prouinciæ Senon. fuisse damnatum, atque adeo rem iudicatam pro veritate accipiendam: is sibi respōsum hoc habeat: receptum quidem reum fuisse, sed non peractum; deinde cū pro innocentie suæ præsidio appellarit summum Pontificem, provocatio illa judicialis suspendit iudicatum, si quod fuit.

Sed ut melius omneis intelligant quid rei gestum sit in illo Conventu Senon. legatur Apologeticus, qui hunc Operi insertus reperitur ex Bibl. Regia sub nomine Epistolæ XVII. & XVIII. lib. 2. auctore Petro Berengario, Scholastico Pictaviensi, qui discipulus Abaelardi variis coloribus depinxit quosdam ex illis, qui ante tempus iudicantes præfigere non erubuerant nigrum & contra inauditum suum Magistrum. Fit enim ferè, inquit ille, ut libenter condemnet, qui citò Totum legat qui volet Apologeticum, ego ex eo hæc tantum excerpam.

In via Christi ambulans, in occulto prodiens, tunica inconsutili spoliatus est. Post prandium allatus est liber, & cuiusdam juveni præceptum est, ut voce clamosa Petri Opuscula personaret. At ille juvenis Petri odio animatus, sonoriùs quàm postulatus fuerat exclamavit. Post aliqua, emulos de turba insultare, pedem pedi adplaudere, ridere, nugari, conspiceres. Dissipabatur cordibus suis, stridebant dentibus in Petrum, oculos talpæ habentes: *Filiosum hunc, inquit, fineremus vivere?* Et paulò post: *In somni leibargiam oculi multorum solvebantur. Inter hæc sonas lector, stertit auditor. Alius cubito innititur, ut det oculis suis somnum, alius super molle cervical dormitionem palpebris suis molitur, alius super genua caput inclinans dormitat.* Cum itaque Lector in Petri satis aliquod reperiret spinetum, surdis exclamabat auribus, *Damnatis?* Tum quidam de vulgo ad extremam syllabam expergesacti, somnolenta voce, capite pendulo, *Damnatus, aiebant: alij verò damnantium tumultu excitati, decapitata prima syllaba, Natus, inquit.* Inter hæc Petrus orabat, *Domine libera animam meam à labijs iniquis, & à lingua dolosa.*

Inter tot & tantas angustias, Abaelardus ad Romani examinis confugit asylum: *Filius sum, inquit, Romana Ecclesia: volo causa mea quasi impij iudicetur, Casarem Ecclesia appello.* Sed nonobstante appellatione, relata sunt quæ gesta fuerant Apostolico, & statim à Romana Sede literæ damnationis in Petrum per Gallicanam Ecclesiam volarunt. Damnatur taliter os illud, promptuarium rationis, tuba fidei, hospitium Trinitatis. Damnatur, proh dolor! absens, inauditus, & inconvictus. Cujus, inquam, Iesu bone, culpa rã cæcos habuit iudices, ut non vtrinque causæ latera ventilarent. Sed corrigere, inquit, Petrum volebant. Cur ergo ei coram populo alternæ blasphemie characterem impingebant? rursusque si Petro amorem populi

tollebant, quomodo corrigere disponebant? Præclarè dictum est à Profe-
ta, *Corpietur iustus in misericordia*. Parce inclyte bellator, non impugnat fi-
dem Petri, qui affirmat fidem Petri. Patere tecum esse Christianum &
Catholicum:

Contemplemur Abaelardi fidem in parte Epistolæ ad Heloissam: *Soror
mea Heloissa, quondam mihi in seculo cara, nunc in Christo carissima, odio sum
mereddidi mundo Logica, in qua aiunt perversi, me præstatißimū esse, sed in Pau-
lo claudicare. Nolo sic esse Philosophus, ut recalcitrem Paulo; non sic esse Aristoteles, ut
secludar à Christo. Et paulo post: Credo in Patrem, Filium, & Spiritum sanctum,
vnum naturaliter & verum Deum. In personis sic approbo Trinitatem, ut semper in
substantia custodiam vnitatem. Credo Filium per omnia Patri esse æqualem, æter-
nitate, potestate, voluntate, opere, nec audio Arium, qui prius & posterius in Trini-
tate ponit. Spiritum etiam sanctum Patri & Filio consubstantialem & coæqualem
per omnia testor. Credo etiam Filium Dei factum filium hominis vnamque perso-
nam ex duabus, & in duabus naturis consistere, qui passus est, mortuus resurrexit, as-
cendit ad cælum venturusque est iudicare vivos & mortuos. Afferro etiam in bap-
tismo remitti delicta, gratiaque nos egere, quā & ineipiamus bonum & perficiamus,
lapsoque per penitentiam reformari. De carnis autem resurrectione quid opus est di-
cere, cum frustra glorietur Christianum, si non credidero me resurrecturum? Hæc
de Epistola Petri excerpta, cujus maiorem partem infra inseruimus, ut cla-
rum & perspicuum faciant omnibus eum fidem Petri non impugnasse.*

Adjicit deinde Berengarius, se vidisse Indiculum ab inimicis ejus com-
pactum, in quo non Abaelardi dogmata, ut illi falso iactabant, sed ne-
fandi commenti Capitula legebantur, quorum quædam prorsus negat,
quædam etiam diluenda putat, quamvis agnoscat Petrum errare potuisse.
Ipse etiam audet ex Clærvall. familia ut putabat scriptum erroris argue-
re, de origine animarum. Quæ opinio Origenis, nescio quid Pythagoreum
& Platonium redolens, orthodoxæ veritatis gladio amputanda est: cum
sancta Ecclesia Catholica teneat noviter creatis corporibus noviter crea-
tas animas quotidie infundi, iuxta illud ex ore Christi: *Pater meus usque mo-
do operatur, & ego operor.*

De hoc Berengario Doctoris sui famam & nomen tuente Petrar-
cha in Apologia ait, ipsum fuisse facundum, non magni corporis, sed in-
gentis acrimonix, qui post modum se excusavit quod tanti viri sanctitas
nondum totum orbem repleverat. Abaelardo inquit in somnum vel in er-
rorem prolabenti viam comiter monstrare debebat: si sauciatus esset, eum
jumento par erat imponere, vinum & oleum eius vulneribus infundere,
& ad stabularium vniuersalis Ecclesiæ reducere, summum puta Pontificē,
quem qui Christi Vicarium, Petri successorem, Episcoporum Primatem
agnoscit, & ad eius nutum se componere paratus est, reprobis dici non
potest. Has & plures alias tricas ad Lectoris fastidium verrit Berengarius,
nimia in præceptorem veneratione, si nimia esse potuit in eo, qui calle-
bat illud Iuvenalis,

*Dij majorum umbris tenuem & sine pulvere terram,
Spirantesque crocos, & in urna perpetuum Ver,
Qui præceptorem sancti voluere parentis
Ejse loco*

Quid ergo? Audacissimusne Berengarius ex omnibus? minimè. At multo officiosior erga præceptorem, quàm cæteri condiscipuli. Quanquam nec istius quidem laudis ita cupidus, ut eam aliis, qui pro Magistro calamum strinxisse dicuntur, præreptam voluerit. Nam ipse electus vnus videtur à sociis, qui maximo ingenio, minimoque famæ periculo posset dicere; ut pote qui vix ex cæbis excesserat. Itaque ipse cùm ad opulentam responsionis messem invitatus esset, culmos tantum legit, statimque ab incæpto destitit, in hac prima lucta quodammodo excusari postulans, quòd nimio Præceptoris zelo ardens librum adversus sanctissimum adversarium evo-
muit, quem ut lapidis iactum retinere non potuit postea, quia ejus exemplaria statim per Franciam Italiamque volaverant: de quo se excusat altera Epistolâ ad Episcopum Mimatensem his verbis: *Nōne homo est? nōne nobiscum navigat per hoc mare magnum & spatiosum, inter reptilia quorum nō est numerus? Cujus navis etsi prosperiori feratur na vigio, tamen securitas pelagi in dubio est. Nam nec Auster adhuc ei fidem dedit, iuxta illud Augustini: Homo quamdiu vi vit nescit ira an odio dignas habeatur. Et paulò post: Nondum in firmamento fixus, qui meo judicio temporum nostrorum est Martinus. Ego ita sentio de Abbate, quòd sit lucerna ardens & lucens: sed tamen in testa est. Damnaverat inquit Abaelardum præceptorem meum, fidei buccinam, legis armarium, in motum via pede recto gradientem. Damna verat, inquam, & vocem eius sine audientia strangula verat. Eram ea tempestate adolescens. Pectus appuli ut purgarem Abaelardum. Sed non, inquit, à te talem Theologum argui oportebat. In quo audet Abbas? audet in litteris, audeo & ego. Audet in Theologicis; audeo & ego. Audet in sanctitate, hic non audeo. Hæc est Berengarij excusatio sui Apologetici, quo concludit, In campo Philosophiæ semper licuisse, ut alter alterum, dum magis amica est veritas, iustis de causis reprehendat. Nam illa quæ decem annis post transitum S. Bernardi secuta est in Canonem Sanctorum ejus nominis translatio: testis quidem est sanctitatis, sed non omnium ejus ante-dictorum, actorum, aut scriptorum comprobatrix. Verè enim vir probus & sanctus fuit D. Bernardus, verè sui temporis velut quoddam Orionis astrum resplenduit: cujus purissimis radiis non potuerunt officere, aut tenebras offundere, ne quidem illi, qui ab Ecclesia Catholica desciverunt, quorum nonnulli Bernardum habent præ manibus & in deliciis: inter quos nominari potest vir excellentis ingenij Franc. Hotomanus I. C. qui quamvis alieno à Monachis animo, hunc Auctorem gravem, Doctorem præcipuum habebat in senectute, & ejus lectione assidua se proficere, & puros in sacris Scripturis sensus haurire fatebatur.*

Superest igitur, quoniam alios pro Abaelardo dicentes placidè audistis, ei pro se pauca dicenti aurem non denegeris. Nam adversus varia probra, quæ illi objecta sunt, contentus fuit brevicula Apologia, seu Confessione, quæ vix treis paginas excedit: in qua Indiculi superioris articulos ut diabolicos detestatur, cum suis auctorib. & architectis, negatque in suis voluminib. tale quid reperiri. Tam Filium, quàm Spiritum sanctum ex Patre proficetur esse, ut ejusdem sint cum Patre substantiæ, ejusdem penitus voluntatis atque potentiæ. Solum incarnatum IESUM Christum, vnicum & verum Dei Patris filium, ex substantia Patris ante secula genitum: ita Spiri-

tum quoque sanctum tertiam in Trinitate personam, tam ab ipso Filio quam à Patre procedentem credens asserit, & asserens credit. Gratiā Dei ita omnibus necessariā, ut nec naturæ facultas, nec arbitrij libertas sine illa sufficere possit ad salutem. Crucifixores Christi in ipsa crucifixione gravissimum peccatum commisisse fatetur. Potestatem ligandi atque solvendi agnoscit datam successoribus Apostolorum omnibus, ut ipsis æquē Apostolis, tam dignis quā indignis Episcopis. Quid plura? cū ad singula objecta modestē paucisque respondeat, negetque se Librum Sententiarum, ē quibus Capitula excerpta sunt contra se per ignorantiam, vel per malitiam prolata, scripsisse; atque ita innocentiam suam tueatur, ut si qua dubia videbuntur, in meliorem partem omnia fraternē adsumi per viscera misericordię I E S V C H R I S T I postulet: quis ampliū dubitet hanc veram fuisse Petri fidem, ex qua spei contraxit firmitatem: in qua locutus salubriter, ut ipse dixit, latratus Scyllæ non timuit, vorrices Charibdis irrisit, mortiferos modulos surda aure contempsit, scopulos non horruit, irruentibus turbini- bus non est concussus, necdum loco dimotus. Fundatus enim erat suprà firmam petram, ob idque meritorē refugium invenit apud Sedem S. Petri, cui conciliante Mauriaceno est reconciliatus. Sed reprimam me: Non enim, ut inquit Tullius, dicenda est gratia reconciliata, quæ numquam desijt.

Quamobrem bono animo esse, & benē sperare debemus, nullos esse incassum susceptos labores pro decore & fama pietatis & sanctitatis in nostro Doctore. De cujus doctrina, quæ superest, sana & eximia, in omni literarum genere, nihil est quod plura adjiciamus, nisi hoc vnum, nempe eo seculo, quod fuit præstantium ingentiorum feracissimum, nullum extitisse ei vlla ex parte conferendum. Quod ut faciliū innotescat, aliquot raptim nominabo ex insignioribus, qui circa illud ævum floruerunt. Nam D. Bernardum, P. Mauriacenum, Othonem Frising. Gulielmum Cathalaū. Anselmum Laudun. Io. Rozelinum, Albertum Rhenum, Gratianum Bononiensem satis suprà memoratos arbitror. Petrum verò Lombardum Episcopum Paris. solem Theologorum inter stellas recensere vereor, qui quantus fuit, ex Schola & umbraculis nostri Abaelardi cum multis aliis, tanquam ex equo Trojano prodiit. Veniant ordine Robertus Episc. Salisberiens. Ivo Episc. Carnotensis, Robertus alter Abbas Majoris Monasterii, Baldericus Archiep. Dolensis, Marbodius Episc. Rhedon. Ioannes Atrebas, Morin. Episc. Guillelmus Armoricanus & Radulfus Nigellus Poetæ Epici, Guilielmi duo, ille Abbas S. Theodoricæ Rhem. alter Neubrig. Lotulfus Novariensis, Gaufridus Antissiod. Sugerius Abb. S. Dionysii, Hildebertus Ep. Ceno- man. Honorius E. Eduen. Petrus Cantor Lutetianus, & alter Petrus de Roessiac: Hugo, Richardus, Adamus, Andreas, Monachi Victoriani: Rupertus duo, Tuiciensis, & Bononiensis, Aubertus & Petrus Rhem. Goffridus Archid. Burdeg. Boso Anglus, Bruno Coloniensis, Vicerius Trustinus Ebo- ric. Petrus Bleisensis Ep. Bathon. Gualterus de Constantiis ex regia Brito- num stirpe, Alfredus sacerdos Historicus, Hugo Carthusianus Historicus, Ioannes Oxoniensis Hist. Heribertus Lozingua, Bartolomeus Itacanus, Turgotus Dunelm. Abbas, Odericus & Petrus Casinenses, Ioachimus Abb.

PRÆFATIO APOLOGETICA

Floren. Gilbertus, Laurentius, & Radulfus Vvestmonasterienſes, Nicolaus Vvaſtintonenſis, Guillelmus Sommerſetus, Vvalterus, Daniel & Robertus Budlontonienſis, Vvillelmus & Robertus Fiſcanenſis, Sterlo & Oſbertus Gloceſtrienſes, Gilbertus Hollandus, Vvignomus Homeliarius, Petrus Piſanus I. C. Rogerius Mathematicus, Thebites & Alfraganus Aſtologi, Guillelmus Sturdus & Guido Poëte, Karadocus hiſtoricus, Odo Kentianus, Guillelmus Archiep. Tyri, Rudolfus, Lucas, & Francus Abbates Teuthones, Robertus Polonus, Adalbertus Spaldingen. Richardus de Præcellis, & alij, quos referre longa mora eſſet. Quibus addendus meritò magnus ille Gilbertus Porretanus Episcop. Pictaviensis, ſuæ Academiae ſi non Romulus, at ſaltem Camillus, accuſantibus Adamo de Parvo-ponſte, & Hugone de Campo-florido Regis Ludovici VII. Cancellario, ad tribunal ſummi Pontificis tunc per Gallias peregrinantis, pertractus, paremque cum Abaelardo aleam ſortitus. Tantum potuit inveterata, & a rudibus ſeculis priſcis deducta opinio, ut quiſquis ingenio & doctrina conſummata cæteros de vulgo anteiret, ſtatim à fide alienus crederetur. Parum vilem eſſe fateor eruditionem ſine timore Dei & pietate: ſed ubi hæ concurrunt in vno ſubjecto, plus commodi ad Eccleſiam dimanat ex his duabus ſororiantibus, quàm ex altera. Quid noſter? nōne eruditione & pietate omnibus ex ſuprà nominatis poſt ſe reliquit? ad extremum etiam plures ſanctitate, ſi D. Bernardum excipias, Thomam Cantuar. & Malachiam Hibern. Archiepiscopos, quos endo cælo merita locarunt.

Quid, quod & illud duodecimum ſeculum illuſtribus feminis & doctis claruit: inter quas Heloiſſa noſtra fulget, velut interſigneis luna minores. In quibus placet Hildegardim, Matildem, Sofiam cum eius filia, & Elſabetham connumerare, quæ dubium reliquerunt plūſne eruditione, an vitæ aſtinitate fuerint commendabileis. Veriſſimum omnes agnoſcunt quod ad Heloiſſam noſtram Mauriacenus Lib. V. ſcripſit: Eam non tantum religionis, ſed honeſtorum ſtudioſorum, & laudabilium, ac ſecularis ſapientia famâ toti orbi innotuiſſe, mulieres omnes eviciſſe, & penè viros univverſos ſuperaiſſe. *Mox verò, inquit, ut complacuit ei, qui te ſegregaviſt ab utero matris tuæ, per gratiam ſuam longè in melius diſciplinariarum ſtudia commutaſti, & pro Logica Evangelium, pro Fyſica Apoſtolum, pro Platone Chriſtum, pro academia clauſtrum, tota jam & verè ſiloſofica muliere elegiſti.*

Quid mirum: cum hoc Ludovico Iuniore regnante, quem G. Tyrius lib XXII. Regem piſſimum & Chriſtianiſſimum vocat, Lutetia omnium liberalium & Mathematicarum artium ſtudia floruerint, necnon Philoſofia, Medicinæ, & Theologiæ: quarum profeſſores honoribus, honorarijs, & præmijs, & (quod in deluetudinem abiit) beneficiorum Eccleſiaſticorum proventibus, teſte Rigordo, digniſque remunerationibus Rex proſequebatur: ita ut Petrum illum nomine & origine Longobardum, Auctorem libri Sententiarum, in Episcopatus Pariſienſis electione proprio fratri Ludovici Cralli F. prætulerit, qui tum Archidiaconus Pariſienſis erat, neque agrè moleſtève tulerit, Doctorem advenam & alibi natum ſibi præferri. De Academia enim Lutetiana idem dicendum quod de Roma, eſſe eam communem orbis incolatum patriam.

PRO PETRO ABAELARDO.

Nec tantum inter Christianos Lutetiæ, sed etiam inter Iudæos floruerunt linguarum & divinæ scientiæ studia. Quod & testatur Benjaminus Hebræus in Hispania natus, qui scribit in Itinerario suo se sub illo Rege Lutetiam venisse: quam vocat regni caput. *Sunt, inquit, in ea discipuli Sapientum omnium, qui hodie in quacunque regione vivunt, doctissimi, & qui nocte dieque legis studio incumbunt.* Hæc ex supra nominatis Doctorib. satis manifesta, quibus adjungam Petrum Alfonsum, qui ex Iudæo Christianus factus, habuit susceptorem in baptismo Alfonsum Castulonis seu Castiliæ Regem optimum, Mathematicum doctissimum. Alios verò perperam doctos silentio puto involvendo, sicut & Petrum Bruis, & Petrobrusianos, Henricianos, Adamitas, Marlenses, Catharos, Iacobitas, omnes relatu indignos, Marrucinos & Fatuos, quod litteris abutentes, hæresibus peruersis varias Orbis parteis infecerunt: à quibus tamen immunis permansit. Gallia ope Doctoris Abaelardi, qui contra illos sinceræ fidei suæ symbolum solvit Libro singulari adversus Hæreses edito. Quo indignius videtur ejus Libros non bene agnitos, in prohibitis ad hunc usque diem repositos, Auctorisque nomen veru transfixum, qui se acerrimum hæreticorum hostem sit professus. Unica certè ejus Epistola octava, quàm piè & Catholicè de Eucharistia, ceterisque fidei articulis senserit, satis ostendit. Quod si aliquid ejus Operum in manus venisset eorum, qui Indicem Librorum suspectæ fidei sarcinarunt, certè aut in eo nomen Abaelardi delevisent, de quo nihil mali viderant, nihil comperti habuerant, aut permisissent ejus Opera per doctores expurgata in lucem prodire: sicut nunc ea damus Reip. Christianæ & Catholicæ, tersa sane & lævigata pumice Theologorum Parisiensium, qui ut sunt acris iudicii Senatores, nulla ex iis expungenda, sed si quæ duriuscula videbantur, aut molliori interpretatione temperanda iudicarunt, aut sapienter cavenda monuerunt.

Acta causa est. Vides, sapientissime Nomofylax, lectionem Abaelardi Ecclesiæ utilem esse & conducibilem, cum Monachum probum & doctum, ab errorum suspitione repurgatum, adversis suis clariorem, majori post obitum honore ornandum, & inter Orthodoxos collocandum, omni laude, prædicatione, literis, monumentisque esse decorandum.

Et quoniam in illis tot tantisque negotijs Regni, quæ tanquam Atlas cælum, tu sustines, animadvertimus te semper ex succisivis aliquot horas impendere meditationi & veterum Auctorum lectioni: Habe quæso hunc inter eos, quos tibi in pretio habendos, legendos, & eximie diligēdos proposuisti. Mea hæc studia & officia, quæ tibi honori & ornamento, ut debeo, esse concupivi, boni consule; tibi que persuade, me eorum qui tuas virtutes mirantur, te amant & colunt, quorum pro tua amplitudine magnus est numerus, nemini concessurum.

Colofonē imponent huic Apologetico pro Abaelardo ejusdem, parentalia & exequiæ, nec non vxoris. Præclare enim apud Euripidem Vlixes, dum vult suadere mactandam Manibus Achilleis Polyxenam, dicit se quādiu fruatur hac luce, modicis contentum honoribus; at sepulturam suam optat inspicere ornatissimam, *διὰ μακρὴν γὰρ ἡ χρεία*. Hic supremus cumulus felicitatis, sicut Virgilio apud Plinium Cornelius Tacitus, ita Abaelardo

PRÆFATIO APOLOGETICA

Contigit laudator eloquentissimus, Petrus nempe Venerabilis, & optatissima præfica, seu funera, quæ lacrymis ejus tumulum decoravit, æterumque fecit Heloissa præstantissima, quæ plùsne dilexerit an suspexerit maritum, in dubio reliquit. Prius Epitafium parum perspecta Græcanica prosodia, tale est,

*Gallorum Socrates, Plato maximus Hesperiarum,
Noster Aristoteles, Logicis, quicumque fuerunt,
Aut par, aut melior: studiorum cognitus orbi
Princeps, ingenio varius, subtilis, & acer:
Omnia visuperans rationis, & arte loquendi.
Abaelardus erat; sed tunc magis omnia vicit,
Cum Cluniacensem Monachum moremque professus,
Ad Christi veram transivit Filosofiam.
In qua longa va bene complens vltima vita,
Filosofis quandoque bonis se connumerandum
Spem dedit, vnderas Maio re vocante Kalendas.*

Posterius est eiusdem Auctoris, sed Elegiaco carmine.

*Petrus in hac petra latitat, quem mundus Homerum
Clamabat, sed iam sidera sidus habent.
Solerat hic Gallus, sed cum iam fata tulerunt,
Ergo caret regio Gallica sole suo.
Ille sciens quicquid fuit ulli scibile, vicit
Artifices, artes absque docente docens.
Vndecima Maij Petrum rapuere Calenda,
Privantes Logices atria Rege suo.
Est satis in cumulo, Petrus hic jacet Abailardus,
Cui soli patuit scibile quicquid erat.*

Obijt magnus ille Doctor XI. Kal. Maij, MCXLII. anno suo climacterico: Heloissa verò XVI. Kal. Iunij an. MCLXIII. creditur enim XX. annis & amplius marito supervixisse. Ejus Epitafium iv. Versibus comprehensum non est ejusdem Auctoris, cujus sunt præcedentia. Sed tamen libuit ascribere, quamvis majoribus præconiis fuerit dignissima, vtpote supra sexus modum eloquens.

*Hoc tumulo Abatissa jacet prudens Heloissa.
Paraclitum statuit, cum Paraclito requiescit.
Gaudia Sanctorum sua sunt super alta polorum.
Nos meritis precibusque suis exaltet ab imis.*

Have & vale, mi Abaelarde redivive, tibi ipsi tuisque cineribus Fœnix, & à veritate temporis filia in lucem erute. Hoc tibi dictum tolle memor.

*At mihi quod vi vo detraxerat invida turba,
Post obitum duplici fœnore reddet honor.*

FINIS APOLOGIÆ.

Sine Tempore Tempus.



ELENCHVS OPERVM

HOC VOLVMINE

CONTENTORVM.

EPISTOLAE Petri Abaelardi & Heloise,
quarum.
I. Historiam Calamitatum Abaelardi comple-
ctitur. pag. 3
VII. Originē Religionis Sanctimonialiū. pag. 94
VIII. Institutionem seu Regulam earundem.
pag. 130

Epistola Fulconis Prioris de Diogillo, ad Petrum Abaelardum.
pag. 217

Epistola Petri Abaelardi aduersus eos, qui ex auctoritate Bedae
Presbyteri arguere conantur Dionysium Areopagitam fuisse
Dionysium Corinthiorum Episcopum, & non magis fuisse Athe-
niensem Episcopum. pag. 224

Epistola eiusdem Abaelardi, contra quendam Canonicum Regula-
rem, qui Monasticum Ordinem deprimebat, & suum illi antefe-
rebat. pag. 228

Inuectiua in quendam ignarum Dialecticem, qui tamen eius stu-
dium reprehendebat, & omnia eius dogmata putabat sophisma-
ta & deceptiones. pag. 238

Elegia Hilary Petri Abaelardi discipuli, qua plangit recessum eius
ex Paracliso. pag. 243

Epistola Petri Abaelardi ad Bernardum Claraualensem Abbatē.
pag. 244

Exhortatio ad studium litterarum. pag. 251

De laude S. Stephani Protomartyris. pag. 263

Epistola aliquot Bernardi Claraual. Abb. ad Cardinales & Innocē-
f

INDEX OPERVM

<i>tium II. Papam contra Petrum Abaelardum.</i>	pag. 270. & seq.
<i>Rescripta Innocentij Papa contra eundem.</i>	pag. 299. & 301
<i>Berengarij Pictaviensis Abaelardi discipuli Apologeticus contra beatum Bernardum Claraual. Abbatem, & alios qui condemnauerunt Præceptorem suum.</i>	pag. 302
<i>Epistola eiusdem Berengarij ad Episcopum Mimatensem.</i>	pag. 320
<i>Inuectiua contra Carthusienses.</i>	pag. 325
<i>Petri Abaelardi Apologia seu Confessio fidei.</i>	pag. 330
<i>Epistola eiusdem Abaelardi ad G. Parisiensem Episcopum.</i>	pag. 334
<i>Epistola Petri Venerabilis Abbatis Clun. ad Innocentium II. Papam, pro Petro Abaelardo.</i>	pag. 335
<i>Epistola eiusdem Abbatis Clun. ad Heloisam Paracliti Abbatissam.</i>	pag. 337
<i>Episaphium Petri Abaelardi à Petro Venerabili scriptum.</i>	pag. 342
<i>Epistola Heloise ad Petrum Abbatem Cluniacensem,</i>	pag. 343
<i>Epistola alia Petri Clun. ad Heloisam,</i>	pag. 344
<i>Absolutio Petri Abaelardi.</i>	pag. 345
<i>Rescripta quadam summorum Pontificum ad Heloisam.</i>	pag. 346
<i>Petri Abaelardi expositio in Orationem Dominicam.</i>	pag. 359
<i>Expositio Symboli Apostolorum.</i>	pag. 368
<i>Expositio fidei in Symbolum Athanasij.</i>	pag. 381
<i>Heloise Paraclitensis Abbatissæ Problemata, cum Abaelardi Solutionibus.</i>	pag. 384
<i>Petri Abaelardi aduersus hereses Liber.</i>	pag. 452
<i>Commentarius super Epistolam S. Pauli ad Romanos, in quinque Libros diuisus.</i>	pag. 491
<i>Sermones per annum legendi, pag. 729. quorum.</i>	
I <i>De Incarnatione Domini.</i>	pag. 730
II <i>In Natali eiusdem.</i>	pag. 736
III <i>In Circumcisione.</i>	pag. 751
IV <i>In Epiphania</i>	pag. 764
V <i>In Purificatione sanctæ Mariæ.</i>	pag. 774
VI <i>In Septuagesima.</i>	pag. 783
VII <i>In Ramis palmarum.</i>	pag. 790
VIII <i>In eadem die</i>	pag. 797
IX <i>In eadem adhuc die.</i>	pag. 808
X <i>Item in eadem die.</i>	pag. 812
XI <i>De rebus gestis in diebus Passionis.</i>	pag. 818
XII <i>In die Pascha.</i>	pag. 847

PETRI ABAELARDI.

XIII. *Expositio Dominica Orationis, in diebus Rogationum.*

pag. 852

XIV. *Sermo de Cruce.*

pag. 860

XV. *In die Ascensionis.*

pag. 865

XVI. *In octava Ascensionis.*

pag. 868

XVII. *In die Pentecostes.*

pag. 870

XVIII. *Feria II. Pentecostes.*

pag. 878

XIX. *Feria III. Pentecostes.*

pag. 883

XX. *Feria IIII. Pentecostes.*

pag. 885

XXI. *Feria V. Pentecostes.*

pag. 889

XXII. *De sancto Petro.*

pag. 892

XXIII. *In conuersione sancti Pauli.*

pag. 897

XXIV. *De sancto Ioanne Euangelista.*

pag. 905

XXV. *In Assumptione beatae Mariae.*

pag. 908

XXVI. *In die sancti Marcellini Papae & Martyris, ad Monachos Rothomagenses reliquias habentes.*

pag. 917

XXVII. *In dedicatione Ecclesiae.*

pag. 921

XXVIII. *De sancta Susanna ad hortationem Virginum.*

pag. 925

XXIX. *De Eleemosyna.*

pag. 935

XXX. *In natali sancti Stephani vel ceterorum Diaconorum.*

pag. 941

XXXI. *De sancto Ioanne Baptista.*

pag. 946

XXXII. *In VI. Feria post Octauas Ascensionis.*

pag. 968

Introductio ad Theologiam, diuisa in tres libros.

pag. 973

Prosa de beata Virgine.

pag. 1136

Nota ad Historiam Calamitatum Abaelardi.

pag. 1141

f —

SVMMÆ PRIVILEGII.



Ex sanxit ne quis intra decennium typis mandet aut vendat, simul, aut separatim Petri Abaelardi S. Gildasii Ruyensis Abbatis, & Heloisæ coniugis eius, Epistolas, & Opera alia quæ reperiri potuerunt: Nunc primum ex manuscriptis Codicibus eruta, & in lucem edita, præter Nicolaum Buon Bibliopolam in alma Parisiorum vrbe commorantem. Qui secus faxit, præter librorum amissionem, graui pœna mulctabitur, vti latius patet in Regio diplomate. Dato Parisiis 26. die Iunij, anni 1615. Subsignat.

Ad mandatum Regiæ maiestatis.

RENOVARD.

ADMONITIO AD LECTOREM.

ETSI, Lector, Apologetica Epistola, quam Abaelardus ipse pro defensione sua scripsit, iam inter alias eius Epistolas semel inserta fuerit; tamen quia fidei Catholica puram ac sinceram professionem continet, & subsequens Doctorum Censura seu Precautio, lectioni Scriptorum eius adhibenda, sapius ad illam remittit, iterum hic eam tibi subycere nec iniucundum, nec forsan etiam inutile futurum credidimus.

PETRI ABAELARDI

APOLOGIA,

SEU CONFESSIO FIDEI.

UNIVERSIS ECCLESIAE SANCTAE FILIIS

Petrus Abaelardus ex eis unus, sed in eis minimus.

NOTVM prouerbiū est: Nil tam bene dictū, quod non possit depruari: & vt beatus meminit Hieronymus, *Qui multos scribit libros, multos sumit indices.* Ego quoq; , cū pauca scripserim, parua, vel, ad cōparationem aliorum, nulla, reprehensionis notam effugere non potui: cū tamē in his, de quibus grauitē accusor, nullā (sciat Deus) meam cognoscā culpā, nec, si qua fuerit, procaciter defendam. Scripsi fortē^{*al fortassis} aliqua per errorem, quā nō oportuit: sed Deum testem & iudicem in animam meam inuoco, quia in his, de quibus accusor, nil per malitiam, aut per superbiam prae-sumpsi. Multa in scholis multis loquutus sum, nec vnquam aquas furtiuas, vel panem absconditum habuit mea doctrina. Palām loquutus sum ad aedificationem fidei siue morum, quod mihi salubre visum fuit: & quaecunque scripsi, libenter omnibus exposui, vt eos iudices, non discipulos haberem. Quod si vspiam per multiloquium excessi, vt scriptum est, *In multiloquio non effugies peccatum*: nunquā importuna defensio me effecit hāreticum, paratus semper ad satisfactionem de malē dictis meis corrigendis, siue delendis: in quo certē proposito vsque in finem perseuerabo. Sed sicut meum est malē dicta mea, si qua sint, velle corrigere: sic cri-

*Proverb. cap.
10.*

*Aug. serm.
52. ad fratres
in heremo.
* al. conscri-
ptis
Greg. hom. 9.
lib. 1. super
Exechiel.*

mina mihi non rectè iniecta me propulsare conuenit. Cùm enim dicat beatus Augustinus, *Crudelis est qui famam suam negligit*, ac, iuxta Tullium, *Taciturnitas imitatur confessionem*; quæ scripta sunt * contra me capitulis æquum duxi respondere, videlicet ratione seruata, qua contra derogantium linguas beatus Gregorius fideles his instruit verbis. Sciendum est quia linguas detrahentium sicut nostro studio non debemus excitare, ne ipsi pereant; ita per suam malitiam excitatas debemus æquanimiter tolerare, vt nobis meritum crescat: aliquando autem etiam compescere, ne dum de nobis mala disseminant, eorum, qui audire nos ad bona poterant, corda innocentium corrumpât. Agnoscat ergo fraterna charitas me qualemcunque filium Ecclesiæ, cum ipsa integrè cuncta, quæ recipit, recipere; cuncta, quæ respuit, respuere: nec me vnquam vnionem fidei scidisse, quamuis impar cæteris morum qualitate.

Qvòd igitur mihi vel per malitiam impositum est quòd scripserim, Quia Pater plena potentia, Filius quædam potentia, Spiritus sanctus nulla potentia; hæc ego verba non tam hæretica, quàm Diabolica, sicut iustissimum est, abhorreo, detestor, & ea cum suo authore pariter damno. Quæ si quis in meis reperiatur scriptis, non solum me hæreticum, verum etiam hæresiarcham profiteor.

Tam Filium quàm Spiritum sanctum ex Patre profiteor esse, vt eiusdem sint cum Patre substantiæ, eiusdem penitus voluntatis atque potentiæ: quæ quorum omnino eadē substantia vel essentia, nulla potest esse vel voluntatis diuersitas, vel potentiæ inequalitas. Quisquis etiam me scripssisse asserit, quòd de substantia Patris Spiritus sanctus etiam non sit, malitiæ id vel ignorantia maximæ fuit.

SOLVM Filium Dei incarnatum profiteor, vt nos à seruitute peccati & à iugo Diaboli liberaret, & supernæ aditum vitæ, morte sua, nobis referaret.

IESVM Christum sicut verum & vnicum Dei Filium ex substantia Patris ante sæcula genitum, ita tertiam in Trinitate personam, Spiritum quoque sanctum ita ab ipso Filio, quàm à Patre procedentem & credens assero, & asserens credo.

GRATIAM Dei ita omnibus necessariam, vt nec naturæ facultas, nec arbitrij libertas sine illa sufficere possit ad salutem.

A P O L O G I A.

Ipsa quippè gratia nos præuenit ut velimus, ipsa subsequitur ut possimus, ipsa nos consociat, ut perseueremus.

DEVM ea solummodo posse facere credo, quæ ipsum facere conuenit: & quòd multa facere potest, quæ nunquam faciet.

M A L A * per ignorantia facta culpæ sunt abscribenda: maxime cum per negligentiam nostram contingat nos ignorare, quæ nobis necessarium erat prænosse. Qualis ille fuit, de quo Psalmista dicit, *Noluit intelligere ut benè ageret.* * al. Multa quoque
Psal. 35.

M A L A Deum impedire frequenter, fateor: quia non solù effectum malignantium præuenit, ne, quod volunt, possint: verumetiam voluntates eorum mutat, ut à malo, quod cogitauerunt, penitus diuertant.

Ex Adam, in quo omnes peccauimus, tam culpam quàm pœnam nos contraxisse assero: quia illius peccatum nostrorum quoque peccatorum omnium origo extitit atque causa.

CRUCIFIXORES Christi in ipsa crucifixione grauissimū peccatum fateor commisisse.

M V L T A de Christo dicuntur, quæ non tam secundum caput, quàm secundum corpus ipsius, quod est Ecclesia, sunt accipienda: ut ille Spiritus timoris, quod est initium sapientiæ, quem videlicet timorem perfecta charitas foras mittit. Huius ergo timoris spiritum in anima Christi, qui perfectissimā habuit charitatem, nunquam fuisse credendum est, qui tamē in inferioribus membris non deest. Tantę quippe perfectionis, & tantę securitatis anima illa extitit per ipsam Verbi unionem, ut sciret nil omnino se committere posse, vnde pœnas incurreret, vel Deum offenderet. Castum quippe timorem in sæculum sæculi permanentem, qui propriè reuerentia charitatis dicitur, tam ipsi anime Christi quàm electis Angelis & hominibus inesse semper recognosco. Vnde & de ipsius supernis spiritibus scriptum est, *Adorant dominationes, tremunt potestates.* * al. verè
Psal. 13.

P O T E S T A T E M ligandi atque soluendi successoribus Apostolorum omnibus, ut ipsis æquè Apostolis concessam esse profiteor, & tam indignis quàm dignis Episcopis, quandiu eos Ecclesia susceperit.

O M N E S in dilectione Dei & proximi æquales, æqualiter bonos esse confiteor & meritis pares: nec quicquam meriti a-

pud Deum deperire, si bonæ voluntatis affectus à suo præpe-
diatur effectu. Non enim Angelus, cum à Deo missus id quod
facere vult impleuerit, aut anima Christi suæ voluntati effe-
ctum addiderit, melior indè reputari debuit: sed equè quili-
bet bonus permanet, siue tempus operandi habeat, siue non,
dummodo æqualem bene operandi voluntatem teneat, nec
in eo, quod non operatur, remaneat.

DEVM Patrem æquè sapientem, & Filium æquè benignum
vt Spiritum sanctum profiteor: quia in nulla boni plenitudi-
ne, in nulla dignitatis gloria, vna personarum differre potest
ab alia.

A D V E N T V M Filij in fine sæculi posse attribui Patri, nun-
quam (sciat Deus) in mentem meam venit, nec se verbis meis
inseruit.

S I C & animam Christi non per se ad inferos descendisse,
sed per potentiam, omnino à meis verbis & sensu remotū est.

* al. quæ
moucant

N O V I S S I M V M quoque Capitulum, quod scripisse cri-
minor, quod neq; opus, neque voluntas, neque concupiscen-
tia, neque delectatio, quæ mouet eam*, peccatum sit, neque
debemus ea velle extinguere, nec minùs à meis tam dictis, quam
scriptis alienum est.

Q V O D autem Capitula contra me scripta tali fine ami-
cus noster concluderit, vt diceret, *Hæc autem capitula partim
in libro Theologiae magistri Petri, partim in libro Sententiarum eius-
dem, partim in libro, cuius titulus est, Scito te ipsum, reperta sunt,*
non sine admiratione maxima suscepi: cum nunquam liber
aliquis, qui Sententiarum dicatur, à me scriptus reperitur.
Sed sicut cætera contra me Capitula, ita & hoc quoque per
malitiam vel ignorantiam prolatum est.

* al. veneno

Psal. 14.

Mat. 6. 7:

S I qua igitur consolatio in Christo Iesu, si qua sunt viscera
pietatis, fraternam pietatem vestram exoro, ne innocentiam
meam, quam à culpa veritas liberat, nemo* respergendo de-
linquat. Charitatis quippe est, opprobrium non accipere ad-
uersus proximum, &, que dubia sunt, in meliorem partem in-
terpretari, & illam semper Dominicæ pietatis sententiam at-
tendere, *Nolite iudicare, & non iudicabimini: nolite condemna-
re, & non condemnabimini.*

EIVSDEM

PETRI ABAELARDI

EPISTOLA, ET FIDEI CONFESSIO

AD HELOISSAM.

SOROR mea Heloisa quondam mihi in seculo cara, nunc in Christo carissima, otiosum me mundo reddidit Logica. Aiunt enim peruersi peruertentes, quorum sapientia est in perditione, me in Logica præstantissimum esse, sed in Paulo non mediocriter claudicare. Cùmque ingenij prædicent acie, Christianæ fidei subtrahunt puritatem. Quia, ut mihi videtur, opinione potius traducuntur ad iudicium, quàm experientia magistratu. Nolo sic esse Philosophus, ut recalcitrem Paulo. Non sic esse Aristoteles, ut secludar à Christo. Non enim aliud nomen est sub cælo, in quo oporteat me saluum fieri. Adoro Christum in dextera Patris regnantem. Amplector eum vlnis fidei in carne virginali de Paracleto sumpta gloriosa diuinitus operantem. Et ut trepida sollicitudo, cunctæque ambages à corde tui pectoris explodantur, hoc de me teneto, quòd super illam petram fundavi consciëntiam meam, super quam Christus ædificauit Ecclesiam suam. Cuius petrae titulum tibi breuiter assignabo. Credo in Patrem, & Filium, & Spiritum sanctum, vnum naturaliter & verum Deum: qui sic in personis approbat Trinitatem, ut semper in substantia custodiat vnitatem. Credo Filium per omnia Patri esse coæqualem, scilicet æternitate, potestate, voluntate & opere. Nec audio Arrium, qui peruerso ingenio actus, imò dæmoniaco seductus spiritu, gradus facit in Trinitate; Patrē maiorem, Filium dogmatizans minorem: oblitus legalis præcepti: Non ascendes, inquit Lex, per gradus ad meum altare. Ad altare quippe Dei per gradus ascendit, qui prius & posterius in Trinitate ponit. Spiritum etiam sanctum Patri & Filio consubstantialem & coæqualem per omnia testor, ut pote quem bonitatis nomine designari volumina mea sæpe declarant. Damno Sabellium, qui eandem personam asserens Patris & Filij, Patrem passum autumauit; vnde & Patri-

P. ABAEL. APOLOGIA.

passiani dicti sunt. Credo etiam Filium Dei factum esse Filium hominis, vnamque personam ex duabus & in naturis duabus consistere. Qui post completam, susceptæ humanitatis dispensationem passus est & mortuus, & resurrexit, & ascendit in cœlum, venturusque est iudicare viuos & mortuos. Afferro etiam in baptismo vniuersa remitti delicta; gratiâque nos egere, quâ & incipiamus bonum, & perficiamus: lapsosque per pœnitentiam reformari. De carnis autem resurrectione quid opus est dicere, cum frustra glorier me Christianum, si non credidero resurrecturum? Hæc itaque est fides in qua sedeo, ex qua spei contraho firmitatem. In hac locatus salubriter, latratus Scyllæ non timeo, vertiginem Carybdis rideo, mortiferos Syrenarum modulos non horresco. Si irruat turbo, non quatior. Si venti perflent, non moueor. Fundatus enim sum supra firmam petram.



CENSURA DOCTORVM PARISIENSIVM.

Petri Abaelardi Opera, pia admodum & erudita, suis cum naui (quemadmodum fieri assolet in veterum scriptis) praelo commissa fuere. Quae quidem ut inoffenso quilibet decurrat pede, praeter animum, quem praese fert Auctor sua in Apologia, Ecclesia in omnibus adficientem; quid in quoque Operum eius loco salebrosum foret, à quibusdam Theologis Parisiensibus diligenter adnotatum, & indigitatum est: singulisque periculosioribus dictis praesens est adhibitum amuletum. Si quis tamen oculatior plura posthac animaduertat, rem omnibus vere Catholicis fecerit gratissimam.

QVAE NON SATIS AEQVA VERITATIS
lance librata sunt, in Abaelardi, Heloissa, &
aliorum quorundam Epistolis.

Pag. 31. l. 36. & sequenti p. 32. initio. Paulò acerbius cōque-
ritur Abaelardus (etsi tacito nomine) de DD. Bernardo &
Norbertho, qui eius erroribus magis quàm ipsi fuere infensi.

Pag. 42. Heloissa eosdem sanctos viros, pseudo-Apostolorum nomine laceffit, & cum ipsis alios quosdā acrius sugillat.

Pag. 45. l. 16. & 17. Quae extorserit à se noxius amor, non satis prudenter Heloissa commemorat.

Pag. 129. l. 9. & 10. Sentit Abaelardus à Catholica veritate absonum, mortuum aliquem Cathecumenum gloriam posse consequi. Verùm id est fidei consentaneum, si modò excessit contritus, & baptizari non abnuit, si quis hanc ei gratiam impertiri voluisset.

Pag. 168. l. 8. & p. 179. l. 9. Coniugalis debiti solutionē haud

penitus facit immunem à peccato. Hoc verò in ijs, qui rectitudinem & honestatem observant, minimè concedendum.

Pag. 222. Fulco in Epistola ad Abaelardum, sanctam Sedem Apostolicam temerè & virulenter proscindit.

Pag. 246. Dum Abaelardus arguit præsumptionis eum, qui in Oratione Dominica pro voce, *super substantialem*, substituit *quotidianum*, receptā in Ecclesia sic recitandi consuetudinem minimi pendit.

Pag. 302. Apologeticus Berengarij Scholastici pro Abaelardo præceptore suo, cùm sit contumeliosus in D. Bernardum, & Concilium Senonense, lucem non commeruit; sicut nec duæ sequentes eiusdem Epistolæ: quarum priore Apologetici sui maculas eluit, sed alias inurit sibi; posteriore Carthusianis scurriliter insultat.

In expositione Symboli.

Pag. 372. l. 26. Omnipotentiam Dei ieiunè explicat Abaelardus; sui forsan erroris memor, quo Deum ea solum posse facere, quæ quandoque facit, asseruerat. Sed hunc in Apologia errorem absterfit.

Pag. 378. l. 9. Animam Christi Domini ad inferos secundum propriam substantiam descendisse, videtur inficiari. At in Apologia secus censet.

Pag. 379. l. 28. Quia nullam ex ascensu ad cælos corpori Christi factam astringit beatitudinis accessionem, aduentitiam saltem cælestis habitaculi felicitatem, quam suspiciunt omnes, nimium extenuat.

In Heloissæ Problematibus.

Pag. 391. l. 14. in respōsione ad 111. Problema. Abaelardus dubitationem in fide affingit D. Virgini Mariæ, in morte filij sui, auctoritate D. Augustini in libro Quæstionum veteris & novi Testamenti: sed hic Liber totus est supposititius.

Pag. 406. l. 22. & 23. in solutione xlii. Problematis. Quod sic ex ignorantia innuincibili, id peccati damnat. In Apologia autem contrariam tuetur opinionem.

Pag. 407. l. 31. & 32. Innuincibilem eam ignorantiam falsò

tribuit iis, pro quibus Dominus in passione sua, & D. Stephanus orauere, vel ei qui iuxta Euangelium dixerit verbum contra filium hominis.

Pag. 417. l. 2. in solutione xv. Problematis. Legem Moſis nec docere, peccatum mente compleri, nec ex concupiscencia rei alienæ quempiam reum statuere, nec alium quàm Iudæum velut proximum diligendum definire, dum sentit Abaelardus, à veritate dissentit.

Pag. 419. l. 5. in solutione xvi. Problematis. Præceptum de diligendo proximo, à Christo Domino commemoratum, solos Iudæos deuincire autumat; nec videt Decalogi præcepta, quia iuris Naturæ sunt, singulos homines obstringere.

Pag. 426. l. 1. & 2. in solutione xxiv. Problematis. Quòd putat Iudæos mala vel bona ex ipsa intentione non diiudicare; de quibusdam solummodo admittendum.

Ibidem, l. ult. Contendit Abaelardus, nihil quicquam ad peccatum spectare, quòd cibum vetitum ore sumamus. Verum hoc pacto, maiorem peccati grauitatem, ex adiuncto opere externo, prorsus tollit.

Pag. 428. l. 12. in solutione xxv. problematis. Esau subtraham gratiam; abundantiorē intellige, non omnem.

In Libro aduersus Hæreses.

Liber hic, vt in Codice MS. nomen Abaelardi haud præſergerit, ita neque eius loquendi morem, stilum, aut mentis acumen sapit.

Pag. 485. l. 24. & 25. Author ait, Apostolos tantum manus imposuisse ijs, quos Prædicatores, Presbyteros, vel Diaconos instituebant; de alijs nequicquam ex S. Scriptura constare. Verum idem vsurpatum in consecratione Episcoporum, & Cōfirmationis sacramento, satis luculenter diuina producit eloquia.

In Commentarijs Epistolæ D. Pauli ad Romanos.

Pag. 549. l. 12. Verba hæc D. Pauli, *ostensionem suæ iustitiæ*, de charitate & iustitia nobis infusa intelligit Abaelardus, cū de charitate Christi, & iustitiâ, qua satisfecit pro nobis, capi præcipuè debeant.

Pag. 550. l. 26. Iis Abaelardi verbis, *cum solos electos liberaueris*, hanc adhibe cautionem. Electos liberat Christus, quia soli ipsa gloriam consequuntur, quam & ceteri, ni per ipsos staret, possent etiam per Christum promereri.

Pag. 551. l. 10. Censet dæmonem nullum ius in hominem quem seduxit, acquisisse: cum tamen æquissimo iure, homo per peccatum, pœnæ æternæ, & torquēti dæmoni obnoxius fiat. Quare Abaelardus rem acrius perscrutatus, Christū morte sua hominē à iugo diaboli liberasse, in Apologia profitetur.

Pag. eadem, l. 28. Beatæ Mariæ Virgini dimissum peccatum, ita accipe, quo videlicet peccauerat in Adam, non quod aliquando contraxerit.

Pag. 552. l. 2. Verbum diuinum hominem suscepisse caute legito, quia videlicet naturam humanam adsciuerit sibi.

Pag. 553. Iustificationem & redemptionem nostram in sanguine & morte Christi, sic quidem benè explicat Abaelardus, ut per ipsam, quam patiēdo & moriēdo exhibuit, charitatis immēsitatem, nos à seruitute peccati redemerit, & in libertatem filiorum Dei asseruerit. Sed quia passionem ipsam & mortem à charitate profectam, velut infinite iustitiæ & satisfactionis opus, omnibus exoluendis sceleribus & pœnis idoneum, aut non agnouit, aut subtrixit; genuinū de redemptione nostra Ecclesiæ Catholicæ sensum, vel non est secutus, vel non assecutus. Quæ cum iustissimè D. Bernardus Epist. c. x. coarguerit, hoc ab Abaelardo eliciuit Christianæ mentis testimonium in sua Apologia, *Solum filium Dei incarnatū profiteor, ut nos à seruitute peccati, & à iugo diaboli liberaret, & supernæ adiutam vitæ morte sua nobis referaret.*

Pag. 555. l. 30. & 31. In duobus aberrat, primò quòd censeat ei, qui antequam baptizetur iustus est, nondum in baptismo dimissa esse peccata: ille etenim per votum baptismi iam veniā delictorum est consecutus. Secundò, quia peccata nondum dimissa, pœnam non adhuc exolutam interpretetur.

Pag. ead. l. 35. Paruulos baptizatos nondum charitatis aut iustitiæ capaces, intellige per actiones elicitas.

Pag. 582. l. ult. Per peccata, quæ moriēdo Christus sustulit, perperam Abaelardus pœnam solum ipsorum ablatam exposuit. Sic & pag. 630. l. 12. & 14. ad eundem scopulum allidit.

Pag. 586. l. 7. Verba hæc D. Pauli, *in quo omnes peccauerunt*,

ad pœnam tantummodo reuocat, & reatum ipsum peccati originalis, in quem incurrerunt omnes, omittit. Pag. 588. l. 13. in eodẽ lubrico nutat, similiter & p. 590. l. 6. itidem & p. 592. l. 9. & 10. p. 597. l. 29. & 30. & l. 33. Sed eos omnes locos in Apologia hoc vno profligat firmamento. *Ex Adam, in quo omnes peccauimus, tam culpam quàm pœnam, nos contraxisse assero.*

Pag. 590. l. 29. Asseuerat Christum præcepto diuino fuisse coactum orare pro nobis. Verùm, huic sententiæ erroneus subest loquendi modus.

Pag. 591. l. penult. & pag. 600. quæ falsò numerum præfert 592. l. 36. Abaelardus peccata dimitti, perinde existimat, ac pœnam ipsorum condonari, & p. 592. l. 3. aliquem habere peccatum, præterita peccati actione, aliud nihil quàm remanere obnoxium pœnæ. Sed hanc illius opinionem Catholica explodit doctrina.

Pag. 596. l. 23 Eos solùm paruulos perhibet cum originis labe mortuos, qui si vixissent, pessimi erant futuri. At id prorsus videtur temerarium.

Pag. ead. l. 30. & 31. Damnari asserit infantes ob aliena peccata, verùm non aduertit, quam habent originis maculam, iis propriè vitæ aditum præcludere.

Pag. 697. l. 20. & 21. Minus aptè elicit, nō sic institutam vel confirmatam tempore Apostolorum, Quadragesimæ, vel sextæ feriæ abstinentiã, qualem nūc seruamus, eo quòd neophyti quidam apud D. Paulum nullum in comedendo diem ab alio secernerent.

In Concionibus.

Pag. 782. l. 9. In Sermone de Purif. B. Mariæ, sibi ipsi persuadet Iudæos nullam de obedientia sua in cælestib. promissionis remunerationem accepisse: quod equidem tantum verum est ex solis operibus legis, seposita fide & charitate.

Pag. 918. l. 25. D. Petrum non tātum satisfecisse ob trinam negationem, quantum Marcellinum pro incenso idolis oblato. Periculosa comparatio.

Pag. eadem l. 29. Culpam deputat, quod D. Paulus more Nazaræorum Deo se consecrarit, & Timotheum circumciderit, cū tamen in his minimè deliquerit.

Fol. 963. verso l. 27. Scribit neminem præsumere ita precari,

CENSURA DOCT. PARISIENS.

Omnes sancti Clerici, vel Episcopi, vel Canonici, orate pro nobis. At debuit meminisse hos Litaniarum Versiculos, Omnes sancti Pontifices, omnes sancti Sacerdotes & Levita, eundem fermè sensum obtinere.

Fol. 967.l.18.D. Norbertum insinuat frustra tentatę suscitationis mortui cuiusdam, fortè quia eum senserat suis dogmatibus aduersum.

In Introductione ad Theologiam.

P Ag. 980.l.4. Opinio Abaelardi, quod sola charitas remuneratione sit digna, abscedit à veritate. Etenim Fides, Spes, & ceterę virtutes, Charitate comite, æterna etiam reportant præmia. p.636.l.37.in idem impegit offendiculum.


Cætera, quę in hoc Introductionis Opusculo animaduersione digna videntur, ea sunt quę carpit D. Bernardus Epist. cx c. quibus & satisfacit Abaelardus publica fidei Catholicę professione, & aduersi erroris anathemate, Epistolâ vniuersis Ecclesię filiis inscripta. Vtramque consulat Lector in hoc Volumine, hanc fol. præced. & pag.330. illam pag. 276.

FINIS.

MAGISTRI
PETRI ABAELARDI
NANNETENSIS, THEOLOGI
ACUTISSIMI,
ET HELOISSÆ EIVS CONIVGIS, PRIMÆ
PARACLETI ABBATISSÆ,
EPISTOLÆ.

*Recens edita ex MSS. Codd. illustrissimi viri FRANCISCI AMBOSII, Regis
in sanctiore Consistorio Consilarii, Equitis, Baronis Chartra supra Ledum,
Domini in Hemerio, Mala-Noa, Neullio & Borotta.*

Cum Argumentis Fr. S. H. Guil.



WILLIAMS J. J. J. J.

1880

1880

1880

1880

1880



MAGISTRI
PETRI ABAELARDI
 ET HELOISSÆ EPISTOLÆ.

Ex MS. V. Ill. Francisci Ambosij Equ. &c.

EPISTOLA I.

Quæ est HISTORIA CALAMITATVM ABAELARDI,
 Ad Amicum scripta.

ARGVMENTVM.

Hanc Epistolam ex Monasterio Diui Gildasij, in minore Britannia sito, quod tunc ipse Petrus Abaelardus Abbas regebat, scribit ad Amicum, cuius nomen tota Epistola, licet proluxa, nec ipse edit; nec etiam Heloyssa, cum huius epistolæ meminit in secunda. Est autem narratoria. Toto enim Epistola textu suam vitam antè actam ab infantia ad illud vsque tēpus, quo hanc scripsit, diligenter enarrat: nullā tamen Ioannis Rozolini mentionem facit, quo Philosopho doctissimo præceptore vsus Otho Frisingensis Episcopus, grauis Scriptor, qui eodem vivebat tempore, affirmat. Caterū quid, quo animo egerit vel scripserit, quid passus sit, quanta inuidia amuli in eum exarserint, graphicè describit: atque obiectatoribus suis cursim ex occasione breuiter & argutè respondet. Denique hanc Epistolam potius ad propriam, quàm ad amici consolationem scripsisse videtur, scilicet ut & presentes calamitates ex recordatione præteritarum lenius ferret, & imminentium periculorū timorem facilius detergeret. Nullas enim amici molestias cum suis confert, ut ex cōparatione grauiorē appareāt.



Sed e' humanos affectus aut prouocant, aut mitigant ampliùs exempla quàm verba. Unde post nonnullam sermonis ad præsentem habiti consolationem, de ipsis Calamitatum mearum experimentis consolatoriam ad absentem scribere decreui: ut in comparatione mearum, tuas aut nullas, aut modicas tentationes recognoscas, & tolerabiliùs feras.

CAP. I.
De loco
natiuitatis
PETRI A.
BAELARDI.

De paren-
tibus eius.

* al. ambu-
lator.

CAP. II.
De perfe-
ctione
Magistri
sui GUIL-
IELMI.

* al. Meli-
duni ca-
strum.

Ego igitur oppido quodam oriundus, quod in ingressu minoris Britanniae constructum, ab vrbe Nannetica versus Orientem octo credo miliarijs remotum, proprio vocabulo Palatium appellatur. Sicut natura terrae meae vel generis animo leuis, ita & ingenio extiti ad literatoriam disciplinam facilis. Patrem autem habebam litteris aliquantulum imbutum antequam militari cingulo insigniretur. Vnde postmodum tanto literas amore complexus est, ut quoscumque filios haberet, litteris antequam armis instrui disponderet. Sicque profecto actum est. Sic itaque primogenitum suum quantum chariorem habebat, tantò diligentius erudiri curauit. Ego verò quantum amplius & facilius in studio literarum profeci, tantò ardentius in eis inhaesi, & in tanto earum amore illectus sum, ut militaris gloriae pompam cum hereditate & praerogatiua primogenitorum meorum fratribus derelinquens, Martis Curiae penitus abdicarem ut Mineruae gremio educarer. Et quoniam Dialecticarum rationum armaturam omnibus Philosophiae documentis praetuli, his armis alia commutavi, & trophaeis bellorum conflictus praetuli disputationum. Proinde diuersas disputando perambulans Prouincias, ubicumque huius artis vigere studium audieram, Peripateticorum aemulator * factus sum.

PERVENI tandem Parisios, ubi iam maximè disciplina haec florere consueuerat, ad Guillelmum scilicet Campellensem Praeceptorem meum in hoc tunc magisterio re & famam praecipuum: cum quo aliquantulum moratus primò ei acceptus, postmodum grauissimus extiti, cum nonnullas scilicet eius sententias refellere conarer, & ratiocinari contra eum saepius aggrederer, & nonnumquā superior in disputando viderer. Quod quidē & ipsi, qui inter conscholares nostros praecipui habebantur, tantò maiori sustinebant indignatione, quantum posterior habebam aetatis & studij tempore. Hinc calamitatum mearum, quae nunc vsque perseverant, coeperunt exordia, & quò amplius fama extendebatur nostra, aliena in me succensa est inuidia. Factum tandem est ut supra vires aetatis meae de ingenio meo praesumens, ad Scholarum regimen adolescentulus aspirarem, & locum, in quo id agerem, prouiderem; insigne videlicet tunc temporis Meldunū * castrum, & Sedem Regiam. Praesensit hoc praedictus Magister

meus, & quo longiùs posset Scholas nostras à se remouere conatus, quibus potuit modis latenter machinatus est; vt priusquam à suis recederem, Scholas nostras, & prouisum mihi locum auferret. Sed quoniam de potentibus terræ nonnullos ibidem habebat æmulos, fretus eorum auxilio voti mei compos extiti, & plurimorum mihi assensum ipsius inuidia manifesta conquisiuit. Ab hoc autem Scholarum nostrarum exordio * ita in arte Dialectica nomen meum dilatari cœpit, vt non solum condiscipulorum meorum, verum etiam ipsius Magistri fama contracta paulatim extingueretur. Hinc factum est, vt de me amplius ipse præsumens, ad castrum Corbolij, quod Parisiæ vrbi vicinius est, quanto cyus Scholas nostras transferrem: vt inde videlicet crebriores disputationis assultus nostra daret importunitas *. Non multo autem interiecto tempore ex immoderata studij afflictione correptus infirmitate coactus sum repatriare, & per annos aliquot à Francia quasi remotus, quærebar ardentius ab ijs, quos Dialectica sollicitabat doctrina. Elapsis autem paucis annis, cum ex infirmitate iamdudum conualuissem, Præceptor meus ille Guillelmus Parisiensis Archidiaconus, habitu pristino commutato ad Regularium Clericorum ordinem se conuertit; ea, vt referebant, intentione, vt quò religiosior crederetur, ad maiorem Prælationis gradum promoueretur, sicut in proximo contigit, eo Catalaunensi Episcopo facto. Nec tamen hic suæ conuersionis habitus aut ab vrbe Parisiaca, aut à consueto Philosophiæ studio eum reuocauit: sed in ipso quoque Monasterio, ad quod se causa religionis contulerat, statim more solito publicas exercuit Scholas. Tum ego ad eum reuersus vt ab ipso Rhetoricam audirem, inter cætera disputationum nostrarum conamina, antiquam eius de Vniuersalibus sententiam patentissimis argumentorum disputationibus ipsum commutare, imò destruere compuli. Erat autem in ea sententia de communitate Vniuersalium, vt eandem essentialiter rem totam simul singulis suis inesse astrueret indiuiduis; quorum quidem nulla esset in essentia diuersitas, sed sola multitudine accidentium varietas. Sic autem istam suam correxerat sententiam, vt deinceps rem eandem non essentialiter, sed individualiter * diceret. Et quoniam de Vniuersali-

De rectione ipsius apud Melidunum.

* al. tyrocinio.

De rectione apud Corboliū.

* opportunitas.

De impugnatione Magistri sui, & rectione apud Parisium.

* al. indifferenter.

* al. cor-
rexerit,
* al. dimise-
rit
* al. ad ex-
tera Diale-
cticæ

bus in hoc ipso præcipua semper est apud Dialecticos qua-
stio, ac tanta ut eam Porphyrius quoque in Isagogis suis, cum
de Vniuersalibus scriberet, diffinire non præsumeret, dicens:
Altissimum enim est huiusmodi negotium. Cum hanc ille
correxisset, * imò coactus dimisisset * sententiam, in tantam
lectio eius deuoluta est negligentiam, ut jam ad Dialecticæ
lectionem * vix admitteretur: quasi in hac scilicet de Vniuer-
salibus sententia tota huius artis cōsisteret summa. Hinc tan-
tum roboris & auctoritatis nostra suscepit disciplina, ut ij, qui
antea vehementiùs Magistro illo nostro adhærebant, & ma-
ximè nostram infestabant doctrinam, ad nostras conuolarent
Scholas; & ipse, qui in Scholis Parisiæ Sedis Magistro no-
stro successerat, locum mihi suum offerret, ut ibidem cum
cæteris nostro se traderet magisterio, vbi antea suus ille &
noster Magister floruerat. Paucis itaque diebus ibi me Stu-
dium Dialecticæ regente, quanta inuidia tabescere, quanto
dolore æstare cœperit Magister noster, non est facile expri-
mere. Nec conceptæ miseræ æstum diu sustinens, callidè ag-
gressus est me etiam tunc remouere. Et quia in me quod
apertè ageret nō habebat, ei Scholas auferre molitus est, tur-
pissimis obiectis criminibus, qui mihi suum concesserat Ma-
gisterium, alio quodā æmulo meo in locum * eius substituto.
Tunc ego Meledunum * reuersus, Scholas ibi nostras, sicut
antea, constitui: & quantò manifestiùs eius me persequeba-
tur inuidia, tantò mihi auctoritatis ampliùs conferebat, iuxta
illud Poëticum,

* al. ad offi-
cium.

* al. Meli-
dunum.

De recessu
à Parisiensi
ciuitate ad
Melidunū.

Quod. lib. r.
de remed. a-
mor.

* al. discre-
tos.

Summa petit liuor, perflant altissima venti.

De eius re-
gressu ad
montem S.
Genouefæ,
extra ciui-
tatem, &
conflictu
contra Ma-
gistrū suū.

Non multo autem post, cum ille intelligeret ferè omnes di-
scipulos * de religione eius plurimum hæsitare, & de con-
uersione ipsius vehementer susurrare, quòd videlicet à ci-
uitate minimè recessisset, transtulit se & Conuenticulum
fratrum cum Scholis suis ad villam quandam ab vrbe remo-
tam. Statimque ego Meleduno Parisius redij, pacem ab
illo vlteriùs sperans. Sed quia, ut diximus, locum nostrum ab
æmulo nostro fecerat occupari, extra ciuitatem in monte S.
Genouefæ, Scholarum nostrarum castra posui; quasi eum ob-
fessurus, qui locum occupauerat nostrum. Quo audito, Ma-
gister noster statim ad urbem impudenter rediens, Scholas
quas tunc habere poterat, & Conuenticulum fratrum ad pri-

stinum reduxit Monasterium, quasi militem suum, quem deseruerat*, ab obsidione nostra liberaturus. Verùm, cùm illi prodesse intenderet, maximè nocuit. Ille quippe antea aliquos habebat qualescumque discipulos, maximè propter lectionem* in qua plurimum valere credebatur. Postquam autè Magister aduenit, omnes penitus amisit, & sic à regimine Scholarũ cessare cõpulsus est. Nec post multũ tempus, quasi iam vlteriũs de mundana desperans gloria, ipse quoque ad Monasticam conuersus* est vitam. Post reditum verò Magistri nostri ad urbem, quos conflictus disputationum Scholares nostri, tam cum ipso, quàm cum discipulis eius habuerint, & quos fortuna euentus in his bellis dederit nostris, imò mihi ipsi in eis, te quoque res ipsa iam dudum edocuit. Illud verò Aiakis & temperantiũs loquar, & audacter proferam,

*al. dimiserat.

*propter lectiones Prisciani, in quibus;

*al. compulsus.

Ovid lib. xiii. Metamorph.

— si queritis huius

Fortunam pugne, non sum superatus ab illo.

Quòd si ego tacerẽ, res ipsa clamat, & ipsius rei finis indicat. Dum verò hæc agerentur, charissima mihi mater mea Lucia repatriare me compulit. Quæ videlicet post conuersionẽ Berengarij patris mei ad professionẽ Monasticam, idem facere disponebat. Quo completo, reuersus sum in Franciam, maximè vt de Diuinitate addiscerem, quando* iam sæpefatus Magister noster Guillelmus in Episcopatu Catalaunensi pollebat. In hac autè lectione Magister eius Anselmus Laudunensis maximam ex antiquitate auctoritatem tũc tenebat.

De repatriatione eius. Lucia mater. Berengarius pater.

*quoniam.

Accessi igitur ad hunc senem, cui magis longæus vsus, quàm ingenium vel memoria nomen comparauerat. Ad quem si quis de aliqua quæstione pulsandum accederet incertus, redibat incertior. Mirabilis quidem erat in oculis auscultantium, sed nullus in conspectu quæstionantium. Verborum vsus habebat mirabilem, sed sensu contemptibilem, & ratione vacuum. Cùm ignem accenderet, domum suam fumo implebat, non luce illustrabat. Arbor eius tota in foliis aspicientibus à longe conspicua videbatur, sed propinquantibus, & diligentius intuentibus infructuosa reperiēbatur. Ad hanc itaque cùm accessissem vt fructum indè colligerem, deprehendi illam esse ficulneam cui maledixit Dominus, seu illam veterem quercum, cui Pompeium Lucanus comparat, dicens,

CAP. III.
Quomodo Laudunum venit ad magistrum ANSELMUM

Math. 21.
Marc. 11.
Lucan. lib 1:
Pharsal.

*stat magni nominis umbra,
Qualis frugifero quercus sublimis in agro.*

Hoc igitur comperto, non multis diebus in umbra eius ociosus iacui. Paulatim verò me iam rarius ad lectiones eius accedente, quidam tunc inter discipulos eius eminentes grauer id ferebant, quasi tanti Magistri contemptor fierem. Proinde illum quoque aduersum me latenter commouentes, prauis suggestionibus ei me inuidiosum fecerunt. Accidit autem quadam die, ut post aliquas sententiarum collationes, nos Scholares inuicem iocaremur. Vbi cum me quidam animo intentantis interrogauisset, quid mihi de diuinorum lectione Librorum videretur, qui nondum nisi in Phisicis studueram: respondi saluberrimum quidem huius lectionis esse studium vbi salus animæ cognoscitur, sed me vehementer mirari, quòd his qui literati sunt, ad expositiones Sanctorum intelligendas, ipsa eorum scripta vel glossæ non sufficiant, ut alio scilicet non egeant magisterio*. Irridentes plurimi quæ aderant, an hoc ego possem & aggredi præsumerem, requisierunt. Respondi me id si vellēt experiri paratum esse. Tunc conclamantes* & amplius irridentes, Certè, inquit, & nos assentimus. Quærat, inquam*, & tradatur nobis* expositor alicuius inusitatae Scripturæ, & probemus quod vos promittitis. Et consenserunt omnes in obscurissima Ezechielis Prophetia. Assumpto itaque expositore statim in crastino eos ad lectionem inuitavi. Qui inuito mihi consilium dantes, dicebant ad rem tantam non esse properandum, sed diutius in expositione rimanda & firmanda mihi hâc inexperto vigilandū. Indignatus autem respondi non esse meæ consuetudinis per vsum proficere, sed per ingenium: atque adieci vel me penitus desitutum esse, vel eos pro arbitrio meo ad lectionem accedere non differre. Et primæ quidem lectioni nostræ pauci tunc interfuere, quòd ridiculum omnibus videretur me adhuc quasi penitus sacræ lectionis expertem* id tam propter aggredi. Omnibus tamen qui affuerunt intantum lectio illa grata extitit, ut eam singulari præconio extollerent, & me secundum hunc nostræ lectionis tenorē ad glosandum compellerent. Quo quidem audito, ij qui non interfuerant cœperunt ad secundam & tertiam lectionem certatim accedere*, & omnes pariter de transcribendis glosis, quas prima die incœperam,

* al. magistro.

* al. inclamantes.

* al. itaque.

* al. vobis.

Quomodo sacros cœperit legere libros scolasticis, & nouas cudere glossas.

* al. inexpertum.

* al. contēdere, & cōcurrere,

incœperam,

incœperam, in ipso eorum initio plurimum solliciti esse.

Hinc itaque prædictus senex vehementi commotus inuidia, & quorundam persuasionibus iam aduersum me, ut supra memini, extunc stimulatus; non minus in sacra lectione me persequi cœpit, quàm antea Guillelmus noster in Philosophia. Erant autem tunc in Scholis huius senis duo, qui cæteris præminere videbantur, Albericus scilicet Remensis, & Loculphus* Lombardus; qui quanto de se maiora præsumebant, ampliùs aduersum me accendebantur. Horum itaque maximè suggestionibus, sicut postmodum deprehensum est, senex ille perturbatus impudenter mihi interdixit inceptum glosandi opus in loco Magisterij sui ampliùs exercere. Hanc videlicet causam prætendens, ne si forte in illo opere aliquid per errorem scriberem, utpote rudis adhuc in hoc studio, ei deputeretur. Quod cùm ad aures Scholarium pervenisset, maxima commoti sunt indignatione super tam manifesta liuoris calumnia, quæ nemini vnquam vlteriùs acciderat. Quæ quantò manifestior, tantò mihi honorabilior extitit, & persequendo gloriosiore effecit.

Post paucos itaque dies Parisius reuersus, Scholas mihi iam dudum destinatas atque oblatas, vnde primò fueram expulsus, annis aliquibus quietè possedi, atque ibi in ipso statim Scholarum initio glosas illas Ezechielis, quas Lauduni incœperam, consummare studui. Quæ quidem ad ceteros legentibus acceptabiles fuerunt, ut me non minorem gratiam* in sacra lectione adeptum iam crederent, quàm in Philosophica viderant. Vnde vtriusque lectionis studio Scholæ nostræ vehementer multiplicatæ quanta mihi de pecunia lucra, quantam gloriam compararent, ex fama te quoque latere non potuit. Sed quoniam prosperitas stultos semper inflat, & mundana tranquillitas vigorem eneruat animi, & per carnales illecebras facilè resoluit: cùm iam me solum in mundo superesse* Philosophum æstimarem, nec vllam vlteriùs inquietationem formidarem; frena libidini cœpi laxare, qui antea vixeram continentissimè. Et quò ampliùs in Philosophia vel sacra lectione profecerā, ampliùs à Philosophis & Diuinis immunditia vitæ recedebam. Constat quippe Philosophos, nedum Diuinos, idest sacre lectionis exhortationibus intentos, continenz decore maximè polluisse. Cùm igitur totus in super-

CAP. IV.
De persecutione
Magistri
ANSILMI
in eum.

* al. Lotulphus : sed Othoni Frothinghamensi Leuiticus No-
uaticus.

* al. persecutum.

CAP. V.
Quomodo reuersus Parisius glosas suas, quas Lauduni legere cœperat, consummauit.
* al. gloriā

* al. superiorem.

1. Cor. 8.

bia atque luxuria laborarem, vtriusque morbi remedium diuina mihi gratia, licet nolenti, contulit; ac primo luxuriæ, deinde superbiæ. Luxuriæ quidem, his me priuando quibus exercebam. Superbiæ verò, quæ mihi ex literarum maximè scientia nascebatur, iuxta illud Apostoli, *Scientia inflat*: illius libri, quo maximè gloriabar, combustionem me humiliando. Cuius nunc rei vtramque historiam verius ex ipsa re, quàm ex auditu cognoscere te volo, ordine quidem quo processerunt. Quia igitur scortorum immunditiam semper abhorrebam, & ab excessu & frequentatione nobilium feminarum studij scholaris assiduitate reuocabar, nec laicarum conuersatione multum noueram; praua mihi, vt dicitur, fortuna blandiens commodiorem naçta est occasionem, qua me faciliùs de sublimitatis huius fastigio prosterneret: imò superbissimum, nec acceptæ gratiæ memorem diuina pietas humiliatum sibi vendicaret.

CAP. VI.
Quomodo
in amorem
Heloisæ
lapsus vul-
nus inde sa-
mentis qua
corporis
traxit.

*al. facere

ERAT quippe in ipsa ciuitate Parisius adolescentula quædam nomine Heloisia, neptis Canonici cuiusdam, qui Fulbertus vocabatur, qui eam quantò ampliùs diligebat, tantò diligentius in omnem quam poterat scientiam literarum promoueri studuerat. Quæ cum per faciem non esset infima, per abundantiam literarum erat suprema. Nam què bonum hoc, literatoriæ scilicet scientiæ, in mulieribus est rarius: eò ampliùs puellam commendabat, & in toto regno nominatissimam fecerat. Hanc igitur, omnibus circumspèctis, quæ amantes allicere solent, commodiorem censui in amorem mihi copulare, & me id facillimè credidi posse. Tanti quippe tunc nominis eram, & iuuentutis & formæ gratia præminebam, vt quamcumque feminarum nostro dignarer amore, nullam vererer repulsam. Tantò autem facilius hanc mihi puellam consensuram credidi, quantò ampliùs eam literarum scientiam & habere & diligere noueram, nosque etiam absentes scriptis internuntijs inuicem liceret præsentare, & pleraque audaciùs scribere quàm colloqui; & sic semper iocundis interesse colloquiis. In huius itaque adolescètulæ amorem totus inflammatus, occasionem quæsiui qua eam mihi domestica & quotidiana conuersatione familiarem efficerem, & facilius ad consensum traherem. Quod quidem ut fieret, egi cum prædicto puellæ auunculo quibusdam ipsius amicis in,

teruenientibus, quatenus me in domum suam, quæ Scholis nostris proxima erat, sub quocumque procurationis pretio susceperet. Hanc videlicet occasionem prætendens, quòd studium nostrum domestica nostræ familiæ cura plurimum præpediret, & impensa nimia nimium me grauaret. Erat autem cupidus ille valde, atque erga neptim suam, vt amplius semper in doctrinam proficeret literatoriam, plurimum studiosus. Quibus duobus faciliè assensum assecutus sum, & quod optabam obtinui; cùm ille videlicet & ad pecuniam totus inhiaret, & neptim suam ex doctrina nostra aliquid percepturam crederet. Super quo vehementer me deprecatus, supra quàm sperare præsumerem votis meis accessit, & amor consuluit: eam videlicet totā nostro Magisterio committens, vt quoties mihi à Scholis reuerso vacaret, tam in die quàm in nocte, ei docendæ operam darem, & eam si negligentem sentirem vehementer constringerem. In qua re quidem quanta eius simplicitas esset vehementer admiratus, non minus apud me obstupui quàm si agnam teneram famelico lupo committeret. Qui cùm eam mihi non solum docendam, verum etiam vehementer constringendam traderet; quid aliud agebat, quàm vt votis meis licentiam penitus daret, & occasionem, etiam si nollemus, offerret; vt quam videlicet blanditiis non possem, minis & verberibus facilius flecterem? Sed duo erant, quæ eum maximè à turpi suspitione reuocabant, amor videlicet neptis, & continentia meæ fama præterita. Quid plura? Primum domo vna coniungimur, postmodum animo. Sub occasione itaque disciplinae amor penitus vacabamus, & secretos regressus, quos amor optabat, studiū lectionis offerebat. Apertis itaque libris plura de amore quàm de lectione verba se ingerebant, plura erant oscula quàm sententiæ. Sæpius ad sinus quàm ad libros reducebatur manus: crebrius oculos amor in se reflectebat quàm lectio in scripturā dirigebat. Quòq; minus suspicionis haberemus, verbera quandoq; dabat amor, non furor; gratia, non ira, quæ omnium vnguentorum suauitatem transcenderent. Quid denique? nullus à cupidis intermissus est gradus amoris, & si quid insolitum amor excogitare potuit, est additum. Et quòd minùs ista fueramus experti gaudia, ardentius illis insistebamus, & minus in fastidium vertebantur. Et quò me

• al. recessus

amplius hæc voluptas occupauerat, minus Philosophiæ vacare poteram, & Scholis operam dare. Tædiosum mihi vehementer erat ad Scholas procedere, vel in eis morari, pariter & laboriosum, cum nocturnas amoris vigilias, & diurnas studio conseruarem. Quem etiam ita negligentem & tepidum lectio tunc habebat, ut iam nihil ex ingenio, sed ex usu cuncta proferrem: nec iam nisi recitator pristinorum essem inuentorum, & si qua inuenire liceret carmina, essent amatoria, non Philosophiæ secreta. Quorum etiam carminum plæraque adhuc in multis, sicut & ipse nosti, frequentantur & decantantur regionibus, ab his maximè quos vita simul

* al. similis
oblectat. * oblectabat. Quantam autem mœsticiam, quos gemitus, quæ lamenta nostri super hoc Scholares assumerent, ubi videlicet hanc animi mei occupationem, imò perturbationem præfenserunt, non est facile vel cogitare. Paucos enim iam res tam manifesta decipere poterat, ac neminem (credo) præter eum, ad cuius ignominiam maximè id spectabat; ipsum videlicet puellæ auunculum. Cui quidem hoc cum à nonnullis nonnunquam suggestum fuisset, credere non poterat; tum, ut suprà memini, propter immoderatam suæ neptis amicitiam: tum etiam propter antea actæ vitæ meæ continentiam cognitam. Non enim facile de his, quos plurimum diligimus, turpitudinem suspicamur. Nec in vehementi dilectione turpis suspicionis labes potest inesse. Vnde & illud est beati Hieronymi in Epistola ad Sabinianum: *Solemus mala domus nostræ scire nonisimi, ac liberorum ac coniugum vitia vicinis canentibus ignorare. Sed quod nonisimè scitur, utique sciri quandoque contingit, & quod omnes deprehendunt, non est facile unum latere.* Sic itaque pluribus euolutis mensibus & de nobis accidit. O quantus in hoc cognoscendo dolor auunculi! quantus in separatione amantium dolor ipsorum! quanta sum erubescencia confusus! quanta contritione super afflictione puellæ sum afflictus! quantos mœroris ipsa de verecundia mea sustinuit æstus! Neuter quod sibi, sed quod alteri contigerat querebatur. Neuter sua, sed alterius plangebat incommoda. Separatio autem hæc corporum maxima erat copulatio animorum, & negata sui copia amplius amorem accendebat, & verecundiæ transacta iam passio inuerecundiores reddebat: tãtòque verecundiæ minor extiterat passio,

Tom. I. E.
p. 48.

quantò conuenientior videbatur actio. Actum itaque in nobis est quod in Marte & Venere deprehensis Poëtica narrat fabula. Non multò autem post puella se concepisse compertit, & cum summa exultatione mihi super hoc illicò scripsit, consulens quid de hoc ipse faciendum deliberarem. Quadam itaque nocte auunculo eius absente, sicut nos condixeramus, eam de domo auunculi furtim substuli, & in patriam meam sine mora transmisi. Vbi apud sororem meam tam diu conuersata est, donec pareret masculum quem Astrolabium nominauit. Auunculus autè eius post ipsius recessum quasi in insaniam conuersus, quanto æstualet dolore, quanto afficeretur pudore nemo nisi experiendo cognosceret. Quid autem in me ageret, quas mihi tenderet insidias ignorabat. Si me interficeret, seu in aliquo corpus meum debilitaret, id potissimum metuebat ne dilectissima neptis hoc in patria mea plecteretur. Capere me & inuitum alicubi coercere nullatenus valebat, maximè cum ego mihi super hoc plurimum prouiderem, quòd eum si valeret, vel auderet, citius aggredi non dubitarem. Tandem ego eius immoderate anxietati admodum compatiens, & de dolo quem fecerat amor, tanquam de summa proditione, me ipsum vehementer accusans; conueni hominem supplicando & promittendo quamcumque super hoc emendationem, ipse constitueret. Nec vlli mirabile id videri asserens, quicumque vim amoris expertus fuisset, & qui quanta ruina summos quoquè viros ab ipso statim humani generis exordio mulieres deiecerint, memoria retineret. Atque vt ampliùs eum mitigarem supra quàm sperare poterat, obtuli me ei satisfacere, eam scilicet quam corruperam mihi matrimonio copulando; dummodo id secretò fieret, ne famæ detrimentum incurrerem. Assensit ille, & tam sua quàm suprum fide & osculis eam quam requisui concordiam mecum iniit, quòd me faciliùs proderet.

ILLICO ego ad patriam meam reuersus Amicam reduxi, vt vxorem facerem. Illa tamen hoc minimè approbante, imò penitus duabus de causis dissuadente; tam scilicet pro periculo, quàm pro dedecore meo. Iurabat illum nulla vnquam satisfactione super hoc placari posse, sicut postmodum cognitum est. Quærebat etiam quam de me gloriam habitura esset, cum me ingloriosum efficeret, & se & me pariter

Ouid. lib.
xiv. Metam.
Homer.
Odyss. lib.
viii.

CAP. VII.
Dehortatio
supradictæ
puellæ
à nuptijs.

humiliaret. Quantas ab ea mundus pœnas exigere deberet, si tantam ei lucernam auferret: quantæ maledictiones, quanta damna Ecclesiæ, quantæ Philosophorum lachrimæ hoc matrimonium essent secutura. Quàm indecens, quàm lamentabile esset, ut quem omnibus natura creauerat, vni me feminæ dicarem, & turpitudini tantæ subiacerem. Detestabatur vehementer hoc matrimonium, quod mihi per omnia probrosum esset, atque onerosum*. Prætendebat infamiam mei pariter & difficultates matrimonij, ad quas quidem vitandas nos exhortans Apostolus ait; *Solutus es ab uxore? noli querere uxorem. Si autem acceperis uxorem, non peccasti. Et si nupserit virgo, non peccabit. Tribulationem tamen carnis habebunt huiusmodi. Ego autem parco vobis. Et iterum. Volo autem vos sine sollicitudine esse.* Quod si nec Apostoli consilium, nec Sanctorum exhortationes de tanto matrimonij iugo susciperem: saltem, inquit, Philosophos consulere, & quæ super hoc ab eis vel de eis scripta sunt attenderem. Quod plerumque etiam Sancti ad increpationem nostram diligenter faciunt. Quale illud est beati Hieronymi in primo contra Iovinianum, ubi scilicet commemorat Theophrastum intolerabilibus nuptiarum molestijs, assiduisque inquietudinibus ex magna parte diligenter expositis, uxorem sapienti non esse ducendam evidentissimis rationibus adstrinxisse, ubi & ipse illas exhortationis Philosophicæ rationes tali fine concludens: *Hoc, inquit, & huiusmodi Theophrastus differens, quem non suffundat Christianorum?* Idem in eodem. Cicero, inquit, rogatus ab Hircio ut post repudium Terentia, sororem eius duceret; omnino facere supersedit, dicens non posse se & uxori & Philosophiæ operam pariter dare. Non ait operam dare, sed adiunxit pariter, nolens quicquam agere quod studio æquaretur Philosophiæ. Ut autem hoc Philosophici studij nunc omittam impedimentum, ipsum consule honestæ conuersationis statum. Quæ enim conuentio Scholarium ad pedissequas, scriptoriorum ad cubacula, librorum siue tabularum ad colos, stilorum siue calamorum ad fusos? Quis denique sacris vel Philosophicis meditationibus intentus pueriles vagitus, nutricum, quæ hos mitigant, nœnias, tumultuosam familiæ tã in viris quàm in feminis turbam sustinere poterit? Quis etiam inhonestas illas paruulorum sordes assiduas tolerare valebit? Id (inquies) di-

* d. inho-
norosum.

1. Cor. 7.

Ibidem.

Tom. 2. lib.
1. aduers.
Iovin.

uites possunt, quorum palatia vel domus amplæ diuersoria habent, quorum opulencia non sentit expensas, nec quotidianis sollicitudinibus cruciatur. Sed non est (inquam) hæc conditio Philosophorum quæ diuitum, nec qui opibus student vel secularibus implicantur curis, diuinis seu Philosophicis vacabunt officiis. Vnde & insignes olim Philosophi mundum maximè contemnentes, nec tam relinquentes seculum quàm fugientes, omnes sibi voluptates interdixerunt, vt in vnius Philosophiæ requiescerent amplexibus. Quorum vnus & maximus Seneca Lucilium instruens ait: *Non cum vacaueris philosophandum est: omnia negligenda sunt, vt huic assideamus, cui nullum tempus satis magnum est.* Non multum refert vtrum omittas Philosophiam an intermittas. Non enim vbi interrupta est manet. Resistendum est occupationibus, nec explicandæ sunt, sed submouendæ. Quod nunc igitur apud nos amore Dei sustinent qui verè Monachi dicuntur; hoc desiderio Philosophiæ, qui nobiles in gentibus extiterunt, Philosophi. In omni namque populo tam Gentili scilicet quàm Iudaico, siue Christiano, aliqui semper extiterunt fide seu morum honestate cæteris præminentes, & se à populo aliqua continentix vel abstinentix singularitate segregantes. Apud Iudæos quidem antiquitus Nazaræi, qui se domino secundum legem consecrabant, siue filij Prophetarum Helix vel Helisæi sectatores, quos beato attestante Hieronymo Monachos legimus in veteri Testamento. Nouissimè autem tres illæ Philosophiæ sectæ, quas Iosephus in libro Antiquitatum xviii. distinguens, alios Phariseos, alios Sadduceos, alios nominat Essæos. Apud nos verò Monachi, qui videlicet aut communem Apostolorum vitam, aut priorem illam & solitariam Ioannis imitantur. Apud Gentiles autem, vt dictum est, Philosophi. Non enim sapientiæ vel Philosophiæ nomen tam ad scientiæ perceptionem, quàm ad vitæ religionem referebant, sicut ab ipso etiam huius nominis ortu didicimus, ipsorum quoque testimonio Sanctorum. Vnde & illud est beati Augustini viii. de Ciuitate Dei libro, genera quidem Philosophorum distinguentis: *Italicum genus auctorem habuit Pythagoram Samium, à quo & fertur ipsum Philosophiæ nomen exortum. Nam cum antea sapientes appellaretur qui modo quodam laudabilis vite aliis prestare videbantur, iste interrogatus quid*

Epist. 73.

Tom. I. Epist. 4. § 13.

Cap. 2.

*proficeretur, Philosophum se esse respondit, id est studiosum vel amatorem sapientiae: quoniam sapientem profiteri arrogantissimum videbatur. Hoc itaque loco cum dicitur, qui modo quodam laudabilis vitae aliis prestare videbantur, aperte monstratur Sapientes gentium, id est, Philosophos ex laude vitae potius quam scientiae sic esse nominatos. Quàm sobriè autem atque continenter ipsi vixerint, non est nostrum modo exemplis colligere, ne Mineruam ipsam videar docere. Si autem sic Laici Gentilesque vixerunt, nulla scilicet professione religionis adstricti, quid te Clericum atque Canonicum facere oportet, ne diuinis officiis turpes praeferas voluptates, ne te praecipitem hæc Charibdis absorbeat, ne obscœnitatibus istis te impudenter atque irreuocabiliter immergas? Qui si Clerici prærogatiuam non curas, Philosophi saltem defende dignitatem. Si reuerentia Dei contemnitur, amor saltem honestatis impudentiam temperet. Memento Socratem vxoratum fuisse, & quàm fœdo casu hanc Philosophiae labem ipse primò luerit, vt deinceps cæteri exemplo eius cautiores efficerentur. Quod nec ipse præterit Hieronymus ita in primo contra Iovinianum de ipso scribens Socrate. *Quodam autem tempore cum infinita conuitia ex superiore loco ingerenti Xantippe restitisset: aqua profusus immunda nihil respondit amplius, quàm capite deterso*, Sciebam (inquit) futurum vt ista tonitrua imber sequeretur. Addebat denique ipsa & quàm periculosum mihi esset eam reducere, & quàm sibi charius existeret, mihi que honestius amicam dici quàm vxorem: vt me ei sola gratia conseruaret, non vis aliqua vinculi nuptialis constringeret. Tantòque nos ipsos ad tempus separatos gratiora de cōuentu nostro percipere gaudia, quantò rariora. Hæc & similia persuadens seu dissuadens, cum meam deflectere non posset stultitiam, nec me substineret offendere; suspirans vehementer & lachrymās perorationem suam tali fine terminauit. Vnum, inquit, ad vltimum restat, vt in perditione duorum minor non succedat dolor quàm præcessit amor. Nec in hoc ei, sicut vniuersus agnouit mundus, prophetiae defuit spiritus. Nato itaque paruulo nostro sorori meæ commédato Parisius occultè reuertimur, & post paucos dies nocte secretis orationum vigilijs in quadam Ecclesia celebratis, ibidem summo mane, auunculo eius atque quibusdam nostris vel ipsius amicis assistentibus,**

Abaelardus
Clericus &
Canonicus;

* al. demisso

Prophetia
Heloissæ.

Abaelardus
Heloissam
ducit in vxorem.

stentibus, nuptiali benedictione confœderamur. Moxque occultè diuissim abscessimus, nec nos vlteriùs nisi rarò latenterque vidimus, dissimulantes plurimùm quod egeramus. Auunculus autem ipsius, atque domestici eius, ignominia suæ solatium quærentes, initum matrimonium diuulgare, & fidē mihi super hoc datam violare cœperunt. Illa autem econtra anathematizare & iurare, quia falsissimum esset. Vnde vehementer ille commotus, crebris eam contumelijs afficiebat. Quod cū ego cognouissem, transmisi eam ad Abbatiam quandam Sanctimonialium prope Parisius, quæ Argenteolum appellatur: vbi ipsa olim puellula educata fuerat, atque erudita. Vestes quoque ei religionis, quæ conuersioni^{*al conuersioni.} Monasticæ conuenirent, excepto velo, aptari feci, & his eam indui. Quo audito, auunculus & cōsanguinei seu affines eius opinati sunt me nunc sibi plurimum illuxisse^{*al. illuxisse.}, & ab ea Moniali facta me sic facilè expedire. Vnde vehementer indignati, & aduersum me coniurati, nocte quadam quiescentem me atque dormientem in secreta hospitij mei camera, quodam mihi seruiente per pecuniam corrupto, crudelissima & pudentissima vltione punierunt, & quam summa admiratione mundus excepit: eis videlicet corporis mei partibus amputatis, quibus id quod plangebant commiseram. Quibus mox in fugam conuersis, duo qui comprehendi potuerunt oculis & genitalibus privati sunt. Quorum alter ille fuit supradictus seruientis, qui cū in obsequio meo mecum maneret, cupiditate ad proditionem ductus est.

Quomodo
castrat^{us} est.

MANE autem factō, tota ad me ciuitas congregata quantastuperet admiratione, quanta se affligeret lamentatione, quanto me clamore vexarent, quanto planctuperturbarent: difficile, imò impossibile est exprimere. Maximè verò Clerici, ac præcipuè Scholares nostri intolerabilibus me lamentis & eiulatibus cruciabant, vt multò ampliùs ex eorum compassionē quàm ex vulneris læderer passione, & plus erubescētiā quàm plagam sentirem, & pudore magis quàm dolore affligerer. Occurrebat animo quanta modo gloria pollebam, quàm facili & temporali casu hæc humiliata, imò penitus esset extincta. Quàm iusto Dei iudicio in illa corporis mei portione plecterer, in qua deliqueram. Quàm iusta proditione is, quem antea prodideram, vicem mihi retulisset. Quanta

CAP. VIII.
De plaga
illa corporis
eius.

* al. deno-
tandus.

Deuteron.
cap. 23.

Abaelardus
fuit Mona-
chus in Mo-
nasterio S.
Dionysij:
Heloissa
Sanctimo-
nialis apud
Argenteo-
lum.

Lucanus lib.
8. Phœsal.

laude mei æmuli tam manifestam æquitatē efferrent. Quan-
tam perpetui doloris contritionem plaga hæc parentibus
meis & amicis esset collatura. Quanta dilatatione hæc sin-
gularis infamia vniuersum mundum esset occupatura. Qua
mihi vlteriùs via pateret, qua fronte in publicum prodirem
omnium digitis demonstrandus*, omnium linguis corro-
dendus, omnibus monstruosum spectaculum futurus. Nec
me etiam parum confundeat, quòd secundum occidentem
legis literam tanta sit apud Deum Eunuchorum abomina-
tio, vt homines amputatis vel attritis testibus eunuchizati
intrare Ecclesiam tanquã olentes & immundi prohibeantur,
& in sacrificio quoque talia penitus animalia respuantur. Lib.
Num. cap. LXXIII. *Omne animal, quod est contritis, vel tonsis, vel
sectis, ablatisque testibus, non offeretis Domino.* Deutor. cap. XXI.
*Non intrabit Eunuchus attritis vel amputatis testibus, & abscisso
veretro, Ecclesiam Dei.* In tam misera me contritione positum
confusio, fateor, pudoris potiùs quàm deuotio conuersionis
ad Monastichorum latibula claustrorum compulit. Illa ta-
men priùs ad imperium nostrum spontè velata, & Monaste-
rium ingressa. Ambo itaque simul sacrum habitum suscep-
imus, ego quidem in Abbazia sancti Dionysij, illa in Monaste-
rio Argenteoli supradicto. Quæ quidem, memini, cùm eius
adolescenciam à iugo Monasticæ regulæ tanquam intolera-
bili pœna plurimi frustra deterrerent ei compatiens, in il-
lam Cornelix querimoniam inter lachrymas & singultus
prout poterat prorumpens, ait:

————— *ô maxime coniux!*
O thalamis indigne meis! hoc iuris habebat
In tantum fortuna caput? cur impia nupsit,
Si miserum factura fui? nunc accipe pœnas,
Sed quas sponte luam. —————

Atque in his verbis ad altare mox properat, & confestim ab
Episcopo benedictum velum ab altare tulit, & se monasticæ
professioni coram omnibus alligauit. Vix autem de vulnere
adhuc conualueram, cùm ad me confluentes Clerici tam ab
Abbate nostro, quàm à meipso continuis supplicationibus
efflagitabant; quatenus quod hucusque pecuniæ vel laudis
cupiditate egeram, nunc amore Dei operam studio darem:
attendens quod mihi fuerat à Domino talentum commis-

Matth. 25.

sum, ab ipso esse cum vsuris exigendum: & qui diuitibus maximè hucusque intenderam, pauperibus erudiendis amodò studerem. Et ob hoc maximè Dominica manu me nunc tactum esse cognoscerem, quò liberius à carnalibus illecebris, & tumultuosa vita seculi abstractus, studio literarum vacarem. Nec tam mundi quàm Dei verè Philosophus fierem. Erat autem Abbatia illa nostra, ad quam me contuleram, secularis admodum vitæ atque turpissimæ. Cuius Abbas ipse, quò cæteris prælatione maior, tantò vita deterior atque infamia notior erat. Quorum quidem intolerabiles spurcicias ego frequenter atque vehementer modò priuatim, modò publicè redarguens, omnibus me supra modum onerosum atque odiosum effeci. Qui ad quotidianam discipulorum nostrorum instantiam maximè gauisi, occasionem nacti sunt, qua me à se remouerent. Diu itaque illis instantibus atque importunè pulsantibus, Abbate quoque nostro & fratribus interuenientibus, ad Cellam quandam recessi, Scholis more solito vacaturus. Ad quas quidem tanta Scholarium multitudo confluxit, vt nec locus hospitii, nec terra sufficeret alimentis. Vbi, quod professioni meæ conuenientius erat, sacræ plurimum lectioni studium intendens, secularium artium disciplinam, quibus ampliùs assuetus fueram, & quas à me plurimum requirebant, non penitus abiici: sed de his quasi hamum quendam fabricaui, quo illos Philosophico sapore inescatos ad veræ Philosophiæ lectionem attraherem, sicut & summum Christianorum Philosophorum Origenem consueuisse Historia meminit Ecclesiastica. Cùm autem in diuina Scriptura non minorem mihi gratiam, quàm in seculari Dominus contulisse videretur, cœperunt admodum ex vtraque lectione Scholæ nostræ multiplicari, & cæterę omnes vehementer attenuari. Vnde maximè Magistrorum inuidiam atque odium aduersum me concitauit. Qui in omnibus quę poterant mihi derogantes, duo præcipuè absenti mihi semper obijciebant: quòd scilicet proposito Monachi valde sit contrarium secularium Librorum studio detineri, & quòd sine Magistro ad Magisterium diuinæ lectionis accedere præsumpsissem: vt sic videlicet omne mihi doctrinæ Scholaris exercitium interdiceretur, ad quod incessanter Episcopos, Archiepiscopos, Abbates, & quascumque

Euseb. Eccl. Hist. lib. 6. cap. 13

poterant religiosi nominis personas incitabant.

CAP. IX.
De libro
Theologiæ
suz, & per-
secutione
quam susti-
nuit à con-
discipulis.

Math. 15.

Remensis
Archiepiscopus in
Abaelardū.

Concilium
cōtra eum.

*al corrup-
tionem.

ACCIDIT autem mihi ut ad ipsum fidei nostræ funda-
mentum humanæ rationis similitudinibus differendum pri-
mò me applicarem, & quēdam Theologiæ Tractatum de V-
nitate & Trinitate diuina Scholaribus nostris componerem,
qui humanas & Philosophicas rationes requirebant, & plus
quæ intelligi quàm quæ dici possent efflagitabant: dicentes
quidem verborum superfluum esse prolationem, quam intel-
ligentia non sequeretur, nec credi posse aliquid nisi primi-
tus intellectum, & ridiculosum esse aliquem alijs prædicare
quod nec ipse nec illi quos doceret intellectu capere possent.
Domino ipso arguente quòd *cæci* essent *duces cæcorum*. Quem
quidem Tractatum cū vidissent & legissent plurimi, cœpit
in commune omnibus plurimum placere, quòd in eo pariter
omnibus satisfieri super hoc quæstionibus videbatur. Et quo-
niam quæstiones istæ præ omnibus difficiles videbantur,
quantò earum maior extiterat grauitas, tantò solutionis ea-
rum censebatur maior subtilitas. Vnde æmuli mei vehemen-
ter accensi Concilium contra me congregauerunt, maximè
duo illi antiqui insidiatores, Albericus scilicet & Lotulfus,
qui iam defunctis Magistris eorum & nostris, Guillelmo sci-
licet atque Anselmo, post eos quasi regnare se solos appet-
ebant, atque etiam ipsis tanquam hæredes succedere. Cū
autem vtrique Remis Scholas regerent, crebris suggestio-
nibus Archiepiscopum suum Rodolphum aduersum me
commouerunt, ut ascito Conano Prænestino Episcopo, qui
tunc legatione fungebatur in Gallia, Cōuenticulum quem-
dam sub nomine Concilij in SueSSIONENSIS ciuitate celebra-
rent; mēque inuitarent quatenus illud opus clarum, quod
de Trinitate composueram, mecum afferrem. Et factum
est ita. Antequam autem illuc peruenirem, duo illi præ-
dicti æmuli nostri ita me in Clero & populo diffamauerunt,
ut penè me populus paucosque qui aduenerant ex discipu-
lis nostris prima die nostri aduentus lapidarent, dicentes me
tres Deos prædicare & scripsisse, sicut ipsis persuasum fue-
rat. Accessi autem, mox ut ad ciuitatem veni, ad Legatum;
eique Libellum nostrum inspiciendum & dijudicandum
tradidi; & me, si aliquid scripsissem quod à Catholica fide
dissentiret, paratum esse ad correctionem* vel satisfactio-

nem obtuli. Ille autem statim mihi præcepit Libellum ipsum Archiepiscopo, illisque æmulis meis deferre, quatenus ipsi me iudicarent, qui me super hoc accusabant: ut illud in me etiam compleretur, & *inimici nostri sunt iudices*. Sæpius autem illi inspicientes atque reuoluentes Libellum, nec quid in audientia proferre aduersum me auderent inuenientes, distulerunt vsque in finem Concilij Libri, ad quam anhela-
bant, damnationem. Ego autem singulis diebus antequam sederet ^{* al. cederet} Concilium, in publico omnibus secundum quàm scripseram fidem Catholicam differebam, & cum magna admiratione omnes qui audiebant tam verborum apertio-
nem quàm sensum nostrum commendabant. Quod cum populus & Clerus inspiceret, cœperunt adinuicem dice-
re: Ecce nunc palam loquitur, & nemo in eum aliquid di-
cit. Et concilium ad finem festinat, maximè in eum ut au-
diuimus congregatum. Nunquid iudices cognouerunt, quia ipsi potius, quàm ille, errant? Ex quo æmuli nostri quoti-
die magis ac magis inflammabantur. Quadam autem die Albericus ad me animo intentatis ^{* al. inten-} cum quibusdam dis-
cipulis suis accedens, post quædam blanda colloquia di-
xit se mirari quoddam, quod in Libro illo notauerat: quod scilicet cum Deus Deum genuerit, nec nisi vnus Deus sit, negarem tamen Deum seipsum genuisse. Cui statim respondi. Super hoc, si vultis, rationem proferam. Non curamus, inquit ille, rationem humanam, aut sensum no-
strum in talibus, sed authoritatis verba solummodò. Cui ego. Vertite, inquam, folium Libri, & inuenietis autho-
ritatem. Et erat præsto Liber quem secum ipse detulerat. Reuolui ad locum, quem noueram, quem ipse minimè compererat, aut qui non nisi mihi nocitura quærebat. Et voluntas Dei fuit, ut citò occurreret mihi quod volebam. Erat autem sententia intitulata. Augustinus de Trinitate lib. 1. *Qui putat eius potentie Deum, ut seipsum ipse genuerit,* ^{cap. 1.}
eo plus errat quod non solum Deus ita non est; sed nec spirita-
lis creatura, nec corporalis. Nulla enim omnino res est, qua seip-
sum gignat. Quod cum discipuli eius, qui aderant, audis-
sent, obstupefacti erubescabant. Ipse autem, ut se quoquo-
modo protegeret: Bene, inquit, est intelligendum. Ego au-
tem subiici ^{* al. subiun-}, hoc non esse nouellum: sed ad præsens nihil

artinere, cum ipse verba tantum, non sensum requisisset. Si
 autem sensum & rationem attendere vellet, paratum me
 dixi ei ostendere secundum eius sententiam, quod in eam
 lapsus esset hæresim, secundum quam is qui pater est sui ipsius
 filius sit. Quo ille audito, statim quasi furibundus effectus,
 ad minas conuersus est, asserens nec rationes meas, nec au-
 thoritates mihi in hac causa suffragaturas esse. Atque ita
 recessit. Extrema verò die Concilij, priusquam residerent,
 diu Legatus ille atque Archiepiscopus cum æmulis meis &
 quibusdam personis deliberare cœperunt, quid de me ipso
 & Libro meo statueretur, pro quo maximè vocati fuerant.
 Et quoniam ex verbis meis, aut scripto quod erat in præsentì,
 non habebant quod in me prætenderent, omnibus aliquan-
 tulum conticentibus, aut iam mihi minùs apertè detrahen-
 tibus, Gaufridus Carnotensis Episcopus, qui cæteris Episco-
 pis & religionis nomine & sedis dignitate præcellebat, ita
 exorsus est. **NOSTRIS** Domini omnes qui adestis, hominis
 huius doctrinam, qualiscumque sit, eiusque ingenium, in
 quibuscumque studuerit multos affectatores * & sequaces
 habuisse, & Magistrorum tam suorum quàm nostrorum fa-
 mam maximè compressisse, & quasi eius vineam à mari vsque
 ad mare palmites suos extendisse. Si hunc præiudicio, quod
 non arbitror, grauaueritis, etiamsi rectè multos vos offen-
 suros sciatis, & non deesse plurimos qui eum defendere ve-
 lint; præsertim cum in præsentì scripto nulla videamus, quæ
 aliquid obtineant apertæ calumpniæ; & quia iuxta illud Hie-
 ronymi, *semper in propatulo fortitudo æmulos habet, feriuntque sum-
 mos fulgura montes*: Videte ne plus ei nominis conferatis vio-
 lenter agendo, & plus nobis criminis ex inuidia, quàm ei ex
 iustitia conquiramus. Falsus enim rumor, ut prædictus Do-
 ctor meminit, citò opprimitur, & vita posterior iudicat de
 priore. Si autem Canonicè agere in eum disponitis, dogma
 eius vel scriptum in medium proferatur, & interrogato libe-
 rè respondere liceat, ut conuictus vel confessus * penitus ob-
 mutescat. Iuxta illam saltem beati Nicodemi sententiam,
 qua Dominum ipsum liberare cupiens aiebat: *Nunquid lex
 nostra iudicat hominem, ubi audierit ab ipso prius, & cognouerit quid
 faciat?* Quo audito statim æmuli mei obstrepentes exclama-
 uerunt: **O sapiens** * consilium, ut contra eius verbositatem

* al. assen-
tatores.

Tom. 3.
Præm. in
quæst. Hebr.
in Genes.
Horat. lib. 2.
Carm. Od.
10.

Tom. 1. Ep.
10.

* al. cōfusus.

Ioan. 7.

* al. sapiētis.

contendamus, cuius argumentis vel sophismatibus vniuersus obistere mundus non posset ! Sed certè multò difficilius erat cum ipso contendere Christo , ad quem tamen audiendum Nicodemus iuxta Legis sanctionem inuitabat. Cùm autem Episcopus ad id quod proposuerat eorum animos iuducere non posset, alia via eorum inuidiam refrenare attemptat, dicens ad discussionem tantæ rei, paucos qui aderant non posse sufficere , maiorisque examinis causam hanc indigere. In hocque vlteriùs tantum suum esse consilium , vt ad Abbatiam meam, hoc est Monasterium sancti Dionysij, Abbas meus, qui aderat , me reduceret : ibique pluribus ac doctioribus personis conuocatis diligentiori examine quid super hoc faciendum esset statueretur. Assensit Legatus huic nouissimo consilio, & cæteri omnes. Indè mox Legatus assurrexit, vt Missam celebraret, antequam Concilium intraret, & mihi per Episcopum illum licentiam constitutam mandauit, reuertendi scilicet ad Monasterium nostrum , ibi expectaturo quod conditum fuerat. Tunc æmuli mei nihil se egisse cogitantes, si extra diocesim suam hoc negotium ageretur, vbi videlicet iudicium minimè exercere valerent, qui scilicet de iustitia minus confidebant, Archiepiscopo persuaferunt hoc sibi valdè ignominiosum esse, si ad aliam audientiam causa hæc transferretur, & periculosum fieri si sic euaderem. Et statim ad Legatum concurrentes, eius immutauerunt sententiam, & ad hoc inuitum pertraxerunt, vt Librum sine vlla inquisitione damnaret, atque in conspectu omnium statim cōbureret, & me in alieno Monasterio perenni clausura cohiberet. Dicebant enim ad damnationem Libelli satis hoc esse debere, quòd nec Romani Pontificis, nec Ecclesiæ autoritate commendatum legere publicè præsumpseram, atque ad transcribendum iam pluribus eum ipse præstitissem. Et hoc perutile futurum fidei Christianæ, si exemplo mei multorum similis præsumptio præueniretur. Quia autem Legatus ille minus quàm necesse esset literatus fuerat, plurimum Archiepiscopi consilio nitebatur *, sicut & Archiepiscopus illorum. Quod cùm Carnotensis præsensisset Episcopus, statim machinamenta hæc ad me retulit, & me vehementer hortatus est, vt hoc tantò leniùs tolerarem, quantò violentiùs agere eos omnibus patebat. Atque hanc

* al. vtebatur.

tam manifestæ inuidiæ violentiam eis plurimum obfuturam, & mihi profuturam non dubitarem. Nec de clausura Monasterij vllatenus perturbarer, sciens profectò Legatum ipsum, qui coactus hoc faciebat, post paucos dies, cum hinc recesserit, me penitus liberaturum. Et sic me ut potuit flentem flens & ipse consolatus est.

C A P. X.

De combustione
ipsius Libri.

VOCATVS itaque statim ad Concilium adfui, & sine vlllo discussionis examine meipsum compulerunt propria manu

Librum memoratum meum in ignem projicere. Et sic combustus est, ut tamen cum nihil dicere viderentur, quidam de aduersarijs meis id submurmuravit, quòd in Libro scriptum deprehenderat, solum Deum Patrem omnipotentem esse. Quod cum Legatus subintellexisset, valde admirans ei res-

*al. paruulo

pondit, hoc nec de puerulo* aliquo credi debere, quòd ad-

In Symbolo.

cò erraret: Cum communis, inquit, fides & teneat & profiteatur tres omnipotentes esse. Quo audito Terricus quidam Scholarum Magister irridendo subintulit illud Athanasij, &

tamen non tres omnipotentes, sed vnus omnipotens. Quem cum Episcopus suus increpare cœpisset, & reprimere quasi reum, qui in Majestatem loqueretur; audacter ille restitit, & quasi Danielis verba commemorans ait: *Sic fatui filij Israel, non in-*

Cap. 13.

dicantes neque quod verum est cognoscentes, condemnastis filium Israel. Reuertimini ad iudicium, & de ipso iudice indicate, qui talem iudicem quasi ad instructionem fidei & correctionem er-

*al. errorū.

roris* instituitis: qui cum iudicare deberet, ore se proprio condemnauit. Diuina hodie misericordia innocentem patēter, sicut olim Susannā à falsis accusatoribus, liberate. Tunc Archiepiscopus assurgens verbis, prout oportebat, commutatis sententiam Legati confirmauit, dicens: Re vera Domine, inquit, omnipotens Pater, omnipotens Filius, omnipotens Spiritus-sanctus. Et qui ab hoc dissentit, apertè deuius est, nec est audiendus. Et modo si placet, bonum est ut frater ille fidem suam coram omnibus exponat, ut ipsa prout oportet vel approbetur, vel improbetur, atque corrigatur.

Ibidem.

Cum autem ego ad profitendam & exponendam fidem meā assurgerem, ut quod sentiebam verbis proprijs exprimerem; aduersarij dixerunt non aliud mihi necessarium* esse, nisi ut Symbolum Athanasij recitarem, quod quiuis puer æquè facere posset. Ac ne ex ignorantia prætenderem excusationē,

*al. necessarium.

quasi

quasi qui verba illa in vſu non haberem, ſcripturam ad legendum aſſerri fecerunt. Legi inter ſuſpiria, ſingultus & lacrimas, prout potui. Indè quaſi reus & conuiſtus Abbati ſancti Medardi, qui aderat, traditus; ad clauſtrum eius tanquam ad carcerem trahor. Statimque Concilium ſoluitur. Abbas autem & Monachi illius Monasterij me ſibi remanſurum vlteriùs arbitrantur, ſumma exultatione ſuſceperunt, & cum omni diligentia tractantes conſolari fruſtra nitebãtur. Deus qui iudicas æquitatem, quanto tunc animi felle, quanta mentis amaritudine teipſum infamis arguebam, te furibundus accuſabam, ſapiùs repetens illam beati Anthonij conqueſtionem, *Ieſu bone ubi eras?* Quanto autem dolore æſtuarem, quanta erubeſcentia confunderer, quanta deſperatione perturbarer, ſentire tunc potui, proferre non poſſum. Conſerebam cum his quæ in corpore paſſus olim fueram, quanta nunc ſuſtinerem; & omnium hominum me æſtimabam miſerrimum. Paruam illam ducebam proditionem in comparatione huius iniuriæ, & longè ampliùs famæ quàm corporis detrimentum plangebam: cum ad illam ex aliqua * culpa deuenerim, ad hanc me tã patentem violentiam ſincera intentio amorque fidei noſtræ induxiſſent, quæ me ad ſcribendum compulerant. Cùm autem hoc tam crudeliter & inconfideratè factum omnes, ad quos famâ delatum eſt, vehementer arguerent, ſinguli qui interfuerant à ſe culpã repellentes in alios transfundebant: adeò vt ipſi quoque emuli noſtri idcõſilio ſuo factum eſſe denegarent, & Legatus coram omnibus inuidiam Francorum ſuper hoc maximè deteſtaretur. Qui ſtatim pœnitentia ductus poſt aliquos dies, cùm ad tempus coactus ſatiſfeciſſet illorum inuidiæ, me de alieno educitum Monasterio ad proprium remiſit; vbi ferè quotquot erãt olim iam, vt ſuprà memini, infeſtos habebam; cùm eorum vitæ turpitudine & impudens conuerſatio me ſuſpectum penitus haberent, quem * arguentem grauiter ſuſtinerent. Paucis autem elapſis menſibus, occaſionem eis fortuna obtulit, qua me perdere molirentur. Fortuitu namque mihi quadam die legenti occurrit quædam Bedæ ſententia, qua in expoſitione Actuum Apoſtolorum aſſerit Dionyſium Arcopagitam Corinthiorum potius quàm Athenienſium fuiſſe Episcopum. Quod valdè eis contrarium videbatur, qui ſuum Dionyſium

Apud Hieronymum. in eius vita.

** al. antiqua*

** al. quod*

*al Hildui.
nū. & restē.

De perse-
cutione Ab-
batis sui &
fratrum in
eum.

*al. imposi-
turierant.

esse illum Arcopagitam iactitant, quem ipsum Athenien-
sem Episcopum gesta eius fuisse profitentur. Quod cum re-
perissem, quibusdam circumstantium fratrum quasi iocan-
do monstraui, testimonium scilicet illud Bedæ, quod nobis
objiciebatur. Illi verò valde indignati dixerunt Bedam men-
dacissimum Scriptorem, & se Huldonium* Abbatem suum
veriores habere testes, qui pro hoc inuestigando Græciam
diu perlustrauit, & rei veritate agnita in gestis illius, quæ cō-
scripsit, hanc veraciter dubitationem remouit. Vnde cum
vnus eorum importuna interrogatione pulsaret, Quid mihi
super hac controuersia, Bedæ videlicet atque Huldonij, vi-
deretur; Respondi, Bedæ auctoritatem, cuius scripta vni-
uersæ Latinorum frequentant Ecclesiæ, gratiorem mihi vi-
deri. Ex quo illi vehementer accensi clamare cœperunt, nūc
me patenter ostendisse, quòd semper Monasterium illud no-
strum infestauerim, & quòd nunc maximè toti regno dero-
gauerim, ei videlicet honorem illum auferens, quo singulari-
ter gloriaretur; cum eorum Patronum Arcopagitam fuisse
denegarem. Ego autem respondi, nec me hoc denegasse, nec
multum curandum esse, vtrum ipse Arcopagita an aliunde
fuerit, dummodo tantam apud Deum adeptus sit coronam.
Illi verò ad Abbatem statim concurrentes, quod mihi impo-
suerant* nunciauerunt. Qui libenter hoc audiuit, gaudens se
occasionem aliquam adipisci qua me opprimeret, vtpote qui
quantò cæteris turpius vivebat, magis me verebatur. Tunc
Concilio suo congregato, & fratribus congregatis, grauiter
mihi comminatus est, & se ad Regem cum festinatione mis-
surum dixit, vt de me vindictam sumeret, tanquam regni sui
gloriam & coronam ei auferente. Et me interim bene obser-
uare præcepit, donec me Regi traderet. Ego autem ad regu-
larem disciplinam, si quid deliquissem, frustra me offerebam.
Tunc ego nequiciam eorum vehementer exhorrens, vtpote
qui tamdiu tam aduersam habuissem fortunam, penitus de-
speratus quasi aduersum me vniuersus coniurasset mundus,
quorundam consensu fratrum mei miserantium, & quorum-
dam discipulorum nostrorum suffragio, nocte latenter aufu-
gi, atque ad terram Comitum Theobaldi proximam, vbi antea
in Cella moratus fueram, abscessi. Ipse quippe & mihi ali-
quantulum notus erat, & oppressionibus meis quas audierat

admodum compatiebatur. Ibi autem in castro Priuigni^{mo-} morari cœpi, in Cellar^{videlicet} quadam Trecensium Monachorum, quorum Prior antea mihi familiaris extiterat, & valde dilexerat. Qui valde in aduentu meo gauisus, cum omni diligentia me procurabat. Accidit autem quadā die, vt ad ipsum castrum Abbas noster ad prædictum Comitem pro quibusdam suis negotiis veniret. Quo cognito accessi ad Comitem cum Priore illo, rogans eum quatenus pro me ipse intercederet ad Abbatem nostrum, vt me absolueret & licentiam daret viuendi monasticè vbicumque mihi competens locus occurreret. Ipse autem, & qui cum eo erant, in consilio rem posuerunt, respōsuri Comiti super hoc in ipsa die antequam recederent. Inito autem consilio, visum est eis me ad aliam Abbatiam velle transire, & hoc suę dedecus immensum fore. Maxima namque gloriæ sibi imputabant, quòd ad eos in cōuersione meā diuertissem, quasi cæteris omnibus Abbatij contemptis; & nunc maximum sibi imminere dicebant opprobrium, si eis abiectis ad alios transmearem. Vnde nullatenus vel me, vel Comitem super hoc audierunt. Imò mihi statim comminati sunt, quòd nisi festinus redirem, me excōmunicarēt. Et Priori illi, ad quē refugerā, modis omnibus interdixerunt, ne me deinceps retineret, nisi excōmunicationis particeps esse sustineret. Quo audito, tā Prior ipse quàm ego valde anxiiati fuimus. Abbas autem in hac obstinatione recedens, post paucos dies defunctus est. Cui cū alius successisset, conueni eum cum Episcopo Meldensi, vt mihi hoc, quod à prædecessore eius petieram, indulgeret. Cui rei cū nec ille primò acquiesceret, postea interuenientibus amicis quibusdam nostris, Regem & Consilium eius super hoc compellaui; & sic quod volebam impetraui. Stephanus quippe Regis tunc Dapifer, vocato in partem Abbate & familiaribus eius, quæsiuit ab eis cur me inuitum retinere vellent, ex quo incurrere facilè scandalum possent, & nullam vtilitatem habere; cū nullatenus vita mea & ipsorum conuenire[†] possent. Sciebam autem in hoc Regij Consilij sententiam esse, vt quò minus regularis Abbatia illa esset, magis Regi esset subiecta atque utilis, quantum videlicet ad lucra temporalia. Vnde me facile Regis & suorum assensum consequi credideram. Sicque actum est. Sed ne gloriationem suam,

* al. congruere.

quam de me habebat, Monasterium nostrum amitteret; concesserunt mihi ad quam vellem solitudinem transire, dummodo nulli me Abbatia subjugarem. Hocque in presentia Regis & suorum utrinque assensum est & confirmatum. Ego itaque ad solitudinem quandam in Trecensi pago mihi antea cognitam me contuli, ibique à quibusdam terra mihi donata, assensu Episcopi terræ Oratorium quoddam in nomine sanctæ Trinitatis ex calamis & culmo primum construxi. Vbi cum quodam clerico nostro latitans, illud verè Domino poteram decantare, *Ecce elongavi fugiens, & mansi in solitudine.*

Psalm. 54.

CAP. XI.

QUOD cùm cognouissent Scholares, cœperunt undique concurrere, & relictis ciuitatibus & castellis solitudinem inhabitare, & pro amplis domibus parua tabernacula sibi construere, & pro delicatis cibis herbis agrestibus & pane cibario victitare, & pro mollibus stratis culmum sibi & stramen comparare, & pro mensis glebas erigere. Et verè eos priores Philosophos imitari crederes, de quibus & Hieronymus in Libro secundo contra Iouinianum his commemorat verbis, *Per sensus quasi per quasdam fenestras vitiorum ad animam introitus est. Non potest metropolis & arx mentis capi, nisi per portas irruerit hostilis exercitus. Si Circensibus quispiam delectatur, si Athletarum certamine, si mobilitate histrionum, si formis mulierum, si splendore gemmarum, vestium, & cæteris huiusmodi, per oculorum fenestras anime capta libertas est, & impletur illud propheticum, Mors intrauit per fenestras nostras. Igitur cùm per has portas quasi quidam perturbationum cunei ad arcem nostræ mentis intrauerint, ubi erit libertas? ubi fortitudo eius? ubi de Deo cogitatio? Maxime cùm tactus depingat sibi etiam præteritas voluptates, & recordationem vitiorum cogat animam compati, & quodam modo exercere quod non agit. His igitur rationibus inuitati multi Philosophorum reliquerunt frequentias urbium & hortulos suburbanos, ubi ager irriguus, & arborum come, & susurrus auium, fontis speculum, riuus murmurans, & multe oculorum auriumque illecebre, ne per luxum & abundantiam copiarum anime fortitudo mollesceret, & eius pudicitia stupraretur. Inutile quippe est crebro videre per quæ aliquando captus sis, & eorum te experimento committere quibus difficulter careas. Nam & Pythagoræ huiusmodi frequentiam declinantes, in solitudine & desertis locis habitare consueuerant. Sed & ipse Plato cùm diues esset &*

Hierem. 9.

thorum eius Diogenes lutatis pedibus conculcaret, ut posset vacare Philosophiæ elegit Academiam villā ab vrbe procul non solum desertam, sed & pestilentem: ut cura & assiduitate morborum libidinis impetus frangerentur, discipuli que sui nullam aliam sentirent voluptatem nisi earum rerum quas discerent. Talem & filij Prophetarum Helisæo adherentes vitam referuntur duxisse. De quibus ipse quoque Hieronymus, quasi de Monachis illius tēporis, ad Rusticum Monachū inter cætera ita scribit: *Filij Prophetarum, quos Monachos in veteri legimus Testamento, edificabant sibi casulas prope fluentia Iordanis, & turbis & urbibus derelictis, polenta & herbis aggregstibus vitabant.* Tales discipuli nostri ibi super Arduzonem fluium casulas suas ædificantes, Heremitæ magis quàm Scholares videbantur. Quantò autem illuc maior Scholarium erat confluentia, & quantò duriores in doctrina nostra vitam sustinebant, tantò amplius mihi æmuli æstimabant gloriosum, & sibi ignominiosum. Qui cū cuncta quæ poterant in me egissent, omnia cooperari mihi in bonum dolebant: atque ita iuxta illud Hieronymi, me procul ab urbibus, foro, litibus, turbis remotum, sic quoque (ut Quintilianus, ait) latentem inuenit inuidia. Quia * apud semetipsum tacitè conquerentes, & ingemiscētes, dicebant: Ecce mundus totus post eum abiit, nihil persequendo profecimus: sed magis eum gloriosum effecimus. Extinguere nomen eius studuimus, sed magis accendimus. Ecce in ciuitatibus omnia necessaria Scholares ad manum habent, & ciuiles delicias contemnentes, ad solitudinis inopiam confluunt, & sponte miseri fiunt. Tunc autem præcipuè ad Scholarum regimen intolerabilis me compulit paupertas, cū fodere non valerem, & mendicare erubescerem. Ad artem itaque, quam noueram, recurrens*, pro labore manuum ad officium linguæ compulsus sum. Scholares autem vtrò mihi quælibet necessaria præparabant, tam in victu scilicet quàm in vestitu vel cultura agrorum, seu in expensis ædificiorum, ut nulla me scilicet à studio cura domestica retardaret. Cū autem Oratorium nostrum modicam eorum portionem capere non posset, necessariis ipsum dilatauerunt, & de lapidibus & lignis construētes

4. Reg. 6.

Tom. I.

Epist. 4.

* al. potuerant.

* al. Qui

* al. reuer-
tens

* al. inco-
lauerunt.
* al. honore.

* al. Para-
clitum, &
sic ubique.
De Paracle-
ti appella-
tione.

2. Cor. 1.

1. Ioan. 14.

* al. diuifa.

* al. festum.

meliorauerunt*. Quod cum in nomine* sanctæ Trinitatis
esset fundatum, ac postea dedicatum; quia tamen ibi profu-
gus ac tam desperatus diuinæ gratia consolationis aliquan-
tulum respirassem, in memoriam huius beneficii ipsum Pa-
racletum* nominaui. Quod multi audientes, non sine ma-
gna admiratione susceperunt, & nonnulli hoc vehementer
calumniati sunt; dicentes non licere Spiritui sancto specia-
liter magis quàm Deo Patri Ecclesiam aliquam assignari; sed
vel soli Filio, vel toti simul Trinitati secundum antiquam
consuetudinem. Ad quam nimirum calumniam hic eos er-
ror plurimum induxit, quòd inter Paracletum & Spiritum
paracletum nihil referre crederent. Cum ipsa quoque Tri-
nitas & quælibet in Trinitate persona sicut Deus vel adiutor
dicitur, ita & paracletus, id est consolator rectè nuncupetur,
iuxta illud Apostoli, *Benedictus Deus & Pater Domini nostri Je-
su Christi, Pater misericordiarum, & Deus totius consolationis, qui
consolatur nos in omni tribulatione nostra.* Et secundum quod
Veritas ait: *& alium Paracletum dabit vobis.* Quid etiam im-
pedit, cum omnis Ecclesia in nomine Patris, & Filij, & Spi-
ritus sancti pariter consecretur, nec sit eorum in aliquo pos-
sessio diuersa*, quòd domus Domini non ita Patri, vel Spiri-
tui sancto adscribatur, sicut Filio? Quis titulum eius, cuius
est ipsa domus, de fronte vestibuli radere præsumat? aut cum
se Filius in sacrificium Patri obtulerit, & secundum hoc in
celebrationibus Missarum specialiter ad Patrem orationes
dirigantur, & hostiæ fiat immolatio; cur eius præcipuè altare
esse non videatur, cui maximè supplicatio & sacrificium agi-
tur? Nunquid rectius eius cui immolatur, quàm illius qui im-
molatur, altare dicendum est? an melius Dominicæ Crucis,
aut Sepulchri, vel beati Michaelis, seu Ioannis, aut Petri, aut
alicuius Sancti, qui nec ibi immolantur, nec eis immolatur,
aut obsecrationes eis fiunt, altare quis esse confitebitur? Ni-
mirum nec inter Idololatrias altaria vel templa aliquorum di-
cebantur, nisi quibus ipsi sacrificium atque obsequium im-
pendere intendebant. Sed fortasse dicat aliquis, idèd Patri
non esse vel Ecclesias, vel altaria dedicanda, quòd eius ali-
quod factum* non existit, quod specialem ei solemnitatem
tribuat. Sed hæc profectò ratio ipsi hoc Trinitati aufert, &
Spiritui sancto non aufert. Cum ipse quoque Spiritus ex ad-

uentu suo propriam habeat Pentecostes solemnitate: sicut Filius ex suo, natalis sui festiuitatē. Sicut enim Filius missus est in mundū, ita & Spiritus S. in Discipulos propriā sibi vendicat solemnitatē. Cui etiam probabilius quā alicui aliarum personarum templum adscribendum videtur, si diligētius Apostolicam attendamus auctoritatem, atque ipsius Spiritus operationem. Nulli enim trium personarum speciale* templum specialiter adscribit Apostolus, nisi Spiritui sancto. Non enim ita templum Patris, vel templum Filij dicit, sicut templum Spiritus sancti, in prima ad Corinthios ita scribens: *Qui adheret Domino, vnus spiritus est.* Item, *An nescitis quia corpora vestra templum sunt Spiritus sancti, qui in vobis est, quem habetis à Deo, & non est vestri?* Quis etiam diuinorum sacramenta beneficiorum, quæ in Ecclesia fiunt, operationi diuinæ gratiæ, qua Spiritus sanctus intelligitur, nesciat specialiter adscribi? Ex aqua quippe & Spiritu sancto in baptismo renascimur, & tūc primò quasi speciale templum Deo constituimur. In consummatione quoque septiformis spiritus gratia traditur, quibus ipsum Dei templum adornatur atque dedicatur. Quid ergo mirum, si ei personæ, cui specialiter spirituale templum Apostolus tribuit, nos corporale assignemus? Aut cuius personæ rectius Ecclesia esse dicitur, quā eius, cuius operationi cuncta, quæ in Ecclesia ministrantur, beneficia specialiter assignantur? Non tamen hoc ita cogitamus*, vt cū Paracletum primò nostrum vocauerimus Oratorium, vni ipsum personæ nos dicasse fateamur; sed propter eam quam supra reddidimus causam, in memoriam scilicet nostræ consolationis. Quanquam si illo quoque, quo creditur, modo id fecissemus, non esset* rationi aduersum, licet consuetudini incognitum.

* al. spirituale,

1. Cor. 6.
Ibidem.

* al. agimus,

* al. est

Hoc autem loco me corpore latitante, sed fama tunc vniuersum mundum perambulante, & illius poëtici figmenti, quod Echo dicitur, instar penitus recinente*, quod videlicet plurimum vocis habeat, sed nihil subest: priores æmuli cū per se iam minus valerent, quosdam aduersum me novos Apostolos, quibus mundus plurimum credebatur, excitauerunt. Quorum alter regularium Canonicorum vitam, alter Monachorum se resuscitasse gloriabatur. Hi prædicando per mundum discurrentes, & me impudenter quantum pote-

CAP. XII.
De persecutione
quorūdam
quasi nouorum
Apostolorum
in eum.
Ouid lib. 3.
Metam.
* al. reser-
nante.

* *al. modicum.*

rant corroderes, non modicè tam Ecclesiasticis quibusdam quàm secularibus Potestatibus contemptibilem ad tempus effecerunt, & de mea tam fide quàm vita adeo sinistra disseminauerunt, vt ipsos quoque amicorum nostrorum præcipuos à me auerterent, & qui adhuc pristini amoris erga me aliquid retinerent, hoc ipsi modis omnibus metu illorum dissimularent. Deus ipse mihi testis est, quotiens aliquem Ecclesiasticarum personarum Conuentum adunari noueram, hoc in damnationem meam agi credebam. Stupefactus illicò quasi superuenientis ictum fulguris, expectabam vt quasi hæreticus aut prophanus in Concilijs traherer, aut Synagogis. Atque vt de pulice ad leonem, de formica ad elephãtem comparatio ducatur, non me mitiori animo persequerentur æmuli mei, quàm beatum olim Athanasium hæretici. Sæpè autem (Deus scit) in tantam lapsus sum desperationem, vt Christianorum finibus excessis, ad Gentes transire dispo-nerem, atque ibi quietè sub quacumque tributi pactione inter inimicos Christi Christianè viuere. Quos tantò integrè propitios me habiturum credebam, quantò me minus Christianum ex imposito mihi crimine suspicarentur, & ob hoc facilius ad sectam suam inclinari posse crederent.

CAP. XIII.

De Abbatia ad quam assumptus est, & persecutione tam filiorum, id est Monachorum, quam tyranni in eum.

* *al. Ruieris, et melius: vulgò de Ruys.*

CUM autem tantis perturbationibus incessanter affligerer, atque hoc extremum mihi superesset consilium, vt apud inimicos Christi ad Christum confugerem: occasionem quandam adeptus qua insidias istas paululum declinare me credidi, incidi in Christianos atque Monachos Gëtibus longò sauiiores, atque peiores. Erat quippe in Britannia minore in Episcopatu Venetensi Abbatia quædam sancti Gildasij Riuenfis* Pastore defuncto desolata. Ad quam me concors fratrum electio cum assensu Principis terræ vocauit, atque hoc ab Abbate nostro & fratribus facilè impetrauit. Sicque me Francorum inuidia ad Occidentem, sicut Hieronymum Romanorum expulit ad Orientem. Nunquam enim huic rei (sciat Deus) acquieuissem, nisi vt quocumque modo has, quas incessanter sustinebam, oppressiones, vt dixi, declinarem. Terra quippe barbara, & terræ lingua mihi incognita erat, & turpis atque indomabilis illorum Monachorum vita omnibus ferè notissima, & gens terræ illius inhumana atque incomposita. Sicut ergo ille, qui imminente sibi gladio perterritus

ritus in præcipitiū se collidit, & ut puncto temporis mortem
 vnam differat aliam incurrit: sic ego ab vno periculo in aliud
 scienter me contuli, ibique ad horrifoni vndas Oceani cū
 fugam mihi vlteriū terræ postremitas non præberet, sæpe in
 orationibus meis illud reuoluebam: *A finibus terre ad te cla-* *Psal. 60.*
mani, dum anxiaretur cor meum. Quanta enim anxietate illa
 etiam, quam regendam susceperam, indisciplinata fratrum
 congregatio cor meum die ac nocte cruciaret, cū tam ani-
 mæ meæ quàm corporis pericula pensarem, neminem iam
 latere arbitror. Certū quippe habebā, quod si eos ad regularē
 vitam, quam professe fuerant, cōpellere tentarem, me viuere
 non posse. Quod si hoc in quantum possem non agerem, me
 dānandum* esse. Ipsam etiam Abbatiam tyrannus quidam in
 terra illa potentissimus ita iam diu sibi subiugauerat, ex inor-
 dinatione scilicet ipsius Monasterij nactus occasionem, ut
 omnia loca Monasterio adiacentia in vsus proprios redegis-
 set, ac grauioribus exactionibus Monachos ipsos, quàm tri-
 butarios Iudæos, exagitaret. Urgebant me Monachi pro ne-
 cessitudinibus quotidianis, cū nihil in commune haberent
 quod eis ministrarem, sed vnusquisque de proprijs olim mar-
 supijs se & concubinas suas cum filijs & filiabus sustentaret.
 Gaudebant me super hoc anxari, & ipsi quoq; furabantur &
 asportabant quæ poterant, ut cū in administratione ipsa de-
 ficerem, compellerer* aut à disciplina cessare, aut omninò re- ** al. cōpel-*
 cedere. Cū autem tota terræ illius barbaries pariter exlex *lerent.*
 & indisciplinata esset, nulli erant hominum ad quorum con-
 fugere possem adiutorium, cū à moribus omnium pariter
 dissiderem. Foris me tyrannus ille & satellites sui assiduè op-
 primebant, intus mihi fratres incessanter insidiabantur: ut
 illud Apostoli in me specialiter dictum res ipsa indicaret, *foris* *1. Cor. 7.*
pugna, intus timores. Considerabam, & plangebam quàm in-
 utilem & miseram vitam ducerem, & quàm infructuosè tam
 mihi quàm alijs viuerem, & quantum antea Clericis profe-
 cissim, & quòd nunc eis propter Monachos dimissis, nec in
 ipsis, nec in Monachis aliquem fructum haberem, & quàm
 inefficax in omnibus inceptis atque conatibus meis redde-
 ret, ut iam mihi de omnibus illud improperari rectissimè de-
 beret: *Hic homo cepit adificare, & non potuit consummare.* Des-
 perabam penitus, cū recordarer quæ fugeram, & conside-
 rarem quæ incurrerem; & priores molestias quasi iam nullas

*al. Argen-
teoli.

*al. prædij
*al. quanto

*al. permot.
net.

reputans, crebrò apud me ingemiscens dicebam. Meritò hæc patior, qui Paracletum, id est consolatorem, deferens in desolationem certam me intrusi, & minas euitare cupiens ad certa confugi pericula. Illud autem plurimum nre cruciabat, quòd Oratorio nostro dimisso, de diuini celebratione officij ita vt oporteret prouidere non poteram; quoniam loci nimia paupertas vix vnus hominis necessitudini sufficeret. Sed ipse quoque verus Paracletus mihi maximè super hoc desolato veram attulit cōsolationem, & proprio prout debebat prouidit Oratorio. Accidit namque vt Abbas noster sancti Dionysij prædictam illam Argenteoli * Abbatiam, in qua religionis habitum nostra illa iam in Christo soror potius quàm vxor Heloissa susceperat, tanquam ad ius Monasterij sui antiquitus pertinentem, quocumque modo acquireret, & Conuentum inde Sanctimonialium, vbi illa comes nostra Prioratum habebat, violenter expelleret. Quæ cum diuersis locis exules dispergerentur, oblatam mihi à Domino intellexi occasionem, qua nostro consulerem Oratorio. Illuc namque reuersus, eam cum quibusdam aliis de eadem congregatione ipsi adhærentibus ad prædictum Oratorium inuitavi. Eoque illis adductis, ipsum Oratorium cum omnibus ei pertinentibus concessi & donaui; ipsamque postmodum donationem nostram assensu atque interuentu Episcopi terræ Papæ Innocentius secundus ipsis & earum sequacibus per priuilegium in perpetuum corroborauit. Quas ibi quidem primò inopem sustinentes vitam, & ad tempus plurimum desolatas, diuinæ misericordiæ respectus, cui deuotè seruebant, in breui consolatus est, & se eis quoque verum exhibuit Paracletum, & circumadiacentes populos misericordes eis atque propitios effecit. Et plus (sciat Deus) vt arbitror vno anno in terrenis commodis * sunt multiplicata, quàm ego per centum si ibi permansissem. Quippe quòd * feminarum sexus est infirmior, tantò earum inopia miserabilior facile humanos commouet * affectus, & earum virtus tam Deo quàm hominibus est gratior. Tantam autem gratiam in oculis omnium illi sorori nostræ, quæ cæteris præerat, Dominus annuit; vt eam Episcopi quasi filiam, Abbates quasi sororem, Laici quasi matrem diligerent: & omnes pariter eius religionem, prudentiam, & in omnibus incomparabilem patientiæ mansue-

tudinem admirabantur. Quæ quantò rariùs se videri permittebat, vt scilicet clauso cubiculo sacris meditationibus atque orationibus puriùs vacaret: tantò ardentius eius præsentiam atque spiritualis colloquij monita hi qui foris sunt efflagitabant.

Cum autem omnes earum vicini vehementer me culparent, quod earum inopiæ minus quàm possem & deberem consularem, & facile id nostra saltem prædicatione valerem: coepi sapiùs ad eas reuerti, vt eis quoquomodo subuenirem. In quo nec inuidiæ mihi murmur defuit, & quod me facere sincera charitas compellebat, solita derogantium prauitas impudentissimè accusabat; dicens me adhuc quadam carnalis concupiscentiæ oblectatione teneri, qui pristinæ dilectæ substinere absentiam vix aut nunquam paterer. Qui frequenter illam beati Hieronymi querimoniam mecum voluens, qui ad Asellam de fictis amicis scribens, ait: *Nibil mihi obijci-
tur nisi sexus meus, & hoc nunquam obijceretur nisi cum Hierosolimā
Paula proficiscitur.* Et iterum: *Antequam, inquit, domum sanctæ
Paulæ nossem, totius in me urbis studia consonabant, omnium penè
iudicio dignus summo sacerdotio decernebar. Sed scio per bonam &
malam famam peruenire ad regna calorum:* Cum hanc (inquam) in tantum virum detractiōis* iniuriā ad mentem reduce-
rem, non modicā hinc consolationem carpebam, inquiens: O si tantam suspiciōis causā æmuli mei in me reperirent, quanta me detrectatione opprimerent! Nunc verò mihi diuina misericordia ab hac suspiciōe liberato, quomodo huius perpetrandæ turpitudinis facultate ablata suspitio remanet? Quæ etiam tam impudens hæc criminatio nouissima? Adeò namque res ista omnem huius turpitudinis suspiciōē apud omnes remouet, vt quicumque mulieres obseruare diligentius student, eis Eunuchos adhibeant: sicut de Hester & cæteris Regis Assueri puellis sacra narrat Historia. Legim⁹ & potentem illum reginæ Cādacis Eunuchum vniuersis eius gazis præesse. Ad quem conuertendum & baptisandū Philippus Apostolus ab Angelo directus est. Tales quippe semper apud verecundas & honestas feminas tantò ampliùs dignitatis & familiaritatis adepti sunt, quantò longiùs ab hac absistebant suspiciōe. Ad quam quoque penitus remouendam maximum illum Christianorum Philosophum Orige-

CAP. XIV.
De infama-
tione turpi-
tudinis.

Tom. 2.
Epist. 99.

* al. detra-
ctionis.

Hest. 2.

Act. 8.

Eusebius.

* f. diuitius.

Prom. 22.

Serm. 52. ad
fratres in
Heremo.Rom. 12.
Ca. 12. can.
Nolo.

Cap. 4.

Luc. 8.

* al. mali-
guis

nem, cum mulierum quoque sanctæ doctrinæ intenderet, sibi ipsi manus intulisse Ecclesiasticæ Historiæ Liber vi. continet. Putabam tamen in hoc mihi magis quàm illi diuinam misericordiam propitiâ fuisse, ut quod ille minus prouidè creditur egisse, atque indè non modicum crimen incurrisset: id aliena culpa in me ageret, ut ad simile opus me liberum præpararet, ac tantò minore pœna, quantò breuiore ac subita, ut oppressus somno cum mihi manus iniicerent nihil pœnæ ferè sentirem. Sed quod tunc fortè minus pertuli ex vulnere, nunc ex detractione diuitius* plector, & plus ex detrimento famæ quàm ex corporis crucior diminutione. Si-
cut enim scriptum est, *Melius est nomen bonū quàm diuitiæ multæ.* Et ut beatus meminit Augustinus in Sermone quodam de vita & moribus Clericorum; *Qui fidens conscientie suæ negligit famam suam, crudelis est.* Idem suprâ, *Prouidemus*, inquit, bona, ut ait Apostolus, non solum coram Deo, sed etiam coram hominibus. Propter nos conscientia nostra sufficit in nobis. Propter nos fama nostra non pollui, sed pollere debet in nobis. Dux res sunt conscientia & fama. Conscientia tibi: fama proximo. Quid autem horum inuidia ipsi Christo vel eius membris, tam Prophetis scilicet quàm Apostolis, seu alijs Patribus sanctis obijceret, si in eorum temporibus existeret, cum eos videlicet corpore integros tam familiari conuersatione feminis præcipuè videret* sociatos. Vnde & beatus Augustinus in Libro de Opere Monachorum, ipsas etiam mulieres Domino Iesu Christo atque Apostolis ita inseparabiles comites adhæsisse demonstrat, ut & cum eis etiam ad prædicationem procederent. *Ad hoc enim*, inquit, *& fideles mulieres habentes terrenam substantiam ibant cum eis, & ministrabant eis de sua substantia, ut nullius indigerent horum quæ ad substantiam vitæ huius pertinerent.* Et quisquis non putat ab Apostolis fieri, ut cum eis sanctæ conuersationis mulieres cursitarent quocumque Euangelium prædicabant, Euangelium audiat & cognoscat quemadmodum hoc ipsius Domini exemplo faciebant. In Euangelio enim scriptum est, *Deinceps & ipse iter faciebat per ciuitates, & castella, Euangelizans regnum Dei, & duodecim cum illo, & mulieres aliquæ quæ erant curatæ à spiritibus immundis, & infirmitatibus, Maria quæ vocatur Magdalene, & Ioanna uxor Cuzæ procuratoris Herodis, & Susanna, & aliæ multæ quæ mi-*

ministrabant ei de facultatibus suis. Et Leo nonus * contra Epi-
 stolam Parmeniani * de Studij Monasterio, *Omnino*, inquit,
 profiteamur non licere Episcopo, Presbytero, Diacono, Subdiacono
 propriam uxorem causa religionis abjicere cura sua, ut non ei vi-
 ctum & vestitum largiatur, sed non ut cum illa carnaliter ia-
 ceat. Sic & sanctos Apostolos legimus egisse beato Paulo dicente:
 Nunquid non habemus potestatem sororem mulierem circumdu-
 cendi, sicut fratres Domini & Cephas? Vide insipiens quia non
 dixit, Nunquid non habemus potestatem sororem mulierem ample-
 ctendi, sed circumducendi; scilicet ut mercede predicationis sub-
 stentarentur ab eis, nec tamen deinceps foret inter eos carnale con-
 iugium. Ipse certè Phariseus, qui intra se de Domino ait,
 Hic, si esset propheta, sciret utique quæ & qualis esset mulier quæ
 tangit eum, quia peccatrix est: multo commodiorem, quan-
 tum ad humanum iudicium spectat, turpitudinis conie-
 cturam de Domino concipere poterat, quàm de nobis
 isti: aut qui Matrem eius Iuveni commendatam, vel Pro-
 phetas cum viduis maximè hospitari atque conuersari vi-
 debat, multo probabiliorem inde suspicionem contrahe-
 re. Quid etiam dixissent isti detractores nostri, si Mal-
 chum illum captiuium Monachum, de quo beatus scribit
 Hieronymus, eodem contubernio cum vxore victitan-
 tem conspicerent? Quanto id crimini adscriberent, quod
 egregius ille Doctor cum vidisset, maximè commendans
 ait; *Erat illic senex quidam nomine Malchus eiusdem loci indi-
 gena* *, anus quoque in eius contubernio. Studiosi ambo religio-
 nis, & sic Ecclesie limen terentes, ut Zachariam & Elisabeth
 de Euangelio crederes, nisi quòd Ioannes in medio non erat. Cur
 denique à detractioe sanctorum Patrum se continent,
 quos frequenter legimus, vel etiam vidimus, Monaste-
 ria quoque seminarum constituere, atque eis ministra-
 re; exemplo quidem septem Diaconorum, quos pro se
 Apostoli mensis & procurationi mulierum præfecerunt? Luc. 1.
 Adeò namque sexus infirmior fortioris indiget auxilio,
 ut semper virum mulieri quasi caput præesse Apostolus Act. 6.
 statuatur. In cuius etiam rei signo ipsam semper vela-
 tum habere caput præcipit. Vnde non mediocriter mi-
 nor consuetudines has in Monasterijs dudum inoleuisse,

* al. Ma-
 gous.
 * al. Par-
 menij

1. Cor. 9.

Luc. 7.

Ioan. 19.

3. Reg. 17.

Tom. 1. in
 vita Malchi.

* Tria verba
 præcedentia
 non habentur
 apud D. Hie-
 ronymum; sed
 eorum loco
 αὐτοχθόν,
 vox eisdem
 sensus.

Luc. 1.

Act. 6.

Ephes. 5.

1. Cor. 11.

quòd quemadmodum viris Abbates, ita & feminis Abbatis-
sæ præponantur, & eiusdem Regulæ professione tam feminæ
quàm viri se adstringant. In qua tamen pleraque continentur
quæ à feminis tam prælatis quàm subiectis nullatenus possunt
adimpleri. In plerisque etiam locis ordine perturbato natu-
rali ipsas Abbatisas atque Moniales Clericis quoque ipsis,
quibus subest populus, dominari conspiciamus, & tantò faci-
lius eos ad praua desideria inducere posse, quantò eis am-
plius habent præesse, & iugum illud in eos grauiissimum exer-
cere. Quod Satyricus ille considerans ait,

*Iuuenalis
Satyra 6.*

Intolerabilius nihil est quàm femina diues.

CAP. XV.

Hoc ego sæpè apud me pertractando, quantùm mihi li-
ceret, sororibus illis prouidere, & earum curam agere dispo-
sueram: & quò me amplius reuererentur, corporali quoque
præsentia eis inuigilare. Et cùm me nunc frequentior ac ma-
ior persecutio filiorum quàm olim fratrum affligeret, ad eas
de æstu huius tempestatis quasi ad quendam tranquillitatis
portum recurrerem, atque ibi aliquantulum respirarem, &
qui in Monachis nullum, aliquem saltē in illis assequerer fru-
ctum. Ac tantò id mihi fieret magis saluberrimum, quantò
id earum infirmitati magis esset necessarium. Nunc autem
ita me Sathanas impediuit, ut vbi quiescere possim, aut etiam
viuere, non inueniam: sed vagus & profugus ad instar male-
dicti Cain vbique circumferar: quem, ut supra memini, *foris*
pugne, intus timores incessanter cruciant, imò tam foris quàm
intus timores incessanter, pugne pariter & timores. Et multò
periculosior & crebrior persecutio filiorum aduersum me sæ-
uit quàm hostium. Istos quippe semper præsentem habeo, &
eorum insidias iugiter sustineo. Hostium violentiam in cor-
poris mei periculum video, si à claustro procedam. In clau-
stro autem filiorum, id est Monachorum mihi tanquam Ab-
bati, hoc est Patri, commissorum tam violenta quàm dolosa
incessanter sustineo machinamenta. O quotiens veneno
me perdere tentauerunt! sicut & in beato factum est Bene-
dicto. Ac si hæc ipsa causa, qua ille peruersos deseruit filios, ad
hoc ipsum me patenter tanti Patris adhortaretur exēplo: ne
me certo videlicet opponens periculo temerarius Dei tēpta-
tor potiusquā amator: imò meipsum perēptor inuenirer. A
talibus autem eorum quotidianis insidijs cùm mihi in admi-

*Genes. 4.
2. Cor. 7.*

*Gregor. lib. 2
Diab. c. 3.*

nistratione cibi vel potus quantū possem prouiderem, in ipso altaris sacrificio in toxicare me moliti sunt, veneno scilicet calici immisso. Qui etiam quadam die cū Namneti ad Comitē in ægritudine sua visitandum venissem, hospitatum me ibi in domo cuiusdam fratris mei carnalis, per ipsum qui in Comitatu nostro erat famulum veneno interficere machinati sunt, vbi videlicet me minus à tali machinatione prouidere crediderunt. Diuina autem dispositione tunc actum est, vt dum cibum mihi apparatus non curarem, frater quidam ex Monachis quem mecum adduxeram, hoc cibo per ignorantiam vsus ibidem mortuus occumberet, & famulus ille, qui hoc præsumperat, tam conscientię suę, quàm testimonio ipsius rei perterritus aufugeret. Ex tunc itaque manifesta omnibus eorum nequitia, patenter iam cœpi eorum prout poteram insidias declinare, etiam à Conuentu Abbatię me subtrahere, & in Cellulis cum paucis habitare. Qui si me transiturum aliquò præsensissent, corruptos per pecuniam latrones in vijs aut semitis, vt me interficerent, opponerant. Dum autem in istis laborarem periculis, fortē me die quadam de nostra lapsum equitatura manus Domini vehementer collisit, colli videlicet mei canalem confringēs. Et multò me ampliùs hæc fractura afflixit & debilitauit, quàm prior plaga. Quandoque horum indomitam rebellionem per excommunicationem coercens, quosdam eorum, quos magis formidabam, ad hoc compuli, vt fide sua seu sacramento publicè mihi promitterent, se vlteriùs ab Abbatia penitus recessuros, nec me ampliùs in aliquo inquietaturos. Qui publicè & impudentissimè tam fidem datam quàm sacramenta facta violantes, tandem per authoritatem Romani Pontificis Innocentij, Legato proprio ad hoc destinato, in præsentia Comitē & Episcoporum, hoc ipsum iurare compulsi sunt, & pleraque alia. Nec sic adhuc quieuerunt. Nuper autem cū illis, quos prædixi, eiectis ad Conuentum Abbatię rediissem; & reliquis fratribus, quos minus suspicabar, me committerem, multo hos peiores quàm illos reperi. Quos iam quidem non de veneno, sed de gladio in iugulum meum tractantes cuiusdam Proceris terrę conductu vix euasi. In quo etiam adhuc laboro periculo, & quotidie quasi ceruici meę gladium imminentem suspicio, vt inter epulas

Cicer. 5.
Tusc.
* al. pote-
statem.

vix respirem: sicut de illo legitur, qui cū Dionisij tyranni potentiam • atque opes conquistatas maximæ imputaret beatitudini, filio latenter appensum super se gladium aspiciens, quæ terrenam potentiam felicitas consequatur edoctus est. Quod nunc quoque ipse de paupere Monacho in Abbatem promotus incessanter experior, tantò scilicet miserior quanto ditior effectus; ut nostrò etiā exemplo eorum, qui id sponte appetunt, ambitio refrenetur. Hæc, dilectissime frater in Christo, & ex diutina conuersatione familiarissime comes, de calamitatum mearum Historia, in quibus quasi à cunabulis iugiter laboro, tuæ me desolationi atque iniuriæ illatæ scripsisse sufficiat; ut, sicut in exordio præfatus sum Epistolæ, oppressionem tuam in comparatione mearum, aut nullam, aut modicam esse iudices; & tantò eam patientius feras, quanto minorem consideras. Illud semper in consolationem assumens, quod mēbris suis de mēbris diaboli Dominus prædixit, *Si me persecuti sunt, & vos persequentur. Si mūdus vos odit, scitote quoniā me priorē vobis odio habuit. Si de mundo fuissetis, mundus quod suū erat diligeret.* Et: Omnes, inquit Apostolus, qui volunt piē viuere in Christo, persecutionē patientur. Et alibi. *Haud quæro hominibus placere. Si adhuc hominibus placerem, Christi seruus non essem.* Et Psalmista, *Cōfusi sunt, inquit, qui hominibus placēt, quoniā Deus spreuit eos.* Quod diligenter beatus attendens Hieronymus, cuius me præcipuē in contumelijs detractionum hæredem conspicio, ad Nepotianum scribens ait: *Si adhuc, inquit Apostolus, hominibus placerem, Christi seruus non essem. Desinit placere hominibus, & seruus factus est Christi.* Idem ad Ascllam de fictis amicis, *Gratias ago Deo meo, quòd dignus sim quem mundus oderit.* Et ad Heliodorum Monachum, *Erras frater, erras si putas vnquam Christianum persecutionem non pati. Aduersarius noster tanquam leo rugiens deuorare querens circuit, & tu pacem putas? Sedet in insidijs cum diuitibus.* His itaque documentis atque exemplis animati, tantò securius ista toleremus, quanto iniuriosius accidunt. Quæ si non ad meritum nobis, saltem ad purgationem aliquam proficere non dubitemus. Et quoniam omnia diuina dispositione • geruntur, in hoc se saltem quisque fidelium in omni pressura consoletur, quòd nihil inordinatè fieri vnquam summa Dei bonitas permittit, & quòd quæcumque peruersè fiunt optimo fine ipse terminat.

Ioan. 15.
Ibidem.
Ibidem.
2. Tim. 3.
Galat. 1.

Psal. 82.

Tom. 2.
Epist. 2.

Tom. 2. Ep.
99.
To. 1. Ep. 1.

1. Petr. 5.
Psal. 9.

* al. dispen-
satione

minat. Vnde & ei de omnibus rectè dicitur; *Fiat voluntas tua.* Matt. 6. 26.
 Quanta denique diligentium Deum illa est ex autoritate
 Apostolica consolatio, quæ dicit: *Scimus quoniam diligentibus* Rom. 8.
Deum omnia cooperantur in bonum. Quod diligenter ille sapien-
 tissimus attendebat, cùm in Prouerbijs diceret: *Non contri-* Prouerb. 12.
stabit iustum quicquid ei acciderit. Ex quo manifestè à iustitia
 eos recedere demonstrat, quicunque pro aliquo suo grau-
 amine his irascuntur, quæ erga se diuina dispensatione geri
 non dubitant; & se propriæ voluntati magis quàm diuinæ
 subijciunt, & ei quod in verbis sonat, *fiat voluntas tua*, desi-
 derijs occultis repugnant, diuinæ voluntati propriam ante-
 ponentes. VALE. Matt. 6. 26.

EPISTOLA II.

Quæ est HELOISSÆ ad PETRVM Deprecatoria.

ARGVMENTVM.

Cùm Heloyssa quondam Abaclardi amica, postea vxor, ac tandem Monasterio Paracletensi, quod ipse sibi discipulorum fortune à fundamentis eduxerat, ab eo præfecta, Epistolam eius ad Amicum legisset: hanc ad eum scribit, orans vt de suis periculis vel liberatione ad se rescribas, quò vel luctus, vel gaudij eius particeps efficiatur. Expostulas etiam quòd ad se post Monasticam professionem non scripserit, cùm antea plures amatorias mitteres literas. Suum denique erga illum tum præteriti temporis turpem & carnalem amorem, tum præsentis castum & spiritalem exponit: ac acerbè queritur se ab illo aquè non redamari. Est autem Epistola multis affectibus & querulis planctibus more femineo affatim plena: vbi pectus femineum multa eruditione exuberans intueri liceat.

Domino suo, imò patri; coniugi suo, imò fratri; ancilla sua,
 imò filia; ipsius vxor, imò soror;
 Abaclardo Heloissa.



ISSAM ad Amicum pro consolatione Epistolam, dilectissime, vestram ad me fortè quidam nuper attulit. Quam ex ipsa statim tituli fronte vestram esse considerans, tantò ardentius eam cœpi legere, quantò Scriptorem ipsum charius amplector: vt cuius rem perdidi, verbis saltem tanquam eius quadam imagine recreer. Erant, memini, huius Epistolæ ferè omnia felle & absinthio plena,

quæ scilicet nostræ conuersionis miserabilem historiam, & tuas, vnice, cruces assiduas referebant. Complesti re vera in Epistola illa quod in oxordio eius Amico promisti, vt videlicet in comparatione tuarum suas molestias nullas vel paruas reputaret. Vbi quidem expositis prius Magistrorum tuorum in te persecutionibus, deindè in corpus tuum summæ proditionis iniuria, ad condiscipulorum quoque tuorum, Alberici videlicet Remensis, & Lotulfi Lombardi execrabilem inuidiam, & infestationem nimiam stilum contulisti. Quorum quidem suggestionibus quid de glorioso illo Theologiæ tuæ opere, quid de te ipso quasi in carcere damnato actum sit non prætermisisti. Indè ad Abbatis tui fratrumque falsorum machinationem accessisti, & detractiones illas tibi grauissimas duorum illorum pseudoapostolorum à prædictis æmulis in te commotas, atque ad scandalum plerisque subortum de nomine Paraclæti Oratorio præter consuetudinem imposito: denique ad intolerabiles illas & adhuc continuas vitæ persecutiones, crudelissimi scilicet illius exactoris, & pessimorum, quos filios nominas, Monachorum profectus miserabilem Historiam consummasti. Quæ cū siccis oculis neminem vel legere vel audire posse æstimem: tantò dolores meos ampliùs renouarunt, quantò diligentius singula expresserunt & eo magis auxerunt, quò in te adhuc pericula crescere retulisti; vt omnes pariter de vita tua desperare cogamur, & quotidie vltimos illos de nece tua rumores trepidantia nostra corda & palpitantia pectora expectent. Per ipsum itaque, qui te sibi adhuc quoquomodo protegit, Christum obsecramus; quatenus ancillulas ipsius & tuas crebris literis de his, in quibus adhuc fluctuas, naufragijs * certificare digneris; vt nos saltem quæ tibi solæ remansimus, doloris vel gaudij participes habeas. Solent etenim dolenti nonnullam afferre consolationem qui condolent, & quodlibet onus pluribus impositum leuius sustinetur, siue defertur. Quòd si paululum hæc tempestas quieuerit, tantò ampliùs maturandæ sunt literæ, quanto sunt iocundiores futuræ. De quibuscumque autem nobis scribas, non paruum nobis remedium conferes; hoc saltem vno quod te nostri memorem esse monstrabis. Quam iocundæ verò sint absentium literæ amicorum, ipse nos exemplo proprio Seneca docet, ad amicum Lucilium

* al. nau-
fragus

quodam loco sic scribens: *Quod frequenter mihi scribis, gratias* Epist. 48.
ago. Nam quo uno modo potes te mihi ostendis. Nunquam Episto-
lam tuam accipio, quin protinus unâ simus. Si imagines nobis a-
 micorum absentium iocundæ sunt, quæ memoriam reno-
 uant, & desiderium absentix falso atque inani solatio leuant:
 quantò iocundiores sunt literæ, quæ amici absentis veras no-
 tas afferunt? Deo autem gratias, quòd hoc saltem modo
 præsentiam tuam nobis reddere nulla inuidia prohiberis,
 nulla difficultate præpediris: nulla (obsecro) negligentia
 retarderis. Scripsisti ad Amicum prolixæ cōsolationem Epi-
 stolæ, & pro aduersitatibus quidem suis, sed de tuis. Quas
 videlicet tuas diligenter commemorans, cū eius intende-
 res * consolationi, nostræ plurimū addidisti desolationi, &
 dum eius mederi vulneribus cuperes, noua quædam nobis * al. stude-
res.
 vulnera doloris inflixisti, & priora auxisti. Sana, obsecro, ipse
 quæ fecisti, qui quæ alij fecerunt curare satagis. Morem qui-
 dem amico & socio gessisti, & tam amicitix quàm societatis
 debitum persoluisti: sed maiore te debito nobis adstrinxisti,
 quas non tã amicas quàm amicissimas, non tam socias quàm
 filias conuenit nominari: vel si quod dulcius & sanctius vo-
 cabulum potest excogitari. Quanto autem debito te erga
 eas obligaueris, non argumentis, non testimonijs indiget, vt
 quasi dubium comprobetur: & si omnes taceant, res ipsa cla-
 mat. Huius quippè loci tu post Deum solus es fundator,
 solus huius Oratorij constructor, solus huius Congregatio-
 nis ædificator. Nihil hîc super alienum ædificasti fundamen-
 tum. Totum quod hîc est, tua creatio est. Solitudo hæc fe-
 ris tantū, siue latronibus vacans, nullam hominum habita-
 tionem nouerat, nullam domum habuerat. In ipsis cubili-
 bus ferarum, in ipsis latibulis latronum, vbi nec nominari
 Deus solet, diuinum erexisti tabernaculū, & Spiritus sancti
 proprium dedicasti templum. Nihil ad hoc ædificandum
 ex Regum vel Principum opibus intulisti, cū plurima pos-
 ses & maxima, vt quicquid fieret, tibi soli posset adscribi.
 Clerici siue Scholares huc certatim ad disciplinam tuam
 confluentes omnia ministrabant necessaria; & qui de bene-
 ficijs viuebant Ecclesiasticis, nec oblationes facere nouerāt,
 sed suscipere, & qui manus ad suscipiendum non ad dandum
 habuerant, hîc in oblationibus faciendis prodigi atque im-

2. Cor. 3.

portuni fiebant. Tua itaque, verè tua hæc est propriè in sancto proposito nouella plantatio, cuius adhuc teneris maximè plantis frequens, vt proficiant, necessaria est irrigatio. Satis ex ipsa feminei sexus natura debilis est hæc plantatio: est infirma, etsi non esset noua. Vnde diligentio rem culturam exigit & frequentio rem, iuxta illud Apostoli: *Ego plantaui, Apollo rigauit, Deus autem incrementum dedit.* Plantauerat Apostolus atque fundauerat in fide per prædicationis suæ doctrinam Corinthios, quibus scribebat. Rigauerat postmodum eos ipsius Apostoli discipulus Apollo sacris exhortationibus, & sic eis incrementum virtutum diuina largita est gratia. Vitis alienæ vineam, quam non plantasti, in amaritudinem tibi conuersam, admonitionibus sæpè cassis, & sacris frustra sermonibus excolis. Quid tuæ debeas attende, qui sic curam impendis alienæ. Doces & admones rebelles, nec proficis. Frustra ante porcos diuini eloquij margaritas spargis. Qui obstinatis tanta impendis, quid obedientibus debeas considera. Qui tanta hostibus largiris, quid filiabus debeas meditare. Atque vt cæteras omittam, quanto erga me te obligaueris debito, pensa: vt quod deuotis communiter debes feminis, vnicae tuæ deuotiùs soluas. Quot autem & quantos Tractatus in doctrina, vel exhortatione, seu etiam consolatione sanctarum feminarum sancti Patres, & quanta eos diligentia composuerint, tua melius excellentia quàm nostra paruitas nouit. Vnde non mediocri admiratione nostræ tenera conuersionis initia tua iamdudum obliuio mouit, quòd nec reuerentia Dei, nec amore nostri, nec sanctorum Patrum exemplis admonitus fluctuantem me & iam diutiuo mœrore confectam, vel sermone præsentem, vel Epistola absentem consolari tentaueris. Cui quidem tantò te maiore debito noueris obligatum, tantò te ampliùs nuptialis fœdere sacramenti constat esse adstrictum: & eò te magis mihi obnoxium, quòd te semper, vt omnibus patet, immoderato amore complexa sum. Nostri, charissime, nouerunt omnes, quanta in te amiserim, & quàm miserabili casu summa & vbique nota proditio me ipsam quoque mihi tecum abstulerit, & incomparabiliter maior sit dolor ex amissionis modo quàm ex damno. Quò verò maior est dolendi causa, maiora sunt consolationis adhibenda remedia. Non utique ab alio,

sed à teipso, vt qui solus es in causa dolendi, solus sis in gratia consolandi. Solus quippe es qui me contristare, qui me lætificare, seu consolari valeas. Et solus es qui plurimum id mihi debeas, & tunc maximè cùm vniuersa quæ iusseris tantùm impleuerim, vt cùm te in aliquo offendere non possem, meipsam pro iussu tuo perdere substinerem. Et quod maius est, dictūque mirabile, in tantam versus est amor insaniam, vt quod solum appetebat, hoc ipse sibi sine spe recuperationis auferret. Cùm ad tuam statim iussionem tam habitum ipsa quàm animum immutarem: vt te tam corporis mei quàm animi vnicum possessorem ostenderem. Nihil vnquam (Deus scit) in te nisi te requisui; te purè, non tua cōcupiscens. Non matrimonij fœdera, non dotes aliquas expectaui, non denique meas voluptates aut voluntates, sed tuas (sicut ipse nosti) adimplere studui. Et si vxoris nomen sanctius ac validius videtur, dulcius mihi semper extitit amicæ vocabulum; aut, si non indigneris, concubinæ vel scorti. Vt quòd me videlicet pro te ampliùs humiliarem, ampliorem apud te consequeretur gratiam, & sic etiam excellentiæ tuæ gloriam minus læderem. Quod & tu ipse tui gratia oblitus penitus non fuisti, in ea, quam suprà memini, ad Amicum Epistola pro consolatione directa. Vbi & rationes nonnullas, quibus te à coniugio nostro infauis thalamis reuocare conabar, exponere non es dedignatus: sed plerisque tacitis, quibus amorem coniugio, libertatem vinculo præferebam. Deum testem inuoco, si me Augustus vniuerso præsidens mundo matrimonij honore dignaretur, totūque mihi orbem confirmaret in perpetuo præsidendum, charius mihi & dignius videretur tua dici meretrix, quàm illius Imperatrix. Non enim quòd quisque ditior siue potentior, ideò & melior: fortunæ illud est, hoc virtutis. Nec se minimè venalem æstimet esse quæ libentiùs ditiori quàm pauperi nubit, & plus in marito sua quàm ipsum concupiscit. Certè quamcumque ad nuptias hæc concupiscentia ducit, merces ei potius quàm gratia debetur. Certum quippe est eam res ipsas, non hominem sequi, & se, si posset, velle prostituere ditiori. Sicut inductio illa Aspasiæ Philosophæ apud Socraticum Æschinem cum Xenofonte & vxore eius habita manifestè conuincit. Quam quidem inductionem cùm prædicta

Philosophà ad reconciliandos inuicem illos proposuisset, tali fine concludit: *Quia ubi hoc peregeritis, ut neque vir melior, neque femina in terris letior sit: profectò semper id quod optimum putabis esse multò maximè requiretis: ut & tu maritus sis quàm optima, & hæc quàm optimo viro nupta sit.* Sancta profectò hæc & plusquam Philosophica est sententia ipsius potius Sophiæ quàm Philosophiæ dicenda. Sanctus hic error, & beata fallacia in coniugatis, ut perfectà dilectio illæsa custodiat matrimonij fœdera non tam corporum continentia, quàm animorum pudicitia. At quod error cæteris, veritas mihi manifesta contulerat. Cùm quod illæ videlicet de suis æstimarent maritis, hoc ego de te, hoc mundus vniuersus non tam crederet quàm sciret. Ut tantò verior in te meus amor existeret, quantò ab errore longiùs absteret. Quis etenim Regum aut Philosophorum tuam exæquare famam poterat? Quæ te regio, aut ciuitas, seu villa videre non æstuabat? Quis te, rogo, in publicum procedentem conspiceret non festinabat, ac discedentem collo erecto, oculis directis non insectabatur? Quæ coniugata, quæ virgo non concupiscebat absentem, & non exardebat in præsentem? Quæ Regina vel præpotens femina gaudijs meis non inuidebat vel thalamis? Duo autem, fateor, tibi specialiter inerant, quibus feminarum quarumlibet animos statim allicere poteras; dictandi videlicet, & cantandi gratia. Quæ cæteros minimè Philosophos affecutos esse nouimus. Quibus quidem quasi ludo quodam laborem exercitij recreans Philosophici, plæraque amatorio metro vel rithmo composita reliquisti carmina, quæ præ nimia suauitate tam dictaminis quàm cantus sæpius frequentata, tuum in ore omnium nomen incessanter tenebant: ut etiam illiteratos melodiæ dulcedo tui non sinneret immemores esse. Atque hinc maximè in amorem tui feminae suspirabant. Et cùm horum pars maxima carminum nostros decâtaret amores, multis me regionibus breui tempore nunciauit, & multarum in me feminarum accendit inuidiam. Quod enim bonum animi vel corporis tuam non exornabat adolescentiam? Quam tunc mihi inuidentem, nunc tantis priuatæ delitijs compati calamitas mea non cōpellat? Quem vel quam, licet hostem, primitus, debita compassio mihi nunc non emolliat? Et plurimùm nocens, pluri-

mum (vt nosti) sum innocens. Non enim rei effectus, sed effici-
 entis affectus in crimine est. Nec quæ fiunt, sed quo animo
 fiunt, equitas pensat. Quem autem animum in te semper ha-
 buerim, solus qui expertus es iudicare potes. Tuo examini
 cuncta committo, tuo per omnia cedo testimonio. Dic vnum
 si vales, cum post conuersionem nostram, quam tu solus fa-
 cere decreuisti, in tantam tibi negligentiam atque obliuio-
 nem venerim, vt nec colloquio præsentis recreer, nec absen-
 tis Epistola cōsoler: Dic (inquam) si vales, aut ego quod sen-
 tio, imò quod omnes suspicantur dicam. Concupiscentia te
 mihi potius quàm amicitia sociauit, libidinis ardor potius
 quàm amor. Vbi igitur quod desiderabas cessauit, quicquid
 propter hoc exhibebas pariter euauit. Hæc, dilectissime,
 non tam mea est quàm omnium coniectura, non tam specia-
 lis quàm communis, non tam priuata quàm publica. Vtinam
 mihi soli sic videretur, atque aliquos in excusationem sui
 amor tuus inueniret, per quos dolor meus paululum reside-
 ret. Vtinam occasiones fingere possem, quibus te excusando
 mei quoquomodo tegerem vilitatem. Attende, obsecro,
 quæ requiro; & parua hæc videris & tibi facillima. Dum tui
 præsentia fraudor, verborum saltem votis*, quorum tibi co- * al. notis
 pia est, tuæ mihi imaginis præsentia dulcedinem. Frustra
 te in rebus dapilem expecto, si in verbis auarum substineo.
 Nunc verò plurimum à te me promereri credideram, cum
 omnia propter te compleuerim, nunc in tuo maximè perse-
 uerans* obsequio. Quam quidem inuenculam ad Monasti- * al. com-
plicam.
 cæ conuersionis asperitatem non religionis deuotio, sed
 tua tantum pertraxit iussio. Vbi si nihil à te promerear, quàm
 frustra laborem dijudica. Nulla mihi super hoc merces ex-
 pectanda est à Deo, cuius adhuc amore nihil me constat egis-
 se. Properantem te ad Deum secuta sum habitu, imò præ-
 cessi. Quasi enim memor vxoris Loth retro conuersæ, priùs Genes. 9.
 me sacris vestibus & professione Monastica quàm te ipsum
 Deo mancipasti. In quo (fateor) vno minus te de me con-
 fidere vehementer dolui atque erubui. Ego autem (Deus
 scit) ad Vulcania loca te properantem præcedere vel sequi
 pro iussu tuo minimè dubitarem. Non enim mecum animus
 meus, sed tecum erat. Sed & nunc maximè si tecum non est,
 nusquam est. Esse verò sine te nequaquam potest. Sed vt

tecum bene sit age obsecro. Bene autem tecum fuerit, si te propitium inuenerit, si gratiam referas pro gratia, modica pro magnis, verba pro rebus. Utinam, dilecte, tua de me dilectio minus confideret, ut sollicitior esset! Sed quò te amplius nunc securum reddidi, negligentiorē sustineo. Memento obsecro quæ fecerim: & quanta debeas attende. Dum tecum carnali fruerer voluptate, utrum id amore, vel libidine agerem, incertum pluribus habebatur. Nunc autem finis indicat quo id inchoauerim principio. Omnes denique mihi voluptates interdixi, ut tuæ parerem voluntati. Nihil mihi reseruauī, nisi sic tuam nunc præcipuè fieri. Quæ verò tua sit iniquitas perpende, si merenti amplius persoluis minus, imò nihil penitus: præsertim cum paruum sit quod exigeris, & tibi facillimum. Per ipsum itaque, cui te obtulisti, Deum te obsecro, ut quoquo modo potes tuam mihi præsentiam reddas, consolationem videlicet mihi aliquam rescribendo. Hoc saltem pacto, ut sic recreata diuino alacrior vacem obsequio. Cum me ad temporales olim voluptates expeteres, crebris me Epistolis visitabas, frequenti carmine tuam in ore omnium Heloissam ponebas. Me plateæ omnes, me domus singulæ resonabant. Quantò autem rectius me nunc in Deū, quam tunc in libidinem excitares? Perpende obsecro quæ debes, attende quæ postulo; & longam Epistolam breui fine concludo. Vale vnice.

EPISTOLA III.

Quæ est Rescriptum PETRI ad HELOISSAM.

ARGUMENTVM.

Superiori Epistola Heloissa respondet Abaelardus, ac se candidè excusat, quòd tanto tempore ad illam non scripserit, minimè de incuria in eam venisse: sed quòd de prudentia, doctrina, pietate, & religione eius tantum confideret, ut eam vel exhortatione, vel consolatione non indigere crederet. Monet autem ut ad se rescribat, quid sibi exhortationis vel consolationis diuina ab eo rescribi velit: & ipse eius desiderio faciet satis. Rogat eam, ut eam ipsa quàm sacer eius virginum ac viduarum chorus se apud Deum precibus iunet, quantas apud ipsum vires oratio maximè uxorum pro viris habeat, luculenter ex scripturarum auctoritate differens: & commemoratis precibus, quæ hætenus in ipso Monasterio pro se à sacris feminis fierent ad Deum

ad Deum singulis horis Canonicis, alias item quæ pro salute absentis fiant instituit. Præterea rogat ut quocunque modo vel loco enim ex hac vita migrare contingeret, defuncti corpus ad Paracletense Cœnobium deferri, ibique sepeliri curaret.

Heloissæ dilectissimæ sorori suæ in Christo Abaelardus
frater eius in ipso.



V O D post nostram à seculo ad Deum conuersio-
nem nondum tibi aliquid consolationis vel exhor-
tationis scripserim, non negligentia meæ; sed tuæ,
de qua semper plurimum confido, prudentia im-
putandum est. Non enim eam his indigere credidi, cui abū-
danter quæ necessaria sunt diuina gratia impertiuit; ut tam
verbis quàm exemplis errantes valeas docere, pusillanimes
consolari, tepidos exhortari: sicut & facere iam dudum con-
sueuisti cum sub Abbatisa Prioratum obtineres. Quod si
nunc tanta diligentia tuis prouideas filiabus, quanta tunc
sororibus; satis esse credimus, ut iam omninò superfluam do-
ctrinam vel exhortationem nostram arbitremur. Sin autem
humilitati tuæ aliter videtur, & in ijs etiam quæ ad Deum
pertinent magisterio nostro atque scriptis indiges, super his
quæ velis scribe mihi, ut ad ipsam rescribam prout Dominus
mihi annuerit. Deo autem gratias, qui grauissimorum & as-
siduorum periculorum meorum sollicitudinem vestris eor-
dibus inspirans, afflictionis meæ participes vos fecit; ut ora-
tionum suffragio vestrarum diuina miseratio me protegat, &
velociter Sathanam sub pedibus nostris conterat. Ad hoc
autem præcipuè Psalterium, quod à me sollicitè requisisti,
soror in seculo quondam chara, nunc in Christo charissi-
ma, mittere maturavi. In quo videlicet pro nostris magnis
& multis excessibus, & quotidiana periculorum meorum
instantia iuge Domino sacrificium immoles orationū. Quā-
tum autem locum apud Deum & Sanctos eius fidelium ora-
tiones obtineant, & maximè mulierum pro charis suis, &
vuxorum pro viris, multa nobis occurrunt testimonia & exem-
pla. Quod diligenter attendens Apostolus, sine intermis-
sione orare nos admonet. Legimus Dominum Moyse dixisse,
Dimitte me ut irascatur furor meus. Et Hieremiæ: *Tu vero, in-*
quit, noli orare pro populo hoc, & non obsistas mihi. Ex quibus vi-
delicet verbis manifestè Dominus ipse profitetur orationes

1. Thess. 5.

Exod. 32.

Hierem. 7.

Sanctorum quasi quoddam frenum iræ ipsius immittere, quo scilicet ipsa coerceatur, ne quantum merita peccatum exigunt ipsa in eos sequiat. Ut quem ad vindictam iustitia quasi spontaneum ducit, amicorum supplicatio fleat, & tanquam inuitum quasi vi quadam retineat. Sic quippè oranti vel oraturo dicitur, *Dimitte me, & ne obsistas mihi.* Præcipit Dominus ne oretur pro impijs. Orat iustus Domino prohibente, & ab ipso impetrat quod postulat, & irati iudicis sententiam immutat. Sic quippè de Moyse subiunctum est: *Et placatus factus est Dominus de malignitate quam dixit facere populo suo.* Scriptum est alibi de vniuersis operibus Dei: *Dixit, & facta sunt.* Hoc autem loco & dixisse memoratur quod de afflictione populus meruerat, & virtute orationis præuentus non impleſſe quod dixerat. Attende itaque quanta sit orationis virtus, si quod iubemur oremus: quando id quod orare Prophetam Deus prohibuit, orando tamen obtinuit, & ab eo quod dixerat eum auertit. Cui & alius Propheta dicit: *Et cum iratus fueris, misericordia recordaberis.* Audiant id atque aduertant Principes terreni, qui occasione præpositæ & edictæ iustitiæ suæ obstinati magis quàm iusti reperiuntur, & se remissos videri erubescunt si misericordes fiant, & mendaces si edictum suum mutent, vel quod minus prouidè statuerunt non impleant, etsi verba rebus emendent. Quos quidem rectè dixerim Iephthæ comparandos, qui quod stultè vouerat stultiùs adimplens vnicam interfecit. Qui verò eius membrum fieri cupit, tunc cum Psalmista dicit, *Misericordiam & iudicium cantabo tibi Domine.* Misericordia, sicut scriptum est, *iudicium exaltat,* attendens quod alibi Scriptura comminatur, *iudicium sine misericordia in eum qui misericordiam non facit.* Quod diligenter ipse Psalmista considerans, ad supplicationem vxoris Nabal Carmeli iuramentum, quod ex iustitia fecerat, de viro eius scilicet & ipsius domo delenda, per misericordiam cassauit. Orationem itaque iustitiæ prætulit, & quod vir deliquerat supplicatio vxoris deleuit. In quo quidem tibi, soror, exemplum proponitur, & securitas datur, ut si huius oratio apud hominem tantum obtinuit, quid apud Deum tua pro me audeat instruaris. Plus quippe Deus, qui pater est noster, filios diligit; quàm Dauid feminam supplicantem. Et ille quidom pius & misericors habebatur, sed

ipsa pietas & misericordia Deus est. Et quæ tunc supplicabat mulier secularis erat & laica, nec ex sanctæ deuotionis professione Domino copulata. Quòd si ex te minus ad impetrandum sufficias, sanctus qui tecum est tam virginum quàm viduarum Conuentus, quod per te non potes, obtinebit. Cùm enim discipulis Veritas dicat, *Vbi duo vel tres congregati fuerint in nomine meo, ibi sum in medio eorum.* Et rursum, *Si duo ex vobis consenserint de omni re quam petierint, fiet illud à Patre meo:* quis non videat quantum apud Deum valeat sanctæ congregationis frequens oratio? Si, vt Apostolus asserit, *multum valet oratio iusti assidua*, quid de multitudine sanctæ congregationis sperandum est? Nosti, charissima soror, ex Homelia beati Gregorij xxxviii. quantum suffragiū inuito seu contradicenti fratri oratio fratrum naturæ attulerit. De quo iam ad extremum ducto quanta periculi anxietate miserrima eius anima laboraret, & quanta desperatione & tædio vitæ fratres ab oratione reuocaret, quid ibi diligenter scriptum sit tuam minimè latet prudentiam. Atque vtinam confidentiùs te & sanctarum Conuentum sororum ad orationem inuiter, vt me scilicet vobis ipse viuum custodiat, per quem Paulo attestante, mortuos etiam suos de resurrectione mulieres acceperunt. Si enim veteris & Evangelici Testamenti paginas reuoluas, inuenies maxima resurrectionis miracula solis vel maximè feminis exhibita fuisse, pro ipsis vel de ipsis facta. Duos quippe mortuos suscitatos ad supplicationes maternas vetus commemorat Testamentum, per Heliam scilicet, & ipsius discipulum Helisæum. Euangelium vero trium tantum mortuorum suscitationem à Domino factam continet, quæ mulieribus exhibita, maximè illud quod supra commemorauimus Apostolicum dictū rebus suis confirmant. *Acceperunt mulieres de resurrectione mortuos suos.* Filium quippe viduæ ad portam ciuitatis Naym suscitatum matri reddidit, eius compassione compunctus. Lazarum quoq; amicum suum ad obsecrationem sororum eius, Mariæ videlicet ac Marthæ, suscitauit. Quo etiam Archisynagogi filiæ hanc ipsam gratiam ad petitionem patris impendente, *mulieres de resurrectione mortuos suos acceperunt.* Cùm hæc videlicet suscitata proprium de morte receperit corpus, sicut illæ corpora suorum. Et paucis quidem inter-

Math. 18.

Ibidem.

Iacob. 5.

*al. maturè

Hebr. 11.

1. Reg. 17.

4. Reg. 4.

Heb. 11.

Luc. 7.

Ioan. 11.

Math. 9.

Marc. 5.

Luc. 7.

Prouer. 12.

Prouer. 18.

Eccles. 26.

Ibidem.

1. Cor. 7.

Luc. 12.

Exod. 32.

uenientibus hæ factæ sunt resuscitationes. Vitæ verò nostræ cōseruationē multiplex vestra deuotionis oratio facilè obtinebit. Quatū tam abstinentia quàm continentia Deo sacrata quātō ipsi gratior habetur, tantō ipsum propitiore inueniet. Et plæriq; fortassis horū qui suscitati sunt nec fideles extiterūt, sicut nec vidua prædicta, cui non roganti filiū Dominus suscitauit, fidelis extitisse legitur. Nos autem inuicem non solum fidei colligat integritas, verumetiam eiusdem religionis professio sociat. Vt autem sacrosanctum Collegij vestri nunc omittam Conuentum, in quo plurimarum virginum ac viduarum deuotio Domino iugiter deseruit; ad te vnam veniam, cuius apud Deum sanctitatem plurimū non ambigo posse, & quæ potes mihi præcipuè debere, maximè in tantæ aduersitatis laboranti discrimine. Memento itaque semper in orationibus tuis eius, qui specialiter est tuus, & tantō confidentiū in oratione vigila, quātō id esse tibi recognoscis iustius, & ob hoc ipsi qui orandus est acceptabilius. Exaudi, obsecro, aure cordis, quod sæpiū audisti aure corporis. Scriptum est in Prouerbijs, *Mulier diligens corona est viro suo*. Et rursus, *Qui inuenit mulierem bonam, inuenit bonū: & hauriet iocunditatem à Domino*. Et iterum, *Domus & diuitie dantur à parentibus, à Domino autem proprie uxor prudens*. Et in Ecclesiastico, *Mulieris bonæ beatus vir*. Et post pauca, *Pars bona, mulier bona*. Et iuxta authoritatem Apostolicam, *Sanctificatus est vir infidelis per mulierem fidelem*. Cuius quidem rei experimentum in regno præcipuè nostro, id est Francorum, diuina specialiter exhibuit gratia, cū ad orationem videlicet vxoris magis quàm ad sanctorum prædicationem, Clodoueo rege ad fidem Christi conuerso regnum sic vniuersum diuinis legibus mancipauerunt, vt exemplo maximè superiorum ad orationis instantiam inferiores prouocarentur. Ad quam quidem instantiam Dominica nos vehementer inuitans parabola, *Ille, inquit, si persenerauerit pulsans, dico vobis quia si non dabit ei eò quòd amicus illius sit, propter improbitatem eius surgens dabit ei quotquot habet necessarios*. Ex hac profectò, vt ita dicam, orationis improbitate, sicut supra memini, Moyses diuinæ iustitiæ seueritatem enervauit, & sententiam immutauit. Nosti, dilectissima, quantum charitatis affectum præsentiae meæ Conuentus olim vester in oratione solitus sit exhibere. Ad expletionem namque quotidie singularum Horarū spe-

cialem pro me Domino supplicationem hanc offerre consuevit, vt Responso proprio cum Versu eius præmissis & decantatis, Preces his & Collectam in hunc modum subiungeret. Responsum. *Non me derelinquas, nec discedas à me Domine.* Vers. *In adiutorium meum semper intende Domine.* Preces. *Saluum fac seruum tuum Deus meus sperantem in te. Domine exaudi orationem meam, & clamor meus ad te veniat.* Oratio. * *Deus qui per seruulum tuum ancillulas tuas in nomine tuo dignatus es aggregare, te quaesumus; vt tam ipsi quàm nobis in tua tribuas perseuerare voluntate.* Per Dominũ, &c. Nunc autem absenti mihi tantò ampliùs orationum vestrarum opus est suffragio, quãtò maioris anxietate periculi constringor. Supplicando itaque postulo, & postulãdo supplico, quatenus præcipuè nunc absens experiar quàm vera charitas vestra erga absentem extiterit, singulis videlicet Horis expletis hunc Orationis propriæ modum adnectens. Respon. *Ne derelinquas me Domine pater & dominator vite mee, vt non corruam in conspectu aduersariorum meorum: ne gaudeat de me inimicus meus.* Vers. *Apprehende arma & secutum, & exurge in adiutorium mihi. Ne gaudeat.* Preces. *Saluum fac seruum tuum Deus meus sperantem in te. Mittere ei Domine auxilium de sancto: & de Syon tuere eum. Esto ei Domine turris fortitudinis: à facie inimici. Domine exaudi orationem meam: & clamor meus ad te veniat.* Oratio. * *Deus qui per seruulum tuum ancillulas tuas in nomine tuo dignatus es aggregare, te quaesumus, vt eum ab omni aduersitate protegas, & ancillis tuis incolumem reddas.* Per Dominum, &c. Quòd si me Dominus in manibus inimicorum tradiderit, scilicet vt ipsi præualentes me interficiant, aut quocũq; casu viam vniuersę carnis absens à vobis ingrediar: cadauer obsecro nostrum vbicumque vel sepulchrum vel expositum iacuerit, ad Cimiterium vestrum deferri faciatis, vbi filia nostræ*, imò in Christo sorores, sepulchrum nostrum sæpiùs videntes, ad preces pro me Domino fundendas ampliùs inuitentur. Nullum quippè locum animæ dolenti de peccatorum suorum errore desolatę tutiorem ac salubriorem arbitror, quàm eum qui vero Paracleto, id est cōsolatori propriè consecratus est, & de eius nomine specialitor insignitus. Nec Christianæ sepulturæ locum rectius apud aliquos fideles, quàm apud feminas Christo deuotas consistere censeo. Quæ de Domini Iesu Christi sepultura sollicitæ, Marc. 16.

Psal. 37.

Psal. 85.

Psal. 101.

* al. Oremus.

Eccles. 23.

Psal. 34.

Psal. 85.

* al. Oremus.

* al. vestra

Math. 28. eam vnguentis pretiosis, & præuenerunt & subsecutæ sunt, & circa eius sepulchrum studiosè vigilantes, & sponsi mortem lachrymabiliter plangentes, sicut scriptum est, *Mulieres sedentes ad monumentum lamentabantur flentes Dominum.* Primò ibidem de resurrectione eius Angelica apparitione & allocutione sunt consolatæ, & statim ipsius resurrectionis gaudia, eo bis eis apparente, percipere meruerunt, & manibus cōtrectare. Illud autem demùm super omnia postulo, vt quæ nunc de corporis mei periculo nimia sollicitudine laboratis, tunc præcipuè de salute animæ sollicitæ, quantum dilexeritis viuum exhibeatis defuncto, orationum videlicet vestrarum speciali quodam & proprio suffragio.

*al. Domi-
no*

*Vine, vale, viuantque tuæ, valeantque sorores
Vinite, sed Christo quæso mei memores.*

EPISTOLA IIII.

Quæ est Rescriptum HELOISSÆ ad PETRUM.

ARGVMENTVM.

Plena planctibus & doloribus est Epistola. Plangit enim Heloissa & suam, & Monacharum suarum, atque ipsius Abaelardi miseram conditionem, accepta planctus occasione ex postrema precedentis Epistolæ parte, vbi de sua ex hac vita migratione meminisset Abaelardus. Multis visus affectibus, quibus lectorem ad compassionem suarum & Abaelardi mouet, vt fortè etiam lachrymas excutiat. Plangit & ipsius Abaelardi plagam. Multa etiam de ipsis in corpore carnalibus desiderijs inardescens, quæ aliquando cum ipso experta fuerat Abaelardo, conqueritur. Proinde exteriorem & apertam religionem suam non incongruè extenuat, ac illam simulationi potius quàm pietati ascribit; se Abaelardi sui orationibus innari postulat, atque suas laudes humiliter rejicit.

Vnico suo post Christum vnica sua in Christo.



MORR (vnice meus) quòd præter consuetudinem Epistolarum, imò contra ipsum ordinem naturalem rerum, in ipsa fronte salutationis Epistolaris me tibi præponere præsumpsisti: feminam videlicet viro, uxorem marito, ancillâ Domino, Monialem Monacho & Sacerdoti, Diaconissam Abbati. Rectus quippe ordo est & honestus, vt qui ad superiores vel ad pares scribunt, eorū

quibus scribūt nomina suis anteponant. Sin autē ad inferiores, præcedūt scriptiōis ordine qui præcedunt rerū dignitate. Illud etiā non parua admiratione suscepim⁹, quòd quibus consolationis remedium afferre debuisti, desolationem auxisti; & quas mitigare debueras, excitasti lachrymas. Quæ enim nostrum siccis oculis audire possit, quod circa finem Epistolæ posuisti dicens, *Quòd si me Dominus in manus inimicorum tradideris, ut me scilicet preualentes interficiant, &c.* O charissime, quo id animo cogitasti, quo id ore dicere substitui? Nunquam ancillulas suas adeò Deus obliuiscatur, ut eas tibi superstites reseruet. Nunquam nobis vitam illam concedat, quæ omni genere mortis sit grauior. Te nostras exequias celebrare, te nostras Deo animas conuenit commendare, & quas Deo aggregasti ad ipsum præmittere; ut nulla amplius de ipsis perturberis sollicitudine, & tantò lætior nos subsequaris, quantò securior de nostra salute iam fueris. Parce obsecro, domine, parce huiusmodi dictis, quibus miseras miserrimas facias; & ut ipsum quodcumque uiuimus ne nobis auferas ante mortem. Sufficit diei malicia sua, & dies illa omnibus, quos inueniet, satis secum sollicitudinis afferet omni amaritudine inuoluta. *Quid enim necesse est,* inquit Seneca, *mala arcessere, & ante mortem vitam perdere?* Rogas vnice, ut quocumque casu nobis absens hanc vitam finieris, ad Cimiterium nostrum corpus tuum adferri faciamus: ut orationum scilicet nostrarum ex assidua tui memoria ampliorem assequaris fructum. At verò quomodo memoriam tui à nobis labi posse suspicaris? aut quod orationi tempus tunc erit commodum, quando summa perturbatio nihil permittet quietum? cùm nec anima rationis sensum, nec lingua sermonis retinebit vsum? Cùm mens insana in ipsum, ut ita dicam, Deum magis irata quàm pacata, non tam orationibus ipsum placabit quàm querimonijs irritabit? Flere tunc miseris tātum vacabit, non orare licebit, & te magis subsequi quàm sepelire maturandum erit, ut potius & nos consepeliendæ simus, quàm sepelire possimus. Quæ cùm in te nostram amiserimus vitam, viuere te recedente nequaquā poterimus. Atque utinam nec tunc vsque possimus! Mortis tuæ mentio mors quædam nobis est. Ipsa autem mortis huius veritas quid, si nos inuenerit, futura est? Nunquam Deus

Matth. 6.

annuat, vt hoc tibi debitum superstitēs persoluamus, vt hoc tibi patrociniō subueniamus, quod à te penitus expectamus. In hoc vtinam te præcessuræ, non secuturæ. Parce itaque obsecro nobis, parce itaque vnicæ saltem tuæ, huiusmodi scilicet supersedendo verbis, quibus tanquam gladijs mortis nostras transfuerberas animas: vt quod mortem præuenit ipsa morte grauius sit. Confectus mœrore animus quietus non est, nec Deo sincerè potest vacare mens perturbationibus occupata. Noli obsecro diuinum impedire seruitium, cui nos maximè mancipasti. Omne ineuitabile, quod cùm acciderit, mœrorem maximum secum inferet, vt subito veniat optandum est; ne timore inutili diu ante cruciet, cui nulla succurri prouidentia potest. Quod & Poeta benè considerans Deum precatur dicens,

Lucanus
lib. 2.

*Sit subitum quodcumque paras, sit cæca futuri
Mens hominum fati. Liveat sperare timenti.*

Quid autem te amisso sperandum mihi superest? aut quæ in hac peregrinatione causa remanendi, vbi nullum nisi te remedium habeam, & nullum aliud in te nisi hoc ipsum quod viuīs omnibus de te mihi alijs voluptatibus interdictis, cui nec præsentia tua concessum est frui, vt quâdoque mihi reddi valeam? O si fas sit dici crudelem mihi per omnia Deum! ô inclementē clementiam! ô infortunatam fortunā! quæ iam in me vniuersi conaminis sui tela intantū consumpsit, vt quibus in alios sæuiat iam non habeat! Plenam in me pharetram exhaustit, vt frustra iam alij bella eius formident. Nec si ei adhuc telum aliquod superesset, locum in me vulneris inueniret. Vnum inter tot vulnera metuit, ne morte supplicia finiam. Et cùm interimere non cesset, interitum tamen quem accelerat timer. O me miserarum miserrimam! infeliciū infelicissimam, quæ quantò vniuersis in te feminis prælata sublimiorem obtinui gradum, tantò hinc prostrata grauiorem in te & in me pariter perpeffa sum casum! Quantò quippe altior ascendentis gradus, tantò grauior corruentis casus. Quam mihi nobiliū ac potentium feminarū fortuna vnquā præponere potuit aut æquare? Quam denique adedò deiecit & dolore conficere potuit? Quam in te mihi gloriam contulit? quam in te mihi ruinam intulit? Quam mihi vehemens in vtramque partem extitit, vt nec in bonis nec in malis modum

* el. vitæ

dum habuerit? Quæ ut me miserrimam omnium faceret, omnibus antè beatiorē effecerat. Ut cū quanta perdidī pensarem, tantō me maiora consumerent lamenta, quantō me maiora opprēsserant damna: & tantō maior amissorum succederet dolor, quantō maior possessorum præcesserat amor, & summæ voluptatis gaudia summa mœroris terminaret tristitia. Et ut ex iniuria maior indignatio surgeret, omnia in nobis æquitatis iura pariter sunt peruersa. Dum enim solliciti amoris gaudijs frueremur, & ut turpiore, sed expressiore vocabulo utar, fornicationi vacaremus, diuina nobis seueritas pepercit. Ut autem illicita licitis correximus, & honore coniugij turpitudinem fornicationis operuimus, ira Domini manum suam super nos vehementer aggrauauit, & immaculatum non pertulit thorum qui diu ante sustinuerat pollutum. Deprehensis in quouis adulterio viris hæc satis esset ad vindictam pœna quam pertulisti. Quod ex adulterio promerentur alij, id tu ex coniugio incurristi; per quod iam te omnibus satisfecisse confidebas iniurijs. Quod fornicatoribus suis adulteræ, hoc propria vxor tibi cōtulit. Nec cū pristinis vacaremus voluptatibus, sed cū iam ad tempus segregati castiūs viueremus, te quidem Parisius Scholis præsidente, & me ad imperium tuum Argēteoli cum Sanctimonialibus conuersante. Diuisis itaque sic nobis adinuicem * ut tu studiosiūs Scholis, ego liberiūs orationi siue sacræ *al. abinuicemlectionis meditationi vacarem; & tantō nobis sanctiūs quantō castiūs degentibus, solus in corpore luisti quod duo pariter commiseramus. Solus in pœna fuisti, duo in culpa: & qui minus debueras, totum pertulisti. Quantō enim ampliūs te pro me humiliando satisfeceras, & me pariter & totum genus meum sublimaueras; tantō te minus tam apud Deum quàm apud illos proditores obnoxium pœnæ reddideras. O me miseram in tanti sceleris causa progenitam! O summam in viros summos & consuetam feminarum perniciem! Hinc de muliere cauenda scriptum est in Prouerbijis: *Nunc ergo, fili, audi me, & attende verbis oris mei. Ne abstrahatur in vijs illius mens tua, neque decipiaris semitis eius. Multi enim vulneratos deiecit, & fortissimi quique interfecti sunt ab ea. Vix inferi domus eius penetrantes in inferiora mortis.* Et in Ecclesiaste. *Lustraui vniuersa animo meo, & inueni amariorem* Prouerb. 7.
Eccles. 7.

morte mulierem, quæ laqueus venatorum est, & sagena cor eius. Vincula enim sunt manus eius. Qui placet Deo, effugiet eam. Qui autem peccator est, capietur ab illa. Prima statim mulier de Paradiso virum captiuauit, & quæ ei à Domino creata fuerat in auxilium, in summum ei conuersa est exitium. Fortissimum illum Nazaræum Domini & Angelo nunciante conceptum Dalila sola superauit, & eum inimicis proditum & oculis priuatum ad hoc tandem dolor compulit, vt se pariter cum ruina hostium opprimeret. Sapientissimum omnium Salomonem sola quam sibi copulauerat mulier infatuauit, & in tantam compulit insaniam, vt eum quem ad ædificandum sibi Dominus templum elegerat, patre eius David, qui iustus fuerat, in hoc reprobato, ad idololatriam ipsa vsque in finem vitæ deiiceret; ipso, quem tam verbis quàm scriptis prædica-
bat atque docebat, diuino cultu derelicto. Iob sanctissimus in vxore nouissimam atque grauissimam substinuit pugnam, quæ eum ad maledicendum Deo stimulabat. Et callidissimus temptator hoc optimè nouerat, quod sæpius expertus fuerat; virorum videlicet ruinam in vxoribus esse facillimam. Qui denique etiam vsque ad nos consuetam extendens malitiam, quem de fornicatione sternere non potuit, de coniugio temptauit: & bono malè est vsus, qui malo malè vti non est permissus. Deo saltem super hoc gratias, quòd me ille vt supra positas feminas in culpam ex consensu non traxit, quam tamen in causam commissæ malitiæ ex affectu conuertit. Sed & si purget animum meum innocentia, nec huius reatum sceleris consensus incurrat: peccata tamen multa præcesserunt, quæ me penitus immunem ab huius reatu sceleris esse non sinunt. Quòd videlicet diu ante carnalium illecebrarum voluptatibus seruiens, ipsa tunc merui quod nunc plector, & præcedentium in me peccatorum sequentia meritò facta sunt pœna. Etiam malis initijs peruersus imputandus est exitus. Atque vtinam huius præcipuè commissi dignam agere valeam pœnitentiam, vt pœnæ illi tuæ vulneris illati ex lingua saltem pœnitentiæ contritione vicem quoquo modo recompensare queam: & quod tu ad horam in corpore pertulisti, ego in omni vita, vt iustum est, in contritione mentis suscipiam, & hoc tibi saltem modo, si non Deo, satisfaciam. Si enim verè miserrimi mei animi profi-

tear infirmitatem, qua pœnitentia Deum placare valeam nō inuenio, quem super hac semper iniuria summæ crudelitatis arguo; & eius dispensationi contraria magis eum ex indignatione offendo, quàm ex pœnitentiæ satisfactione mitigo. Quomodo etiam pœnitentia peccatorum dicitur, quantumque sit corporis afflictio, si mens adhuc ipsam peccandi retinet voluntatem, & pristinis æstuat desiderijs? Facile quidem est quemlibet confitendo peccata seipsum accusare, aut etiam in exteriori satisfactione corpus affligere. Difficillimum verò est à desiderijs maximarum voluptatum auellere animum. Vnde & meritò sanctus Iob cū præmisisset, *Dimittam aduersum me eloquium meum*, id est laxabo linguam, & aperiam os per confessionem in peccatorum meorum accusationem: statim adiunxit, *loquar in amaritudine animæ meæ*. Iob. 10.

Quod beatus exponens Gregorius, *Sunt*, inquit, *nonnulli*, Lib. 9. Moral. c. 23. *qui apertis vocibus culpas fatentur, sed tamen in confessione gemere nesciunt, & lugenda gaudentes dicunt*. Vnde qui culpas suas detestās loquitur, restat necesse est vt has in amaritudine animæ loquatur, vt hæc ipsa amaritudo puniat quicquid lingua per mentis iudicium accusat. Sed hæc quidē amaritudo vere pœnitentiæ quàm rara sit beatus diligenter attendens Ambrosius: *Facilins*, inquit, *inueni qui innocentiam seruauerunt*, Lib. de pœnit. c. 10. *quàm qui pœnitentiam egerunt*. In tantum verò illæ, quas pariter exercuimus, amantium voluptates dulces mihi fuerunt; vt nec displicere mihi, nec vix à memoria labi possint. Quocumque loco me vertam, semper se oculis meis cum suis ingerunt desiderijs. Nec etiam dormienti suis illusionibus parcunt. Inter ipsa Missarum solemnia, vbi purior esse debet oratio, obscœna earum voluptatum fantasmata ita sibi penitus miserrimam captiuant animam, vt turpitudinibus illis magis quàm orationi vacem. Quæ cum ingemiscere debeam de commissis, suspiro potius de amissis. Nec solùm quæ egimus, sed loca pariter & tempora, in quibus hæc egimus, ita tecum nostro infixæ sunt animo, vt in ipsis omniā tecum agā, nec dormiens etiam ab his quiescam. Nonnunquam & ipso motu corporis animi mei cogitationes deprehenduntur, nec à verbis temperant improuisis. O verè me miseram, & illa Rom. 7. conqueſtione ingemiscantis animæ dignissimam! *Infelix ego homo! quis me liberabit de corpore mortis huius? Vtinā & quod se-*

Psal. 7.
Matth. 6.
** al. corde*

Psal. 36.

** al. valetu-
 dinem*

quitur veraciter addere queam! *Gratia Dei per Iesum Christum Dominum nostrum.* Hæc te gratia, charissime, præuehit, & ab his tibi stimulis vna corporis plaga medendo multas in anima sanauit, & in quo tibi ampliùs aduersari Deus creditur, propitior inuenitur. More quidem fidelissimi medici, qui non parcat dolori, vt consulat saluti. Hos autem in me stimulos carnis, hæc incentiua libidinis ipse iuuenilis feruor ætatis, & iocundissimarum experientia voluptatum, plurimum accendunt, & tantò ampliùs sua me impugnatione opprimunt, quantò infirmior est natura quam oppugnant. Castam me prædicant, qui non deprehenderunt hypocritam. Munditiam carnis conferunt in virtutem, cùm non sit corporis, sed animi virtus. Aliquid laudis apud homines habens, nihil apud Deum mereor, qui cordis & renum probator est, & in abscondito videt. Religiosa hoc tempore * iudicor, in quo iam parua pars religionis non est hypocrisis; vbi ille maximis extollitur laudibus, qui humanum non offendit iudicium. Et hoc fortassis aliquo modo laudabile, & Deo acceptabile quoquo modo videtur, si quis videlicet exterioris operis exemplo quacumque intentione non sit Ecclesiæ scandalo, nec iam per ipsum apud infideles nomen Domini blasphemetur, nec apud carnales professionis suæ ordo infametur. Atque hoc quoque nonnullum est diuinæ gratiæ donum, ex cuius videlicet munere venit non solum bona facere, sed etiam à malis abstinere. Sed frustra istud præcedit, vbi illud non succedit, sicut scriptum est: *Declina à malo, & fac bonum.* Et frustra vtrumque geritur quod amore Dei non agitur. In omni autem (Deus scit) vitæ meæ statu, te magis adhuc offendere quàm Deum vereor: tibi placere ampliùs quàm ipsi appeto. Tua me ad religionis habitum iussio, non diuina traxit dilectio. Vide quàm infelicem, & omnibus miserabiliorem ducam vitam, si tanta hîc frustra sustineo: nihil habitura remunerationis in futuro. Diu te, sicut multos, simulatio mea fefellit, vt religioni deputares hypochrism: & ideò nostris te maximè commendans orationibus, quod à te expecto à me postulas. Noli, obsecro, de me tanta præsumere, ne mihi cesses orando subuenire. Noli æstimare sanam, ne medicaminis subtrahas gratiam. Noli non egentem credere, ne differas in necessitate subuenire. Noli valitudinem.

putare, ne prius corruam quàm subistentes labentem. Multis ficta sui laus nocuit, & præsidium quo indigebant abstulit. Per Esaiam Dominus clamat, *Popule meus, qui te beatificans* Esai. 3.
ipso te decipiunt, & viam gressuum tuorum dissipant. Et per Ezechielem, *Vae qui consuitis,* inquit, *pulvillo sub omni cubitu manus, & cervicalia sub capite etatis uniuersæ ad decipiendas animas.* Ezech. 13.
 E contra autem per Salomonem dicitur, *verba sapientum quasi stimuli, & quasi clavi in altum defixi, qui videlicet vulnera nesciunt* Eccles. 12.
palpare, sed pungere. Quiesce obsecro à laude mea, ne turpem adulationis notam & mendacij crimen incurras: aut si quod in me suspicaris bonum, ipsum laudatum vanitatis aura ventilet. Nemo medicinæ peritus interiorem morbum ex exterioris habitus inspectione dijudicat. Nulla, quicquid meriti apud Deum obtinent, quæ reprobis æquè vt electis communia sunt. Hæc autem ea sunt, quæ exteriùs aguntur, quæ nulli Sanctorum tam studiosè peragunt, quantum hypocritæ. Præuuum est cor hominis, & inscrutabile etiam: quis cognosceret illud? Et sunt viæ hominis quæ videntur rectæ: nouissima autem illius deducunt ad mortem. Temerarium est in eo iudicium hominis, quod diuino tantum reseruatur examini. Vnde & scriptum est: *Ne laudaueris hominem in vita.* Ne tunc videlicet hominem laudes, dum laudando facere non laudabilem potes. Tantò autem mihi tua laus in me periculosior est, quantò gratior: & tantò amplius ea capior & delector, quantò amplius tibi per omnia placere studeo. Time obsecro semper de me potius quàm confidas, vt tua semper sollicitudine adiuuer. Nunc verò præcipuè timendum est, vbi nullum incōtinentiæ meæ superest in te remedium. Nolo me ad virtutem exhortans, & ad pugnam prouocans, dicas: *Nam* 1. Cor. 12.
virtus in infirmitate perficitur: &, non coronabitur nisi qui legitime 2. Tim. 2.
certauerit. Non quero coronam victoriæ. Satis est mihi periculum euitare. Tutiùs euitatur periculum, quàm committitur bellum. Quocumq; me angulo cœli Deus collocet, satis mihi faciet. Nullus ibi cuiquam inuidebit, cùm singulis quod habebunt suffecerit. Cui quidem consilio nostro vt ex autoritate quoque robur adiungam, beatum audiamus Hieronymum: *Fateor imbecillitatem meam, nolo spe victoriæ pugnare, ne perdam aliquando victoriam.* Quid necesse est certamittere, & incerta sectari?

2. Tim. 2. aduers. Vigilantium

EPISTOLA V.

Quæ est Rescriptum PETRI rursus ad HELOISSAM.

ARGVMENTVM.

Quatuor capitibus, quibus totam nonissimam Heloissæ Epistolam constare dicit, arguere respondet Abaelardus: singulorumque rationes prosequitur, non tam ut se ipsum excuset, quam ut ipsam doceat, hortetur, & consoletur Heloissam. Primò quidem rationem ponit, qua in postremis literis suis nomen eius suo præposuerit. Secundò, quod suorum periculorum & mortis mentionem egerit, se ab ea adiuratum fecisse exponit. Tertium de laudum suarum rejectione approbat: modò id sincerè & sine laudis fiat cupiditate. Quartò de sua viriisque conuersionis occasione ad vitam Monasticam fasius prosequitur. Plagam in corporis sui fœda parte, quam illa plungebat, sic extenuat: ut eam utrique saluberrimam, & multorum bonorum causam esse proficiatur, comparatione turpius eiusdem pudenda partis actōrum: atque eam ob rem diuinam excolit sapientiam & clementiam. Multa denique passim ponuntur ad doctrinam & exhortationem atque consolationem Heloissæ. Ponitur & breuis oratio qua Monacha Paracletenses Abaelardo & Heloissæ Deum propitiarent.

Sponsæ Christi seruus eiusdem.



N quatuor, memini, circa quæ Epistolæ tuæ nouissimæ summa consistit, offensæ tuæ commotionē expressisti. Primò quidem super hoc conquereris, quòd præter consuetudinem Epistolarum, imò etiam contra ipsum naturalem ordinem rerum, Epistola nostra tibi directæ te mihi in salutatione præposuit. Secundò, quòd cum vobis consolationis potiùs remedium afferre debuisssem, desolationem auxi, & quas mitigare debueram lachrimas excitaui. Illud videlicet ibidem adiungens, *Quòd si me Dominus in manus inimicorum tradiderit, ut me scilicet præualentes interficiant, &c.* Tertio verò veterem illam & assiduam querelam tuam in Deum adiecisti, de modo videlicet nostræ conuersionis* ad Deum, & crudelitate prodicionis illius in me commissæ. Denique accusationē tui contra nostram in te laudem opposuisti, non cum supplicatione modica, ne id deinceps præsumerem. Quibus quidem singulis rescribere decreui, non tam pro excusatione mea, quam pro doctrina vel exhortatione tua; ut eò scilicet libentiùs petitionibus assentias no-

* al. con-
uersationis

stris, quò eas rationabiliùs factas intellexeris; & tantò me ampliùs exaudias in tuis, quantò reprehensibilem minus inuenies in meis; tantòque ampliùs verearis contemnere, quàtò minus videris dignum reprehensione.

De ipso autè nostræ salutationis, vt dicis, ordine præponero, iuxta tuam quoque, si diligenter attendas, actū est sententiam. Id enim quod omnibus patet, tu ipsa indicasti, vt cū videlicet ad superiores scribitur, eorum nomina præponantur. Te verò ex tunc me superiorē factam intelligas, quò domina mea esse cœpisti, Domini mei sponsa effecta, iuxta illud beati Hieronymi ad Eustochium ita scribentis: *Hec idcirco domina mea Eustochium, scribo. Dominam quippe debeo vocare sponsam Domini mei.* Felix talium commercium nuptiarum, vt homunculi miseri priùs vxor, nunc in summi Regis thalamis sublimeris. Nec ex huius honoris priuilegio priori tantummodo viro, sed quibuscumque seruis eiusdem Regis prælata. Ne mireris igitur si tam viuus quàm mortuus me vestris præcipuè commendem orationibus; eū iure publico constet apud dominos plus eorum sponas intercedendo posse, quàm ipsorum familias, dominas ampliùs quàm seruos. In quarum quidem typo Regina illa & summi Regis sponsa diligenter describitur, cū in Psalmo dicitur, *Astitit Regina à dextris tuis.* Ac si apertè dicatur, ista iuncto latere sponso familiarissimè adheret, & pariter incedit, cæteris omnibus quasi à longè abstantibus * vel subsequenter. De huius excellentia prærogatiuæ sponsa in Canticis exultans, illa vt ita dicam quam Moyse duxit, Æthiopissa dicit: *Nigra sum, sed formosa, filia Hierusalem. Ideò dilexit me Rex, & introduxit me in cubiculum suum.* Et rursus, *Nolite considerare quòd fusca sum, quia decolorauit me Sol.* In quibus quidem verbis cū generaliter anima describatur contemplatiua, quæ specialiter Sponsa Christi dicitur, expressiùs tamen ad vos hoc pertinere ipse etiam vester exterior habitus loquitur. Ipse quippè cultus exterior nigrorum aut vilium indumentorum, instar lugubris habitus bonarum viduarum mortuos quos dilexerant viros plangentium, vos in hoc mundo, iuxta Apostolum, verè viduas & desolatas ostendit, stipendia Ecclesiæ sustentandas. De quarum etiam viduarum luctu super occisum earum sponsum Scriptura commemorat,

Ad primam
querimoniam.

Tom. 1.
Epist. 22.

Psal. 44.

* al. adstantibus.
Num. 12.
Cant. 1.

Ibidem.

1. Tim. 5.

Matth. 27. dicens: *Mulieres sedentes ad monumentum lamentabantur flentes Dominum.* Habet autem Æthiopissa exteriorem in carne nigredinem, & quantum ad exteriora pertinet, cæteris apparet feminis deformior: cum non sit tamen in interioribus dispar, sed in plerisque etiam formosior atque candidior, sicut in ossibus seu dentibus. Quorum videlicet dentium candor in ipso etiam commendatur Sponso, cum dicitur: *Et dentes eius lacte candidiores.* Nigra itaque in exterioribus, sed formosa in interioribus est; quia in hac vita crebris aduersitatû tribulationibus corporaliter afflicta, quasi in carne nigrescit exterius, iuxta illud Apostoli: *Omnes qui volunt pie vivere in Christo tribulationem patientur.* Sicut enim candido prosperû, ita non incongruè nigro designatur aduersum. Intus autem quasi in ossibus candet, quia in virtutibus eius anima pollet, *Psal. 44.* sicut scriptum est: *Omnis gloria eius filie Regis ab intus.* Ossa quippe, quæ interiora sunt, exteriori carne circumdata, & ipsius carnis, quam gerunt vel sustentant, robur ac fortitudo sunt, bene animam exprimunt, quæ carnem ipsam, cui inest, viuificat, sustentat, mouet atque regit, atque ei omnem valitudinem ministrat. Cuius quidem est candor siue decor, ipsæ quibus adornatur virtutes. Nigra quoque est in exterioribus, quia dum in hac peregrinatione adhuc exulat, vilem & abiectam se tenet in hac vita; ut in illa sublimetur, quæ est abscondita cum Christo in Deo, patriam iam adeptâ. Sic verò eam sol verus decolorat, quia cœlestis amor Sponsi eam sic humiliat, vel tribulationibus cruciat; ne eam scilicet prosperitas extollar. Decolorat eam sic, id est, dissimilem eam à cæteris facit, quæ terrenis inhiant, & seculi quærunt gloriam; ut sic ipsa verè lilium conuallium per humilitatem efficiatur: non lilium quidem montium, sicut illæ videlicet fatuæ virgines, quæ de munditia carnis, vel abstinence exteriori apud se intumescētes, æstu temptationum aruerunt. Benè autem filias Hierusalem, id est, imperfectiores alloquens fideles, qui filiarum potius quàm filiorum nomine digni sunt, dicit. *Nolite me considerare quòd fusca sim, quia decolorauit me sol.* Ac si apertiùs dicat. Quòd sic me humilio, vel tam viriliter aduersitates sustineo, non est meæ virtutis; sed eius gratiæ, cui deseruio. Aliter solent hæretici vel hypocritæ, quantum ad faciem hominum spectat, spe terrenæ gloriæ

gloriæ sese vehementer humiliare, vel multa inutiliter tolerare. De quorum quidem huiusmodi abiectiōe vel tribulatione, quam sustinent, vehementer mirandum est; cū sint omnibus miserabiliores hominibus, qui nec presentis vitæ bonis, nec futuræ fruuntur. Hoc itaque Sponsa diligenter considerans, dicit: *Nolite mirari cur id faciā.* Sed de illis mirandum est, qui inutiliter terrenæ laudis desiderio æstuantēs terrenis se priuant commodis, tam hīc quā in futuro miseri. Qualis quidem fatuarum virginum continentia est, quæ *Math. 25.* à ianua sunt exclusæ. Benè etiam, quia nigra est, ut diximus, & formosa, dilectam & introductam se dicit in cubiculum Regis, id est in secretum vel quietem contemplationis, & lectulum illum de quo eadem alibi dicit: *In lectulo meo per noctes quæsiui quem diligit anima mea.* Ipsa quippe nigredinis deformitas occultum potius quā manifestum, & secretum magis quā publicum amat. Et quæ talis est vxor, secreta potius viri gaudia quā manifesta desiderat, & in lecto magis vult sentiri quā in mensa videri. Et frequenter accidit, ut nigrarum caro feminarum quantò est in aspectu deformior, tantò sit in tactu suauior: atque ideo earum voluptas secretis gaudijs quā publicis gratior sit & conuenientior, & earum viri ut illis oblectentur magis eas in cubiculum introducunt, quā ad publicum educunt. Secundum quam quidem metaphoram bene spiritalis Spōsa cū præmisisset, *Nigra sum, sed formosa*, statim adiunxit: *Idcō dilexit me Rex, & introduxit me in cubiculum suum,* singula videlicet singulis reddens. Hoc est, quia formosa, dilexit: quia nigra, introduxit. Formosa, ut dixi, intus virtutibus, quas diligit Sponsus: nigra exterius corporalium tribulationū aduersitatibus. Quæ quidem nigredo, corporalium scilicet tribulationum, facile fidelium mentes ab amore terrenorum auellit, & ad æternæ vitæ desideria suspendit, & sæpe à tumultuosa seculi vita trahit ad secretum contemplationis. Sicut in Paulo illo videlicet nostræ, id est, Monachalis vitæ primordio actum esse beatus scribit Hieronymus. Hæc quoque abiectio indumentorum vilium secretum magis quā publicum appetit, & maxima vilitatis* ac secretioris loci, qui nostræ præcipuè conuenit professioni, custodienda est. Maximè namque ad publicum procedere preciosus prouocat cultus, quem à nullo

*Math. 25.**Cant. 3.**Cant. 1.**Tom. 1. in
vita.*** al. humil-
latus*

*Homil. 40.
in Luc. 16.*

Matth. 6.

Matth. 23.

*Libr. 6. de
baptismo cō-
tra Donatist.
c. 3. dist. 3.
ca. qui con-
tempta.*

1. Cor. 6.

*Ad secun-
dam.*

appeti nisi ad inanem gloriam & seculi pompam beatus Gre-
gorius indè conuincit: *Quod nemo his in occulto se ornat,*
sed vbi conspici queat. Hoc autem prædictum Sponsæ cu-
biculum illud est, ad quod ipse Sponsus in Euangelio inuitat
orantem, dicens: *Tu autem cum oraueris, intra in cubiculum,*
& clauso ostio ora Patrem tuum. Ac si diceret. Non in plateis
vel publicis locis, sicut hypocritæ. Cubiculum itaque di-
cit secretum à tumultibus & aspectu seculi locum, vbi quie-
tius & purius orari possit: qualia sunt scilicet Monasticharum
solitudinum secreta, vbi claudere ostium iubemur, id est, a-
ditus omnes obstruere ne puritas orationis casu aliquo præ-
pediatur, & oculus noster infelicem animam deprædetur.
Cuius quidem cōsiliij, imò præcepti diuini multos huius ha-
bitus nostri contemptores adhuc grauitèr substinemus, qui
cùm diuina celebrant officia claustris vel choris eorum rese-
ratis, publicis tam feminarum quàm virorum aspectibus im-
pudenter se ingerunt, & tunc præcipuè cùm in solemnitati-
bus preciosis polluerint ornamentis, sicut & ipsi quibus ostē-
tant, seculares homines. Quorum quidem iudicio tantò fe-
stiuitas habetur celebrior, quantò in exteriori ornatu est di-
tior, & in epulis copiosior. De quorum quidem cæcitate mi-
serrima & pauperum Christi religioni penitus contraria
tantò est silere honestius quantò loqui turpius. Qui penitus
Iudaizantes consuetudinem suam sequuntur pro regula, &
irritum fecerunt mandatum Dei per traditiones suas: non
quod debeat, sed quod soleat attendentes. Cùm, vt beatus
etiā meminit Augustinus, Dominus dixerit, *Ego sum veritas,*
non ego sum consuetudo. Horum orationibus, quæ aperto
scilicet fiunt ostio, qui voluerit se commendat. Vos autem
quæ in cubiculum cælestis Regis ab ipso introductæ, atq; in
eius amplexibus quiescentes, clauso semper ostio ei totæ va-
catis, quantò familiariùs ei adhæretis, iuxta illud Apostoli,
Qui adheret Domino vnus spiritus est, tantò puriorem & effica-
ciorem habere confidimus orationem, & ob hoc vehemen-
tiùs earum efflagitamus opem. Quas etiam tantò deuotiùs
pro me faciendas esse credimus, quantò maiore nos inuicem
charitate colligati sumus.

Q V O D verò mentione periculi in quo laboro, vel mortis
quam timeo, vos commoui: iuxta ipsam quoque tuam factū

est exhortationem, imò etiā adiurationem. Sic enim prima, quam ad me direxisti, quodam loco continet Epistola: *Per ipsum itaque qui te sibi adhuc quoquo modo protegit Christum obsecramus, quatenus ancillulas ipsum & tuas crebris literis de his, in quibus adhuc fluctuas, naufragiis certificare digneris: ut nos saltem quæ tibi solere mansimus, doloris vel gaudij participes habeas. Solent enim dolenti nonnullam adferre consolationem qui cōdolent. Et quodlibet onus pluribus impositum leuius substinetur siue defertur. Quid igitur arguis, quòd vos anxietatis meæ participes feci, ad quod me adiurando compulisti? Nunquid in tanta vitæ, qua crucior, desperatione gaudere vos conuenit? Nec doloris sociæ, sed gaudij tantum vultis esse: nec flere cum flētibus, sed gaudere cum gaudentibus? Nulla maior verorum & falsorū differētia est amicorum, quàm quòd illi aduersitati, isti prosperitati se sociāt. Quiesce obsecro ab his dictis, & huiusmodi querimonias compesce, quæ à visceribus charitatis absistunt longissimè. Aut si adhuc in his offenderis, me tamen in tanto periculi positum articulo, & quotidiana desperatione vitæ, de salute animæ sollicitum esse conuenit esse, & de ipsa dum licet providere. Nec tu, si me verè diligis, hanc exosam providentiam habebis. Quinetiam si quam de diuina erga me misericordia spem haberes, tantò amplius ab huius vitæ ærūnis liberari me cuperes, quantò eas conspicias intolerabiliores. Certum quippè tibi est, quòd quisquis ab hac vita me liberet, à maximis pœnis eruet. Quas postea incurram incertū est, sed à quantis absoluar dubium non est. Omnis vita misera iocundum exitum habet, & quicumque aliorum anxietatibus verè compatiuntur & condolent, eas finiri desiderant: & cum damnis etiam suis, si quos anxios vident verè diligūt, nec tam commoda propria quàm illorum in ipsis attendunt. Sic diu lāguentem filium mater etiam morte languorem finire desiderat, quem tolerare ipsa non potest, & eo potius orbari substinet quàm in miseria consortem habere. Et quicūque amici præsentia plurimum oblectatur, magis tamō beatam esse vult eius absentiam quàm præsentiam miseram. Quia quibus subuenire non valet ærumnis, tolerare non potest. Tibi verò nec nostra vel etiam misera cōcessum est frui præsentia. Nec ubi tuis in me commodis aliquid provideas, cur me miserrimè vivere malis quàm felicius mori nō video.*

Quod si nostras protendi misérias in commoda tua desideras, hostis potius quam amica conuinceris. Quod si videri refugis, ab his obsecro, sicut dixi, quiesce querimonijs.

Ad tertiam

Prover. 18.

Luc. 18.

Tom. 1.

Epsl. 22.

Virgil. Eclog.

3.

* al. accen-
dimus

* al. impu-
dentes

Tom. 1.

Epsl. 22.

Ad quartā.

APPROBO autem, quod reprobas, laudem; quia in hoc ipso te laudabiliorem ostendis. Scriptum est enim: *Iustus in primordio accusator est sui: & qui se humiliat se exaltat.* Atque utinam sic sit in animo tuo sicut in scripto! Quod si fuerit, vera est humilitas tua, ne pro nostris euanuerit verbis. Sed vide obsecro ne hoc ipso laudem quæras quo laudem fugere videris, & reprobes illud ore quod appetas corde. De quo ad Eustochium virginem sic inter cætera beatus scribit Hieronymus, *Naturali ducimur malo. Adulatoribus nostris libenter fauemus, & quanquam nos respondeamus indignos, & callidior rubor ora suffundat, attamen ad laudem suam intrinsecus anima letatur.* Talem & lasciua calliditatem Galatheæ Virgilius describit, quæ quod volebat fugiendo appetebat, & simulatione repulsæ ampliùs in se amantem incitabat

Et fugit ad salices, inquit, & se cupit ante videri.

Antequam lateat cupit se fugientem videri, ut ipsa fuga, qua reprobare consortium iuuenis videtur, ampliùs acquirat. Sic & laudes hominum dum fugere videmur, ampliùs erga nos excitamus, & cum latere nos velle simulamus, ne quis scilicet in nobis quid laudet agnoscat, ampliùs attendimus * in laudem nostram imprudētes, * quia eo laude videmur digniores. Et hæc quidem quia sæpè accidunt dicimus, non quia de te talia suspicemur, qui de tua non hæsitamus humilitate. Sed ab his etiam verbis te temperare volumus, ne his qui te minus nouerint videaris, ut ait Hieronymus, fugiendo gloriam quærere. Nunquam te mea laus inflabit, sed ad meliora prouocabit, & tantò studiosiùs quæ laudauero amplecteris, quāto mihi ampliùs placere satagis. Non est laus nostra testimonium tibi religionis, ut hinc aliquid extollentiæ sumas. Nec de commendatione cuiusquam amicis credendum est, sicut nec inimicis de vituperatione.

SUPEREST tandem ut ad antiquam illam, ut diximus, & assiduam querimoniam tuam veniamus, quia videlicet de nostræ conuersionis modo Deum potius accusare præsumis, quam glorificare, ut iustum est, velis. Hanc iamdudum amaritudinem animi tui tam manifesto diuinæ misericordiæ

consilio euauisse credideram. Quæ quantò tibi periculofior est, corpus tuum pariter & animam conterens; tantò miserabilior est, & mihi molestior. Quæ cùm mihi per omnia placere, sicut profiteris, studeas, hoc saltem vno vt me non crucies, imò vt mihi summopere placeas, hanc depone. Cum qua mihi non potes placere, neque mecum ad beatitudinem peruenire. Substinebis illuc me sine te pergere, quem etiam ad Vulcania profiteris te sequi velle? Hoc saltem vno religionem appete, ne à me ad Deum, vt credis, properantem diuidaris; & tantò libentiùs quantò quò veniendum nobis est beatius est; vt tantò scilicet societas nostra sit gratior, quantò felicior. Memento quæ dixeris. Recordare quæ scripseris, in hoc videlicet nostræ conuersionis modo, quo mihi Deus ampliùs aduersari creditur, propitiorem mihi sicut manifestum est extitisse. Hoc vno saltem hæc eius dispositio tibi placeat, quòd mihi sit saluberrima, imò mihi pariter & tibi, si rationem vis doloris admittat. Nec te tanti boni causam esse doleas, ad quod te à Deo maximè creatam esse non dubites. Nec quia id tulerim plāgas, nisi cum Martyrum passionum, ipsiusque Dominicæ mortis commoda te contristabunt. Nunquid si id mihi iustè accidisset, tolerabiliùs ferres, & minus te offenderet? Profecto si sic fieret, eo modo contingeret quo mihi esset ignominiosius, & inimicis laudabilius; cùm illis laudem iustitia, & mihi contemptum acquireret culpa. Nec iam quisquam quod actum est accusaret, vt compassione mei moueretur. Vt tamen & hoc modo huius amaritudinem doloris leniamus, tam iustè quàm vtiliter id monstrabimus nobis accidisse, & rectiùs in coniugatos quàm in fornicantes vltum Deum fuisse. Nosti post nostri considerationem coniugij, cùm Argenteolicum Sanctimonialibus in claustro conuersabar, me die quadam priuatim ad te visitandam venisse, & quid ibi tecum meæ libidinis egerit intemperantia in quadam etiam parte ipsius resectorij, cùm quò alias diuerteremus, non haberemus. Nosti, inquam, id impudentissimè tunc actum esse in tam reuerendo loco & summæ Virgini consecrato. Quod, etsi alia cessent flagitia, multò grauiore dignum sit vltione. Quid pristinas fornicationes & impudentissimas referam pollutiones, quæ coniugium præcesserunt? Quid summam denique prodicionem

meam, qua de te ipsa tuum, cum quo assidue in eius domo conuiuebam, auunculum tam turpiter seduxi? Quis me ab eo iuste prodi non censeat, quem tam impudenter ante ipse prodideram? Puras ad tantorum criminum ultionem momentaneum illius plagæ dolorem sufficere? Imò tantis malis tantum debitum esse commodum? Quam plagam diuinæ sufficere iustitiæ credis ad tantam contaminationem, ut diximus, sacerrimi loci suæ matris? Certè nisi vehementer erro, non tam illa saluberrima plaga in ultionem horum conuersa est, quàm quæ quotidie indefinenter sustineo. Nosti etiam quando te grauidam in meam transmisi patriam, sacro te habitu indutam Monialem te finxisse, & tali simulatione tuæ, quam nunc habes, religioni inreuerenter illulisse. Vnde etiam pensa quàm conuenienter ad hanc te religionem diuina iustitia, imò gratia traxerit nolentem, cui verita non es illudere, volens ut in ipso luas habitu quod in ipsum deliquisti, & simulationis mendacio ipsa rei veritas remedium præstet, & falsitatem emendet. Quod si diuinæ in nobis iustitiæ nostram velis utilitatem adiungere, non tam iustitiam quàm gratiam Dei quod tunc egit in nobis poteris appellare. Attende itaque, attende, charissima, quibus misericordiæ suæ retribus à profundo huius tam periculosi maris nos Dominus piscauerit, & à quantæ Charibdis voragine naufragos licet inuitos extraxerit, ut meritò vterque nostrum in illam perrumpere, * posse videatur vocem: *Dominus sollicitus est mei.* Cogita & recogita, in quantis ipsi nos periculis cōstituti eramus, & à quantis nos eruerit Dominus: & narra semper cum summa gratiarum actione quanta fecit Dominus animæ nostræ: & quoslibet iniquos de bonitate Domini desperantes nostro consolare exemplo, ut aduertant omnes quid supplicatibus atque petentibus fiat, cum tam * peccatoribus & inuitis tanta præstentur beneficia. Perpendè altissimum in nobis diuinæ consilium pietatis, & quàm misericorditer iudicium suum Dominus in correptionem verterit, & quàm prudenter malis quoque ipsis usus sit, & impietatem piè deposuerit, ut vnus partis corporis mei iustissima plaga duabus mederetur animabus. Confer periculum & liberationis modum. Confer languorem & medicinam. Meritorum causas inspicere, & miserationis affectus admirare. Nosti quantis turpitudinibus

* al. pro-
rompere
Psal. 39.

Psal. 65.

* al. iam

immoderata me alibido corpora nostra addixerat, vt nulla honestatis vel Dei reuerentia in ipsis etiam diebus Dominica passionis, vel quantarumcumque solemnitarum ab huius luti volutabro me reuocaret. Sed & te nolētem, & prout poteras reluctantem & dissuadentem, quæ natura infirmior eras, sæpius minis ac flagellis ad consensum trahebam. Tātō enim tibi concupiscentiæ ardore copulatus eram, vt miserar illas & obscœnissimas voluptates, quas etiam nominare confundimur, tam Deo quàm mihi ipsi præponerem: nec tam aliter consulere posse diuina videretur clementia, nisi has mihi voluptates sine spe vlla omnino interdiceret * *al. inter- cideret*

Vnde iustissimè & clementissimè licet cum summa tui auunculi prodicione, vt in multis crescerem, parte illa corporis sum minutus, in qua libidinis regnum erat, & tota huius concupiscentiæ causa consistebat: vt iustè illud pleteretur membrum, quod in nobis commiserat totum, & expiaret patiēdo quod deliquerat oblectando: & ab his me spurcitijs, quibus me totum quasi luto immerseram, tam mente quàm corpore circumcideret: & tantō sacris etiam altaribus idoneiorem efficeret, quantō me nulla hinc ampliùs carnalium contagia pollutionum reuocarent. Quàm clementer etiam in eo tantū me pati voluit membro, cuius priuatio & animæ saluti consuleret, & corpus non deturparet, nec vllam officiorum ministratiōem præpediret *. Imò ad omnia, quæ honestè geruntur, tantō me promptiorem efficeret, quantō ab hoc concupiscentiæ iugo maximo ampliùs liberaret. Cū itaque membris his vilissimis, quæ pro summæ turpitudinis exercitio pudenda vocantur, nec proprium substantient nomen, me diuina gratia mūdauit potius quàm priuauit, quid aliud egit quàm ad puritatem mundiciæ conseruandam sordida remouit & vitia? Hanc quidem mundiciæ puritatem nonnullos sapientium vehementissimè appetētes inferre etiam sibi manum audiuius, vt hoc à se penitus remouerent concupiscentiæ flagitium. Pro quo etiā stimulo carnis auferēdo & Apostolus perhibetur Dominum rogasse, nec exauditum esse. In exemplo est ille magnus Christianorū Philosophus Origenes, qui vt hoc in se penitus incendium extingueret, manus sibi inferre veritus non est: ac si illos ad literam verè beatos intelligeret,

1. Cor. 11.

Euseb. Hist.
Eccles. lib. 6.
c. 7.

- Matth. 19. qui seipsum propter regnum cœlorum castrauerunt, & tales illud veraciter implere crederet, quod de membris scandalizantibus nobis præcipit Dominus, ut ea scilicet à nobis abscindamus & proijciamus, & quasi illam Isaia Prophetiam ad historiam magis quam ad mysterium duceret, per quam cæteris fidelibus Eunuchos Dominus præfert, dicēs: *Eunuchi si custodierint sabbatha mea, & elegerint quæ volui, dabo eis in domo mea & in muris meis locum, & nomen melius à filiis & filiabus. Nomen sempiternum dabo eis, quod non peribit.* Culpam tamen non modicam Origenes incurrit, dum per pœnam corporis remediū culpæ quærit. Zelum quippe Dei habens, sed non secundum scientiam, homicidij incurrit reatum, inferendo sibi manum. Suggestione diabolica vel errore maximo id ab ipso constat esse factum, quod 'miseratione Dei in me est ab alio perpetratum. Culpam euito, non incurro. Mortem mereor, & vitam assequor. Vocor, & reluctor. Insto criminibus, & ad veniam trahor inuitus. Orat Apostolus, nec exauditur. Precibus instat, nec impetrat. Verè Dominus sollicitus est mei. Vadam igitur & narrabo quanta fecit Dominus animæ meæ. Accede & tu inseparabilis comes in vna gratiarum actione, quæ & culpæ particeps facta es & gratiæ. Nam & tuæ Dominus non immemor salutis, imò plurimum tui memor, qui etiam sancto quodam nominis prælagio te præcipue suam fore præsignauit, cum te videlicet Heloysam ex proprio nomine suo, quod est Heloym insigniuit: ipse, inquam, clementer disposuit in vno duobus consulere, quos diabolus in vno nitebatur extinguere. Paululum enim antequam hoc accideret, nos indissolubili lege sacramenti nuptialis inuicem adstrinxerat, cum cuperem te mihi supra modum dilectam in perpetuum retinere, imò cum ipse iam tractaret ad se nos ambos hac occasione conuertere. Si enim mihi antea matrimonio non esses copulata, facile in discessu meo à seculo, vel suggestione parentum, vel carnalium oblectatione voluptatum, seculo inhæsissem. Vide ergo quantum sollicitus nostri fuerit Dominus, quasi ad magnos aliquos nos reseruaret usus, & quasi indignaretur aut doleret illa literalis scientiæ talenta, quæ vtrique nostrum commiserat, ad sui nominis honorem non dispensari: aut quasi etiam de incontinentissimo seruulo vereretur, quod scriptum est, *Quia mulieres faciunt*

Eccl. 19.

faciunt etiam apostatare sapientes. Sicut de sapientissimo cer-
 tum est Salomone. Tuæ vero prudentiæ talentum quantas
 quotidie Domino referat vsuras, quæ multas domino iam
 spirituales filias peperisti, me penitus sterili permanente, &
 in filijs perditionis inaniter laborante. O quàm detestabile
 damnum! quàm lamentabile incommodum, si carnalium
 voluptatum sordibus vacans paucos cum dolore pareres mū-
 do, quæ nunc multiplicem prolem cum exultatione partu-
 ris celo! Nec esses plus quàm femina, quæ nunc etiam viros
 transcendis, & quæ maledictionem Eux in benedictionem
 vertisti Mariæ. O quàm indecenter manus illæ sacræ, quæ
 nunc etiam diuina reuoluunt volumina, curæ muliebris ob-
 scœnitatibus deseruirent! Ipse nos à contagijs huius cœni, à
 voluptatibus huius luti dignatus est erigere*, & ad seipsum **al. cruce*
 vi quadam attrahere, qua percussum voluit Paulum conuer-
 tere, & hoc ipso fortassis exemplo nostro alios quoque litera-
 rum peritos ab hac deterrere præsumptione. Ne te id igitur,
 soror, obsecro moueat, nec patri paternè nos corrigenti sis
 molesta; sed attende quod scriptum est: *Quos diligit Deus, hos*
corripit. Castigat autem omnem filium quem recipit.* Et alibi, *Qui*
parcit virgæ, odit filium. Pœna est hæc momentanea, non æ-
 terna; purgationis, non damnationis. Audi Prophetam, &
 confortare: *Non indicabit Dominus bis in idipsum, & non con-*
surges duplex tribulatio. Attende summam illam & maximam
 Veritatis adhortationem: *In patientia vestra possidebitis animas*
vestras. Vnde & Salomon: *Melior est patiens viro forti, & qui*
dominatur animo suo, expugnatore urbium. Non* te ad lachry-
 mas aut ad compunctionem mouet vnigenitus Dei innocēs
 pro te & omnibus ab impijs simis comprehensus, distractus,
 flagellatus, & velata facie illusus, & colaphizatus, sputis cō-
 spersus, spinis coronatus, & tandem in illo crucis tunc tam
 ignominioso patibulo inter latrones suspensus, atque illo tūc
 horrēdo, & execrabili genere mortis interfectus? Hunc sem-
 per, soror, verum tuum & totius Ecclesiæ Sponsum præ
 oculis habe, mente gere. Intuere hunc exeuntem ad cruci-
 figendum pro te & baiulantem sibi crucem. Esto de populo
 & mulieribus, quæ plangebant & lamentabantur eum, sicut
 Lucas his verbis narrat: *Sequebatur autem multa turba populi &*
mulierum, quæ plangebant & lamentabantur eum. Ad quas qui-

3. Reg. 11.

Act. 9.

Proverb. 3.

**al. Flagel-*
lat

Hebr. 12.

Apoc. 3.

Naum. 1.

Luc. 12.

Proverb. 16.

**al. Num*

Luc. 23.

dem benignè conuersus, clementer eis prædixit futurum in
 vlutionem suæ mortis exitium, à quo quidem si saperent caue-
 re sibi per hoc possent. *Filia, inquit, Hierusalem, nolite flere su-
 per me, sed super vos ipsas flete, & super filios vestros. Quoniam ec-
 ce venient dies, in quibus dicent: Beata steriles, & ventres qui non
 genuerunt, & ubera quæ non lactauerunt. Tunc incipient dicere
 montibus, Cadite super nos: & collibus, Operite nos. Quia si in vi-
 ridi ligno hæc faciunt, in arido quid fiet? Patienti spontè pro re-
 demptione tua compatere, & super crucifixo pro te compū-
 gere. Sepulchro eius mente semper assiste, & cum fidelibus
 feminis lamentare & luge. De quibus etiam ut iam supra me-
 mini scriptum est, *Mulieres sedentes ad monumentum lamenta-
 bantur flentes Dominum.* Para cum illis sepultura eius vnguē-
 ta, sed meliora spiritualia quidem, non corporalia: hæc enim
 requirit aromata qui non suscepit illa. Super his toto deuo-
 tionis affectu compungere. Ad quam quidem compassionis
 compunctionem ipse etiam per Hieremiam fideles adhorta-
 tur dicens, *O vos omnes qui transitis per viam, attendite & videte
 si est dolor similis sicut dolor meus.* Id est, si super aliquo patien-
 te ita est per compassionem dolendum, cū ego scilicet so-
 lus sine culpa quod alij deliquerint luam. Ipse autem est via
 per quam fideles de exilio transeunt ad patriam. Qui etiam
 crucem, de qua sic clamat, ad hoc nobis crexit scalam. Hic
 pro te occisus est vnigenitus Dei, oblatus est, quia voluit. Su-
 per hoc vno compatiendo dole, dolendo compatere. Et
 quod per Zachariam Prophetam de animabus deuotis præ-
 dictum est comple: *Plangent, inquit, planctum quasi super vni-
 genitum, & dolebunt super eum ut doleri solet in morte primogeni-
 ti.* Vide, soror, quantus sit planctus his qui Regem diligunt
 super morte primogeniti eius & vnigeniti. Intuere quo plā-
 ctu familia, quo mœrore tota consummatur curia &, cū
 ad Sponsam vnigeniti mortui perueneris, intolerabiles vlul-
 atus eius non sustinebis. Hic tuus, soror, planctus, hic
 tuus sit vlulatus, quæ te huic Sponso felici copulasti matri-
 monio. Emit te iste non suis, sed seipso. Proprio sanguine
 emit te, & redemit. Quantum ius in te habeat vide, & quā
 preciosa sis intuere. Hoc quidem pretium suum Apostolus
 attendens, & in hoc pretio quanti sit ipso, pro quo ipsum da-
 tur, perpendens, & quam tantæ gratiæ vicem referat adne-*

Stens: Absit mihi, inquit, gloriari nisi in cruce Domini nostri Iesu Christi, per quem mihi mundus crucifixus est, & ego mundo. Maior es cœlo, maior es mundo; cuius pretium ipse conditor mundi factus est. Quid in te, rogo, viderit, qui nullius eget, ut pro te acquirenda usque ad agonias tam horrendæ atque ignominiosæ mortis certauerit? Quid in te, inquam, quaerit nisi teipsam? Verus est amicus, qui te ipsam, non tua, desiderat. Verus est amicus, qui pro te moriturus dicebat: Maiorem hac dilectionem nemo habet, ut animam suam ponat quis pro amicis suis. Amabat te ille veraciter, non ego. Amor meus, qui utrumque nostrum peccatis inuoluebat, concupiscentia, non amor dicendus est. Miseras in te meas voluptates implebam, & hoc erat totum quod amabam. Pro te, inquis, passus sum, & fortassis verum est: sed magis per te, & hoc ipsum inuitus. Non amore tui, sed coactione mei. Nec ad tuam salutem, sed ad dolorem. Ille verò salubriter, ille pro te spontè passus est, qui passione sua omnem curat languorem, omnem remouet passionem. In hoc, obsecro, non in me tua tota sit deuotio, tota compassio, tota compunctio. Dole in tam innocentem tantæ crudelitatis perpetratâ iniquitatem: non iustam in me æquitatis vindictam, imò gratiam, ut dictum est, in utrosque summam. Iniqua enim es, si æquitatem non amas; & iniquissima, si voluntati, imò tantæ gratiæ Dei scienter es aduersa. Plange tuum reparatorem, non corruptorem; redemptorem, non scortarem; pro te mortuum Dominum, non viuentem seruum, imò nunc primum de morte vere liberatum. Caue obsecro ne, quod dixit Pompeius mœrenti Corneliæ, tibi impropere turpissimè,

Vixit post praelia Mannus:

Sed fortuna perit, quod desles illud amasti.

*Lucanus
lib. 8.*

Attende, precor, id, & erubescere, nisi admissas turpitudines impudentissimas commendes. Accipe itaque soror, accipe quæso patienter quæ nobis acciderunt misericorditer. Virga hæc est patris, nō gladius persecutoris. Percutit pater ut corrigat, ne feriat * hostis ut occidat. Vulnere mortem præuenit, * *al. ferit* non ingerit: immittit ferrum ut amputet morbum. Corpus *hostis* vulnerat, & animam sanat. Occidere debuerat, & viuificat. Immunditiam resecat, ut mundum relinquat. Punit semel ne puniat semper, patitur vnus ex vulnere ut duobus parca-

tur à morte. Duo in culpā, vnus in pœna. Id quoque tuæ infirmitati naturæ diuina indulgetur miseratione, & quodam modo iustè. Quò enim naturaliter sexu infirmior eras, & fortior continentia, pœnæ minus eras obnoxia. Refero Domino in hoc gratias, qui te tunc & à pœna liberauit, & ad coronam reseruauit; & cùm me vna corporis mei passione semel ab omni èstu huius concupiscentiæ, in qua vna totus per immoderatam incontinentiam occupatus eram, refrigerauit ne corruam; multas adolescentiæ tuæ maiores animi passionnes ex assidua carnis suggestione reseruauit ad martyrij coronam. Quod licet te audire tædeat, & dici prohibeas, veritas tamen id loquitur manifesta. Cui enim semper est pugna, superest & corona; quia non coronabitur nisi qui legitimè certauerit. Mihi verò nulla superest corona, quia nulla subest certaminis causa. Deest materia pugnæ, cui ablatus est stimulus concupiscentiæ. Aliquid tamen esse æstimo si cùm hinc nullam percipiam coronam, nonnullam tamen euitem pœnam, & dolore vnius momentaneæ pœnæ multis fortassis indulgeatur æternis. Scriptum est quippe de huius miserrimæ vitæ hominibus, imò iumentis: *Computraverunt iumenta in stercorebus suis*. Minus quoque meritum meum minui conqueror, dum tuum crescere non diffido. Vnum quippè sumus in Christo, vna per legem matrimonij caro. Quicquid est tuum, mihi non arbitror alienum. Tuus autem est Christus, quia facta es sponsa eius. Et nunc, vt supra memini, me habes seruum, quem olim agnoscebas dominum: magis tibi tamen amore nunc spirituali coniunctum, quàm timore subiectum. Vnde & de tuo nobis apud ipsam patrocinio amplius confidimus, vt id obtineam ex tua quod non possum ex oratione propria. Et nunc maximè cùm quotidiana periculorū aut perturbationum instantia nec viuere me, nec orationi sinat vacare. Nec illum beatissimum imitari potentem Candacis reginæ Æthiopum, qui erat super omnes gazas eius, & de tam lōginquo venerat adorare in Hierusalem. Ad quem reuertentem missus est ab Angelo Philippus Apostolus, vt eum conuerteret ad fidem: quod iam ille meruerat per orationem vel sacræ lectionis assiduitatem. A qua quidē vt nec in via tunc vacaret licet ditissimus & gentilis, magno diuinæ dispensationis actum est beneficio vt locus ei Scripturæ oc-

1. Tim. 2.

Lab. 1.

Act. 8.

curreret, qui opportunissimā conuersionis eius occasionem Apostolo præberet. Ne quid verò hanc petitionem nostram impediatur, vel impleri differat, orationem quoque ipsam, quā pro nobis domino supplices dicatis, componere, & mittere tibi maturaui.

DEVS qui ab ipso humanæ creationis exordio femina de costa viri formata nuptialis copulæ sacramentum maximum sanxisti, quique immensis honoribus vel de desponsata nascendo, vel miracula inchoando nuptias sublimasti, meæque etiam fragilitatis incontinentiæ utcumque tibi placuit olim hoc remedium indulxisti: Ne despicias ancillulæ tuæ preces, quas pro meis ipsis charisque mei * excessibus in cōspectu maiestatis tuæ supplex effundo. Ignosce, ô benignissime, imò benignitas ipsa, ignosce & tantis criminibus nostris, & ineffabilis misericordiæ tuæ multitudinem culparum nostrarum immensitas experiatur. Puni obsecro in præsentī reos, ut parcas in futuro. Puni ad horam, ne punias in æternum. Accipe in seruos virgam correctionis, non gladium furoris. Afflige carnem ut conserues animas. Ad sis purgator, non ultor; benignus magis quàm iustus. Pater misericors, non austerus Dominus. Proba nos Domine & tenta, sicut de semetipso rogat Propheta. Ac si apertè diceret. Prius vires inspice, ac secundum eas tentationum onera moderare. Quod & beatus Paulus fidelibus tuis promittens ait: *Potens est enim Deus, qui non patietur vos tentari supra id quod potestis, sed faciet cum tentatione etiam prouentum ut possitis sustinere.* Coniunxisti nos Domine, & diuixisti quando placuit tibi, & quo modo placuit. Nunc quod, Domine, misericorditer cœpisti, misericordissimè comple. Et quos à se semel diuixisti in mundo, perenniter tibi coniungas in cœlo. Spes nostra, pars nostra, expectatio nostra, consolatio nostra, Domine qui es benedictus in secula. Amen.

ORATIO.

* al. tãquam
meis

* al. Hoc

Vale in Christo sponsa Christi, in Christo valle, & Christo viue, Amen.


EPISTOLA VI.

Quæ est eiusdem HELOISSÆ ad eundem PETRUM.

ARGVMENTVM.

Duo potissimum in hac Epistola sibi & suis Monachabus Heloissa rescribi ab Abaelardo exorat: quorum alterum est, ut eas doceat unde Monacharum ordo originem duxit. Alterum est, ut eis aliquam scribas regulam, & certam vivendi formulam præscribas, quæ solis conveniat feminis, quod à nullo sanctorum Patrum antea tentatum fuerat. Hoc ut peteret, adducta videtur quibusdam Benedictina Regula Capitibus, quæ à feminis vix aut nullo omnino modo sine maximo periculo impleri possunt: de quibus tam doctè disseris, ut ipsam regulam solis viris, non autem feminis à sancto institutore scriptam convincere videatur. Unde indignum iudicat tam gravia femineo sexui infirmiori onera imponi, quàm virili fortiori. Suam autem & ipsa opinionem apponit, quare sancti patres Monachabus Regulas non præscripserint, asserens feminis sufficere, si clericis & viris Ecclesiasticis secularibus, vel Monachis, qui Canonici regulares dicuntur, in continentia & abstinentia non sint inferiores. Prolixè etiam de moderata dispensatione & discreta consideratione beati Benedicti, quæ suam temperavit Regulam, atque de ipsa Regula observantia disputat: nimirum de interdicto esu carniùm, & concessio vini usu. Fusius quoque de operibus exterioribus agit cum ipsorum extenuatione, quibus interiora præfert. Postremò monet Abaelardum, ut tanta discretionè cuncta siue de ieiuniorum vel diuinorum ratione temperet, ut feminei sexus consilium velit infirmitati. Et hic femina eruditionem, & pectus omni doctrina refertum animadvertere poteris. Quid enim pretiosa mercis in tam diuite apotheca non inuenias, siue philosophiam, siue Theologiam, vel etiam eloquentiam requiras? O seculum illud felix, talem intreri feminam, in qua quid primum, quid postremum admireris addubites!

Domino specialiter, sua singulariter.



NE me fortè in aliquo de inobediètia causari queas, verbis etiam immoderati doloris tuæ frenum impositum est iussionis, ut ab his mihi saltem in scribendo temperem, à quibus in sermone non tã difficile quàm impossibile est prouidere. Nihil enim minus in nostra est potestate quàm animus, ei que magis obedire cogimur quàm imperare possimus. Unde & cum nos eius affectiones stimulant, nemo earum subitos impulsus ita repulerit, ut non in effecta facile prorumpant, & se per verba faciliùs effluant quæ promptiores animi passionum sunt notæ. Secundum quod scriptum est, *Ex abundantia cordis os loqui-*

tur. Reuocabo itaque manum à scripto, in quibus linguam
 à verbis temperare non valeo. Utinam sic animus dolentis
 parere promptus sit, quemadmodum dextera scribentis. A-
 liquod tamen dolori remedium vales conferre, si non hunc
 omnino possis auferre. Vt enim insertum clauum alius ex-
 pellit, sic cogitatio noua priorem excludit. Cùm aliàs inten-
 tus animus priorum memoriam dimittere cogitur aut inter-
 mittere. Tantò verò amplius cogitatio quolibet animum oc-
 cupat, & ab alijs deducit; quantò quod cogitatur honestius
 æstimatur, & quò intendimus animum magis videtur neces-
 sarium. Omnes itaque nos Christi ancillæ, & in Christo filiæ
 tuæ, duo nunc à tua paternitate supplices postulamus, quæ
 nobis admodum necessaria prouidemus. Quorum quidem
 alterum est, vt nos instruere velis vnde Sæctimonialium Or-
 do cœperit, & quæ nostræ sit professionis authoritas. Alte-
 rum verò est, vt aliquam nobis Regulam instituas, & scriptâ
 dirigas, quæ feminarum sit propria, & ex integro nostræ cõ-
 uersationis statum habitumque describat, quod nondum à
 Patribus sanctis actum esse conspeximus. Cuius quidem rei
 defectu & indigentia nunc agitur, vt ad eiusdem Regulæ
 professionem tam mares quàm feminae in Monasterijs susci-
 piantur, & idem institutionis monasticæ iugum imponitur
 infirmo sexui æquè vt forti. Vnam quippe nunc Regulam
 beati Benedicti apud Latinos feminae profitentur æquè vt vi-
 ri. Quam sicut viris solummodo constat scriptam esse, ita &
 ab ipsis tantum impleri posse tam subiectis pariter quàm præ-
 latis. Vt enim cætera nunc omittam Regulæ capitula, quid
 ad feminas quod de cucullis, femoralibus, & scapularibus ibi
 scriptum est? Quid denique ad ipsas de tunicis aut de lanceis
 ad carnem indumentis; cùm earum humoris superflui men-
 struæ purgationes hæc omnino refugiant? Quid ad ipsas etiâ
 quod de Abbate statuitur, vt ipse lectionem dicat Euangeli-
 cam, & post ipsam Hymnum incipiat? Quid de mensa Abba-
 tis seorsim cum peregrinis & hospitibus constituenda? Nū-
 quid nostræ conuenit religioni, vt vel nunquam hospitium
 viris præbeat, aut cum his quos susceperit viris Abbatissa co-
 medat? O quàm facilis ad ruinam animarum virorum ac mu-
 lierum in vnum cohabitatio! Maximè verò in mensa, vbi
 crapula dominatur & ebrietas, & vinū in dulcedine bibitur,

* al. cõuer-
 sionis, &
 professio-
 nis,

S. Bened. in
 Regula c. 55

Regul. c. 111.
 Regula c. 56.

Tom. 1.
Epist. 47.

in quo est luxuria. Quod & beatus præcauens Hieronymus, ad matrem & filiam scribens meminit dicens, *Difficile inter epulas seruatur pudicitia*. Ipse quoque Poeta luxuriæ turpitudinisque doctor libro amatoriarum artis intitulato quãtam fornicationis occasionem conuiuia maximè præbeant studiosè exequitur, dicens:

Ouid. lib. 1.
de Arte amandi.

*Vinaque cum bibulas sparsere Cupidinis alas,
Permanet, & cepto stat gravis ille loco,
Tunc veniunt risus, tunc pauper cornua sumit:
Tunc dolor & cura, rugaque frontis abit.
Illic sæpè animos inueniunt rapere puella,
Et Venus in venis, ignis in igne furit.*

Tom. 1. Ep.
13. & 21.

Nunquid & si feminas solas hospitio susceptas ad mensam admiserint, nullum ibi latet periculum? Certè in seducenda muliere nullum est æquè facile vt lenocinium muliebre. Nec corruptæ mentis turpitudinem ita promptè cuiquam mulier committit sicut mulieri. Vnde & prædictus Hieronymus maximè secularium accessus feminarum vitare propositi sancti feminas adhortatur. Denique si viris ab hospitalitate nostra exclusis solas admittamus feminas, quis non videat quanta exasperatione viros offendamus, quorum beneficijs Monasteria sexus infirmi egent, maximè si eis à quibus plus accipiunt minus aut omninò nihil largiri videantur? Quod si prædictæ Regulæ tenor à nobis impleri non potest, vereor ne illud Apostoli Iacobi in nostram quoque damnationem dictum sit, *Quicumque totam legem obseruauerit, offendat autem in vno, factus est omnium reus*. Quod est dicere: De hoc ipso reus statuitur qui peragit multa, quod non implet omnia. Et transgressor legis efficitur ex vno, cuius impletor non fuerit nisi omnibus consummatis eius præceptis. Quod ipse statim diligenter exponens Apostolus adiecit, *Qui enim dixit, Non mæchaberis, dixit &, Non occides. Quod si non mæchaberis, occidas autem, factus es transgressor legis*. Ac si aperte dicat: Ideò quilibet reus sit de transgressione vniuscuiuslibet præcepti, quia ipse Dominus, qui præcipit vnum, præcipit & aliud. Et quodcumque legis violetur præceptum, ipse contemnitur qui legem non in vno, sed in omnibus pariter mandatis constituit. Vt autem præteream illa Regulæ instituta, quæ penitus obseruare non possumus, aut sine periculo

Iacob 1.

tulo non valemus: vbi vnquam ad colligendas messes Con- Regul. c. 48.
 uentus Monialium exire, vel labores agrorum habere con- Regul. c. 48.
 suevit? aut suscipiendarum feminarum constantiam vno
 anno probauerit, easque tertio perlecta Regula, sicut in ipsa
 iubetur, instruxerit? Quid rursus stultius quàm viam igno-
 tam, nec adhuc demonstratam aggredi? Quid præsumptuo-
 sius quàm eligere ac profiteri vitam quam nescias, aut votum
 facere quod implere non queas? Sed & cùm omnium virtu-
 tum discretio sit mater, & omnium bonorum mediatrix * sic * al. mode-
ratrix.
 ratio; quis aut virtutem aut bonum censeat quod ab istis dis-
 sentire videatur? Ipsas quippe virtutes excedentes modum
 atque mensuram, sicut Hieronymus asserit, inter vitia repu- Tom. I. ep. 8
 tari conuenit. Quis autem ab omni ratione ac discretione
 seiunctum non videat, si ad imponēda onera eorum, quibus
 imponuntur, valitudines prius non discutiantur, vt naturæ
 constitutionem humana sequatur industria? Quis asinum
 sarcina tanta *, qua dignū iudicat elephātē? Quis tāta pueris * f. deest one
rat, vel quid
simile.
 aut senibus quāta viris iniūgat? Tāta debilibus scilicet quāta
 fortibus, tāta infirmis quāta sanis, tanta feminis quāta mari-
 bus? Infirmiori videlicet sexui quanta & forti? Quod diligē-
 ter beatus Papa Gregorius attēdēs, Pastoralis sui cap. XIII. Part. 3. ad-
monit. 1.
 tam de admonendis quàm de præcipiendis ita distinxit: *Ali-
 ter igitur admonendi sunt viri, atque aliter femine: quia illis graui-
 istis verò sunt iniungenda leuiora: & alios magna exerceant, istas ve-
 ro leuia demulcendo conuertant.* Certè & qui Monachorum Re-
 gulas scripserunt, nec solum de feminis omninò tacuerunt,
 verumetiam illa statuerunt quæ eis nullatenus conuenire
 sciebant: satis commodè innuerūt nequaquam eodem iugo
 Regulæ tauri & iuuenæ premendam esse ceruicem, quia
 quos dispares natura creauit æquari labore non conuenit.
 Huius autem discretionis beatus non immemor Benedictus,
 tanquam omnium iustorum spiritu plenus, pro qualitate ho- Regul. c. 48.
 minum aut temporum cuncta sic moderatur in Regula, vt Regul. c. 2.
 omnia, sicut ipsemet vno concludit loco, mensuratè fiāt. Pri-
 mò itaque ab ipso incipiens Abbate præcipit eum ita subie-
 ctis præsidere, vt secundum vnius, inquit, cuiusque qualita-
 tem vel intelligentiam ita se omnibus conformet & aptet,
 vt non solum detrimenta gregis sibi commissi non patiatur, Regul. c. 64.
 verum in augmentatione boni gregis gaudeat, suamque fra-

- gilitatem semper suspectus sit, memineritque calamū quassatum non conterendum. Discernat & tempora, cogitans discretionem sancti Iacob dicentis: *Si greges meos plus in ambulando fecero laborare, morientur cuncti una die.* Hæc ergo aliaque testimonia discretionis matris virtutum sumens, sic omninò temperet, ut & fortes sit quod cupiant, & infirmi non refugiant. Ad hanc quidem dispensationis moderationem indulgentia pertinet puerorum, senum & omninò debiliū, Lectoris seu Septimanariorum, coquinæ ante alios refectio, & in ipso etiam conuentu de ipsa cibi vel potus qualitate seu quantitate pro diuersitate hominum prouidentia. De quibus quidem singulis ibi diligenter scriptum est. Ipsa quoque statuta ieiunij tempora pro qualitate temporis vel quantitate laboris ita relaxat, prout naturæ postulat infirmitas. Quid obsecro? ubi iste, qui sic ad hominum & temporum qualitatem omnia moderatur, ut ab omnibus sine murmuratione proferri queant, quæ instituuntur: Quid, inquam, de feminis prouideret, si eis quoque pariter ut viris Regulam institueret? Si enim in quibusdam Regulæ rigorem pueris, senibus, & debilibus pro ipsa naturæ debilitate vel infirmitate temperare cogitur: quid de fragili sexu prouideret, cuius maximè debilis & infirma natura cognoscitur? Perpende itaq; quàm longe absistat ab omni rationis discretionem, eiusdem Regulæ professione tam feminas quàm viros obligari, eademque sarcina tam debiles quàm fortes onerari. Satis esse nostræ arbitror infirmitati, si nos ipsis Ecclesiæ Rectoribus, & qui in sacris Ordinibus constituti sunt, Clericis tam continentia quàm abstinencia virtus æquauerit. Maximè cum Veritas dicat, *Perfectus omnis erit, si sit sicut magister eius.* Quibus etiam pro magno reputandum esset, si religiosos laicos æquiparare possemus. Quæ namque in fortibus parua censemus, in debilibus admiramur. Et iuxta illud Apostoli, *Virtus in infirmitate perficitur.* Ne verò laicorum religio pro paruo ducatur, qualis fuit Abraham, David, Iob*, licet cōiugatorū, Chrysostomus in Epistola ad Hebræos sermone vii. nobis occurrit, dicens: *Sunt multa in quibus poterit laborare ut bestiam illam incantet. Quæ sunt ista? labores, lectiones, vigiliae.* Sed quid ad nos hæc, inquit, qui non sumus Monachi? Hæc mihi dicit? Dic Paulo, cum dicit, *Vigilantes in omni patientia & oratione:*
- Genes. c. 33.
- Regul. c. 37.
38. 39.
- Regul. c. 41.
- * al. prof-
teri.
- Luc. 6.
1. Cor. 12.
- * al. Iacob
- In cap. 4.
- Rom. 13.

cum dicit, *Carnis curam ne feceritis in concupiscentijs*. Non enim hæc Monachis scribebat tantum, sed omnibus qui erant in ciuitatibus. Non enim secularis homo debet aliquid amplius habere Monacho quam cum vxore concumbere tantum. Hic enim habet veniam, in alijs autem nequaquam: sed omnia æqualiter sicut Monachi agere debet. Nam & beatitudines, quæ à Christo dicuntur, non Monachis tantum dictæ sunt. Alioquin vniuersus mundus peribit, & in angustum inclusit ea quæ virtutis sunt. Et quomodo honorabiles sunt nuptiæ, quæ nobis tantum impediunt? Ex quibus quidem verbis aperte colligitur, quod quisquis Euangelicis præceptis continentie virtutem addiderit, Monasticam perfectionem implebit. Atque vtinam ad hoc nostra religio conscendere posset, vt Euangelium impleret, non transcendere: ne plusquam Christianæ appeteremus esse. Hinc profectò, ni fallor, sancti decreuerunt Patres, non ita nobis sicut viris generalem aliquam Regulam quasi nouam legem præfigere, nec magnitudine votorum nostram infirmitatē onerare, attendentes illud Apostoli: *Lex enim iram operatur*. Vbi enim non est lex, nec prauariatio. Et iterum: *Lex autem subintravit ut abundaret delictum*. Idem quoque maximus continentie prædicator de infirmitate nostra plurimum confidens, & quasi ad secundas nuptias vrgens iuniores viduas: *Volo*, inquit, *iuniores nubere, filios procreare, matres familias esse, nullam occasionem dare aduersario*. Quod & beatus Hieronymus saluberrimum esse considerans, Eustachio de improuisis feminarum votis consulit, his verbis. *Si autem & illæ, quæ virgines sunt, ob alias tamen culpas non soluantur: quid fiet illis, quæ prostituerunt membra Christi, & mutauerunt templum Spiritus sancti in lupanar? Rectius fuerat homini subisse coniugium, ambulasse per plana, quàm aliorum intendentem in profundum inferni cadere*. Quarum etiam temerariæ professioni sanctus Augustinus consulens, in libro de Continentia viduali ad Iulianum scribit his verbis: *Quæ non capit deliberet, quæ aggressa est perseueret. Nulla aduersario detur occasio, nulla Christo subtrahatur oblatio*. Hinc etiam Canones nostræ infirmitati consulentes decreuerunt, Diaconissas ante quadraginta annos ordinari non debere, & hoc cum diligenti probatione; cum à viginti annis liceat Diaconos promoueri. Sunt & in Monasterijs, qui regulares dicuntur Ca-

Marsh. 5.

Rom. 4.

Rom. 5.

1. Tim. 5.

Tom. 1.
Epist. 22.

Cap. 9.

nonici beati Augustini, quandam ut aiunt regulam profiten-
tes, qui se inferiores Monachis nullatenus arbitrantur: licet
eos & vesci carnibus & lineis uti videamus. Quorum quidē
* al. adæ-
quare
minimo habendum esset? Ut autem de omnibus cibis tutius
ac lenius indulgeatur, ipsa quoque natura prouidit, quæ ma-
iore scilicet sobrietatis virtute sexum nostrum præmuniuit.
Constat quippè multo parciori sumptu & alimonia minore
feminas quàm viros substētari posse, nec eas tam leuiter inebriari
Physica protestatur. Vnde & Macrobius Theodosius
Cap. 5.
Saturnialiorum libro VII. meminit his verbis: *Aristoteles
mulieres, inquit, raro inebriantur, crebrò senes. Mulier humectis-
simo est corpore. Docet hoc & leuitas cutis & splendor. Docent præci-
puè assidue purgationes superfluo exonerantes corpus humore. Cum
ergo epotum vinum in tam largum ceciderit humorem, vim suam
ibilem.
perdit, nec facile cerebri sedem ferit fortitudine eius extincta. Item:
Muliebri corpus crebris purgationibus deputatum, pluribus consertū
foraminibus ut pateat in meatus, & vias præbeat humori in egestio-
nis exitum confluenti. Per hæc foramina vapor vini celeriter eva-
nescit. Contra senibus siccum est corpus, quod probat asperitas & scal-
lor cutis. Ex his itaque perpende quantò tutius ac iustius na-
* al. quili-
bet
turæ & infirmitati nostræ cibus quislibet* & potus indulgeri
possit, quarum videlicet corda crapula & ebrietate grauari
facile non possunt: cum ab illa nos cibi parcitas, ab ista femi-
nei corporis qualitas, ut dictum est, protegat. Satis nostræ
esse infirmitati & maximum imputari debet, si continenter
ac sine proprietate viuentes, & officijs occupatæ diuinis, ipsos
Ecclesiæ duces vel religiosos laicos in victu adæquemus, vel
eos denique qui regulares Canonici dicuntur, & se præcipuè
vitam Apostolicam sequi profitentur. Magnæ postremò
prouidentix est, his qui Deo se per votum obligant, ut minus
voueant, & plus exequantur, ut aliquid semper debitis gra-
tia superaddat. Hinc enim per semetipsam Veritas ait: *Cum
Luc. 17.
feceritis omnia quæ præcepta sunt, dicite: Serui inutiles sumus, quæ
debuimus facere fecimus. Ac si apertè diceret: Idcò inutiles
& quasi pro nihilo, ac sine meritis reputandi, quia debitis tã-
tum exsoluēdis contenti nihil ex gratia superaddidimus. De
quibus quidem gratis superaddendis ipse quoque Dominus
Luc. 10.
alibi parabolicè loquens ait: Sed & si quid supererogaeris, ego**

cūm rediero reddam tibi. Quod quidem hoc tempore multi Monasticæ religionis temerarij professores si diligentius attenderent, & in quam professionem iurarent animaduertent, atque ipsum Regulæ tenorem studiosè perscrutarentur: minus per ignorantiam offenderent, & per negligentiam peccarent. Nunc verò indiscretè omnes ferè pariter ad Monasticam conuersationem* currentes inordinatè suscepti inordinatiùs viuunt, & eadem facilitate qua ignotam Regulam profitentur, eam contemnentes, consuetudines quas volunt pro lege statuunt. Prouidendū itaque nobis est, ne id oneris feminæ præsumamus, in quo viros ferè iam vniuersos succumbere videamus, imò & deficere. Senuisse iam mundum conspiciamus, hominèsque ipsos cum cæteris, quæ mundi sunt, pristinum naturæ vigorem amisisse, & iuxta illud Veritatis, ipsam charitatem non tam multorum quàm ferè omnium refriguisse. Vt iam videlicet pro qualitate hominū ipsas propter homines scriptas vel mutari, vel temperare necesse sit Regulas. Cuius quidē discretionis ipse quoq; beatus non immemor Benedictus ita se Monasticæ discretionis rigorem temperasse fatetur, vt descriptam à se Regulam comparatione priorum institutorum non nisi quandam honestatis institutionem, & quandam conuersationis inchoationem reputet, dicens: *Regulam autem hanc descripsimus, vt hanc obseruantes aliquatenus vel honestatem morum aut initium conuersationis nos demonstremus habere. Cæterum ad perfectionem conuersationis qui festinat, sunt doctrinæ sanctorum Patrum, quarum obseruatio perducatur hominem ad celsitudinem perfectionis. Item, Quisquis ergo ad caelestem patriam festinas, hanc minimam inchoationis Regulam adiuvante Christo perfice, & tunc demum ad maiora doctrinæ virtutumque culmina Deo protegente peruenies. Qui, (vt ipse ait) cūm legamus olim sanctos Patres vno die Psalterium explere solere, ita psalmodiam tepidis temperauit, vt in ipsa per Hebdomadam distributione Psalmorum, minore ipsorū numero Monachi quàm Clerici contenti sint.* Quid etiam tã religioni quietiq; Monasticæ contrariū est, quàm quod luxuriæ fomentum maximè præstat & tumultus excitat, atque ipsam Dei in nobis imaginem, qua præstamus cæteris, id est rationē delez? Hoc autem vinū est, quod supra omnia victui pertinētia plurimum Scriptura damnosum asserit, & caueri admo-

* al. conuersationem

Math. 24.

Regul. c. vlt.

ibidem.

Regul. c. 18.

* al. essent

net. De quo & maximus ille sapientum in Prouerbiis meminit, dicens: *Luxuriosa res vinum, & tumultuosa ebrietas. Quicumque his delectatur, non erit sapiens: cui ve, cuius patri ve, cui rixæ, cui fouea, cui sine causa vulnera, cui suffusio oculorum? nonne his qui morantur in vino, & student calicibus epotandis? Ne intuearis vinum quando flauescit, cum splenduerit in vitro color eius. Ingre- ditur blandè, sed in nouissimo mordebit ut coluber, & sicut regulus venena diffundet. Oculi tui videbunt extraneas, & cor tuum loque- tur peruersa. Et eris sicut dormiens in medio mari, & quasi sopitus gubernator amisso clauo: & dices: Verberauerunt me, sed non dolui: traxerunt me, & ego non sensi. Quando euigilabo, & rursus vina re- periam?* Item: *Noli regibus, ô Lamuel, noli regibus dare vinum; quia nullū secretum est ubi regnat ebrietas, ne forte bibant & obliuiscā- tur iudiciorum, & mutant causam filiorum pauperis.* Et in Eccle- siastico scriptum est; *Vinum & mulieres apostatare faciunt sa- pientes, & arguunt sensatos.* Ipse quoque Hieronymus ad Ne- potianum scribēs de vita Clericorum, & quasi grauiter indi- gnās quòd sacerdotes legis ab omni, quod inebriare potest, abstinentes, nostros in hac abstinencia superent: *Nequaquam,* inquit, *vinum redoleas, ne audias illud Philosophi: Hoc non est oscu- lum porrigere, sed vinum propinare.* Vinolentos sacerdotes & Apostolus damnat, & lex vetus prohibet. *Qui altario deser- uiunt, vinum & siceram non bibant.* Sicera Hebræo sermone omnis potio nuncupatur quæ inebriare potest, siue illa quæ fermento conficitur, siue pomorum succo, aut faui deco- quitur in dulcedinē, & herbarū potionem, aut palmarū fru- ctus exprimuntur in liquorem, coctisque frugibus aqua pin- guior colatur. Quicquid inebriat, & statum mentis euertit, fuge similiter ut vinum. Ecce quod Regum delitijs interdi- citur, sacerdotibus penitus denegatur, & cibis omnibus pe- riculosius esse constat. Ipse tamen tam spiritalis vir beatus Benedictus dispensatione quadam præsentis ætatis indulge- re Monachis cogitur. *Licet,* inquit, *legamus vinum Monacho- rum omnino non esse: sed quia nostris temporibus hoc Monachis per- suaderi non potest, &c.* Legerat, ni fallor, quod in vitis Patrum scriptum est his verbis: *Narrauerunt quidam Abbati pastori de quodam Monacho, quia non bibebat vinum, & dixit eis quia vinum Monachorum omnino non est.* Item post aliqua; facta est aliquando celebratio Missarum in monte Abbatis Anthonij, & inuentum est ibi

Prouer. 20.

Prouer. 23.

Prouerb. 31.

Cap. 19.

Tom. 1.

Epist. 2.

1. Tim. 3.

Leuit. 10.

Regul. c. 40.

Part. 2.

cenidum vini. Et extollens unus de senibus paruum vas calicem portavit ad Abbatem Sisoi; & dedit ei. Et bibit semel, & secundo, & accepit, & bibit. Obtulit ei & tertio. Sed non accepit, dicens: Quiesce frater, an nescis quia est Sathanas? Et iterum de Abbate Sisoi: Dicit ergo Abraham discipulis eius: Si occurritur in Sabbatho & do- Ibidem. minica ad Ecclesiam, & biberit tres calices, ne multum est? Et dixit senex, Si non esset Sathanas, non esset multum. Vbi unquam quæso carnes à Deo damnatæ sunt vel monachis interdictæ? Vide obsecro & attende qua necessitate Regulam temperet in eo etiam quod periculosius est Monachis, & quod eorum nō esse nouerit. Quia videlicet huius abstinence tēporibus suis Monachis iam persuaderi non poterat. Vtinā eadē dispensatione & in hoc tēpore ageretur, vt videlicet in his, quæ media boni & mali atque indifferentia dicuntur, tale temperamentum fieret; vt quod iam persuaderi non valet professio non exigeret, mediisque omnibus sine scandalo concessis, sola interdici peccata sufficeret; & sic quoque in cibis sicut in vestimentis dispensaretur, vt quod vilius comparari posset ministraretur, & per omnia necessitati, non superfluitati cōsuleretur. Non enim magnopere sunt curanda quæ nos regno Dei non præparant, vel quæ nos minimè Deo commendant. Hæc verò sunt omnia quæ exterius geruntur, & æquè reprobis vt deiectis, æquè hypocritis vt religiosis communia sunt. Nihil quippe inter Iudæos & Christianos ita separat sicut exteriorum operum & interiorum discretio, præsertim cum inter filios Dei & Diaboli sola charitas discernat, quam plenitudinem legis & finem præcepti Apostolus vocat. Vnde Rom. 13. & ipse hanc operum gloriam prorsus extenuans, vt fidei 1. Tim. 1. præferat iustitiam, Iudæam alloquens dicit, Vbi est gloriatio Rom. 3. tua? exclusæ est. Per quam legem? factorum? Non, sed per legem fidei. Rom. 4. Arbitramur eum hominem iustificari per fidem sine operibus Legis. Item. Si enim Abraham ex operibus iustificatus est, habet gloriam, sed Genes. 15. non apud Deum. Quid enim dicit scriptura? Credidit Abraham Deo, & reputatum est ei ad iustitiam. Et rursum, Ei, inquit, qui non ope- Rom. 4. ratur, credenti autem in Deum qui iustificat impium, deputatur Rom. 14. fides eius ad iustitiam secundum propositum gratiæ Dei. Idem etiam omnium ciborum esum Christianis indulgens, & ab his ea quæ iustificat distinguens: Non est, inquit, regnum Dei Rom. 14. esca & potus, sed iustitia & pax, & gaudium in Spiritu sancto.

Omnia quidē mūda sunt, sed malū est homini qui per offendiculum manducat. Bonum est non manducare carnem, & non bibere vinum, neque in quo frater tuus offendatur, aut scandalizetur, aut infirmetur. Non enim hoc loco vlla cibi comestio interdicitur, sed comestionis offēso: qua videlicet quidā ex conuersis Iudæis scandalizabantur, cū viderēt ea quoq; comedi quæ lex interdixerat. Quod quidē scādālū Apostolus etiā Petrus cupiens euitare, grauiter ab ipso est obiurgatus, & salubriter correctus. Sicut ipsemet Paulus ad Galatas scribens commemorat. Qui rursus Corinthijs scribens, *Esca autem nos non commendat Deo. Et rursum, Omne quod in macello venit manducate. Domini est terra & plenitudo eius.* Et ad Colossenses: *Nemo ergo vos iudicet in cibo aut in potu.* Et post aliqua, *Si mortui estis cum Christo ab elementis huius mundi, quid adhuc tanquam viuentes in mundo decernitis? Ne tetigeritis neque gustaueritis, neque contrectaueritis quæ sunt omnia in interitu ipso vsu secundum præceptum & doctrinas hominum.* Elementa huius mundi vocat prima legis rudimenta secundum carnales obseruantias, in quarum videlicet doctrina quasi in addiscendis literalibus elementis primò se mundus, id est, carnalis adhuc populus exercebat. Ab his quidem elementis, id est, carnalibus obseruantijs tam Christi quàm sui, mortui sunt; cū nihil his debeant, iam non in hoc mundo viuentes, hoc est inter carnales figuris intendentes, & decernentes, id est distinguentes quosdam cibos vel quaslibet res ab alijs; atque ita dicentes: *Ne tetigeritis hæc vel illa.* Quæ scilicet tacta, vel gustata, vel contrectata, inquit Apostolus, sunt in interitu animæ ipso suo vsu, quo videlicet ipsis ad aliquam etiam vti-
Galat. 14.
1. Cor. 10.
Psal. 23.
Colos. 2.

Colos. 2.

* al. vilitatem, & in al. Cod. vilitatem

Luc. 10.

2. Tim. 4.

mur humilitatem: secundum, inquam, præceptum & doctrinas hominum, id est carnalium & legem carnaliter intelligentium, potius quàm Christi vel suorum. Hic enim cū ad prædicandum ipsos destinaret Apostolos, vbi magis ipsi ab omnibus scandalis prouidendum erat, omnium tamen ciborum esum eis ita indulgit, vt apud quoscunque suscipiantur hospitio, ita sicut illi victitent, edentes scilicet & bibentes quæ apud illos sunt. Ab hac profectò Dominica suaque disciplina illos recessuros ipse iam Paulus per spiritum prouidebat. De quibus ad Timotheum scribit dicens, *Spiritus autem manifestè dicit, quia in nouissimis temporibus discedent quidam**

dam à fide, attendentes spiritibus erroris, & doctrinis demoniorum in hypocrisi loquentium, mendacium, prohibentiam nubere, abstinere à cibis quos Deus creauit, ad percipiendum cum gratiarum actione fidelibus, & his qui cognouerunt veritatem; quia omnis creatura Dei bona, & nihil reijciendum quod cum gratiarum actione percipitur. Sanctificatur enim per verbum Dei & orationem. Hæc proponens fratribus, bonus eris minister Christi Iesu, & enutritus verbis fidei, & bonæ doctrinæ, quam affecutus es. Quis denique Ioannem eiusque discipulos abstinentia nimia se macerantes ipsi Christo eiusque discipulis in religione non præferat, si corporalem oculum ad exterioris abstinentiæ intendat exhibitionem? De quo etiam ipsi discipuli Ioannis aduersus Christum & suos murmurantes, tanquam adhuc in exterioribus Iudaizantes, ipsum interrogauerunt Dominum, dicentes: *Quare nos & Pharisei ieiunamus frequenter, discipuli autem tui non ieiunant?* Quod diligentior attendans beatus Augustinus, & quid inter virtutem & virtutis exhibitionem referat attendens, ita quæ fiunt exterius pensat, vt nihil meritis superaddant opera. Ait quippè sicut Libto de bono coniugali: *Continentia, non corporis, sed animæ virtus est. Virtutes autem animi aliquando in corpore manifestantur, aliquando in habitu: sicut Martyrum virtus apparuit in tolerando passionibus.* Item: *Iam enim erat in Iob patientia, quam nonerat Dominus & cui testimonium perhibebat, sed hominibus innotuit tentationis examine.* Item. *Verum vt apertius intelligatur quomodo sit virtus in habitu, etiam si non sit in opere, loquor de exemplo, de quo nullus dubitat Catholicorum. Dominus Iesus quod in veritate carnis esurierit, & sitierit, & manducauerit, & biberit, nullus ambigit eorum qui ex eius Euangelio fideles sunt. Num igitur non erat in illo continentie virtus à cibo & potu, quanta erat in Ioanne Baptista? Venit enim Ioannes non manducans & bibens, & dixerunt: Daemonium habet. Venit filius hominis manducans & bibens, & dixerunt: Ecce homo vorax & potator vini, amicus publicanorum & peccatorum.* Item. *Deinde ibi subiecit cum de Ioanne ac de se illa dixisset: Iustificata est sapientia à filiis suis, qui virtutem continentie vident in habitu animi semper esse debere: in opere autem pro rerum ac temporum opportunitate manifestari, sicut virtus patientie sanctorum Martyrum.* Quocirca sicut non est impar meritum patientiæ in Petro, qui passus est, & in Ioanne qui passus non est: sic non est im-

Marc. 2.

Cap. 21.

Ibidem.

Iob. 1.

August. ubi
supra.

Matth. 4.

Matth. 11.

August. loc.
cit.

Matth. 11.

4. Sent. dist.

33. c. Quid
vera.

par meritum continentia in Ioanne, qui nullas expertus est nuptias; & in Abraham, qui filios generauit. Et illius enim cælibatus, & illius connubium pro distributione temporum Christo militauerunt. Sed continentiam Ioannes & in opere, Abraham vero in solo habitu habebat. Illo itaque tempore cum & lex dies Patriarcharum subsequens maledictum dixit, qui non excitaret semen in Israel: & qui non poterat non promebat, sed tamen habebat. Ex quo autem venit plenitudo temporis ut diceretur, *qui potest capere capiat; qui habet, operetur; qui operari noluerit, non se habere mentiatur*. Ex his liquidè verbis colligitur solas apud Deum merita virtutes obtinere, & quicūq; virtutibus pares sunt quātumcumque distent operibus, æqualiter ab ipso promereri. Vndè quicumque sunt verè Christiani, sic toti circa interiorem hominem sunt occupati, ut cum scilicet virtutibus ornent, ac vitijs mudent: ut de exteriori nullam vel minimam assumant curam. Vnde & ipsos legimus Apostolos ita rusticane & velut inhonestè in ipso etiam Domini comitatu se habuisse, ut velut omnis reuerentiæ atque honestatis obliti, cum per sata transirent spicas vellere, fabricare, & comedere more puerorum non erubescerent. Nec de ipsa etiam manuum ablutione, cum cibos essent accepturi, sollicitos esse. Qui cum à nonnullis quasi de immunditia arguerentur, eos Dominus excusans: *Non lotis, inquit, manibus manducare non coinquinat hominum*. Vbi & statim generaliter adiecit, ex nullis exterioribus animam inquinari: sed ex his tantum quæ de corde prodeunt, *quæ sunt, inquit, cogitationes, adulteria, homicidia, &c.* Nisi enim prius praua voluntate animus corrumpatur, peccatum esse non poterit quicquid exterius agatur in corpore. Vnde & benè ipsa quoque adulteria siue homicidia ex corde procedere dicit, quæ & sine tactu corporum perpetrantur, iuxta illud: *Qui viderit mulierem ad concupiscendam eam, iam mæchatus est in corde suo*. Et, *Omnis qui odit fratrem suum, homicida est*. Et tactis vel læsis corporibus minimè peraguntur, quando videlicet per violentiam opprimitur aliqua, vel per iustitiâ coactus iudex interficere reum. *Omnis quippe homicida (sicut scriptum est) non habet partem in regno Dei*. Non itaque magnopere quæ fiunt, sed quo animo fiant pensandum est, si illi placere studemus, qui cordis &

Deuter. 25.

Galat. 4.

Matth. 19.

Matth. 22.

Matth. 15.

Ibidem.

*al. contra-
ctu

Matth. 5.

1. Ioan. 3.

Ibidem.

Psalm. 7.

Matth. 6.

renum probator est, & in abscondito videt, qui iudicabit occulta hominum. *Paulus inquit, secundum Evangelium meum,* Rom. 2.
 hoc est secundum meæ prædicationis doctrinam. Vnde & modica viduæ oblatio, quæ fuit duo minuta, id est quadrans, Mar. 12.
 omnium diuitû oblationibus copiosis prælata est ab illo cui dicitur: *Bonorû meorû nō eges,* cui magis oblatio ex offerēte quā Psal. 15.
 offerēs placet ex oblatione, sicut scriptum est: *Respexit Dominus ad Abel, & ad munera eius.* Vt videlicet prius deuotionem Genes. 4.
 offerentis inspiceret, & sic ex ipso * donum oblatum gratum * al. ipsa haberet. Quæ quidem animi deuotio tantò maior in Deo habetur, quantò in exterioribus quæ fiant minus confidimus. Vnde & Apostolus post communem ciborum indulgentiam, de qua, vt suprâ meminimus, Timotheo scribit, de exercitio quoque corporalis laboris adiunxit, dicens: *Exerce autem te ipsum ad pietatem. Nam corporalis exercitatio admodum utilis est. Pietas autem ad omnia utilis est, promissionem habens vitæ quæ nunc est, & futura: quoniam pia mentis in Deum deuotio, & hic ab ipso meretur necessaria, & in futuro perpetua.* Quibus quidem documentis quid aliud docemur quàm Christianè sapere, & cum Iacob de domesticis animalibus refectionem patri prouidere? Non cum Esau de siluestribus curam sumere, & in exterioribus Iudaizare. Hinc & illud est Psalmistæ: *In me sunt Deus vota tua, quæ reddam laudationes tibi.* Ad hoc quoque illud adiunge Poeticum,

Ne te quesieris extra.

Perf. Satyr. 1

Multa sunt & innumerabilia tam secularium quàm Ecclesiasticorum Doctorum testimonia, quibus ea quæ sunt exterius & * indifferentia vocantur, non magnoperè curanda esse docemur. Alioquin legis opera, & seruitutis eius, sicut ait Petrus, importabile iugum Euangelicæ libertati esset præferendum, & suaui iugo Christi, & eius oneri leui. Ad quod quidem suaue iugum & onus leue per semetipsum Christus nos inuitans: *Venite, inquit, qui laboratis & onerati estis.* Vnde Matth. 11.
 & prædictus Apostolus quosdam iam ad Christum conuersos, sed adhuc opera legis retinere censentes vehementer obiurgans, sicut in Actibus Apostolorum scriptum est, ait: *Viri fratres, quid tentatis Deum imponere iugum super cernicem discipulorum, quod neque patres nostri neque nos portare potuimus: sed per gratiam Domini Iesu credimus saluari quemadmodum & illi?* Act. 15.

Et tu ipse obsecro non solum Christi, verum etiam huius imitator Apostoli, discretionem sicut & nomine sic operum præcepta moderare, ut infirmæ conuenit naturæ, & ut diuinæ laudis plurimum vacare possimus officiis. Quam quidem hostiam exterioribus omnibus sacrificiis reprobatis Dominus commendans ait: *Si esurireo, non dicam tibi: meus est enim orbis terræ, & plenitudo eius. Nunquid manducabo carnes taurorum, aut sanguinem hircorum potabo? Immola Deo sacrificium laudis, & redde Altissimo vota tua, & inuoca me in die tribulationis, & erua te, & honorificabis me.* Nec id quidem ita loquimur, ut laborem operum corporalium respuamus, cum necessitas postulauerit. Sed ne ista magna putemus quæ corpori seruiunt, & officij diuini celebrationem præpediunt*; præsertim cum ex authoritate Apostolica id præcipuè deuotis indultum sit feminis, ut alienæ procurationis sustententur officiis magis, quàm de opere proprii laboris. Vnde ad Timotheum Paulus: *Si quis fidelis habet viduas, subministret illis, & non grauetur Ecclesia, ut his quæ veræ viduæ sunt sufficiat.* Veras quippè viduas dicit quascumque Christo deuotas, quibus non solum maritus mortuus est, verum & mundus crucifixus est, & ipsæ mundo. Quas rectè de dispendijs Ecclesiæ tanquam de proprijs Spõsi sui redditibus sustentari conuenit. Vnde & Dominus ipse matri suæ procuratorem Apostolum potius quàm virum eius præuidit, & Apostoli septem Diaconos, id est Ecclesiæ ministros, qui deuotis ministrarent feminis, instituerunt. Scimus quidem & Apostolum Thessalonicensibus scribentem quosdam otiosè vel curiosè viuentes adeò constrinxisse, ut præciperet quoniam si quis non vult operari non māducet: & beatam Benedictum maximè pro otiositate vitanda operamantum iniunxisse. Sed nunquid Maria otiosè sedebat, ut verba Christi audiret? Martha tam ei quàm Domino laborante, & de quiete sororis tanquam inuida murmurante, quasi quæ sola pondus diei & æstus portauerit? Vnde & hodie frequenter murmurare eos cernimus, qui in exterioribus laborant, cum his qui diuinis occupati sunt officiis terrena ministrant. Et sæpe de his, quæ tyranni rapiunt, minus conqueruntur, quàm quæ desidiosus (ut aiunt) istis & otiosis exsoluere coguntur. Quos tamen non solum verba Christi audire, verum etiam in his assiduè legendis & decantandis oc-

Pal. 49.

* al. impe-
diunt

1. Tim. 5.

Iean. 19.

Act. 6.

* al. prouidit

2. Thess. 3.

Regul. c. 48.

Luc. 10.

cupatos considerant esse. Nec attendunt non esse magnum, ^{1. Cor. 9.} ut ait Apostolus, si eis communicent corporalia, à quibus expectant spiritualia. Nec indignum esse, ut qui terrenis intendunt, his qui spiritualibus occupantur deseruiant. Hinc etenim ex ipsa quoque legis sanctione ministris Ecclesiæ hæc salubris otij libertas concessa, ut tribus Leui nihil hæreditatis terrenæ perciperet, quo expeditius Domino deseruiret: sed de labore aliorum decimas & oblationes susciperet. ^{Num. 18.} De abstinentia quoque ieiuniorum, quam magis vitiorum quam ciborum Christiani appetunt, si quid Ecclesiæ institutioni superaddi decreueris, deliberandum est, & quod nobis expedit instituendum. Maximè verò de officijs Ecclesiasticis, & de ordinatione Psalmorum prouidendum est: ut in hoc saltem, si placet, nostram exoneres infirmitatem. Ne cum Psalterium per hebdomadam expleamus, eosdem necesse sit ^{Regul. c. 18.} Psalmos repeti. Quam etiam beatus Benedictus, cum eam pro visu suo distribuisset, in aliorum quoque actione sua id reliquit admonitio: ut si cui melius videretur aliter ipsos ordinaret. Attendens videlicet, quòd per temporum successionem Ecclesiæ decor creuerit, & quæ prius rude susceperat fundamentum, postmodum ædificij nacta est ornamentum. Illud autem præ omnibus diffinire te volumus, quid de Evangelica lectione in vigilijs nocturnis nobis agendum sit. Periculosum quippè videtur eo tēpore ad nos Sacerdotes aut Diaconos admitti, per quos hæc lectio recitetur, quas præcipuè ab omni hominum accessu atque aspectu segregatas esse cōuenit: tum ut sincerius Deo vacare possimus, tum etiam ut à tentatione tutiores simus. Tibi nunc domine, dum viuis, incūbit instituere de nobis quid in perpetuū tenēdum sit nobis. Tu quippè post Deum huius loci fundator, tu per Deum nostræ congregationis es plantator, tu cum Deo nostræ sis religionis institutor. Præceptorem alium post te fortassis habituræ sumus, & qui super alienū aliquid * ædificet fundamentum. Ideoque veremur de nobis minus futurus sollicitus, vel à nobis minus audiendus, & qui denique si æquè velit non æquè possit. Loquere tu nobis, & audiemus. Vale.

EPISTOLA VII.

Quæ est rursus PETRI ad HELQISSAM,
De origine Sanctimonialium.

ARGVMENTVM.

Abaelardus ab Heloissa superiore Epistola rogatus, ut ei & sodalibus eius, de origine ordinis Monialium scriberet; hac epistola eius & illarum voluntati amplissimè respondet: ipsumque ordinem à primitiua Ecclesia, immo & ab ipso Domini Seruatoris sacro deducit Collegio, & quid Philo Iudæus, quid Tripartita Historia de primis ascetis narrent recenset. Sexum autem femineum in singulis eius gradibus miris effert laudibus, nec solum in Christianis vel Iudæis, sed etiam in Gentilibus siue Paganis feminis laudes virginis latissimè percurrit. Nihil demique tota ferè continet Epistola, quàm feminei sexus elegantissimum encomium; latius tamen virginis laudem prosequitur, cuius etiam apud Paganos miri actus legantur.



C H A R I T A T I T U Æ, charissima soror, de Ordine tuæ professionis tam tibi quàm spiritualibus filiabus tuis suscitanti, vnde scilicet Monialiū cœperit religio, paucis si potero succinctèque rescribam. Monachorum si quidem siue Monialium Ordo à domino nostro Iesu Christo religionis suæ formā plenissimè sumpsit. Quāuis & ante ipsius incarnationem nonnulla huius propositi tam in viris quàm in feminis præcesserit inchoatio. Vnde & Hieronymus ad Eustochium scribēs, *Filios, inquit, Prophetarum, quos Monachos legimus in veteri Testamento, &c.* Annam quoque viduam templo & diuino cultui assiduam Euangelista commemorat, quæ pariter cum Simeone Dominum in templo suscipere, & Prophetia repleti meruerit. Finis itaque Christus iustitiæ, & omnium bonorum consummatio, in plenitudine temporis veniens, ut inchoata perficeret bona, vel exhiberet incognita; sicut vtrumque sexum vocare venerat atque redimere, ita vtrumque sexum in vero monachatu suæ congregationis dignatus est adunare: ut indè tam viris quàm feminis huius professionis daretur autoritas, & omnibus perfectio vitæ proponeretur quam imitarentur. Ibi quippe cum Apostolis cæterisque discipulis, cū matre ipsius sanctarum legimus conuētum mulierum; quæ scilicet seculo abrenunciantes, omnemque proprietatem abdicantes, ut

Tom. I.
Epist. 4.

4. Reg. 6.
Luc. 2.

Luc. 8.

solum possiderent Christum, sicut scriptum est: *Dominus pars hereditatis meæ*, deuotè illud compleuerunt, quo omnes secundum regulam à Domino traditam cōuersi seculo ad huius vitæ communitatem initiantur, *Nisi quis renuntiauerit omnibus quæ possidet, non potest meus esse discipulus*. Quàm deuotè autem Christum hæ beatissimæ mulieres ac verè moniales secutæ fuerint, quantamque gratiam & honorem deuotioni earum tam ipse Christus quàm postmodum Apostoli exhibuerint, sacræ diligenter historiæ continent. Legimus in Euangelio murmurantem Phariseum, qui hospitio Dominum susceperat, ab ipso esse correctum, & peccatricis mulieris obsequium hospitio eius longè esse prælatum. Legimus & Lazaro iam resuscitato cum cæteris discumbente, Martham sororem eius solam mensis ministrare, & Mariam copiosi libram vnguenti pedibus Dominicis infundere, propriisque capillis ipsos extergere, huiusque copiosi vnguenti odore domum ipsam impletam fuisse, ac de pretio ipsius, quia tam inaniter consumi videretur, Iudam in concupiscentiam ductū, & discipulos indignatos esse. Sat agente itaque Martha de cibis, Maria disposuit de vnguentis: & quem illa reficit interius, hæc lassatum refouet exterius. Nec nisi feminas Domino ministrasse Scriptura commemorat Euangelica. Quæ proprias etiam facultates in quotidianam eius alimoniam dicarant, & ei præcipuè huius vitæ necessaria procurabant. Ipse discipulis in mensa, ipse in ablutione pedum humillimū se ministrum exhibebat. A nullo verò discipulorum, vel etiā virorum, hoc eum suscepisse nouimus obsequium: sed solas, vt diximus, feminas in his vel cæteris humanitatis obsequijs ministerium impendisse. Et sicut in illo Marthæ, ita in isto nouimus obsequium Mariæ. Quæ quidem in hoc exhibendo tanto fuit deuotior, quantò ante fuerat criminiosior. Dominus aqua in peluim missa illius ablutionis peregit officium. Hoc verò ipsa ei lachrymis intime compunctionis, non exteriori aqua exhibuit. Ablutos discipulorum pedes linteo Dominus extersit. Hæc pro linteo capillis vsa est. Fomenta vnguentorum insuper addidit, quæ nequaquam Dominum adhibuisse legimus. Quis etiam ignoret mulierem intantum de ipsius gratia præsumpsisse, vt caput quoque eius superfuso delibuerit vnguento? Quod quidem vnguentum non de ala-

Psal. 135.

Luc. 14.

Luc. 7.

Ioan. 12.

Luc. 8.

Ioan. 13.

Marc. 14.

Dan. 9.

Isai. 11.

* al. defluit

bastro extractum, sed fracto alabastro memoratur effusum, ut nimiae deuotionis vehemens exprimeretur desiderium, quæ ad multum ulterius usum illud reseruandum censebat, quo in tanto vsa sit obsequio. In quo etiam ipsum iam vñtionis defectum factis ipsis exhibet, quæ antea Daniel futurum prædixerat: postquam videlicet vngeretur Sanctus Sanctorum. Ecce enim Sanctum Sanctorum mulier inungit, & cum pariter hunc esse quem credit, & quem verbis Propheta præsignauerat, factis ipsa proclamatur. Quæ est ista, quæso, Domini benignitas; aut quæ mulierum dignitas, ut tam caput quàm pedes suos ipse non nisi feminis præberet inungendos? Quæ est ista, obsecro, infirmioris sexus prærogatiua, ut summum Christum omnibus Spiritus sancti vnguentis ab ipsa eius conceptione delibutum mulier quoque inungeret, & quasi corporalibus sacramentis eum in Regem & Sacerdotem cōsecrans, Christum id est vñctum corporaliter ipsum efficeret? Scimus primùm à Patriarcha Iacob in typum Domini lapidem vñctum fuisse. Et postmodum regum siue sacerdotum vñctiones, seu quælibet vñctionum sacramenta non nisi viris celebrare permissum est. Licet baptizare nonnunquam mulieres præsumant. Lapidem olim Patriarcha templum, nunc & altare Pontifex oleo sanctificat. Viri itaque sacramenta figuris imprimunt. Mulier verò in ipsa operata est veritate, sicut & ipsa protestatur Veritas dicens, *Bonum opus operata est in me*. Christus ipse à muliere, Christiani à viris inunguntur. Caput ipsum scilicet à femina, membra à viris. Benè autem effudisse vnguentum, non stillasse super caput eius mulier memoratur. Secundum quod de ipso Sponsa in Canticis præcinit dicens, *Vnguentum effusum nomen tuum*. Huius quoque vnguenti copiam per illud, quod à capite vsque ad oram vestimenti defluxit*, Psalmista mysticè præfigurat, dicens: *Sicut vnguentum in capite, quod descendit in barbam, barbam Aaron. Quod descendit in oram vestimenti eius*. Trinam David vñctionem, sicut & Hieronymus in Psalmo xxvi. meminit, accepisse legimus: trinam & Christum siue Christianos. Pedes quippe Domini, siue caput, muliebres susceperunt vnguentum. Mortuum verò ipsum Ioseph ab Arimathia & Nicodemus, sicut refert Ioannes, cum aromatibus sepelierunt. Christiani quoque

trina

trina sanctificantur vnctione: quarum vna fit in baptismo, altera in confirmatione, tertia verò infirmorum est. Perpende itaque mulieris dignitatem, à qua viuens Christus his inunctus, tam in pedibus scilicet quàm in capite, Regis & Sacerdotis suscepit sacramenta. Mirrhæ verò & aloes vnguentum, quod ad conseruanda corpora mortuorum adhibetur, ipsius Dominici corporis incorruptionem futuram præsignabat, quam etiam quilibet electi in resurrectione sunt adepti *. * al. adepturi.

Priora autem mulieres vnguenta singularem eius tam regni quàm sacerdotij demonstrant dignitatem. Vnctio quidem capitis superiorem, pedum verò inferiorē. Ecce Regis * etiā * al. Rex sacramentum à muliere suscipit, qui tamen oblatum à viris sibi regnum suscipere respuit, & ipsis eum in Regem rapere Ioan. 6. volentibus aufugit. Cœlestis, non terreni Regis mulier sacramentum peragit; eius, inquam, qui de semetipso postmodum ait: *Regnum meum non est de hoc mundo.* Gloriantur Episcopi cum applaudentibus populis terrenos inungunt Reges, cum mortales consecrant sacerdotes, splendidis & inauratis vestibus adornati. Et sæpe his benedicunt, quibus Dominus maledicit. Humilis mulier non mutato habitu, non præparato cultu, ipsis quoque indignantibus Apostolis hæc in Christo sacramenta peragit; non prælationis officio, sed de- Ioan. 8. lationis * merito. O magnam fidei constantiam! ô inestimabilem charitatis ardorem, quæ omnia credit, omnia sperat, omnia substat! Murmurat Phariseus dum à peccatrice pedes Dominici inunguntur: indignantur patenter Apostoli, quòd de capite quoque mulier præsumpserit. Perseuerat ubique * mulieris fides immota, de benignitate Domini confisa, nec ei in utroque Dominicæ commendationis desunt * al. dilectionis. Par Cod. deuotionis. 1. Cor. 13. suffragia. Cuius quidem vnguenta quàm accepta, quàm grata Dominus habuerit, ipsemet profitetur cum sibi hæc reseruati postulans indignanti Iudæ dixit: *Sine illam vt in die sepultura mee serues illud.* Ac si diceret: Ne repellas hoc eius obsequium à viuo, ne deuotionis eius exhibitionē in hac quoque re auferas defuncto. Certum quippe est, sepulturæ quoque Dominicæ sanctas mulieres aromata parasse. Quod tunc ista utique minus satageret, si nunc repulsa verecundiam substituisset. Qui etiam quasi de tanta mulieris præsumptione discipulis indignantibus, & vt Marcus meminit, in eam fremen-

Marc. 14.

Marc. 12.

tibus, cum eos mitissimis fregisset responsis, in tantum hoc extulit beneficium, ut ipsum Euangelio inferendum esse censeret, & cum ipso pariter ubique prædicandum esse prædiceret; in memoriam scilicet & laudem mulieris, quæ id fecerit in quo non mediocris arguebatur præsumptionis. Quod nequaquam de aliis quarumcumque personarum obsequiis authoritate Dominica sic commendatum esse legimus atque sancitum. Qui etiam viduæ pauperis eleemosynam omnibus templi præferens oblationibus, quàm accepta sit ei feminarum deuotio diligenter ostendit. Ausus quidem est Petrus seipsū & Coapostolos suos pro Christo omnia reliquisse profiteri. Et Zachæus desideratum Domini aduentum suscipiens dimidium bonorum suorum pauperibus largitur, & in quadruplum si quid defraudauit restituit. Et multi alij maiores in Christo seu pro Christo fecerunt expensas, & longè preciosiora in obsequium obtulerunt diuinum, vel pro Christo reliquerunt. Nec ita tamen Dominicæ commendationis laudem adepti sunt, sicut feminæ. Quarum quidem deuotio quanta semper erga eum extiterit, ipse quoque Dominicæ vitæ exitus patenter insinuat. Hæ quippe, ipso Apostolorum principe negante, & dilecto Domini fugiente, vel cæteris dispersis Apostolis, intrepidæ perstiterunt: nec eas à Christo vel in passione, vel in morte formido aliqua, vel desperatio separare potuit. Ut eis specialiter illud Apostoli congruere videatur: *Quis nos separabit à charitate Dei? Tribulatio an angustia?* Vnde Mathæus, cum de se pariter & cæteris retulisset: *Tunc discipuli omnes relicto eo fugerunt, perseverantiam postmodum supposuit mulierum, quæ ipsi etiam crucifixo quantum permittebatur adsistebant. Erant, inquit, ibi mulieres multe à lōge, quæ secutæ fuerant Iesum à Galilea, ministrantes ei.* Quas denique ipsius quoque sepulchro immobiliter adhærentes idem diligenter Euangelista describit, dicens: *Erāt autem Maria Magdalene, & altera Maria sedentes contra sepulchrum.* De quibus etiam mulieribus Marcus commemorans ait: *Erant autem & mulieres de longe aspicientes, inter quas erat Magdalene, & Maria Iacobi minoris, & Ioseph mater, & Salome. Et cum esset in Galilea sequebantur eum, & ministrabant ei, & alie multe quæ simul cum eo ascenderant Hierosolymam.* Stetisse autem iuxta crucem, & crucifixo se etiam astitisse Ioannes, qui prius aufugerat, narrat: sed perseverantiam præmittit mulierum, quasi earum

exemplo animatus esset ac reuocatus. *Stabant*, inquit, *iuxta crucem Iesu mater eius, & soror matris eius Maria Cleopha, & Maria Magdalene. Cum vidisset ergo Iesus matrem, & discipulum stantem, &c.* Hanc autem sanctarum constantiam mulierum, & discipulorum defectum longè antè beatus Iob in persona Domini prophetavit, dicens: *Pelli mea consumptis carnibus adhæsit os meum, & derelicta sunt tantummodo labia circa dentes meos.* In osse quippè, quod carnem & pellem sustentat & gestat, fortitudo est corporis. In corpore igitur Christi, quod est Ecclesia, os ipsius dixit Christianæ fidei stabile fundamentum, siue feruor ille charitatis, de quo canitur: *Aque multe non poterunt extinguere charitatem.* De quo & Apostolus: *Omnia*, inquit, *suffert, omnia credit, omnia sperat, omnia sustinet.* Caro autem in corpore pars interior est, & pellis exterior. Apostoli ergo interiori animæ cibo prædicando intendentes, & mulieres corporis necessaria procurantes, carni comparantur & pelli. Cum itaq; carnes cōsumerētur, os Christi adhæsit pelli: quia scandalizatis in passione Domini Apostolis, & de morte ipsius desperatis, sanctarum deuotio feminarum perstitit immobilis, & ab osse Christi minimè recessit: quia fidei, vel spei, vel charitatis constantiam intantum retinuit, vt nec à mortuo mente disungerentur aut corpore. Sunt & viri naturaliter tam mente quàm corpore feminis fortiores. Vnde & merito per carnem, quæ vicinior est ossi, virilis natura; per pellem muliebris infirmitas designatur. Ipsi quoque Apostoli, quorum est reprehendendo lapsus aliorum mordere, dentes Domini dicuntur. Quibus tantummodò labia, id est verba potius quàm facta remanserant: cum iam desperati de Christo magis loquerentur, quàm pro Christo quid operarentur. Tales profectò illi erant discipuli, quibus in castellum Emaus euntibus, & loquentibus adinuicem de his omnibus quæ acciderant, ipsi apparuit, & eorum desperationem correxit. Quid denique Petrus vel cæteri discipulorū præter verba tunc habuerunt, cum ad Dominicam ventum esset passionem, & ipse Dominus futurum eis de passione sua scandalum prædixisset? *Et si omnes*, inquit Petrus, *scandalizati fuerint in te, ego nunquam scandalizabor.* Et iterum: *Etiam si oportuerit me mori tecum, non te negabo.* Similiter & omnes discipuli dixerunt. Dixerunt, inquam, potius quàm fecerunt. Ille

enim primus & maximus Apostolorū, qui tantā in verbis habuerat constantiam, vt Domino diceret: *Tecum paratus sum & in carcerem, & in mortem ire*: Cui tunc & Dominus Ecclesiam suam specialiter committens, dixerat: *Es tu aliquando conuersus confirma fratres tuos*, ad vnam aneillæ vocem ipsum negare non veretur. Nec semel id agit, sed tertio ipsum adhuc viuentem denegat, & à viuo pariter omnes discipuli vno temporis puncto fugiendo deuolant: à quo nec in morte vel mente vel corpore feminæ sunt disiunctæ. Quarum beata illa peccatrix mortuum etiam quærens, & Dominum suum confitens, ait: *Tulerunt Dominum de monumento*. Et iterum: *Si tu substulisti eum, dicito mihi ubi posuisti, & ego eum tollam*. Fugiant arietes, imò & pastores Dominici gregis: remanent oues intrepidæ. Arguit hos Dominus tanquam infirmam carnem, quod in articulo etiam passionis suæ nec vna hora cū eo potuerunt vigilare. Insomnem ad sepulchrū illius noctem in lachrymis feminæ ducentes, resurgentis gloriam primæ videre meruerunt. Cui fideliter in mortem quantum dilexerint viuum, non tam verbis quàm rebus exhibuerunt. Et de ipsa etiam, quam circa eius passionē & mortem habuerūt sollicitudinem, resurgentis vita primæ sunt lætificatæ. Cū enim, secundum Ioannem, Ioseph ab Arimatia, & Nicodemus corpus Domini ligantes linteis cum aromatibus sepelirent; refert Marcus de earum studio, quod Maria Magdalene & Maria Ioseph aspiciebant vbi poneretur. De his quoque Lucas commemorat dicens: *Secute autem mulieres, quæ cum Iesu venerant de Galilæa, viderunt monumentum, & quemadmodum positum erat corpus eius, & reuertentes parauerunt aromata*. Nec satis videlicet habentes aromata Nicodemi, nisi & adderent sua. Et sabbatho quidem siluerunt secundum mādātum. Iuxta Marcum verò, cū transisset sabbatum, summo mane in ipso die resurrectionis venerunt ad monumentum Maria Magdalene, & Maria Iacobi, & Salome. Nunc quoniam deuotionem earum ostendimus, honorem quem meruerint prosequamur. Primò Angelica visione sunt consolatæ de resurrectione Domini iam cōpleta: demùm ipsum Dominum primæ viderunt & tenuerunt. Prior quidem Maria Magdalene, quæ cæteris feruentior erat. Postea ipsa simul, & aliæ, de quibus scriptum est, quod post Angelicam

* f. quia

visionem exierunt de monumento, currentes nunciare Discipulis resurrectionem Domini. Et ecce Iesus occurrit illis, dicens: *Auete*. Illæ autem accesserunt, & tenuerunt pedes eius, & adorauerunt eum. Tunc ait Iesus: *Ite, nunciate fratribus meis, ut eant in Galileam. Ibi me videbunt.* De quo & Lucas prosecutus ait: *Erat Magdalene, & Ioanna, & Maria Iacobi, & cetera, quæ cum eis erant, quæ dicebant ad Apostolos hæc.* Quas etiam ab Angelo primum fuisse missas ad Apostolos nunciare hæc non reticet Marcus, ubi Angelo mulieribus loquente scriptum est: *Surrexit, non est hic. Sed ite, dicite Discipulis eius, & Petro, quia precedet vos in Galileam.* Ipse etiam Dominus primò Mariæ Magdalenæ apparens, ait illi: *Vade ad fratres meos, & dic eis: Ascendo ad Patrem meum.* Ex quibus colligimus has sanctas mulieres quasi Apostolas super Apostolos esse constitutas. Cum ipsæ ad eos vel à Domino vel ab Angelis missæ summum illud resurrectionis gaudium nunciauerunt, quod expectabatur ab omnibus, ut per eas Apostoli primum addiscerent quod toti mundo postmodum prædicarent. Quas etiam post resurrectionem Domino occurrente salutari ab ipso Euangelista suprà memorauit: ut tam occursum suo quàm salutatione quãtam erga eas sollicitudinem & gratiam haberet ostenderet. Non enim aliis proprium salutationis verbum, quod est, *Auete*, eum legimus protulisse: imò ista salutatione antea discipulos inhibuisse, cum eis diceret: *Et neminem per viam salutaueritis.* Quasi hoc priuilegium nunc vsque deuotis feminis reseruaret, quod per semetipsum eis exhiberet immortalitatis gloria iam potitus. Actus quoque Apostolorum cum referant statim post Ascensionem Domini •Apostolos à monte Oliueti Hierusalem rediisse, & illius sacrosancti conuentus religionem diligenter describant, non est deuotionis sanctarum mulierum perseuerantia prætermissa, cum dicitur: *Hierant omnes perseuerantes unanimiter in orationibus cum mulieribus, & Maria matre Iesu.* Ut autem de Hebræis prætermittamus feminis, quæ primò conuersæ ad fidem viuente adhuc Domino in carne, & prædicante, formam huius religionis inchoauerunt: de viduis quoque Græcorum, quæ ab Apostolis postea susceptæ sunt consideremus; quanta scilicet diligentia, quanta cura ab Apostolis & ipsæ tractatæ sint, cum ad ministrandum eis gloriosissimus signifer

Act. 6.

Christianæ militiæ Stephanus protomartyr cum quibusdam aliis spiritualibus viris ab ipsis Apostolis fuerit constitutus. Vnde in eisdem Actibus Apostolorum scriptum est; *Crescente numero discipulorum factum est murmur Græcorum aduersus Hebræos, quod despicerentur in ministerio quotidiano viduæ eorum. Cōvocantes autem duodecim Apostoli multitudinem discipulorum, dixerunt: Non est æquum derelinquere nos Verbum Dei, & ministrare mensis. Considerate ergo, fratres, viros ex omnibus vobis boni testimoniij septem, plenos Spiritu sancto & sapientia, quos constituamus super hoc opus. Nos verò orationi & ministerio verbi instantes erimus. Et placuit sermo coram multitudine. Et elegerunt Stephanum plenum fide & Spiritu sancto, & Philippum, & Prochorum, & Nicanorem, & Timotheam, & Parmenam, & Nicolaum Antiochenum. Hos statuerunt ante conspectum Apostolorum, & orantes imposuerunt eis manus.* Vnde & continentia Stephani admodum commendatur, quòd ministerio atque obsequio sanctarum feminarum fuerit deputatus. Cuius quidem obsequij ministratio, quàm excellens sit, & tam Deo quàm ipsis Apostolis accepta, ipsi tam propria oratione quàm manuum impositione protestati sunt: quasi hos, quos in hoc constituebant, adiurantes vt fideliter agerent, & tam benedictione sua quàm oratione eos adiuuantes vt possent. Quam etiam Paulus administrationem ad Apostolatus sui plenitudinem ipse sibi vendicans: *Nunquid non habemus, inquit, potestatem sororem mulierem circumducendi, sicut & ceteri Apostoli?* Ac si apertè diceret: Nunquid & sanctarum mulierum conuentus nos habere ac nobiscum in prædicatione ducere permissum est, sicut cæteris Apostolis; vt ipsæ videlicet eis in prædicatione de sua substantia necessaria ministrarent? Vnde Augustinus in libro de opere Monachorum: *Ad hoc, inquit, & fideles mulieres habentes terrenam substantiam ibant cum eis, & ministrabāt eis de sua substantia, vt nullius indigerent horum quæ ad substantiā huius vite pertinent.* Item: *Quod quisquis non putat ab Apostolis fieri, vt cum eis sanctæ conuersationis mulieres circumirent quocumque Euangelium predicabant: Euangelium audiant, & cognoscant quemadmodum hoc ipsius Domini exemplo faciebant.* In Euangelio enim scriptum est: *Deinceps & ipse iter faciebat per cinitates & castella euangelizans regnum Dei, & duodecim cum illo, & mulieres aliqua, quæ erant curate à spiritibus immundis, & infirmitati-*

1. Cor. 9.

Cap. 4.

Ibidem.

Luc. 8.

bus, Maria quæ vocatur Magdalene, & Ioanna vxor Cuzæ procura-
toris Herodis, & Susanna, & aliæ multe, quæ ministrabant ei de
facultatibus suis. Vt hinc quoque pateat Dominum etiam
in prædicatione sua proficiscentem ministratione mulierum
corporaliter sustentari, & eas ipsi pariter cum Apostolis
quasi inseparabiles comites adhærere. Demum * verò huius ^{* al. deinde}
professionis religione in feminis pariter vt in viris multipli-
cata, in ipso statim Ecclesiæ nascentis exordio æquè sicut vi-
ri, ita & feminae propriorum per se Monasteriorum habita-
cula possederunt. Vnde & Ecclesiastica Historia laudem ^{Eusib. lib.}
Philonis disertissimi Iudæi, quam non solum dixit, verùm ^{1.6. 16.}
etiam magnificè scripsit de Alexandrina sub Marco Eccle-
sia, ita inter cætera libro secundo, capitulo xvi. commemo-
rat: *In multis est, inquit, orbis terre partibus hoc genus hominum.*
Et post aliqua. *Est autem in singulis locis consecrata orationi do-*
mus, quæ appellatur Senior, vel Monasterium. Item infra: *Itaque* ^{Ibidem.}
non solum (subtilium intelligunt hymnos veterum, sed ipsi faciunt no-
uos in Deum, omnibus eos & metris & sonis honesta satis & suavi
compagne modulantes. Item plærisque de abstinentia præmissis, ^{Ibidem.}
& diuini cultus officijs adiecit: *Cum viris autem, quos dicimus,*
sunt & feminae, in quibus plures iam grandæa sunt virgines, inte-
gritatem ac castitatem corporis non necessitate aliqua, sed deuotione
seruantes; dum sapientiæ studijs seuerè gestiunt non solum anima, sed
etiam corpore consecrare, indignum ducentes libidini mancipare vas
ad capiendam sapientiam præparatum, & edere mortalem partum
eas, à quibus diuini verbi concubitus sacrosanctus & immortalis ex-
petitur: ex quo posteritas relinquatur nequaquam corruptela morta-
litatis obnoxia. Item ibidè de Philone: *Etiã de Conuentibus eorum*
scribit, vt seorsum quidem viri, seorsum etiam in eisdem locis femi-
næ congregentur, & vt vigilas, sicut apud nos fieri mos est, peragant.
Hinc illud est in laude Christianæ Philosophiæ, hoc est Mo-
nasticæ prærogatiuæ, quod Tripartita commemorat Hi-
storia, non minus à feminis quàm viris arreptæ. Ait quippè
sic libro i. cap. xi. *Huius elegantissima Philosophia princeps fuit*
quidem, sicuti quidam dicunt, Helias Propheta, & Baptista Ioannes.
Philo autem Pythagoricus suis temporibus refert vndique
egregios Hebræorum in quodam prædio circa stagnum Ma-
ria in colle positum philosophatos. Habitaculum verò eo-
rum, & cibos, & conuersationem talem introducit, qualem

& nos nunc apud Ægyptiorum Monachos esse conspiciamus. Scribit eos ante solis occasum non gustare cibum, vino semper, & sanguinem habētibus abstinere, cibum eis esse panis, & salis, & hysopi, & potum aquæ. Mulieres eis cohabitare seniores virgines propter amorem Philosophiæ spontanea voluntate nuptijs abstinentes. Hinc & illud est Hieronymi in libro de illustribus viris, capitulo viii. de laude Marci, & Ecclesiæ sic scribentis: *Primus Alexandria Christum annuntians constituit Ecclesiam tantæ doctrinæ, & vitæ continentia, ut omnes sectatores Christi ad exemplum sui cogeret.* Denique Philo disertissimus Iudæorum videns Alexandria primam Ecclesiam adhuc Iudaizantem, in laudem gentis suæ librum super eorum conuersione scripsit, & quomodo Lucas narrat Hierosolymæ credētes omnia habuisse communia, sic & ille quod Alexandria sub Marco doctore fieri cernebat memoriæ tradidit. Item cap. xi. *Philo Iudæus natione Alexandrinus de genere sacerdotum idcirco à nobis inter scriptores Ecclesiasticos ponitur, quia librum de prima Marci Euangelistæ apud Alexandriam scribens Ecclesia in nostrorum laude versatus est, non solum eos ibi, sed in multis quoque provincijs esse commemorans, & habitacula eorum dicens Monasteria.* Ex quo apparet talem primum Christo credentium fuisse Ecclesiam, quales nunc Monachi esse imitātur & cupiunt, ut nihil cuiusquam proprium sit, nullus inter eos diues, nullus pauper, patrimonia egentibus diuidantur, orationi vacetur & psalmis, doctrinæ quoque & continentię. Quales & Lucas refert primum Hierosolimæ fuisse credentes. Quod si veteres reuoluamus Historias, reperiemus in ipsis feminas in his quæ ad Deum pertinent, vel ad quamcumque religionis singularitatem, à viris non fuisse disiunctas. Quas etiam pariter ut viros diuina Cantica non solum cecinisse, verumetiam composuisse sacræ tradunt Historiæ. Primum quippe Canticum de liberatione Israelitici populi non solum viri, sed etiam mulieres domino decantauērunt: hinc statim diuinorum officiorum in Ecclesia celebrandorum authoritatem ipsæ adeptæ. Sic quippè scriptum est: *Sumpsit ergo Maria prophetes soror Aaron tympanum in manu sua, egressæque sunt omnes mulieres post eam cum tympanis & choris, quibus præcinebat dicens: Cantemus Domino, gloriose enim magnificatus est.* Nec ibi quidem Moyse commemoratur propheta, nec præcinnisse

præcinisse dicitur sicut Maria, nec tympanum aut chororum viri habuisse referuntur sicut mulieres. Cum itaque Maria præcinens prophetae commemoratur, videtur ipsa non tam dictando vel recitando, quam prophetando Canticum istud protulisse. Quæ etiam cum cæteris præcinere describitur, quàm ordinate siue cōcorditer psallerent demonstratur. Quod autem non solum voce, verum etiam tympanis & choris cecinerint; non solum earum maximam deuotionem insinuat, verum etiam mysticè spiritualis Cantici in congregationibus Monasticis formam diligenter exprimit. Ad quod & Psalmista nos exhortatur dicens: *Laudate eum in tympano & choro*, hoc est in mortificatione carnis, & concordia illa charitatis, de qua scriptum est: *Quia multitudinis credentium erat cor unum & anima una*. Nec vacat etiam à mysterio, quod egisse ad cantandum referuntur, in quo animæ contemplatiuæ iubilanti figurantur. Quæ dum ad cælestia se suspendit, quasi terrenæ habitationis castrum deserit, & de ipsa cōtemplationis suæ intima dulcedine hymnum spiritalem summa exultatione Domino persoluit. Habemus ibi quoque Delboræ*, & Anne, nec non Iudith viduæ Cantica, sicut & in Euangelio Mariæ matris Domini. Quæ videlicet Anna Samuelem paruulum suum offerens tabernaculo Domini, authoritatem suscipiendorum infantium monasterijs dedit. Vnde Isidorus fratribus in Cœnobio Honorianensi* constitutis cap. v. *Qui cumque*, inquit, *à parentibus proprijs in Monasterio fuit delegatus, nouerit se ibi perpetuò mansurum. Nam Anna Samuelem puerum Deo obtulit. Qui & in ministerio templi, quo à matre fuerat functus, permansit, & ubi constitutus est deseruiuit*. Constat etiam filias Aaron pariter cum fratribus suis ad sanctuarium & hæreditariam sortem Leui adeo pertinere, vt hinc quoque eis Dominus alimoniam instituerit, sicut scriptum est in libro Numeri, ipso ad Aaron sic dicente: *Omnes primitias sanctuarij, quas offerunt filij Israel Domino, tibi dedi, & filijs ac filiabus tuis iure perpetuo*. Vnde nec à clericorum ordine mulierum religio disiuncta videtur. Quas etiam ipsis nomine coniunctas esse constat, cum videlicet tam Diaconissas quàm Diaconos appellemus. Ac si in vtrisque tribum Leui, & quasi Leuitas agnoscamus. Habemus etiam in eodem libro votum illud maximum, & consecrationem Nazaræorum Domini æquè feminis sicut &

Psalm. 150.

Act. 4.

* al. Debo-

ra.

Iudic. 5.

1. Reg. 2.

Iudith. 16.

Luc. 1.

* al. Hono-

riacensi

1. Reg. 1.

Num. 18.

Num. 6.

viris esse institutum, ipso ad Moysen Domino sic dicente: *Loquere ad filios Israel, & dices ad eos: Vir siue mulier cum fecerint votum ut sanctificentur, & se voluerint Domino consecrare, vino & omni quod inebriare potest abstinebunt. Acetum ex vino & ex qualibet alia portione, & quicquid de vva exprimitur non bibent. Vvas recentes siccasque non comedent cunctis diebus, quibus ex voto Domino consecrantur. Quicquid ex vinea est ab vva passa usque ad acinum non comedent omni tempore separationis sue.* Huius quidē religionis illas fuisse arbitror excubantes ad ostium tabernaculi, de quarum speculis Moyses vas composuit, in quo la-

Exod. 30. &
38.

uarentur Aaron & filij eius, sicut scriptum est, *Apposuit Moyses labrum aeneum in quo lauarentur Aaron & filij eius; quod fecit de speculis mulierum quae excubabant ad ostium tabernaculi.* Diligenter magnae deuotionis earum feruor describitur quae clauso etiā tabernaculo foribus eius adhærentes sanctarum vigiliarum excubias celebrabant, noctem etiam ipsam in orationibus ducentes, & ab obsequio diuino viris quiescentibus non vacantes. Quod vero clausum eis tabernaculum memoratur vita pœnitētium congrue designatur, qui ut se durius pœnitentiæ lamentis afficiant à cæteris segregantur. Quæ profecto vita specialiter monasticæ professionis esse perhibetur, cuius videlicet ordo nihil aliud esse dicitur quàm quædam parciore pœnitentiæ forma. Tabernaculum vero ad cuius ostium excubabant illud est mysticè intelligendum, de quo

Heb. 13.

ad Hebræos Apostolus scribit, *Habemus altare, de quo non habent edere hi qui tabernaculo deseruiunt*, id est quo participare digni non sunt qui corpori suo, in quo hîc quasi in castris ministrant, voluptuosum impendunt obsequium. Ostium vero tabernaculi finis est vitæ præsens, quādo hinc anima exit de corpore & futuram ingreditur vitam. Ad hoc ostium excubant qui de exitu huius vitæ & introitu futuræ solliciti sunt, & sic pœnitēdo disponūt hunc exitum ut illum mereantur introitum. De hoc quidem quotidiano introitu

Psalm. 120.

& exitu sanctæ Ecclesiæ illa est oratio Psalmistæ: *Dominus custodiat introitum tuum, & exitum tuum.* Tunc enim simul introitum & exitum nostrum custodit, cum nos hinc exeuntes & iam per pœnitētiā purgatos illuc statim introducit. Benè autem prius introitum quàm exitum nominauit, nō tam videlicet ordinem quàm dignitatem attendens, cum hic exi-

tus vitæ mortalis in dolore sit, ille verò introitus æternæ summa sit exultatio. Specula vero earum opera sunt exteriora, ex quibus animæ turpitudine vel decor diiudicatur, sicut ex speculo corporali qualitas humanæ faciei. Ex istis earum speculis vas componitur in quo se abluant Aaron & filij eius, quando sanctarum feminarum opera & tanta infirmi sexus in Deo constantia pontificum & presbiterorum negligentiam vehementer increpant, & ad compunctionis lachrymas præcipue mouet. Et si prout oportet ipsi earum sollicitudinem gerant hæc ipsarum opera peccatis illorum veniam per quam abluantur præparant. Ex his profecto speculis vas sibi compunctionis beatus parabat Gregorius, cum sanctarum virtutem feminarum, & infirmi sexus in martyrio victoriam admirans, & ingemiscens quærebat: *Quid barbari dicturi sunt viri, cum tanta pro Christo delicate puella sustineant, & tanto agone sexus fragilis triumphet, ut frequentius ipsum gemina virginitatis & martyrij corona pollere nouerimus?* Ad has quidem, ut dictum est, ad ostium tabernaculi excubantes, & quæ iam quasi Nazareæ Domini suam ei viduitatem consecrauerant, beatam illam Annam pertinere non ambigo, quæ singularem Domini Nazareum Dominum Iesum Christum in templo cum Luc. 1. sancto Symeone pariter meruit suscipere, & ut plusquam Propheta fieret ipsum eadem hora qua Symeon per spiritum agnoscere & præsentem demonstrare ac publicè prædicare. Cuius quidem laudem Euangelista diligentius prosecutus ait: *Et erat Anna prophetissa filia Phanuel de tribu Aser. Hæc procecesserat in diebus multis & vixerat cum viro suo annis VII. à virginitate sua. Et hæc vidua erat usque ad annos octoginta quatuor, quæ non discedebat de templo ieiunijs & obsecrationibus seruiens nocte ac die. Et hac ipsa hora superueniens confitebatur Domino, & loquebatur omnibus qui expectabant redemptionem Hierusalem* *. * al. Israel.

Nota singula quæ dicuntur, & perpende quàm studiosus in huius viduæ laude fuerit Euangelista, & quantis præconijs excellentiam eius extulerit. Cuius quidem prophetissæ gratiam quam habere solita erat, & parentem eius, & tribum, & post septem annos, quos cum viro sustinuerat, longæum sanctæ viduitatis tempus quo se Domino micipauerat, & assiduitatem eius in templo, & ieiuniorum & orationum instantiam, confessionem laudis, quas grates Domino referebat &

* al. perfe-
ctionis
1. Tim. 5.
Ibidem.

Ibidem.

Ibidem.

Ibidem.

publicam eius prædicationem de promisso & nato saluatore diligenter expressit: & Symeonem quidem iam superius Euangelista de iustitia, non de prophetia commendauerat, nec in eo tantæ continentia vel abstinentiæ virtutem, nec diuini sollicitudinē obsequij fuisse memorauit, nec de eius ad alios prædicatione quicquam adiecit. Huius quoque professionis* atque propositi illæ sunt veræ viduæ, de quibus ad Timotheum scribens Apostolus ait: *Viduas honora, quæ veræ viduæ sunt.* Item: *Quæ autem verè vidua est, & desolata, speret in Deum, & instet obsecrationibus, & orationibus nocte ac die. Et hoc præcipue vt irreprehensibiles sint.* Et iterū: *Si quis fideles habet viduas subministret illis, & non grauetur Ecclesia, vt his quæ veræ viduæ sunt sufficiat.* Veras quippè viduas dicit quæ viduitatem suam secundis nuptijs non dehonestauerunt, vel quæ deuotione magis quàm necessitate sic perseuerantes Domino se dicant. Desolatas dicit quæ sic omnibus abrenunciāt, vt nullū terreni solatij subsidium retineant, vel qui earum curam agant non habent. Quas quidem & honorandas esse præcipit, & de stipendijs Ecclesiæ censet sustentari tanquam de proprijs redditibus sponsi earum Christi. Ex quibus etiam quales ad Diaconatus ministerium sint eligendæ diligenter describit, dicens: *Vidua eligatur non minus sexaginta annorum, quæ fuerit vnus viri uxor, in operibus bonis testimonium habens, si filios educavit, si hospitio suscepit, si sanctorum pedes lauit, si tribulationem patientibus subministravit, si omne bonum opus consecuta est. Adolescentiores autem viduas deuita.* Quod quidē beatus exponens Hieronymus, *Deuita*, inquit, *in ministerio Diaconatus, ne malum pro bono detur exemplum, si videlicet iuniores ad hoc eligantur quæ ad tentationem proniores & natura leuiore: nec per experientiam longæ ætatis prouidæ malū exemplum his præbeant, quibus maximè bonum dare debuerant.* Quod quidem exemplum in iunioribus viduis, quia iam Apostolus certis didicerat experimentis, aperte profitetur, & cōsiliū insuper aduersum hoc præbet. Cū enim præmisisset: *Adolescentiores autem viduas deuita*, causam huius rei & consilij sui medicamentum statim apposuit, dicens: *Cū enim luxuriatæ fuerint, in Christo nubere volunt, habentes damnationem, quia primam fidem irritam fecerunt. Simul autem & otiose discunt circumire domos: non solum otiose, sed & verbosæ & curiosæ, loquentes quæ non oportet. Volo ergo iuniores nubere,*

*filios procreare, matres familias esse, nullam occasionem dare aduersario maledicti gratia. Iam enim quedam conuerse sunt retro Sathanam. Hanc quoque Apostoli prouidentiam, de Diaconissis scilicet eligēdis, beatus Gregorius secutus, Maximo Siraculano Episcopo scribit, his verbis: Inuenculas Abbatissas vehementissimè prohibemus. Nullum igitur Episcopum fraternitas tua nisi sexagenariam virginem, cuius vitam atque mores exegerint, uelare permittat. Abbatissas quippe quas nunc dicimus antiquitus Diaconissas vocabant, quasi ministeriales potius quàm matres. Diaconus quippe minister interpretatur, & Diaconissas ab administratione potius quàm à prælatione nuncupandas esse censebant, secundum quod ipse Dominus tam exemplis quàm verbis instituit, dicens: Qui maior est vestrum, erit minister vester. Et iterum: Nunquid est maior qui recumbit an qui ministrat? Ego autem in medio vestrum sum, sicut qui ministrat. Et alibi: Sicut filius hominis non venit ministrari, sed ministrare. Vnde & Hieronymus hoc ipsum nomē Abbatis, quo iam gloriari multos nouerat, ex ipsa Domini anthoritate non mediocriter ausus est arguere. Qui videlicet eum locum exponens quo scriptum * est in Epistola ad Galathas, Clamantē abba pater: Abba, inquit, Hebraicum est, hoc ipsum significans quod pater. Cum autem abba pater Hebræo Syroque sermone dicatur, & Dominus in Euangelio præcipit nullum Patrem vocandum esse nisi Deum: nescio qua licentia in Monasterijs vel vocemus hoc nomine alios, vel vocari nos acquiescamus. Et certè ipse præcepit hoc, qui dixerat non esse iurandum. Si non iuramus: nec patrem quempiam nominemus. Si de patre interpretabimur aliter, & de iurando aliter sentire cogemur. Ex his profectò Diaconissis Pheben illam fuisse constat, quam Apostolus Romanis diligenter commendans, & pro ea exorans, ait: Commendo autem vobis Pheben sororem nostram, quæ est in ministerio Ecclesiæ, quæ est in Cenchrīs. Vt eam suscipiatis in Domino dignè sanctis, & assistatis ei in quocumque negotio vestro indiguerit. Etenim ipsa quoque astitit multis, & mihi ipsi. Quem quidem locum tam Cassiodorus quàm Claudius exponentes, ipsam illius Ecclesiæ Diaconissam fuisse profitentur. Cassiodorus: Significat, inquit, Diaconissam fuisse matris Ecclesiæ. Quod in pactibus Grecorum hodie vsque quasi militiæ causa peragitur. Quibus & baptizandi vsus in Ecclesia non negatur. Claudius: Hic locus, inquit, Apostolica anthoritate docet etiam se-*

Lib. 7. ep. 12

Matth. 23.

Luc. 22.

Matth. 20.

* al. Qui scriptus
Hieron. l. 2.
Com. in ep.
ad Gal. m
c. 4.

Matth. 23.

Matth. 5.

Rom. 16.

* al. mini-
strorum
1. Tim. 3.

* al. biga-
mos

1. Tim. 5.

Ibidem.

minus in ministerio Ecclesiae constitui, in quo officio positam Pheben apud Ecclesiam, quæ est Cenchris, Apostolus magna cum laude & commendatione prosequitur. Quales etiam ipse ad Timotheum scribens inter ipsos colligens Diaconos simili morum instructione vitam earum instituit. Ibi quippe Ecclesiasticorum ministeriorum * ordinans gradus, cum ab Episcopo ad Diaconos descendisset; Diaconos, inquit, similiter pudicos, non bilingues, non multo vino deditos, non turpe lucrum sectantes, habentes mysterium fidei in conscientia pura. Et: Hi autem probentur primum & sic ministrent, nullam crimen habentes. Mulieres similiter pudicas esse, non detrahentes, sobrias, fideles in omnibus. Diacones sint unius uxoris viri, qui filiis suis bene præsent, & suis domibus. Qui enim bene ministraverint, gradum bonum sibi acquirent, & multam fiduciam in fide, quæ est in Christo Iesu. Quod itaque ibi de Diaconibus dixit, non bilingues: hoc de Diaconissis dicit, non detrahentes. Quod ibi non multo vino deditos, hinc dicit sobrias. Cætera verò, quæ ibi sequuntur, hinc breuiter comprehendit, fideles in omnibus. Qui etiam sicut Episcopos siue Diaconos esse prohibet digamos *, ita & Diaconissas unius viri uxores instituit esse, ut iam suprâ meminimus: Vidua, inquit, eligatur non minus sexaginta annorum, quæ fuerit unius viri uxor, in operibus bonis testimonium habens, si filios educavit, si hospitio recepit, si sanctorum pedes lauit, si tribulationem parentibus subministravit, si omne opus bonum subsecuta est. Adolescentiores autem viduas denita. In qua quidẽ Diaconissarum descriptione vel instructione, quàm diligentior fuerit Apostolus quàm in præmissis tam Episcoporum quàm Diaconorum institutionibus facile est assignare. Quippe quod ait, in operibus bonis testimonium habens, vel, si hospitio recepit, nequaquam in Diaconibus memoravit. Quod verò adiecit, si sanctorum pedes lauit, si tribulationem, &c. tam in Episcopis quàm in Diaconis tacitum est. Et Episcopos quidem & Diaconos dicit nullum crimen habentes. Istas verò non solum irreprehensibiles esse præcipit, verumetiam omne opus bonum subsecutas dicit. Cautè etiam de maturitate ætatis earum prouidit, ut in omnibus auctoritatem habeant, dicens: non minus sexaginta annorum, & non solum vitæ earum, verumetiam ætati longæ in multis probatæ reuerentia deferatur. Vnde & Dominus licet Ioannem plurimum diligeret, Petrum tamen

seniorem tam ipsi quam cæteris præfecit. Minus quippè omnes indignantur seniorem sibi quàm iuniorem præponi; & libentiùs seniori paremus, quem non solum vita priorem, verumetiam & natura & ordo temporis fecit. Hinc & Hieronymus in primo contra Iovinianum, cùm de Prælatione Petri meminerit; *Vnus, inquit, eligitur ut capite cõstituto scismatis tollatur occasio. Sed cur non Ioānes electus est? Ætati delatū est, quia Petrus senior erat, ne adhuc adolescens, & penè puer progressæ ætatis hominibus præferretur, & magister bonus, qui occasione iurgij debuerat auferre discipulis, in adolecentē, quem dilexerat, causam præbere videretur invidia.* Hoc Abbas ille diligenter cõsiderabat, qui sicut in vitis Patrū scriptū est, iuniori fratri, qui primus ad cõversionem venerat, primatū abstulit, & maiori eum tradidit; hoc vno tantū, quia hic illū ætate præcedebat. Verebatur quippe ne ipse etiam frater carnalis indignè ferret iuniorem sibi præponi. Meminerat ipsos quoque Apostolos de duobus ipsorum indignatos esse, cùm apud Christum matre interueniente prærogatiuam quandam affectasse viderentur: maxime cùm vnus horum esset duorum, qui cæteris iunior erat Apostolis. Ipse videlicet Ioannes, de quo modo diximus. Nec solum in Diaconissis instituendis Apostolica plurimum inuigilauit cura, verū generaliter erga sanctæ professionis viduas quàm studiosus extiterit liquet, ut omnem amputet tentationis occasionem. Cùm enim præmisisset, *Viduas honora, quæ veræ viduæ sunt:* statim adiecit, *si qua autē vidua filios aut nepotes habet, discat primū domum suam regere, & mutuam vicem reddere parentibus.* Et post aliqua. *Si quis, inquit, suorum, & maxime domesticorum curam non habet, fidem negauit, & est infideli deterior.* In quibus quidem verbis simul & debitæ prouidet humanitati, & propositæ religioni. Ne videlicet sub obtentu religionis paruuli deserantur inopes, & carnalis compassio erga indigentes sanctum viduæ perturbet propositum, & retrò respicere cogat, & nonnunquam etiam vsque ad sacrilegia trahat, & aliquid suis porrigat, quod de communi defraudet. Vnde necessarium patet consilium, ut quæ domesticorum cura sunt implicitæ, antequam ad veram viduitatem transeuntēs diuinis se penitus obsequijs mancipient, hanc vicem suis parentibus reddant: ut sicut eorum cura fuerunt educatæ, ipsæ quoque posteris suis eadem lege proui-

deant. Qui etiam viduarum religionem exaggerās, eas insta-
re præcipit obsecrationibus & orationibus nocte & die. De
quarum etiam necessitudinibus admodum sollicitus; *Si quis*
fidelis, inquit, habet viduas, subministret illis, & non grauetur Ec-
clesia, ut his quæ veræ viduæ sunt sufficiat. Ac si apertè dicat: Si
qua est vidua, quæ tales habeat domesticos, qui ei necessaria
de facultatibus suis valeant ministrare; ipsi super hoc ei pro-
uideant, ut cæteris sustentandis publici sumptus Ecclesiæ
possint sufficere. Quæ quidem sententia patenter ostendit, si
qui erga huiusmodi viduas suas obstinati sunt, eos ad hoc de-
bitum ex Apostolica autoritate constringendos esse. Qui
non solum earum necessitudini, verumetiam providens ho-
nori; *Viduas, inquit, honora, quæ veræ viduæ sunt.* Tales illas fuisse
credimus, quarum alteram ipse matrem, alteram Ioannes
Euangelista dominam, ex sanctæ professionis reuerentia vo-
cat: *Salutate, inquit Paulus ad Romanos scribens, Rursum ele-*
ctum in Domino, & matrem eius, & meam. Ioannes verò in secū-
da quam scribit Epistola: *Senior, inquit, electæ dominæ, & nativ-*
eius, &c. Aqua etiam se diligi postulans inferiùs adiunxit: *Et*
nunc rogo te domina, ut diligamus alterutrum. Cuius quoque
fretus autoritate Hieronymus, ad vestræ professionis virgi-
nem Eustochium scribēs, eam appellare dominam non eru-
buit: imò cur etiam debuerit, statim apposuit dicens: *Hoc id-*
circo domina mea Eustochium, dominam quippe debeo vocare sp̃sam
domini nostri, &c. Qui etiam postmodum in eadem Epistola
huius sancti propositi prærogatiuam omni terrenæ felicitatis
gloriæ superponens, ait: *Nolo habeas consortia matronarum, nolo*
ad nobilium accedas domos, nolo frequenter videas, quod contemnēs,
virgo esse voluisti. Si ad Imperatoris uxorem concurreret ambitio sa-
lutantium, cur tu facis iniuriam viro tuo? ad hominis coniugem spon-
sa Dei quid properas? Disce in hac parte superbiam sanctam. Scito te
esse illis meliorem. Qui etiam ad virginem Deo dicatam scri-
bens de consecratis Deo virginibus, quantam in cœlo beati-
tudinem, & in terra possideant dignitatem, ita exorsus ait:

Quantam in cælestibus beatitudinem virginitas sancta possideat,
præter scripturarum testimonia Ecclesiæ etiam cōsuetudine edocemur,
qua addiscimus peculiare illis subsistere meritum, quarum spiritalis
est consecratio. Nam cum unaquæque turba credentium paria gra-
tia dona percipiant, & hisdem omnes sacramentorum benedictioni-
bus

Rom. 16.

To. 1. ep. 22

* al. cōsor-
tium

To. 9. p. 14.

bus gloriantur, istæ proprium aliquid præ ceteris habent, dum de illo sancto & immaculato Ecclesiæ grege quasi sanctiores purioresque hostiæ pro voluntatis suæ meritis à Spiritu sancto & eliguntur, & per summum sacerdotem Dei offeruntur altario. Item: Possidet ergo *Ibidem.* virginitas & quod alij non habent, dum & peculiarem obtinet gratiam, & proprio ut ita dixerim consecrationis privilegio gaudet. Virginum quippè consecrationem nisi periculo mortis urgente celebrari alio tempore non licet quàm in Epiphania & albis Paschalibus, & in Apostolorum natalitijs. Nec nisi à summo sacerdote, id est Episcopo tam ipsas quàm ipsarum sacris capitibus imponenda velamina sanctificari. Monachis autem, quamvis eiusdem sint professionis, vel Ordinis, & dignioris sexus, etiam si sint virgines, quolibet die benedictionem & ab Abbate suscipere tam ipsis quàm proprijs eorum indumentis, id est cucullis, permissum est. Presbiteros quoque & cæteros inferioris gradus Clericos semper in ieiunijs quatuor temporum, & Episcopos omni die Dominico constat ordinari posse. Virginum autem consecratio quantò pretiosior, tantò rarior, præcipuarum exultationem solemnitatum sibi vendicavit. De quarum virtute mirabili vniuersa amplius congaudet Ecclesia, sicut & Psalmista prædixerat, his verbis: *Adducentur Regi virgines Ioan. 44.* post eam. Et rursum: *Afferentur in letitia & exultatione, adducentur in templum Regis. Quam* etiam consecrationem Matthæus Apostolus simul & Euangelista composuisse vel dictasse refertur, sicut in eius passione legitur, ubi & ipse pro earum cōsecratione vel virginalis propositi defensione martyr occubuisse memoratur. Nullam verò benedictionem vel Clericorum vel Monachorum Apostoli nobis scriptam reliquerunt. Quarum quoque religio sola ex nomine sanctitatis est insignita, eùm ipsæ à sanctimonia, id est sanctitate, Sanctimoniales sunt dictæ. Quippè quò infirmior est feminarum sexus, gratior est Deo atque perfectior earum virtus: iuxta ipsius quoque Domini testimonium, quo infirmitatem Apostoli ad certaminis coronam exhortans, ait: *Sufficit tibi 2. Cor. 12.* gratia mea. Nam virtus in infirmitate perficitur. Qui etiam de corporis sui, quod est Ecclesia, membris per eundem loquens Apostolum, ac si præcipuè tam infirmorum membrorum honorem commendaret, in eadem subiunxit Epistola, hoc est ad Corinthios prima: *Sed multo magis quæ 1. Cor. 12.*

videntur membra corporis infirmiora esse necessaria sunt. Et quæ putamus ignobiliora membra esse corporis, his abundantiorum honorem circumdamus: & quæ inhonestæ nostræ sunt, abundantiorum honestatē habet. Honestæ autē nostræ nullius egent. Sed Deus temperavit corpus ei cui dederat abundantiorum tribuendo honorem, ut non sit scisma in corpore, sed in idipsum proinuicem sollicita sint membra. Quis autem adeo integrè per diuinæ gratiæ dispensationem hæc in aliquo dixerit adimpleri, sicut in ipsa muliebris sexus infirmitate, quem tam culpa quàm natura contemptibilem fecerat? Circumspice singulos in hoc sexu gradus, non solū virgines, ac viduas, seu coniugatas: verumetiam ipsas scortorum abominationes, & in eis Christi gratiam videbis amplioriorem: ut iuxta Dominicam & Apostolicam sententiā, *Sint nouissimi primi, & primi nouissimi: & ubi abundauit delictum, superabundet & gratia.* Cuius quidem diuinæ gratiæ beneficia vel honorem feminis exhibita si ab ipso exordio mundi repetamus, reperiemus statim mulieris creationem quadam præcellere dignitate: cū ipsa scilicet * in Paradiso, vir extrā creatus sit. Ut hinc præcipuè mulieres admoncantur attendere, quàm sit earum naturalis patria Paradisus, & quo amplius eas cœlibem Paradisi vitam sequi conueniat. Vnde Ambrosius in libro de Paradiso: *Et apprehendit, inquit, Deus hominem quem fecit, & posuit eum in Paradiso. Vides quoniam qui erat apprehenditur. In Paradiso eum collocauit. Aduerte quia extra Paradisum vir factus est, & mulier intra Paradisum. In inferiori loco vir melior inuenitur, & illa quæ in meliore loco facta est inferior reperitur.* Prius quoque Dominus Euam totius originē mali restaurauit in Maria, quàm Adam in Christo reparauit. Et sicut à muliere culpa, sic à muliere cœpit gratia, & virginitatis reffloruit prærogatiua. Ac prius in Anna & Maria viduis & virginibus sanctæ professionis forma exhibita, quàm in Ioanne vel Apostolis Monasticæ religionis exempla viris proposita. Quod si post Euam, Delboræ, Iudith, Ester virtutem intueamur: profectò non mediocrem robori virilis sexus inferemus erubescētiā. Delboræ * quippè Domini iudex populi, viris deficientibus dimicauit, & deuictis hostibus populoque Domini liberato potenter triumphauit. Iudith inermis cū Abrahæ sua terribilem exercitum est aggressa, & vnius Holofernis proprio ipsius gladio caput am-

Matth. 20.

Rom. 5.

Genes. 2.

et. quoq;

*.l. Debora

Judic. 4.

Judith. 23.

putans, sola vniuersos strauit hostes, & desperatum populum suum liberauit. Hester spiritu latenter suggerente contra ipsum etiam legis decretum gentili copulata Regi, impijsimi Aman consilium, & crudele Regis præuenit edictum, constitutamque regiæ deliberationis sententiam quasi vno temporis momento in contrarium conuertit. Magne adscribitur virtuti quòd Dauid in funda & lapide Goliã aggressus est & deuicit. Iudith vidua ad hostilem procedit exercitum sine funda & lapide, sine omni adminiculo armaturæ dimicatura. Hester solo verbo populum suum liberat, & conuersa in hostes sententia corruerunt ipsi in laqueum quem tetenderāt. Cuius quidem insignis facti memoria singulis annis apud Iudæos solemnem meruit habere lætitiā. Quod nequaquam aliqua virorum facta quantumcumque splendida obtinuerunt. Quis incomparabilem matris septem filiorum constantiam non miretur, quos vnā cum matre apprehensos, sicut Machabæorum Historia narrat, Rex impijsimus Antiochus ad carnes porcinas contra legem edendas nisus est frustra compellere? Quæ mater suæ immemor naturæ, & humanæ affectionis ignara, nec nisi Dominum præ oculis habens, quot sacris exhortationibus suis ad coronam filios præmisit, tot ipsa martyrijs triumphauit, proprio ad extremum martyrio consummata. Si totam veteris Testamenti seriem reuoluamus, quid huius mulieris constantiæ comparare poterimus? Ille ad extremum vehemens tentator beati Iob, imbecillitatē humanæ naturæ contra mortē considerās: *Pellē, inquit, propelle, & vniuersa dabit homo pro anima sua.* Intātū enim omnes angustias mortis naturaliter horremus, vt sæpè ad defensionem vnius membri alterum opponamus, & pro vita hac conseruanda nulla vereamur incommoda. Hæc verò non solū sua, sed propriam & filiorum animas perdere substinuit, ne vnā legis incurreret offensam. Quæ est ista, obsecro, ad quam compellebatur transgressio? Nunquid abrenuntiare Deo, vel thurificare idolis cogeatur? Nihil, inquam, ab eis exigebatur, nisi vt carnibus vescerentur, quas lex eis interdicebat. O fratres & commonachi, qui tam impudenter quotidie contra Regulæ institutionem ac nostram professionē ad carnes inhiatis, quid ad huius mulieris constantiam dicturi estis? Nunquid tam inuerecundi estis,

Hester. 8.

1. Reg. 17.

Judith 9.

Hester, 8.

Hester. 9.

1. Machab. 7.

Leuit. 11.

Deuter. 14.

Iob. 2.

2. Machab. 7.

Leuit. 11.

Deuter. 14.

ut cum hæc auditis, erubescentiâ non confundamini? Scia-
tis, fratres, quod de Regina Austri Dominus incredulis ex-
probat, dicens: *Regina Austri surget in iudicio cum generatione*
ista, & condemnabit eam, multò amplius vobis de huius mu-
 lieris constantia improprium esse, quæ & longè maiora
 fecerit, & vos vestræ professionis voto religioni arctius
 adstricti estis. Cuius quidem tanto agone virtus examinata,
 hoc in Ecclesia priuilegium obtinere meruit, ut eius marty-
 rium solemnes lectiones atque Missam habeat, quod nulli
 antiquorum Sanctorum concessum est, quicumque scilicet
 aduentum Domini moriendo præuenerunt: quamuis in ipsa
 1. Macha. 6. Machabæorū Historia Eleazarus ille venerabilis senex vnus
 de primoribus scribarum eadem causa martyrio iam coro-
 natus fuisse referatur. Sed quia, ut diximus, quo naturaliter
 femineus sexus est infirmior, eò virtus est Deo acceptabilior,
 & honore dignior: nequaquam martyrium illud in festiui-
 tate memoriam meruit, cui femina non interfuit, quasi pro
 magno non habeatur si fortior sexus fortiora patiatur. Vn-
 de & in laude prædictæ feminae ampliùs scriptura prorump-
 pens, ait: *Supra modum autem mater mirabilis & bonorum me-*
moriam digna, quæ peruenientes septem filios sub vnus diei tempo-
re conspiciens bono animo ferebat propter spem, quam in Domi-
no habebat, singulos illorum hortabatur fortiter, repleta sa-
pientia; & femineæ cogitationi masculinum animum inferens.
 Quis in laudem virginum vineam illam Iephthe filiam af-
 sumi non censeat? Quæ, ne voti licet improuidi reus pa-
 ter haberetur, & diuinæ gratiæ beneficium promissâ frau-
 daretur hostia, victorem patrem in iugulum proprium ani-
 mauit. Quid hæc, quæso, in agone martyrum factura esset, si
 fortè ab infidelibus negando Deū apostatate cogeretur? Nū-
 quid interrogata de Christo cum illo iam Apostolorū prin-
 cipe diceret: *Non noui illum?* Dimissa per duos menses à pa-
 tre libera, his completis redit ad patrem occidenda. Sponte
 morti se ingerit, & eā magis prouocat quàm veretur. Stultū
 patris plectitur votum, & paternū redimit mandatū amatrix
 maxima veritatis. Quantum hunc in se lapsum abhorreret,
 quem in patre non sustinet? Quantus hic est virginis fer-
 uor tam in carnalem quàm in cælestem patrem? Quæ simul
 morte sua & hunc à mendacio liberare, & illi promissum de-
 creuit conseruare. Vnde merito tanta hæc puellaris animi

Math. 12.

1. Macha. 6.

Judic. 11.

Luc. 22.

Judic. 11.

fortitudo prærogatiua quadam id meruit obtinere, vt per annos singulos filiæ Israel in vnum conuenientes quasi quibusdam solemnibus hymnis festiuas virginis agant exequias, & de passione virginis compunctæ pijs plâctibus compatiantur. Vt autem cætera omnia prætermittamus, quid tam necessarium nostræ redemptioni, & totius mundi saluti fuerit, quàm sexus femineus, qui nobis ipsum peperit Saluatorem? Cuius quidem honoris singularitatem mulier illa, quæ prima irrumperè ausa est ad beatum Hilarionem, illi admiranti opponerebat, dicens: *Quid auertis oculos? Quid rogantem fugis? Noli me mulierem aspicere, sed miseram. Hic sexus genuit Saluatorem.* Quæ gloria huic poterit comparari, quam in Domini matre adeptus est sexus iste? Posset vtrique si vellet Redemptor noster de viro corpus assumere, sicut primam feminam de corpore viri voluit formare. Sed hanc suæ humilitatis singularem gratiam ad infirmioris sexus trāstulit honorem. Posset & alia parte mulieris corporis digniore nasci quàm cæteri homines, eadem qua concipiuntur vilissima portione nascētes. Sed ad incōparabilē infirmioris corporis honorē lōgè ampliùs ortu suo consecrauit eius genitale quàm viri fecerat ex circumcissione. Atque vt hunc singularem virginum nunc omittam honorem, libet ad cæteras feminas sicut proposuimus stilum conuertere. Attende itaque quantam statim gratiam aduentus Christi Elisabeth coniugatæ, quantam exhibuit Annæ viduæ. Virum Elisabeth Zachariam magnum Domini sacerdotem incredulitatis diffidentia mutum adhuc tenebat, dum in aduentu & salutatione Mariæ ipsa mox Elisabeth Spiritu sancto repleta & exultantem in vtero suo paruulum sensit, & prophetiam iam de ipso completo Mariæ conceptu prima proferens, plus quàm Propheeta extitit. Præsentem quippè illico virginis conceptum nuntiavit, & ipsam Domini matrem ad magnificandum super hoc ipso Dominum concitauit. Excellentius autem prophetiæ donum in Elisabeth videtur completum, conceptum statim Dei filium agnoscere, quàm in Ioanne ipsum iam dudum natum ostendere. Sicut igitur Mariam Magdalenam Apostolorum dicimus Apostolam, sic nec istam Prophetarum dicere dubitemus Prophetam, siue ipsam beatam viduam Annam, de qua supra latius actum est. Quod si hanc Pro-

Tom. I. in
vita Hila-
rionis.

Genes 2.

Luc. 1. 26.

In pref. in
Esai. 10.
3. ep. 117.
Cap. 3.

Ibidem.
* al. ipsum

Esai. 9.

Cap. 23.

phetiæ gratiam usque ad Gentiles etiam extendamus, Sibylla vates in medium procedat, & quæ ei de Christo reuelata sunt proferat. Cum qua si vniuersos conferamus Prophetas, ipsum etiam Esaiam, qui ut Hieronymus asserit, non tam Propheta quàm Euangelista dicendus est; videbimus in hac quoque gratia feminam viris longè præstare. De qua Augustinus contra hæreses testimonium proferens, ait: *Audiamus quid etiam Sibylla vates eorum de eodem dicat: Alium, inquit, dedit Dominus hominibus fidelibus colendum. Item, Ipse tuum cognosce Dominum Dei filium esse. Alio loco filium Dei symbolum appellat, id est consiliarum. Et Propheta dicit, Vocabunt nomen eius mirabilis, consiliarius. De qua rursus idem pater Augustinus in xviij. de Ciuitate Dei. Eo, inquit, tempore nonnulli Sibyllam Eriçtream vaticinatam ferunt, quam quidam magis credunt esse Cumanam. Et sunt eius viginti & septem versus; qui, sicut eos quidam Latinis versibus est interpretatus, hoc continent,*

*Iudicij signum tellus sudore madescet,
E cælo Rex adueniet per secla futurus,
Scilicet in carne præsens ut iudicet orbem.*

Lib. 4. instit.
cap. 18.
* al. impu-
ro.

Quorum quidem versuum primæ literæ in Græco cōiunctæ, id sonant, IESVS CHRISTVS FILIVS DEI SALVATOR. Infert etiam Lactantius quædam de Christo vaticinia Sibyllæ. *In manus, inquit, infidelium postea veniet. Dabunt Deo alas manibus incestis, & impurato ore expuent venenatos sputos. Dabit vero ad verbera suppliciter sanctum dorsum, & colaphos accipiens tacebit, ne quis agnoscat quod verbum vel unde venerit inferis loquatur, & spinea corona coronabitur. Ad cibum autem fel, & ad sitim acetum dederunt. In hospitalitatem hanc monstrabunt mensam. Ipsa enim insipiens gens tuum Deum non intellexisti laudandum mortaliū mentibus, sed spinis coronaſti, fel miscuisti. Templi velum scindetur, & in medio die nox erit tribus horis, & morietur, tribus diebus somno suscepto, & tunc ab inferis regressus ad lucem veniet, primus resurrectionis principio ostensus. Hoc profecto Sibyllæ vaticinium, ni fallor, maximus ille Poetarū nostrorum Virgilius audierat atque attenderat cū in iiii. Ecloga futurum in proximo sub Augusto Cæsare tempore consulatus Pollionis mirabilem cuiusdam pueri de cælo ad terras mittendi, qui etiam peccata mundi tolleret, & quasi seculum nouum in mundo mirabiliter ordinaret, præcineret ortum: admonitus*

ut ipsemet ait, Cumæi carminis vaticinio, hoc est Sibyllæ, quæ ^{* al. Cumæa} Cumana^{*} dicitur. Ait quippe sic, quasi adhortans quoslibet ad congratulandum sibi, & concinendum seu scribendum de hoc tanto puero nascituro, in comparatione cuius omnes alias materias quasi infimas^{*} & viles reputat, dicens:

Sicelides Musæ paulo maiora canamus.

Non omnes arbuta iuuant, humilésque mirice.

Ultima Cumæi venit iam carminis ætas.

Magnus ab integro seclorum nascitur ordo.

Iam redit & Virgo, redeunt Saturnia regna.

Iam noua progenies cælo demittitur alto, &c.

^{*} al. Infir-
mas

Virgil. E-
clog. 4.

Inspice singula Sibyllæ dicta, & quàm integrè & apertè Christianæ fidei de Christo summam complectatur. Quæ nec diuinitatem eius, nec humanitatem, nec vtrumque ipsius aduentum, nec vtrumque iudicium prophetando vel scribendo prætermisit. Primum quidem iudicium, quò iniuste iudicatus est in passione, & secundum quo iuste iudicaturus est mundum in maiestate. Quæ nec descensum eius ad inferos, nec resurrectionis gloriam prætermittens, non solum Prophetas, verum etiam ipsos supergressa videtur Euangelistas, qui de hoc eius descensu minimè scripserunt. Quis non etiam illud tam familiare prolixumque colloquium miretur, quo ipse solus solam illam gentilem & Samaritanam mulierem tam diligenter dignatus est instruere, de quo & ipsi vehementer obstupuerunt Apostoli? Aqua etiam infideli & de virorum suorum multitudine reprehensa potum ipse voluit postulare, quem nihil vltèrius alimenti ab aliquo nouimus requisisse. Superueniunt Apostoli, & emptos ei cibos offerunt, dicentes: *Rabi, manduca*: nec oblatos suscipi videmus, sed hoc quasi in excusationem ipsum prætendisse: *Ego cibum habeo manducare, quem vos nescitis*. Potum ipse à muliere postulat. A quo se illa excusans beneficio, *Quomodo*, inquit, *tu Iudeus cum sis, bibere à me poscis, quæ sum mulier Samaritana? Non enim contuntur Iudei Samaritanis*. Et iterum: *Neque in quo haurias habes, & puteus altus est*. Potum itaque à muliere infideli, & id negante desiderat, qui oblatos ab Apostolis cibos non curat. Quæ est ista, quæso, gratia, quam exhibet infirmo sexui; ut videlicet à muliere hac postulet aquam, qui omnibus tribuit vitam? Quæ, inquam, nisi ut patenter insinuet tantò sibi mulierum virtu-

Ioan. 4.

Ioan. 3.
* ad. hunc

tem esse gratiorem, quantò earum naturam esse constat infirmiore; & se tantò amplius earum salutem desiderando sitire, quantò mirabiliorem earum virtutem constat esse. Vnde & cùm à femina potum postulat, huic præcipuè siti suæ per salutem feminarum satisfieri velle se insinuat. Quem potum etiam cibum vocans: *Ego, inquit, cibum habeo manducare quem vos nescitis.* Quem postmodum exponens cibum, adiungit: *Meus cibus est ut faciam voluntatem Patris mei.* Hanc videlicet quasi singularem sui Patris voluntatem esse innuēs, vbi de salute agitur infirmioris sexus. Legimus & familiare colloquium cum Nicodemo illo Iudæorum principe Dominum habuisse, quo illum quoque ad se occultè venientem de salute sua ipse instruxerit; sed illius colloquij nō tantū tunc fructum esse consecutum. Hanc quippe Samaritanam, & spiritu prophetiæ repletam esse tūc constat, quo videlicet Christum & ad Iudæos iam venisse, & ad gentes venturum esse professa est: cùm dixerit, *Scio quia Messias venit qui dicitur Christus.* Cùm ergo venerit ille nobis annuntiabit omnia, & multos ex ciuitate illa propter verbum mulieris ad Christū cucurrisse, & in eum credidisse, & ipsū duobus diebus apud se retinuisse: qui tamen alibi discipulis ait: *In viam gentium ne abieritis, & in ciuitate Samaritanorum ne intraueritis.* Refert alibi idem Ioannes quosdam ex gentilibus, qui ascenderant Hierosolymam, vt adorarent in die festo, per Philippum & Andream Christo nunciasse, quòd eum vellent videre. Non tamen eos esse admissos commemorat, nec illis postulantibus tantam Christi copiam esse concessam, quantam huic Samaritanæ nequaquam id petenti. A qua eius in gentibus prædicatio cœpisse videtur, quam non solum conuertit; sed per eam, vt dictum est, multos acquisiuit. Illuminati statim per stellam Magi, & ad Christum conuersi, multos exhortatione sua vel doctrina ad eum traxisse referuntur; sed soli accessisse. Ex quo etiam liquet quantam à Christo gratiam in gentibus mulier sit adepta, quæ præcurrens, & ciuitati nuntians eius aduentum, & quæ audierat prædicans, tam properè ipsa multos de populo suo est lucrata. Quod si veteris Testamenti vel Euangelicæ scripturæ paginas reuoluamus, summa illa de resuscitatis mortuis beneficia diuinam gratiam feminis præcipuè videbimus impendisse, nec nisi ipsis vel de ipsis hæc miracula

miracula facta fuisse. Primò quippè per Heliam & Helisæum ad intercessionem matrum filios ipsarum resuscitados esse legimus. Et Dominus ipse viduæ cuiusdam filium suum, & Archisynagogi filiam, & rogatu sororum Lazarum resuscitans, hoc immensi miraculi beneficium maximè feminis impendit. Vnde illud est Apostoli ad Hebræos scribentis: *Acceperunt mulieres de resurrectione mortuos suos.* Nam & puella suscitata mortuum recepit corpus, & ceteræ feminæ in consolationem sui, quos plangebant mortuos receperunt suscitatos. Ex quo etiam liquet, quantam semper feminis exhibuerit gratiam, quas tam sua quàm suorum resuscitatione primò lætificans, nouissimè quoque ipse propria resurrectione eas plurimùm extulit, quibus, vt dictum est, primùm apparuit. Quod etiam hic sexus in populo persequente, quodā erga Dominum naturali compassionis affectu, visus est promereri. Vt enim Lucas meminit, cū cum viri ad crucifigendum ducerent, feminæ ipsorum sequebantur plangentes ipsum, atque lamentantes. Quibus ipse conuersus, & quasi pietatis huius vicem in ipso statim passionis articulo misericorditer eis referens, futurum vt cauere queant prædicit exitum*: *Filiæ, inquit, Hierusalem nolite flere super me, sed super vos ipsas flete, & super filios vestros. Quia ecce venient dies, in quibus dicent: Beata steriles, & ventres qui non genuerunt.* Ad cuius etiam liberationem iniquissimi iudicis vxorem antea fideliter laborasse Matthæus commemorat, dicens: *Sedente autem illo pro tribunali misit ad illum vxor eius dicens; Nihil tibi & iusto illi. Multa enim passa sum hodie per visum propter eum.* Quo etiā prædicante solam feminam de tota turba in tantam eius laudem legimus extulisse vocem, vt beatum exclamaret vterū qui eum portauerit, & vbera quæ suxerit. A quo & statim piam confessionis suæ, licet verissimæ, correctionem meruit audire, ipso confestim ei respondente: *Quinimò beati qui audiunt verbum Dei, & custodiunt illud.* Solus Ioannes inter Apostolos Christi hoc priuilegium amoris obtinuit, vt dilectus Domini vocaretur. De Martha autem & Maria ipse scribit Ioannes, *quia diligebat Iesus Martham, & sororem eius Mariam, & Lazarum.* Ipse idem Apostolus, qui ex priuilegio, vt dictum est, amoris se vnum à Domino dilectum esse commemorat, hoc ipso priuilegio, quod nulli aliorū adscrip-

3. Reg. 17.
4. Reg. 4.
Luc. 4.
Marc. 5.
Ioan. 11.
Heb. 11.

Matth. 23.
Marc. 16.

* al. exitū

sit Apostolorum, feminas insigniuit. In quo etiam honore
 et si fratrem earum ipsis aggregaret, eas tamen illi præposuit,
 quas in amore præcellere credidit. Libet deniq; vt ad fideles
 seu Christianas redeamus feminas, diuinæ respectu miseri-
 cordiæ in ipsa etiam publicorū abiectione scortorū & stupē-
 do prædicare, & prædicando stupere. Quid est abiectius quā
 Maria Magdalene, vel Maria Ægyptiaca secundum vitæ sta-
 rum pristinæ? Quas verò postmodum vel honore vel merito
 diuina amplius gratia sublimauit? Illam quidem quasi in
 Apostolico permanentem Cœnobio, vt iam suprā comme-
 morauimus: hac verò, vt scriptum est, supra humanam vir-
 tutem Anachoretarum agone dimicante, vt in vtrorumque
 Monachorum proposito sanctarum virtus feminarum præ-
 mineat, & illud quod incredulis Dominus ait, *Meretrices præ-*
cedent vos in regnum Dei, ipsis & fidelibus viris impropertandū
 videatur, & secundum sexuum seu vitæ differentiam fiāt no-
 uissimi primi, & primi nouissimi. Quis denique ignoret femi-
 nas exhortationem Christi & consilium Apostoli tanto ca-
 stimonix zelo esse complexas, vt pro conseruanda carnis pa-
 riter ac mentis integritate, Deo se per martyrium offerrent
 holocaustum, & gemina triumphantes corona, Agnum spō-
 sum virginum quocumque ierit sequi studerent? Quam qui-
 dem virtutis perfectionem raram in viris, crebram in feminis
 esse cognouimus. Quarum etiam nonnullas tantum in hac
 carnis prærogatiua zelum habuisse legimus, vt non sibi ma-
 rium inferre dubitarent, ne quā Deo vouerant incorruptio-
 nem amitterent, & ad Sponsū virginem virgines perueni-
 rent. Qui etiam sanctarum deuotionem virginum intantum
 sibi gratam esse monstrauit, vt gentilis populi multitudinem
 ad beatæ Agathæ suffragium concurrentem velo eius contra
 æstuantis Æthnæ terribilem ignem opposito tam à corporis
 quā animæ liberauerit incendio. Nullā nouimus Monachi
 cucullam beneficij tanti gratiam esse adeptam. Legimus
 quidem ad tactum pallij Helix Iordanem esse diuisum, & ipsi
 pariter & Helisæo viam per terram præbuisse: velo autem
 virginis immensam adhuc infidelis populi multitudinem tam
 mente saluari quā corpore, & sic eis conuersis ad celestia
 viam patuisse. Illud quoque non modicum sanctarum di-
 gnitatem commendat feminarium, quòd in suis ipsæ verbis

In vitis Pa-
rr.

Matth. 21.

Matth. 10.

Apost. 14.

Mantuan.
in pass. Aga-
tha.

consecrantur, dicentes: *Annulo suo subarrauit me, ipsi sum desponsata.* Hæc quippe verba sunt beatæ Agnetis, in quibus virgines suam professionem facientes Christo desponsantur. Si quis etiam vestræ religionis formam ac dignitatem apud Gentiles cognoscere curet, atque nonnulla inde quoque exempla ad exhortationem vestram inducere, facile deprehender in ipsis etiam nonnullam huius propositi institutionem præcessisse, excepto quòd ad fidei pertinet tenorē, & multa in illis sicut & in Iudæis præcessisse, quæ ex vtrisque congregata Ecclesia retinuit, sed in melius commutauit. Quis nesciat vniuersos Clericorum ordines ab Ostiario vsque ad Episcopum, ipsumque consuræ vsum Ecclesiasticæ, qua Clerici fiunt, & ieiunia quatuor temporum, & azimorum sacrificiū, necnon ipsa sacerdotalium indumentorum ornamenta, & nonnulla dedicationis vel alia sacramenta, à Synagoga Ecclesiam assumpsisse? Quis etiam ignoret ipsum vtilissima dispensatione non solum secularium dignitatum gradus in Regibus, cæterisque Principibus, & nonnulla legum decreta, vel Philosophicæ disciplinæ documenta in conuersis Gentibus retinuisse: verumetiam quosdam Ecclesiasticarum dignitatum gradus, vel continentia formam, & corporalis munditiæ religionem ab eis accepisse? Constat quippe nunc Episcopos vel Archiepiscopos præsidere, vbi tunc Flamines vel Archiflamines habebantur: & quæ tunc templa Dæmonibus sunt instituta, postea Domino fuisse consecrata, & sanctorum memorijs insignita. Scimus & in gentibus præcipuè prærogatiuam virginitatis enituisse, cùm maledictum legis ad nuptias Iudæos coerceret: & in tantum Gētibus hanc virtutem seu mundiciam carnis acceptam extitisse, vt in tēplis earum magni feminarum Conuentus cælibi se vitæ dicarent. Vnde Hieronymus in Epistolam ad Galathas lib. iiii. *Quid nos, inquit, oportet facere, in quorum condemnationem habet & Inno vniuiras, & Vesta vniuirgines, & alia idola continentes?* *Deuter. 25.* *To. 6 in c. 6.* Vniuiras autem & vniuirgines dicit; quasi Monachas vniuiras, quæ viros nouerant, & Monachas vniuirgines virgines. Monos enim, vnde Monachus, id est solitarius dicitur, vnum sonat. Qui etiam libro i. contra Iouinianum, multis de castitate vel continentia Gentilium feminarum, inductis exemplis: Scio, inquit, in catalogo feminarum me plura di-

xisse, ut quæ Christianæ pudicitie despiciunt fidem, discant saltem ab Ethnicis castitatem. Qui in eodem suprâ illam quoque continentiae virtutem adeo commendauit, ut hanc præcipuè mundiciam carnis in omni gente Dominus approbasse videatur, & nonnullis etiam in infidelibus quoque vel collatione meritorum, vel exhibitione miraculorum extulisse. *Quid referam*, inquit, *Sibyllam Erithream atque Cumanam, & octo reliquas? Nam Varro decem fuisse antumat, quarum insigne virginitas est, & virginitatis premium diuinitio.* Itē: *Claudia virgo vestalis cum in suspicionem venisset stupri, fertur cingulo duxisse ratem, quam hominum millia trahere nequiverāt.* Et Sydonius Claremontensis Episcopus in propemptico ad Libellum suum ita loquitur:

*Qualis nec Tanaquil fuit, nec illa,
Quam tu Tricipitine procreasti,
Qualis nec Phrygiæ dicata Vesta
Quæ circa satis Albulam tumentem
Duxit virgineo ratem capillo.*

Cap. II.

Augustinus de Ciuitate Dei lib. xxii. *Iam si ad eorum miracula veniamus, quæ facta à dijs suis martyribus opponunt nostris, nonne etiam ipsa pro nobis facere, & nobis reperientur omnino proficere? Nam inter magna miracula Deorum suorum profecto magnum illud est, quod Varro commemorat Vestalem virginem, cum periclitaretur falsa suspitione de stupro, cribrum implese aqua de Tyberi, & ad suos indices nulla eius parte stillante portasse. Quis aquæ pondus tenuit tot cauernis patientibus? Itane Deus omnipotens terreno corpori graue pondus auferre non poterit, ut in eodem elemento habitat viuificatum corpus, in quo voluerit viuificans spiritus? Nec mirum si ijs vel alijs Deus miraculis infidelium quoque castitatem extulerit, vel officio Demonum extolli permiserit: ut tantò amplius nunc fideles ad ipsam animarentur, quantò hanc in infidelibus quoque amplius exaltari cognouerint.* Scimus & Caiphæ prælationi non personæ gratiam esse collatam, & pseudo quoque Apostolos miraculis nonnusquam coruscasse: & hæc non personis eorum, sed officio esse concessa. Quid igitur mirum, si Dominus non personis infidelium feminarum, sed virtuti continentiae ipsarum hoc concesserit, ad innocentiam virginis saltem liberandam, & falsæ accusationis improbitatem conterendam? Constat quippè amorem continentiae bonum esse & in

Yodn. II.

infidelibus, sicut & coniugalis pactiois obseruantiam donum Dei apud omnes esse. Ideoque mirabile non videri, si sua dona, non errorem infidelitatis per signa, quæ infidelibus fiunt, non fidelibus, Deus honoret: maximè quando per hæc, vt dictum est, innocentia liberatur, & peruersorum hominum malicia reprimatur, & ad hoc, quod ita magnificatur, bonum homines ampliùs cohortantur, per quod tantò minùs ab infidelibus quoque peccatur, quantò ampliùs à voluptatibus carnis receditur. Quod nunc etiam cum plebisque alijs aduersus prædictum incontinentem hæreticum beatus non inconvenerenter induxit Hieronymus, vt quæ non miratur in Christianis, erubescat in Ethnicis. Quis etiam dona Dei esse deneget, potestatem etiam infidelium Principum, etsi peruersè ipsa vtantur, vel amorem iustitiæ, vel mansuetudinem quam habent, lege instructi naturali, vel cætera quæ decent Principes? Quis bona esse contradicat quia malis sunt permixta? præsertim cum, vt beatus adstruit Augustinus, & manifesta ratio testatur, mala esse nequeant nisi in natura bona? Quis non illud approbet quod Poetica perhibet sententia,

Oderunt peccare boni virtutis amore?

Quis Vespasiani nondum Imperatoris miraculū, quod Suetonius refert, de cæco videlicet & claudo per eum curatis, non magis approbet quàm neget, vt eius virtutem ampliùs æmulari velint Principes. Aut quod de anima Traiani beatus egisse Gregorius refertur? Nouerunt homines in cæno margaritam legere, & à paleis grana discernere. Et dona sua infidelitati adiuncta Deus ignorare non potest, nec quicquam horum quæ fecerit odire. Quæ quò ampliùs signis coruscant, tantò ampliùs sua esse demonstrat, nec hominum prauitate sua inquinari posse, & qualis sit fidelibus spectandus, qui talē se exhibet infidelibus. Quantam autem apud infideles dignitatem deuota illa templis pudicitia sit adepta, vindicta violationis indicat. Quam scilicet vindictam Iuuenalis commemorans in IIII. Satyra contra Crispinum, sic de ipso ait:

Horat.

Epist. l. I.

ep. 15.

Sueton. in

Vespas. c. 7.

Ioan. Dia-

conul. 2.

vita S. Greg.

c. 44.

————— *Cum quo nuper vitiata iacebat*

Sanguine adhuc vino terram subitura Sacerdos.

Vnde & Augustinus de Ciuitate Dei lib. III. Nam & ipsi, inquit, Romani antiqui in stupro detectas vestes Sacerdotes viuas defo-

* vestrae

C. 17.
 quast. 1. Cā.
 Viduas. &
 Ha. vero.

1. Tim. 5.

dicbant. *Adulteras autem feminas quamvis aliqua damnatione, nulla tamen morte plectebant. Usque adeo grauius quæ putabāt abdita diuina, quàm humana cubilia vindicabant. Apud nos autem Christianorum cura Principum tantò amplius nostræ * prouidit castimonix, quantò eam sanctiorem esse non dubitatur. Vnde Iustinianus Augustus: Si quis, inquit, non dicam rapere, sed attentare tantum causa iungendi matrimonium sacras virgines ausus fuerit, capitali pœna feriatur. Ecclesiasticæ quoque sanctio disciplinæ, quæ pœnitentiæ remedia, non mortis supplicia quærit, quàm seuera sententia lapsus vestros præueniat non est dubium. Vnde illud est Innocentij Papæ Vistricio Episcopo Rothomagensi, cap. xiii. Quæ Christo spiritualiter nubunt, & à sacerdote velantur, si postea vel publicè nupserint, vel occultè corruptæ fuerint, non eas admitrendas esse ad agendam penitentiam, nisi is cui se coniunxerant de hac vita discesserit. Hæc verò, quæ necdum sacro velamine tectæ, tamen in proposito virginali semper se simulauerint permanere, licet velatæ non fuerint, his agenda aliquanto tempore pœnitentia est: quia sponsio earum à Domino tenebatur. Si verò inter homines solet bonæ fidei contractus nulla ratione dissolui, quantò magis ista pollicitatio, quam cum Deo pepigerunt, solui sine vindicta non poterit? Nam si Apostolus Paulus, quæ à proposito viduitatis discesserant, dixit eas habere condemnationem, quia primam fidem irritam fecerunt: quantò magis virgines, quæ prioris propositionis fidem minimè seruauerunt? Hinc & Pelagius ille notabilis ad filiam Mauritij: Criminosior est, inquit, Christi adultera quàm mariti. Vnde pulchrè Romana Ecclesia tam seueram nuper de huiusmodi statuit sententiam, ut vix vel pœnitentia dignas iudicaret, quæ sanctificatum Deo corpus libidinosa coinquinatione violassent. Quod si perscrutari velimus quantam curam, quantam diligentiam & charitatem sancti Doctores ipsius Domini, & Apostolorum exemplis incitati, deuotis semper exhibuerint feminis, reperiemus eos summo dilectionis zelo deuotionem earum amplexos fuisse, & fouisse, & multiplici doctrinæ vel exhortationis studio earum religionem iugiter instruxisse atque auxisse. Atque ut cæteros omittam, præcipui Doctores Ecclesiæ producantur in medium: Origines scilicet, Ambrosius, atque Hieronymus. Quorum quidem*

primus, ille videlicet maximus Christianorum Philosophus,
 religionem feminarum tanto amplexus est zelo, ut sibi ma-
 nus ipse inferret, sicut Ecclesiastica refert Historia, ne vlla Lib. 6. c. 7.
 cum suspicio à doctrina vel exhortatione mulierum abduce-
 ret. Quis etiam ignoret quantam Ecclesiæ diuinorum mes-
 sem librorum rogatu Paulæ & Eustochij beatus reliquerit
 Hieronymus? Quibus inter cætera sermonem etiam de As- To. 9. ep. 19.
 sumptione matris Domini iuxta earum petitionem scribēs,
 id ipsum proficitur, dicens: *Sed quia negare non queo quic-*
quid iniungitis, nimia vestra deuinctus dilectione, experiar quod
hortamini. Scimus autem nonnullos maximorum Doctorum
 tam ordinis quàm vitæ dignitate sublimium, nonnunquam
 ad eum de longinquo scribentes parua ab eo requisisse scri-
 pta, nec impetrasse. Vnde & illud est beati Augustini in se-
 cundo Retractionum libro: *Scripsi & duos libros ad Presby-* Cap. 43.
terum Hieronymum sedentem in Bethleem, vnum de origine anime,
aliud de sententia Apostoli Iacobi, ubi ait: Quicumque totam le- Iacobi 2.
gem seruauerit, offendat autem in vno, factus est omnium reus: de
utroque consulens eum: Sed in priore quætionem, quam proposui,
ipse non solui. In posteriore autem quid mihi de illa soluenda videretur
non tacui. Sed utrum hoc approbare, & illum consului. Respondit * al. Res-
autem laudans eandem consultationem meam, sibi tamen ad respon- scripsit
dendum otium non esse respondit. Ego verò quousque esset in corpore
hos libros edere nolui, ne fortè responderet aliquando, & cum ipsa
responsione eius potius ederentur. Illo autem defuncto edidi. Ec-
 ce virum tantum tanto tempore pauca & parua rescripta à
 prædicto viro expectasse, nec accepisse. Quem quidem ad
 petitionem prædictarum feminarum in tot & tantis vo-
 luminibus vel trāsferendis vel dictādis sudasse cognouimus,
 longè eis maiorē quàm Episcopo reuerentiā in hoc exhibēs.
 Quarū fortassis tantò ampliùs virtutem amplectitur studio,
 nec contristare substat, quantò earū naturam fragiliore cō-
 siderat. Vnde & nōnūquā zelus charitatis eius erga huiusmo-
 di feminas tantus esse deprehēditur, ut in earū laudibus ali-
 quatenus veritatis tramitē excedere videatur, quasi in seipso
 illud expertus, quod alicubi cōmemorās: *Charitas, inquit, mē-* To. 1. ep. 17.
suram non habet. Qui in ipso statim exordio vitæ sanctæ Paulæ,
 quasi attentum sibi lectorem præparare desiderans, ait: *Si* Ibid. ep. 27.
cuncta corporis mei membra verterentur in linguas, & omnes artus

Ibidem;
Epist. 8.

Tom. 2.
Epist. 99.

Ibidem.

** suspicere*
Ibidem.

Luc. 7.

Euseb. Hist.
Eccles. lib. 6.
cap. 7.

*humana voce resonarent, nihil dignum sanctæ ac venerabilis Paulæ virtutibus dicerem. Descripsit & nonnullas sanctorum Patrum venerabiles vitas, atque miraculis coruscas, in quibus longè mirabilia sunt quæ referuntur. Nullum tamen eorum tanta laude verborum extulisse videtur, quanta hanc viduam commendavit. Qui etiam ad Demetriadem virginem scribens, tanta eius laude frontem ipsius insigniuit Epistolæ, ut non in modicam labi videatur adulationem. Inter omnes, inquit, materias, quas ab infantia usque ad hanc ætatem vel mea, vel notariorum scripsi manu, nihil præsentis opere difficilius. Scripturus enim ad Demetriadem virginem Christi, quæ & nobilitate & diuitijs prima est in urbe Romana, si cuncta eius virtutibus congrua dixero, adulari putabor. Dulcissimum quippè viro sancto fuerat quacumque arte verborum fragilem naturam ad ardua virtutis studia promouere. Ut autem opera nobis quàm verba in hoc certiora præbeant argumenta, tanta huiusmodi feminas excoluit charitate, ut immensa eius sanctitas næuum sibi propriæ imprimeret famæ. Quod & ipse quidem ad Asellam, de fictis amicis atque sibi detrahentibus scribens, inter cætera commemorat, dicens: Et licet me sceleratum quidam putent, & omnibus flagitijs obrutum; tu tamen benè facis, quod ex tua mente etiam malos bonos putas. Periculosum quippè est de seruo alterius iudicare, & non facilis venia praua dixisse de rectis. Osculabantur quidam mihi manus, & ore vipereo detrahebant. Dolebant labijs, corde gaudebant. Dicant quid unquam in me aliter senserunt, quàm quod Christianum decebat? Nihil mihi obijcitur, nisi sexus meus. Et hoc nunquam obijceretur, nisi cùm Hierosolymam Paula proficiscitur. Item: Antequam domum sanctæ Paulæ noscerem, totius in me urbis studia consonabant. Omnium pene iudicio dignus summo sacerdotio decernebar. Sed postquam eam pro suo merito sanctitatis venerari, colere, suscipere * cæpi; omnes me illico deseruere virtutes. Et post aliqua: Saluta, inquit, Paulam & Eustochium, velint nolint, in Christo meas. Legimus & Dominum ipsum tantam beatæ meretrici familiaritatem exhibuisse, ut qui eum inuitauerat Phariseus, ob hoc iã penitus de ipso diffideret, apud se dicens: Hic si esset Propheta, sciret utique quæ & qualis est quæ tangit eum. Quid ergo mirum, si pro lucro talium animarum ipsa Christi membra eius incitata exemplo propriæ famæ detrimentum non effugiunt? Quod quidem Origenes, ut dictum est,*

est, cum cuperet euitare, grauius sibi corporis detrimentum inferre substinuit. Nec solum in doctrina vel exhortatione seminarum mira sanctorum Patrum charitas innotuit, verum etiam in earum consolatione ita vehemens nonnunquam extitit, ut ad earum dolorem leniendum nonnulla fidei aduersa promittere mira eorum compassio videatur. Qualis quidē illa est beati Ambrosij cōsolatio, quā super morte Valētiniani Imperatoris sororibus eius scribere ausus est, & eius qui cathecumenus sit defunctus salutem adstruere. Quod longē à Catholica fide atque Evangelica veritate videtur dissidere. Non enim ignorabant quā accepta Deo semper extiterit virtus infirmioris sexus. Vnde & cum innumeras videamus virgines matrem Domini in huius excellētiæ proposito sequi, paucos agnoscimus viros huius virtutis gratiam adeptos; ex qua, quocumque ierit, ipsum sequi Agnum valerent. Cuius quidem zelo virtutis cum nonnullæ sibi manu *Apoc. 14.* inferrent, ut quam Deo vouerant integritatem etiam carnis conseruarent; non solum hoc in eis non est reprehensum, sed apud plerosque hæc ipsarum martyria titulos Ecclesiarum meruerunt. Desponsatæ quoque virgines, si antequam viris suis carnaliter misceantur Monasterium decreuerint eligere, & homine reprobato sponsum sibi Deum efficere, liberā in hoc habent facultatem, quam nequaquam viris legimus indultam. Quarum etiam pleræque tanto ad castimoniam *Deuter. 22.* zelo sunt accensæ, ut non solum contra legis decretum pro custodienda castitate virilem præsumerent habitum, verum etiam inter Monachos tantis præminerent virtutibus, ut Abbates fieri mererentur. Sicut de beata legimus Eugenia, *In uitis Pat* quæ sancto etiam Heleno Episcopo conscio, imò iubente virilem habitum sumpsit, & ab eo baptizata Monachorum collegio est sociata.

HÆC ad nouissimarum * petitionum tuarum primam, * *al. petitionē nouissimarum* soror in Christo charissima, me satis rescripsisse arbitror; de authoritate videlicet Ordinis vestri, & insuper de commendatione propriæ dignitatis, ut tanto studiosius vestræ professionis propositum amplectamini, quantò eius excellentiam amplius noueritis. Nunc ut secundam quoque Domino annuente perficiam, vestris id meritis & orationibus obtineam, VALE.

EPISTOLA VIII.

Quæ est eiusdem PETRI ad HELOISSAM,
Institutio, seu Regula Sanctimonialium.

ARGVMENTVM.

Cum duo ab Heloissa rogatus fuisset Abaelardus, alteri quidem eorum superiore respondit Epistola: alterum nunc exequitur. Si quidem petitionis Heloisse alterum caput fuerat, ut Paracletensibus Monachabus Regulam scriberet; quod ipse hoc libro potius quàm Epistola luculenter perficit, plurimis sanctorum Patrum sententijs tanquam floribus adunatis. Tripertitum autem Tractatum vocat, quod in eo maxime de tribus præcipuis virtutibus Monasticis, continentia scilicet, paupertate voluntaria, & silentio tractet. Constituit toti earum Collegio septem officiales sorores, quæ cæteris tum in his quæ animarum sunt, tum in his, quæ ad temporalia suæ corporalia spectant, prudenter præfinc. Esuram carniū ternis diebus singulis hebdomadibus, & usum vini moderatum eis indulget: ac cætera ad vitæ Monasticae Ordinem pertinentia diligenter & congruè disponit.



ETITIONIS tuæ parte iam aliqua prout potuimus absoluta, superest Domino annuante de illa, quæ restat, parte tam tuis quàm spiritualium tuarum filiarum desiderijs complendis operam dare. Restat quippè iuxta prædictæ vestræ postulationis ordinem, aliquam vobis Institutionem, quasi quandam propositi vestri Regulam à nobis scribi, & vobis tradi; ut certius ex scripto quàm ex consuetudine habeatis quid vos sequi conveniat. Nos itaque partim consuetudinibus bonis, partim scripturarum testimonijs vel rationum nitentes fulcimètis, hæc omnia in vnum conferre decreuimus; ut spirituale Dei templum, quod estis vos, habens decorare, quasi quibusdā egregijs exornare picturis valeamus, & ex pluribus imperfectis quod possimus vnum Opusculum consummare. In quo quidē opere Zeuxim pictorem imitantes, ita facere instituimus in templo spiritali, sicut ille disposuit faciendum in corporali. Hunc enim, ut in Rhetorica sua Tullius meminit, Crotoniataæ ascuerunt ad quoddam templum, quod religiosissimè colebant, excellentissimis picturis decorandum. Quod ut diligentius faceret, quinque sibi virgines pulcherrimas de populo illo elegit, quas sibi pingenti assistentes intuens, earum

pulchritudinem pingendo imitaretur. Quod duabus de
 causis factum esse credibile est. Tum videlicet quia, ut prædi- *Ibidem.*
 ctus meminit Doctor, maximam peritiam in depingendis mu-
 lieribus pictor ille adeptus fuerat, tum etiam quia naturali-
 ter puellaris forma elegantior & delicatior virili compo-
 sitione * censetur. Plures autem virgines ab eo eligi supra me- * *al. com-*
 moratus Philosophus ait, quia nequaquam credidit in vna *pactione*
 se reperire posse puella, membra omnia æqualiter formo-
 sa, nullique vnquam à natura tantam pulchritudinis gra-
 tiam esse collatam, ut æqualem in omnibus mēbris pulchri-
 tudinem haberet, ut nihil ex omni parte perfectum in com-
 positione corporum ipsa expoliret, tanquam vni sic omnia
 commoda conferret, ut non haberet quod cæteris largiretur.
 Sic & nos ad depingendam animæ pulchritudinem, & Spon-
 sæ Christi describendam perfectionem, in qua vos tanquam
 speculo quodam vnius spiritalis virginis semper præ oculis
 habitæ decorem vestrum vel turpitudinem deprehendatis:
 proposuimus ex multis sanctorum Patrum documentis vel
 consuetudinibus Monasteriorum optimis vestram instruere
 conuersationem, singula quæque prout memoriæ occurre-
 rint delibando, & quasi in vnum fasciculum congregando,
 quæ vestri propositi sanctitati congruere videbo. Nec solum
 quæ de Monachabus, verum etiam quæ de Monachis institu-
 ta. Quippe sicut nomine & continentia professione nobis
 estis coniunctæ, ita & ferè omnia nostra vobis competunt in-
 stituta. Ex his ergo, ut diximus, plurima quasi quosdam flores
 decerpendo, quibus vestra lilia castitatis adornemus, multo
 maiore studio describere debemus virginem Christi, quàm
 prædictus Zeuxis depingere simulachrum idoli. Et ille qui-
 dem quinque virgines, quarum speciem imitaretur, suffice-
 re credidit. Nos verò pluribus Patrum documentis exube-
 rantem copiam habentes, auxilio freti diuino perfectius vo-
 bis opusculum relinquere nō desperamus: quo ad sortem vel
 descriptionem illarum quinque prudentium virginum per- *Matth. 25.*
 tingere valeatis, quas in depingenda virgine Christi Domi-
 nus nobis in Euangelio proponit. Quod ut possimus sicut vo-
 lumus, vestris orationibus impetremus, Valete in Christo,
 sponsæ Christi.

TRIPERTITVM instructionis vestrae Tractatum fieri

R ij

Luc. 12.

Matth. 19.

Matth. 12.

1. Cor. 7.

Luc. 10.

Matth. 23.

Luc. 9.

Ibi lera.

Luc. 14.

decreuimus, in describenda atque munienda religione vestra, & diuini obsequij celebratione disponenda, in quibus religionis monasticæ summam arbitror consistere: vt videlicet continenter, & sine proprietate viuatur, ac silentio maxime studeatur. Quod quidem, iuxta Dominicam Euangelicæ regulæ disciplinam, lumbos præcingere, omnibus renūciare, otiosum verbum cauere. Continentia vero castitatis illa est, quam suadens Apostolus ait: *Quæ innupta est & virgo, cogitat quæ Domini sunt, vt sit sancta corpore & spiritu.* Corpore, inquit, toto, non vno membro, vt ad nullam scilicet lasciuiam in factis vel in dictis eius aliquod membrum declinet. Spiritu verò tunc sancta est, quando eius mentem nec consensus inquinat, nec superbia inflat: sicut illarum quinque fatuarum virginum, quæ dum ad vendentes oleum recurrerent, extra ianuam remanserunt. Quibus iam clausa ianua frustra pulsantibus & clamentibus, Domine, Domine aperi nobis, terribiliter Sponsus ipse respondet: *Amen dico vobis, nescio vos.* Tunc autem relictis omnibus nudum Christum nudi sequimur, sicut sancti fecerunt Apostoli, cum propter eum non solum terrenas possessiones aut carnalis propinquitatis affectiones, verumetiam proprias postponimus voluntates: vt non nostro viuamus arbitrio, sed Prælati nostri regamur imperio, & ei qui nobis loco Christi præsidet tanquam Christo penitus pro Christo subiiciamur. Talibus enim ipsemet dicit: *Qui vos audit, me audit; & qui vos spernit, ipse me spernit.* Qui si etiam, quod absit, malè viuat, cum benè præcipiat; non est tamen ex vitio hominis sententia contemnenda Dei. De quolibet ipsemet præcipit, dicens: *Quæ dixerint vobis seruate, & facite: secundum verò opera eorum nolite facere.* Hanc autem ad Deum spiritalem à seculo conuersionem ipsemet diligenter describit, dicens: *Nisi quis renunciauerit omnibus quæ possidet, non potest meus esse discipulus.* Et iterum: *Si quis venit ad me, & non odit patrem suum, aut matrem, & uxorem, & filios, & fratres, & sorores, adhuc autem & animam suam, non potest meus esse discipulus.* Hoc autem est odire patrem vel matrem, affectiones carnalium propinquitatum nolle sequi; sicut & odire animam suam est voluntatem propriam sequi nolle. Quod alibi quoque præcipit, dicens: *Si quis vult post me venire, abneget semetipsum, & tollat crucem suam, & sequatur me.* Sic enim propinquantes

post eum venimus, hoc est eum maximè imitando sequimur, qui ait : *Non veni facere voluntatem meā, sed eius qui misit me.* Ac si diceret, cuncta per obedientiam agere. Quid enim, *abneget semetipsum*, nisi carnales affectiones propriamque voluntatē postponere, & alieno, non suo regendum arbitrio se committere? Et sic profectò crucem suam non ab alio suscipit, sed ipsemet tollit; per quam scilicet ei mundus crucifixus sit, & ipse mundo: cū spontaneo propriæ professionis voto mundana sibi & terrena desideria interdicit, quod est voluntatē propriam non sequi. Quid enim carnales aliud appetunt, nisi implere quod volunt? Et quæ est terrena delectatio, nisi propriæ voluntatis impletio, etiam quando id quod volumus labore maximo siue periculo agimus? Aut quid est aliud crucem ferre, id est cruciatum aliquem sustinere, nisi contra voluntatem nostram aliquid fieri, quantumcumque illud videatur facile nobis esse vel vtile? Hinc alius Iesus longè inferior in Ecclesiastico admonet, dicens: *Post concupiscentias tuas non eas, & à voluntate tua auertere. Si præstes animæ tuæ concupiscentias eius, faciet te in gaudium inimicis tuis.* Cū verò ita tam rebus nostris quàm nobis ipsis penitus renuntiamus, tūc verè omni proprietate abiecta vitam illam Apostolicam inimus, quæ omnia in commune reducit, sicut scriptū est: *Multitudinis credentium erat cor vnum & anima vna.* Nec quisquam eorum, quæ possidebat, aliquid suum esse dicebat. Sed erant illis omnia communia. Diuidebatur autem singulis prout cuique opus erat, non enim æqualiter omnes egebāt: & ideo non æqualiter omnibus distribuebatur, sed singulis prout opus erat. Cor vnum fide, quia corde creditur. Anima vna, quia eadem ex charitate voluntas adinuicem, cū hoc vnusquisque alij quod sibi vellet, nec sua magis quàm aliorum commoda quæreret, vel ad communem utilitatem ab omnibus omnia referrentur: nemine quæ sua sunt, sed quæ Iesu Christi quarente seu affectante. Alioquin nequaquam sine proprietate viueretur, quæ magis in ambitione, quàm in possessione consistit. Otiosum verbum seu superfluum idem est quod multiloquium. Vnde Augustinus Retractionū lib. 1. *Absit, inquit, ut multiloquiū deputem quando necessaria dicuntur,* In proxm. *quantalibet sermonum multitudine ac prolixitate dicantur.* Hinc Proverb. 10. autem per Salomonem dicitur: *In multiloquio non decrit pecca-*

- rum. Qui autem moderatur labia sua, prudentissimus est. Multum ergo cauendum est in quo peccatum non deest, & tantò studiosius huic morbo prouidendum est, quantò periculosius & difficilius euitatur. Quod beatus prouidens Benedictus:*
- Regul. c. 42. Omni tempore, inquit, silentio debent studere Monachi. Plus quippè esse constat silentio studere quàm silentium habere. Est enim studium vehemens applicatio animi ad aliquid gerendum. Multa vero negligenter agimus vel inuiti, sed nulla studiosè nisi volentes vel intenti. Quantum verò difficile sit vel vtile linguam refrenare, Apostolus Iacobus diligenter attendens, ait: In multis enim offendimus omnes. Si quis in verbo*
- Iacob. 13. non offendit, hic perfectus est vir. Idem ita: Omnis natura bestiarum, & volucrum, & serpentum, & ceterorum, domantur, & domita sunt à natura humana. Qui simul considerans quanta sit in lingua malorum materia, & omnium bonorum consumptio, suprà sic & infrà loquitur: Lingua quidem modicum membrum, quantus ignis, quàm magnam siluam incendit: uniuersitas iniquitatis, inquietum malum, plenum veneno mortifero. Quid autem veneno periculosius vel cauendum amplius? Sicut ergo venenum vitam extinguit, sic loquacitas religionem penitus euertit. Vnde idem superiùs: Si quis putat se, inquit, religiosum esse, non refrenans linguam suam, sed seducens cor suum,*
- Iacob. 1. huius vana est religio. Hinc & in Prouerbijs scriptum est. Sicut urbs patens, & absque murorum ambitu: ita vir qui non potest in loquendo cohibere spiritum suum. Hoc ille senex diligenter considerabat, qui de loquacibus fratribus ei in via sociatis Antonio dicente, Bonos fratres inuenisti tecum Abba: Respondit,*
- Prouer. 25. Boni sunt siquidem, sed habitatio eorum non habet ianuam. Qui cumque vult intrat in stabulum, & soluit asinum. Quasi enim ad præsepe Domini anima nostra ligatur, sacræ se meditationis in eo quadam ruminatione reficiens, à quo quidem præsepi soluitur, atque huc & illuc toto mundo per cogitationes discurrit, nisi eam clausura taciturnitatis retineat. Verba quippè intellectum animæ immittunt, vt ei quod intelligit intendat, & per cogitationem hæreat. Cogitatione verò Deo loquimur, sicut verbis hominibus. Dumque huc verbis hominum intendimus, necesse est vt indè ducamur. Nec Deo simul & hominibus intendere valemus. Nec solum otiosa, verum etiam quæ utilitatis aliquid habere videntur vitanda*
- Vit. patr. part. 2. Lib. de continent.*

sunt verba, eò quodd facile à necessarijs ad otiosa , ab otiosis ad noxia veniatur. *Lingua* quippè, vt Iacobus , ait, *inquietum malum*, quo cæteris minor est aut subtilior membris , tantò mobilior & cæteris motu lacescentibus , ipsa cùm non mouetur fatigatur , & quies ipsa ei fit onerosa. Quæ quanto in nobis subtilior , & ex mollitie corporis nostri flexibilior, tantò mobilior & in verba pronior existit , & omnis malitiæ seminarium patet. Quod in vobis præcipuè vitium Apostolus notans, omninò feminis in Ecclesia loqui interdicit , nec de ijs etiam quæ ad Deum pertinent, nisi domi viros interrogare permittit. Et in ijs etiam discendis, vel quibuscumque faciendis, silentio eas præcipuè subijcit, Timotheo super his ita scribens: *Mulier in silentio discat cum omni subiectione. Docere autem mulieri non permitto, neque dominari in virum, sed esse in silentio.* Quod si laicis & coniugatis feminis ita de silentio prouiderit, quid vobis est faciendum? Qui rursus eidem cur hoc præceperit innuens, verbosas eas & loquentes cùm non oportet arguit. Huic igitur tantæ pesti remedium aliquod prouidentes , his saltem penitus locis vel temporibus linguam continua taciturnitate domemus : in oratione scilicet , in claustro , dormitorio , refectorio, & in omni comestione & coquina : & post Completorium deinceps hoc maximè ab omnibus obseruetur. Signis verò his locis vel temporibus, si necessarium est , pro verbis vtamur. De quibus etiam signis docendis seu addiscendis diligens habeatur cura , per quæ etiam si verbis quoque opus est, ad colloquium inuitetur loco congruo, & ad hoc instituto. Et expletis breuiter verbis illis necessarijs , redeatur ad priora , vel quod opportunum est fiat. Nec tepidè corrigatur verborum aut signorum excessus, sed verborum præcipuè, in quibus maius imminet periculum. Cui profectò multo magnoque periculo & beatus Gregorius succurrere vehementer cupiens, vi r. *Moralium* lib. sic nos instruit: *Dum otiosa, inquit, verba cauere negligimus, ad noxia peruenimus. Hinc seminantur stimuli, oriuntur rixæ, accendantur faces odiorum, pax tota extinguitur cordium.* Vnde benè per Salomonem dicitur: *Qui dimittit aquam, caput est iurgiorum.* Aquam quippe dimittere , est linguam in fluxum eloquij relaxare. Quo contrà & in bonam partem asserit dicens: *Aqua profunda ex ore viri.* Qui ergo dimittit aquam, caput est

Cap. 18. in
cap. 6. lib.

Prouer.

iurgiorum : quia qui linguam non refrenat, concordiam dissipat. Vnde scriptum est : *Qui imponit stulto silentium, iras mitigat.* Ex quo nos manifestè admonet, in hoc præcipuè vitio corrigendo districtissimam adhibere censuram : ne eius vindicta vllatenus differatur, & per hoc maximè religio periclitetur. Hinc quippe detractiones, lites, conuitia, & nonnunquam conspirationes, & coniurationes germinantes, totum religionis ædificium non tam labefactant quàm euertunt. Quod quidem vitium cùm amputatum fuerit, non omnino fortasse prauæ cogitationes extinguuntur, sed ab alienis cessabunt corruptelis. Hoc vnum vitium fugere, quasi religioni

* al. arbitrius
Vit. Patr.
part. 2. lib.
de continent.

sufficere arbitraretur * Abbas Macharius, admonebat, sicut scriptum est, his verbis : *Abbas Macharius maior in Scyti dicebat, fratribus, Post Missas Ecclesias fugite fratres. Et dixit ei unus frater, Pater ubi habemus fugere amplius à solitudine ista ? Et ponebat digitum suum in ore suo, dicens : Istud est quod fugiendum dico. Et sic intrabat in Cellam suam, & claudens ostiū sedebat solus.* Hæc verò silentij virtus, quæ, vt ait Iacobus, perfectum hominem reddit, & de qua Esaias prædixit, *Cultus iustitiæ silentium*, tanto à sanctis Patribus feruore est arrepta, quòd sicut scriptum est, Abbas Agatho per triennium lapidem in ore suo mittebat, donec taciturnitatem disceret.

Iacobi 3.
Esai. 32.

Vit. Patr.
part. 2.

Tom. 1. ep.
4. & 13.

QVAMVIS locus non saluet, multas tamen præbet oportunitates ad religionem facilius obseruandam, & tutius muniendam. Et multa religionis auxilia vel impedimenta ex eo consistunt. Vnde & filij Prophetarum, quos, vt ait Hieronymus, Monachos legimus in veteri Testamento, ad solitudinis secretum se transtulerunt, præter fluëta Iordanis casulas suas constituentes. Ioannes quoque & discipuli eius, quos etiam propositi nostri principes habemus, & deinceps Paulus, Anthonius, Macharius, & qui præcipuè in nostro floruerunt proposito, tumultum seculi & plenum tentationibus mundum fugientes, ad quietem solitudinis lectulum suæ contemplationis contulerunt ; vt videlicet Deo possent sincerius vacare. Ipse quoque Dominus, ad quem nullus tentationis motus accessum habebat, suo nos erudiens exemplo, cùm aliqua vellet agere præcipuè secreta petebat, & populares declinabat tumultus. Hinc ipse Dominus nobis quadraginta dierum abstinentia heremum consecrauit, turbas in heremo refecit,

& ado-

& ad orationis puritatem non solum à turbis, verumetiam ab Apostolis secedebat. Ipsos quoque Apostolos & in monte seorsum instruxit, atque constituit, & transfigurationis suæ gloria solitudinem insigniuit, & exhibitione resurrectionis suæ discipulos communiter in monte lætificauit, & de monte in cœlum ascēdit, & cætera quæcumque magnalia in solitudinibus vel secretis operatus est locis. Qui etiam Moyse vel antiquis patribus in solitudinibus apparens, & per solitudinē ad terram promissionis populum transducens, ibique populo diu detento legem tradens, manna pluens, aquam de petra educens, crebris apparitionibus ipsum consolans, & mirabilia operans, patenter docuit quantam eius singularitas solitudinem pro nobis amet, cui purius in ea vacare possumus. Qui etiam libertatem mysticè onagri solitudinem amantis diligenter describens, & vehementer approbans, ad beatum Iob Iob. 32. loquitur, dicens: *Quis dimisit onagrum liberum, & vincula eius quis soluit? Cui dedit in solitudine domum, & tabernacula eius in terra falsuginis. Contemnit multitudinem ciuis, clamorem exactoris non audit, circumspicit montes pascuæ suæ, & virentia quæque perquirat.* Ac si apertè dicat, quis hoc fecit nisi ego? Onager quippè, quem siluestrem asinum vocamus, Monachus, est, qui secularium rerum* * al. virorū
& in aliq-
vitiis vinculis absolutus ad tranquillam vitæ solitariae libertatem se contulit, & seculum fugiens in seculo non remansit. Hinc in terra falsuginis habitat, cū membra eius per abstinentiam sicca sunt & arida. Clamorem exactoris non audit, sed vocem, quia ventri non superflua, sed necessaria impendit. Quis enim tam importunus exactor, & quotidianus exactor quàm venter? Hic clamorem, id est immoderatam postulationem habet in superfluis & delicatis cibis, in quo minimè est audiendus. Montes pascuæ sunt illi vitæ vel doctrinæ sublimium Patrum, quas legendo & meditando reficimur. Virentia quæque dicit vniuersa vitæ cælestis & immarcessibilis scripta. Ad quod nos præcipuè beatus Hieronymus exhortans, sic Heliodoro scribit Monacho: *Interpretare vocabulum Monachi, hoc est nomen tuum. Quid facis in turba qui solus es?* Idem & nostram à Clëricorum vita distinguens, ad Paulum Presbyterum scribit his verbis: *Si officium* To. 1. ep. 1.
vis exercere Presbyteri, si Episcopatus te vel opus vel onus forte delectat, vive in urbibus & castellis, & aliorum salutem fac lucrum To. 1. ep. 19.

animæ tuæ. Si cupis esse quod diceris, Monachus, id est solus, quid facis in urbibus, quæ utique non sunt solorum habitacula, sed multorum? Habet vnumquodque propositum principes suos. Et ut ad nostram veniamus, Episcopi & Presbyteri habeant ad exemplum Apostolos, & Apostolicos viros, quorum honorem possidentes, habere nitantur & meritum. Nos autem habeamus propositi nostri Principes Paulos, Anthonios, Hilariones, Macharios. Et ut ad scripturarum materiam redeam noster princeps Helyas, noster Helisæus, nostri duces & filij

4. Reg. 6. Prophetarum, qui habitabant in agris & solitudine, & faciebant sibi tabernacula præter fluentia Iordanis. De ijs sunt & illi filij Rechab qui vinum & siceram non bibebant, qui morabantur in tentorijs, qui Dei per Hieremiam voce laudantur, quod non deficiat de stirpe eorum vir stans coram Domino.

Hierem. 15.

*Vit. Patr.
par. 2. lib. de
quiete.*

Et nos ergo, ut coram Domino stare, & eius obsequio parati magis valeamus adistere, tabernacula nobis erigamus in solitudine, ne lectulum nostræ quietis frequentia hominum concutiat, quietem turbet, ingerat tentationes, mentem à sancto euellat proposito. Ad quam quidem liberam vitæ tranquillitatem beatum Arsenium Domino dirigente omnibus in vno manifestum datum est exemplum. Vnde & scriptum est: Abbas Arsenius cum adhuc esset in palatio, oravit ad Dominum, dicens: Domine dirige me ad salutem. Et venit ei vox dicens: Arseni fuge homines, & sanaberis. Idem ipse: Ac discedens ad Monachalem vitam rursum oravit eundem sermonem, dicens: Domine dirige me ad salutem. Audiuissetque vocem dicentem Asibi: Arseni fuge, tace, quiesce. Hæ enim sunt radices non peccandi. Ille igitur hac vna diuini præcepti regula instructus non solum homines fugit, sed eos etiam à se fugauit. Ad quem Archiepiscopo suo cum quodam iudice quadam die venientibus, & ædificationis sermonem ab eo requirentibus, ait: Et si dixeris vobis, custodietis? Illi autem promiserunt se custodire. Et dixit eis: Vbicumque audieritis Arseniam, approximare nolite. Alia iterum vice Archiepiscopus eum visitans, misit primò videre si aperiret. Et mandauit ei, dicens: Si venis aperio tibi, sed si tibi aperuero, omnibus aperio, & tunc iam ultra hic non sedeo. Hæc audiens Archiepiscopus, dixit: Si enim persecuturus vado, nunquam vadam ad hominem sanctum. Cuius etiam sanctitatem cuidam Romanæ matronæ visitanti, dixit: Quomodo presumpsisti

tantam nauigationem assumere? Nescis quia mulieres, & non debes exire quoquam, aut ut vadas Romam, & dicas alijs mulieribus, quia vidi Arsenium; & faciant mare viam mulierum venientium ad me? Illa autem dixit: Si voluerit me Dominus reuerti Romam, non permitto aliquem venire huc. Sed ora pro me, & memor esto mei semper. Ille autem respondens, dixit ei: Oro Deum ut deleat memoriam tui de corde meo. Quæ audiens hæc, egressa est turbata. Hic quoque, sicut scriptum est, à Marco Abbate requisitus cur fugeret homines, respondit: Scit Deus quia diligo homines, sed cum Deo pariter & hominibus esse non possum. Intantum verò sancti Patres conuersationem hominum atq; notitiã abhorrebant, ut nonnulli eorū ut illos à se penitus remouerent, insanos se fingerent; &, quod dictu mirabile est, hæreticos etiã se profiterentur. Quod si quis voluerit, legat in vitis Patrū de Abbate Symone, qualiter se præparauit iudici Prouinciæ ad se venienti: qui se videlicet sacco cooperiens, & tollens in manu sua panem & caseum, sedit in ingressu cellæ suæ, & cœpit manducare. Legat & de illo Anachoreta, qui cū quosdā sensisset obuiam sibi cum lampadibus occurrere, exspolians se vestimenta sua, misit in flumen; & stans nudus cœpit ea lauare: Ille autem qui ministrabat ei hæc videns, erubuit, & rogauit homines, dicens: Reuertimini, quia senex noster sensum perdidit. Et veniens ad eum dixit ei: Quid hic fecisti Abba? Omnes enim qui te viderunt dixerunt, quia demonium habet senex. Ille autem respondit. Et ego hoc volebam audire. Legat insuper & de Abbate Moyse, qui ut à se penitus iudicem prouinciæ remoueret, surrexit ut fugeret in palude. Et occurrit ei ille iudex cum suis, & interrogauit eum, dicens: Dic nobis senex ubi est Cella Abbatis Moyse? Et dixit eis: Quid vultis eum inquirere? homo fatuus est & hæreticus. Quid etiam de Abbate Pastore, qui nec se à iudice prouinciæ videri permisit, ut sororis suæ supplicantis filium de carcere liberaret? Ecce potentes seculi cum magna veneratione & deuotione sanctorum præsentiam postulant, & illi etiam cum summo sui dedecore eos penitus à se repellere student. Ut autem sexus etiam vestri in hac re virtutem cognoscatis, quis dignè prædicare sufficiat virginem illam, quæ beatissimi quoque Martini visitationem respuit, ut vacaret contemplationi? Vnde ad Oceanum monachum Hieronymus scribens: In beati, inquit, Martini vita le-

Vit. Patr.
par. 4. cap. de
eterno sp. par.
2. de chari-
tate.

Vit. Patr.
par. 2. lib.
de ostentat.

Ibidem, §.
III. & par.
4. cōtra v'a-
uā gloriā.

Vit. Patr.
par. 2. lib. de
ostentat.

Ibidem.

Tom. I.
Epist. 51.

*al. xenium

Cant. 5.

gimus commemorasse Sulpitium, quod transiens sanctus Martinus virginem quandam moribus & castitate precelsum cupiens salutare, illa noluit, sed exenium^{*} misit, & per fenestram respiciens, ait sancto viro: Ibi pater ora, quia nunquam à viro sum visitata. Quo audito gratias egit Deo sanctus Martinus, quod talibus imbuta moribus castam custodierit voluntatem. Benedixit eam & abiit lætitia plenus. Hæc reuera de contemplationis suæ lectulo surgere dedignata vel verita, pulsanti ad ostium amico parata erat dicere: *Lani pedes meos, quomodo inquinabo illos?* O quantæ sibi imputarent iniuriæ Episcopi vel Prælati huius temporis, si hanc ab Arsenio vel ab hac virgine repulsam pertulissent! Erubescant ad ista, si qui nunc in solitudine moratur Monachi, cum Episcoporum frequētia gaudēt, cum eis proprias, in quibus suscipiātur, fabricant domos: cum seculi potētes, quos turba comitatur, vel ad quos confluit, non solum non fugiunt, sed adsciscūt, & occasione hospitum domos multiplicantes, quam quæsierunt solitudinem redigunt in ciuitatem. Hac profectō antiqui & callidi tentatoris machinatione omnia ferè huius temporis Monasteria, cum prius in solitudine constituta fuissent, ut homines fugerentur, postea feruore religionis refrigerescēte homines adsciuerunt, & seruos atque ancillas congregantes, villas maximas in locis Monasticis construxerunt; & sic ad seculum redierunt, imò ad se traxerunt seculum. Qui se miseris maximis implicantes, & maximæ seruituti tam Ecclesiasticarum quàm terrenarum potestatum alligantes, dum otiosè appeterent viuere, & de alieno victitare labore, ipsum quoque Monachi, hoc est solitarij nomen pariter amiserunt & vitam. Qui etiam sæpè tantis vrgentur incommodis, ut dum suos & res eorum tutari laborant, proprias amittant, & fræquenti incendio vicinarum domorū ipsa quoque Monasteria cremantur. Neo sic tamen ambitio refrenatur. Hi quoque distractionem Monasterij qualemcumque non ferentes, ac per villas, castella, ciuitates sese dispergentes, binique vel terni, aut etiam singuli sine aliqua obseruatione regulæ victitantes; tantò secularibus deteriores sunt hominibus, quantò à professione sua ampliùs apostatantur. Qui habitationum quoque suarū sicut & sua abutentes, Obediēcias loca sua nominant, vbi nulla regula tenetur, vbi nulli rei nisi ventri & carni obeditur, vbi cum propinquis vel familia;

ribus suis manentes, tantò liberiùs agunt quod volunt, quantò minus à conscientijs suis verentur. In quibus profectò impudentissimis apostatis excessus illos criminales esse dubium non est, qui in cæteris veniales sunt hominibus. Qualiù omninò vitam non solum attingere, sed nec audire sustineatis. Vestræ verò infirmitati tantò magis est solitudo necessaria, quantò carnalium tentationum bellis minus hic infestamur, & minus ad corporalia per sensus euagamur. Vnde & beatus Antonius: *Qui sedet, inquit, in solitudine, & quiescit, à tribus vellus eripitur, id est auditus, locutionis, & visus: & contrà unum tantummodò habebit pugnam, id est cordis.* Has quidem vel cæteras Heremi commoditates insignis Ecclesiæ Doctor Hieronymus diligenter attendens, & ad eas Heliodorum Monachum vehementer adhortans, exclamat dicens: *O heremus familiari Deo gaudens! Quid agis frater in seculo, qui maior es mundo?* Nunc verò quia ubi construi Monasteria conuenit disseruimus: qualis & ipsa loci positio esse debeat ostendamus. Ipsi autem Monasterij loco constituendo, sicut quoque beatus consuluit Benedictus, ita si fieri potest prouidendum est, ut intra Monasterij septa contineantur illa maximè quæ Monasterijs sunt necessaria, id est hortus, aqua, molendinum, pistrinum cum furno, & loca quibus quotidiana sorores exerceant opera, ne foras vagandi detur occasio.

Vit. Pat. par. 2. lib. de quiete.

Tom. 1. Epist. 1.

Regul. c. 66.

S I C V T in castris seculi, ita & in castris Domini, id est Congregationibus Monasticis constituendi sunt, qui præ sint cæteris. Ibi quippè imperator vnus, ad cuius nutum omnia gerantur, præest omnibus. Qui etiam pro multitudine exercitus vel diuersitate officiorum sua nonnullis impertiens onera, quosdam sub se adhibet magistratus, qui diuersis hominum cateruis aut officijs prouideant. Sic & in Monasterijs fieri necesse est, ut ibi vna omnibus præsit matrona, ad cuius considerationem atque arbitrium omnes reliquæ omnia operentur, nec vlla ei in aliquo præsumat obistere, vel etiam ad aliquod eius præceptum murmurare. Nulla quippè hominum Congregatio vel quantulacumque domus vnus familia consistere potest incolumis, nisi vnitas in ea conseruetur: ut videlicet totum eius regnum in vnus personæ magisterio consistat. Vnde & Arca typum Ecclesiæ gerens

* al. ministerio

cùm multos tam in longo quàm in lato cubitos haberet , in
Proverb. 18. vno consummata est. Et in *Proverbijs* scriptum est : *Propter*
Matth. 1. *peccata terra multi Principes eius.* Vnde etiam Alexandro mor-
 tuo, multiplicatis Regibus mala quoque multiplicata sunt.
 Et Roma pluribus communicata Reſtoribus concordiam
 tenere non potuit. Vnde Lucanus in primo sic meminit,

Lucanus
lib. 1.

————— *Tu causa malorum*
Facta tribus Dominus Roma, nec unquam
In turbam miſſi feralia fœdera regni.

Et poſt pauca ,

————— *Dum terra fretum, terramque leuabit*
Aer; & longi voluent Titana labores,
Noxque diem cœlo totidem per ſigna ſequetur:
Nulla fides regni ſocijs, omniſque poteſtas
Impatiens conſortis erit —————

Tales profectò & illi erant diſcipuli ſancti Frontonij Abbatis,
 quos ipſe in ciuitate, in qua natus eſt, cùm uſque ad ſeptua-
 ginta congregaſſet, & magnam ibidem gratiam tam apud
 Deum quàm apud homines adeptus eſſet, relicto Mona-
 ſterio ciuitatis cum mobilibus rebus nudos ſecum ad here-
 mum traxit. Qui poſtmodum more Iſraelitici populi aduer-
 ſus Moyſem conquerentis, quòd eos etiam de Ægypto reli-
 ctis ollis carniū & abundantia terræ in ſolitudinem eduxiſ-
 ſet, murmurantes incallum dicebant: *Nunquid ſola in heremo*
caſtitas, quæ in urbibus non eſt? Cur itaque non in ciuitatem reuerſi-
mur, de qua ad tēpus exiuiſmus? An in heremū ſolum Deus exaudiet
orantes? Quis cibo Angelorum viuat? Quem pecorum & ferarum de-
lectat fieri ſocium? Quanta nos habet neceſſitas hic morari? Cur itaque
non regreſſi in locum, in quo nati ſumus, benedicimus Dominum?
 Hinc & Iacobus admonet Apoſtolus: *Nolite, inquit, plures ma-*
giſtri fieri fratres mei, ſcientes quoniam maius iudicium ſumitis.
To. 1. ep. 4. Hinc quoque Hieronymus ad Ruſticū Monachum de inſti-
 tutione vitæ ſcribens: *Nulla, inquit, ars abſque magiſtro diſcitur.*
Etiā muta animalia & ferarum greges ductores ſequuntur ſuos. In
apibus unam præcedentem reliquæ ſubſequuntur. Grues unum ſequū-
tur ordine literato. Imperator unus, iudex unus prouinciæ. Roma ut
condita eſt duos fratres ſimul habere reges non potuit, & parricidio
dedicatur. In Rebecca utero Eſau & Iacob bella geſſerunt. Singuli
eccleſiarum Epifcopi, ſinguli Archipreſbiteri, ſinguli Archidiaconi,

Et omnis ordo Ecclesiasticus suis Rectoribus nititur. In naue unus gubernator. In domo unus Dominus. In quamuis grādi exercitu unus signum spectatur. Per hæc omnia ad illud tendit oratio, ut doceam te non tuo arbitrio dimittendum, sed viuere debere in Monasterio sub unius disciplina Patris consortioque multorum.

VT igitur in omnibus concordia seruari possit, vnā omnibus præesse conuenit, cui per omnia omnes obediant. Sub hac etiam quasi magistratus quosdam nonnullas alias personas, prout ipsa decreuerit, constitui oportet. Quæ quibus officijs ipsa præceperit, & quantum voluerit præsent, ut sint videlicet istæ quasi Duces vel Consules in exercitu Dominico: reliquæ autem omnes tanquam milites vel pedites, istarū cura eis præuidente, aduersus malignum eiusque satellites liberè pugnent. Septem verò personas ex vobis ad omnem monasterij administrationem necessarias esse credimus atque sufficere, Portariam scilicet, Cellerariam, Vestiariam, Infirmariam, Cantricem*, Sacristam, & ad extremum Diaconissam, quam nunc Abbatissam nominant. In his itaque castris, & diuina quadam militia sicut scriptum est, *Militia est vita hominis super terram: & alibi, Terribilis ut castrorum acies ordinata*, vicem imperatoris, cui per omnia obeditur ab omnibus, obtinet Diaconissa. Sex verò aliæ sub ea, quas dicimus Officiales, Ducum siue Consulū loca possident. Omnes verò reliquæ Moniales, quas vocamus claustrales, militum more diuinum peragunt expeditè seruitium. Conuersæ autem, quæ etiam seculo renunciantes, obsequio Monialium se dicarunt, habitu quodam religioso, non tamen monastico, quasi pedites inferiorem obtinent gradum.

* al. Cartatricem, sed malè.

Iob. 7.

N V N C verò superest Domino inspirāte huius militiæ gradus singulos ordinare, ut aduersus impugnationes dæmonū verè sit quod dicitur *castrorum acies ordinata*. Ab ipso, inquam, ut dictum est capite, quod Diaconissam dicimus, huius institutionis ducentes exordium, de ipsa primitus disponamus, per quam sunt omnia disponenda. Huius verò sanctitatem, sicut in præcedēti meminimus Epistola, beatus Paulus Apostolus Timotheo scribēs, quam eminētem & probatam oporteat esse diligenter describit, dicens: *Vidua eligatur non minus sexaginta annorum, quæ fuerit unius viri vxor, in operibus bonis testimonium habens, si filios educavit, si hospitio recepit, si sanctorum pe-*

1. Tim. 5.

des lauit, si tribulationem patientibus subministravit, si omne opus bonum subsequuta est. Adolescentes autē viduas deuota. Idē supra de Diaconissis, cū etiam Diaconorum institueret vitam: *Mulieres*, inquit, *similiter pudicas, non detrahentes, sobrias, fideles in omnibus*. Quæ quidem omnia quid intelligentiæ vel rationis habeant quantum æstimamus, Epistola præcedente nostra satis differuimus. Maximē cur eam Apostolus vnus viri & prouectæ velit esse ætatis. Vnde non mediocriter miramur quomodo perniciosa hæc in Ecclesia consuetudo inoleuit, vt quæ virgines sunt potius quàm quæ viros cognouerunt ad hoc eligantur, & frequenter iuniores senioribus præfician-
Eccles. 10. tur. Cū tamen Ecclesiastes dicat: *Vatibi terra, cuius Rex puer est*: Et cū illud beati Iob omnes pariter approbemus,
Iob, 12. *In antiquis est sapientia, & in multo tempore prudentia*. Hinc & in
Prouer. 16. Prouerbijs scriptum est: *Corona dignitatis senectus, quæ in vīs iustitiæ reperietur*. Et in Ecclesiastico: *Quàm speciosum canitie iudicium, & à Presbyteris cognoscere consilium. Quàm speciosa veterani sapientia, & gloriosus intellectus, & consilium, Corona senum*.
Eccles. 25. *Multa peritia & gloria illorum timor Dei*. Item: *Loquere maior natu, decet enim te. Adolescens loquere in tua causa vix cū necesse fuerit. Si bis interrogatus fueris, habeat caput responsum tuum. In multis esto quasi inscius, & audi tacens simul & querens, & loqui in medio magnatorum non presumas, & ubi sunt senes non multū loquaris*. Vnde & Presbyteri qui in Ecclesia populo præsunt seniores interpretantur, vt ipso quoque nomine quales esse debeant doceatur. Et qui Sanctorum vitas scripserunt, quos nunc Abbates dicimus senes appellabāt. Modis itaque omnibus prouidendum est vt in electione vel cōsecratione Diaconissæ consilium præcedat Apostoli, vt videlicet talis eligatur, quæ cæteris vita & doctrina præesse debeat, & ætate quoque morum maturitatem polliceatur, & quæ obediendo meruerit imperare, & operando magis quàm audiendo Regulam didicerit, & firmiter nouerit. Quæ si literata non fuerit, sciat se non ad Philosophicas scholas, vel disputationes Dialecticas, sed ad doctrinam vitæ & operum exhibitionem accommodari. Sicut de Domino scriptum est: *Qui capit facere & docere*, prius videlicet facere, postmodum docere. Quia melior atq; perfectior est doctrina operis, quàm sermonis; facti, quàm verbi. Quod diligenter attēdamus, vt scriptū est.

est. Dixit Abbas Ipitius *, *Ille est verè sapiens, qui factò suo alios* * Ipericius
docet, non qui verbis. Nec parum consolationis & confiden-
 tiæ super hoc affert. Attendatur & illa quoque beati Anto-
 nij ratio, qua verbosos confutavit Philosophos, eius videli-
 cet tanquam idiotæ & illiterati hominis magisterium irri-
 dentes. *Et respondete, inquit, mihi, quid prius est sensus, an lite-* Athanas. in
re; & quid cuius exordium est, sensus ex literis, an literæ oriuntur ex vita Ansen.
sensu? Illis asserentibus quia sensus esset author atque inuen-
 tor literarum, ait: *Igitur cui sensus incolumis est, hic literas non re-*
quirat. Audiat quoque illud Apostoli & confortetur in Do-
 mino: *Nonne stultam fecit Deus sapientiam huius mundi?* Et ite- 2. Cor. 1.
 rum: *Quæ stulta sunt mundi elegit Deus ut confundat sapientes, &* Ibidem.
infirma elegit Deus ut confundat fortia, & ignobilia mundi & con-
temptibilia elegit Deus, ut ea quæ non sunt tanquam ea quæ sunt de-
struat, ut non gloriatur omnis caro in conspectu eius. Non enim, si- 1. Cor. 4.
 cut ipse postmodum dicit, in sermone est regnum Dei, sed in
 virtute. Quod si de aliquibus melius cognoscendis ad scrip-
 turam reuertendum esse censuerit, à litteratis hoc requirere
 & addiscere non erubescat, nec in his literarum documen-
 ta contemnat; sed deuotè & diligenter suscipiat, cum ipse
 quoque Apostolorum Princeps coapostoli sui Pauli publicā Galat 2.
 correctionem * diligenter exceperit. Vt enim beatus quoque * al. correc-
 tionem
 meminit Benedictus, sæpè minori reuelat Dominus quod
 melius est. Vt autem amplius Dominicam sequamur proui-
 dentiam quam Apostolus quoque supra memorauit, nunquā
 de nobilibus aut potentibus seculi, nisi maxima incumbente
 necessitate, & certissima ratione, fiat hæc electio. Tales nam-
 que de genere suo facile confidentes, aut glorianes, aut præ-
 sumptuosæ, aut superbæ fiunt: & tunc maximè quando indi-
 genæ sunt, earum prælatio pernitiōsa sit Monasterio. Veren-
 dum quippe est ne vicinia suorum eam præsumptiorem red-
 dat, & frequentia ipsorum grauet aut inquietet monasteriū,
 atque ipsa per suos religionis perferat detrimentum, aut alijs
 veniat in contemptum: iuxta illud Veritatis, *Non est propheta*
sine honore nisi in patria sua. Quod beatus quoque prouidens
 Hieronymus, ad Heliodorum scribens, cum pleraque annu-
 merasset, quæ Monachis officiunt in sua morantibus patria:
Ex hac, inquit, supputatione illa summa nascitur, Monachum in
patria sua perfectum esse non posse. Perfectum esse autem nolle delin-

quere est. Quantum verò est animarum damnum, si minor in religione fuerit, quæ religionis præest magisterio? Singulis quippè subiectis singulas virtutes exhibere sufficit. In hac autem omnium exempla debent eminere virtutum, ut omnia quæ alijs præceperit proprijs præueniat exemplis; ne ipsa quæ præcipit moribus oppugnet, & quod verbis ædificat, factis ipsa destruat, & de ore suo verbum correctionis auferatur; cum ipsa in alijs erubescat corrigere, quæ constat eam committere. Quod quidem Psalmista ne ei eueniat Dominum precatur, dicens: *Et ne auferas de ore meo veritatem usquequaque.* Attendebat quippè illam grauissimam Domini increpationem, de qua & ipse alibi meminit dicens: *Peccatori autem dixit Deus; Quare tu enarras iustitias meas, & assumis testamentum meum per os tuum? Tu vero odisti disciplinam, & proiecisti sermones meos retro.* Quod studiose præcauens Apostolus; *Castigo, inquit, corpus meum, & in seruitutem redigo, ne fortè cum alijs predicauerim ipse reprobus efficiar.* Cuius quippè vita despicitur, restat ut & prædicatio vel doctrina contemnatur. Et cum curare quis alium debeat, si in eadem laborauerit infirmitate, rectè ipsi ab ægroto improperatur: *Medice cura teipsum.* Attendat sollicitè quisquis Ecclesiæ præesse videtur, quantam ruinam casus eius præbeat, cum ipse ad præcipitum secum pariter subiectos trahat. *Qui soluerit, inquit Veritas, unum de mandatis istis minimis, & docuerit sic homines, minimus vocabitur in regno cælorum.* Soluit quippè mandatum, qui contra agendo infringit ipsum, & exemplo suo corrumpens alios in cathedra pestilentiæ Doctor residet. Quod si quislibet hoc agens minimus habendus est in regno cælorum, hoc est in Ecclesia præsentī, quanti habendus est pessimus prælatus à cuius negligentia non suæ tantum, sed omnium subiectarum animarum sanguinem Dominus requirit? Vnde benè Sapientia talibus comminatur: *Data est à Domino potestas vobis, & virtus ab Altissimo, qui interrogabit opera vestra, & cogitationes scrutabitur.* Quoniam cum essetis ministri regni illius, non rectè iudicastis, neque custodistis legem iustitiæ. Horredè etiam citò apparebit vobis, quoniam iudicium durissimum in his qui præsumunt fieri. Exiguo enim conceditur misericordia. Potentes autem potenter tormenta patientur, & fortioribus fortior instat cruciatio. Sufficit quippè unicuique subiectarum animarum à proprio sibi providere delicto,

1. Cor. 9.

Luc. 4.

Matth. 5.

Sapient. 6.

Prælati autem & in peccatis alienis mors imminet. Cum enim augentur dona, rationes etiam crescunt donorum ; & cui plus committitur, plus ab eo exigitur. Cui quidem periculo tantò maximè providere in Prouerbijs admonemur, cum dicitur: *Fili si sponderis pro amico tuo, defixisti apud extraneum manum tuam. Illaqueatus es verbis oris tui, & captus proprijs sermonibus. Fac ergo quod dico fili mi, & temetipsum libera, quia incidisti in manum proximi tui. Discurre, festina, suscita amicum tuum: ne dederis somnū oculis tuis, nec dormitent palpebræ tuæ.* Tūc enim pro amico sponsonem facimus, cum aliquem charitas nostra in nostræ congregationis cōuersationem suscipit. Cui nostræ prouidentix curā promittimus, sicut & ille nobis obedientiam suam. Et sic quoque manū nostram apud eum defigimus, cum sollicitudinē nostræ operationis erga eum spondendo constituimus. Tum & in manum eius incidimus, quia nisi nobis ab ipso prouiderimus, ipsum animæ nostræ interfectorem sentiemus. Contra quod periculum adhibetur consilium, cum subditur, *discurre, festina, &c.* Nunc igitur huc, nunc illuc deambulans more prouidi & impigri Ducis, castra sua sollicitè giret, vel scrutetur, ne per alicuius negligentiam ei, qui tanquam leo circuit quærens quem deuoret, aditus pateat. Omnia mala domus suæ prior agnoscat, ut ab ipsa prius possint corrigi quàm à cæteris agnosci, & in exemplum trahi. Caueat illud quod stultis vel negligentibus beatus improperat Hieronymus: *Solemus mala domus nostræ scire nouissimi, ac liberorum ac coniugum vitia vicinis canentibus ignorare. Attendat quæ sic præsidet, quia tam corporum quàm animarum custodiam suscepit.* De custodia verò corporum admonetur cum dicitur in Ecclesiastico: *Filia tibi sunt, serua corpus illarum, & non ostendas faciem tuam hilarem ad illas.* Et iterum, *Filia patris abscondita est, vigilia & sollicitudo eius aufert somnum, nequando polluat.* Polluimus verò corpora nostra non solū fornicando, sed quodlibet indecēs in ipsis operādo tã lingua, quàm alio mēbro, seu quolibet mēbro sensibus corporis ad vanitatē aliquā abutendo. Sicut scriptū est: *Mors intrat per fenestras nostras*, hoc est peccatum ad animā per quinq; sensuum instrumenta. Quæ vero mors grauior, aut custodia periculosior, quàm animarum? Nolite, inquit Veritas, *timere eos qui occidunt corpus, anima vero non habent quid faciant.* Si quis hoc au-

Prouerb. 6.

1. Petr. 5.

Matth. 10.
Luc. 12.

84p. 1.

Abac. 1.

1. Petr. 5.

Iob. 40.

Matth. 4.

Marc. 1.

Luc. 4.

Genes. 3.

Ioan. 13.

Iob. 1.

Genes. 3.

Contra eos
qui ambiunt
prælatio-
nes.

dit consilium, quis non magis mortem corporis quàm animæ timet? Quis non magis gladium quàm mendacium cauet? Et tamen scriptum est: *Os quod mentitur occidit animam*. Quid tam facilè interfici quàm anima potest? Quæ sagitta citiùs fabricari quàm peccatum valet? Quis sibi à cogitatione saltē providere potest? Quis proprijs peccatis providere sufficit, ne dum alienis? Quis carnalis pastor spiritales oves à lupis spiritualibus, inuisibiles ab inuisibilibus custodire sufficiat? Quis raptorem non timeat, qui infestare non cessat, quem nullo possumus excludere vallo, nullo interficere vel lædere gladio? quem incessanter insidiantem & maximè religiosos persequentem, iuxta illud Abbacuc, *esca illius electe*, Petrus Apostolus cauendum adhortatur, dicens: *Aduersarius vester Diabolus tanquam leorugiens, circuit querens quem deuoret*. Cuius quanta sit præsumptio in deuoratione nostra, ipse Dominus beato Iob dicit: *Absorbebit fluium, & non mirabitur, & habet fiduciam quòd influat Iordanis in os eius*. Quid enim aggredi nō præsumat, qui ipsum quoque Dominum aggressus est tentare? Qui de Paradiso statim primos parentes captiuauit, & de Apostolico cœtu ipsum etiā, quem Dominus elegerat, Apostolum rapuit? Quis ab eo locus tutus, quæ claustra illi non sunt peruia? Quis ab eius insidijs providere, quis eius fortitudini valet resistere? Ipse est qui vno impulsu concutiens quatuor angulos domus sancti viri Iob, filios & filias innocētes oppressit & extinxit. Quid sexus infirmior aduersus ipsum poterit? Cui seductio eius tantum timenda est, quantum femina? Hanc quippè ipse primum seduxit, & per ipsam virum eius pariter, & totam posteritatem captiuauit. Cupiditas maioris boni possessione minoris mulierem priuauit. Hac quoque arte nunc facilè mulierem seducet, cum preesse magis quàm prodesse cupierit, rerum ambitione vel honoris ad hoc impulsus. Quod autē horum præcesserit sequentia probabunt. Si verò delicatiùs vixerit Prælata quàm subiecta, vel si supra necessitatem aliquid sibi peculiare vendicauerit, non dubium est hoc eam concupisse. Si pretiosiora postmodum quàm antea quæsierit ornamenta, profectò vana tumet gloria. Qualis prius extiterit postmodum apparebit. Quod prius exhibebat, vtrum virtus fuerit an simulatio, indicabit prælatio. Trahatur ad prælationem magis quàm veniat, di-

cente Domino : *Omnes quotquot veniunt, fures sunt & latrones.* Ioan. 10.
 Venerunt, inquit Hieronymus, *non qui missi sunt.* Sumatur potius ad honorem quàm sibi sumat honorem. *Nemo enim,* Hebr. 5.
 inquit Apostolus, *sibi sumit honorem, sed qui vocatur à Deo tanquã Aaron.* Vocata lugeat tanquam ad mortem deducta, repulsa gaudeat tanquam à morte liberata. Erubescimus ad verba quæ dicimus cæteris meliores. Cùm autem in electione nostra rebus ipsis hoc exhibetur, impudenter sine pudore sumus. Quis enim nesciat meliores cæteris præferendos? Grig. l. b.
 Unde lib. Moralium XXI I I I. *Non debet autem hominum ducatum* 24. Moral. c.
suscipere, qui nescit homines bene admonendo increpare. Qui ad hoc 15. in Iob. 34
eligitur ut aliorum culpas corrigat, quod resecari debuit ipse committat. In qua tamen electione si forte hanc impudentiam aliquando leui verborum repulsa, tamen per aures oblatam recusamus dignitatẽ: hanc profecto in nos accusationem proferimus, quo iustiores & digniores videamur. O quot in electione sua flere vidimus corpore & ridere corde! Accusare se tanquam indignos, & per hoc gratiam sibi & fauorem humanum magis venari! attendentes quod scriptum est: *Iustus* Prouerb. 18.
prior accusator est sui. Quos postea cùm accusari contingeret, & se eis occasio cedendi offerret, importunissimè & impudentissimè suam sibi prælationem defendere nituntur, quam se inuitos suscepisse fictis lachrymis, & veris accusationibus sui monstraucrunt. Quot in Ecclesijs vidimus Canonicos Episcopis suis reluctantes, cùm ab eis ad sacros Ordines cogerentur, & se indignos tantis ministerijs profitentes, nec omnino velle acquiescere? quos cum fortè Clerus ad Episcopatum postmodum eligeret, nullam aut leuem perpeffus est repulsam? Et qui heri sicut aiebant animæ suæ periculum vitantes Diaconatum refugiebant, iam quasi vna nocte iustificati de altiore gradu præcipitium non verentur. De qualibus quidem in ipsis scriptum est Prouerbijs: *Homo stultus plaudet manibus cùm spoponderit pro amico.* Prouerb. 17.
 Tunc enim miser gaudet vnde potius ei lugendum esset, cùm ad regimen aliorum veniens in cura subiectorum propria professione ligatur, à quibus magis amari quàm timeri debet. Cui profecto pestilentia quãtum possumus prouidentes omninò interdiciamus, ne delicatius aut mollius viuat prælata quàm subiecta: ne priuatos habeat secessus ad comedendum vel dormiendum, sed

Regul. c. 56.

cum sibi commisso grege cuncta peragat, & tantò eis amplius prouideat, quantò eis amplius præsens assister. Scimus quidem beatum Benedictum de peregrinis & hospitibus maximè sollicitum, mensam Abbatis cum illis seorsum constituisse. Quod licet tunc piè sit constitutum, postea tamen utilissima Monasteriorum dispensatione ita est immutatum, ut Abbas à Conuentu non recedat, & fidelem dispensatorem peregrinis prouideat. Facilis quippè est inter epulas lapsus, & tunc disciplinæ magis est inuigilandum. Multi etiam occasione hospitum sibi magis quàm hospitibus propitij sunt, & hinc maxima suspitione læduntur absentes & murmurant. Et tantò Prælatis minor est authoritas, quātò eius vita suis est magis incognita. Tunc quoque tolerabilior omnibus quælibet habetur inopia, cùm ab omnibus æquè participatur, maximè verò à Prælati. Sicut in Catone quoque didicimus. Hic quippe, ut scriptum est, populo secum sitiente oblatum sibi aque paululum respuit & effudit, suffecitque omnibus.

Eccles. 4.

Cum igitur Prælati maximè sobrietas sit necessaria, tantò eis parcius est viuendum, quantò per eos cæteris est prouidendum. Qui etiam ne donum Dei, hoc est prælationem sibi concessam in superbiam conuertant, & maximè subiectis per hoc insultent, audiant quod scriptum est: *Noli esse sicut leo in domo tua, euertens domesticos tuos, & opprimens subiectos tibi: Odibilis coram Deo & hominibus est superbia. Sedes ducum superbiorum destruxit Dominus, & sedere fecit mites pro eis. Rectorem te posuerunt, noli extolli. Esto in illis quasi unus ex ipsis.* Et Apostolus Timotheum erga subiectos instruens: *Seniorem, inquit, ne increpaueris, sed obsecra ut patrem, iuniores ut fratres, anus ut matres, iuenculas ut sorores. Non vos me, inquit Dominus, elegistis, sed ego elegi vos.* Vniuersi alij Prælatis à subiectis eliguntur, & ab eis creantur & constituuntur; quia non ad Dominum, sed ad ministerium adsumuntur. Hic autem solus verè est Dominus, & subiectos sibi ad seruiendum habet eligere. Nec tamen se Dominum, sed ministrum exhibuit, & suos iam ad dignitatis arcem aspirantes proprio confutat exemplo, dicens: *Reges gentium dominantur eorum, & qui potestatem habent super eos benefici vocantur. Vos autem non sic.* Reges igitur gentium imitatur, quisquis in subiectis dominium appetit magis quàm ministerium, & timeri magis quàm amari satagit, & de prælationis

Cōtra præ-
latos au-
steros.

sux magisterio intumescens amat primos recubitus in cœnis, & primas cathedras in synagogis, & salutationes in foro, & vocari ab hominibus Rabbi. Cuius quidem vocationis honorem, vt nec nominibus gloriemur, & in omnibus humilitati prouideatur: *Vos autem*, inquit Dominus, *nolite vocari Rabbi, & patrem nolite vocare super terram.* Et postremò vniuersam prohibens gloriationem: *Qui se*, inquit, *exaltauerit humiliabitur.* Prouidendum quoque est, ne per absentiam pastorum grex periclitetur, & ne Prælati extrauagantibus intus disciplina torpeat. Statuimus itaque, vt Diaconissa magis spiritalibus quàm corporalibus intendēs, nulla exteriori cura monasterium deserat, sed circa subiectas tantò sit magis sollicita, quantò magis assidua; & tantò sit hominibus quoque præsentia eius venerabilior, quantò rarior, sicut scriptum est: *Aduocatus à potentiore discede. Ex hoc enim magis te aduocabit.* Si Eccles. 13. qua verò legatione monasterium egeat, monachi vel eorum conuersi ea fungantur. Semper enim viros mulierum necessitudinibus oportet prouidere. Et quo earum maior religio, amplius vacant Deo, & maiori virorum egent patrocinio. Vnde & matris Domini curam agere Ioseph ab angelo admonetur, quam tamen cognoscere non permittitur. Et ipse Dominus moriens quasi alterum filium matri suæ prouidit, qui eius temporalem ageret curam. Apostoli quoque quantam deuotis curam impenderent feminis dubium non est, vt iam satis alibi meminimus; quarum etiam obsequijs Diaconos *viros* instituerunt. Quam quidem nos auctoritatem sequentes, ipsa etiam rei necessitate hoc exigente decreuimus, Monachos & eorum Conuersos more apostolorum & Diaconorum in iis quæ ad exteriorem pertinet curam Monasterijs feminarum prouidere. Quibus maximè propter Missas necessarij sunt Monachi, propter opera verò Conuersi. Oportet itaque sicut Alexandria sub Marco Euangelista legimus esse factum in ipso Ecclesiæ nascentis exordio, vt Monasterijs feminarum Monasteria non desint virorum, & per eiusdem Religionis viros omnia extrinsecus feminis administrantur. Et tunc profectò Monasteria feminarum firmitus propositi sui religionem obseruare credimus, si spiritalium virorum prouidentia gubernentur, & idem tam ouium quàm arietum Pastor constituatur: vt qui videlicet viris ipse

quoque præsit feminis, & semper, iuxta Apostolicam institutionem, caput mulieris sit vir, sicut viri Christus, & Christi Deus. Vnde & Monasterium beatæ Scholasticæ in possessione fratrum Monasterij situm fratris quoque prouidentia regebatur, & crebra ipsius vel fratrum visitatione instruebatur & consolabatur. De cuius quoque regiminis prouidentia beati Basilij Regula quodam loco nos instruens, ita continet: *Interrogatio. Si oportet eum qui præest extra eam quæ sororibus præest loqui aliquid quod ad edificationem pertineat virginibus? Responsio. Et quomodo seruabitur illud præceptum Apostoli dicentis: Omnia vestra honestè & secundum ordinem fiant?* Item sequenti capitulo. *Interrogatio. Si conuenit eum qui præest cum ea quæ sororibus præest frequenter loqui, & maximè si aliqui de fratribus per hoc leduntur. Responsio. Apostolo dicente, Vt quid enim libertas iudicatur ab aliena conscientia? Bonum est imitari eum dicentem, Quia non sum visus potestate mea uti, ne offendiculum aliquod ponerem Euangelio Christi. Et quantum fieri potest, & rariùs videnda sunt, & breuiùs est sermocinatio finienda.* Hinc & illud est Hispalensis Concilij: *Consensu communi decreuimus, ut Monasteria virginum in provincia Betica Monachorum ministracione ac præsidio gubernentur. Tunc enim salubria Christo dicatis virginibus prouidemus, quando eis spirituales eligimus patres quorū non solū gubernaculis tueri, sed etiam doctrinis edificari possint.* Hac tamē circa Monachos cautela seruata, vt remoti ab earum peculiaritate, nec vsque ad vestibulum habeant accedendi permissum familiare, & neque Abbatem vel eum qui præficitur extra eam quæ præest loqui virginibus Christi aliquid, quod ad institutionem morum pertinet, licebit. Nec cum sola quæ præest frequenter eum colloqui oportet, sed sub testimonio duarum aut trium sororum. Ita vt rara sit accessio brevis locutio. Absit enim vt ne Monachos, quod etiam dictu nefas est, Christi virginibus familiares esse velim⁹. Sed iuxta quod iussa regularia vel Canonum admonent, longè discretos atque seiunctos eorum tantū gubernaculis easdem deputamus; constituentes, vt vnus Monachorum probatissimus eligatur, cuius curæ sit prædia earum rusticana vel urbana intendere, fabricas struere, vel si quid aliud ad necessitatem Monasterij prouidere, vt Christi famulæ pro animæ suæ tantū utilitate sollicitæ solis diuinis cultibus viuant, operibus suis

suis inseruiant. Sane is qui ab Abbate suo præponitur, iudicio sui Episcopi comprobetur. Vestes autem illæ iisdem Cœnobijis faciant, à quibus tuitionem expectant. Ab iisdem de nouo, vt prædictum est, laborum fructus, & procurationis suffragium recepturæ. Hanc nos itaque prouidentiam sequentes, Monasteria feminarum Monasterijs virorum ita semper esse subiecta volumus, vt sororum curâ fratres agant, & vnus vtrisque tanquam pater præsideat, ad cuius prouidentiam vtraque spectent Monasteria, & vtrorumque in Domino quasi vnum sit ouile & vnus pastor. Quæ quidem spiritualis fraternitatis societas tantò gratior tam Deo quàm hominibus fuerit, quantò ipsa perfectior omni sexui ad conuersionē venienti sufficere possit: vt videlicet Monachi viros, Moniales feminas suscipiant, & omni animæ de salute sua cogitanti possit ipsa consulere. Et quicumque cūm vel matre, aut sorore, vel filia, seu aliqua, cuius curam gerit, conuerti voluerit; plenum ibi solatium reperire possit. Et tantò maioris charitatis affectui sibi vtraque Monasteria sint connexa, & pro se inuicem sollicita, quātò quæ ibi sunt personæ propinquitate aliqua vel affinitate ampliùs sunt coniunctæ. Præpositum autem Monachorum, quem Abbatem nominant, sic etiam Monialibus præesse volumus; vt eas, quæ Domini spōsæ sunt, cuius ipse seruus est, proprias recognoscat dominas, nec eis præesse, sed prodesse gaudeat. Et sit tanquam dispensator in domo regia, qui non imperio dominam premit, sed prouidentiam erga eam gerit; vt ei de necessarijs statim obediat, & in noxijs eam non audiat, & sic exterius cuncta ministret, vt thalami secreta numquam nisi iussus introcat. Ad hunc igitur modum seruum Christi sponsis Christi prouidere volumus, & earum pro Christo fideliter curam gerere, & de omnibus quæ oportet cum Diaconissa tractare. Nec ea inconsulta quicquam de ancillis Christi, vel de ijs quæ ad eas pertinent eum statuere, nec ipsum cuiquam earum nisi per eam quicquam præcipere, vel loqui præsumere. Quotiens verò eum Diaconissa vocauerit, ne tardet venire, & quæ ipsa ei consuluerit de ijs, quibus ipsa vel ei subiectæ opus habent, non moretur exequi quantum valet. Vocatus autem à Diaconissa nunquam nisi in manifesto, & sub testimonio probatarum personarum ei loquatur, nec ei proximus adiungatur, nec prolixo sermone eam detineat. Omnia verò quæ ad vi-

ctum aut vestitum pertinet, & si quæ etiam pecuniæ fuerint, apud ancillas Christi congregabuntur vel reseruabuntur, & inde fratribus necessaria tradentur de ijs quæ sororibus supererunt. Omnia itaque fratres exteriora procurabunt, & sorores ea tantum quæ intus à mulieribus agi conuenit, componendo scilicet vestes etiam fratrum, vel abluendo, panem etiam conficiendo, & ad coquendum tradendo, & coctum suscipiendo. Ad ipsas etiam cura lactis, & eorum quæ inde fiunt, pertinebit, & gallinarum vel anserum nutritura, & quæcumque cōuenientiùs mulieres agere quàm viri possunt. Ipse verò Præpositus quando constitutus fuerit, in præsentia Episcopi & sororum iurabit, quòd eis fidelis in Domino dispensator erit, & earum corpora à carnali contagio sollicitè obseruabit. In quo si fortè, quod absit, Episcopus cum negligentem deprehenderit, statim eum tanquam periurij reum deponat. Omnes quoque fratres in professionibus suis hoc se sororibus sacramento adstringent, quòd nullatenus eas grauari consentient, & earum carnali mūditiæ pro posse suo prouidebunt. Nullus igitur virorum nisi licentia Præpositi ad sorores accessum habebit, nec aliquid eis missum, nisi à Præposito transmissum, suscipietur. Nulla vnquam sororum septa Monasterij egredietur, sed omnia exterius sicut dictum est, fratres procurabunt, & in fortibus fortes sudabunt operibus. Nullus vnquam fratrum septa hæc ingredietur, nisi ob tēta Præpositi, & Diaconissæ licentia, cū aliqua hoc necessaria vel honesta exegerit causa. Si quis fortè contra hoc præsumpserit, absque dilatione de Monasterio proijciatur. Ne tamen viri fortiores feminis in aliquo eas grauare præsumāt, statuimus eos quoque nihil præsumere contra voluntatem Diaconissæ, sed omnia ipsos etiam ad nutum eius peragere, & omnes pariter tam viros quàm feminas ei professionem facere, & obedientiam promittere: vt tantò pax firmior habeatur, & meliùs seruetur cōcordia, quantò fortioribus minus licebit, & tantò minus fortes debilibus obedire grauentur, quantò earum violentiam minus vereantur. Et quantò ampliùs hic humiliauerit se apud Deum, ampliùs exaltari certum sit. Hæc in præsentī de Diaconissa dicta sufficiant. Nunc ad Officiales stilum inclinemus.

SACRIFICA, quæ & Thesauraria, toti Oratorio proui-

debit, & omnes quæ ad ipsum pertinent clauēs, & quæ ipsi necessaria sunt, ipsa seruabit: & si quæ fuerint oblationes, ipsa suscipiet, & de ijs quæ in Oratorio necessaria sunt faciendis vel reficiendis, & de toto eius ornatu curam aget. Ipsius quoque prouidere est de hostijs, de vasis & de libris altaris, & toto eius ornatu, de reliquijs, de incenso, de luminaribus, de horologio, de signis pulsandis. Hostias verò si fieri potest virgines conficiant, & frumentum purgent vnde fiant, & altaris pallas abluant. Reliquias autem, vel vasa altaris nunquam ei vel alicui Monialium contingere licebit, nec etiam pallas nisi cùm eis traditæ ad lauandum fuerint. Sed ad hoc Monachi vel eorum Conuersi vocabuntur, & expectabuntur. Et si necesse fuerit, aliqui sub ea ad hoc officium instituantur, qui hæc contingere cùm opus fuerit digni sint, & arcis ab ea reseratis, hæc inde ipsi sumant, vel ibi reponant. Hæc quidem quæ sanctuario præsidet, vitæ munditia præminere debet: quæ si fieri potest mente cum corpore sit integra, & eius tam abstinentia quàm continentia sit probata. Hanc præcipuè de compoto lunæ instructam esse oportet, vt secundum temporum rationem Oratorio prouideat.

CANTRIX toti Choro prouidebit, & diuina disponet officia, & de doctrina cantandi vel legendi magisterium habebit, & de eis quæ ad scribendum pertinent vel dictandum. Armarium quoque librorum custodiet, & ipsos indè tradet atque suscipiet, & de ipsis scribendis vel aptandis curam suscipiet, vel sollicita erit. Ipsa ordinabit quomodo sedeatur in choro, & sedes dabit, & à quibus legendum sit vel cantandum prouidebit: & inscriptionem componet sabbathis recitandam in Capitulo, vbi omnes Hebdomadariæ describentur. Propter quæ maximè literatam eam esse conuenit, & præcipuè musicam non ignorare. Ipsa etiam post Diaconissam toti disciplinæ prouidebit. Et si fortè illa rebus alienis fuerit occupata, vices illius in hoc exequetur.

INFIRMARIA ministrabit infirmis, & eas obseruabit tam à culpa quàm ab indigentia. Quicquid infirmitas postularit, tam de cibis quàm de balneis, vel quibuscumque alijs, est eis indulgendum. Notum est quippè prouerbium in talibus, *Infirmis non est lex posita*. Carnes eis nullatenus dengerentur, nisi sexta feria, vel præcipuis vigilijs aut ieiunijs qua-

tuor Temporum, seu Quadragesimæ. A peccato autem tantò amplius coerceantur, quantò amplius de exitu suo cogitandum incumbit. Maximè verò tunc silentio studendum est, in quo exceditur plurimum, & orationi instandū, sicut scriptum est: *Fili, in tua infirmitate ne despicias te ipsum, sed ora Deum, & ipse curabit te. Auertere à delicto, & dirige manus, & ab omni delicto munda cor tuum.* Oportet quoque infirmis prouidam semper adistere custodiam, quæ cū opus fuerit statim subueniat: & domum omnibus instructam esse, quæ infirmitati illi sunt necessaria. De medicamentis quoque si necesse est, pro facultate loci prouidendum erit. Quod facilius fieri potest, si quæ infirmis præest non fuerit expertus medicinæ. Ad quam etiam de ijs quæ sanguinem minuunt cura pertinebit. Oportet autem aliquam flebotomiæ peritam esse, ne virum propter hoc ad mulieres ingredi necesse sit. Prouidendum est etiam de officijs Horarū & communione, ne desint infirmis; vt saltem Dominico die communicetur, confessione semper & satisfactione quam potuerint præcuntibus. De vnctione quoque infirmorum beati Iacobi Apostoli sententia sollicitè custodiatur, ad quam quidem faciendam tunc maximè cū de vita ægrotantis desperatur, inducantur ex Monachis duo seniores Sacerdotes cum Diacono, qui sanctificatum oleum secum afferant, & Conuentu sororum assistente, interposito tamen pariete, ipsi hoc celebrent sacramentum. Similiter cū opus fuerit, de communione agatur. Oportet itaque domum infirmarum sic aptari, vt ad hæc facienda Monachi facilem habeant accessum & recessum, nec Conuentum videntes, nec ab eo visi. Singulis autem diebus semel ad minus Diaconissa cum Celleraria infirmam tanquam Christum visitent, vt de necessitatibus eius sollicitæ prouideant tam in corporalibus quàm spiritualibus, & illud à Domino audire mereantur: *Infirmus eram, & visitasti me.* Quod si ægrotans ad exitum propinquauerit, & in extasi agonizauerit, statim aliqua ei adstans ad Conuentum properet cum tabula, & eam pulsans exitum sororis nunciet, totusque Conuentus, quæcumque hora sit diei vel noctis, ad morientē festinet, nisi Ecclesiasticis præpediatur* officijs. Quod si acciderit, quòd nihil est operi Dei præponendum, satis est Diaconissam cum aliquibus, quas elegerit, ac-

* ut impediatur

celerare, & Conuentum postmodum sequi. Quæcumque verò ad hunc tabulæ pulsus occurrerint, statim letaniam inchoent, quousque Sanctorum & Sanctarum inuocatio compleatur; & tunc Psalmi vel cætera, quæ ad exequias pertinet, subsequantur. Quàm salubre verò sit ad infirmos ire siue mortuos, Ecclesiastes diligenter attendens, ait: *Melius est ire ad domum luctus, quàm ad domum conuiuij. In illa enim finis cunctorum admonetur hominum, & viuens cogitat quid futurus sit.* Item: *Cor sapientium ubi tristitia est.* Defunctæ vero corpusculum à sororibus statim abluatur, & aliqua vili, sed munda interula & caligis indutum feretro imponatur, velo capite obuoluto. Quæ quidem indumenta firmiter corpori consuantur siue ligentur, nec vltèriùs moueantur. Ipsum corpus à sororibus in Ecclesia delatum Monachi cum oportuerit sepulturæ tradant, & sorores interim in Oratorio psalmodiæ vel orationibus intentè vacabunt. Diaconissæ verò sepultura id tantum præ cæteris habeat honoris, vt cilicio solo totum eius corpus inuoluatur, & in eo quasi in sacco tota cõsuatur.

VESTIARIA totum quod ad curam indumentorū spectat prouidebit, tam in calciamentis scilicet quàm in cæteris omnibus. Ipsa tonderi oues faciet, coria calciamentorum suscipiet. Linum seu lanam excolet, & colliget, & totam curam telarum habebit. Filum & acum & forfices omnibus ministrabit. Totam dormitorij curam habebit, & stratis omnibus prouidebit. De mantilibus quoque mensarum & manutergijs & vniuersis pannis curamaget, incidendis, suendis, abluendis. Ad hanc maximè illud pertinet: *Quæsiuit lanam & linum, & operata est consilio manuum suarum. Manum suam misit ad colum, & digiti sui apprehenderunt fusum. Non timebit domui suæ à frigoribus niuis. Omnes enim domestici eius vestiti duplicibus, & ridebit in die nouissimo. Considerauit semitas domus suæ, & panem otiosa non comedit. Surrexerunt filij eius & beatissimam prædicauerunt eā.* Hæc suorū operū habebit instrumenta, & prouidebit de suis operibus, quæ quibus debeat iniungere sororibus. Ipsa enim nouiciarum curamaget, donec in Congregationem suscipiantur.

CELLERARIA curam habebit de ijs omnibus quæ pertinent ad victum, de cellario, refectorio, coquina, molendi-

no, pistrino cum furno, de hortis etiam & viridarijs, & agrorum tota cultura: de apibus quoque, armentis & pecoribus cunctis, seu auiibus necessarijs. Ab ipsa requiretur quicquid de cibis necessarium erit. Hanc maximè non esse auaram conuenit, sed promptam & voluntariam ad omnia necessaria tribuenda. Hilarem enim datorem diligit Deus. Quam omninò prohibemus, ne de administrationis suæ dispensatione sibi magis quàm alijs sit propitia, nec priuata sibi paret fercula, nec sibi reseruet quæ alijs defraudet. *Optimus*, inquit Hieronymus, *est dispensator, qui sibi nihil reseruat*. Iudas suæ dispensationis abutens officio, cum loculos haberet, de cœtu perijt Apostolico. Ananias quoque & Saphira vxor eius retinendo sententiam mortis exceperunt.

Ad Portariam, siue Ostiariam, quod idem est, pertinet de suscipiendis hospitibus, vel quibuslibet aduenientibus, & de ijs nunciandis vel adducendis vbi oporteat; & de cura hospitalitatis. Hanc ætate & mente discretam esse conuenit, vt sciat accipere responsum & reddere, & qui vel qualiter suscipiendi sint, an non sint, iudicare. Ex qua maximè tanquam ex vestibulo Domini religionem Monasterij decorari oportet, cum ab ipsa eius notitia incipiat. Sit igitur blanda verbis, mitis alloquio, vt in his quoque quos excluderit, conuenienti reddita ratione charitatem studeat ædificare. Hinc enim scriptum est: *Responsio mollis frangit iram, sermo durus suscitaturorem*. Et alibi: *Verbum dulce multiplicat amicos, & mitigat inimicos*. Ipsa quoque sæpiùs pauperes videns, meliusque cognoscens, si qua eis de cibis aut vestimentis distribuenda sunt distribuet: tam ipsa verò quàm ceteræ Officiales, si suffragio vel solatio aliquarum eguerint, dentur eis à Diaconissa vicariæ. Quas præcipuè de Conuersis assumi conuenit, ne aliqua vnquam Monialium diuinis desit officijs, siue capitulo vel refectorio. Domunculam iuxta portam habeat, in qua ipsa vel eius vicaria præsto sit semper aduenientibus, vbi etiam otiosæ non maneant, & tantò ampliùs silentio studeant, quanto earum loquacitas his quoque qui extrà sunt, faciliùs potest innotescere. Ipsiùs profectò est non solum homines, quos oportet, arcere; verum etiam rumores penitus excludere, ne ad Conuentum temerè deferantur, & ab ipsa est exigendum quicquid in hoc quoque fuerit excessum. Si quid verò au-

dierit quod scitu opus sit, ad Diaconissam secretò referet, ut ipsa super hoc si placet deliberet. Mox autem ut ad portam pulsatum vel inclamatum fuerit, quæ præsto est quærat à superuenientibus qui sint, aut quid velint, portâq; si oportuerit statim aperiat, ut aduenientes suscipiat. Solas quippe feminas intus hospitari licebit. Viri autē ad Monachos dirigētur. Nullus itaq; aliqua de causa intus admittetur, nisi consulta prius & iubente Diaconissa. Feminis autē statim patebit introitus. Susceptas verò feminas, seu viros quacūq; occasione introeūtes Portaria in Cellula sua pausare faciet, donec à Diaconissa vel sororibus, si necessariū est vel opportunum, eis occurratur. Pauperibus verò quæ ablutione pedū indigent, hanc quoque hospitalitatis gratiam ipsa Diaconissa, seu sorores diligenter exhibeant. Nam & Apostolus ex hoc præcipuè humanitatis obsequio dictus est Diaconus. Sicut in vitis quoque Patrum quidam ipsorum meminit, dicens: *Propter te homo saluator factus diaconus, praeingens se linteo lauit pedes discipulorum, præcipiēs eis fratrum pedes lauare.* Hinc Apostolus de Diaconissa meminit, dicens: *Si hospitio recepit, si Sanctorum pedes lauit.* Et ipse Dominus: *Hospes, inquit, eram, & collegistis me.* Officiales omnes præter Cantricem de his instituantur, quæ literis non intendunt, si ad hoc tales reperiri possint idoneæ, ut literis vacare liberiùs queant.

ORATORII ornamenta necessaria sint, non superflua; munda magis quàm pretiosa. Nihil igitur in eo de auro vel de argento compositum sit præter vnum calicem argenteum, vel plures etiam si necesse sit. Nulla de serico sint ornamenta, præter stolas aut phanones. Nulla in eo sint imaginum sculptilia. Crux ibi lignea tantum erigatur ad altare, in qua si forte imaginem Saluatoris placeat depingi, non est prohibendum. Nullas verò alias imagines altaria cognoscant. Campanis duabus Monasterium sit contentum. Vas aquæ benedictæ ad introitum Oratorij extra collocetur, ut ea sanctificentur mane ingressuræ, vel post Completorium egressæ. Nullæ Monialium Horis desint Canonicis; sed statim ut pulsatum fuerit signum, omnibus alijs postpositis ad diuinum propere tur officium, modesto tamen incessu. Introeuntes autem secretò Oratorium, dicant quæ poterunt: *Introibo in domum tuā, adorabo ad templum sanctum tuum, &c.* Nullus in Choro liber

teneatur, nisi officio præsentis necessarius. Psalmi apertè & distinctè ad intelligendum dicantur, & tam moderata sit psalmodia vel cantus, ut quæ vocem habent infirmam sustinere valeant. Nihil in Ecclesia legatur aut cantetur, nisi de authentica sumptum scriptura, maximè autem de nouo vel veteri Testamento. Quæ utraque sic per lectiones distribuantur, ut ex integro per annum in Ecclesia legantur. Expositiones verò ipsorum vel Sermones Doctorum, seu quælibet scripturæ aliquid ædificationis habentes ad mensam vel in Capitulo recitentur: & ubicumque opus sit omnium lectio concedatur. Nulla autem legere vel cantare præsumat, nisi quod prius præuiderit. Si qua fortè de ijs aliquid in Oratorio viriosè protulerit, ibidem supplicando coram omnibus satisfaciat secretò dicens: *Ignosce Domine etiam hac vice negligentiam meam.* Media autem nocte secundum institutionem propheticam ad vigilias nocturnas surgendum est, propter quod ad eò tempestiuè cubandum est, ut has vigilias ferre natura valeat infirma. Et omnia quæ ad diem pertinent cum luce fieri possint, sicut & beatus Benedictus instituit. Post Vigilias autem ad dormitorium redeatur, antequam hora Matutinarum laudum pulsetur. Et si quid noctis adhuc superest, infirmæ somnus non negetur naturæ. Maximè namque somnus lassatam recreat naturam, & patientem operis reddit, & sobriam conseruat, & alacrem. Si quæ tamen Psalterij vel aliquarum Lectionum meditatione indigent, ut beatus quoque meminit Benedictus, vacare ita debent, ut quiescentes non inquietent. Ideò namque meditationi hoc loco potius quàm lectioni dixit, ne lectio aliquorum quietem impediret aliorum. Qui etiam cum ait, *à fratribus qui indigent*, profectò nec ad hanc meditationem compulit. Nonnunquam tamen si doctrina etiam cantus opus est, de hoc similiter prouidendum est ijs quibus necesse est. Hora verò matutina die statim illufcescete peragatur, & exorto Lucifero si prouideri potest ipsa pulsetur. Qua completa reuertatur ad dormitorium. Quòd si æstas fuerit, quia tunc breue est tempus nocturnum, & longum matutinum; aliquantulum ante primam dormire non prohibemus, donec sonitu facto excitentur. De qua etiam quiete post matutinales videlicet laudes beatus Gregorius II. Dialongorum capitulo, cum de venerabili viro Libertino loqueretur,

loqueretur, meminit, dicens: Die verò erat altera pro utilitate Monasterij causa constituta. Expletis igitur hymnis matutinalibus Libertinus ad lectum Abbatis venit, orationem sibi humiliter petijt. Hæc igitur quies matutinalis à Pascha vsque ad æquinoctiũ autumnale, ex quo incipit diem excedere, non denegetur. Egressæ autem de dormitorio abluant, & acceptis libris in claustro sedeant legentes vel cantantes, donec Prima pulsetur. Post Primam verò in Capitulum eatur, & omnibus ibi residentibus lectio Martyrologij legatur, luna ante pronuntiata. Vbi postmodum vel aliquo sermonis ædificio fiat, vel aliquid de Regula legatur & exponatur. Deinde si quæ corrigenda sunt, vel disponenda, prosequi oportet.

SCIENDVM verò est, nec Monasterium nec domum aliquam inordinatam dici debere, si qua ibi inordinatè fiant: Sed si cum facta fuerunt non sollicitè corrigantur. Quis enim locus à peccato penitus expers? Quod diligenter beatus attendens Augustinus, cum clerum suum instrueret, in quodam loco meminit, dicens: *Quantumlibet enim vigilet disciplina domus mea, homo sum, & inter homines vivo. Nec mihi arrogare audeo ut domus mea melior sit quàm Arca Noe, ubi tamen inter octo homines unus inuentus est reprobus: aut melior sit quàm domus Abrahamæ, ubi dictum est: Ejce ancillam & filium eius. Aut melior quàm domus Isaac: Iacob dilexi, Esau odio habui: aut melior quàm domus Iacob, ubi lectum patris filius incestauit: aut melior quàm domus David, cuius filius unus cum sorore concubuit, alter contra patris tam sanctam mansuetudinem rebellauit: aut melior quàm cohabitatio Apostoli Pauli, qui si inter bonos habitaret non diceret: Foris pugna, intus timores: nec loqueretur, Nemo est homo qui germanè de vobis sollicitus sit. Omnes quæ sua sunt quarunt: aut melior quàm cohabitatio ipsius Christi, in qua undecim boni perfidum & furem Iudam tolerauerunt: aut melior postremo quàm cælum, unde Angeli ceciderunt.* Qui etiam nos ad disciplinam Monasterij plurimum exhortans, annexuit dicens: *Fateor coram Deo ex quo Deo seruire cæpi, quomodo difficile sum expertus meliores quàm qui in Monasterijs profecerunt: Ita non sum expertus peiores quàm qui in Monasterijs ceciderunt. Itaut hinc, arbitror, in Apocalypsi scriptum: Iustus iustior fiat, & sordidus sordescat adhuc.* Tanta igitur correctionis districtio sit, vt quæcunque in altera viderit quod corrigendũ sit, & celauerit, grauiori subiaceat disciplinæ, quàm illa quæ hoc commisit. Nulla igitur vel suum vel alterius de-

Epist. 157.
47. dist. ca.
Quantumlibet.

Genes. 9.
Genes. 21.
Genes. 49.

2. Reg. 11.
2. Reg. 18.

2. Cor. 7.

lictū accusare differat. Quæcumq; verò se accusans alias præ-
Proverb. 18. uenerit, sicut scriptum est: *Iustus prior est accusator sui*, mitiorē
 meretur disciplinā, si eius cessauerit negligentia. Nulla verò
 aliam excusare præsumat, nisi fortè Diaconissa ab alijs igno-
 tam rei veritatem interroget. Nulla vnquam aliam cædere
 pro quacumque culpa præsumat, nisi cui iniunctum fuerit à
 Diaconissa. Scriptum est autem de disciplina correctionis:
Proverb. 3. *Disciplinam Domini, fili mi, ne abijcias. Ne deficias cum ab eo corri-*
Proverb. 13. *peris. Quem enim diligit Dominus corripit, & quasi pater in filio*
Proverb. 19. *complacet sibi. Item: Qui parcit virgæ, odit filium: qui autem dili-*
Proverb. 21. *git illum, instanter erudit. Pestilente flagellato stultus sapientior erit:*
Eccl. 22. *Mulctato pestilente sapientior erit paruulus. Flagellum equo, & cha-*
mus asino, & virga dorso imprudentium. Qui corripit hominem po-
 stea inueniet apud eum, magis quàm ille qui per lingue blandimenta
 decipit. Omnis autem disciplina in præsentī quid videtur non esse
 gaudij, sed mæroris. Postea autem fructum peccatissimum exercita-
 ti per eam reddet iustitiæ. Confusio patris est in filio indisciplinato,
 filia autem fatua in deminoratione erit. Qui diligit filium, assiduat
 illi flagella, vt letetur in nouissimo. Qui docet filium, laudabitur in
 illo, & in medio domesticorum in illo gloriatur. Equus indomitus eua-
 det durus, & filius remissus euadet præceps. Lacta filium tuum, &
 pauentem te faciet. Lude cum eo, & contristabit te. In discussio-
 ne vero consilij cuiuslibet suam proferre sententiā licebit, sed
 quicquid omnibus videatur Diaconissæ decretum immobi-
 le teneatur, in cuius arbitrio cuncta consistunt, etiam si, quod
 absit, ipsa fallatur, & quod deterius est ipsa constituat. Vnde
 & illud est beati Augustini libro confessionum: *Multum peccat*
qui inobediens est suis prælatis in aliquo, si vel meliora eligat quàm
ea quæ sibi iubentur. Multò quippè melius est nobis bene fa-
 cere, quàm bonum facere. Nec tam quod fiat quàm quod
 quo modo vel animo fiat pensandum est. Bene vero fit quic-
 quid per obedientiam fit, etiam si quod fit bonum esse mini-
 mè videatur. Per omnia itaque prælatis est obediendū quan-
 tacumque sint damna rerum, si nullum apparet animæ peri-
 culum. Prouideat Prælatus vt benè præcipiat, quia subiectis
 benè obedire sufficit: nec suam sicut professi sunt, sed Præla-
 torum sequi voluntatem. Omnino enim prohibemus vt
 nunquam consuetudo rationi præponatur, nec vnquam ali-
 quid deffendatur, quia sit consuetudo, sed quia ratio; nec

* al. Omni-
 bus

quia sit vsitatum, sed quia bonum: & tantò libentiùs excipia-
 tur, quantò meliùs apparebit. Alioquin Iudaizantes legis an-
 tiquitatem Euangelio præferamus. Ad quod beatus Augu-
 stinus de consilio Cypriani plæraque asserēs testimonia, quo-
 dam loco ait. *Qui contempta veritate præsumit consuetudinem se-*
qui, aut circa fratres invidus est & malignus, quibus veritas reuelat-
ur: aut circa Deum ingratus est, cuius inspiratione Ecclesia eius in-
struitur. Item: In Euangelio Dominus: Ego sum, inquit, Veritas.
Non dixit, Ego sum consuetudo. Itaque veritate manifestata, cedat
consuetudo veritati: Item reuelatione facta veritatis, cedat error ve-
ritati, quia & Petrus qui prius circumcidebat cessit Paulo prædican-
ti veritatem. Idem lib. 4. de Baptismo: Frustra quidem qui ra-
tionem vincuntur consuetudinem nobis obijciunt, quasi consuetudo ma-
ior sit veritate, aut non sit in spiritualibus sequendum quod in melius
fuit à Spiritu sancto reuelatum. Hoc plane verum est, quia ra-
tio & veritas consuetudini præponenda est. Gregorius vii.
 Vvimmundo * Episcopo: Et certè, ut beati Cypriani utamur senten-
 tia, qualibet consuetudo quantumvis vetusta, quantumvis vulgata,
 veritati est omnino præponenda: & usus qui veritati est contrarius,
 abolendus. Quanto etiam amore veritas quoque verborum
 amplectenda, admonemur in Ecclesiastico cùm dicitur: *Pro*
anima tua non confundaris dicere verum. Item: Non contradicas
verbo veritatis ullo modo. Et iterum: Ante omnia opera verbum
verax præcedat te, & ante omnem actum consilium stabile. Nihil
etiam in auctoritatē ducatur, quia geritur à multis, sed quia
probatum à sapientibus & bonis. Stultorum, inquit Salomon,
infinitus est numerus. Et iuxta Veritatis assertionem, multi vo-
cati; pauci verò electi. Rara sunt quæque pretiosa; & quæ abun-
dant numero, minuuntur pretio. Nemo enim in consilio
maiorum hominum partem, sed meliorem sequatur. Nec
ætas hominis, sed sapientia consideretur: nec amicitia, sed
veritas attendatur. Vnde & poetica est illa sententia,

Fas est & ab hoste doceri.

Quotiens autem opus est consilio non differatur. Et si de re-
 bus præcipuis est deliberandum, conuocetur conuentus. In
 minoribus autem rebus discutiēdis sufficiet Diaconissa pau-
 cis ad se de maioribus personis conuocatis. Scriptum quoq;
 est de consilio, *Vbi non est gubernator, populus corrumpit. Salus au-*
tem, ubi multa consilia. Via stulti recta in oculis eius. Qui autem

Lib. 3. de
bapt. contr.
Donat. c. 5.
Dist. 8. ca.
Qui contēta

Lib. 6. de
bapt. c. 37.

Ioan. 14.

Lib. 4. de
bapt. c. 6. dist
8. ca. frustra
& ca. con-
suetudo.

* al. Vvilli-
mundo
Dist. 8. ca.
Si consuetu-
dinem.
Eccles. 4.

Ibidem.
Eccles. 37.

Eccles. 1.

Quid. lib. 4.
Metam.

Prouerb. 11.
Eccles. 32.

sapiens, audis consilia. Fili, sine consilio nihil facias, & post factum non pœnitebis. Si fortè sine consilio aliquid prosperum habet euentum, non excusat hominis præsumptionem fortunæ beneficium. Sin autem post consilium nonnunquam errant, potestas quæ consilium quæsiuit rea non teneatur præsumptionis. Nec tam culpandus est qui credidit, quàm quibus ipse errando acquieuit. Egressæ verò Capitulum ijs quibus oportet operibus intendant, legendo scilicet vel cantando, siue manibus operando vsque ad Tertiam. Post Tertiam autem missa dicatur, ad quam quidem celebrandam vnus ex Monachis sacerdos hebdomadarius instituatur. Quem profecto si copia tanta sit, cum Diacono & Subdiacono venire oportet, qui ei quod necessarium est administrent, vel quod suum est & ipsi operentur. Quorum accessus vel recessus ita fiant, vt sororum Conuentui nullatenus pateant. Si verò plures necessarii fuerint, & de his prouidendum erit, & ita semper si fieri potest, vt Monachi propter Missas Monialium nunquam Conuentui suo in officijs desint diuinis. Si verò communicandum à sororibus fuerit, senior eligatur sacerdos, qui post missam eas communicet; egressis inde priùs Diacono & Subdiacono propter tollendam tentationis occasionem. Ter verò ad minus in anno totus communicet Conuentus, id est Pascha, Penthecoste, & Natale Domini, sicut à Patribus est institutum de secularibus etiam hominibus. His autem communionibus ita se præparent vt tertio die ante ad confessionem & congruam satisfactionem omnes accedant, & terno se panis & aquæ ieiunio & oratione frequenti purificent cum omni humilitate & tremore; illam Apostoli terribilem apud se retractantes sententiam: *Itaque, inquit, quicumque manducauerit panem vel biberit calicem Domini indignè, reus erit corporis & sanguinis Domini. Probet autem seipsum homo, & sic de pane illo edat, & de calice bibat. Qui enim manducat & bibit indignè, iudicium sibi manducat & bibit, non dyjudicans corpus Domini. Ideo inter vos multi infirmi & imbecilles, & dormiunt multi. Quod si nosmetipsos dyjudicarem, non vtrique dyjudicarem.* Post Missam quoque ad opera redeant vsque ad Sextam, & nullo tēpore otiose viuant, sed vnaquæque id quod potest & quod oportet operetur. Post Sextam autem prandendum est, nisi ieiunium

* al. præsto

fuerit. Tunc enim Nona expectanda est, & in quadagesima etiam Vespera. Nullo verò tempore Conuentus careat lectione. Quam cum Diaconissa terminare voluerit, dicat: sufficit. Et statim ad grates Domino referendas ab omnibus surgatur. Æstiuo tempore post prandium vsque ad Nonam quiescendum est in dormitorio, & post Nonam ad opera redeundum vsque ad Vesperas. Post vespertas autem vel statim cœnandum est vel potandum. Et inde etiam secundum temporis consuetudinem ad collationem eundum. Sabbatho autem ante collationem munditiæ fiant, in ablutione videlicet pedum & manuum. In quo quidem obsequio Diaconissa famuletur cum hebdomadarijs, quæ coquinæ deseruiunt. Post collationem verò ad Completorium statim est veniendum, indè dormitum est eundum.

DE victu autem & vestitu Apostolica teneatur sententia, qua dicitur: *Habentes autem alimenta & quibus tegamur, his contenti sumus.* Vt videlicet necessaria sufficiant, non superflua quærantur. Et quod vilius poterit comparari, vel facilius haberi, & sine scandalo sumi, re concedatur. Solum quippe scandalum propriæ conscientiæ vel alterius in cibis Apostolus vitat, sciens quia non est cibus in vitio, sed appetitus. *Qui manducat, inquit, non manducantem non spernat. Qui non manducat, manducantem non iudicet. Tu quis es qui iudicas alienum seruum?* *Qui manducat, Domino manducat. Gratias enim agit Deo. Et qui non manducat, Domino non manducat, & gratias agit Deo. Non ergo amplius inuicem iudicemus, sed hoc iudicate magis ne ponatis offendiculum fratri vel scandalum. Scio & confido in Domino Iesu, quia nihil commune per ipsum, nisi qui estimat quid commune esse. Non est regnum Dei esca & potus, sed iustitia, & pax, & gaudium in Spiritu sancto. Omnia quidem munda sunt, sed malum est homini qui per offendiculum manducat. Bonum non manducare carnem, & non bibere vinum, neque in quo frater tuus offendatur, aut scandalizetur. Qui etiam post scandalum fratris de proprio scandalo ipsius qui contra conscientiam suam comedit adiungit dicens: *Beatus qui non iudicat semetipsum in eo quod probat. Qui autem discernit si manducauerit, damnatus est quia non ex fide. Omne autem quod non est ex fide, peccatum est.* In omni quippe quod agimus contra conscientiam nostram, & contra hoc quod credimus, peccamus. Et in eo quod probamus, hoc est per legem quā*

1. Tim. 6.

Rom. 14.

Ibidem.

Ibidem.

Ibidem.

- approbamus atque recipimus, iudicamus nosmetipsos atque damnamus, si illos videlicet comedimus cibos quos discernimus, hoc est per legem excludimus, & separamus tanquam immundos. Tantum enim est testimonium conscientiae nostrae, ut hæc nos apud Deum maxime accuset vel excuset. Vnde
1. Ioan. 3. & Ioannes in prima sua meminit Epistola: *Charissimi, si cor nostrum non reprehenderit nos, fiduciam habemus ad Deum. Et quicquid petierimus accipiemus ab eo, quoniam mandata eius custodimus, & ea quæ sunt placita coram eo facimus.* Bene itaque & Paulus superius ait: Nihil esse commune per Christum nisi ei qui commune quid esse putat, hoc est immundum & interdictum si sibi credit. Communes quippe cibos dicimus, qui secundum legem mundi vocantur, quod eos scilicet lex à suis excludens quasi his qui extra legem sunt exponat & publicet. Vnde & communes feminae immundæ sunt, & communia quæque vel publicata vilia sunt, vel minus cara. Nullum itaque cibum per Christum asserit esse communem, id est immundum, quia lex Christi nullum interdicit, nisi ut dictum est propter scandalum remouendum, vel propriæ scilicet conscientiae, vel alienæ. De qua & alibi dicit. *Quapropter si esca scandalizat fratrem meum, non manducabo in æternum, ne fratrem meum scandalizem.*
1. Cor. 9. *Non sum liber, non sum Apostolus?* Ac si diceret: Nunquid non habeo illam libertatem quam Dominus Apostolis dedit, de quibuslibet scilicet edendis vel de stipendijs aliorum sumendis? Sic quippe cum Apostolos mitteret quodam loco ait: *Edentes & bibentes quæ apud illos sunt.* Nullum videlicet cibum à cæteris distinguens. Quod diligenter Apostolus attendens, & omnia ciborum genera etiam si sint infidelium cibi & idolotyrta, Christianis esse licita studiosè prosequitur, solum, ut diximus, in cibis scandalum vitans. *Omnia, inquit, licent; sed non omnia expediunt. Omnia mihi licent, sed non omnia edificant.*
1. Cor. 10. *Nemo quod suum est querat, sed quod alterius. Omne quod in mactello venit, manducate, nihil interrogantes propter conscientiam.*
- Psal. 23. *Domini est terra, & plenitudo eius. Si quis vocat vos infidelium ad carnem, & vultis ire; omne quod vobis apponitur manducate, nihil interrogantes propter conscientiam. Si quis autem dixerit, hoc immolatum est idolis, nolite manducare propter illum qui indicavit, & propter conscientiam. Conscientiam dico non tuam, sed alterius. Sine offensione esote Iudeis & Gentibus, & Ecclesie Dei.* Ex quibus

videlicet Apostoli verbis manifestè colligitur, nullum nobis interdici, quo sine offensa propriæ consciëntiæ vel alienæ vesci possimus. Sine offensa verò propriæ cōscientiæ tūc agimus, si propositū vite, quo saluari possumus, nos seruare cōfidimus. Sine offensa autem alienæ, si eo modo viuere credimur quo saluemur. Eo quidem modo viuemus, si omnibus necessarijs naturæ indultis peccata vitemus, nec de nostra virtute præsumentes illi vitæ iugo professione nos obligemus, quo prægrauati succūbamus: & tantò sit grauior casus, quanto fuerat professionis altior gradus. Quem quidem casum & stultæ professionis votum Ecclesiastes præueniens ait: *Si quid vouisti Deo, ne moreris reddere. Difficet enim ei infidelis & stulta promissio. Sed quodcumqueoueris redde. Melius est non vouere, quàm post votum promissa nō reddere.* Cui quoq; periculo occurrens Apostolicū consiliū: *Volo, inquit, iuniores nubere, filios procreare, matres familias esse, nullam occasionem dare aduersario maledicti gratia. Iam enim quedam conuersæ sunt retro Sathanam.* Etatis infirmæ naturam considerans, remedium vitæ laxioris opponit periculo melioris. Consulit residere in imo, ne præcipitium detur ex alto. Quem & beatus secutus Hieronymus Eustochium virginem instituens ait: *Si autem & illæ quæ virgines sunt, ob alias tamen culpas non saluantur, quid fiet illis quæ prostituerunt membra Christi, & mutauerunt templum Spiritus sancti in lupanar? Rectius fuerat homini subiisse coniugium, ambulasse per plana, quàm ad altiora tendentem in profundum inferni cadere.* Quòd si etiam vniuersa reuoluamus Apostoli dicta, nunquam cum reperiemus secunda matrimonia nisi feminis indulgisse. Sed viros maximè ad continentiam exhortans, ait: *Circuncisus aliquis vocatus est? non adducat præputium.* Et iterum: *Solutus es ab uxore? noli querere uxorem.* Cū Moyses tamen viris magis quàm feminis indulgens vni viro plures simul feminas, non vni feminæ plures viros concedat, & distriktius adultera feminarum quàm virorum puniat. *Mulier, inquit Apostolus, si mortuus fuerit vir eius, liberata est à lege veteri, ut non sit adultera si fuerit cum alio vero.* Et alibi: *Dico autem nō nuptis & viduis: Bonum est illis si sic permaneant sicut & ego. Quod si non se continent, nubant. Melius est enim nubere quàm vri.* Et iterum: *Mulier si dormierit vir eius liberata est. Cui vult nubat, tantum in Domino.* Beatior autem erit si sic permanferit secundum consiliū

Ecclef. 5.

1. Tim. 5.

Tom. 1.
Epist. 12.1. Cor. 7.
Ibidem.

Rom. 7.

1. Cor. 7.

Ibidem.

meum. Non secunda tantum matrimonia infirmo sexui concedit, verum etiam ea nullo concludere audet numero, sed cum dormierint earum viri nubere alijs permittit. Nullum matrimonijs earum præfigit numerum, dummodo fornicationis euadant reatum. Sæpius magis nubant quam semel fornicentur: nè si vni prostituantur, multis carnalis commercij debitum soluant. Quæ tamen debiti solutio non est penitus immunis à peccato, sed indulgentur minora vt maiora vitentur peccata. Quid igitur mirum si id, in quo nullum est omnino, conceditur ne peccatum incurrant; hoc est alimenta quælibet necessaria, non superflua? Non est enim, vt dictum est, cibus in vitio, sed appetitus: cum videlicet liber quod non licet, & concupiscitur quod interdictum est, & nonnunquam impudenter sumitur, vnde maximum scandalum generatur. Quid verò inter vniuersa hominum alimenta tam periculosum est, vel damnosum, & religioni nostræ vel sanctæ quieti contrarium, quantum vinum? Quod maximus ille Sapiētum diligenter attendens, ab hoc maximè nos dehortatur dicens:

Prouer. 20. *Luxuriosa res vinum, & tumultuosa ebrietas. Quicumque his de-*

Prouerb. 23. *ctatur, non erit sapiens. Cui ve, cuius patri ve, cui rixæ, cui foveæ, cui sine causa vulnera, cui suffosio oculorum? nonne his qui morantur in vino, & student calicibus epotandis? Ne intuearis vinum quando flauescit, cum splenderit in vitro color eius. Ingreditur blandè, sed in nouissimo mordebit vt coluber, & sicut regulus venena diffundet. Oculi tui videbunt extraneas, & cor tuum loquetur peruersa, & eris sicut dormiens in medio mari, & quasi sopitus gubernator amisso clauo, & dices: Verberauerunt me & non dolui, traxerunt me, & ego non sensi.*

Prouerb. 31. *Quando euigilabo, rursus, & vina reperiā? Item: noli regibus ō Lamuel, noli regibus dare vinum, quia nullum secretū est vbi regnat ebrietas. Ne forte bibant & obliuiscantur iudiciorum, & mittant causam filiorum pauperis.*

Eccles. 19. *Et in Ecclesiastico scriptum est. Operarius ebriosus non locupletabitur, & qui spernit modica, paulatim decidet. Vinum & mulieres apostatare faciunt sapientes, & arguunt sensatos.*

Isai. 5^o *Isaias quoque vniuersos præteriens cibos, solum in causam captiuitatis populi commemorat vinum: Væ, inquit, qui consurgitis mane ad ebrietatem sectandam & potandum vsque ad vesperam, vt vino æstuetis. Cythara & lyra & tympanum & tibia & vinum in conuiuijs vestris, & opus Domini non respicitis. Propterea captiuus ductus est populus meus, quia non habuit scientiam.*

Ve qui potentes estis ad bibendum vinum, & viri fortes ad miscendā *Ibidem.*
ebrietatem. Qui etiam de populo vsque ad sacerdotes & Pro-
phetas querimoniam extendens, ait: Verum y quoque prae vino
nescierunt, & prae ebrietate errauerunt. Sacerdos & Propheta nes- *Esai. 18.*
cierunt prae ebrietate, absorpti sunt à vino, errauerunt in ebrietate,
nescierunt videntem, ignorauerunt iudicium. Omnes enim mensæ
repletae sunt vomitu sordiumque, ita ut non esset ultra locus. Quem
docebit scientiam, & quem intelligere faciet auditum? Dominus *Isai. 1.*
per Ioel dicit: Expergimisciimini ebrj, & flete qui bibitis vinum in
dulcedine. Non enim vti prohibet vino in necessitate, sicut
Apostolus indè Timotheo consulit, propter stomachi frequentes *1. Tim. 5.*
infirmities; non tantum infirmitates, sed frequentes. Noe
primus vineam plantauit, nesciens adhuc fortassis ebrietatis *Genes. 9.*
malum, & inebriatus femora denudauit; quia vino coniun-
cta est luxuriæ turpitudine. Qui etiam superirrisus à filio ma-
ledictionem in eum intorsit, & seruitutis sententia illū obli-
gauit: quæ antea nequaquam facta esse cognouimus. Loth *Genes. 19.*
virum sanctum ad incestum nullatenus trahi nisi per ebrieta-
tem filia ipsius prouiderunt. Et beata vidua superbum Ho- *Iudith. 13.*
lofernum non nisi hac arte illudi posse & prosterni credidit.
Angelos antiquis Patribus apparentes, & ab eis hospitio sus- *Genes. 18.*
ceptos carnibus, non vino vfos esse legimus. Et maximo illi
& primo principi nostro Eliæ in solitudinem latenti corui
mane & vespere panis & carniū alimoniam, non vini mi- *3. Reg. 17.*
nistrabant. Populus etiam Israeliticus delicatissimis in here-
mo cibus maximè coturnicum educatus, nec vino vsus fuisse, *Exod. 17.*
nec ipsum appetiisse legitur. Et refectiōes illæ panum &
piscium, quibus in solitudine populus sustentabatur, vinum
nequaquam habuisse referuntur. Solummodo nuptiæ quæ *Ioan. 2.*
indulgentiam habent, incontinentiæ vini, in quo est luxu-
ria, miraculum habuerunt. Solitudo verò, quæ propria est
Monachorum, habitatio carniū magis quàm vini benefi-
cium nouit. Summa etiam illa in lege Nazaræorum religio, *Num. 6.*
qua se Domino consecrant, vinum & quod inebriare potest
solummodo vitabat. Quæ namque virtus, quod bonum in
ebrijs manet? Vnde non solum vinum, verumetiam omne
quod inebriare potest antiquis quoq; sacerdotibus legimus
interdici. De quo Hieronymus ad Neporianum, de vita *Tom. 2.*
clericorum scribens, & grauitè indignans, quòd sacerdotes *Epist. 2.*

Hac iam an-
tea scripsit
eisdem omni-
no verbis.

* al. nostrū

* al. est

Regul. c. 46.

Tom. I.
Epist. 22.

legis ab omni quod inebriare potest abstinentes nostros in hac abstinence superent: *Nequaquam*, inquit, *vinum redoleas, ne audias illud Philosophi: Hoc non est osculum porrigere, sed propinare*. Vinolentos sacerdotes & Apostolus dānat, & lex vetus prohibet. *Qui altario deserviunt, vinum & sicerā non bibent*. Sic- cera Hebræo sermone* omnis potio nūcupatur, quæ inebria- re potest, siue illa quæ fermento conficitur, siue pomorū suc- co, aut faui decoquuntur in dulce, & herbarum potionē aut palmarū fructus exprimuntur in liquorē, coctisq; frugibus a- qua pinguior colatur. Quicquid inebriat & statū mētis euer- tit fuge similiter vt vinū. Ex regula sācti Pachomij vinū & li- quamē absque loco ægrotantiū nullus attingat. Quis etiam *vestrū** non audierit vinum Monachorum penitus nō esse, & in tantum olim à Monachis abhorreri, vt ab ipso vehementer dehortantes ipsum Sathanam appellarent? Vnde in vitis Pa- trum scriptum legimus: *Narrauerunt quidam Abbati Pastori de quodam Monachō quia non bibebat vinum, & dixit eis: Quia vi- num Monachorum omnino non est*. Item post aliqua: *Facta est aliquando celebratio Missarum in monte Abbatis Anthonij, & inue- tum est ibi cenidium vini, & tollens vnus de senibus paruum vas ca- licem portauit ad Abbatem Syloi, & dedit ei, & bibit semel & secun- dō, & accepit & bibit. Obrulit ei etiam tertio, sed non accepit, dicens: Quiesce frater, an nescis quia est Sathanas?* Et iterum de Abbate Syloi. Dicit ergo Abraham discipulis eius, *si occurritur in sabbatho, & Dominica ad Ecclesiam, & biberit tres calices, ne multo est?* & dixit senex: *Si non esset Sathanas, non esset multum*. Hinc & bea- tus non immemor Benedictus cū dispensatione quadam Monachis vinum indulgeret, ait: *Licet legamus vinum Mona- chorum omnino non esse, sed quia nostris temporibus id Monachis pe- nitus persuaderi non potest*. Quid enim mirum si Monachis pe- nitus non sit indulgendum, quod feminis quoque, quarum in se est natura debilior, & tamen contra vinum fortior, ip- sum omnino beatus interdicat Hieronymus? Hic enim Eu- stochium virginem Christi de conseruanda instruens virgi- nitate, vehementer adhortatur dicens: *Si quid itaque in me po- test esse consilij, si experto creditur, hoc primum moneo & obtestor, vt sponsa Christi vinum fugiat pro veneno*. Hæc aduersus adolescentiā prima sunt arma Demonum. Non sic auaritia quatit, inflat super- bia, delectat ambitio. Facile alijs caremus vitijs. Hic hostis intus

*inclusus est. Quocumque pergamus, nobiscum portamus inimicum. Vinum & adolescentia duplex incendium voluptatis. Quid oleum flamma adijcimus? Quid ardenti corpusculo fomenta ignium ministramus? Constat tamen ex eorum documentis qui de Physica scripserunt, multo minus feminis quàm viris virtutem vini prævalere posse. Cuius quidem rei rationem inducens Macrobius Theodosius 4. Saturnaliorum libro sic ait: Aristoteles, Cap. 6.
mulieres, inquit, rarò inebriantur, crebrò senes. Mulier humectissimo est corpore. Docet hoc & leuitas cutis & splendor. Docent præcipuè assiduæ purgationes superfluo exonerantes corpus humore. Cùm ergo epotum vinum in tam largum ceciderit humorem vim suam perdit, nec facile cerebri sedem ferit fortitudine eius extincta. Item: Mulie- Ibidem;
bre corpus crebris purgationibus depuratum, pluribus confectum foraminibus, ut pateat in meatus, & vias præbeat humori in egestionis exitum confluenti. Per hæc foramina vapor vini celeriter evanesceat. Quia igitur ratione id Monachis indulgetur, quod infirmiori sexui denegatur? Quanta est insania id eis concedere, quibus amplius potest nocere, & alijs negare? Quid denique stultius id quod religioni magis est contrarium, & à Deo plurimùm facit apostatare, religionem non abhorrere? Quid impudentius, quàm id quod regibus quoque & sacerdotibus legis interdicitur, Christianæ perfectionis abstinenciam non vitare? imò in hoc maximè delectari? Quis namque ignoret quantum in hoc tempore Clericorum præcipuè vel Monachorum studium circa cellaria versetur, ut ea scilicet diuersis generibus vini repleant? herbis illud, melle, & speciebus condiant; ut tantò facilius se inebrient, quantò delectabilius potent? & tantò se magis ad libidinem incitent, quantò amplius vino æstuent? Quis hic non tam error quàm furor, ut qui se maximè per professionem continentiae obligant, minus ad conseruandum votum se præparent? imò ut minimè custodiri possit, efficiant? Quorum profectò si claustris retinentur corpora, corda libidine plena sunt, & in fornicationem inardescit animus. Scribens ad Timotheum Apostolus: Noli, in- 1. Tim. 5.
quit, adhuc aquam bibere, sed vino modico utere propter stomachum tuum & frequentes infirmitates tuas. Cui propter infirmitatem conceditur vinum modicum, constat utique quia sanus summeret nullum. Si vitam profiteamur Apostolicam, & præcipuè formam vouemus pœnitentiæ, & fugere seculum pro-*

Lib. 2^o de
Pœnit. c. 20.

Cap. 9^o

* al. vino

Regul. c. 40.

Eccles. 19.

Regul. 2. c. 2.
& ad fratres
in erem. Ser.
1.

In vit. Patr.
part. 1.

Psal. 132.

Cōtra illos
qui à carni-
bus absti-

ponimus: cur eo maximè delectamur, quod proposito nostro maximè aduersari videmus, & vniuersis est alimentis delectabilius? Diligens pœnitentiæ descriptor beatus Ambrosius nihil in victu pœnitentium præter vinum accusat, dicens: *An quis putat illam pœnitentiam ubi acquirenda ambitio dignitatis, ubi vini effusio, ubi ipsius copulæ coniugalis usus? Renunciandū seculo est, facilius inueni qui innocentiam seruauerint, quàm qui cōgruè pœnitentiam egerint.* Item in libro de fuga seculi: *Bene, inquit, fugis si oculus tuus fugiat calices, & fialas: ne fiat libidinosus dum moratur in vino.* Solum de omnibus alimentis in fuga seculi vinum commemorat, & hoc vinum si fugiamus, bene nos seculum fugere asserit, quasi omnes seculi voluptates ex hoc vno * pendeant. nec etiam dicit, si gula fugiat eius gustū, verum etiam oculus visum, ne libidine & voluptate ipsius capiatur, quod frequenter intuetur. Vnde & illud est Salomonis quod suprā meminimus: *Ne intueamur vinum quando flauescit, cū splenderit in vitro color eius.* Sed quid & hic quæso dicemus, qui vt tam gustu eius quàm visu oblectemur, cū illud melle, herbis, vel speciebus diuersis condierimus, fialis etiam ipsum propinari volumus? Beatus Benedictus vini coactus indulgentiam faciens, *Saltem vel hoc, inquit, consentiamus, non vsque ad satietatem bibamus, sed parcius: quia vinum apostatate facit etiam sapientes.* O vtinam vsque ad satietatem bibere sufficeret, ne maioris rei transgressionis ad superfluitatem efferremur. Beatus etiam Augustinus Monasteria ordinans Clericorum, & eis Regulam scribens, *Sabbatho tantum & Dominica, sicut cōsuetudo est, qui volunt vinum accipiant: tum videlicet pro reuerentia Dominicæ diei & ipsius vigiliæ, quæ est Sabbathum: tum etiam quia tunc dispersi per cellulas fratres congregabantur.* Sicut & in vitis Patrum beatus commemorat Hieronymus, scribens de loco quem Cellia nominauit, his verbis: *Singuli per cellulas manent. Die tamen sabbathi & Dominica in vnum ad Ecclesiam coeunt, & ibi semetipsos inuicē tanquam cælo redditos vident.* Vnde profectò cōueniens erat hæc indulgentia, vt in simul conuenientes aliqua recreatione congauderent, non tam dicentes quàm sentientes: *Ecce quàm bonum & quàm iocundum habitare fratres in vnum.* Ecce si à carnibus abstineamus, magnum quid nobis imputatur, quantacumque superfluitate cæteris vescamur. Si

multis expensis diuersa piscium fercula comparemus, si pi-
peris & specierum sapes misceamus, si cum inebriati mero
fuerimus, calices herbatorum & fialas pigmētorum superad-
damus. Totum id excusat vilium abstinētia carniū, dum-
modo eas publicē non voremus, quasi ciborum qualitas ma-
gis quā superfluitas in culpa sit: cum solam Dominus cra-
pulam & ebrietatem nobis interdicit, hoc est cibi pariter &
vini superfluitatem potius quā qualitatem. Quod & dili-
genter beatus attendens Augustinus, nihilque in alimentis
præter vinum veritus, nec vllam ciborum qualitatem distin-
guens, hoc in abstinētia satis esse credidit quod breuiter ex-
pressit: *Carnem, inquit, vestram domate ieiunijs, & abstinētia*
esca vel potus quantum valitudo permittit. Legerat, nisi fallor,
illud beati Athanasij in exhortatione ad Monachos: *Ieiunio-*
rum quoque non sit volentibus certa mensura, sed in quantum possibi-
litas valet, nisi laborantis extensa: quæ præter Dominicam diem sem-
per sint solemnia, non votiuæ sint. Ac si diceret: Si ex voto susci-
piuntur, deuotē compleātur omni tempore, nisi in Domini-
cis diebus. Nulla hīc ieiunia præfiguntur, sed quantum per-
mittit valitudo. Dicitur enim: *Solam nature facultatem inspicit,*
& ipsam sibi modū præfigere permittit: sciēs quoniam in nullis delin-
quitur, si modus in omnibus teneatur. Vt videlicet nec remissius
quā oportet voluptatibus resoluamur, sicut de populo me-
dulla tritici & meracissimo vino educato scriptum est: *Incras-*
satus est, dilatatus, & recalcitrauit. Nec supra modū abstinētia
macerati vel omnino victi succumbamus, vel murmurantes
mercedem amittamus, vel de singularitate gloriemur. Quod
Ecclesiastes præueniens ait: *Iustus perit in sua iustitia. Noli esse*
iustus multum, neque plus sapias quā necesse est. Ne obstupescas de
sua quasi admirans singularitate intumesceas. Huic verò | dili-
gentiæ sic omnium virtutum mater discretio præsit, vt quæ
quibus imponat onera sollicitē videat, vnicuique scilicet se-
cundum propriam virtutem, & naturam sequens potius quā
trahens, nequaquam vsum satietatis *, sed abusum auferat
superfluitatis: & sic extirpentur vitia, ne lædatur natura. Sa-
tis est infirmis, si peccata virent, & si non ad perfectionis cu-
mulum conscendant. Sufficit quoque paradisi angulo resi-
dere, si martyribus non possis confidere. Tutum est vouere
modica, vt maiora debitis superaddat gratia. Hinc enim

nent & ex-
teris super-
flue vescū-
tur & po-
tant.

Luc. 21.

Epist. 109.
& sum. 25.
ad frat. &
Reg. 3. c. 11.

Deuter. 32.

Eccles. 7.

* al. saturi-
tatis

Luc. 7.

Rom. 4.

Rom. 7.

Lib. 1. quæst.
quæst. 66.Quid. lib. 3.
amor. eleg. 3.

Ioan. 14.

1. Cor. 7.

Ibidem.

Hebr. 7.

Ab. 15.

scriptum est: *Cum feceritis omnia quæ præcepta sunt, dicite: Serui inutiles sumus, quæ debuimus facere fecimus. Lex, inquit Apostolus, iram operatur. Vbi enim non est lex nec prævaricatio. Et iterum: Sine lege enim peccatum mortuum erat. Ego autem vivebam sine lege aliquando. Sed cum venisset mandatum, peccatum reuixit. Ego autem mortuus sum, & inuentum est mihi mandatum quod erat ad vitam: hoc est ad mortem. Nam peccatum occasione accepta per mandatum seduxit me, & per illud me occidit, ut fiat supra modum peccans peccatum per mandatum. Augustinus ad Simplicianum: Ex prohibitione aucto desiderio dulcius factum est, & ideo sefellit. Idem in libro Quæstionum, quæst. lxxxiiij. Suasio delectationis ad peccatum vehementior est cum adest prohibitio.*

Nitimur in vetitum/emper cupimusque negata.

Attendat cum tremore hæc quisquis se iugo alicuius regulæ quasi nouæ legis professioni vult alligare. Eligat quod possit, timeat quod non possit. Nemo legis efficitur reus, nisi qui eam fuerit ante professus. Antequam profitearis delibera. Cū professus fueris, observa. Ante est volūtarium quod postea fit necessarium. *In domo Patris mei, dicit Veritas, mansiones multe sunt.* Sic etiam plurimæ sunt quibus illuc perueniatur viæ. Non damnantur coniuges, sed facilius saluantur continentes. Non ad hoc ut saluaremur sanctorum Patrum sunt additæ regulæ: sed ut facilius saluemur, & purius Deo vacare possimus. *Et si, inquit Apostolus, nupseris virgo, non peccabit: tribulationem tamen carnis habebunt huiusmodi. Ego autem vobis parco.* Item: *Mulier quæ innupta est & virgo cogitat quæ Domini sunt, ut sit sancta corpore & spiritu. Quæ autem nupta est, cogitat quæ sunt mundi, quomodo placeat viro. Porro hoc ad utilitatem vestram dico, non ut laqueum vobis injiciam, sed ad id quod honestum est, & quod facultatem præbeat, sine impedimento Deum observandi. Tunc verò facillimè id agitur, cum à seculo corpore quoque recedentes, claustris nos Monasteriorum recludimus, ne nos seculares inquietent tumultus. Nec solum qui legem suscipit, sed qui legem imponit, prouideat ne multiplicatis præceptis transgressionem multiplicet. Verbum Dei veniens verbum abbreviatum fecit super terram. Multa Moyses locutus est: & tamen, ut ait Apostolus, nihil ad perfectum adduxit lex. Multa profectò & in tantum grauiora, ut Apostolus Petrus eius præcepta neminem potuisse portare profiteatur,*

dicens: *Viri fratres, quid tentatis Deum imponere iugum super cervicē discipulorum, quod nec patres nostri neque nos portare potuimus? sed per gratiam Domini Iesu credimus saluari quemadmodum & illi.* Paucis Christus de ædificatione morum & sanctitate vitæ Apostolos instruxit, & perfectionem docuit. Austera remouens & graua, suauia præcepit & leuia, quibus omnem consummauit religionem: *Venite, inquit, ad me omnes qui laboratis & onerati estis, & ego reficiā vos. Tollite iugum meum super vos, & discite à me, quia mitis sum & humilis corde; & inuenietis requiem animabus vestris. Iugū enim meum suauē est, & onus meū leue.* Sic enim sæpe in operib⁹ bonis sicut in negotijs agitur sæculi. Multi quippe in negotio plus laborant & minus lucrantur. Et multi exteriorius ampliùs affliguntur, & minus interiorius apud Deum proficiūt, qui cordis potiùs quàm operis inspector est. Qui etiam quo in exterioribus ampliùs occupātur, minus ad interiora vacare possunt; & quantò apud homines, qui de exterioribus iudicant, ampliùs innotescunt, maiorem gloriam apud eos assequuntur, & faciliùs per elationem seducuntur. Cui Apostolus occurrens errori, opera vehemēter extenuat, & fidei iustificationem amplificās ait: *Si enim Abraham ex operibus iustificatus est, habet gloriam; sed non apud Dominū. Quid enim dicit scriptura? Credidit Abraham Deo & reputatum est ei ad iustitiam.* Et iterum: *Quid ergo dicimus, quod gentes quæ non sectabantur iustitiam apprehenderunt iustitiam; iustitiam autem, quæ ex fide est: Israel verò sectando legem iustitiæ, in legem iustitiæ non peruenit? Quare? quia non ex fide, sed quasi ex operibus.* Illi quod catini est vel paropsidis de foris mundantes, de interiori mundicia minus prouident, & carni magis quàm animæ vigilantes carnales potiùs sunt quàm spirituales. Nos vero Christum in exteriori homine per fidem habitare cupientes, pro modico ducimus exteriora, quæ tam reprobis quàm electis sunt communia, attendentes quod scriptum est: *In me sunt Deus vota tua, quæ reddam laudationes tibi.* Vnde & exteriorē illam legis abstinentiam non sequimur, quam nihil iustitiæ certum est conferre. Nec quicquam nobis in cibis Dominus interdicat, nisi crapulam & ebrietatem, id est superfluitatem. Qui etiam quod nobis indulsit, in seipso exhibere non erubuit: licet hinc multi scandalizati non mediocriter impropere-
Vnde & per semet ipsum loquens: *Venit Ioannes, inquit, non*

Math. II.

Rom. 4.

Genes. 15.

Luc. 21.

Math. 23.

manducans & non bibens, & dixerunt: Demoniam habet. Venit filius hominis manducans & bibens, & dixerunt: Ecce homo vorax & potator vini. Qui etiam suos excusans, quod non sicut discipuli Ioannis ieiunarent, nec etiam manducantes corporalem illam mundiciam abluendarum manuum magnopere curarent: *Non possunt*, inquit, *lugere filij Sponsi quando cum illis Sponsus est.* Et alibi: *Non quod intrat in os coinquinat hominem, sed quod procedit ex ore. Quae autem procedunt de ore, de corde exeunt, & ea coinquinant hominem. Non lotis autem manibus manducare non coinquinat hominem.* Nullus itaque cibus inquinat animam, sed appetitus cibi vetiti. Sicut enim corpus non nisi corporalibus inquinatur sordibus, sic nec anima nisi spiritualibus. Nec timendum est quicquid agatur in corpore, si animus ad consensum non trahitur. Nec confidendum de mundicia carnis, si mens voluntate corrumpitur. In corde igitur tota mors animae consistit & vita. Vnde Salomon in Prouerbijs: *Omni custodia serua cor tuum, quoniam ex ipso vita procedit.* Et iuxta praedictam Veritatis assertionem, ex corde procedunt quae coinquinant hominem: quoniam bonis vel malis desiderijs anima damnatur vel saluatur. Sed quoniam animae & carnis in vnam coniunctarum personam maxima est vnio, summopere prouidendum est ne carnis delectatio ad consensum animam trahat, & dum nimis indulgetur carni, ipsa lasciuiens reluctetur spiritui, & quam oportet subijci incipiat dominari. Hoc autem cauere poterimus, si necessarijs omnibus concessis superfluitatem, vt saepius dictum est, penitus amputemus: & infirmo sexui nullum ciborum vsum, sed omnium denegemus abusum. Omnia concedatur sumi, sed nulla immoderate consumi, *Omnis*, inquit Apostolus, *creatura Dei bona, & nihil reijciendum quod cum gratiarum actione percipitur. Sanctificatur enim per verbum Dei & orationem. Hoc proponens fratribus, bonus eris minister Christi Iesu, nutritus verbis fidei, & bonae doctrinae quam affecutus es.* Et nos igitur cum Timotheo hanc Apostoli insecuti doctrinam, & iuxta Dominicam sententiam nihil in cibis nisi crapulam & ebrietatem vitantes, sic omnia temperemus, vt ex omnibus infirmam naturam sustentemus, non vitia nutriamus. Et quo quaeque amplius sua superfluitate possunt nocere, temperamenti magis accipiant. Maius quippe est ac laudabilius temperate

temperatè comedere, quàm omninò abstinere. Vnde & beatus Augustinus in Libro de bono coniugali, cùm de corporalibus ageret sustentamentis: *Nequaquam*, inquit, *eis benè utitur, nisi qui & uti non potest. Multi quidem facilius se abstinere ut non utantur, quàm temperant ut benè utantur. Nemo tamen potest eis sapienter uti, nisi potest & continenter non uti.* Ex hoc habitu & Paulus dicebat: *Scio & abundare & penuriam pati.* Penuriam quippè pati, quorumcumque hominum est: sed scire penuriam pati, magnorum est. Sic & abundare quisquam hominum incipere potest. Scire autem abundare non nisi eorum est, quos abundantia non corrumpit. De vino itaque, quia, sicut dictum est, luxuriosa res est & tumultuosa, idcòque tam continentix quàm silentio maximè contrarium, aut omnino feminæ abstineant propter Deum, sicut vxores gentilium ab hoc inhihentur metu adulteriorum: aut ita ipsum aqua temperent, ut & siti pariter & sanitati consulat, & vires nocendi non habeat. Hoc autem fieri credimus, si huius mixturæ quarta pars ad minus aquæ fuerit. Difficillimum verò est ut adpositum nobis potum sic obseruemus, ut non vsque ad satietatem indè bibamus, sicut de vino beatus præcipit Benedictus. Ideoque tutius arbitramur, ut nec satietatem interdiciamus, ne indè * periculum incurramus. Non enim Regul. c. 40.
* al. vita satietas, ut sæpè iam diximus, sed superfluitas in crimine est. Ut verò pro medicamento herbata vina conficiantur, aut etiam vinum purum sumatur, non prohibendum est. Quibus tamen Conuentus nunquam utatur, sed separatim ab infirmis hæc degustentur. Triticæ quoque medullæ similaginè omninò prohibemus, sed semper cùm habuerint triticum, tertia pars ad minus grossioris annonæ misceatur. Nec calidis vnquam oblectentur panibus, sed qui ad minus vno die antè cocti fuerint. Cæterorum verò alimentorum providentiam sic habeat Diaconissa, ut sicut iam præfati sumus, quod vilius poterit cōparari, vel facilius haberi, infirmi sexus naturæ subueniat. Quid enim stultius quàm cùm sufficiant nostra emamus aliena? & cùm sint domi necessaria, quæramus extra superflua? & cùm sint ad manum quæ sufficiant, laboremus ad illa quæ superfluant? De qua quidem necessaria discretionis moderatione nō tam humano quàm Angelico, seu etiam Dominico instructi documento, nouerimus ad huius

Genes. 18.
Marc. 8.
Ioan. 6.

Epist. 5. ad
Lucil.

Cap. 13. in
Iob. 39.

Genes. 25.
3. Reg. 17.

vitæ necessitudinem transigendam non tam qualitatem ciborum exquirere, quàm his quæ præsto sunt contentos esse. Vnde & Abraham carnibus apparatus Angeli vescuntur, & inuentis in solitudine piscibus ieiunam multitudinem Dominus Iesus refecit. Ex quo videlicet manifestè docemur indifferenter tam carniū quàm piscium esum non esse respiciendum, & eum præcipuè sumendum, qui & offensa peccati careat, & sponte se offerens faciliorem habeat apparatus, & minorem exigat expensam. Vnde & Seneca maximus ille paupertatis & continentiae sectator, & summus inter vniuersos Philosophos morum ædificator: *Propositum, inquit, nostrum est secundum naturam viuere. Hoc cōtra naturam est, torquere corpus suum, & faciles odisse mundicias, & squalorem appetere, & cibis non tantum vilibus uti, sed certis & horridis.* Quemadmodum desiderare delicatas res luxuriæ est, ita & vsitatas & non magno parabiles fugere dementiæ. Frugalitatem exigit Philosophiæ, non pœnam. Potest tamen esse non incompressa frugalitas, hic mihi modus placet. Vnde & Gregorius Moralium libro xxx. cū ipsi hominum moribus non tam ciborum quàm animorum qualitatem attendendam esse doceret, ac gulæ tentationes distingueret: *Aliquando, inquit, cibos lautiores querit, aliquando quelibet sumenda præparari accuratius appetit.* Nonnunquam verò & abiectius est quod desiderat, & tamen ipso æstu immensi desiderij peccat. Ex Ægypto populus eductus in Heremo occubuit, quia despecto manna cibos carniū petijt, quos lautiores putauit. Et primogenitorum gloriam Esau amisit, quia magno æstu desiderij vilem cibum, id est lenticulam concupiuit, quam dum vendendis etiam primogenitis prætulit, quo in illam appetitu anhelaret indicauit. Neque enim cibus, sed appetitus in vitio est. Vnde & lautiores cibos plerumque sine culpa sumimus, & abiectiores non sine reatu consciētiae degustamus. Hic quippe quem diximus Esau primatum per lenticulam perdidit, & Helias in Heremo virtutem corporis carnes edendo seruabit. Vnde & antiquus hostis, quia nō cibum, sed cibi concupiscentiam esse causam damnationis intelligit, & primum sibi hominem non carne, sed pomo subdidit; & secū dum non carne, sed pane tentauit. Hinc est quod plerumque Adam culpa committitur etiam cū abiecta & vilia sumun-

tur. Ea itaque sumenda sunt, quæ naturæ necessitas quærit, & non quæ edendi libido suggerit. Minori verò desiderio concupiscimus quæ minus pretiosa esse videmus, & quæ magis abundant, & vilius emuntur: sicut est communium cibis carniū, qui & infirmam naturam multo validius quàm pisces confortat, & minores expensas, & faciliorem habet apparatus. Vsus autem carniū ac vini, sicut & nuptiæ intermedia boni & mali, hoc est indifferentia computantur. Licet copulæ nuptialis vsus omninò peccato non careat, & vinum omnibus alimentis periculosius existat. Quod profectò si temperatè sumptum religioni non interdicitur, quid aliorū timeamus alimentorum, dummodo in eis modus nō excedatur? Si beatus ipsum Benedictus quod Monachorum non esse profiteretur, quadam tamen dispensatione Monachis huius temporis, iam refrigescente pristinæ charitatis fervore, concedere cogitur; quid cætera non indulgere feminis debeamus, quæ adhuc eis nulla professio interdicit? Si Pontificibus ipsis, & Ecclesiæ sanctæ rectoribus: si denique Monasterijs Clericorū sine offensa carnibus etiam vesci licet, quia nulla scilicet professione ab eis religantur: quis hias culpet feminis indulgeri, maximè si in cæteris maiorem tolerant distractionē? Sufficit quippè discipulo ut sit sicut magister eius. Et magna videtur credulitas, si quod Monasterijs Clericorū indulgetur, Monasterijs feminarum prohibeatur. Nec parvum etiam æstimandum est, si feminæ cum cætera Monasterij distractione in hac vna carniū indulgentia religione fidelium laicorum inferiores non sint: præsertim cū, teste Chrysostomo, nihil licet secularibus, quod non liceat monachis: excepto concumbere tantū cum vxore. Beatus quoque Hieronymus Clericorū religionē non inferiorē quā Monachorū iudicans, ait: *Quasi quicquid in Monachos dicitur non redūdet in Clericos, qui sunt patres Monachorū.* Quis etiā ignoret omninò discretionem contrarium esse, si tanta debilibus quanta fortibus imponantur onera? si tanta feminis quanta viris iungatur abstinencia? De quo etiam si quis supra ipsum naturæ documentum auctoritatem efflagitet, beatum quoque super hoc Gregorium consulat. Hic quippè magnus Ecclesiæ tam Rector quàm Doctor de hoc quoque cæteros Ecclesiæ Doctores diligenter instruens, libri Pastoralis capitulo

Regul. c. 40.

Matth. 10

Homil. 7. in
cap. 4. Epist.
ad Hebr.
Tom. 1.
Epist. 10.

Part. 3. ad-
monit. 1.

Contra illos
qui abstinē
vel abstinē-
dum prædi-
cant à car-
nibus, & nō
alijs cibis.
1. Cor. 15.

XXIIII. ita meminit: *Aliter igitur admonendi sunt viri, atque aliter femine: quia illis grauiora, istis verò sunt iniungenda leuiora; & illos magna exerceant, istas verò leuia demulcendo conuertant. Quæ enim parua sunt in fortibus, magna reputantur in debilibus.* Quamuis hæc quoque vilium licentia carniū minus habeat oblectamenti quàm ipsæ piscium vel auium carnes, quas minimè tamen nobis beatus interdicat Benedictus. De quibus etiam Apostolus, cū diuersas species carnis distingueret: *Non omnis, inquit, caro eadem caro, sed alia hominum, alia pecorū, alia volucrum, alia piscium.* Et pecorum quidem & auium carnes in sacrificio Domini lex ponit: pisces verò nequaquā: vt nemo piscium esum mundiorē Deo quàm carniū credat. Qui etiam tantò est onerosior paupertati vel carior, quantò piscium minor est copia quàm carniū, & minus infirmam corroborat naturam; vt in altero magis grauet, in altero magis subueniat. Nos itaque fortunæ pariter & naturæ hominum consulentes, nihil in alimentis, vt diximus, nisi superfluitatem interdiciamus. Ipsum itaque carniū siue cæterorum esum temperamus, vt omnibus concessis maior sit abstinētia Monialium, quàm quibusdam interdictis modo sit Monachorum. Igitur ipsum quoque carniū esum ita temperari volumus, vt non ampliùs quàm semel in die sumant, nec diuersa indè fercula eidem personæ parentur; nec seorsum aliqua superaddantur pulmenta, nec vllatenus ei vesci liceat plusquam ter in hebdomada, prima videlicet feria, tertia, & quinta feria, quantacumque etiam festiuitates intercurrent. Quo namque solemnitas maior est, maioris abstinētiæ deuotione est celebranda. Ad quod nos egregius doctor Gregorius Nazianzenus vehementer exhortans, lib. iij. de luminibus vel secundis Epiphanijs ait: *Diem festum celebremus non ventri indulgentes, sed spiritu exultantes.* Idē lib. iiij. de Penthecoste & Spiritu sancto: *Et hic est noster festus dies, ait, in animæ thesauros perenne aliquid & perpetuum recondamus, non ea quæ pertranseunt & dissoluuntur. Sufficit corpori malicia sua, non indiget copiosiore materia, nec insolens bestia abundantioribus cibis vt insolentior fiat, & violentius urgeat.* Idcirco autem spiritualiter magis est agenda solemnitas, quam & beatus Hieronymus eius discipulus secutus, in Epistola sua de acceptis muneribus ita quodam loco meminit: *Vnde nobis sollicitius*

Tom. 1.
Epist. 19.

providendum, ut solemnem diem non tam ciborum abundantia, quam spiritus exultatione celebremus: quia valde absurdum est nimia saturitate honorare velle martyrem, quem sciamus Deo placuisse ieiunjs.

Augustinus de pœnitentiæ medicina: *Attēde tot martyrum mil-* Cap. 4.

lia. Cur enim natalitia eorum conuiujs turpibus celebrare delectat, & eorum vitam sequi honestis moribus non delectat? Quotiens vero carnes deerunt, duo eis fercula qualiumcumque pulmentorum concedimus, nec superaddi pisces prohibemus. Nulli verò preciosi saporibus cibis apponantur in Conuentu, sed ijs contentæ sint, quæ in terra, quam inhabitant, nascuntur: fructibus verò non nisi in cœna vescantur. Pro medicamento autem quibus opus fuerit, vel herbas vel radices seu fructus aliquot, vel alia huiusmodi nunquam prohibemus mensis apponi. Si qua forte peregrina Monialis hospitio recepta mensis intererit, ferculo ei aliquo superaddito charitatis sentiat humanitatem. De quo quidem si quid distribuere voluerit, licebit. Hæc autem, vel si plures fuerint, in maiore mensa residebunt, & eis Diaconissa ministrabit. Postea cum alijs, quæ mensis ministrant, comestura. Si qua verò sororum pariori cibo carnem domare voluerit, nullatenus hoc ipsa nisi per obediētiam præsumat, & nullatenus hoc ei denegetur, si hoc non lenitate, sed virtute videtur appetere, quod eius firmitudo valeat tolerare. Nulli tamen vnquam permittatur, ut per hoc Conuentu nec ut aliquam diem sine cibo transigat. Sagiminis condimento sexta feria nunquam vtantur, sed quadragesimali cibo contentæ sponso suo ea die passo quadam compatiantur abstinentia. Illud vero non solum prohibendum, sed vehementer est abhorrendū, quod in plerisque Monasterijs agi solet, quod videlicet parte aliqua panis, quæ superest esui, & pauperibus est reseruanda, manus & cultellos mundare & extergere solent, & ut mappis parcant mensarum panem polluant pauperum. Imò eius qui se attendens in pauperibus ait: *Quod uni ex minimis meis fecistis, mihi fecistis.**

* locus corruptus.

DE abstinentia ieiuniorum generalis institutio Ecclesiæ illis sufficiat, nec supra fidelium laicorum religionem in hoc eas grauare præsumimus, nec virtuti virorum earum infirmitatem in hoc præferre audemus. Ab æquinoctio vero autumnali vsque ad Pascha propter dierum breuitatem vnā in die

comestionem sufficere credamus. Quod quia non pro abstinentia religionis, sed pro breuitate dicimus temporis, nulla hîc ciborum genera distinguemus.

1. Tim. 2.

1. Petr. 3.

Luc. 16.

Matth. 11.

Ibidem.

Luc. 16.

1. Petr. 3.

Eccles. 19.

PRETIOSAE vestes, quas omninò Scriptura dānat, sum-
mopere fugiantur. De quibus nos præcipuè Dominus de-
hortans & damnati diuitis superbiam de ijs accusat, & Ioan-
nis humilitatem è contrario commendat. Quod beatus dili-
genter attendens Gregorius homilia Euangeliorum vi. *Quid
est, inquit, dicere, Qui mollibus vestiuntur, in domibus regum sunt:
nisi aperta sententia demonstrare quod non celesti, sed terreno regno
militant, qui pro Deo perpeti aspera fugiunt, sed solis exterioribus de-
diti presentis vite molliem delectationemque querunt?* Idem Ho-
milia xl. *Sunt nonnulli, qui cultum subtilium pretiosarumque vestiū
non putant esse peccatum. Quod videlicet si culpa non esset, nequa-
quam sermo Dei tam vigilanter exprimeret, quod diues, qui torque-
batur ad inferos, bysso & purpura indutus fuisset. Nemo quippe ve-
stimenta præcipua nisi ad inanem gloriam querit, videlicet ut hono-
rabilior ceteris esse videatur. Nam pro sola inani gloria vestimentū
pretiosis queritur. Res ipsa testatur, quod nemo vult ibi preciosis ve-
stibus indui, ubi ab alijs non possit videri.* A quo & prima Petri E-
pistola seculares & coniugatas feminas dehortans ait: *Simili-
ter & mulieres subdita sint viris suis, ut & si qui non credunt verbo
per mulierum conuersationē, sine verbo lucrifiant; considerantes in
timore castam conuersationem vestram. Quarum sit non extrinsecus
capillatura, aut circundatio auri, aut indumenti vestimentorius cul-
tus, sed qui absconditus corde est homo incorruptibilitate quieti &
modesti spiritus, quod est in conspectu Domini locuples.* Bene autem
feminas potius quàm viros ab hac vanitate censuit dehortā-
das, quarum infirmus animus id amplius appetit, quo per eas
& in eis amplius imitari luxuria possit. Si autem seculares
hinc inhibendæ sunt feminae, quid Christo deuotas conuenit
providere? quarum hoc ipsum illis est cultus, quòd sunt in-
cultæ. Quæcumque igitur hunc appetit cultum vel non
renuit oblatum, castitatis perdit testimonium. Et quæcum-
que talis est, non se religioni præparare, sed fornicationi cre-
datur, nec tam monialis quàm meretrix cēseatur. Cui & ipse
cultus est tanquam lenonis præconium, qui incestum prodit
animum, sicut scriptum est: *Amictus corporis, & risus dentium, &
ingressus hominis enunciant de illo.* Legimus Dominum in Ioan-

ne, vt iam suprâ meminimus, vilitatem seu asperitatem vestiũ potius quàm esce commendasse, atque laudasse. *Quid existis, inquit, in desertum videre? hominem mollibus vestitum?* Habet enim nonnunquam vsus pretiosorum ciborum vtilem aliquã dispensationem, sed vestium nullam. Quæ videlicet vestes quantò sunt pretiosiores, tantò carius custodiuntur, & minus proficiunt, & e mentem ampliùs grauant, & præ subtilitate sui facilius possunt corrumpi, & minus corpori præbent fomenti. Nulli verò panni magis quàm nigri lugubrem pœnitentiæ habitum decent, nec adedò sponsis Christi pelles aliquæ conueniunt, sicut agnina: vt ipso quoque habitu Agnum sponsum virginum indutæ videantur, vel inducere moneantur. Vela verò earum non de serico, sed de tincto aliquo lineo panno fiant. Duo autem velorum genera esse volumus, vt alia sint scilicet virginũ iã ab ipso consecratarũ, alia verò minimè. Quæ verò pudictarum sunt virginũ, crucis sibi signum habeant impressum; quo scilicet ipsę integritate quoque corporis ad Christũ maximè pertinere monstrentur: & sicut in consecratione distare à cæteris, ita & hoc habitus signo distinguantur, quo & quique fidelium territi magis abhorreant in concupiscentiam earum exardescere. Hoc autem signum virginalis mundiciæ in summitate capitis candidis expressũ filis virgo gestabit, & hoc nullatenus antequam ab Episcopo consecratur gestare præsumat. Nulla autem alia vela hoc signo insignita sint. Interulas mundas ad carnẽ habeant, in quibus etiam cinctæ semper dormiant. Culcitrarum quoque molliem vel lintheaminum vsum infirmæ ipsarum non negamus naturæ. Singulæ verò dormiant & comedant. Nulla pœnitens indignari præsumat, si vestes vel quæcumque alia sibi ab aliquibus transmissa alij, quæ ampliùs indiget, concedantur sorori. Sed tunc maximè gaudeat, cùm in sororis necessitate fructũ habuerit eleemosynæ, vel se respexerit non solum sibi, sed alijs viuere. Alioquin ad sanctæ societatis fraternitatem non pertinet, nec proprietatis sacrilegio caret. Sufficere autem ad corpus contegendum credimus interulam, pelliceam, togam; & cum multum exasperauerit frigus, insuper mantellum. Quo videlicet manteilo pro opertorio quoque vti iacentes poterunt. Oportebit autem pro infestatione vermium vel grauamine sordiũ ablucen-

darum, hæc omnia esse duplicia indumenta sicut ad literam in laude fortis & prouidæ mulieris Salomon ait: *Non timebit domui suæ à frigoribus niuis. Omnes enim domestici eius vestiti duplicibus.* Quorum ita sit moderata longitudo, vt vltra oram sotularium non procedant, ne puluerem moueant. Manicæ verò extensionem brachiorum & manuum non excedant. Crura verò & pedes caligæ pedules & sotulares muniât. Nec vnquã occasione religionis nudæ pedes incedât. In lectis culcitra vna, puluinar, auriculare, lodex & linteolũ sufficiât. Caput verò muniant vitta candida, & velum desuper nigrum, & pro tonsura capillorum pilleum agninum, cùm opus fuerit supponatur.

N E C in victu tantũ aut vestitu superfluitas euitetur, verum & in ædificijs aut quibuslibet possessionibus. In ædificijs quidẽ hoc manifestè dignoscitur, si ea maiora vel pulchriora quàm necesse sit componantur, vel si nos ipsa sculpturis vel picturis ornantes, non habitacula pauperum ædificemus, sed palatia Regum erigamus. *Filius hominis*, inquit Hieronymus, *non habet ubi caput reclinet, & tu amplas porticus & ingentia tectorũ spatia metiris?* Cum pretiosis vel pulchris delectamur equitaturis, non solum superfluitas, sed elationis vanitas innotescit. Cum autem animalium greges vel terrenas multiplicamus possessiones, tunc se ad exteriora dilatat ambitio: & quãto plura possidemus in terra, tantò ampliùs de ipsis cogitare cogimur, & à contemplatione cælestium deuocamur. Et licet corpore claustris recludamur; hæc tamen quæ foris sunt, & diligit animus, sequi cogitur, & se pariter huc & illuc cum illis diffundit, & quo plura possidentur quæ amitti possunt, maiori nos metu cruciât; & quo pretiosiora sunt ampliùs diliguntur, & ambitione sui miserum magis illaqueant animũ. Vnde omnino prouidendum est, vt domui nostræ sumptibusque nostris certum præfigamus modum, nec supra necessaria vel appetamus aliqua, vel recipiamus oblata, vel retineamus suscepta. Quicquid enim necessitati superest, in rapina possidemus; & tot pauperum mortis rei sumus, quot inde sustentare potuimus. Singulis igitur annis cùm collecta fuerint victualia, prouidendum est quantum sufficiat per annum; & si qua superfuerint, pauperibus non tam danda sunt quàm reddenda. Sunt qui prouidentie modum ignorantes,

cũ

Tom. I.
Epist. I.

cùm redditus paucos habeant, multam habere familiã gaudent. De cuius quidem procuratione dum grauantur, impudenter hanc quærentes mendicant, vel quæ non habent violenter ab alijs extorquent. Tales etiam iam nonnullos Monasteriorum Patres conspiciamus, qui de multitudine Conuentus gloriantes, non tam bonos filios quàm multos habere student, & magni videntur in oculis suis, si inter multos maiores habeantur. Quos quidem vt ad suum trahant dominium, cùm aspera deberent eis prædicare, lenia promittunt, & nulla examinatione antea probatos quos indiscretè suscipiunt facilè apostatates perdunt. Talibus, vt video, improperebat Veritas, dicens: *Væ vobis qui circuitis mare & aridam, vt faciatis unum proselitum. Quem cùm feceritis, facitis illum filium gehennæ duplò quàm vos.* Qui profectò minus de multitudine gloriarentur si salutem animarum magis quàm numerum quærerent, & de suis viribus in ratione sui regiminis reddenda minus præsumerent. Paucos Dominus elegit Apostolos, & de ipsa electione sua vnus in tantum apostatauit, vt pro ipso Dominus diceret: *Nunquid ego duodecim vos elegi, & vnus ex vobis diabolus est?* Sicut autem de Apostolis Iudas, sic & de septem Diaconibus Nicolaus periit. Et cùm paucos adhuc Apostoli cōgregassent, Ananias & Sapphira vxor eius mortis excipere sententiã meruerunt. Quippè & ab ipso antea Domino cùm multi abiissent discipulorū retrorsum, pauci cum ipso remanserunt. Arcta quippè via est, quæ ducit ad vitam, & pauci ingrediuntur per eam. Sicut è contrario lata est & spatiosa, quæ ducit ad mortem; & multi sunt qui se vltro ingerant. Quia sicut ipse Dominus testatur alibi: *Multi vocati, pauci verò electi.* Et iuxta Salomonem: *Stultorum infinitus est numerus.* Timeat itaque quisquis de multitudine gaudet subiectorum, ne in eis iuxta Dominicã assertionem pauci reperiantur electi, & ipse immoderatè gregem suū multiplicans minùs ad custodiam eius sufficiat, vt ei rectè à spiritualibus illud propheticum dici possit. *Multiplicasti gentem, non magnificasti letitiam.* Tales vtique scilicet de multitudine gloriantes, dum tam pro suis quàm suorum necessitatibus sapius exire, atque ad seculum redire, & mendicando discurrere coguntur, curis se corporalibus magis quàm spiritualibus implicant, & infamiam sibi magis quàm

Cōtra illos qui circumueniunt alios vt intrent religionē, qui in multitudine gloriātur, & per mundū discurrent.

Matth. 23.

* al. Nonne
Ioan. 6.

Act. 5.

Ioan. 6.

Matth. 7.

Matth. 20.

Esai. 9.

gloriam acquirunt. Quod quidem in feminis tantò magis est erubescendum, quanto eas per mundum discurrere minus videretur tutum. Quicquid igitur quietè vel honestè cupit viuere, & officijs vacare diuinis; & tam Deo quàm seculo charus haberi, timeat aggregare quos non possit procurare, nec in expensis suis de alienis cōfidat marsupijs; nec eleemosynis petendis, sed dandis inuigilet. Apostolus ille magnus Euangelij prædicator, & habens potestatem de Euangelio sumptus accipere, laborat manibus; ne quos grauare videatur, & gloriam suam euacuet. Nos ergo, quorum non est prædicare, sed peccata plangere, quæ temeritate vel impudentia mendicantes quærimus? Vnde hos, quos inconsideratè congregamus, sustentare possumus? Qui etiam sæpè in tantam prorumpimus insaniam, vt cum prædicare nesciamus, prædicatores conducamus; & pseudoapostolos nobiscum circumducendo, cruces & philacteria reliquiarum gestemus, vt tam hæc quàm verbum Dei seu etiam figmenta diaboli simplicibus & idiotis vendamus Christianis, & eis promittamus quæcumque ad extorquendos nummos proficere credimus. Ex qua quidem impudenti cupiditate, quæ sua sunt non quæ Iesu Christi quærente, quantum iam ordo noster & ipsa diuini prædicatio verbi viluerit, neminem iam latere arbitror. Hinc & ipsi Abbates vel qui maiores in Monasterijs videntur, potentibus seculi & mundanis curijs sese importunè ingerentes, iam magis carnales esse quàm Cœnobitæ didicerunt. Et fauorem hominum quacumque arte venantes, crebriùs cum hominibus fabulari, quàm cum Deo loqui, consueuerunt. Illud sæpè frustra legentes, atque negligentes, vel audientes; sed non exaudientes quod beatus Anthonius admonet, dicens: *Sicut pisces si tardauerint in sicco moriuntur: ita & Monachi tardantes extra Cellulam, aut cum viris secularibus immorantes, à quietis proposito resoluuntur.* Oportet ergo sicut piscem in mari, ita & nos ad Cellam recurrere, ne fortè foris tardantes obliuiscamur interioris custodiæ. Quod ipse quoque Monasticæ scriptor Regulæ, scilicet beatus Benedictus, diligenter attendens; quasi in Monasterijs assiduos velit esse Abbates, & super custodiam sui gregis sollicitè stare, tam exemplo quàm scripto patenter edocuit. Hic enim cum à fratribus ad sacratissimam sororem suam visitandam

1. Cor. 9.

1. Thessal. 2.

1. Cor. 9.

Vis. Patr.
par. 2. lib.
de quiesc.

profectus, cū ipsa eum pro ædificatione saltem nocte vna
 vellet retinere, apertè professus est manere extra Cellā nul-
 latenus se posse. Nec ait quidem, *non possumus*; sed, *non possum*, Gregor. lib.
2. dialog. c.
33.
 quia hoc per eum fratres, non ipse posset, nisi hoc & à Do-
 mino, sicut postmodum actum est, reuelante. Vnde & cū
 Regulam scriberet, nusquam de Abbatis, sed solummodò
 fratrum egressu meminerit. De cuius etiam assiduitate ita
 cautè prouidit, vt in vigilijs Dominicorum & festorum die-
 rum Euangelicam lectionem, & quæ illi adiuncta sunt, non
 nisi ab Abbate præcipiat dici. Qui etiam instituens, vt men- Regul. c. 11.
 sa Abbatis cum peregrinis & hospilibus sit semper, & quo-
 tiens minus sunt hospites cum eo, quos voluerit de fratribus Regul. c. 36.
 vocare, seniore vno tantū aut duobus dimissis cum fratri-
 bus; patenter insinuat nunquam in tempore mensæ Abbatē
 Monasterio debere deesse, & vt delicatis principum ferculis
 iam assuetus cibarium panem Monasterij subiectis derelin-
 quat, de qualibus quidem Veritas: *Alligant*, inquit, *onera* Matth. 23:
grauia, & importabilia, & imponunt in humeros hominum: digito
autem suo nolunt ea mouere. Et alibi de falsis prædicatoribus: Matth. 7.
Attendite à falsis Prophetis qui veniunt ad vos. Veniūt, inquit, per
 se, non à Deo missi, vel expectantes vt pro eis mandetur.
 Ioannes Baptista princeps noster, cui Pontificatus hæredita-
 te cedebat, semel ab vrbe recessit ad heremum, Pōtificatum
 scilicet pro Monachatu, ciuitates pro solitudine deserens.
 Et ad eum populus exhibat, nec ipse ad populū introibat. Qui Marc. 1:
 cū tantus esset vt Christus crederetur, & nulla in ciuitati-
 bus corrigere posset: in illo iam erat lectulo, vnde pulsanti
 dilecto respondere paratus erat: *Expoliaui me tunica mea, quo-* Cant. 5:
modo induar illa? Laui pedes meos, quomodo inquinabo illos? Quis-
 quis itaque quietis Monasticæ secretum desiderat, lectulum
 magis quàm lectum se habere gaudeat. De lecto quippè, vt
 Veritas ait, *vnus assumetur, & alter relinquetur.* Lectulum vero
 sponsæ esse legimus, id est animæ contemplatiuæ Christo ar-
 etiū copulatæ, & summo ei desiderio adhærentis. Quem
 quicumque intrauerit, neminem esse relictum legimus. De
 quo & ipsamet loquitur: *In lectulo meo pernoctans quasi ui quem*
diligis anima mea. A quo etiam lectulo ipsa surgere dedignās,
 vel formidans, pulsanti dilecto quod supra meminimus res-
 pondeat. Non enim sordes nisi extra lectum suum esse credit,

quibus inquinari pedes metuit. Egressa est Dina ut alienigenas videret, & corrupta est. Et sicut Malcho illi captiuo Monacho ab Abbate suo prædictum est, & ipse postmodum est expertus; Ovis quæ de ouili egreditur cito lupi moribus patet. Ne igitur multitudinem congregemus, pro qua egrediendi occasionem quæramus, imò & egredi compellamur, & cum detrimento nostri lucrum faciamus aliorum: ad modum videlicet plumbi, quod ut argentum seruetur in fornace consumitur. Verendum potius est ne & plumbum pariter & argentum fornax vehemens consumat tentationum. Veritas, inquiunt, ait: *Et eum qui venit ad me non eijciam foras.* Nec nos eijci susceptos volumus, sed de suscipiendis providere: ne cum eos intus susceperimus, nos ipsos extra pro eis eijciamus. Nã & ipsum Dominum non susceptum eiecisse legimus, sed offerentem se respuisse. Cui quidem dicenti: *Magister, sequar te quocumque ieris.* Respondit, *Vulpes foveas habent, &c.* Qui etiã de sumptibus nos ante providere, cum aliquid facere meditatur, cui sint ipsi necessarij, diligenter admonet, dicens: *Quis vestrum volens turrim ædificare, nonne prius sedens computat sumptus qui necessarij sunt, si habet ad perficiendum? Ne postea quàm posuerit fundamentum, & non potuerit perficere, omnes qui viderint incipiant illudere ei, dicentes: Quia hic homo cepit ædificare, & nō potuit consummare.* Magnum est si vel se vnum quis saluare sufficiat, & periculosum est multis eum providere qui vix ad custodiam sui sufficit vigilare. Nemò verò studiosus est in custodiendo, nisi qui pauidus fuerit in suscipiendo. Et nemo sic perseverat in cœpto, sicut qui tardus est & prouidus ad incipiendum. In quo quidem tantò maior feminarum sit prouidentia, quantò earum infirmitas magna minus tolerat onera, & quietè plurimum est fouenda.

Cap. 1.
SPECULUM animæ Scripturam sacram constat esse, in quam quilibet legendo viuens, intelligendo proficiens, morum suorum pulchritudinem cognoscit, vel deformitatem deprehendit: ut illam videlicet augere, hanc studeat removere. Hoc nobis speculum beatus commemorans Gregorius in ij. Moralium ait: *Scriptura sacra mentis oculis quasi quoddam speculum opponitur, ut interna nostra facies in ipsa videatur. Ibi etenim facta cognoscimus, ibi pulchra nostra conspiciamus. Ibi sentimus quantum proficimus. Ibi à profectu quàm longe distamus.*

Qui autem Scripturam conspicit quam non intelligit, quasi cæcus ante oculos tenet, in quo qualis sit cognoscere non valet, nec doctrinam quærit in scriptura, ad quam ipsa est tantummodo facta, & tanquam asinus applicetur ad lyram, sic otiosus sedet ad scripturam, & quasi panem appositum habet, quo ieiunus non reficitur, dum verbum Dei nec se per intelligentiam penetrante, nec alio ei docendo frangente, inutiliter cibum habet qui ei nullatenus prodest. Unde & Apostolus generaliter ad scripturarum studium nos adhortans: *Quæcumque, inquit, scripta sunt, ad nostram doctrinam scripta sunt; ut per patientiam & consolationem scripturarum spem habeamus.* Et alibi: *Implemini Spiritu sancto, loquentes vobismet ipsis in psalmis, & hymnis, & canticis spiritualibus.* Sibi quippe vel secum loquitur, qui quod profert intelligit, vel de intelligentia verborum suorum fructum facit. Idem ad Timotheum: *Dum venio, inquit, attende lectioni, exhortationi, doctrinæ.* Et iterum: *Tu verò permane in ijs quæ didicisti, & credita sunt tibi; sciens à quo didiceris, & quia ab infantia sacras literas nosti, quæ te possunt instruere ad salutem, per fidem quæ est in Christo Iesu.* Omnis Scriptura diuinitus inspirata, utilis est ad docendum, ad arguendum, ad corripiendum, ad erudiendum in iustitia, ut perfectus est homo Dei ad omne opus bonum instructus. Qui etiam ad intelligentiam Scripturæ Corinthios admonens, ut quæ videlicet alij de Scriptura loquuntur exponere valeant: *Secramini, inquit, charitatem, emulamini spiritualia: magis autem spiritus ut prophetetis.* Qui enim loquitur lingua, non hominibus loquitur, sed Deo. Qui autem prophetat, Ecclesiam ædificat. Et ideo qui loquitur lingua, orat ut interpretetur. *Orabo spiritu, orabo & mente. Psallam spiritu, psallam & mente.* Caterum si benedixeris spiritu, quis implebit locum idiotæ? *Quomodo dicet amen super tuam benedictionem, quoniam quid dicas nescit?* Nam tu quidem bene gratias agis, sed alter non ædificatur. *Gratias ago Deo, quoniam omnium vestrum lingua loquor, sed in ecclesia volo quinque verba sensu meo loqui, & alios instruam, quàm decem nullia ut verborum.* Fratres nolite effici parui sensibus, sed malitia paruuli estote, sensibus autem perfecti. Loqui lingua dicitur qui ore tantum verba format, non intelligentia exponendo ministrat. Prophetat verò siue interpretatur qui more Prophetarum, qui videntes dicuntur, id est intelligentes, ea quæ dicit intelligit, ut ipsa exponere possit.

Rom. 15.

Ephes. 3.

1. Tim. 4.

2. Tim. 3.

1. Cor. 14.

* al. proficiatis.

Orat ille spiritu siue psallit, qui solo prolationis flatu verba format, non mentis intelligentiam accommodat. Cùm verò spiritus noster orat, idest nostræ prolationis flatus solummodo verba format, nec quod ore profertur corde concipitur, mens nostra sine fructu est, quem in oratione videlicet habere debet, vt ipsa scilicet ex intelligentia verborum in Deum compungatur atque accendatur. Vnde hanc in verbis perfectionem nos admonet habere, vt non more plurimorum verba tantùm sciamus proferre, verùm etiam intelligentiæ sensum in ijs habere; atque aliter nos orare vel psallere infructuosè protestatur. Quem & beatus sequens Benedictus:

Regul. c. 19.
Psalm. 46.

Sic stemus, inquit, *ad psallendum, vt mens nostra concordet voci nostre.* Hoc & Psalmista præcipiens, ait: *Psallite sapienter*, vt videlicet verborum prolationi sapor & condimentum intelligentiæ non desit, & cum ipso veraciter Domino dicere valeamus:

Psalm. 128.
Psalm. 146.

Quam dulcia faucibus meis eloquia tua! Et alibi. *Non in tibijs viri beneplacitum erit ei.* Tibia quippe sonitum emittit ad delectationem voluptatis, non ad intelligentiam mentis. Vnde bene in tibijs cantare, nec in hoc Deo placere dicuntur, qui melodia sui cantus sic oblectantur, vt nulla hinc ædificentur

1. Cor. 14.

intelligentia. Qua etiam ratione, inquit Apostolus, cùm benedictiones in Ecclesia fiunt, respondebitur amē, si quod oratur in illa benedictione non intelligitur? Vtrum videlicet bonum sit quod oratio postulat, aut non. Sic enim sæpe multos idiotas & literarum sensum ignorantes videmus in Ecclesia per errorem nonnulla sibi nociua quàm vtilia precari, veluti cùm dicitur: *Vt sic transeamus per bona tēporalia, vt non amittamus æterna.* Facile ipsa consimilis vocis affinitas nonnullos

Ibidem.

sic decipit, vt vel sic dicant: *vt nos amittamus æterna*, vel ita proferant, *vt non admittamus æterna.* Cui etiam periculo Apostolus prouidens ait: *Cæterum si benedixeris spiritu*, id est prolationis tantum flatu verba benedictionis formaueris, non sensu mentem audientis instruxeris, *quis supplet locum idiotæ?* id est quis de assistentibus, quorum est respondere, id ager respondendo, quod idiota non valet, imo nec debet? *Quomodo dicet amen?* cùm videlicet nesciat vtrum in maledictionē potius quàm benedictionem inducas. Denique qui Scripturæ non habent intelligentiam, quomodo sermonis ædificationē sibi ministrabunt, aut etiam regulam exponere vel intellige-

Ibidem.

re, aut vitiose prolata corrigere valebūt: vnde non mediocriter miramur quæ inimici suggestio in Monasteriis hoc egit, vt nulla ibi de intelligendis Scripturis sint studia, sed de cantu tantum vel de verbis solummodò formandis, non intelligendis, habeatur disciplina: quasi ouium balatus plus utilitatis habeat, quàm pastus. Cibus quippe est animæ & spiritalis refectio ipsi diuina intelligentia scripturæ. Vnde & Ezechielē Ezech. 3. Prophetam ad prædicandum Dominus destinans cum prius volumine cibatur, quod statim in eius ore factum est mel di lce. De quo etiam cibo scriptum est in Hieremia: *Paruuli petierunt* Throb. 4. *panem, & non erat qui frangeret eis.* Panem quippe paruulis frangit, qui literæ sensum simplicioribus aperit. Hi verò paruuli panem frangi postulant, cum de intelligentia Scripturæ animam saginari desiderant, sicut alibi Dominus testatur: *Emit-ram famem in terra, nō famem panis, neque sitim aque, sed audiendi* Amos. 8. *verbum Domini.* Hinc autem ē contrariō antiquus hostis famē & sitim audiendi verba hominum, & rumores seculi, claustris Monasteriorum immisit, vt vaniloquio vacantes diuina tantò amplius fastidiamus eloquia, quantò magis sine dulcedine vel condimento intelligentiæ nobis sunt insipida. Vnde & Psalmista vt suprā meminimus: *Quam dulcia faucibus meis elo-* Psal. 118. *quia tua: super mel ori meo.* Quæ quidem dulcedo in quo consisteret statim annexuit dicens: *A mādatis tuis intellexi.* Id est à Ibidem. mandatis tuis potius quàm humanis intelligentiam accepi; illis videlicet eruditus atque instructus. Cuius quidem intelligentiæ quæ sit utilitas non prætermisit, subiungens: *Propter-* Ibidem. *ea odiui omnem viam iniquitatis.* Multæ quippe iniquitatis viæ ita per se sunt apertæ vt facilè omnibus in odiū vel contemptum veniant, sed omnem iniquitatis viam non nisi per eloquia diuina cognoscamus, vt omnes euitare possimus. Hinc & illud est: *In corde meo abscondi eloquia tua, vt non peccem tibi.* Ibidem. In corde potius recondita sunt quàm in ore sonantia, cum eorum intelligentiam meditatio nostra retinet. Quorum quidem intelligentiæ quātò minus studemus, minus has iniquitatis vias cognoscimus atque vitamus, & minus à peccato nobis prouidere valemus. Quæ quidem negligentia tantò amplius in Monachis, qui ad perfectionem adspirant, est arguenda, quantò hæc eis faciliior esset doctrina, qui & sacris abundant libris, & quietis otio perfruuntur. Quos quidem

Vit. Patr.
par. 2. lib. de
direct.

ibidem.

al. vitæ

1. Petr. 3.

Colos. 1.

Colos. 3.

Psal. 1.

Ios. 1.

Cap. 6. in
Job. 26.

de multitudine scriptorum gloriantes, sed ab eorum lectione vacantes, senex ille in vitis Patrum egregie arguit, dicēs : *Propheta scripserunt libros, Patres autem nostri venerunt post eos, & operati sunt in eis plurima. Etenim successores illorum commendauerunt illos memoria. Venit autem generatio que nunc est, & scripsit in cartis atque membranis, & reposuit in fenestris otiosa.* Hinc & Abbas Palladius ad discendum pariter & docendum nos vehementer adhortans, ait : *Oportet animam secundum Christi voluntatem conuersantem aut discere fideliter quæ nescit, aut docere manifestè quæ nouit.* Si autem vtrumque cum possit non vult, insanix morbo laborat. Initium enim recedendi à Deo fastidium doctrinæ est, & cum non appetit illud quod semper anima esurit, quomodo diligit Deum? Hinc & beatus Anastasius in exhortatione Monachorum, in tantum discendi vel legendi studium commendat, vt per hoc etiam orationes intermitteri suadeat. *Pergam, inquit, per tramitem viæ nostræ. Primum abstinentiæ cura, ieiunij patientia, orandi assiduitas, & legendi, vel si quis adhuc literarum expertus sit, audiendi sit desiderium cupiditate discendi. Hæc enim prima sunt quasi lactantium cunabulorum in Dei agnitione crepundia.* Et post aliqua cum præmisisset ; *Orationibus vero ita instandum est, quod vix eas aliquod tempus interpolet.* postea subiecit, *Has si fieri potest sola legendi intercapedo disrumpat.* Neque enim aliàs Petrus Apostolus admoneret : *Parati semper estote ad rationem reddendam ad omnes poscentes vos de verbo fidei vestre & spei.* Et Apostolus : *Non cessamus pro vobis orantes, vt impleamini agnitione eius in omni sapientia & intellectu spiritali.* Et rursum : *Verbum Christi habitet in vobis abundanter in omni sapientia.* Nam in veteri Testamento similem hominibus curam sacræ præceptionis inculcauit eloquium. Sic enim Dauid ait : *Beatus vir qui non abiit in consilio impiorum, & in via peccatorum non stetit, & in cathedra pestilentie non sedit : sed in lege Domini voluntas eius.* Et ad Iesum Naue Deus loquitur : *Non recedet Liber iste de manibus tuis, & meditaberis in eo die ac nocte.* His quoque negotijs malarum cogitationum lubrica frequenter se ingerunt, & quamuis ipsa sedulitas animum ad Deum præstet intentum, efficit tamen in se mordax seculi cura sollicitum. Quod si hoc frequenter importunè patitur religioso labori deditus, nunquam profectò illis carebit otiosus. Et beatus Papa Gregorius lib. Moral. xix. *Quæ tempora,* inquit,

inquit, iam nunc inchoasse ingemiscimus, cum multos intra Ecclesiam positos cernimus, quia nolunt operari quod intelligunt, aut hoc ipsum quoque sacrum eloquium intelligere ac nosse contemnunt. A veritate enim auercentes auditum, ad fabulas conuertuntur: dum omnes quæ suæ sunt quarunt, non quæ Iesu Christi. Scripta Dei ubique reperta cognoscuntur, opponuntur oculis. Si hæc cognoscere homines dedignantur, pene nullus scire querat quod credidit. Ad quod etiam plurimum ipsos & professionis suæ regula & sanctorum Patrum adhortantur exempla. Nil quippe de doctrina vel studio cantus admonet Benedictus, cum ipse plurimum de lectione præcipiat, & ipsa legendi tempora, sicut & laborandi, diligenter assignet: & in tantum de ipsa quoque dictandi seu scribendi doctrina provideat, ut inter necessaria quæ ab Abbate Monachi sperare debeant tabulas etiam & grassium non prætermittat. Qui cum inter cætera iubeat, quod in capite quadragesimæ omnes Monachi singulos accipiant codices ex bibliotheca, quos per ordinem ex integro legant: quid hoc magis ridiculosum quam lectioni vacare, & intelligentiæ operam non dare? Notum quippè est illud Sapientis prouerbum: *Legere & non intelligere, negligere est.* Tali quippè lectori merito illud Phil. ἀλλ' ὅτις λέγει improperandum est. Quasi enim asinus est ad lyram lector librum tenens, id ad quod liber est factus agere non valens. Multò etiam salubrius tales lectores aliàs intendetent, ubi aliquid utilitatis inesset, quam otiosè vel scripturæ literas inspicerent, vel folia versarent. In quibus profectò lectoribus illud Isaia compleri manifestè videmus: *Et erit, inquit, vobis visio omnium sicut* Esai. 29. *verba libri signati. Quem cum dederint scienti literas, dicent: Lege istum, & respondebit: Non possum. Signatus est enim. Et dabitur liber nescienti literas, diceturque ei: Lege, & respondebit: Nescio literas. Et dixit Dominus. Eo quod appropinquat populus iste ore suo, & labijs suis glorificat me, cor autem eius longe est à me, & timuerunt me mandato hominum & doctrinis: Ideò ecce ego addam ut admirationem faciam populo huic miraculo grandi & stupendo. Peribit enim sapientia à sapientibus eius, & intellectus prudentium eius abscondetur.* Scire quippe literas in claustris dicuntur, quicumque illas proferre didicerunt. Qui profectò, quantum ad intelligentiam spectat, se nescire legem profitentes, librum qui traditur habet signatum æquè ut illi, quos illiteratos ibidem

Tom. 1.
Epist. 4.

Tom. 1.
Epist. 65.

dicunt. Quos quidem Dominus arguens dicit, eos oſe & labijs potiùs quàm corde ſibi appropinquare, quia quæ proferre vtcumque valent, intelligere minimè poſſunt. Qui dū diuinorum eloquiorum ſcientia careant, magis conſuetudinem hominum quàm vtilitatem ſcripturæ obediendo ſequuntur. Propter hoc dominus eos quoque, qui ſapientes inter eos videntur & doctores reſident, excæcandos eſſe cōminatur. Maximus Eccleſiæ doctor & Monastiæ profeſſionis honor Hieronymus, qui nūc ad amorem literarum adhortans, ait: *Ama ſcientiam litterarum, & carnis vitia non amabis*, quantum laborem & expenſas in doctrina earum conſumpſerit eius quoque teſtimonio didicimus. Qui inter cætera quæ ipſemet de proprio ſcribit ſtudio, vt nos etiam videlicet ſuo inſtruat exemplo, ad Pammachium & Oceanum quodam loco ſic meminit: *Dum eſſem inuenis, miro diſcendi feruebam amore. Nec iuxta quorundam præſumptionem ipſe me docui. Apollinarem audiui frequenter Antiochiæ, & colui, cum me in ſcripturis ſanctis erudiret. Iam canis ſpargebatur caput, & Magiſtrum potiùs quàm diſcipulum decebat. Perrexi tamen Alexandriam. Audiui Didimum, in multis ei gratias ago, quod neſcui didici. Putabam me homines finem feciſſe diſcendi. Ruſus Hieroſolimæ & Bethleem, quo labore, quo pretio Baranniam Hebræum nocturnum habui præceptorem? Timebat enim Iudeos, & mihi alterum ſeſe exhibebat Nicodemum. Memori profeſſò mente hic recondiderat quod in Eccleſiaſtico legerat: *Fili à iuuentute tua excipe doctrinam, & uſque ad canos inuenies ſapientiam*. In quo ipſe non ſolùm ſcripturæ verbis, verum etiam ſanctorum Patrum inſtructus exemplis, inter cæteras excellentis illius Monasterij laudes hoc de ſingulari exercitio eius in ſcripturis diuinis adiecit: *Scripturarum verò diuinarum meditationem & intellectum, atque ſcientiæ diuinæ, nunquam tanta vidimus exercitia, vt ſingulos penè eorum oratores credas in diuinam eſſe ſapientiam*. Sanctus etiam Beda, ſicut in hiſtoria refert Anglorum, à puero in Monasterium ſuſceptus: *Cunctum*, inquit, *ex eo tempus vitæ in eiſdem Monasterij habitatione peragens, omnē meditando ſcripturis operam dedi: atque inter obſeruantiam diſciplinæ regularis & quotidianam cantandi in Eccleſia curam ſemper aut diſcere, aut ſcribere dulce habui*. Nunc verò qui in Monasterijs erudiuntur adeò ſtulti perſeuerant, vt literarum*

sono contenti nullam de intelligentia curam assumant, nec cor instruere, sed linguam student. Quos patenter illud Salomonis arguit prouerbiū: *Cor sapientis querit doctrinam, & os stultorum pascetur imperitia*: cū videlicet verbis quæ non intelligit oblectatur. Qui profectò tantò minùs Deum amare & in eum accendi possunt, quantò amplius ab eius intelligētia & à sensu scripturæ de ipso nos erudientis absistunt. Hoc autem duabus maximè de causis in Monasterijs accidisse credimus, vel per laicorum, scilicet conuersorum, seu etiam ipsorum Præpositorum inuidiam: vel propter vaniloquium otiositatis, cui hodie plurimum claustra Monastica vacare videmus. Isti profectò nos terrenis magis quàm spiritalibus seculum intendere cupientes, illi sunt qui tanquam Allofili fodientem puteos Isaac persequuntur: & eos replendo congerie terræ aquam ei satagunt prohibere. Quod beatus exponens Gregorius Lib. Moral. xvj. ait: *Sæpe cū eloquijs sacris insidimus malignorum spirituum insidias grauius toleramus, quia menti nostræ terrenarum cogitationum puluerem aspergunt * ut intentionis nostræ oculos à luce intimæ visionis obscurent*. Quod nimium Psalmista pertulerat cū dicebat: *Declinate à me maligni, & scrutabor mandata Dei mei*. Videlicet patenter insinuans, quia mandata Dei perscrutari non poterat, cū malignorum spirituum insidias in mente tolerabat. Quod etiam in Isaac opere Allophilorū prauitate cognoscimus designari, qui puteos quos Isaac foderat terræ congerie replebant. Nos enim nimirum puteos fodimus, cū in scripturæ sacræ abditis sensibus alta penetramus. Quos tamen occultè replent Allophili, quando nobis ad alta tendentibus immundi spiritus terrenas cogitationes ingerunt, & quasi inuentam diuinæ scientiæ aquam tollunt. Sed quia nemo hos hostes sua virtute superat, per Eliphat dicitur: *Eritque omnipotens contra hostes tuos, & argētum coaceruabitur tibi*. Ac si diceretur: Dum malignos spiritus Dominus sua à te virtute repulerit, diuini in te eloquij talentum lucidiùs crescit. Legerat iste ni fallor magni Christianorum Philosophi Origenis Homelias in Genesi, & de eius hauserat puteis quod nunc de ijs loquitur puteis. Ille quippe spiritualium puteorū fossor studiosus non solū ad eorum potum, sed etiam effosionem nos vehementer adhortās, expositionis prædictæ Homelia xii. ita loquitur: *Tentemus* Cap. 16.

Genes 26.

Cap. 3. in
Iob. 24.

* al. spargū

Proverb. 5.

Homil. 13.
cap. 26.

facere etiam illud quod sapientia commonet dicens. Bibe aquam de tuis fontibus, & de tuis puteis. Et sis tibi fons tuus proprius. Tempta ergo & tu o auditor habere proprium puteum & proprium fontem, ut & tu cum apprehenderis librum scripturarum, incipias etiam ex proprio sensu proferre aliquem intellectum, & secundum ea que in Ecclesia didicisti. Tempta & tu bibere de fonte ingenij tui. Est intra te natura aque viue, sunt venae perennes & irrigua fluentia rationabilis sensus, si modo non sint terra & rudibus completa. Sed satage fodere terram tuam, & purgare sordes, id est ingenium, amouere desidiā & torporem cordis excutere. Audi enim quod dicit scriptura. Punge oculum, & profer lachrimam: punge cor, & profer sensum. Purga etiā & tu ingenium tuum, ut aliquādo etiam de tuis fontibus bibas, & de tuis puteis haurias aquam viuam. Si enim suscepisti in te verbum Dei, si accepisti ab Iesu aquam viuam, & fideliter accepisti, fiet in te fons aque salientis in vitam aeternam. Idem Homelia sequente de puteis Isaac supra memoratis. Quos, inquit, Philistin terra repluerant, illi sine dubio qui intelligentiam spiritalem claudunt, ut neque ipsi bibant, neque alios bibere permittant. Audi Dominum dicentem, *Vae vobis Scribæ & Pharisei, quoniam tulistis clauem sciētiæ, non ipsi introiistis, neque volentes permisistis.* Nos verò nunquā cessamus puteos aquæ viuæ fodiendo, & nunc quidem vetera, nunc etiam noua discutiendo, efficiamur similes illi Euāgelico Scribæ, de quo Dominus dixit: *Qui profert de thesauro suo noua & vetera.* Itē redeamus ad Isaac, & fodiamus cū ipso puteos aquæ viuæ, etiam si obstant Philistini, etiam si rixantur, nos tamen perseueremus cum ipso puteos fodiēdo, ut & nobis dicatur: *Bibe aquam de tuis vasis, & de tuis puteis:* & intantum fodiamus, ut superabundent aquæ putei in plateis nostris, ut non solum nobis sufficiat scientia scripturarum, sed & alios doceamus & instruamus ut bibant. Homines bibant & pecora, quia & Propheta dicit: *Homines & iumenta saluos facies Domine.* Et post aliqua: *Qui Philistinus est, inquit, & terrena sapit, nescit in omni terra inuenire aquam, inuenire rationabilem sensum.* Quid tibi prodest habere eruditionem, & nescire ea vti? habere sermonem, & nescire loqui? Istud propriè puerorum est Isaac, qui in omni terra fodiunt puteos aquæ viuæ. Vos autem non sic, sed vaniloquio penitus supersedētes, quæcumque discendi gratiam assecutæ sunt, de ijs quæ ad Deum pertinent erudiri studeant. Sicut de beato scriptum est viro: *Sed in lege Domini voluntas eius, & in lege eius medi-*

tabitur die ac nocte. Cuius quidem assidui studij in lege Domini quæ sequatur vtilitas statim adiungitur: *Et erit tanquam lignum quod plantatum est secus decursus aquarum.* Quasi enim lignum aridum est & infructuosum, quod fluentis diuinorum eloquiorum non irrigatur. De quibus scriptum est: *Flumina de ventre eius fluent aquæ vivæ.* Hæc illa sunt fluentia, de quibus in laude Sponsi canit Sponsa in Canticis eum describens: *Oculi eius sicut columbæ super riuulos aquarum, quæ lacte sunt lotæ, & resident iuxta fluentia plenissima.* Et vos igitur lacte lotæ, id est candore castimoniarum nitentes iuxta hæc fluentia quasi columbæ residere, vt hinc sapientiæ haustus sumentes, non solum discere, sed & docere, & alijs tanquam oculi viam possitis ostendere, & Sponsum ipsum non solum conspicerere, sed & alijs valeatis describere. De cuius quidem singulari Sponsa, quæ ipsum aure cordis concipere meruit, scriptum esse nouimus: *Maria autem conseruabat omnia verba hæc, conferens in corde suo.* Hæc igitur summi Verbi genitrix verba eius in corde potius habens quàm in ore, ipsa etiam diligenter conferebat: quia studiosè singula discutiebat, & inuicem sibi ea conferebat; quàm congruè scilicet inter se conuenirent omnia. Nouerat iuxta mysterium legis omne animal immundū dici, nisi quod ruminat, & vngulam findit. Nulla quippe est anima munda, nisi quæ meditando quantum capere potest diuina ruminat præcepta, & in ijs exequendis discretionem habeat: vt non solum bona, sed & bene, hoc est recta faciat intètionem. Diuisio quippe vngulæ pedis, discretio est animi, de qua scriptum est: *Si recte offeras, recte autem nō diuidas, peccasti.* Si quis diligit me, inquit Veritas, sermonem meum seruabit. Quis autem verba vel præcepta Domini sui seruare obediendo poterit, nisi hæc prius intellexerit? Nemo studiosus erit in exequendo, nisi qui attentus fuerit in audiendo. Sicut & de beata illa legitur muliere, quæ cæteris omnibus postpositis sedens secus pedes Domini audiebat verbum illius: illis videlicet auribus intelligentiæ, quas ipsemet requirit dicēs: *Qui habet aures audiendi, audiat.* Quod si in tantæ feruorē deuotionis accēdi nō valetis, imitamini saltem & amore & studio sanctarū literarū beatas illas sancti Hieronymi discipulas Paulā & Eustochiū, quarum præcipuè rogatu tot voluminibus Ecclesiam prædictus Doctor illustrauit.

Psal. 1.

Ioan. 14.

HVC VSQVE NANNETICVM

exemplar, itemque Victorianum. Sed in Paracletensi,

*(quod & auctius ubique passim) sequentia
reperimus. Et videntur esse*

Heloissæ.

INstructiones nostræ sumunt exordium à doctrina Christi prædicantis, & tenentis paupertatem, humilitatem, & obedientiã. Sequimur autem vestigia Apostolorum in commune viuentium. In habitu nostro conseruamus paupertatem & humilitatem, in subiectione obedientiam: in conuersatione nostra, quia communiter viuimus, sequimur Apostolos. Quia vndecumque beneficia temporalia proueniant, diuiditur singulis prout potest; si non abundat omnibus, maximè datur magis indigentibus. Et quoniam seculo abrenunciamus, & Deo militamus, persistamus in proposito castitatis, & pro viribus nostris iuxta mensuram donationis suæ ei placere contendamus.

De conuenientia Consuetudinum.

Domino super nos prospiciente, & aliqua loca nobis largiente, misimus quasdam ex nostris ad Religionem tenendam numero sufficiente. Annotamus autem boni propositi nostri Consuetudines; vt quod tenuit mater incommutabiliter, teneant & filix vniformiter.

De Habitu.

Habitus noster vilis est & simplex, in agninis pellibus, in lineis & laneis vestibus. In ijs emendis vel faciendis non eliguntur pretiosa, sed quod vilius comparari vel haberi potest. Quodcumque sufficere debeat annotandum esset: sed longè sumus à sufficientia.

De Lectis.

In Lectulis nostris habemus culcitra, & puluinaria, & lintea linea sicut singulis diuiditur. Si non recipiant singulæ

quod sufficiat, paupertati ascribitur.

De cibis.

Pane quolibet vescimur; si fuerit triticum, triticeo; si defuerit, pane cuiuslibet annonæ. In refectorio nostro cibi sine carnibus sunt legumina, & ea quæ nutrit hortus. Lac, oua, & caseus rariùs apponuntur, & pisces, si dati fuerint. Vinum mixtum sit aqua. Duo pulmenta in prima refectioe habentur. In cœna verò herbæ, vel fructus, vel aliquid tale, si haberi poterit. Horum quoque deficientiam sine murmure portamus.

De obedientia.

Soli Abbatissæ & Priorissæ debitum exhibetur obedientiæ. Nulla præsumit claustra Monasterij egredi sine harum licentia. Nulla loqui, nulla dare aliquid vel recipere, nulla retinere nisi quod permissum fuerit. De cætero nobis inuicem obedimus affectu charitatis.

Vnde necessaria pronentiant.

Religionis erat de cultu terrarum & labore proprio viuere si possemus. Sed quia ex debilitate non sufficimus, admittimus Conuersos & Conuersas, vt quæ per nos administrari rigor non permittit Religionis, per eos adimpleatur. Recipimus etiam quascumque fidelium eleemosynas more cæterarum Ecclesiarum.

Quando egredimur.

Statutum tenemus, quòd nulla velata causa cuiuscumque necessitatis egrediatur ad forensia negotia, vel ingrediatur domum cuiuslibet secularis. Ad familiaria verò negotia, & ad custodiam rerum nostrarum mittimus in Domos nostras probatas tam ætate quàm vita & Moniales & Conuersas.

De longinquo venientibus.

Superuenientem nobiscum diu manere non permittimus; sed si remanere voluerit, & eam ratio suscipi permiserit, primò septem dies, aut profiteatur, aut discedat.

Quando fit Conuersa Monialis.

Si ad nos aliqua Conuersa veniens in conuersatione laicorum suscepta fuerit, nullatenus postea Monialis efficietur, sed in ea vocatione, in qua vocata est, permaneat.

De Officijs nocturnis à Kal. Octobr. vsque ad Pascha.

Audito signo, ad Vigiliis cum festinatione surgimus, & moderatè nos cultores festinamus ad opus Dei: & dimisso signo ad nutum Priorissæ facimus consuetas orationes, in solemnitatibus inclinatæ, in priuatis diebus prostratæ. Completis orationibus signamus nos, & ingredimur stationes nostras. Hebdomaria, cuius est *Deus in adiutoriū*, incipit *Veni sancte Spiritus*, prosequens Versum & Orationem. Quod & facimus in principijs omnium Horarum, in præcipuis solemnitatibus cantando, cæteris diebus sine cantu. Hebdomadaria incipit, *Domine labia mea*, & prosequimur diuinum Officium iuxta consuetudinem regularium Ecclesiarum. Post Vigiliis egredimur omnes, & firmatur Oratorium, si dies non fuerit, & accenso lumine in Capitulo sedent quæ lectionis vel operis indigent. Si dies fuerit, statim sequitur Prima. In festiuitatibus & Dominicis diebus, siue dies fuerit, siue non fuerit, reuertimur omnes in Dormitorium, pausantes in lectulis, donec die clariùs illucescente ad sonitum Dormitorij veniamus in Claustrum. Pulsatur Prima, & faciente signum Priorissæ, ingredimur omnes Ecclesiam præcedente Scola & Iunioribus. Similiter ante omnes Horas expectatur signum Priorissæ. Ante Primam fit oratio inter formas sicut ante Vigiliis. Post Primam sequitur Missa matutinalis. Inde itur in Capitulum, & fiunt clamations & emendationes iuxta modum culparum, consideratione tenentis Capitulum. Quibusdam solemnitatibus veniunt sorores in Capitulum, & emendantur culpæ earum. Quotiescumque autem fratres grauiter delinquant, vocantur in Capitulum, & coram communi Capitulo corriguntur, vt maiori confundantur erubescencia. Præcipuis solènitatibus habetur Sermo in Capitulo. Egressæ de Capitulo vacamus lectioni vsque ad Tertiam si hora permiserit. Sequitur Tertia, & maior Missa. Sequitur & Sexta siue interuallo. Post Sextam vacamus lectioni vsque ad Nonā.

Ministræ

Ministræ & Lectrix accipiunt mixtum. Post Nonam ingredimur Refectorium, auditur lectio cum summo silentio, & in cæteris ordinē regularium sequimur. Dicto *Tu autem*, procedimus ordinatè gratias cantantes, & ingredimur Oratorium. Finitis gratijs in Ecclesia, ingredimur Capitulum, & conueniunt sorores laicæ, & exponitur aliquid ædificationis in communi audientia, referente illa cui iniunctum fuerit. Si tempus superfuerit, sedemus in Claustro vsque ad vespervas. Cantantur Vesperæ. Sciendum est, quia nulla Chorum egreditur sine licentia. Post Vespervas sedemus in Claustro, meditationi seruientes, & in cordibus orantes absque signis penitus cum summo silentio. Ante collationem bibimus in Refectorio. Hebdomadaria donante benedictionem, statim accedimus ad collationem, nulla diuertente alicubi. Post collationem cantamus in Ecclesia Completorium. Dicto *Requiescant in pace*, facimus orationem inter formas. Ad signū Abbatisæ vel Priorisæ erectæ consignamus nos, & egredientes per ordinem, incipientes à senioribus, aspergit nos aqua benedicta Abbatisa vel Priorissa. Ascendentes in Dormitorium diuertimus ad lectulos nostros, & collocamus nos vestitæ & cinctæ iacentes.

De Dominicis diebus.

Diebus Dominicis exeuntes de Capitulo, accipiunt aquā benedictam ab Abbatisa vel Priorissa, & facimus processionem in Claustro, vna portante crucem, & duabus cereos. Post Sextam reficimus. Post refectiōnem statim Nona. Post Nonam aliquid exponitur ad ædificationem, sicut superiùs dictum est. Post Vespervas fit cœna. Et eo modo nos habemus deinceps quo superiùs dictum est. Priuatis diebus, summo mane cantatur Prima, postea sedemus in Claustro vsque ad Tertiam, legentes, & cantantes, & operantes. Præcedit oratio inter formas, & sequitur Tertia. Post Tertiam Missa matutinalis. Inde itur in Capitulum. Egressæ de Capitulo sedemus in Claustro. Debiliores sumunt mixtum, secundum dispensationem Abbatisæ. Nulli licet sedere in claustrō sine opere vel lectione. Post Sextam sequitur maior Missa, & statim Nona. Post Nonam ingredimur Refectorium. Cætera prosequimur vt superiùs dictum est.

De tempore astiuo.

A Pascha verò vsque ad supradictas Kalendas Octobris, post Laudes reuertimur ad lectulos nostros, & aliquo intervallo fit sonitus in Dormitorio, & surgētes venimus in Claustrum, & legimus & cantamus vsque ad Primam. Ante Primam tam festiuis diebus quàm priuatis agūtur orationes inter formas. Post Primam sequitur Missa matutinalis. Inde itur in Capitulum. Egressæ Capitulum, sedemus in claustro, legentes & operantes vsque ad Tertiam. Post Tertiam maior Missa agitur. Sexta; & itur in Refectorium. Post gratiarum actionem imus in Dormitorium, & licet dormire, legere, operari in lectulis sine alicuius inquietatione. Audito primo signo Nonæ surgimus, & præparamus nos, vt dum secundum signum pulsauerit, ad signum Abbatissæ vel Priorissæ ordinatè ingrediamur Ecclesiam. Post Nonam agimus pro defunctis. Indè ingredimur Refectorium, & bibimus aquam. Deinceps in claustro sedemus, legentes & operantes. Egre- dimur etiam ad laborem qualibet hora diei necessariò aduocata fuerimus. Post Vesperas agitur cœna. Deinceps nos habemus sicut superius dictum est. In Letania maiore, tribus diebus Rogationum, sexta Feria, & Sabbato, vigilia S. Ioannis Baptistæ, vigilia Apostolorum Petri & Pauli, vigilia S. Laurentij, vigilia Assumptionis, & ab Idibus Septembris vsque ad Pascha ieiunamus.

Ex Concilio Triburiensi, Cap. X.

Virgines quæ ante XII. annos in scijs mundiburdis suis sacrum velamen capiti suo imposuerint, & illi mundiburdi annum & diem hoc tacendo consenserint, in sancto proposito permaneant. Et si in prædicto anno & die pro illis proclamauerint, petitioni eorum assensus præbeatur: nisi fortè Dei timore tactæ cū eorū licentia in religionis habitu perseuerent.

De consecratione Sanctimonialium, ex Concilio Carthagenensi.

Sanctimonialis Virgo cū ad consecrationem suo Episcopo offertur, in talibus vestibibus applicetur, qualibet semper qualibus per vsura est, professioni & sanctimonix aptis.

Ex Decreto Gelasij, Cap. XII.

Deuotis quoque Virginibus, nisi aut in Epiphania, aut in albis Paschalibus, aut in Apostolorum Natalitijs, sacrum minime velamen imponatur; & non ante xxv. annos, nisi fortè, sicut de baptismo dictum est, graui langore correptis. Ne sine hoc munere de seculo exeant, implorantibus non negetur.

Ex Decreto Pij Papæ.

Vt Virgines non velentur ante xxv. annos ætatis, nisi fortè necessitate periclitantis virginalis pudicitie, & non sunt consecranda in alio tempore nisi in Epiphania, & in albis Paschalibus, & in Apostolorum Natalitijs, nisi causa mortis urgente.

Ex Concilio Milenitano, Cap. XXV.

Item placuit, vt quicumque Episcoporum necessitate periclitantis pudicitie Virginalis, cum vel portitor potens, vel raptor aliquis formidatur, vel si etiam aliquando mortis periculoso scrupulo compuncta fuerit, ne non velata moriatur, aut exigentibus parentib. aut ijs ad quorum curam pertinet, velaui Virginem, seu velaui intra xxv. annos ætatis, non ei obsit Concilium quod de isto numero annorum constitutum est.

Hieronymus contra Iovinianum. 1.

Si nupserit Virgo, non peccauit: non illa virgo quæ semet cultui Dei dedicauit. Harum enim si qua nupserit, habebit damnationem, quod primam fidem irritam fecit. Si autem hoc de viduis dictum obiecerint, quanto magis de virginib. præualebit; cum etiam ijs non liceat, quibus aliquando licuerit? Virgines enim, quæ post consecrationem nupserunt, non tam adulteræ quàm incestæ sunt.

Ex Decreto Euticiani Papæ, Cap. XIII.

Nihilominus etiam in quibusdam locis inditum inuenimus vsum stultitiæ plenum, & Ecclesiasticæ auctoritati contrarium, eò videlicet quod nonnullæ Abbatissæ, & aliquæ ex Sanctimonialibus viduis & puellis virginibus contra fas

velum imponere præsumant, & idèd nonnullæ iniuste velata putant se liberiùs suis carnalibus desiderijs posse inservire, & suas voluntates explere. Quapropter statuimus, vt si Abbatissa, aut quælibet Sanctimonialis post hanc diffinitionem in tantam audaciam proruperit, vt aut viduam aut puellam virginem velare præsumat, iudicio Canonico vsque ad satisfactionem subdatur.

Bonifacius Martyr Hilteribalbo Regi Anglorum.

Apud Græcos & Romanos, quasi blasphemiam Deo irrogasset, qui in hoc reus sit, vt propriè de hoc peccato ante ordinationem interrogatus si reus fuerit inuentus, vt cum velata & consecrata vna concubuiſſet, ab omni gradu sacerdotum Dei prohiberetur. Propter hoc, fili carissime, sollicitè considerandum est quanti ponderis hoc peccatum esse videtur ante oculos æterni iudicis, quod facientem inter idolatriæ seruos constitutus, & à diuino ministerio altaris abijciet. Licet autem peracta pœnitentia reconciliatus sit Deo.

Ex Concilio Rothomagensi, Cap. IX.

Statutum est viduas non debere velari, similiter & hoc statutum est, vt si quispiam Presbyterorum deinceps huius constitutionis normæ contumaciter transgressor extiterit, scilicet vt aliquas viduas velare præsumat, quia & hoc Episcopis non licet, gradus sui periculum incurrat. Similiter & de puellis virginibus à Presbyteris non velandis statutum est, vt si quis hoc facere tentauerit, tanquam transgressor canonum damnetur.

Ex Concilio Maguntinensi, Cap. VI.

Viduas autem velare Pontificum nullus temptet, prout statutum est in Decretis Gelasij cap. xiii. quod nec auctoritas diuina, nec Canonum forma præstitit. Quæ si propria voluntate continentiam fuerit professæ, vt in eiusdem Gelasij cap. xxi. legitur, eius intentio pro se rationem reddat Deo, quia sicut secundum Apostolum, si continere se non poterat, nullatenus nubere verabatur, sic secum habita deliberatione promissam fidem pudicitia Deo debet custodire.

Nos autem auctoritate Patrum suffulti in hoc sacro Conuē-
tu sancimus & labore iudicamus si sponte velamen quamuis
non consecratum sibi imposuerit, & in Ecclesia inter velatas
oblationem Deo obtulerit, velit nolit, sanctimonix habitū
ulterius habere debet, licet sacramento confirmare velit eo
tenore & ratione velamen sibi imposuisse, vt iterum posset
deponere.

Ex Concilio Aurelianensi, Cap. III.

Vidux, quæ ab altari sacro velamen accipiunt spontanea
voluntate sacræ conuersationis, decreuit sancta Synodus in
eodem proposito eas permanere. Non enim fas esse decerni-
mus, vt postquam semet Deo sub velo consecrauerint, & in-
ter velatas oblationem fecerint, iterum eis concedi Spiritui
sancto mentiri.

Nicolaus Papa Archiepiscopo C. & eius suffrag.

Vidua quidem, quæ capiti imposuerit sacrum velamen, si
inter cæteras velatas feminas in Ecclesia orauerit, & oblatio-
nem cum illis obtulerit, si professa est in eodem habitu per-
manere, spondens nunquam religionis velamen deponere, à
Religionis obseruantia discedere non præsumat.

Augustinus de dono viduitatis.

Vidux, quæ se non continent nubant antequam professa
continentiam deuoueant, quod nisi reddant iure damnen-
tur.

Ex Concilio Arausico, Cap. VI.

Viduitatis seruandæ professionem coram Episcopo in se-
cretario habitam, imposita coram Episcopo veste viduali
non esse violandam; ipsam tamen professionis desertricem
merito esse damnandam decernimus.

Ex Concilio Toletano, Cap. V.

Omnes feminæ venientes ad sacram Religionem & pal-
lio capita contegant, & conscriptam roboratamque profes-
sionem faciant, postquam ulterius non sinantur relabi ad

præuaricationis audaciam. Quæ verò ex ijs omnibus fuerint repertæ animum aut vestem in transgressionem dedisse, excommunicationis sententiâ ferant, & rursus mutato habitu in Monasterijs, donec diem vltimum claudant, sub ærumnis arduæ pœnitentiæ permaneant religatæ.

Ex Decretis Gelasij Papæ ad Sicilienses Episcopos missis, Cap. IX.

Neque viduas ad nuptias trāsire patimur, quæ in religioso proposito diuturna obseruatione permanserunt. Similiter virgines nubere prohibemus, quas annis plurimis in monasteriis ætatem egisse contigerit.

Ex Epistola Gregorij Papæ missa ad Bonifacium.

Viduas à proposito discedentes viduitatis, super quibus nos consulere voluit dilectio tua, frater charissime, credo te nosse à sancto Paulo, & multis sanctis Patribus, nisi conuertantur, olim esse damnatas. Quas & nos Apostolica auctoritate esse damnandas, & à communione fidelium, atque à liminibus Ecclesiæ arcendas fore censemus, vsquequo obediāt suis Episcopis; & ad bonum quod cœperunt, inuitæ aut voluntariæ reuertantur. De virginibus autem non velatis, si deuiuerint, à sanctæ memorię prædecessore nostro Papa taliter decretum habemus. Hæ verò quæ necdum sacro velamine tectæ, tamen in proposito virginali semper simulauerunt se permanere, licet velatæ non fuerint, si nupserint, aliquanto tempore his agenda pœnitentia est, quia sponsio earum à Domino tenebatur. Si enim inter homines solet bonæ fidei cōtractus nulla ratione dissolui, quanto magis ista pollicitatio, quæ cum Deo pepigit, solui sine vindicta non poterit? Nam si virgines nondum velatæ taliter pœnitentiæ publica puniuntur, & à cœtu fidelium, vsquequo ad satisfactionem veniāt, excluduntur; quantò potius viduæ, quæ perfectioris ætatis, & maturioris sapientiæ atque consilij existunt, virorumque consortio multotiens vsæ sunt, & habitum religionis assumpserunt, & demum apostatauerunt, atque ad priorem vomitum sunt reuersæ, à nobis & ab omnibus fidelibus à liminibus Ecclesiæ, & à cœtu fidelium vsque ad satisfactionem sunt eliminandæ & carceribus tradendæ? Qualiter iuxta beatum Pau-

lum tradere huiusmodi hominem sathanæ, & spiritus saluus sit in die Domini. De talibus & Dominus per Moysen loquitur, *Auferte malum de medio vestri*. De quibus & per Prophetam ait, *Letabitur iustus cum vindictam viderit, manus suas lauabit in sanguine peccatoris*. De talibus namque, & eorum similibus, atque eisdem consentientibus dicitur, quia non solū qui faciunt, sed & qui consentiunt facientibus rei sunt.

Ex Epistola Nicolai Pape, Cap. V.

Nicolaus seruus seruorum Dei reuerentissimo ac sanctissimo confratri nostro Adaberino * sanctæ Viuacensis Ecclesiæ Archiepiscopo. Quod interrogasti de femina, quæ post obitum viri sui velamen sacrum super caput suum imposuit, & finxit se sub eodem velamine Sanctimoniam esse, postea verò ad nuptias redijt, bonum mihi videtur, quia per hypocrisim Ecclesiasticam regulam conturbare voluit, & non legitime in voto suo permansit, vt pœnitentiam agat de illusione nefanda, & reuertatur ad id quod spondidit, & in sacro ministerio inchoauit. Nam si cōsenserimus, quòd omnia Ecclesiastica sacramēta quisque prout vult fingat, & nō verè faciat, omnis ordo Ecclesiasticus turbabitur, nec Catholice fidei iura consistunt, nec Canones sacri ritè obseruantur. Quid enim profuit Simoni Mago baptisma sacrum fidè suscipere, & in Christianitate se permansurum finxisse, cum per Apostolum fraude eius detecta quod sibi futurum esset pronunciatum fuit? Ait enim, *Pœnitentia tua tecum sit in perditione. Cor enim tuum non est rectum coram Deo. Pœnitentiam itaque age de hac nequitia tua, & roga Deum vt forte remittatur tibi cogitatio cordis tui. In felle enim amaritudinis & obligatione iniquitatis video te esse*. Ideo tales, nisi resipiscant, spirituali gladio percutere censemus. Non enim fas est Spiritui sancto mentiri, sicuti Ananias & Saphira mentiti sunt, & statim perierunt.

* f. Aluino sanctæ Ianuensis. ad quē dist. 34. c. 1. Adaberini enim in omnibus Nicolai Epistolis nulla fit mentio, neq; Viuacensis Ecclesiæ quæ sit adhuc reperire potui.

Ex Concilio Arelatensi, Cap. VII.

Sciendum est omnibus, quòd Deo sacratarum feminarum corpora per votum propriæ sponsionis & verba sacerdotis Deo consecrata templa esse Scripturarum testimonijs comprobantur; & ideò violatores earum sacrilegi, ac iuxta Apo-

stolum filij perditionis esse noscuntur.

Apostolus dicit.

Præcipe, *inquit*, ut viduæ irreprehensibiles sint. Vidua eligatur non minus xl. annorū in operibus bonis testimoniū habēs si filios educauit. *Et*, Adolescentiores viduas deuota. Cum enim luxuriatæ fuerint, in Christo nubere volunt, habentes damnationem, quia primam fidem irritam fecerunt, simul & otiosè loquentes quod non oportet. Volo ergo iuniores nubere, filios procreare, matres familias esse, nullam occasionē dare aduersario maledicti gratia. Iam enim quædam conuersæ sunt retro Satanam.

Ex Concilio Maguntinensi, Cap. XIII.

Abbatissas autem cum Sanctimonialibus omnino rectè & iustè viuere censemus. Quæ verò professionem secundum regulam sancti Benedicti fecerunt, singulariter viuant. Sin autem Canonicè viuant, pleniter & sub diligenti cura custodiam habeant, & in claustris suis permaneant, nec foras exitum habeant. Sed & ipsæ Abbatissæ in Monasterijs sedeant, nec foras vadant sine licentia & consilio Episcopi sui.

Ex Concilio Maguntino, Cap. XXVI.

Abbatissa nequaquam de Monasterio egrediatur, nisi per licentiam sui Episcopi. Et si quando foras pergit, de Sanctimonialibus quas secum ducit, curam habeat maximam, ut nulla eis detur occasio peccandi.

* *Gangrensi*

*Ex Concilio Grantiensi *, Cap. IX.*

Abbatissa diligentem habeat curam de congregatione sibi commissa, & prouideat ut in lectione & officio, in modulatione Psalmorum ipsæ Sanctimoniales strenuæ sint, & in omnibus operibus bonis. Illa eis ducatum præbeat, utpote pro animabus earum rationem redditura in conspectu Domini, & stipendia Sanctimonialibus præbeat necessaria, ne fortè per indigentiam cibi aut potus peccare compellantur.

Ex

Ex Concilio Maguntienſi , Cap. XIV.

Sanctimoniales niſi fortè Abbatiffa ſua pro aliqua neceſſitate incumbente nequaquam de Monafterio egrediantur.

Ex Concilio Granecenſi , Cap. XIII.*

* Gangrenſi,

Si qua mulier propter continentiam quæ putabatur, habitum immutauit, & pro ſolito muliebri amiſtum virilem ſumat, anathema ſit.

Ex eodem Concilio , Cap. XIV.

Si qua mulier propter diuinum cultum, vt æſtimat, crines attondet, quos ei Deus ad ſubjectionis memoriam tribuit, tanquam præceptum diſſoluens obedientiæ, anathema ſit.

Ex Concilio Rothomagenſi , Cap. III.

Vt Episcopuſ Monafteria Monachorum & Sanctimonialium frequenter introeat, & cum grauibuſ & religioſis perſonis in earum Conuentu reſidens, eorum vel earum vitam & conuerſationem diligenter excutiat. Si quid reprehenſibile inuenerit, corrigere ſatagat. Sanctimonialium etiam pudicitiam ſublimiter inueſtiget, & ſi aliqua inuenitur, quæ neglecto propoſito caſtitatis clerico aut laico impudenter miſceatur, acriter verberibuſ coerceatur, & in priuata cuſtodia retrudatur, niſi quod malè commiſit dignè pœniteat. Interdicatur etiam ex auctoritate ſacrorum Canonum, vt nulluſ laicuſ aut clericuſ in earum clauſtris & ſecretis habitationibuſ acceſſum habeat, neque Preſbyteri niſi tantum ad Miſſam. Expleta Miſſa ad Eccleſiaſ ſuaſ redeant. Omnibuſ prætereà publicè & priuatim denunciaret, quantum ſit piaculuſ qui ſponſam Chriſti vitare præſumit. Si enim ille reuſ tenetur qui ſponſam hominiſ violat, quantò magis reuſ maiſtatiſ efficitur, qui ſponſam omnipotentis Dei corrupit?

De Monialibuſ.

Episcopuſ vt Moniales viuant ſine proprio curam adhibeant diligentem, ne ſe poſſint excuſare prætextu alicuiuſ paupertatiſ.

De Sanctimonialibus.

Statuimus vt Abbatisſæ & Prioriſſæ, & aliæ obedientiaræ, de ſingulis prouentibus, redditibus, & expenſis ſingulis annis computent in Capitulo quater in anno ad minus; & vt ſtatus tam Obedientiarum quàm Prioratum à clauſtralibus cognoſcatur, compotus redigatur in ſcriptis: ita quòd Conuentus penes ſe retineat vnum ſcriptum, & Abbatiſſa aliud.

De Sanctimonialibus.

Propter ſcandala, quæ ex Monialium conuerſatione proueniunt, ſtatuimus de Monialibus nigris ne aliquod depoſitum in domibus ſuis recipiant ab aliquibus perſonis, maximè arceſ Clericorum vel laicorum cauſa cuſtodix apud ſe minimè deponi permittant. Pueri & puellæ, quæ ſolent ibi nutrirī & inſtitui, penitus expellantur. Omnes communiter comedant in Reſectorio, & in Dormitorio ſolitaria dormiant. Camere omnes Monialium deſtruantur, niſi aliqua per inſpectionem Epiſcopi neceſſaria retineatur ad infirmariam faciendam, vel alia de cauſa, quæ Epiſcopo iuſta & neceſſaria videatur. Item Moniales nullatenus exire permittantur, vel extra pernoctare, niſi forte ex magna cauſa, & rarò: & Abbatiſſæ iniungatur, ne aliter permittat egredi Moniales. Et ſi aliquando Abbatiſſa ex iuſta cauſa alicui permittat, eidem iniungat quòd ſine mora reuertatur, & det ei ſociam non ad voluntatem ſuam, ſed quam viderit expedire. Oſtia ſuſpecta & ſuperflua obſtruantur. Circa hoc autem Epiſcopi diligentiam adhibeant & curam, per ſe & per miniſtros ſuos, & vitas & conuerſationes ipſarum taliter reſtringant, quòd per eorum diligentiam ſcandala, quæ de earum vita in præſenti proueniunt, ſopiantur.

De ſororibus non emittendis.

Sorores noſtræ non egrediantur, niſi fortè mittantur de clauſtro ad clauſtrum moraturæ ad minus per annum. Verum, ſi euidentis neceſſitas ingruerit, propter quam oporteat aliquam egredi, fiat de licentia Præmonſtrenſis Abbatis, dum tamen ſine graui periculo eius poſſit expectari aſſenſus. Si quis Abbas aliquam aliter emiſerit, puniantur ſecundum quantitatem exceſſus, arbitrio Capituli generalis, & maximè ſi ſcanda-

lum emerferit de sorore emissa. Tempore verò guerrarum liceat cuilibet Abbati sorores sibi subditas ad loca tuta transferre. Quod si aliter fuerit, Abbas, sub quo hoc contigerit, per annum continuum in Feria sexta ieiunet in pane & aqua.

De sororibus non recipiendis.

Quoniam instant tempora periculosa, & Ecclesiæ supra modum grauantur, communi consilio Capituli statuimus, ut amodo nullam sororem recipiamus. Si quis autem huius statuti transgressor extiterit, Abbatissa sua sine misericordia punietur.

Item de sororibus non recipiendis.

Nulla soror de cætero recipiatur in ordine, nisi locis illis qui sunt ab antiquo recipiendis sororibus perpetuò deputata.

De testimonio sororum recipiendarum.

Si mulieres aliquæ ex antiqua concessione facta eis ante institutionem editam de sororibus non recipiendis, recipi voluerint in sorores, nullomodo recipiantur, nisi probauerint vel per litteras, vel per sufficientem numerum fratrum, utpotè per quatuor vel quinque, quòd concessio fuerit facta eis ante inhibitionem ordinis per Abbatem vel Conuētum.

De mulieribus non permutandis.

Mulieres, quæ ab antiquo loca habēt in domibus nostris, ut recipiantur in sorores, nullis aliis loca sua conferant, nec fiat circa mulieres aliqua mutatio personarum.

De puellis non nutriendis in Domibus nostris.

Cùm propriis fratribus ac sororibus nostris etiam tenui vi-ctu sufficere vix possimus, absurdum videretur si alienos in delicijs nutriremus, & tales maximè, de quorum fratres aut sorores nostræ possent conuersatione corrumpi. Eapropter censuimus sub districta inhibitione cauendum, ut emissis omnino secularibus, quæ ad nutriendum in claustris sororum nostrarum hætenus sunt receptæ, nulla alia prorsus ad nutriendum decetero admittatur. Quòd si aliqua voluerit exire

iam recepta, vel si ad nutriendum recipiatur, per se, vel per alios intruſerit violenter, ceſſetur in eodem loco, quouſque exierit, penitus à diuinis.

Quòd ſorores noſtra non habeant nigras Tunicas.

Prædictis namque duximus annectendum, ſtatuentes ſub pœna excommunicationis firmiter obſeruari, vt ſorores noſtrę non niſi in tunicis albis & nigris ſuperpellicijs induantur. In quibus videlicet ſuperpelliceis nulla vel ſuperfluitas vel curioſitas videatur, & ne ſit notabilis habitus earumdem, ne veſtes potiùs videantur quàm morum delicias affectare.

De ſororibus in lapſu carnis deprehenſis.

Si aliqua ſoror deprehēſa fuerit in lapſu carnis, ſtatim emit-
tatur à domo, & nullomodo etiam ſi obtinuerit miſericordiã, de cætero reuertatur, niſi ſub tali lege quod velo careat in perpetuum, & ſub vili veſte & tenui victu nullatenus egreſſura de clauſtro ſeruiat vt ancilla. Verùm, ſi ſecundò commiſerit, eiſciatur, & nullum de cætero receptionis ſuæ debitum ab ordine præſtoletur. Sane ſi aliqua extra ſepta ſororum exierit, omni ſexta feria per annum in pane & aqua abſtineat. Porro, ſi extra exteriorẽ portam domus exierit, infra octo dies ſi reuerſa fuerit poterit recipi vt fugitiua. Ita tamen vt per xl. dies ſubijciatur pœnæ grauioris culpæ, & omni ſexta feria per annũ reficiatur in pane & aqua. Poſt dies octo reuertenti adiſciatur ad pœnam, vt vſque ad ſequens generale Capitulum velo careat, & ſeruiat vt ancilla; non tamen hac occasione egreſſura à clauſtro.

De egreſſione ſororum.

Quaſdam Eccleſias noſtri Ordinis de facili egreſſione ſororum audiuiſus infamari. Sed quia indè multa pericula animarum poſſunt emergere, & forſitan emerſerunt: prohibemus ne amodò ad aliquod negotium vel laborem, ſiue etiã in cauſis ad teſtimoniũ perhibendum egrediantur de cætero.

De comuni vita ſororum.

Docente Hiſtoria Actuum Apoſtolorum, ſatis eſt lucidum

& apertum, quòd Ananias & Saphira vxor sua oblati Apostolorum Principi ijs, quæ transitoriè possidebant, & retenta parte pretij cuiusdam agri venditi ab eisdem, morte subitanea sunt percussi. Quia ergo quæcumque scripta sunt ad nostram doctrinam scripta sunt, vt proprietatis vitium, vel saltem species extirpetur, statuimus, vt quilibet Abbas nostri Ordinis ita sororibus suis prouideat, vt de communi & in communi viuant, communiter operentur, & ad communem vtilitatem; nec permittatur habere proprium, sed necessaria eis administrentur de communi, secundum Ecclesiarum, ad quas pertinent, facultates. Si quid autem ipsarum alicui datum fuerit à quoquam, secūdum Patris nostri Augustini præceptum, statim redigat in commune. Quod si retinere præsumpserit, deprehensa ab Abbate vel Priorissa, grauius secundum Ordinis statuta puniatur.

Ne sorores frequententur.

Cū secundum Apostolum vniuersos Christi fideles, & maximè viros religiosos ab omni specie mala deceat abstinere; inhibemus tam subditis quàm Prelatis ostium aperire sororum, & hoc in Domibus alienis. Substinemus tamen, vt si quis accesserit ad eas gratiā predicandi, aperto ostio Ecclesiæ vlteriùs non procedat, imò sedens in eodem effundat ipsis audientibus verbum Dei, nec permittat aliquatenus Capellanos aut socios suos introire ad ipsas.

EXPLICIUNT EPISTOLÆ PETRI ABAELARDI,
ET HELOISSÆ.

ALIAMAG.
PETRI ABAELARDI
NANNETENSIS
EPISTOLAE;

Quibus adjectæ sunt & INNOCENTII II. PAPAE,
S. BERNARDI Clareuall. Abbatis, Heloissæ, Beren-
garij Scholastici, Fulconis Prioris de Diogillo,
itemque Petri Venerabilis Abbatis
Cluniacensis,

Ad illius seculi Historiam maximè pertinentes,

*Nunc primum ex varijs Codd. in unum collectæ
& euulgatæ.*

С А М О У Ч Е Н И Е

КОНСТАНТИН ПЕТРОВИЧ

СЕРГЕЕВ

П Е Т Р О В И Ч

С П Е К Т Р О С К О П И Ч Е С К И Е
И С С Л Е Д О В А Н И Я

М О С К В А



ALIÆ MAG.
PETRI ABAELARDI
 NANNETENSIS,
 ET ALIORVM EIVSDEM TEMPORIS,
 EPISTOLÆ.

EPISTOLA I.
 QVÆ EST FVLCONIS PRIORIS
 DE DIOGILLO,
 AD PETRVM ABAELARDI.

*Petro Deo gratias cucullato Frater Fulco vitæ consolationem
 presentis & futura.*

SECVLARIS vitæ pericula qui sine peri-
 culo se putat euadere, non minus mihi
 desipere videtur, quàm, si cùm insipiens,
 quispiam se existimat sapientem. Quan-
 to vtique inuoluatur errore stultitię non
 opus est me monstrare, cùm luce clarius
 pateat sapienti. Fortuna regūtur, qui di-
 utiùs sibi permanere in huius felicitatis
 mutabilitate promittūt. Quàm sit contrariū rationi hoc opi-
 nari, mōstrat sui mutatione infida felicitas. Non est humanū,
 stabilitate durare. Et licet res humanæ quotidie in deterio-
 ra labantur, & felicitatis iocunda vanitas frequenter serua-

Ee

Psal. 37.

tur contrarijs : homines tamen miseri huius temporis familiares & amicissimi finem rerū attendere negligunt, & quā multis subiaceant periculis, quantulacumque deliniti prosperitate oculo prouidentiaē metiuntur. Sed cū ferit aduersitas, aut in desperationem præcipitat, aut ad fructum animaduersionis eleuat; attamen demū quod homines sint agnoscunt. Desperatis & impœnitentibus neque in hoc seculo, neque in futuro remissionis venia relinquitur vlla: sperantes autem in Domino misericordia circumdabit. Affluētissimè tibi paulò antè mundi huius gloria blandiebatur, & te incertis fortunæ casibus esse obnoxium non sinebat aduertere. Roma suos tibi docendos trans mittebat alumnos: & quæ olim omnium artium scientiam auditoribus solebat infundere, sapientio rem te se sapiente transmissis Scola ribus monstrabat. Nulla terrarum spatia, nulla montium cacumina, nulla concaua vallium, nulla via difficili licet obsita periculo, & latrone, quominus ad te properarent retinebat. Anglorum turbam iuuenum mare interjacens & vndarum procella terribilis non terrebat: sed omni periculo contempto, audito tuo nomine, ad te confluebat. Remota Britannia sua animalia erudienda destinabat. Andegauenses eorum edomita feritate tibi famulabantur in suis. Pictaui, Vvascones, & Hiberi: Normania, Flandria, Theutonicus, & Sueuus tuum calere ingenium, laudare, & prædicare assidue studebat. Prætereo cunctos Parisiorum ciuitatem habitantes, & intra Galliarum proximas & remotissimas partes, qui sic à te doceri sitiebant, ac si nihil disciplinae non apud te inueniri potuisset. Ingenij claritate, & suauitate eloquij, & linguæ absolutioris facilitate, necnon & scientiaē subtilitate permoti, quasi ad limpidissimum Philosophiaē fontem iter accelerabant. Nam illud, quod sic te, vt aiunt, præcipitem dedit, singularum scilicet feminarum amorem, & laqueos libidinis earum, quibus suos capiunt scortatores, melius mihi videor præterire, quàm aliquid dicere quod ordini nostro, & regulae nostraē religionis non concordet: quando quidē sermo de talibus sæpè magis soleat nocere bonis, quàm prodesse. Hac fortassis in te bonorū congregatione in te & super te elatus (quamuis sapiens, si huius nominis significationem in se non extinguat, his animi bonis minimè moueatur) in super-

biam initiū & pestem omniū malorū, & inanissimè efferbueras, & te jactantiæ vento ostētandi, oēs ferè alios, etiā sanctos, qui ante te sapientiæ operam dederant, vt aiunt qui te frequentius audiebant, inferiores te existimabas. At omnipotens Dei dignatio & benignitas, qui superbiæ ventum facit euanescere, & humilitatis gratiam multiplicat; qui neminē morbo ægrotantem superbiæ, alijsque animi ægritudinibus laborantem non iusto iudicio despicit; tuæ mentis inflationem, & oculorum extollentiam hoc aduersitatis genere tui miserando perdomuit: quatenus & in te superbè non saperes, & alios quosque bonos vituperando negligere desisteres; castimoniæq; sanctitate, & continentix laudabili deuotione de reliquo polleres. Hæc corporis particula, quam omnipotentis Dei iudicio, & beneficio perdidisti, quantum tibi nocuerat, ac nocere quamdiu permansit non desisteat, melius tuarum diminutio rerum, quàm mea possit monstrare oratio, docet. Quicquid verè scientiæ tuæ venditione perorando præter cotidianum victum & vsum necessarium, sicut relatione didici, adquirere poteras, in voraginem fornicariæ consumptionis demergere non cessabas. Auara meretricum rapacitas cuncta tibi rapuerat. Nulla audierunt secula meretricem velle alteri misereri, vel pepercisse rebus appetitorū, quas quoquomodo auferre potuerunt. Videtur hoc probare tua profunda paupertas, qui nihil, vt dicitur, præter pannos ex tanto quæstu habebas, cum his primū casibus subjacuiști fortunæ. Damnum quidem in hoc tempore tui corporis pertulisti, & secundum seculi vanitatem, te forsitan reputas, aut reputari æstimas viliorē: omnium infelicem æstimationē, & penitus à vera ratione destitutam reputationem. Si verius quod iustum & bonum est perscrutari tecum & solus studiosa frequentiquæ meditatione velles; postposita vanitate inuenires, quantum tibi afferat utilitatis particularum ista mutilatio. Primū quidem, quod plurimas euasisti passiones, quibus frequenter quatiuntur, qui tale aliquid minimè perdidērunt: & quibus nequaquam tenentur obnoxij, vt Phisici affirmant, qui huius partis corporis priuatione ab omni felicitate se cecidisse stolidissimè putāt. Deinde autem quod ardore libidinis, & luxuriæ facibus, quo malo aliquando tanguntur etiam sancti, nullam ex hoc iam nisi sola cogita-

tione patieris vexationem: sed extincta feralis flamma incendi
 dij ad te redeas necesse est, mentemque, quæ per multa &
 dulcia luxuriæ insania vagabatur, in solidum recolligas. Iam
 poteris liber, nulla retractante libidine omnium vias cognos-
 cere rationum, & causas, quas aut parum, aut nihil percipiunt,
 qui per diuersa libidinis incitamenta raptantur. Adde quòd
 pecunia tua, si quam tibi habere licuerit (non enim est Mo-
 nachorum, sine licentia proprium quid habere) vexationi di-
 strahentium non erit obnoxia. Amodo incipies possidere
 quod multis paulo ante distrahebatur euiscerationibus. Hoc
 quoque magni existimare debes, quòd nulli suspectus, ab
 omni hospite hospes tutissimè recipiaris. Maritus vxoris vio-
 lationem ex te, vel lectuli concussionem minimè formidabit.
 Decètissimè ornatarum turmas matronarum inuiolabiliter
 pertransibis. Virginum choros flore iuuentutis splenden-
 tium, quæ etiam senes iam calore carnis destitutos suis moti-
 bus in feruorem libidinis inflammare consueuerunt, non ti-
 mens earum incessus & laqueos, securus & sine peccato mi-
 raberis. Sodomitarum secretos recessus, quos detestatur su-
 per omnes turpissimos diuinæ iustitiæ veritas, & eorum tur-
 pia & maligna consortia, quæ quidem semper odisti, de cete-
 ro te sine intermissione vitare verum est. Et omnino post hos
 huius fragilissimæ fragilitatis fluxus, quod magnum Dei gra-
 tiæ munus in hoc ordine æstimo, nocturnas somniorum illu-
 siones te minimè sentire ita certum est, sicut certum est, quo-
 niam voluntatē, si fortè aderit, nullus sequetur effectus. Blan-
 ditix vxoris, corporumque contactus, sine quo vxor haberi
 non potest, ac liberorum cura singularis, quominus Deo pla-
 ceas minimè retardabunt. Quàm magnum æstimas bonum,
 peccandi periculis te subtrahi, & in non peccandi securitate
 constitui? Leoninam itaque meretricum ferociam, quam pri-
 mum ad se introeuntibus ostendunt, serpentinx deceptionis
 astutiam, captiux earum luxuriæ incontinentiam poteris vi-
 tare superbus. Quod loquor meliùs de reliquo rerum expe-
 rientia es cogniturus, quàm verbis valeam explicare. Orige-
 nes ille, cuius alta sapiētia vbique prædicatur, & colitur, præ-
 ter hoc quod quædam errata minimè correxerit, referens
 tamen culpam in Ambrosium discipulum, vt dicit beatus
 Hieronymus, qui clāculum edita, ante tempus in lucem pro-

* al Blandi-
 menta.

Hieronym.
 so. 2. ep. 65.

tulerit, ille, inquam, Origenes deuotans omnem libidinis suspicionem, hac parte corporis se sponte priuauit. Ioannes & Paulus, Protus & Hiacintus, alique plures gloriosi Martyres, gloria & honore in supercœlestibus in præsentia Dei coronati, in hac temporis breuitate gaudent genitalibus caruisse. Et beati sunt, qui propter regnum cœlorum se castrauerunt. Poteram fortasse plurima talium exempla ponere, sed quæ dicta sunt sufficiant. Ergo frater ne doleas, nec contristeris, nec perturbatione huius incommodi quatiaris, præsertim cū hoc tam plures, vt dictum est, utilitatis afferat fructus; & quod hoc modo factum est, semper & irreparabile permaneat & euulsum. Sit hoc tibi solamen assiduè quod redintegrari natura non patitur, leuius potest tolerari.

*Euseb. hist.
Eccles. lib. 6.
cap. 7.*

—— *Fer & hac, vt ait ille, solatia tecum,*

quoniam tempore huius diminutionis vel thorum violando aliorum, vel in aliquo fornicationis veneno minimè deprehensus es. Membra quieti dederas & sopori, nullique malum inferre parabas: cū ecce manus impietatis & ferramentum exitiale sanguinem tuum innoxium gratis fundere non dubitauerunt. Plangit ergo hoc tuum vulnus & damnum venerabilis Episcopi benignitas, qui, quantum licuit, vacare iustitiæ studuit. Plangit liberalium Canonicorum ac nobilium Clericorum multitudo. Plāgunt ciues ciuitatis hoc dedecus reputantes, & dolentes suam urbem tui sanguinis effusione violari. Quid singularum feminarum referam planctum, quæ sic, hoc audito, lachrymis, more femineo, ora rigarunt, propter te militem suum, quem amiserant, ac si singulæ virum suum aut amicum sorte belli reperissent extinctum? Tantus ergo omnium luctus extitit, vt melius mihi videaris te debere velle perijsse quàm seruasse quod periit. Felix se nescit amari. Penè tota ciuitas in tuo dolore contabuit. Habes arram veræ dilectionis in te, quam si prius agnouisses, nullas, meo iudicio, diuitias illi comparabiles æstimares. Sed forsitan illo sermone Prophetico mihi respondere contendes, *Renuit consolari anima.* Non possum non dolere tam probroso

Psal. 76.

tactus incommodo: quoniam hoc hominum genus suam solet ætatem adducere. Nudantur genæ post modicum ornameto pilorum, & gloria cutis in facie in rugam cōtrahitur, pallor inconueniens confundit vultum, & qui me aliquan-

do nouerunt, ex quo faciem meam viderint, statim esse mutilum hac corporis parte sunt cognituri. Exigam ergo mei vindictam dedecoris, & totum meæ pondus iniuriæ Romanis acribus intimare studebo, & tam Episcopum quàm Canonum, quoniam primum iudicium de illo, qui in me malus exstitit, mutare machinati sunt, quantum potero perturbabo, ac tum demum intelligent, quàm sit contrarium honestati à rigore iustitiæ deuiasse. O miserum valde consiliū, & omni destitutum vtilitate! Nunquid non audisti aliquando de Romanorum avaritia & impuritate? Quis vnquam suis potuit opibus meretricum voraginem satiare? Quis potuit sacculis, cupiditatis earum sufficere crumenis? Quantum ergo ratione colligo, nec tibi, nec Ecclesiæ tuæ, hoc etiam cogitare, salubre consilium esse dignoscitur. Et plurimum Monasterio tuo, cui addictus es, debes studere, prodesse potius quàm obesse. Quamplurimum te obesse, si hoc agere intenderis, nulli, qui sapiat, erit in incerto. Substantia tuæ rei ad visitationem Romani Pontificis, cùm aut modica sit, aut nulla, minimè sufficit. Quid Palatinis morsibus objectabis? Parentum vel amicorum tuorum, (omnes enim oderunt te propter te) rei familiaris subuentio, vel aliorum, in nullo ministrabit tibi. Restat ergo, vt, si Romam expecteris, Monasterij tui opibus, quæ res ei grande damnum extiterit, necesse est iter arripias. Quod si defecerit, & iter tamen impleueris, in cassum te sudasse nulli dubitare fas est. Quotquot enim nostris temporibus ad illam Sedem sine pōdere pecunia accesserunt, perdita causa, confusi & reprobi abcesserunt. Si proteruus extiteris, & causam tuam inter eos exponere volueris, de te quidem commouebis risum: iustitiam verò consequeris nullam. Perdes itaque tanti laboris fructum & operam: & Ecclesiæ Parisiensis Pontificem & Canonicos Monasterio tuo & fratribus reddes acerbissimos & infestissimos inimicos. Frustra autem niti, vt dicit historicus, & nil nisi odium acquirere, extremæ dementiæ est. Si de vindicta quereris, quam multum fitit anima tua & desiderat, noli continuò morderi dolore & tabescere: quia iam in maxima parte visa est adimpleri. Nam quidam illorum, qui tibi nocuerunt, oculorum priuatione & genitalium abscissione mutilati sunt. Ille autem qui per se factum abne-

*anecdota
p. III. et
p. 402. de
capitulis
num. in litteris.*

gat, iam ab omni possessione sua bonorum suorum comporatione exturatus est. Noli ergo Canonicos vel Episcopum tui sanguinis effusores vel perditores vocare, qui propter te & propter se, quantum potuerunt, iustitiæ intenderunt. Sed audi consilium bonum & veri amici consolationem. Monachus es, & sanctæ religionis habitum non inuitus, sed sponte sumpisti. Nō igitur ampliùs tibi vindictam exigere licet, si in veritate vis tenere & amare quod in huius nominis significatione monstratur contineri. Si verò odio habueris etiam inimicum, qui hoc opus fecit, nec odire desinis: afferat aliud qui velit, ego confidenter assero, Vestem quidem Christi portare potes: sed ad nullam tibi vtilitatem proueniet. *Sequitur*, inquit Apostolus, *pacem cum omnibus & sanctimoniam, sine qua nemo videbit Deum. Mihi vindictam, dicit Dominus, & ego retribuam.* Si vis esse perfectus, incipe Christum perfectè diligere, & vsque ad inimicum diligendum pertinges. Remitte minas & verba ampullosa in cassum effundere. Neque enim potes implere quod cupis. Iniuria iniustè irrogata, non cui irrogatur, sed ei qui irrogat, infamia est. Noli de cætero de amissa dolere fœlicitate, quam semper aduersitatis incommoda prosequuntur. Si ergo in sancto proposito permanseris vsque in finem, nec defeceris: Christus omnia, quæ perdidisti, multipliciter & mirabiliter reformabit in glorificatione corporum in futuro beatorum: ac tum demum regula Dialecticorum falsa parebit, dicentium, in habitum nunquam posse redire piationem. Vale in Domino.

Hebr. 12.

Rom. 12.

EPISTOLA II.

QVÆ EST PETRI ABAELARDI,
 ADVERSUS EOS, QUI EX AUCTORITATE
 Bedæ Presbyteri arguere conantur Dionysium
 Areopagitam fuisse Dionysium Corin-
 thiorum Episcopum, & non magis
 fuisse Atheniensem
 Episcopum.

AD AE DILECTISSIMO PATRI SVO, ABBATI
 Dei gratia Cænobij gloriosissimorum martyrum Dionysij,
 Rustici, & Eleutherij ibidem corpore quiescentium,
 unaque fratribus & cōmonachis suis carissimis
 Petrus habitu Monachus, vita peccator,
 gratiā vobis & pax, ut ait Apostolus
 à Deo patre nostro & Domino
 Iesu Christo.



SEPE vnus error multos inuoluit, & proni homi-
 nes in malum, facilius per vnum in falsitatem, quàm
 per multos in veritatem trahuntur. Ideo dico, quòd
 multi ei, quam tenemus, veritati de Dionysio Areo-
 pagita vnus Bedæ auctoritatem opponere soleant: grauiori-
 bus, qui nobis fauent, aut per malitiam, aut fortassis per igno-
 rantiam, auctoribus postpositis. Hic quippè Dionysium A-
 reopagitam Corinthiorum Episcopum fuisse proficetur, cum
 alij, quorum longe validior est auctoritas, cum potius fuisse
 Atheniensem Antistitem astruant, & omninò alium fuisse
 Dionysium Areopagitam, alium Dionysium Corinthiorum
 Episcopum, suis conuincant assertionibus. Ponamus itaq;
 singulorum verba, ac deinde consideremus, si non solùm di-
 uersa, verumetiam inuicem aduersa sibi sint, ac sibi penitus
 repugnantia. Quod si viderimus, dijudicemus auctoritates
 ipsas, ut cùm omnes saluari non valeant; illa pericliteretur quæ
 minore nititur dignitate. Scriptum est itaque de hoc in Ec-
 clesiastica Historia, libro quarto, capitulo vigesimo tertio,
 his verbis: *Veniendum nobis est tandem ad beati Dionysij comme-
 morationem*

morationem Corinthiorum Ecclesie Episcopi, cuius eruditione & gratia, quam habebat in verbo Dei, fruebantur non hi populi tantum, quos regendos acceperat, sed & procul positi, quibus per Epistolas presentiam sui reddebat. Extat denique eius Epistola ad Lacedæmonios scripta de Catholica fide, ut alia ad Athenienses, in qua ad Euangelij credulitatem inuitat & concitat seniores. Et illud designat in eadem Epistola, quod Dionysius Areopagites, qui ab Apostolo Paulo instructus credidit Christo, secundum ea, quæ in Apostolorum Actibus designantur, primus apud Athenas ab eodem Apostolo Episcopus fuerit ordinatus. Sed & Hieronymus, ille, inquam, Ecclesie doctor egregius super hoc ipso in libro de illustribus viris ita meminit. Dionysius Corinthiorum Ecclesie Episcopus tantæ eloquentiæ fuit & industriæ, ut non solum sue ciuitatis & Prouinciæ populos, sed & aliarum Prouinciarum & urbium Epistolis erudiret. E quibus una est ad Lacedæmonios, ad Athenienses, & cætera. Et post pauca. Claruit sub Imperatore Marco Antonino Vero & Lucio Aurelio Commodo. Nunc & ipsius Bedæ verba ponamus, qui in explanatione Actuum Apostolorum, eo, videlicet, loco, quo dicitur, In quibus & Dionysius Areopagita, ait sic. Hic est Dionysius, qui in Episcopatu ordinatus, Corinthiorum gloriøsè rexit Ecclesiam, multaque ad utilitatem Ecclesie pertinentia, quæ hætenus manent, ingenij sui volumina reliquit, cognomen à loco cui præerat accipiens. Areopagus enim est Athenarum curia, nomen à Marte trahens. Si quidem Græcè Mars Ἄγος, villa dicitur ἄγος. Inductis itaque, sicut proposuimus, auctoritatibus, earum, sicut promissimus, diuersitatem aut repugnantiam consideremus. Videntur autem duæ suprà positæ auctoritates, quæ sibi consonæ sunt, auctoritati Bedæ omnino contrariæ. Ex illis quippe apertè conuincitur alium fuisse Dionysium Areopagitam, alium Dionysium Corinthiorum Episcopum. Nam, iuxta Ecclesiasticam historiam, Dionysius Corinthiorum Episcopus de Dionysio Areopagita scripsisse perhibetur, & ibidem Dionysius Areopagita Atheniēsium fuisse Episcopus assignatur. Nec minùs ex verbis Hieronymi alium hunc esse, quàm illū apparet: cùm videlicet dicat Dionysium Corinthiorū Episcopum sub Marco Antonino & Lucio Aurelio claruisse. C. Itar quippè Dionysium Areopagitam, qui prædicatione Pauli conuersus est, tempore Christi & Apostolorum exti-

tisse, ac iam virum adultum adeò fuisse, vt vxorem Damarim iam tunc cum constet habuisse: de qua pariter cum eo in Actibus Apostolorum fit commemoratio. Vnde & ibidem scriptum habetur, quod *quidam viri adherentes Paulo crediderunt, in quibus & Dionysius Areopagita, & mulier nomine Damaris, & alij cum eis.* A tempore autem Tiberij Cæsaris, sub quo Dominus passus est, vsque ad tempora prædictorum Imperatorum, sub quibus Dionysius Corinthiorum claruisse dicitur, ampliùs quàm centum sexaginta annos Chronicorù supputatio assignat, vt nequaquam tanto tempori vita prædicti viri sufficeret. Scriptum quippè est in Psalmis. *Si autem in potentatibus octoginta anni, & amplius eorum labor & dolor.* Ex quo liquidè colligitur alium Dionysiu Areopagitam, alium Dionysium Corinthiorum Episcopum extitisse. Atque ita prædictorum auctorum sententijs, Bedæ refellimus opinionem: præsertim cum & illorum longè grauior auctoritas sit, & in ore duorum potius quàm vnius stare verbum conueniat. Ad Ecclesiasticam quippe historiam, quasi primum & maximum Ecclesiasticorum gestorum fundamentum, tam Bedā quàm cæteros scriptores Ecclesiasticos recurrere certum est. Quid itaque videtur tibi respondere posse Beda, si illa scripta ei aduersari monstraues, quorum se frequenter auctoritatibus protegit? Nil equidem rectius, quàm sapientis illum versiculum,

Conueniet nulli, qui secum disidet ipse.

Nequis autem grauiter ferat, ac vehementer abhorreat Bedam nonnunquam decipi, & suo spiritu non diuino, quædam protulisse, eò videlicet quòd eius expositiones Latinorù maximè frequentet Ecclesia: ad memoriam Natham Prophetam reducat de ædificando templo deceptum, atque ipsius quoque principis Apostolorum perniciosam simulationem à coapostolo Paulo correctā, *Quia, inquit, reprehensibilis erat:* necnon & venerabilem Doctorem Augustinum, qui errores proprios sponte corrigendo, omnia ferè scripta sua retractare non erubuit. Recogitet & illud Helix Prouerbiū, *Non enim meliores sumus, quàm patres nostri.* Et tunc, profectò, cum tantorum virorum errores commemorauerit, iam de errore Bedæ mirari desistet. Vt enim beatus asserit Gregorius in prima super Ezechielē Homilia, nonnunquā Spiritus sanctus ad humilitatis custodiam mentibus fidelium sese subtrahit,

& eos in errorem labi permittit, vt videlicet recognoscant, quàm inutiles Spiritu sancto abscedente remaneant: qui etiam cùm mentibus præsidet sanctorum, sic reuelet aliqua, vt occultet nonnulla. Non magnopere curandum est, si in historijs, aut in his, quæ ad Catholicæ fidei periculum non attinent, errasse sanctos nonnunquam annuamus, cùm aper- tè Augustinus de historia septimi Psalmi, in cuius videlicet Psalmi titulo legitur, *Pro verbis Chusi filij Iemini*, per Hierony- mum errasse conuinci possit, tanquam Hebraicæ penitus ex- pers veritatis. Siquis autem Bedæ quoque auctoritate nita- tur, vt omnibus satisfaciatur; dicere fortassè licebit hoc loco Bedam aliorum opinionem potius sequutum esse, quàm suã constituisse sententiam. Sæpè etenim, vt sanctorum aucto- ritates illæ sas custodiamus, ea quæ scribunt ad opinionem a- liorum potius quàm ad sententiam ipsorum referimus. Sic & in hoc loco dicamus Bedam aliorum introduxisse sententiã, qui ex æquiuatione nominis decepti, eundem esse æstima- uerunt Dionysium Areopagitam, & Dionysium Corinthio- rum: quippè cùm & beatũ Ambrosium adedò ab historica ve- ritate quodam loco per æquiuationem nominis videamus exorbitasse, vt Iacobum fratrem Ioannis, quem pariter cum Ioanne fratre suo & Petro ad transfigurationem sui seorsum Dominus assumpsit, eum Iacobum fuisse asserat, qui primus solium sacerdotale conscendit. Quod quidem de alio Iaco- bo, & qui frater Domini nuncupatus est, & primus in Hiero- solymorum Ecclesiam est ordinatus, constat intelligi debere: vt videlicet ille primus hoc modo sacerdotale solium intelli- gatur conscendisse. Si ergo tantus Doctor per æquiuationem nominis Iacobi, à veritate historica, in expositione Euã- gelica permissus sit deuiare: quid mirum, si Bedam æquiua- tio quoque nominis Dionysij, vel plerosque alios fefelle- rit, præsertim in illa Actuum Apostolorũ expositione, quam ab ipso Beda certum est postea retractatam esse? In cuius qui- dem retractationis præfatiuncula, vt breuiter verba eius cõ- prehendamus, ita exorsus ait. *Scimus eximium doctorem Au- gustinum libros Retractationum in quedam opuscula sua fecisse: cuius industriam nobis quoque placuit imitari, vt post expositionem Actuum Apostolorum, quam ante annos plures conscripsimus, nunc in idem volumem breuem Retractationis libellum condamus, studio maximè*

vel addendi quæ minùs dicta, vel emendãdi quæ secùs, quàm placuit, dicta videbantur. Qui etiam in prædicta expositione sua ver-
sus Arati frequenter introduxit, cuius nonnullos nouimus
errores, cùm apertè eum Hieronymus in prædicto illustrium
virorum libro errasse ostendit, de eodem die quo Petrus &
Paulus passi sunt. Quem quidem diem non aliter eundem
tam Aratus quàm Beda in Martyrologio, eius auctoritate fre-
tus accipiat, nisi anni reuoluto tempore, cùm Hieronymus
eodem prorsus die, anno quartodecimo Neronis tam Petrum
quàm Paulum passos esse pronuntiet. Denique, vt hanc li-
tem variarum sententiarum pacatissimo fine sopire penitus
valeamus; facile fortassis, si duos Dionysios Corinthiorum
Episcopos extitisse ponamus, & Bedam veracem poterimus
tenere, & nihil per opinionem accipere: ita quidem, vt vnus
ex Dionysijs Corinthiorum Episcopis, & Dionysius Arco-
pagita idem sit, de quo Beda scribit, & in diuersis tempori-
bus idem Athenis & Corintho præflet Episcopus, & post-
modum à sancto Clemente Galliarum sit ordinatus Aposto-
lus: alius verò ex Dionysijs Corinthiorum Episcopis, ille fue-
rit Dionysius, de quo Ecclesiastica Historia & Hieronymus
meminerunt: atque ita arbitror omnem controuersiam ab-
solui posse. Omnium igitur, quæ ad solutionem proposui-
mus, hæc summa est, vt vel Bedam deceptum fuisse conceda-
mus: vel eum aliorũ nobis opinionẽ præsentasse: vel duos Co-
rinthiorũ Episcopos extitisse. Valete in Domino dilectissimi.

EPISTOLA III.

QVÆ EST PETRI ABAELARDI,

CONTRA QVENDAM CANONICVM REGV-
larem, qui Monasticum ordinem deprimebat,
& suum illi anteferebat.



MULTORVM relatione ad nostras delatum est aures,
nostri Ordinis, id est Monastici, statum à te sæpiùs in
præsentia multorum non mediocritæ læsum: quod
non alia de causa præsumptum esse credimus, nisi vt
nostros humiliando, tuæ professionis Clericos, quos Canoni-
cos regulares vocatis, sic efferre laborares. Miramur autem

si ita sit, sed amplius miramur si ita non sit, cùm nullam aliam suspicari possimus causam. Dicis, vt dicunt, longè ordine tuo nostrum inferiorem esse, & plurimùm Monachos à dignitate Clericorum abesse. In quo quidem primùm à te sciscitari volumus, de qua id dignitate intelligas, vtrum Prælationis inter homines, an Religionis apud Deum. Quod Religionis, profecto hæc dignitas verissima est, quæ nos Deo maximè cōmendat, atque virtutibus adornat, & tantò gloriosiores in cælestibus efficit, quantò humiliores habemur in terrenis. At verò qua ratione vel authoritate hanc sibi dignitatem Clerici vindicare valeant dicas si possis, aut adicias cur non possis. Quis enim nesciat quòd quotidianis docemur experimentis hos etiam Clericos, qui maiore gradu præminent, Monasticā eligere vitam, cùm quod in Clericatu deliquerint perfectè corrigere satagunt, & cùm eis ad Monachatum transire liceat, ad Clericatum nullatenus redire permittantur? Aut si quandoque per religionis excellentiam Ecclesiasticæ personæ de Monasterijs electæ, Clericorum officijs præficiantur, ipse quoque habitus Monachalis tanta dignitate præminet, vt semel assumptus deponi non debeat: pro quo non solum secularis, verum etiam Clericalis abiiciendus est. Quid est etiam, quòd cùm sæpè Monachi Episcopi facti Clericis præponantur, vel quibuscumque officijs Ecclesiasticis applicentur? Cur non è conuerso de Clericis Abbates in Monasterijs fiant, vel officiorum Monachicorum curam suscipiant? Cur, inquam, cur, obsecro, nisi quod indignissimum censetur, vt eius vitæ regimini laxior præponatur, pro qua etiam ipsa contemnenda est, & vt diximus, per eam corrigenda? Cur etiam vos ipsi, & vniuersa Ecclesia in supplicatione Letaniarum dicitis, *Omnes sancti Monachi & Eremitæ, Omnes sanctæ Virgines, Omnes sanctæ viduæ & continentes orate pro nobis*, & non, *Omnes sancti Clerici, vel sancti Presbyteri, vel sancti Episcopi*? Certè quia hæc nomina officij magis sunt, sicut illa religionis. Quid est etiam quòd in illis Hymnis festiuitatis omnium Sanctorum, in quibus tam à vobis, quàm à cæteris suffragia Sanctorum postulantur, nulla vestri mentio fiat, sicut fit Monachorum & Virginum? Sic quippè scriptum est:

*Chorus sanctarum virginum,
Monachorumque omnium,*

*Simul cum Sanctis omnibus
Consortes Christi facite.*

Item.

*Monachorum suffragia,
Omnesque ciues celici,
Annuant votis supplicum,
Et vite pascant præmium.*

Audio te tamen solere opponere nobis illud quoque Hieronymi nostri. *Monachus, si ceciderit, rogabit pro eo Sacerdos : pro Sacerdotis lapsu quis rogaturus est?* Quod certè quacumque ratione diceres, si nullatenus Monachos Sacerdotes esse contingeret. Cùm verò dicit, Monachus est Sacerdos, utique illud distinguit Monachum à ditione Sacerdotis, qui Sacerdos non sit. Sic enim cùm dicimus, Rex & Miles, vel, Episcopus & Sacerdos, vel Sacerdos & Diaconus, quamuis etiam Reges sint milites, vel Episcopi Sacerdotes, vel Sacerdotes Diaconi; militem eum intelligimus, qui Rex non sit, & Sacerdotem qui non sit Episcopus, & Diaconum simplicem. Vbi etiam cùm dicit, *Rogabit pro eo Sacerdos*, specialem illam Missam orationem intelligit, quæ propria est Sacerdotis, non quæ cuilibet iusto competit. Quam & Apostolus generaliter cõmendans, ait: *Multùm enim valet deprecatio iusti assidua.* Quo enim quisque iustior est, ab eo exaudiri meretur, qui non tam verba quàm opera pensat, nec tam linguam quàm vitam cõsiderat. Quantùm autem de perfectione sua vitam Monasticam idem Doctor vestræ præferat, patenter insinuat ad Heliodorum Monachum his scribens verbis: *Interpretare vocabulum Monachi, hoc est nomen tuum. Quid facis in turba qui solus es? Quid ergo? Quicumque in ciuitate sunt, Christiani non sunt? non est tibi eadem causa quæ cæteris? Dominum ausculta dicentem: Si vis perfectus esse, vade, vende omnia quæ habes, & da pauperibus; & veni, sequere me. Tu autem perfectum te esse pollicitus es. Nã cùm derelicta milita mundiali castrasti te propter regnum celorum, quid aliud quàm perfectam sequutus es vitam? Et post aliqua, Alia, inquit, ut ante perstrinxi, Monachica causa est, alia Clericorum: hoc est, longè ab inuicem eorum professio & conuersatio distat, & ipsorum propositum tendit ad diuersa, sicut, ait; ante perstrinxi. Quod quidem vbi faceret, assignari non potest, nisi vbi perfectionem Monasticam à vita fidelium in ciuitate*

commorantium distinxit, dicens. *Quid ergo? Quicumque in ciuitate sunt, Christiani non sunt?* Qui etiam ad Paulinum presbyterum simul & Monachum scribens, Clericos magis inter homines cōuersari debere, quàm Monasticæ solitudinis perfectionem tenere patenter his verbis insinuat: *Quia igitur fraternè interrogas, per quam viam incedere debeas, reuelata tecum facie loquar. Si officium vis exercere Presbyteri, si Episcopatus te vel opus vel honor fortè delectat; viue in urbibus & castellis, & aliorum salutem fac lucrum animæ tuæ. Sin autem cupis esse quod diceris, Monachus, id est solus, quid facis in urbibus, quæ utique non sunt solorum habitacula, sed multorum? Habet unumquodque propositum Principes suos: & ut ad nostra veniamus, Episcopi & Presbyteri habeant in exemplum Apostolos & Apostolicos viros: quorum honorem possidentes, habere nitantur & meritum. Nos autem habeamus propositi nostri principes, Paulos, Antonios, Iulianos, Hilariones, Macharios, & ut ad scripturarum auctoritatem redeam, noster princeps Helias, noster Heliseus, nostri duces filij Prophetarum, qui habitabāt in agris & solitudinibus, & faciebant sibi tabernacula prope fluentia Iordanis. De his sunt & illi filij Rechab, qui vinum & siceram non bibebant, qui morabantur in tentorijs, qui Dei per Hieremiam voce laudantur, & promittitur eis, quòd non deficiat de stirpe eorum vir stans coram Domino. Nec solū Heliam, qui in antiquo populo tantus enituit, ut in cælum uiuus sustolli mereretur, inter nostros mirare principes: verumetiam Ioannem in spiritu eius venientem, & quasi alterum Heliam, cui Dominus tantum testimonium dedit, ut pro eminentia vitæ ipsum ex testimonio Prophetæ Angelum nuncuparet, nec solū Prophetis, verumetiam vniuersis hominibus anteferebat. De quo & Chrysostomus Homelia Euangeliorum xxiii. quæ sic incipit, *De Ioanne dicitur, Fuit homo missus à Deo, cui nomen erat Ioannes. Gratia in homine comprehenditur, Ioannes enim interpretatur Dei gratia, quia maiorem accepit gratiam. Propterea in eremo philosophatur, & reseruat se in aduentum Christi: quia nunciaturus erat Christum. Statim in eremo nutritur, statim ibi crescit: non vult cum hominibus conuersari, in eremo cum Angelis philosophatur. Considerate, Monachi, dignitatem vestram: Ioannes princeps vestri est dogmatis ipse Monachus. Statim ut natus est, in eremo vixit, in solitudine nutritur, Christum expectat in solitudine. Eo tempore, quo Iesus natus est, erat in ere-**

mo. Hoc templum, quod videmus esse destructum, quantas habebat diuitias, quid auri, quid argenti Iosephus describit, quantū gemmarū, quantū serici, quanti erant Sacerdotes, scribe, & vniuersa genera officiorū. Christus in tēplo nescitur, & in eremo predicatur. Hoc totum quare dico? Et doceam dogmatis vestri principem esse Baptistam Ioannē. Audistis, fratres, nostri pariter & vestri propositi principes superius inductos, vt vtriusque ordinis differentia clareat. Si gaudetis Apostolos quoque vestris cōnumerari principibus, atque Pontifices tam veteris quā noui Testamenti ab ipso videlicet Aaron vsque ad Annam & Caypham, ne obsecro doleatis Heliam & Ioannem maiores istis, nostri duces esse propositi. Clericatum pro Monachatu Ioannem commutasse dubium non est: qui cū filius Pontificis esset, cui eo tempore Pontificalis dignitas hæreditario iure debebatur, ciuitatem solitudini, Pontificem Monacho posthabuit, & perfectionem vitæ Prælationi præposuit Ecclesiasticæ. De quo & Hieronymus ad Rusticum Monachum scribens, *Audio*, inquit, *religiosam te habere matrem, multorum annorum viduā, quæ aluit, quæ erudiuit infantem. Et Ioannes Baptista sanctam matrem habuit, Pontificisque filius erat: & tamen nec matris affectu, nec patris opibus vincebatur, vt in domo parentum cum periculo viueret castitatis. Viuebat in eremo, & oculis desiderantibus Christum, nihil aliud dignabatur aspicere. Filij Prophetarum, quos Monachos in veteri Testamento legimus, edificabant sibi casas propter fluentia Iordanis: & turbis urbium derelictis, polenta & herbis agrestibus victitabant. De quibus & alibi meminit, Virgo Helias, Helisæus virgo, virgines filij Prophetarum. Quid est, obsecro frater, quod electurus Apostolos Dominus, nequaquam de eremo acciuit Ioannem, nec ab eo baptizandus, ipsum à solitudine, vel ad horam reuocauit: sed sicut ceteri hominum ad eum venit, inter ceteros & ipse baptizandus à Monacho, sicut scriptum est, *factum est cū baptizaretur omnis populus. & Iesu baptizato, &c.* Quid, inquam, nisi quia, vt dixit, partem Mariæ præferendam censuit parti Marthæ, quietem scilicet contemplationis, solitudini & crebris perturbationibus sæculi? Quibus quidem sollicitudinibus occupatus Apostolus ingemiscit, dicens: *Præter illa quæ extrinsecus sunt, instantia mea, quotidiana sollicitudo omnium Ecclesiarum. Quis infirmatur, & ego non infirmor? Quis scandalizatur, & ego non uror?**

In

In quibus quidem occupationibus atque molestijs quàm difficile sit puritatem custodire mentis, & terrena itinera sine aliquo pulueris contagio frequentare, ipse Dominus patenter edocuit, cùm pedes Apostolorum ablucere decreuit. Quod diligenter Sponsa in Cantico Canticorum attendens, Sponso ad ostium eius pulsanti, & vt de lectulo surgens ei aperiat roganti, prouidè his verbis se excusat. *Expoliam me tunica mea, quomodo induar illa? Laui pedes meos, quomodo inquinabo illos?* Quid enim lectulus Sponsæ, nisi quies est animæ contemplatiuæ, & à sollicitudinibus & curis seculi remotæ? Quæ quidem in claustro quasi spōsa in thalamo, tanto amplius Deo vacat, & arctius ei toto astringitur desiderio, quantò longius ab occupationibus seculi remota est, & iam in secreto cælestium camerarum per contemplationem ita ei coniuncta est, vt sit vnus cum Deo spiritus, iuxta quod de beato Martino legitur, *Artus quippè fatiscientes spiritui seruire cogebat, stratiq; suo recubans, nec terram videre iam dignatus, cælo totus inhiabat.* Ad talem lectuli quietem contemplationis secretum Sponsus veniens sibi aperiri postulat, cùm plebs Christiana animæ cui-cunque contemplatiuæ supplicat, vt suscipiendo regimen ipsorum eos ad se sic admittat. Quod & ipse Christus in membris suis agere dicitur, quo inspirante id agitur, & sub cuius nomine & auctoritate hoc imploratur. Perfecta verò anima illa quietem suam vehementer diligens, dum laborem refugit, ne aliorum lucro detrimentum incurrat suæ perfectionis, surgere de lectulo renuit, & Sponso, vt dictum est, instanti dicit: *Expoliam me tunica mea*, hoc est, exteriorem curam mundanarum actionum ex voto postposui. Interior quippè vestis & subtilior, est interula; exterior & grossior, tunica. Vnde bene hic ornatus, contemplatiuus; ille vero habitus, assignandus est actiuus. Hi quippe claustris se Monasticis recludentes tantò subtilius atq; perfectius summi luminis splendorem contemplantur, quantò ab exterioribus seculi curis amplius sunt remoti. Hanc profectò curarum occupationem, quam Martha proximi necessitudinibus impendit, & qui populo præsunt exercent, quasi tunicam resumere Sponsa refugit, cùm à contemplatione ad actionem redire nullatenus acquiescit. Vnde & causam annexens ait: *Laui pedes meos, quomodo inquinabo illos?* Affectus quippe nostri,

quibus ad quidlibet agendum trahimur, quasi quidam pedes sunt, quibus ducimur. Istos pedes abluit, qui à curis seculi mentem retrahit, quibus animus per diuersa diffusus, difficile est ne saltem cogitationum maculis aliquibus respergatur, vel quandoque cedat tentationibus. Quod Sponsa cōsiderans de lectulo pedes ad terram deponere trepidat, hoc est se iterum implicare curis, dum nullum à sordibus vacare locum extra lectulum suum credit. Quæ tandem sponso instante de lectulo surgere compellitur, & ei, sicut postulauit, aperire: de quo cū eum tenere vellet, atque, vt solita fuerat, comprehendere, subiunctum est. *At ille declinauerat atque trāsierat.* Non enim ita in publico sicut in occulto Deus inueniri potest: nec sollicitudo Marthæ circa plurima turbatæ Christo assistere valet assiduè, nec curis seculi mens intenta in Deo poterit vigilare quieta. Vnde & ipse Sponsus quo deuotius oremus, ostium cubiculi admonet claudi: alioquin declinat & trāsit à nobis, quia quò minus ei vacamus, eo magis ab ipso deferimur, & ab eius gratiæ donis amplius destituimur. Etiam Sponsa eius ad publicum de secreto thalami transgressa, quantum de perfectione sua prolucris aliorum minuit, reperit; & tantò magis accedit periculum, quantò de commissis animatus maior illi superest reddenda ratio. Attende, obsecro frater, tui ordinis dignitatem & officij conditionem, in quo & minuitur meritum, & imminet periculum. Vide quid sit profectus dignitatis, vbi perfectio tollitur religionis, vbi maior apud seculum, minor fit apud Deum, & graue sui sustinet dispendium. Liam, quam duxisti, gaudes esse fœcundam: sed doles cū respexeris eam lippam. Nocturnum Lia coniugium habuit, quasi talis copula luce digna non fuerit. Quandiu sterilis Rachel permansit, incolumis vixit: fœcunda postmodum facta, proprio partu est extincta. Ex quo patenter innuitur quàm periculosè id, vnde gloriamini, suscipiatur: & quòd hæc gloria, ruina potiùs siue deiectio quàm exaltatio sit dicenda. Quorum quidem facilem casum, & periculosum ascensum, iuxta illud Psalmistæ, *Deiecisti eos dum alleuarentur*, beatus Hieronymus attendens, quodam loco ad Heliodorū Monachum his scribit verbis: *Quod si te quoque ad eundem ordinem pia fratrum blandimenta sollicitant, gaudebo de ascensu, sed timebo de lapsu.* Idem aduersus Vigilā-

gium solitaria, hoc est Monastica vitæ securitatē cōmendans, ait. *Cur, inquires, pergis ad eremum? Videlicet ut te non audiā, non videam, ut tuo furore non mouear, ut tua bella non patiar, ne me capiat oculus meretricis, ne forma pulcherrima ad illicitos ducat amplexus. Respondebis. Hoc non est pugnare, sed fugere. Sta in acie, aduersarijs armatus obfiste, ut postquā viceris coroneris. Fateor imbecillitatē meā: nolo spe pugnare victoriæ, ne perdā aliquando victoriā. Si fugero, gladium deuittavi: si stetero, aut vincendum mihi est, aut cadendum. Quid autem necesse certa dimittere, & incerta sectari? Aut scuto, aut pedibus mors vitanda est. Tu, qui pugnas, & superari potes, & vincere: ego cūm fugero, non vinco in eo quod fugio, sed ideo fugio, ne vincar. Nulla securitas est, vicino serpente dormire. Potest fieri, ut me non mordeat: tamen potest fieri, ut aliquandō me mordeat. Idem ad Oceanum de morte Fabiolæ: Caueat religiosus ibi viuere, ubi necesse habeat quotidie aut perire, aut vincere. Securius enim est perire non posse, quā iuxta periculum non perire. Hanc & Seneca maximus ille morum Philosophus sententiam tenens, & sic philosophari Lucilio suo consulens, ait Epistolarum, quas ad eum scribit, quinquagesima tertia: Non tantūm corpori, sed etiam moribus salubrem locum eligere debemus. Id agere debemus, ut irritamenta vitiorum quā longissimē profugiamus. Indurandus est animus, & à blandimentis voluptatum procul abstrahendus. Vna Hannibalem hiberna soluerunt, & indomitum illum niuibz atque Alpibus virum enervauerunt fomenta Campaniæ. Armis vicit, vitis victus est. Nobis quoque militandum est, & quodam genere militiæ, quo nunquam otium datur. Debellande sunt imprimis voluptates: quæ, ut vides, seua quoque ad se ingenia rapuerunt. Si quis sibi proposuerit quantum operis aggressus sit, sciet nihil delicatè, nihil molliter esse faciendum. Sed ad hæc fortassis tam sanctorum Patrum quā Philosophorum consilia respondebis reuera periculosum esse administrationem Ecclesiasticam suscipere, ac difficillimum in ea, quantum oportet, desudare: sed profectò tantò maiora constat esse præmia, quantò huic labori maior incumbit difficultas. Cui primū illud respondeo Tullianum. Quod si laboriosum, non statim præclarum. Alioquin in Ecclesia Dei, qui quotidianis nuptiarum molestijs & solitudinibus implicantur assiduis, his præferendi essent, qui cœlibem vitam ducentes, minùs onere sæculi premuntur, & ob hoc liberiùs atque puriùs Deo vacant, tanquam*

videtur a-
liquid de-
esse.

lectuli quietem adepti. Denique si pro augmento meritō
eos extollis, qui de virtutibus suis confidentes, pugnas ten-
tationum & illecebras mundi magis sustinere quā fu-
gere decreuerunt, vide vtrum his, qui continentiam voue-
runt, consulendum sit, vt in lupanaribus vel vbi crebras for-
nicationes*, vide aut hanc virtutem studeant conserua-
re, & se sponte periculis objicientes, sed quæ magis Ange-
los, quā homines attendentes, tanta securitate sui Deum
præsumant tentare. Cur etiam Clerici feminas in contuber-
nio suo habere prohibentur, nisi tales consanguinitatis per-
sonas, de quibus nulla suspicio turpitudinis possit haberi?
Quas quoque vester maximè, vt dicitis, præceptor Augusti-
nus intantum declinare decreuit: vt nec sanctissimam soro-
rem secum habitare pertulerit, dicens: *Quæ cum sorore mea
sunt, sorores meæ non sunt.* Cur & vos ipsi Canonici regulares
à vobis ipsis nouiter ap- ati, sicut & nouiter exorti, magno
ambitu murorum clau- a vestra sepientes, more Monacho-
rum, ab illecebris & tentationibus seculi manetis diuisi? Si
ergo, vt vos quoque docetis, & omnibus patet, imbecillitati
humanæ magis prouideri conuenit à periculis, quā vltro se
obicere illis; profectò consilium est omnia tentamenta, quo
ad possumus, euitare, præsertim si eam eligamus vitam, quæ &
maioris sit meriti, & minùs pateat tentationi. Quod tam au-
thoritate Patrum, quā certis rerum declaratur exemplis.
Vitam contemplationis, quietem tumultuosæ fideiū actio-
ni constat à Domino prælatam fuisse: & Mariæ partē, quam
optimam dixit, parti Marthæ certum est anteferri. Quamuis
enim Martha reficeret Dominum: feliciùs Maria reficieba-
tur à Domino, & longè meliorem Dominus quā Martha
ministrabat refectionem. Marthæ ministratio est necessa-
ria corporis prouidere, verbum prædicationis erogare, a-
liorum magis, ex officio proprio; quā sui curam gerere.
Non enim Ecclesiæ Pastores, in eo quod Pastores sunt,
tam de proprijs quā de subiectorum pabulis habent co-
gitare, nec in hoc tam sibi quā alijs proficiunt. Vnde &
Dominus cū in hoc officio Petrum constitueret, nequa-
quam ait, *Pasce te ipsum*, sed, *Pasce oves meas*, siue, *agnos meos*,
hoc est pane spiritalis doctrinæ vel exhortationis ipsos instrue
vel confirma. De quo quidem pane diuini verbi scriptum est

alibi: *Non in solo pane viuit homo, sed in omni verbo, quod procedit de ore Dei.* Quòd si hoc tempore Clericorum ac Monachorum laborem ac vitę duritiam conferatis, non est hoc lingua disputatione discutiendum, quod quotidianis experimentis sit manifestum. Confer Episcopos cum Abbatibus, Archiepresbyteros Ecclesiarum cum Prioribus Monasteriorum, Clericos cum Monachis: & quoslibet consulo, qui quibus inter ipsos magis asperam vel laboriosam vitam ducant, vt si laborem penſes, ad meritum nos longè superiores inuenias, quibus vos ipsi non aliam quàm pœnitentium vitam ascribitis, & claustra nostra non loca dignitatis, sed pœnitentię carceres nuncupatis. Quam & beatus Hieronymus à vita Clericorum distinguens, ad Heliodorum de morte Nepotiani scribit his verbis: *Si quis relicto Clericatu duritię se tradiderit Monachorum, sit creber in orationibus, vigilans in precando, lachrymas Deo, non hominibus offerat.* Certè si clericorum arctior esset vita, & qui Ecclesiastica præsunt dignitate, vitæ quoque præemerent austeritate: nequaquam Monachi tanto desiderio appeterent Episcopari, nec spirituales Patres tanta solitudine Clericos etiam ad Monasticam conuersationem inuירarent. Quale & illud est prædicti Doct̃oris Præsidium Diaconem exhortantis. *Diaconus, inquires, Ecclesiam tutò deserere non possum. Vereor ne incurram sacrilegium, si altaria derelinquam. Sed considera, obsecro, satis esse difficile locum Stephani implere vel Pauli, in angelico stare ministerio, & populos subiacentes candenti de super veste despicere. Pretiosum est margaritum, sed citò frangitur, fractumque non potest instaurari. Item: Cùm vitam in urbibus lacerent bonam, quid facies frater in medio? aut sectaberis quę sunt aduersa consinentia: aut, si facere nolueris, ipse damnaberis. Præmitto varias illecebras, quibus etiam rigidissimi emolliantur animi. Nunc illud affirmo, quòd etiam si ita non essent, ad comparisonem tam ingentis boni, minora deserere debueras. Adde quod Diaconus es, sed abcessu tuo Ecclesię damna non sentient. Helias vixit in eremo. Hælisæum Prophetarum secutus est chorus. Precursor Domini Ioannes nueritus in solitudine, ad hoc tantum descendit ad Iordanis ripas, vt populos argueret confluentes, & Phariseos intelligens Clericos Iudæorum, generationes vipereas denotaret. Nuper Ægypti deserta vidisti, insuitus es Angelicam familiam. Quanti ibi flores sunt? quàm spiritualibus gemmis prata vernantia? Vidisti ferta, quibus Dominus*

coronatur. Item: *Habebis cellulā, quæ te solum capiat. Immo non eris solus, Angelica tecum turba versabitur. Tot socij, quot sancti. Leges Euangelium, fabulabitur tecum Iesus. Replicabis Apostolos vel Prophetas. Nunquid poteris talem alium tuis sermonibus habere consortem?* Sectemur saltem mulierculas, sexus nos doceat infirmior. Quantæ diuitijs pariter & nobilitate pollentes (nolo enim vocabula dicere, ne adulari videar) relictis facultatibus, pignoribusque contemptis, id factu facile iudicauerunt, quod tu proprio putasti timore difficile?

EPISTOLA IV.

QVÆ EST PETRI ABAELARDI,

INVECTIVA IN QVENDAM IGNARVM

Dialectices, qui tamen eius studium reprehendebat,

& omnia eius dogmata putabat sophismata

& deceptiones.



MYSTICA quædam de vulpe fabula in prouerbum à vulgo est assumpta. Vulpes, inquiunt, conspectis in arbore cerasis, repere in eam cœpit, vt se indè reficeret. Quò cùm peruenire non posset, & relapsa decideret, irata dixit. Non curo cerasa: pessimus est earum gustus. Sic & quidam huius temporis doctores, cùm Dialecticarum rationum virtutem attingere non possint, ita eam execrantur, vt cuncta eius dogmata putent sophismata, & deceptiones potiùs quàm rationes arbitrentur. Qui cæci duces cæcorum nescientes, vt ait Apostolus, de quibus loquuntur, neque de quibus affirmant, quod nesciunt dānant, quod ignorant accusant. Lethalem iudicant gustum quem nunquam attigerunt. Quicquid non intelligunt, stultitiam dicunt: quicquid capere non possunt, æstimant deliramentum. Quos quidem rationis expertes, quia rationibus refellere nō valemus: testimonijs saltem sanctarum Scripturarum, quibus se plurimum niti fatentur, eorum præsumptionē compescamus. Agnoscant igitur eam, quam vehementiùs detestantur, artem, hoc est Dialecticam quasi sacræ lectioni contrariam,

quantum Ecclesiastici Doctores commendent, quantum eam sacre Scripturæ necessariam iudicent. Hanc quippe scientiam tantis præconijs efferre beatus ausus est Augustinus, ut comparatione cæterarum artium eam solam facere scire fateatur, tanquam ipsa sola sit dicenda scientia. Vnde libro secundo de ordine ita meminit. *Disciplinā disciplinarū, quā Dialecticā vocant. Hæc docet docere, hæc docet discere. In hac se ipsa ratio demonstrat atque aperit, quæ sit, quid velit: scit sola, scientes facere non solum vult, sed etiam potest.* Idem in secundo de doctrina Christiana, cum inter omnes artes præcipuè Dialecticam & Arithmeticam sacre lectioni necessarias esse profiteatur, illam quidem ad dissoluendas quæstiones, hanc ad allegoriarum mysteria discutienda, quæ frequenter in naturis numerorum inuestigamus, tanto amplius Dialecticam extulit, quantum amplius eam necessariam assignauit, ad omnes videlicet quæstionum dubitationes terminandas. Ait autem sic: *Restant ea, quæ non ad corporis sensus, sed ad rationem animi pertinent, ubi disciplina regnat disputationis & numeri.* Sed disputationis disciplina ad omnia genera quæstionum, quæ in literis sanctis sunt, penetranda & dissoluenda plurimum valet. Tantum ibi cauenda est libido rixandi, & puerilis quædam ostentatio decipiendi aduersarium. Sunt enim multa, quæ appellantur sophismata, falsæ conclusiones rationum, & plerumque ita veras imitantes, ut non solum tardos, sed ingeniosos etiam minus diligenter attentos decipiant. Quod genus captiosarum conclusionum scriptura, quantum existimo, detestatur illo loco ubi dictum est, *Qui sophisticè loquitur, odibilis erit.* Plurimum autem Dialecticam atque Sophisticam artem ab inuicem constat esse discretas, cum illa in veritate rationum, hæc in similitudine consistat earum, ista fallaces argumentationes tradat, illa fallacias earum dissoluat, & ex discretionem verarum argumentationum falsas deprehendi doceat. Vtraque tamen scientia tam Dialectica scilicet quam Sophistica ad discretionem pertinet argumentorum: nec aliter quis in argumentis esse discretus poterit, nisi qui falsas ac deceptorias argumentationes à veris & congruis argumentationibus distinguere valebit. Vnde & à scriptoribus Dialecticæ nec huius artis tractatus est prætermisus, cum ipse Peripateticorum princeps

Aristoteles hanc quoque tradiderit elenchos scribens Sophisticos. Vt enim homini iusto mali quoque notitia necessaria est, non ut malum faciat, sed ut malum cognitum cauere queat; ita & Dialectico sophismatum non potest deesse peritia, ut sic ab eis sibi cauere queat. Nec discretus in rationibus argumentorum erit, nisi falsis pariter & veris cognitis, hæc ab illis discernere, & utraque diiudicare diligenter valebit. Vnde &, beato attestante Hieronymo, ipse quoque Salomon ad falsas pariter & veras argumentationes cognoscendas plurimum adhortatur. Sic enim aduersus calumnias Magni Oratoris urbis Romæ scribens, sicut & nos nunc aduersus consimiles, ait inter cætera de summo illo sapiente Salomone. *In exordio Proverbiorum commonet, ut intelligamus sermones prudentie, versutiasque verborum, parabolas, & obscurum sermonem, dicta sapientum & enigmata, que propriè Dialecticorum & Philosophorum sunt.* Quid enim sapientiæ sermones, versutiasque verborum, nisi verarum & fallaciarum argumentationum diuersitatem intelligit? Quæ, ut diximus, ita sibi sunt adiunctæ, ut discretus in his esse non possit, qui illas ignorauerit: cum ad cognitionem quarumlibet rerum necessaria sit notitia contrariarum. Nemo enim virtutes diligenter nouerit, qui vitia ignoret: præsertim cum nonnulla vitia ita virtutibus finitima sint, ut ex similitudine sua facile multos decipiant, sicut & falsæ argumentationes ex similitudine verarum plerosque in errorem pertrahunt. Vnde non solum in Dialectica diuersitas incidit sententiarum, verumetiam in fide Christiana multiplicitas errorum, cum verbosi hæretici assertionum suarum laqueis multos simplices in diuersas pertrahant sectas: qui nequaquam in argumentationibus exercitati, similitudinem pro veritate, & fallaciam pro ratione suscipiunt. Aduersus quam pestem nos in disputationibus exercere ipsi quoque Doctores Ecclesiastici commonent, ut quod non intelligimus in scripturis, non solum orando petamus à Domino, verum inuicem quæramus disputando. Vnde & illud est Augustini in tractatu de Misericordia, cum illa Domini exponeret verba, *Petite & dabitur vobis, querite & inuenietis, pulsate & aperietur vobis*, Petite, inquit, orando, querite disputando, pulsate rogando, id est interrogando. Nō enim hæreticorum, vel quorumlibet infidelium infestationes refellere sufficimus

sufficimus, nisi disputationes eorum dissoluere possimus, & eorum sophismata veris refellere rationibus, vt cedat falsitas veritati, & Sophistas reprimant Dialectici: parati semper, vt beatus ammonet Petrus, ad satisfactionem omni poscēti nos rationem, de ea, quæ in nobis est, spe vel fide. In qua profectò disputatione, cū illos Sophistas conuicerimus, nos Dialecticos exhibebim⁹, & tanto Christi, qui veritas est, discipuli memores erimus, quanto veritate rationum ampliùs pollebitur. Quis denique nesciat ipsam artem disputandi, qua indifferenter hos quàm illos * constet nuncupatos esse? Ipsum <sup>* Locum cor-
rumpit.</sup> quippe Dei filium, quem nos Verbum dicimus, græci λόγον ^{τυπος.} appellant, hoc est diuinæ mentis conceptum, seu Dei sapientiam, vel rationem. Vnde & Augustinus in libro quæstionum octoginta trium capite quadagesimo quarto. *In principio, inquit, erat Verbum, quod Græcè λόγος dicitur.* Idem in libro contra quinque hæreses. *In principio erat Verbum.* Melius græci λόγος dicunt. λόγος quippe Verbum significat & rationem. Et Hieronymus ad Paulinum de diuinis scripturis. *In principio erat Verbum.* λόγος Græcè multa significat. Nam & verbum est, & ratio, & supputatio, & causa vniuscuiusque rei, per quam sunt singula, quæ subsistunt. Quæ vniuersa rectè intelligimus in Christo. Cū ergo Verbum patris Dominus Iesus Christus λόγος Græcè dicatur, sicut & οὐσία Patris appellatur: plurimū ad eum pertinere videtur ea scientia quæ nomine quoque illi sit coniuncta, & per deriuationem quandam à λόγος Logica sit appellata: & sicut à Christo Christiani, ita à λόγος Logica propriè dici videatur. Cuius etiam amatores tanto verius appellantur Philosophi, quanto veriores sint illius sophiæ superioris amatores. Quæ profectò summi Patris summa Sophia, cū nostram indueret naturam, vt nos veræ sapientiæ illustraret lumine, & nos ab amore mundi in amorem conuerteret sui; profectò nos pariter Christianos, & veros effecit Philosophos. Qui cū illam sapientiæ virtutem discipulis promitteret, qua refellere possent contradicentium disputationes, dicens, *Ego enim dabo vobis os & sapientiam, cui non poterunt resistere aduersarij vestri*: profectò post amorem sui, vnde veri dicendi sunt Philosophi, patenter & illam rationum armaturam eis pollicetur, qua in disputando summi efficiantur Logici. Quæ duo de hoc videlicet amore, & doctrina eius, quibus tam phi-

losophi, quàm summi efficerentur Logici, hymnus ille Pentecostes, *Beata nobis gaudia*, diligenter distinguit, cùm dicitur:

Verbis ut essent proflui,

Et caritate feruidi.

Hec enim duo maximè ille superni Spiritus aduētus in igneis linguis reuelatus eis contulit: ut per amorem Philosophos, & per rationum virtutem summos efficeret Logicos. Vnde be-
nè Spiritus in ignis & linguarum specie est demonstratus, qui eis amorem & eloquentiam in omni genere linguarum conferret. Quis denique ipsum etiam Dominum Iesum Christum crebris disputationibus Iudæos ignoret conuicisse, & tam scripto quàm ratione calumnias eorum repressisse: non solum potentia miraculorum, verùm virtute verborum fidē plurimū astruxisse? Cur non solis vsus est miraculis, ut hæc faceret, quibus maximè Iudæi, qui signa petunt, commouerentur: nisi quia proprio nos exēplo instruere decreuit, qualiter & eos, qui sapientiam quærunt, rationibus ad fidem pertraheremus? Quæ duo Apostolus distinguens, ait: *Nam & Iudæi signa petunt, & Greci sapientiam querunt.* Hoc est rationibus plurimū isti, sicut illi maximè signis ad fidem mouentur. Cùm autem miraculorum iam signa defecerint, vna nobis contra quoslibet contradicentes superest pugna, ut quod factis non possumus, verbis cōuincamus: præsertim cùm apud discretos vim maiorem rationes quàm miracula teneant, quæ utrū illusio diabolica faciat, ambigere facile potest. Vnde & Veritas, *Surgent*, inquit, *pseudo-Prophetæ, & dabunt signa magna & prodigia, ita ut in errorem inducantur, si fieri potest, etiam electi.* At verò, inquires, quia & in rationibus plurimus error se ingerit, ut non facilè discernat, cùm rationes inducuntur argumentorum, quæ & pro rationibus suscipiantur, & quæ tanquā sophismata respuantur. Ita, inquam, his accidit, qui peritiam argumentorum non sunt adepti. Quod ne fortè accadat, rationi differendi, hoc est Logicæ disciplinæ, opera est danda, quæ, ut beatus meminit Augustinus, ad omnia genera quæstionum penetranda, quæ in sacris literis incidunt, plurimū valet. Sed hoc certè apud illos Doctores necessarium est, qui soluendis quæstionibus se sufficere confidentes, eas minimè subterfugiunt.

E L E G I A,

*QVA HILARIVS PETRI ABAELARDI**discipulus plangit recessum Præceptoris sui
ex Paraclete.*

Lingua serui, lingua perfidiæ,
 Rixæ motus, semen discordiæ,
 Quàm sit praua sentimus hodie,
 Subjacendo graui sententiæ.

Tort auers nos li Mestre.

* f vos,

Lingua serui, nostrum dissidium,
 In nos Petri commouit odium,
 Quæ meretur ultorem gladium
 Quia nostrum extinxit studium.

Tort auers nos li Mestre.

Detestandus est ille rusticus,
 Per quem cessit à Schola Clericus;
 Grauis dolor quod quidam publicus
 Id effecit vt cesset Logicus.

Tort auers nos li Mestre.

Est dolendum quòd lingua seruuli
 Magni nobis causa perieuli
 Susurrauit in aurem creduli
 Per quod eius cessant discipuli.

Tort auers nos li Mestre.

O quàm durum Magistrum sentio,
 Si pro sui bubulci nuntio,
 Qui vilis est & sine precio,
 Sua nobis negetur lectio.

Tort auers nos li Mestre.

Heu quàm crudelis iste nuntius
 Dicens, Fratres exite citius,
 Habitetur vobis Quinciacus:
 Alioquin, non leget Monachus.

Tort auers nos li Mestre.

Quid, Hilari, quid ergo dubitas?
 Cur non abis, & villam habitas?

Sed te tenet diei breuitas,
Iter longum, & tua grauitas.

Tort auers nos li Mestre.

Ex diuerso multi conuenimus,
Quo Logices fons erat plurimus,
Sed discedat summus & minimus:
Nam negatur quod hîc quæsiuimus.

Tort auers nos li Mestre.

Nos in vnum passim & publicè
Traxit aura torrentis Logicæ:
Desolatos Magister respice,
Spémque nostram, quæ languet, refice.

Tort auers nos li Mestre.

Per impostum, per deceptorium
Si negare vis adiutorium,
Huius loci non Oratorium
Nomen erit, sed ploratorium.

Tort auers nos li Mestre.

EPISTOLA V.

QVÆ EST PETRI ABAELARDI AD
BERNARDVM CLARAEVAL.
Abbatem.

VENERABILI ATQVE IN CHRISTO
dilectissimo Fratri Bernardo Clarauallensi Abbati
Petrus compresbyter,



VM nuper Paracletum venissem quibusdam compul-
sus negotijs ibi peragendis, filia vestra in Christo
& soror nostra, quæ illius loci Abbatisa dicitur, cū
summa exultatione mihi retulit vos illuc diu desi-
deratum causa sanctæ visitationis aduenisse, & non tanquam
hominem, sed quasi Angelum tam eam quàm sorores suas sa-
cris exhortationibus corroborasse. Secretò verò mihi inti-
mauit vos ea charitate, qua me præcipuè amplectimini, ali-
quantulum commotum esse, quòd in Oratorio illo Oratio

Dominica non ita ibi in horis quotidianis , sicut alibi recitari solet : & cùm hoc per me factum crederetis , me super hoc quasi de nouitate quadam notabilem videri. Quo audito , scribere vobis decreui nostram super hoc qualemcumque excusationem , maximè eùm vestram minus quàm cæteras omnes dolerem , vt decet offensionem.

CONSTAT, vt nostis, hanc Dominicam Orationē vel à solis Matthæo & Luca nos habere conscriptam, quorum alter tam Apostolus quàm Euangelista huic Orationi, cùm traderetur, interfuit: vnde & eam plenius ac perfectius, sicut & totum sermonem in monte habitum, cui est ipsa inserta, scripsisse dubium non est. Lucas verò discipulus Pauli, qui nec huic sermoni interfuit, nec, quæ ex ore Dominico audierit, scripsit: sed quæ Paulo maximè referente didicit, quem nec illi sermoni constat interfuisse. Scribit etiam non illum perfectiorem Dominicum sermonem, quem in monte habuit cum Apostolis, sed quem turbis in campestribus fecit. Electurus quippe Apostolos Dominus, sicut scriptum est, *in montana subiit*: turbas verò docturus, ad campestria redijt. Illuc quidem conscendit, hinc descendit, in quo quàm altior illa esset doctrina, qua Doctores ipsos docebat, patenter ostenderet. Beato denique Hieronymo attestante nouimus, sicut & manifesta veritas habet, quoniam aliter audita, aliter visa narrantur: & quòd melius intelligimus, melius & proferimus. De ipso fonte Matthæus, de riuulo fontis Lucas est potatus. Non arguimus Lucā mendacij, nec ipse nobis irascitur, si ei Matthæum præferamus, & Orationem Dominicam, quæ Apostolis omnibus generaliter tradita, & ab Apostolo est scripta, ei anteferamus, quæ cuidam discipulo est dicta, præsertim cùm illam Matthæi sicut in autoritate & in perfectione constat eminere. Vt autem de vtraque quasi ante oculos posita melius iudicemus, iuuat vtramque præsentì loco inserere. Sicut ergo Matthæus scribit, cùm prædictam Orationem Apostolis traderet, ait. *Sic ergo orabitis. Pater noster, qui es in cælis, sanctificetur nomen tuum, adueniat regnū tuum, fiat voluntas tua sicut in cælo & in terra, panem nostrum super substantialem da nobis hodie, & dimitte nobis debita nostra, sicut & nos dimittimus debitoribus nostris, & ne nos inducas in tentationem: sed libera nos à malo.* Lucas verò sic ait: *Factum est cùm esset in loco*

quodam orans, ut cessauit, dixit unus ex discipulis eius ad eum. Domine doce nos orare, sicut & Ioannes docuit discipulos suos. Et ait illis. Cum oratis dicite. Pater, sanctificetur nomen tuum, adueniat regnum tuum. Panem nostrum quotidianum da nobis quotidie, & dimitte nobis peccata nostra, siquidem & ipsi dimittimus omni debenti nobis, & ne nos inducas in tentationem. Patet itaque quòd perfectiùs, ut suprà meminimus, Matthæus quàm Lucas scripserit: cum ille videlicet septem petitiones in ea, iste tantùm quinque posuerit. Illa quippe Apostolis, sicut oportebat, perfectior est tradita, & in eo petitionum numero constituta, quo septiformis gratiæ plenitudo notatur, de qua prima & potiora dona ipsos accepisse Apostolos Paulus confitetur, dicens: *Nos autem primitias spiritus habentes, &c.* Illa verò, quam longè post sermonem in monte habitum Lucas refert à Domino vni discipulorum id roganti traditam fuisse, non immeritò suæ imperfectionis typum in ipso petitionum quinario designat. Quinque etenim sunt corporis sensus, sicut & septem dona Spiritus. Vnde bene his numerus ille conuenit, qui quasi carnales adhuc spiritualibus inferiores sunt. Quod de illo vno discipulo nō esse dubitandum arbitror, quem constat Apostolis non interfuisse, cū eis in monte Dominus, nouum traderet Testamentum; cui, ut diximus, ipsam quoque Orationem inseruit, quam ille nōdum audierat. Qui etiam cum ait, *Domine doce nos orare, sicut & Ioannes discipulos suos*: commemorando Ioannem, qui minor Christo in omnibus atque imperfectior fuit, ipsam quoque imperfectionem sui sensus innuit. Constat & plerumque legem, quæ in quinque libris consistit, & carnali populo sensibus magis quàm ratione ducto, & corporalibus bonis potiùs quàm spiritualibus inhianti data est, per Ioannem figurari. Vndè non incongruè factum est, ut qui à Christo talem Orationis doctrinam, qualem Ioannes dederat, requirebat, imperfectiorem, quàm Apostoli, suscipere deberet. Pro qua quidem imperfectione sui, bene id à sanctis Patribus prouisum est, ut illa potiùs quæ à Matthæo perfectior scribitur in vsum veniret, atque in Ecclesiasticis frequentetur officijs. Quid igitur extiterit causæ, ut cæteris Matthæi verbis retentis, vnum solum mutemus, *quotidianum* scilicet pro *super substantiali* dicentes, qui potest dicat, si tamen dicere sufficiat.

Non enim ita excellentiam huius panis hoc nomen *quotidianum* quemadmodum *super substantialem* videtur exprimere, & non mediocris videtur præsumptionis esse Apostoli verba corrigere; & sic ex duobus Euangelistis vnā Orationem componere, vt neuter in ea sufficere videatur: & sic eam proferre, sicut nec à Domino est dicta, nec ab aliquo Euangelistarum scripta; præsertim cū in cæteris omnibus, quæ de scriptis eorum in Ecclesia recitantur, impermixta sint eorum verba, quacumque perfectione vel imperfectione discrepent. Siquis itaque me nouitatis super hoc arguat, attendat an ille magis arguendus fuerit, qui ex duabus orationibus antiquitus scriptis vnā nouā componere præsumpsit, non tam Euangelicā quā suā dicendam. Denique Græcorum discretio, quorum, vt ait beatus Ambrosius, authoritas maior est, solam Matthæi Orationem prædictis, vt arbitror, rationibus in consuetudinem duxit, dicendo scilicet *πῶν ἄρτον ἡμῶν, πῶν ἐπιείκην*, quod interpretatur, *Panem nostrum super substantialem*. Quamuis enim Lucas Græcè, Matthæus scripserit Hebraicè, antiquiorem tamen & perfectiorem peregrinæ linguæ orationem frequentare potius Græci decreuerunt, & translationem magis quā propriæ linguæ scripturam sequi. His itaque, ni fallor, tam rationibus quā authoritatibus vetustatis potius quā nouitatis arguendus videor, & minùs de præsumptione censendus, qui tam Dominum quā Apostolos, & manifestam Græcorum prouidentiam in hoc præcipuè sequor. Non enim dubitandū est Apostolos Orationē hanc sibi traditā à Domino & ab Apostolo primū scriptā in eisdē verbis eam frequentasse, in quibus ipsam à Domino acceperant, & Apostolus tradiderat scriptam. Quis enim non censeat eos, qui in commune viuunt, & in hoc Apostolicam plurimū vitam, doctrinā quoque ipsorum insistere debere potissimū? Denique cū Dominus Orationem hanc traderet, vel in his secundum Matthæum verbis, vel in illis secundum Lucam, & eam, sicut tradebat, dici præciperet, quis non videat eos non mediocriter præsumere, qui sic eam dicūt sicut nunquam est ab ipso tradita, nec ab aliquo scripta? Quāta enim præsumptio est, in hac Oratione nec aliquod scriptū sequi, nec tenere præceptum Domini: immò tam scriptum, quā Dominum ipsum emendare audere, si fortè ista præ-

sumptio dici possit emendatio? Nemini tamen præcipio, nemini persuadeo ut me in hoc sequatur, & à communi recedat usu. Abundet unusquisque in sensu suo. Illud tamen, quicumque est ille, attendat nec usu rationi, nec consuetudinem præferendam esse veritati. Quod quidem tam seculi leges, quàm doctrinæ sanctorum Patrum plurimùm nobis commendare decreuerunt. Codicis lib. viii. cap. i. *Consuetudinis ususque longæ nec vilis authoritas est: verum nec usque adeò sui valitura momento, ut aut rationem vincat, aut legem.* Augustinus lib. iiii. de Baptismo. *Frustra qui ratione vincuntur, consuetudinem nobis obijciunt, quasi consuetudo maior sit veritate, aut non sit in spiritualibus sequendum, quod in melius fuerit à Spiritu sancto reuelatum. Hoc planè verum est, quia ratio & veritas consuetudini præponenda est.* Gregorius septimus Vvimundo Auerfano Episcopo. *Si consuetudinem fortassis opponas, aduertendum fuit quod Dominus dicit, Ego sum, inquit, veritas, non ait, Ego sum consuetudo.* Beatus quoque Gregorius de diuersis consuetudinibus Ecclesiarum Augustino Anglorum Episcopo scribens, eius prouidentia relinquit in diuinis officijs, vel celebratione Missæ, de varijs vsibus aliorum id quod decreuerit eligere, nec tam ipsam etiam matrem Romanam Ecclesiam in talibus sequi, quàm quod tenere censuerit. *Novit, inquit, fraternitas tua Romana Ecclesie consuetudinem, in qua se meminit nutritam: sed mihi placet siue in Romana, siue in Gallicana, seu in qualibet Ecclesia aliquid inuenisti, quod plus omnipotenti Deo possit placere, sollicitè eligas, & in Anglorum Ecclesiam, quæ adhuc fide noua est, institutione præcipua, quæ de multis Ecclesijs colligere potuisti, infundas. Non enim pro locis res, sed pro bonis rebus loca emendas. Ex singulis ergo quibusque Ecclesijs, quæ pia, quæ religiosa, quæ recta sunt elige, & hæc quasi in fasciculum collecta apud Anglorum mentes in consuetudinē depone. Quod si in talibus & nobis eligere liceat ex consuetudinibus Ecclesiarum, non improbanda nostra videtur electio prouidentiam Græcorum, à quibus plurimam accepimus doctrinam, in hoc etiam imitata, ut nec authoritas consuetudinis desit tam manifestæ rationi. Quam videlicet rationem ita vos videmus insistere, & in ea vehementes esse, ut contra omnium consuetudinem Ecclesiarum, in diuinis officijs eam tenere ac defendere audeatis. Vos quippe quasi nouiter exorti, ac de nouitate plurimùm gaudentes,*

dentes, præter consuetudinem omnem tam Clericorū quàm Monachorum longè antè habitā, & nunc quoq; permanentē, nouis quibusdam decretis aliter apud vos diuinum officium instituisi agi : nec tamen indè vos accusandos censeris. Si hæc vestra nouitas aut singularitas ab antiquitate recedat aliorum, quam rationi plurimū & tenori Regulæ creditis concordare : nec curatis quantacumque admiratione super hoc alij moueantur, ac murmurent, dummodo vestræ, quam putatis, rationi pareatis. Quorum vt pauca commemorem, pace vestra, Hymnos solitos respuistis, & quosdam apud nos inauditos, & ferè omnibus Ecclesijs incognitos, ac minùs sufficientes, introduxistis. Vndè & per totum annum in vigilijs tam feriarum quàm festiuitatum vno Hymno & eodem contenti estis, cū Ecclesia pro diuersitate feriarum vel festiuitatū diuersis vtatur Hymnis, sicut & Psalmis, vel cæteris, quæ his pertinere noscuntur : quod & manifesta ratio exigit. Vndè & qui vos die Natalis, seu Paschæ, vel Pentecostes, & cæteris solemnitatibus Hymnum semper eundem decantare audiunt, scilicet, *Æterne rerum conditor*, summo stupore attoniti suspenduntur; nec tam admiratione quàm derisione mouentur. Preces quæ post supplicationem & Orationem Dominicam ab Ecclesia vbique celebrantur, & ea quæ suffragia Sanctorum dicuntur, omninò à vobis fieri interdixistis, quasi vel precibus vestris mundus, vel vos suffragijs Sanctorū minùs egeatis. Et, quod mirabile est, cū omnia Oratoria vestra in memoria matris Dominicæ fundetis, nullam eius commemorationem, sicut nec cæterorum Sanctorum, ibi frequentatis. Processionum ferè totam venerationem à vobis exclusistis. *Alleluia* nec in Septuagesima communi Ecclesiæ more intermittitis; sed vsq; in Quadragesimā retinetis. Symbolum, quod dicitur Apostolorum, quod tam à Clericis quàm à Monachis in Prima pariter ac Completorio ex antiquo frequentatur, à vestra remotum est consuetudine, qui tamen Symbolum Athanasij diebus tantū Dominicis recitare decreuistis. *Gloria* cum Responsorijs vigiliarum tantū decantatis diebus Dominicæ sepulturæ : antiquam consuetudinem penitus abstulistis. Vbi & Inuitatorium & Hymnū cum tribus tantū Lectionibus & Responsorijs cum *Gloria*, contra omnem Ecclesiæ morem, &, vt dicitur, rationem vos

dicere instituitis. Cùm enim hoc triduum tanquam exequiæ Dominicæ in luctu peragatur, atq; hinc vulgò horū diurnæ vigiliæ nuncupentur tenebræ, quòd extinctis ibi luminaribus mœror hîc exprimat; non mediocriter mirandum videtur vel Inuitatorium, vel Hymnum, vel *Gloria*, quæ potius gaudij voces sunt, ibi decantari. Quæ omnia cùm omnibus in magnam admirationē veniant, cur hæc scilicet vestra nouitas totius Ecclesiæ vsui apud vos præferatur, nec tamen ab institutione vestra ideò receditis, nec quid aliij murmurēt curatis: quia id rationabiliter vos facere confiditis, quos institutio regulæ nouum opus de veteri facere compellit, sicut de semetipso Hieronymus meminit. Non enim vocum nouitates, sed profanas tantum & fidei cōtrarias Apostolus interdicat. Alioquin nouam legem veteri non præferremus, & post Canonicas scripturas multa fidei verba necessariò inuenta, hæreticorum more, respueremus. Ad confutandam quippe nouam hæresim nouum vocabulum *ὑποστάσις* repertum fuit: nec hoc nomen *Trinitas* & *persona* Canonicis scripturis insertū est. Denique in diuinis officiis quis ignoret diuersas & innumeras Ecclesiæ consuetudines inter ipsos etiam Clericos? At quam certè Romanæ Sedis consuetudinem nec ipsa ciuitas tenet, sed sola Ecclesia Lateranensis, quæ mater est omnium, antiquum tenet officium, nulla filiarum suarū in hoc eam sequente, nec ipsa etiam Romani palatij basilica Mediolanensis metropolis ita in talibus ab omnibus dissidet, vt nulla etiam *Franganearum* suarum matris institutionem imitetur. Sic *Lugdunensis* prima Sedes Galliarum sola in suo persistit officio. Et cùm tanta in istis facta sit varietas, quicquid vna post aliam nouiter instituit, nulla reprehensio nouitatis incidit, quia nulla fidei contrarietas fuit. Nonnullam enim oblectationem hæc diuini cultus varietas habet: quia, vt Tullius meminit, identitas in omnibus mater est satietatis. Qui ergo omnium linguarum generibus prædicari voluit, ipse diuersis officiorum modis venerari decreuit. Qui etiam cùm Orationem prædictam diuersis composuerit modis, & in ea vtroque modo orandum præceperit, quomodo præceptum eius implebimus, si verbum aliquod subtrahere præsumimus, & nunquam eam eo modo, quo ipsam dixit proferamus? Denique, vt omnibus satisficiam, nunc

etiam vt superiùs dico, abundet vnusquisque in suo sensu, dicat eam quomodo voluerit. Nemini persuadeo vt me in hoc sequatur, variet verba Christi prout voluerit. Ego autem sic illa, sicut & sensum, quantum potero, inuariara seruabo.

EPISTOLA VI.

QVÆ EST EIVSDEM PETRI
ad Virgines Paracletenses,

DE STUDIO LITERARVM.



E A T V S Hieronymus in eruditione virginum Christi plurimùm occupatus, inter cetera, quæ ad ædificationem earum scribit, sacrarum studium literarum eis maximè commendat, & ad hoc eas nõ tam verbis hortatur, quàm exemplis inuitat. Memor quippe sententiæ, qua Rusticum instruens ait, *Ama scientiam scripturarũ, & carnis vitia non amabis*: tantò magis necessariũ amorem huius studij feminis esse censuit, quantò eas naturaliter infirmiores & carne debiliores esse conspexit. Nec solùm ad hanc virginum exhortationem argumentum à similitudine à virginibus sumptum inducit, vnde ad comparisonem minoris, viduas & coniugatas in exemplum assumit: quo magis Sponsas Christi ad hoc studium incitet per matronas seculi, & ex virtute laicarum torporem excutiat vel confundat Monialium. Et quoniam, iuxta illud Gregorianum, *à minimis quisque inchoat, vt ad maiora perueniat*; præmittere iuvat quanta diligentia virgunculas in sacris imbuere literis studuerit. Vnde, vt omittam cætera, illud nunc in medium procedat, quod ad Lætam de institutione filix suæ Paulæ, propter morum doctrinam, tradit hanc literarum disciplinam. *Sic erudienda est, inquit, anima, quæ futura est templũ Dei. Fiant ei literæ vel buxæ, vel eburne, & suis nominibus appellentur. Ludat in eis, vt & lusus ipse eruditio sit. Et non solùm ordinem teneat literarum, vt memoria nominum in canticum transeat: sed & ipse inter se crebrò ordo turbetur, & medij ultima, primis media misceantur, vt eas non sono tantùm, sed & visu nouerit.* Cùm verò cæperit

tremēti manu stylum in cera ducere, vel alterius superposita manu teneri regantur articuli, vel in tabula sculpantur elementa; ut per eosdem sulcos inclusa marginibus trahantur vestigia, ut foras non queant euagari. Syllabas iungat ad premium, & quibus illa atas deliniri potest, munusculis inuictetur. Habeat in discendo socias, quibus inuideat, quarum laudibus mordeatur. Non obiurganda est, si tardior sit: sed laudibus excitandum est ingenium, & ut vicisse gaudeat, & victa doleat. Cauendum imprimis, ne oderit studia, ne amaritudo eorum, præcepta in infantia, ultra rudes annos transeat. Ipsa nomina, per quæ consuefcit paulatim verba contexere, non sint fortuita, sed certa, & coaceruata de industria, Prophetarum videlicet, atque Apostolorum, & omnis ab Adā Patriarcharum series, de Mattheo Lucæque descendat: ut, dum aliud agit, futura memoria præparetur. Magister probæ ætatis & vitæ, atque eruditionis est eligendus: nec, puto, erubescet vir doctus id facere in propinqua, vel nobili virgine, quod Aristoteles fecit in Philippi filio: ut ipse librariorum vilitate initia traderet literarum. Non sunt contemnenda quasi parua, sine quibus magna consistere non possunt. Ipse elementorum sonus, & prima institutio præceptorum aliter de erudito, aliter de rustico ore profertur. Nec discat in tenero, quod ei postea dediscendum est. Difficulter traditur, quod rudes animi perbiberunt. Græca narrat historia, Alexandrum potentissimum regem, orbisq; dominatorem, & in moribus, & in incessu, Lænidis pædagogi sui non potuisse carere vitijs, quibus adhuc paruulus fuerat infectus. Ut autem pronuntiationem scripturæ commendet memoriæ, certam & ipse lectionis mensuram singulis diebus vult præfigi: quam cum memoriter persoluat, nec solum Latinis, verum etiam Græcis literis operam dari præcipit, cum ytræque linguæ tunc Romæ frequentarentur, & maximè propter scripturas de Græco in Latinum versas: ut eas ex origine sua melius cognosceret, ac veriùs dijudicare posset. Nōdum enim Hebraicæ veritatis translatione Latinitas utebatur. Ait itaque: Reddat tibi pensum quotidie de scripturarum floribus carptum. Ediscat Græcorum versuum numerum. Sequatur statim & Latina eruditio: quasi non ab initio os tenerum composueris; in peregrinum sonum lingua corrumpitur, & externis vitijs sermo patrius sordidatur. Pro gemmis & serico, diuinos codices amet, in quibus non auri, & pellis Babylonice vermiculata pictura, sed ad fidē placeat emendata & erudita distinctio. Discat primò Psalterium, his

Se canticis auocet, & in prouerbijs Salomonis erudiatur ad vitam. In Ecclesiaste consueſcat, quæ mundi ſunt, calcare. In Iob, virtutis & patientiæ exempla ſectetur. Ad Euangelia tranſeat, nunquam ea deſignatura de manibus. Apoſtolorum Acta & Epistoſas tota cordis imbibat voluntate. Cùmque pectoris ſui cellarium his opibus locupletauerit, mandet memoriæ Prophetas, Heptateuchum, & Regum, & Paralipomenon libros, Eſdra quoque & Heſtor volumina. Ad vltimum, ſine periculo diſcat Canticum Canticorum: ne, ſi in exordio legerit, ſub carnalibus verbis ſpiritualium nuptiarum epithalamium non intelligens, vulneretur. Caueat omnia apocrypha, & ſi quando ea non ad dogmatum veritatem, ſed ad ſignorum reuerentiam legere voluerit, ſciat non eorum eſſe, quorum titulis prenotantur, multaque his admixta vitioſa, & grãdis eſſe prudentiæ aurum in luto quærere. Cypriani opuscula ſemper in manu teneat. Athanaſij Epistoſas, & Hilarij libros inoffenſo decurrat pede. Illorũ tractatibus, illorum delectetur ingenijs, in quorum libris pietas non vacillet. Ceteros ſic legat, ut magis iudicet, quàm ſequatur. Reſpondebis. Quomodo hæc omnia mulier ſecularis, in tanta frequentia hominum, Romæ cuſtodire potero? Noli ergo ſubire onus, quod ferre non potes: ſed, poſtquã ablaſtaueris eam cũ Isaac, & veſtieris cum Samuele, mitte auia & amitta. Redde pretioſiſſimã gemmã cubiculo Mariæ, & cunis Ieſu vagientis impone. Nutriatur in monaſterio: ſit inter virginũ choros: iurare non diſcat: mentiri ſacrilegium putet: neſciat ſeculum: viuat angelicè: ſit in carne ſine carne: omne hominum genus ſui ſimile putet. Et, ut cetera taceam, certè te liberet ſeruãdi difficultate, & cuſtodia periculo. Melius eſt tibi deſiderare abſentem, quàm pauere ad ſingula. Trade Euthochio paruulã: illam primis miretur ab annis; cuius & ſermo, & inceſſus, & habitus doctrina virtutum eſt. Sit in gremio auia, quæ longo uſu didicit nutrire, ſeruare, docere virgines. Anna filiũ, quem Deo vouerat, poſtquam obtulit in tabernaculo, nunquam recepit. Ipſe, ſi Paulam miſeris, & magiſtrum me, & nutritium ſpondeo, geſtabo humeris, balbutia ſenex verba formabo, multo glorioſior mundi Philoſopho, qui non regem Macedonum, Babylonio periturum veneno; ſed ancillã & Sponſã Chriſti erudiam, regnis cæleſtibus offerendam. Perpendite ſorores in Chriſto cariſſimæ, pariter & conſerua, quantam curam tantus Eccleſiæ Doctõr in eruditione vnius paruulæ ſuſceperit, in qua tam diligenter cuncta diſtinxerit, quæ neceſſaria doctrinæ decreuerit, ab ipſo alphabeto ſumẽs exordium. Nec ſolũ de pronunciandis ſyllabis, & literis

coniungendis, verum etiam de scribendis adhibet documētum: necnon & de socijs prouidet adiungendis, quorum liuore, vel laude plurimū moueatur. Quod etiam, vt spontanea magis quā coacta faciat, & maiori studium amore complectatur; blanditijs, & laudibus, necnon & munusculis incitari admonet. Ipsa quoque nomina distinguit ex scripturis sacris colligenda, in quibus proferendis se primū exercens, hæc memoriæ suæ plurimū commendet, iuxta illud Poëticum,

Quo semel est imbuta recens seruabit odorem

Testa diu. —————

Qualis etiam magister ad hoc sit eligendus, diligenter describit: nec prætermittit præfixam esse debere mensuram lectionis, quam corde tenus firmatam quotidie persoluat. Et quia eo tempore, Græcarum quoque liberarum vsus Romæ abundabat, nec Græcarum literarum expertem eam esse permittit: maximè, vt arbitror, propter translationem diuinorum Librorū à Græcis ad nos diriuatam, vnde discernere posset, quid apud nos minùs, vel aliter esset: & fortasse propter liberalium disciplinam artium, quæ his, qui ad perfectionem doctrinæ nituntur, non nihil afferunt utilitatis. Qui etiam conditionem Latinæ linguæ præmittit, quasi ab ipsa nostrum inchoauerit magisterium. Cū autem à sono vocum ad earum peruenerit sensum, vt quæ proferre didicerit iam intelligere velit: codices ei distinguit diuersos, tam de canone duorum Testamētorum, quā de opusculis Doctorum, ex quorum eruditione proficiat, vt consummetur. Inter canonicas autem scripturas, ita ei Euangelia commendat, vt nunquam hæc de manibus virginis recessura censeat; quasi plus aliquid Diaconissis, quā Diaconis de lectione iniungat Euangelica: cū isti in Ecclesia illam habeant recitare, illæ nunquam ab eorum debeant lectione vacare. Deinde ista matri de filia scribens, ne quam mater excusationem prætenderet, hæc omnia Romæ secularem feminam in tanta hominum frequentia perficere posse; dat consilium, vt ab isto se onere liberet: Monasterio virginum tradat filiam, vbi educari sine periculo, & de his, quæ dixit, perfectius instrui possit. Omnem denique occasionem amputans, ne de Magistro tandem, qualem ipse descripserat, mater so-

licitaretur, puellæ Roma Hierosolymam, ad auiam scilicet sanctam Paulam, & amitam Eustochium, missæ, se magistrū pariter & nutritium offert. Et in tantum, quod dictum mirabile est, erumpit promissum, ut tantus Ecclesiæ Doctor etiam senio debilis, dicat se virginem, quasi baiulum eius, humeris gestare non dedignari. Quod quā apud suspiciosos, non sine suspitione fieri, non apud religiosos sine scandalo vix cōtingeret. Huc tamen omnia vir Deo plenus, & de integritate vitæ omnibus tandiu cognitus, confidēter spondebat: dum modo vnā sic instruere virginem posset, ut ipsam cæteris magistrā relinqueret, & in ipsam Hieronymum legeret, qui Hieronymum non vidisset. Ut autem de paruulis ad maiores transcamus virgines, quas plurimū semper prouocat ad studium literarum, tam eis videlicet scribendo quæ legāt, quā eas laudando de assiduitate legendi vel discendi: quid ad Principiam virginem de Psalmo quadagesimo quarto scribens dicat, audiamus. *Scio me, Principia in Christo filia, à plerisque reprehendi, quod interdum scribam ad mulieres, & fragiliorem sexum maribus præferam: & ideo debeo primū obrectatoribus meis respondere, & sic venire ad disputatiunculam, quam rogasti. Si viri de scripturis quærent, mulieribus non loquerer. Si Barach ire ad prælium voluisset, Debora de victis hostibus non triumphasset. Et post aliqua. Apollo, virum Apostolicum, & in lege doctissimum, Aquila & Priscilla erudiunt, & instruunt eum de via Domini. Si doceri à femina non fuit turpe Apostolo: mihi quare turpe sit, post viros docere & feminas? Hac & istiusmodi, *αὐτοῦ τῆς* filia, perstrinxi breuiter, ut nec te pœniteret sexus tui, nec viros suum nomen erigeret, in quorum condemnationem, feminarum in scripturis sanctis vita laudatur. Iuuat post virgines, intueri de viduis, quantum & ipsæ in studio sacrarū litterarū ipsius testimonio & laude profecerint. Scribens igitur idē Doctor ad eandem virginē Principiam de vita sanctæ Marcellæ, sicut illa postulabat, inter virtutum eius insignia: *Diui narum*, inquit, *scripturarum* ardor erat incredibilis: semperque cantabat: *In corde meo abscondi eloquia tua, ut non peccem tibi. Et illud de perfecto viro: Et in lege Domini voluntas eius, & in lege eius meditabitur die ac nocte: & A mandatis tuis intellexi. Denique, cum & me Romā cum sanctis Pontificibus, Paulino, & Epiphanio, Ecclesiastica traxisset necessitas, & verēcundē nobilium feminarum oculos declinarem: ita egit,**

secundum Apostolum, importunè opportunè, ut pudorem meum sua superaret industria. Et quia alicuius tunc nominis esse existimabar super studio scripturarum: nunquam conuenit, quin de scripturis aliquid interrogares: nec statim acquiesceret, sed moueret è contrario quaestiones, non ut cunderet, sed ut quaerendo disceret earum solutiones, quas opponi posse intelligebat. Quid in illa virtutum, quid ingenij inuenerim, Vereor dicere: ne fidem credulitatis excedam, & tibi maiorem dolorem incuriam, recordanti quanto bono carueris. Hoc solum dicam, quòd quicquid in nobis longo fuit studio congregatum, & meditatione diuturna, quasi in naturam versum, hoc illa libauit, didicit, atque possedit: ita ut post perfectionem nostram, si in aliquo testimonio scripturarum esset oborta contentio, ad illam iudicem pergeretur. Et quia valde prudens erat, sic ad interrogata respondebat, ut etiam sua non sua diceret, sed vel mea, vel cuiuslibet alterius: ut in eo ipso, quod docebat, se discipulam fateretur. Sciebat enim dictum ab Apostolo: Docere autem mulieri non permitto: ne virili sexui, & interdum sacerdotibus, de obscuris, & ambiguis sciscitantibus, facere videretur iniuriam. Absentiam nostri mutuis solabatur alloquijs, & quod carne non poteramus, spiritu reddebamus: semper obuiare epistolis, superare officijs, salutationibus praeuenire. Non multum perdebat absentia, quæ iugibus sibi literis iungebatur. In hac tranquillitate, & Domini seruitute, haeretica in his prouincijs exorta tempestas cuncta turbauit: & in tantam rabiem commitata est, ut nec sibi, nec ulli bonorum parceret: & quasi parum esset, hic vniuersa nouisse, nauem plenam blasphemiarum Romano intulit portui, cum venenata spurcaque doctrina Romæ inuenerit, quos induceret. Tunc S. Marcella, quæ diu se cohibuerat, ne per emulationem quippiam facere videretur, postquam sensit fidem Apostolico ore laudatam in plerisque violari, ita ut sacerdotes quoque, & nonnullos Monachorum, maximèque saeculi homines in assensum sui traheret, ac simplicitati illuderet Episcopi, qui de suo ingenio ceteros aestimabat, publicè restiti, malens Deo placere quàm hominibus. Damnationis haeticorum hac fuit Principium, dum adducit testes, qui prius ab eis eruditi, & postea ab haeretico fuerant errore correpti, dum ostendit multitudinem deceptorum, dum impia & aexon ingerit volumina, quæ emendata manu scorpj monstrabantur, dum acciti frequentibus literis haeretici, ut se defenderent, venire non ausi sunt. Tantàque vis conscientiae fuit, ut absentes damnari, quàm praesentes corrigi, maluerint. Huius tam gloriosae victoriae origo, Marcella est. Videtis, dilectissimæ, quantum attulerit fructum, repressis haeresibus, in vrbe fidelibus omnibus in caput constitutæ vnius matronæ laudabile studium, & quanta lampade doctri-

nã ipsorum quoque Doctorum Ecclesiasticorum tenebras
 vna mulier expulerit : De cuius studio in sacris literis , quo
 ipsa victoriam istam meruerit , idem Doctor proœmio lib. x.
 in Epistolam Pauli ad Galatas, ad exhortationem vestram ita
 meminit. Scio equidem ardorem eius, scio fidem (quam flammam
 semper habeat in pectore) superare sexum , obliuisci hominis , & di-
 uinorum voluminum tympano concrepante, rubrum huius seculi pela-
 gus transfretare. Ceriè cum Romæ essem , nunquam tam festina me
 vidit, ut non de scripturis aliquid interrogaret. Neque verò more
 Pythagorico, quicquid responderam, rectum putabat, nec sine ratione
 præiudicata apud eam valebat auctoritas : sed examinabat omnia, &
 sagaci mente vniuersa pensabat, ut me sentirem non tam discipulam
 habere quàm iudicem. Tantum eo tempore in sanctis feminis,
 sicut & in viris , studium feruebat literarum , ut nequaquam
 suæ linguæ disciplina contentæ , ipsos scripturarum riuiolos,
 quos habebant , ab ipsis inquirerent fontibus ; nec inopiam
 vnius linguæ sibi crederent sufficere. Vnde & illud est suprâ
 memorati Doctoris ad Paulam de morte Blesillæ filiæ suæ, sic
 inter cætera in eius præcipuam laudem scribentis : *Quis sine*
singultibus transeat orandi instantiam , nitorem linguæ , memoria
tenacitatem , acumen ingenij ? Si Gracè loquentem audisses , Latine
eam nescire putares. Si in Romanum sonum lingua se verteret ; nihil
omnino peregrini sermo redolebat. Iam verò, quod in Origene quoque
illo Gracia tota miratur, in paucis non dicam mensibus, sed diebus, ita
Hebrææ linguæ vicerat difficultates, ut in discendis canēdisque Psal-
mis cum matre contenderet. Ipsam quippe matrem eius Paulam,
necnon & alteram ipsius filiam Eustochium virginem Deo
dicatam , in eodem studio literarum atque linguarum non
minùs occupatas esse, idem non præterit doctor. Sic quippe
de his commemorat , vitam ipsius Paulæ scribens , & de ipsa
dicens : Nihil ingenio eius docilins. Tarda erat ad loquendum, velox
ad audiendum, memor illius præcepti: Audi Israel , & tace. Scripturas
sanctas tenebat memoriter. Denique compulit me , ut vetus & no-
uum Instrumentum cum filia, me differente, perlegeret. Quod pro-
pter verecundiam negans, propter assiduitatem tamen, & crebras po-
stulationes eius, præstiti, ut docerem quod didiceram. Sicubi hæsitabā,
& nescire me ingenuè confitebar : nequaquam mihi volebat acquies-
cere : sed iugi interrogatione cogebar, ut è multis varijsque sententijs,
quæ mihi videretur probabilior, indicarem. Loquar & aliud , quod

forſitan emulis videatur incredibile. *Hebraeam linguam, quam ego ab adoleſcentia multo labore ac ſudore ex parte didici, & inſatigabili meditatione non deſero, ne ipſe ab ea deſerar, diſcere voluit, & conſecuta eſt: ita vt Pſalmos Hebraicè caneret, & ſermonem abſque vlla Latina lingua proprietate perſonaret. Quod quidem vſque hodie in ſancta filia eius Buſtochio cernimus. Sciebant quippe Latinorum codicum doctrinam ex Hebraicis & Gracis proceſſiſſe ſcriptis: & idioma cuiuſcumque linguae ad plenum in peregrina ſeruari ab interprete non poſſe. Quod tam Hebraei, quam Graci de perfectione gloriantes, noſtris tranſlatoribus, velut imperfectis, nonnunquam inſultare conſueverunt, talem in argumentum ſimilitudinem aſſerentes, quòd quilibet liquor in plura vaſa viciffim tranſfuſus, plenitudine ſua neceſſariò minuitur, nec eius quantitas in ceteris vaſis poſteſt reperiri, quam in priore habuit. Vnde & illud ſepe accidit, quòd cum aliquibus testimonijs Iudeos arguere nitimur, facile nos refellere ſolent, qui Hebraicum ignoramus, ex tranſlationum, vt aiunt, noſtrarum falſitate. Quod ſapientiſſimæ mulieres prædictæ diligenter attendentes, nequaquam propriæ linguae doctrina contentæ fuerunt: vt non ſolùm ſuos inſtruere, verumetiam alios refellere poſſent, & de limpidiſſima fontis aqua, ſitim ſuam reficerent. Ad quod maximè, ni fallor, ipſe Hieronymus harum peritus linguarum, ſuo prouocauerat exemplo. Cuius quidem peritiæ perfectionem quãto labore vel expenſis acquiſierit, ad Pammachium & Oceanum ſcribit his verbis: Dum eſſem iuuenis, miro diſcendi ferebar ardore, nec, iuxta quorundam præſumptionem, ipſe me docui. Apollinarium Laodicenum audiui Antiochia frequenter, & colui: & cum me in Sanctis ſcripturis erudiret, nunquam illius contentioſum ſuper ſenſu dogma ſuſcepi. Iam canis ſpargebatur caput, & magiſtrum potiùs, quam diſcipulum decebat. Perrexi tamen Alexandriam, audiui Didymum: in multis ei gratias ago: quod neſciui, didici: quod ſciebam, illo docente non peridi. Putabant me homines finem feciſſe diſcendi: veni ruruſum Hieroſolymam & Bezhelem: quo labore, quo pretio Barrabanum nocturnum habui præceptorem? Timebat enim Iudeos, & mihi ſe alterum exhibebat Nicodemum. Horum omnium frequenter in opusculis meis facio mentionem. Hunc zelum tanti Doctoris, & ſanctarum feminarum in ſcripturis diuinis conſiderans, monui, & inceſſanter implere vos cupio, vt dum poteſtis, & matrem harum peritam trium linguarum habetis, ad hanc ſtudiij perfectionem feramini: vt quæcumque de diuerſis tranſlationibus oborta du-*

bitatio fuerit, per vos probatio terminari possit. Quod & ipse Dominicæ crucis titulus Hebraicè, Græcè, & Latinè scriptus non incongruè præfigurasse videtur: ut in eius Ecclesia vbique terrarum dilatata, harum linguarum, quæ præminēt, abundaret doctrina; quarum literis vtriusque testamenti cōprehenfa est scriptura. Non longa peregrinatione, non expensis plurimis, pro his linguis addiscendis, opus vobis est, ut beato accidit Hieronymo: cū matrem, ut dictum est, habeatis ad hoc studium sufficientem. Post virgines quoque ac viduas, fideles coniugatę incitamentum præbeant vobis doctrinæ, ut vel negligentiam vestram arguant, vel ardorem augeant. Præstat exemplum etiam vobis Celantia venerabilis, quæ in coniugio quoque regulariter viuere cupiens, legē sibi coniugij præscribi ab ipso etiam Hieronymo sollicitè petijt. Vnde & ipse ad eandem super hoc rescribens, ita meminit: *Pronocatus ad scribendum literis tuis, diu, fateor, de responsione dubitavi, silentium mihi imperante verecundia. Petis namque, & sollicitè ac violenter petis, ut tibi certam ex scripturis Sanctis præsiniamus regulam, ad quam tu ordines cursum vitæ tuæ: ut cognita Domini voluntate, inter honores seculi, & diuitiarum illecebras, morum magis diligas suppellectilem, atque ut possis in coniugio constituta, non solum coniugi placere, sed etiam ei, qui ipsum indulget coniugiū. Cui tam sanctæ petitioni, tamque pio desiderio non satisfacere, quid aliud est, quàm profectū alterius non amare? Parebo igitur precibus tuis, æque paratam ad implendam Dei voluntatem, ipsius nitar incitare sententijs. Audierat fortassis hæc matrona quod in laudem sanctæ Susannæ Scriptura commemorat. Quam cū præmisisset pulchram nimis, & timentem Deum, vnde hic timor & verus animæ decor procederet, statim annexuit dicens: *Parentes enim illius, cū essent iusti, erudierunt filiam suam secundum legem Moysi.* Cuius eruditionis inter molestias nuptiarum & sæcularium perturbationes occupationum Susanna non immemor, & morti adiudicata, ipsos suos iudices atque presbyteros damnare promeruit. Quem quidem in Daniele locum ipse Hieronymus exponens, illud quod dictum est, *Parentes illius, cū essent iusti, erudierunt filiam suam, &c.* in exhortationis competenter assumens occasionem, ait: *Hoc utendum est testimonio ad exhortationem parentum, ut doceant iuxta legem Dei sermonemque diuinum non solum filios, sed & filias**

suas. Et quia diu me tam literarum quàm virtutum impedire studia plurimum solent: omnem vobis negligentia torporem excutiat illa ditissima regina Saba, quæ cum magno labore infirmi sexus, & longæ viæ fatigatione pariter atque periculis, expensisque nimis, venit à finibus terræ sapientiam experiri Salomonis, & cum eo conferre quæ nouerat de his quæ ignorabat. Cuius studium & laborem intantum Salomon approbavit, ut ei pro remuneratione cuncta quæ petijt daret, exceptis quæ ipse illi ultro more obtulerat regio. Multi viri potentes ad sapientiam eius audiendam confluebant, & multi Regum & Ducum terræ doctrinā eius magnis muneribus honorabant, & cum ab eis multa susciperet donaria, neminem eorum super his remunerasse legitur, nisi supradictam feminam. Ex quo patenter exhibuit quantum sanctæ feminæ studium & ardorem doctrinæ approbavit: & quantum Domino ipsum gratum esse censuerit. Quam & postmodum ipse Dominus & Salomon verus, immò plusquam Salomon ad condemnationem virorum eruditionem suam contemnendum, non prætermisit inducere. *Regina*, inquit, *Austri surget in iudicio, & condemnabit generationem istam.* In qua generatione, carissimæ, ne vos quoque vestra condemnet negligentia, prouidete. In quo etiam quo minùs excusabiles sitis, non est vobis necessarium longi fatigationem itineris arripere, nec de magnis expensis prouidere. Magisterium habetis in matre, quod ad omnia vobis sufficere, tam ad exemplum scilicet virtutum, quàm ad doctrinam literarum potest: quæ non solùm Latinæ, verum etiam tam Hebraicæ quàm Græcæ non expers literaturæ, sola hoc tempore illam trium linguarum adepta peritiam videtur, quæ ab omnibus in beato Hieronymo, tanquam singularis gratia, prædicatur, & ab ipso in supradictis venerabilibus feminis maximè commendatur. Tribus quippe linguis principalibus istis duo testamenta comprehensa, peruenerunt ad nostram notitiam. Quibus etiam linguis titulus Dominicæ crucis insignitus, Hebraicè scilicet, Græcè, & Latine conscriptus, patenter innuit his præcipuè linguis Dominicam doctrinam & Christi laudes, ipsum Trinitatis mysterium in tripertitam mundi latitudinem, sicut & ipsum crucis lignum, cui titulus est superpositus, tripertitum fuerat, indicanda & corroboranda fore.

Scriptum quippe est: *In ore duorum vel trium testium stabit omne verbum.* Vnde vt trium linguarum auctoritate scriptura sanciretur sacra, & cuiuscumque linguæ doctrina duarum aliarum testimonio roboraretur, tribus his linguis vetus simul & nouum Testamentum diuina prouidentia comprehendere decreuit. Ipsum etiam nouum Testamentum, quod tam dignitate quàm vtilitate veteri supereminet, tribus istis linguis primò scriptum fuisse constat, tanquam id titulus Cruci superpositus futurum præsignaret. Quædam namque in eo Hebræis scripta linguam eorum exigebant: quædam similiter ex eis Græcis, quædam Romanis, proprijs eorum linguis, ad quos dirigebantur, scribi necesse fuit. Primùm quidem Euangelium secundum Matthæum, sicut Hebræis, sic Hebraicè primò scriptum est. Epistolam quoque Pauli ad Hebræos, & Iacobi ad duodecim tribus iam dispersas, & Petri similiter, & nonnullas fortassis alias eadem ratione cōstat esse scriptas Hebraicè. Ad Græcos verò tria Euangelia Græcè quis dubitet esse scripta, & quasunque Epistolas tã Pauli quàm cæterorum ad eos destinatas, necnon & Apocalypsim ad septem Ecclesias à se missas? Vnam vero ad Romanos scriptam Pauli nouimus Epistolam, vt parum à nobis habere nos Latini gloriemur, & quantum nobis aliorum sunt doctrinæ necessariæ cogitemus: quas ad plenum si cognoscere studeamus, in ipso fonte magis quàm in riuulis translationū perquirendæ sunt: præsertim cùm earum diuersæ translationes ambiguitatem magis, quàm certitudinem lectori generent. Non enim facile est idioma, id est proprietatem cuiuscunque linguæ, sicut & suprâ meminimus, translationem seruare, & ad singula fidam interpretationem accommodare: vt quælibet ita exprimere possimus in peregrina, sicut dicta sunt in propria lingua. Nam & in vna lingua cùm aliquid exponere per aliud volumus, sepe deficimus: cùm verbum proprium quod apertiùs id exprimere possit, nō habeamus. Nouimus & beatum Hieronymum apud eos præcipuè trium harum linguarum peritum, multum in translationibus suis, & in commentarijs earum à se ipso nonnunquam dissidere. Sæpè nanque in expositionibus suis dicit: *Sic habetur in Hebræo*, quod tamen in translationibus eius secundum Hebraicum, vt ipsemet asserit, factis non reperitur. Quid igitur mi-

rum, si diuersi Interpretes ab inuicem discrepent, si vnus etiam nonnunquam à se dissonare inueniatur? Quisquis ergo de his certus esse desiderat, non sit contentus aqua riuuli, sed puritatem eius de fonte inquirat & hauriat. Hac enim ratione & translatio beati Hieronymi, quæ nouissima fuit, & de ipso Hebraico vel Græco, prout ipse potuit, tanquam ab origine fontis diligentius requisit, veteres apud nos translationes superauit: & superuenientibus nouis, sicut in lege scriptum est, vetera proiecta sunt. Vnde & Daniel, *Pertransibunt inquit, plurimi, & multiplex erit scientia*. Fecit Hieronymus suo tempore quod potuit, & quasi solus in lingua peregrina: nec fidelem, sed Iudæum habens Interpretem, cuius auxilio plurimum nitebatur, sicut & ipse testatur, multis displicuit, quod translationes iam factas sufficere non credidit: & quia perstitit in proposito, vicit adiuuante Deo, tanquam illud Ecclesiastici attendens & complens. *Ad fontem unde exeunt flumina reuertuntur, ut iterum fluant*. Quasi fons origo translationum scripturæ sunt illæ, à quibus ipse fuerit; & citò translationes, tanquam mendaces, repulsæ deficiunt, si ab origine sua deuiare, & ad ipsam per concordiam recurrere non probentur. At ne ad omnia vnum hunc interpretem sufficere credamus, tanquam peritiæ perfectionem de singulis adeptum, maximè in Hebraico, vbi apud nos præminere dicitur, ipsius super hoc testimonium audiamus, ne plus ei quàm habeat imputare præsumamus. Scribit super hoc ad Domnionem & Rogatianum, & contra accusatorem, his verbis. *Nos, qui Hebræe lingue saltem parua habemus scientiam, & Latinus nobis utcumque sermo non deest, & de alijs magis possumus iudicare, & ea, quæ ipsi intelligimus, in nostra lingua promere*. Felix illa anima est, quæ in lege Domini meditans die ac nocte, vnamquamque scripturam in ipso ortu fontis quasi purissimam aquam haurire satagit, ne riuos per diuersa discurrentes, turbulentos pro clavis per ignorantiam vel impossibilitatem sumat: & quod biberat, euomere cogatur. Defecit iamdudum hoc peregrinarum linguarum vitis studiū, & cum negligentia literarum, scientia periit carum. Quod in viris amisimus, in feminis recuperemus: & ad virorum condemnationem, & fortioris sexus iudicium, rursus Regina Austri sapientiam veri Salomonis in vobis exquirat. Cui tanto magis operam dare potestis, quātò in opere

manuum minùs Moniales quàm Monachi desudare possunt: & ex otij quiete, atque infirmitate naturæ, faciliùs in tentationem labi. Vnde & prædictus Doctor in vestram doctrinã & exhortationem præcipuus, tam scriptis quàm exemplis laborem vestrum ad studium incitat literarum: maximè ne occasione discendi vires vnquam acciri necessarium sit; aut frustra corpore intentæ, animus foras euagetur, & relicto sponso fornicetur cum mundo.

EPISTOLA VII.

QVÆ EST EIVSDEM PETRI, AD EASDEM
VIRGINES PARACLETENSES.

De laude Sancti Stephani Protomartyris.

ANCILLIS CHRISTI SERVVS CHRISTI,
tanto Domino dignè confamulari.

PROTOMARTYRIS & cælestis signiferi pijsimas exequias, immò triumphalem celebrantes agonem, tantò id maiore perficite deuotione, quãtò vos amplius huic tam Christi quàm vestro Diacono constat obnoxias esse. Quid enim Diaconus nisi minister interpretatur? Quis autem Actus Apostolorum perlegens, non nouerit beatum Stephanum cum sex alijs Spiritu sancto plenis, iuxta ipsius Spiritus septiformis gratiæ numerum, ab Apostolis in ministerium sanctarum feminarũ Diaconos electos, & per impositionem manus, ad huius administrationis curam diligenter astrictos, & quasi adiuratos? Qui cùm omnes pleni Spiritu sancto ab Apostolis eligendi dicantur, solus tamen Stephanus hanc gratiam spiritualiter adeptus in sequentibus memoratur, cùm dicitur. *Et elegerunt Stephanum virum plenum fide & Spiritu sancto, & Philippũ &c.* Et rursum: *Stephanus plenus gratia & fortitudine faciebat prodigia & signa magna in populo.* Gaudete itaque, & spiritualiter congaudete tanti agonistæ victoriæ, quem & meruistis habere ministrum, & in huius administrationis mercede priorem martyrij palmam adeptum de obsequio vestro transmisistis ad cælum. Reddite mu-

tuum super hoc diuinę laudis obsequium; & quò ille fidelius
 pro Deo vestris ministravit mensis, eò vos deuotius in obse-
 quio Dei & veneratione Martyris persistatis. In quo simul &
 honorem vestrum pensate, & fiduciam de meritis eius non
 mediocrem sumite. Honorem quidem, quòd, vt præfati su-
 mus, talem meruistis habere ministrum, quem militię cæle-
 stis signiferum omnes animę sequuntur iustę: fiduciam verò,
 qua ipsum præcipuè ibi speretis adiutorem, quem hîc fidelis-
 simum habuistis procuratorem: qui in minimo fidelem se
 præbuit ministrum, in maiore vltro neum se præparet aduo-
 catum. Quod tantò facilius suis apud Dominum meritis
 obtinebit, quantò eius gratiam maiorem adeptus, summo
 ibi Sacerdoti primus Diaconus meruit adiungi. Cuius quo-
 que passio tantam priuilegij nacta est auctoritatē, vt sola ipsa
 Canonicis inserta scripturis, eundem habuerit scriptorem,
 quem & Dominica. Tanquam apocryphę passionēs Aposto-
 lorum repudiantur, & exitus Dominicę matris certum ex
 scriptore titulum non habet. Sola est Protomartyris passio
 Euangelici scripti stylo insignita, & tam diligenter descripta,
 vt tam in sua quàm in vestra laude abundet. Statim quippe
 post electionem eius & cæterorum ad obsequij vestri Diacono-
 natum, subiectum legimus: *Stephanus autem plenus gratia &
 fortitudine faciebat prodigia & signa magna in populo.* Quid hoc,
 obsecro, vobis dignitatis acquirit, quòd non ante susceptum
 Diaconatus officium his prodigijs & signis Stephanum ma-
 gnificari Lucas commemorat, sed statim post curę suscep-
 tionem: nisi vt innuat hoc à vobis meritū processisse, vt quò
 se amplius sub infirmiori sexu famulādo humiliaret, amplius
 hinc cum Dominus exaltaret, & in his, quę sequuntur, cæ-
 teris excellentior Sanctis appareret? De quo & subditur,
 quòd cum propter prodigiorum & signorum eius magnitu-
 dinem ferre aduersarij eum non possent, de diuersis in eum
 Synagogis & locis conuenientes, tam verbis quàm factis mi-
 rabilem inuenirent. Cum enim præmisisset Euangelista,
*Stephanus autem plenus gratia & fortitudine faciebat prodigia &
 signa magna in populo;* adiecit, atque ait: *Surrexerunt autē qui-
 dam de Synagoga quę appellatur Libertinorum, & Cyrenensium, &
 Alexandrinorum, & eorum, qui erant à Cilicia & Asia, disputan-
 tes cum Stephano: & non poterant resistere sapientia & spiritui, qui
 loquebatur.*

loquebatur. Vnde ilicò tam verbis ipsius quàm miraculis amplius confutati, & vehementius in eum commoti, falsis contra eum testibus introductis, ilico commouerant plebem, & Seniores, & Scribas, vt concurrentes raperent eum, & traherent in Concilium, vt de blasphemia saltem in Deum & Moysen à falsis testibus ei obiecta reus adiudicaretur. Quod quidem non tam per eorum malitiam, quàm per dispensationem diuinam, vt in omnibus militem suum Deus glorificaret, patenter historia docet. Vnde & cùm scriptum sit, *quia concurrentes rapuerant eum, & adduxerunt in Concilium*: non tam vi ductum, quam propria volùtate adductum eum intelligimus. Cupiens enim dissolui, & esse cum Christo, qui ad Patrē ait, *Volo, pater, vt vbi sum ego, illic sit & minister meus*, eo tunc desiderio primus ipse Diaconus post summum sacerdotē Christum ferebatur, quo postmodū Laurentius Sixto adhaerebat dicens: *Quò progredieris sine filio pater? Quò sacerdos sancte sine ministro properas?* Recordabatur & illud Sapientis prouerbiū, quo se obligatum attendebat, & exsoluere cupiebat. *Ad mensam magnam sedisti: scito quoniam & talia te oportet preparare*. Sicut enim mensa est corporalis cibi, quæ parua dicitur: sic & mensa magna ea rectè vocatur, vndè cibus animæ in sacramento Dominico sumitur. Hanc mensam Dominus nobis crexit, cùm seipsum in Cruce pro nobis immolauit. Ad hanc mensam accedimus, cùm de altari corporis & sanguinis eius sacramenta sumimus. Quod quidem sumentes, illud attendere debemus, quod ista sumentes Christus admonet, *hoc facite, inquit, in meam commemorationem*. Ac si apertè dicat: Hæc in memoriam meæ passionis ita celebrate sacramenta, vt ad compatiendū pro me, ipsa vos promptos memoria præparet. Vt enim Apostolus meminit, *Si compatimur, & conregnabimus*. Cùm verò compatiendo Christo, vicem ei reddimus: quasi de mensa potentis sumpta fercula recōpensamus, vt & nos eum reficiamus de nostro, sicut & ille nos satiauit de suo; & nobiscum ipso cœnet, cum quo nos prius cœnauimus. Quis autem minister in mensa Christi, nisi Diaconus intelligitur, qui & ipsam altaris mensam, & in ea consecranda hostiæ sacramenta componit? Vndè benè memorem hostiæ huius ipsum esse conuenit, cuius præcipuè ministerio tractatur, vt inde meritò primus hic Diaconus illi summo sacer-

doti in hac recōpēsanda vice succederet. Cuius quidē laudē cū in Concilium aduocatus esset, vt diximus, ad accusandū, Euangelista prosequens ait: *Et intuentes in eum omnes, qui sedebant in Concilio, viderunt faciem eius, tanquā faciē Angeli.* Iā enim in eo futurę vitę gloria resplendebat, quam fidelibus suis Dominus promittens, ait: *Ibi enim neque nubent, neque nubentur: sed erunt sicut Angeli Dei in celo.* Et Apocalypsis, *Mensura*, inquit, *hominis, quę est Angeli.* Legimus Dominum in transfiguratione sua tanquam solem facie resplenduisse: huius autem faciem tanquam Angeli audiuius factam esse, quod nec Apostolorum, nec sanctorum cuiquam sacrę tribuunt Historię. Staturus autem & interrogatus in Concilio, quāta fortitudine animi atque constantia plenus esset, proprijs responsis exhibuit: quę quide in tali fine concludens, ait: *Dura ceruice, & incircuncisi corde & auribus, vos semper Spiritui sancto restitistis: sicut patres vestri, ita & vos. Quem Prophetarum non sunt persequuti patres vestri? Et occiderunt eos, qui prænunciabant de aduentu iusti, cuius vos nunc proditores & homicidę fuistis, qui accepistis legem, & non custodistis.* Vbi & subditur. *Audientes autem hac, dissecabantur cordibus suis, & stridebant dētibz in eum.* Iam enim de primitijs percipiendę coronę securus, & de cōsummatione agonum suorum roboratus, quantō ampliū properabat ad brauium, tantō aduersarios minū verebatur, & magis in se commoueri gaudebat. Quam profectō constantiā non tam verbis ipsius, quā ipsa sua præsētia ei Dominus exhibebat, sicut statim adiunctum est: *Cū autem esset Stephanus plenus Spiritu sancto, intendens in celum, vidit gloriam Dei, & Iesum stantem à dextris Dei.* Legimus Dominum Iesum, cū celos ascenderit, ad dexteram Patris consedis: nunc verò propter Stephanum, quasi indē surrexerit, stantem potius quā sedentem eum vidit apparuisse. Quis hic honor, quæso, aut quæ spes Martyris, vt in occursum eius assurgere, vel in auxilium eius stare, quasi & pariter pugnet, Christus appareat? Bene autem præmissum est, faciem eius tanquam faciem Angeli factam fuisse, cū subiunctum sit eum gloriā Dei vidisse, vt iam eius vita siue cognitio Angelica magis quā humana dicenda sit. Scriptum quippe est, Domino ad Moysen dicente: *Non videbit me homo, & viuet.* Et Psalmista de ipsa visione diuinitatis iam securus, ad Deum loquitur:

Satiabor cū apparuerit gloria tua. Hic verò Stephanus non solum humanitatem Christi stantem ad dexteram Patris, verū etiam gloriam Dei videre se asserit, quasi iam omnino Angelicam faciem adeptum. De qua videlicet Angelica visione per semetipsam Veritas ait: *Amen dico vobis, quia Angeli eorum semper vident faciem Patris mei, qui in calis est.* Raptus est Paulus vsque ad tertium cælum, & audiuit arcana verba, quæ nō licet homini loqui: non tamen gloriam Dei, vel dexteram Patris, in qua Christus consisteret, legitur conspexisse. Unde iam Stephanum quasi iam in exitu vitæ constitutum non tam humanè quàm Angelicè viuere perpendimus: cui nec virginitatis prærogatiuam defuisse credimus, quæ præcipuè virtus Angelos imitatur: vt videlicet in carne sine corruptione carnis viuatur, quod nequaquā Moyſi concessum est humanæ infirmitatis copulæ obligato. Vndè & in laudem tanti Martyris sermo quidam conscriptus tali fine conclusus est: *In hoc quod præpositus est feminis, testimonium meruit sincerissimæ castitatis. Beatus ergo erit, qui hunc imitatus fuerit. Et pudicitiam enim palmam, & martyrij consequetur coronam.* Ac si apertè diceretur. Qui exemplo eius Agnum sequens quocumque ierit, & bisso pariter indutus & purpura, rosis simul & lilijs intextum percipiet diadema. Vndè & per excellentiam tanti meriti, diuino quodam præſagio factū est vt Stephanus vocaretur: quod, vt Beda meminit, Hebraicè norma vestra, Græcè corona dicitur; Cuius nominis vtraque interpretatio quantum huius militis excellentiam exprimat facile est assignare. Quod enim dicitur norma vestra (subauditur ô fideles) tantis cum virtutibus adornatum innuit, vt ad perfectionem vitæ ipse sit omnibus regula disciplinæ. Quippe cū dilectio sit legis plenitudo, quis æquè vt Stephanus hanc tam Deo quàm proximo visus est exhibere? Deo quidem pro ipso, & post ipsum prior moriendo, atque illud adimplēs, quod ipse de ipso dixerat. Maiorem hac dilectionem nemo habet, quàm vt animam suam ponat quis pro amicis suis. Proximo autem, cū pro se lapidantibus voce magna orans, supplicauit dicens: *Domine ne statuas illis hoc peccatum: quia nesciunt quid faciunt.* Vbi & mox de ipso de tanta perfectione assumpto subditur. *Et cū hoc dixisset, obdormiuit in Domino.* Et prius quidem, ipsum pro se orasse Scriptura non

reticeret, dicens: *Et lapidabant Stephanum invocantem & dicentem: Domine Iesu, suscipe spiritum meum.* Sed, profectò, dum pro se orat, nec genua flexisse, nec clamasse voce magna legitur: ut tantò maiorem inimicis exhiberet deuotionem, quantò eos ampliùs orationis suæ præsidio egere sentiret, de quorù meritis nihil confidebat. In hac ergo perfectione caritatis erga inimicos consummatus, expleta pro eis oratione, statim in Domino meruit obdormire; ut de perfecto virtutis cumulo, primus tam dignitate, quàm tempore Martyr primum perciperet brauium. Decebat quippe ut talis in acie Domini primus eligeretur athleta, & cæteris anteponeretur, qui, quò virtute perfectior esset, eò ampliùs ad bellù proprijs animaret atque instrueret exemplis: quasi per ipsum Dominus manus omnium doceret ad prælium, & digitos ad bellum. Et ut còstantiùs ad agonem posteros hortaretur, intuens in cælum vidit gloriam Dei, & sibi iam astantem Iesum, statimque quasi ad sequaces suos in agone corroborandos, exclamet dicens: *Ecce video celos apertos, & filium hominis stantem à dextris virtutis Dei.* Ac si diceret: Pugnate & vos fortiter, dimiccate viriliter: quia post agonem pugnae, nulla est iam dilatio palmae. State in acie intrepidi, pugnate securi: quia Christus in agone astat nobis, ut vincamus pugnat pro nobis. Si Deus pro nobis, quis contra nos? Quid etiam illud est insigne prælagij, quòd Stephanus non tam coronatus, quàm corona ipsa interpretatur? Quasi enim de ipso sunt omnes coronandi, qui ab ipso inchoantes, sunt per ipsum instructi: ut ipse simul & regula sit virtutum, & quodāmodo corona victorum, & ducatus ad præmium. Qui etiam tantis, ut dictum est, extitit virtutibus adornatus, ut corona cæterorum quasi supremum diceretur ornamentum, & in ipso corpore Christi non tam cæteris sanctis in vestimento Dominico sit connumerandus, quàm in superiori parte, quasi corona, collocandus. Vnde & immaculatæ suæ carnis hostia cæteris Martyribus præponi, & in catalogo septem Diaconorum tanquam eorum Archidiaconus, tam rei, quàm ordinis nomine meruit anteponi. Decebat quippe ut cæteri cum ipso nobis, ut diximus, deputati, eius præcipuè regerentur arbitrio, qui castimonie præminebat virtute. Bene itaque diuina dispensatione actum est, ut in exemplo Martyribus ille primus exhiberetur; qui

virtutum gratia præcedens, eos ampliùs roboraret, & ad coronam prouocaret. Et sursum intuitus Iesum, tam in occursum, quàm in auxilium sui pariter stantem, hanc sibi reuelationē fieri non distulit profiteri: qua videlicet sequaces suos ad cōpatiendū ampliùs roboraret, & aduersarios in se ipsum vehementiùs commoueret. Meminerat, ni fallor, Esaiā à Iudæis occisum, eo quod se Deum vidisse scripserat. Vnde & ipse ampliùs istos commouendos ex his verbis suis Stephanus æstimabat, sicut & statim adnexum est cū dicitur: *Exclamantes autem voce magna, continuerunt aures suas, & impetum fecerunt unanimiter in eum. Et eicientes eum extra ciuitatem, lapidabant.* Hanc eandem portam æstimo, qua & Christus ad crucifigendum egressus est: vt & regi & militi idem passionis locus esset communis. Completū est in eo iuxta ipsam quoque Historiam, quod ad Hebræos scribens Apostolus, ait. *Quorum animalium inferitur sanguis in sancta per Pontificem, horum corpora cremantur extra castra. Propter quod & Iesus, vt sanctificaret, per suum sanguinem, populum: extra portam passus est. Exeamus igitur ad eum extra castra, improperium eius portantes. Non enim habemus hic manentem ciuitatem, sed futuram inquirimus.* Si ergo his, qui futuram inquirunt, tanto desiderio properandum est, quanto magis Stephano, qui iam eam in cælis præsentem cernebat, qui sibi assurgentem, seu in occursum eius stantem ac paratum videbat Christum? Quanta autem promotione in eum debaccharentur, ipsa persequentium impatientia testatur, cū dicitur: *Et eicientes eum extra ciuitatem, lapidabant.*

EPISTOLA VIII.

QVÆ EST BERNARDI CLARÆVAL. AB.

AD EPISCOPOS SENONAS CONVOCANDOS
contra Petrum Abaelardum.

1. Tim. 2. d.

XIIIT sermo inter multos, & credimus ad vos peruenisse, quomodo videlicet apud Senonas in octauis Pentecostes vocamur & prouocamur ad litem pro defensione fidei: cum seruum Dei non oporteat litigare, sed magis patientem esse ad omnes. Si mea propria causa esset, posset non immerito fortassis puer sanctitatis vestræ in vestro patrocinio gloriari. Nunc autē quia & vestra est imo plus vestra, fidentius moneo, & obnixius rogo, vt amicos vos in necessitate probetis. Amicos dixerim non nostros, sed Christi, cuius sponsa clamat ad vos in sylua hæresum, & in segere errorum, quibus sub tutela & custodia vestra pullulātibz, pene iam suffocatur. Amicus sponsi non deseret eam in opportunitatibus in tribulatione. Nec miremini quod ita de subito & in arcto temporis vos inuitamus: quoniam hoc quoque aduersa pars in sua versutia & calliditate prouidit, vt improuidos inuaderet, & congregari cogeret immunitos.

EPISTOLA IX.

QVÆ EST EIVSDEM BERNARDI CLAR. ABB.

Ad Episcopos & Cardinales Curia, de eodem
Petro Abaelardo.

DOMINIS ET PATRIBVS REVERENDIS,
*Episcopis & Cardinalibus qui sunt de Curia,
puer sanctitatis eorum.*



Exod. 24. d.

VLLI dubium quin ad vos specialiter spectet tollere scandala de regno Dei, surgentes succidere spinas, sedare querelas. Sic enim præcepit Moyses cum montem subiit: *Habetis* (inquiens) *Aaron & Hur vobiscum: si quid natum fuerit questionis, referetis ad ipsos.* Illum lo-


quor Moysen, qui venit per aquam, & non in aqua solum, sed in aqua & sanguine. Et ideo plus quam Moyses, quia & in sanguine venit. Et quoniam pro Hur & Aaron stat zelus & auctoritas Romanæ Ecclesiæ super populum Dei, ad ipsam merito referimus non quæstiones, sed læsiones fidei, & iniurias Christi, Patrum probra atque contemptus, præsentium scandala, pericula posterorum. Irridetur simplicium fides, euiscerantur arcana Dei, quæstiones de altissimis rebus temerariè ventilantur, insultatur Patribus quod eas magis sapiendas quàm soluendas censuerint. Inde fit quod agnus Paschalis contra Dei statutum aut aqua coquitur, aut crudus discerpitur more & ore bestiali. Quod residuum est, non igne comburitur, sed conculcatur, ita omnia vsurpat sibi humanum ingenium, fidei nil reseruans. Tentat altiora se, fortiora scrutatur, irruit in diuina, sancta temerat magis, quam reseruat, clausa & signata non aperit, sed diripit: & quicquid sibi non inuenit peruium, id putat nihilum, credere dedignatur. Legite si placet librum Petri Abaelardi quem dicit Theologiæ, ad manum est enim: cum, sicut gloriatur, à pluribus legeretur in curia, & videte qualia ibi de sancta Trinitate dicantur, de genitura Filij, de processione Spiritus sancti, & alia innumera catholicis auribus & mentibus disfluata. Legite & alium quem dicunt Sententiarum eius, necnon & illum qui inscribitur: Scito te ipsum: & animaduertite quantæ & ibi syluescant segetes sacrilegiorum atque errorum, quid sentiat de anima Christi, de persona Christi, de descensu Christi ad inferos, de sacramento altaris, de potestate ligandi atque soluendi, de originali peccato, de concupiscentia, de peccato delectationis, de peccato infirmitatis, de peccato ignorantie, de opere peccati, de voluntate peccandi. Et si quidē iudicatis me iuste moueri, mouemini & vos: ac ne frustra moueamini, agite pro loco quem tenetis, pro dignitate qua polletis, pro potestate quam accepistis, quomodo qui ascendit ad cælos, descendat vsque ad inferos: & opera tenebrarum ausa prodire in lucem, arguantur à luce in lucem, ut dum qui publicè peccat, publicè arguetur, comprimant sese etiam alij ponentes tenebras lucem, disputantes in triuiis de diuinis, qui loquuntur mala in cordibus suis, & in codicibus suis scribunt: & sic obstruatur os loquentium iniqua.

EPISTOLA X.

QVÆ EST RVRSVM BERNARDI ABB.
Ad Dominum Papam Innocentium de eodem Petro.

AMANTISSIMO PATRI ET DOMINO INNOCENTIO Dei gratia summo pontifici, Bernardus Clareuallensis vocatus Abbas, modicum id quod est.

Psal. 54. b.
Philip. 1. c.



3. Reg. 16. a.

Philip. 1. d.

NECESSSE est vt veniant scandala. Necesse, sed non
iuaue. Et ideo dicit Propheta: *Quis dabit mihi pennas
sicut columbe, & volabo & requiescam?* Et Apostolus cu-
pit dissolui, & cum Christo quiescere. Et alius qui-
dam sanctorum: *Sufficit mihi Domine, ait, tolle animam meam, ne-
que enim melior sum quam patres mei.* Est mihi nunc aliquid cō-
mune cum sanctis, in voluntate dumtaxat, non in merito. Nā
vellem & ipse modo de medio fieri, victus, fateor, à pusillani-
mitate spiritus, & tempestate. Vereor autem ne non sicut
pariter affectus, ita pariter & paratus inueniar. Tardet viuere,
& an mori expediat, nescio: & ideo forte etiam in votis distē
à sanctis, quod ipsi prouocētur desiderio meliorum: cum ego
scandalis & ærumnis compellar exire. Denique ait: *Dissolui
& cum Christo esse, multo melius.* Ergo & in facto appetitus, & in
hac miserrima vita nec ille habere quod appetit bonum, nec
ego quod molestum patior, non habere valemus. Et ob hoc
exire quidem ambo pari cupimus voluntate, sed non pari in-
tentione. Stultè mihi dudum requiem promittebam, liqui-
dem Leonina rabies quieuisset, & pax Ecclesiæ redderetur.
Nam ecce illa quieuit, sed non ego. Nesciebam me esse in
valle lacrymarum, aut oblitus fueram me habitare in terra
obliuionis. Non attendebam terram in qua habito spinas &
tribulos germinare mihi, succisis succedere nouas, & rursus
illis alias sine fine, sine intermissione succrescere. Audieram
hæc, sed melius, vt nunc experior, ipsa vexatio dat intellectu
auditui. Innouatus est dolor, non exterminatus, lacrymæ in-
undauerunt quia inualuerunt mala, & expertis pruinam, ir-
ruit super eos nix. Ante faciem frigoris huius quis sustinebit?
Hoc frigore refrigescit charitas, vt abundet iniquitas. Leo-

nem euasimus, sed incidimus in draconem, qui non minus forsan noceat sedens in insidijs, quàm ille rugiens de excelsso. Quamquam non iam in insidijs, cuius virulenta folia utinam adhuc laterent in scrinijs, & non in triuijs legerentur. Volant libri: & qui oderant lucem quoniam mali sunt, impegerunt in lucem, putantes lucem tenebras. Urbibus & castellis ingeruntur pro luce tenebræ, pro melle vel potius in melle venenum passim omnibus propinatur. Transierunt de gente in gentem, & de regno ad populum alterum. Nouum cuditur populis & gentibus euangelium, noua proponitur fides, fundamentum aliud ponitur præter id quod positum est. De virtutibus & vitijs non moraliter, de Sacramentis Ecclesiæ non fideliter, de arcano sanctæ Trinitatis non simpliciter, nec sobriè disputatur: sed cuncta nobis in peruersum, cuncta præter solitum & præterquam accepimus ministrantur. Proccedit Goliath procero corpore nobili illo suo bellico apparatu circummunitus, antecédente quoque eius armigero Arnaldo de Brixia. Squama squamæ coniungitur, & nec spiraculum incedit per eas. Siquidem sibilauit apis quæ erat in Francia, apis de Italia: & venerunt in vnum aduersus Dominum, & aduersus Christum eius. Intenderunt arcum, parauerunt sagittas suas in pharetra, ut sagittent in obscuro rectos corde. In victu autem & habitu habentes formam pietatis, sed virtutem eius abnegantes, eo decipiunt plurimos, quo transfigurant se in Angelos lucis, cum sint satanæ. Stans ergo Goliath vna cum armigero suo inter vtrasque acies, clamat aduersus phalangas Israel, exprobratque agminibus sanctorum, eo nimirum audacius, quo sentit David non adesse. Denique in suggillationem doctorum Ecclesiæ, magnis effert laudibus philosophos, ad inuentiones illorum & suas nouitates Catholicorum Patrum doctrinæ præfert & fidei: & cum omnes fugiant à facie eius, me omnium minimum expetit ad singulare certamen. Denique scripsit mihi, sollicitante quidem ipso, Archiepiscopus Senonensis diem statuens congressionis, quo ille in præsentia eius & coepiscoporum suorum deberet, si posset, statuere praua dogmata sua, contra quæ ego ausus mutire fuisset. Abnuui, tum quia puer sum, & ille vir bellator ab adolescentia: tum quia iudicarem indignum rationem fidei humanis committi ratiunculis agitandâ, quam

Matt. 10. 6.
Psal. 117. 9

tam certa ac stabili veritate constet esse subnixam. Dicebam sufficere scripta eius ad accusandum eum, nec mea referre, sed Episcoporum, quorum esset ministerij de dogmatibus iudicare. Ille nihilominus, imò eo amplius leuauit vocem, vocauit multos, congregauit complices. Quæ de me ad discipulos suos scripserit, dicere non curo. Disseminauit ubiq; se mihi die statuto apud Senonas responsurum. Exijt sermo ad omnes, & non potuit me latere. Dissimulaui primum, nec enim satis rumore populi mouebar. Cedens tamen (licet vix, ita vt flerem) consilio amicorum, qui videntes quomodo se quasi ad spectaculum omnes pararent, timebant ne de nostra absentia & scandalum populo, & cornua crescerent aduersario: & quia error magis confirmaretur cum non esset qui responderet aut cōtradiceret: occurri ad locum & diem, imparatus quidem & immunus, nisi quod illud mente voluebam: *Nolite premeditari qualiter respondeatis, dabitur enim vobis in illa hora quid loquamini.* Et illud: *Dominus mihi adiutor, non timebo quid faciat mihi homo.* Conuenerant autē præter Episcopos & Abbates, plurimi viri religiosi, & de ciuitatibus magistri scholarum, & clerici literati multi, & Rex præsens erat. Itaque in præsentia omnium aduersario stante ex aduerso producta sunt quædam capitula de libris eius excerpta. Quæ cum cœpissent legi nolens audire exiuit, appellans ab electis iudicibus: quod non putamus licere. Porro capitula iudicio omnium examinata, inuenta sunt fidei aduersantia, contraria veritati. Hæc pro me, ne leuitate aut certè temeritate vsus in tanto negotio putarer. Verum tu ô successor Petri, iudicabis an debeat habere refugium ad sedem Petri, qui Petri fidem impugnat. Tu, inquam, amice sponsi prouidebis quomodo liberes sponsam à labijs iniquis & à lingua dolosa. Sed, vt paulo audacius loquar cum Domino meo, attende etiam tibi ipsi amantissime Pater, & gratiæ Dei quæ in te est. Nōne cūm esses paruulus in oculis tuis, ipse te cōstituit super gētes & regna? Ad quid nisi vt euellas & destruas & ædifices & plātes? Qui ergo tulit te de domo Patris tui, & vnxit te vnctiōne misericordiæ suæ, attēde, quæso, ex tunc & deinceps quāta fecit animæ tuæ, quāta per te Ecclesiæ suæ, quanta in agro Dominico, cœlo & terra testibus, tam potenter quàm salubriter euulsa sunt & destructa, quanta rursus bene ædificata, plan-

cata, propagata. Suscitauit Deus furorem schismaticorum in tuo tempore, vt tuo opere contererentur. Vidi stultum firma radice, & statim maledictum est pulchritudini eius. *Vidi, inquam, vidi impium superexaltatum & elcuiatum sicut cedros Libani: & transiui, & ecce non erat.* Oportet autem, ait, *hereses & schismatica esse: vt qui probati sunt, manifesti fiant.* Et in schismate quidem iam (vt dictum est) Dominus probauit te & cognouit te. Sed ne quid desit coronæ tuæ, en hæreses surrexerunt. Itaque ad commutationem virtutum, & ne quid minus fecisse inueniamini à magnis Episcopis antecessoribus vestris, capite nobis, Pater amantissime, vulpes quæ demoliuntur vineam Domini, donec paruulæ sunt: nec si crescant & multiplicentur, quicquid talium per vos non fuerit exterminatum à posteris desperetur. Quanquam non iam paruulæ nec pauculæ, sed certè grandiusculæ & multæ sint, nec nisi in manu forti vel à nobis exterminabuntur. Iacinctus multa mala ostendit nobis, nec enim quæ voluit, fecit. Sed visus est mihi patienter ferendus de me, qui nec personæ vestræ nec curiæ in curia illa pepercit: quod melius Nicolaus iste meus, imo & vester, viua referet voce.

1. Cor. II. d.

ADMONITIO

PRæcedenti Epistolæ adhærebant, non in editis, sed in M. S. Codicibus, Capitula quædam contra Petrum Abaelardum posita, & Innocentio summo Pontifici missa. Verum quia nulla eorum, aut pene nulla in omnibus ipsius Abaelardi scriptis, quæ nunc damus, reperiri, quibus facillimè iudicabit, quem illa non pigebit legisse, propterea omittendam hîc eorum relationem haud inconueniens censuimus. Alioquin & quæ fuerint, subsequens S. Bernardi ad Innocentium Epistola; & utrum vera, Confessio fidei, quam pro sua defensione conscripsit Petrus, satis indicabunt.

EPISTOLA XI.

QVÆ EST ITERVM BERNARDI ABB.

Ad eundem Papam Innocentium,

AMANTISSIMO PATRI ET DOMINO

Innocentio summo Pontifici, frater Bernardus

Clareuallis vocatus Abbas, modicum

id quod est.



PORTET ad vestrum referri Apostolatum pericula quæque & scandala emergentia in regno Dei, ea præsertim quæ de fide contingunt. Dignum namque arbitror ibi potissimū resarciri damna fidei, ubi non possit fides sentire defectum. Hæc quippe huius prærogatiua

Sedis. Cui enim alteri aliquando dictum est : *Ego pro te rogam* Luc. 22. d. *Petree, ut non deficiat fides tua?* Ergo quod sequitur, à Petri successore exigitur : *Et tu aliquando conuersus confirma fratres tuos.* Ibidem. Id quidem modo necessarium. Tempus est ut vestrū agnoscat, Pater amantissime, principatum, probetis zelum, ministerium honoretis. In eo plane Petri impletis vicem, cuius tenetis & Sedem, si vestra admonitione corda in fide fluctuantia confirmatis, si vestra auctoritate conteritis fidei corruptores. Habemus in Francia nouum de veteri magistro Theologum, qui ab ineunte ætate sua in arte Dialectica lusit, & nunc in scripturis sanctis insanit. Olim damnata & sopita dogmata, tam sua videlicet quàm aliena suscitare conatur, insuper & noua addit. Qui dum omnium quæ sunt in cœlo sursum, & quæ in terra deorsum, nihil præter solum nescio quid nescire dignatur, ponit in cœlum os suum, & scrutatur alta Dei, rediensque ad nos refert verba ineffabilia, quæ non licet homini loqui. Et dum paratus est de omnibus reddere rationem, etiam quæ sunt supra rationem & contra rationem præsumit, & contra fidem. Quid enim magis contra rationem, quàm ratione rationem conari transcendere? Et quid magis contra fidem, quàm credere nolle quicquid non possit ratione attingere? Denique exponere volens illud Sapientis: *Qui credit cito* Eccl. 19. b. *leuis est corde:* cito credere est, inquit, adhibere fidem ante rationem: cum hoc Salomō non de fide in Deum, sed de mutua inter nos dixerit credulitate. Nam illam, quæ in Deum est, fidem beatus Papa Gregorius negat planè habere meritum, si ei humana ratio præbeat experimentum. Laudat autem Apostolos, quod ad vnius iussionis vocem secuti sunt redemptorem. Scit nimirum pro laude dictum: *In auditu aures obedi-* Psal. 135. b. *uit mihi:* increpatos è ratione discipulos quòd tardiùs credidissent. Denique laudatur Maria, quod rationem, fide præuenit: & punitur Zacharias, quod fidem ratione tentauit. Et rursus Abraham commendatur, qui contra spem in spem credidit. At contra Theologus noster. Quid, inquit, ad doctrinam loqui proficit, si quod docere volumus, exponi non potest ut intelligatur? Et sic promittens intellectum auditoribus suis, in his etiam quæ sublimiora & sacratiora profundo illo sinu sacræ fidei continentur, ponit in Trinitate gradus, in maiestate modos, numeros in

æternitate. Constituit denique Deum Patrem plenam esse potentiam, Filium quandam potentiam, Spiritum sanctum nullam potentiam. Atque hoc esse filium ad patrem, quod quandam potentiam ad potentiam, quod speciem ad genus, quod materiaturum ad materiam, quod hominem ad animal, quod æreum sigillum ad ær. Nonne plus quam Arrius hic? Quis hæc ferat? Quis non claudat aures ad voces sacrilegas? Quis non horreat prophanas nouitates & vocum & sensuum? Dicit etiam Spiritum sanctum procedere quidem ex patre & Filio, sed minimè de Patris esse Filij ve substantia. Vnde ergo? an fortè ex nihilo, sicut & vniuersa quæ facta sunt? Nam & ipsa ex Deo esse non diffitetur Apostolus, nec veretur dicere: *Ex quo omnia*. Quid igitur? Dicemus ex Patre & Filio Spiritum sanctum non alio prorsus procedere modo, quàm omnia, id est, non esse essentialiter, sed creabiliter, ac proinde creatum sicut & omnia? Aut nunquid tertium inueniet sibi modum, quo eum ex Patre Filioque producat, homo qui noua semper inquit, & quæ non inuenit fingit, affirmans ea quæ non sunt, tanquam ea quæ sunt. At si esset, inquit, de substantia Patris, profecto genitus esset, & duos Pater Filios haberet. Quasi verò omne quod de substantia aliqua est, continuo ipsum à quo est habeat genitorem. Num vero pediculi aut lendes aut phlegmata, vel filij carnis sunt, vel non sunt de substantia carnis? Aut vermes de ligno putrido prodeuntes aliunde quam de ligni substantia sunt, qui tamen filij ligni non sunt? Sed & tinea de substantia pannorum substantiam habent, generationem non habent. Et multa in hunc modum. Miror autem hominem acutum & sciolum, (ut quidem sibi ipse videtur) quomodo cum Spiritum sanctum fateatur patri & Filio consubstantialem, neget tamen ex patris Filijque prodire substantia, nisi fortè illos ex ipsius procedere velit. Quod quidem in iudicium est, & nefandum. Si autem nec is de illorum, nec illi de huius substantia sunt, ubi quæso consubstantialitas? Aut ergo fateatur cum Ecclesia Spiritum sanctum de substantia illorum esse, à quibus non negat procedere, aut certe cum Arrio consubstantialitatem denegat, & prædicet apertè creationem. Deinde si Filius de substantia patris est, Spiritus sanctus non est: differant necesse est à se inuicem, non solum quia Spiritus sanctus genitus non

Rom. 11. d

est, quod Filius est: sed etiam quod Filius de substantia Patris est, quod Spiritus sanctus non est. Quam quidem posteriorem differentiam fides Catholica hucusque nesciuit. Si eam amittimus, vbi Trinitas? vbi vnitas? Siquidem Spiritu sancto Filioque nouarum à se differentiarum numerositate distantibus, vnitas dissipatur, præsertim cum substantialem esse pateat differentiam quam iste conatur inducere. Porro autem Spiritu sancto à Patris Filijque substantia recedēte, non Trinitas remanet, sed dualitas. Neque enim dignum est in Trinitate admitti personam quæ nil habeat in substantia commune cum reliquis. Desinat ergo Spiritus sancti processionē à Patris Filijque substantia separare, ne duplici impietate numerum & Trinitati minuat, & tribuat vnitati: quod vtrumque fides abnuat Christiana. Et ne de re tanta solis videar humanis inniti rationibus, legat Epistolam Hieronymi ad Auitum: & certe videbit inter cæteras quas redarguit Origenis blasphemias, etiam hoc eum detestantem, quod dixerit Spiritum sanctum de substantia Patris non esse. Beatus Athanasius in libro de vnica Trinitate ita loquitur: Solum Deum vbi memoratus sum, non solam personam Patris indicaui, quia Filium & Spiritum sanctū de hac ipsa sola substantia Patris esse non abnegauī. Hoc Athanasius. Videt sanctitas vestra quomodo isto non disputante, sed dementante, & Trinitas non cohæret, & vnitas pendet, nec istud sane absque iniuria maiestatis. Quicquid namque illud est quod Deus sit, id sine dubio est quo non possit aliquid maius cogitari. Si ergo in hac vnica & summa maiestate iuxta considerationē personarum vel parum aliquid claudicare recipimus, dum quod vni plus datur, alteri minuitur; minus profecto est totum ab eo, quo nihil maius valeat cogitari. Maius enim sine dubio est quod totum maximum est, quàm quod ex parte. Ille vero digne pro sua possibilitate diuinam æstimat magnificentiam, qui nil in ea cogitat dispar, vbi est totum summū: nil distans, vbi totum est vnum: nil hians, vbi totum est integrum: nil denique imperfectum vel egens, vbi totum est totum. Totum nempe est Pater, quod Pater & Filius & Spiritus sanctus. Totum Filius, quod ipse & Pater & Spiritus sanctus. Totum Spiritus sanctus, quod & ipse & Pater & Filius. Et totum vnum est totum, nec superabundans in tribus, nec

imminutum in singulis. Nec enim verum summumque bonum quod sunt, inter se particulariter diuidūt, quoniam nec participaliter id possidēt, sed hoc ipsum essentialiter sunt. Nā quod alter ex altero, vel alter ad alterū veracissime dicitur, personarū sane designatio est, non vnitatis diuisio. Licet nāq; in hac ineffabili & incōprehensibili deitatis essentia, alter & alter, id quidē requirentibus proprietatibus personarum, sobriè Catholiceq; dicatur, non tamen ibi est alterū & alterum: sed simplex vnum: vt nec præiudicium faciat vnitati Trinitatis confessio, nec proprietatum sit exclusio vera assertio vnitatis. Tam longe proinde fiat à sensibus nostris quàm est & à regula veritatis execranda illa de genere & specie non similitudo, sed dissimilitudo, & nihilominus illa de ære æreoque sigillo: quoniam cum genus quidem & species, quod ad se inuicem sunt alterum superius, altera inferior sit: Deus autem vnus sit: nunquam bene profecto conueniet tantæ æqualitati & tantæ disparilitati. Et rursus de ære & quodam ære quod est æreū sigillum, quoniam quod inde in eandē vsurpatur similitudinis rationem, simile est huic idem iudiciū. Cum enim species, vt dixi, minor sit & inferior genere, absit vt hāc in Patre & Filio diuersitatem cogitemus. Absit vt huic acquiescamus dicenti, hoc esse Filium ad Patrem, quod speciē ad genus, quod hominem ad animal, quod æreum sigillum ad æs, quod aliquam potentiam ad potentiam. Sunt quippe cuncta hæc mutua suæ connexionē naturæ ad se inuicem superiora & inferiora: & ob hoc nulla prorsus admittenda similitudo ex his ad illud vbi nihil est inæquale, nil dissimile. Videtis de quanta vel imperitia vel impietate descendat harum adinuentio similitudinum? Adhuc aduertite clarius quid sentiat, doceat, scribat. Dicit, propriè & specialiter ad Patrem potentiam, ad Filium sapientiam pertinere: quod quidem falsum. Nam & Pater sapientia, & Filius potentia verissimè sunt, sanissimeque dicuntur: & quod est commune amborum non erit proprium singulorum. Alia illa sunt profecto vocabula, quæ non ad seipsos dicuntur, sed ad alterutrum: & ideo est cuique suum, & non commune cum altero. Nam qui Pater est, filius non est: & qui filius est, Pater nō est: quoniam non quod ad se, sed quod ad Filium Pater est, Patris nomine designatur: & itē nomine Filij non quod ad se

Filius,

Filius, sed quod est ad Patrem, exprimitur. Non sic potentia, non sic sapientia, neque alia multa quæ ad se dicuntur & Pater & Filius non singulariter alter respectu alterius. Non, inquit, sed ad proprietatem personæ Patris proprie vel specialiter inuenimus omnipotentiam attinere, quod non solum cum cæteris duabus personis æquè omnia efficere potest: verum etiam ipse solus à se, non ab alio existere habet: & sicut habet ex se existere, ita etiam ex se habet posse. O alterum Aristotelem! An non eadem ratione, si hoc ratio esset, & sapientia & benignitas proprie pertineret ad Patrem, cum & sapere & benignum esse æquè à se Pater & non ab alia habeat, quemadmodum & esse & posse? Quod si non abnuitt (nec enim de ratione potest) quid quæso facturum est de illa nobili sua partitione, in qua ut Patri potentiam, sic Filio sapientiam, sic Spiritui sancto benignitatem proprie ac specialiter assignauit? Non enim una & eadem res proprie poterit conuenire duobus, hoc est, ut cuique propria sit. Eligat, quod vult, aut det sapientiam Filio, & tollat eam Patri: aut Patri tribuat, & auferat Filio: & rursum benignitatem aut Spiritui sancto sine Patre, aut Patri sine Spiritu sancto assignet: aut certè desinat nomina communia propria facere, & Patri quoniam à seipso habet potentiam, non ideo tamen audeat concedere propriam, ne & benignitatem simul & sapientiam, quas à se nihilominus habet identidem proprias ipsi sua ratione assignare cogatur. Sed expectemus adhuc, & videamus quā theoricè noster Theologus inuisibilia Dei contempletur. Dicit (ut dixi) proprie omnipotentiam pertinere ad Patrem, atque hanc ut sit integra & perfecta, in generando & discernendo constituit. Porro Filio, ut iam dictum est, assignat sapientiam, ipsamque non simpliciter quidem potentiam, sed quandam in Deo potentiam esse diffinit, id est, potentiam tantum discernendi. Forte timet iniuriam facere Patri, si tantum tribuat filio quantum & ipsi: & cui non audet potentiam dare integram, concedit dimidiam. Et quod dicit, manifestis declarat exemplis, asserens potentiam discernendi quæ est Filius, ita quandam esse potentiam, quemadmodum homo quoddam est animal, & sigillum æreum quoddam est æs: atque hoc esse potentiam discernendi, ad gerendi discernendique potentiam, id est, Filium ad Patrem, quod homo ad

animal est, quod æreum sigillum ad æs. Sicut enim, inquit, ex eo quod est æreum sigillum, exigit necessario ut æs sit: & ex eo quod est homo, ut animal sit, sed non è conuerso: ita diuina sapientia quæ est potentia discernendi, exigit quod sit diuina potentia, sed non econuerso. Quid igitur? vis ut iuxta tuam similitudinem ad instar præcedentium, etiam ex hoc quod Filius est, exigat ut Pater sit, hoc est, ut qui Filius est Pater sit, quanquam non econuerso? Si hoc dicis, hæreticuses. Si non dicis, vacat similitudo. Ad quid enim tibi ipsam tanto circuitu de longo positis rebus, & minus conuenientibus emendicas, tanto labore colligis, tanta inculcas inani multiplicitate verborum, tantis effers laudibus, si non facit ad quod adducitur, ut videlicet membra ad membra congruis proportionibus reducantur? Nonne hoc opus, hic labor est, ut per ipsam nos doceas eam, quæ est inter Patrem & Filium habitudinem? Tenemus autem te docente ad hominis positionem poni animal, sed non econuerso secundum regulam Dialecticæ tuæ, qua non quidem posito genere ponitur species, sed posita specie ponitur genus. Cum ergo Patrem ad genus, Filium ad speciem referas, nonne id oratio similitudinis postulat, ut similiter posito Filio, Patrem poni ostendas, & non conuerti: ut quomodo qui homo est, necessario animal est, sed non conuertitur: ita quoque qui Filius est, necessario Pater sit, & æque non conuerratur? Sed contradicit tibi in hoc Catholica fides, quæ profecto vtrumque recusat, tam Patrem videlicet esse, qui Filius est, quàm esse Filium qui Pater est. Nam alius proculdubio Pater, atque alius Filius: quamuis non aliud Pater, quàm Filius. Nam per alius, & aliud nouit pietas fidei cautè inter personarum proprietates & indiuiduam essentiam vnitatem discernere, & medium iter tenens regia incedere via, ut nec declinet ad dexteram, confundendo personas: nec respiciat ad sinistram, substantiam diuidendo. Quod si per simplex esse, dicas verè consequi ut si Filius est, necessario Pater sit, nil te iuuat, cum ratio relationis necessario exigat ut conuertatur, & eadem veritas comiteretur conuersam: quod non congruit adductæ de genere & specie, vel de ære æreoque sigillo similitudini. Neque enim sicut per simplex esse duntaxat verissime dicitur, si Pater est, Filius est: & si Filius est, Pater est: ita etiam possumus inter

hominem & animal, siue inter æreum sigillum & æs in veritate conuertibilem texere consequentiam. Nam etsi verum sit dicere, si homo est, animal est, non tamen vera est conuersa, qua dicitur, si animal est, homo est. Et item si sigillum æreum est, necessario sequitur vt æs sit: non tamen si æs sit, necessario sequitur vt sigillum æreum sit. Sed iam pergamus ad reliqua. En iuxta istum habemus omnipotentiam in Patre, quandam potentiam in Filio. Dicat nobis etiam de Spiritu sancto quid sentiat. Benignitas ipsa, inquit, quæ hoc nomine quod est Spiritus sanctus, demonstratur, non est in Deo potentia siue sapientia. *Videbam satanam tanquam fulgur cadentem de cælo.* Sic debet cadere qui ambulat in magnis & mirabilibus super se. Vides, Pater sancte, quas scalas, imo quæ præcipitia iste sibi parauerit ad ruinam? Omnipotentiam, semipotentiam, nullâ potentiam. Ipsa auditu horreo, & ipsum horrorem puto sufficere ad refellendum. Veruntamen testimoniû pono, quod turbato interim occurrit ad remouendam Spiritus sancti iniuriam. In Esaia legitur, *Spiritus sapientie, & spiritus fortitudinis.* Per quod vtique apertè satis istius audacia etsi non comprimitur, conuincitur tamen. O lingua magniloqua! Esto, vt iniuria Filij vel Patris remittatur tibi, nunquid blasphemia Spiritus? Manet Angelus Domini, qui te secet medium. Dixisti enim: Non est Spiritus sanctus in Deo potentia, siue sapientia. Ita pes superbix ruit cum irruit. Nec mirum si homo qui non curat quæ dicat, irruens in arcana fide, thesauros absconditos pietatis tam irreuerenter inuadit atque discerpit, cum de ipsa pietate fidei nec piè nec fideliter sentiat. Denique in primo limine Theologiæ (vel potius stultilogiæ suæ) fidem diffinit æstimationem: quasi cuique in ea sentire & loqui quæ libeat liceat, aut pendeant sub incerto in vagis ac varijs opinionibus nostræ fidei sacramenta, & nō magis certa veritate subsistant. Nonne si fluctuat fides, inanis est & spes nostra? Stulti ergo martyres nostri, sustinentes tam acerba propter incerta, nec indubitantes sub dubio remunerationis præmio durum per exitum diuturnum inire exilium. Sed absit vt putemus in fide vel spe nostra aliquid, vt is putat, dubia æstimatione pendulum, & non magis totum quod in ea est, certa ac solida veritate subnixum, oraculis & miraculis diuinitus persuasum, stabilitum & consecratum partu virginis,

Luc. 10. 6

Esa. 11. 3

Psal. 91. a

1. Tim. 1. c

Aebr. 11. a

sanguine redemptoris, gloria resurgentis. *Testimonia ista credibilia facta sunt nimis.* Si quo minus, ipse postremo spiritus reddit testimonium spiritui nostro quod filij Dei sumus. Quomodo ergo fidem quis audet dicere æstimationem, nisi qui spiritum istum nondum accepit, quive euangelium aut ignoret, aut fabulam putet? *Scio cui credidi, & certus sum,* clamat Apostolus, & tu mihi subibitas, fide est æstimatio? Tu mihi ambiguum garris, quo nihil est certius? Sed Augustinus aliter: Fides, ait, non coniectando vel opinando habetur in corde in quo est, ab eo cuius est, sed certa scientia, acclamante consciëntia. Absit ergo, absit, ut hos fines fides habeat Christiana. Academicorum sint istæ æstimationes, quorum est dubitare de omnibus, scire nihil. Ego vero securus in magistri gētium sententiam pergo, & scio quoniam non confundar. Placet mihi, fateor, illius de fide diffinitio, & si iste etiam ipsam latēter insimulet. *Fides est, ait, substantia rerum sperandarum argumentum non apparentium.* Substantia, inquit, rerum sperandarum: non immanium phātasia coniecturarum. Audis substantiam, non licet tibi in fide putare vel disputare pro libitu, non hac illacque vagari per inania opinionum, per devia errorum. Substantię nomine aliquid tibi certum fixumque præfigitur: Certis clauderis finibus, certis limitibus coarctaris. Non est enim fides æstimatio, sed certitudo. Sed aduertite cætera. Omitto quod dicit spiritum timoris Domini non fuisse in Domino: timorem Domini castum in futuro seculo non futurū post consecrationem panis & calicis: priora accidentia quæ remanent, pendere in aëre: dæmonum in nobis suggestiones contactu fieri lapidum & herbarum, prout illorum sagax malitia nouit harum rerum vires diuersas diuersis incitandis & incidendis vitijs conuenire: Spiritum sanctum esse animam mundi: mundum iuxta Platonem tanto excellentius animal esse, quanto meliorem animam habet Spiritum sanctū. Vbi dum multum sudat quomodo Platonem faciat Christianum, se probat ethnicum. Hæc, inquam, omnia, aliasque istiusmodi nānias eius non paucas prætereo, venio ad grauiora. Non quod vel ad ipsa cuncta respondeam, magnis enim opus voluminibus esset. Illa loquor quæ tacere non possum. Mysteriorum nostræ redemptionis (sicut in libro quodam sententiarum ipsius, & item in quadam eius expositione Epistolæ ad

Romanos legi) temerarius scrutator maiestatis aggrediens in ipso statim suæ disputationis exordio Ecclesiasticorū doctorum vnā omnium de hac re dicit esse sententiam, & ipsam ponit ac spernit, & gloriatur se habere meliorem: non veritus, contra præceptum sapientis, transgredi terminos antiquos quos posuerunt Patres nostri. Sciendum est, ait, quod omnes Doctores nostri post Apostolos in hoc conueniunt, quod diabolus dominium & potestatem habebat super hominem, & iure eum possidebat, ideo scilicet quod homo ex libertate arbitrij quam habebat, sponte diabolo consensit. Aiunt namque quod si quis aliquem vicerit, victus iure victoris seruus constituitur. Ideo, inquit, sicut dicunt doctores, hac necessitate incarnatus est Filius Dei, vt homo qui aliter liberari non poterat, per mortem innocentis iure liberaretur à iugo diaboli. Sed vt nobis videtur, ait, nec diabolus vnquam ius aliquod in homine habuit, nisi forte Deo permittente, vt carcerarius: nec Filius Dei vt hominem liberaret, carnem assumpsit. Quid in his verbis intolerabilius iudicem, blasphemiam, an arrogantiam? Quid damnabilius, temeritatem, an impietatem? An non iustius os loquens talia fustibus tunderetur, quam rationibus refelleretur? Nonne omnium merito in se prouocat manus, cuius manus cōtra omnes? Omnes inquit, sic: sed non ego sic. Quid ergo tu? Quid melius affers? Quid subtilius inuenis? Quid secretius tibi reuelatum iactas, quod præterierit sanctos, effugerit sapiētes? Aquas furtiuas & panes absconditos puto apponet nobis iste. Dic tamen, dic quicquid illud est quod tibi videtur & nulli alteri. An quod Filius Dei non vt hominem liberaret, hominem induit? Hoc plane nemini te excepto videtur: tu videris vbi videris. Non enim hoc à sapiente, non à propheta, non ab Apostolo, non denique ab ipso Domino accepisti. Magister gentium accepit à Domino, quod & tradidit nobis. Magister omnium suam doctrinam fatetur non esse suam, non enim, ait, à me ipso loquor, tu vero de tuo nobis tradis; & quod à nemine accepisti. Qui loquitur mendaciū, de suo loquitur. Tibi proinde sint, quæ tua sunt. Ego prophetas & Apostolos audio, obedio Euangelio, sed non Euangelio secundum Petrum. Tu nobis nouum condis Euangelium? Quintum Ecclesia Euangelistam non recipit. Quid lex, quid Prophetæ, quid Apo-

Ioan. 8.

Eph. 3. d

Psal. 106. d.

Leb. 40. c

stoli, quid Apostolici viri nobis aliud euangelizant, quàm quod solus tu negas, Deum videlicet factum hominem vt hominem liberaret? Et si angelus de cœlo aliud nobis euangelizauerit, anathema sit. Sed qui venerunt post Apostolos doctores non recipis, homo qui super omnes docentes te intellexisti. Denique non erubescis dicere quod aduersum te omnes sentiant, cum ab inuicem non dissentiant. Frustra proinde illorum tibi fidem doctrinamque proponerē, quos iam proscripsisti. Ad Prophetas te ducam. Loquitur sub typo Hierusalem, ad populum acquisitionis, non Propheta, sed in Propheta Dominus dicens: *Saluabo te, & liberabo te, noli timere.* Quæris à qua potestate, Non enim vis vt diabolus in hominem habeat vel habuerit potestatem. Fateor nec ego. Nō tamen idcirco non habet, quia ego & tu hoc nolimus. Si non confiteris tu nec cognoscis: cognoscunt & dicunt qui redēpti sunt à Domino, quos redemit de manu inimici. Quod minimè negares & tu, si non esses sub manu inimici. Non potes gratias agere cum redemptis, qui redemptus non es. Nam si redemptus esses, redemptorem agnosceres, & non negares redemptionē. Nec quærit redimi, qui se nescit captiuum. Qui autem scierunt, clamauerunt ad Dominum, & Dominus exaudiuit eos, & redemit eos de manu inimici. Et vt intelligas hunc inimicum qui sit, Quos redemit, ait, de manu inimici: de regionibus congregauit eos. Sed primum quidem agnosce hunc congregatorem, de quo Caiphas prophetat in Euangelio, quia Iesus moreretur pro gente. Et qui narrat, sequitur dicens: Non tantum pro gente, sed vt filios Dei qui erant dispersi congregaret in vnum. Quo erant dispersi? In omnes regiones. Ergo quos redemit, de regionibus congregauit eos. Non congregaret, nisi redimeret. Erant enim non solum dispersi, sed & captiui. Redemit & congregauit, redemit autem de manu inimici. Non dicit inimicorum, sed inimici. Inimicus vnus, regiones multæ. Si quidem non de regione, sed de regionibus congregauit eos à solis ortu & occasu, ab Aquilone & mari. Quis iste vnus tam potens Dominus, qui non vni præfuit regioni, sed omnibus? Non alius, vt arbirror, quā ille qui ab alio Propheta dicitur absorbere fluuiū, id est, genus humanū, & non mirari: habere autem fiduciā quod & Iordanis, hoc est, electio ipsa in-

fluat in os eius. Beati qui sic influunt vt effluant, qui sic intrant vt exeant. Sed quid? nondum forte credis prophetis sic sibi concinentibus de diaboli potestate in hominem. Veni mecum & ad Apostolos. Dixisti nempe te non sentire cum illis qui post Apostolos venerunt: assentias vel Apostolis: si forte & tibi contingat quod vnus eorum loquitur de quibusdam: *Nequando inquit, det illis Deus pœnitentiam ad cognoscendam veritatem, vt resipiscant à diaboli laqueis, à quo captiui tenentur ad ipsius voluntatem.* Paulus est iste, qui homines à diabolo captiuos teneri asserit ad eius voluntatem. Audis ad eius voluntatem, & negas potestatem? Si & Paulo non credis, veni iam ad ipsum Dominum si forte audias & quiescas. Nempe ab ipso appellatur princeps huius mundi, & fortis armatus, possessorque vasorum: & dicis eum non habere potestatem in homines: Nisi tu aliud putas hoc loco intelligi atrium quam mundum, vasa quam homines. Quod si atrium diaboli mundus erat, & homines vasa eius: quomodo non dominabatur in hominibus? Ait item Dominus capientibus se. *Hæc est hora vestra, & potestas tenebrarum.* Potestas ista non latuit illum qui dicebat: *Qui eruit nos de potestate tenebrarum, & transtulit in regnum filij claritatis sue.* Hanc ergo Dominus nec in se quidem negauit diaboli potestatem, sicut nec Pilati, qui membrum erat diaboli. Ait siquidem: *Non haberes potestatem in me vllam, nisi data fuisset desuper.* Quod si in viride lignum intantum grassata est ista desuper data potestas, aridum quomodo non fuit ausa contingere? Nec iniustam puto ipse causabitur potestatem, datam desuper. Discat ergo diabolus non solum potestatem, sed & iustam habuisse in homines, vt consequenter & hoc videat, venisse vtique in carne Dei filium propter liberandos homines. Cæterum etsi iustam dicimus diaboli potestatem, non tamen & voluntatem. Vnde non diabolus qui inuasit, non homo qui meruit, sed iustus Dominus qui exposuit. Non enim à potestate, sed à voluntate iustus iniustusve quis dicitur. Hoc ergo diaboli quoddam in hominem ius, etsi non iure acquisitum, sed nequiter vsurpatum, iuste tamē permissum. Sic itaque homo iuste captiuus tenebatur: vt tamen nec in homine nec in diabolo illa esset iustitia, sed in Deo. Iuste igitur homo addictus, sed misericorditer liberatus. Sic tamen misericorditer, vt non defuerit iustitia

2. Tim. 2. d

Ioan. 14. d

Luc. 22. f
Coloss. 1. b

Ioan. 19. b

quædam & in ipsa liberatione, quoniam hoc quoque fuit de misericordia liberantis, ut (quod congruebat remedijs liberandi) iustitia magis contra inuasorem quam potentia vteretur. Quid namque ex se agere poterat ut semel amissam iustitiam recuperaret homo seruus peccati, vinctus diaboli? Assignata est ei proinde aliena, qui caruit sua, & ipsa sic est. Venit princeps huius mundi, & in Salvatore non inuenit quicquam, & cum nihilominus innocenti manus iniecit, iustissima quos tenebat amisit: quando is qui morti nil debeat, accepta mortis iniuria, iure illum qui obnoxius erat, & mortis debito, & diaboli seruit dominio: qua enim iustitia id secundo homo exigeretur? Homo siquidem qui debuit, homo qui soluit. Nam si vnus, inquit, pro omnibus mortuus est, ergo omnes mortui sunt: ut videlicet satisfactio vnus omnibus imputeretur, sicut omnium peccata vnus ille portauit: nec alter iam inueniatur qui forefecit, alter qui satisfecit: quia caput & corpus vnus est Christus. Satisfecit ergo caput pro membris, Christus pro visceribus suis, quando iuxta Evangelium Pauli, quo conuincitur mendacium Petri, mortuus pro nobis cõuiuificauit nos sibi, donans nobis omnia delicta, delens quod aduersum nos erat chirographum decreti, quod erat contrarium nobis, & ipsum tulit de medio, affigens illud cruci, expolians principatus & potestates. Vtinam ego inueniar in his spolijs quibus spoliatae sunt contrariae potestates, traductus & ipse in possessionem Domini! Si me insecutus Laban arguerit quod recesserim clam ab eo, audiet me accessisse ad eum, & ob hoc clam recessisse. Subiecit me illa causa secretior peccati, subduxit me illi ratio occultioris iustitiæ: aut si gratis venundatus sum, gratis non redimat? Si Assur sine causa calumniatus est mihi, sine causa causam exigit euasionis. Quod si dixerit, Pater tuus addixit te: respondebo, sed frater meus redemit me. Cur non aliunde iustitia, cum aliunde reatus? alius qui peccatorem constituit, alius qui iustificat à peccato: aliter in semine, alter in sanguine. An peccatum in semine peccatoris, & non iustitia in Christi sanguine? Sed iustitia, inquit, sit cuius est, quid ad te? Esto. Sed sit etiam culpa cuius est: quid ad me? An iustitia iusti super eum erit, & impietas impij non erit super eum? Non conue-

nit

Coloss. 2. c

Genes. 31. c

nit filium portare iniquitatem patris, & fraternæ fieri exortō iustitiæ. Nunc vero per hominem mors, & per hominem vita. Sicut enim in Adam omnes moriuntur, ita & in Christo omnes viuificabuntur: quoniam non sic illi attineo, vt non & isti. Si illi per carnem, & per fidem huic. Et si infectus ex illo originali concupiscentia, etiam & in Christi gratia spiritali perfusus sum. Quid mihi plus imputatur de præuaricatore? Si generatio, regenerationem oppono: nisi quod spiritalis est ista, illa carnalis? Nec patitur ratio æquitatis vt ex æquo contendant, sed vincat necesse est spiritus carnem, & sit efficacior causa, cuius est potior & natura: quo plus videlicet profit generatio secunda, quàm prima nocuerit. Sane peruenit delictum ad me, sed peruenit & gratia: & non sicut delictum, ita & donum. Nam iudicium ex vno in condemnationem, gratia autem ex multis delictis in iustificationem. A primo homine manauit delictum, à summo cœlo egressio gratiæ: vtrumque à parente, illud à primo, ista à summo. Terrena natiuitas perdit me, & non multo magis generatio cœlestis conseruat me? Nec vereor sic erutus de potestate tenebrarum repelli à patre luminum iustificatus gratis in sanguine filij eius: nempe ipse qui iustificat, quis est qui condemnet? Non condemnabit iustum, qui misertus est peccatori: iustum me dixerim, sed illius iustitia. *Quænam ipsa? Finis legis Christi, ad iustitiam omni credenti.* Denique qui factus est nobis, inquit, iustitia à Deo Patre. Quæ ergo mihi iustitia facta est, mea non est? Si mea traducta culpa, cur non & mea indulta iustitia: & sane mihi tutior donata quàm innata. Nam ista quidem gloriam habet, sed non apud Deum. Illa autem cum sit salutis efficax materiam non habet gloriandi nisi in Domino. Nam & si iustus fuero, inquit, non leuabo caput, ne videlicet responsum accipiat. *Quid habes quod non accepisti? Si autem accepisti, quid gloriaris quasi non acceperis?* Hæc est iustitia hominis in sanguine Redemptoris, quam homo perditionis exufflans & subsannans, in tantum euacuare conatur, vt totum quod Dominus gloriæ semetipsum exinanivit, quod minoratus est ab Angelis, quod natus de femina, quod conuersatus in mundo, quod expertus infirma, quod passus indigna, quod demum per mortem crucis in sua reuersus, ad id solum putet & disputet redigendum, vt traderet homini-

Rom. 10. 4

Iob. 10. 6

1. Cor. 4. 5

bus formam vitæ viuendo & docendo, patiando autem & moriendo charitatis metam præfigeret. Ergo docuit iustitiam & non dedit: ostendit charitatem, sed non infudit, & sic redijt in sua? Itane hoc totum est magnum illud pietatis sacramentum, quod manifestatum est in carne, iustificatum est in spiritu, apparuit Angelis, prædicatum est gentibus, creditum est mundo, assumptum est in gloria? Incomparabilis doctor, qui etiam profunda Dei sibi aperiens, & ea quibus vult lucida & peruia faciens, altissimum sacramentum, & mysterium absconditum à seculis, sic nobis suo mendacio planum & apertum reddit, vt transire leuiter possit per illud quiuis etiam incircuncisus & immundus, quasi Dei sapientia cauere nescierit aut neglexerit quod ipsa prohibuit, sed dederit & ipsa sanctum canibus, & margaritas porcis. Sed non est ita. Nam etsi manifestatum est in carne, sed tamen iustificatum est in spiritu, vt & spiritualibus spiritualia conferantur, & animalis homo non percipiat quæ sunt spiritus Dei, nec fides nostra sit in sapientia verbi, sed in virtute Dei. Vnde

Math. 11. d saluator ait: *Confitebor tibi pater Domine cæli & terra, quia abscondisti hæc à sapientibus & prudentibus, & reuelasti ea paruulis.* Et

2. Cor. 4. a Apostolus: *Et si, inquit, opertum est Euangelium meum, in his est opertum qui pereunt.* Denique aduertite hominem irridentem, quæ sunt spiritus Dei, quoniam stultitia illi videntur, & insultantem Apostolo loquenti Dei sapientiam in mysterio absconditam, inuchentem in Euangelium, Dominum blasphemantem. Quam prudentius quod non valet comprehendere, credere dignaretur, nec auderet contemnere aut conculcare sacrum reuerendumque mysterium? Longum est ad omnes eius ineptias & calumnias quas diuino struit consilio, respondere. Pauca tamen infero, è quibus cætera æstimentur. Cum solos, inquit, electos liberauerit Christus, quomodo eos diabolus possidebat, siue in hoc seculo, siue in futuro, magis quàm modo? Respondemus. Imo quia diabolus electos Dei possidebat, à quo (sicut dicit Apostolus) captiui tenebantur ad ipsius voluntatem, vt Dei propositum de ipsis impleretur, opus fuit liberarore. Oportuit autem liberari in hoc seculo, vt liberos haberet in futuro. Deinde infert: Nunquid etiam pauperem illum, qui in sinu Abrahamæ quiescebat, sicut & diuitem damnatum diabolus cruciabat, aut etiam in

ipsum Abraham dominum habebat, ceterosque electos? Nō, sed habuisset, si non liberati fuissent fide futuri, sicut de ipso Abraham scriptum est. *Credidit Abraham Deo, & reputatum est ei ad iustitiam.* Item. *Abraham exultauit ut videret diem meum, & vidit, & gauisus est.* Propterea iam tunc sanguis Christi rorabat etiam Lazaro, ne flammās sentiret, quod & ipse credidisset in eum qui erat passurus. Sic de omnibus electis illius temporis sentiendum, natos quidem & ipsos æquē vt nos sub potestate tenebrarum, propter originale peccatum, sed erutos antequam morerentur, & non nisi in sanguine Christi. Scriptum est enim: *Turbæ autem quæ præcedebant, & quæ sequebantur, clamabant dicentes. Osanna filiū David, benedictus qui venit in nomine Domini.* Ergo Christo in carne venienti, & antequam veniret, & post benedictum est à turbis benedictorum, quamuis præeuntes plenam minimè tunc consecuti sint benedictionē, seruata nimirum hac prærogatiua temporis gratiæ. Deinde laborans docere & persuadere, diabolum nullum sibi ius in hominem vindicare potuisse aut debuisse, nisi permissu Dei, & quod sine iniuria diaboli iure Deus profugū suum, si veller misereri, repetere, & solo verbo eripere posset, quasi hoc quis diffiteatur, post multa aliquando infert: Quæ itaque necessitas, aut quæ ratio, aut quod opus fuit, cum sola iussione sua diuina miseratio liberare hominem à peccato posset, propter redemptionem nostram Filium Dei carne suscepta, tot & tantas in edias, opprobria, flagella, sputa, denique ipsam crucis ignominiosam & asperissimam mortem sustinere, vt cum iniquis patibulum sustineret? Respondemus: Necessitas nostra fuit, & necessitas dura sedentium in tenebris & vmbra mortis. Opus æquē nostrum, & Dei ipsius, & sanctorum Angelorum. Nostrum vt auferret iugum captiuitatis nostræ: Suum, vt impleretur propositum voluntatis eius. Angelorum, vt numerus impleretur eorum. Porro ratio huius facti fuit dignatio facientis. Quis negat omnipotenti ad manum fuisse alios & alios modos nostræ redemptionis, iustificationis, liberationis? Verum hoc non præiudicet huius quem è multis elegit efficaciam. Et fortasse is præstat, per quem in terra obliuionis, grauedinis, lapsus nostri, tot & tantis grauaminibus reparatoris fortius & viuacius admoneremur. Alias autem nemo hominum nouit, nec noscere ad plenum

potest quid boni ad gratiam, quid congruentiæ ad sapientiã, quid decoris ad gloriam, quid commodi ad salutem, penes seipsam contineat huius venerandi mysterij inscrutabilis altitudo, quam Propheta considerans expauit, non penetrauit, & præcursor Domini indignum se iudicauit qui penetraret. Caterum si non licet perscrutari diuinæ sacramentum voluntatis, licet tamen sentire effectum operis, fructum utilitatis percipere. Et quod licet scire non licet tacere, quia gloria regum celare verbum, & gloria Dei inuestigare sermonem. Fidelis sermo, & omni acceptione dignus, quoniam cum adhuc peccatores essemus, reconciliati sumus Deo per mortem Filij eius. Vbi reconciliatio, & remissio peccatorum.

Esa. 59. a

Nam si, dicente scriptura, peccata nostra separant inter nos & Deum manente peccato, non est reconciliatio. In quo ergo remissio peccatorum? Hic calix, inquit, noui testamenti in meo sanguine, qui pro vobis effundetur in remissionem peccatorum. Itaque vbi reconciliatio, ibi remissio peccatorum. Et quid ipsa, nisi iustificatio? Siue igitur reconciliatio, siue remissio peccatorum, siue iustificatio sit, siue etiam redemptio vel liberatio de vinculis diaboli, à quo captiui tenebamus ad ipsius voluntatem: intercedente morte vnigeniti obtinemus iustificati gratis in sanguine ipsius, in quo (sicut idem dicit) habemus redemptionem per sanguinem eius, remissionem peccatorum, secundum diuitias gratiæ eius. Cur, inquis, per sanguinem, quod potuit facere per sermonem? Ipsum interroga. Mihi scire licet quod ita: cur ita, non licet. Nunquid dicit figmētum ei qui se finxit, quid me finxisti sic? Sed hæc iustitia ei videntur, non potest tenere risum. Audite cachinnos. Quomodo, ait, iustificari nos vel reconciliari Deo per mortem Filij eius dicit Apostolus, qui tanto amplius aduersus hominem irasci debuit, quāto amplius homines in crucifigendo filium suum deliquerunt, quā in transgrediendo primum eius præceptum vnus pomi gustu? Quasi non poterit Deo in vno eodemque facto & displicere iniquitas malignantium, & placere pietas patientis. Et ait: Quod si tantum fuerat illud Adæ peccatum, vt expiari non posset nisi morte Christi, quam expiationem habebit ipsum homicidiū quod in Christum commissum est? Breuiter respondemus, ipsum sanguinem quem fuderunt, & interpellationem ipsius

Osee 4. a

quem occiderunt. Addit etiam : Nunquid mors innocentis filij intantum Deo patri placuit, vt per ipsam reconciliaretur nobis, qui hoc peccando commisimus, propter quod innocēs Dominus est occisus, nec nisi hoc maximum fieret peccatū, illum multo leuius potuit ignoscere? Non mors, sed voluntas placuit sponte morientis, & illa morte expungentis mortem, operantis salutem, restituentis innocentiam, triumphantis principatus & potestates, spoliantis inferos, ditandis superiores, pacificantis quæ in cœlo sunt, & quæ in terra omnia instaurantis. Et quoniam hæc tam pretiosa mors voluntariè suscipienda aduersum peccatum, non tamen poterat fieri nisi per peccatum: non delectatus quidem, sed tamen bene vsus malitia sceleratorum, & mortem de morte, & de peccato dānavit peccatum. Et quanto illorum maior iniquitas, tanto huius voluntas sanctior, & eo potentior ad saluandum, quatenus tanta mediante potentia antiquum illud quamuis grāde peccatum, necessario tamen hic quod in Christum commissum est cederet, tanquam minus maiori. Nec peccato siue peccantibus adscribitur hæc victoria, sed bene vtenti peccato, & peccantes fortiter perferenti, & conuertenti in vsum pietatis quicquid in ipsum ausa est crudelitas impiorum. Fuit vero sanguis qui effusus est, tam multus ad ignoscendum, vt ipsum quoque peccatum maximum quo factum est vt effunderetur, deleret, ac per hoc de antiqui illius vt pote leuioris deletionem nullam omnino dubietatem relinqueret. Deinde iste: Cui vero, inquit, non crudele & iniquum videtur, vt sanguinem innocentis in precium aliquod quis requisierit, aut villo modo ei placuerit innocentem interfici, nedum Deus tam acceptam filij mortem habuerit, vt per ipsam vniuerso reconciliatus sit mundo? Non requisivit Deus Pater sanguinem Filij, sed tamen acceptauit oblatum, non sanguinem ficti, sed salutem, quia salus erat in sanguine. Salus planè, & non sicut iste sapit & scribit, sola charitatis ostensio. Sic enim concludit tot calumnias & inuectiones suas, quas in Deum tam impiè quàm imperitè euomuit, vt dicat totum esse quod Deus in carne apparuit, nostram de verbo & exemplo ipsius institutionem, siue vt postmodum dicit instructionem, totum quod passus & mortuus est, suæ erga nos charitatis ostensionem vel commendationem. Cæterum quid

Rom. 5. c

prodest quod non instituit, si nō restituit? Aut nūquid frustra instruimur, si non prius destruat in nobis corpus peccati, vt ultra non seruiamus peccato? Si omne quod profuit Christus, in sola fuit ostensione virtutum, restat vt dicatur quod Adam quoque ex sola peccati ostensione nouerit: siquidem pro qualitate vulneris allata est medicina. Sicut enim in Adā omnes moriuntur, ita & in Christo omnes viuificabuntur. Ergo sicut hoc, ita & illud: Si vita quam dat Christus, non est alia quā institutio eius: nec mors vtique quam dedit Adā, alia erit similiter quā institutio eius: vt ille quidem ad peccatum exemplo suo, hic vero exemplo & verbo ad bene viuendum, & se diligendum homines informaret. Aut si Christianæ fidei, & non hæresi Pelagianæ acquiescentes, generatione non institutione traductum in nos confitemur Adæ peccatum, & per peccatum mortem: fateamur necesse est & à Christo nobis non institutione, sed generatione restitutam iustitiam, & per iustitiam vitam: vt sicut per vnus delictum in omnes homines in condemnationem, sic & per vnus iustitiam in omnes homines in iustificationē vitæ. Et si ita est, quomodo is dicit consilium & causam incarnationis fuisse, vt mundum luce suæ sapientiæ illuminaret, & amorem suum accenderet? Vbi ergo redemptio? A Christo nempe, vt fateri dignatur, illuminatio & prouocatio ad amorem. Redemptio & liberatio à quo? Esto quod Christi aduentus illis profuit qui se illi possunt conformare per vitam, & vicem ei dilectionis rependere: quid de paruulis? Quam dabit lucem sapientiæ vix adhuc captantibus lucem vitæ? Vnde ascendens ad Dei amorem, qui nedum matres suas amare nouerunt; Nihil proderit eis aduentus Christi? nihil quod complantati sunt similitudini mortis eius per Baptismum, quoniam nondum possunt prohibente ætate Christum sapere aut amare? Redemptio itaque, ait, nostra est illa summa in nobis per Christi passionem dilectio. Ergo paruuli non habent redemptionem, quia non habent summam illam dilectionem. An sicut non habent vnde diligant, ita nec vnde pereant, vt non sit eis in Christo necessaria regeneratio, vt pote quibus generatio ex Adam nihil nocuerit? Si hoc sapit, cum Pelagio desipit. Quicquid horum sentiat, patet quantum humanæ sacramento salutis inuideat, quantum quod in ipso est, euacuet

alti dispensationem mysterij, qui totum de salute tribuit deuotioni, generationi nihil: qui nostræ gloriæ redemptionis, & summam salutis non in virtute crucis, & non in precio sanguinis, sed in nostræ constituit conuersationis profectibus. *Mihi autem absit gloriari, nisi in cruce Domini nostri Iesu Christi, in qua est salus, vita, & resurrectio nostra.* Et quidem tria quædam præcipua in hoc opere nostræ salutis intueor: formam humilitatis, in qua Deus semetipsum exinanivit: charitatis mensuram, quam vsque ad mortem, & mortem crucis extendit: redemptionis sacramentum, quo ipsam mortem quam pertulit, sustulit. Horum duorum priora sine vltimo sic sunt, ac si super inane pingas. Magnum profecto & valde necessarium humilitatis, magnum & omni acceptione dignum charitatis exemplum: sed non habent fundamentum, ac proinde nec statum, si desit redemptio. Volo totis visceribus humilem sequi Iesum, cupio eum qui dilexit me, & tradidit semetipsum pro me, quibusdam brachijs vicariæ dilectionis amplecti, sed oportet me & Agnum manducare Paschalem. Nisi enim manducauero carnem eius, & bibero eius sanguinem, non habebo vitam in memetipso. Aliud est sequi Iesum, aliud tenere, aliud & manducare. Sequi, salubre consilium: tenere & amplecti, solemne gaudium: manducare, vita beata. Caro enim *Ioan. 6. f.* eius verè est cibus, & sanguis eius verè est potus. Panis est Dei qui de cælo descendit, & dat vitam mundo. Qui status gaudio siue consilio absque vita? Nempe haud alius quam picturæ absque solido: ergo nec humilitatis exempla, nec charitatis insignia præter redemptionis sacramentum sunt aliquid. Hæc Domine Pater, de labore manuum pueri vestri qualiacumque tenetis aduersus pauca quidem nouæ hæreseos capitula: vbi si non aliud quàm zelum agnoscitis meum, tamen propriæ interim conscientiæ satisfeci. Nam cum non esset quod agerem pro iniuria fidei quam dolebam, operæ mihi precium arbitror, si illum monui cuius arma potentia Dei ad destructionem contrariarum adsertionum, ad destruendam omnem altitudinem extollentem se aduersus scientiam Dei, & in captiuitatem redigendum omnem intellectum in obsequium Christi. Sunt & alia in alijs eius scriptis non pauca nec minus mala capitula, ad quæ nec tem-

poris nec epistolæ angustia respondere permittit. Quanquā nec necessarium putem, cum sint adeo manifesta, ut ipsa etiam vulgata fide facile refellantur. Collegi tamen aliqua, & transmissi.

EPISTOLA XII.

AD EVNDEM EX PERSONA DOMINI
RHEMENSIS,

REVERENDISSIMO DOMINO, ET CLARIS-
simo Patri, Dei gratia, summo Pontifici Innocentio, Samson
Rhemorum Archiepiscopus, Ioslenus Sueßionensis,
Gaufridus Cathalanensis, Alaisus Atre-
batenfis, voluntarium debite
subiectionis obsequium.



V R I B V S occupatis ad plurima, sermonem faci-
mus abbreviatum de prolixo negotio, pro eo maxi-
mè quia id ipsum diffusius ac plenius continetur in
litteris Domini Senonensis. Petrus Abaelardus
Christianæ fidei meritum euacuare nititur, dum totū quod
totum Deus est, humana ratione arbitratur se posse compre-
hendere; ascendit vsque ad cœlos, & descendit vsque ad a-
byssos. Nihil est quod lateat eum siue in profundum inferni,
siue in excelsum supra. Homo est magnus in oculis suis, de fi-
de contra fidem disputans, ambulans in magnis, & in mirabi-
libus super se, scrutator maiestatis, hæresium fabricator. Iā-
dudum fecerat librum de sua Trinitate, sed sub legato Ro-
manæ Ecclesiæ igne examinatus est, quia inuēta est in eo ini-
quitas. Maledictus qui rexdificabit ruinas Hiericho. Surre-
xit à mortuis liber ille, & cū eo multorū hæreses qui dormie-
rant surrexerunt, & apparuerunt multis. Iamā extendit pal-
mites suos vsque ad mare, & vsque ad Romā propagines eius.
Hæc gloriatio hominis illius, quod liber suus in curia Roma-
na habet vbi caput suum reclinat. Hinc confirmatus & con-
fortatus est furor eius. Propterea cum in conspectu Episco-
porum

porum super his argueret cum Abbas Claræuallis zelo fidei iustitie armatus, nec confessus est, nec negauit: sed à loco & iudice quem uol ipse cingat, sine laqueo, sine grauamine, ut suam prolongaret iniquitatem, sedem Apostolicam appellauit. Episcopi autem qui propter hoc in vnum conuenerant, vestræ reuerentiæ deferentes, nihil in personam eius egerunt, sed tantummodo capitula librorum eius à sanctis patribus condemnata, ne morbus serperet, medicinali necessitate abiudicauerunt. Quia ergo homo ille multitudinē trahit post se, & populum qui sibi credat habet, necesse est ut huic contagio celeri remedio occurratis.

— *sero, enim, medicina paratur,
Cum mala per longas inualuere moras.*

Processimus in hoc negotio quousque ausi sumus, tuum est de cætero, beatissime Pater, providere ne in diebus tuis aliqua hæreticæ prauitatis macula decor Ecclesiæ maculetur. Tibi commissa est sponsa Christi amici sponsi; tuum est tandem in viro virginem castam exhibere Christo.

EPISTOLA XIII.

QVÆ EST BERNARDI CLAREVAL. AB.

Ad magistrum Guidonem de Castello, qui Petri discipulus fuerat, & de quo potissimum præsumebat, qui postea fuit Papa Cælestinus.

VENERABILI DOMINO ET CHARISSIMO

Patri, magistro Guidoni sanctæ Romanæ Ecclesiæ Dei gratia

Presbytero Cardinali, B. Claræuallis vocatus

Abbas, non declinare ad dexteram,

nec ad sinistram.

IN IURIAM facio vobis si aliquem à vobis ita diligere credam, ut cum eo pariter eius errores diligatis. Quisquis enim sic aliquem diligit, nondū nouit quē admodum oporteat cum diligere. Talis nāq; dilectio terrena est, animalis, diabolica, nocens æquē diligenti atq; dilecto.

Existimēt alij de alijs prout volunt, ego adhuc de vobis æstimare non possum nisi quod vicinum est rationi, & conscientie æquitatis. Quidam prius iudicant, & postea probant: ego de potione vtrum dulcis sit an amara ante gustū non iudicabo. Magister Petrus in libris suis profanas vocum nouitates inducit & sensuum, disputans de fide contra fidem, verbis legis legem impugnat. Nihil videt per speculum & in ænigmate, sed facie ad faciem omnia intuetur, ambulans in magnis & in mirabilibus super se. Melius illi erat si (iuxta titulū libri sui) seipsum cognosceret, nec egrederetur mensurā suam, sed saperet ad sobrietatem. Ego non cum accuso apud patrem, est qui eum accuset, liber suus, in quo sibi male complacuit. Cum de Trinitate loquitur, sapit Arrium: cū de gratia, sapit Pelagium: cū de persona Christi, sapit Nestorium. Minus de vestra æquitate præsumo si diu vos rogauero vt in causa Christi nullum Christo præponatis. Illud autem scitote quia expedit vobis quibus potestas data est à Domino, expedit ecclesiæ Christi, expedit illi etiam homini, vt ei silentium imponatur, cuius maledictione os plenum est, & amaritudine & dolo.

EPISTOLA XIV.

QVÆ EST ITERVM BERNARDI,

Ad magistrum Yuonem Cardinalem, de eodem Petro,

DILECTISSIMO SVO YVONI, SANCTÆ ROMANÆ Ecclesiæ. Dei gratia, presbytero Cardinali, B. Claravallis Abbas, diligere iustitiam, & odire iniquitatem.



Galat. 6. b

MAGISTER Petrus Abaelardus sine regula Monachus, sine solitudine prælatus, nec ordinem tenet, nec tenetur ab ordine. Homo sibi dissimilis est: intus Herodes, foris Ioānes: totus ambiguus, nihil habens de Monacho præter nomen & habitum. Sed quid ad me? Vnusquisque onus suum portabit. Aliud est, quod dissimulare non possum, quod pertinet ad omnes qui diligunt nomen Christi. Iniquitatem in excelso loquitur, integritatem

tem fidei, castitatēque Ecclesiæ corrumpit. Transgreditur terminos quos posuerunt patres nostri, de fide, de sacramentis, de sancta Trinitate disputans & scribens: singula pro sua voluntate mutat, auget & minuit. In libris & in operibus suis ostendit se fabricatorem mendacij, & cultorem peruersorum dogmatum, hæreticum se probans non tam in errore quàm in pertinacia & defensione erroris. Homo est egrediens mensuram suam, in sapientia verbi euacuans virtutem Christi. Nihil nescit omnium quæ in cælo & quæ in terra sunt, præter seipsum. Damnatus est Sueffione cum opere suo coram legato Romanæ Ecclesiæ. Sed quasi non sufficeret ei illa damnatio, iterum facit vnde iterum damnetur, & iam nouissimus error peior est priore. Securus est tamen, quoniam Cardinales & clericos curiæ se discipulos habuisse gloriatur, & eos in defensione præteriti & præsentis erroris adsumit, à quibus iudicari timere debuit, & damnari. Si quis spiritum Dei habet, illius versiculi recordetur: *Nōne qui oderunt te Domine oderam, & super inimicos tuos tabescebam?* Liberet Deus per vos & per cæteros filios suos Ecclesiam suam à labijs iniquis, & à lingua dolosa. Psal. 138.

EPISTOLA XV.

QVÆ EST RESCRIPTVM DOMINI
Innocentij Papæ, contra hæreses Petri Abaelardi.

INNOCENTIVS EPISCOPVS, SERVVS SERV-
orum Dei, venerabilibus fratribus, Henrico Senonensi, Sam-
psoni Rhemensi Archiepiscopis, eorūque suffraganeis,
& charissimo in Christo filio Bernardo Clara.
Abbati, salutem & Apostolicam
benedictionem,



ESTANTE Apostolo, sicut vnus Dominus, ita vna fi- Ephes. 4. 6
des esse dignoscitur, in qua tanquā in immobili fun-
damēto præter quod nemo potest aliud ponere, fir-
mitas Catholicæ Ecclesiæ inuiolata cōsistit. Inde est
quòd beatus Petrus Apostolorū princeps pro eximia huius fi-
dei cōfessione, à Domino ac Salvatore nostro audire meruit:

Matth. 16. c.

Tu es, inquit, Petrus, & super hanc petram ædificabo Ecclesiam meam, petram utique firmitatem fidei, & catholicæ unitatis soliditatem manifestè designans. Hæc siquidem est incōfutilis tunica redemptoris nostri, super quam milites sortiti sunt, sed eam diuidere minimè potuerunt. Contra quam in initio fremuerunt gentes, & populi meditati sunt inania. Astiterunt reges terræ, & principes conuenerunt in vnum. Verum Apostoli duces dominici gregis, & eorum successores Apostolici viri, ardore charitatis & zelo rectitudinis succēsi, fidem defendere, & eam in cordibus aliorum proprii sanguinis effusione plantare non dubitarunt. Demum cessante persecutorū rabie, imperauit Dominus ventis, & facta est in Ecclesia tranquillitas magna. Sed quia hostis humani generis semper circuit quærens quem deuoret: ad impugnandam sinceritatem fidei, fraudulentam hereticorum fallaciam subinduxit. Contra quos viri Ecclesiarum pastores viriliter insurgentes, eorum praua dogmata cum ipsorum auctoribus condemnarunt. In magna namque Nicena synodo Arrius hæreticus est damnatus. Constantinopolitana synodus Manichæum hereticū debita sententia condemnauit. In Ephesina synodo Nestorius condignam sui erroris damnationem excepit. Chalcedonensis quoque synodus Nestorianam hæresim, & Eutychianam cum Dioscoro & eius complicibus iustissima sententia confutauit. Marcianus præterea licet laicus, Christianissimus tamen imperator, Catholicæ fidei amore succensus, prædecessori nostro sanctissimo Papæ Ioanni scribens, aduersus eos qui sacra mysteria profanare contendunt, inter cætera sic loquitur, dicens: Nemo clericus, vel militaris, vel alterius conditionis, de fide Christiana publicè tractare conetur in posterum. Nam iniuriam facit iudicio reuerendissimæ synodi, si quis semel iudicata & rectè disposita reuoluere, & iterum disputare contendit, & in contemptores huius legis tanquam in sacrilegos pœna non decrit. Igitur si clericus erit qui publicè tractare de religione ausus fuerit, à cōsortio clericorū remouebitur. Dolemus autem, quoniam sicut literarum vestrarum inspectione, & missis à vestra fraternitate nobis errorum capitulis cognouimus, in nouissimis diebus, quando instant tempora periculosa: in Petri Abaelardi perniciofa doctrina & prædictorum hæreses, & alia per-

uerſa dogmata catholicę fidei obuiantia pullulare cęperunt. Verũ in hoc maxime cõſolamur, & omnipotenti Deo gratias agimus: qui in partibus veſtris pro patribus tales filios ſuſcitauit, & tempore apoſtolatus noſtri in Eccleſia ſua tam præclaros voluit eſſe paſtores, qui noui hæretici calumniis ſtudeant obuiare, & immaculatam ſponſam vni viro virginem caſtam exhibere Chriſto. Nos itaque qui in beati Petri cathedra (cui à Domino eſt dictum: Et tu aliquando conuerſus Luc. 22. 32) licet indigni reſidere conſpicimur: communicato fratrum noſtrorum Epiſcoporum & Cardinalium conſilio, deſtinata nobis à veſtra diſcretione capitula, & vniuerſa ipſius Petri peruerſa dogmata ſanctorum canonum auctoritate cum ſuo auctore damnauiſmus, eique tanquam hæretico perpetuum ſilentium impoſuimus. Vniuerſos quoque erroris ſui ſectatores & deſenſores à fidelium conſortio ſequeſtrandos, excommunicationisque vinculo innodandos eſſe cenſemus. Datum Laterani decimo ſeptimo Kalendas Auguſti.

EPISTOLA XVI.

QVÆ EST EIVSDEM DOMINI INNO-
CENTII PAPÆ,

Ex veteri exemplari Monaſt. Claraual.

INNOCENTIUS EPISCOPUS SERVUS SERVORUM
Dei venerabilibus fratribus Samſoni Rhemenſi, Henrico
Senonenſi Archiepiſcopis, & cariſſimo in Chriſto filio
Bernardo Claraualis Abbati Salutem &
Apoſtolicam benedictionem.

PER præſentia ſcripta fraternitati veſtrę mandamus, quatinus Petrum Abaelardum & Arnaldum de Brixia peruerſi dogmatis fabricatores, & Catholicę fidei impugnatores in religioſis locis, vbi vobis melius viſum fuerit, ſeparatim faciatis includi, & libros erroris eorum, vbi cumque reperti fuerint, igne comburi. Data Laterani xviii. Kal. Aug.

Et adiectum.

Transcripta ista nolite ostendere cuiquam, donec ipsæ literæ in Parisiensi colloquio, quod prope est, presentatæ fuerint ipsis Archiepiscopis.

EPISTOLA XVII.

QVÆ EST BERENGARII SCHOLASTICI
APOLOGETICVS,

Contra beatum Bernardum Claraualensem Abbatem & alios, qui condemnauerunt Petrum Abaelardum.

EX BIBLIOTHECA REGIS CHRISTIANISSIMI,

Ut rideas, Lector, videas: imò videas, ut irrideas quæ ridicula tibi occurrent. Et quemadmodum ipse Berengarius te monet in Epist. seq. si quid in personam hominis Dei (Bernardi scilicet Abbatis Clar.) dixit, ioco legas, non serio.



SCRIPTORVM tuorum exemplaria, Bernarde, celebris circumquaque fama diuulgat. Nec mirum Scripta tua in famæ pulpito collocari, cum constet ea, qualiacumque sint, à maioribus huius temporis approbari. Mirantur homines in te liberalium disciplinarum ignaro, tantam vbertatem facundiæ; quia emissiones tuæ iam cooperuerunt vniuersam superficiem terræ. Quibus est diuinitus respondendū, *Quia magna opera Domini: & Hæc est mutatio dextera Excelsi.* Sed nihil est cur admiratione percelli debeant. Imò magis mirandum esset, te eloquij vrgeri siccitate, quoniam audiuius à primis ferè adolescentiæ rudimentis, cantiunculas mimicas & vrbanos modulos fictitasse. Neque certè in incerto loquimur opinionis, sed testis est alumna cui patria nostri sermonis. Nónne id etiam tuæ memoriæ altius est insignitum, quòd fratres tuos rhythmico certamine, acutæque inuentionis versutia semper exuperare contendebas? Cui grauis & peracerba videbatur iniuria, reperire aliquem qui pari responderet proteruia. Possem aliqua de nu-

gis tuis huic Opusculo ex testium probabilium astipulatione
interpolari. Ceterum cunctis nota tenet, non indigent. Illum
itaque commentandi & nugandi vsum ad diuinum in-
strumentum accersis; & astruunt imperiti grauitè & gran-
diter dictum, quod vbertim & eloquenter effutis. Sed non
sic esse ratio necessaria conuincit. Frequentè enim veritas
absolutè & illepidè profertur, & falsitas plausibilis eloquij
comitate commendatur. Similèsque sunt, vt ait Augustinus,
simplicitas dicendi & eloquentia vasis rusticanis & vrbis:
falsitas verò & veritas, ferculis vilibus & preciosis. Vtraque
autem fercula vtrisque possunt vasis ministrari. Neque hoc
idèd dixerim, vt te notabilem & suspectum reddam; sed vt
veritatem non in omnium facundia esse simpliciter astruam.
Sed super hoc hætenus: ad reliqua potius transeamus. Iam-
dudum sanctitudinis tuæ odorem ales per orbem fama dis-
perlit, præconizauit merita, miracula declamauit. Felicia
iactabamus moderna secula tam corusci syderis venustata
nitore, mundumque iam debitum perditioni tuis meritis sub-
sistere putabamus. Sperabamus in linguæ tuæ arbitrio cœli
sitam clementiam, aeris temperiem, vbertatem terræ, fru-
ctuum benedictionem. Caput tuum nubes tangebant. Et iux-
ta vulgare prouerbum, rami tui umbras montium transcen-
debant. Sic diu vixisti, sic Ecclesiam castis institutionibus in-
formasti; vt ad semicinctia tua rugire dæmones autumare-
mus, & beatulos nos tanto gloriaremur patrono.

N V N C, pro dolor! patuit quod latebat, & colubri sopo-
rati tandem aculeos suscitasti. Omissis omnibus, Petrum
Abaclardum quasi signum ad sagittam posuisti, in quem acer-
bitatis tuæ virus euomeres, quem de terra viuentium tolle-
res, quem inter mortuos collocares. Corrogatis vndecum-
que Episcopis eum in Senonensi Concilio hereticum pro-
nunciasti, ab utero matris Ecclesiæ velut abortum præcidisti.
In via Christi ambulantem, tãquam sicarius de occulto pro-
diens, tunica inconsutili spoliasti. Concionabaris ad populū,
vt orationem funderet ad Deum pro eo: interius autem dis-
ponebas eum proscribendum ab orbe Christiano. Quid vul-
gus faceret? quid vulgus oraret, cum pro quo esset orandum
nesciret? Tu vir Dei, qui miracula feceras, qui ad pedes Iesu

cum Maria sedebas ; qui conseruabas omnia verba hæc in corde tuo ; purissimum sacræ orationis thus coram ^{per}pernis obtutibus adolere ^{de}des, vt reus tuus Petrus resipisceret, ^{et}meretur quem nulla suspicio inquinaret. Sed forsitan malebas talem , in quo reprehensionis idoneam nanciscereris occasionem. Denique post prandium allatus est Liber Petri, & cuidam præceptum est vt voce clamosa Petri Opuscula personaret. At ille & Petri odio animatus, & vitis germine irrigatus ; non illius qui dixit, *Ego sum vitis vera*, sed illius qui Patriarcham nudum strauit in arca, sonoriùs quàm postulatum fuerat exclamauit. Post aliqua Pontifices insultare, pedem pedi applodere, ridere, nugari conspiceres ; vt faciliè quilibet iudicaret illos non Christo vota persolvere, sed Baccho. Inter hæc salutantur cyphi, pocula celebrantur, laudantur vina, Pontificum guttura irrigantur. Tunc aliquis Horatiano sale ludere posset,

Nullam, Vare, sacra vite priùs seneris arborem.

Nam illud, quod idem Poeta in alio Carmine promittit,

Nunc est bibendum ; nunc pede libero

Pulsanda tellus

sibi memoriter gerebatur. Quantò salubriùs audiretur suauis Poetæ Galli sententia luculentis admodum versibus vigilata. Ait enim

Vina probo si pota modo, debentque probari.

Si non pota modo, vina venena puto.

Sed lethæi potio succi Pontificû corda iam sepelierat. Ecce, inquit Satyricus,

inter pocula querunt

Pontifices saturi quid diu poemata narrent.

Denique cùm aliquid subtile diuinumque sonabat, quod auribus Pontificalibus erat insolitum, audientes omnes dissecabantur cordibus suis, & stridebant dentibus in Petrum : & oculos talpæ habentes in Philosophum : Hoc, inquiunt, sineremus viuere mōstrum? Mouentesque caput quasi Iudæi, *Vah*, inquiunt, *ecce qui destruit templum Dei*. Sic iudicant verba luminis cæci, sic virum sobrium damnant ebrij, sic contra organum Trinitatis disserunt calices facundi. Sic contra simplicem disputant cornuti. Sic sanctum canes, sic margaritas porci corrodunt. Sic sal terræ infatuatur. Sic legis

fistula

fistula obturatur. Concionatur sapiens vir, *Qui tangit picem inquinabitur ab ea: quod nos alio possumus reddere versu, Qui tangit vinum inquinabitur ab eo.* Biberat Episcoporum sobrietas sanguinem vix meracissimum, cuius integritatem aqua non deuirginauerat, quia secundum Martialem,

Grande nimis scelus est sacrum iugulare Falernum,

Nec Bacchus Lymphae coniugium patitur.

Impleuerant Primates orbis Philosophi turis * dolia sua vi-
nido vino. Cuius calor ita inceserat cerebris, vt in somni le-
targiam oculi omnium soluerentur. Inter hæc sonat lector,
stertit auditor. Alius cubito innititur, vt det oculis suis som-
num. Alius super molle cervical dormitionem palpebris suis
molitur. Alius super genua caput reclinans dormitat. Cum
itaque lector in Petri satis aliquod reperiret spinetum, surdis
exclamabat auribus Pontificum: *Damnatis?* Tunc quidam
vix ad extremam syllabam expergefatti, somnolenta voce,
capite pendulo, *Damnamus,* aiebant. Alij verò damnantium
tumultu excitati, decapitata prima syllaba, *namus* inquiunt.
Verè natis, sed natatio vestra procella, natatio vestra mer-
sio *. Sic milites dormientes testimonium perhibent, quia
nobis dormientibus venerunt Apostoli, & tulerunt corpus. Qui vi-
gilauerat in lege Domini die ac nocte, nunc damnatur à Sa-
cerdotibus Bacchi. Sic morbidus medicum curat. Sic dam-
nat naufragus in littore constitutum. Sic arguit innocentia
qui ad furcas ducitur suspendendus. Quid agimus anima?
Quò nos vertimus? Excideruntne tibi præcepta Rhetorum,
& occupata luctu, præpedita singultibus, dicendi ordinem
non tenes? Putasne veniens Filius hominis inueniet fidem
super terram? Vulpes foveas habent, & volucres cœli nidos:
Petrus autem non habet vbi caput suum reclinet. Sic iudi-
cant in loco Iudicis sedentes rei; in loco vindicis innocentia
vexatores. Simul sunt omnia talibus iudicibus, talibus acto-
ribus deprauata.

Hic satur exiguo manuque turgescere somno,

Hic exporrectis ampullat verba labellis.

Hic loquitur nimis, ille tacet: hic ambulat, hic stat.

Alter amat fletus, alter crispare cachinnum.

Diuersisque modis pax est vefania cunctis.

Quid hi tales egerint, quid decreuerint iuris periti, Euange-

lica lectio consolatur. *Collegerunt*, inquit, *Pontifices & Pharisei Concilium, & dixerunt: Quid facimus? quia hic homo multa mira dicit. Si dimittimus eum sic, omnes credent in eum.* Vnus autem ex ipsis nomine Bernardus Abbas, cum esset Pontifex Concilij illius, prophetauit dicens: Expedi nobis ut vnus exterminetur homo à populo, & nō tota gens pereat. Ab illo ergo die cogitauerunt condemnare eum, dicentes illud Salomonis: *Tendamus insidias iusto, supplantemus ei gratiam labiorum. Inueniamus radicem verbi contra iustum. Facientes fecistis, & linguas vipereas in Abaelardum euaginastis. Subuerfi subuertistis, & vinum absorbuistis, sicut qui deuorat pauperem in abscondito.* Inter hæc Petrus orabat, *Domine libera animam meam à labijs iniquis, & à lingua dolosa.* Interdum illud Psalmistæ sedulò ruminabat: *Circumdederunt me viruli multi, tauri pingues obsederunt me. Aperuerunt super me os suum.* Verè pingues, quorum colla thoris adipeis incrassata liquidam sudabant ad ruinam*. Nec mirum. Visitauerant enim domestici fidei neutriu. † lacrimas in misericordia & caritate. Sedit autem in Concilio vanitatis, contra Psalmi decretum quidam memoriæ celebris Episcopus, in cuius auctoritatem plurimorum se reclamabat assensus. Hic hesternam erapulam ructans, huiusmodi in concione sermonem euomit: Fratres, Christianæ Religionis participes omnium periculo prouidete. Ne fides in vobis turbetur, ne sincerus columbæ oculus turgente macula obducatur. Nihil enim prodest aliarum virtutum possessio vbi fuerit fidei defectio, iuxta illud Apostoli: *Si linguis hominum loquar & Angelorum, caritatem autem non habeam, nihil mihi prodest.* O Mineræ lepos! ô sales Attici! ô eloquentia Tulliana! Hanc certè caudam non vult hic asinus. Talis finis tali capiti non respondet. Vnde etiam qui fauerunt, pressa fronte ruborem confessi sunt. Placet & non immeritò hanc magni nominis vmbra gregi illorum communicare, de quibus dictum est: *Conceperunt ventum, & telas araneæ texuerunt.* Præfatus verò Episcopus etiam præmissis adiungens: Petrus, inquit, semper turbat Ecclesiam, semper excogitat nouitatem. O tempora! ô mores! Sic iudicat de sole cæcus. Sic pingit in ebore mancus. Sic urbem appreciatur asinus. Sic animales Episcopi iudicant, sic casus ventilant, sic discutiunt rationes. Sic pu-

* aruinam,
uno verbo.

†

Gal. cōmuni

gnant contra eum filij matris suæ. Sic lues crassæ aduersus silentem grunniunt.

INTRA tot itaque & tantas angustias deprehensus Abaelardus ad Romani examinis confugit asylum. Filius sum, inquit, Romanæ Ecclesiæ. Volo causa mea quasi impij iudicetur. Cæsarem appello. At Bernardus Abbas, in cuius brachio fidebat Præsulorum multitudo, non dixit vt Præses qui tenebat Paulum in vinculis: Cæsarem appellasti, ad Cæsarem ibis: sed, Cæsarem appellasti, ad Cæsarem non ibis. Renunciavit enim quæ gesta fuerant Apostolico, & statim à Romana Sede litem damnationis in Petrum per Gallicanam Ecclesiam volauerunt. Damnatur taliter os illud promptuarium rationis, tuba fidei, hospitium Trinitatis. Damnatur, proh dolor! absens, inauditus & inconuictus. Quid dicam? quidue non dicam? Bernarde,

Nil opus est bello, veniam pacemque rogamus,

Porrigimus iunctas ad tua lora manus.

Iura cadent rerum, vertetur sanctio legum,

Si vis, si mandas, si sic decernis agendum,

Quem penes arbitrium est, & vis, & norma loquendi.

Cuius vnquam, Iesu bone, culpa tam cæcos habuit iudices, vt non vtrinque causæ latera ventilarent? vt non in quam potissimum partem ius vergeret elimarent? Isti clausis oculis palpant negotium, & quasi oculati rerum cognitores arcu iniquitatis intenso toxicum subito iaculantur. Quicquid intestinus odiorum furor, quicquid implacabilis amentię turbo rotaret in Petrum, quicquid iniqua conflaret emulatio, censuræ Apostolicæ sobrium nunquam dormire deberet acumen. Sed facilè deuiat à iustitia, qui plus hominem quàm Deum timet in causa. Verumque illud est quod per Propheticum organum sonat: *Omne caput languidum, à planta pedis usque ad cervicem, non est in eo sanitas.*

SED corrigere, inquiunt fautores Abbatis, Petrum volebat. Si Petrum, bone vir, ad integrum fidei statum disponebas reuocare; cur ei coram populo æternæ blasphemię characterem impingebas? Rursusque si Petro amorem populi tollebas, quomodo corrigere disponebas? Ex qua complexione in summā redigitur, te in Petrum exarsisse non amore cor-

rectionis, sed desiderium propriæ ultionis. Præclare dictū est à Propheta: *Corripiet me iustus in misericordia*. Vbi enim deest misericordia nō est correctio iusti, sed barbaries incondita tyrāni. Testatur etiam rancorē animi eius Epistola ad Innocentiū Papā directā, in qua sic stomachatur: *Non debet, inquit, refugium inuenire apud Sedem Petri, qui fidem impugnāt Petri*. Parce, parce bellator inclyte. Non decet Monachū sic pugnare. Crede Salomoni: *Noli, inquit, nimium esse iustus: ne fortē obstupescas*. Non impugnāt fidē Petri, qui fidem affirmat Petri. Debet ergo inuenire refugium apud Sedem Petri. Patere, quæso, Petrum tecum esse Christianum. Et si vis, tecum erit Catholicus. Et si non vis, tamen erit Catholicus. Communis enim Deus est, non priuatus. Sed si sedet sentētia cordi, pergamus pariter contemplari, quomodo Petrus fidem infestat Petri. Scribit enim Petrus ad ancillam Dei Heloissam sacris litteris apprimē institutam, familiarem satis Epistolam, quæ inter reliqua horum etiam verborum redolet continentiam*:

* *Hæc Epistola Abaelardi non extat integra.*

Soror mea Heloisa quondam mihi in seculo cara, nunc in Christo carissima, odiosum me mundo reddidit Logica. Aiunt enim peruersi peruerentes, quorum sapientia est in perditione, me in Logica præstantissimum esse, sed in Paulo non mediocriter claudicare. Cūque ingenij prædicent aciem, Christianæ fidei subtrahunt puritatē. Quia, ut mihi videtur, opinione potius traducuntur ad iudicium, quàm experientie magistratu. Nolo sic esse Philosophus, ut recalcitrem Paulo. Non sic esse Aristoteles, ut secludar à Christo. Non enim aliud nomen est sub cælo, in quo oporteat me saluum fieri. Adoro Christum in dextera Patris regnantem. Amplector eum vlnis fidei in carne virginali de Paracleto sumpta gloriosa diuinitus operantem. Et ut trepida sollicitudo, cunctæque ambages à corde tui pectoris explodantur, hoc de me teneto, quod super illam petram fundavi conscientiam meam, super quam Christus edificauit Ecclesiam suam. Cuius petra titulum tibi breuiter assignabo. Credo in Patrem, & Filium, & Spiritum sanctum; unum naturaliter & verum Deum: qui sic in personis approbat Trinitatem, ut semper in substantia custodiat unitatem. Credo Filium per omnia Patri esse coequalem, scilicet æternitate, potestate, voluntate & opere. Nec audio Arrium, qui peruerso ingenio actus, imò demoniaco seductus spiritu, gradus facit in Trinitate; Pa-

trem maiorem, Filium dogmatizans minorem: oblitus legalis præcepti: Non ascendes, inquit Lex, per gradus ad meum altare. Ad altare quippe Dei per gradus ascendit, qui prius & posterius in Trinitate ponit. Spiritum etiam sanctum Patri & Filio consubstantialem & coequalem per omnia testor, ut pote quem bonitatis nomine designari volumina mea sæpè declarant. Damno Sabellium, qui eandem personam asserens Patris & Filij, Patrem passum autumavit; unde & Patripassiani dicti sunt. Credo etiam Filium Dei factum esse Filium hominis, unamque personam ex duabus & in naturis duabus consistere. Qui post completam suscepta humanitatis dispensationem passus est & mortuus, & resurrexit, & ascendit in cælum, venturusque est iudicare vivos & mortuos. Affero etiam in baptismo uniuersa remitti delicta; gratiæque nos egere, quæ & incipiamus bonum, & perficiamus: lapsosque per pœnitentiam reformari. De carnis autem resurrectione quid opus est dicere, cum frustra glorier me Christianum, si non credidero resurrecturum? Hæc itaque est fides in qua sedeo, ex qua spei contrahō firmitatem. In hac locatus salubriter, latratus Scyllæ non timeo, vertiginem Carybdis rideo, morziferos Syrenarum modulos non horresco. Si irruat turbo, non quatiōr. Si venti perflent, non moueor. Fundatus enim sum supra firmam petram.

Hæc de Epistola Petri ad verbum excerptenda putavi, ut liquidum fieret quomodo Petrus impugnaret fidem Petri. Nunc rigide censo, adesto, & fidem Petri sincero perpende iudicio. Dixisti: *Non debet refugium inuenire apud Sedem Petri, qui fidem impugnat Petri.* Hoc per se dictum quoddam esset eminens & generale verum. Sed quia personaliter dixisti de Petro, conuincō te sentire contraria vero. Non enim Petrus arguit fidem, ad cuius lineam vitam suam disponit: nec alienus est à Christi portione, cuius se tam humiliter insigniuit nomine. Deberet ergo refugium apud Sedem Petri inuenire, si non illecebræ tui eloquij clausissent viscera misericordiæ Romanæ Ecclesiæ. Sed dum tu Petro clementiæ ostium obstruis, conceptę vesaniæ signanter impetum prodis.

Hic forrasse inquires, Nimia super me lacessis iniuria. Zelus domus Dei comedit me, eò quod lepra insanæ doctrinæ macularet corpus Ecclesiæ. Cui obuiandum in ipso statim nequitix semine putavi, ne latè serperet vis veneni. Nōne cautè consultèque egi, quod fœdum illud sacrilegumque

dogma manuali quodam indiculo complosi. Ne scilicet breuiter volentibus attingere summam rei, onerosum esset ire per spaciosos saltus voluminum Abaelardi. Ad hæc ego: Laudo te, Pater, sed in hoc non laudo. Indiculum vidimus, in quo non Petri dogmata, sed nefandi commenti Capitula legimus: Quod, scilicet Pater sit omnipotentia, Filius quædam potentia, Spiritus sanctus nulla potentia. Quod Spiritus sanctus, licet sit eiusdem substantiæ cum Filio, non tamen est de eadem substantia. Quod homo sine noua gratia possit operari. Quod Deus non possit plus facere quàm facit, nec melius facere quàm facit, nec aliter facere quàm facit. Quod anima Christi non descendit ad inferos. Hæc & alia Indiculus tuus continet, quorum quædam, fateor, Petrus & dixit & scripsit: quædam verò neque protulit neque scripsit. Quæ autem dixerit, & quæ non dixerit, & quàm Catholica mente ea quæ dixerit senserit, secundus arrepti Operis Tractatus Christiana disputatione ardentè & impigrè declarabit. Nam talia sunt quæ dilui debent, atque refelli: ut non immerito proprio referuentur volumini. Nunc illud est acriter persequendum, cur vir sanctus, & in ore famæ nominatissimus, qui quædam perenni sepelienda silentio scriptis proprijs tradidit, Petro Abaelardo hereseos crimen impeggerit. Rata namque est fama, & ab antiquo quasi naturæ legibus promulgata, neminem de simili crimine quempiam posse conuincere. Quod dum fecisti, & imprudenter & impudenter egisti.

PETRVS errauerat, esto. Tu quare errasti? Aut sciens, aut nesciēs errasti. Si sciens errasti, hostis Ecclesiæ cōprobaris. Si nesciens errasti, quomodo es defensor Ecclesiæ, qui errorem nescis discernere? Errasti verè dum originē animarū de cœlo asseruisti esse. Quod qualiter in libro astruas, quoniā vtile & facile est cognitu, sagaci lectori ab altiori cardine retexā. Est Liber, quem Hebræus *Firafirim*, Latinus nominat Canticum Canticorum, cuius littera vigilantibus animis, diuinæ cuiusdam intelligentiæ sudat arcanum. Ad hunc librum Bernardus manum expositionis applicat, ut ab hirsutis litteræ opusculis egregij sensus frugem eliciat, utitur sane mediocri & temperato genere dicendi. Sed libet paululum percunctari, cur Bernardus post tot illustrium virorum sudores, qui in præfa-

eo opere sua ingenia contulerunt, tam immensæ maiestatis volumē temptauit in lucem proferre? Nam si maiores nostri plenariè, sufficienterque libri huius latebras produxerunt in solem, miror qua fronte ausus tuos extenderis in opus elimatum ad vnguem. Quòd si aliqua sunt tibi reuelata sacramenta, quæ eorum notitiam fugerint, non inuideo: imò labori vehementer applaudo. Sed cùm eorum expositiones, commentumque tuum studiosis reuoluo manibus, nihil te noui dixisse comperio: imò sensum alienum verbis tuis vestitum deprehendo. Superuacua igitur explanatio tua esse videtur. Ac ne quis me putet improbabilia proloquutum, proferam super hunc Librum quadrigam Expositorum: Origenem scilicet Græcum, Ambrosium Mediolanensem, Retium Augustidunensem, Bedam Angligenam. Quorum primus cùm in ceteris Libris, vt ait Hieronymus, vicerit, in Canticis Canticorum se ipsum vicit. Secundus verò probabili & erudito sermone Sponsi Sponsæque firmauit amores. Tertiùs perplexitatem voluminis sublimi ore disseruit. Quartus autem eiusdem libri opaca septem Libris absoluit. Post tales itaque, & tam industrios viros, Bernardus arat, quasi aliquid intemptatum nostri maiores reliquerint. Possemus sane lucubrationibus disertis hominis acquiescere, nisi potius tragœdiam videretur quàm Commentarios texere. Patefacta namque quadam parte Operis, repente mortem sui fratris inducit, in cuius funeris prosecutione duos penè quaternos consumit. Quod quàm ibi discrepans & inconcinnum fuerit, paucis expediam. Liber ille Salomonis in sancti Spiritus officina conflatus, Christi & Ecclesiæ sub Sponsi Sponsæque typo maritat amplexus. Porro nuptijs gaudia consonant. At Bernardus aut rerum obscurarū cædio victus, aut negligens Apostoli dictum suadentis gaudere cum gaudentibus, mortuum suum ducit ad nuptias: Cùm scriptum sit, *Non est Deus mortuorum, sed viventium*. Discumbente itaque Sponso in Sponsæ gremio, & iuuenulis Sponsi, Sponsæque iuuenulabus alterna iocunditate plaudentibus, tuba funebris subito clangit. Epulæ in luctum eunt, organa vertuntur in funus. Tragœdia risum procerit † nuptiarum. Non discretus, non elegans citharista fuisti, qui funebres modulos regio conuiuio præsentasti? Quis vnquam somniauit tale portentum?

Solemus ridere picturas incipientes ab homine & in asinum
definientes. Reuolue quæso prisca super hunc librum moni-
menta ingenij, & nullum reperiēs, qui in huiusmodi materia
tristitia lætis confœderet. Vnde Retij Augustidunensis aurea
sic depromit camœna, *Mose est, inquit, generose materiae obseruan-
dus, Sponsi Sponseque tripudia festiua tuba persultent. Neque enim in
funera fas distrahi animum, quoniam ad exponendum Cantica nup-
tiarum inuitat alacritas conuiuiarum. Sed quoniam tantæ facultatis
ratio in nobis vel nulla est, vel admodum orba, eius innitatur gratiæ, qui
per Euangelium suum sonat: Sine me nihil potestis facere. Neque cer-
tè mihi deficiet transitorium verbum, cum credam in Verbum quod
est in principio apud Deum.* O vox Catholico digna doctore! o
fidelis confessor gratiæ! Rectè perpendiculum sui iudicij vir
sapiens lineauit, qui mœrorè à gaudio tanto interstitio seque-
strauit. Tu verò terminos transgrediens, quos posuerunt Pa-
tres tui, Cantica in elegos, carmina in threnos sorte misera-
bili conuertisti. Quod si tibi deessent Ecclesiasticæ scita cen-
suræ, recolere poteras etiã gentilis instituta prudentiæ. Nam
cùm Zeuxis pictor eximius simulacrum Helenæ pinxit, non ei
brachia simiæ, nec chimæræ ventrè, nec caudã piscis aptauit:
sed humanorum membrorum expolitione perfectum publi-
cis vñibus * propalauit. Alioquin indecens & ridiculosa esset
pictura. Vnde Horatius in Arte Poetica,

* f. visibus

*Humano capiti cernicem pictor equinam
Iungere si velit, & varias inducere plumas,
Vndique collatis membris; ut turpiter atrum
Desinat in piscem mulier formosa superne:
Spectatum admissi risum teneatis amici?*

Concedit ars, ut quod velis incipias, sed non ut quemlibet fi-
nem cœptis tuis supponas. Vnde idem Poeta paulò post
scripsit,

*———— pictoribus atque Poetis
Quidlibet audendi semper fuit æqua potestas:
Sed non ut placidis coeant immitia, non ut
Serpentes auibus generentur, tigribus agni.
Velut ægri somnia Operis tui vanæ species finguntur,
———— ut nec pes, nec capus vni
Reddatur formæ. ————
Purpureus latè qui splendeat, vnus & alter*

Assuitur

Assuitur pannus

At ne quis fautorum tuorum obloquatur,

Scimus inurbanum lepido seponere dicto,

Legitimumque sonum digitis callemus & aure.

Quid plura? Tota ars Poetica iurata contra te bella suscepit. Deberes te vera ingenij tui puerperium, iuxta eiusdē Poetæ institutionem, nonum premere in annum; ut malè tornatū opus rursus liceret iucudi reddere, & curare ne te lunæ labor offenderet. Deberes utique festinantiam emissionis differre, cum scriptum sit,

nescit vox missa reuerſi.

Laudamus in te, Pater, venam ingenij, sed artis culpamus inſcitiam. Inde est quòd veteres diffinierūt ingenium esse mutilum, nisi opem artis sibi asciscat. Laudantur sales Lucilij, & tamen mordetur quod incomposito currat pede.

Impositos versus componit & arte carentes

Ennius ingenio diues, & arte rudis.

E quibus est ille,

Omnes mortales sese laudari exoptant.

Sed quoniam lippis & tonsoribus claret, quòd non rectè lamenta epithalamio coniugasti, libet aliqua de ipso boatu tragico speculari. Inter cetera, ni fallor, Oratoris nostri lugubris Musa sic calculat. *Deceſſit frater à vita, imò ut rectius fatear, mortem reliquit pro vita. Frater, inquam, deceſſit, tenor continentie, morum speculum, vinculum religionis. Quis ulterius vegetabit me ad laborem? Quis amplius leniet mœrentem? Et post aliqua, Bos bonem requirit; se quòd solum putat, frequenti mugitus pium testatur affectum. Bos, inquam, bonem requirit, cum quo ducere collo aratra consuevit.* Pulchrum quidem est & tinnulum quod Bernardus loquitur; sed de alio sudore precium nomēque venatur. Ambrosius enim hæc verba syllabatim in querimonia illa posuit, quam de excessu Satyri amici sui mulcebrī dealbatoque stylo procudit. Itaque Bernardus in hoc planctu adeo est vehemens, adeò pertinax, adeò viuus, ut legenti cuilibet constans sit, cum non veros fletus edere, sed verba quibus veri questus exprinantur effundere. Aiunt tamen quidam insulsi, seductorio eius linguæ moderamine seducti, qui corpus verborum diligunt, animam autem rationis spernunt, cum tam facundia sublimi in lamentis illis uti, ut

nulla modernæ eloquentiæ facultas ei valeat exæquari. O falsi iudices eloquentiæ, quos proijcit vocis ventus ut puluerem à facie terræ! Quænam ibi sententiarum vis? quæ pocula rationum? Totus in verbis fluctuat, & mors ridiculi syllogismi rotatur in circulo. Vnde Poeta. Citharoedus, inquit,

Ridetur, corda qui semper oberrat eadem.

Læta verborum gramina sata instrangulant sententiæ. Aut fortasse idem dicendo multipliciter, Vlixem simulare volebat. De quo scriptum est,

Ille referre alij sæpè solebat idem.

Sed non talibus instrumentis mortuus suscitatur, nec eloquentiæ præstigiis vita mortuo comparatur. Vnde cuiusdam distichum egregiè sonat.

Cur dantur frustra pro Psalmis carmina pulcra?

Plus prodesset ei, ter, Miserere mei.

Quòd si dolorè suū delinimentis facundię remedioq; carminis euaporare nolebat; cur non saltem super hoc propriū separatim opusculum condebat? Nec deerant, à quibus talis materiæ mutuari posset exemplar. Socrates mortem sui Alcibiadis Philosophici vigoris vbertate testatur. Plato Alexim puerum, cui amatorias cantiunculas composuerat, insigni titulo ducit ad tumulum. Taceo Pythagoram, Demetrium, Carneadem, Possidonium, reliquosque, quorum excellentia Græcia superbit: qui, teste Hieronymo, diuersis seculis, diuersis libris diuersorum lamenta minuere sunt conati. Præterea Anaxagoræ laudatam semper sententiam, qui cum ei nunciaretur filium obisse, fletu represso: Sciebam, inquit, me genuisse mortalem. Et ut peregrina omittēs ad nostra veniā, Tullius eloquij Romani maximus auctor consolatorium de morte filij sui Librum edidit, cui præclara magnorum virorum monumenta quasi stellas micantes impressit. Hieronymus dolori, quem de morte Nepotiani conceperat, plausibili medetur eloquio. Ambrosius, de quo præfatus sum, duos Libros de excessu dilecti sui Satyri suaui stylo edisserit. Ad horum normam planctum tuum texere debebas, non immemor illius vulgaris prouerbij,

Vicini barbæ propriam debes simulare.

SED quoniam super hoc satis abundèque digessim, ¶
pestium est illud Capitulum in eodem libro visitare, in quo

animarum originem de cœlis fabularis esse. Vbi sic recolo te locutum: *Merito dixit Apostolus, nostra conuersatio est in cœlis.* Hæc verba tua subtiliter explorata, Christianæ mentis palato hæresim sapiunt. Si enim idcirco animæ originem de cœlis astruis, quia quandôque beata futura est in cœlis; eadem ratione corporis origo erit in cœlis, quia quandôque beatum futurum est in cœlis. Sed ad hoc intimandum talia verba se non accommodant. Aut si ideò animæ originem cœlestem ascribis, quia olim orta, id est facta sit in cœlis, quod quidem verborum talium resultat intentio; prauitatem Origenis incurris, qui in Libris Periarichôn Pythagoreum Platonicumque dogma secutus, originariam in cœlo sedem animabus disponit. At quoniam de anima mentio se ingessit, non absurdum est commemorare, quæ altercationis varietas occupauerit de animarum origine. Aiunt Philosophi, quorum duces sunt Plato & Pythagoras, quibus & tu ex parte maxima acquiescis, animas scilicet olim ab initio factas conditasque in thesauris Dei: indèque ob antiquum vitæ contagium in corporum ergastulum lapsas, rursusque si corpus iustè gubernauerint, ad antiquæ honestatis vultum meritorium vehiculo redituras ferunt. Et heretici, animam partem esse diuinæ substantiæ contenderunt, occasionem huius fabulæ indè rapientes, quod scriptum est in Genesi: *Et sufflauit Deus in faciem eius, scilicet Adæ, spiraculum vitæ.* Contra quos intonat breuiter Augustinus: *Flatus, inquit, ille dicitur qui hominē animauit. Factus est ab ipso, non de ipso, quia nec hominis flatus hominis pars est, nec homo cum facit de seipso, sed ex aereo halitu sumpto & effuso.* Item fuerunt quidam crassis ignorantie tenebris obuoluti, qui venire animas ex traduce delirabant: quos confutare, quodammodo est eorum ineptias roborare. His tribus nanijs * quasi rationi aduersis orthodoxæ veritatis gladio amputatis: asserunt sancti Patres nouiter creatis corporibus creatas nouiter animas cotidie infundi, iuxta id Euangelii: *Pater meus usque modo operatur, & ego operor.* Tu itaque à doctrinæ salutaris tramite deuius, in Philosophorum scopulos ruis. Et dum dignitatem animæ iactitas, originem ei sinderam flore ieiuni eloquij nundinatis. Quod si in Petri opusculis huius vecordiam reperisses; non est dubium quin eam inter illa, quæ peperisti, Capitulorum monstra locasses.

Hinc ad alios tui ingenij fructus articulus est vertendus. Quærit à te vir collo inflatus Romano, quid sit diligendum, & quomodo. Cui sic rescribis, *Orationes à me, Aimerice, & non quæstiones flagitare solebas.* & post pauca. *Queris quid sit diligendum. Cui breuiter respondeo. Deus.* Homo Romanus, grossus camelus, Gallicano argumento gibbosus trans Alpes saltat, ut quid sit diligendum inquirat: quasi iuxta se non habeat, qui rei huius sibi notionē infundat. Cui noster Philosophus mādāt non virtutē esse diligendam, ut Crisyppus: nec voluptatē, ut Aristipus: sed Deum, ut Christianus. Acutulū sane responsum, & docto homine dignum! Sed quænam abiecta muliercula; quisnam hoc ignoret extremus idiota? Sic philosophantur in textrinis aniculæ. Sic propositiones Dagani cum ioco mirari solemus. De cuius propositionibus aliquas exempli gratiā interseram. *Filius, inquit, sum matris meæ. Placenta est panis. Caput meum est grossius pugno meo. Cum meridies est, dies est.* Quis est, cui audita tam ridicula veritate, labia risu non quæctiantur? Similiter & cum Bernardus dixit, Deum esse diligendum, verissimum quidem dixit, & venerabile verum: sed ad hoc dicendū pro nihilo aperuit os suum. Nemo enim de hoc dubitat. Sperabat enim Romanus aliquid secreti audire, & Archimādrīta noster tale quid intonat, quod quilibet rusticus valeret respondere. Et tamen dū Deum diligendum esse pronunciat latēter, ferit Romanum, qui in curia Papæ non Deum didicerat amare, sed aurum. Sequitur postea de modo diligendi: *Modus, inquit, est sine modo diligere.* Aimericum, sic enim dictus est, ad quem scribis, quasi lacteo succo pauisti, dum Deum diligendum apertē pronunciaſti. Nunc cum subito ad altiora subrigens * dicis, quod modus diligendi Deum sit sine modo diligere. Qui quæſiuerat quid esset diligendum, de quo nec pauperculus Christianus quidem hæſitaret, quomodo poterit hanc subtilitatem intelligere, quod modus diligēdi Deum sit sine modo diligere? In quo impossibile quiddam spondere videris. Cum enim stabile fixumque sit, De^{ne} ea magnificentia esse prædictum, ut nequaquam nostra in illum dilectio eius dignitati equipollenter respondere sufficiat: quomodo sine modo diligemus, quem cum modo diligere non valemus? Quomodo, inquam, porrigetur dilectio ultra modum, cum semper remaneat citra modum? Aut si sic intel-

* f. subri-
gens

Iexisti sine modo diligere, id est diligere quod non perueniatur ad congruum diligendi modum: ridiculam intelligentiā portendit somnium tuum. Dum itaque rhetoricari voluisti, & obscuritatem dedisti, & quiddam inopium atque impossibile confecisti, dum Deum sine modo diligendum docuisti.

Quanto rectius hic qui nil molitur ineptè?

Iesus Christus scilicet, qui per Euangelium suum diligendi modum exprimens: *Diliges*, inquit *Dominum Deum tuum ex toto corde tuo, & ex tota mente tua, & ex omnibus viribus tuis*. Hic nullus eloquentiæ fucus, sed mera tantum veritas, simplici & absoluto est expressa eloquio. Hic Romanus aurem accommodet. Hic superbiæ strumam deponat camelus, quia Iesus hic nil impossibile pronunciat. Iesus, inquam, sententiæ lucē tenebris eloquij non inuoluit, ut Bernardus, qui rei venerabilis maiestatem exquisito quodam obnubit verborum adultatio. Vir sapiens, inquit Horatius,

Non fumum ex fulgore, sed ex fumo dare lucem

Cogitat

Quod Bernardus malè attendit, qui quod Iesus nudo patu-
loque ore, nube sermonis ab intelligentiæ via secludit. Horū & his similium ludicrorum mensuram confertam & coagitatam, in libellorum tuorum, Bernarde, sinum dedisti. Quod reprehendere facile poterit, quem oculatum eruditio reddidit. Quæ si vngue tenus persequi vellem, longitudo certè dictaminis lectorem etiam repelleret diligentem.

Cum itaq; tantas trabes loquaris, cur Abaelardi festucas in trabes commutare moliris? Non est negotium misericordis culpam augere, sed minuere. Vnde Psalmista cum dicturus esset; *Misericordiam & iudicium cantabo tibi Domine*. commodè misericordiam præposuit iudicio, quasi diceret: Immense Deus, scio quia misericors es & iustus; sed in altero mea saluatio, in altero mea damnatio: primoquo misericordiæ canticum libentius volo. Scriptum est in Isaia, *Et conuertent gladios suos in vomeres*. Gladij enim in vomeres conuertendi sunt, non vomeres in gladios: quia & mali ad tranquillitatis bonum trahendi sunt leuitate correctionis: & boni ad discordiam commonendi non sunt asperitate inuentionis.

Hic & alijs delinitus exemplis, Petrum, si errore sauciatus esset, iumento tuo deberes imponere, & sic ad stabulum vni;

* Hic deest
aliquid

uersalis fidei reuocare. Plures Catholici quædam culpanda dixerunt, nec tamen ob id hæreticorum collegio sunt adscripti. Duo dixit Hilarius erroris expugnator, propugator Ecclesiæ, in quibus cum non audit sobrietas Ecclesiæ. Primum, quòd Christū nil in passione doloris sensisse asseruit. Contra quæ sententiam Claudianus Presbiter Lugdunēsis, vir Christianissimus, & tam subtilis ad disputandum, quàm artifex ad loquendum, sic personat. Si Christus nil in passione sensit doloris, non verè passus est: & si verè non passus est*. Secundum, quod nullum incorporeum dixit esse creatum. Nec igitur, inquit Claudianus, anima, cum sit incorporea, est creata. Quòd si creata non est, nec creatura Dei est. Sed non ob hoc, ut ait idem Claudianus, scientia Doctoris perdit meritum Confessoris, quia Ecclesia bono filio indulgit quod humana opinio minus cautè disputauit. Proculdubio si hæc Petrus dixisset, eum esse lapidandum rigoris tui seueritas sanxisset.

BEATVS etiam Hieronymus in Libro contra Iouinianū de nuptijs quædam disserit. Et præcipuè illo loco, vbi sententiam Apostoli inducit, quæ in hunc modum se habet: *Bonum est mulierem non tangere.* Cui Hieronymus subiungit: *Si bonum est mulierem non tangere, malum est ergo tangere. Nihil enim bono contradictorium est præter malum.* Argumentum hoc scit esse friuolum, quisquis disputandi disciplina se profiteretur imbutum. Nam similiter bonum est carnem non comedere, & vinum non bibere: nec ideò sequitur quòd sit malum carnem comedere, & vinum bibere. Quod quidam asserentes inter hæreticos recepti sunt. Sed tamen paulisper concedatur, ut malum sit iuxta Hieronymum, mulierem tangere. Ex quo quanta sequatur absurditas, nexus ipse rationis ostendit. Nā si malum est mulierem tangere, malum est cum muliere coire. Neque enim potest fieri ut bonus sit coitus si malus est tactus. Et si malum est cum muliere coire, malū agit quisquis cum muliere coit. Peccant ergo coniugati legitimè vtendo coitu coniugali. Nam etiam coeundo mulierem tangunt. Igitur ut malè non agant mariti, feriabuntur ab vxoribus. Aut si necesse erit coire, ita cocant ut mulierem non tangant. Sed hoc impossibile est fieri. Sequitur ergo coniugalis boni naufragium, quod ad remedium mortalis luxuriæ superna indu-

stria præparauit. Nam si coniugium coitum non excusant mariti, certatim agant pœnitentiam, eò quod cum vxoribus suis aliquando coierunt. Aliàs in eodem libro Hieronymus inhumanius de nuptijs disputat super illum Apostoli locũ. *Melius nubere, quàm vri.* Sed si bonũ est nubere, quare malo cõparatur? Nemo enim ratione malũ bono cõparat. Vri certè malũ est, & nubere mali huius respectu bonum est. Quòd autem respectu mali bonum sit, simpliciter bonum non est. Ex his Hieronymi verbis distinctè colligimus nuptias non esse absolutè bonas. Perit igitur nuptiale bonum. Nam nuptiale bonum secundum Hieronymum non est bonum, nisi quia vri est maius malum quàm ipsum. Multos fideles viros, inter quos & Pamachium Senatorem, scandalizauit hæc effera austeràque disputatio, doloremque suum scriptis super hoc Epistolis eidem Hieronymo testati sunt. Quod si Petrus tam crudeliter contra nuptias declamasset, profectò Bernardus in eius exitium coniugatorum cohortes armasset.

AUGUSTINVS erroribus suis inimicus eos Libro Retractionum purgandos committit. Lactantius, de quo ipse Augustinus asseuerat, quòd multo auro suffarcinatus exierit de Ægypto, cùm ore fulmineo contra Gentes Christum defendat, quædam absona de dogmatibus Ecclesiæ postea somniet. Longum est recensere veterum syngrapha Tractatorũ, quæ non sunt sic ad purũ excocta, vt non inueniantur in eis multa quæ virgâ correctionis esset dignissima. Verax nãq; est Iacobi Apostoli sententia: *In multis, inquit, offendimus omnes. Si quis autẽ in verbo nõ offenderit, hic perfectus est vir.* Itaq; si Petrus in verbo offenderat, iudicandus à te, misericordiæ potius blãdum deberet sentire tactum, quàm iracundiæ incentiuum. Aequũ erat te reminisci quod Abacuc Propheta Deo decantat, dicẽs: *Cùm iratus fueris, misericordiæ recordaberis.* Vide quid distet inter iram Dei, & iram hominis. Cùm homo irascitur, clementiæ ab eius pectore mentio exulat. Cùm autẽ Deus irascitur, per ingentis bonitatis affluentiam misericordiæ recordatur, Recordatur nõ sine obliuione, qui irascitur sine cõmotione. Magnus Dominus noster, qui sic tentat summa, vt curam inferiorum non negligat. Huius imaginem æmulari, huius te oportebat vestigia totis conatibus amplexari, vt calculo quem forcipe tulerat Angelus de altari, purgares viciũ

labiorum Petri. Nec ignorare ius erat te hominē esse, quē
& culpæ lubricum trahere ad pœnam, & medicus gratiā
reparare posset ad veniam.

HIS ita decursis, silentium imperat prolixitas orationis.
Et quoniam vox lassata refrigerij portum iam expetit, ob re-
creandum Lectoris fastidium debitus primo volumini termi-

• *Secundus* nus affigetur, ut ad ea quæ promissimus enodanda secundi
hic non extat luctamen laboris officiosius accingatur.

nec à Beren-
gario scriptus
est, ut ex E-
pist. seq. patet

EPISTOLA XVIII.

QUÆ EST EIVSDEM BERENGARII,

Ad Episcopum Mimatensem.

PATRI ET DOMINI SVO G. MIMATENSI

*Episcopo pleno dierum, Berengarius renouari
ut aquile iuuentutem suam.*



N loco barbaro corpus meum à latronibus est li-
berrimum, sed spiritus meus apud vos in loco sancto
periclitatur. Quapropter in totius orbis conspectu
vobis baculum meæ porrigo defensionis, ut sancto-
rum dentes mordere non audeant, quem vesci spiraculo vi-
tæ permittit truculentia gladiatorum. Sis igitur Vlixes meæ
causæ, ut Circe quamuis filia Solis, ius meum magico mur-
mure non audeat immutare, ut sidus meæ conscientiæ non
possit invidia denigrare. Minus certè dolerem si fauces lupi
biberent meum sanguinem, quàm si ouium dentibus in fru-
sta minuerer. Corrige igitur Pastor bone, tuas oues, ne contra
me balent, quia non sum lupo insidians, sed canis protegens
ouem. Fretus tandem vestro fauore sermoni vela leuabo, &
inter oblatrantium linguarum Scyllas firmæ rationis remi-
gio nauigabo. Imponit plurima dira meæ personæ religiosa
manus, & sacro criminum diademate caput innocentis ho-
norat. Aiunt, quòd lingua mea inquietum malum est, &
mentis invidia, quæ aduersus Abbatem Claræuallis Librum
euomuit. Quippe tantæ sanctitatis virum esse confirmant, ut
iam

iam cœlo propinquus hominum euaserit opiniones. Qui hoc dicunt, etsi religioso vellere albesant, tamen dum sine serpente cupiunt esse columbæ, fatuitate linguam inficiunt. Nonne Abbas homo est? nōne nobiscum nauigat per hoc mare magnum & spaciosum manibus, inter reptilia quorum non est numerus? Cuius naus etsi prosperiori feratur nauigio, tamen seueritas maris in dubio est. Nam nec Auster adhuc ei fidem dedit, ne ratem eius concutiat. Nec Boream calcavit ipse sub pedibus. Nec Euri Nothique minas euasit. Nec ab Æolo Rege ventorum extorsit inducias. Quod vinū potest habitare in pice, & saporem eius non mutare? Vnde & Apostolus Paulus vinum suum à consorcio picis remoueri optabat, & in vas gloriæ transuersari, cū diceret: *Infelix ego homo, quis me liberabit de corpore mortis huius?* Ac si apertius loqueretur: Vinum Dei sum, & in pice sum; sed nisi picis sodalitiū derelinquā, timeo ne picem sapiam conditori. Potest igitur Abbas & vt ignis de alto subuehi, & vt terra deorsū cadere. Nōdū sol est, nondū fixus est in firmamēto: satis est si luna est. Neque æstimet me quispiam ad iniuriam eius stylum per ceram trahere, qui meo iudicio nostrorum temporum est Martinus. Simpliciter & sine vulpe candido pectori vestro loquor. Ego ita sentio de Abbate quòd sit lucerna ardens & lucens: sed tamen in testa est. Quod dedecus infigitur auro cū laudatur, si eius scoria improbetur? Laudatis Abbate, magis ego laudo. Cur igitur inquietiūs contra eum scribis, de quo tam benè sentis? Porrigite patulas aures, vt ebibant rationem.

DAMNAVERAT Abaelardum præceptorem meum, virum fidei buccinam, legis armarium, in morum via pede regio gradientem. Damnauerat, inquam, Abaelardum, & vocē eius sine audientia strangulauerat. Eram ea tempestate adolescēs, nondumque impuberes malas nubes lanuginis adumbrabat, eratque mihi velut Scholastico animus inficta crebro materia declinare. Porro veri certaminis arridente vena, pectus appuli vt purgarem Abaelardum, Abbatisque confutarem audaciam. Sed non, inquiunt, à te Theologum talem argui oportebat. Tu enim bestia es, & montem tangere non debes. Parciūs ista, fratres. Memētote vos hoc obijcere viro. In quo audet Abbas? Audet in litteris, audeo & ego. Audet

in Theologicis, audeo & ego. Audet in fide, audeo & ego. Audet in sanctitate, hinc non audeo ego. Quid ergo peccaui, si fidelis fidelē, minor maiorē, secularis religiosum redargui? Momordi, fateor, non contemplativum, sed Philosophum: non Confessorem, sed scriptorē: non mentem, sed linguā: non precordia, sed stylum: non meditationes viri, sed somnum. Legant eruditi viri Apologeticum quem edidi, & si dominū Abbatem iustē non argui, licenter me redarguant. Quærite per totam seriem Scripturarum ab ortu solis vsque ad occasum: & videbitis in campo Philosophiæ semper licuisse, ut alter alterum iustis occasionibus reprehendat. Colotes loquacitate notabilis rodit Platonem principem Philosophiæ, cum diuina versans fabellas immiscuerit. Et certē Colotes ad Platonem mus est ad elephantem. Lucilius Ennium, Horatius Lucilium lacerat. Omittam fumos gentilium, & membrulam hanc luminibus Ecclesiæ venustabo. Augustinus & Hieronymus, Presbyter & Episcopus, alterno rostro se carpunt. Fulgentius Regem quendam Africæ notat hereticum, non veritus regiam potestatem dum diligit veritatem. Iulianus Augustinum lædit audaciter: Ab infectione, inquit, hæresis nulla te purgabit herba fullonis. Solus Ambrosius ab omni suspicionis infamia liber est, quem egregio præconio coronauit Pelagius quamuis hereticus, ita dicens: Ambrosius Latinorum Scriptorum velut quidam flos enituit. Cuius purissimum in scripturis sensum nec etiam inimicus audet reprehendere. Si igitur Abbas aliqua silenda descripsit, quid peccauit in ore meo veritas si extirpanda notauit? Nec enim ante faciem gladij debet tremere iustitia, nec ante potentem veritas adulationis chlamidem induere. Vnde Seneca Cæsarem alloquens. *Cæsar, inquit, qui contra te audent loqui, magnitudinem tuam ignorant: qui non audent, nesciunt te hominē esse.* Socrates quoque, quem Apollinis oraculum sapientissimum esse cecinit, capitalis erat auctoritatis: & tamen Aristoteles egregiē ausus est dicere: Amicus est Socrates, sed magis amica est veritas. Sed cur, inquirunt, expleto primo volumine, secundum ut spoponderas non texis? Quia processu temporis meum sapere creuit: & in sententiam Abbatis pedibus, ut dicitur, iui. Nolui esse patronus Capitulorum obiectorum Abaelardo, quia et si sanum saperent, non sanē sonabant. Post-

quam igitur, inquit, à secundo libro manus torpuit, quare primum non rasisti? Fecissem hoc, inquam, nisi cassa esset industria. Remanerent enim viua exemplaria, quæ iam per totam Franciam & Italiam concurrerunt. Si igitur, inquit, Apologiam illam iugulare nō potes, damna vel viuam. Characterem rei frōti eius infige, vt omnis qui legerit sciat te ætate non malitia peccasse. Damnabo, inquam, tali conditione, vt si quid in personam hominis Dei dixi, ioco legatur, non serio.

Nō refutamus, inquit, ratiocinia tua, satis cautè asellum exoneras. Sed Carthusianos eremitas, genus electum, populum acquisitionis, quare inquietasti? quare inuectione perunxisti? cur à cellulis suis abstraxisti? Hic placidè purgationē meam audite. Improperat Propheta eis, qui congregant merces, & commendant eas sacco pertuso. Congregabāt sancti Anachoritæ Carthusiani merces iustitiæ, sed sacculū pertusum habebant. Curaui obstruere foramen sacculi, ne farina religionis patentibus rimis exiret. Volui rescare in eis immoderatam licentiam linguæ, qua velut quidam Geometræ totum orbem mensurabant. Cur hīc mea pietas crudelitatis arguitur? Cur sedulus sartor dissipator appellatur? Hīc, inquit, firmæ rationis columnæ inniteris. Sed Masfiliēsem illum Monachum cur vulnerasti vsque ad animam? Quia vulnerabat anulum Sponsæ Christi, & puritati antiquæ fidei naufragium minabatur. Introducebat enim præter Deum alium Creatorem, sicut Epistola eius ad me scripta declarat. Sed quocumque inquit, te persequimur, arma defensionis opponis. Responde per membra vestra, quoniam linguæ tuæ toxicum effudisti. Quando, inquam, factum est verbum istud? Misere mini mei, misere mini mei, saltem vos amici mei, quia humilitas tetigit me. Vbi læsi vos, vbi maiestatem vestram sauciaui?

Tvnc, inquit, non percussisti, quando dixisti: *Apud Religiosos patella Psalmus est, & pinguis refectio alleluya.* Fratres indulgere, nihil læsi vos. In incerto loquutus sum. Indeterminatè garriui. Nullum specialiter flagellaui. Vt Apollo cassum Oraculum emisi, quasi aerem verberans. Sed, vt video, quicquid dicam, aut erit, aut non. Cur alienam vobis sarcinam imposuistis? Cur iaculo non ad vos destinato munditiam ve-

Hoc inuenitur in prologo cuiusdā Tractatus, quem fecit de incarnatione Christi, ad Benedictum Canonicum.

** f. iaculum* stram exulcerastis? Dixi, *Apud religiosos patella Psalmus est, & pinguis refectio alleluia.* Quid ad vos? Et Magalonenses Religiosi sunt: & Canonici beati Rufi Religiosi. Apollo cœlum contorsit in aera, & ne cadat in cassum spontaneos vulneri vos offertis. Quis vnquam vidit os aperire, vt sagittam reciperet? Ego quidem, fratres, aliàs arcum intenderam, sed vos ferrum volatile retinuistis. Renui, ferre volebam: sed vos caritate commoti, vulnera eius in vestram trahitis sanitatem. Credite mihi, non adeo fui plenus agaue, id est furore, vt in vos emitterem filiam pharetrę meæ. Ergo ignoscite innocentibus. Et aliud inquiunt. Cur Cyclopas conduximus, vt fulmina fabricent in caput tuum? Quid quæso? Tunc, inquiunt, dixisti: *Episcopus vester non Mimatensium, sed mimorum est Episcopus.* Libet exclamare cum Hieremia Propheta. *Vt tibi mater mea! quare genuisti me virum rixę & doloris in vniuersa terra? vbi & quando, quæso, talia eructaui?* Tunc forsitan quando extra mundum nundinas celebraui, tales blasphemias vestro Episcopo imprimebam. Nam verè fateor, in nullo de eo talia delatraui. Aliud est, inquiunt, cur te nostro inebriemus aceto. Quid est? De nobis, inquiunt, dixisti: *Donatus vester vulgus est.* Terretis me, fratres, nouitatibus vestris; & contra portenta quæ fingitis frontem cruce signabo. In nomine Patris, & Filij, & Spiritus sancti. Quid est quod dicitis?

Vltra Sauromatas fugere hinc libet, & glaciale Oceanum

Vera est vtique Prophetia illa, *Fictio veritatem in exilium mittet.* Hoc, fratres, fingere potuistis? Sed vt maiori auctoritate in aures publicas prodeant, me talium facitis inuentorem. Iurem me non dixisse? Sed quasi mons pariat murem, ridebitis. Recognoscam? Sed virtutem crucis statim sentiam experimento. Quid igitur faciam? Veniam rogo innocens: & si magis placet, veniam postulo reus. Ad cumulum autem satisfactionis, sextarium mei sanguinis offero vobis. Parcite igitur, fratres, parcite: & criminatione nostrę personulę ora vestra nolite fœdare. Lingua enim vestris laudibus militat, & Ecclesię vestrę pius sum prædicator vbique. Hanc humilitatem absens vobis præsentis pagina mitto, quam præsens vna voce, & si vita comes fuerit, præsens exhibebo.

EPISTOLA XIX.

QVÆ EST EIVSDEM BERENGARII;

Contra Carthusienses.

FRATRIBVS CARTHVSIAE PROFESSIONEM

*iuratis B. cum Lazaro quondam paupere
æternam habere requiem.*

QUAR ad Dominos meos, cùm sim pulvis & cinis. Sed ut iumentum factus sum apud vos : & tamẽ homines & iumenta saluabis Domine. Multiplicavit Deus misericordiam suam, qui congregavit vos à quatuor ventis cæli, ut recumbatis cum Abraham in regno Patris sui. Fidelis ille in tota domo Ægypti de vestra vos extraxit Ægypto in manu potenti & brachio excelso, ut euomentes ollas carniū clamare possitis in deserto, *Manhu?* quid est hoc? Vox hæc, vox deserti. Hæc vox pluuiam admiratur cœlestis edulij, quam proferre non sustinet guttur Ægypti. Igitur ne redoleretis allia Pharaonis, accessistis ad hyssopum crucis, & pro Ægyptio gemitu cœlestis aliti desiderio clamaris, *Quid est hoc?* A regione deserti venit manna ad viatores deserti, & iure dicitis, *Quid est hoc?* quid, inquam, est quod famem repellit, quod desiderium satiat, & satiendo accendit? Rapuit manus illa inexhaustæ clementiæ lutum de luto, & in diademate Salomonis, quo coronauit eum mater, fecit vos aureos de luto. Sed nescio quo pacto nunc aurum redijt in lutum, & in ferri vilitatem aurei seculi moneta degenerat. Leuastis corpora vestra in montes, sed mentes in vallibus remanserunt. Vnde ergo veniet auxilium vobis? Sperabamus quòd in cacuminibus mōtium pēnas cuderetis, quæ vos veherent ad dexteram Patris. Seduxit nos opinio lubrica, & quod valde gemimus, alarum nudato remigio in plumis corporis grauitas vos pessundat. Putabamus quòd Deus esset montium tantum Deus: Sed & valles abundabunt frumẽto. Suscipere debuistis pacem populo montes, & linguæ spiculavibrastis non in populum, sed in Deum. *Cultus iustitiæ*, teste Propheta, *est silētium*. Quàm graue trutinata in statera Spiritus sancti sententia litium*. Nam stulticia & luxuria exci-

*f. silentiū.

dit aut deficit. Ultra profilit, aut citra jacet, nisi freno silentij gubernetur. Huius freni rupistis iuncturas, clauos fregistis, & languente auriga veluti infrænes equi ante sentitis præcipitia quàm brauium acquiratis. Ille quidem dixit, *Cultus iustitiæ silentium*. Vos verò aliter interpretantes dicitis: *Cultus iustitiæ multiloquium*. Quæ enim fora, quæ prætoria tanto ardent litigio causarum, ut montanæ Carthusiæ claustrum? Ibi non accusator obijcit, non aduocatus obiecta detergit, & nō de vestra sententia fasque nefasque vniformiter damnat, nec absoluit. Super nubes volatis aquilæ, & penna tandem remissiore ad vestrum cadauer carpendum rostra deponitis. Abstinetis à carnalibus pecudum, & sine sale carnes hominū deuoratis. Aitis enim: *Hæc mulier prægnans est, non à semine sui mariti. Illa colit multos amasios. Canonici illi ter in die carnibus ventres confundunt. Ille ructu pigmenti aera fædat. Ille scutellam baurit usque ad vomitum. Vacatis otio, & ideò talia ructatis. Verè cultus iustitiæ silentium*. Quod nōdum venit in linguam, apud vos iam constat esse patratum. Dubietas nostra penes vos est iurata veritas. *Cultus iustitiæ silentium*. Oh clementes medicos, qui non ægros curationibus curare, sed eorum vulnera suscipere student, ut cum eis pariter ægrotent! Quid prodest, fratres, exire in heremum, & in heremo habere cor Ægyptium? Quid prodest Ægypti ranas vitare, & obscœnis detractationibus concrepare? En qui sub Pharaone languistis, sub manu Moysi expirastis. Argumento vobis est fumus linguæ vestræ, qui cum fontē bibatis in secretario Cellæ vestræ, detractio in Cellis concipitur, in claustris vomitur. Non est Carthusia cælū, non est Carthusia Paradisus. Adhuc est Carthusia inter flumina Babylonis. In cœlo apostata, in Paradiso præuaricator. Quid facit in Carthusia detractor? Post scorix puritatem, post compunctionis lacrimas itur in forum claustrum, & linguæ ostium non reſeratur, sed frangitur. Quisquis verò per illud ostium non introierit, non palpat, sed creditur: non curatur, sed iudicatur: non reficitur, sed ma-

* Videtur hic
aliter esse
Auctoris Dia-
logus, & for-
tè, Abaelar-
di. Nec ad
Epistolā Be-
regarij quic-
quā attinet.

ctatur: & ut breuiter dicam, sine crimine nullus apud vos. DIXIT A. P.* dixit P. A. dixit eidem idem. Cū sit, Petre, Christus Deus, à quo Christiani dicuntur, sola est gens nostra, ut æstimo, quæ diuini nominis appellatione sit insignata. P. ipsi gloria, qui tanti nominis gloriā tā infirmæ concessit crea-

turæ, vt ipso quoque vocabulo ei capiti, cuius membra fuimus, coniuncti, ex ipsa nominis interpretatione id quod dicimur seruire moneamur. Christus quippè Græcè à Chrismate, id est vnctione dictus, Latinè vnctus interpretatur, quod Hæbraicè Messias sonat. Inungi autem tam Reges, quàm Sacerdotes solebant. Ideoque nomine vnctionis tam Rex ipse, quàm sacerdos ostenditur. Rex quidem per potestatem qua suos eruire à periculis, ac protegere potest. Sacerdos per proprii corporis immolationem, qua quos eruit à diabolo, reconciliat Deo. A Christo itaque Christiani quasi à Messia Messianite dicimur; id est à Rege illo summo siue Sacerdote, quasi reges, siue sacerdotes. Quod beatus exprimens Petrus, regale nos sacerdotiū appellat, quales esse debeamus cōmemorās: nostræ videlicet carnalitatis impetus regendo; & matris carnalibus cōcupiscētijs nos ipsos Deo quasi sacrificiū offerēdo. Gratia igitur Christi in nobis dilatata, iuxta illud Apostoli: *Quia Charitas Dei diffusa est in cordibus nostris per Spiritū sanctū qui datus est nobis.* Nomen quoq; dilatari cōueniebat, sicut etiam in Cantico Canticorū dicitur: *Vnguentū effusum nomen tuum.* Ac si diceret: Nomen tuum, ô Christe, quod vnguentum, id est vnctionem sonat, est effusum, id est dilatatum, atque in multos diriuatum, qui indè scilicet Christiani dicti sunt. A B. Sed & iuxta Apostolum, cū sit Christus ipsa sapientia, quam sophiam Græci nominant: nullos rectius dici Philosophos autumo, quàm qui huius summæ ac perfectæ sapientiæ amatores existunt. P. Hoc equidem & ipsa Physici nominis ethymologia requirit, & maximè tam doctrina fidei quàm morum disciplina seu vita, ipsos nobis Philosophos gentium certum est conuenire. Adeo namque de fide Trinitatis apertè disseruerunt, vt mirabile sit eos quoque in plerisque diligentius quàm Prophetas ipsos totam huius fidei summam exposuisse. Quorum etiam sequaces in tantam ausi sunt insaniam prorumpere, vt Dominum quoque Iesum dicerent ea, quæ de fide Trinitatis prædicauit, à Philosophis didicisse. Vnde & beatus Augustinus in libro viii. de Ciuitate Dei: *Mirantur, inquit, quidam nobis in Christi gratia sociata * cū audiunt vel legunt Platonem: cū de Deo ista senserit, quæ multum congruere veritati nostræ Religionis agnoscuntur.* Idem in ii. de doctrina Christiana, *Quidam lectores, & dilectores Pla-*

* f. sociatū

ionis ausi sunt in tantam prorumpere dementiā, quòd dicerent omnes Domini nostri Iesu Christi sententias, quas mirari & promere coguntur, de Platonis Libris eum didicisse. Quòd si vitam quoque Philosophorum, ac morum disciplinam pensemus, nullos aut paucos fidelium & Christianorum de contemptu seculi aut morum disciplina eis anteferendos esse censebimus. Qui per Sophum siue Philosophorum magis ex vita quàm ex conscientia dicendum esse asserunt. De fide autem Philosophorum atque vita, seu etiam disciplina morum, in exhortatione nostra ad fratres & commonachos nostros satis arbitror à nobis esse expositum. Quam quidem exhortationem quisquis legerit, videbit Philosophos non tam nomine quàm re ipsa Christianis maximè sociatos. Neque enim gratia tot Philosophicis rationibus armata Euangelicæ prædicationis iugo colla tam citò submisisset, nisi antea scriptis Philosophorum, sicut Iudæa Prophetarum, ad hoc esset præparata. A B. Verbum quoque Dei, quod Græci λόγον vocant, solum Christum dicimus. Vnde Augustinus in Libro questionum LXXXIII. Cap. XLIII. *In principio erat Verbum*, inquit, *quod Græcè λόγος dicitur*. Hinc & iuxta nominis ethymologiam, quicumque huic vero ac perfectò Verbo per doctrinam & amorem coherent, verè Logici sunt, & Philosophi dicendi sunt: nullaque disciplina veriùs Logica dici debet, quàm Christiana doctrina.

PETRVS. Et si hoc quidē modo sermonis vsus non habeat, vt videlicet aut Christianos nunc specialiter nominemus Philosophos, aut eorum de Christo scientiam, aut à Christo traditam doctrinam appellemus Logicam, profitemur tamen ijs quæ dicis nominum ethymologias maximè consentire. A B. Imò etiam res ipsas plurimum attestari. Quòd enim apud Gentiles Philosophicæ potiores sunt disciplinæ, tanrò vel multo amplius vniuersis sacris eruditionibus Euangelica, quam Christus tradidit, perfectior est disciplina. Qui etiam suis quantam sermonis abundantiam daret, demonstratus in igneis linguis aduentus Spiritus sancti manifestat, qui eos omnium linguarum varietates, omnium sermonum genera perfectissimè docuit. Vnde scriptum est: *Non sunt loquela neque sermones, quorum non audiantur voces eorum*. Ac si apertè diceretur: Non sunt lectionum varietates, aut eloquentiæ ornāmē-

ta vel genera, quæ suis ipse non dederit, quibus etiam promiserat, dicens: Quòd cum veniret Spiritus ille veritatis, doceret illos omnem veritatem: vt tam verbis eos quàm scientiâ perfectos efficeret: vt quæ perfectè cognoscerent differere ad integrum possent. Quantò autem de Deo perfectiorem sunt adepti scientiam quàm antiqui Patres, ij qui ab ipso vnigenito Dei sunt edocti, Gregorius in extrema parte Ezechielis, Homilia III. edisserens, ait: *Per temporum incrementa venit in Patribus scientia Dei. Vnde Daniel, Pertransibunt plurimi & multiplex erit scientia.* P. Et hoc quoque libenter accipimus quod & veritas habet, & nostræ fidei professionem commendat. Quippe quomodo per prædicationem paucorum & simplicium hominum tot in vniuersis mundi partibus Christus acquisisset, nisi eos interiùs mira sapientia repleret, atque exterioribus rationibus verborum atque eloquentiæ gratia insigniret? Sicut enim in ipsa Rhetorica fictè Tullius meminit, Nemo nisi sapientia & eloquentia præditus homines à jocūda sua consuetudine, quæ præsertim iam naturæ vim obtineret, propter vetustatem conuertere, & ad diuersas rationes vitæ traducere posset. Quanto autem difficiliora videntur ac perfectiora Christi præcepta, maior prædicatoribus eius discretio & eloquentia conferenda erat. A B. Certè nil verius ac magis rationi consentaneum quàm vt optimis tam scientiæ quàm eloquentiæ munirentur armis, quorum prædicatio ad vniuersum acquirendum mundum à Domino destinabatur, vt cum fiducia verbum omnibus prædicarent, quos & ipso cum mittit, confortat, dicens: *Cum steteritis ante Reges & Præsides, nolite cogitare quomodo aut quid loquamini. Dabitur enim vobis in illa hora quid loquamini.*

EPISTOLA XX.

QVÆ EST PETRI ABAELARDI

APOLOGIA, SEV CONFESSIO.

VNIVERSIS ECCLESIAE SANCTAE FILIIS

Petrus Abaelardus ex eis unus, sed in eis minimus.

OTVM prouerbiū est, Nil tam bene dictū, quod nō
 possit deprauari: &, vt beatus meminit Hierony-
 mus, *Qui multos scribit libros, multos sumit indices.* Ego
 quoq;, cū pauca scripserim, parua, vel, ad cōpara-
 tionem aliorum, nulla, reprehensionis notam effugere non
 potui: cū tamen in his, de quibus grauitè accusor, nullam
 (sciat Deus) meam cognoscā culpam, nec, si qua fuerit, pro-
 caciter defendam. Scripsi fortè ⁊ aliqua per errorem, quæ nō
 oportuit: sed Deum testem & iudicem in animam meam in-
 uoco, quia in his, de quibus accusor, nil per malitiam, aut per
 superbiam præsumpsi. Multa in scholis multis loquutus sum,
 nec vnquam aquas furtiuas, vel panem absconditum habuit
 mea doctrina. Palàm loquutus sum ad ædificationem fidei si-
 ue morum, quod mihi salubre visum fuit: & quæcunque scri-
 psi, libenter omnibus exposui, vt eos iudices, non discipulos
 haberem. Quod si vsquam per multiloquium excessi, vt scri-
 ptum est, *In multiloquio non effugies peccatum:* nunquam impor-
 tuna defensio me effecit hæreticum, paratus semper ad satis-
 factionem de malè dictis meis corrigendis, siue delendis: in
 quo certè proposito vsque in finem perseuerabo. Sed sicut
 meum est malè dicta mea, si qua sint, velle corrigere: sic cri-
 mina mihi non rectè iniecta me propulsare conuenit. Cū
 enim dicat beatus Augustinus, *Crudelis est qui famam suam ne-
 gligit*, ac, iuxta Tullium, *Taciturnitas imitatur confessionē*; quæ
 scripta sunt* contra me capitulis æquum duxi respondere,
 videlicet ratione seruata, qua contra derogantium linguas
 beatus Gregorius fideles his instruit verbis. Sciendum est
 quia linguas detrahentium sicut nostri studio non debemus
 excitare, ne ipsi pereant; ita per suam malitiam excitatas de-

*al. fortassis

Proverb. cap.
10.Augu. serm.
32. ad fratres
in heremo.
*al. conferti-
prisGreg. hom. 9.
lib. 1. super
Ezechiel

bemus æquanimiter tolerare, vt nobis meritum crescat; aliquando autem etiam compescere, ne dum de nobis mala disseminant, eorum, qui audire nos ad bona poterant, corda innocentium corrumpant. Agnoscat ergo fraterna charitas me qualemcunque filium Ecclesiæ, cum ipsa integrè cuncta, quæ recipit, recipere; cuncta, quæ respuit, respuere: nec me vnquam vnionem fidei scidisse, quamuis impar cæteris morum qualitate.

QVOD igitur mihi vel per malitiam impositum est, quòd scripserim, Quia Pater plena potentia, Filius quædam potentia, Spiritus sanctus nulla potentia; hæc ego verba non tam hæretica quàm Diabolica, sicut iustissimum est, abhorreo, detestor, & ea cum suo authore pariter damno. Quæ si quis in meis reperiatur scriptis, non solum me hæreticum, verum etiam hæresiarcham profiteor.

Tam Filium quàm Spiritum sanctum ex Patre profiteor esse, vt eiusdem sint cum Patre substantiæ, eiusdem penitus voluntatis atque potentiæ: quæ quorum omnino eadē substantia vel essentia, nulla potest esse vel voluntatis diuersitas, vel potentiæ inæqualitas. Quisquis etiam me scripsisse asserit, quòd de substantia Patris Spiritus sanctus etiam non sit, malitiæ id vel ignorantia maximæ fuit.

SOLVM Filium Dei incarnatum profiteor, vt nos à seruitute peccati & à iugo Diaboli liberaret, & supernæ aditum vitæ, morte sua, nobis referaret.

IESVM Christum sicut verum & vnicum Dei Filium ex substantia Patris ante sæcula genitum, ita tertiam in Trinitate personam, Spiritum quoque sanctum tam ab ipso Filio, quàm à Patre procedentem & credens assero, & asserens credo.

GRATIAM Dei ita omnibus necessariam, vt nec naturæ facultas, nec arbitrij libertas sine illa sufficere possit ad salutem. Ipsa quippè gratia nos præuenit vt velimus, ipsa subsequitur vt possimus, ipsa nos consociat, vt perseueremus.

DEVM ea solummodo posse facere credo, quæ ipsum facere conuenit: & quòd multa facere potest, quæ nunquam faciet.

MALA per ignorantiam facta culpæ sunt ascribenda: maximè cum per negligentiam nostram contingat nos ignora- * al. Multa quoque

Psal. 35.

re, quæ nobis necessarium erat prænosse. Qualis ille fuit, de quo Psalmista dicit, *Noluit intelligere ut benè ageret.*

MALA Deum impedire frequenter, fateor: quia non solum effectum malignantium præuenit, ne, quod volunt, possint: verumetiam. voluntates eorum mutat, ut à malo, quod cogitauerant, penitus diuertant. Ex Adam, in quo omnes peccauimus, tam culpam quàm pœnam nos contraxisse assero: quia illius peccatum nostrorum quoque peccatorum omnium origo extitit atque causa.

CRUCIFIXORES Christi in ipsa crucifixione grauissimum peccatum fateor commisisse.

1. Ioan. c. 4.

MULTA de Christo dicuntur, quæ non tam secundum caput, quàm secundum corpus ipsius, quod est Ecclesia, sunt accipienda: ut ille Spiritus timoris, quod est initium sapientiæ, quem videlicet timorem perfecta charitas foras mittit. Huius ergo timoris spiritum in anima Christi, qui perfectissimam habuit charitatem, nunquam fuisse credendum est, qui tamè in inferioribus membris non deest. Tantæ quippe perfectionis, & tantæ securitatis anima illa extitit per ipsam Verbi unionem, ut sciret nil omnino se committere posse, vndè pœnas incurreret, vel Deum offenderet. Castum quippe timorem in sæculum sæculi permanentem, qui propriè reuerentia charitatis dicitur, tam ipsi animæ Christi quàm electis Angelis & hominibus inesse semper recognosco. Vndè & de ipsis supernis spiritibus scriptum est, *Adorant dominationes, tremunt potestates.*

2. al. verò

Psal. 18.

POTESTATEM ligandi atque soluendi successoribus Apostolorum omnibus, ut ipsis æquè Apostolis concessam esse profiteor, & tam indignis quàm dignis Episcopis, quandiu eos Ecclesia susceperit.

OMNES in dilectione Dei & proximi æquales, æqualiter bonos esse confiteor & meritis pares: nec quicquam meriti apud Deum deperire, si bonæ voluntatis affectus à tuo præpediatur effectus. Non enim Angelus, cum à Deo missus id quod facere vult impleuerit, aut anima Christi suæ voluntati effectum addiderit, melior inde reputari debuit: sed æquè quilibet bonus permanet, siue tempus operandi habeat, siue non, dummodo æqualem bene operandi voluntatem teneat, nec in eo, quod non operatur, remaneat.

DEVM Patrem æquè sapientem, & Filium æquè benignū
 ut Spiritum sanctum profiteor: quia in nulla boni plenitu-
 dine, in nulla dignitatis gloria, vna personarum differre po-
 test ab alia.

ADVENTVM Filij in fine sæculi posse attribui Patri, nun-
 quam (sciat Deus) in mentem meam venit, nec se verbis meis
 inseruit.

SIC & animam Christi non per se ad inferos descendisse,
 sed per potentiam, omnino à meis verbis & sensu remo-
 tum est.

NOVISSIMVM quoque Capitulum, quod scripsisse cri-
 minor, quod neq; opus, neque voluntas, neque concupiscen-
 tia, neque delectatio, quæ mouet eam*, peccatum sit, neque
 debemus ea velle extinguere, nec minùs à meis tam dictis, quàm ^{* al. quæ moueant}
 scriptis alienum est.

QVOD autem Capitula contra me scripta tali fine ami-
 cus noster concluderit, ut diceret, *Hæc autem capitula partim
 in libro Theologiæ magistri Petri, partim in libro Sententiarum eius-
 dem, partim in libro, cuius titulus est, Scito te ipsum, reperta sunt,*
 non sine admiratione maxima suscepi: cum nunquam liber
 aliquis, qui Sententiarum dicatur, à me scriptus reperiatur.
 Sed sicut cætera contra me Capitula, ita & hoc quoque per
 malitiam vel ignorantiam prolatum est.

SI qua igitur consolatio in Christo Iesu, si qua sunt viscera
 pietatis, fraternam pietatem vestram exoro, ne innocentiam
 meam, quam à culpa veritas liberat, nemo * respergendo de- ^{* al. veniens}
 linquat. Charitatis quippe est, opprobrium non accipere ad- ^{Psal. 14.}
 uersus proximum, & que dubia sunt, in meliorem partem
 interpretari, & illam semper Dominicæ pietatis sententiam
 attendere, *Nolite iudicare, & non indicabimini: nolite condem- ^{Matth. 7. 1.}
 nare, & non condemnabimini.*

EPISTOLA XXI.

QVÆ EST EIVSDEM PETRI ABAELARDI,

Ad G. Parisiensem Episcopum.

G. DEI GRATIA PARISIACAE SEDIS EPIS-
 copo, unâque venerabili eiusdem Ecclesiæ Clero P. debita
 reuerentiæ subiectionem sempiternam.

f. cretus



ELATVM est nobis à quibusdam discipulorum no-
 strorum superuenientibus, quòd electus * ille & sem-
 per inflatus Catholicæ fidei hostis antiquus, cuius
 hæresis detestabilis tres Deos cōfiteri, imo & prædi-
 care Sueffionensi Cōcilio à Patribus conuicta est, atq; insuper
 exilio punita, multas in me contumelias & minas euome-
 rit, viso Opusculo quodam nostro de fide sanctæ Trinitatis,
 maximè aduersus hæresim præfatam, qua ipse infamis est, cō-
 scripto. Nunciatum insuper nobis est à quodam discipulo
 nostro, cui indè locutus est, quòd vos tunc absentem expe-
 ctaret, vt vobis in illo Opusculo quasdam hæreses me inse-
 ruisse monstraret: & vos quoque contra me, sicut & omnes
 quos nititur, commoueret. Quòd si ita est, vt in hoc quoque
 nunc ille persistat, precamur vos athletas Domini, & fidei sa-
 cræ defensores; vt statuto loco & tempore conuenienti me
 & illum conuocetis, & coram Catholicis & discretis viris,
 quos vobiscum prouideatis, quid ille aduersum me absentem
 mussitet audiantur, & debita correctioni subiaceant, vel ille
 de tanti criminis impositione, vel ego de tanta scribēdi præ-
 sumptione. Interea autem Deo gratias refero quòd summū
 Dei inimicum & fidei labefactorem, in fide contrarium si per-
 fero, & pro fide qua stamus dimicare compellor; & quod nu-
 mero bonorum hominum iam esse videor ex eius infestatio-
 ne, quem solis bonis semper constat esse infestum, cuius tam
 vita quàm disciplina omnibus est manifesta. Hic cōtra egre-
 gium illum præconem Christi Robertum Arbrofello contu-
 macem ausus est Epistolam confingere, & contra illum ma-
 gnificum Ecclesiæ Doctorem Anselmum Cantuariensem

Archiepiscopum adeò per contumelias exarsit, vt ad Regis Anglici imperium ab Anglia turpiter impudens eius contumacia sit eiec̃ta, & vix tum cum vita euaserit. Vult cum infamix habere participem, vt per infamiam bonorum suam cõsoletur infamiam: nec nisi bonum odit, qui bonus esse non sustinet: qui ob temperantiam^{* f. intem-} arrogantix suæ, ab vtróque^{perantiam} regno, in quo conuersatus est, tam Anglorum scilicet quàm Francorum, cum summo dedecore expulsus est, & in ipsa, cuius pudore Canonicus dicitur, beati Martini Ecclesia numquam, vt aiunt, à Canonicis verberatus morem solitum seruauerit. Nomine designare quis iste sit superuacaneū duxi, quem singularis infamia infidelitatis & vitæ eius singulariter notabilem facit. Hic sicut pseudo-Dialecticus, ita & pseudo-Christianus, cùm in Dialectica sua nullam rem partes habere æstimat, ita diuinã paginã impudenter peruertit; vt eo loco, quo dicitur Dominus partem piscis assi comedisse, partem huius vocis, quæ est piscis assi, non partem rei intelligere cogatur. Ne quid igitur mireris, si is qui in cœlum os ponere conueuit, in terris insaniat; & qui Dominum persequitur, membris eius deroget; & nemini parcit, qui nec sibi parcere potest. Valere.

EPISTOLA XXII.

QVÆ EST PETRI VENER. ABB. CLVN.

Ad Dominum Innocentium II. Papam,
pro Petro Abaelardo.

SUMMO PONTIFICI ET NOSTRO SPECIALI

*Patri, Domino Papæ Innocentio frater Petrus humilis
Cluniacensium Abbas obedientiam
& amorem.*



MAGISTER Petrus sapientix vestrx, vt credo, optimè notus, nuper à Francia veniens, per Cluniacum transitum fecit: quæsiuimus quò tēderet, grauatam se vexationibus quorundam, qui sibi, quod valde abhorrebat, nomen hæretici imponebant, Maiestatem


Apostolicam se appellasse, & ad eam confugere velle respondit. Laudauimus propositum, &, vt ad notum & commune refugium confugeret, admonuimus: iusticiam Apostolicam, quæ nulli vnquam etiam extraneo vel peregrino defuit, sibi non defuturam diximus. Misericordiam ipsam, vbi ratio postulare sibi occursum promissimus. Venit interim Dominus Cisterciensis Abbas, & de pace ipsius & Domini Claraualensis, cuius causa appellauerat, nobiscum & cum ipso pariter egit. Dedimus & nos operam paci eius: &, vt ad illum cum ipso iret, hortati sumus. Addidimus hoc monitis nostris, vt si qua Catholicas aures offendentia aut scripsisset, aut dixisset: hortatu eius & aliorum bonorum & sapientum, & à verbis suis amoueret, & à libris abraderet. Et factum est ita. Iuit, redijt, cum Domino Claraualensi, mediante Cisterciensi, sopitis prioribus querelis, se pacificè conuenisse reuersus retulit. Interim à nobis admonitus, magis autem à Deo, vt credimus, inspiratus, dimissis scholarum & studiorum tumultibus, in Cluniaco vestra sibi perpetuam mansionem elegit. Quod nos senectuti eius, debilitati eius, religioni eius congruere putantes, & scientiā eius vobis ex toto non incognitam magnæ fratrum nostrorum multitudini proficere posse credentes, voluntati eius assensimus: &, si sic benignitati vestræ beneplacitum esset, benignè & cum gaudio nobiscum, vestris, vt nostis, per omnia, remanere concessimus. Rogo igitur ego qualiscumque, tamen vester, rogat deuotissimus vobis Cluniacensis Conuentus, rogat ipse per se, per nos, per præsentium latores filios vestros, per has, quas vt scriberem rogauit literas: vt reliquos dies vitæ & senectutis suæ, qui fortasse non multi sunt, in Cluniaco vestra eum consummare iubeatis, & ne à domo, quam velut passer, ne à nido, quem velut turtur inuenisse se gaudet, aliquorum instantia aut expelli, aut commoueri valeat, more quo omnes bonos colitis, & etiam istum dilexistis, scuto defensionis Apostolicæ protegatis.

EPISTOLA XXIII.

QVÆ EST EIVSDEM PETRI ABB. CLVN.

Ad Heloissam Paracliti Abbatissam.

VENERABILI ET IN CHRISTO PLVRIMVM
*dilectæ sorori Heloissæ Abbatissæ, frater Petrus humilis
 Cluniacensium Abbas, Salutem, quam promissit
 Deus diligentibus se.*



ACCEPTIS literis charitatis tuæ*, quas mihi nuper ^{He litteræ non extant} per filium meum Theobaldum misisti, gaudius, & eas mittētis gratia amicabiliter amplexus sum. Volui statim rescribere quod animo infederat: sed impedientibus importunis curarum exactionibus, quibus plerumque, immo penè semper, cedere compellor, non potui. Vix tamen à tumultibus tandem interpolata die, quod conceperam, attentaui. Visum est vt affectui tuo erga me, quem & tunc ex literis, & prius ex mihi missis xenijs cognoueram: saltem verborum vicem rependere festinarem, & quantum in corde meo locum tibi dilationis in Domino seruarem, ostenderem. Reuera enim non nunc primùm diligere incipio, quam ex multo tempore me dilexisse reminiscor. Necdum plenè metas adolescentiæ excesseram, necdum in iuueniles annos euaseram, quando nomen, non quidem adhuc religionis tuæ, sed honestorum tamen & laudabilium studiorum tuorum mihi fama innotuit. Audiebam tunc temporis mulierem, licet necdum sæculi nexibus expeditam, literatoris scientiæ (quod perrarum est) & studio licet sæcularis sapientiæ summam operam dare: nec mundi voluptatibus, nugis vel delitijs, ab hoc vtili discendarum artium proposito retrahi posse. Cùmque ab his exercitijs detestanda desidia totus penè torpeat mundus, & vbi subsistere possit pes sapientiæ, non dicam apud sexum femineum, à quo ex toto explosus est, sed vix apud ipsos viriles animos inuenire valeat: tu illo efferēdo studio tuo & mulieres omnes euicisti, & penè viros vniuersos superasti. Mox verò, iuxta verba Apostoli, vt com- ^{Galat. 3.}

placuit ei, qui te segregauit ex utero matris tuæ, vocare te per gratiam suam, longè in melius disciplinarum studia commutasti: & pro Logica Euangelium, pro Physica Apostolum, pro Platone Christum: pro Academia claustrum tota iam & verè Philosophica mulier elegisti. Eripuisti victis spolia hostibus, & de thesauris Ægyptiacis per huius peregrinationis desertum transiens, pretiosum in corde tuo tabernaculum

Exod. c. 15. Deo erexisti. Cantasti cum Maria, demerso Pharaone, canticum laudis; & beatę mortificationis tympanum, ut olim illa, præ manibus gerens, noui modulaminis melos vsque ad ipsas deitatis aures docta tympanistria transmisisti. Conculcasti iam incipiendo, quod per omnipotētis gratiam bene perseverando conteres vetusti anguis, ac semper mulieribus insidiantis caput: atque elides, ut nunquam ulterius contra te sibilare audeat. Ostentui facis & facies superbum principem

Iob. cap. 41. mundi: & illum, qui diuina voce vocatur Rex filiorū superbiæ, & iuxta ipsius Dei ad beatum Iob verba, tibi ac tecum

Iob. cap. 40. cohabitantibus ancillis Dei alligatum ingemiscere coges. Et verè singulare miraculum, ac super omnia mirāda opera extollendum, eum, quo, iuxta prophetam, Cedri non fuerunt

Ezech. c. 31. altiores in Paradiso Dei, & cuius summitatem frondium abietes non adæquarunt, à fragili sexu vincī: & fortissimum Archangelum à muliere infirmissima superari. Gignitur tali duello maxima gloria conditori: infertur è conuerso summa ignominia deceptor. Exprobratur ei hoc certamine, non solum stultum, sed & super omnia ridiculum fuisse, illum aspirasse ad æqualitatem sublimissimæ maiestatis, qui nec breue luctamen ferre præualet fœminæ debilitatis. Sustinet caput cuiuslibet victricis illius, merito talis victoriæ, gemmeam à rege cœlorum coronam; ut quanto, in transacta pugna carne infirmior, tantò in remuneratione sempiterna appareat gloriosior. Hæc, charissima in Domino soror, verè non adulando, sed exhortando dico, ut magnum, in quo aliquandiu perstitisti, bonum attendens, ad cautè illud conseruandum animosior reddaris: ut sanctas illas, quæ tecum Domino seruiunt, secundum gratiam à Deo tibi collatam, ut in eodem sollicitè agone contendant, verbis pariter & exēplis accendas. Es enim vnum de animalibus illis, quæ Ezechiel

Ezech. c. 1. Propheta vidit, licet sis mulier: quæ non tantum ut carbō

ardere, sed vt lampas ardere debes pariter & lucere. Es quidem discipula veritatis, sed es etiam ipso officio, quantum ad tibi cōmissas pertinet, magistra humilitatis. Humilitatis planè, & totius cælestis disciplinæ, tibi à Deo magisterium impositum est: vndè non solum tui, sed & commissi gregis curam habere, & pro vniuersis, maiorem vniuersis debes mercedem recipere. Manet tibi certè palma pro omnibus: quia, vt optimè nosti, quotquot ducatu tuo mundum mundique principem vicerint, tot tibi triumphos, tot gloriosa trophæa apud æternum regem & iudicem præparabunt. Sed nec omnino apud mortales insolitum est feminas feminis principari, nec ex toto inusitatum etiam præliari; ipsos insuper viros ad prælia comitari. Nam si verum est quod dicitur

fas est & ab hoste doceri,

& apud gentiles Amazonum Regina Penthesilæa cum suis Amazonibus, non viris, sed mulieribus, Troiani belli tempore, sæpe pugnasse scribitur: & in populo etiam Dei, prophetissa Debora Barach iudicem Israel contra Ethnicos animasse legitur. Cur ergo non liceat feminas virtutis contra fortem armatum ad prælia procedentes, ductrices fieri exercitus Domini, cum & illa, quod quidem indecès videbatur, manu tamen propria contra hostes pugnaverit, & hæc nostra Debora viros ipsos ad bella diuina commouerit, armauerit, accenderit? Victo dehinc Iabin rege, occiso Sisara duce, deleto prophano exercitu, cecinit statim Canticum illa, illudque Dei laudibus deuota dicauit. Erit, Dei gratia hoc faciente, post datam tibi tuisque de longè fortioribus hostibus victoriam, longè tuum gloriosius Canticum, quod sic læta cantabis, vt nunquam postea lætari, nunquam cantare desistas. Interim eris ancillis Dei, hoc est cælesti exercitui, quod illa suo Iudaico populo Debora: nec à tam lucroso certamine, aliquo tempore, quolibet casu, nisi vincendo cessabis. Et quia hoc nomen Debora, vt tua nouit eruditio, lingua Hebraica apem designat, eris etiam in hoc & tu Debora, id est apis. Mellificabis enim tu, sed non soli tibi, quia quicquid boni per diuersos & à diuersis collegisti, exemplo, verbo, modisque quib' poteris, domesticis sororibus seu quibuslibet alijs, totum refundes. Satiabis hoc exiguo vitæ mortalis tempore & te ipsam sacrarum literarum secreta dulcedine, & beatas

Ouid. met.

lib. 4.

Iustin. bisp.

lib. 2.

Iudic. c. 4.

Iudic. c. 5.

Isid. cap. 3.

sorores aperta prædicatione, quousque, iuxta vocem propheticam, in illa, quæ promittitur, die, distillent montes æternam dulcedinem, & colles fluant lac & mel. Hoc enim licet de tempore gratiæ dicatur, nil obstat, immò & dulcius est, ut de tempore gloriæ accipiatur. Dulce mihi esset diu tecum de huiusmodi protrahere sermonem, quia & famosa eruditione tua delector, & prædicata mihi à multis religione tua longè magis allicior. Utinam te Cluniacus nostra habuisset! Utinam te iucundus Marciniaci carcer cum cæteris Christi ancillis libertatem inde cælestem expectantibus inclusisset! Prætulissem opes religionis ac scientiæ maximis quorumlibet regum thesauris: & illarum sororum illud præclarum collegium cohabitatione tua clariùs rutilare gauderem. Retulisses & ipsa ab ipsis non modicum quæstum, & summam mundi nobilitatem ac superbiam pedibus substratam mirareris. Cernereres omnigenos sæculi luxus miranda parcite mutatos, & sordida quondam vasa diaboli in mundissima Spiritus sancti templa conuersa. Videres puellas Dei, Satanæ vel mundo velut furto subtractas, super innocentiae fundamentum altos virtutum erigere parietes: & usque ad ipsa cæli fastigia scælicis fabricæ cacumen producere. Lætareris Angelica virginitate florentes castissimis viduis iunctas & vniuersas pariter beatæ illius & magnæ resurrectionis gloriam sustinentes, infra arcta septa domorum etiam corporaliter beatæ spei velut sepulchro iam conditas. Quæ licet omnia, & fortassis maiora, cum tibi datis à Deo collegis habeas, licet fortè nihil ad sacrarum rerum studium pertinens tibi addi possit: augeretur tamen augmento gratiarum tuarum non paruis, ut arbitror, commodis respublica nostra. Sed quamuis à dispensatrice omnium rerum prouidentia Dei hoc nobis de te negatum sit, concessum tamè est de illo tuo, de illo, inquā, sæpe ac semper cū honore nominādo seruo ac verè Christi Philosopho magistro Petro: quem in vltimis vitæ suæ annis eadē diuina dispositio Cluniacū transmisit: & eam in ipso & de ipso super omne aurum & topazion munere cariore ditauit. Cuius sanctæ, humili ac deuotæ inter nos conuersationi, quod quantumve Cluniacus testimonium ferat, brevis sermo non explicat. Nisi enim fallor, non recolo vidisse me illi in humilitatis habitu & gestu similem: in tantum ut nec Germanus

abjectior, nec ipse Martinus bene discernenti pauperior appareret. Cūque in magno illo fratrum nostrorum grege, me compellente, gradum superiorem teneret, vltimus omnium vestitu incultissimo videbatur. Mirabar sæpe, & in processionibus eo me cum reliquis pro more præcedente, penè stupebam, tanti tamque famosi nominis hominem sic seipsum contemnere, sic se abijcere posse. Et quia sunt quidam religionis professores, qui ipsum quem gerunt habitum religiosum nimis esse cupiunt sumptuosum: erat ille prorsus parcus in istis, & cuiuscunque generis simplici veste contentus, nil vltra quærebat. Hoc & in cibo, hoc & in potu, hoc & in omni cura corporis sui seruabat: & non dico superflua, sed & cuncta nisi valde necessaria, tam in se quàm in omnibus verbo pariter & vita damnabat. Lectio erat ei continua, oratio frequens, silentium iuge, nisi aut fratrum familiaris collatio, aut ad ipsos in Cōuentu de diuinis publicus sermo eum loqui vrgebant. Sacramenta cœlestia, immortalis Agni sacrificium Deo offerendo, prout poterat, frequentabat, immo postquam literis & labore meo Apostolicæ gratiæ redditus est, penè continuabat. Et quid multa? mens eius, lingua eius, opus eius, semper diuina, semper philosophica, semper eruditoria meditabatur, docebat, fatebatur. Tali nobiscum vir simplex & rectus, timens Deum & recedens à malo, tali, inquam, per aliquantum temporis conuersatione vltimos vitæ suæ dies consecrans Deo, pausandi gratia (nam plus solito scabie & quibusdam corporis incommoditatibus grauabatur) à me Cabillonem missus est. Nam propter illius soli amœnitatem, qua cunctis penè Burgundiæ nostræ partibus præminet, locum ei habilem prope urbem quidem, sed tamò Arari interfluente, prouideram. Ibi iuxta quod incommoditas permittebat, antiqua sua reuocans studia, libris semper incumbibat: nec, sicut de magno Gregorio legitur, momentū aliquod præterire sinebat, quin semper aut oraret, aut legeret, aut scriberet, aut dictaret. In his sacrorum operum exercitijs cum aduentus illius Evangelici visitatoris reperit, nec eum, vt multos, dormientem, sed vigilantem inuenit. Inuenit eum verè vigilantem, & ad æternitatis nuptias, non vt fatuam, sed vt sapientem virginem euocauit. Attulit enim ille secum lampadem plenam oleo, hoc est conscientiam refer-

tam sanctæ vitæ testimonio. Nam ad soluendum commune mortalium debitum morbo correptus, eoque ingrauescente in breui ad extrema perductus est. Tunc verò quàm sanctè, quàm deuotè, quàm Catholicè primò fidei, dehinc peccatorum confessionem fecerit, quanto inhiantis cordis affectu viaticum peregrinationis ac vitæ æternæ pignus, corpus scilicet redemptoris Domini acceperit, quàm fideliter corpus suum & animam hic & in æternum ipsi commendauerit, testes sunt religiosi fratres & totus illius Monasterij, in quo corpus sancti martyris Marcelli iacet, Conuentus. Hoc magister Petrus sine dies suos consummauit: & qui singulari scientiæ magisterio toti penè orbi terrarum notus & vbique famosus erat, in illius discipulatu qui dixit, *Discite à me quia mitis sum & humilis corde*, mitis & humilis perseuerans, ad ipsum, vt dignum est credere, sic transiuit. Hunc ergo, venerabilis & charissima in Domino soror, cui post carnalem copulam tantò validiore quàm meliore diuinæ charitatis vinculo adhæstisti, cum quo & sub quo diu Domino deseruisti: hunc, inquam, loco tui, vel vt te alteram in gremio suo confouet, & in aduentu Domini, in voce Archangeli, & in tuba Dei descendens de cælo, tibi per ipsius gratiam restituendum reseruat. Esto ergo in Domino memor ipsius, esto etiam, si placet, & sanctis sororibus tecum domino famulantibus fratres congregationis nostræ ac sorores, qui vbique terrarum pro posse suo eidem, cui & tu, Domino famulantur, sollicitè commenda. Vale.

EPITAPHIUM MAGISTRI

PETRI ABAELARDI,

A Petro Venerabili Abb. Clun. scriptum.


G Allorum Socrates, Plato maximus Hesperiarum,
 Noster Aristoteles, Logicis, quicunque fuerunt,
 Aut par, aut melior, studiorum cognitum orbi
 Princeps, ingenio varius, subtilis & acer.
 Omnia vi superans rationis, & arte loquendi
 Abaelardus erat: sed tunc magis omnia vicis,
 Cùm Cluniacensem monachum moremque professus,
 Ad Christi veram transiuit Philosophiam.
 In qua longæ uæ bene complens ultima uitæ,

*Philosophis quandoque bonis se connumerandum
Spem dedit, vnde nas Maioreuocante calendas.*

EPISTOLA XXIV.

QVÆ EST HELOISSÆ AD PETRVM
ABB. CLUNIACENSEM.

PETRO REVERENDISSIMO DOMINO ET PA-
*tri ac venerabili Abbati Cluniacensium Heloyssa humilis
Dei & eius ancilla spiritum gratia salutaris.*



ISITANTE nos Dei misericordia, dignationis vestræ nos visitauit gratia. Gratulamur, pater benignissime, &, quòd ad paruitatem nostram magnitudo vestra descenderit, gloriamur. Est siquidem vestra visitatio, magna magnis quibuslibet gloriatio. Norunt alij quantum eis vtilitatis vestræ contulerit præsentia sublimitatis: ego certè non dicam enarrare dictu, sed nec ipso valeo comprehendere cogitatu, quàm vtilis, quàm iucundus vester mihi fuerit aduentus. Abbas noster, Dominus noster apud nos anno præterito xv i. Kal. Decemb. Missam celebrastis, in qua Spiritui sancto nos commendastis: in Capitulo diuini nos sermonis elogio cibastis, corpus magistri nobis dedistis, ac beneficium Cluniacense concessistis. Mihi quoque, quam nec ancillæ nomine dignam sublimis humilitas vestra tam scripto quàm verbo sororem vocare non dedignata est, singulare quoddam velut amoris & synceritatis priuilegium donastis, Tricenarium scilicet, quod mihi defunctæ Conuentus Cluniacensis persolueret. Indixistis etiam quòd donum illud sigillatis confirmaretis apicibus. Quod itaque sorori, immò ancillæ concessistis; frater, immò Dominus impleatis. Placeat etiam vobis aliud mihi sigillum mittere, in quo Magistri absolutio literis apertis contineatur: vt sepulchro eius suspendatur. Memineritis & amore Dei & nostri Astralabij vestri, vt aliquam ei vel à Parisiensi vel alio quolibet Episcopo præbendam acquiratis. Vale. Dominus vos custodiat, & præsentiam vestram quandoque nobis exhibeat.

EPISTOLA XXV.

QVÆ EST RVRSVM PETRI CLVN. ABB.
AD HELOISSAM,

VENERABILI ET CHARISSIMÆ SORORI
*nostræ, Deique ancillæ Heloissæ ancillarum Dei Ductrici ac
magistræ frater Petrus humilis Cluniacensium
Abbas, salutis à Deo, amoris à nobis
in Christo plenitudinem.*



AVISVS sum, & hoc non parum, legens sanctita-
tis vestræ literas, in quibus agnoui aduentum meū
ad vos non fuisse transitorium, ex quibus aduer-
ti non solum me apud vos non fuisse, sed & à vobis
nunquam postmodum recessisse. Non fuit, ut video, illud
hospitium meum velut memoria hospitis vnius noctis præ-
tereuntis, nec factus sum advena & peregrinus apud vos, sed
civis sanctarum, & domesticus, utinam, Dei. Sic sacræ men-
ti vestræ cuncta inhæserunt, sic benigno spiritui vestro om-
nia impressa sunt, quæ in illo fugaci seu volatico aduētū meo
dixi, quæ feci, ut non dicam ea quæ studiosè à me tunc dicta
sunt, sed nec verbum fortè negligenter prolatum, ad terram
cederet. Ita notastis omnia, ita tenaci memoriæ ex syn-
ceritatis affectu diriuatæ commendastis, quasi magna, quasi ex-
lestia, quasi sacrosancta, quasi ipsius verba vel opera Iesu
Christi. Fortè mouerunt vos ad illa sic retinenda, verba cō-
munis regulæ, hoc est tam nostræ quàm vestræ, quæ de ho-
spitibus præcipit, Christus in eis adoretur, qui & suscipitur.
Forſitan & illa de Præpositis, licet ego præpositus vobis non
sim, *Qui vos audit, me audit.* Utinam hæc mihi semper gratia
deretur apud vos, ut mei memor esse dignemini, ut pro me om-
nipotentis misericordiam cum sacro gregis vobis commissi
collegio deprecemini. Rependo & ego in hoc vobis vicem
quam possum: quia & longè antequàm vos viderem, & ma-
ximè ex quo vestri notitiam habui, singularem vobis in inti-
mis mentis meæ recessibus veræ, non fictæ charitatis locum
seruaui. Donum quod, de Tricenario vobis præsens feci,
absens,

Regul. c. 53.

Regul. c. 5.

Lut. cap. 10.

absens, vt voluistis, scriptum & sigillatum transmittito. Mitto etiam, sicut mandastis, magistri Petri absolutionem in charta similiter scriptam & sigillatam. Astralabio vestro vestrique causa nostro, mox vt facultas data fuerit, in aliqua nobilium Ecclesiarum præbendam libens acquirere laborabo. Restamen difficilis est: quia, vt sæpe probaui, ad dandas in Ecclesiis suis præbendas, varijs obiectis occasionibus, valde se difficiles præbere Episcopi solēt. Faciam tamen causa vestri quod potero, mox vt potero. Valete.

ABSOLVTIO PETRI ABAELARDI.

EGO Petrus Cluniacensis Abbas, qui Petrum Abaelardum in Monachum Cluniacensem recepi, & corpus eius furtim delatum He-loisse Abbatisse & Monialibus Paracleti concessi, autoritate omnipotentis Dei & omnium sanctorum absoluo eum pro officio ab omnibus peccatis suis.



LITERÆ,
SEV DIPLOMATA;
SVMMORVM PONTIFICVM,

Ad Heloissam Paracliti Abbatissam,

EX CHARTVLARIO PARACLITENSIS
Canobij.

I.



INNOCENTIVS Episcopus servus servorum Dei, dilectis in Christo filiabus HELOISSAE Priorissæ, cæterisque sororibus in Oratorio S. Trinitatis, quod in pago Trecenti, in Parrochia Quinceij, supra fluvium Arduconem situm est, diuino famulatu mancipatis tam præsentibus quàm futuris in perpetuum. Quoties illud à nobis petitur quod rationi cognoscitur convenire, animo nos decet libenti concedere, & petentium desiderijs congruum impertiri suffragium. Proinde dilectæ in Domino filiæ, vestris iustis postulationibus assensum præbentes, Monasterium S. Trinitatis, in quo diuino vacatis servitio sub Apostolicæ Sedis protectione suscipimus, & præsentis scripti pagina communimus. Statuentes vt quascumque possessiones, quæcumque bona in præsentiarum iustè & legitimè possidetis, aut in futurum concessione Pontificum, liberalitate Regum vel Principum, oblatione fidelium seu alijs iustis modis præstante Domino poteritis adipisci, firma vobis in perpetuum & illibata permaneant. Sane laborum vestrorum decimas quas proprijs excolitis sumptibus, seu annualium absque contradictione aliqua vobis

concedimus possidendas. Nulli ergo hominum fas sit præfatum Monasterium temerè perturbare, aut eius possessiones auferre, vel ablatas retinere, minuere, aut aliquibus vexationibus fatigare, sed hæc omnia integra conseruentur vestris vsibus perpetuò profutura. Ad iudicium autem perceptæ huius à Romana Ecclesia libertatis, sex nummos quotannis Lateranensi Palatio persoluetis. Si qua igitur in futurum Ecclesiastica secularisue persona hanc nostræ Constitutionis paginam sciens, contra eam temerè venire tentauerit, secundo tertiòque commonita, si non satisfactione congruâ emendauerit, potestatis honorisque sui dignitate careat, & à sacratissimo corpore ac sanguine Dei & Domini Redemptoris nostri Iesu Christi aliena fiat, atque in extremo examine districtæ ultioni subiaceat. Conseruantes autem interuenientibus BB. Apostolorum Petri & Pauli meritis gratiam Domini nostri Iesu Christi & æternæ felicitatis præmia consequantur. Amen. Ego Innocentius Catholicæ Ecclesiæ Episcopus. Datum Autissiodori per manū Aldierici S. Rom. Ecclesiæ Diaconi Card. & Cancellarij, 1111. Cal. Decembr. Ind. x. Incarnationis Dominicæ Anno MCXXXI. Pontificatus vero Domini Innocentij Papæ 11. An. 11.

II.

INNOCENTIVS Episcopus, seruus seruorum Dei, dilectis in Christo filiabus HELOYSÆ Abbatissæ, cæterisque sororibus in Oratorio sanctæ Trinitatis, quod in pago Trecentensi, in parrochia Quinceij supra fluuium Arduconem situm est, diuino famulatu mancipatis tam præsentibus quàm futuris in perpetuum. Quotiens illud, &c. *ut in præcedenti.* & j. Ad hæc adijcimus statuimus, ne propter benedictionem & cōsecrationem percipiendam de Monasterio exire cogamini. Nec pro electione Abbatissæ, aut alia qualibet occasione Episcopus, vel alia quælibet persona, vllum vobis grauamen vel molestiam inferre præsumat. Nulli ergo omnino, &c. & j. Ad iudicium autem perceptæ huius à Romana Ecclesia libertatis vnum obolum aureum quotannis Lateranensi Palatio persoluetis. Si qua igitur, &c. & j. Data Lisis per manū Almerici S. R. E. Diaconi Cardinalis & Cancellarij xv, Xx ij

Kalend. Iulij Indi&. xii. Incarnationis Dominicæ anno
M C X X X V I. Pontificatus Domini Innocentij Papæ ii.
anno vi.

III.

INNOCENTIUS Episcopus seruus seruorum Dei, dilectis
in Christo filiabus HELOISSÆ Abbatisæ, & Sanctimo-
nialibus Paraclitensis Cœnobij salutem & Apostolicam be-
nedictionem. Religiosis desiderijs dignum est facilem præ-
bere consensum, vt fidelis deuotio celerem sortiatur effectû.
Quanto itaque femineus sexus extat fragilior, tanto magis
erga vos paternam curam atque sollicitudinem volumus ex-
hibere, & in quibus secundum Deum possumus quieti & vti-
litati vestræ salubriter prouidere. Locum itaque suum cum
omnibus ad ipsum pertinentibus, quem Gundricus Sacerdos
in paterno prædio constructum religiosorum precibus & cõ-
silio rationabiliter vobis concessit, auctoritate vobis Aposto-
lica confirmamus, & concessionem ipsam præsentis scripti
pagina roboramus. Si quis autem huius nostræ Constitutio-
nis paginam sciens cõtra eam temerè venire temptauerit, se-
cundo tertioque commonitus, si non reatum suum congrua
satisfactione correxerit, indignationẽ omnipotentis Dei, &
beatorum Petri & Pauli Apostolorum eius se nouerit incur-
surum. Datum Later. iij. Kal. Ianuar.

IIII.

LVCIUS Episcopus seruus seruorum Dei dilectis in Do-
mino filiabus Heloissæ Abbatisæ, cæterisque sororibus
in Oratorio S. Trinitatis diuino famulatui mancipatis, &c.
vt in i. Innocentij. & j. Datum Laterani per manum Barrocij
Capellani & scriptoris, Id. Mart. Ind. vii. Incar. Dominicæ
anno M C X L I I I. Pontificatus verò domini Lucij ii. Papæ
anno i.

V.

EVGENIUS Episcopus seruus seruorum Dei, dilectis in
Christo filiabus Heloissæ Abbatisæ Monasterij sancti
Spiritus eiusque sororibus tam præsentibus quàm futuris

• regularem vitam professis. Ad hoc nobis à prouisorum omnium bonorum Deo Pastoralis officij cura commissa est, ut beneplacentem Deo religionem laboremus statuere, & stabilitam exacta diligentia conseruare. Ea propter, dilectæ in Domino filiæ, vestris iustis postulationibus clementer annuimus, & præfatum Monasterium, in quo diuino mancipatæ estis obsequio, sub beati Petri & nostra protectione suscipimus, & præsentis scripti priuilegio communimus. Statuentes, ut quascumque possessiones, quæcumque bona in agris, vineis, pratis, siluis, molendinis, aquis, decimis, seu alijs idem Monasterium in præsentiarum iustè & Canonicè possidet, aut in futurum concessione Pontificum, largitione Regum, vel Principum, oblatione fidelium, seu alijs iustis modis Deo propitio poterit adipisci, firma vobis, eisq; , quæ post vos successerint, & illibata permaneant, in quibus hæc specialiter duximus annotanda. Terram videlicet, in qua ipsum Monasterium constructum est. Culturas in mōte Limarsum. Quicquid habetis ex venditione seu donatione Milonis. Duo iugera terræ ante ipsum Monasterium. Aliam terram in eodē loco. Culturam de fonte Amam. Totam terram quam Rainaldus habebat in parrochia de Quinceio, ex vtraque parte fluuioli Arducionis. Molendinum de Brusleto, culturam & quasdam alias terras, quas Hilduinus Decanus, & Seguinus frater eius, & cognati eorum Monasterio vestro dederunt. Medietatem furni de Quinceio, & vineam Baboel de Calestra*. Quicquid Arpinus de Mairiaco tenebat de feodo Milonis, ex illa parte Sequanæ in qua Monasterium est. Terram de Busseto, terras quas habetis apud Fontanetum Petrosū*, & apud Bociam Vagonis, & in valle Faiel. Quatuor ochas de terra apud Ferroum*, medietatem totius nemoris & terræ de Furuellis. Decem iugera terræ apud Bocennaium*. Tertiam partem molendini molentis & sextā terentis, & totā piscationē quam Maria de Balbusia habebat apud Pontes, & terrā apud Pomerulos*. Modiū frumenti singulis annis ab illustri Comite Theobaldo vobis donatū, & totā piscationē in molendinis suis apud Pontes. Vineā quā dedit vobis Berfridus de Calestra, & duodecim denarios census apud sanctum Ferreolum, vineam apud Calestram, censum quinque solidorum in eodem loco. Apud Montem portarū

* Chalautre

* Pontenay la Perrenx.

* Ferroux

* Bocenay

* Pomerai.

censum trium solidorum. Terram de Croisum. Totam terrā, quam Rainaldus Filius Milonis habebat in Murgeoris, vsus nemorum de Gurgiuolt & de Poiseio, de Maceilliaco, de Charmcio & omnium nemorum Anseli de Triagnello tam ad pasturam pecorum quā ad ædificia, seu alia necessaria.

* *Pont de
Baldimento*

Censum quinq; solidorum in Ponte de Baldimento*, & sex solidos in molendino de Canturanæ, & quinque solidos in Oscha Teold, apud Gurgiuolt, & vineam de Fonte Beton, & quicquid Vvillelmus habebat in prato Gandleu; vineam de Saldon. Ex dono Gauterij de Curtemaim duos sextarios sili-
ginis singulis annis. Terram de Tilliaco. Quicquid legitimè habetis ex dono Heruulfi de Insula apud Villam-nouam &

* *Tranquais*

* *Somme
fontaine*

Tranqueil*. Terram de Spineto, terram apud Gumeri, terram apud Summum fontem*, & apud Trembleium. Molendinū de Barsam. Medietatem molendini de fonte Amau. Partem molendini Pagani de Frou. Quicquid habetis apud Planteiz. Censum sex denariorum ab Vberto de Tranqueil. Quicquid Thehelinus habebat in eodem loco præter homines. Terram Amici militis de Summo fonte. Quicquid Ermen-
gardius Postellus habebat in molendinis Canonorum Vil-
la Maurorum*, & in hortis ultra pontem Vanæ. Partem pisca-
tionis, quam Felix habebat in aqua Bucennaij, & partem quā habebat in terra Scrobium, & censum duorum solidorum ab eodem. Terram, in qua granchia vestra est, & oscham in eodem loco. Terram quam dederunt Amaldricus & Hildui-
mus. Prata de Vergeron. Terras quas habetis apud Quin-
ceium. Quartam partem prati de Orella. Quatuor arpen-
nos prati apud Tilleium. Medietatem molendini de Quin-
ceio. Totum tenementum Gaufridi. Dimidium arpennum vineæ Ponstingiatur. Ex dono Hugonis Capri vineam de Montearpon, & domum in qua ipse manebat, & Cellarium. Tenementum Guarini apud Sanceium. Vineam apud Sesa-
nam. Terram inter Pisiacum* & Aizium. Molendinum de Bretenniaco. Molendinum, terram, & pratum apud Mar-
cilliaco. Octauam partem nemoris de Pisiaco. aliam par-
tem in eodem nemore. Ex dono Gualterij Rûgifer quatuor arpen-
nos prati, & x l. solidos census. Ex dono Heloissæ de Villari, terram, vineam, & domum. Quicquid Rodolphus Gaius habebat in bosco Fraxineti, ex dono præfati Comitis

* *Pisy & Aisy*

Theobaldi. Sexdecim sextarios annonæ in molēdinode Stagno. Molendinum de Changeio. Quindecim sextarios annonæ in molendino de Planca. Molendinum de Iustigniaco *. Medietatem molendini de Creuecuer & vineam. Medietatem furni Vicecomitissæ. Medietatem prati subter Ecclesiam S. Nicolai. Vineas Paulæ & Emmellinæ, tenementum Petri de Valle, & tres denarios census de Ponne. Vineas Gualcherij Cementarij. Arpennum vineæ, & xiiii. denarios census à Frodemundo Peregrino. Vineam Hugonis Butarij. Vineam Rahaldis. Septē iugera terræ à Petro de Ponne. Quatuor iugera ab Alburge de Ponne. Duo iugera & aream à prædicto Gualcherio. Septem iugera ab Ada de Altomuro. Arpennum prati, & dimidium, & medietatem domus ab Emelina Reburfata. Arpennum prati & dimidium à Bonade Prouuino. Pratum Teodorici. Domum Ascranæ & plateam. Domos Richeldis, Paulæ, Hugonis Butarij, Loberij, Adan, Ioannis Tyranni, & dimidiam domum Sunbardi. Domum Bonelli Vuauræ, & medietatem alterius domus. Tres cameras & vineam eiusdem. Modium auenæ & xx. gallinas à Margareta Vicecomitissa de Marrolis. Molendinum de Roscha. Quartam partem domus ab Andrea. Sex iugera terræ in Campo leuato, & decem & octo iugera de super Montem Hanepon. Quartam partem terræ de Villa-Cren. Dimidiū plantæ de Fuliniaco. Ab Eurardo, vineam & xii. denarios census. Tenementum vxoris Pagani sellarij, & tres solidos census apud Lisinas, & domum eiusdem Pagani apud Pruuinum. Terram Radulphi Canonici apud Lizinniam *. Medietatem domus in atrio S. Nicolai. Septem solidos census apud Calestram. Viginti solidos apud Pruuinum, Viginti solidos apud Lisinnias. Septem & diuidium à Tescia Maiorissa. Decem & septem de Monte Henepon. Quatuor solidos & duos denarios de Buath. Duos solidos à Godefrido Monetario. Viginti solidos in terris Couleti. Terram Gruiarum. Ex dono præterea Hatonis Trecentis Episcopi medietatem omnis decimæ de S. Albino, & medietatem candelarum in purificatione sanctæ Mariæ. Totam decimam de Aneuz. Quicquid Petrus Sanctus habebat in oblatione Ecclesiæ de Tranqueil, & partem decimæ eiusdem loci. Tertiam partem præfatæ oblationis, & censum atrij, & maiorem

* Iutigny.

* Lisina.

• *off. &*
Maupigny,

• *Maferey*

partem decimæ de Parigniaco. Quicquid habetis in decimis de Balbusia, & apud sanctum Parrum, in decimis de Quinceio, & apud Vlmellos duas partes decimæ de Gurgiuolt. Quicquid habetis in decima de Villagruis. Tertiam partem decimæ de Nogennio. Decimam quam habetis apud Aurniacum, apud Occe, & Malpigniacum, & sanctum Flauitum. Quicquid habetis apud Marigniacum in decimis & oblatione, & apud vtramque Ecclesiam de Bocennay, apud Ferroum, apud Capellam, & apud Codes, apud Calestram, apud Maferial, apud Bernerias. Quicquid etiam Petrus Sacerdos de Parrigniaco vobis donauit in domibus, vineis, seu alijs. De dono Henrici Senonensis Archiepiscopi decimam de Lisignis, & partem decimæ de Cuchermeyo. Loca verò de Triagnello & Pomario, quemadmodum vobis rationabiliter concessa sunt, cum vniuersis appendicijs suis auctoritate vobis Apostolica confirmamus, & in vestra subiectione manere decernimus, iuxta videlicet dispositionē Paraclitensis Abbatissæ suarumque sororū Priorissæ statuuntur & mutantur. Decernimus autem ne propter consecrationem vel benedictionem percipiendam de Monasterio exire cogamini, nec pro electione Abbatissæ, aut alia qualibet occasione Episcopus vel alius grauamen vobis vel molestiam inferat. De laboribus etiam vestris seu annualibus nullus à vobis decimas exigit. Ad indicium itaque perceptæ huius à Romana Ecclesia libertatis, vnum obolum aureum singulis annis nobis nostrisque successoribus persoluetis. Nulli ergo hominū liceat præfatum Monasterium temerè perturbare, aut eius possessiones auferre, vel ablatas retinere, minuere, aut aliquibus molestijs fatigare; sed omnia integra conseruentur earum, pro quarum sustentatione & gubernatione concessa sunt, vsibus profutura. Salua Sedis Apostolicæ auctoritate. Si qua igitur, &c. *ut in i. Innocentij ix. & j.* Datum Catalauni per manum Guidonis S. R. E. Diaconi Card. & Cancellarij, Kal. Nouembr. Indiēt. xi. Incarnationis Dominicæ anno MCXLVII. Pontificatus verò domini Eugenij iii. Papæ anno iii.

VI.

ANASTASIUS Episcopus seruus seruorum Dei, dilectis in Christo filiabus Heloyſæ Abbatiffæ, ceterisque sororibus in Oratorio S. Spiritus, quod in pago Trecenſi, in parrochia Quinceij ſupra fluuium Arduconem ſitum eſt, diuino famulatui mancipatis tam præſentibus quàm futuris, &c. *ut in præcedenti Eugenij*, & j. Ex dono Gauterij Rungifer 1111. arpennos prati, & 1111. arpennos terræ, xl. ſolid. cenſus, & corueas. & j. A Godefrido Monetario decem ſolidos cenſus, à Fulcherio Pētecoſte, & quicquid habebat in furno alodij. Quinquaginta ſolidos cenſus à defuncto Stephano Vicario & Andrea nepote ſuo. Quinque ſolidos cenſus à defuncta Aalis. Decē ſolidos cēſus à Petro de Porta. Quicquid habetis apud Sulimatū & apud Pontem. Ab vxore Gualterij de Fontinetto xx. ſolidos cenſus in terris Corileti: & j. Loca verò de Triagnello, & Pomario, & Leaualle, quemadmodum vobis rationabiliter conceſſa ſunt, &c. Datum Laterani per manum Rolandi S. R. E. Preſbyteri Cardinalis & Cancellarij vii. Kal. Februar. Indiēt. ij. Incarn. Dominicæ anno MCLIII. Pontificatus verò Domini Anaſtaſij 1111. Papæ.

VII.

ADRIANVS Episcopus ſeruus ſeruorum Dei, dilectis in Christo filiabus Heloyſæ Abbatiffæ, ceterisque in Oratorio S. Spiritus, quod in pago Trecenſi ſitum eſt, diuino famulatui mancipatis, &c. *ut in ſuperiori Eugenij*. & j. Loca verò de Pomario, Triagnello, Leaualle, Neſorto, S. Flauiti, quemadmodum vobis rationabiliter conceſſa ſunt, auctoritate vobis Apoſtolica confirmamus, & j. Datum Laterani per manum Alberti ſancti Adriani Diaconi Cardinalis, vicem Domini Rollandi S. R. E. Preſbyteri Cardinalis & Cancellarij gerentis. Cal. Decembr. Indiēt. xi. Incarnationis Dominicæ anno MCLVII. Pontificatus verò Domini Adriani Papæ 1111. anno 111.

VIII.

ADRIANVS Episcopus seruus seruorum Dei, dilectis in Christo filiabus Heloyſæ Abbatiſſæ, ceterisque ſororib. Paracliti, ſalutem & Apoſtolicam benediſtionem. Et iniuncti nobis à Deo Apoſtolatus officium nos impellit, & bonæ veſtræ conuerſationis odor hortatur iuſtis poſtulationibus veſtris benignum impertiri conſenſum, & quæ ad vtilitatem & quietem veſtram pertinent libenti animo adimplere. Ea propter dilectæ in Domino filiæ, laboribus veſtris providere volentes, ſepeliendi apud Abbatiam veſtram cum fratres veſtros proprium non habentes, liberam vobis, & ijs quæ poſt vos ſucceſſerint, licentiam auctoritate Apoſtolica indulgemus. Nulli ergo omnino hominum liceat hanc paginam noſtræ conſtitutionis infringere, vel ei auſu temerario contrariare. Si quis autem hoc attemptare præſumpſerit, indignationem omnipotentis Dei, & beatorum Petri & Pauli Apoſtolorum eius ſe nouerit incurſurum. Datum Beneuenti Id. Februarij.

IX.

ADRIANVS Episcopus ſeruus ſeruorum Dei, dilectis in Christo filiabus Heloyſæ Abbatiſſæ Monasterij de Paraclito, eiſque ſororibus ſalutem & Apoſtolicam benediſtionem. Quotiens religioſæ perſonæ à nobis talia poſtulant, quæ à rationis tramite non diſcordant, ad concedendum quod petitur non debemus difficiles iuueniri. Ea propter dilectæ in Domino filiæ, veſtris iuſtis poſtulationibus gratum impertientes aſcenſum, auctoritate vobis Apoſtolica concedimus, vt eos qui de facultatibus ſuis Eccleſiæ veſtræ grata conferunt ſalutaria caritatis, ſi forte non proprio reatu ſed pro alienis ſunt exceſſibus interdicti, liceat vobis ad ſepulturam recipere, & ipſos in Cimiterio veſtro cum alijs fidelibus tumulare. Datum Later. vii. Kal. Decembr.

X.

ALEXANDER Episcopus ſeruus ſeruorum Dei, dilectis in Christo filiabus Heloyſæ Abbatiſſæ, cæterisque ſoro-

ribus in Oratorio S. Spiritus, quod in pago Trecensi situm est diuino famulatu mancipatis, &c. *ut in precedenti Eugenij.*
 & j. Loca verò de Triagnello, Leaualle, Neoforto, S. Fla-
 uiti, quemadmodum vobis rationabiliter concessa sunt, cum
 vniuersis appendicijs suis auctoritate vobis Apostolica con-
 firmamus. & j. Datum Parisius per manum Hermannii S. R.
 E. Subdiaconi & Notarij, viii. Id. Aprilis Indiēt. x. Incarn.
 Dominicæ anno MCLXIII. Pontificatus verò Domini A-
 lexandri Papæ III. anno IIII.

XI.

EGO Hugo Dei gratia Senonensis Archiepiscopus. Notū
 omnibus fieri volo præsentibus & futuris, quòd Heloissa
 Paraclitensis Abbatisa interuentu religiosorū virorum con-
 cessit Blesensi Comitissæ, laude & voluntate totius Capituli
 sui, locum Pomerij ad construendam Abbatiam, statutis in-
 ter se quibusdam conuentionibus, quas duximus annotādas.
 Statutum itaque fuit & diuisum, quòd hæc prima Abbatis-
 sa Pomerij, quæ nunc est, constituta Domina Gertrude no-
 bili & honesta femina, quæ Canonicè electa fuit apud Para-
 clitum de Dominabus eiusdem Ecclesiæ; cæteræ, quæ post ip-
 sam primam substituentur in eodem loco, Canonicè eligen-
 tur secundum aliarum consuetudinem Ecclesiarum, & assu-
 mentur de ipsa Ecclesia si in ea potuerint inueniri. Sin au-
 tem, transibunt ad Ecclesiam Paracliti, & de ea sibi assumēt
 Abbatissam, & ad aliam per electionē non licebit eis pertran-
 sire Ecclesiam, quoniam alium Ordinem nisi Paraclitensem
 non licebit eis obseruare. Abbatissa verò Paracliti semel in
 anno ibit Pomerium, & sedens in Capitulo emendabit si quid
 fuerit emendandum de Ordine, vel de aliqua re ad Ordinem
 pertinente. Pro concessione sanè prædicti loci dedit Co-
 mitissa Ecclesiæ Paracliti tres modios frumenti per singulos
 annos in molédino suo Pruini sub Creuecor, laude quidem
 filiorum suorum Comitū Henrici, Theobaldi, & Stephani,
 promisitque rem iustè garantire. Et hoc fuit ad voluntatem
 Abbatissæ Paraclitensis & totius Capituli sui. Promisit &
 Abbatissa Paracliti, promisit & Comitissa, quòd nec per D.
 PP. nec per alium aliquem quod factum fuerat aliquo modo

immutaretur: sed & conditiones inter vtramque Ecclesiam
superiùs designatæ à neutra parte abolerentur. Harum con-
ventionum mediatorem me posuerunt & Abbatissa & Co-
mitissa, atque benigna vtriusque partis postulatione in ma-
nu accepi rem sicuti fuerat simpliciter ac deuotè celebrata,
opitulante Domino in finem permanere. Vt autem & mo-
dernis & successuræ posteritati firmum & ratum habeatur,
authoritate sigilli nostri muneri fecimus sub chirographi di-
uisione.



M A G.
PETRI ABAELARDI
N A N N E T E N S I S

EXPOSITIONES

In Orationem Dominicam,

In Symbolum Apostolorum,

In Symbolum S. Athanasij:

E T

HELOISSÆ PARACLITENSIS DIACONISSÆ

PROBLEMAT,

Cum eiusdem Petri Abaelardi Solutionibus.



M A G.

PETRI ABAELARDI

NANNETENSIS,

EXPOSITIO ORATIONIS

DOMINICÆ.



INTER omnia quæ fragilitas humana facere potest, unde placere Conditori, vel cum placare valeat, plurimum prodest oratio, si cum pura conscientia & cordis humilitate fiat. Ideo dico cum pura conscientia & cum cordis humilitate, quia si conscientia fuerit sorde prauæ voluntatis, vel operis nauo polluta, si cor nostrum inani fuerit elatione repletum, oratio nostra apud Deum non recipitur, nec noster animus exauditur. Qui auertit aurem suam ne audiat legem, oratio eius erit execrabilis. Mediator itaque Dei & hominû homo Christus Iesus humanæ salutis consulens & illi misericorditer prouidens, inter cætera sanctissimæ doctrinæ verba formâ orationis instituit, & quomodo Patrem orare debeamus, edocuit dicens. *Cum orabitis non eritis sicut hypocritæ, qui amant in Synagogis & in angulis platearum stantes orare: Orantes autem nolite multum loqui sicut Ethnici. Putant enim quia in multiloquio suo exaudiantur, sic ergo vos orabitis: Pater noster qui es in cælis, &c.* In hac oratione Dominica septem petitiones esse dignoscuntur. Prima petitio est, *Pater noster qui es in cælis, sanctificetur nomen tuum.* Secunda, *Adueniat regnum tuum.* Tertia, *fiat voluntas tua sicut in cælo & in terra.* Quarta, *panem nostrum quoti-*

*dianum da nobis hodie. Quinta, & dimitte nobis debita nostra sicut
& nos dimittimus debitoribus nostris. Sexta, & ne nos inducas in tē-
tationem. Septima, sed libera nos à malo Amen.*

Prima Petitio.

PATER noster qui es in celis, &c. Ecce, charissimi, singulis fere diebus Clerus & populus, viri & mulieres, sed præcipuè diebus solemnibus gregatim ad basilicas euolant, vestibibus melioribus coram alpectibus hominum singuli pro posse suo se adornant, domum Dei sancti quasi filij Dei communiter intrant, genua flectunt, pectora tundunt, manus expandunt, ora aperiunt, preces fundunt dicentes: *Pater noster*. sed, quod sine graui mœrore dicendum non est, quàm multi domum Dei, Dominum deprecaturi, ingrediuntur, & quàm pauci exaudiuntur? Quàm multi Dominum vocant in hac oratione *Pater noster*, qui non sunt eius filij, sed illius Patris de quo scriptum est, *vos ex fratre Diabolo estis*? Dei non sunt filij, qui iam dius perdiderunt gratiam: diaboli sunt filij, quia per superbiam eos genuit, & nutrit per culpam. Filij sunt diaboli omnes immundi, concubinarij, ad vltimum auari, maledici, funeratores, & alijs quibuscumque damnabilibus peccatis deprauati qui dicunt fratri suo, *fatue*: qui vident mulierem ad concupiscendum eam. Et quicunq;, etsi nō peruerso opere peruersa tamē à Deo separati sunt voluntate, & quod multò grauius est, quod magis flendum est, non solū vulgares & indocti laici, verum etiam & innumerabiles nostri temporis Sacerdotes, qui sacro peruncti sunt oleo, qui quotidie sacris ornantur vestibibus, sacris adsistunt altaribus, qui sacramentum Dominici corporis & sanguinis tractare mundissimis manibus debent, Dominum pro se sibi que commissis placare deuotis precibus: Ipsi, inquam, sordibus vitiorum inuoluuntur, ipsi maculis peccatorum polluantur, sed & (quod scelestius est) non solum talibus qualibus multi laici scedantur sceleribus; sed multo grauioribus, & non in ædificationem, sed in scandalum & in ruinam populorum iam positi, omnibus pro uerbium, risus, & contemptus facti sunt. Sciant etiam tales sacerdotes quòd cotidie quando primam horam Deo decantant, vel semetipsos maledicunt, vel testimonium diuinæ maledictionis

maledictionis aduersum se dicunt dum proferunt, *Maledicti qui declinant à mandatis tuis*. Quicumque igitur (fratres) Deum in Oratione Dominica patrem vocat, quicūque ab eo exaudiri desiderat, taliter viuat vt Deus eum suum filium recognoscat esse per gratiam, qui omnium pater est per naturam. Alioquin cū iudicabitur exhibit condemnatus, & oratio huius fiet in peccatum. *Pater noster qui es in cælis*. Qui dicit, *Pater*, captat beneuolentiam; Qui dicit *noster*, excludit superbiam. Qui dicit, *qui es in cælis*, exhibet reuerentiam. Qui dicit, *Pater*, Captat beneuolentiā, quia piū clamat. Qui dicit *noster*, excludit superbiā, quia non sibi arroganter propriū, aut specialem; sed & alijs etiam communem denuntiat. Qui dicit, *qui es in cælis*, exhibet reuerentiam: quia non solum infirmis, sed & summis eum præsidere prædicat. *Sanctificetur nomen tuum*, Multa sunt nomina diuina. Quod ergo nomen petimus sanctificari, cū dicimus, *sanctificetur nomen tuum*? Nomen Dei fides est Dei, per quam credentibus innotescit. *Sanctificetur nomen tuum*, sanctificetur fides tua, quæ est noticia tui. Sed nunquid nomen Domini non est sanctificatum & sanctum? Omnes scripturæ clamant, omnes resonant, *Sanctio nomen tuum*. Nomen quidem Domini, fratres, sanctum est, sed adhuc in cordibus quorundam amplius sanctificari potest. Potest namque sanctificari in cordibus paganorum, in quibus nondum sanctificatum est per fidem: in cordibus Iudæorum, in quibus nondum sanctificatum est per fidei consummationem: in cordibus falsorum Christianorum, in quibus non est sanctificatum per dilectionem. Potest quoque amplius sanctificari in cordibus electorum per maiorem fidei confirmationem, & maiorem Dei & proximorum dilectionem. Quanto etenim quisque perfectiùs Deum credit & diligit, tantò amplius nomen patris in se sanctificat & sanctificatum demonstrat. *Pater noster, qui es in cælis, sanctificetur nomen tuum*. Sanctificetur nomen tuum in cordibus paganorum: sanctificetur in cordibus Iudæorum, vt & illi in te credant, & isti perfectiùs credant, & vtrique diligant. Sanctificetur in cordibus falsorum Christianorum, vt sicut habent per fidem tui cognitionem, sic quoque habeant per affectum & dilectionem. Sanctificetur adhuc in cordibus electorum per maiorem claritatem cognitionis, & maiorem suauitatem

dilectionis. *Pater noster, qui es in calis, sanctificetur nomen tuum.*

Secunda Petitio.

ADVENIAT regnum tuum. Quid est quod petimus dum dicimus, *adueniat regnum tuum*? nunquid non habet regnum Deus? nunquid non est Rex Deus? si Deus non est Rex, aut si non habet regnum; quid est quod Psalmista ait, *Quoniam Rex omnis terræ Deus, Psallite sapienter*? Ergo Rex est Deus, & regnū habet Deus. Quare ergo petimus, ut adueniat regnū eius? Quando petimus ut adueniat regnum eius, non petimus ut adueniat in hoc quod iā est, sed in hoc quod nondū est, vel potius manifestetur in eo quod nondū manifestū est. Ad hæc & nascituri sunt multi, qui ad regnum eius sunt prædestinati: Et qui prædestinati nec dum sunt de regno ipsius esse, omnibus manifestat. Adueniat ergo regnum tuum, ô Pater cælestis, ut per naturam carnis generentur ad regnum tuum prædestinati, & per gratiam baptismi regenerentur: & fiant iusti, & per claritatem iustitię omnibus manifestentur esse filij regni tui. *Adueniat ergo regnum tuum*, ut in fine seculi, in die iudicii, in resurrectione generali, separentur grana à paleis, agni ab hœdis, frumentum à zizanijs, & Ecclesia tua, quæ est regnum tuū, de pressura seculi præsentis te vocante transcat in gloriam patriæ cælestis. Item *adueniat regnum tuum*, ut sicut regnas in iustificatis, ita citò regnes in iustificandis: Et sicut regnas in illis qui iam sunt boni, sic expulsa potestate demonum regnes & in illis, qui adhuc sunt mali. *Adueniat regnum tuum.*

Petitio tertia.

FIAT voluntas tua sicut in cælo & in terra. Scimus quod in cælo nemo Sanctorum vel Angelorum à voluntate Dei deuiat, nemo illi contradicit. Quando ergo fieri poterit, ut nō volūtas Dei ita in terra sicut in cælo fiat, ut videlicet in terra nemo vel per ignorantiam, vel per fragilitatem humanam delinquat: cū infans vnius diei non sit sine peccato super terram, & in multis offendamus omnes. Sed sciendum quod, *sicut*, nō est quantitatis, sed qualitatis, & similitudinem insinuat, non æqualitatem. Siquis ædificaret domum parvam

secundum formam & dispositionem domus maioris, non diceremus de parua domo, Tanta est ista quanta illa maior: sed diceremus, Talis est ista qualis illa; talis similitudine, non tanta quantitate. *Fiat ergo ô Pater, voluntas tua sicut in cælo per Angelos, & per Sanctos per primam stolam iam glorificatos: ita in terra per homines iustificandos & glorificandos, ut sicut illi faciunt voluntatem tuam in cælo, ita eam faciant isti in terra, etsi non secundum æqualitatem, tamen secundum similitudinem: si non secundum illorum perfectionem, tamē secundum perfectionis illorum imitationem. Fiat voluntas tua, non solum in electis per bonorum operum exhibitionem, verum & in reprobis per malorum dispositionem. Quamuis verò malorum dispositor, & quamuis sub potestate tua multa sunt mala, nulla tamen relinquis inordinata: & sic fit in omnibus voluntas tua.*

Petitio quarta.

PANEM nostrum cotidianum da nobis hodie. Fecit Deus hominem ex substantia duplici, corporea scilicet & spirituali. Quia igitur homo compositus est ex duabus substantijs, necessarius est ei duplex panis, corporalis & spiritualis. Corporalis reficit corpus, spiritualis animam satiat. Corporalem petimus, quia nisi Deus fecerit terram germinare, non poterit fructus suos ministrare. Spiritualem panem à Deo postulamus, quia nec ipsum nisi ipse dederit percipimus. Hunc habent nobis dispensare Sacerdotes. Hinc iam quæritur inter dispensatores, ut fidelis quis inueniatur. Quis verò est nostris temporibus fidelis servus & prudens, quem constituit Dominus super familiam suam, ut det illis cibum in tempore fideliter & prudenter? Fideliter quantum ad Deum, ut videlicet cum tanta fide, tanto timore, tanta similitudine, tanta instantia, tanta diligentia, quemadmodum præcipit Dominus, verbum Dei dispense. Prudenter, quantum ad homines, ut secundum capacitatem singulorū singulos erudiat. Sed (quod sine graui luctu dicendum non est) mundus Sacerdotibus plenus est, & tamen si sit qui bonum audiat, non est qui dicat iuxta illud, *Paruuli petierunt panem, & non est qui porrigat eis.* Quid dicturi sunt quidam moderni sacerdotes in die iudicii,

qui ordinem sacerdotalem susceperunt, sed inordinate vivere non erubescunt? Quidam verò in conuiuijs & potationibus cum vulgo prorsus indocto, prauis moribus corrupto tota die sedent, fabulantur, & quæ dicenda non sunt turpiter operantur. Lanis gregis Domini superbe vestiuntur, lacte pascuntur, & oues fame & pecunia verbi Dei moriuntur. Transcunt festa, transit integer annus, quòd nec vnum verbum de ore ipsorum egreditur, quo plebs sibi commissa erudiatur, de malo corrigatur, ad bonum reuocetur, & in bono confirmetur. Cotidie tamen se Deo præstare obsequium arbitrantur: verba diuinæ laudis iubilant, immò sibilant, & audientes & intendentes sono vocis, gestu corporis scandalisant, non ædificant. Cogitare deberent huiusmodi sacerdotes animaduersiones Propheticas aduersum se esse prolatas, quibus dicitur: *Erit sicut populus sic sacerdotes*. Et item, *Sacerdotes non dixerunt, ubi est Dominus: & tementes legem nescierunt me*. Et illud, *Canes muti non valentes latrare*. Et, *Canes impudissimi nescierunt saturitatem*. Nemo itaque ab istis sacerdotibus expectet sibi dari panem sacræ doctrinæ, quia vel nesciunt docere, vel contemnunt. Considerent potius illis in locis doctos & dignos sacerdotes, bonæ vitæ & famæ: illos adeant & audiant, ab eis doceri suppliciter requirant. Sunt autem quidam prædicatores, qui sicut zizania in agro Domini à Diabolo sunt seminati, qui totum mundum cum suis phylacterijs peragrant, & indoctum vulgus & peccatis oneratum verbis mendacibus beatificant, dicentes: *pax, pax*, cum non sit pax. Vnde Isaias, *Popule meus, qui te beatificant ipsi te seducunt, & viam gressuum tuorum dissipant*. Et iterum, *Erunt qui beatificant, & qui beatificantur precipitati*. Panem nostrum pater da nobis hodie, pascere Domine, pascere tu ipse oues tuas: vnctio tua doceat eas de omnibus, vt spiritus tuus per internam aspirationem vel doctrinam infundat quam talium sacerdotum os mutum non dispensat. Panem itaque nostrum cotidianum da nobis hodie, panem scilicet corporalem & panem spiritualem. Panem corporalem, vt facias terram germinare, & fructus suos temporibus suis reddere. Panem spiritualem, vt inspires Prælati & doctoribus Ecclesiæ tuæ doctrinam tuam sibi traditam studeant feliciter nobis & prudenter dispensare. Et si illi non curant panem istum nobis frangere, tu ipse nos pascere per occultam spi-

ritus tui aspirationē, vt intus per te capiamus panē, quo foris fraudamur per illorum taciturnitatem. *Panem nostrum cotidianum da nobis hodie.*

Petitio quinta.

DIMITTE nobis debita nostra, sicut & nos dimittimus debitoribus nostris. Quàm multis timenda, quàm multis pernicio-
sa est, fratres, ista oratio! Multis etenim plus confert detri-
menti quàm augmenti, plus damni quàm lucri. Sunt nam-
que quidam, qui per magnam vel longam malignitatis vel
odiorum malitiam * obdurati, illos qui per aliquam iniuriam * *al. militiā*
facti sunt illis debitores, manibus suis ledere vel iugulare cō-
cupiscunt: nec pro timore Dei, nec precibus hominum satis-
factionem recipere, vel concordiam facere volunt. De tali-
bus scriptum est, *Vua eorum, vua fellis, & botrus amarissimus. Fel*
draconum vinea eorum, & venenum aspidum insanabile. Qui cū
tales sint, secretē tamen ad Ecclesiam confluunt, & corā Deo
& altari eius orantes dicunt: *Pater noster, dimitte nobis debita*
nostra, &c. sed ō misera insipientia! ō infelix præsumptio, irā
Dei aduersum se precibus prouocare! Homo homini reser-
uat iram, & à Deo quærit misericordiam? Sunt autem quidā
imperfecti, quorum imperfectioni, sicut dicit beatus Augu-
stinus, diuina miseratio condescendens, concedit vt saltem
tunc debitoribus suis debita dimittāt, cū ipsi debitores in-
dulgentiā ab eis sibi dari postulauerint. Sicut Dominus ser-
uo suo nequam fecisse legitur, quemadmodum scriptum est,
Serue nequam, omne debitum dimisi tibi quia rogasti me. Quicun-
que autem rogatus à debitore debitum cuiuslibet iniuriæ di-
mittere contemnit, in vanum sibi à Domino dimitti debitū
peccati sui petit. Quinimō magis illud iram iudicis aggrauat
quàm alleuiat. Quamuis verò imperfectis concedatur sua
posse requirere, satisfactionem de sibi illata iniuria recipere,
& à debitoribus rogari de indulgentia: si tamen nihil horum
fieri contingat, debent omnino proprii cordis iram refre-
nare, & tenebras odiorum à se pellere, memores illius Iaco-
bi Apostoli, *Ira enim viri iustitiam Dei non operatur.* Et, *Qui odit*
fratrem suum, hoc est, omnis homicida, non habet partem in regno
Dei. Perfectorum autem est omnibus omnia corde puro, vul-
tu iocundo sine restauratione rerum, sine satisfactione iniu-

riarū, & sine precibus, suis debitoribus indulgere: insuper & sua tribuere, & obsequia charitatis exhibere. Prouideat igitur vnusquisque sibi in oratione ista, *Dimitte nobis pater debita nostra, sicut & nos dimittimus debitoribus nostris*: & si pro aliqua fragilitate vel etiam pernicie nos videas non dimittere sicut debemus, da nobis gratiam vt secundum voluntatem tuam dimittamus, & sic tuam indulgentiam consequamur. Da vt sic diligamus homines, vt eorum non diligamus errores: vt sic in eis diligamus naturam, vt non diligamus culpam: vt sic diligamus quod sunt, vt non diligamus quod malè faciunt. *Dimitte nobis debita nostra.*

Petitio sexta.

Et ne nos inducas in tentationem. Cū scriptum sit, *Deus intētor malorum est, ipse neminem tentat*: vnusquisque autem tentatur à concupiscentia sua abstractus & illectus, Quid est quod petimus cū dicimus, *Et ne nos inducas in tentationem*? Est igitur sensus: Ne nos inducas in tentationem, non vt nunquam nos permittas tentari, sed vt nunquam permittas à tentatione superari. Et da vt per tentationes probemur, non reprobemur. Multum enim profunt tentationes electis; quia per tentationum victoriam pertingunt ad coronam. Vnde Iacobus Apostolus, *Beatus vir qui suffert tentationem, &c.* Item, *Omne gaudium existimate fratres cū in varias tentationes incideritis, scientes quod probatio fidei vestre, quæ subaudis, per tentationes fit, patientiam operatur: vnde, in patientia vestra possidebitis animas vestras.* Tentationum quatuor species sunt: Alia enim leuis & occulta: Alia leuis & manifesta: Alia grauis & occulta: Alia grauis & manifesta. Tria autem sunt quæ nos tentant, caro, mundus, diabolus. Caro nos tentat per gulam & luxuriam: Mundus per prospera & aduersa: per prospera vt decipiat, per aduersa vt frangat: Diabolus omnibus modis nos aggreditur, & ad omnem nequitiam nos perducere conatur. *Pater, ne nos inducas in tentationem*: ne nos permittas tentari supra id quod possumus: sed fac etiam cum tentatione prouertum, vt possimus sustinere. *Ne nos inducas in tentationem.*

Petitio septima.

SED libera nos à malo: Multa sunt mala, quibus humana conditio subiaceret, & quorum pressuram per se minimè euadere valet; Quæ generaliter considerata sex modis distinguere possumus. Malum enim aliud est corporis, aliud animæ. Item aliud est malum, quod est culpa, aliud quod est pœna. Item aliud præsentis seculi, & aliud futuri. Ab omnibus istis, & ab alijs quæ per ista comprehenduntur petimus liberari. Et sub istis continentur, quando oramus dicentes, *libera nos ab omni malo*: quia nisi tu liberares nos, non poterimus sine te liberari. *Libera ergo nos tu Pater à malo.*

Conclusio harum Petitionum.

AMEN. Interpretatur verè, & concludit omnes præcedentis Orationis Petitiones: *Amen*, quasi dicamus, O pater noster qui es in cælis, verè sanctificetur nomen tuum, verè adueniat regnum tuum, verè fiat voluntas tua sicut in cælo & in terra, verè panem nostrum quotidianum des nobis hodie, verè dimittas nobis debita nostra, sicut & nos dimittimus debitoribus nostris, verè ne nos inducas in tentationem, verè liberares nos à malo. Ista est, fratres, iugiter meditanda, ista est iugiter dicenda Oratio, utpote quam ipse Saluator docuit, & qua nobis Patrem orare præcepit. Nulla est enim ista sublimior, nulla utilior. Sunt quidam qui sicut Ethnici gloriantur multa verba fundere, multa Psalteria legere, diuersas Horas decantare, prolixas orationes continuare: Et cum ore Domino loquuntur, nonnumquam in finibus terræ vagantur. Meminerint tales scripturæ qua dicitur, *Populus hic labiis me honorat, cor autem eorum longè est à me.* Neque ista dicentes, sanctæ Orationis solertiam & perseuerantem deuotionem culpamus, quam multum laudamus, dum prolixitatem Orationis comitatur feruor maximus deuotionis.

*Est & alia huius Orationis expositio infrà, Serm.
in diebus Rogationum.*

EIVSDEM MAG.

PETRI ABAELARDI

EXPOSITIO SYMBOLI,

Quod dicitur Apostolorum.



INSTITVTVM, fratres, à Patribus sanctis habemus, tam Symbolum fidei, quod dicitur Apostolorum, quàm Orationem Dominicam ab omnibus communiter Christianis debere sciri, & memoriter retineri, vt promptiùs queant frequentari. In illo quippe fidei confessio breuiter est expressa : in ista instruimur à Domino postulare necessaria. Ex Concilio Remensi Capitulo VIII. *Vt omnis Presbyter omnibus parrochianis suis Symbolum & Orationem Dominicam aut ipse insinuet, aut insinuanda iniungat: vt cum ad confessionem tempore Quadragesimali venerint, hæc ab unoquoque memoriter sibi decantari faciat. Nec ante sanctam Communionem alicui tradat, nisi hæc ex corde pronunciare noerit. Siquidem sine horum scientia nullus saluus esse poterit. In uno enim fides & credulitas Christiana continetur, in alio quid orare & petere à Deo debemus exprimitur. Quòd vero sine fide nemo possit saluari, Dominus ostendit cum dicit: Qui crediderit & baptizatus fuerit saluus erit. Nullus autem credere potest quod nescit nec audiuit. Ait enim Paulus: Quomodo credent ei quem non audierunt? Nec sola sufficit fides in corde, nisi etiam verbo enuncietur, vt idem Apostolus testis est: Corde enim creditur ad iustitiam, ore confessio fit ad salutem. Nullus autem de stoliditate sensus, vel tenuitate ingenij causetur, quia hæc tã parua sunt, vt nemo tam hebes & barbarus sit, qui hoc dicere, & verbis omnibus enunciare non possit: tam magna, vt qui horum scientiam pleniter capere potuerit, sufficere sibi credatur ad salutem perpetuam.*

ILLVD etiam obseruandum, vt nullus suscipiat infantem in baptismo à sacro fonte, antequam idẽ Symbolum & Orationem Dominicam corã Presbytero decantet. Ex Concilio Cabilonensi

Cabilonensi Capitulo III. Iubendum est, ut Oratio Dominica, in qua omnia necessaria humane vite comprehenduntur; & Symbolum Apostolorū, in quo fides Catholica ex integro cōprehenditur, ab omnibus discatur tam Latine quàm Barbaricè, ut quod ore confitentur corde credant. Ex Concilio Parisiensi, cap. II. Ut nemo à sacro fonte aliquem suscipiat, nisi Orationem Dominicam & Symbolum iuxta linguam suam & intellectum teneat, & coram Presbytero decantet: & ut intelligant omnes pactum quod cum Deo pepigerunt. Ex Concilio Garinaziensi, cap. I. Caueant Presbyteri, ut neque viri, neque femine de sacro fonte filios vel filias suscipiant, nisi memoriter Symbolum & Orationem Dominicam tenuerint. Ex Concilio Agathensi, cap. XII. Symbolum etiam placuit ab omnibus Ecclesiis octaua die ante Dominicam Resurrectionis publicè in Ecclesia competentibus tradi.

HAC itaque auctoritate Patrum eruditi, præsentī die ante Resurrectionem octauam decreuimus prædicti Symboli non verba docere, quæ iam didicistis: sed aperire sensum eorum quæ profertis; cū cordis potius fides sit quàm oris, & prius ipsa sit habenda quàm eius confessione facienda. Quem etiam ordinem Apostolus assignans, *Corde, inquit, creditur ad iustitiam: ore autem confessio fit ad salutem.* Dicit enim Scriptura: *Omnis qui credit in eum, non confundetur.* Et post aliqua: *Quomodo autem credent si non audierint? Quomodo autem audient sine prædicante? &c.* Hoc igitur, fratres, tam salubre consilium ab ortu suo Ecclesia prouidens, breuissimum fidei Symbolū composuit, quod & summam fidei comprehenderet, & verborum multitudine confitentem non grauaret. Hoc autem illud est quod non Conciliorum, sed ipsorum esse creditur Apostolorum: & iuxta numerum eorum totidem sententijs dicitur comprehensum. Symbolum autem collatio dicitur, quando videlicet homines conuiuaturi partes suas in vnum conferunt, vnde comestationes fiant. Hinc illud est in Proverbijs. *Noli esse in conuiuijs potatorum, nec in comestationibus eorum qui carnes ad vescendum conferunt: quia vacantes potibus, & dantes symbola, consumuntur.* Ad hanc itaque similitudinem Symbolum dicuntur diuersorum sententiæ in vnum cōgregatz, summam fidei continentes. Vnde & Eusebius Emisenus Homilia de Symbolo fidei: *Sicut nonnullis scire permissum est, apud veteres symbola vocabantur, quod de substantia collecti in*

unum sodales in medio conferebant ad solemnes epulas, ad cœnæ communes expensas. Ita & Ecclesiarum Patres de populorum salute solliciti, ex diuersis voluminibus scripturarum collegerunt testimonia diuinis grauida Sacramentis; ad animarum pactum salubre conuiuium, verba breuia, &c. & hoc Symbolum nominauerunt. Est quippe quasi quoddam spiritale conuiuium diuini verbi refectio, & quasi quædam mensa scriptura nobis apposita: in qua tot sunt fercula quot sunt Doctorum sententiæ. De hac mensa scriptum est: *Fiat mensa eorum coram ipsis in laqueum.* Itē de pane diuini verbi: *Non in solo pane uiuit homo, sed in omni verbo quod procedit de ore Dei:* Sed etiam apud Philosophos Timæus Platonis diuersarum collationem sententiarum sub specie cuiusdam conuiuij componit, dicens: *Vnus, duo, tres, quartum enim uero vestrum, Timæe, requiro; qui hesterni epuli conuiuiæ fueritis, hodierni præbitores mutatores ex condicto resideatis.* Legimus & cœnam Cypriani, in qua sancti Patres, quasi quædam fercula virtutum, quibus præminebant, offerentes inducuntur. Sic & Apostoli tanquam inuicem conferentes, communi deliberatione præsens fidei Symbolum creduntur instituisse; in quo & fidei Catholicæ summa, vt dictum est, doceatur, & eius salubris confessio paucis verbis conferatur: vt simul & doctrina fidei sit perfecta, & nulla sit verborum prolixitas onerosa. Quod quidem postmodū à sanctis Patribus tanta est diligentia roboratum, vt nemini fidelium liceat verba eius ignorare ad confitendum; etsi nondum sufficiat ad intelligendum. Sed quoniam sonus sine intelligentia aures tantū mulcere, non mentem reficere potest, & balatus potius quàm pastus dicendus est: nec mentem excitant audita, si minimè fuerint intellecta: nos, qui litterarum scioli videmur, niti iam conuenit, vt de sensu verborum sumamus animæ pastum: nec tam ore corporis sonum, quàm ore cordis capiamus sensum. Quales quidem aures tantū Dominus requirens, dicit: *Qui habet aures audiendi, audiat.* Cū autem fides omnium bonorum sit fundamentum, sine qua impossibile est placere Deo, & cordis ipsa sit potius quàm oris, corde enim, vt dictum est, creditur: magis ei cordis quàm corporis aures sunt applicandæ, vt quod verbis asserimus, intelligentia capiamus. Non enim longè est à mendacio, qui quod nescit profitetur, & periurij reus est, qui iurat quod

ignorat. Quod quidem ne præsumamus, illa nos Apostoli reprehensio compescat, qua quibusdam improperans, ait: *Nescientes de quibus loquuntur, neque de quibus affirmant.* Nullū est autem periculosius mendacium vel error, quàm in his quæ ad fidem pertinent: & quassa est verborum prolatio, quam intelligentia non sequitur: quæ ad hoc tantū instituta sunt, ut intelligentiam conferant audita. Quanto autem diuinorum verborum salubrior est intelligentia, tanto hæc à nobis ampliùs est requirenda. Ad quam nos suprà memoratus adhortatur Apostolus, ut cum diuinæ laudis benedictiones vel orationes quælibet in Ecclesia fiūt, vel aliquid dicitur ad confirmationem, cuius vel precis complectionem *amen*, seu *fiat*, est respondendum, à nemine id responderi permittat, qui ea quæ præcesserunt non intelligat. Sic quippe Corinthiis scribēs de idiota litteras ignorante, & quā ad respondēdum in Ecclesia cuiquam astante: *Quomodo dicet amen super tuam benedictionem qui quid dicas nescit?* Quod & beatus Hieronymus memoriter tenens cum Marcellam de diuersis nominibus Hebraicis erudiret: *In Hebræo*, inquit, *legitur amen, quòd scilicet ea vera sint dicta quæ supra confirmantur.* Vnde & Paulus asserit non posse aliquem respondere amen, id est confirmare ea quæ supra dicta sunt, nisi intellexerit prædicationem. Qui & ad omnium intelligentiam, quæ in Ecclesia dicuntur, vehementer nos excitans, *Impleamini*, inquit, *Spiritu sancto, loquentes vobismetipsis in Psalmis, & Hymnis, & Canticis spiritualibus.* Non enim sibi vel secum loquitur, qui quod dicit minimè intelligit: cum totum, ut dictum est, sermonis officium ad intelligentiam sit accommodatū: nec sermo sine intelligentia prolatus tam sermo quàm sonus sit habendus. Ut igitur, iuxta Apostolum, maliciā paruuli, sensu autem perfecti, firmum teneamus fidei fundamentum, quod proposuimus expositionis luce, prout Dominus annuerit, consummemus.

C R E D O in Deum. Sed ut confessionis suæ veritatē obseruet, ne os quod mentitur occidat animam, attendere primū debet & quid sit credere in Deum. Aliud quippe est credere Deum, aliud credere Deo, aliud credere in Deum. Credere quippe Deum est æstimare quòd ipse sit. Credere Deo, verbis eius, quòd vera sint, vel à falsitate penitus aliena, consen-

tire. Credere verò in Deum, est credendo eum diligere: & sic eius membrum fieri vel esse. Hæc verò illa est fructuosa fides, quæ, ut dicit Apostolus, per dilectionem operatur; & de qua, ut diximus, scriptum est: *Omnis qui credit in illum non confundetur.* In illum inquit, potius quàm illum, vel illi. Illi quippe duo priores fidei modi, cùm videlicet Deum vel Deo credimus, communes nobis sunt cum reprobis, & cum ipsis etiã dæmonibus. De quibus & beatus meminit Iacobus, quia dæmones credunt & contremiscunt, & fides sine operibus mortua est. Hic verò tertius credendi modus, quo videlicet in Deum creditur, solus inter reprobos discernit & electos. Ut igitur vera sit nostra fidei confessio, qua singuli cotidie dicimus, *Credo in Deum*, sic vivere studeamus, ut hoc verè dicere valeamus. Aliter quippe membrum Veritatis non erimus, & plus nobis officit falsitas confessionis, quàm eius prolatio adiuuet. Cùm autem singula, quæ in hac fidei confessione sequuntur, ita huic principio cohæreant, atque hinc pendeant, ut si huius veritas violetur, non possit in ceteris ipsa custodiri; cùm videlicet dicitur, *Credo & in Iesum Christum, & in Spiritum sanctum &c.* frustra reliqua confitemur, si confessionis exordium falsitatis habeat fundamentum.

PATREM omnipotentem. Cùm præmiserit Deum, unū videlicet, non plures, deitatis astruxit unitatem. Nunc verò personarum annectit distinctionem, cùm Patrem, & Filium, & Spiritum sanctum commemorat. Omnipotens dicitur, ut beatus meminit Augustinus, non quòd omnia possit, hoc est, quælibet in se suscipere actiones; sed quòd eius voluntati vel dispositioni nulla resistere potestas, vel cuiusque naturæ vis eam impedire possit. Benè autem cùm nos in Deum credere confitemur, omnipotentiam eius memoramus, ut quàm rectum sit in eum credere, vel spem nostram in eum ponere, cuius tanta sit potentia, declaremus. Vnde & Apostolus: *Si Deus pro nobis, quis contra nos?*

CREATOREM cæli & terræ. Dicturus eum creatorem omnium esse, præmisit omnipotentem: ut ostenderet eum hoc posse qui omnia possit, & cuius voluntati nihil resistere queat. Creatorem autem cæli dicit, hoc est de nihilo, non de præjacente materia omnia, ex quibus cõstat mundus, operatum. Cælum quippe, quod tam æcreum quàm æthereum

dicatur, superiores mundi partes hinc appellat : terram verò, inferiores quæ pondere suo in vno subsistunt, tam aquaticam scilicet quàm terrenam substantiam. Possumus & per cælum & terram ita vniuersam includere creaturam, vt cælum dicamus dignitatem superiorem, id est spiritalem quamlibet naturam : terram verò quamcumque corpoream. Cùm autē ita omnium creatorem Deum commemorat, quantum ei debeant vniuersa patenter insinuat.

ET in Iesum Christum. Filij Dei personam præsens Symbolum nobis commendans, eius diuinitatem pariter & humanitatem commemorat, & tam regni eius quàm sacerdotij dignitatem, vnde Christus dictus est, designat : per quæ duo nobis Iesus, id est Saluator efficitur. Nam quia tam regia quàm sacerdotalis dignitas per vnctionem instituitur; hinc merito Christus est appellatus Rex iste summus, & Sacerdos supremus, & Saluator verus. Vnde & hæc nomina iam quasi propria meruit obtinere; vt iam cùm audimus Christum vel Iesum, eum per excellentiam solum intelligamus. Rex autem nobis est quasi supremus Dominus, & nobis præsidens, & inter huius seculi procellas & turbines Ecclesiam suam nauem propriam ad portum tranquillitatis æternæ regendo dirigens, & tam verbis quàm exemplis disciplinæ regulam nobis tradens. Sacerdos autem, immò & Pontifex nobis factus est, dum in Cruce suspensus tanquam in ara pro nobis immolatus est. Vnde autem nobis tam Christus, vt dictum est, quàm Iesus verus existat, diligenter aperit : cùm eum tam Dei quàm hominis filium esse consequenter annectit, dicens :

FILIVM eius, id est Dei Patris, *unicum*; ne adoptiuus, sed consubstantialis putetur. Et rursus, *qui conceptus est*, &c. Quod tamen dicimus unicum, quibusdam videtur magis ad Dominum quàm ad filium esse coniungendum, siue ad vtrūque simul : vt sicut est vnicus filius Patri, ita & vnicus sit Dominus nobis. Sicut enim personam Patris commendans, eum & omnipotentem, & cæli & terræ dixit creatorem : ita nunc ad honorem Filij eum non solummodò Christum & Iesum, verumetiam Dominum confitemur nostrum & unicum, id est solum Dominum nostrum, secundum hoc quod eius solius precioso sanguine empti sumus. Aut si fortè quem mo-

uet etiam Patrem & Spiritum sanctum non minus nostrum dici Dominum, sciat ita Filium solum dici Dominum nostrum, vt præter eum non sit alius omnium Dominus. Licet enim vtraque aliarum personarum æquè Dominus noster sicut & Deus sit dicenda, quia non est alius Dominus vna persona quàm alia, sicut nec alius Deus quælibet earum: ita Deus vel Dominus sola est dicenda, vt nullatenus res alia Dominus sit existimanda, vel ab ea Dominus sit credendus; cum idem Dominus sicut & Deus vna sit persona cum alia.

QUI conceptus est. Qui, inquam, Christus, siue qui filius Dei secundum assumptam humanitatem conceptus est, &c. Ac si diceretur: Cuius humanitas de ipsa substantia Virginis per operationem diuinæ gratiæ concepta est, & nata. Nam & cū singuli homines ex anima constant & corpore, secundum tamen solam corporis naturam, quæ traducitur, concipi à matribus, vel nasci dicuntur. Bene autem dicturus eum de Virgine natum, ne quis quæreret qualiter id fieret, præmisit conceptum per Spiritum sanctum: sicut & matri quærenti, *Quomodo fiet istud?* dictum est ab Angelo, *Spiritus sanctus superueniet in te*, &c. Ex quo quidē non mediocriter ipsam quoque Spiritus personam nobis commendat, dicendo videlicet per operationem eius illud corpus esse conceptum, in cuius hostia omnium redemptio est consummata. Quod nec minus per ipsum Spiritum Apostolus dicit pro nobis oblatum sicut & conceptum. Hinc est illud ad Hebræos, vbi in hac nostræ salutis consummatione totius Trinitatis operationem commemorans, ait: *Si enim sanguis hircorum & taurorum, & cinis vitulæ aspersus inquinatos sanctificat ad emundationem carnis: quāto magis sanguis Christi, qui per Spiritum sanctum semetipsum obtulit immaculatum Deo, emundabit conscientiam nostram ab operibus mortuis?* Cū autē ipsum vel cōceptum vel natū de Spiritu S. audimus, aliter à Virgine conceptū, aliter eū de Spiritu conceptū; vel aliter eum de Spiritu natum, aliter de Virgine natū intelligamus. A Virgine quidem, vel de Virgine, secundum quod de substantia eius tanquam matris carnem acceperit. De Spiritu verò, secundum hoc quod per diuinæ, vt dictum est, gratiæ nouam ac mirandam operationem factum est: ad quam nulla institutio naturæ sufficere poterat. Non ergo ita in hac natiuitate vel incarnatione Domini patrem eius intelligere debemus Spiritum sanctum, sicut eius matrem pro-

fitemur virginem. Sicut enim illa eius æterna generatio de substantia Patris sine matre est, sic ista temporaliter de matre sine patre est. Operatorem itaque, ut dictum est, potius quam patrem Spiritum sanctum hinc intellige, sicut & in singulis quæ facit Deus operator dicitur, vel creator potius quam pater propriè dicendus est. Et attende quod cum dicit Filium Dei de Virgine natum, eundemque tam Dei quam hominis filiū esse astruit, vnitatem personæ in duabus naturis, diuina scilicet, atque humana, confirmat. Quamuis enim secundum diuinitatem ex solo Patre sit genitus, & secundum humanitatem ex sola matre sit natus; aliāque sit natura Dei, alia hominis; aliud sit diuinitas, aliud humanitas: vna tamen est in Christo persona, in duabus naturis consistens, nec est aliud in persona Filius Dei quam filius hominis. Quamuis aliud sit in natura Verbum quod hominem assumpsit, quam homo ipse assumptus: nec duo sunt Christi, assumens & assumptus, sed vnus Christus: sic nec duo sunt homines vel duæ personæ anima hominis & eius caro, licet aliud secundum naturam sit anima quam caro, cum illa videlicet sit incorporea substantia, hæc corporea: hoc est, illa corpus, hæc spiritus. Si ergo in singulis hominibus duæ sunt naturæ, corporea scilicet, atque incorporea, sed vna tantum persona: sic & in Christo duæ sunt naturæ, diuina scilicet, atque humana, sed vna solummodò persona. Persona quippe quasi per se vna dicitur, hoc est, substantia quælibet rationalis ita per se ab alijs rebus disiuncta, ut ipsa substantiam cum aliqua re alia non constituat. Quamdiu ergo anima humana in corpore est, persona dici non potest, quia carni coniuncta vnā hominis personam atque vnā rationalem substantiam cum ea constituit. Sic & Verbum homini in Christo vnitum vnā Christi personā, non duas reddit. Iuxta quam quidem vñionem personæ eundem Christum tam Dei filium quam hominis profiteamur, & tam Dei filium quam hominis dicimus crucifixum, mortuū, & sepultum: cum tamen ista non nisi secundum humanitatem sint accipienda. Vnde & Paulus Dominum gloriæ crucifixum esse non veretur dicere, & qui descendit de cælo, & qui ascendit, eundem esse. Et ipse Dominus Christus de se ipso loquens: *Nemo, inquit, ascendit in cælum, nisi qui descendit de cælo, filius hominis qui est in cælo.* Et iterum: *Si ergo videritis*

filium hominis ascendente ubi erat prius, &c. Cum itaque Christus proprie dicatur Deus & homo simul, hoc est tria illa simul in naturis proprijs discreta, Verbum videlicet, anima humana, & caro: ad ostendendum tamen vnitatem personæ tam diuersarum in Christo naturarū, ita sæpè vocabula permiscemus, vt modo Verbum, modo animam, modo etiam carnem dicamus; & nonnunquam quæ propria sunt Dei, homini ascribamus, vel è conuerso. Cum enim dicit Apostolus, *Christum Dei virtutem & Dei sapientiam*: & rursus, *Qui cum in forma Dei esset, non rapinam arbitratus est esse se equalem Deo, sed semetipsum exinaniuit, formam serui accipiens.* &c. quis hoc ad ipsius diuinitatem non referat? Sed & cum ipsemet Christus de se & Patre loquens, dicat: *Quia ego & Pater vnum sumus*: & rursus, *Quia Pater maior me est*; quis non videat hoc & illud secundum aliam & aliam naturam de ipso dici? Quem etiam cum dicimus ad inferos descendisse, vel in sepulchro fuisse; quis non illud de anima sola, hoc de corpore solo intelligat? Hoc quippe modo & Petrum Romæ in sepulchro esse, & eundem in cælestibus cum Christo profiteamur gaudere; cum tamen hoc de alia, & illud de alia dicamus substantia, non tamen de alio Petro quamuis post dissolutionē corporis & animæ iā nō sit vna in Petro, persona ex anima simul & corpore cōpacta. Ad illam tamē vñionem personæ, quæ iam fuit, non quæ modo sit, respicientes dicimus Petrum ipsum & ibi esse in sepulchro, & in cælestibus cum Christo. Qui etiam sepulchrum alicuius intuentes dicere non veremur: Hic homo qui hīc iacet magnam scientiam & pulchritudinem habuit, cum tamen illud cadauer nec iam homo sit, nec scientiā habuit, quæ solius erat absentis animæ, nec ipsa anima, quæ scientiā illam habuit, vllatenus habere corporalē illam pulchritudinem potuit, sed in diuersis penitus naturis scientia illa & pulchritudo fuerit: illa quidē in anima, hæc in corpore. Cum itaque dicimus hunc, qui hīc iacet, sapientem fuisse, propter vnitatem videlicet personæ, quæ iam non est, sed fuit: cur nō dicamus de Christo hunc, qui Deus est, hominem esse? vel hunc, qui de cælo descendit, ascendisse? hoc est vnam Dei & hominis, vel Verbi descendentis & hominis personam esse. Alioquin, quomodo dicemus aliquem intuentes hominem, quia hic, qui pulcher est, sapiens est? nisi videlicet secundā

vnitatem

Vnitatem personæ, in cuius diuersis, vt dictum est, partibus pulchritudo & sapiētia ita sunt distincta, vt aliud ibi pulchritudinem habeat, id est corpus; aliud sapientiam, id est animam. Sicut ergo dicimus eum, qui pulcher est, vel qui animatus, sapientem esse, cum tamen pulchritudo, vel animatio solius sit corporis, sicut sapientia solius animæ: ita & vnum eundemque Christum & Deum dicimus & hominem, hoc est vnam ex istis vel in istis naturis consistere personam: & cum Christus adhuc in terra consistens dicit filium hominis in cælo esse, vel in cælo quondam fuisse, quid aliud sonat nisi humanam naturam ei esse unitam, quæ per præsentiam diuinitatis vbique consistentis à cælesti celsitudine nō est remota? Quid ita mirum, si cum superius præmissum sit filium Dei, statim adiunctum sit, *Qui conceptus est de Spiritu*, vel *natus de Virgine*: hoc est, assumpta humanitas sic concepta est vel nata? Sic quippe intelligimus & Dominum gloriæ crucifixum, hoc est hominem vel corpus ab eo assumptum tali patibulo affixum. Iuxta quod & Maria Magdalenæ Dominum suum de monumento dicit sublatum, id est corpus Domini sui: sicut & dicimus hic Petrum sepultum esse, de solo eius corpore id intelligentes: & rursum, vt dictum est, ipsum in cælestibus esse, de sola eius anima hoc intendentes. Sæpe quippè de toto ad partes, vel de partibus ad totum translationes fiunt nominū: veluti cum modo animam, modo carnem totum hominem dicimus, & nonnunquam animam desiderijs carnalibus irritam carnis nomine designamus.

PASSVS, secundum eandem scilicet humanitatis naturā de Spiritu conceptus, vel ex Virgine dictus est natus. *Sub Pontio Pilato*, hoc est eo ibi dominante vbi passus fuit: Pontius vel cognomen vel gentile nomen esse patet ex aliquo loco. Benè autem gentilem commemorat Præsidem, vbi ex hoc etiam insinuet iā illud tempus aduenisse, quo iā iuxta Prorphetiā Iacob siue Danielis vnctio regia in populo Iudæorū defecerat.

CRUCIFIXVS. Genus quoque patibuli determinat, quod ignominiosius erat, sicut & prædictum fuerat, *morte turpissima condemnemus eū*. Et ita *mortuus* & *insuper sepultus*, vt in omnibus humanitatis veritas comprobetur, & tantò amplius diligatur à nobis, quantò grauiora vel indigniora sustinuit pro nobis.

DESCENDIT *ad infernos*. Qui mortuus dicitur & sepul-

tus, ipse etiam ad inferos descendisse asseritur: cū illud tantū secundum corpus, hoc secundum animam intelligatur. Ipsa quoque anima, quæ in carne passa fuerat, ad inferos dicitur descendisse; quia passionibus illius efficaciam iusti senserunt antiqui, per eam à pœnis liberati. Non eam anima, vel spiritus aliquis, ut beatus meminit Augustinus, loco mouetur, sed solummodò corpus. Sicut ergo Deus, qui ubique est, descendere quoque dicitur secundum aliquem suæ operationis effectum, ita & anima illa secundum efficaciam propriæ passionis, quam habuit in electis, descendisse liberando dicitur. Solius quippe animæ vel sentire vel pati est, etsi ei hoc ex carne accidat, tanquam quodam talium instrumento. Inferos itaq; dicit pœnales illas tenebras, quas iusti etiam sustinebant, adhuc extra diuinæ gloriæ conspectū constituti, ad quā totis desiderijs anhelabant. Cuius quidē gloriæ visio summa est illa felicitas ab omni pœna penitus immunis, quā latroni Dominus ipse promittit, dicens: *Hodie mecum eris in Paradiso.*

TERTIA die resurrexit à mortuis. Hoc est, de inter mortuos, tanquam veraciter corpore defunctus propria voluntate, non aliena, est suscitatus. Sicut & ipsemet ait. *Potestatem habeo ponendi animam meam, & iterum sumendi eam.* Nota ordinem, quod priusquàm surrexit, ad inferos descendens, salutē nostræ liberationis, antequam gloriā suæ resurrectionis est operatus: quia non tam sua quàm nostra in his omnibus requirebat. Ipso itaque die passionis suæ antequam resurgeret, vel cœlos ascēderet, tam prædictum latronem quàm antiquos viros in paradysum introduxit: quia eis suæ diuinitatis visionē exhibens, vera iam beatitudine, quam Paradysum nominant, animas eorum satiauit. De qua quidem satietate Propheta dixerat: *Satiabor cū apparuerit gloria tua.* Extra quam quidē visionem gloriæ quicquid est, eius comparatione dicendum est tenebræ: nec est prorsus alienum à pœna, quandoquē sint quietis remedia.

ASCENDIT ad cœlos. Sicut corpore surrexit de sepulchro, ita & corpore ascendit ad cœlos, & vtrumq; in propria potestate, ut non tractus esse, sed magis dicatur ascēdisse. Ut enim ipsemet ait: *Nemo ascendit in cælum, nisi qui descēdit de cælo.* Alij quippe magis trahi quàm ascendere sunt dicendi. Absit autem, ut Christo iam per resurrectionem glorificato, corpo-

ralis eius ad cœlos ascensus aliquid beatitudinis contulerit. Quæ est enim in futura vita beatitudo nostra, nisi illa diuinitatis visio, de qua Psalmista dicit: *Satiabor dum apparueris gloria tua?* Cuius quidem visionis lucem ciuitati per Isaiam Dominus promittens, ait: *Non erit tibi amplius sol ad lucendum per diem, nec splendor lune illuminabit te, sed erit tibi Dominus in lucem sempiternam, & Deus tuus in gloriam tuam. Non occidet ultra sol tuus, & luna non minuetur, quia Dominus erit in lucem sempiternam, & complebuntur dies luctus tui. Populus autem tuus omnes iusti in perpetuum hereditabunt terram, &c.* Quis etiam nesciat Deo, qui vtique est, nos nequaquam locis, sed operibus præsentem fieri vel absentem? Vnde & Angeli faciem Dei semper videntes, cum ad nos mittuntur, nequaquam huius visionis beatitudine priuantur. Quanto magis anima Christi, quæ hac visione perfectiùs semper fruitur, ea vniquam priuari potuit? Quid est itaque humanitatem eius cœlos conscendisse, vel vt diligentius Apostolus ait, cum super omnes cœlos ascendisse, vt adimpleret omnia, nisi loco corporali ascensu monstrasse eam omnium beatorum altitudinē transcendisse? De qua quidem dignitatis excellentia, qua transcendit vniuersa, dictum est per Prophetam: *Eleuata est manus tua sicut cedrus.* Et per Apostolum, *Propter quod & Deus illum exaltauit, & dedit ei nomen quod est super omne nomen.* Et iterum, *sedet ad dexteram maiestatis in excelsis, tanto Angelis melior effectus, quanto differentius præ illis nomen hereditauit.* Ascendisse itaque ad cœlos dicitur, non vt eius beatitudo vel gloria per corporalem eius ascensum augeatur, sed vt per ipsum declaratur. Absit enim, vt dictum est, quod post resurrectionem ipsi aliquid beatitudinis vel gloriæ suæ in anima siue in corpore credamus collatum esse: sed quod iam obtinebat, cum iam corpus suum tanta leuitate ostendebat glorificatum, vt & nubi insidere, & cœlos penetrare, & longè iam diuersum factum esse ab hoc corruptibili corpore, quod aggrauat animam, & sensus nostri deprimat vigorem. Vt ergo fideles hanc in suis corporibus glorificationem expectarent, vt ubicumque vellet spiritus, ibi sine vlla difficultate statim esset corpus, hoc primum in seipso caput exhibuit, quod exemplo eius sperandum esset membrum. Sicut ergo Filius Dei de cœlo descendisse dicitur humiliatus, & secundum assumptā

humanitatem quodammodo Angelis minor factus, ita & filius hominis ascendisse dicitur exaltatus, quamuis & corporalis ei non defuerit ascensus, qui hunc exaltatum attestaretur. Nam & quod mox additur, *sedet ad dexteram Patris*, non de corporali eius sessione, vel de corporali eius dextera Patris est accipiendum. Quid est enim hominem Christum ad dexteram Dei sedere, nisi eum in gloria Dei Patris, hoc est in superna illa beatitudine digniorem gradum tenere, tanquam omnium à Deo iudicem constitutum? Vnde subditur, *Inde*, hoc est perinde, *venturus iudicare viuos & mortuos*. Quasi ceteris electis ad sinistram Dei constitutis, solus iste assistit dexteræ: quia sicut dextera præualet sinistræ, ipse vniuersis præminet beatitudine. Quia verò sedere iudicantium, sicut stare iudicandorum, bene per eius sessionem iudiciariam exprimit potestatem. Viuos & mortuos iudicabit, quia tam electis quàm reprobis vel pœnam vel præmium pro meritis reddet. Quia enim iustus ex fide viuit, & iniquitas mors quædã animæ, iuxta illud: *Non mortui laudabunt te Domine, sed nos qui vivimus benedicimus Dominum*: electos hîc viuos, reprobos appellat mortuos. Vel viuos dicit, quos aduentus ille Iudicis occultus adhuc in corpore viuentes reperiet: ceteros verò, mortuos appellat.

C R E D O in Spiritum sanctum. Quæquidem confessio fidei ipsum æquè Deum sicut Patrem & Filium patenter asserit. Alioquin non diceret, *in Spiritum sanctum*, sed *Spiritum tantum*: sicut & consequenter dicit *Ecclesiam*, non *in Ecclesiam*, &c. Sicut ergo dicimus, *Credo sanctam Ecclesiam*, id est eam esse sanctam: ita & dicere possumus, credo sanctum Petrum, vel credo sancto Petro, & credo sanctæ Ecclesiæ. Vel Petri tanquam capitis sumus, sicut membra Dei existimus. Membra tamen Ecclesiæ tanquã corporis dicuntur, sed solius Dei tanquam capitis. Quod quidem illa innuit propositio cùm dicitur, *in Deum*, sicut iam superius expositio nostra præfixit. Græci tamen & *in Ecclesiam*, dicere non verentur: sicut & Symbolum illud continet, quod ad cautelam fidei orthodoxæ Leo tertius instituit, & in tabula argentea descriptum Romæ altari sancti Pauli affixit. *Catholicam*, id est vniuersalem, & non in aliqua mundi parte, sicut sunt hæreticorum conventicula, conclusam: sed vbiq; dilatatam, sicut & Iacob in fi-

gura Christi promissum est, cùm dicitur, *Dilataberis ad Orientem & Occidentem.*

SANCTORVM communionem. Hoc est illam, qua sancti efficiuntur, vel in sanctitate confirmantur, diuini scilicet sacramenti participatione: vel communem Ecclesiæ fidem, siue caritatis vnionem. Possumus & *sanctorum* dicere neutraliter, id est sanctificati panis & vini in sacramentum altaris. *Remissionem peccatorum*, tam per pœnitentiam, quàm per virtutem Ecclesiasticorum sacramentorum. *Carnis resurrectionem*, tam in electis videlicet quàm in reprobis, & in corporibus vtrorumque deinceps nulla dissolutione interueniente. *Vitam æternam*, siue ad gloriam, siue ad pœnam. *Amen*, hoc est, verum est. Quod quidem iuxta Apostolum, vt suprâ meminimus, dicere non debemus, nisi quæ præmissa sunt intelleximus. Vnde ad paruulorum eruditionem, hanc quantulamcumque necessariam duximus expositionem.

EIVSDEM MAG.

PETRI ABAELARDI

EXPOSITIO FIDEI,

In Symbolum Athanasij.



QUICVM QVE vult saluus esse. Voluntate quippe propria, non coactione saluamur aliena. *Ante omnia opus est*, subaudis, illi, hoc est necessarium. Ante omnia, hoc est ante spem & caritatem, vel cetera bona, quibus ad vitam æternam peruenitur. *Vt teneat*, non solum habeat, sed habitam custodiat, tanquam bonorum omnium fundamentum atque originem. *Sine fide* quippe, vt ait Apostolus, *impossibile est placere Deo.* *Catholicam*, id est vniuersalem, & omnibus fidelibus communem, atque ita cunctis necessariam, vt nec antiqui iusti tam ante legem, quàm sub lege, absque illa saluarentur. *In Trinitate*, hoc est in tribus personis existentem, & tres personas in vno Deo non solum credamus, sed etiam veneremur. Qualiter autem hæc Trini-

tas iuxta proprietates personarum, & hæc vnitas secundum naturam diuinæ substantiæ credenda sit, statim determinat, dicens: *Neque confundentes personas.* hoc est, permiscentes ad inuicem personas, vt videlicet eandem dicamus personam Patris, quæ Filij, vel Spiritus sancti; sicut illa hæresis assererat, quæ de Patre dicebat, quia quando vult Pater est, quando vult Filius. *Neque substantiam separantes*, hoc est, diuersas substantias in Deo credentes, sed vnā tantum. Sicut enim diuersitatem personarum in Deo debemus credere, ita etiam vnitatem diuinæ substantiæ. Quod statim exponens, ait: *Alia est enim persona Patris, &c.* Et rursum, *Sed Patris, & Filij, & Spiritus sancti vna est Deitas. Aequalis gloria*, id est reuerentia exhibenda. *Maestas*, id est dignitas. *Quare?* quia, *qualis Pater*, id est quantus dignitate. Quam dignitatem statim prosequitur, dicens: *Increatus Pater, &c. Immensus Pater*, non mole, sed potestate omnia concludente. Vel *immensus*, id est incomprehensibilis. *Æternus*, tam principio quàm fine carens. *Et tamen non tres omnipotentes.* Teste Augustino, nullū nomen est Dei, cuius singulare ita de singulis dicatur personis, vt eius pluralitas illis simul conueniat, præter hoc nomen persona. Pater quippe persona est, & Filius persona, & hi duo sunt personæ. At verò cū Pater sit Deus, & Filius Deus, vel Dominus, vel Creator, seu principium, aut lumen, vel omnipotens: non tamen Pater & Filius aut dii plures sunt, aut Creatores, aut plura principia, vel lumina, siue omnipotentes. Quippe cū dicitur pluraliter personæ, diuersitas proprietatum ostenditur, non rerum numero, vel essentialiter differentium. Econtrā autem, si diceremus Deos vel Creatores, &c. Ipsam quoque rerum essentialiter diuersarum multitudinem monstraremus, quarum vnaquæque esset Deus, &c. *Prius* tempore vel existentia præcedens. *Maius*, prolatione dignitatis. *Vnitas*, scilicet substantiæ in tribus personis. *Trinitas* e conuerso personarum, in vnitatem videlicet substantiæ. *Sentiat*, id est credat salutem substantiæ obtinendam. Vt credamus & confiteamur, iuxta illud, *Corde creditur ad iustitiam, ore autem confessio fit ad salutem.* Non duo substantiæ Christi sunt, sed vnus tantum in persona Christus. Etsi ergo in Christo diuersæ sunt naturæ, diuina scilicet atque humana; non tamen ideo diuersæ personæ. Quod statim congrua similitudine

confirmat, dicens: *Nam sicut anima*, hoc est, sicut in vno homine diuersæ sunt naturæ, spiritalis & corporalis; nec tamen idè duo homines vel duæ personæ: ita in Christo duæ, vt dictum est, sunt naturæ, non tamen duo Christi, imò vel duæ personæ. Persona quippe quasi per se vna dicitur, non rei alij in vnam rationalem substantiam sociata. Diuinitas itaque humanitati in Christo conjuncta per se ibi persona vna non est dicenda, & humanitas altera, sed duæ simul vna sunt persona, quæ propriè Christus dicitur. *Omnes homines resurgent*, etiam illi qui tunc reperientur viui. Hi namque dum rapiuntur obuiam Christo in aera, in ipso raptu, quo Iudici occurrent, morientes, statim reuiuiscunt; & hoc ipsum erit eis resurgere quod reuiuiscere. Quòd si opponatur de quibusdā, quorum resurrectio iam completa creditur; veluti de his qui Dominicæ resurrectionis testes sua quoque resurrectione fuerunt; ita intelligendum est tunc omnes resurrecturos esse, vt tunc omnium resurrectio ita compleatur, vt neminem deinceps resurgere contingat, sicut nec morte dissolui. *Cum corporibus suis*. Hoc est, resumptis eisdem corporibus, quæ prius habuerant cum in mortem corruerunt. Non enim resurget nisi quod cecidit. At verò vtrum hi, qui paruuli moriuntur, vel qui diu vixerunt, illud solùm, vel illud tantùm ibi sint habituri de quantitate suæ corpulentiae, quod hîc habuerunt, nonnulla est quæstio. Quicquid tamen de hoc æstimemus, illud proculdubio constat, resurrectionē dici non posse absq; illa corporis substantia, quæ pertulit casum in morte. *Et reddiduri sumus*. Si hoc quoque generaliter de omnibus intelligatur, quærendum videtur quomodo paruulis morientibus id conueniat, vel perfectis iustis, qui potius sunt ibi iudicaturi quàm iudicandi. Quippe quæ ratio de suis tunc ab eis exigenda est, vel discussio est facienda, qui in tanta perfectione beatitudinis apparebunt; vt cum ipso Domino resideant iudicantes, nec tam pro se rationem reddituri, quàm à ceteris exacturi. Denique paruuli, quibus nulla imputanda sunt opera, quam ibi habent rationem reddere de proprijs factis? Sed profectò, quemadmodum diximus omnes homines ibi resurgere, non vt de singulis tunc resurrecturis id cogamur intelligere; sed ita tunc omnium resurrectionem cōpleri, vt nulla vlteriùs fiat: ita & hoc loco omnes tunc red-

dere rationem dicuntur, ut tunc de omnibus ita sit consummatum iudicium, ut nulla deinceps discussio restet, ne de quoquam amplius dubitetur, utrum premio vel poena dignus sit. Et hoc est eos ibi de proprijs operibus reddere rationem, manifestari omnibus quid horum meruerint. Quæ duo statim determinat, tam præmium scilicet, quam poenam, dicens: *Et qui bona egerunt*, hoc est in proposito bonorum operum vitam consummauerunt, qualiacumque præcesserint opera. *Vitam æternam*, hoc est beatitudinem indeficientem. *Ignem æternum*. Hoc est summum atque indeficientem cruciatum, siue ille ignis corporeus tantum sit atque materialis, siue quicumque interior animæ cruciatus, qui nomine ignis maximè nos cruciantis, & validiùs consummentis, cum sit acutius elementum, & penetrabilius cæteris, quo minus ei resisti queat, exprimitur. Et attende nihil hîc de paruulis qui nihil habent meritorû, dictum videri; quamuis eos quoq; non minus adultos saluari constet aut damnari. Sicut enim tam hæc scriptura quàm ceteræ non nisi adultis, & qui capaces sunt rationis, ad eruditionem fiunt: ita satis visum est hoc loco tantum de his eos instruere, quæ ad ipsos pertinent.

HELOISSÆ
PARACLITENSIS
DIACONISSÆ

PROBLEMATÀ,

Cum Mag. Petri Abaelardi Solutionibus.

EPISTOLA HELOISSÆ AD
PETRUM ABAELARDUM.



BEATVS Hieronymus sanctæ Marcellæ studium, quo tota feruebat, circa quæstiones sacrarum literarum maximè commendans, ac vehementer approbans, quantis eam super hoc præconijs laudum extulerit, vestra meliùs prudentia, quàm mea simplicitas novit.

uit. De qua, cùm in Epistolam Pauli ad Galatas commentarios scriberet, ita in primo meminit libro: *Scio quidem ardorem eius, scio fidem, quam flammam habeat in pectore, superare sexum, obliuisci homines, & diuinorum voluminum tympano concrepare, rubrum hoc seculi pelagus transfretare. Certè cùm Romæ essem, nunquam tam festina me vidit, ut de scripturis aliquid interrogaret. Neque verò, more Pythagorico, quicquid responderem rectum putabat, nec sine ratione præiudicata apud eam valebat auctoritas: sed examinabat omnia, & sagaci mente vniuersa pensabat, ut me sentirem non tam discipulam habere quàm iudicem. Ex quo vtique studio in tantum eam profecisse nouerat, ut ipsam cæteris eodem studio discendi feruentibus magistram præponeret. Vndè & ad Principiam virginem scribens, inter cætera sic meminit documenta: *Habes ibi in studio scripturarum & in sanctimonia mentis & corporis Marcellam & Asellam; quarum altera te per prætata virentia & varios diuinorum voluminum flores ducat ad eum, qui dicit in Cantico: Ego flos campi, & lilium conuallium: altera ipsa flos Domini tecum mereatur audire: ut lilium in medio spinarum, sic proxima mea in medio filiarum. Quorsum autem ista, dilecte multris, sed dilectissime nobis? Non sunt hæc documenta, sed monita: ut ex his quid debeas recorderis, & debitum soluere nō pigriteris. Ancillas Christi, ac spirituales filias tuas in Oratorio proprio congregasti, ac diuino mancipasti obsequio; diuinis nos intendere verbis, ac sacris lectionibus operam dare, plurimùm semper exhortari consueuisti. Quibus sæpius in tantum scripturæ sacræ doctrinam commendasti, ut eam animæ speculum dicens, quo decor eius vel deformitas cognoscatur, nullam Christi sponsam hoc carere speculo permittebas, si ei, cui se deuouerit, placere studuerit. Addebas insuper ad exhortationem nostram, ipsam scripturæ lectionem non intellectam, esse quasi speculum oculis non videntis appositum. Quibus quidem monitis tam ego quàm sorores nostræ plurimùm incitata, tuam in hoc quoque quoad possumus implentes obedientiam, dum huic operam studio damus, eo videlicet amore literarum correptæ, de quo prædictus Doctor quodam loco meminit, *Ama scientiam scripturarum, & carnis vitia non amabis*, multis quæstionibus perturbata, pigriores efficimur in lectione: & quod in sacris verbis magis ignoramus, minùs diligere cogimur, dum infructuo-**

sum laborem sentimus, cui operam damus. Proinde Quæstiunculas quasdam discipulæ Doctori, filia Patri destinantes, supplicando rogamus, rogando supplicamus, quatinus his soluendis intendere non dedigneris, cuius hortatu, immò & iussu hoc præcipuè studiū aggressæ sumus. In quibus profectò Quæstionibus, nequaquam ordinem scripturæ tenentes, prout quotidie nobis occurrunt, eas ponimus & solvendas dirigimus.

Problema Heloissæ I.

QUID est quod Dominus in Euangelio Ioannis de Spiritu, quem missurus erat, promittit dicens, *Et cum veneris ille, arguet mundum de peccato, & de iustitia, & de iudicio: De peccato quidem, quia non crediderunt in me: de iustitia verò, quia ad patrem vado, & iam non videbitis me: de iudicio autem, quia, princeps mundi huius iudicatus?*

Solutio Abaelardi.

ARGVET per Apostolos, quos replebit, nō vnā partem mundi, sed totum, de peccato scilicet perseuerante vel retento ab hominibus, propter hoc, quia non crediderunt in me. Arguet de iustitia, scilicet per meipsum præsentem oblata, & non suscepta tunc cū præsens essem, quem iam recuperare non possunt euntem ad Patrem, & iam ultra hīc non videntum. De iudicio scilicet præcedentium, in quo erant, hoc est peccati siue iustitiæ: cum ea videlicet quæ reos vel iustos faciunt in operibus magis quā in intentione constituent, & merita non tam secundum animum, quā secundum operationem diiudicent, sicut maximè Iudæi faciunt, neminem arbitantes dānari, quicquid velit, dūmodo illud opere non cōpleat. Vndè & Apostolus ad Romanos, *Israel, inquit, sectādo legē iustitiæ, in legē iustitiæ non peruenit. Quare? quia non ex fide, sed quasi ex operibus. Quāvis ergo lex concupiscentiā quoque interdicit: non tamen hoc peccatum esse tantum arbitrantur, vt ad damnationem sufficiat. Quem quidem errorem arguendum esse Dominus nunc dicit, ex eo quod princeps huius mundi iudicatus est. Ipse quippe diabolus, qui carnalibus & amatoribus mundi dominatur, & totius auctor*

est & origo peccati, non de hoc quod fecerit, sed quod præsumendo voluerit, statim damnatus tam grauitè corruit.

Problema Heloyssæ II.

QUID est illud in Epistola Iacobi, *Quicumque autem totā legem seruauerit, offendat autem in vno; factus est omnium reus? Qui enim dixit, non mæchaberis, dixit, & non occides. Quod si non mæchaberis, occides autem: factus es transgressor legis?*

Solutio Abaelardi.

OMNIA simul legis præcepta, non singula sunt lex ipsa. Qui ergo totam legem præter vnum mandatum custodierit, fit reus omnium: hoc est, ex eo damnandus est, quòd non omnia custodit præcepta, quæ simul, vt dictum est, accepta, sunt lex ipsa. Ac si apertè dicat. Quamuis impletor legis nemo esse possit, vnum eius obseruando mandatum: transgressor tamen legis efficitur, si vel vnum eius transgrediatur præceptum. Vndè & statim Apostolus exponens quod dixerat, *Omnium reus*: subiecit, *factus est transgressor legis*, ex eo videlicet quod vnum prætermisit præceptum, quod æquè, vt cætera, fuerat iniunctum. Alioquin ex eo quod subiungit, *Qui enim dixit, non mæchaberis, &c.* nequaquam comprobaret illud præmissum, *factus est omnium reus*. Cùm igitur ait, *Qui enim dixit, &c.* tale est, ac si diceret: Ideò rectè dixi, quia vnum transgrediendo, factus est omnium reus: hoc est, ex hoc dānandus est, quia non omnia seruando Deū contempsit. Quia ipse Dominus, qui legem tradidit, tam hoc mandatū, quàm illud obseruari iussit: hoc est, omnia, non aliquod vnum ex omnibus. Ac per hoc sicut transgressor fit legis, vel vnum transgrediendo præceptum: ita fit reus omnium, sicut est expositum, ex hoc etiam damnandus, quòd non omnia compleuerit.

Problema Heloyssæ III.

QUID est quod sæpè Dominus ab aliquibus interrogatus, respondens illis sigillatim dicat, *Tu dixisti*, vel, *Tu dicis*, nonnunquam etiam pluribus simul interrogantibus respon-

deat, *Vos dicitis*, tanquam hoc eos dixisse assereret, quod quasi quæ dubitantes quærebant? Sic quippe Iudæ interroganti *Nunquid ego sum Rabbi*, qui te scilicet sum traditurus? Respondit, *Tu dixisti*. Et interrogatus à Pontifice, an sit filius Dei, similiter respondit. Populo etiam quærenti, *Si tu es Christus, dic nobis palam*. Vel, *Tu ergo es filius Dei*? Respondit: *Vos dicitis, quia ego sum*. Denique & à Præsede, id est Pilato, inquisitus an sit Rex Iudæorū. Respondit, *Tu dicis quia Rex sum ego*. Quæ profectò responsiones non immeritò dubitationem excitare videntur. Qui enim quærit utrū hoc sit vel illud, nequaquam enuntiando dicit, quòd hoc sit, vel illud: sed quasi dubitando quærit utrū ita sit.

Solutio Abaelardi.

RE vera difficilem vel prorsus insolubilem hæ responsiones Domini mouerent quæstionem, si quod Dominus ait, *Tu dixisti*, vel, *Vos dicitis*, vel, *Tu dicis*, ad præcedentium interrogationum verba referret: ut in eis scilicet hæc dicta fuisse assereret, quod nequaquam conuenit. Cū ergo Iudæ interroganti, an ipse sit, qui eum tradat, respondit, *Tu dixisti*, potius quàm, *Tu dicis*: ad pactum illud respexit, quod iam ille cū Iudæis inierat promittēs se illis eum tradere cupiditate promissæ pecuniæ. Quod verò Principi sacerdotum interroganti an Christus sit filius Dei, respondit, *Tu dixisti*, sic est accipiendum, quod ille, qui eo tempore Christum, quem videbat, esse filium Dei negabat, sæpius olim legem ac Prophetas recitando id confessus fuerat. Cū autem Iudæis interrogantibus an sit Christus, vel an sit filius Dei, respondit, *Vos dicitis*, verbo scilicet præsentis temporis vtens ad eos sicut & ad Pilatum, præsentem iam adesse diem significat, in quo id fateantur. Vbi enim illudentes ei dicebant, *Prophetiza Christe, quis est qui te percussit?* vel, *Aue Rex Iudæorum*, eum profectò Christum esse, hoc est vnctum quacumque intentione detestabantur, in hoc fortassis prophetiam Caiphæ imitātes dicentis: *Expedi vobis ut vnus moriatur homo, & non tota gens pereat*. Sed & turbæ testimonio eum cum ramis palmarum susipientis ipse & filius Dauid est, iuxta Matthæum: & in ipso regnum Dauid venit, secundum Marcum: & benedictus

est Rex qui venit, secundum Lucam : & denique, secundum Ioannem , benedictus qui venit in nomine Domini Rex Israel. Quod nequaquam isti, per illusionem, sicut supradicti, sed ex fide dicebant. Tale est ergo quod Iudæis ait, *Vos dicitis*, ac si diceret : Multi adhuc inter vos sunt, qui hoc non solum ore proferant : sed & corde teneant. Etsi enim illi, qui hoc interrogabant, nequaquam id dicerent, vel crederent : cum tamen dixit, *Vos dicitis*, non ad personas illas, quæ aderant, sed ad populum ipsum respexit. Sic & alibi cum ait Iudæis de Zacharia, *Quem occidistis inter templum & altare*, nequaquam de illis, qui tunc erant, Iudæis, sed de populo ipso, de quo erant, accipiendum est. Sic & Iosue cum dicitur filios Israel secundo circumcidisse, non hoc in eisdem personis, sed in eodem populo constat eum fecisse. Legimus quoque in hoc die passionis, quoddam centurio, & qui cum eo erant custodientes Dominum crucifixum, cum expirasset, & viderent velum templi scissum, & terræ motum, & monumenta aperta, dixerunt : *Verè filius Dei erat iste*. Et omnis turba eorum, qui simul aderat ad spectaculum istud, & videbant, quæ fiebant, percutientes pectora sua reuertebantur. Tale est ergo, ut diximus, quod Iudæis quærentibus, an esset Filius Dei, respondit, *vos dicitis* : hoc est iam præsens dies vel tempus adest, in quo id de me confiteamini. Similiter Pilato quærenti, an sit rex Iudeorum, respondit, *Tu dicis*, potius quam, *Tu dixisti*. Homo quippe gentilis prophetias ignorabat, non ea legerat verba, ubi Christus fuerat promissus, & regnum eius prophetatum iuxta illud, & *regni eius non erit finis*, vel illud, *Dicite filia Sion, Ecce rex tuus venit* : quod tamen ipso die Pilatus sæpius verbis asseruit, & in ipso titulo crucis scripto meminit, Iudæis ait. *Vultis dimittam vobis regem Iudeorum?* & iterum : *Regem vestrum crucifigam?* Qui etiam cum superius quæsisset à Domino, *Tu es rex Iudeorum?* & ille respondisset, *A temetipso hoc dicis, an alij tibi dixerunt de me?* Rursum ait Pilatus : *Nunquid ego Iudeus sum?* Gens tua & Pontifices traderunt te mihi. Ecce quoties & quàm manifestè Pilatus eum Regem profiteatur Iudæorum, & ipsum populum Iudæorum gentem eius appellet : cui cum Dominus dixerit, *A temetipso hoc dicis, &c.* tale est, ac si diceret. Quæris hoc pro teipso ut veritatem cognoscas, an dolo Iudæorum, tanquam vnus ex ipsis, ut me interficiendi occasionem hinc sumas? Denique

& titulum Pilatus scribens, hoc quod dixerat verbis, scripto confirmavit trium linguarum, ut ab omnibus Hierosolymam conuenientibus legi posset, & verus intelligi Rex Iudæorum. Erat quippè scriptum, *Iesus Nazarenus, Rex Iudæorum*. Vbi quidem cum adiecit, *Nazarenus*, diligenter hunc Iesum distinxit à cæteris, qui in antiquo populo, hoc quoque nomine, non tam propriè quàm nuncupatiuè fuerant insigniti: ut pote Iosue, Iesus Sacerdos, vel Iesus filius Sirach. De hoc autem honore tituli, Pontifices Iudæorum vehementer indignati tanquam in damnationem suam conscripti, regem proprium crucifixissent, dixerunt Pilato: *Noli scribere Regem Iudæorum, sed quia ipse dixit, Rex sum Iudæorum*. At verò quoniam prophetatum fuerat, *Ne corrumpas David in tituli inscriptione*, tanquam hoc ad se dictum Pilatus intenderet, respondit: *Quod scripsi, scripsi*. Tanquam si diceret. Quod scribendum prouidi sine vlla correptionis retractatione firmaui: tanquam in eius mente hoc scriptum primitus esset, quod secundo literis exhiberet. Hæc ergo geminatio verbi, *Quod scripsi scripsi*, perseverantiam vel incommutabilitatem significat facti, sicut illud: *Euntes ibant*.

Problema Heloissæ IIII.

QUOMODO stare potest quod Dominus Iudæis signa querentibus respondit de tempore sepulturæ suæ, *Sicut fuit Ionas in ventre ceti tribus diebus & tribus noctibus, sic eris & filius hominis in corde terræ tribus diebus & tribus noctibus*? Constat quippe Dominum sexta feria de cruce depositum esse sepultum, & sabbato quieuisse in sepulchro, & sequenti nocte Dominicæ diei resurrexisse quarta vigilia. Vnde certum est per vnā tantum integram noctem præcedentem sabbatū, & per integram ipsius sabbati diem eum in sepulchro fuisse, quem quarta vigilia noctis Hieronymus in Epistolam ad Galatas dicit resurrexisse.

Solutio Abaelardi.

QUOD ait Dominus, *tribus diebus & tribus noctibus*, non est accipiendum, quòd per tres dies integros & noctes ibi fuerit:

sed quòd in tempore continente tres dies cum noctibus suis sepultus quieuerit. Vndè & bene cùm dicitur, *tribus diebus & tribus noctibus*, adiunctũ est, *sicut Ionas*, quem tertio die piscis euomuit in aridã; ac per hoc per vnã tantũ noctẽ integrã, & vnũ tantũ integrũ diẽ in ventre ceti fuerit. Tempus itaq; cõtinens tres dies cũ noctibus suis, accipe à principio noctis parasceuem sequentis vsque ad finem Dominicæ diei: & inuenies in illo temporis spatio, quamuis non per totum tempus, Dominum tribus diebus & tribus noctibus iacuisse in sepulchro. Non enim quod in tempore aliquo fit per totum illud tempus fieri necesse est. Fortassis & quod dicitur, *in corde terre*, non tam de sepultura Domini accipi videtur, quàm de cordibus hominum eo tempore intantum de Christo desperantium, vt discipuli quoque necnon & mater ipsius in fide grauiter titubauerint. Vnde Augustinus quæstionum veteris & nouæ legis Capitul. *Etiam Maria, per quam mysterium gestum est incarnationis Saluatoris, in morte Domini dubitauit; ita vt in resurrectione Domini firmaretur: Omnes enim in morte dubitauerunt, & quia omnis ambiguitas à resurrectione Domini recessura erat, pertransire dixit gladium.* Cor itaque terræ quasi cor terrenũ adhuc & carnale nondum spiritale factum ex firmitate fidei, vel ardore caritatis, dicit cor humanum: quandiu homines in illo temporis articulo Christum carnem magis, hoc est hominem, quàm Deum æstimarent, & terrenũ potiùs quam cælestem. Quod ergo Iudæis signum potentia requirentibus tanquam per hoc eum recognoscerent Deum, respondit se potiùs eis daturum signum Ionæ, tale est, quod potiùs infirmitatem in eo cognoscere digni sint: sicut Ionas in mare missus plus iniustitiæ quàm religionis æstimatus est habuisse, & hoc ei ex propria culpa contigisse, vt damnari etiam mereatur.

Problema Heloisse V.

MAXIMAM dubitationem de apparitionibus Domini resurgentis, quæ mulieribus factæ sunt, nobis Euangelistæ reliquerunt. Marcus quippe & Ioannes eum insinuant primò apparuisse Mariæ Magdalena, quæ venit mane, cùm adhuc tenebræ essent, ad monumentum, & vidit lapidem sublatum à monumento: & postquam hoc nuntiauit Petro &

Ioanni, & illi cucurrerunt ad monumentum, & inde reuerſi ſunt, vidit duos Angelos, & deinde Ieſum quē putauit hortolanum. Et hæc apparitio prima illi ſoli dicitur facta. Matthæus verò refert eam cum altera Maria veniſſe ad ſepulchrū, & tunc terræ motu facto Angelum deſcendiſſe, & lapidem reuoluiſſe, & nuntiariſſe Dominum reſurrexiſſe, & illis duabus Ieſum occurriſſe: cuius pedes tenuerunt. Marcus verò refert quòd Maria Magdalene & Maria Iacobi, & Salomæ valde mane venerunt ad monumētum orto iam ſole, cōquirentes ad inuicem, quis reuolueret eis lapidem ab oſtio monumēti. Quem cū respicientes viderunt reuolutū, & per Angelū eis loquentē, & per ſepulchrum vacuum cognouiſſent Dominum reſurrexiſſe: exeuntes de monumento fugerunt tremefactæ, nemini quicquam de hoc præ timore dicētes. Vbi & ſtatim annectitur: *Surgens autem Ieſus manè prima Sabbati, apparuit primò Maria Magdalena. Illa vadens nuntiauit his, qui cum eo fuerant, & non crediderunt.* Lucas autem refert, quòd Maria Magdalene, & Ioanna, & Maria Iacobi, & quæ cum eis erant, valde diluculo venerunt ad monumentum, & inuenerunt lapidem reuolutū à monumento, & ingreſſæ non inuenerūt corpus Ieſu: & edoctæ ab Angelis de reſurrectione Domini, nuntiauerunt hoc diſcipulis, & non credebant illis. Poſitis itaque verbis Euangelistarum, primò quærimus quomodo, iuxta Ioannem, Maria Magdalene veniens ad monumentum manè cū adhuc eſſent tenebræ, vidit lapidem ſublatus, & poſtea, vt Marcus dicit, ipſa & Maria Iacobi & Salomæ valde mane veniunt ad monumentum orto iam ſole dicentes ad inuicem; *Quis reuoluet nobis lapidem?* Si enim Maria Magdalene iam viderat lapidem reuolutum cū adhuc tenebræ, id eſt nox eſſet: quomodo nunc orto iam ſole ipſa cum cæteris queritur de lapide reuoluendo, quæ iam antea ſublatus viderat? Secundò etiam quærendum videtur quomodo in Marco mulieres dicuntur nemini præ timore reſurrectionem Domini nuntiaſſe, cū cæteri Euangeliftæ aſſerant econtrario? Denique Ioannes Mariam Magdalenam, non aliquam cum ea, refert antequam Ieſum videret, nuntiaſſe Petro & Ioanni eum de monumento ſublatus, & eos ſtatim illuc cucurriſſe. Lucas verò refert eandem Mariam & alias cū ea plures feminas, poſtquam didicerunt Dominum reſurrexiſſe,

xisse, hoc discipulis nuntiassent: & tunc Petrum ad monumentum cucurrisse.

Solutio Abaelardi.

SOLVS quidē Ioannes de Maria Magdalene, & non cæteris mulieribus in resurrectione Domini cōmemorat, nō quod ea sola his, quæ tunc facta sunt, affuerit: sed quod eius deuotionem cæteris maiorē plurimum ipse commendaret, cuius hortatu & exemplo cæteræ feminæ incitarentur maximè. Sicut ergo cæteris in dilectione feruentior erat, & de gaudio resurrectionis magis sollicita, venit prior & intrepida, cū adhuc nox esset, ad monumentum: & reuersa est iterum ad suos, quærendo studiosè si quis adhuc de resurrectione Domini certificatus esset. Quod cū minimè reperisset, iterum ad monumentum orto iam sole cum alijs venit, & tunc reuolutio lapidis facta est, quamuis Ioannes hanc reuolutionē quasi prius factā per anticipationem dicat à Maria visam fuisse. Prior ergo Maria quàm cæteræ, quibus sollicitior erat, lapidē reuolutum cōperit, & sublatū Dominū credens, festina redijt, & hoc Petro nuntiavit, & Ioanni. Deinde reuersa cū illis ad monumentū post discessū eorū à monumento, stabat ad ipsum monumentū foris plorans, cæteris, quæ aderant, nō sic accedere audētibus, tunc Angelos, ac deinde Dominū prima videre meruit: ac deinceps altera Maria, quæ iuxta Matthæum, cum ea venerat prius, accedens, & metuens adhuc custodes, qui aderant, consolatæ sunt ambæ, cū ad terræmotum, & ad apparitionem Angeli sedentis super lapidem, quem reuoluerat, exterriti sunt custodes & facti sunt velut mortui. Quibus duabus euntibus nuntiare discipulis quod Angelus præceperat, occurrit Iesus illis simul secundo apparens. Aliæ autem, quæ timidiore & infirmiores fuerant in fide, nequaquam tunc Dominum meruerunt videre: sed & tantum Angelis nuntiantibus, eum audierant surrexisse. Et ideo cū non omnes æqualiter super hoc prius essent certæ, prius omnes tacuerunt, & distulerunt illud discipulis nuntiare, pauidæ adhuc & obstupefactæ de Angelica visione, & verentes ne sibi statim non crederetur, donec pluribus sibi aggregatis cōfidentiùs diceretur. Vndè postea, vt Lucas meminit, ipsa Magdalene, & Ioanna, & Maria Iacobi, & cæteræ, quæ cum

eiserant, dicebant ad Apostolos hæc. Quibus Petrus in fide firmior cæteris hoc non credentibus, iterum cucurrit ad monumentum: & cùm nec Angelos, nec Dominum vidisset, redijt vehementer admirans. Qui cùm vehementer stupe- ret de apparitionibus Angelorum, siue Domini, quæ factæ fue- rant mulieribus potius quàm ei vel discipulis, ne diu in dubi- tatione & mœstitia persisteret, vel credimus tunc ei Domi- num apparuisse, sicut Lucas refert Apostolos dicere, quòd *surrexit Dominus verè, & apparuit Simoni*. Quod autem Mat- thæus & Lucas dicunt, *Vespere Sabbati*, finem eius, id est no- ctem sequentem vsque ad lucem Dominicæ diei intelligunt. Hoc vesperum lucefcit in prima Sabbati, cùm ad lucem diei sequētis perducitur. Quod verò ait, *quæ lucefcit*, feminino sci- licet genere vtens, ad significationem respexit: quia, vt dixi- mus, in vespere noctem intellexit, vt tale sit, *Quæ lucefcit*, tanquam diceretur, Quæ nox ad claritatem pertingit. Vef- perum itaque seu vespera diei, dicitur extrema eius hora: vef- per verò totum tempus noctis sequentis.

Problema Heloissæ VI.

QUID est quod Dominus sacramenta corporis & sangui- nis sui discipulis tradens & commendās, non ait de cor- pore suo, *Hæc est corpus meum noui testamenti*, cùm de sanguine dixerit, *Hic est sanguis meus noui testamenti*, tanquam inagis sanguinem commendaret, quàm carnem? Quid est etiam illud, *Non bibam à modo de hoc genimine visis, vsque in diem illum, cum illud bibam vobiscum nouum in regno patris mei?*

Solutio Abaelardi.

CORPVS Christi in sacramento susceptum, humanitas est, quam nascendo de Virgine suscepit: quando, sicut scrip- tum est, *Verbum caro factum est*. Sanguis eius in poculum da- tus, passio est ipsius, cui communicare debemus, quicumque membra eius sumus. Vndè & scriptum est. *Christus passus est pro nobis vobis relinquens exemplum, vt sequamini vestigia eius*. Cùm enim Gregorius dicat, *Nihil enim nasci profuit, nisi redimi profuisset, atque in eius passione nostra redemptio consummetur; quod*

& ipse moriens profitetur dicens, *Consummatum est*, non incongruè sanguis effusus præfertur conceptæ carni, hoc est, passio eius natiuitati. Qui etiam magis quàm caro eius dicendus fuit noui testamenti, hoc est confirmatio Euangelicæ prædicationis: quia, sicut dicit Apostolus, *testamentum in mortuis confirmatum est*. Quid Euangelium nisi testamētum est amoris, sicut lex fuerat timoris? Vndè & Apostolus conuersis Iudæis ait: *Non enim subditi estis iterum in timore*. Et rursum. *Finis præcepti caritas de corde puro*. Et per semetipsam Veritas, *Ignem veni mittere in terram, & quid volo nisi ut ardeat*? Hoc igitur testamentum amoris in hoc maximè Dominica passio confirmauit, cùm pro nobis moriendo, illam nobis dilectionem exhibuit, qua maior esse non possit. Vndè & ipsemet ait, *Maiorem hac dilectionem nemo habet, ut animam suam ponat quis pro amicis suis*. In hoc etiā testamentum hoc confirmauit, quòd pro doctrina Euangelicæ prædicationis vsque ad mortem perstitit, & moriendo monstrauit, quod nascendo non potuit: sicut & ille qui testamentum aliquod suis hæredibus componit, dum in pristina voluntate perseuerat moriens, testamentum suum confirmat, quod nequaquam delens, vel in aliquo corrigens, ipsum omnino tunc roborat. Vnde benè sanguis Domini potius quàm corpus eius noui testamenti, vt diximus, fuerat dicendus. Illud autem quod ait, *Non bibam amodo de hoc genimine vitis vsque in diem illum cum illud bibam vobiscum nouum in regno Patris mei*, sic intelligo, tanquā si diceret. Non celebrabo vltèrius in sacramento passionem carnis meæ, donec id faciam vobiscum tanquam nouum in regno Patris mei. Sacramentum quippe Christi tunc quasi nouum sumitur, cùm ipsum sumentes plena fide, accedentes ipsos innouat, & à veteri homine, quem per transgressionem imitantur, in nouum transmutat, dum ipsum per obedientiam vsque ad mortem sequi sunt parati. Quales nequaquam tunc caderant discipuli in fide adhuc maximè, & à temporis articulo potissimum infirmi, nec adhuc in regno Dei traditi, vt in eis videlicet regnaret Deus, cui nōdum soliditate fidei adhærebant, eius Dominio penitus subditi. Quasi ergo vetus & non nouum tunc acceperunt ipsum sacramentum, & tanquam adhuc extra regnum Dei manentes: quia nondum in Deo sic eos constantia fidei confirmauerat, vt hoc percipien-

do noui iam facti, mererentur in nouitate illa ita sicut post resurrectionem confirmari. Bibet tunc Christus de hoc gemmine vitis cum eis, id est, de sanguine suo, qui est vitis eorū tanquam palmitum, cū illis dignè sacramenta suæ passionis communicantibus, sic inde sitim suam in ipsis reficiet. Qui enim salutem hominum sitit vel esurit, tunc de ipsa reficitur, cū eam impleri lætatur. Fortassis & ex hoc sacramentum Dominicæ passionis quasi vetus ante resurrectionem extitit, & postmodum nouum fuit: quia cū adhuc passibile corpus & corruptibile vel mortale gestaret, veteri homini per hoc similis fuit, antequam resurgendo de hac vita pœnali ad nouitatem futuræ perueniret. Dum ergo mortalis fuit, & se talem, qualis tunc erat, in sacramento dedit: quodammodo vetus & non nouum fuit illud sacrificium comparatione videlicet noui, quod nunc in humanitate sumimus immortali iam & incorruptibili. Lucas verò ait, *hic calix nouum testamentum est in sanguine meo*, id est pactum vel promissio vobis à Deo facta, de vestra scilicet redemptione in mea passione. Vbi enim nos habemus testamentum, in Hebræo habetur pactum. Qui enim legem Domini suscipiunt, cum eo quoddam ineunt pactum, siue ille cum ipsis: cū ipsi videlicet legis obedientiam, ille promittat remunerationem.

Problema Heloissæ VII.

QUID est etiam quod in Luca legimus duos calices, vel eundem bis Dominum dedisse discipulis? Sic quippe scriptum habetur. *Et cū facta esset hora, discubuit, & duodecim Apostoli cum eo. Et ait illis. Desiderio desideravi hoc Pascha manducare vobiscum antequam patiar. Dico enim vobis, quia ex hoc non manducabo, donec illud impleatur in regno Dei. Et accepto calice, gratias agit, & dixit, Accipite & diuidite inter vos. Dico enim vobis, quod non bibam de generatione vitis, donec regnum Dei veniat. Et accepto pane, gratias egit, & fregit, & dedit eis, dicens: Hoc est corpus meum quod pro vobis datur. Hoc facite in meam commemorationem. Similiter & calicem postquam cœnauit dicens: Hic est alix nouum testamentum in sanguine meo.*

Solutio Abaelardi.

PASCHA, quod secundum legem parare discipulos miserat, vetus est Pascha, in esu videlicet agni vel hœdi cum lactucis agrestibus. Quod etiam Pascha dicit se desiderasse, ut hoc cum discipulis manducaret, antequam pateretur: quia ante passionem, non postea voluit in figuris celebrari vetera, quæ superuenientibus nouis essent proijcienda. Quod & ipse Dominus patenter insinuat, cùm de nouo sacramento tantum dixerit, *hoc facite in meam commemorationem*, tanquam vetus iam finiens, & solummodo nouum deinceps statuens. Cùm enim dixisset, *hoc est corpus meum, quod pro vobis tradetur*, statim adiunxit, *hoc facite in meam commemorationem*. Vnde & Apostolus: *Quotiescunque enim manducabitis panem hunc & calicem bibetis: mortem Domini annuntiabitis donec veniat*. Est igitur Missæ celebratio, Dominicæ Passionis commemoratio, ad quam vnusquisque fidelium tanta compassionis deuotione debet accedere, quanta cum pro se crucifixum debet conspiciere. Vt ergo hæc Dominicæ Passionis memoria nostris mentibus inhæreat, & in eius amorem semper accendat, quotidie in eius altari hoc eius sacrificium debet immolari. *Hoc*, inquit, *facite*, hoc est ipsum corpus meum, non iam pro vobis traditum, sed tradendum in memoriam tantæ meæ dilectionis cōficite, ut inde quoque tantæ dilectionis flamma sitis accensi, ut communicare possitis passioni. Bis eundem calicem dare voluit, ut per hoc exprimeret nos calicem eius non solum in sacramenti perceptione, verum etiam in passionis imitatione accipere debere. Vnde & Psalmista: *Calicem salutaris*, hoc est veri Iesu, *accipiam*, eum videlicet per passionis quoque virtutem imitando. Et quia mortem tolerare non est humanæ infirmitatis, sed collatæ nobis à Deo virtutis: ipse est inuocandus, à quo ista speranda est virtus, in qua non tam nostram utilitatem, quàm eius gloriam quærere debemus, quæ per nomē eius significatur. Sicut enim ignominiosa dicuntur, quæ nomine digna non videntur: ita e contrario quæque gloriosa nomine digna sunt & fama. Nomen igitur Dei inuocamus, cùm ea quæ facimus ad gloriam eius intendimus, ut ille potius in nobis, quàm nos ipsi, glorificetur atque laudetur, à quo in his virtutem accipimus, ad quæ infirmi ex nobis sumus.

Hinc & Apostolus. *Qui glorificatur, inquit, in Domino gloriatur;* hoc est, qui in se aliquid virtutis vel pretij recognoscit, non se inde, sed Deum quærat honorari: nec id virtuti suæ, sed diuinæ ascribat gratiæ, non à se, sed à Deo id recognoscens esse. De hoc calice, quem Christi passionem imitando sumimus, illud est quod filijs Zebedæi ait: *Potestis bibere calicē, quem ego bibiturus sum?* Hoc est, me per passionem imitari posse confiditis? Benè autem de hoc calice primo, & non de secundo, discipulis ait: *Accipite, & diuidite inter vos.* Calicē quippe Christi ab eo accipientes inter nos diuidimus, cū eum diuersis generibus passionum imitamur. In perceptione verò sacramenti non est diuisio: quia ibi est vna ipsius capitis non membrorum oblatio, quæ à malis æquè vt à bonis Sacerdotibus virtute diuinorum verborum conficitur. *Accipite,* inquit *calicem,* hunc à me, quem postea inter vos diuidatis: *quia deinceps non bibam de generatione vitis,* hoc est, non celebrabo hanc hostiam meæ passionis, *donec regnum Dei veniat,* hoc est, vita cœlestis, in qua solus Dominus, non peccatum, regnat, per passionem meam fidelibus patefiat. Bene calicem imitationis calici præmisit sacramenti: quia hi soli condigni sunt Dominicæ mensæ cōmunicare, qui passionē eius imitari, & crucem eius parati sunt tollere. Vnde & scriptum est. *Ad mensam magnam sedisti, scito quoniam talia oportet te præparare.* Nouum, non vetus testamentum tradens, tam panem quàm calicem accipiens, gratias agit: innuens per hoc hinc esse completum, quod ibi fuerat præfiguratum, & de veritate potius quàm de vmbra Deum esse glorificandum. Superius tamen se desiderasse dixit vetus quoque Pascha cum discipulis celebrare, ne sic ab ipso noua sacramenta susciperent, vt à Deo tradita vetera non æstimarent. Quæ etiam vetera eis adhuc veteribus tunc maximè congruebant, vt hoc præcipuè Dominus deberet cum eis celebrare quod eis potissimū videbat conuenire, tanquam in hoc suo desiderio id se innuere intenderet, quod hoc eorū arguendæ vetustati videbat potissimū conuenire. De qua vt ad nouitatem eos transferendos esse innueret, vel admoneret, nouum veteri testamentū statim subjunxit, vt sic quodammodo illud quoq; vetus in nouū transiret: dū illi scilicet vetustatē deponentes, de regno peccati in regnum transirent Dei, & in veteri Pascha non iam literā, sed

spiritalem intelligentiam sequerentur : & sic de vetustate literæ ad nouitatem spiritus deferrentur : quod est Christum nunc etiam cum eis vetus pascha manducare, & ipsum in nouum commutare, cum ibi illud figurari perpendimus, quod in nouo consummari credimus. Vnde & ipse post resurrectionem statim incipiens à Moyse & interpretans in omnibus scripturis, vetus sacramentum in nouum conuertit, dum illud per intelligentiam huic applicuit, & quasi rotam in rota conclusit, & aquam legis in vinum Euangelij conuertit. Et iam etiam vetus Pascha tanquam mutatum in nouum nobiscum manducat : quia tunc cum reficimus ac delectamus, dum sic istud sumimus, sicut in illo sumendum edocti mysticè sumus, in esu videlicet agni & hœdi, & agrestibus lactucis, vel cæteris sibi constitutis. Vetus Pascha non nouum cum discipulis Christus manducat : ipse quippe ipsum est Pascha nouum, iuxta illud Apostoli, *Etenim Pascha nostrum immolatus est Christus*, quando nostra hostia ipse est factus, & ipsum in sacramento quotidie sumimus. Rectè quoque hinc vetus Pascha cum discipulis celebrauit, cum ipse adhuc in veteri homine esset ex corporis mortalitate, sicut illi ex morum similitudine. Sic econtrariò quasi nouus cum nouis nouum genimen vitis nunc bibit, dum ipse per immortalitatem, & isti per morum diuersitatem, deposito veteri homine, veri sacrificij delectantur nouitate : & tanquam ipse cum eis bibit, dum caput in membris agit. Vetus Pascha calicem non habuit, quia lex ad perfectum nihil adduxit, ideòque in eius sacrificio perfecta non debuit esse refectio.

Problema Heloisse VIII.

QUOD Dominus pro adultera liberanda Iudæis respondit, *Qui sine peccato est vestrum, primus in eam lapidem mittat*, & sic eam eruit, non nihil habet quæstionis. Cum enim eam lapidari non permittit, nisi ab eo qui peccato careat, omni homini vindictam exercere videtur interdicare : cum nemo mundus sit à sorde, nec infans, cuius vnus diei vita sit super terram.

Solutio Abaelardi.

DOMINVS Iesus ex Iudæis solus inter eos fuit sine peccato: hic adulteram lapidat, & feminam seruat, dum misericorditer ei parcit, & sic à flagitijs suis pœnitentē conuerit. Tale est ergo quod ait: *Qui sine peccato est vestrū, primus in eam lapidem mittat*: ac si aperte dicat: Ei lapidandam dimittite, qui ex vobis solus est à peccato immunis. Ipse primus in lapidandam dirigit lapidem, cū ei prius pœnitentiam inspirat; & illa postmodum per satisfactionem se macerat, & carnem ne spiritui ampliùs reluctetur, domat: vt iam mortificata mundo, deinceps viuat Deo, & macentur vitia, conseruata natura. Denique & Dominus ait: *Mihi vindictam, & ego retribuam*. Tunc quippe Deo vindictam reseruamus, quando ipse in nobis potius, quàm nos ipsi, hanc operatur. Vnde & homini, nō Deo, dictum est, *Non occides*. Ab ipso vtique nobis hoc interdicitur, qui sub nullo præcepto conclusus, id sibi deberi patēter profitetur. *Ego occidam*, inquit, *& ego viuere faciam*. Ipse in nobis occidit & parcit, cū tanquam adminiculo quodam nobis vtens, nos præceptis suis reos occidere vel innocentibus parcere facit, vt ei potius quàm nobis ista debeant imputari. Nam cū aliquis potens per operarios suos aliquid agit, non tam istorum quàm illius opus illud esse dicitur, hoc est, non illorum, qui operando faciunt, sed illius magis, qui per illos fecit hæc fieri. Homo itaque prohibetur occidere, non Deus in homine. Tunc autem occidit homo, & non in eo Deus, quando propria malignitate id agit, non præceptione Dei: hoc est, quando id ex se, non ex lege facit, & suæ malitiæ magis quàm diuinæ obedit iustitiæ. Tunc gladium accipit non ad exercendam iustitiam, vt vindicet iniquitatem: sed vt suam compleat impietatem. De qualibet Veritas ait: *Qui acceperit gladium, gladio peribit*. Qui acceperit, inquit, per se, non cui traditus fuerit à potestate, iste gladio perdendus est iustè, qui gladio vti præsumpsit iniustè. Cū autem quasi gladium miles sibi à rege traditum exercet ad vindictam, Rex in eo id agit, cuius ille operarius in hoc existit. Vnde Augustinus de Ciuitate Dei libro primo: *Non occides, his*, inquit, *exceptis, quos Deus occidi iubet siue data lege, siue pro tempore ad personam expressa iussione*. Non autem ipse occidit, qui ministerium debes

debet iubenti, sicut amminiculum gladius utenti. Idem in quaestionibus Exodi. Israelita furtū non fecerunt spoliando Aegyptios, sed Deo iubenti ministeriū prae buerunt: quemamodū minister iudicis occidit eum quem lex iussit occidi. Profectò si id sponte faciat, homicida est, etiamsi cum quem occidit, scit occidi à iudice debuisse. Item in quaestionibus Leuitici. Cū homo iste occiditur, lex eum occidit, non tu. Ex his profectò verbis patenter docemur nec homicidium, nec furtum propriè dici, quod ex obedientia cōmittimus, cū id rectè geramus, in quo Dei iussionem implemus. Quicquid ad Domini possessionem pertinere videtur, Dei potius quàm hominis esse dicendum est. Nec quisquam eorum Dominus est, sed dispensator, quandiu hoc habet Domino permittente: nec quisquam hoc ei surripit iniuste, qui hoc accipit Domino iubente. Cuius tantū sunt illa à quo quandiu vult nobis sunt commissa, atque in diuersos, prout voluerit, dispensatores transitura: qui tantò minùs hæc dispensare & habere digni sunt, quantò minùs eum recognoscunt, à quo hæc ei sunt commissa. Quales vtique infideles erant Aegyptij, hæc magis amittere quàm habere digni.

Problema Heloyssæ IX.

DOMINVS leprosum, sicut Matthæus refert, tactu suo mundatum ad sacerdotis iudicium misit, & offerre id iussit, quod lex talibus offerendum præcipit. Vnde super hoc quaestione mouemur, qua ratione Dominus in hoc facto legi contraire simul & obtemperare videatur. Leprosum quippe tetigit, quod lex prohibet: & mundatum ad sacerdotem misit, & ad offerendam hostiam, sicut lex iubet.

Solutio Abaelardi.

SICVT ipse Dominus ait, *Vsq̃ue ad Ioannem lex & Prophetæ:* hoc est vsque ad tempus gratiæ, tam legis quàm Prophetarū præcepta etiam iuxta literam fuerunt implenda. In nullo ergo iam Dominus legi contradicit, cui iam nullus obedire ex præcepto constringitur Dei: præcipuè cū lex ipsa in manu mediatoris, vt Apostol' ait, posita, hoc est in eius potestate cōstituta sit, vt qui eā ad tempus instituerat, cessare pro arbi-

trio faceret, cùm oporteret: vt iam perfecta caritas in tempore gratiæ timorem foras mitteret. Pertinet autem ad tempus gratiæ misericordiam maximè circa quoslibet exhibere, & ad pietatem, quos possumus, exemplis inuitare, nec quicquā in hominibus immundum, præter peccatum, abhorrere. Vnde Dominus in leproso cuncta hic misericorditer agit, cùm & eum tangere propter infirmitatem corporis non est dedignatus, & ei id facere præcepit, sine quo in conuersationem hominum nequaquam fuerat suscipiendus. Ad hoc enim à sacerdote aspectus, ipsius iudicio & legis sacrificio fuerat commendandus.

Problema Heloyssæ X.

QUID est illud in Euangelio Lucæ, quod diuiti damnato Abraham dicit, *Et in his omnibus inter nos & vos chaos magnum firmatum est, vt hi qui volunt hinc transire ad vos, non possint, neque inde huc transmeare?* Quomodo enim aliqui exccati sunt, vt de refrigerio tantæ quietis ad pœnas damnatorum transire velint, vel eis aliquod impendere beneficium iam omnino inaniter affectent, quos à misericordia Dei penitus exclusos vident?

Solutio Abaelardi.

ABRAM, in cuius sinu Lazarus est susceptus Deus est, qui fideles suos de huius vitæ miserijs ad futuræ vitæ refrigerium nobis adhuc occultū tanquā in quoddam secretū quietis suscipit. Ad hunc anima damnata loquitur quasi supplicando, dum eum sui desideret misereri. Abraham ei de sententia sua constituta respondet, cùm eum intelligere facit inaniter eum desiderare, quod nullatenus eidem potest euenire. Hoc est autem quod eum intelligere facit, quod subiungit, *Et in his omnibus inter nos & vos chaos magnum firmatum est, &c.* In his omnibus, hoc est, in vtrisque prædictis, de consolatione scilicet iustorum & cruciatu malorum, *chaos magnum firmatum est*, & hoc est impedimentum tantum diuino iudicio perenniter constitutum: *Vt qui volunt ad vos hinc transire non possint.* Transire hoc loco de refrigerio iustorum ad pœnas malorum intelligimus velle his quoque subuenire, qui damnati sunt &

quasi hoc beneficium iustorum illis afferre; vel inde huc illos educere, sicut fideles quotidie faciunt in hac vita, dum orationibus vel eleemosynis suis his quoque subuenire nituntur, quos in pœnis purgatorijs esse putant, cum omnino sint damnati. Non ergo de illis, qui in illo refrigerio sunt, intelligimus, vt hanc de damnatis compassionem habeant: sed de viuentibus adhuc, sicut dictum est, fidelibus. Non enim Abraham dixit, vt hi de istis, qui sunt hic, volunt ad vos hinc transire: sed simpliciter dixit, *Hi qui volunt*, siue adhuc viui, siue iam defuncti. Nos autem, vt diximus, propter viuentes hoc dictum accipimus, qui parabolicè dicuntur de refrigerio iustorum transire ad loca pœnalia damnatorum, vel inde huc transmeare: quæ videntur eiusdè esse sententiæ. Tale quippe est eos de refrigerio iustorum transire ad pœnas damnatorum, vel huc meare: tanquam illis quoque, qui damnati sunt, ita compati, vt bonis operibus suis hoc refrigerium velint illis impertiri, & quodammodo transportare, vel eos inde huc educere, vt eadem sententia in diuersis videatur verbis.

Problema Heloiffæ XI.

QUID est quod in eodem Euangelista legimus Dominũ dicere, *Dico autem vobis, quòd ita gaudium erit in cælo super vno peccatore pœnitentiam agente, quàm super nonaginta nouem iustis, qui non indigent pœnitentia?* Multo quippe melius est ac perfectius peccatum cauere, quàm commissum emendare, & multos quàm vnum bene agere: Vndè hoc magis quàm illud Deo constat placere. Quid est ergo quòd Deus vnus peccatoris pœnitentiam plus approbat, quàm multorum iustorum perseuerantiam?

Solutio Abaelardi.

Quo quisque ampliùs de peccato alicuius dolet, magis de correptione ipsius gaudet; & quo dolor damni maior extiterat, & de reparando commodo minùs sperandum videbatur, & grauius vt eueniret, maiore cum lætitia suscipitur, & maiori sollicitudini de damno maius gaudium succedit de commodo. De iustis autem quos in bono perseuerare confi-

dimus, & ideo minùs illi intendimus, de quibus securiores sumus, minore gaudio hinc accendimur, quàm de conuersione peccatoris, quæ difficillima videbatur. Non tamen ideo plus valet huius conuersio, quàm illorum perseuerantia: sed plus inde gaudemus cùm acciderit, vnde plurimùm solliciti fuimus vt accideret. Quod ergo dicitur, *Gaudium erit in cælo*, in Ecclesia præsentis fidelium intelligitur exultatio, quæ nonnunquam etiam regnum cælorum à Domino nuncupatur.

Problema Heloissæ XII.

IL L V D quoque nonnihil quæstionis habet quod in Matthæo legimus de operarijs in vineam missis: quorum prior est tantùm nouissimis inuidisse videntur, & aduersus patrem familias murmurasse vt tale mererentur responsum. *An oculus tuus nequam est, quia ego bonus sum?* In futura quippe vita, ita cuique beatorum sufficiet brauium susceptum, vt nemo plus ibi habere appetat, quàm accipiet: vbi erit tanta omnium caritas, vt vnusquisque alterius bonum diligat tanquam suum, nec à voluntate Domini quisquam discrepare possit, nec per malum inuidiæ aduersus aliquem, possit nequam oculum habere: maximè cùm inuidia hos, in quibus est, tantùm affligat & cruciet, vt de ipsa Poeta dixerit.

Inuidia Siculi non inuenere tyranni

Maius tormentum ————— & alibi

Inuidus alterius rebus macrescit opimis.

Solutio Abaelardi.

SC I E N D V M verò in omni parabola non tam rei veritatem expressam esse, quàm ex parte aliqua rei similitudinem inductam esse: & sæpe historiæ veritati similitudinem quasi rem gestam adiungi. Cùm enim de diuite & Lazaro gestum esse creditur in duabus personis, vel sæpius in multis, quòd huius anima sit saluata, illius damnata: nequaquam iuxta litteram accipi potest, quod diues Abrahamæ dicit, *Miste Lazarum, vt extremum digiti sui intingat in aquam & refrigeret linguam meam*. Non enim animarum est digitum vel linguam in se habere, sed corporum tantùm. Quod ergo de his dicitur, non ad

veritatem pertinet rei gestæ secundum proprietatem literæ, sed ad similitudinem inductam ex aliqua parte. Sic & hoc loco, cum murmurare dicuntur quidam & tanquam indignari alios sibi adæquari; murmuratio ista non indignationis, sed admirationis est accipienda. Qui enim murmurant, mirantur id fieri, quod non credebant. Vnde murmuratio illa, nunc dicitur multorum fidelium admiratio, quod sibi videbunt in præmio adæquari, quos pauciori tempore nouerant operari. Similiter oculus nequam per similitudinem dicitur hominū inuidorum, qui inde aduersus alios commouentur, quod quasi contra rationem factum, quod non crediderant, mirantur. Tale est ergo, *An oculus tuus nequam est, quia ego bonus sum?* tanquam si diceret. Nunquid ex eo quod vides per meam bonitatem factum commoueris more mundi ex iniquitate ad indignationem? Ac si diceret. Nequaquam sic conuenit. Hoc autem Dominū cuiquam dicere, est ipsum facere, hoc intelligere, quod non hinc debeat indignari, sed magis laudare Deum.

Problema Heloyssæ. XIII.

QVAESTIO illa de peccato in Spiritum sanctum irremissibili nos quoque sicut multos commouet. Quomodo enim quis in Filium Dei, & non in Spiritum sanctum peccare potest, cum vnus offendi nequaquam sine alio queat, & vnus offensam in vtrumque redundare sit necesse: cum nequaquam cuiquam possit esse placatus, cui fuit ille offensus?

Solutio Abaelardi.

ANTEQVAM solutionem, prout possumus, ponamus: præmittenda sunt, & ex diuersis Euangelistis colligenda huius sententiæ verba, & vnde ipsa pendeat præmittendum, vt facilius ad solutionem sit perueniendum. Sicut ergo Matthæus refert, cum dæmoniacum quendam Dominus curasset, & inuidi Pharisei dicerent eum id facere per spiritum nequam, non per Spiritum sanctum: Dominus ait, *Si ergo in Beelzebub eijcio demones, filij vestri in quo eijciunt? Si autē in Spiritu Dei eijcio demones: igitur peruenit in vos regnū Dei.* Et post aliqua: *Ideo dico vobis, Omne peccatū & blasphemie remittetur homini-*

bus: Spiritus autem blasphemia non remittetur. Et quicumque dixerit verbum contra filium hominis, remittetur ei: qui autem dixerit contra Spiritum sanctum, non remittetur ei neque in hoc seculo, neque in futuro. Marcus verò sic ponit: Amen dico vobis, quoniam omnia dimittentur filiis hominum peccata & blasphemia, quibus blasphemaauerant: qui autem blasphemaauerit in Spiritum sanctum, non habebit remissionem in aeternum, sed reus est aeterni delicti. Quoniam dicebāt immundum spiritum habet. Lucas verò sic scribit Dominum dicere. Quicumque confessus fuerit me coram hominibus, & filius hominis confitebitur illum coram Angelis Dei. Qui autem negauerit me coram hominibus, negabitur coram Angelis Dei. Et omnis qui dicit verbum in Filium hominis, remittetur illi. Ei autem, qui in Spiritum sanctum blasphemaauerit, non remittetur. His itaque præmissis, primò distinguendum est, quid sit peccatum blasphemiae in filium hominis, & quid in Spiritum sanctum. Quatum verò æstimo, ille peccat blasphemando in Filium hominis, qui Christo detrahit eum denegando Deum non tam per malitiam quam per errorem, ex assumpta nostræ infirmitatis natura, quam in eo conspicit. Hoc enim innuit, cum dicit Filium hominis potius quam Filium Dei: ut propter infirmitatem hominis, quam ex matre nascendo suscepit, non credatur in eo fortitudo Dei. Quod quidem peccatum ex ignorantia tanquam inuincibili, plurimum excusabile videtur: cum hoc nequaquam humana ratione, sed Deo tantum inspirante percipi posset, ut videlicet Deus homo fieret. Vnde & ipsemet Christus profiteur, *Nemo venit ad me, nisi pater meus traxerit illum*: quia non est humanæ rationis hoc in Christo percipere, quod solummodo fit Deo inspirante. Blasphemare verò in Spiritum sanctum, est manifestè bonitati Dei, qui Spiritus sanctus intelligitur, ita scienter ex inuidia detrahere, ut beneficia, quæ per Spiritum sanctum, hoc est diuinæ bonitatis gratiam non dubitant fieri, per inuidiam tribuant maligno Spiritui, sicut Pharisei faciebant, dum turbam credentem his, quæ videbant, miraculis, à Christo per inuidiam auertere niterentur. Quorum peccatum si diligentius consideremus, grauius esse videtur quo diabolus corrumpitur. Et si enim Pharisei Christum non credebant Deum: hominem tamen iustum ex vita & operibus eius ignorare non poterant, nec ista, quæ faciebat, per Spiritum sanctum facta esse. Cum ergo contra conscientiam

suam hæc dicerent per malignum spiritum, quæ fieri non dubitabant per Spiritum sanctum : profecto scienter mentientes ipsum Spiritum sanctum asserabant , esse spiritum malignum. In quo longè magis præsumpsisse videntur mentiendo, quàm diabolus superbiendo. Diabolus quippe quamuis appetierit Deo similis esse, & per se regnum obtinere : non tamen intantum ibi excessisse credendus est, vt in tantâ prurumpere blasphemiam auderet, vt Deum mentiri esse malû sustineret. Vnde blasphemia istorum non minor superbia illorum, sed etiam magis execrabilis videtur, vt omnino à venia excludi sit digna. Nequaquam tamen dicimus quoddam penitentia talium, si esset, indulgentiam non impetraret : sed ex sententia Domini omnes tales credimus ita Spiritum Dei exacerbasse, vt in sua obstinati malitia, penit⁹ exclusi fuerint à gratia. Hanc autem manifestam gratiam Dei, quæ se in Christo per effectum miraculorum reuelat, Lucas superius per digitum Dei designat, ipso dicente Domino, *Porro si in digito Dei eijcio demonia* : Manus quippe siue dextera, vel brachium Dei Filius eius dicitur : in hac manu digitus est manifesta quælibet sancti Spiritus operatio. Digito quippe maximè vtimur in demonstratione corporalium rerum : vnde digitum Dei Spiritum eius dicit, cùm gratiam suam per aliquem effectum beneficij patenter exhibet, vt non nisi Dei opus illud credatur, etsi nonnulli per inuidiam more Pharisæorum illud calumnientur. Et hoc est hoc peccatum blasphemix in Spiritum sanctum, per quem remissio fit peccatorum, irremissibile permanere. Quod autem dictum est, *Quicumque dixeris verbum contra filium hominis, remittetur ei* : sic accipe, quòd nullus, qui, vt dictum est, non per malitiam, sed per errorem detraxerit honori Christi, propter hoc damnabitur : cùm hæc ignorantia inuincibilis similem eum faciat illis pro quibus Dominus in passione sua siue Stephanus orauerit. Pierati quippè atque rationi conuenit, vt quicumque lege naturali creatorem omnium ac remuneratorem Deum recognoscentes, tanto illi zelo adhærent, vt per consensum, qui propriè peccatum dicitur, eum nitantur nequaquam offendere, tales arbitremur minimè damnandos esse : & quæ illum ad salutem necessum est addiscere, ante vitæ terminum à Deo reuelari siue per inspirationem, siue per aliquem direc-

etum quo de his instruatur, sicut in Cornelio factum esse legimus de fide Christi ac perceptione baptismi. Quod & patienter illa videtur astruere sententia. *Si cor nostrum non reprehenderit nos, fiduciam habemus ad Deum: & cum Dominus dicat, maiorem hac dilectionem nemo habet, ut animam suam ponat quis pro amicis suis, nequaquam de his diffidendum videtur qui zelo legis, quamuis Christum non nouerint, mori pro Deo sustinent: cum sit facile Deo talibus statim inspirare quid de Christo sit credendum antequam de corpore recedat anima, ne infidelis transeat ex hac vita.*

Problema Heloissæ XIII.

QUOD est quod fidelium mentes Dominus componens, & ea computans bona, quibus beatitudinem promereri possunt, modò in singulis dicit eos beatos, in quibus sunt, tanquam vnum quodque facere sufficiat beatum sicut esse declaratur ex remuneratione eorum subjecta? Sic quippe dicitur. *Beati pauperes spiritu, quoniam ipsorum est regnum cælorum.* Et similiter in cæteris singulis remuneratio supponitur, ex qua vnaquæque gratia sufficere videtur ad salutem. Quas etiam distinguere petimus diligenter, quò meliùs appareat, utrùm singulæ sufficiant, si non in eodem homine simul occurrant.

Solutio Abaelardi.

SEPTEM sunt bona tanquam septem beatitudinibus distincta, quibus ad supernæ gaudia vitæ meremur pertingere. Nam illa, quæ quasi octaua supponitur, probatio magis est præcedentium beatitudinum, quàm illis tanquam diuersa, connumeranda; vbi videlicet dicitur: *Beati qui persecutionem patiuntur propter iustitiam, quoniam ipsorum est regnum cælorum.* Nam quia fidelibus beatis persecutiones maximè cōstat imminere, nequise eos propter hoc crederet minùs esse beatos, ideo prædictis beatitudinibus istud supposuit tanquam si diceret. Nec minùs isti tales beati sunt, cum persecutiones sustinent; sed magis hinc probantur, cum in eis non deficiunt. Tres autem fidelium ordines constat esse; vnum videlicet continentium, alterum rectorum, tertium coniugatorum. In tribus

bus autem præcedentibus beatitudinibus continentes diligenter describi arbitror: post has autem tres, duas proximas ad rectores maximè referendas arbitror, sicut duas vltimas ad coniugatos, & est ordo congruus secundum meritorum gradus. Ordo quippe continentium, perfectione vitæ prior est cæteris. Secundus est rectorum, qui, quamuis sint potestate ipsis quoque continentibus digniores, gratior tamen exitit patriarchæ pulchra Rachel & sterilis, quam Lia lippa & fœcunda: & melior pars Mariæ tanquam in orio vacantis, quàm Marthæ cibum ministrantis. Vltimus ordo est coniugatorum: qui longè à continentibus distant, & rectoribus æquari non merentur quamuis vtrique in actiua sint occupati. Nam, vt postmodum Veritas ait, *Qui docuerit & fecerit legem* (quod est doctorum, & Ecclesiæ Prælatorum) *magnus vocabitur in regno cælorum*, sicut continens, maximus, & coniugatus minimus. Ab his ergo, qui virtute sunt maximi, & priores apud Deum dignitate religionis, inchoans, in tribus eorum sanctitatem cōprehendit: cū eos videlicet pauperes spiritu, mites, ac lugentes describit. Beatus dicitur, quasi bene actus, hoc est in bonis moribus compositus. Pauperes spiritu dicuntur, qui paupertatē non necessitate sustinent, hoc est Dei, quo feruēt, edocti ratione, hanc appetant, diuitias contemnentes, & eas tanquam nociuas fugientes, attendentes quod Dominus ait: *Facilius est camelum intrare per foramen acus, quàm diuitem in regnum cælorum*. Spiritum itaque hoc loco rationem dicit, sicut & Apostolus id secutus ait, *Caro concupiscit aduersus spiritū, & spiritus aduersus carnem*. Quis enim nesciat concupiscentiā animæ potius quàm corporis esse? Sed tunc caro aduersus spiritum concupiscit, cū in eadem anima sensualitas, hoc est delectatio ex infirmitate carnis veniens, rationi repugnat, vt, iuxta eundem Apostolum, sæpe victi faciamus, quæ nolumus; hoc est quæ facienda esse non approbamus. Cū ergo spiritus, hoc est ratio, suggesserit nos facere quod debemus, & nos inde carnalitas retrahit; in quo perficiendo nonnulla difficultas incumbit: vincitur spiritus dominante carne, & ei subiicitur, vt homo iam carnalis vel animalis sit dicendus, desiderijs carnis more pecudum deditus. *Quoniam ipsorum est regnum cælorum*. Inde pauperes spiritu probat esse beatos, quia qui rationabiliter terrena contemnunt, cœlestia

promerentur. Pauperes itaque spiritu sunt, qui tam possessionis quàm honoris ambitionem propter Deum postponunt, & nihil ad voluptatem appetunt: sed contenti necessarijs, à licitis quoque abstinent, ne voluptatibus terrenis capiantur, & Deo magis quàm sæculo dare operam contendunt. Tales sunt, qui à tumultuosa sæculi vita transeunt ad quietem monasticam, vt tanto purius Deo & sibi vacent, quantomagis remoti sunt à curis sæculi: & tanto facilius ad cœlos euolent, quanto magis terrenis sarcinis exonerati sunt. Quod & Hieronymus in illo principe Monachorum præfiguratum attendens, quodam loco ait: *Helias ad cœlorum regna festinans, melorem reliquit in terris.* Hi tales cum pauperes spiritu facti fuerint, mites ac mansueti necesse est fiant. Qui enim in terrenis nihil ambiunt, nequaquam de amissione rerum, vel illatis iniurijs in iram accenduntur. His benè se possidentibus, & impetus carnis regendo fragentibus, terra viuētium, hoc est vera stabilitas beatorum in præmium supponitur, cum ait: *Quoniam ipsi possidebunt terram.* Istam in talibus mansuetudinis & patientiæ virtutem Hieremias describens, ait: *Bonum est viro, cum portauerit iugum ab adolescentia sua. Sedebit solitarius & tacebit: quia leuauit se super se. Ponet in puluere os suum, si forte sit spes. Dabit percutienti se maxillam, saturabitur opprobrijs: quia non repellit in sempiternum Dominus.* Iugum Monasticæ ab adolescentia sua portat, cum quis hoc suscipere non differt, quousque in senio viribus exhaustus hoc præsumat tollere, quod non possit portare, & quietem corporis magis quàm pacem animæ quærens, voluptates sæculi, quas fugere se mētitur, in Monasterio quærit. Et nihil iam valens operari, tanquam inter apes burdio factus, quod illæ congregant, deuorat impudenter. Et iam consumptis viribus corporis, quas, quoad potuit, in seruitio diaboli expendit, occasione senilis infirmitatis, luxurioso vacat otio, quando cum tanto restrictius viuere decuit, & contra vitia dimicare, quanto se minus victurum nouit, & ad percipiendam brauij sui palmam citius peruenturum, si hanc meruerit. Iste talis miser ab adolescentia sua iugum portare non assuetus, sub ipso, quod non potest ferre, cogitur succumbere. Sedet solitarius & tacet professor Monasticæ disciplinæ, cum & nomen Monachi & vitæ perfectionem sibi vendicat. Monachus quippe, solitari-

rius interpretatur, quem beatus increpans Hieronymus, ait: *Quid facis in turba, qui solus es?* Quem omni tempore debere silentio studere beatus asserit Benedictus, cultum iustitiæ silentium ex testimonio comprobans Esaia. Et Apostolus hanc præcipuè virtutem commendans, ait: *Si quis in verbo non offendit, hic perfectus est vir.* Leuat se super se, cum se ipsum regens, & opprimens, carnem spiritui subdit: & voluntatem propriam voluntati subijciens Dei, de seipso gloriosè triumphat, attendens quod scriptum est, *Melior est patiens viro forti, & qui dominatur animo suo, expugnatore urbium.* Tunc autem maximè tacere debet, cum alij virtutem eius diuulgant: ne ipse sui præco factus, in leuè euanescat auram, & quanto altior in virtutibus videtur, grauiorem superbiendo casum perferat. Taceat ergo quia leuauit se super se, ne videlicet hæc si fecerit recognoscat, & pavidus oret ne corruat; quia in hac vita, nulli securæ est victoria. Quod si fortè de se loqui præsumat: non virtutem suam, sed infirmitatem prædicet. Vnde & subditur. *Ponet in puluere os suum, si fortè sit spes.* Quod est dicere: Tanquam puluerem tentationibus dæmonum agitatam, & in operibus non constantem, sed dissolutum profiteatur: & si quando mentis elatio titillauerit, statim se obiurgans dicat, *Quid superbis terra & cinis?* Quid præsumis leuissime puluis, quem proijcit ventus à facie terræ? hæc dicens, & de se pauens, cum terròre cogitet, si fortè sit illi spes, ne nouissimè superbia vincatur, quæ nõ nisi de virtutibus triumphat. Et ne virtutibus extollatur, persecutionibus est humiliandus: vt per patientiam virtus eius probata coronetur, quæ spiritu pauperes facit veros mites. Dabit igitur percutienti se maxillam, & saturabitur opprobrijs: quia siue factis, siue verbis iniurietur, his tanquam quadam dulcedine saporis oblectatus reficietur. Dat percutienti se maxillam, qui pro Deo gaudet iniuriari. Subtrahit e contrario maxillam, qui iniurias refugit, vel inuitus patitur. Cur autem iustus libenter hæc toleret, & in passionibus gaudeat, iuxta illud, quod de Apostolis dictum est, *Ibant gaudentes à conspectu concilij, quoniam digni habiti sunt pro nomine Iesu contumeliam pati?* Et etiam supponitur. Et Propheta ait, *Quia non repellet in sempiternum Dominus.* Repulsus à gratia Domini, & miserijs in vita hac expositus videtur iustus: vnde & de ipso

iustorum capite scriptum est: *Desiderauimus eum despectū & nouissimum virorum, & putauimus eum quasi leprosum, & percussū à Deo, & humiliatum.* De hoc despectu vel repulsione Dei, cum nos in aduersis non protegit, scriptum est: *Deus repulisti nos.* Sed quia hic, ut dictum est, repellit nos, ut probemur, quos post victoriam assumit, ut coronemur: spes afflictorum, qui triumphant, exponitur cum dicitur, *Quia non repellet in sempiternam Dominus:* hoc est, pœnas finiet afflictorum, qui pœnas non finiet affligentium. Et notandum quod Dominus Apostolis nouum testamentum tradens, cum in exordio statim ad paupertatem admonet, ut fœcunditatem terrenorum cœlesti commutemus felicitate: patenter remunerationem Euāgelij à remuneratione legis distinguit, cum ibi cœlestium, hic terrenorum tantum promissionem in remunerationem obedientiæ constituat. Carnalis quippe populus Israel terrena magis quam cœlestia desiderans, hoc in remuneratione accepit, quod magis concupiuit, & per ea ad magis obediendum trahendus magis fuerat, quæ concupiscebat, ut hac saltem promissione à peruerso retraheretur opere, si nondum animus mundari poterat ab iniquitate. Ut enim Apostolus ait, *Nihil ad perfectum adduxit lex,* nec perfectionem habuit in promissis, sic nec in præceptis. *Beati qui lugent.* Luctus salubris propriè conuenit Monachis, siue ille sit pœnitentiæ de peccato, siue dilationis à regno. Quæ duo lachrimarū genera, in Axa filia Caleb præfigurata sunt; cui conquerenti ad patrē, quod ei terram aridam dedisset, & irriguā postulanti, ei pater dedit tã superius irriguū quam inferius. Quantum autem de peccatis tam suis quam aliorum lugere conueniat monachū, Hieronymus huius professionis maximus profitetur dicens: Monachus non doctoris, sed plangentis habet officium, qui se & mundum lugeat, & Domini pauidus præstoletur aduentum. Quid enim vita monastica, nisi quædam est districtioris pœnitentiæ forma? Lugeant ergo monachi siue hoc, ut dictum est, siue illo modo: ut risum mereantur consolationis de quo verè dicitur, *Quoniam ipsi consolabuntur:* attendentes illud, quod Apostolis Dominus promisit. *Amen, amen dico vobis, quia plorabitis & flebitis vos, mundus autem gaudebit, vos autem contristabimini: sed tristitia vestra vertetur in gaudium.* Vnde & contrario reprobis ait. *V & vobis, qui nūc ridetis: quia plorabitis.* Con-

trariæ quippe vitæ contrarios status & exitus habent: cum nunc iusti flentes postea rideant, & iniqui modò ridentes, e-contrario fleant. Iusti siue de perpetratiōe peccati, siue de dilatiōe regni consolationem accipiunt: quando ad vitam illam, quæ à dolore penitus est immunis, perueniunt. *Beati qui esuriunt.* Post vitam continentium ad ordinem transit rectorum, ita istos instituens in duobus, sicut illos fecerat in tribus. Rectores in populo Dei, non solùm Ecclesiasticæ sunt potestates in Sacerdotibus, verum etiã sæculares in Regibus. Et notandum quòd cùm binarius numerus, qui coniugatis conuenit teste Hieronymo, immundus sit, vnde & opera secundæ diei laudem habere non meruerunt, & bina & bina de immundis animantibus in archam iussa sunt mitti, non incongruè continentes per ternarium, qui impar numerus est, magis quàm binarium describendi esse videntur. Cæteris verò, vbi continentia virtus omnino non præminet, magis conuenire binarius videtur. Esuries vel sitis iustitiæ, desiderium magnum est in rectoribus debitæ vindictæ: vt videlicet mala commissa tantùm vindicare velint, quantum se debere cognoscunt, & si non tantùm quantum illi meruerint, qui deliquerunt. Alioquin misericordia in eis locum non haberet, si videlicet nihil de pœna, quam rei meruerunt, relaxarent. Nam & cœlestis iudex, quem terreni debent imitari, ita iustitiam temperat per misericordiam, vt non tantùm reos puniat, quantum illi merentur, sed quantum ipsi conuenit, cuius miserationes super omnia opera eius. Hinc enim de ipso scriptum est: *Aut obliuiscetur misereri Deus, aut continebit in ira sua misericordias suas.* Et rursum, *Et cùm iratus fueris, misericordia recordaberis.* Superexaltat quippe misericordia iudicium, & magis iudicem commendat quàm vindictam. Hęc ergo duo in iudice semper esse debent coniuncta, vt & reum puniat per iustitiam, & minùs quàm meruerit per clementiã, quam hic dicit misericordiam. Misericordia quippe à miserris dicta, humana compassio est ex miserijs aliorum progressa, qua ex infirmitate animi magis quàm ex virtute pœnas abhorremus, ex hoc vno quòd patiētem affligunt, tam eas, quæ sunt iustæ, quàm quæ iniustæ. Talis est animi compassio naturalis, siue rationalis sit siue minimè, misericordia propriè dicitur, teste Seneca. Clementia autem, quæ hoc loco dicta

est misericordia, rationabilis tantum dicitur compassio, per quam videlicet eis subuenire volumus, quibus debemus. Quisquis iustitiam habet sine misericordia, ut videlicet vindicare velit, nec poenam relaxare: crudelis est. Sin autem è conuerso, remissus est. Vndè bene Dominus hoc loco rectorum mores instruens, nunquam iustitiam sine misericordia exerceri approbat: ideoque hoc loco tanquam inseparabiles comites eas sibi sociat. Potest autem remissio poenae in his etiam, qui occiduntur, nonnulla esse: si videlicet eas abbreviare, vel genus mortis leuius eligere studeamus. Alioquin illam incurrimus sententiam, *Iudicium sine misericordia illi, qui non facit misericordiam*. Contraria quippe contrarijs conueniunt, ut videlicet quemadmodum misericordes misericordia sunt digni: ita immisericordes hac mereantur priuari. Denique post continentes & rectores ad coniugatos veniens, ait: *Beati mundo corde*. Cum ait corde & non corpore, vitam coniugatorum voluptati carnis plurimum indulgentem, & concupiscentiae libidini cedentem insinuat. Etsi enim admixtio coniugum habeat indulgentiam, cum in ea incontinentiae suae remedium quaerunt, non ob voluptatem & carnis delectationem more pecudum hanc appetunt: caro tamen ex labe luxuriae nonnullum trahit contagium & immunditiam vel foetorem maculae. Mundi tamen corde sunt, sed non corpore, qui hanc tantum appetunt non ad voluptatem, ut diximus, sed ad necessitatem: ne fornicando Deum offendant. Et hi quoque saluandi, non carebunt visione Dei, in qua verae beatitudinis summa consistit. Hi quoque pacifici dicuntur, qui pugnam carnis maximam per indulgentiam coniugij vitantes, sic eo rationabiliter ac mediocriter vtuntur, ut ad Deum quoque pacem habeant, quem per intemperantiam non offendunt. Vnde & filijs Dei sunt aggregandi, qui nunc per vinculum matrimonij seruire inuicem coguntur carni. De qua quidem seruitute Hieronymus Apostolum dixisse intelligit, *Seruus vocatus es? non sit tibi cura*. *Qui enim positus in coniugio, conuersus est ad fidem Christi, tanquam seruus Deo inspirante est vocatus & tractus*. Quippe quae maior seruitus est dicenda, quam ut proprii corporis vir aut vxor potestatem non habeat, nec ab usu carnis abstinere, ut vel orationi vacent, nisi ex consensu, queant? Hi tamen tales filij Dei vocabuntur, cum de hac

seruitute ad libertatem venerint supernæ vitæ, vbi neque nubent, neque nubentur, sed erunt sicut Angeli in cælo. Hæc ad distinctionem prædictarum beatitudinum, hoc est virtutum, vel donorū diuinæ gratiæ, quibus beati efficimur, nunc à nobis vtcunque breuiter dicta sufficiant: superest autem qualiter ex singulis donis beati sint dicendi, qui vnum sine cæteris habuerint, cum vnum mandatum Dei obseruare nequaquam sufficiat, immo qui omnia præter vnum impleuerit, ex vno etiam prætermisso damnationem incurrat. Sed, quantum mihi videtur, qui primū dixit, *Beati pauperes*, & adiecit, *spiritu*: eandem adjectionem in cæteris subintellexit, tanquam mites spiritu, vel lugentes spiritu diceretur: vt hæc quoque vel cætera, quæ sequuntur, per spiritum Dei, quæ caritas eius intelligitur, in istis, quæ hîc memorantur, fideles non solū esse, sed etiam alios aliorum operatione faciat præminere atque abundare. Sicut enim quæ de quatuor elementis constare certum est, ex obtinenti vocabula sortiūtur, hoc est ex illo elemento, quod in eis abundat, esse maxime dicuntur: ita & hic fidelium gratiæ distinguuntur secundum hoc quod in eis abundare probatur. Illos quippe pauperes caritas Dei facere dicitur, quos in contemptu diuitiarum vehementiores ac perfectiores facit. Similiter mites, quos in virtute patientiæ reliquis præfert: ac similiter de cæteris nobis sentiendum videtur. Omnes tamen beatos vel beatitudine dignos caritas Dei facit, cum qua nemo perire potest, quamuis in donis Dei istos illis perfectiores faciat. Diuersa autem verba, quæ in remuneratione supponuntur, cum dicitur, *Quoniam ipsorum est regnum cælorum*, vel, *Quoniam ipsi possidebunt terram*, &c. Nequaquam in significatione percipiendi præmij videntur diuersa: sed identitatis fastidiū fugiens, hoc Dominus variauit quadam conuenientia, quam habent ad præmissa iuxta proprietatem sermonis, & similitudinem rei. Quod in singulis leue est intueri. Congruè quippe pauperibus regnum cælorum promittitur, vt qui terrenas diuitias propter Deum contemnunt, cælestes mercantur. Mitibus, qui se bene gerendo possident, possessio terræ viuētium, lugentibus consolatio conuenit. Esurientibus & sitientibus iustitiam, saturitas, hoc est impletio desiderij sui apud Deum obtinendi; cuius amore plurimū intendunt exerci-

tio iustitiæ in vindictam malorum. Sic & in cæteris remunerationis verbis quædam concinnitas ad beatitudines præmissas assignari potest. Non ergo Dominus tam beatitudines ipsas haberi præcipit, quàm in eis illos abundare admonet, qui in singulis ordinibus desiderant esse perfectiores. Nam ad perfectionis abundantiam, ipse consequenter novum se tradere testamentum hîc Deo proficetur, dicens, nisi abundauerit iustitia vestra plus quàm Scribarum & Phariseorum, non intrabitis in regnum cælorum.

Problema Heloyssæ XV.

QUID est quod postmodum Dominus ait, *Nolite putare quoniam veni soluere legem*, cum Ioannes dicat, *Propterea ergo magis quærebant eum Iudæi interficere*: quia non solum solvebat sabbatum, sed etiam patrem suum dicebat Deum, & qualem se faciens Deo?

Solutio Abaelardi.

CUM dixit, *Non veni soluere*, & postmodum addidit, *sed adimplere*, in moralibus scilicet præceptis potius quàm figuratiuis, sicut sequentia continent ex adimplerione quam supposuit: innuit quam solutionem mandatorum legis prius intellexerit, in moralibus scilicet præceptis. Moralia quidem præcepta sunt agendæ vitæ, sicut figuralia figurandæ. Et moralia quidem quæ naturaliter ab omnibus semper complenda fuerunt, & antequam lex scripta daretur, mores hominum ita necessariò componunt: ut nisi impleatur quod in eis præcipitur, nemo vnquam saluari meruerit. Qualia sunt, diligere Deum & proximum, non occidere, non mœchari, non mentiri, & similia, sine impletione quorum nemo vnquam iustificari potest. Figuralia verò sunt legis præcepta, quæ iuxta literam accepta, nihil iustitiæ conferunt ex operatione sua: sed ad tempus instituta fuerunt, ad aliquid figurandum iustitiæ, ut observatio Sabbati, circuncisio, quorundam ciborum abstinentia, & his similia. Ad moralia itaque tantum legis præcepta referendum est quod Dominus ait, se non venisse soluere legem, sed adimplere: hoc est nequaquam cessare

fare facere quod in moralibus præceptis lex continet, sed in eis per Euangelium supplere quod legi deest. Lex quippe Moyfi nequaquam inimicum diligere præcipit, sed amicū: nec peccatum in mente consuminari docet, sed opera magis quā intentionem interdicit. Et si enim concupiscentiam quoque lex prohibeat, non tamen ex ea reum statuit esse putandum: nec concupiscere prohibet, nisi res eius, quem, iuxta literam, proximum definit, hoc est eius, qui de populo suo nunquam est alienigena. Non enim omnem hominem, iuxta literam, lex proximum dicit: sed patenter alienigenam à proximo distinguit, cum dicit Iudæum nequaquam fornerari proximo, sed alieno.

Problema Heloissæ XVI.

QUOMODO etiam Euangelij abundantiam præfert imperfectioni legis, dicēs, *Nisi abundauerit iustitia vestra plus quā Scribarum aut Phariseorum, non intrabitis in regnum cælorum?* Aut quomodo, ut Apostolus ait, reprobatio fit præcedentis mandati propter infirmitatem eius & inutilitatem? Nihil enim ad perfectum adduxit lex. Cum enim Dominus diuiti quærenti, quomodo vitam æternam possideret, respondit de duobus mandatis dilectionis, quæ in lege sunt: *Hoc fac, & viues*, & Apostolus dicat, *Qui diligit proximū, legē impleuit. Nam, non adulterabis, non occides, &c.* Et iterū, *Dilectio proximi malū non operatur. Plenitudo ergo legis, est dilectio.* Quomodo ad perfectionē mandatorū deest aliquid legi, cum illa etiā duo præcepta dilectionis Dei & proximi sufficere omnino videantur, nec aliquid perfectionis deesse?

Solutio Abaelardi.

CVM ait Dominus, *Nisi abundauerit iustitia vestra plus quā Scribarum & Phariseorum*, subaudis iustitia: non ait, iustitia legis. Vnde & in sequentibus ait, *Audistis quia dictum est antiquis: diliges amicum tuum, & odio habebis inimicum tuum*, nequaquam hoc in lege reperiri potest, sed magis in traditionibus Scribarum & Phariseorum legi superadditis, de quibus Dominus ait, *& irritum fecistis mandatum Dei propter traditiones vestras.* Præsertim cum de dilectione inimici, vel etiam de beneficijs ei impendendis, lex ipsa præcipiat dicens: *Si occurreris boni ini-*

*mici tui aut asino erranti, reduce eum. Si videris asinum odientis te iacere sub onere, non pertransibis, sed leuabis cum eo. Et in Psalmista: Si reddidi retribuētibus mihi mala, decidam meritò ab inimicis meis inanis. Et Salomon in Prouerbijs. Ne dicas, Reddam malum pro malo: expecta Dominum, & liberabit te. Cum ceciderit inimicus tuus, ne gaudeas, & in ruina eius ne exultet cor tuum: ne fortè videat Dominus, & displiceat ei, & auferat ab eo iram suam. Ne dicas, Quomodo fecit mihi, sic faciam ei, reddam unicuique secundum opus suum. Item. Si esurierit inimicus tuus, ciba illum: si sitierit, da ei aquam bibere. Prunas enim congregabis super caput eius, & Dominus reddet tibi. Et beatus Iob. Si gauisus sum, inquit, ad ruinam eius, qui me oderat, & exultaui, quòd inuenisset eum malum: Non enim ad peccandum guttur meum, ut expeterem maledicens animam eius. Non ergo antiquis hoc iussum vel concessum fuit in lege, ut odio haberent inimicum: sed magis, ut dictum est, in traditionibus hominum, quàm in præceptis Dei habebatur. Cum ergo dicit Dominus, Plus quàm Scribarum & Phariseorum, non plus quàm legis: nequaquam hinc cogimur fateri Dominum hanc abundantiam Euangelij præferre imperfectioni legis. Non tamen ideò minus concedimus legem in præceptis suis ita imperfectam fuisse, ut ei necessarium esset Euangelium succedere: sicut & Apostolus, ut suprà meminimus, patenter profitetur. Sed nec præceptum de dilectione proximi, ante aduentum Christi perfectum esse potuit, quod ipse veniens, & proximus noster factus, tam susceptione carnis, quàm exhibitione dilectionis, perfectum fecit: ut iam quilibet eum tanquam proximum diligens, ex hac perfectus dilectione fiat. Vnde & eidem diuiti requirenti quis esset proximus eius, parabolicè respondens, se illum proximum esse significauit, què ille Samaritanus expressit, qui vulnerati misertus est: & quem ex affectu compassionis ipse quoque diues verè proximum fuisse professus est. Siue ergo in lege habeatur, *Diliges amicum tuum*, siue *proximum*, ut eum videlicet ibi proximum intelligamus, qui vel cognatione, vel amore est nobis coniunctus: nemo rectius proximus noster, quàm Christus est dicendus, ut in eo nunc dilectio proximi perfecta sit facta, quæ antea fuerat imperfecta, quandiu videlicet statum suum lex habuerit, quæ vsque ad Ioannem vigorem suum custodiuit. Prius ergo imperfecta, quandiu lex propriè fuit dicenda, ut ei*

obediendum esset per omnia : pro hac ipsa imperfectione sui reprobata est, Euāgelicæ doctrinæ superueniente perfectione, ubi quicquid est necessariū, liquidè magis, quàm parabolicè est expressum. Nam etsi diligenter legis literæ insistamus, quæ soli populo Iudæorum data est, nequaquam proximus nisi eorum est intelligendus. Vnde nec per Christū illud præceptū de dilectione proximi, ad alios pertinere videtur, cum ipsi soli sub lege continerentur. Quapropter necessariò succedere legi Euangelium debuit, omnibus generaliter iniunctum, ut omnes debeant saluari per ipsum. Ad prædictum itaque proximum, id est Christum Apostolus respexit, cum eo premisso, *Qui diligit proximum, legem impleuit*: statim hoc tanquam pro probatione adiunxit: *Nam non adulterabis, non occides, &c.* Si enim Iudæus hunc inter proximos suos comprehensum diligit, sicut ipse ait, *Si quis diligit me, mandata mea seruabit*, in nullo adulterio, in nullo peccabit homicidio: & omnia similia, quæ in lege sunt, euitabit, & iustitias eius complebit.

Problema Heloise XVII.

QUID est etiam, quod in sequentibus Dominus ait, *Neque per caput tuum iurabis: quia non potes unum capillum album facere aut nigrum*: tanquam si hoc facere posset, iurare per caput liceret?

Solutio Abaelardi.

REPLICANDA sunt, quæ in proximo sunt præmissa, ut ex illis, & de hoc facilius iudicemus. Dico, inquit, vobis, non iurare omnino: neque per cælum, quia thronus Dei est: neque per terram, quia scabellum est pedum eius: neque per Hierosolymam, quia ciuitas magni regis est; neque per caput tuum, quia non potes unum capillum album facere aut nigrum. Quatuor itaque sunt, cælum scilicet, terra, Hierosolyma, caput nostrū, per quæ iurare prohibemur: quia hæc maximè in iuramento ponimus, quæ venerabiliora æstimamus, ut ex his ampliùs nobis credatur. Hæc autem veneratione digna maiore videntur, quæ ad Deū maximè constat pertinere: ut cælum, quod dicitur thronus Dei, hoc est anima Christi, cui specialiter diuinitas insidet,

& in ea plenius per gratiam inhabitat. Terra, quæ scabellum Dei dicitur, humanitas est Christi, tanquam terrena & inferior in Christo creatura. Hierosolyma ciuitas Dei, sancta est Ecclesia: cuius caput ipse est Christus. Capilli adhaerentes capiti, & ipsum adornantes vel protegentes, eloquia sunt diuina quibus Christus commendatur, & per fidem in nobis conseruatur: horum quædam alba, quædam nigra dicuntur, cum aliorum intelligentia clara sit, & manifesta: aliorum obscura, sicut illorum maximè quæ sunt allegoricè dicta. Quorum quidem nullum siue album sit, vt dictum est, siue nigrum, nostrum non est facere: quia eloquia Dei non sunt inuentionis humanæ, nec nostra sunt documenta, sed diuina. Quod ergo ait, *Non iurabis per caput tuum: quia non potes* &c. tale est: Non debes Christum in iuramento ponere, quod eius solius summæ Dei sapientiæ sit hæc inuenire, quorum alia, vt diximus, alba sunt, alia nigra. Similiter cum iubet vt nec iuremus per cælum, quod thronus Dei est, sic accipe: vt non ideo per ipsum iurare eligamus, quia tantæ dignitatis est, quod cæteris eminet creaturis. In his itaque verbis negatiuum aduerbiũ præpositum orationi, causam ipsam excludit, non interpositũ ipsam relinquit atque constituit. Aliam quippe vim negatiua particula habet toti orationi præposita, vt totam scilicet simul neget, aliam interposita, vt vni tantũ illius orationis parti apposita. Aliud quippe est dicere, Non quia hoc fecisti, peccasti: aliud dicere, Peccasti, quia hoc non fecisti. Ibi nanque causa remouetur peccandi, vt videlicet non propter hoc peccauerit, vt hinc eum certum sit non peccasse, vbi causa ad hoc intercesserit: ibi verò non ostenditur quod non peccauerit, sed hoc tantũ quod non propter hoc peccauerit, vt videlicet causa peccati potius quàm peccatum ipsum remoueatur. Tale est ergo quod de iuramento Dominus præcipit vel adhortatur, vt, quia periculosum est iurare, ne periuremus, omnino, quantum possumus, hoc caueamus, ne aliqua dignitate, quam res habeat, per ipsam iurare appetamus, siue ipsa sit Deus, vt pote Christus, seu quæcumque creatura ex Deo præ cæteris aliquid dignitatis adepta. Iurare autem per aliquid, est nos ei cui iuramus cōcedere, vt nihil utilitatis in ea re, per quam iuramus, habeamus vlteriùs, nisi hoc, quod iuramento firmamus, verum sit.

Cùm autem in Ecclesiasticis causis omnis controuersia, vt Apostolus ait, finis sit iuramentum; non hoc loco Dominus præcipit non iurare, sed magis adhortatur. Quædam nanque præcipiuntur, quædam prohibentur, quædam suadentur, quædam permittuntur. Præcipiuntur illa siue prohibentur, siue quibus vel cum quibus nos saluari diffidimus. Mala itaque prohibentur omnia, & bona præcipiuntur, non omnia, sed illa tantum, quæ saluti necessaria videtur: vt credere in Deum, & diligere non tam ipsum quàm proximum, non adulterari & similia. Illa berò bona, quæ non ita necessaria sunt, siue quia strictioris, vel laxioris sunt vitæ, & tanquam nimis alta, vel nimis infima, sub præcepto non clauduntur: sed vel persuasionem consilij habent, vt virginitas, vel indulgentiæ permissionem, vt nuptiæ. Quippe si præceptum ad virginitatem cogeret, damnarentur nuptiæ: vel si ad nuptias, damnaretur virginitas. Consilium itaque siue persuasio, est de potioribus bonis: permissio verò, de minoribus, hoc est, quæ minoris sunt meriti, quando consilium de melioribus aliqua diffidentia vel dispensatione non suscipitur. Quæ ergo tam fieri, quàm dimitti licet, præceptum non habent: sed admonitionem, vt omnino non iurare, vel permissionem, vt hoc fiat pro necessitate: veluti cùm ad inquisitionem veritatis, testibus opus est. Permissio autem est, cùm dicitur, *Vnusquisque habeat uxorem suam propter fornicationem*: præceptio verò, cùm dicitur, *Alligatus es uxori? noli querere solutionem*. Persuasio verò consilij, cùm statim supponitur, *Solutus es ab uxore? noli querere uxorem*.

Problema Heloissæ XVIII.

QUID est in eodem Euangelista, *Nolite solliciti esse dicentes, Quid manducabimus?* Et rursus, *Nolite solliciti esse in crastinum*. *Crastinus enim dies sollicitus erit sibi ipsi. Sufficit enim diei malitia sua*. Nunquid enim prouidentiam prohibet futurorum? Nunquid & ipse Dominus eum qui turrem vult ædificare, de sumptibus cogitare admonet? Et Apostolus, *Qui præst*, inquit, *in sollicitudine*; sicut & ipse faciebat, de seipso dicens, *Instantia mea quotidiana, sollicitudo omnium Ecclesiarum*.

Solutio Abaelardi.

SOLICITVDINEM propriè Dominus dicit superfluam curam de futuris, quando videlicet pro aliquibus præparandis, magis necessaria dimittuntur: vt si pro apparatus crastinorũ ciborũ, prætermittamus orando quærere à Deo regnũ suũ, hoc est tales nos facere, vt in nobis ipse, nõ peccatum regnet. Crastinus enim vt tanquam si diceret, ne affligatis vos superfluis curis, pro tempore futuro, antequam veniat: quia cùm ipsum venerit, satis sollicitudinis afferet ex se ipso, illis, qui de necessarijs minùs in Dominico confidunt, non attendentes illud Prophetæ: *Iacta super Dominum curam tuam, & ipse te enutriet. Sufficit enim diei, &c.* Hoc est, vnicuique temporis vitæ huius ærumnosæ, suæ sollicitudinis pœna sufficere debet, quam videlicet affert nobis ex superfluis curis pro temporalibus, dum pro his æternorum obliuiscimur. Sollicitudinem verò in bono, vel in his, quæ ad æternam pertinent vitam, dicit Apostolus prouidentiam, hoc est, rationabilem de futuris, vel profuturis curam: si videlicet temporalia prouideamus propter æterna, vt his sustententur quodam viatico necessario qui ad illa festinant.

Problema Heloyssæ XIX.

QV ID illud est, quod sequitur, *Nolite iudicare, vt non iudicemini. In quo enim iudicio iudicaueritis, iudicabimini?* Quid enim si iniustum fecerimus iudicium? nunquid simile recipimus?

Solutio Abaelardi.

NOLITE iudicare, hoc est, ne præsumatis, de incertis, aliquem certa sententia grauare. Cùm enim iratus patet, de se ipsa res iudicat, non tu. Hinc & Apostolus: *Nolite ante tẽpus iudicare, quoadusque veniat Dominus, qui & illuminabit abscondita cordium.* Venit Dominus occulta reuelando, cùm eius dispositione, quæ latebant, apparent, vel cùm secundum legem eius aliquid discutiendum inuestigamus, vel de probatis pœnam inferimus: & tunc potiùs ipse iudicat, vel punit,

quàm nos. *In quo enim iudicio iudicaueritis, iudicabimini.* Ac si diceret. Ideo non debetis in iudicio præsumere, vt alios appetatis grauare: quia confimile iudicium grauaminis incurretis apud Deum. Non ait denique, ne iudicetis; sed, *Nolite iudicare*, vt non hoc scilicet sponte appetamus, quod tamen nonnunquam facere cogimur, officio iudicis nobis cōmisso.

Problema Heloyssæ XX.

QVÆRIMVS & illud, quod in sequentibus adiungit, *Omnia ergo quaecunque vultis vt faciant vobis homines, & vos facite illis. Hæc est enim lex, & propheta.* Si quis enim vult vt in malo sibi quisquam consentiat, nunquid debet illi præbere consensum in re confimili?

Solutio Abaelardi.

DVO legis naturalis præcepta sunt circa dilectionem proximi, vnum scilicet, quod hoc loco ponitur, alterum, quod in Tobia legimus, ipso ad filium dicente: *Quod ab alio odis fieri tibi, vide ne alteri tu aliquando facias.* Sicut ergo id de malis, ita illud de bonis accipiendum est. Vt videlicet, sicut mala nolumus nobis inferri, sic nec alijs inferamus: & econtrario, bona, quæ nobis ab alijs volumus conferri, alijs impendere simus parati. Cùm ergo dicitur, *Quæ vultis vt faciant vobis homines*, tale est: Quod approbatis in conscientia vestra vobis ab alijs debere fieri. Nullus enim in consciëntia approbat sibi consentiendum esse in malo, sed in his, quæ bona æstimat, & fieri digna. Sic & Apostolus, cùm ait, *Non quod volo, hoc ago: volo dixit, pro fieri approbo.* Sed quid est, quod ait, *Omnia quaecunque vultis?* Multi quippe pro dignitate, vel diuersitate personarû, multa sibi debere fieri censent, quæ nequaquam alijs se debere recognoscunt: vt in prælatis videmus & subiectis, cùm isti multa exigant ab illis, vt sibi fiant, quæ nequaquam illis facere debent. Sed profectò sic est accipiendum, vt quæcunque fieri debere nobis ab hominibus credimus; parati essemus & illis facere, non quidem quibuscunque, sed nostri similibus, hoc est, qui hæc à nobis suscipere digni essent, sicut nos ab illis. Illud quoque Tobia, *Quod ab alio odis fieri tibi, vide ne alteri*

in aliquando facias, nonnihil habet quæstionis, cum is scilicet, qui alium propter iustitiam occidit, nunquam ab alio id sustinere velle possit. Sed quia cum quis iustitiam propter Deum exercet, Deus potius id quam ille facit, sicut dudum superius diximus, precipitur ut quod odit fieri sibi, ipse alteri ne faciat: quia cum aliquem recte punit, Deus hoc potius, vel lex, quam homo facit.

Problema Heloyssæ XXI.

QUID est, ut ait Apostolus, sine intermissione orare?

Solutio Abaelardi.

NVLUM tempus, quo debeamus orare, prætermittere.

Problema Heloyssæ XXII.

QUID est illud in Matthæo de fide Centurionis rogantis pro seruo, *Audiens autem Iesus, miratus est, & sequentibus se dixit: Amen dico vobis, non inueni tantam fidem in Israel?* Non enim aliquid mirari dicuntur, nisi qui insperatum aliquid accidere vident, quod nullatenus euenturum antea sciebant, vel credebant.

Solutio Abaelardi.

MIRATUS esse dicitur, quia simile miranti se fecit; quia mirari alios fecit de fide Centurionis, quem in tantum extulit.

Problema Heloyssæ XXIII.

QUID est illud in Luca, *Omnipotenti tribue, & qui aufert, quæ tua sunt, ne repetas?*

Solutio Abaelardi.

CUM ait, *tribue*, non subiunxit, illud quod petit: sed in hoc innuit neminem petentem nos vacuum à dono dimittere, ut saltem in nostra responsione nos conuenienter excusando, non illum exacerbare, sed caritate in eo studeamus edificare: ut blanda vel conueniens responsio, aliquod sit gratiæ donum.

num. Tua ne repetas, hoc est, quia tua sunt, vt in te videlicet potius quàm in Deo repetitionis finem constituas. Non enim religiosus excedit, si qua sibi oblata, quæ propter Deum possidebat, propter ipsum repetat, & illa in bonos vsus expendat, & violentum liberet à rapina. Nam & cùm in proximo supponit, *Et si diligitis eos qui vos diligunt, & si benefeceritis eis qui bene faciunt vobis: quæ vobis est gratia?* Cùm dicit, *qui vos diligunt*, simile est ei, *Ne repetas quæ tua sunt*, hoc est, quia vos diligunt sicut, quia tua sunt. Alioquin iniquum esset non nos diligere eos à quibus diligimur, cùm omnes diligere præcipiamur: nec ipsum etiam, qui nos diligit, Deum, sicut ipsemet ait, *Ego diligentes me diligo*, Quem potius propter ipsum, quia summè bonus est, quàm quòd nobis utilis est, summo amore debemus diligere. Hæc est ordinata caritas, vt vnumquemque, prout melior ac dignior est, ob hoc amplius diligamus; hoc est, vt ei meliùs sit desideremus, sicut & iustum est.

Problema Heloyssæ XXIIII.

QUOMODO dicit Dominus, *Non quod intrat in os co- inquinat hominem, sed quod procedit ex ore?* Nunquid qui comedit de rapina, vel quod illicitum credit, etsi illicitum sit, vel qui sacrificium indignè accipit, ex his peccati maculam non incurrit? Dicit Apostolus de quibusdam Iudæis ad fidem conuersis, & adhuc propter legem quosdam cibos ab alijs discernentibus, tanquam immundos. Dicit inquam: *Qui autem discernit, si manducauerit, damnatus est: quia non ex fide. Omne autem quod non est ex fide, peccatum est.* Dicit & de his, qui pro reuerentia idoli vescebantur idolothytis, *Quidam vsque nunc conscientia idoli, quasi idolothytum manducant; & conscientia ipsorum cùm sit infirma, polluitur.* Quomodo ergo nunc dicit Dominus, quia quod in os intrat, non coinquinat hominem: sed magis quod de ore procedit?

Solutio Abaelardi.

Ex hoc loco præcipuè in quo sit peccatum accipiendum Dominus diligenter distinxit: & Iudæos redarguens super hoc, nos instruxit. Illi quippe ad opera magis quàm ad ani-

mun respicientes, ex his, quæ sunt exteriùs, magis ex hoc, quod in mente habetur, tam bona, quàm mala dijudicant. Dominus verò ad intentionem cuncta reducēs, ex his potiùs, quæ in corde sunt, quàm ex his quæ apparent, in opere, damnari hominem censet: nec animam pollui iudicat, nisi ex his, quæ in ea sunt, & ipsam contingunt, ut sint animarum maculæ spiritales, sicut corporum sunt sordes corporales. Vnde & consequenter exponens quod dixerat, *Sed quod procedit ex ore, hoc coinquinat hominem*, ait: *Quæ autem procedunt ex ore, de corde exeunt: & ea coinquinant hominem. De corde enim exeunt cogitationes male, homicidia, adulteria, fornicationes, furta, falsa testimonia, blasphemia. Hæc sunt, quæ coinquinant hominem. Non lotis manibus manducare, non coinquinat hominem.* Ac si apertè dicat: Sordes manuum corporales animam non attingunt, ut eam pollueri peccato possint. Cogitationes, quæ inquinant, de corde exeunt, cum ad hoc perpetrandum consentimus, quod cogitauimus. Vbi autem non est sensus, non potest esse consensus, sicut in paruulis, aut stultis: Qui sic faciunt, quod non debent, nullum in hoc eis peccatum imputatur; nec homicidium, vel adulterium, nec aliquod peccatum Dominus dicit, nisi quod ex corde procedit, hoc est, nisi cum hæc illicita recognoscimus, ad quæ nos inclinat consensus. Sicut ergo cogitationes exeunt de corde, cum per cōsensum ad opera tendunt, ita homicidiū, & adulteriū & cætera peccata de corde docet exire, nec aliter peccata esse, nisi per consensum priùs fuerint in corde, quàm exhibeantur in opere. Postquā enim his agendis, quæ scit sibi non licere, aliquis consentit, is consensus propriè peccatum dicitur: & homicida seu mæchus, ex hoc vno apud Deum tenetur. Vnde & Veritas ipsa, *Qui viderit, inquit, mulierem, ad concupiscendum eam*, hoc est qui inspecta illa, venerit ad concupiscentiæ consensum: *iam mæchatus est eam in corde suo*, hoc est, peccatum habet in animo perfectum, etsi nondum sit in opere consummatū. Cum aliquid manducandū malè sumimus, quia hoc nobis illicitū credimus, nequaquam cibo ille, qui in os intrat, animam polluit: sed iam hoc fecerat præcedens conscientia nostra, nec quicquam ad peccatum refert, quod nunc ore sumimus, sed quod ad sumendum consenseramus.

Problema Heloyſſæ XXV.

QUID est illud in Matthæo, quod Dominus quibusdam ciuitatibus improprians, ait: *Va tibi Corozain, va tibi Bethsaida; quia si in Tyro & Sidone factæ essent virtutes, quæ factæ sunt in vobis, olim pœnitentiam egissent in cilicio & cinere?* Saluare quippe Dominus homines venerat, vnde & Iesus, id est, Saluator proprio dictus est vocabulo. Cur ergo Tyro & Sidoni ciuitatibus gentilium illa beneficiorum miracula subtraxit, per quæ saluarentur, & ea illis exhibuit, quibus nocitura magis, quàm profutura sciebat? Sed inquies: quia sicut ipsemet profiteretur, non erat missus nisi ad oues quæ perierunt domus Israel. Sed dico: Cur ad eas, nisi vt saluarentur? Si autem vt saluarentur, quid eis profuit ea sibi fieri, per quæ grauius damnarentur: nec sunt ad pœnitentiam conuersi, sed in sua obstinatione permanentes? Vnde & ipsemet Dominus supponit: *Veruntamen dico vobis, Tyro, & Sidoni remissius erit in die iudicij, quàm vobis.* Denique & Samaritanorum multos refert Ioannes ad verbum eius credidisse, & eum nonnulla miraculorum beneficia gentilibus etiam tam in viris, quàm in feminis exhibuisse, per quæ illi crederent, vel in fide firmentur: sicut est illud de puero Centurionis, & de filia Syrophœnissæ, de ipsius Tyri finibus egressæ.

Solutio Abaelardi.

REVERA Dominus Iesus ad solos Iudæos in persona propria missus fuit. Quod ergo circa Gentiles misericorditer egit, non ex officio missionis fecit, sed ex gratia, debito superaddidit, attendens quod & ipsemet ait: *Cùm feceritis omnia, quæ præcepta sunt vobis, dicite: Serui inutiles sumus, quod debuimus facere, fecimus.* Ac si apertè dicat: Ne pro magno habeatis, si obedientiæ debitum impleatis, nisi insuper aliquid gratiæ debitis adiungatis, sicut illi faciunt, qui virginitati vel continentiæ student, virtuti nequaquam sub præcepto comprehensæ. Denique nec illa beneficia Gentilibus præstita, tam missus facere venit, quàm inuitatus, & quasi precibus ad hæc agenda tractus. Quod verò illis prædicationem subtra-

xit, quos ad pœnitentiam sic fuisse conuertendos testatur; nequaquã cogimur per hoc fateri eos in hac pœnitētia perseueraturos vt saluarentur. Multi quippe leues sunt homines, qui ad pœnitentiæ compunctionem facili cōmouentur, & eadē facilitate, quasi ad vomitū reuertentes, in mala, quæ fleuerāt, relabuntur: & cū auditum verbum prædicationis auidē susceperint, firmitatem non habent radicis, vt in eo perseuerent, quod cœperint. Quod si etiam ponamus illos ad prædicationem Domini fuisse conuertendos, atque saluandos, quibus ipse tamen prædicationis gratiam subtraxit: penes ipsum est, cur hoc facere non decreuerit, qui nihil sine ratione facit; sicut de Esau, cui subtracta est gratia, quæstionem Apostolus mouit, & eam indiscussam reliquit.

Problema Heloissæ XXVI.

QUÆRENDVM etiam videtur, quo mysterio, vel qua ratione Dominus in ficulnea quærens fructum, & non inueniens, quando, vt Marcus ait, non erat tempus ficorum: eam tamen sua maledictione percussam, continuò effecit aridam, vt deinceps arefacta permaneret, tanquam ex culpa quacunque arboris, hanc maledictionem in eam intorsisset?

Solutio Abaelardi.

ARBOR sine fructu reperta, Iudæa est pro sua nequitia tunc à Domino reprobata, vt boni operis fructu priuari mereretur, nequaquam recognoscens suæ visitationis tempus. Culpa autem eius accidit, quòd tunc tempus fructuum eius non fuerit: quando videlicet dominicæ prædicationis gratiam sibi oblatam repulit.

Problema Heloissæ XXVII.

QUID est, *Oratio eius fiat in peccatum?*

Solutio Abaelardi.

ITA in reprobum sensum tradatur, vt magis eligat orare

nociuā, quā profutura, & obtinere precibus ea, quæ ad peccatum magis pertrahant, quā ad salutem perducant.

Problema Heloisse XXVIII.

EX Epistola prima Pauli ad Tessalonicenses: *Ipse autem Deus pacis sanctificat vos per omnia, ut integer spiritus vester, & anima, & corpus sine querela in aduentu Domini nostri Iesu Christi seruetur.* Quid est spiritus & anima, tanquam anima non sit spiritus, aut duo spiritus sint in vno homine?

Solutio Abaelardi.

SPIRITVM pro ratione, hoc est animi discretionē hoc loco ponit Apostolus, sicut & ibi, *spiritus aduersus carnem.* Tale est ergo, Integer sit spiritus vester, hoc est, ratio ita perfecta vel incorrupta, ut in nullo per errorem exorbitet à veritate. Animam verò dicit voluntatem, iuxta illud: *Qui amat animam suam perdet eam.* Hoc est, qui suam hic voluntatem sequitur, postmodum sua voluntate priuabitur: ut qui hic voluntatem suam impleuerit, quod voluerit in futuro non habeat. Anima itaque nostra, id est voluntas, integra est: quando à diuina non discrepat. Corpus quoque integrum seruatur, cū exercitium corporalium sensuum nō corrumpitur illecebris carnalibus, nec oculus noster animam nostram deprædetur, neque mors intret per fenestras nostras. In his verò tribus per omnia sanctificamur, cū nec in discretionē rationis, nec in exæstuatione nostræ voluntatis, nec in oblectatione sensuum excedimus, ut caro spiritui dominetur. Sic tunc profectò sine querela, hoc est, sine reprehensione seruamur vsque in aduentum Domini: cū tales perseueramus vsque ad extremam iudiciū, vel tales tunc inueniri meremur.

Problema Heloisse XXIX.

QUID est illud ad Ephesios, *ut possitis comprehendere cum omnibus Sanctis, quæ sit latitudo, longitudo, sublimitas, & profundum: scire etiam supereminentem scientiæ caritatem Christi: ut impleamini in omnem plenitudinem Dei?*

Solutio Abaelardi.

POSSITIS comprehendere, hoc est, in vobismet ipsis experiri, quanta sit latitudo ipsorum, scilicet sanctorum, in caritate, per quam se usque ad inimicos etiam dilatant. Longitudo, id est longaminitas perseverantiae, caritatis, vel patientiae in aduersis, per ipsam scilicet caritatem, quæ omnia suffert, omnia sustinet, sublimitas eorundem & profundum, hoc est, quàm magni sint ex his duobus apud Deum per meritum quantitatem, & quàm parui vel infirmi apud se per humilitatem. Profundum quippe imum dicit vel humile. Quàm magni verò sint ac sublimes Deo, in remuneratione sua experientur, ubi tanto ampliùs merentur exaltari, quanto hinc humiliores extiterint: & tanto plus à Deo recipere, quanto minùs hinc ex se recognoscunt habere. Hæc autem quatuor, latitudo scilicet Sanctorum, vel Ecclesiæ, quæ corpus Christi est, in ipsa eius cruce, cui eius corpus affixum est, præfiguratum esse intelligunt. In latitudine quidem crucis, ad dexteram & in sinistram, ubi manibus affixis extensus est: latitudo caritatis inimicos etiam amplectentis, qui nobis tãquam in sinistra sunt, hoc est, in aduersitate, sicut amici in dextera, designatur. Manus affixæ in dextera & sinistra crucis parte, opera sunt caritatis, ad inimicos pariter & amicos in beneficijs dilatata. Quam profectò latitudinem caritatis de ipsa cruce Dominus nobis exhibuit, cùm & curam matris gerens, eam discipulo commendauit, & pro crucifigentibus exorauit. Sicut autem latitudo dextrorsum & sinistrorsum tendit, ita longitudo sursum & deorsum respicit, in qua ipse Dominus à capite usque ad pedes in cruce stetit erectus. Ex qua quidem longitudine, illa eius perseverantia patientiæ figuratur, usque ad consummationem vitæ ipsius, siue redemptionis nostræ. De qua ipse ait: *Consummatum est.* Et Apostolus, *factus, inquit, obediens usque ad mortem.* Sublimitas crucis, additio illa est, in qua titulus scriptus est super caput Domini. In quo certè titulo nomen eius præscriptum, quod est, Iesus, illud est excellentissimum, de quo idem Apostolus adiecit. *Propter quod & Deus exaltauit illum, & donauit illi nomen quod est super omne nomen.* In electis quoque illa superior pars ad-

data, significat illud in remuneratione Sanctorū, quod supra merita ipsis est collatū ex gratia, iuxta illud eiusdē Apostoli: *Non sunt cōdignae passionēs huius tēporis ad futurā gloriā, quae reuelabitur in nobis*. Profundū, hoc est, inferior pars crucis, per quam terrae affixa stat, humile est, & abjectū crucis patibulum, siue genus mortis ignominiosum, quo maxima Christi humilitas cōmendatur, & ipse ampliū exaltari meruit, sicut suprà meminimus ibi, *Propter quod & Deus exaltauit illū, &c.* De hoc genere mortis prae dictum fuerat ex persona impiorum: *Morte turpissima condemnemus eum*. In electis etiam illa pars inferior crucis, qua terrae infixata tenetur; virtutem exprimit humilitatis, qua ipsi se pulueri & terrae comparantes quanto se ampliū hic humiliant, & minores reputant, tanto postmodum exaltari merentur. Et haec quidem humilitas eorum, firmos & erectos eos tenet in culmine virtutum: sicut illa pars terrae affixa firmam eam, & erectam tenet. Post caritatem sanctorum, transit ad summam Christi caritatem, quam nobis exhibuit, & nos eam scire, ac semper attendere admonet, vt eius comparatione humiliores ac feruentiores in eius dilectione teneamur. Hanc vtique Christi caritatem supereminentem scientiae nostrae dicit: quia longē maior est, quā nos comprehendere intelligentia, vel experientia possimus. Cū autem hanc Christi caritatem considerantes, eam nostrae conferemus incomparabiliter superiorem: tunc, vt dictum est, humiliores ac feruentiores effecti, implebimur omni perfectione virtutum à Deo nobis collata.

Problema Heloissae XXX.

QUID est illud in primo libro Regum, quod de Helchana dicitur, *Et ascendebat vir ille statutis diebus, vt adoraret?* Qui, vel à quo statuti sunt dies isti?

Solutio Abaelardi.

RABANVS Maurus in libris Regum, ex sententia cuiusdam Hebraei, quem in plerisque sequitur secundum literam: *Quod autem dicit, statutis diebus, hoc est, tribus festiuitatibus, Pascha videlicet, Pentecoste, & solemnitate Tabernaculorum*. Vnde

Dominus in Exodo præcepit, dicens: *Tribus vicibus per singulos annos mihi festa celebrabitis.* Et item: *Ter, inquit, in anno apparebit omne masculinum tuum coram Domino Deo tuo, in loco, quem elegerit Dominus Deus tuus.* Ergo in Silo cum esset eo tempore arca Domini, ibi hic Helchana, cum esset ipse Leuita, post oblatus victimas, cum vxoribus, & filijs, atque filiabus pariter vescebatur.

Problema Heloissæ XXXI.

QUID est postmodum, quod Anna respondit Heli sacerdoti, *Nequaquam, inquit, Domine mi: nam mulier infelix nimis ego sum, vinumque, & omne, quod inebriare potest, non bibi: sed effudi animam meam in conspectu Domini. Ne reputes ancillam tuam, sicut unam de filiabus Belial?*

Solutio Abaelardi.

INFELICEM se dicit, quasi probrosam; quia maledicta sterilis, & quæ semen non reliquit in Israel. Vnde & illud est Elizabeth, *Quia sic fecit mihi Dominus in diebus, quibus respexit auferre opprobrium meum inter homines.* Vnde & illud est Deuteronomij cap. 24. quod Dominus inter cætera promittit populo, pro præceptorum obseruantia: *Non erit apud te sterilis utriusque sexus, tam in hominibus, quàm in gregibus tuis.* Quod verò ait, *Vinum, & omne, quod inebriare potest, non bibi:* magnam laicæ feminae vel coniugatae perfectionem exprimit. Quam profectò abstinenciam si tunc agebat, ut eius orationem facilius exaudiret Dominus, de partu, quem postulabat quanto magis virgines Christi, quæ spiritali, ac longè meliori fructui student, ista decet abstinencia? filias Belial specialiter appellat, quas sibi Diabolus, tanquam propriam prolem generat. Ebrietas quippe statum mentis euertit; & quicquid imaginis Dei per rationem habemus, extinguit, ut iumentis insipientibus comparandi, efficiamur sicut equus, & mulus, quibus non est intellectus. Antiquus hostis, & diabolus dicitur, hoc est, deorsum fluens: & Zabulus, siue Satanas, quod in Latinum sonat aduersarius, siue transgressor; & Belial, hoc est, absque iugo. Quod quidem nomen hoc loco propter ebrios rectè positum est: cum ebrij, tanquam insani, nulli Dei, vel disciplinæ

disciplinæ iugo subjaceant. Tales ergo dicit filias Belial, quales furibundæ Bacchi Sacerdotissæ describuntur.

Problema Heloyssæ XXXII.

QUID est etiam illud de Anna, *Vultusque illius non sunt amplius in diuersa mutati?*

Solutio Abaelardi.

HILAREM tantum faciem, & non mæstam vel flebilem deinceps exhibuit.

Problema Heloyssæ XXXIII.

QUID & illud est, *Orauit Anna, & ait: Exultauit cor meum in Domino? &c.* Hoc quippe Canticum verba gratiarum, vel prophetiæ potius habet, quam orationis.

Solutio Abaelardi.

QUANTVM æstimo, ante Canticum orationem præmissit: quò eius Canticum, vel actio gratiarum acceptabilius Deo fieret. De oratione itaque præmissum est, *oraui*: & de Cantico subjunctum, *Et ait, exultauit cor meum, &c.* Nam & mos Ecclesiæ est in singulis horis orationem præmittere his, quæ in laudibus Dei decantanda sunt. Plura autem Cantica sanctarum feminarum legimus, vt Debboræ, Iudith, & istud Annæ matris Samuelis, sicut & Mariæ matris Domini, de partu sibi à Domino commisso, illi quidem sterili, vt mater fieret tanti prophetæ, isti verò virgini, vt mater fieret Saluatoris. Et hoc profectò canticum Annæ, sicut & illud Virginis summæ, Ecclesia maximè frequentare consuevit, non solum pro sanctitate matris, vel dignitate partus ei concessi in Samuele, scilicet à quo specialiter Prophetæ dicuntur incœpisse, & qui primus à matre Domino est oblatus: verum etiam quia nullus ante Prophetarum tempus tam manifestè Christum, & eius imperium in suis Canticis, sicut nunc Anna, prophetasse videtur. Sic quippe ait de patre Christi, &

ipso: Dominus iudicabit fines terra, & dabit imperium regi suo, & sublimabit cornu Christi sui. Nondum quippe Rex in Israel erat constitutus, ad quem hæc prophetisæ gratulatio pertineret. Ipsa primo Christum, hoc est Messiam verum patenter exprimere meruit: ipsa manifestè prænuntia futurum, quod Maria decantat completum tanquam fidem virginis, tam prophetia, quàm partus instrueret sterilis.

Problema Heloissæ XXXIIII.

ILVD etiam mouet, quod hîc dicitur, *Donec sterilis peperit plurimos*. Et si enim Scriptura postmodum referat, quod post Samuelem adhuc tres filios, & duas filias Anna pepererit; nondum tamen, dum hoc diceret Canticum, nisi Samuelem habuisse refertur. Quomodo etiam de filiis suis dicit, *plurimos* & de filiis æmulæ suæ Fenennæ, dicit multos, tanquàm ipsa plures habuerit, quàm illa? Quamuis enim scriptura non definiat, quot filios habuerit Fenenna: nonnulli tamē a struunt eam plures habuisse, quàm Annam, hoc est, septem.

Solutio Abaelardi.

NON est necesse ut plurimos hoc loco, pro plures cōparatiuè accipiamus, respectu pauciorum: sed plurimos dicit absolutè, sicut & multos, verbis in eodem sensu variatis. Nec impedit, si iam multos filios habuisset Anna, quando Canticum istud Domino persoluit, quamuis scriptura nondum retulerit eam habuisse nisi Samuelem. Sæpe namque series scripturæ non tenet ordinem historię; sed nonnulla narrat præposterè. Potuit etiam istud per prophetiæ spiritum Anna dicere, cum solum adhuc haberet Samuelem. Denique nec incongruè dicere potuit pro solo Samuele, ut ipse scilicet pluris esset in pretio, quàm filij Fenennæ, licet vnus in numero. Hoc enim modo nonnunquam contingit, ut illum dicamus plus habere quàm alium, qui pauciora numero, sed pretiosiora possidet.

Problema Heloise XXXV.

OBSECRAMVS & quid illud sit, *Samuel autem ministrabat ante faciem Domini puer accinctus ephod lineo, & tunicam parvam faciebat mater sua, quam afferebat statutis diebus, ascendens cum viro suo, ut immolaret hostiam solemnem.* Siue enim Leuita, vt probabilius est, siue Sacerdos Samuel fuerit: nequaquam ætas pueritiæ ministerio eius conuenire secundum legem poterat, vt videlicet ephod accinctus tãquam Leuita, vel Sacerdos vitam tenera ætate ministraret. Quærimus & quam tunicam vel quibus temporibus statutis mater puero afferret.

Solutio Abaelardi.

MINISTRARE puer in aliquibus officijs minoribus poterat, ephod quoque lineo accinctus. Vnde & illud est Rabani secundum Augustinum: *Samuel accinctus ephod bad, hoc est superhumerali lineo, quod distat ab illo ephod, quod induebatur Pontifex: quia istud tantummodo lineum fuit, & concessum minoribus gradibus ad utendum. Illud enim, quod vestiebat pontificem, ex quatuor coloribus, id est, biacinto, bisso, cocco, purpura, & ex auro habebatur contextum.* Statutos dies patet esse supradictos trium festiuitatum secundum legem, vt in singulis illis præcipuis solemnitatibus anni, mater sollicita filio nouam tunicam afferret, in qua ipse Domino mundiùs vel honestiùs ministraret, superhumerali lineum desuper habens, quo accinctus, & non operatus, expeditiùs ministrare posset. Quem, ni fallor, habitum Monachi nunc imitantur, cum opera manuum in tunica & scapulari desuper accincto soleant exercere. Quid enim aliud scapulæ quàm humeri? Aut quid scapulare nisi superhumerali? Denique, quis improbet Samuelem, licet puerum, in officio Leuitarum, pro necessitate ministrare, hoc etiam Heli iubente, cum nullus tunc in domo Heli reperiretur hoc officio dignus? Notum quippe pro- uerbum est. Necessitas non habet legem.

Problema Heloissæ XXXVI.

ROGAMVS quippe & quærimus, quis fuerit ille vir Dei à Domino missus ad Heli, vt eum corrigeret, & mala domui eius ventura prædiceret? Quid & illud sit, quod inter cætera dicitur, de sacerdote meliore successuro Heli, *Suscitabo*, inquit, *mihi sacerdotem fidelem, qui iuxta cor meum & animam meam faciat: & edificabo ei domũ fidelem, & ambulabit corã Christo meo cunctis diebus. Futurum est autem, vt quicumque remanserit in domo, veniat, vt oretur pro ea, & offerat nummũ argenteum, & tortã panis, dicatq; . Dimitte me, obsecro, ad unam partem Sacerdotale, vt comedam buccellã panis. Scimus quidem Samuelem, qui Heli superuixit, fidelissimum extitisse Domino. Sed quòd Leuita potius quàm Sacerdos extiterit, communis opinio est, nec domum eius fidelẽ extitisse, cuius filij reprobatii sunt. Quod etiã dicitur, *Ambulabit coram Christo meo*, vtrum de ipso Sacerdote, an de domo eius accipiendũ sit, & quis ille Christus sit quærimus. Denique quod supponitur de oblatione nummi argentei, & tortæ panis, tanquam oblatione noua, quam lex non habuit, & cæteris, quæ adduntur, exponi postulamus.*

Solutio Abaelardi.

VIR ille Dei, creditur Angelus fuisse apparens in humana specie. Sacerdos successurus Heli, non tam Samuel, qui Leuita fuerit, nec fidelem, sed reprobam domum habuit, quàm quicumque alius vir sanctus, qui in ordine Sacerdotij Heli successerit, intelligendus esse videtur, qualis fortassis Aminadab fuit, in cuius domum arca Domini Cariathiarim reducta est à Philistæis, vel Eleazarus filius eius sanctificatus ibi ad custodiendam arcam, vel denique ipse Achimelec, quẽ cū alijs Sacerdotibus Saul interfecit in Nobe ciuitate sacerdotum. Quod verò dictum est, *Ambulabit coram Christo meo*, non de Sacerdote, sed de domo eius accipe sub ipso ministrante. Denique quod additur, *Futurum est enim, &c.* ita Hebræum quendam audiui exponentem. Nummus argenteus, siclus argenteus est, quo vnusquisque redimebat se à Sacerdote. Torta panis, quicquid id est quarta panis pars, quæ pauperum oblatio erat. Pars Sacerdotij armus dexter, & pectusculum, id est superior pectoris pars, maxillæ, ventriculus, &

cauda, (Quæ tamen non semper eadem erat) quia secundū diuersos sacrificiorum ritus, vt in Leuitico legitur, pars Sacerdoti dabatur. Nuntiatur itaque Heli, quòd domus eius ad tantam ventura sit paupertatem: vt qui modò redemptionum & oblationum susceptores erant, quibus etiam propter ipsum Heli pars Sacerdotalis dabatur, ab alijs se redimendos Sacerdotibus, alimoniā petant, orātes, vt eis quantulacumq; Sacerdotij particula, & buccella panis, quæ torta superiùs appellata est, dimittatur.

Problema Heloissæ XXXVII.

QUID est illud in exordio Marci Euangelistæ, quod ait, *Sicut scriptum est in Esaia: Ecce mitto Angelum meum ante faciem tuam, qui preparabit viam tuam ante te. Vox clamantis in deserto, &c.* Cur enim dicit in Esaia, cū primum testimonium, quod statim addit, sit Malachix, secundum Esaia? Siñ autem econuerso fecisset, stare veritas posset; ita scilicet, vt illud, quod præmiserat, *Sicut scriptum est in Esaia*, ad primū tantūm pertineret testimonium.

Solutio Abaelardi.

SED quia eadem sententia in verbis vtriusque Prophetæ continetur: breuiloquus Euangelista id ipsum, quod Malachias dixit, Esaia ascripsit, qui maioris erat auctoritatis, & à quo fortassis ille hoc didicerat. Missio quippe Angeli, ad parandam viam Domini, vel ipsa eius præparatio, & vox clamantis in deserto, Ioannis est prædicatio. Quem etiam diligentius Esaia describit, cū eum nō Angelum appellat, sed clamantem in deserto prænuntiat, Vnde & bene Euangelista post testimonium Esaia, quod posterius posuit, statim adjecit: *Fuit Ioannes in deserto baptizans, & predicans.* Quod quidem cū ait, *in deserto, & predicans*, apertius verbis consonat Esaia dicētis, scilicet, *Vox clamantis in deserto.* Prouidè quoque Marcus cū præmiserit, *Scriptum est in Esaia*, addidit, *Propheta.* Tanquā Esaia testimonij quoque Malachix Propheta potius esset, quā ille: qui hoc, vt arbitror, testimoniū ex Prophetia Esaia, quā legerat, nō hac sola inspiratione spiritus acceperat. Ad hūc etiā modū illud posse solui arbitror testimoniū,

quod Matthæus inducit de duobus Prophetis collectum, Zacharia scilicet & Hieremia, cùm ipse totum tribuat Hieremiæ dicens, *Tunc impletum est quod dictum est per Hieremiam Prophetam dicentem: Et acceperunt triginta argenteos pretium appretiati, quem appretiauerunt à filijs Israel, & dederunt eos in agrum figuli, sicut constituit mihi Dominus.* Cùm igitur tam primum testimonium Zachariæ, quàm secundum Hieremiæ, in eadem de Domino sententia sint coniuncta: Hieremiæ tamen, qui maioris erat auctoritatis, & à quo Zacharias illud quod dixit accipere potuit, Matthæus totum Hieremiæ tribuit.

Problema Heloissæ XXXVIII.

ILLUD quoque testimonium Zachariæ Prophetæ, quod Dominus in Matthæo inducit de se ipso dicens, *Scriptum est enim, Percutiam pastorem, & dispergentur oves gregis,* nonnullam generat quæstionem. Hoc enim Zacharias de pseudopropheta potius quàm de Domino dicere videtur. Sic quippe in eo scriptum est. *Et erit, cùm prophetauerit quispiam ultra: dicit ei pater eius, & mater eius, qui genuerunt eum. Non viues, quia mendacium loquutus es in nomine Domini. Et configent eum pater eius, & mater eius, genitores eius, cùm prophetauerit. Et erit in die illa, confundentur propheta, unusquisque ex visione sua, cùm prophetauerit, nec operientur pallio saccino, ut mentiantur: sed dicet. Non sum propheta: homo agricola ego sum: quoniam Adam exemplum meum ab adolescentia mea. Et dicetur ei. Quæ sunt plaga istæ in medio manuum tuarum? Et dicit. His plagatus sum in domo eorum, qui diligebant me. Framea suscitare super pastorem meum, & super virum coherentem mihi, dicit Dominus exercituum. Percute pastorem, & dispergentur oves.*

Solutio Abaelardi.

QUAMVIS Zacharias illud pro pseudopropheta dixerit, Dominus verò pro se ipso induxerit: tamen tale est illud Domini testimonium ex Zacharia sumptum, quod tam bono pastori, quam malo conueniat. Siue enim bonus pastor, siue malus, aliqua aduersitate percussus, à cura illa pastorali, quã acceperat, præpediatur ab eius regimine grex, quem aduna-

uerat, dispergitur, & disgregatus in diuersa vagatur, sine pastore & duce factus. Quia ergò persecutio aduersariorum, tã in bono pastore, quàm in malo hanc dispersionem gregis operatur, non incommode Dominus, quod generaliter de pastoribus dicitur, ad suam etiam passionem applicuit: tanquã si diceret. Quod generaliter de pastoribus verum est, hoc etiam in se complendum esse, & sic etiam in se futurum, sicut in pseudopastore fuerat prædictum: vt in hoc etiam cum iniquis sit reputatus, quòd eis etiam in hoc assimilatus.

Problema Heloyse XXXIX.

QVÆRIMVS etiam quomodo illud, quod de galli cantu Dominus Petro prædixit, tam variè scriptum sit ab Euangelistis. Matthæus quippe ita scribit: *Ait illi Iesus, Amen dico tibi, quia in hac nocte antequam gallus cantet, ter me negabis.* Marcus verò, qui Euangelium suum ipso Petro dictante dicitur scripsisse, sic ait. *Amen dico tibi, quia hodie in nocte hac priusquam bis gallus vocem dederit, ter me es negaturus.* Lucas verò ita: *Dico tibi Petre, non cantabit hodie gallus, donec ter abneges nosse me.* Ioannes verò sic. *Amen, amen dico tibi, non cantabit gallus, donec ter me neges.* Quid ergo sibi vult tanta verborum diuersitas, si semel vnum ex his Dominus Petro dixerit? Quid est etiam quod dicit Marcus, *Hodie in nocte hac*: cum nequaquam nox in die sit, & in cãtu galli addiderit, *bis*, quod cæteri tacent.

Solutio Abaelardi.

CONSVERTVO est Scripturæ, nomine diei pariter diem & noctem comprehendere: veluti cum dicimus, quia ille vixit, vel sedit tot annis & tot diebus, vel quia ibi fuit per tot dies. Sic & cum Marcus dixit *hodie*, noctem etiam cum suo die comprehendit. Quod verò adiunxit, *in nocte hac*, noctem non tempus, sed imminentis noctis aduersitatem dixit. Vt verò vtraque soluamus de galli cantu dicta, ponamus Dominum ita temperatè Petro dixisse priùs, vt Marcus refert, antequam gallus scilicet bis vocem dederit, & postea, tanquam Petrus constantiam suam promitteret, adjecisse, quòd etiam illud faceret, antequam gallus cantaret. Nam & Marcus

Petrum quasi nimium confidentem sæpius verbis Domini quasi procaciter contraire commemorat, dicens. *Petrus autē ait : Etsi omnes scandalizati fuerint, sed non ego. Et ait illi Iesus Amen dico tibi, quia hodie in nocte hac, priusquam gallus bis vocem dederit, ter me es negaturus. At ille amplius loquebatur, Et si oportuerit me simul commori tibi: non te negabo.* Qui prius dixerat se non esse scandalizandum, plus aliquid nunc addit, dicens, se etiam paratum commori antequam neget. Ad quam maiorem suæ cōstantiæ præsumptionem, & ipse Dominus plus aliquid adjecisse non incongruè creditur, dicēdo scilicet, quòd priusquam etiam gallus cantet, ter sit negaturus, vt diximus. Sed illud plurimum quæstionis generat, quod negationes Petri, & tantum galli Marcus sic ordinat, vt post primam negationē, gallus primo cātaret, & post duas alias, secundò; ex quo videtur nequaquam posse stare, quòd, sicut dicunt cæteri Evangelistæ, Petrus ter negaret, antequam gallus cantaret: nisi fortè in verbis quoque ipsorum subaudiatur, bis, quod Marcus ponendo subaudiendum innuit, & quòd Dominus tantummodo dixerit. Cū enim aliquid vno loco magis determinatè, quàm in alio dicitur: sæpe determinationem subaudiri oportet, vbi etiam ipsa non ponitur, vel quod alibi est exceptum, diligenter annotandum, ne falsitas confundat sensum. Quod nec ipsos etiam latet infideles. Vnde cū Iudæis nonnunquam opponimus, *Ad usuram non accommodaueris*, tanquam nec nobis etiam fœnerare debeant: dicunt, *proximo tuo*, subintelligendum esse, quod alibi legitur determinatum esse. Sed & cū veritas habeat Evangelica, *Nisi quis renatus fuerit ex aqua, & Spiritu sancto, non potest introire in regnū Dei*, subintelligendum est, vel sua passione sanctificatus: Cū alibi quoque de Martyribus generalem habeamus sententiā, Domino dicente, *Qui perdiderit animam suam propter me, inueniet eam.* Augustinus verò lib. 3. de consensu Evangelistarum, hanc diuersitatem de negatione Petri ita dissoluit, vt quod Marcus ait, ad prolationem vocis referat negantis; quod cæteri dicunt, ad propositum animi iam tanta formidine percussi, atque perturbati: vt paratus esset tertio negare, antequam omnino gallus cantaret. Quòd si quis fortè requirat, cur dixerit Dominus, ter, & non quater, vel amplius, quod similiter ex magnitudine formidinis facere paratus esset: vide-

etur mihi nonnulla etiam ratio in hoc negationis haberi ternario, quo comprehensu intelligatur omnis negatio. Omnis quippe Christum negans, vel per errorem id facit, vel timore aliquo, siue cupiditate compulsus id præsumit. Ter igitur negaturus Petrus cum à Domino prædicitur, ad omnem paratus esse negationem insinuat. Neque enim dubitandum est ex his, quæ iam in Domino gesta conspexerat, antequam primùm negaret, in desperationis scandalum vnà cum cæteris ipsum corruisse: à quo postmodum liberatus, Domino eum respiciente, amaro pœnitentiæ fletu deleuit, quod commisit. Nec illud fortassis absurdè dici potest quòd ille prior cantus galli, post primam negationem Petri, naturalis non fuit: sed ex aliquo strepitu, vel Petri de atrio foras exeuntis, vel quorumcunque illic deambulantium, gallus aliquis propè assistens, excitatus ante horam, primò cantauerit: ut non esset ille prior cantus naturaliter factus, sed vi quadam extortus. Nec tamen sine ratione id Dominus ordinauit, ut ad primam statim negationem Petri, statim gallus, quasi Petrum arguendo, cantaret, nec sic Petrus negàdo desilteret, ut veritas ipsa appareret. Cum itaque Dominus prædixerit Petrum ter negaturum, antequam gallus cantaret: horam naturalis cantus galli intellexisse videtur. Marcus verò qui solus apposuit bis; tam naturalem, quàm accidentalem cantum galli indifferenter accepit.

Problema Heloissæ XL.

QUOD est quod solæ bestiæ, vel aues commemorantur adductæ esse in Paradisum ad Adam, ut videret, quid vocaret ea: & non etiam reptilia terræ, ut serpentes, vel reptilia aquæ, ut pisces?

Solutio Abaelardi.

BENE quidem, quantum ad mysterium, hoc credimus actum. In Ecclesia namque præsentis, continentes, qui se maximè per desiderium ad cœlestia subleuant, & quasi volucres in altum volant, aibus comparantur. Boni verò coniugati bestiis, quæ terram ex parte contingunt, pedibus videlicet, & ex parte ab ea separantur, cum corpore in ea non volutentur.

Qui enim matrimonio coniunctus est, diuisus est; partim Deo seruiēs, partim sæculo intentus, propter instātes cōiugij necessitates. Quasi ergo pedibus, hoc est, inferiori parte sui terram contingit; quia terrenis curis, propter occupationem matrimonij, quod lapsioris vitæ est, deseruit. Reptilia verò, quæ toto corpore in imo iacent, nec se vllatenus erigere possunt, reprobi sunt terrenis desiderijs penitus vacantes, & in profundo vitiorum commorantes. De qualibus scriptum est: *Peccator cum in profundum vitiorum venerit, contemnit.* Vnde nec pisces vnquam in sacrificio Dei permitti sunt offerri. Rectè igitur volatilibus tantùm & gressilibus animantibus in Paradisum adductis, non etiam reptilibus, Adam nomina imposuisse dicitur: quia de toto præsentis Ecclesiæ populo, in qua granis paleæ adhuc sunt permixtæ, soli continentes, & boni coniugati ad verum cælestis patriæ Paradisum sunt peruenturi, & Dei vocatione digni: quorum nomina iam in libro vitæ sunt scripta. De qua quidem vocatione Dei, illud est Apostoli. *Quos autem prædestinavit, hos & vocavit; & quos vocavit, illos & iustificavit.*

Problema Heloissæ XLI.

QUÆRIMVS quis illud addiderit in fine Deuteronomij librorū scilicet quinque Moyfi nouissimi, quod de morte Moyfi & deinceps narratur: vtrum videlicet ipse Moyses id quoque prophetico spiritu dixerit, vt etiam id libris eius cōnumerari possit, an ab alio postmodum sit superadditum.

Solutio Abaelardi.

SICVT Beda super Esdram meminit, ipse Esdras, qui non solum legem, sed etiam, vt communis maiorum fama est, omnem sacræ scripturæ seriem, quæ pariter igni absumpta est, prout sibi videbatur legentibus sufficere, rescripsit: tam hoc quàm pleraque alia scriptis veteris testamenti adiecit. Sic & nonnulla scriptis etiam Euangelicis superaddita videmus à translatoribus: quale est illud in Matthæo. *Heli, Heli, lama sabathani? hoc est Deus meus, Deus meus, vt quid me dereliquisti?* Sic & in cæteris Euāgelistis, quæ nō Hebraicè, sed Græcè scripta

sunt, simul expositio istorum Hebraicorum verborum addita reperitur. Libro etiam Hieronymi de illustribus viris, vbi se ipsum in fine operis posuit, eius vitæ quantitas & finis à quodam addita reperitur.

Problema Heloyssæ XLII.

VTRŪM aliquis in eo quod facit à Domino sibi concessum, vel etiam iussum, peccare possit, quærimus.

Solutio Abaelardi.

QUOD si, vt oportet, verum concedatur; quæstione graui pulsamur, quomodo coniuges, vel in antiquo populo, vel in nouo, carnalem concupiscentiam exercentes, in eo peccare dicantur, vnde in posteros peccatum originale trāsfundunt. Priorem quippe populum ad procreationem filiorum Dominus ex præcepto, & legis maledicto in eos, qui semen in Israel non relinquerent, constringebat. Vnde non solum primis parentibus ante peccatum dixit, *Crescite & multiplicamini, & replete terram*: verum etiam hoc ipsum Noe & filijs eius post diluuium iniunxit. De supradicto autem legis maledicto, quo ad propagationem filiorum homines cgebantur; illud est Hieronymi contra Heluidium de perpetua virginitate sanctæ Mariæ. Quandiu lex illa permansit, *Crescite, & multiplicamini, & replete terram*, & *Maledicta sterilis, quæ non facit semen in Israel*, nubebant omnes, & nubebantur. Hinc & illud est beati Augustini in libro de bono coniugali. *Continentiam Ioannes & in opere, Abraham verò in solo habitu habebat. Illo itaque tempore, cum & lex dies Patriarcharum subsequens, maledictum dixit, qui nō excitaret semen in Israel, & qui poterat non promebat, sed tamen habebat.* Idem ad Iulianum de viduitate seruanda. *Nec quia dixi Ruth beatam, Annam beatiorem, cum illa bis nupsit; hæc vni- uira citò viduata diu vixerit, continuò etiam te meliorem putes esse quàm Ruth: alia quippe prophetis temporibus sanctarum feminarū dispensatio fuit, quas nubere obedientia, non concupiscentia compellebat, ut propagaretur populus Dei, ex quo nasceretur etiā caro Christi.* Ut ergo ille populus propagaretur, maledictus habebatur per legis sententiam, qui non suscitaret semen in Israel. Vnde &

sanctæ mulieres accendebantur non cupiditate concumbendi, sed pietate pariendo, ut rectissimè credantur coitum non fuisse quæsituræ, si proles posset aliter prouenire. Et viris vsus plurimarum viuarum concedebatur vxorum. Proinde sancta Ruth quale cum semen illo tempore necessarium fuit in Israël non haberet in mortuo viro, quæsiuit alterum de quo haberet. Ad hoc utique legis maledicto, quod prædictus cōmemorat doctor, & quasi summo fidelium opprobrium, intantum etiam ipsa lex illi prouidebat populo, ut posteriores fratres, etsi de vxoribus suis proprium semen haberent, ad semē quoque priorum fratrum suscitandum, vxores eorum ducere compelleret, & illis iam defunctis potius quàm sibi filios generare, ut vel sic à maledicto legis illos absolueret, qui prole priuati non essent. Ipse etiam Dominus obseruatoribus legis id quoque in remuneratione constituit, ut steriles apud eos non permaneant, tam in hominibus, quàm in iumentis. Sic quippe scriptum est in Deuteronomio: *Si postquam audieris hæc iudicia, custodieris ea, custodiet te Dominus, diliget & multiplicabit, benedicetque fructui ventris tui, & terra tue armentis, gregibus ouium. Benedictus eris inter omnes populos. Non erit apud te sterilis utriusque sexus, tam in hominibus quàm in gregibus tuis.* Vnde & nullos sanctorum Patrum legimus semine priuatos, quamuis steriles haberent vxores, quas non ad voluptatem concupiscentiæ carnalis exercendam, sed ad populū Dei propagandum ducebant: ut non tam sibi quam Deo filios procrearent. Quale & illud est Thobia. *Et nunc, Domine, tu scis, quia non luxurie causa accipio sororem meā, sed sola posteritatis causa, in qua benedicetur nomen tuum in secula seculorū.* Hac intentione Abraham matrimonio copulatus, de vxore sterili prolem suscipere meruit. Sic quoque Isaac, Manue pater Samsonis, Helchana de Anna, Zacharias de Elizabeth optatam adepti sunt prole, ne maledictum legis vel opprobrium incurrerent matrimonij. Quod inde matrimonium est dictum, quòd ad matrem familias faciendam sit initum. Hoc maledictum legis Iepte filia considerans, virginitatem suam deflebat: quòd virgo moritura, semen in Israël non esset relictura. Ab hoc opprobrio se liberari Helizabeth exultabat, dicens. *Quia sic fecit mihi Dominus, in diebus, quibus respexit auferre opprobrium meum inter homines.* Hæc omnia suprà memoratus doctor diligenter attendens, illum coniugatorum concubitum, qui

fit propter filios non tam generandos, quàm in Christo regenerandos, ita commendat, vt illum magis à peccato immunẽ dicat, quàm eum qui fit causa vitandæ fornicationis: quam tamen solam Apostolus causam constituit, ad continentiam plurimùm nos adhortans: *De quibus, inquit, scripsistis mihi, bonũ est homini mulierem non tangere: propter fornicationem autem, unusquisque suam uxorem, & unaquæque suum virum habeat.* Tanquam ergo melius sit, concubitum quoque coniugalem Deo magis quàm nobis impendi; vt ei scilicet filios generare magis quàm vtilitati nostræ intendamus prouidere. Adeo prædictus doctor illam intentionem isti præponit, vt nequaquam illum concubitum ad indulgentiam referat, quem à culpa penitus alienat: vt non solùm tanquam culpabilis non vitetur, sed tãquam laudabilis exspectetur. Qui etiam nuptiarum bonum commendat, vt si causa qua conuenit, incantur, procreandi videlicet filios: illos etiam concubitus excusent, qui non hac intentione, qua conuenit, sunt: atque in seipsis, magis quàm in operationem vitandæ fornicationis, nuptias esse bonas cõuincit. Vnde & in prædicto Libro, de bono scilicet coniugali, sic ait. Bonum ergo coniugij, quod etiam Dominus in Evangelio confirmauit: non solum quia prohibuit dimittere uxorem nisi ex causa fornicationis, sed etiam quia venit inuitatus ad nuptias, cur sit bonum merito quæritur. Quod mihi non videtur propter solam filiorum procreationem, sed propter ipsam etiã naturalem in diuerso sexu societatem. Item: Tantum valet illud sociale vinculum cõiugum, vt cùm causa procreandi colligitur, nec ipsa causa procreandi soluatur. Posset etiam homo dimittere sterilem uxorem, & ducere aliam, de qua filios habeat, & tamen non licet habere. Item. Sanè videndum est alia bona Deum nobis dare, quæ propter seipsa exspectanda sunt, sicut est, sapientia, salus, amicitia: alia quæ propter aliquid sunt necessaria, sicut doctrina, cibus, & potus, somnus, coniugium, concubitus. Horum enim quædam necessaria sunt propter sapientiam, sicut doctrina: quædam propter salutem, sicut cibus, & potus, & somnus: quædam propter amicitiam, sicut nuptiæ vel concubitus. Hinc enim subsistit propagatio generis humani, in quo societas amicabilis magnum bonum est: his itaque bonis, quæ propter aliud necessaria sunt, qui non ad hoc vtitur, propter quod instituta

sunt, peccat, aliàs venialiter, aliàs damnabiliter. Quisquis verò eis propter hoc utitur, propter quod data sunt, benefacit. Item. Mihi videtur hoc tempore solos eos, qui se non continent, coniugari oportere, secundum illam eiusdem Apostoli sententiam, Quòd si se non continent: nubant. Melius est enim nubere, quàm vri. Nec ipsis tamen non peccatum sunt nuptiæ. Qui si in operationem fornicationis eligerentur, minus peccatum esset, quàm fornicatio; sed tamen peccatum esset. Nunc autem quid dicturi sumus aduersus euidentissimam vocem Apostoli dicentis, Quod vult faciat, non peccat si nubat, &, Si acceperis vxorem, non peccasti, &, si nupserit virgo, non peccat? Hinc certè iam dubitare fas non est, nuptias non esse peccatum. Non itaque nuptias secundum veniam concedit Apostolus. Nam quis ambigat absurdissimè dici non eos peccasse, quibus venia datur? Sed illum concubitum secundum veniam concedit, qui fit per incontinentiam, non sola causa procreandi, & aliquando nulla causa procreandi: quem nuptiæ non cogunt fieri, sed ignosci impetrant: si tamè non ita sit nimis, vt impediatur, quæ seposita esse debent tempora orandi, nec immutetur in eum vsus, qui est contra naturam. De quo Apostolus tacere non potuit, cùm de corruptelis nimijs immundorum & impiorum hominum loqueretur. Concubitus enim necessarius causa generandi, inculpabilis & solus ipse nuptialis est. Ille autem, qui ultra istam necessitatem progreditur, iam non rationi, sed libidini obsequitur. Et hunc tamen non exigere, sed reddere coniugi, ne fornicando damnabiliter peccet, ad personam pertinet conjugalem. Si autem ambo tali concupiscentiæ subiguntur, rem faciunt non planè nuptiarum. Veruntamen si magis in sua cõiunctione diligunt quod honestum, quàm quod inhonestum est, id est, quod est nuptiarum, quàm id quod non est nuptiarum, hoc eis, auctore Apostolo, secundum veniam conceditur. Item. Ille naturalis vsus, quando prolabitur ultra pacta nuptialia, id est ultra propagandi necessitatem, venialis fit in vxore, in meretrice damnabilis: iste, qui est contra naturam, execrabiliter fit in meretrice, sed execrabiliùs in vxore. Tantum valet ordinatio creatoris & ordo creaturæ, vt in rebus ad vtendum concessis, etiam cum modus exceditur, longè sit tolerabilius: quàm in eis, quæ con-

cessa nō sunt, vel vnus vel rarus excessus: & ideo in re cōcessa, immoderatio coniugis, ne in rem non concessam libido prorumpat, toleranda est. Hinc est etiā quodd longē minū peccat quālibet assiduus ad vxorem, quā vel rarissimus ad fornicationem. Cū verō vir membro mulieris non ad hoc concessio vti voluerit, turpior est vxor si in se, quā si in alia fieri permiserit. Decus ergo coniugale est castitas procreandi, & reddendi carnalis debiti fides; hoc est opus nuptiarum, hoc ab omni crimine defendit Apostolus, dicendo, Et si acceperis vxorem, non peccasti, & si virgo nupserit, non peccat: & quod vult faciat: non peccat, si nubat. Exigendi autem debiti ab alterutro sexu immoderatio progressio, propter illa, quæ suprā diximus, coniugibus secundum veniā conceditur. Quod ergo ait, Quæ innupta est cogitat ea, quæ sunt Domini, vt sit sancta & corpore & spiritu, non sic accipiendū est, vt putemus non esse sanctam corpore Christianam coniugem castam. Omnibus quippe fidelibus dictum est, Nescitis quoniam corpora vestra templum in vobis est Spiritus sancti, quem habetis à Deo? Sancta sunt etiam corpora coniugatorum, fidem sibi & Domino seruantium. Cui sanctitati cuiuslibet eorum, nec infidelem coniugem obsistere, sed potius sanctitatem vxoris prodesse infideli viro, aut sanctitatem viri prodesse infideli vxori: idem Apostolus testis est, dicens, Sanctificatus est enim vir infidelis in vxore fidei: & sanctificata est mulier infidelis in fratre fidei. Proinde illud dictum est secundum ampliorem sanctitatem innuptarū quā nuptiarum. Item. Manet vinculum nuptiarum, etiam si proles, cuius causa initum est, manifesta sterilitate non subsequatur: ita vt iam scientibus coniugibus non se filios habituros, separare se tamen, vel ipsa causa filiorum atque alijs copulare non liceat. Quod si fecerint, cum eis, quibus se copulauerint, adulterium committunt: ipsi autem coniuges manent. Planē vxoris voluntate adhibere aliam, vnde comunes filij nascentur vnus commixtione, ac semine, alterius autem iure ac potestate, apud antiquos patres fas erat: vtrum & nunc fas sit, non temere dixerim. Non est enim propagandi necessitas, quæ tunc fuit: quando & parientibus coniugibus alias propter copiosiore posteritatem, superducere licebat, quod nūc certē non licet. Item. Quod est cibus ad salutem hominis,

hoc est concubitus ad salutem generis, & vtrumque non est sine delectatione carnali. Quæ tamen modificata, & temperantia refrænante in vsum naturalem redacta, libido esse non potest. Quod est autem in sustentanda vita illicitus cibus, hoc est in quærenda prole fornicarius vel adulterinus concubitus. Et quod est in luxuria ventris & gutturi illicitus cibus, hoc est in libidine nullam prolem quærente illicitus concubitus. Et quod est in cibo licito nonnullus immoderatio appetitus, hoc est in coniugibus venialis ille concubitus. Sicut ergo satius est mori fame, quàm idolothyris vesci: ita satius est defungi sine liberis, quàm ex illicito coitu stirpem quærere. Vnde cunque autem nascantur homines, si parentum vitia non sectentur, & Deum rectè colant, honesti & salvi erunt. Semen enim hominis ex qualicunque homine, Dei creatura est, & eo malè vtentibus malè erit, non ipsum aliquando malum erit. Sicut autem filij boni adulterorum, nulla defensio est adulteriorum: sic mali filij coniugatorum, nullum crimen est nuptiarum. Idem supra. Sunt viri vsque adeo incontinentes, vt coniugibus nec grauidis parcant. Quicquid ergo inter se coniugati immodestum, inuerecundum, sordidumve gerunt, vitium hominum est, non culpa nuptiarum. Iam in ipsa quoque immoderatiore exactione debiti carnalis, quæ eis non secundum imperium præcipit, sed secundum veniam concedit Apostolus, vt etiã præter causam procreandi sibi miscantur: & si eos prauis mores ad talè concubitum impellunt, nuptiæ tamè ab adulterio seu fornicatione defendunt. Neque enim illud propter nuptias admittitur, sed propter nuptias ignoscitur. Debent ergo sibi coniugati non solum ipsius sexus sui cõmiscendi fidè, liberorum procreandorum causa, quæ prima est humani generis in ista mortalitate societas: verum etiam infirmitatis inuicem excipiendæ ad illicitos concubitus euitandos, mutuam quodam modo seruitutem: vt & si alteri eorum perpetua continentia placeat, nisi ex alterius consensu non possit. Et ad hoc enim vxor non habet potestatem sui corporis, sed vir: similiter & vir non habet potestatem sui corporis, sed mulier: vt & quod non filiorum procreandorum, sed infirmitatis & incontinentiæ causa expetit, vel ille de matrimonio, vel illa de marito, non sibi alterutrum negent: ne per hoc incidant in damnabiles corruptelas, tentate

Satana

Satana propter incontinentiam, vel amborum, vel cuiusquam eorum. Coniugalis enim concubitus generandi gratia non habet culpam. Item. Reddere debitum cōiugale, nullius est criminis: exigere autem ultra generandi necessitatem culpa venialis. Idem ad Valerianum Comitem, de nuptijs & concupiscentia, libro primo. Quis autem audeat dicere donum Dei esse peccatum? Anima & corpus, & quæcunque bona animæ & corporis, naturaliter insita etiam peccatoribus, dona Dei sunt: quoniam Deus, non ipsi, ista fecerunt. De his quæ faciunt dictum est, omne quod non est ex fide, peccatum esse. Absit ergo pudicum veraciter dici, qui non propter verum Deum, fidem connubij seruat vxori. Copulatio itaque maris & fœminæ, generandi causa, bonum est naturale nuptiarum. Sed isto bono malè vtitur, ut sit ei intentio in voluptate libidinis, non in voluntate propaginis. Hac intentione cordis, qui suum vas possidet, id est coniungem suam: proculdubio non possides in morbo desiderij, sicut gens quæ ignorat Deum, sed in sanctificatione & honore, sicut fideles qui sperant in Deum. Illo quippe concupiscentiæ malo vtitur homo, non vincitur, quando eam inordinat aut indecoris motibus æstuantem frænât & cohibet: neque nisi propagini consulens relaxat atque adhibet, ut spiritualiter regenerandos carnaliter gignat, non ut spiritum carni sordida seruitute subijciat. Item de coniugio Ioseph & Mariæ. Omne nuptiarum bonum impletum est in illis parentibus Christi, proles, fides, sacramentum. Prolem cognoscimus ipsum Dominum Iesum. Fidem, quia nullum adulterium. Sacramentum, quia nullum diuortium. Solus ibi nuptialis concubitus non fuit: quia in carne peccati fieri non poterat, sine illa carnis concupiscentia, quæ accidit ex peccato, sine qua concipi voluit, qui futurus erat sine peccato, non in carne peccati, sed in similitudine carnis peccati: ut hinc etiam doceret omnem, quæ de concubitu nascitur, carnem esse peccati: quandoquidem, sola quæ non inde nata est, non fuit caro peccati. Quamuis coniugalis concubitus, qui sit intentione generandi, non sit ipse peccatum: quia bona voluntas animi sequentem ducit, nec ducentem sequitur corpus voluptatem, nec humanum arbitrium.

confiteretur malum: si autem non confunditur, addit impudentiam peius malum. Rectè ergo diximus ita nuptiarum bonum malo originali, quod inde trahitur non potest accusari: sicut adulterorum malum bono naturali, quod inde nascitur, non potest excusari. Quoniam natura humana, quæ nascitur vel de coniugio vel de adulterio, Dei opus est; quæ si malum esset, non esset generanda, si malum non haberet, non esset regeneranda.



Deus est. Itē in Actibus Apostolorum inuenitur, quòd omnes Apostoli & discipuli in vnum congregati vocē suam vnanimiter leuauerunt, dicentes: *Domine Deus tu qui fecisti cælum, & terram, mare, & omnia quæ in eis sunt, &c.* Itē & quod Ioannes in Apocalypsi dicit: *Et Angelus quem vidi stantem supra mare, & super terram, leuauit manum suam ad cælum, & iurauit per viuentem in secula seculorum: qui creauit cælum & terram, mare & omnia quæ in eis sunt, &c.* Item in eodem: *Timete Dominum, & date illi honorem, quia venit hora iudicij eius: & adore eum qui fecit cælum, & terram, mare, & omnia quæ in eis sunt, & fontes aquarum.* Item Paulus in Epistola ad Hæbræos dixit: *Et tu in principio, Domine, terram fundasti, & opera manuum tuarum sunt cæli.* Item in Euangelio secundum Matthæum; *Confitebor tibi, Domine, Pater cæli & terræ.* Item Ioannes de eodem: *Et mundus per ipsum factus est.* Et istæ auctoritates noui Testamenti vobis sufficiant. Quamuis multæ auctoritates in nouo & in veteri Testamento, & in Prophetis eadem testificantes; quòd Deus creauit & fecit omnia visibilia & inuisibilia, inueniuntur. Item in Actibus Apostolorum Paulus & Barnabas: *Viri fratres, annunciamus vobis ab his vanis conuerti ad Deum viuum & verum, qui fecit cælum, & terram, mare, & omnia quæ in eis sunt; dans pluuias de cælo, & tempora fructifera, implens cibo & letitia corda vestra.*

C A P. II.

HOc quod Hæretici dicunt, duos esse Deos, vnum omnipotentem, & alium malignum, contra omnem diuinam Scripturam sentiunt: quia omnis Scriptura diuinitus inspirata, noui videlicet & veteris Testamenti, & omnium Prophetarum, vnum Deum solūmodò affirmat. Dicit enim beatus Paulus, *Vnus est Deus, & pater omnium, qui est super omnia, & in omnibus nobis.* Item Marcus in Euangelio: *Quidam de Scribis interrogauit Dominum Iesum, quod esset primum omnium mandatum.* Iesus autem respondit ei quia primum omnium mandatum est: *Audi Israel, Dominus Deus tuus, Deus vnus est.* Et, *Diliges Dominum Deum tuum ex toto corde tuo.* Et ait illi Scriba: *Benè, magister, in veritate dixisti, quia vnus est Deus, & non est alius præter eum.*

CAP. III.

DICUNT Hæretici, Legem Moyſi, quam veterem dicimus, ab omnipotenti Deo non eſſe datam, ſed à Principe malignorum Spirituum. Cui errori plurimæ auctoritates diuinarum Scripturarum contradicunt. Dicit enim Dominus in Euangelio ſecundum Mathæum: *Nolite putare quia veni Legem ſoluere, aut Prophetas. Non veni Legem ſoluere, ſed adimplere.* Ipſe, qui Filius Dei eſt, ſi lex à diabolo data fuiſſet, non dixiſſet ſe eam adimplere, immò deſtrueret. Item ſecundū Lucam: *Postquam conſummati ſunt dies purificationis Mariæ ſecundum Legem Moyſi, tulit Ieſum in Hieruſalem, ut ſiſteret eum Domino, ſicut ſcriptum eſt in Lege Domini, &c. & ut darent hoſtiā ſecundum quod ſcriptum eſt in Lege Domini.* Et iterum. *Et ubi fecerunt per omnia ſecundum Legem Domini, reuerſi ſunt in ciuitatem Galileam ſuam Nazareth.* Et hoc certum eſt, & ſine dubitatione: Chriſtus, qui verus Deus & verus homo eſt, non conſentiret diabolicæ Legis præcepta in ſe ſeruari vel impleri. Item in Euangelio ſecundum Ioannem Dominus dicit: *Nolite putare quia ego accuſaturus ſim vos apud Patrem. Eſt qui vos accuſet Moyſes, &c. Si ergo crederetis Moyſi, crederetis forſitan & mihi. Si autem illius litteris non creditis, quomodo verbis meis credetis?* Ac ſi dicat: Qui non credit verba veteris Legis, & in fide ſua non recipit verba Euangelij, ad ſuam ſalutem credere vel recipere non poteſt. Item in Euangelio ſecundum Lucam: *Dominus dixit cuidam legiſperito ſe interroganti, quid facere deberet ut vitam æternam poſſideret: quarens ab eo quid eſſet ſcriptum in Lege. Ille perito reſpondens dixit ei, Diliges Dominum Deum tuum ex toto corde tuo, &c. Dixitque illi Ieſus, r. reſ. hoc fac, & viues.* Si enim lex Moyſi à Deo data non fuiſſet, nunquam Chriſtus pro ea obſeruanda vitam promiſiſſet. Item in eodem Dominus teſtatur: *Habent Moyſen & Prophetas, audiant illos.* In hoc apparet quod obſeruatio Legis & Prophetarum non permittit hominem ire ad pœnarum loca inferni. Item in eodē: *Cum Chriſtus reſurrexiſſet à mortuis, duobus diſcipulis euntibus in caſtellum Emaus apparens legem teſtificans dixit: Nōne hæc oportuit pati Chriſtum, & ita intrare in gloriam ſuam? Et incipiens à Moyſe & omnibus Prophetis, interpretabatur illis in omnibus Scripturis*

qua de ipso erant. Si enim data esset lex à Diabolo Moyfi, nūquam Christus suis discipulis eam doceret & interpretaretur. Item in eodē Veritas dixit: Quoniam necesse est impleri omnia quæ scripta sunt in lege Moyfi, & Prophetis, & Psalmis de me. Item in Evangelio secundum Matheum, Dominus Phariseis quærentibus quare discipuli eius traditiones seniorum transgrediuntur, dicit: Et quare vos transgredimini mandatum Dei propter traditionem vestram? Nam Deus dixit: Honora patrem tuum & matrem tuam. Et quicumque maledixerit patri vel matri, morte moriatur. Et certum est hoc testimonium de Legē Moyfi, & Christus dixit hoc testimonium à Deo esse dictum & datum. Ergo Lex à Deo data est. Item in actibus Apostolorum Paulus ait: Annuncio vobis Deum, qui fecit cælum, mundū, & omnia quæ in eo sunt. Hic cæli & terræ cum sit Dominus. Item Paulus in eodem, excusans se aduersus Iudæos de his, de quibus accusabatur ante Felicem Præsidem Cæsareæ, dicit: Confiteor tibi hoc, quòd secundum sectam, quam Iudæi dicunt heresim, sic deseruio modo Patri, credens omnibus quæ in Lege & Prophetis scripta sunt. Item Paulus in Epistola ad Romanos, Capitulo VIII. An ignorans dicis, lex peccatum est? Absit, lex quidem sancta & bona, & mandatum sanctum, & iustum, & bonum.

CAP. IIII.

ETIAM sunt quidam Hæretici, qui Moysen magum fuisse asserunt, & omnipotentem Deum non ei fuisse locutum, nec ei dedisse Legem. Contra quem errorem Paulus in Epistola ad Hebræos scripsit dicens: Multifariè, multisque modis olim Deus locutus Patribus in Prophetis: nouissimè diebus istis locutus est nobis in Filio. Sed Moyses est vnus ex Prophetis, quibus Deus locutus est. Dicitur & fidelis in Domino, cui Deus locutus est. Item in eodem: Omnis namque domus fabricatur ab aliquo. Qui autem omnia creauit Deus est. Et Moyses quidem fidelis erat in tota domo eius tanquam famulus in testimonium eorum verborum quæ dicenda erant. Christus verò tanquam filius in domo sua. Quæ domus sumus nos si fiduciam & gloriam spei vsque ad finem firmam retineamus. Apostolus vero non eum magum, sed fidelem in domo Dei esse famulum testatur. Item Moyses in multis scriptis

noui & veteris Testamenti, ac Prophetarum, amicus & fidelis Dei dicitur. Sicut beatus Paulus in Epistola ad Hebræos de eo commemoravit, dicens: *Fide Moyses grandis factus negavit se esse filium filie Pharonis; magis eligens affligi cum populo Dei, quam temporalis peccati habere iocunditatem: maiores diuitias aestimans thesauro Ægyptiorum Imperium Christi. Aspiciebat eum in Dei remunerationem.* In hoc apparet certissime quoniam beatus Paulus de Moyse, & de Lege Moyse, & de Deo Hebræorum non diffidebat. Sed Moysen sanctum & bonum, & legem sanctam & bonam, & Deum Hebræorum omnipotentem Deum verbis assererat, & corde credebatur.

C A P. V.

HÆRETICI secundum Tacianum hæreticum, qui matrimoniū damnabat, omne matrimoniū maris & feminae adinuicē commiscentes, nullo modo posse saluari dicunt & credunt. Sed huic errori multa testimonia diuinarū scripturarum noui & veteris Testamenti sunt contraria. Habetur in Euangelio secundum Mathæum, quod Dominus Phariseis se interrogantibus dixit: *Si licet homini dimittere uxorem suam quacumque ex causa?* Qui respondens ait illis: *Non legistis, quia qui fecit ab initio, masculum & feminam fecit eos, & dixit: Propter hoc dimittet homo patrem & matrem, & adheret uxori suae, & erunt duo in carne una. Itaque iam nō sunt duo, sed una caro. Quod ergo Deus coniunxit, homo non separet, & feminam similiter.* Sed omne quod impedit hominem à vita æterna malum est, sed si malum esset matrimonium, nunquam Christus prohiberet separari, nec etiam consentiret, qui nullum malum consentit. Item in Marco de eodem: *Ab initio autem creatura masculum & feminam fecit eos Deus, &c.* Item in Lucam: *Fuit in diebus Herodis Regis Iudæe Sacerdos quidam nomine Zacharias de vice Abia, &c.* Erant autem ambo iusti ante Deum, incedentes in omnibus mandatis, & iustificationibus Domini sine querela. Sequitur: *Itaque cum iusti erant, saluabantur, & non erat filius illis, eò quod esset Helizabeth sterilis, & ambo processissent in diebus suis.* Et est notandum quod non stetit per virum quod non haberet filium; sed per mulierem, quia sterilis erat. Et Angelus Domini apparens Zachariæ in tēplo, dixit ei: *Ne timeas Zacharia,*
uxor

uxor enim tua pariet tibi filium, & vocabis nomen eius Ioannem, &c. Erit enim magnus coram Domino, &c. Item, Vnde hoc sciam? Ego enim sum senex, & uxor mea processit in diebus suis. Et nota quia hoc dixit, non credens verbis Angeli propter uxoris senectutem, quia ipsa præcesserat conceptiuam ætatem. Item, Innuebant patri eius quo vocabulo vocaret eum. Euangelista non vocaret eum patrem nisi filium haberet. Nemo enim potest esse pater naturalis, nisi filium naturalem habeat. Item, Zacharias pater eius repletus est Spiritu sancto. Ecce trina paternitatis affirmatio, & Euangelium non aufert eis, quin sint iusti ambo ante Deum pro generatione filij, si incedant in omnibus mandatis Domini; nec in veteri Testamento, & in nouo. Itē in Epistola ad Corinthios prima. Apostolus dans consilium fidelibus Christianis dixit. Propter fornicationem unusquisque suam uxorem habeat, & unaqueque virum suum. Vir uxori sue debitum reddat, similiter & uxor viro. Mulier sui corporis potestatem non habet, sed vir. Similiter autem & vir sui corporis potestatem non habet, sed mulier. Nolite fraudare inuicem, nisi forte ex consensu ad tempus, ut vacetis orationi: id est, Nolite continere, altero nolente. Item in eodem, Dico autem non nuptis & viduis, Sic permaneant sicut ego. Quod si non continent, nubant. Melius est nubere, quam vri. His autem, qui matrimonio iuncti sunt, precipio non ego, sed Dominus, uxorem à viro non discedere. Quod si discesserit, manere innuptam, aut viro suo reconciliari. Item sequitur. Si quis ergo uxorem habet infidelem, & hæc consentit habitare cum illo, non dimittat illam, &c. Sanctificatus est enim vir infidelis per mulierem fidelem, & econuerso, &c. Alioquin filij vestri immundi essent. Nunc autem mundi sunt. Non credidit Apostolus viros & uxores si sint fideles pro redditione maritalis debiti amittere suam sanctitatem, si cetera eorum opera sint bona. Item Apostolus in eodem: Si acceperis uxorem, non peccasti: & si nupserit virgo, non peccauit. Item in eodem Apostolus ait: Qui matrimonio coniungit virginem suam, benè facit: & qui non coniungit, melius facit. Hæc præcepta supradicta Apostolus suis discipulis non daret, & hæc verba non scriberet eis, si propter hoc coniugale factum crederet eos esse damnandos. Item Apostolus in Epistola prima ad Timotheum: Spiritus manifestè dicit, quia in nouissimis temporibus discedent quidam à fide; attendentes spiritibus erroris, & doctrinis demoniorum, in hypocrisis loquentium mendacium, prohibentium nubere. Et nota quòd Spi-

ritus sanctus aperte manifestauit quosdam à fide discedere, & eos adhærere doctrinis dæmoniorum, & mendacium in hypocrisi loqui, & illi tales nubere prohibent. Item in eodem: *Volo iuniores nubere, filios procreare, matres familias esse, nullam occasionem dare aduersarij maledicti gratia.* Et nota quòd Apostolus non credidit pro hoc facto esse aliquam damnationis occasionem in coniugatis. Item habemus in Epistola prima beati Petri. Beatus verò Petrus Apostolus, qui Princeps omnium Apostolorum à Deo constitutus fuit, & etiam totius Ecclesiæ caput, vt in Euangelio Christus ait, *Tu vocaberis Cephas.* Et in eodem. *Tu es Petrus, & super hanc petram edificabo Ecclesiam meam.* Postquam viris fidelibus Christianis doctrinam suam scripsisset, scripsit mulieribus, qualiter proprijs viris suis subiectæ essent, humilitatem seruantes, & modestiã, dicens: *Similiter & mulieres subditæ sint viris suis, vt & si qui non credunt verbo, per mulieris conuersationem sine verbo lucrifiant.* Sic aliquando & sanctæ mulieres sperantes in Deo, ornabant se suis viris; sicut Sara obediebat Abraham, Dominum eum vocans. Cuius estis filii benefacientes, &c. Hic innuit beatus Petrus viros ab vxoribus & vxores à viris non discedere: quia Abraham à Sara vxore sua non discessit nisi per mortem, sed nutu cognouit eam, & filium genuit sicut Elcana Susannam, & Ioachin Annam. Itē beatus Paulus in Epistola ad Corinthios, *Volo vos scire quòd omnis viri caput est Christus, caput autem mulieris est vir, caput verò Christi est Deus. Non vir ex muliere est, sed mulier ex viro. Etenim non est creatus vir propter mulierem, sed mulier propter virum. Verumtamen neque vir sine muliere, neque mulier sine viro in Domino.* Item habetur secundum Ioannem, quòd Iesus Saluator noster, & mater eius, & discipuli eius vocati venerunt ad nuptias; & in eisdem nuptijs initium signorum suorum coram discipulis suis fecit, scilicet de aqua vinum. Propter hoc certissimum est nuptias esse bonas, quia non est credendum, nisi bonæ essent, Christum venisse, nec tantum miraculum fecisse. Item Paulus in Epistola ad Corinthios: *Mulier alligata est legi viri, quanto tempore eius vir viuit. Quòd si dormieris vir vir eius, liberata est à lege viri, & cui viro vult nubat; tantum in Domino.* Item Paulus ad Thimotheum: *Saluabitur mulier per generationem filiorum, si permanserit in fide, & dilectione, & sanctificatione cum sobrietate.*

CAP. VI.

ITEM Ioannem Baptistam non à bono Angelo, sed à dæmoniacò nunciatum fuisse dicunt, nec bonum eum esse credunt. Sed contra hunc errorem multa in Euangelij testimonià inueniuntur, vt in Euangelio beati Ioannis, ipse Ioannes scripsit dicens: *Fuit homo missus à Deo, cui nomen erat Ioannes. Hic venit in testimonium, &c.* Item idem in eodem testatus est de Christo, *Ecce Agnus Dei, ecce qui tollit peccata mundi.* Item testimonium perhibuit Ioannes de ipso: *Qui misit me baptizare in aqua, ille mihi dixit: Super quem videris Spiritum Dei descendente, & manentem super eum, hic est qui baptizat in Spiritu sancto, &c.* Item in eodem, *Qui habet sponsam, sponsus est. Amicus autem sponsi qui stat & audit, &c.* Hoc ergo gaudium meum impletum est. Item in Euangelio secundum Mathæum Christus ipsum Ioannem commendat, dicens: *Amen dico vobis, inter natos mulierum non surrexit maior Ioanne Baptista.* Item, *Quid existis in desertum videre? Prophetam. Etiam dico vobis plus quam Prophetam. Hic enim est de quo scriptum est; Ecce mitto Angelum ante faciem tuam, qui preparabit viam tuam ante te.* Qui de Ioanne sentit malè vel peruersè, contra Christum, & contra Apostolos, & contra Catholicam fidem est. Habemus in Euangelio quòd ipse Ioannes Baptista in flumine Iordanis Christum baptizauit, & Spiritum sanctum in specie columbæ super eum descendente vidit, & vocem Patris dicentis audiuit: *Hic est filius meus dilectus, in quo mihi benè complacui.* Si ipse esset à maligno spiritu nunciatus, vt hæretici dicunt, nunquam Christus ab eo se permetteret baptizari, nec tantum sacramentum ab eo vellet initiari. Item in Matthæo ipse Christus approbat eum, dicens Pharisæis: *Amen, amen dico vobis, quia publicani & meretrices precedent vos in regnum Dei. Venit enim Ioannes Baptista ad vos in via iustitiæ, & non credidistis ei. Publicani, & peccatores, & meretrices crediderunt ei. Vos autem eum vidētes, nec penitentiam habuistis postea vt crederetis ei.* Ecce Christus de Ioanne Baptista asseuerat, dicens, quòd in viam iustitiæ, in qua itur ad regnum Dei, ipse Ioannes ambulabat in ea, & eam prædicabat. Quod non ageret, si malignus, vel à maligno spiritu fuisset nunciatus. Item in Euangelio secundum Ioannem, de

commendatione Ioannis Baptistæ: *Vos misistis ad Ioannem, ipse testimonium veritati perhibet. Ego autem non ab homine testimoniū accipio: sed hoc dico, ut vos salui sitis. Ille erat lucerna ardens & lucens. Voluistis autem vos exultare ad horam in luce eius.*

CAP. VII.

DE Incarnatione Christi sunt quidam hæretici inter istos Condonianā hæresim sequentes, qui dicunt Christū nō ex femina natum, nec habuisse veram carnem, nec verè mortuum, nec quicquam passum; sed simulasse passionem: nec credunt eum manducasse, nec bibisse, & quasi fantasticum corpus habuisse, nec eum resurrexisse. Contra hunc errorem hæreticorum, qui non credunt Christum de vera virgine femina fuisse natum, destruendum; testimonium habemus in Mathæo. *Cū natus esset Iesus in Bethleem Iudæ, &c. Videntes stellam Magi, gausi sunt gaudio magno valde. Et intrantes domum inuenerunt Puerum cum Maria matre eius, &c. Item in eodem. Apparuit Angelus Domini in somnis Ioseph, dicens; Surge, & accipe Puerum cum Maria matre eius. Item in Evangelio secundum Lucam. Ascendit autem Ioseph à Galilea in Bethleem ciuitate, ut profiteretur ibi cum Maria desponsata sibi uxore pregnante. Et impleti sunt dies ut pareret, & peperit filium suum primogenitum. Itē in eodē. Angelus Domini eius natiuitatem Pastoribus nunciavit, dicens: Ecce enim euangelizo vobis gaudium magnum, quia natus est vobis hodie Saluator, qui est Christus in carne Dauid: & hoc vobis signum. Inuenietis puerum Iesum positum in praesepio. Item in eodem: Postquā consummati sunt dies octo, ut puer circumcideretur, vocatum est nomen eius Iesus. Quod vocatum est ab Angelo priusquā in utero conciperetur. Item in eodem. Cū factus esset Iesus annorum duodecim, ascendentibus illis Hierosolymam secundum consuetudinem diei festi, consummatisque diebus cū redirent, remansit puer Iesus in Hierusalem, & non cognouerunt parentes eius, &c. Et Iesus proficiebat etate, & sapientia, & gratia, & Spiritu sancto apud Deum & homines. Item in Epistola ad Galatas, Paulo attestante Christum fuisse natum ex muliere, cū dixit: *At ubi venit plenitudo temporis m. d. f. f. natum ex muliere factum sub lege, ut eos qui sub lege erant redimeret.* Hæretice, ecce plura testimonia de Christi conceptione, nati-*

uitate, circumcisione, pueritia, ætate, adolescentia, & etiam natum esse Christū ex muliere, & esse factum sub lege. Item Ioannes de natiuitate Christi. *Ego in hoc natus sum, & ad hoc veni in mundum, ut testimonium perhibeam veritati.*

DE Incarnatione Christi testimonia aduersus hæreticos, qui non credunt Christum habuisse veram carnem, sed aerium corpus eum dicunt assumpsisse. Sed contra hunc errorem Ioannes Euangelium suum scripsit, dicens: *In principio erat Verbum, & Verbum erat apud Deum, & Deus erat Verbum. Et Verbum caro factum est, & habitauit in nobis.* Itē in eodem. *Iudei rogauerunt Pilatum, quoniam parasceue erat, ut non remanerent corpora in cruce Sabbato, ut eorum crura frangerentur. Et milites quidam primi fregerunt crura latroni, & alteri qui crucifixus est cum eo. Ad Iesum autem cum venissent, ut viderunt eum iam mortuum, non fregerunt eius crura: sed vnus militum lancea latus eius aperuit, & continuo exiuit sanguis & aqua. Et qui vidit testimonium perhibuit, & verum est testimonium eius.* Item Ioannes in Epistola prima dicit: *Omnis spiritus, qui confitetur Iesum Christum in carne venisse, ex Deo est: & omnis spiritus, qui soluit Christum, ex Deo non est: id est, qui negat eum carnalem esse hominem, & hic est Antichristus.* Item in eodem: *Et scimus quoniam filius Dei venit, & induit carnem pro nobis, & mortuus est, & resurrexit à mortuis pro nobis.* Item idem Ioannes in secunda Epistola. *Quoniam multi seductores exierunt in mundum, qui non consentiunt Iesum Christum in carne venisse. Hic est seductor & Antichristus. Omnis qui præcedit, & non manet in doctrina Christi, Deum non habet. Qui permanet in doctrina, id est in doctrina Apostolica, hic Filium & Patrem habet. Si quis venit ad vos, & hanc doctrinam non affert, sed Christum in carne venisse negat, nolite recipere eum in domum, nec aue ei dicatis. Qui enim dicit illi aue, communicat operibus illius malignis.* Item Paulus in Epistola ad Romanos, *Quod ante promiserat per Prophetas suos in Spiritu sancto, dicens: Qui factus est ex semine David secundum carnem. Qui prædestinatus est filius Dei in verbo.* Item Petrus in Epistola prima: *Christo igitur passo in carne, & vos eadem cogitatione armamini. Quia qui passus est in carne desit à peccatis.*

ITEM contra eosdem hæreticos, qui non credunt Christum passum, nec fuisse mortuum. Contra hunc errorem Mathæus in Euangelio scripsit, dicēs: *Iesum flagellatū Pilatus tradi-*

dit Iudæis ve crucifigeretur. Tunc milites Præsidis suscipiētes Iesum in Pratorio, exuentes chlamydem coccineā circumdederunt ei, & plēntes coronam de spinis posuerunt super caput eius, & arundinem in dextra eius, & genu flexo illudebant ei, dicentes: Ave Rex Iudæorum. Et expuentes in eum acceperunt arundinem, & percutiebant caput eius, &c. Item in eodem, Tunc crucifixerunt, &c. Item in eodem: Tunc unus militum accepta lancea punxit latus eius, & exiuit sanguis & aqua. Iesus autem iterum clamans voce magna emisit spiritum. Hæc de Christi passione & eius morte. Cæteri Euangelistæ in Euangelijs suis hac eadem testificantur. Item in Actibus Apostolorū, Petrus stans cum omnibus Apostolis inter Iudæos, dixit illis: Viri Israelitæ audite verba hæc. Iesum Nazarenum, virum approbatum à Deo, etiam verbis, virtutibus, & prodigijs, & signis; quæ fecit per illum Deus in medio vestri, sicut vos scitis. Hunc definito consilio, & præscientia Dei traditum per manus iniquorum affligentes interemistis, quem Deus suscitavit solutis doloribus inferni. Et hoc testimonium de passione & morte Christi, & etiam de resurrectione, quod omnes Apostoli in eodem loco manentes testificati sunt. Item Petrus de passione Christi in Epistola prima. Christus passus est pro nobis, vobis relinquens exemplum, ut sequamini vestigia eius, &c. Cū pateretur non comminabatur, qui peccata nostra ipse tulit in corpore suo super lignum, cuius morte sanati sumus. Item Paulus ad Romanos de morte eius dixit: Quoniam cū adhuc peccatores essemus, Christus pro nobis mortuus est. Item in eodem: Christus Iesus qui pro nobis mortuus est, imò qui & resurrexit. Et de his plura testimonia habentur.

DE resurrectione Christi contra hæreticos qui non credunt Christum resurrexisse à mortuis. Mathæus in Euāgelio de resurrectione Christi dicit: *Angelus dixit mulieribus, Nolite timere, scio quòd Iesum, qui crucifixus est, queritis. Non est hic. Surrexit enim sicut dixit vobis.* Hoc idem testantur Marcus & Lucas in Euangelijs suis. Item Ioannes in Euangelio suo dicit: *Solvite templum hoc, & in tribus diebus excitabo illud.* Ille autem dicebat de templo corporis sui. Cū ergo resurrexisset à mortuis, recordati sunt discipuli eius, quia hoc dicebat, &c. Item in Euangelio secundum Lucam, humanam carnem Christum habere testimonium affirmans: *Videte manus meas & pedes meos, quia ipse ego sum. Palpate & videte, quia spiritus carnem & ossa non*

habet, sicut me videtis habere. Et cum hoc dixisset, ostendit eis manus, & pedes, & latus. Item Ioannes in Euangelio de carnis resurrectione: Venit Iesus ianuis clausis, & stetit in medio discipulorum, & dixit eis: Pax vobis. Deinde dixit Thoma: Infer digitum tuum huc, & vide manus meas, & affer manum tuam, & mitte in latus meum, & noli esse incredulus, sed fidelis.

SUNT quidam hæreticorum qui non credunt quòd Christus manducauit & bibit, dum erat cum suis discipulis ante passionem. Sed contra hunc errorem destruendum, habemus in Euangelio secundum Mathæum testimonium, quòd ipse Christus, qui est Veritas, protulit dicens: *Venit enim Ioannes Baptista neque manducans panem, neque bibens vinum, & dicunt: demonium habet. Venit enim Filius hominis manducans, & dicunt: Ecce homo vorax est, & potator vini, publicanorum & peccatorum amicus.* Item Lucas in Euangelio testimonium perhibet quòd ipse manducauit, dicens: *Rogabat autem quidam de Phariseis ut manducaret cum illo.* Certissimum est eum manducasse, aliter non inuitaretur ab aliquo ad manducandum. Item in eodem Lucas. *Rogabat quidam Phariseus illum ut pranderet apud se. Et ingressus recubuit.* Idem in eodem testatur. *Et factum est, cum intraret Iesus in domum cuiusdam Principis Phariseorum Sabbato, manducare panem.* Item Ioannes in Euangelio: *Rabi, manduca.* Hoc dixerunt ei discipuli sui, cum venissent à Samaria, cibos afferentes quos emerant, & viderunt eum cum muliere Samaritana loquentem. Si aliquis obijciat eum illis dixisse: *Habeo alium cibum manducare quem vos nescitis.* Verum est, quia ipse Christus duobus cibis utebatur, scilicet carnali & spirituali. Hoc de spirituali dixit. Nec tamen minus est credendum, quoniam cæteri Evangelistæ testificantur eum vsum fuisse cibo temporali. Item in Euangelio secundum Mathæum quando interrogauerunt eum discipuli dicentes: *Vbi vis paremus tibi comedere Pascha?* dixerunt tibi, non sibi parere Pascha, quod certificat eum manducasse cibum temporalem dum erat cum illis. Item in eodem testimonio quod ipse Christus dixit: *Qui intingit mecum manum in paropside, hic me tradet.* Non est credendum quòd ipse Christus manum in paropside intringeret, nisi manducaret. Hoc idem Marcus & Lucas testificantur in Euangelijs suis. Hæc testimonia sunt de Christi comestione antequam pateretur. Post passionem verò suam te sta-

tur Lucas in Euangelio cum coram Discipulis suis manducasse, dicens: *Habetis hic aliquid quod manducetur? At illi obtulerunt ei partem piscis assi, & fauum mellis. Et cum manducasset coram eis, sumens reliquias dedit eis.* Isdem Lucas in Actibus Apostolorum testatur, dicens: *Et conuescens precepit eis ab Hierosolimis ne discederent.* Et ita certissimum & firmum est, antequam pateretur omnibus actibus humanis uti; excepto peccato, & Paulus in Epistola ad Philippenses testatur, dicēs: *Hoc enim sentite in vobis quod & in Christo Iesu. Qui cum in forma Dei esset, non rapinam arbitratus est se esse equalem Deo; sed seipsum exinaniuit, formam serui accipiens, & inuentus est ut homo. Humiliauit semetipsum usque ad mortem.* Et hæc de Christi humanitate sufficiant.

CAP. VIII.

DE Ecclesiarum institutionibus legitur, quòd Duminus Moyfi tabernaculum non manu factum in monte ostendit, dicens: *Vade, & fac tabernaculum non manufactum simile huic, in quo habitem inter illos quando loquar ad te, in quo offerantur à Sacerdotibus dona, & libamina, & sacrificia, & hostie, & oblationes allata cum populo Israelitico.* Tunc Moyses secundum præceptum Domini fideliter peregit, & post Moysen, quando populus Israel intrauit terram promissionis detulit illud secū in Sylo, in quo erat Arca Testamenti, infra quam erat urna aurea continens manna, & tabulæ Testamenti, & virga Aaron quæ fronduerat. Deinde post multum tempus, Salomon filius David iussu Domini ædificauit templum manu factum in Hierusalem, in quo omnis populus Israeliticus adorandū & sacrificandum conueniebat. Sicut & patres corū in priori tabernaculo venire consueuerant; ita obseruantes legalia præcepta dominica usque ad aduentum Christi. Veniens autē Christus, nolens destruere legem, sed adimplere; à suis parentibus voluit in eo præsentari: & secundum legem datam à Deo sicut mos erat offerri. Inuenitur post hæc eum venisse in templum in adolescentia cum parentibus suis, cum xii. esset annorum. Post triginta verò annos suæ ætatis venit in Hierusalum, sicut inuenitur in Euangelio secūdum Mathæū, & intrauit templum, & omnes euentes & vendentes eiecit de templo, dicens: *Scriptum est, domus mea domus orationis vocabitur.*

sur. Nam & ipse Christus testificatus est templum domū Dei esse orationis. Itē Marcus idē testimoniū iisdē verbis protulit in Euāgelio suo. *Et etiam prohibebat ut quisquā non ferret vas per templum.* Item Lucas his verbis testatur in Euangelio suo. Item Ioannes in Euangelio suo scripsit dicens: *Et Iesus inuenit in templo vendentes boues & oves, & columbas, & nummularios sedentes. Et cum fecisset quasi flagellum de funiculis, omnes eiecit de templo. Oves quoque & boues, & nummulariorū effudit es, & mensas subuertit; & his qui columbas vendebant dixit: Auferte ista hinc, & nolite facere domum Patris mei, domum negotiationis. Recordati sunt discipuli eius, quia scriptum est: Zelus domus tuæ comedit me.* Inuenitur in Euangelij quod Christus multotiens venit in templum, ibique docebat populum, & in eo multa signa & miracula in curationibus infirmorum faciebat, ut Mathæus Euangelista narrat. *Et accesserunt ad Iesum in templo cæci, & claudi, & sanauit eos.* Habemus in Euangelij, dum Iesus prædicando perambulasset ciuitates Israeliticas, intrabat potius Synagogas Iudæorum, ibique docēs populum de regno Dei, & in eis multa signa & mirabilia peragebat: ut dicitur in Mathæo, *Et circuibat Iesus ciuitates omnes & castella, docēs in Synagogis eorum & predicans Euangelium, & curans omnem languorē, & omnē infirmitatē.* Item in Euangelio Mathæi ipsemet testatur dicens vobis. *Quotidie apud vos sedebam in templo, dicens;* iisdem verbis testatur Lucas in Euangelio. Item Ioannes testatur in Euangelio, *Ego semper docui in Synagoga, & in templo, quò omnes Iudæi conueniunt, & in occulto locutus sum nihil.* Si obijcitis nobis, quod sæpius prædicabat in alijs locis quàm in templo, vel in Synagogis; verum est. Sed propter multitudinem venientium, ne essent impedimentum ministris templi & Synagogarum: ne minus redderent vota sua, & ea quæ sibi iniuncta erant, in montibus & in alijs locis discedebat.

Post ascensionem verò eius discipuli Christum magistrū suum & Saluatorem imitari cupientes, quamdiu in Hierusalem morarentur, cotidie in templum orare veniebant, ut in Actibus Apostolorum inuenitur dicens: *Cotidie erant Apostoli perdurantes, & orantes unanimiter in templo.* Et iterum: *Petrus & Ioannes ascendebant in templum ut orarent ad horam orationis nonam.* Item in eodem, Cum Annas princeps Sacerdotum, & omnes qui cum illo erant, injecerunt manus in Apostolos, & posuerunt illos in custodia publica. Angelus autem Do-

mini per noctem aperiens ianuas carceris, & educens eos dixit: *Ite & stantes loquimini in templo plebi omnia verba vite huius.* Vnde habuit initiū domus orationis manufacta, quā nos vocamus Ecclesiam.

C A P. IX.

CV M Apostoli, & eorum discipuli ab Hierusalem essent expulsi, & per diuersas mundi partes volūate Dei essent dispersi, & in ciuitatibus vniuersis Iudæorum vidissent ædificia Synagogarum, transeuntes ad gentes diuersorum templa idolorum intra ciuitates eorum inuenientes, in quibus sua vota & sua sacrificia dæmoniorum idolis offerentes, & ad hæc persoluenda assiduè erant cōuenientes; habuerunt Apostoli consilium à Spiritu sancto, vt à tanto errore & malicia facilius possent euellere, & à diabolicis vinctulis eos eruere; vt in nomine Patris, & Filij, & Spiritus sancti domus manufactas ædificari iuberent, & ad instar templi eas ædificare ostenderent: in quibus fidelis populus ad baptizandum, & ad orandum & sacrificandum, & ad verbum Dei audiendum, & ad omnia Christianitatis sacramenta percipiēda fideliter ac deuotè conuenirent; & in eas domos, quas propter congregationem populi in eis Ecclesias vocamus, Apostoli ministros, videlicet Episcopos, Presbyteros, Diaconos, ad Christi mysterium perficiendum constituerunt. Sicut in Actibus Apostolorum legitur: *Et cū constituisent per singulas Ecclesias Presbyteros, & orassent cum ieiunationibus, commendauerunt eos Domino in quem crediderunt.* Et hoc habemus, quòd ab Apostolis Presbyteri primitus in Ecclesia Dei fuerunt ordinati Diacones. Habemus in Epistola ad Corinthios, quòd Apostolus eos redarguens, domum in qua erant fideles congregati vocauit Ecclesiam dicens: *Nunquid non habetis domos ad manducandum & bibendum, aut Ecclesiam Dei contemnitis, & confunditis eos qui non habent? Quid dicam vobis? Lando vos? In hoc non laudo.* Item Paulus in Epistola ad Corinthios: *Mulieres in Ecclesiis taceant. Nō enim permittitur eis loqui, sed subditas esse sicut lex dicit. Si quid autem volunt dicere, domi viros suos interrogent. Turpe est enim mulieri loqui in Ecclesia.* In hoc & multis alijs dat Apostolus intelligendum, quod omnem domum vbi fideles congregati sunt ad participandum Christi sacramenta constituta, Eccle-

sia Dei nominetur. Item Ioannes in Epistola comminando Diotrepi scripsit, dicens : *Propter hoc si venero, commoneam eius opera quæ facit verbis malignis garriens in nos. Et quasi non ei ista sufficiant, neque ipse suscepit fratres, & eos qui suscipiunt prohibet, & de Ecclesia eijcit, &c.* Item Paulus ad Timotheum : *Si autem sardauero, ut scias quomodo oporteat te conuersari in domo Domini, quæ est Ecclesia Dei viui.* In his testimonijs Apostolorum supra scriptis, & in alijs multis in hoc Tractatu non scriptis planè ostenditur, quòd domus Dei domus orationis Ecclesia manufacta dicitur & intelligitur, in qua Christi sacramenta à ministris ordinatis ad salutē fideiū Christianorū perficiuntur.

CAP. X.

ET quoniam hæretici Ecclesiam manu factam, & altaria quæ in eis sunt, & sacramenta quæ in his à ministris Dei fiunt, & omnia ornamenta Ecclesiastica ad nihilum deputant, & ad salutem animarum nihil proficere dicunt, & despiciunt : Ad hunc tantum errorem & tam nepharium destruendum testimonia breuiter proferemus, & primùm de altari, sine quo Ecclesia manu facta esse non debet, in quibus munera, oblationes & hostiæ pro peccatis offeruntur. Habemus in Euangelio secundum Mathæum quod ipsa Veritas offerentem docet, & qualiter offerre debeat instruit dicens : *Si offers munus tuum ad altare, & ibi recordatus fueris, quia frater tuus habet aliquid aduersum te, relinque ibi munus tuum ante altare, & vade prius reconciliari fratri tuo, & tunc veniens offeres munus tuum.* Hic innuit ipse Christus vt fideles habeant in Ecclesijs altaria, in quibus munera offerant. Iterum in Euangelio secundum Lucam, quando Christus voluit offerri à parentibus suis in templo secundum legem Domini, & offerri pro se hostias ad altare quod erat in templo, scilicet par turturum aut duos pullos columbarum, hîc datur intelligi, quia sicut Christus offerri voluit, & pro se hostiam dari, vt omnes fideles qui sunt in partibus mundi vniuersis altaria habeant, in quibus pro suis peccatis Deo munera & oblationes offerantur. Item Paulus de eodem in Epistola ad Corinthios discipulos suos instruens, vt habeant altaria, & his Deo seruiant, & de altariorum donis Deo seruientes fiant participes ita scripsit : *Qui altari deserviunt, cum altari participantur.* Itē Paulus

vbi scriptum est in Actibus Apostolorum, *Obtulit in templo pro se & pro ceteris qui cum eo erant purificati hostias ad altare nolentes despicere vel ad nihilum deputare altaria, sed exemplificauit.* Item in Apocalypsi Ioannes testificatur se vidisse altare in cœlo in quo incensa multa quæ sunt orationes Sanctorum ab Angelo offerebantur. Vnde beatus Ioannes quia in cœlo coram Deo altare aureum vidit, in terra in Ecclesijs manufactis altare manufactum, mundum & purificatum ædificari voluit. Contra istos supradictos errores quasi maximam nubem testium veteris testamenti, scilicet Legis, Prophetarum, Psalmorum possumus inducere. Sed quoniam Hæretici respondere, nec rationem reddere ad objecta sibi testimonia veteris Testamenti, Legis, & Prophetarum nolunt, videlicet quia ignorant, sed statim conuicti essent, propterea in his laborare nolumus, nisi tantum in his testimonijs, quæ de libris noui Testamenti decerpimus, quibus respondere & nullam rationem reddere possunt, nec iustam occasionem habent.

ITEM hæretici improbant Ecclesiæ cantum, & laudes quas Clerici de nouo & veteri Testamento reddunt creatori suo. Contra hunc errorem proferimus testimonium Pauli dicentis in Epistola ad Ephesios: *Et impleamini Spiritu sancto, loquentes vobismetipsis in Psalmis & Hymnis, & Canticis spiritualibus cantantes in cordibus vestris Domino, gratias agentes semper pro omnibus in nomine Domini nostri Iesu Christi Deo & Patri.* Item de eodem Paulus ad Colossenses dicens: *Verbum Christi habitet in vobis abundanter in omni sapientia, & commonentes vosmetipsos Psalmis, Hymnis, Canticis spiritualibus, & gratia cantantes in cordibus vestris Domino.* Item Ioannes in Apocalypsi vidit **xxiiii.** seniores, & ceciderunt coram Agno, habentes singuli cytharas & phialas aureas plenas odorum, quæ sunt orationes Sanctorum, & cantabant quasi canticum nouum dicentes: *Dignus es Domine soluere librum, & aperire signacula eius, quoniam occisus es & redemisti nos Deo in sanguine.* Item in eodem Ioannes dicens: *Et vocem quam audiui sicut cytharizantium in cytharis suis; & cantabant quasi canticum nouum ante sedem.* Et in alio loco, *Habentes cytharas Dei, & cantantes canticum Dei serui Moysi, &c.* Item Ioannes in eodem: *Audiui vocem magnam turbarum multarum in cœlo dicentium, Alleluia, laus & gloria, & virtus Deo nostro est, quia vera & iusta iudicia eius sunt.*

CAP. XI.

POSTQVAM de domo Domini quæ est Ecclesia, aliqua & nō omnia quæ nobis occurrunt perstrinximus testimonia, de Sacramento corporis & sanguinis Christi, quod omnibus Sacramentis est dignius, à quo & cuius cōsecratio in domo Domini quæ est Ecclesia Dei viui Paulo attestante celebratur, contra hæreticū prauitatem, diuinam auctoritatē in mediū proferamus. Christus videns imminere sibi mortē, volens cōmendare nobis Sacramentū corporis & Sanguinis, accipiens panem, & gratias agens benedixit & fregit, deditq; discipulis suis, & calicē similiter. Vnde Mathæus Euangelista: *Cænātibus autem eis accepit Iesus panē, & benedixit ac fregit, & dedit discipulis suis, & ait, Accipite & comedite, hoc est corpus meū. Et accipiens calicē gratias egit, & dedit illis dicēs: Bibite ex hoc omnes, hoc est enim sanguis meus noui Testamenti qui pro multis effundetur in remissionem peccatorū.* Item de eodem Marcus: *Et manducantibus illis, accepit Iesus panē, & benedicens fregit, & dedit eis & ait: Sumite, hoc est corpus meum. Et accepto calice gratias agens dedit eis, & biberunt ex illo omnes; & ait illis: Hic est sanguis meus noui Testamenti, qui pro multis effundetur.* Item Lucas: *Et accepto pane gratias agens fregit & dedit eis dicens: Hoc est corpus meum quod pro vobis datur, hoc facite in meam commemorationem. Similiter & calicem postquam cœnauit dicens: Hic est enim calix noui Testamenti in sanguine meo qui pro vobis effundetur.* Euangelistæ nāque asserunt quòd Dominus accepit panem & benedixit, & dedit discipulis suis dicens: *Hoc est corpus meum.* Nota singula: *Accepit panem, benedixit & fregit, & dedit.* Non habetur in Euangelio quòd Dominus acceperit corpus suū, & benedixerit, quòd fregerit, quòd dederit discipulis suis: sed testantur Euāgelistæ quòd acceperit panē, & benedicens fregerit, & dederit eis dicens: *Hoc est corpus meū: sed, hic est calix noui Testamēti, in sanguine meo, qui pro vobis effundetur.* Sed hæretici dicunt, quòd hoc demonstratiuū pronomen non refertur ad panem quem in manibus tenebat, & quem benedicebat, & quem frangebat, & suis discipulis distribuebat, sed refertur ad corpus suum quod hæc omnia perficiebat. Vnde eorum error tam nequissimus originem & initium habuit, ignorantes, pronomen nominis *hoc* non

potest relatiuè referri, nisi his de quibus sit facta mentio. Sed in traditione huius sacramenti de corpore suo, mentio nulla tunc facta fuerat. Ergo falsissimum est quod autumant. Sed sicut farina & aqua & sal cum his ita fuerint commixta & decocta, quòd scilicet non sunt farina, nec aqua, nec quæ ante fuerant, sed verè panis purus est & dicitur: ita panis què post cœnam Iesus Christus manibus suis accepit, postquam hunc benedixit & fregit, corpus Christi non panis intelligitur esse, & creditur quod Christus Saluator ac Redemptor in cœna suis Discipulis dedit dicens: *Accipite & comedite, hoc est corpus meum.* Eandem rationem & de calice, per quem gratias agēs, & dedit Discipulis suis dicimus, etiam dixit eis: *Bibite ex hoc omnes; hic est sanguis meus noui Testamenti, qui pro multis effundetur in redemptionem peccatorum.* Et addidit: *Quotiescunque feceritis hoc, facite in meam commemorationem.* Hæc verba quæ à Christo in cœna super istud Sacramentum prolata fuerunt, maximè quasi vltimum Testamentum notari debent. Sed cum dixit: *Quotiescunque feceritis hoc, facite in meam commemorationem;* in his verbis indicatur quòd Christus istud tantum & tam sanctissimum Sacramentum noluit vt ibi finem haberet. Sed Apostolis sicut suis cohæredibus & eorum successoribus hoc Sacramentum post suam passionem & resurrectionem, & ascensionem suam in sempiternum facere præcepit, in memoriam suæ passionis & in spe æternæ salutis. Cùm Dominus Iesus Christus discipulos suos congregasset, carnem suam in specie panis, & sanguinem suum in specie vini se daturum illis promisit, vt in Euangelio beati Ioannis continetur, & dicit: *Panis quem ego dabo vobis caro mea est pro mundi vita.* Iudæi autem hoc audientes inter se litigabant dicentes: *Quomodo potest nobis dare carnem suam ad manducandum?* Propter hanc litigationem, & quia intellexit eos spirituales intellectû non habere sub certa assertionem, dixit eis: *Amen amen dico vobis, nisi māducaueritis carnem filij hominis, & biberitis eius sanguinem, non habebitis vitam in vobis: & qui manducat meam carnem & bibit meum sanguinem, habebit vitam æternam, & ego resuscitabo eum in nouissimo die.* In his verbis notandum est, quòd nemo potest habere vitam æternam, nisi manducauerit carnem ipsius, & biberit eius sanguinem: secundum hoc quod ipse dixit. Sed ipse Christus noluit discipulos suos fallere, nec suum

promissum inaniri. Carnem suam verò & sanguinem suum in specie panis & vini, in vltima cœna vt manducarent sine oris abhorritione suis discipulis dedit. Sed quæcunque verba Christus dixit, certissima & verissima sunt, neque in aliquo fallunt. Multa enim dixit quæ vera sunt, quæ si alius dixisset, nec vera esse viderentur nec crederentur. Ille enim dixit: *Ego sum ostium, per me si quis introierit, saluabitur: Ego sum pastor bonus: Ego sum panis, &c. Ego sum vitis vera & vos palmites: Ego sum via, veritas, & vita.* Tanta enim est vis verbi Dei atque virtus, vt omnia quæcunque dixit quod nunquam fallit nec præterit sicut dixit Psalmista: *Dixit & facta sunt, mandauit & creata sunt.* Et hoc notandum est, quòd Euangelista non posuit præteritum, sed præsens, quamuis post passionem suam scriberet, intelligens & credens hoc quod Christus dixit se esse, & est, & semper erit, ita ea verba quæ Christus in cœna protulit coram suis discipulis, & eos docuit, in se retinent quam habuerunt in Apostolis in Sacramento panis & vini, scilicet corporis & Sanguinis Domini, & eandem vim & virtutem, & efficaciam in Dei ministris retinebunt vsque in finem seculi. Postquam Dominus noster Iesus Christus pro Iudæorum litigio, quod faciebant de carne sua audiuit & dixit eis, Nisi manducauerint carnem filij hominis & biberint eius sanguinem non habebunt vitam æternam, sed qui manducauerint & biberint eius sanguinem, habebunt vitam & æternam resurrectionem, promissio manducationis eius Sacramenti non videatur illi esse difficilis & inutilis, sed certa & vtilissima, & in præsentì tempore susceptibilis, in specie panis & vini, quam eis in cœna dedit, & corpus suum distribuendo asseruit, addit: *Caro enim mea verè est cibus, & sanguis meus verè est potus.* Sed sunt quidam hæretici qui credunt audiendo verbum Dei manducare carnem filij hominis, & eius sanguinem bibere, quasi Christus nesciret dicere qui omnia scit: *Verbum meum verè est cibus, & sanguis meus verè est potus*; aliud verbum pro alio ponens. Sed cum hoc dixit: *Caro mea verè est cibus, & sanguis meus verè est potus*, non dixit, *Caro mea verè est auditus & intellectus*, sed operante spiritali gratia, *Caro mea verè est cibus, & sanguis meus verè est potus.* Et hoc propriè Christus dixit. Et certissimum est de Sacramento panis & vini quod in cœna eius tribuit. Et quotidie à ministris Dei ordi-

natis hoc Sacramentum super altare in Ecclesia Dei consecratur cum ipsius commemoratione. Sed quia vim manducationis huius Sacramenti & vtilitatem bene percipientibus ostendere voluit, addidit. *Qui manducat meam carnem, & bibit meum sanguinem, in me manet, & ego in illo. Et qui manducat me, ipse vivet propter me;* & hæc virtus huius Sacramenti & vtilitas bene percipientis quod consequitur, fidelis, scilicet cum in Deo manere, & Deum in eo: & hic talis affert fructum multum, ut Ioannes testatur: *Quia sine me, ut dicit ipsa Veritas, nihil potestis facere.* Beatus verò Apostolus Paulus, huius tanti & tam certissimi Sacramenti vim & vtilitatem audiens, & cognoscens suos discipulos instruere verbis & actibus, volens nihil utile ad eorum salutem eis subtrahere, ut suis semper subsequentibus in memoria haberetur, in Epistola directâ ad Corinthios scripsit dicens: *Ego enim accepi a Domino quod & tradi vobis: Quoniam Dominus noster Iesus Christus, in qua nocte tradebatur, accepit panem, & gratias agens fregit, & dixit: Accipite & manducate, hoc est corpus meum, quod pro vobis tradetur, hoc facite in meam commemorationem.* Et hoc notandum est quod Christus iussit suos discipulos hoc Sacramentum in sui memoriam facere, & ut illi suis discipulis traderent, sicut ipsi ab eo accipiebant, ut memoria ipsius passionis per hoc Sacramentum in seculum seculi in fidelibus haberetur. *Item Similiter & calicem postquam carnauit dicens: Hic calix novi Testamenti est in meo sanguine, hoc facite quotiescunque biberitis in meam commemorationem. Quotiescunque enim manducabitis panem hunc & calicem bibetis, mortem Domini annunciabitis donec veniat. Itaque quicumque manducauerit panem, vel biberit calicem Domini indignè, reus erit corporis & sanguinis Domini.* Sed si, ut hæretici dicunt, panis & vinum consecratum: nullam haberent dignitatem, quare Apostolus poneret indignum accipientem panem consecratum corporis & sanguinis Domini esse reum? Quia si quis panem simplicem comedat, reus esse corporis & sanguinis Domini non dicitur nec creditur. Et ideo Apostolus aut quislibet hoc Sacramentum videlicet panis & vini percipere voluerit, probet seipsum, id est purget seipsum à peccatis suis, & sic de pane illo edat, & de calice bibat. Item ipse Apostolus reddit causam quare percipiens purgatus à peccatis esse debet cum dicit: *Qui enim manducat & bibit indignè, iudicium sibi*
manducat

manducat & bibit, non dijudicans corpus Domini. Item non est in merito consecrantis, sed in virtute & veritate Spiritus sancti spiritus approbans, confirmans hoc Sacramentum panis & vini esse corpus Domini, quod Corinthijs ostenderat verbo & facto, cùm in Epistola eis transmissa scripsit dicens: Calix benedictionis cui benedicimus, nonne communicatio sanguinis Christi est? & panis quem frangimus nonne participatio corporis Domini est? Quoniam unus panis, unum corpus multi sumus, omnes qui de vno pane participatur.* In hoc capitulo manifestat Apostolus Paulus quòd ipsemet Sacramentum quod à Domino acceperat faciebat. Similiter & cæteri Apostoli. Item Paulus Apostolus in eadem: *Convenientibus vobis in unum, iam non est Dominicam cœnam manducare. Unusquisque enim suam cœnam presumit ad manducandum, & alius quidem esurit, alius ebrius est.* Sed convenire in unum & sua cibaria propria comedere, & nihil alijs largiri, sed inebriari. Hæc facta non sunt Dominicam cœnam manducare. Apostolus reprehendendo Corinthios interrogans dicit: *Nunquid domos non habetis ad manducandum & bibendum? scilicet cibaria simplicia, aut Ecclesiam Dei contemnitis, & confunditis eos qui non habent? Laudo vos in hoc quod simul convenitis in unum in nomine Domini nostri Iesu Christi: non laudo vos in hoc quod comeditis vestra propria cibaria, & confunditis eos qui non habent, sed esuriunt. Non enim habent quod manducent. In hoc aperte manifestum est quod discipuli Apostolorum ipsos imitantes, huius Sacramenti traditionem per vniuersum mundum memoriter peregerunt, & nos dicimus & credimus, & omnis Romana Ecclesia à beato Petro & Paulo primum fundata hoc dicit & credit, quòd nullus homo qui in hoc Sacramento fidem non habet, & in cæteris Apostolorum traditionibus, sicut in Baptismo, in Confessione, in Pœnitentia, cæterisque Apostolicis institutionibus, quæ sunt in Ecclesia præsenti, alienus est ab vnitæ sanctæ Ecclesiæ, & Catholicæ fidei, & segregatus à consortio sanctorum fidelium, videlicet præteritorum & huc* degentium, & est damnatus in secula seculorum.* * f. hic

CAP. XII.

POST QVAM expediuimus, licet indigni, de corporis & sanguinis Iesu Christi tractatu in Catholica Ecclesia per.

vniuersum mundum extensa vniuersaliter celebrato, de baptismo incipiamus, & contra hæreticorum errores baptismi aquæ inficientiū sacramentum, testimonia quæ Spiritus sanctus administrauerit nobis infringendos, auctoritates noui Testamenti proferamus. Dicunt enim quidam hæreticorū, quòd hoc sacramētum baptismi aquæ sine eorum manus impositione recipienti ad salutem perpetuam consequendam nihil prodest adultis, nec etiam paruulis. Et hic error inter ceteros errores maximus est. Habemus in Euāgelio Ioannis, quòd Ioannes Baptista vt esset præcursor Christi & ver^o præco, ab omnipotenti Deo missus est baptizare in aqua, vt ipse met baptista testatur dicens: *Qui misit me baptizare in aqua, ille mihi dixit: Super quem videris spiritū Dei descendentem, & manentē sicut columbam, ipse est qui baptizat in Spiritu sancto.* Item in baptismo Christi aperti sunt cœli, & vox Patris audita est, Spiritus sanctus apparuit. Vide magnum diuinæ pietatis sacramentum. Tota enim Trinitas in baptismo Christi operata est, & dignata est interesse. Pater auditur, Filius baptizatur, Spiritus sanctus apparuit in specie columbæ. Filio Dei baptizato cœli aperti sunt. Et quoniam tantæ dignitatis est institutio & sacramentum baptismatis, ideò Dominus ait Nicodemo, sicut Ioannes in Euangelio suo testatur: *Non potest homo quicquam accipere, nisi datum ei fuerit de cælo. Amen, amen dico tibi, nisi qui natus fuerit denuo, non potest videre regnum Dei. Quod natum est ex carne caro est, & quod natum est ex Spiritu sancto spiritus est.* Audi hæretice. Duas oportet nos habere natiuitates, carnalem scilicet & spirituales, attestante diuino eloquio. Qui spirituali caret natiuitate, nō potest videre regnum Dei, nec intrare in illud. Sed spiritualis natiuitas non potest haberi, nisi carnalis habeatur. Quomodo tu dicit malam esse carnalem natiuitatem, quam sequitur spiritualis natiuitas, quæ confert videre regnum Dei, & intrare in illud, cū spiritualis sine carnali haberi non possit? Nunquam enim potest renasci. Habemus in Euangelijs, quòd Ioannes Baptista Spiritu sancto afflatus in desertum abiit, & pœnitentiam & baptismum aquæ sibi aduenientibus prædicauit & docuit. Vnde Christus Baptistæ Ioanni aquam sanctificare & confirmare volens, ad eum veniens, ab eodem baptismum aquæ in se accipere dignatus est, præbens omnibus fidelibus exem-

plum, sacramentum baptismi aquæ ad animarū salutem percipiendam debere recipere; in quo ab omnibus peccatis tam ab originalibus tam actualibus mundantur; & sine quo non est fides vniuersalis Ecclesiæ, quòd omnis despiciens hoc Sacramentum, & accipere nolens, æternam vitam nullo modo mereri, nec consequi potest, vt Saluator noster Iesus Christus in Euangelio beati Ioannis testatur, dicens: *Nisi quis renatus fuerit ex aqua & Spiritu sancto, non potest intrare in regnum Dei.* Habemus in Euangelio quòd discipuli eius eo iubente ante passionem credentes in Filium Dei baptizabant, vbi dicit: *Cùm audisset Iesus quòd Pharisei dicerent, Plures facit discipulos quàm Ioannes, & baptizabant: quanquam ipse non baptizaret, sed eius discipuli, reliquit Iudæam, &c.* Sed sciendum est quòd Baptista Ioannes in nomine Domini, qui cum miserat, baptizabat. Sed Dominus noster Iesus Christus, qui à Patre de cœlis missus fuit, humano generi æternam salutem secum afferens, huius Sacramenti baptismi formam discipulos suos docens, per vniuersum mundum mittens, iussit eos prædicare regnum Dei, & baptizare, addens: *In nomine Patris, & Filij, & Spiritus sancti*, vt in fine beati Mathæi Euangelistæ inuenitur. Apparens Discipulis suis in montem dixit eis. *Ite, docete omnes gentes, baptizantes eos in nomine Patris, & Filij, & Spiritus sancti, &c.* & adiunxit. *Qui crediderit & baptizatus fuerit, saluus erit. Qui verò non crediderit, condemnabitur.* Ex hac autoritate intelligere possumus, quòd nulli huius sacramenti baptismi incredulitas, etsi susceperit, ad salutem proficit.

DICUNT etiam Hæretici, quòd nulli, nisi proprio ore & corde hoc sacramentum petat, potest prodesse. Inde adducentes hunc errorem, quod paruulis baptismus aquæ nihil prodest. Sed nos habemus in Euangelio beati Marci, quòd Dominus Iesus Christus post resurrectionem suam discipulis suis apparuit, & dixit eis: *Euntes in mundum vniuersum predicate Euangelium omni creaturæ. Qui crediderit & baptizatus fuerit, saluus erit.* In hoc loco non fecit aliquam exceptionem magnorum vel paruulorum, seu masculorum vel feminarum, cùm dicit omni creaturæ. *Qui crediderit & baptizatus fuerit, saluus erit.* Et idè fides est Catholicæ Ecclesiæ per vniuersum mundum, in quacumque parte nomen Christi celebratur & creditur, siue sint paruuli siue magni, siue viri siue mu-

lieres, si hoc sacramentum baptismi receperint, sine dubio saluantur, & ab omnibus peccatis siue ab originalibus, siue ab actualibus, cooperante gratia Spiritus sancti nundantur & purificantur, nisi in corruptione peccati ceciderint post lauacrum baptismi antequam moriantur. Quod dicunt de paruulis hæretici, in baptismo non posse saluari; contra hunc errorē beatus Paulus in Epistola ad Corinthios: *Si quis fidelis frater habet mulierem infidelem, & hac consentit habitare cum illo, non dimittat illam. Et si qua mulier fidelis habet virum infidelem, & hic consentit habitare cum illa, non dimittat illum. Sanctificatur enim vir infidelis per mulierem fidelem, & mulier infidelis per virum fidelem. Alioquin filij vestri immundi essent, nunc autem sancti sunt.* Apostolus dicit filios fidelium parentum esse mundos & sanctos; multo magis etiam credendū, quod immersione aquæ facta à ministris, & inuocatione nominis Patris, & Filij, & Spiritus sancti, paruuli baptizati in fide patrinorum creduntur mundari & saluari. Vnde habemus in Euangelio Matthæi, quod filia mulieris Chananæ fide matris suæ salua facta est. Item habemus in Euangelio, quod quidam deferentes Paralyticum ad Iesum iacentem in lecto, non potuerunt eum adire præ turba, & summisserunt Paralyticum per tegulas ante eum vt eum sanaret. Ipse verò respiciens deponentes Paralyticum, fide illorum ægro reddidit sanitatem. Item potestas diaboli expellitur. Et inuenitur in Euangelio beati Matthæi de quodā Centurione pro sanitate pueri adeunte, quod à Domino audiuit: *Vade, sicut credidisti fiat tibi.* Et sanatus est puer illius ex illa hora. Item filia Principis Synagogæ defuncta, rogatu patris à Domino suscitata est. Item filius cuiusdam mulieris viduæ, dum extra portam ciuitatis ad sepeliendum deferretur, fletu & vlulatu matris Dominus misericordia motus eum suscitauit, & matri suæ reddidit. Et ideo his Euangelicis auctoritatibus, & alijs quamplurimis testimonijs, quæ in Apostolicis scripturis continentur, vniuersalis Ecclesia per vniuersum mundum credit & tenet, quod fide patrinorum per inuocationem sanctæ Trinitatis factam à ministris Ecclesiæ, infantibus & pueris spiritalis gratia à Deo omnipotenti in baptismo donatur, vt Paulus testatur dicens: *Ego plantavi, Apollo rigauit, Deus autem incrementū dedit. Itaque neque qui plantat est aliquid, neque qui rigat; sed qui incrementū dat*

Deus. Et quia Apostolus dixit, *dat Deus incrementum*; unusquisque fidelis credere debet, ut qualiscumque sit qui baptizat eum inuocatione facta, scilicet, In nomine Patris, & Filij, & Spiritus sancti, Deus dat incrementum, videlicet spirituale hoc sacramentum recipienti, etiamsi sit paruulus vel magnus. Vnde Petrus in Actibus Apostolorum dixit: *Baptizetur unusquisque vestrum in nomine Domini nostri Iesu Christi, & accipietis donum Spiritus sancti.*

ITEM dicis hæretice, quia peccator baptizare non potest. Quomodo ergo baptizant Apostoli, qui peccatores erant, attestante Ioanne & dicente: *Si diximus quia peccatum non habemus, ipsi nos seducimus, & veritas in nobis non est?* Item dicis quia per ministerium Sacerdotis non datur Spiritus sanctus, quem te dare mentiris. Et quomodo dicis te dare Spiritum sanctum, cum ipse Spiritui sancto in quantum potes contradicis, & cum sit solius Dei dare Spiritum sanctum? Item in Actibus Apostolorum habetur, quod Apostoli imponebant manus super illos, & accipiebant Spiritum sanctum. Non dicitur quod darent, sed per impositionem manuum eorum accipiebant homines Spiritum sanctum. Item in Actibus Apostolorum: *Et descenderunt uterque in aquam, Philippus & Eunuchus. Et baptizauit eum, & descendit Spiritus sanctus super eum.* Item de infantibus siue paruulis in Euangelijs inuenimus, quia Deus noster Iesus Christus talem paruulorum ætatem probauit, ut diceret discipulis offerentes ad se paruulos prohibentibus: *Sinite paruulos venire ad me, talium est enim regnum celorum.* Quicumque ergo non crediderit paruulorum baptismum atque infantium ad salutem vitæ æternæ valere, contra Euangelium credit, & est quasi qui contradicat paruulos ad Christum venire. Item habemus in Epistola beati Pauli ad Corinthios, quod in primitiua Ecclesia discipuli Apostolorum pro mortuis baptizabantur, credentes eis conferre ad eorum salutem animarum. Dicit etiam Apostolus: *Si mortui non resurgunt, ut quid etiam baptizantur pro illis? ut quid & nos periclitamur omni hora?* Si ergo fides primitiue Ecclesiæ erat, quod baptismus viuorum pro mortuis salutem æternam illis mortuis conferebat, quod illi non audierant nec acceperant, & ideo pro illis baptizabantur: Quantomagis fideles credere debent modò, quod fide patrinorum baptizati paruuli sa-

• Hic errat
non enim
Ecclesia hoc
tenet.

lutem æternam & gratiam spiritualem in baptismo consequuntur? Et ista de baptismo sufficiant.

C A P. XIII.

DI X I M V S de sacramento Baptismi, qui est prima tabula post naufragium, id est post immersionē peccatorum. Et quia pœnitentia est secunda tabula post naufragium, idēō secundo loco post baptismum dicendum est de pœnitentia, quam autenticē contra hæreticam prauitatem confirmare nos oportet. A pœnitentia incipit prædicatio Ioannis. ait enim: *Agite pœnitentiam, appropinquabit enim regnum cælorum.* Et Petrus in Actibus Apostolorum ad eos, qui prædicatione sua compuncti fuerant corde: *Pœnitentiam, inquit, agite, & baptizetur unusquisque vestrum.* Item Petrus: *Pœnite mini igitur, & conuertimini ut deleantur vestra peccata.* Sed quia in pœnitentia necessaria est interior cordis contritio, & oris confessio, & digna satisfactio iniuncta à Presbytero; de vnoquoque exēpla proferamus.

QU O D interior cordis contritio sit necessaria, habemus ex auctoritate Ezechielis, qua dicitur: *Scindite corda vestra, & non vestimenta vestra.* Et etiam ex auctoritate Psalmistæ dicentis: *Cor contritum & humiliatum Deus non despicies.* Contritio enim est compunctio cordis, quæ nascitur ex recordatione præteritorum malorum, ut in Euangelio: *Et recordatus Petrus verbi Iesu, quod dixerat, Priusquam gallus cantet, ter me negabis. Et egressus foras fleuit amarè.* Ecce quomodo compunctus est corde. Recordatus enim mali præteriti ad lacrimas recurrit.

I T E M necessaria est oris confessio, quæ duobus modis dicitur, scilicet confessio Dei, & peccatorum. Confessio Dei est, de qua Dominus in Euangelio loquitur: *Qui me confessus fuerit coram hominibus, confitebor & ego eum coram patre meo.* Confessio peccatorum est, de qua David Psalmo ait: *Confitemini Domino quoniam bonus, quoniam in seculum misericordia eius.* Bonum dixit Dominum & misericordem, quia si quis confiteatur paratus est misereri. Eius namque misericordias præuidebat de longinquo per Spiritum sanctum cum dicebat: *Misericordias Domini in æternum cantabo tibi Domine.* Item, *Miseri-*

cordia tua multa Domine. Item David, *Dixi, confitebor aduersum me in iustitiam meam,* Confessio enim est proprii actus cum sui accusatione execratio. Vnde illud: *Iustus in principio sermonis accusator est sui.* Et Iacobus in Epistola Canonica: *Confitemini alterutrum peccata vestra, & orate pro inuicem ut saluemini.* Et Paulus Apostolus: *Corde creditur ad iustitiam, ore autem confessio fit ad salutem.* Ecce habemus ex auctoritate Iacobi, quod peccata nostra confiteamur. Et non dixit soli Deo, sicut dixit hereticus; sed, *confitemini alterutrum.* Et quod Sacerdotibus debeamus confiteri, dicit Dominus in Euangelio: *Vade, ostēde te Sacerdoti.* Et Iacobus, *Infirmatur quis in vobis? Inducat Presbyteros Ecclesie, & orent super eum, &c.*

QVOD item satisfactio sit necessaria, habetur in Euangelio vbi Ioannes ait. *Facite fructus dignos pœnitentie.* Nam facite fructus dignos pœnitentiæ, nihil aliud est, quàm dignam agere satisfactionem iniunctam à Presbytero. Satisfactio est sententia vel iudicium quod à sacerdote datur pœnitenti super peccatum. Et hoc est iudicium de quo dictum est: *Non indicabit Dominus in idipsum.* Et Paulus: *Si nos iudicaremus, non utique iudicaremur.* Et Petrus: *Quoniam tempus est ut incipiat iudicium de domo Domini.* Et hæc est potestas, quam Dominus dedit omnibus, scilicet potestas ligandi, & soluendi. Dicit itaq; ipsa Veritas: *Quorumcumque remiseritis peccata remittuntur eis, & quorum retinueritis retenta sunt.* Sicut enim in veteri Testamento leprosi iuebantur ostendere se sacerdotibus, ut discernerent qui essent mundi vel immundi: ita & nunc pro officio suo Sacerdos, cū audiret peccatorum varietates, sciat qui ligandus sit, vel qui soluendus. Item, postquam Christus Lazarum suscitauit, ait Discipulis: *Soluite eum,* voluit Dominus, ut quem suscitauerat ipsi soluerent, & solutum ostenderent. Deus dimittit peccata per ministros. Cū enim Deus dimittat peccata, & homo dimittat; aliter Deus, & aliter homo. Deus ex semetipso, quia per semetipsum quando vult peccata dimittit; homines non ex se, sed ex gratia in eis & per eos operante. Et ita verum est quod solus Deus peccata dimittit, sicut ipse Dominus ait in Propheta. *Ego solus deleo iniquitates & peccata populi.* Item, *Tu es solus qui facis mirabilia.* Et non negatur, quin & homines mirabilia faciant; sed non ex se, sicut & Deus, Item, *Nemo bonus, nisi solus Deus,* quia ex se bo-

nus. Nec tamen negamus bonos homines esse. Et sic homines peccata dimittunt non ex se, sed Deus dimittit per ministerium eorum.

SED dicis aliquem posse saluari sine confessione, & obijcis illam auctoritatem qua dicitur: *Quacumque hora peccator ingemuerit, saluus erit.* Ad quod dicendum est, quòd verè vniuersalis Sacerdos, scilicet Deus, qui vult confiteri, sed non potest, soluit à debito pœnæ æternæ per cordis cōtritionem. Sed quamdiu potest nisi ore confiteatur non absoluitur. Est namque certum, quòd ille, qui habet cor contritum, vult cōfiteri. Sed istam bonam voluntatem potest deserere. Non enim vult homo dum est in hac vita quod non possit nolle. Et si hac voluntate amissa nollet confiteri, & tunc moreretur; nulli dubium est tum damnari pro illo peccato quod confiteri noluit. Nullum enim peccatum impunitum. Aut enim homo punit, aut Deus. Apparet igitur quòd solus Deus dimittit peccata viuificando intus per gratiam; & quòd Sacerdos dimittit non intus viuificando, sed à debito æternæ pœnæ absoluendo per eam quam iniungit satisfactionem. Quod verò dicis peccatorum, *Quacumque hora ingemuerit peccator, saluus erit*, de his dictum est, qui instante periculo mortis tempus satisfactionis habere non possunt. Ac si diceret: Peccator quacumque hora verè pœnituerit, in futura vita non peribit vel de omnibus potest dici, *Qua hora ingemuerit, saluus erit*, quia tunc peccantis saluus incipit. Sed postquam diximus de eis, quæ in pœnitentia considerata sunt, dicendum est quid sit pœnitentia. Pœnitentia enim est perpetrata mala plangere, & plangenda non committere. Nam qui sic aëta deplorat, vt alia tamen committat, adhuc pœnitentiam agere aut ignorat, aut dissimulat. Item irrisor est non pœnitens, qui adhuc agit quod pœnituit, nec videtur Deum querere subditus, sed subsannare superbus. Isaias peccatoribus dixit: *Lauamini, mundi estote.* Lauatus & mundus est qui præterita plangit, & plangenda iterum non committit. Et hæc est vera pœnitentia, de qua dicit Dominus in Euangelio: *Maius gaudium est in Angelis Dei super vno peccatore pœnitentiam agente, quàm super nonaginta nouē iustis qui non indigent pœnitentia.* Non quòd sit aliquis adeò iustus, qui non indigeat pœnitentia, sed qui non indigent, id est qui æstimant non indigere. Et hoc est

est quod adhuc retinēt hæretici de supercilio Phariseorum. Ipsi sunt, de quo Salemon ait: *Latantur cū male fecerint, & exultant in rebus pessimis.* Hæc quæ diximus ad præsens negotium de pœnitentia sufficiant.

CAP. XIV.

POST Tractatum pœnitentiæ sequitur de manuum impositione: quoniam hæretici manuum impositionem, quod consolamentum vocant, contra Dominica præcepta, & Apostolorum constituta agere vsurpant. Quomodo, & à quibus personis fiat, & sentiant, primum est dicendum. Modus consolamenti talis est populo vel Episcopus, vel Diaconus, nominatus Rector aliorum hæreticorum sibi subditorum. Et quando volunt facere consolamentum alicui viro vel mulieri; ille qui Maior & Ordinatus dicitur, ablutis manibus; & omnes similiter illi, qui ibi adesse volunt, lotis manibus, Librum Euangeliorum in manibus suis tenens, eum vel eos, qui ad recipiendum consolamentum adueniunt, admonet, vt in eo consolamento omnem suam fidem & spem salutis animarum suarum in Deo & in illo consolamento ponant. Et sic super capita eorum Libro posito, orationem Dominicam septies dicunt. Et deinde beati Ioānis Euangelium ab *In principio* incipientes, vsque ad hunc locum Euangelij, *Gratia & veritas per Iesum Christum facta est:* omnibus audientibus dicit, & sic finitur illud consolamentum. A quibus personis fit dicamus, scilicet ab illis, qui inter eos Ordinati dicuntur. Si ipsi defuerint; ab alijs qui Consolati dicuntur, suppletur: & si viri non assint, mulierestantum infirmis faciunt. Quid de eo sentiant dicamus. In illo enim generaliter omnes saluandi fidem suam & spem habent, & omnium remissionem suorum peccatorū, & emundationem suorum delictorum absque satisfactione aliqua in eo consequi credunt si statim morte deficiunt: & non solum veniam de venialibus peccatis quæ commiserunt, sed etiam de criminalibus perpetratis dari in eo sibi credunt. Dicunt etiam, quod nemo magnus vel parvus vir siue mulier, nisi illud consolamentum ab ipsis consolatis receperit, cœlestē regnum & Angelorum societatem aliquo opere vel beneficio, vel contemplatione religionis, nec etiam martyrio: &

etiam si ab omnibus, quod est impossibile, peccatis & delictis se abstinere, consequi potest. Credunt etiam hoc, quod si ille qui facit illud consolamentum in aliquo peccatorum, quæ ipsi criminalia vocant, lapsus fuerit, sicut est comedere carnem, vel ouum, vel cascum, vel interficere auem, vel aliquod animal, præter repentia: vel etiam in illa peccata quæ Ecclesia Romana nominat, veluti homicidium, adulterium, fornicatio, immunditia, furtum, falsum testimonium, periurium, rapina, consolamentum illius accipientibus nihil prodest. Dicunt enim eum talem sic lapsum Spiritum sanctum non habere, & quod non habent credunt non posse alicui dare. Imò eundem credunt iterum oportere illud consolamentum recipere ab alio, si saluari desiderat. Et hoc vniuersaliter de omnibus tam viris quàm mulieribus lapsis ita oportere fieri ut dictum est.

ROMANA verò Apostolica Ecclesia omnia ita præfata, quæ ab hæreticis conficiuntur, pessimos & mortales errores multis auctoritatibus iudicat; quia non sunt à talibus personis facta, à quibus fieri debent. Neque à Iesu Christo institutum est, neque ab Apostolis, neque in tempore eorum factum est. Habemus etiam in Euangelijis quod Dominus Iesus Christus & Saluator noster paruis ad se delatis, & etiã ægris, imponebat manus super eos; & benedicebat eis, & sanabantur: & hoc non inuenimus ut alicui discipulorum ante passionem, quousque à mortuis resurrexit; sed post resurrectionē potestatem baptizandi, & manus imponendi in nomine Domini tantum Apostolis dedit, & ordinati fuerint, eandem potestatem baptizandi & manum imponendi habeant, videlicet quos Deus elegerit, & ipsi dignos iudicauerint. Vnde habemus in Actibus Apostolorū, quod beatus Petrus Simoni Mago offerenti pecuniam sibi, & petenti Spiritum sanctum talem potestatem dari sibi, ut cuicumque ipse imposeret manus Spiritum sanctum acciperet; respondit, *Non est tibi fors neque pars in sermone isto, quia assumasti donum Dei pecunia possideri. Sed roga Dominum, & age penitentiam ab hac tanta nequitia tua, quæ in cor tuum ascendit.* Et ita illum indignum huius diuini officij respuendum esse iudicauit. Habemus etiam in eodem libro, quod Apostoli per omnes ciuitates, in quibus nomē Domini nostri Iesu Christi

celebrabatur, & Christiani fideles persistebant, Presbyteros & Diaconos ad eadem sacramenta peragenda eis ordinabāt. Verbi gratia, *Cum constituisent per singulos Ecclesias Presbyteros.* Item in eodem, cum Paulus vellet ab Asia ire Hierosolimam transiens per Ecclesias in quibus Presbyteros & Episcopos ordinauerat, venit Miletum; & mittens Ephesum vocauit maiores natu Ecclesiæ, dixitque eis, *Attendite vobis & uniuerso gregi, in quo vos Spiritus sanctus posuit Episcopos regere Ecclesiam Dei, quam adquisiuit sanguine suo.* Et postquam Dominus noster Iesus Christus Apostolos elegit, & post eius ascensionem populi per vniuersas Ecclesias Episcopos, & Presbyteros & etiā Diaconos ad peragenda omnia diuina mysteria constituerunt; & eandem potestatem & traditionem quam ipsi à Christo acceperant, illi à se ordinatis concedebant. Quisquis contra hanc Apostolicam....facit & credit, multum errat, & mortem sibi operatur. Vnde & Iacobus ait: *Qui totā legem seruauerit, offendit autem in vno, factus est omnium reus.* Item Paulus: *Modicum fermentum totam massam corrumpit.* Et contra personas hæreticorum ista sufficiant.

ITEM contra modum consolamenti eorum. Hæretici dant illud consolamentum tam magnis quàm paruis, viris ac mulieribus: quod nunquam ab Apostolis, neque inter discipulos eorum factum fuit, neque mandatum fuisse ab eis inuenitur. Quia Apostoli quos ordinare volebant Prædicatores, Presbyteros, vel Diaconos super populum, manus tantū imponebant. De alijs non inuenimus in diuina Scriptura, nisi quòd prædicabant, & baptizabant eos cum inuocatione Spiritus sancti, vt Dominus noster Iesus Christus eos docuerat, & eis mandauerat, vt dicit: *Ite, docete omnes gentes, baptizantes in nomine Patris, & Filij, & Spiritus sancti,* & formam & modum dedit eis, qui vsque hodie in Ecclesia assidue retinetur. Vnde valde mirandum est, à quo talis consuetudo consolamenti hæreticorum habuit initium, vel sumpsit exordiū: quia neque à Prophetis, neque à Christo, neque ab Apostolis neque ab Apostolicis viris Apostolorum successoribus initiū habere videtur: quia multum discrepat à dictis & à factis, & etiam à scriptis istorum omnium. Et ideo credendum est vt sint de illis, de quibus Apostolus Paulus in Epistola ad Timotheū scripsit. *Erit enim tempus cum sanam doctrinam non sustine-*

bunt, sed ad sua desideria coaceruabunt sibi magistros prurientes auribus, & à veritate auditum auertent. Quia isti nec dicta Prophetarum, nec traditiones Apostolorum, nec mores virorum Apostolicorum, nec etiam scripta Sanctorum obedire. Ipsi hæretici omnes homines cuius illud consolamentum ab eis non acceperint. & in hoc contradicunt verbo Domini nostri Iesu Christi, qui dixit: Nolite iudicare & non iudicabimini, nolite condemnare, & non condemnabimini. Et ideo possunt esse de illis, de quibus subiunxit: In quo iudicio iudicaueritis iudicabimini, & in qua mensura mensi fueritis remetietur vobis. Et quia iudicant & condemnant alios omnes qui de non sunt, condemnatio & iudicium suum Deo volente erit super capita eorum. Quia consilia beati Pauli Apostoli non attendunt, neque obediunt, qui dicit: Nolite ante tempus iudicare, quoad usque Dominus veniat, qui illuminabit abscondita tenebrarum, & manifestabit consilia cordium. Et in alio loco. Dominus nouit qui sunt eius.

CAP. XV.

OMNIVM hæreticorum est fides, quod nullus post suum consolamentum receptum, si carnẽ, vel caseum, vel oua comederit, potest saluari; nisi pœnitentiam receperit ab eis, & post etiam ab eis reconsoletur. Sed tantum errorem destruendum testimonijs Euangeliorum, & etiam Epistolarum Apostolorum, & Actuum obuiare conemur. Habetur namque in Euangelio quòd Dominus dixit discipulis suis: *In quacunque domum intraueritis, manete edentes & bibentes quæ vobis apponentur.* Nullam ciborum exceptionem, scilicet carniũ, vel aliarum escarũ fecit eis, sed vniuersaliter dixit: *Quaecunque vobis apponentur manducate.* Item in Euangelio secundum Mathæum inuenitur quòd dixit: *Non quod intrat in os coinquinat hominem, quia de corde procedunt veluti homicidia, adulteria, furta, falsa testimonia, &c.* Item habemus in Euangelijs, quòd Dominus Iesus Christus in cœna cū discipulis suis Agni Paschalis carnem comedit, sicut Lucas in Euāgelio scripsit manifestè. *Venit autem dies azimorum, in qua necesse erat occidi Pascha, & misit Petrum & Ioannem, dicens: Euntes parate nobis Pascha ut manducemus. At illi dixerunt: Vbi vis paremus tibi comedere Pascha? &c. Dicit tibi Magister: ubi est diuersorium, ubi Pas-*

cha cum discipulis meis manducem, &c. Euntes autem inuenerunt sicut dixit illis. Et parauerunt Pascha. Et cum facta esset hora discubuit, & duodecim cum eo, & ait illis: Desiderio desideravi hoc Pascha manducare vobiscum antequam patiar. Dico enim vobis, quia ex hoc non manducabo illud donec impleatur in regno Dei. Et etiam ceteri Euangelistæ similia verba his scripserunt, quòd Christus comedit Pascha, & illud Pascha, quod necesse erat occidi, erat Agnus Paschalis, de quo præceperat Dominus Moyse. Et Christus comedit agnum Paschalem, & ille agnus erat caro, ergo Christus comedit carnem. Item Apostolus dicit in Epistola ad Corinthios: Omne quod in macello venditur manducate, nihil interrogantes propter conscientiam. Si quis infidelium vocat vos ad cœnam, & vultis ire, omne quod vobis apponitur manducate, nihil interrogantes propter conscientiam. Si quis autem dixerit vobis de immolatis etiam idolis, nolite comedere propter illud quod indicauit, & propter conscientiam; conscientiam non tuam, sed alterius. Item Apostolus ad Timotheum: Omnis creatura Dei bona, & nihil reijciendum quod cum gratiarum actione percipitur. Sanctificatur enim per verbum Dei & orationem. Et nos scimus & credimus quòd Christus, qui est Verbum, & sapientia Dei Patris, ad nihil aliud venit in mundum carne assumpta de utero Virginis, nisi ad salutem animarum. Hæc supra scripta non fecisset, nec fieri iussisset, si esset iudicium & damnatio animarum fidelium. Nec Apostoli spirituali sapientia imbuti, imitatores Christi scripissent neque comederent comestionem carnis ciborum, si scirent esse damnable peccatum manducare. Item Paulus ad Romanos. Infirmum autem in fide assumite, non in disceptationibus curationum. Alius enim credit manducare se omnia, qui autem infirmus est olus māducat. Is qui manducat, non manducantem spernat, & qui non māducat manducantem non iudicet. Deus enim illum assumpsit. Tu qui iudicas alienum seruum. Suo Domino stat, aut cadit. Stabit autem. Potens est enim Deus statuere illum. Nam alius iudicat diem inter diem, alius autem iudicat omnem diem. Vnusquisque enim in suo sensu abundat. Qui sapit Domino sapit, & qui manducat Domino māducat. Gratias enim ago Deo. Nemo enim sibi viuit, & nemo sibi moritur. Siue enim viuimus, Domino viuimus; siue morimur, Domino morimur. Siue ergo morimur, siue viuimus, Domini sumus. In hoc enim Christus mortuus est & resurrexit, ut & mortuorum & viuorum domi-

duccorum errorem imitantes, corporum mortuorum hominum resurrectionem non credunt. Et hunc errorem Christus, cum Saducæis loquens de resurrectione mortuorum, destruxit, ita dicens: *Erratis nescientes scripturas, neque virtutē Dei. In resurrectione enim neque nubent neque nubentur, sed sunt sicut Angeli Dei in cælo. De resurrectione autem mortuorum non legistis quod dictum est à Deo dicente vobis: Ego sum Deus Abraham, & Deus Isaac, & Deus Iacob. Non est Deus mortuorum, sed viuorū. Item in eodem Mathæus: Et monumenta aperta sunt, & multa corpora Sanctorum qui dormierant surrexerunt, & exeuntes de monumentis post resurrectionem eius venerunt in sanctam civitatem, & apparuerunt multis. Audis hæretice, corpora surrexisse. Item Dominus in Euangelio secundum Ioannem: Nolite mirari hoc, quia venit hora, in qua omnes, qui in monumentis sunt, audient vocem Filij Dei; & procedent qui bona egerunt in resurrectionē vitæ, qui verò mala egerunt in resurrectionē iudicij. Item in eodē, Cum autem venerit Filius hominis in maiestate sua, & omnes Angeli cū eo, tunc sedebit super sedem maiestatis sue, & congregabuntur ante eum omnes gentes, & separabit eos ab inuicem sicut qui segregat oves ab hædis. Et non solum resurrectio mortuorum ex Euangelicis testimonijs confirmatur, sed etiam in Epistolis suis Paulus disputando de resurrectione multa locutus est ad Corinthios: Si autem Christus predicatur, qui resurrexit à mortuis; quomodo quidam dicunt in vobis, quoniam resurrectio mortuorum nihil est? Si autem resurrectio mortuorum non est, neque Christus resurrexit. Si autem Christus non resurrexit, inanis est ergo predicatio nostra, inanis est & fides nostra. Sed hoc est quod hæretici obijciunt, Quoniam caro & sanguis regnum Dei non possidebunt. Hoc autem non dixit Apostolus de substantia carnis & sanguinis, sed de operibus carnis & sanguinis. Quod exponit Apostolus in sequentibus, dicens: Neque corruptio incorruptionem possidebit. Apostolus videns Corinthios esse seductos in hoc errore, volens eos de resurrectione rectificare scripsit eis: Seminatur in corruptione, surget in incorruptione. Seminatur in ignobilitate, surget in gloriam. Seminatur in infirmitate, surget in virtute. Seminatur corpus animale, surget corpus spirituale. Si est corpus animale, est spirituale, &c. Item Paulus ad Thessalonicenses, dicens: Nolumus autem vos ignorare, fratres, de dormientibus, ut non cōtristemini, sicut & ceteri qui sp̄e non habent. Si enim credimus*

quòd Iesus mortuus est & resurrexit, ita & Deus eos qui dormierunt adducet cum eo. Hoc enim vobis dicimus in verbo Domini; quia nos qui viuimus, qui residui sumus, in aduentu Domini non prauenimus eos, qui dormierunt. Quia Christus in iussu & in voce Angeli, & in tuba Dei descendet de cælo, & mortui qui in Christo sunt, resurgent primi

Dico autem vobis quòd multi ab Oriente & Occidente venient, & recumbent cum Abraham, Isaac, & Iacob in regno cælorum. Filij autem regni huius eijcientur in tenebras exteriores. Ibi erit fletus & stridor dentium. Si fletus oculorum, qui pertinet ad carnem, & stridor dentium qui ossa demonstrat: vera est ergo eorumdem corporum, quæ ceciderant, resurrectio.

C A P. XVII.

CONTRA quorundam hæreticorum peruersam opinionem, qui asserunt Sanctos, & eorum orationes viuis adhuc in mundo pro Christo certantibus non prodesse; nec defunctos viuorum beneficijs & orationibus releuari, fide nostra, & omnium Catholicorum Doctorum Ecclesiæ Dei auctoritatibus muniamus. Aliquando orant viui pro defunctis, & mortui pro viuis, vt habetur in Euangelio secundum Lucā. Sic enim diues ad Abraham: *Rogo ergo te, Pater, vt mittas eum in domum patris nostri. Habeo enim quinque fratres, vt testetur illis ne & ipsi veniant in locum hunc tormentorum.* Hic diues erat sepultus in infernum, & tamen orabat pro viuis. Quid ergo dicendum est de Sanctis, qui consecuti sunt misericordiam, & non suam, sed aliorum desiderant salutem, & saluti futurorū electorum exultant? Et Ioannes in Apocalypsi. *Et alius Angelus venit, & stetit ante altare, habens thuribulum aureum in manu sua, & data sunt ei incensa multa, vt daret de orationibus Sanctorum omnium super altare aureum, quod est ante thronum.* * *.

Cetera in M S. exesa & lacera.

MAGISTRI
PETRI ABAELARDI
NANNETENSIS,
COMMENTARIORVM SVPER S.
PAVLI EPISTOLAM AD ROMANOS
LIBRI V.

*EX BIBLIOTHECA S. MICHAELIS
DE MONTE.*



MAGISTRI
 PETRI ABAELARDI
 NANNETENSIS,
 COMMENTARIORVM SVPER S. PAVLI
 EPISTOLAM AD ROMANOS
 LIBRI V.

PROLOGVS.



M N I S Scriptura diuina more orationis Rhetoricæ aut docere intendit aut mouere. Docet quippe, dum quæ fieri vel vitari oportet insinuat. Mouet autem, dum sacris admonitionibus suis voluntatem nostram vel dissuadendo retrahit à malis, vel persuadendo applicat bonis: vt iam videlicet implere velimus quæ implenda esse didicimus, vel vitare contraria. Iuxta hanc itaque rationem tam veteris quàm noui Testamenti tripertita est doctrina. In veteri nempe Testamento lex, quæ in quinque libris Moyfi continetur, præcepta Domini primum docet. Deinde Prophetæ vel Historiæ cum cæteris scripturis ad ea quæ iam præcepta erant opere complenda adhortantur, & affectus hominum ad obediendum præceptis commouent. Cùm enim Prophetæ vel sancti Patres populum sentirent præceptis minus obedire diuinis, admonitiones adhibebant, vt per promissiones vel comminationes eos ad obediendum traherent. Exempla quoque ex Historijs necessarium erat adiungi, in quibus tam remunera-

tio obedientium quàm pœna transgressorum ante oculos poneretur. Hi autem sunt veteres illi panni, qui ad extrahendū Ieremiam de lacu funibus circumligati sunt: exempla videlicet antiquorum Patrum, quæ sacris admonitionibus adhibentur ad extrahendum peccatorem de profundo vitiorum.

SIMILITER & noui Tripertita est disciplina Testamenti, vbi quidem Euangelium pro lege est, quod veræ iustitiæ ac perfectæ formam docet. Deinde Epistolæ cum Apocalypsi loco Prophetarū ponuntur, quæ ad obediendum Euangelio cohortantur. Actus vero Apostolorū & pleræq; narrationes Euāgelicæ sacras historias continent. Ex his itaq; liquet, quod cum sit intentio Euāgelij docere, hanc intentionē Epistolę vel Actus Apostolorū tenent, vt ad obediendū Euāgelio nos moueant, vel in his quæ Euangelium docet nos cōfirmant. Nemo itaque post Euangelium, quod perfectæ est doctrinæ, quasi superfluē Epistolas calūniatur, cum has ad admonitiones poti⁹ quàm ad doctrinam scriptas esse meminerimus; quamuis nonnulla in eis salubria documenta siue consilia contineantur, quæ Euangelium non habet. Vnde ad Corinthios scribens ait, *Nam ceteris ego dico, non Dominus. Si quis frater uxorem habet infidelem, &c.* Nec non etiam circumcisionem vel ceteras legis carnales obseruantias cessare iam debere docet: quod nondum in Euangelio reuelatum erat. Qui etiam ad Timotheum scribens multa de Episcopali vel Sacerdotali seu leuitica dignitate docet, quæ Euangelium non expresserat. Perfectam tamen Euangelij dicimus doctrinam traditam esse, quantum ad veræ iustitiæ formam, & ad animarum salutem sufficebat, non ad Ecclesiæ decorem vel ipsius salutis amplificationem. Sunt quippe de bonis ciuitatis quædam ad incolumitatem eius pertinentia, quædam ad amplificationem. Sicut & in fine secundi libri Rhetoricæ Iulius meminit. Quæ verò ad incolumitatem pertinent, ea sunt sine quibus incolumis ac salua consistere ciuitas non potest, vt ager, siluæ, & cætera huiusmodi quæ valde ciuitati sunt necessaria. Alia vero non sunt ita necessaria, sed magis egregia: cum videlicet ultra quàm necesse est quædam obtinet, quæ eam cæteris ciuitatibus digniorem efficiunt aut tutiorem reddunt; sicut ædificia pulchra, thesaurorū copia, dominatio multa, & similia.

Sufficere autem salutem fortasse poterant ea quæ Euangelium de fide & spe & charitate seu sacramentis tradiderat, etiam si Apostolica non addantur instituta, neque aliqua sanctorum Patrum disciplinæ vel dispensationes, ut sunt canones; vel decreta, Regulæ Monachorum, & plurima sanctorum scripta sacris admonitionibus plena. Neque enim aliqua his prætermittis imputanda esset transgressio, si nulla de eis fieret præceptio. Voluit tamen Dominus & ab Apostolis & à sanctis Patribus quædam superaddi præcepta vel dispensationes, quibus adornetur vel amplificetur Ecclesia velut ciuitas sua, vel ipsa ciuium suorum tutius muniatur incolumitas; sicut in singulis promptum est assignare. Vnde Dominus nonnulla discipulis suis vel posteris præcipienda vel disponenda reseruauit, ut quibus in miraculis quoque maiora facere quam sibi ipsi permisit, nonnullam etiam eis præceptorum auctoritatem reseruaret, quibus eos amplius exaltaret, & Ecclesiæ suæ tanto eos efficeret amplius gratos, quanto eos ipsa sibi magis esse cognosceret necessarios. Cum itaque, ut dictum est, Euangeliorum intentio sit, ea quæ sunt salutem necessaria nos docere; hanc intentionem Epistolæ tenent, ut ad obediendum Euangelicæ doctrinæ nos moueant, vel nonnulla etiam ad amplificandam & tutius muniendam salutem tradant. Et hæc quidem est omnium Epistolarum generalis intentio. In singulis verò proprias intentiones requiri conuenit, seu materias aut tractandi modos; sicut in hac ipsa Epistola. Cuius quidem intentio est, Romanos ex Iudæis & Gentilibus conuersos superba contentione se alterutrum præponentes ad veram humilitatem & fraternam concordiam reuocare. Id vero duobus modis efficit: tam diuinæ scilicet gratiæ dona amplificando, quam operum nostrorum merita extenuando: ut nemo iam de operibus gloriari in se præsumat; sed totum diuinæ tribuat gratiæ quicquid valet, à qua quidem recognoscat se accepisse quicquid boni habet. In his itaque duobus, tam operibus scilicet nostris quam diuina gratia, totius materiæ summa consistit. Modus vero tractandi, in attenuationem est nostrorum operum, sicut dictum est, & exaggerationem gratiæ: ut iam nemo de operibus gloriari præsumat, sed qui gloriatur in Domino gloriatur. Gloriabantur autem Gentiles, quod tam citò Euangelio acquieuerunt,

sicut scriptum est, *Populus quem non cognoui, seruiuit mihi, in auditu obediuit mihi.* Et minimè antea deliquissent in his quæ egerant, qui nulla adhuc lege Dominum cognouerant. Iudæi verò de corporalibus legis obseruâtijs maximè intumescabant. Ad conterendam itaque vtrorumque superbiam alternis inuectionibus modo hos, modo illos, & nonnunquam vtrosque simul aggreditur, vt & gentes inexcusabiles in suis fuisse peccatis ostendat; quæ si legem scriptam non acceperant, naturalem habebant qua & Deum cognoscere, & mala à bonis possent discernere: & Iudæos non ex operibus legis iustificari, vt æstimant, posse, sed vtrosque sola Dei vocantis gratia misericordiam, qua iustificentur, assecutos. Quæritur autem de Romanis istis, quibus hæc Epistola dirigitur, quorum Prædicatione antea conuersi fuerant. Ecclesiastica quidem historia, & Hieronymus siue Gregorius Turonensis, per Petrum Apostolum eos iam conuersos fuisse tradunt. Haymo verò è contra sentit, dicens eos non à Petro primum de fide fuisse instructos, vel ab aliquibus duodecim Apostolorum: sed ab alijs quibusdam Iudæis fidelibus à Ierosolymis Romanam venientibus. Ait autem Ecclesiastica Historia libro secundo cap. decimo quarto. *Claudij temporibus, clementia diuine providentia Petrum ad urbem Romam deducit. Iste adueniēs primus in urbe Roma Euangelij sui clauibus ianuam Regni celestis aperuit.* Igitur cùm Romanæ vrbi clarum verbi Dei lumen fuisset exortum, Simonis tenebræ cum suo autore restinctæ sunt. Hieronymus quoque super hanc Epistolam, vbi scriptum est, *ut aliquid impertiar vobis gratiæ spiritualis*, ait sic. *Romanos predicatione Petri fidem tenētes confirmare se velle Paulus dicit. Non quo minus accepissent à Petro, sed ut duobus Apostolis attestatibus atque doctōribus, eorum corroboraretur fides.* Greg. etiam Turonensis Historiarum lib. 1. cap. 25. ita meminit. *Petrus Apostolus sub Imperatore Claudio Romam aggreditur; ibique predicans in multis virtutibus manifestissimè Christum esse Dei Filium comprobauit. Ab illis diebus enim Christiani apud ciuitatem Romanam esse ceperunt.* At vero Haymo in proœmio expositionis præfatis Epistolæ ita loquitur. *A Corintho scripsit Apostolus Romanis hanc Epistolam; quos non ipse Petrus, non quilibet duodecim discipulorum primū instruxit; sed quidam Iudæorum credentium, qui ab Ierosolymis Romam venientes, vbi Princeps orbis residebat, cui*

erant ipsi subiecti, fidem quam apud Ierosolymā didicerant Romanis euangelizauerunt. Notandum verò, quia si diligenter attendamus quæ dicta sunt, nulla erit superiorum doctorum & Haimonis contrarietas. Si enim integrè supra memoratum capitulum Ecclesiasticæ Historiæ percurramus, inueniemus Petrum primū ex omnibus Apostolis, non ex omnibus doctoribus Romanis prædicasse. Hieronymus quoque cū dicit Romanos à Petro per prædicationem eius fidem accepisse, siue tenere, nihil obest: cū per discipulos Petri à Hierosolyma venientes non per ipsum Petrum id fieri potuerit. Haymo verò negat per ipsam Petri personam id factum esse. Vnde & cū Petrus ab eo nominatur, additur *ipse*. Præterea nō dicit Haymo, quòd eos Petrus non instruxit; sed quòd non primū id fecerit. Quod vero ait prædictus Gregorius Petrum Romæ prædicasse sub Claudio, non addidit primum eum prædicasse, sed multis miraculorum virtutibus manifestè Christum esse Dei filium comprobasse. Quod autem tunc addidit, ex tunc Christianos esse Romæ cœpisse; potest intelligi, eos tunc per Petrum manifestos fuisse, qui prius occulti esse potuerunt. Hæc autem Epistola, quamuis primū scripta fuisse non credatur, prima tamen à sanctis Patribus ordinata est, quia contra primum vitium & cæterorum radicem, quod est superbia, dirigitur; sicut scriptum est, *Initium omnis peccati superbia*. Vel etiam quia ad primæ sedis Ecclesiam destinatur. De hoc autem ita Haymo meminit. *Epistola autem ista non illum ordinem tenet in corpore Epistolarum, quo est conscripta: sed causa dignitatis Romanorum, qui tunc temporis vniuersis gentibus imperabant, primatum obtinuit. Hoc autem factum est, non ab Apostolo, sed potius ab illo, qui omnes eius Epistolas sub uno corpore curauit colligere. Item idem. Interpretantur autem Romani sublimes, siue tonantes: quia illo tempore quo Apostolus hanc Epistolam eis misit cunctis gentibus principabantur, & intonabant præcepta. Creditur autem Apostolus præsentem Epistolam Romam misisse à Corinθο per Phœben, ministrum Ecclesiæ Cenchris; qui est locus vicinus Corinθο, immo portus ipsius Corinθi, sicut Origenes super hanc Epistolam meminit. De qua quidem Phœbe ipse Apostolus in fine Epistolæ ait sic. *Commendo vobis Phœbem sororem nostram, &c.* Quem quidem locum Hieronymus exponens ait. *Hic monstrat Apo-**

stolus non accipiendam personam esse viri vel feminae, quando Romanis per mulierem ut fertur, litteras mittit, &c.

LIBER PRIMVS.

CAP. I.



AVLVVS] More scribentium Epistolas salutationē præmittit, qui ad veram eos salutem adhortatur. Quam quidem salutationem cum quibusdam quæ annectit quasi loco præmij præscribit. Vbi eos videlicet attentos aut dociles seu beneuolos breuiter efficiat. Attentos quidem facit tam à persona sua, quàm à persona Christi eum mittentis, quàm etiam ab ipsa re, hoc est Evangelica doctrina, ad quam obseruandam eos adhortatur. A persona quidem sua, dum eam commēdat tanquam in Apostolatū segregatam, & ad prædicandum Euangelium à Deo vocatam. Cōmendat autē & Domini Iesu Christi personam, quē & Filium Dei nominat, & eum esse asserit, qui Patribus promissus erat tanquā humani generis redemptor, & qui ex Spiritu sancto conceptus sit, & mortuorum suscitator magnificus extiterit. Sed nec Euangelij commendationem præterit, dum ipsum per scripturas sanctas Prophetarū Dei promissum esse commemorat. Docilitas verbū in hoc ipso notatur, quòd per hoc quod sibi dicit iniunctum Evangelicæ prædicationis officium, de his quæ ad Euangelij doctrinam pertinent se scripturum esse insinuat. Qui etiam cum se seruum Christi, & se eorum seruum esse confitetur, tam ex humilitate sua, quàm ex amore quem illi in Christū habebant, necnon & ex his quæ subjungit de amore quem habet in eos, quòd videlicet per conuersionem eorū maximè gratias Deo agat, & ad eos venire desideret, ut eos amplius instruat aut confirmet, sibi ipsi beneuolos reddit. Nunc litterarum insistamus. Notandum verò quia iuxta expositionem Rufini in hanc Epistolam, quæ quidem expositio translatio expositionis Originis creditur; iste Apostolus antea etiam quàm conuerteretur binomius erat; ut tam videlicet Paulus quàm Saulus antea vocaretur; sicut scriptum est, in Actibus Apostolorum; *Saulus qui & Paulus*. Iuxta Hieronymū & Augustinū seu ceteros, ipse sibi Apostolus nomen mutauit à Paulo Proconsule,

Proconsule, quem per miraculum primum conuertit. In Actibus Apostolorum scriptum est, *assumens hoc nomen*, ut nunc Paulus sicut antè Saulus vocaretur, ut post eius conuersionem sicut nouam vitam vel nouum prædicationis assumpsit officium, ita & nouum sortiretur vocabulum. Sicut & de Apostolo Petro Dominus fecit, à quo ipse post conuersionem Petrus est vocatus, qui antea Simon vocabatur. Vnde & Romana Ecclesia iam in consuetudine duxit, ut quos in cathedram Beati Petri sublimat, nomina eis mutet. Saulus autem quasi à Saule antea dictus erat, qui de eadem Tribu, id est de Benjamin erat, & in persecutione fidelium Saulem imitabatur, qui Dauid & suos persequebatur, sicut iste Christum atque membra eius. Cui ab ipso dictum, *Saule Saule quid me persequeris?* Teste autem Hieronymo, sicut Iacob in nostram linguam trāslatum Iacobus dicitur, & Ioseph Iosephus, ita & Saul nunc Saulus dicitur, tanquam sit trissyllabum nomen, cum tamen per diphthongon proferre ipsum bissyllabum soleamus. Videtur etiam quasi diminutiuum esse à Saul Saulus, sicut à Iulio Iulius. Sicut autem Saul primo humilis, postea superbus factus est; ita hic è contrario primo superbus & maximus Ecclesiæ persecutor, nunc Paulus, id est per humilitatem iam modicus siue quietus appellatur. Nam iuxta Augustinum Paulus Latine modicus sonat. Vnde & dicimus, *Paululum expecta*, id est modicum. Quantum vero humilis ipse fuerit, audiab ipso. *Ego enim sum*, inquit, *minimus Apostolorum, qui non sum dignus vocari Apostolus*. Iuxta Ambrosium verò, ex Saulo Paulum se dicit, hoc est immutatum; ut quia Saulus inquietudo seu tentatio interpretatur; hic cum ad fidem Christi accessit Paulum se dicit, id est quasi iam quietum: cum prius tentationes æmulatione legis Dei seruis inferret. Quantum verò iam quietus & patiens extiterit, & ne quem scandalizaret semper studuerit, ipse quoque docet, qui ne quem grauaret manibus laborabat, non ut cæteri Apostoli de Euangelio victitans. A Hieronymo autem in libro Hebraicorum nominum Paulus mirabilis, siue electus, interpretari dicitur. Quem & Dominus ipse vas electionis vocauit, & tam vita quàm doctrina inter Apostolos mirabilem fecit. Quem quidem tam virginem esse, quàm Martyrem constat: ut quæ in magnis Apostolis, Petro scilicet & Ioanne,

diuisa sunt merita, in isto reperiantur coniuncta; & præ ceteris tam prædicationis quàm virtutis gratias assecutum; per quem ferè vniuersus conuersus est mundus; atque ipse quoque Apostolorum Princeps de pernicioſa ſimulatione neceſſario correctus, vt in eo quoque mirabiliter illa veritatis impleretur ſententia, *Erunt nouiſſimi primi, & primi nouiſſimi*. In cuius etiam typo Benjamin fratrum ſuorum extremum, & à patre vehementer dilectum fuiſſe non ambigimus. De hoc autem præclaro Chriſti ſignifero & tuba Domini vehemente ipſe humiliter qui ab eo correctus fuerat Petrus, in excellentiæ eius laudem prorumpens, *sicut & cariſſimus*, inquit, *frater noster Paulus ſecundum ſibi datam ſapientiam ſcripſit vobis, ſicut in omnibus Epiſtolis loquens de his, in quibus ſunt quædam difficilia intellectu, quæ indocti & inſtabiles deprauant, ſicut & cæteras ſcripturas ad ſuam ipſorum damnationem*. Quam quidem difficultatem, ex nimia ſubtilitate rationum procedentem, & profeſſi & veriti ſunt Doctores ſancti. Vnde & Ambroſius in Epiſtola quadam quæ ſic incipit, *Eſſe ſciam quod nihil difficilius ſit, quàm de Apoſtoli lectione diſſerere*, cum ipſe Origenes longe minor ſit in nouo quam in veteri teſtamento, &c. Auguſtinus Retractationum lib. 1. *Epiſtola ad Romanos expoſitionem inchoaue- ram, ſed huius operis, ſi perſiceretur, plures libri eſſent futuri. Quo- rum vnum ſolum in ſola diſputatione ſalutationis abſolui: ſed deinde ceſſaui ipſius magnitudine ac labore deterritus*. Et Beatus Hieronymus ad Pammachiũ. *Paulũ*, inquit, *Apoſtolum quotieſcumque lego, videor non mihi verba audire, ſed tonitrua*. Idem ad Paulinum. *Paulus nouiſſimus in ordine, primus in meritis eſt, quia plus omnibus laborauit*. Idem ad Eutochium. *De virginibus*, inquit *Apoſtolus, præceptum Domini non habeo. Quod & ipſe vt eſſet virgo non fuit impery, ſed propriæ voluntatis. Neq; enim audiendi ſunt inquit, qui eum uxorem habuiſſe conſingunt. Cum ſuadens perpetuam caſtitem intuleris; volo autẽ omnes eſſe ſicut meipſum*. Quãtus autem & apud Philoſophos habitus ſit, qui eius vel prædicationem audierunt, vel ſcripta viderunt, inſignis ille tam eloquentia quàm moribus Seneca in Epiſtolis, quas ad eum dirigit, his verbis proteſtatus eſt. *Libello tuo lecto, de plurimis ad quosdam litteris, quas ad aliquam ciuitatem ſeu caput Prouinciæ direxiſti, mira exhortatione vitam mortalem contemnentes uſquequaque reſecti ſumus. Quos ſenſus non puto ex te dictos, ſed per te: ceriè*

aliquando & ex te, & per te. Tanta etenim maiestas earum rerum est, tantaque generositate clarent, ut vix confecturas puto etates hominum quibus illustrari perficique possint. Meminit & Hieronymus huius laudis Senecæ erga Paulum in libro de Illustribus viris cap. 12. ita scribens. *Lucius Annaeus Seneca Cordubensis Photini Stoici discipulus, & patruus Lucani Poëta, continentissima vite fuit: quem non ponerem in catalogo Sanctorum, nisi me Epistolæ ille prouocarent, quæ leguntur Apostoli Pauli ad Senecam, aut Seneca ad Paulum.* In quibus cum esset Neronis magister, & illius temporis potentissimus, optare se dicit esse eius loci apud suos, cuius sit Paulus apud Christianos. Quod & si Prophetiæ autoritatis laudem Philosophico adiungas præconio, inuenies huius Apostoli excellentiam supra ceteros tam apud Patriarchas quàm Prophetas insigne aliquid laudis specialiter adeptam esse. Hic quippe, sicut ipse ait, de tribu Benjamin exordium ducens, ille est, in typo cuius tam Patriarcha Iacob quàm Prophetarum & Regum maximus Dauid, exultantes præcinerunt. Iacob quidem sic ait: *Benjamin lupus rapax mane rapiens prædam, vespere diuidet escas.* Siue iuxta aliam translationem, *vespere spolia distribuet.* Dauid vero futuræ Ecclesiæ Princeps in spiritu præuidens, & quasi hunc ceteris anteponens; *Ibi, inquit, Benjamin adolescentulus in mentis excessu.* Ille quippe Benjamin filius Iacob, qui huius typum gerebat de semine suo futuri, inter fratres ordine extremus, primus apud Patrem per gratiā erat, à quo ipse in senio susceptus potissimū diligebatur. Sic & Paulus inter Apostolos ordine vocationis & conuersionis vltimus, meritis, ut dictum est, apud Deum primus. Benjamin quoque nascens matrem parientem peremit, quæ præ dolore partus moriens Benoni. i. filium doloris appellauit: Pater vero nomine commutato eum Benjamin. i. filium dexteræ appellauit. Paulus quippe in Christo iam renascens, matrem suam Iudæam, quæ eum in doctrina legis genuerat & educauerat, quasi peremisse dicitur, cum ipse præcipuè carnalium obseruationum præcepta, in quibus ipsi viuebant, euacuauerit, & totam eorum gloriam ad nihilum redegerit, quasi de utero matris exiens, & à scholis Synagogæ per conuersionem recedens, iuxta quod ipsemet ait, *Qui me segregauit ex utero matris meæ, & viuificauit per gratiam suam.* Vnde & bene mater eum Bennonim. i. filium doloris sui vocauit, quia

quo plus errorem eius Paulus infestauit, amplius eam dolere fecit: & quopræ sapientiæ suæ excellentia gratior ei extiterat, amplius eam contristauit amissus. Benè autem Pater nomen commutare voluit, vt potius eum filium dexteræ. i. prosperitatis seu fortitudinis appellaret, quàm doloris; quia hic vt diximus interitus Synagogæ, qui per Paulum factus est, in prosperitatem potius fidelium, & communem Ecclesiæ exultationem, quàm in dolorem reputandus. Qui etiam quanta fortitudine animi vigit, innumeræ in eum persecutiones indicant. Quod verò dicitur mane rapere prædam, & vespere escas diuidere, significat eum primitus persecutorem Ecclesiæ fuisse, & postea spiritalis verbi refectionem doctrina suæ prædicationis administrasse. Quod verò iuxta aliā translationem dicitur distribuere spolia, significat eum posteaquā conuersus est multas animas diabolo eripuisse, & quasi spolia fugato hoste hos retinuisse, quos postea per Ecclesiastica officia & quæcūq; fidelium ministeria ordinauit. Hieronymus vero in prologo libri Hebraicarum quæstionū in Genesim, asserit secundum Hebræos, quod altare in quo immolabantur hostiæ, & victimarum sanguis ad basem illius fundebatur, in parte tribus Benjamin erat. Quo quidem conuenienter iste Christiani sanguinis effusor intelligitur, de quo scriptum est, *Spirans minarum & cadis in discipulos Domini, &c.* Vt Christi membra tanquam lupus oues laniaret in terris. Iste est Benjamin adolescentulus, quasi inter Apostolos ipse extremus, mente & ratione cæteris præcellens: vt pote qui raptus est ad tertium cælum, & audiuit arcana verba, quæ non licet homini loqui. A quo etiam ipse primus Apostolorum à pernicioſa simulatione correctus est, & vniuersa Ecclesia spiritaliter instructa, vt inter vniuersa sanctorum scripta eius Epistolæ priuilegium tam vtilitate quàm subtilitate adeptæ sunt. Quarum nunc istam, quæ ad Romanos dirigitur, exponendā suscepimus; quæ omnium eruditissimorum iudicio tam literæ difficultate quàm rationum subtilitate implicita est.

SERVVS] Cūm dicat Apostolis Dominus; *Iam non dicam vos seruos, sed amicos*, quare nunc Apostolus se seruum appellauit? At vero vt prætermittamus distinguere duo genera seruorum, id est subditorum, quorum videlicet alios timor pœnæ subditos tenet; de qualibet dicitur, *quia seruus non*

*manet in domo in aeternū. Et iterum illud, Cū feceritis omnia quacunque praecepta fuerint vobis dicite, Serui inutiles sumus. Alios quoque amor obediens facit. Quibus quidem dicitur, Euge serue bone & fidelis, &c. Facile est, praedictae quaestioni etiam hoc modo respondere, quod alio modo dicitur seruus simpliciter, alio modo seruus dicitur Christi, siue seruus bonus. Ibi enim quasi coactio quaedam ex seruili timore non voluntaria subiectio monstratur, hīc per amorem filialem obedientia designatur. Nec fortasse necesse est ex nomine serui simpliciter prolato coactam semper & non voluntariam subiectionē signari: nisi fortē per adiunctū aliquod amicalis subiectio remoueatur, veluti cum dicitur: *Iam non dicam vos seruos, sed amicos.* Cū enim subditur, *sed amicos*, quasi aduersando ad illud quod est, *seruos*; intelliguntur non praemissi serui illi qui tantum sunt serui, non etiam amici. Alioquin modo generaliter serui dicuntur omnes illi tā boni vel mali, quibus talenta sua Dominus commisit. Serui itaque generaliter dicuntur, siue eos qui praesunt diligant siue non, dummodo eis ita subiecti sint, vt in eorum penitus potestate tam res eorum quā ipsi permaneant: vt nec seipsos, nec aliquid ij qui serui dicuntur possideant proprium. Hoc itaque modo se hoc loco Apostolus seruum Christi nominat: cui se penitus ita subiecerat, vt nihil suo relinqueret arbitrio; sed totum se Christi subderet voluntati, dicens illud ei per omnia, *Fiat voluntas tua.* Quis etiam culpet, cū Dominus per gratiam nolit iam Apostolos appellare seruos, ipsi tamen per humilitatem se seruos profiteantur? Non enim ait, *Iam non dicetis vos seruos, sed amicos*: sed, *iam non dicam vos seruos, sed amicos.* Bene autem Apostolus, cū ad obediendum alios inuitet, se primitus obediens profitetur: vt non solum verbo, verum etiam magis exemplo auditores commoueat, sectatus quidem eum, de quo scriptum est, *quae cepit Iesus facere & docere.* Prius videlicet facere, & postea docere. Cū verò premiserit nomen Christi, quod est commune omnium tam in Regem quā Sacerdotem inunctorum, secundum quod scriptum est, *Nolite tangere Christos meos*; subiecit proprium nomen eius, quod est Iesus, vt hunc videlicet Christum à ceteris tam singularitate personae, quā dignitate distingueret. Solus quippe propriè Iesus dicitur, qui solus verè & in perpe-*

tuum saluare potest. Cùm itaque dicitur Christus .i. vnctus, quoniam tam Reges quàm Sacerdotes inungebantur, ostēdit eum à Domino tam in Regem quàm in Sacerdotem nobis esse constitutum, per quæ duo nos saluet, quod sonat Iesus. Sacerdos quippe nobis extitit, seipsum pro nobis in ara crucis immolando. Rex vero pro fortitudine & potentia dictus est: qua potest sibi subicere omnia, & tanquam fortior fortem alligare diabolus, vt pote illi cui Pater omnia dedit in manu.

VOCATVS *Apostolus.*] Hoc est vocatus à Deo & electus in Apostolatam, non à seipso veniens ad prædicandum: alioquin fur esset & latro, iuxta illud Veritatis, *Omnes quotquot venerunt fures sunt & latrones. Venerunt*, inquit Hieronymus, *non qui missi sunt.* Vnde & bene Apostolus missus siue legatus interpretatur. Attende etiam humilitatis suæ commendationem, cùm dixerit *vocatus* potius quàm electus. Vocatio quippe clamor vocis est ad longe positos vt accedāt vel audiant. Tanto autem iste remotior erat à Deo, quantò immanior erat Ecclesiæ persecutor. Diligenter itaque ait non electus, vel assumptus, sed *vocatus* quasi à longe à Domino tractus ad Euangelium illius prædicandum.

SEGREGATVS *in Euangelio Dei.*] Id est, seorsum & per se, non cum alijs Apostolis electus, non à Christo adhuc in terra consistenti mortali, sed iam in cælestibus ad dexteram Patris constituto, & tam per resurrectionem quàm ascensionem glorificato. Vnde & ad Galathas scribens, vt suam commendaret electionem aduersus eos qui calumniabantur cum cæteris Apostolis non esse connumerandum, quòd non fuerit à Domino Iesu Christo in terra cum cæteris electus, ait Paulus Apostolus, *non ab hominibus neque per hominem, sed per Iesum Christum & Deum Patrem, qui suscitauit eum à mortuis*: ac si diceret Paulus Apostolus non per hominem .i. mortalē, sed per Christum iam resurrectione glorificatum, & nihil iam mortalis naturæ vel corruptibilis habentem. Dicitur etiam segregatus in prædicatione Euangelij, dum cæteris adhuc Apostolis circa prædicationem Iudæorum occupatis iste specialiter ad gentes tanquam eorum proprius Apostolus destinatus est. Vnde & doctor gentium specialiter ipse dictus est. Hinc est illud in Actibus Apostolorum dicente Spiritu sancto, *Segre-*

gate mihi Barnabam & Paulum in opus ministerij quo assumpsit eos. Euangelium bona annunciatio dicitur, eo videlicet quod Euāgelica prædicatio enunciet completum quod antea erat promissum.

QUOD ante promiserat.] Commendatio est Euangelij quod olim à Deo nobis promissum dicit. *Per Prophetas suos.*] Nemo enim rem vilem, ut ait Ambrosius, magnis præconibus nunciat. Per Hieremiam Dominus dicit, *Ecce dies veniūt, & consummabo Testamentum nouum, &c.* Suos dicit Prophetas ad differentiam falsorum siue reproborum, sicut Balam vel qui per spiritum malignum nonnunquam futura prædicunt. Propheta quippe est qui futura prædicendo reuelat. Vnde & Propheta quasi à prophetando. i. prædicendo dicitur. *In scripturis.*] Ut non solum verbis hoc Prophetæ annunciarent, verum etiam scripturis confirmarent. *Sanctis.*] Hoc est ad sanctitatis doctrinam & Religionis formam conscriptis, & Spiritu sancto dictante compositis. *De filio suo.*] .i. proprio & substantiali, non adoptiuo. *Qui factus est ei ex semine David secundum carnem.*] .i. humanam naturam qui secundum diuinam solummodo est genitus, *Ei.*] s. Deo Patri .i. ad honorem ipsius qui semper in filio glorificatus est & honoratus: cum ipse dicat filius Dei propriam gloriam se non querere, sed eius qui misit eum. *Ex semine David.*] .i. ex Maria, quæ fuit ex stirpe David, cum tam Abraham quàm David promissio de Christo facta sit; ut videlicet de eorum semine per matrem suam nasceretur. Hic tamen solum commemorat David, qui grauius nonnunquam deliquit, non Abraham, qui maximè iustus apparuit: ut videlicet diuinæ gratiæ, non meritis hominum totum huius incarnationis tribuatur mysterium. Sufficit etiā nominare David tacito Abraham, cum per David, qui de genere Abraham est, Christū de genere Abraham esse doceat.

QUI prædestinatus est secundum carnem.] s. hoc est diuina præparatus, pro qua & Matri eius dictum est. *Aue gratia plena.* Prædestinatio quippe dicitur diuinæ gratiæ præparatio. Prædestinatus est inquam *Filius Dei in virtute.*] Hoc est, ut esset virtus & fortitudo omnium ei coherentium per fidem. *Secundum Spiritum sanctificationis.*] Ad duo præmissa duo alia subnectit quasi singula singulis reddens. Ad illud quidem quod primo dixit, *qui factus est ei ex semine David secū-*

dum carnem, istud subiungit, secundum Spiritum sanctificationis, hoc est per operationem diuinæ gratiæ, quæ Spiritus sanctus dicitur, mundantem prius & sanctificantem à peccato Matrō eius; vt de semine peccatoris Dauid sacrosanctam carnem assumeret. Ad illud verò aliud quod secundo promiserat, *Qui predestinatus est Filius Dei in virtute,* istud annectit: *Ex resurrectione mortuorum Iesu Christi.*] Ac si diceret, ex tunc factū est, vt esset virtus seu fortitudo omnium per fidem ei cohærentium, ex quo eius resurrectio completa est, testificata per resurrectionem mortuorum eodem die factam, de quibus scriptum est: *Quia venerunt in sanctam civitatem & apparuerunt multis.* Tunc enim omnis infidelitatis dubitatio abscessit, quæ de passione quoque Discipulis acciderat, quorum quidam iam desperati dicebant: *Nos autem sperabamus quod ipse esset redempturus Israel.* Mortuos Iesu Christi dicit .i. ad honorem ipsius, qui ad hoc mortui fuerant, vt cum resurrectionis suæ testimonio glorificarent. Possumus & resurrectionem spiritalem animæ à vicij accipere, de qua Simeon ait: *Quia positus est hic in ruinam & resurrectionem multorum.* Solus quippe est Christus qui à morte animæ liberare potest, Agnus videlicet Dei qui tollit peccata mundi. Notandum verò quod, vt ait beatus Augustinus in Enchiridion, cum dicatur Christus natus ex Spiritu sancto & Maria, non tamen ideo filius Spiritus sancti dicitur sicut Mariæ, cum videlicet non sit natus aut conceptus ex substantia Spiritus sancti sicut ex substantia Mariæ, sed potius per operationem Spiritus .i. diuinæ gratiæ excellens eius conceptio siue natiuitas facta est, & ideo ex illo quoque natus, hoc est conceptus per illum dicitur. Non enim omne quod ex aliquo nascitur filius eius dicitur, vt capilli ex capite, vel pediculi ex nobis nascentes. Ex aqua quoque & Spiritu denuo renascentes nequaquam filij aquæ dicimur. Solent & filij dici eorum, à quibus non nascuntur vt filij adoptiui, filij diaboli, filij gehennæ, vel filij per doctrinā. Si quis tamen Christum secundum hominem filium Dei aut Spiritus sancti dicat, eo quidem modo quo cæteros fideles per filialem ei amorem subiectos, non absurdum arbitror. Nō tamen ideo plures habent patres propter Deum, scilicet Patrem & Spiritum sanctum; cum præsertim nec cæteri electi plures patres Deo habeant propter personarum diuersitatē.

Neque

Neque enim ibi plures Patres dicendum est, sicut nec plures Deos aut Dominos; cum nulla sit ibi rerum diuersitas, aut nominum differentia. Si vero quaeratur utrum homo ille in Christo à Verbo assumptus sit adoptiuus Dei Filius sicut ceteri electi, cum hoc bonum quoque per gratiam habeat, non puto concedendum. Qui enim adoptantur & sic filij efficiuntur, utique prius erant non eo modo filij quo facti sunt. At vero homo ille à Verbo assumptus omnino sine peccato & natus & conceptus, statim ex quo exitit Filius Dei per gratiam fuit. Nos verb alij qui cum peccato nascimur, & filij iræ dicimur, renati baptismo per adoptionem esse incipimus quod non prius eramus. Ille itaq; licet per gratiā secundū humanitatem filius dicatur, non tamen per adoptionem hoc accipit qui hoc ex quo fuit habuit. Vnde Hilarius de Trinitate lib. xii. Et nos qui Filij Dei, sed per facturā filij, fuimus enim aliquando filij iracundiæ, sed Filij Dei per adoptionem effecti, & dici id meremur potius quàm nascimur. Et quia omne quod sit antequam fiat non fuit, nos cum filij non fuisset, ad id quod sumus efficimur. Ante enim filij non eramus, sed postquam meruimus hoc sumus. Sumus autem non nati, sed facti; neq; generati, sed acquisiti. Acquisiuit enim sibi Deus populum, & per hoc genuit. Genuisse autem Dominum filios nunquam cum proprietatis significatione cognoscimus.

PER quē accepimus gratiā & Apostolatū.] Cōmendata Christi persona adnectit commēdationē suā, siue officij sui, cum se à tāto auctore mitti perhibet ad prædicandū, ut saltē ex auctoritate mittētis suscipi eius prædicatio debeat. *Gratiā & Apostolatū*, hoc est prædicandi officiū gratis, nō ex meritis suis, ei collatū; vel primo gratiā in conuersione ipsius & remissione peccatorū, seu collocatione virtutū, vel miraculorū aut quorūlibet donorum, & postea Apostolatū, dum ad prædicandum missus est. Possent Romani Apostolo dicere, Etsi ad Apostolatū vocatus es, non tamen super gentes; vel super gentes aliquas, non tamen super nos. Ideo subdit, *In omnibus gentibus.*] Hoc est, ut omnibus vbicumque prædicaret gentium nationibus. Gentes siue nationes dicuntur quasi tales quales genitæ vel natæ, hoc est sine disciplina legis quasi pecudes viuentes. Pagani autem à pago dicti sunt .i. nulla seu quacunque mansione extra ciuitatem, ut sint pagani quasi

rustici, & non urbani; qui nondum legibus ciuitatis ad rectè aut honestè viuendum instructi sunt. Est quippe ciuitas conuentus hominum, æquo iure viuendum. Qui ergo à ciuitate Dei penitus alieni erant, nullis adhuc diuinis legibus instructi, merito pagani erant appellati, qui nunc se Saracenos magis quàm Agarenos vocari volunt, quasi à Sara libera magis quàm ab Agar ancilla nuncupari se gloriantes. *Ad obediendum fidei.*] Hoc est, ad ea opera implenda quæ ante crediderint implenda. Primo quippe sciri oportet quæ facienda sunt quàm opere compleantur. *Pro nomine eius.*] .i. Dei siue Christi, vt videlicet ipse cognoscatur, & sic ametur secundū quod ipse Christus de se & Patre loquitur, vt cognoscant te solum & quem misisti Iesum Christum. Quælibet res nomine suo significari & cognosci habet, ideòque nomen hic pro notitia ponitur. Cognosci autem verè tantum bonum non potest, nisi & statim diligatur. *In quibus estis & vos.*] .i. in quarum gētium vocatione & vos Romani iam estis. *Vocati Iesu Christi.*] Hoc est ex glorioso eius nomine Christiani appellati.

OMNIBVS *qui sunt Romæ.*) Hucusque littera tota præmissa huius salutationis suspensua est, quasi dicatur repetitis omnibus præmissis, Paulus seruus, &c. mandat, subaudis hoc omnibus qui sunt Romæ dilectis Dei vocatis sanctis, hoc inquam mandat, *Gratia sit vobis & pax, &c. Dilectis Dei.*) Ac si diceret, Non dico simpliciter omnibus qui sunt Romæ, tam fidelibus scilicet quàm infidelibus, tã electis quàm reprobis: sed his tantum qui per conuersionem suam iam amicitiam cum Deo inierunt, subiecti iam ei more Christianorum, .i. ex amore potius quàm timore. Quibus quidem dictum illud conuenit, *Iam non dicā vos seruos. Et iterū, vos autem dixi amicos. Vel dilectis Dei .i. à Deo,* qui eos prior dilexit, vt præueniente gratia eius non meritis eorum ipsos eligeret. *Vocatis sanctis.*) Hoc est vocatis per inspirationē internam, seu prædicationis gratia, ad hoc vt sancti sint. Cum dicit eos vocatos à Deo esse potius quàm eos Dominum inuocasse; gratiā Dei exaggerat, quæ nonnūquā inuitis vel non petentibus beneficia præstat.

QVÆSTIO.

SED cum hæc salutatio ad omnes illos pertineat, ad quā Epistola dirigitur, quomodo dicit dilectis Dei vel vocatis sanctis, cum maximè ad eos vel propter eos corrigendos Epistola sit directā, qui superba contēctione, vt dictum est, se ad alteru-

trum præponere volebant? quippe qui superbè agunt, quomodo dilecti Dei dicuntur? Nunquid propter eorum benevolentiam captandam mentiri aut falsum scribere aliquid Apostolum oportuerit? Sed profectò ad omnes quidem hæc salutatio pertinet, licet non omnes adhuc sint dilecti Dei: ut cum videlicet eos tantum saluter qui sunt dilecti Dei, eos tantum salutatione sua dignos iudicet, aliosque ad imitationem ipsorum inuitet, ut & ipsi .s. dilecti Dei esse nitantur. Conuenienter etiam, etsi nonnulli ibi essent Dei dilecti, dicere eos dilectos Dei potuit, iuxta eorum opinionem quidem qui hoc de se profitebantur, sicut etiã nonnulli ironicè quandoque loquuntur. Non enim mendacium, beato attestante Augustino, dicitur, nisi falsa significatio cum voluntate decipiendi. Hic verò Apostolus non decipere, sed admonere intendit. *Gratia vobis & pax.*) Gratiam dicit donum gratuitum .i. non ex meritis præcedentibus collatum. Gratia & pax .i. donum pacis, qua ipsi qui contendunt superbè, inuicem & cum ipso Deo reconcilientur. Qui enim proximum quem videt non diligit, Dominum quem non videt quomodo potest diligere? *A Deo Patre nostro & Domino Iesu Christo.*) Donum Dei, quod gratiam dicit, Spiritus sanctus dicitur. Vnde & cum septiformem spiritum dicimus, vel septem Spiritus Dei nominamus, septem diuinæ gratiæ dona demonstramus. Rectè ergo donum Dei quod Spiritus sanctus dicitur, à Patre & Filio simul dari postulat, à quibus simul procedere spiritus ipse habet. Sic construe, *A Deo Patre & Domino Iesu Christo*, Deo Patre nostro dico, tam Domini scilicet Iesu Christi Patre quàm nostri. Hinc & ipse Filius Deum Patrem tam suum quàm nostrum appellat dicens, *Ascendo ad Patrem meum & Patrem vestrum.* Illius quidem per naturam, nostri vero per adoptionem. Ex quo maximè gratiam Dei erga nos commendat, per quam fratres efficimur & cohæredes Domini Iesu Christi. Filij quidem dicimur per amorem, & magis quàm per timorem subiicimur. Dominum Iesum dicit, quia ei assidua & perpétua debetur obedientia, sicut Domino à seruis, iuxta quod superius & se seruum dixit.

PRIMUM quidem.) Ne præmissa Epistolæ salutatio magis ex occasione & consuetudine scribendi Epistolas quàm ex affectu caritatis prolata videretur, quanta eos charitate am-

plectatur annectit, dicens se primum .i. maximè pro conuer-
sione & fide Romanorum, Deo gratias agere, cum pro om-
nibus tamen conuersis id faciendum sit. Oportebat etiam
gratiam, quam in eos Apostolus habebat, prius eum osten-
dere; vt cum eos grauiter postmodum reprehenderet, ex
amore id factum intelligerent, & libentiùs eius correctionē
vel admonitionē susciperent. Quasi ergo blandiendo more
solertis Oratoris prius eos allicit, vt ad audiendum attentio-
res ac beneuolos eos magis reddat. Gratias alicui agere, est
pro beneficio ab eo gratis collato eum laudare, benedicere,
glorificare. *De meo per Iesum Christum.*] Hoc est qui mihi
propitius factus est, sicut & cæteris peccatoribus per filium
suum redemptorem ac mediatorem nostrum. Vel *gratias ago*
per Iesum Christum, quia id factum esse de conuersione Ro-
manorum per Christum recognosco, non per nostram vir-
tutem siue cæterorum hominum. Qui etiam in laudem Dei
me idoneū ex me esse non recognosco, sed ex gratia filij eius
cui deseruio: de hoc, inquam, gratias ago. *Quia fides vestra*
annunciatur.] Hoc est diuulgatur ad laudem Dei, & ad exē-
plum conuersionis aliorum in toto mundo .i. vbicunque ter-
rarum vel in maxima parte earum. Quo vero magis notus
erat Romanus populus quasi caput totius mundi, magis vbi-
que innotescebant quæ apud Romanos fiebant: & quo supe-
riores erant, magis exemplo sui cæteros ad conuersionem in-
uitabant. Vnde Quintilianus de cæco. Quo, inquit, ad altio-
rem quisque honoris gradum extenditur, magis in exemplū
spectantibus patet. Item hæc conditio superiorū est, vt quic-
quid faciunt præcipere videantur. Ex his quidē & consimi-
libus Apostoli verbis, quibus dicit se gratias Deo agere per
Iesum Christum, Ecclesia ni fallor in consuetudine duxit, vt
in celebrationibus Missarum cum Deo Patri gratiæ referun-
tur, vel in ipsis orationum petitionibus semper adiungatur,
Per Dominum nostrum Iesum Christum, vel simile aliquid: ac
si omne quod agimus recognoscamus Deo Patri minimè pla-
citurum, nisi per ipsum mediatorem qui nos ei reconciliauit,
neque nos ab eo aliquod bonum adeptos nisi per eundem
qui nobis ipsum pacificauit. *Testis enim.*] Ostendit quasi à
causa, quòd pro gratia eis collata maximè Deo gratias agat;
quia eos tanto affectu complectitur, vt in suis semper oratio-

nibus eorum memor sit. i. quotiescunq; pro se orat, oret etiam ut ad eos peruenire valeat, ut in ipsis quoque aliquem habeat fructum. Vnde, inquit, mihi testis est Deus, cui ipsam orationem facio, & decipi non potest, & qui solus intentionem discutere potest. Non dicit simpliciter, *sine intermissione*; sed *sine intermissione in orationibus suis*, ut videlicet nulla eius oratio sine memoria eorum fiat. *Cui seruo in s. m.*] Hoc est interiori homine, ex toto videlicet cordis affectu sicut amicus, non ad oculum sicut seruus qui flagellari timet. *In Euangelio f. e.*] Hoc est in prædicatione Euangelij, quod Dominus Iesus ipse nobis tradidit atque docuit. *Obsecrans etiam si quomodo.*] siue per tranquillitatem, siue per tribulationem, siue terra, siue mari, ad vos corpore etiam perueniam. Prosperum iter dicit secundum Dei voluntatem, non suam, qui quælibet sanctorum pericula cooperatur eis in bonum, & melius eis prouidet quàm ipsi sibi prouidere queant; cum in omnibus decantat quisque religiosus: *Fiat voluntas tua*, non .s. mea.

DESIDERO enim.] Causa est cur oret venire ad eos, ut videlicet sua prædicatione aliquod spirituale donum eis impendat, confirmando eos suis adhortationibus in ipsa doctrina quam acceperant. Quod videlicet confirmare eos dicit esse, seipsum simul consolari in eis sicut & ipsi consolarentur in eo; hoc est, dicit hoc cōmune fore solatiū tam sibi qui instrueret, quàm illis qui instruerentur. Illis quidē, quia confirmarentur per eius rationes, si in aliquibus dubitarēt ac titubarent; ei verò qui illis cōfirmatis securior esset de perseverantia eorū. Hoc est illud commune solatium, quod in ipso hypotheticorum syllogismorum exordio inter docentes & discentes Boetius commemorat, dicens: *Cū in omnibus Philosophiæ disciplinis ediscendis atque tractandis summum in vita solatium positum esse existimem, &c.* *Spiritualis gratiæ.*] .i. alicuius spiritualis, non corporalis doni gratis ab Apostolo impensi, non spe temporalis lucri. *Peream fidem.*] Quam iam habetis mecum communem .i. ad confirmandos vos in ea fide, quæ iam vobis prædicata est, non in alia noua. *Quæ est inuicem.*] .i. quā inter nos habemus communem, vel quæ omnium communis est fidelium. Vnde & Catholica dicitur .i. vniuersalis, non priuata aut particularis; sicut hæreticorum, quæ in aliquo esse potest terrarū angulo, non vbique dilatatur. Cum subdit,

Vestram atque meam, ostendit fidem suam, quæ omnium est fidelium, tam ipsorum Romanorum quàm Apostoli esse. Potest etiam dici tunc esse fides inuicem, quando ipsos fideles vicaria caritate ad inuicem constringit. Hæc est enim vera illa fides, quæ, sicut ipsemet dicit, per dilectionem operatur.

Nolo autem.] Ne paruum videatur desiderium Apostoli veniendi ad eos nisi id facere iam aggressus esset, dicit se iam id sæpius ipso paratu aggressum esse, sed adhuc permissus non est id complere occulta Dei dispensatione ita disponente. *Venire inquam ad vos, propter hoc ut aliquem.*] .i. aliquam utilitatem in vobis conferam. Fructus quippe arboris non ferenti, sed accipienti utilis est, & Apostolo bonæ voluntatis desiderium sufficit si effectus desit, nec quicquam de merito illius minuitur si impeditur effectus. *Græcis ac barbaris.*] Ac si diceret, Et hoc quidem oportet me velle quia secundum prædicationis officium mihi iniunctum omnibus gentibus debitor à Deo constitutus sum. Præter Græcos omnes cæteras gentes barbaras vocat tam à cultu vnius Dei quam à lege Dei penitus alienas. Apud Græcos verò iam vnius Dei fides per Philosophos innotuerat. Lex per septuaginta interpretes translata nota erat. *Sapientibus & insipientibus.*] .i. tam fidelibus iam per Christum & Dei sapientiam illuminatis, sicut vos estis, quàm infidelibus. Illis quidem ut eos confirmem, istis verò ut ipsos conuertam. *Ita quidem in me.*] Debitor sum, inquam, & voluntarius in soluendo quæ debeo: & hoc est, ita debitor sum, quod in me promptum est euangelizare vobis .i. quantum in me est iam pronus sum & voluntarius in soluendo quod debeo ex iniuncto mihi officio, ad prædicandum scilicet vobis, sicut & cæteris Gentibus prædicaui. Licet enim iam conuersi essent ad fidem, in multis tamen adhuc eis prædicatione vel exhortatione opus erat. Potest etiam quantum ad cæteros Romanos id accipi, qui nondum conuersi fuerat. Vnde & generaliter dicit vobis qui Romæ estis, non qui conuersi estis. *Non enim.*] Ideo promptum est in me, quia non erubesco prædicare Euangelium, licet in eo quædam erubescencia digna videantur, quæ videlicet iuxta infirmitatem assumptæ humanitatis de Domino Iesu prædicatur. Aliter. Nō erubesco Euangelium .i. prædicationem Euangelij .i. cōfutari non possum sicut illi qui rationibus reddendis deficiunt. *Virtus enim.*] Ac si

diceret, Ideò in me promptū est euangelizare, vel non erubescō Euangelium propter infirmitatem assumptæ humanitatis quia Euangelium omni credenti & suscipienti illud est virtus Dei .i. s. hoc est collata à Deo nobis ad saluandum non tantquam virtus, per quam quisque proficit. Euangelium .i. bonum nuntium, per excellentiam nouum Testamentum dicitur, non solum vt superius insinuauimus, quia completum docet quod in veteri Testamento erat promissum, verum etiā quia eius perfecta penitus & veræ prorsus iustitiæ sufficiens doctrina est; cū lex vetus, vt ipse Apostolus ait, ad perfectionem nihil adduxerit, opera magis quàm intentionem corrigens. *Iudæo primum.*] Tempore, & postmodum Græco. Primum enim Apostoli ex Iudæis conuersi sunt, per quos inde ad Græcos prædicatio Euangelij descendit, tandem ad Latinos. Vnde etiam illud quod dictum est, primum respectu Romanorum siue ceterarum gentium ad Iudæos simul & Græcos referri potest. Vel *primum* .i. maximè dicamus quod in tempore Apostoli Pauli de alijs populis conuersi iam essent.

IUSTITIA enim Dei.] Verè in salutem, quia ibi totius salutis doctrina continetur, vbi videlicet iustitia Dei .i. iusta eius remuneratio siue in electis ad gloriam, siue in impijs ad pœnam liquidè & perfectè continetur & traditur. Et hoc est, *In eo.*] Scilicet, Euāgelio reuelatur .i. in eius prædicatione docetur iustitia Dei .i. iusta eius in quibuscunque remuneratio tã electis vt dictum est, quàm reprobis. Reuelatur, inquam, ex fide in fidem .i. ex fide pœnarum dirigente nos in fidem præmiorum. Consequens est enim quasi à contrarijs, vt dum nouerimus quòd pœnam apud Deum mereantur, subintelligamus & quòd præmium assequantur. Quia necesse est eum qui mala oderit bona diligere, sicut scriptum est: *Dilexisti iustitiā, & odisti iniquitatem.* Maximè autem hæc in Euangelio reuelari & distingui arbitror, vbi Dominus cuncta quæ fiunt secundum radicem intentionis examinat, dicens: *Si oculus tuus fuerit simplex, totum corpus tuum lucidum erit. Si oculus tuus fuerit tenebrosus, totum corpus tuum tenebrosus erit.* Et hoc quidem est examen veræ iustitiæ, vbi cuncta quæ fiunt secundum intentionem pensantur magis quàm secundum operum qualitatē. Quæ quidem opera Iudæi magis quàm intentionem atten-

debant, cum nunc Christiani naturali suscitata iustitia non tam attendant quæ fiunt quàm quo animo fiant. Habemus etiam ibi in Euangelio manifestè vtramque retributionem, vbi dicitur à Domino, *Ite maledicti, & venite benedicti*. Iuxta quod alibi ait: *Eadem quippe mensura, &c.* Cùm dicitur ex fide puniendorum, in fidem glorificandorum, ordinem dici iudicij tenemus, vbi impijs punitis coronabuntur electi.

* f. perse-
ueran

Prima in-
uentione in
Iudæos &
Gentiles.

SICUT scriptum est in *Abachuc*, s. Propheta, *Iustus ex fide vivit*.] .i. secundum quam reuelationem factam, de his videlicet quæ credenda sunt, tam de pœnis impiorum, quàm de præmijs iustorum, quilibet electus in sua perseueratus* iustitia, dum hæc videlicet cauet quæ punienda credit, & contraria quæ placitura Deo credit appetit; vt animi terrorem superbis inculcat Romanis, illam partem hîc diuinæ iustitiæ prosequitur, qua punit eos, dicens: *Reuelatur ira*.] Quod dixit iustitiam Dei reuelari ibi ex fide, scilicet iniustorum, vt diximus, puniendorum; nunc manifestè determinat dicens, quia ibi .i. in Euangelio manifestatur ira Dei .i. iusta eius vindicta super iniquos. *Dei de cælo*.] Dicit ad differentiam falsorum Deorum, siue vicariorum Dei in Ecclesia, quibus dicitur, *Ego dixi, dñs estis*. Vel reuelatur de cælo .i. ex ruina superbientium Angelorum de cælo factam, ab æterna scilicet beatitudine irreuerabiliter alienatorum. Si enim tam preciosas creaturas tam cito pœna irreuerabili damnare sustinuit, quid de hominibus sperandum est tot peccatis eum offendentibus? Aliter de vindicta illa præuaricationis Angelicæ patenter ostenditur, vnde ad damnandum irascatur, de peruersa scilicet voluntate priusquam de opere. Non enim diabolus hoc quod superbiendo voluit, dicens apud se, *Ponam sedem meam, &c.* opere compleuit. Vnde nequaquam eum effectus operis, qui subsecutus est, sed voluntas damnauit. Sic & Simon Magus donum miraculorum concupiscendo, quod non obtinuit, non ex opere; sed ex infidelitate, quod venale scilicet Spiritum sanctum credidit, damnatus est, sicut & ei Petrus ait: *Quia existimasti, &c. Impietatē*.] Quantū ad maiorem transgressionē Iudæorum, qui lege etiā scripta instructi erant. *Et in iustitiā*.] Quantū ad transgressionē Gentiliū, qui sola naturali lege utebantur. Super omnē impietate .i. ad puniendū omnem, &c. Et bene super esse dicitur, quasi præualere in illis qui

qui se ab eo tanquam superiori defendere nullatenus valent. *Veritatem m. i. i. d.*] Hoc quod de vero Deo sentiunt fructificare non permittunt, iniusta desideria sua sectantes, & voluntatem suam diuinæ voluntati præponentes.

QVIA quod notum est Dei.] Nota quoniam Apostolus in hac Epistola, sicut suprâ meminimus, ad reprimendam tam Iudæorum quàm Gentilium superbè contendentium elationem, alternatim in utrosque, modò in Gentiles, modò in utrosque simul inuehitur. In utrosque autè pariter iam quandam præmisit inuectionem, cum ait, *Super omnem impietatem & iniustitiam*, ostendens Dominum ad ultionem præparatum. Nunc maximè ac specialiter in Gentiles inuehitur, qui iuxta rationes suas minus reprehensibiles videbantur, ac penè omnino inexcusabiles, quod Deo vero non seruierant, quem sine lege scripta ut aiebant, cognoscere non valebant. Quam quidem excusationem manifestè retundit, etiam sine scripto à Gentibus per naturalem legem Dominum antea notum fuisse, ipso eis de seipsis per rationem quam dederat, hoc est legem naturalem, ac per visibilia sua opera notitiam conferente. Et hoc est quod ait, *quod notum est*. Tãquam diceret: dixi eos detinere quod de Deo vero sentiunt, & bene dixi quod sentiunt.

Secunda inuectio in Gentiles.

Quia quod notum est Dei.] .i. de natura diuinitatis modo reuelatum est mundo per legem scriptam, etiam sine scripto per naturalem rationem manifestum ante fuerat. *In illis.*] .i. non tantum illis, verum etiam per illos alijs. Vnde & multa de Trinitate testimonia aperta in Philosophorum Libris reperiuntur, qui Gentium magistri erant: quæ etiam sancti Patres in nostræ fidei commendationem aduersum Gentilium impugnationem diligenter collegerunt. Quorum pleraque & nos etiam in Theologiæ nostræ opusculo contulimus. *Deus enim illis reuelauit.*] Saltem per effecta suorum operum. Et hoc est quod subdit.

INVISIBILIA enim, &c.] Totum hic mysterium Trinitatis distinguit, ut non solum vnitatem Dei, verum & Trinitatem ex ipsis operibus perpendere possent: quemadmodum ex qualitate operis cuiuslibet, qualis & cuius solertia fuerit artifex eius conijcimus. Et attende diligenter dictum quod notum est Dei illis reuelatum fuisse, hoc est eos credidisse ea quæ nunc credimus de his quæ ad diuinitatem quidem perti-

nent potius quàm ad diuinæ Incarnationis mysteriũ. Mysteriũ quippe Incarnationis ex visibilibus Dei operibus nequaquã cõcipi humana poterat ratione, sicut potentia Dei, & sapiẽtia eius, & benignitas ex his quæ videbant liquidè percipiebantur. In quibus quidem tribus totam Trinitatis distinctionẽ consistere credo. Id quippe Deus Pater sonare mihi videtur quod sonat diuina potentia diuinam generans sapientiam, .i. filium, & Deus quidem filius tantumdem quantum diuina sapientia ex Deo Patre genita, & Deus Spiritus sanctus quantum amor Dei siue benignitas ex Deo Patre procedens & Filio. Cõtinuatio. Deus illis reuelauit, quia per rationem, quam Deus eis contulit, ex visibilibus ipsius operibus diuina eius Trinitas innotuit, & per effecta sua ipse artifex sui notitiam eis imperfit. Et hoc est quod ait, *Inuisibilia enim ipsius .i. Dei*, quod est dicere multiplex eius seu septiformis Spiritus, qui etiam septem spiritus nonnunquam dicitur, sicut septiformis gratiæ dona: ipse, inquam, septiformis spiritus Dei conspicitur intellectus .i. perpenditur non oculis corporis, sed intelligentia rationis.

A CREATURA mundi p. e. q. f. f. i.) .i. intelligi per effecta mūdānorum operum, quæ tam optimè fieri voluit ac disponi. *Sempiterna eius.*) hĩc sapientiam eius .i. Dei intelligimus, quæ est, vt diximus, Filius Dei: de quo alibi idem Apostolus dicit: *Christum Dei virtutem, & Dei sapientiam.* Quæ quidem sapientiam Euangelista Verbum .i. mentis conceptum, Philosophus mentem nominat, quam ex Deo natam affirmat. Virtus quidem Dei sapientia eius dicitur, secundum id quod in sapientia omnia optimè facit ac disponit. Debile quippe atque inualidũ opus est, quod solerter factum non est. Diuinitas verò hoc loco pro maiestate diuinæ potentiæ accipitur, quæ specialiter ex nomine Patris, sicut reor, innuitur. Deus quippe teste Isidoro, *timor* .i. timor interpretatur, & potestas quælibet timor est subiectorum. Vnde meritò nomine Dei siue diuinitatis .i. deitatis, diuina specialiter exprimitur potentia. Quod diligenter maximus Episcopus in expositione Symboli, quod dicitur Apostolorũ, quæ legitur in v. Quadagesimæ Dominica his verbis insinuat. *Credis, inquit, in Deum Patrem omnipotentem. In Deo natura innascibilis, in Patre ingentis veritas, in omnipotente plenitudo virtutis, ostenditur. Est namque*

per ingenitam diuinitatem omnipotens, & per omnipotentiam Pater.

De his autem in primo Theologiæ nostræ prout potuimus satis diligenter disseruimus. Apparet itaque maximè ex ipsa mundanæ fabricæ vniuersitate tam mirabiliter facta, tam decenter ornata, quantæ potentia, quantæ sapientiæ, quantæ bonitas eius artifex sit, qui tantum & tale opus de nihilo facere potuit & voluit, & tam solerter & rationabiliter cuncta temperauit, ita vt in singulis nihil plus aut minus quàm oportuerit actum sit. Vnde & Plato ipse? cum de genitura mundi ageret, in tantum diuinæ potentia & sapientiæ bonitatem extulit, vt astrueret Deum nullatenus potuisse mundū meliorem facere quàm fecerit. Non solum autem Philosophi Gentium ex ipsa mundi compositione vel ornatu mirabili mirabilem eius artificem perceperunt, verum & ex optima eius dispositione optimam diuinæ gubernationis prouidentiam rationibus congruis assignarūt. Quorum vnus Tullius in primo Rhetor. suæ, mundum ipsum prouidentiā, non fortuitu Regi valida ratione monstrauit; cū videlicet ea quæ consilio ac prouidentia reguntur, melius procedere atque administrari proponeret quàm alia: ac statim nihil melius & ordinatius administrari vel disponi, quàm mundum ipsum assumeret, atque hoc quoque illico manifesta ratione conuinceret, ostendens scilicet quàm vtiliter & rationabiliter ea quæ in mūdo sunt in sua ordinatione perseuerent. Possumus & quod ait Apostolus, *Inuisibilia enim ipsius à creatura mundi, &c.* non solum ita exponere, quod ex compositione & ex ornatu mundi potuerit per humanam rationem ipsa artificis potentia, sapientia atque bonitas percipi, secundum quæ, vt diximus, tres in Deo personæ distinguuntur: verum & dicere eousque per similitudinem corporalium rerum humanam rationem conscendisse, vt ipsam Dei vnitatem atque in eo personarum Trinitatem, & quomodo ipsæ personæ inuicē se habeant congruis similitudinum exemplis assignare valeret, ponendo videlicet ante oculos aliquam mundi creaturā sicuti æream substantiā*, & attendendo aliquid quod fiat in ipsa ærea substantia, vt per imaginem æream, quæ nostra operatione ipso ære facta est: ita quidem vt ipsum æs & ærea statua, quæ in ære ipso vel ex ære facta est, eadem res sint essentialiter siue numero, sed tamen proprietatibus suis diuersa

* S. Bernardus Ep. 190.
hanc similitudinem res-
sellit.

sint; cū videlicet aliud sit proprium æris, aliud græ statua.
 Et quamuis idem sint essentialiter æs & ærea statua, ærea ta-
 men statua ex ære est, non æs ex ærea statua. Sic & in diuina
 Trinitate cū sit eadem substantia trium personarum .i. Pa-
 tris, & Filij, & Spiritus sancti, diuersæ tamen sunt in suis pro-
 prietatibus personæ; cū sit aliud proprium Patris, aliud Filij,
 aliud Spiritus sancti. Et quamuis sit vnaquæque persona idem
 essentialiter cum cæteris, Filius tamen ex Patre tanquā ærea
 imago ex ære, nō Pater ex Filio sicut nec ipsum æs est ex ærea
 imagine; & Spiritus sanctus à duabus alijs habet esse personis,
 non illæ ab eo. Sed & de his quidem quantum oportuit in II.
 Theologiæ nostræ nos tractasse arbitramur. Nunc ad litte-
 ram reuertamur.

A CREATURA mundi per ea que facta sunt in ea.] .i. per ali-
 quā creaturā mundi, sicuti per ipsum æs, & per illa quæ in ipso
 ære facta sunt, sicut est imago ærea vel aliquid simile. Cætera
 in expositione non mutantur. *Ita ut sint inexcusabiles.*] .i. iam
 non possint se Gentiles per ignorantiam excusare, de notitia
 scilicet vnius Dei, quamuis legē scriptam non habuerint. Et
 vnde sint inexcusabiles exponit. *Quia cum cognouissent Domi-
 num.*] per humanam scilicet rationem, quæ lex naturalis dici-
 tur. *Non sicut Deum glorificauerunt.*] .i. debitum reuerentiæ
 cultum ei per humilitatem non exhibuerūt. *Nec gratias ege-
 runt.*] Recognoscentes scilicet ex dono gratiæ eius esse hanc
 notitiam de ipso habitā quam præ cæteris habebāt, & ob hoc
 eum laudantes. *Sed euauerunt in cogitationibus suis.*] More vi-
 delicet fumi, qui quod altiùs conscendit, magis deficit atque
 annullatur. Sic & isti quod magis ex arrogantia intumescebāt
 propter scientiā quā adepti erant, suo studio vel ingenio, non
 diuinæ gratiæ eam ascribentes, magis excæcati meruerunt, &
 in errorē amplius deuolui. Et hoc est quod exponens subdit:
Et obscuratū est insipiens cor eorū.] Insipiens fuit, qui sibi, non Deo
 propriū ipsius donum tribuerunt: & ex se, non ab ipso hoc se
 habere crediderunt. Vnde meritò est cor obscuratum, & ipsa
 in eis naturalis ratio obtenebrata. Verè obscuratum, *Quia
 stulti facti sunt.*] & illa nobili cognitione priuati. *Dicentes se
 esse sapientes.*] .i. iactātes se esse potius sapientes ex seipsis, quā
 sapientes esse factos à Domino. Et in quantam stulticiam,
 immò insaniam proripuit, tam per infidelitatis errorem

quàm per ignorantiam vitæ, subiungit dicens.

Et mutauerunt gloriam.] .i. honorem & sacrificia, quæ debuissent vero Deo exhibere, qui videlicet corrumpi aut mutari in aliquo non potest, exhibuerunt falso homini .i. imaginariæ similitudini hominis corruptibilis & mortalis, idololatricæ scilicet facti; & non solum in similitudinem hominis, verum etiam quorumlibet irrationalium animalium, tam *volucrum*, scilicet quàm *quadrupedum & serpentum*. Fortasse autem credebant quosdam spiritus, quos Deos vocabant, præesse hominibus; quosdam cæteris animantibus. Et ideo eos colebant in formis eorum, quibus præesse videbantur. Haymo. Assyrij simulacrum Beli patris Nini Regis pro Deo colebant, & Babilonij ipsum quem vocant Bel, Sidonij Baal, Indi Belzebuth, & Philistæi. Romani colebant anserem, & Ægyptij accipitrem. Item Ægyptij colebant Apim, hoc est vaccam albam, Babilonij draconem, & Ægyptij crocodillum, qui est serpens aquaticus natans in aqua ut piscis, pasceus in terra ut bos. *Propter quod.*] videlicet quia à Domino desipuerunt, ut falsa animalia .i. animalium simulachra pro Deo ederent; *tradidit illos Deus.*] .i. permisit abire post immunda desideria sua, ut quod turpiter mente conceperant, turpius etiam opere complerent. *Vt afficiant.*] .i. affligant, & in quandam contrariam naturam cogant, & dedecorent corpora sua contumeliosis immundicijs sodomiticiis peccati in semetipsis commissi, ut seipsos mutuò polluant.

Qui commutauerunt.] submissio siue repetitio causæ, quare id videlicet permiserit de illis Deus, quia in eum, inquit, maximè deliquerunt. *Commutes veritatem Dei i. m.*] .i. sub nomine & honore veri Dei colentes falsos Deos: & seruiuerunt creaturæ .i. demoniacis spiritibus, quos inhabitare simulacra credebant. *Qui est benedictus.*] .i. qui glorificatur, hoc est laudabilis apparet ex vniuersis suis creaturis per omnes temporum successiones. *Secula.*] quasi à loquendo dictæ sunt ipsæ temporum successiones. *Amen.*] .i. verum est. Modò enim confirmandi, modò optandi aduerbium est hoc. *Propterea tradidit.*] Quia videlicet interim excellentiæ diuinæ derogauerunt, non sufficit semel hoc dicere, ut magis deterreat auditorem à talibus. Passiones igno-

miniosas dicit pollutiones non naturalis libidinis. Pati merito dicitur quælibet substantia, & quasi quandam sustinere violentiam, quoties cōtra naturam aliquid in ea agitur. Quæ verò sint huiusmodi turpitudines statim annectit, tam feminis quam viris eas assignando ad maiorem vindictam Dei probandam. Feminae eorum dicuntur, quas ipsi pessimi exempli doctrina quasi suas in hoc fecerant. *Qui est contra naturam.*] & ideo magis abusus dicendus est quàm vsus. Contra naturā, hoc est contra naturæ institutionem, quæ genitalia feminarum vsui virorum præparauit, & è conuerso; non vt feminae feminis cohabitarent. *Exarserunt.*] .i. contra legem naturæ accensi sunt in suis desiderijs, vel naturæ voluptatibus. *Et mercedem.*] .i. retributionem, debitā sui erroris, hoc est excæcationis atque idolatriæ. *Recipientes in semetipsis.*] mutuo scilicet se inuicem polluentes in corpore, sicut animo corrupti erant infidelitate. *Et sicut non prob.*] hoc est laudauerunt atque elegerunt. *Dominum.*] quæ cognouerant, *Habere in notitia.*] hoc est retinere in memoria ei cohærendo. *Tradidit illos i. r. s.*] hoc est ita penitus excæcari permisit, vt omninò conscriplerant, *ita vt faciant.*] .i. opere impleant ea quæ non conueniunt, non solum quæ mala sunt apud Deum, sed quæ nulli hominum disciplinæ concordant, aut aliqua ratione excusari etiam apud impios valeant. Illos dico *repletos omni immunditia.*] Hoc est non omnibus simul tantum peccatis, sed singulis repletos; ita scilicet vt vnaquæque iniquitas in eis plena & perfecta reperiatur. Vnde statim enumerando subdividit iniquitatis partes, quibus eos repleri ostendit.

MALITIA.] Per quam student alijs damnum inferre. *Fornicatio.*] Quæ est omnis illicitus concubitus, extra vxorem videlicet. *Avaritia.*] .i. immoderato terrenorum desiderio. *Nequitia.*] Qua & alios corrumpere gaudent, quibus non sufficit vt soli moriantur. *Inuidia.*] De bonis alterius dolendo. *Homicidys.*] Tam opere si possunt quàm voluntate. *Contentione.*] Apertè veritati contradicendo, *Dolo.*] .i. simulatione, quando scilicet occultè aliud agitur, & aliud simulatur. *Malignitate.*] In ipsos, & benefactores suos, *Susurriones.*] .i. latenter cum apertè non valent detrahentes, & cum audent etiam in aperto. *Detrañores.*] Et per hoc non solum hominibus quibus detrahunt, vel nocere volunt, verum etiam Deo

odibiles, contumeliosos.] Inferendo conuitia, *Superbos.*] Appetendo esse super æquales. *Elatos.*] Appetendo æquari superioribus. *Inuentores malorum.*] .i. cogitantes nouum aliquod peccandi genus in quo delectarentur. *Parentibus non obediētes.*] Et in hoc inhumani, & feris ipsis indomitiores. *Inspicientes.*] Iam ex consuetudine mali discretionem boni non habentes. *Incompositos.*] quantum ad exteriorem habitum, qui malè ordinatæ mentis nuncius. *Sine affectione.*] scilicet naturalis benignitatis in proximos sui generis. *Sine misericordia.*] .i. compassione alienarum miseriarum. *Sine fœdere.*] .i. mutuo caritatis vinculo in aliquos, vel alicuius pacti obseruatione. Qui etiam in tãram deuoluti sunt excæcationem, vt non per pœnitentiam redire sciant, non iam intelligentes .i. non attendentes vel curantes. *Quoniam qui talia agunt digni sunt morte,*) videlicet æterna, cùm .i. quamuis, iustitiam Dei primitus cognouissent .i. eius debitam vindictam de singulis peccatis. *Sed & qui consentiunt.*) Consentire hîc dicit non resistere aliquem peccato alterius cùm possit & debeat. Multorum enim fortassè Deus resistere peccatis posset, disturbando scilicet, ne fierent, nec tamen debet culpis nostris exigentibus, vel ipsis peccatis, in melius vtendo : ideoque consentire peccatis nullo modo dicendus est. Notandum verò non de omnibus Philosophis vel naturali lege vtentibus hanc excæcationem vel malitiã prædictam esse intelligendam, cùm plerique illorum tam fide quàm moribus Deo acceptabiles extiterint, veluti Iob gentilis, & nonnulli fortasse Philosophorū Gentium, qui continentissimæ vitæ fuerunt ante ipsum Domini aduentum. De qualibus beatus Hieronymus super Matthæum commemorans ait: *Ex eo quod malus seruus ausus est dicere, Metis ubi non seminasti; & congregas ubi non sparsisti, intelligimus etiam, Gentium Philosophorum bonam vitam recipere Dominum, & aliter habere eos qui iustè, aliter eos qui iniustè agunt ad comparationem eius qui naturali legi seruiat, condemnari eos qui scriptam legem negligunt.* Metere itaque Dominum ubi non seminauerit, iuxta Hieronymum, intelligimus eos etiam qui per naturalem legem benè agunt ad vitam colligere: in quibus scilicet nullum prædicationis verbum seminatum est. Sed quia fortassis inter Philosophos pauci tales extiterunt, quasi generaliter sine aliquorū exceptione hoc de eis supra dictum

est, ut sapientes minus de sua sapientia præsumant, quæ magis inflare quàm edificare solet; ipso alibi attestante Apostolo. *Scientia inflat, charitas aedificat.* Sufficiebat enim etiam hoc loco Apostolus ad reprimendam superbam Romanorum Gentilium contentionem, & humilitatem conseruandam, ostendere per aliquos Philosophorum Gentilibus notitiã siue fidem Dei innotuisse, & eosdem ipsos fidei magistros grauitèr deliquisse; ut vsque & ad idolatriam eorum cæcitas duceretur, & cum summo idolatriæ errore ad summam etiam ignominiam vitæ deuoluerentur, ut supra memorauit. Quæ omnia pœnam esse peccati superbiæ docet, ut secundum intentionem præsentis Epistolæ, quæ tota etiam contra superbiæ pestem scripta est, à superbia in ipso statim Epistolæ exordio dehortetur. Pœna præcedētis peccati sequēs peccatū dicitur iusta eius remuneratio ad pœnā, cum ex præcedenti peccato quod corrigere negligit promeretur aliquis in aliud peccatū deuolui; ut iuxta illud Apoc. *Qui in sordibus est, sordescat adhuc.*

- Quæstio 1. TRES in hoc loco quæstiones occurrunt. Quarum quidem vna est, Quid sit quod idolatriam faciat, cum nos etiam Christiani nonnulla in cultu Dei vel Angelorum aut sanctorum hominum sculptilia siue picturas habeamus, Alia verò
- Quæstio 2. quæstio est, Cur dicitur Deus aliquem pro præcedētibus peccatis in alia peccata tradere, atque hoc ex iustitia agere; cum scilicet ille qui traditur hoc meruit. Vtrum Deus quoque author vel causa peccati sit, cum subtrahendo gratiam suam eum compellere ad peccandum videatur, qui ea subtracta à peccato sibi minimè possit cauere. Quemadmodum si quis ei qui inter fluctus in naui nauim subtrahat quacunque de causa, & eum ibi dimittat; eum profectò non cōpellit. Tertia autem
- Quæstio 3. est quæstio, Quomodo iustū sit impio Dominū subtrahere gratiam suam, qua subtracta ille deterior fiat, & ampliùs peccet, nisi etiam iustum sit illum deteriorem fieri, & ampliùs peccare; hoc est ampliùs creatorem suum offendere atque contemnere. Quis hoc autem, quod iniquissimum est, iustū esse dicat; cum videlicet potius resipiscere peccator debeat quàm augere peccata? Quippe si iustum esset eum ampliùs peccare, quomodo reus statueretur, aut etiam peccare diceretur id faciendo, quod utique eum facere iustum esset? Sed harum quidem trium propositarum quæstionum solutiones

tiones Theologiæ nostræ examini reseruamus.

PROPTER quod.] A singulari inuentione in Gentiles ad
generalem transit, ac si ita dicat. Quandoquidem hi se excu-
sare non possunt per ignorantiam Dei à peccato. i. à con-
temptu Creatoris, quibus lex scripta non data est, ergo nul-
lus, & hoc est. *Ergo inexcusabilis es homo omnis qui iudicas.*] Om-
nis inquam qui iudicas .i. iudicium rationis & discretionem
boni habes & mali. Ab hoc quippe contempti paruuli qui
nondum discretionem habent liberi sunt. *In quo enim vere
inexcusabiles.*] Quia etiam proprio tuo iudicio condemnan-
dus, cum in alijs reprehendas eadem quæ facis, aut similia.
Hoc autem maximè spectat ad superbam Romanorum con-
tentionem, qua se alterutrum præponere volebant, & seip-
sos singuli defendentes alios criminosos iudicabant. *In quo
enim iudicas.*] .i. de eodem peccato de quo iudicas .i. repre-
hendis alterum & censes damnandum, te ipsum condemnas
.i. ea operando damnabilē facis vel asseris, & in teipsum pro-
prio iudicio sententiam profers, & quare vel quomodo sup-
ponit dicens. *Eadem verò agis quæ iudicas.*] .i. quæ in alijs re-
prehendis, scilicet mala opera quæ contra propriam consciē-
tiam cōmittis. Et dixi quæ iudicas reprehendēdo, sed bene iu-
dicas hæc arguendo quæ Deus ipse iudicat puniendo: & hoc
est, *Scimus enim, &c.*] vel ita. Dixi, te ipsum condemnas. i. dā-
nabilem facis ea operando. Et verum est quidem. Scimus
enim nos. s. diuina gratia illuminari; quoniam iudicium Dei,
quod est secundum veritatem ipsam rei, non falli potest. *Est
in eos.*] .i. contra illos. *Qui talia agunt.*] Ad ipsos scilicet pu-
niendos atque dānandos. Et cum ita sit, quòd videlicet Deus
tales damnet. *Existimas tu qui iudicas.*] .i. arguis vel accusas
eos qui talia agunt, & facis ea.] Existimas, inquam, quia tu ef-
fugies iudicium Dei .i. iustam eius de talibus vindictam, &
nunquid etiā ignoras, quia tanto dānabilior es quantò maio-
ri patientia Deus te expectat, & expectando diu ad pœniten-
tiam eius inuitat benignitas, & hanc eius benignitatem pa-
tientia in contemptum eius conuertis, & tanto minus cum
vereris quanto amplius sustinet offensas tuas, nec statim pu-
nit. Et hoc est quod ait, *An ignoras.*] Nunquid contemnis di-
uitias bonitatis eius .i. Dei, hoc est diuitem & copiosam eius
animi dulcedinem: bonitatis dico, patientia & longanimi-

tatis .i. longæ eius patientiæ. *Ignorans quoniam benignitas Dei.*] .i. hæc bonitatis eius exhibitio, qua expectat te. *Adducit.*] quantum in ipsa est .i. inuitat, adhortatur ad pœnitentiam peccatorum tuorum potius quàm ad contemptû expectantis. *Sed tu secundum duritiem tuam & cor impenitens thesaurizas tibi.*] .i. studiose tanquàm preciosas diuitias accumulas tibi. *Iram.*] .i. vindictâ exercendâ in te. *In die.*] .i. in tēpore iræ, & reuelationis .i. vindictæ Dei in te reuelādæ, & vt ira illa potius iustitiæ quàm crudelitatis intelligatur. Et deliberationis magis quàm præsūptionis addit: *Iusti iudicis.*] .i. iræ dico .i. vindictæ proueniētis ex iudicio iustæ deliberationis Dei, qui iniustè agere non potest. Quàm vero iustum sit diuinum iudicium supponit dicens.

Qui reddet unicuique.] Quod videlicet meruerit. *Secundum Opera.*] .i. qualitatem operum, quæ magis in intentione quàm in actione consistit. Secundum qualitatem operû est qualitas retributionis, quia qualia sunt opera, talis & retributio, pro bono scilicet bonum, pro malo malum, cùm apud Deum voluntas ipsa pro opere facti reputetur. Vnde & ipse probator cordis & renum in abscondito videre dicitur. Opus hoc loco pro affectu operis ponit. Ab effectu videlicet ad causam vocabulo translato. Alioquin non ostenderetur æquum esse iudicium Dei, cùm opera indifferentia sint in se, scilicet nec bona nec mala, siue remuneratione digna videantur, nisi secundum radicem intentionis, quæ est arbor bonum vel malum proferens fructum. Tale est ergo quod ait: *Secundû opera eius*, ac si diceret: secundum voluntatem eorum quæ fieri vel non fieri appetunt. Alioquin superbia diaboli, vel cupiditas Simonis, quæ non obtinuerunt operis effectum, ad hoc iudicium pertinere non viderentur. Paruuli autem qui intra annos discretionis morientes iudicium habere non videntur, ad huius iudicij reuelationem non pertinent, qua videlicet dicitur: *Reddet unicuique secundum opera eius* .i. tribuet ei quod meruerit. Diligenter itaque expressit Apostolus quid sit accipiendum iudicium Dei, cùm ait reuelationem iudicij. Nō enim verbis, sed exhibitione operis quisque ibi iudicabitur, .i. manifestabitur an præmio vel pœna dignus fuerit. Cuius quidem dum viveret occultus etiâ sanctis exitus habebatur. Vtrum videlicet prædestinatus esset ad vitam vel non. Hoc autem iudiciû .i. hæc reuelatio seu discussio diuini examinis,

& singulariter quotidie fit in exitu singulorum morientium, & generaliter in fine seculi facienda est. Vbi quidem omnes omnibus reuelabuntur, quales videlicet antea fuerint, an præmio scilicet an pœna digni. In illa verò generali discussione bini in electis & reprobis ordines esse dicuntur. Quidam enim electorum .i. prædestinatorum ibi iudicabunt tantum & non iudicabuntur. Sic & reproborum duo erunt ordines cum alij eorum iudicandi sint tantum, alij minimè iudicandi sint. Quicunque enim electi purgati ante diem iudicii non inueniuntur, iudicandi .i. reuelandi ibi erunt: de quibus alibi ait: *Ipse autem saluus erit, sic tamen quasi per ignem.* Qui vero perfectæ vitæ inuenti fuerint, vel ante ipsum iudicium purgati, non erunt ibi iudicandi .i. reuelandi; sed porius cum ipso Christo pariter iudicabunt. Cuius quidem maiestatis & gloriæ participes ita fulgebunt, ut statim ex ipsis appareat sicut ex ipso Christo, quam bene egerint, qui eis adhæserunt, quam malè qui eos contempserunt. Et ita ipsi quoque tanquam iudices cum Christo residebunt, securi penitus de se, & alios iudicantes; hoc est, ut dictum est, reuelantes an benè eum eis an in eos malè egerint, ut præmio ex hoc vel pœna digni sint. Reprobi verò, qui in infidelitate sua moriuntur, iam in ipso exitu suo iudicati sunt .i. reuelati, nec ulterius generaliter reuelandi sunt, iuxta illud Veritatis: *Qui non credit, iam iudicatus est.* Ij verò qui fidem habentes dubiam in occulto gesserunt vitam, propter quod eorum incertus est exitus, ibi iudicandi sunt .i. reuelandi.

His quidem qui secundum.] Quomodo secundum qualitatem operis sit qualitas retributionis ostendit, ut videlicet pro bono bonum reddatur, & è contrario. Et hoc est hic dicere, *Qui secundum patientiam boni operis.]* Subaudi sunt, ut videlicet ostendat bene agentibus tribulationes non deesse, per quas purgantur aut proficiunt. *Gloriam & honorem.]* .i. gloriosum honorem, cum nostra videlicet humanitas ad celsitudinem Angelorum peruenerit, & nos pariter hæredes Dei & cohæredes Christi cum ipso regnabimus. Et ne ista gloria ad animam tantum referatur, addit etiam de glorificatis corporibus quæ incorruptibilia erunt, dicens. *Et incorruptione.]* videlicet corporum, his inquam, *querentibus vitam.]* non transitoriam sicut vidimus, sed æternam sicut Christiani; ut ostē-

dat meritò id eos obtinere ad quod toto desiderio anhelaue-
runt, nec sua spe esse fraudatos, sicut de quolibet scriptum
est iusto. *Vitam petijt à te, & tribuisti ei.* Et item: *Desiderium animæ
eius tribuisti ei. His autem quæ ex contentione.*] sunt subaudis .i.
qui scienter diuinæ repugnant voluntati. Quod statim ex-
ponit dicens, *qui non acquiescunt veritati quam norunt*] vt vide-
licet operentur secundum quod operandum esse veraciter
credunt. *Sed magis credunt.*] i. acquiescunt vel assentiuntur
iniquitati, vt malum quod animo concipiunt opere cõpleant
i. adimplere studeant. Reddetur subaudis, *Ira & indignatio.*]
Quam videlicet meruerunt .i. vindicta Dei sine eorum pa-
tientia. Electi vero si qua in ipsis quandoque puniuntur, vt
videlicet purgentur patienter sustinent, nec indè irascuntur,
sed potius gaudent, atque grates referunt: attendentes quod
scriptum est, *Castigans castigauit me Dominus, & morti non tra-
didit me.* Et rursum, *Quos diligit Deus corrigit, flagellat autem
omnem filium quem recipit.* Vnde Hieronymus ad Castricianum,
Magna ira est quando peccantibus non irascitur Deus.

TRIBVLATIO & angustia.] Ostendit ex quibus prædi-
cta ira & indignatio proueniat. Tribulatio enim angustia est,
vbi is qui torquetur omni spe euadendi destitutus est, vt nec
spes ei ad remedium aliquod sit relicta, sed ipsa quoque des-
peratione torqueatur. Et quia dixerat hiis indefinite, addit
generaliter id fieri. *In omnem animam hominis operantis malum.*]
Tam Iudæi scilicet quàm Gentiles .i. tam scripta quàm natu-
rali lege instructi. *Operantis.*] inquit non operati .i. perseue-
rantis in malitia, non desistentis. Qui etiam inter ipsa tormẽ-
ta nec malam voluntatem deponent cum diabolo confirma-
ti, nolentes adhuc si liceret eadem agere, atque ideo perpe-
tua erit merito pœna, quia perpetua in animo perseuerabit
culpa. Vnde & beato attestante Hieronymo meritò Dominus
in die iudicij dicturus est, *Discedite à me qui operamini iniquita-
tem.* .i. qui non solum operati estis, sed adhuc in ipsis cordibus
vestris operamini. Vbi, vt suprà diximus, apud Deum volun-
tas pro opere facti computatur. Benè dicit in animam, non
in corpus hominis, vindictam fieri, quia solius animæ est non
corporis dolere siue sentire, & contristari vel delectari, irasci
vel gaudere. Et si diligenter consideremus sola ipsa quæ velle
potest, apud Deum voluntatis remuneratorem vel præmium

vel pœnam ex bona vel mala voluntate promeretur ; & sola propriè dicenda est peccare, sicut & virtutes habere, & sola beata effici ex visione diuinæ maiestatis, quæ oculis tantum mentis non corporis conspicitur. Quod autem quinque animæ sensus corporei dicuntur, cum sola tantum est, anima sentiat ; vel quod quædam peccata carnalia, quædam spiritalia vocentur, cum sola tantum anima peccet : quæ sola rationē habet, & velle potest : non ita est accipiendum, vt corpus ipsum vel sentiat, vel peccet, sed quia per ipsum vel sensus exercentur vel voluntates implentur, vt ingluuies gula, libido genitalibus. Sola itaque anima ex bona vel mala volūtate præmium vel pœnā apud Deum meretur & obtinet, & sola beatitudinis vel miseriæ particeps esse potest ; licet ex corpore resumpto pœna eius vel gloria augeatur. Vnde duplicem contritionem impiorum, & geminam stolam sanctorum, tam secundum animam scilicet quàm secundum corpus dicimus. Gaudebit amplius bona anima & creatorem magis glorificabit, cum corpus ipsum, quod hic tam infirmum & passibile gessit, viderit ibi ita aptatum, quod vltèrius dissolui non possit, nec ipsa ex contractu eius aliquam contrahere læsionem. Et hæc ipsa corporis humani reparatio, corporis glorificatio vel beatitudo dicitur. Sic & pœna corporis dici potest, quam anima ipsa per corporea sustinebit membra. Nec tamen cum ex corporibus geminetur animarum gloria vel pœna, idèd geminā istam gloriā vel pœnā simplici Angelorū vel demonū gloriæ vel pœnæ præferimus, qui corporeæ non sunt naturæ. Quod verò, vt dictū est, sola anima doleat vel sētiat, ipsi quoq; asserunt sancti. Vnde August. de ciuitate Dei lib. 20. c. 11. *Si consideremus diligentius, dolor qui dicitur corporis magis ad animam pertinet. Animæ est enim dolere, non corporis, etiam quando ei dolendi causa existit à corpore, cum in eo loco dolet ubi læditur corpus.* Idem super Genesim, *Sentire non est corporis, sed animæ per corpus.* Item, *Neque enim corpus sentit, sed anima per corpus.* Idem ad Dioscorum in ea Epistola, *Tu me innumerabilium questionum. Non igitur accipit animus à corpore vel summum bonum vel partem aliquam summi boni. Hoc qui non vident cecati sunt dulcedine carnalium voluptatum, quam ex indigentia sanitatis venire non intuentur. Sanitas autem perfectæ corporis illa extrema totius hominis immortalitas erit. Tam potenti enim natura Deus fecit animam, vt ex*

eius plenissima beatitudine, qua in fine temporum sanctis promittitur, redundet etiam in inferiorem naturam qua est corpus, non beatitudo qua fruētis & intelligentis est propria, sed plenitudo sanitatis & incorruptionis vigor.

[*IUDAEI primum & Græci.*] Iudæū vocat omnē scripta lege edoctū, Græcū omnē Gentilium more Philosophorū qui Græci fuerunt, ratione prædictum .i. naturali lege optimè instructum; quorum quo maior est discretio, maior est transgressio. Et ideo ait, *Iudei & Græci primum .i. maximè; operantis malū.*] .i. delinquentis, comparatione scilicet aliorum hominum quasi brutorum. *Gloria autem & honor.*] Repetit iustorum remunerationem, quam præmisit, vt ad eam sæpius memoratā nos accendat ampliùs. Pacem quidem dicit, non solum quietem ab infestatione exteriorum inimicorum, verū etiam concordiam illam spiritus & carnis, vt in nullo vlteriùs caro spiritui reluctetur, omnibus prorsus finitis carnalium suggestionum molestijs. *Iudeo primum & Græco bonum, scilicet operanti.*] Quo enim isti amplius summum bonum Dominū vel scripto vel ratione cognouerant, amplius eius voluntati sobrie viuendo inhærebant. Primum itaque & hoc loco pro maximè supraponit. *Non est enim.*] Dixi generaliter omni atque differenter, nullam faciens differentiam retributionis ex dignitate personarum. Et meritò, quia non est personarum acceptio apud Deum, hoc est, nunquam diuinum iudicium minus aliquem ibi punit vel magis glorificat pro aliqua dignitate vel excellentia, quam hic habere videbatur, sed æquè omnibus secundum merita reddit tam habentibus quàm nō habentibus legem, tam ijs qui se esse de genere Israel gloriantur, quàm cæteris. Et quod secundum merita tantum reddat ostendit, cū secundum quantitatem transgressionū sit quantitas pœnarum. Vnde similiter de præmijs subintelligendum constat. Sicut itaque maior est transgressio eius, qui legem quoque scriptam accepit, quàm illius qui sola naturali est instructus: ita maiorem eius esse pœnam ostendit, & alterius minorem, dicens: *Qui peccauerunt sine lege,*] scilicet scripta sicut Gentiles .i. non eam habentes qua instruerentur, peribunt quidem .i. damnabuntur, sed sine lege peribunt .i. nullam ex transgressione legis scriptæ pœnam incurrent, sed ex transgressione naturalis legis tantum. *Et quicunque in lege pec-*

canerunt.] .i. per transgressionem quoque scriptæ legis, sicut Iudæi. *per legem.*] .i. hoc est conuinci apertè rei poterunt per professionem legis susceptæ, quam non seruauerunt. Sed cum maior sit istorum transgressio qui legis quoque scriptæ transgressores sunt, quàm legis naturalis, quare ibi dixit *peribunt*, hîc dixit *iudicabuntur*? Cùm videlicet ea quæ iudicio referuntur peccata non tantùm videantur, quantum illa quæ iudicium non expectant, sed statim damnant, & perire reum cogunt, absque vllo scilicet iudicij examine. Sed profectò vt diximus, *iudicari* dixit, pro apertè conuinci; vt tantò maius peccatum appareat, quantò apertiùs conuinci potest, ex transgressione scilicet scriptæ legis, quæ apertè à Deo coram omnibus est tradita, & miraculis confirmata. Quæ enim publico iudicio damnantur, apertè arguuntur, nec post sententiâ iudicij approbatam defensorem inueniunt. Quæstio;

Non enim auditores.] Incipit inuectio in Iudæos Dixi, *per legem iudicabuntur*, tanquam rei scilicet, quia licet legem audiant, non idè iusti sunt nisi opera faciant quæ lex videlicet præcipit. Et hoc est, *Non enim auditores.*] Hoc est non quia sunt auditores legis iusti sunt apud Deum .i. diuino iudicio quamuis humano, *sed factores.*] .i. quia faciunt quæ lex præcipit. At verò cùm alibi dicat neminem iustificari ex operibus legis, quomodo nunc dicit factores legis iustificari; nisi hoc loco factores dicat qui amore Dei ad faciendû spontanei sunt, secundû quod bona voluntas pro opere facti reputatur vt diximus? Non enim exteriori opere Deo placeamus, sed potius ex voluntate. Hic igitur de voluntate, ibi de exteriori opere loquitur. Possumus & hîc naturalem legem accipere, qua sola vtuntur Gentiles. De quibus verò ait & in sequentibus illud de lege scripta operum intellige, vt videlicet ita intelligatur, quòd non illi tantum qui audiunt verba legis naturalis iusti sunt, sed qui opere complent. Verba autem legis naturalis illa sunt, quæ Dei & proximi caritatem commendant, sicuti ista. *Quod tibi fieri non vis alteri ne feceris.* Et, *Quod vultis vt faciant vobis homines & vos facite illis.*

Cum enim gentes.] Et verè non in auditu scriptæ legis, sed in opere eius, vt dictum est, vis iustificationis consistit. Quod apparet ex Gentilibus, qui quamuis legem scriptam non habeant quam audire possint, cùm tamen faciunt ea opera quæ

lex præcipit, æquè vt Iudæi saluantur. Et hoc est, *Cum enim Gentiles*] i. Gentiles qui legem scilicet scriptam non habent, *naturaliter faciunt.*] i. naturali lege instructi, hoc est cognitione Dei ac discretionem rationis, quam naturaliter, hoc est ex sua creatione habent, non ex scripta alicuius doctrina: ipsi dico non habentes huiusmodi legem, .i. scriptam exterius sicut habent Iudæi, ipsi sibi sunt lex, hoc est eandem remunerationem assequuntur per seipsum sine lege scripta, quam illi per obedientiam scriptæ legis. Quippe qui exhibent exterius in opere voluntatem bonam quam habent in mente, hoc est opus legis scriptum in cordibus. Cum dicit *scriptum*, perseverantiam bonæ voluntatis innuit. Vt enim beatus ait Gregorius, quod loquimur transit, quod scribimus permanet. Qui itaque legis auditores sunt, quasi legem loquuntur quam in membranis scriptam, non in cordibus tenent affixam. Sicut è contrario isti faciunt, *Bonum eis testimonium reddente conscientia ipsorum.*] Hoc est securos eos facientes de iustitia operum suorum, bona ipsorum conscientia atque recta intentione, quæ illis non alijs cognita est. Secundum quam quidem intentionem Deus opera pensat. *Et inter se inuicem*] Diuersa littera hic legi solet. Modo enim genitiui plurales ponuntur hoc modo, *cogitationum & accusantium*, aut etiam *defendentium*; modo ablatiui sic, *cogitationibus accusantibus, &c.* Vnde Augustinus de Ciuitat. Dei lib. 20. *In cogitationibus enim, sicut scriptum est, impij interrogatio erit. Et Apostolus, Cogitationibus, inquit, accusantibus, vel etiam excusantibus, in die qua iudicabit Deus occulta hominum, &c.* Idem in Psal. 118. *Omnia opera vel bona vel mala à cogitatione procedunt. In cogitatione quisque innocens, in cogitatione reus est. Propter quod scriptum est, cogitatio sancta serua-bit te. Et alibi in cogitationibus impij interrogatio erit. Et Apostolus, Cogitationibus, inquit, accusantibus aut etiam excusantibus, &c.* Idem in Psal. v. *Decidant à cogitationibus suis, dictum est decidant accusantibus se cogitationibus suis, conscientia sua, sicut Apostolus dicit, cogitationum accusantium seu defendentium, &c.* Puto autem hanc litteræ narrationem maximè ex consuetudine Græcæ linguæ contigisse; cum videlicet Græci ablatiuo carentes, genitiuo pro ablatiuo vtuntur. Vnde factum est, vt secundum diuersas translationes ex Græco in Latinum modo in genitiuis retentus vt in Latino sicut erat in Græco, modo prout

sententia

sententia requirebat in ablatium apud nos sit commutatus. Quamvis enim hæc Epistola, quæ ad Romanos dirigitur, primo Latine scripta intelligatur, etsi in Græcia apud Corinthum scripta fuerit; credimus tamen diuersos postea eius translatores vel expositores extitisse, qui Græcos, ut dictum est, imitarentur, cum illam fortassis scripturam Latinam ad manum non haberent, & ideo ad exemplaria Græca recurrerunt. Nunc igitur utramque litteram exponamus. Cum itaque præmissum sit, *testimonium reddente illis conscientia*, addit, & *conscientia cogitationum*, &c. Ac si diceret, & tali conscientia quæ non erret in discretionem operum, ea scilicet discutiens secundum ipsas animi cogitationes, hoc est intentiones. Quæ quidem cogitationes habent accusare vel defendere apud Deum potius quam exteriora opera. Et hoc est, conscientia dico cogitationum .i. quæ ipsas cogitationes magis attendit quam opera. Et quare eas maximè penset annectit, qua accusant vel excusant apud Deum. Cogitationum dico inter se inuicem, scilicet habituum, ut de ipsis videlicet existimaret agendum sicut de alijs; iuxta illam videlicet suprapositam naturalis legis regulam: *Quod tibi fieri non vis, alij ne feceris*. Et, *quæ vultis ut faciant vobis homines, & vos facite illis*. In die.] Hoc est in tempore. *Quo iudicabit Deus*.] Per filium suum .i. Iesum Christum, secundum quod scriptum est, *Pater omne iudicium dedit filio*. *Occulta hominum*.] .i. intentiones potius quam exteriora opera. *Secundum Euangelium meum*.] .i. sicut ego prædico, asserere videlicet Deum potius intentionem, quam operum remunerationem. Si vero sit ablatius absolutus hoc modo, *Et inter se inuicem cogitationibus accusantibus*, &c. continuabitur ad præmissum alium ablatium sic, *Dixi conscientia ipsorum reddente illis testimonium, & cogitationibus suis quas habent inter se inuicem*. .i. per quas sese ita ut alios pensant ut dictum est; ipsis, inquam, suis cogitationibus .i. proprijs intentionibus, subaudi reddentibus illis testimonium. Et est quasi expositio eius quod præmissum est, *conscientia*, scilicet, *ipsorum*. Ac si diceret .i. *cogitationibus eorum*, &c. Et quare testimonium reddatur eis .i. securos eos faciat cogitationes suæ apud Deum subdit, quia videlicet solæ, ut dictum est, cogitationes apud Deum habent accusare vel defendere. Et hoc est quod supponit, *Accusantibus aut etiam defendentibus*, &c. Quæritur autem quo-

modo post datum circumcisionis mandatum, *Omnis anima cui caro praputij circumcisa non fuerit, &c.* Gentiles incircumcisi saluabantur, sicut Iob & fortasse plerique alij, de qualibus dictum est: *Cum enim gentes, &c.* Sed si diligenter attendamus verba ipsa scripturæ, atque ipsum circumcisionis exordium, quæ primo Abrahamæ est iniuncta, videbimus præceptum circumcisionis non fuisse generale, sed ad Abraham tantum & semen illius pertinere, .i. Isaac, dicente Domino ad Abraham, *quia in Isaac vocabitur tibi semen*, non in Ismael videlicet. Vnde & cum circumcisionem Dominus Abrahamæ præciperet ait, *Hoc erit pactum inter me & te, & semen tuum post te.* Origenes quoque super hanc Epistolam in sequentibus aperte conuincit ex ipsis alijs scripturæ verbis, soli populo Israeli & vernaculis eorum vel emptis pecuniâ, circumcisionis signum fuisse præceptum. Exposito namque illo versiculo, *Si sibi praputium iustitias legis custodiat, &c.* diligenter circumcisionis mandatum atque rationem discutiens ait: *Non importunum videtur circumcisionis generalem discutere rationem.* Dixit Dominus ad Abraham. *Tu autem testamentum meum seruabis, & omne semen tuum post te in generationes suas. Et hoc est testamentum inter me & vos, & inter me & inter medium seminis tui post te. Circumcideretur omne masculinum vestrum, & puer in octaua die. Circumcideretur in vobis omnis masculus in generationibus vestris, vernaculus & pecunia emptus.* Discutiamus vtrum mandatum & eos qui ex gentibus crediderant constringat. Nunquam fecit proseliti .i. aduenæ mentionem, sed vernaculum seruum, vel pretio mercatum circumcidi iubet, non liberum? Perscrutemur ergo Leuitici legem. *Loquere, inquit, filijs Israel, & dices ad eos: Mulier si pepererit masculum, octaua die circumcides, &c.* Intuere & hoc quemadmodum de lege circumcisionis tantum ad filios Israel Moyse loqui iubetur, & alienigenarum nulla sit mentio, cum in quibusdam mandatis non solum filijs Israel, sed & proselitis & aduenis loquatur. Necessario utique obseruanda distinctio est, quia sicut ibi dicitur, *loquere ad Aaron*, & alibi, *ad filios Aaron*, & alibi *ad Leuitas*, certum est non subiacere reliquos his legibus; & quæ filijs iubentur, nec alienigenæ memoria vlla fit, non est putandum commune esse mandatum vbi appellationis habetur exceptio. Si ergo non alius quisquam circumcisionis lege constringitur nisi ex Abraham ori-

ginem trahens, vel vernaculus eorum, vel pretio emptus, vis autem videre quia sicubi vult etiam alienigenas lege connecti significanter ostendatur? Audi quid scriptum sit, *Homo ex filiis Israel & aduenis, quicumque manducauerit omnem sanguinem animam illam disperdā, quia anima omnis carnis sanguis illius est, & ego dedi vobis ut ex ipso super altare propitiaretur pro animabus vestris, quia sanguis pro anima expiabit.* Vides ergo hanc legem, quæ & aduenis data est, obseruari à nobis qui ex gentibus credimus. Ergo legem de obseruatione sanguinis communē cum filiis Israel & Gentium suscipit Ecclesia. Hæc namque ita intelligens in lege scripta, tunc beatum illud Apostolorum Concilium decernebat decreta, Gentibus scribens ut abstinerent se à sanguine & suffocato. Verum requires fortasse, si etiam de suffocato communis filijs Israel cum aduenis data sit lex? Audi, *Homo, inquit, ex filiis Israel & ex aduenis qui sunt in vobis, quicumque venatus fuerit feram aut auem qua manducatur, effundat sanguinem eius & cooperiat terram, quia anima omnis carnis sanguis ipsius est.* Verum quia inter illa quæ de Levitico superius protulimus, etiam hoc refertur, *Homo ex filiis Israel vel ex aduenis qui sunt in eis quicumque fecerit holocaustum aut sacrificium, & ad ostium tabernaculi non addixerit facere illud Domino, exterminabitur de populo suo.* Et per hoc etiā videtur Ecclesia ex Gētibus holocaustis obnoxia fieri. Non ut faciat iubet, sed si forte fecerit quomodo facere debeat docet. Certū est enim, quòd dum Hierosolymis templum constaret, & religio tradita patribus vigeret, plurimi etiam Gentium veniebant ad templum adorare & offerre sacrificia. Sed hoc quoniam in loco vno tantummodò fieri præceptum est, de quo etiam hīc mandat ut ad ostium tabernaculi iugulanda victima deducatur, tamdiu potuit legitimè fieri, quamdiu status loci permansit incolumis. Denique & Saluator ad decem leprosos, quos mundaauerat inquit, *Ite, ostendite, vos Sacerdotibus, & offerre pro vobis hostias sicut præcipit Moyses.* Nunc verò quomodo exposcitur ab aduenis, quod exhibere nec proprijs quidem cultoribus licet? Hæc dicta sunt à nobis, ut ostenderemus præcipuè de circumcisionis præcepto, quòd non alijs quàm his, qui ex Abraham genus ducant, vernaculisque eorum vel precio emptis, esset iniunctum. Liberos esse ab huiusmodi legibus eos qui per Christum Deo gentibus cre-

dunt. Item, Recuperent ergo prius statutum templum, &c.

Si autem cognominaris Iudæus.] Gentiles, qui à genere sanctorum Patrum hæreditate remoti, ô Iudæe, tibi videntur, cum dicat Dominus Abrahamæ, *quia in Isaac vocabitur tibi semen*, & insuper lege scripta non sunt instructi, & ita bene operantur, sed in te contra est. Quod cum in compositione quadâ, & improperij indignatione proferens exaggerat, dicens, *si tu cognominaris Iudæus*, hoc est, non ille Iudæus existens, imitatione scilicet fidelium Patrum, sed solo nomine cognominaris, à Iuda scilicet Patriarcha, seu à Iuda Machabæo sic vocaris, &c. Origenes, Non diceres, sed cognominaris docet insequentibus, quia verè Iudæus ille sit, qui in occulto circumcisus est. Qui autem in manifesto ut videatur ab hominibus, non est verè, sed cognominatur Iudæus. Et in Apocalyp. *Qui dicunt se Iudeos esse, & non sunt*. Qui verè Iudæus est ab illo Iuda vocabulum trahit, de quo scriptum est, *Iuda te laudabunt fratres tui*, &c. quæ in Salvatore prophetata sunt. August. in Psal. 71. *Iudæi maxime à Iuda Patriarcha appellati sunt*, quia primò de alia tribu datus est Saul & reprobatus, tanquam malus. Rex primus de tribu Iuda David, & ex illo de tribu Iuda semper Reges habuerunt. Vnde Iudæi dicti sunt, & cœperunt Reges alienigenæ ab Herode. Itaque veniente Domino eversum est regnum Iudæorum, & sublatum est ex Iudæis quia noluerunt cognoscere verum Regem. Iam videte si Iudæi sunt appellandi. Ipsi voce sua abdicauerunt se ab isto nomine, ut Iudæi non sint digni appellari, nisi tantum carne. Sequiebant in Christum .i. genus Iuda, semen David, dicebant: *Non habemus Regem nisi Cæsarem*. O Iudæi, si non habetis Regem nisi Cæsarem, defecit iam Princeps ex Iuda, venit cui repromissum est. Illi ergo veriùs dicuntur Iudæi qui Christiani facti sunt ex Iudæis. Iudæa vera Christi Ecclesia est. Credimus in illum qui venit ex tribu Iuda per Mariam. Haymo. Si autem tu Iudæus cognominaris, subaudis à Iuda Patriarcha, &c. Ambros. Iudæo primum & Græco. Iudæi ex tempore Iudæ Machabæi dici cœperunt, qui in causa cladis restitit sacrilegis, & fiducia Dei collegit populum, & defendit genus suum. Notandum vero quia hoc loco Ambrosius non dicit Iudæos dici à Iuda Machabæo, sed à tempore eius sic dici, præsertim cum à cæteris libris veteris Testamenti non in-

ueniantur sic appellati sicut in libris Machabæorū. Quia si à Iuda Machabæo sic essent appellati, videntur & à Iuda Patriarcha sic nominari, cum ipse quoque Iudas Machabæus ab illo Iuda sic esset appellatus.

ET *requiescis in lege*] Vt non fatigeris erroribus inquirendo quæ facienda sint tibi, & totum in ea studium habes occupatum, vt non ipsas alias petendas, ad scripta scilicet Poetarum & Philosophorum, *Et gloriaris in Deo.*] Iactando scilicet te gloriosum de cognitione Dei & lege tibi ab ipso data, ex qua videlicet lege nosti voluntatem eius, quod videlicet ei fieri placeat. *Et probas.*] i. discernis non solum vtilia ab vtilibus, verum etiam vtiliora ab vtilibus. *Confidis.*] vt videlicet possis ostendere alijs viam iustitiæ in mādatis Dei. Cæcos siue in tenebris existentes, siue insipientes & infantes idè intelligit, & similiter ducem, & lumen, & eruditorem, & magistrum pro eodem accipit: vt sit quædam verborum inculcatio ad cōfusionem eorum, non diuersa significatio. Vnde autem se ducem esse cæcorum confidat. i. sufficientē ad alios docendos, supponit: Te dico *habentem ex lege formam scientiæ & veritatis*] i. veram scientiam quæ instruere alios & informare potest ad bene agendum. Tu ergo talis ac tantus secundum iudicium tuum, qui alios doces .i. corrigis, &c. In quo autem se debeat corrigere supponit dicens. *Qui prædicas.*] Ex verbis scilicet legis, &c. *Qui abominaris idola.*] i. simulachrorum formas propter significatū, cum non euitas sacrilegium propter ipsum, quia in seipsum malū est. Sacrilegium dicitur violatio rei sacræ, scilicet eorum maximè quæ ad cultum Dei pertinent, veluti templum, & quæ ad ipsum spectant. Templum verò Dei siue materiale & figuratiuum, siue spirituale & verum Iudæi violarunt, in ipso manufacto templo negotiationem exercēdo, propter quam à Domino indè sunt expulsi; vel ipsum Dominum crucifigendo, qui de templo corporis sui loquens, ait: *Soluite templum hoc, &c. Dominum inhonoras.*] i. facis despicabilem alijs quantum in te est. Colorem in hoc loco Rhetoricū facit, qui repetitio dicitur, habens in diuersis clausulis orationis idem principiū, sicut est, qui, quod, quantum est repetitum.

NOMEN enim.] Cum superius singulariter dixerit, *si autē tu*, nunc verò pluraliter dicat *per vos*, plane insinuat generalē

Iudæi personā se introduxisse, quasi generaliter rebellē redarguens populū, de quo se esse gloriabātur isti cōuersi Iudæi, qui Romæ erant. In quo quidem populo alios dicit reos furti esse, extitisse, vel adhuc esse: alios adulterij, &c. Continuatio. Bene dico inhonoras tu videlicet popule Iudeorū, quia per vos blasphematur inter gentes. i. infideles nomen Dei, & notitia eius quam vos habere gloriamini. Vt enim Tullius meminit, sæpe ex vitio hominis culpari scientia solet, quasi scientia illa malè operari doceat. *Sicut scriptum est.*] In Propheta Ezechiele his verbis, *Nomen sanctum meum quod polluistis in gentibus.* i. cōtemptui vel irrisioni haberi fecistis, & cum in se preciosissimū esset viuificastis*.

CIRCUMCISIO *quidem.*] Superius abstulit gloriatiōē legis datæ, per hoc quod non faciunt quæ lex præcipit, & idē magis à lege arguuntur quàm iustificentur. Nunc verò per hoc ipsum quod legi non obtemperant, aufert gloriam circumcisionis. Quia sicut legis latio nil prodest susipientibus, nisi eam seruent; ita circumcisio, nisi legi obtemperent: ut videlicet cætera præcepta impleant sicut præceptum circumcisionis. Quippe qui in vnum offenderit, ut alius dicit Apostolus, reus est omnium. i. transgressor est seu contemptor totius legis, vniuersa scilicet Dei præcepta continentis. Cū enim lex omnia simul, non vnum tantum præcipiat, quisquis vnum transgreditur legem non seruat. Ac sic per vnius cuiusque præcepti transgressionem legis violatæ reus efficitur. Nihil ergo circumcisio carnalis ad salutem prodest si lex in cæteris violetur. Sicut & Baptismus, cuius locum beato attestante Gregorio, circumcisio tenebat, si in cæteris transgressores permaneamus, non saluat. Cū autem circūcisio in hoc tempore iam nullius sit momenti, iuxta illud ipsius Apostoli ad Galatas scribentis, *si autem circūcidimini, Christus vobis nil proderit.* i. nihil iam vtilitatis vobis ex illo signo conferet, apparet hoc loco Apostolum ad statum priorem legis spectare, in quo utilis erat circumcisio. De quo quidem statu legis quamuis iam præterito & quātum ad carnales obseruantias defuncto, ibi nunc etiam Iudæi conuersi gloriabātur. Si vero Apostolus ad suum nunc tempus respiciens dicat, *Circumcisio quidem prodest si legem obserues*] tale est ac si dicat, circumcisio nunc prodest, si sit spiritualis, potius quàm

carnalis, quæ gentili æquè sicut & Iudæo communis est. Custodia igitur legis spirituales circumcissionem facit .i. separationem à vitijs, quæ per carnalem circumcissionem figuratur. Tale est ergo si legem custodias, ac si diceret: si sit spiritualis circumcisio cordis potius quàm corporis, quia superfluum est signum vbi deest, per negligentiam signatum.

Si autem prauaricator.] .i. transgressor, &c. *Præputium*] vocatur illa particula genitalis membri, quam de summitate illius præcidebant circumcidentes. Et dicitur præputiū quasi amputando .i. præscindendo, quamuis putare modo pro incidere non sit in vsu, sicut amputare. Dicitur tamen in Canticis, *tempus putationis aduenit* .i. amputationis. Quemadmodū autem circumcisio carnis circumcissionem cordis .i. separationem à carnalibus vitijs significat, ita præputium retentum immunditiam carnalium desideriorum demonstrat. Vnde & Iudæi & Gentiles, qui præputium habebant, non præputiatis .i. immundos, verum ipsum præputium .i. ipsam immunditiam vocabant. *Circumcisio tua.*] In sola videlicet carne tua, inquam, quam approbas, quam facis, non Deus. *Præputium facta est tibi.*] .i. quodammodo immundicia, quoniam magis reus conuinceris post susceptum circumcissionis sacramentum & professionem obseruandæ legis, si eam non obserues, quàm si hoc non fecisses. *Si ergo.*] Quasi à contrarijs infert, Quandoquidem tua circumcisio .i. carnalis, præputium fit tibi .i. magis te inquinat & damnat si legem non obserues. Igitur præputium Gentilis, si ipse lege naturali quod scriptū est impleat, *reputabitur ei à Domino in circumcissionem.*] .i. ipsi corporale præputium habentes estimabuntur diuino iudicio eiusdem esse meriti, cuius sunt & spiritualiter circumcisi. Nō enim hic repetit circumcissionem tuam, vt carnalem intelligat, sicut superius posuit: sed simpliciter dicit circumcissionem, vt spirituales insinuet à Deo factam. Qui etiam cum dicit *præputium illius*, sicut superius *circumcisionem tuam*, carnaliter intelligit præputium, corporis .s. particulam, non cordis immunditiam. Alioquin non diceret reputari præputium in circumcissionem. Si præputium .i. ipsa præputiata Gentilitas, quam vos scilicet Iudæi quasi ad ignominiam præputium vocatis. *Custodiat legis iustitias*] potius quàm figuras .i. impleat moralia caritatis præcepta, quæ vnumquemque iustificat,

nonne præputium illius .i. ipsa Gentilitas proprium habens præputium, carnale videlicet cum quo ipsa nascitur, reputabitur à Deo digna præmio? Verè & spiritaliter, vt dictum est, circumcisorum & ipsum præputium legem consumans .i. adimplens. Plenitudo enim legis, vt postea dicitur, est dilectio. Quod videlicet consummare legem, est ei ex natura .i. ex instructione legis naturalis illa, quæ duo dicimus, continentis præcepta caritatis, *quod tibi non vis, &c. Iudicabit te.*] .i. reum manifeste conuincet, qui lege etiam scripta instructus, de qua gloriaris, bene agere negligis. Te dico Iudæe, *Qui prauaricator es legis.*] .i. transgressor per litteram occidentem .i. literalem sensum, carnale signum in quibus confidis significantibus maximè non significatis adhærens .i. figuris potius quàm rebus ipsis, & similitudini potius quàm veritati.

Non enim qui.] Bene dico præputiū per bonorum operū exhibitionē reputari in circūcisionē, & bene dico circūcisionē per mala opera transire in præputiū. Nā illi carnaliter circumcisi etsi in manifesto dicantur Iudæi, non tamen verè .i. corde sunt Iudæi, sed potius illi supradicti Gentiles, quanquam nullo modo reputarentur Iudæi vel circumcisi. Manifesti Iudæi dicuntur, qui solo nomine & natione Iudæ Iudæi nuncupantur, foris Dominum voce confitentes, & mente ab eo recedentes. De quibus dicitur, *Populus hic labijs me honorat, cor autem eorum longe est à me. Sed qui in abscondito Iudæus est.*] Confitentes Deum in corde vbi Deus videt, & qui Deo seruire satagant, non ad hominum aspectum. *Neque quæ in manifesto est circumcisio.*] .i. quæ manufacta est, *In carne.*] .i. in carnis ablatione, non est circumcisio .i. non vera vitiorum damnatio & concupiscentiæ destructio, sed vera circumcisio est illa quæ est cordis, .i. per quam ab animo vitia & concupiscentiæ amputantur. Circumcisio, dico, in spiritu, non littera .i. iuxta spirituales & mysticum, non literalem sensum facta. *Cuius.*] .i. Iudæi vel circūcisionis spiritualis, *Laus est ex Deo*] quia Deus eam approbat, non homines, .i. carnales, qui videlicet legem carnaliter tantum, non spiritaliter intelligunt, & opera magis quàm animum pensant, videntes in facie, non in corde.

CAP. III. Quid ergo amplius.] Oppositionem quam possent Iudæi facere

facere contra prædictam rationem obijcit sibi Apostolus, v^t eam soluat. Dicerent enim Iudæi. Tu dixisti circumcisionem transire in præputium, & præputium transire in circumcisionem. Ergo quid amplius Iudæo quàm Gentili est? quæ maiora beneficia contulit Iudæis quàm Gentilibus, qui dicebantur canes & immundi? aut quæ vtilitas circumcisionis .i. circumcisorum? Hoc quidem, quasi expositio præcedentis subditur. Poterant quippe cum ait, *Iudæo soli*, intelligi illi qui ad Tribum Iudæ pertinent, à quo dicti sunt Iudæi. Et quod dicitur, *quid amplius*, poterat tam ad bonum quàm ad malum se habere, & fortasse magis ad malum, cùm Iudæos in proximo maximè vituperasset. Est autem consuetudo Apostoli sicut per præputium gentes, ita per circumcisionem Iudæos accipere. *Multum*] videlicet amplius vtilitatis Iudæo quàm Gentili olim à Domino collatum est. *Per omnem modum.*] .i. modis omnibus, lege scilicet eos instruendo, & miraculis innumeris, & beneficijs confirmando, & ad amorem suum provocando. *Sed hoc primum*] .i. maximum illud fuit inter bona Dei; quod legem eis dedit; vt non solum naturali sicut Gentiles, verum insuper scripta lege instruerentur. Et hoc est quod ait *primum* .i. maximum fuit illud beneficium quod sunt illis *credita*.] .i. cōmissa, *eloquia Dei in lege & Prophetis.*] Quod quidem donum & eos erudire, & in perpetuum retinere potest. Nota tamen quod non ait commissa, sed *credita*; quasi ad tempus eis sit hæc doctrina accommodata. Quæque ad nos per spiritualem & rectam eius intelligentiam transitura erat, & in carnalibus eius obseruantijs, in quibus maximè confidebant Iudæi, cessatura. Quasi & creditor eloquiorum suorum Deus dicitur, pro quibus ab his quibus ea credit, quasi pretium obedientiam requirat. Verba Dei eloquia dicit, quasi extra alia locutionum genera per excellentiam, *Propter eorum.*] .i. obedientiæ fructum & salutiferam doctrinam.

Quid enim.] Quæ causa, diceret aliquis, de eloquijs diuinis datis illi populo, tamen propter incredulitatem eius bona ipsi promissa Deus non compleuerit, siue de reparatione humani generis per filiū suū, siue de quibuscūq; promissionibus. Quod quidē duobus modis refellit Apostolus ostēdendo non omnes in populo fuisse incredulos, vt penitus illi populo promissa negarētur, nec Deū quia verax est, promissiones suas

posse cessare. Sic lege, Bene dixi maximum illud esse de elo-
quijs diuinis, per quæ sibi alliceret populum suum. Nam quid
impedit propositum diuinum? *Siquidam illorum non credide-
runt.*] illis eloquijs, hoc est his quæ ibi promittebātur vel præ-
dicebantur. *Nanquid incredulitas illorum.*] Qui videlicet non
crediderunt, *Fide Dei.*] .i. per quam Deo crediderunt, *Eua-
cuauit*] vt videlicet non euenerit quod ipse Moyses, Iosue &
cæteri fideles crediderunt? *Absit,*] vt scilicet eorum fides sit
euacuata .i. frustrata in his promissis ibi prædictis quæ credi-
derunt. *Est autem Deus.*] Dixi absit, nec inconsideratè, sed
prouide, cum sit *Deus verax*] .i. stabilis seu immobilis, in his
quæ promittit aut prædicat.

OMNIS autem homo mendax] .i. mutabilis in suo propo-
sito, vt videlicet facilè eius consilium aut voluntas mutari
queat. Forte quæritur si homo in Christo vnit⁹ diuinitati mē-
tiri aut peccare potuerit, quamuis in eo quod præmissum est,
est autem Deus verax, & statim subiunctū est, *omnis autem homo
mendax*, Deus homo exclusus videtur; vt de puro homine tā-
tū accipi debeat quod dictū est, *omnis homo mendax*, nō de homi-
ne qui Deus est. Nemo autē ambigere debet hominē illum
Deo vnitū, postquā ei vnitus est, aut dū ei vnitus est, nullaten⁹
peccare posse: sicut eum qui prædestinatus est, postquā præde-
stinatus, vel cū prædestinatus sit, damnari non posse. At verò
si simpliciter dicitur hominem illū, qui vnitus est, nullo mo-
do peccare posse, potest quilibet ambigere. Si enim penitus
peccare non potest, aut malè facere, quod meritum habet,
cauendo peccatum quod nullo modo potest committere, aut
quo etiam cauere id dicitur quod nullatenus incurrere po-
test. Vnde Boetius contra Eutichen & Nestorium de homi-
ne quem Deus assumpsit. Quando, inquit, fieri potest, vt ta-
lem assumpserit hominem, qualis Adam fuit ante peccatum,
cū in Adam potuerit esse peccandi voluntas atque affectio?
Scriptum præterea est in laude iusti, *Qui potuit transgredi, &
non est transgressus; facere mala, & non fecit, iste in excelsis habi-
tabit, &c.* Et hoc quidem ad liberum hominis arbitrium per-
tinet, vt in eius sit potestate agere bene & male. Quod si
Christus non habuit, libero videtur priuatus arbitrio, & ne-
cessitate potius quàm voluntate peccatum cauere, & ex na-
tura potius quàm ex gratia id habere. Quippe quod per gra-

tiam cuius collatum est, ex dono ei potius quàm ex naturæ suæ proprietate venit, non tam naturale quàm gratuitum est dicendum, quod ex dono alterius potius quàm ex nobis habemus. Quis etiam neget hominem illum ex anima & carne consistere, qui Deo vnitus est, in vnâ videlicet personam; etiam sine illa vnione, sicut ceteros homines, in sua natura cōsistere posse? Alioquin minoris valitudinis esse videretur, si per se ipse subsistere non posset, sicut cæteri homines; non & magis accidentis quàm substantiæ naturam habere. Quòd si per se etiam existere posset, cur non & peccare sic posset vt cæteri? Videtur itaque nobis vt in hac quoque, sicut in cæteris rebus vires propositionum diligenter attendamus, quando videlicet cum determinatione possibile aut necesse ponit, & quando simpliciter prædicatur .i. sine apposita determinatione. Verum quippe est si simpliciter dicatur, quòd cum qui prædestinatus est, & qui saluandus est, possibile est damnari, cum omnino possibile sit eum fuisse non prædestinatum, nec saluandum: non tamen cum determinatione verum est dicere, quod eum possibile est damnari, cum sit prædestinatus, vel cum sit saluandus. Sic & eum, qui curtatus est, possibile est habere duos pedes, cum sit omnis homo bipes, & eum qui cæcus est possibile est videre; non tamen possibile est postquam curtatus est, vel postquam cæcus. Alioquin possibile esset regressionem de priuatione ad habitum fieri, quod penitus falsum est. Sic & fortasse non est absurdum nos concedere simpliciter, quòd cum hominem, qui Deo vnitus est, possibile sit peccare, non tamen postquam vnitus vel dum vnitus est. Christum verò .i. Deum simul & hominem modis omnibus impossibile est peccare, cum videlicet ipsum Christi nomen Dei & hominis exprimat vnionem. Ac sic quod dictum est, *omnis homo mendax*, modis omnibus vera videtur esse enūciatio.

S I C V T scriptum est, vt iustificeris.] Probat per authoritatem Psalmi, quàm verax sit Deus in promissis suis complendis, & stabilis in suo proposito. Promiserat quippe Dominus ad David, quòd de semine eius Christus nasceretur. Quæ quidem promissio post adulterium David cassanda omninò videbatur, & omninò incongruum videbatur vt ulterius de semine tam peccatoris hominis Filius Dei car-

nem susciperet, & ita Deum qui hoc ei promiserat, mendacem fieri oporteret. Quod nequaquam posse contingere, idem qui tam grauitur deliquerat attendens aiebat: *Tibi soli peccaui*. i. ad honorem tui tantum, qui etiam iniquitatem bene ordinas, & ad gloriam tuam omnia conuertis, *Et malum coram te feci*. i. te sciente, quem nihil latet: vt per hoc appareat quàm iustus sis, qui videlicet cum scias me promeruisse, vt non mihi promissa custodias; tamen quia iustus es & verax, non potes promissionem tuam frustrare. Si enim peccatum hoc Deum lateret, non videretur causa quare promissionem non impleret. Nunc autem cum sciat peccatum committi, & peccantem meruisse contrarium, seruat tamen immobilem suæ veritatis constantiam, adimplendo scilicet promissa. *Vt iustificeris in sermonibus tuis.*] .i. vt exequendo sermones tuos, de promissionibus quas mihi fecisti iustificeris, i. iustus & verax appareas. *Et vincas.*] scilicet humanum iudiciū, *cum iudicaris*] ab hominibus, i. argueris mendacij, tanquam qui non possis vltcrius propter delicta mea tuam promissionem adimplere.

Si autem.] Oppositionem ad præmissa ipse inducit Apostolus, quasi diceret: Dictum est Deum iustificari .i. iustum & veracem maximè apparere ex peccatis; cum illam scilicet, promissionem illius impedire nequeant, immò etiam ipsa ad gloriam suam conuertat. Sed si peccata mea ita vt dictum est in præmisso exemplo de David, *Iustitiam Dei commendant.*] .i. ad laudem & gloriam veritatis eius proficiunt: *Quid dicemus*] i. quid poterimus respondere objectioni sequenti, quæ ait, *Nunquid iniquus est Deus qui infert iram?*] .i. vindictam propter peccata, quæ eius, vt dictum est, iustitiam commendant. i. cum maximè laudabilem ostendunt de incommutabili suæ veritatis proposito. Et quoniam non ex persona hoc sua Apostolus obijcit, quasi non ei videretur vt in hoc ageret iniquè, addit, *Secundum hominem dico.*] .i. secundum animalem, qui non sapit ea quæ Dei sunt; non secundum spirituales, qui diiudicat omnia, tam in diuinis quàm in humanis æquum rationis iudicium tenet, & idèd, *Abfit.*] vt hoc scilicet recipiamus, Deum iniquè agere, punièdo peccata, quæ etiam ad eius proficiunt gloriam; vt quamuis peccata non sint bona, bonum tamè sit esse peccata. Vnde est illud August. in Enchirid. *Non fit aliquid nisi Omnipotès fieri velit vel sinèdo vt fiat, vel ipse facièdo. Non dubitandū est Deum facere bene, & sinèdo fieri quæcunq; sunt male. Non enim hoc nisi iusto iudicio finit. Et profecto bonum est omne quod*

iustū. Itē, Nā nisi esset hoc bonum ut essent mala, nullo modo esse sineretur ab omnipotēte bono. Alioquin.] i. si aliter esset quā dicimus, hoc est, si iniqu; faceret Deus, inferēdo vindictā pro peccatis; quomodo mundū. i. vniuersos, tā bonos scilicet quā malos iudicaret, eis videlicet pro meritis vel gloriā vel pœnā retribuendo?

Si enim veritas.] Ad suprapositā obiectionē iterū redit, quasi eam cōmendās, quod. s. benè iniquus videtur Deus puniendo peccata, si ipsā iustitiā eius cōmendāt, quia nec iam pro peccatis reputari debēt, sed pro bonis quæ eius veritatē cōmendāt. Et hoc est, *si enim veritas Dei abundauit in gloriā ei⁹ ex meo mēdacio]* i. immobilitas suæ veritatis laudabilior efficitur ex mutabilitate & incōstantia meæ prōfessionis, qui licet ei mentiar, ipse tamen mihi mentiri non potest. *Qui diiudicor.]* Adhuc dū videlicet id quod facio ad eius gloriā proficit, tāquā peccator. i. qua ratione ea quæ facio pro peccatis reputanda sunt. *Et cur non potius faciamus mala ut veniāt bona.] i. peccemus, ut ex nostris peccatis glorificetur Deus? Sicut blasphemamur]* à quibusdā, & sicut aiunt nos dicere. *] Me. s. & ceteros spiritales, qui dicimus etiā mala tā bene ordinari, ut ad gloriā Dei proficiāt. Vnde & ipse etiā prædictus Doctor in xi. de Ciuit. Dei, cū de bonitate & malitia diaboli loqueretur, ait: Deus sicut naturarū bonarū optimus creator est, ita malarū voluntatū iustissimus ordinator. Itē ibidē de diabolo, Deus cum eū cōderet, futuræ malignitatis non erat ignarus, & prouidebat quæ bona de malis eius esset ipse facturus. Itē post aliqua. Neque enim Deus ullū non dico Angelorū vel hominū creasset, quem malū esse futurū præscisset; nisi pariter nosset quibus eos bonorū vñibus cōmenderet. Idē in Enchiridion, Neq; enim Deus omnipotens cum summè bonus sit, vllō modo sineret malū aliquid esse in operibus suis; nisi vsq; adeo esset omnipotens & bonus, ut bene faceret & de malo. Quorū] s. nos blasphemantiū. i. non tā pro estimatione sua quā propter nos blasphemādos id dicentium. Adeo nāq; mala quoq; à Deo bene ordinari datum est, ut hoc etiam Gentilis ille Philosophus Plato manifestè professus sit, dicēs: Nihil enim sit, cuius ortū non legitima causa & ratio precedat.*

Qv i d ergo.] Dixi talium nos blasphemantiū iustam esse dānationem, ex quo nos maximè cōmendasse videmur, quasi tales simus ex nostris meritis, in quibus nihil sit blasphemādū. *Quid ergo. i. num quid potest dici quia præcellimus tales iustè dānandos. i. ex proprijs meritis & nostra virtute digniores sumus illis? Nequaquā]* sed potius ex Deo quā ex nobis est,

si quid boni habemus, sicut & in sequentibus ait. Quia nō est volentis neque currentis, sed misericordis Dei, quia eius misericordia sufficiens est ad salutem potius quā nostra validudo, quoniam ex nobis omnes simul culpabiles sumus, sicut superius ostendimus tam de Iudæis quā ex Gentibus, omnes inexcusabiles esse. Et hoc est, *Causati enim sumus.*] .i. quasi in causam accusando traximus tam Iudæos quā Græcos, quos sapientiores esse conuenit. *Omnes sub peccato esse.*] .i. & reos esse & pœnæ debitos, tanquam transgressores. Et hoc quidem ad generalem reuertitur inuectionem, colligens ex scripturis testimonia, quibus oēs pariter reos & inexcusabiles cōvincat.

Sic v t scriptum est.] In Psal. videlicet xii. *Quia non est iustus quisquam, &c.* Psalmus hic ubi testimonia hæc apud nos continentur, quasi generalem inuectionem facit in omnes, qui tempus suæ visitationis non cognoscentes, quasi pro abominatione habuerunt Dominum .i. pro humana redemptione incarnari & pati. Vnde & alibi idem Apostolus, *Nos autem prædicamus Christum crucifixum, Iudæis quidem scandalum, gentibus autem stultitiam.* Ait itaque Psalmus, *Dixit insipiens .i.* animalis homo, qui non percipit ea quæ sunt spiritus Dei, de arcano videlicet illo nostræ reparationis mysterio, cū infirmitatem assumpti hominis inspiceret. *Non est Deus,* Dixit hic quidem non verbis negando tantummodo, sicut Petrus eum negando: sed & corde, quia etsi credidit, hoc est, paucissimi & quasi nulli sunt qui iusti sunt .i. unicuique reddentes quæ sua sunt. Absit enim, ut credamus Ecclesiam à primo electo usque ad nouissimum in aliquibus saltem fidelibus non perseveraturam, quæ & ante legem multos & post legem plures: sicut & ipsum qui hunc Psalmum composuit, & sub gratia colligit multos. Vnde & in ipso aduentu Domini iam ex maxima parte in Israel facta cæcitate nonnullos legimus superesse, velut Simeonem, Annam, atque ipsam Domini Matrem cum sponso suo Ioseph, & patrem & matrem Ioannis Baptistæ cum ipso. Sæpe autem cum dicitur *omnis*, vel *nullus*; non generaliter, sed ad maximam partem dicitur. Veluti si dicatur de ciuitate, in qua pauci sunt boni, Omnes mali sunt qui in ea habitant: vel, Nulli boni sunt in ea. Hinc est illud Hieronymi ad Damasum Papam de filio prodigo; *Fili tu semper mecum es, & omnia mea tua sunt.* Nunquid Angeli Throni? Omnia ergo, intellige Prophetas, eloquia diuina, secundum illud

quod sæpe exposuimus, nō omnia ad totum esse referendum, sed ad partem maximam : vt , *Omnes declinauerunt ; & Omnes qui ante me venerunt fuerunt fures & latrones. Et , Omnibus omnia factus sum , vt omnes lucrificerem. Et , Omnes quæ sua querunt , non quæ Iesu Christi. Quare autem non sit iustus quisquā , supponit. Quia non est intelligens Dominum aut requirens ipsum*] Non est intelligens Dominum .i. non curat eius promissis vel minis attēdere, quia animalis homo non percipit ea quæ sunt spiritus Dei, sed est sicut equus & mulus , quibus non est intellectus. Et quia non est intelligens Dominum, nescit requirere eum per pœnitentiam , quem amisit per negligentiam. Quam quidem negligentiam annexit, dicens, *Omnes declinauerunt.*] Hoc est studium suum relicto Deo conuerterunt ad seculum , vt pro temporalibus contemnerent æterna , atque ita omnes pariter tam Iudæi .s. quàm gentes, *Inutiles sibi facti sunt.*] Nemo quippe tam iniquus est, vt omninò inutilis fiat: cū ipsis etiam malis Deus , vt dictum est, optimè vtatur , sicut nequitia Iudæ siue diaboli. In vno quippe & eodē facto, & Deus Pater, & Filius, & Iudas cooperati sunt. Quia Pater Filium, & Filius seipsum, & Iudas tradidit Dominum. Traditio illa, quam & Iudas operatus est , communem omnium redemptionem est operata. Per prædicationem quidem Petri Apostoli aliqui conuersi sunt & saluati. Iudæ verò nequitiam in salutem omnium Dominus conuertit. Ad maiorem vtilitatem nobis malo istius quàm illius bono diuina vsa est gratia. Diaboli quoque nequitiam quis dubitet à Deo semper benè ordinari, cū & ipse nihil nisi Deo permittente faciat, vel puniendo reos, vel probando iustos, vel quidlibet agendo? Vnde & potestas illius non nisi iusta esse potest, sicut voluntas illius non nisi iniusta : qui à Domino potestatem , à se vero habet voluntatem. Non est enim potestas ipso attestante postea Apostolo, nisi à Deo. Vnde & Veritas iniquo Præsidi ait : *Non haberes in me potestatem, nisi datum tibi esset de super.* Qui itaque malè agunt, sibi potius inutiles quàm omninò inutiles intelligendi sunt ; cū in ordine rerum nihil inutiliter aut superfluè agi diuina, vt ostendimus , dispositio permittat. Quomodo autem declinauerunt omnes , aut à quo declinauerunt ? à bono .s. opere, supponit, dicens: *Non est qui faciat bonum.*] Qui bene operetur, & quod debet impleat. Quamuis enim bona videatur traditio Domini, quæ à Iuda

facta est, & simul vt dictum est à Patre siue à Filio, non tamen id Iudas benè fecit, quod peruersa intentione .i. ex cupiditate pecuniæ commisit. Omnia quippe opera ex intentione pensanda esse Dominus docuit, dicens : *Si oculus tuus simplex fuerit, &c.* Alioquin Iudæ quoque opus, in quo tam Pater quàm filius misericorditer sunt operati, bonum dicendum esset. *Non est vsque ad unum.*] Repetitio est præmissi illius, videlicet quòd dictum est, *non est qui faciat bonum*, vt determinatio subderetur, ne generaliter dictum putaretur. Tale est itaque ac si diceret : Non est qui faciat bonum, inquam, vsquequo veniat credendo & per amorem se copulando ei qui verè vnus est, & immutabilis per naturam, & singularis per eminentiam .i. Deo siue Christo, qui est vnus Dei & hominum mediator, per cuius fidem in sequentibus saluari nos astringet sine operibus legis. Potest etiã ita intelligi. *Non est qui faciat bonum vsque ad unum*, ac si diceret, Vix est qui faciat bonum .i. ferè nullus est qui faciat. Fere enim nullus est, nec vnus tantum superest. *Sepulchrum patens.*] Tres isti sequentes versiculi, qui in nostro Psalterio habentur, in Hebræo, teste Origene siue Hieronymo, minimè ita continuè leguntur. Vnde Origenes super hanc Epistolam: In nonnullis, inquit, exemplaribus Latinorum, ea quæ subsequuntur in xiii. Psalmo consequenter inueniuntur, in Græcis autem penè omnibus in xiiii. Psal. scriptum est, *vsque non est qui faciat bonum, non est vsque ad unum.* Sed & quod dixit Apostolus, sicut scriptum est, *Quia non est iustus quisquam, quoniam vsque non est qui faciat bonum, non est vsque ad unum*: Sed & quod dixit Apostolus, sicut scriptum est, *quia non est iustus quisquam, non est intelligens, non est requirens Deum.* Et quod dixit, *Non est iustus quisquam*, puto ex eo sumplerit, *non est qui faciat bonum, non est vsque ad unum.* Quod vero dicit, *Sepulchrum patens est guttur eorum, linguis suis dolose agebant*, in quinto Psalmo reperies. *Venenum aspidum, sub labijs eorum*, ex quodam Psalmo assumptum puto immutatis sermonibus. *Quorū os maledictione & amaritudine plenum est*, ex nono Psalmo videtur acceptum. *Veloces pedes eorum ad effundendum sanguinē*, vel in Isaia inuenies, vel in Prouerbijs. *Sed contritio & infelicitas in vijs eorum, & viam pacis non agnouerunt*, non quidē ad integrū recordor, vbi scriptum sit, suspicor tamen in vno Prophetarum inueniri posse. In Psalmis autem scriptum est,

Non

Non est timor Dei ante oculos eorum. Hæc autem testimonia videtur congregasse vt ostenderet, quia quod causatur Iudæos & Græcos omnes sub peccato esse, non tam sua quàm scripturæ sententia pronunciat, omnes sub peccato esse quos vel naturali vel scripta lege ne peccent constat edoctos. Hieronym. in Præfat. lib. xvi. in Isaia ad Eustochium, Quæstionculam detulisti, quod viii. versus, qui leguntur in Ecclesijs, & in Hæbraico non habentur, tertijdecimi Psalmi Apostolus usurparet. *Sepulchrum patens, &c.*] Animaduerti hoc testimonium de Psalmis in Isaia esse contextum. Nam duo primi versus, *sepulchrum patens est, &c.* quinti Psalmi sunt. Illud autem quod sequitur, *venenum aspidum sub labijs eorum.* 139. Psal. Rursum quod dicitur: *Quorum os maledictione & amaritudine plenum,* de nono Psalmo scriptum est. Tres autem versiculi qui sequuntur, *veloces pedes eorum ad effundendum sanguinem, Contritio & infelicitas in vijs eorum, & viam pacis,* non in Isaia reperiuntur. Vltimus versus. i. octauus, *Non est timor Dei ante oculos eorum,* in tricesimi Psalmi quinti principio est. Item denique omnes Græciæ tractatores qui nobis eruditionis suæ in Psalmos commentarios reliquerunt, hos versiculos annotant atque prætereunt, liquido confidentes in Hæbraico nec haberi, nec esse in 70. Interpretibus, sed in editione vulgata quæ Græce *ἰσχυρὸν* dicitur, & in toto orbe diuersa est. Nunc autem literam persequamur. Dictum est, *Omnes declinauerunt & non est qui faciat bonum.*] & non solum declinauerunt, verum etiam vt alios faciant declinare, & plurimū noceant nituntur. Quasi eis non sufficiat vt soli damnentur, sed quasi ad defensionem sui sociam quærunt multitudinē. Guttur quoniam formandæ vel proferendæ vocis instrumentum est, sermonem significat, qui per guttur emittitur. Sermo itaque eorum ad malum persuadens, quasi sepulchrum patens est ex concepta mente nequitia, quasi ex fœtore inclusi cadaueris alios corrumpens atque astantium nares offendens .i. naturalem eorum discretionē perturbans, ac vicians. *Linguis suis.*] Quasi expositio est præmissi parabolicè dicti, cū dicit eos in dolo loqui .i. contra conscientiam suam ea cōmendare ad quæ persuadent, vel vituperare à quibus dehortantur.

VENENUM aspidum.] Quod & ipse Moyses insanabile dicit, ac per hoc cæteris pœnis testatur esse mortifera .i. cri-

minalia peccata significat, quæ quasi venenum suis persuasio-
nibus infligunt alijs. Hæc autem videlicet peccata, ad quæ
persuadent, sub labijs eorum esse dicuntur .i. callidis eorum
sermonibus ita occultari, vt animaduerti ab audientibus non
possint. Possumus & per venenum aspidum insanabile, illud
in Spiritum sanctum irremissibile peccatum accipere, quan-
do quis videlicet per inuidiam vel cupiditatem aliquam ope-
ra illorum, quæ à Deo fieri non dubitat, diabolo tribuit: sicut
nonnulli Iudæorum faciebant, qui vt populum à Christo
auerterent, opera eius tanquam diabolica vituperabant: quæ
tamen spiritu Dei .i. diuina gratia fieri non dubitabant, &
ideò in Spiritum Dei .i. diuinæ gratiæ donum peccare dice-
bantur, cùm scienter diabolo tribuerent vnde glorificare
Deum deberent, contra propriam mentientes conscientiam.
Quod quidem peccatum etsi per pœnitentiam deleri posset,
ita tamen diuino sancitū iudicio, vt nullus in hoc lapsus resi-
piscendo redeat, atque ideò irremissibile dicitur. Hoc autem
peccatum sub labijs eorum latebat, non in labijs apparebat;
quia dum sic contra propriam conscientiam delinquerent,
aliud in corde habebant quàm ore proferebant. *Quorum os.*]
.i. tam sibi ipsis quàm acquiescentibus, maledictionem acqui-
rit à Domino, & amaritudinē illā, videlicet de qua per Pro-
phetam dicitur, *Vox diei illius amara, tribulabitur ibi fortis.* Tale
est maledictione & amaritudine, ac si diceretur amara illa male-
dictione, qua dicitur reprobis in damnationem eorum, *Ite
maledicti in ignem æternum.* Est quidem alia maledictio quasi
dulcis & paterna, quādo aliquibus anathematis maledictio-
nem inferimus ad correctionem potius quàm ad damnatio-
nem.

VELOCES pedes.] .i. affectus habent pronos ad homici-
dia, etsi opere non permittantur implere. Pes enim, quo in-
cedimus, affectum .i. voluntatem significat, quo ad operatio-
nem perducimur. *Contritio & infelicitas.*] .i. infelix contritio
est, *in vijs eorum*] .i. in operibus, per quæ ad mortem præpa-
rantur æternam, alios etiam secum conterentes, ac per exem-
pla etiam corrumpentes, vt sint quasi puluis dissoluti, quem
proijcit ventus à facie terræ .i. diabolica tentatio, quæ huc &
illuc impellit & deijcit à stabilitate terræ viuentium. *Et viam
pacis*] .i. omnino in vijs suis damnatione conterentur, quia

viam Dei non cognouerunt .i. Christum, per quem tanquam mediatorem Dei & hominum Deo pacificati & reconciliati sumus, qui est pax nostra, vt idem ait Apostolus, & facit vtrūque vnum. Qui & de semetipso ait, *Ego sum via, ego sum ostiū; Per me si quis introierit, saluabitur.* Hanc quidem viam non cognouerunt, .i. Christum qui pro infirmitate carnis eum contemplerunt, aut purum hominem crediderunt, ac per hoc tanquam Dominum eum reueriti non sunt, nec Ioanni crediderunt de eo quidem comminanti & dicenti; *Iam enim securis ad radicem arboris posita est. Omnis enim arbor quæ non facit fructum, &c.* Hoc est quod supponit. *Non est timor Dei.* .i. oculis carnalibus suis, quibus infirmitatē eius percipiebant, actum est vt eum tanquam Deum non metuerent, cū sola eius infirmitas humanitatis, non maiestas appareret diuinitatis.

LIBER SECVNDVS.

S C I M V S *autem.* Redit Apostolus ad inuectionem Iudæorum, vt sicut abstulit eis gloriationem de circumcisione, auferat & de lege vel quibuscumque carnalibus obseruantijs, ne fortè maximè legem in eo commendasse videretur, quod dixerat *primum quidem*, quia credita sunt illis eloquia Dei. Legis ergo gloriationem per hoc primum aufert, quòd eos per legem magis argui quàm iustificari conuincit. Continuatio. Induxit testimonia ex lege .i. veteri Testamento, per quæ omnes reos esse, tam Iudæos scilicet quàm Gentiles, astrueret. Sed scimus Iudæos maximè his argui, quibus quidem solum non de solis lex loquitur, cū eis solis data fuerit atq; imposita. Et hoc est quod ait, *scimus autem, &c.* ac si diceret. Quamuis præmissa testimonia contra Gentiles quoque ex lege collegerimus, tamen scimus legem non eis fuisse locutam, quibus data non fuerat, licet de eis. *Sed his tantum qui in lege sunt.* .i. professioni susceptæ legis tenentur astricti. Notandum legis nomine quandoque propriè quinque tantum libros Moyse comprehendere, quandoque etiam totum vetus Testamentum, sicut in hoc loco. Vnde Augustinus de Trinit. lib. xv. legis nomine aliquando

omnia veteris instrumenti eloquia, aliquando autem proprie lex dicitur, quæ per Moysen data est. *Vt ita omne os obstruatur*] .i. compescatur & conticeat à sua gloriatione, & non aperiat-
 tur nisi in glorificationem Dei, cum scilicet intellexerimus
 illius quoque peculiaris populi Dei maximam gloriam, quam
 ex lege habebant tanquam per eius opera se iustificari arbi-
 trantes, nullam esse reputandam. *Et ita subditus.*] .i. humi-
 liet se Deo, nihil de sua gloriatione presumens, quæ eis etiam,
 qui magni apud Deum videbantur, ablata est. *Quia ex operi-
 bus legis.*] .i. corporalibus eius obseruantijs, quæ maximè po-
 pulus ille attendebat, veluti circumcisionem, sacrificia, ob-
 seruationem sabati, & cæterorum huiusmodi figuralium præ-
 ceptorum. *Non iustificabitur coram illo*] .i. apud Deum, *Omnis
 caro*] .i. omnis ea carnaliter tantum, non spiritualiter adim-
 plens, licet coram hominibus .i. humano iudicio, quod de
 exterioribus & visibilibus iudicat, iusti tales reputentur.

PER *legem enim.*] Ad duo præmissa duo refert. Ad illud
 quod ait, *Vt omne os obstruatur, & subditus, &c.* istud subiungit,
Per legem enim. Ad illud verò aliud, *Quia ex operibus, &c.* istud
 supponit, *Nunc autem siue, &c.* Sic continua. Quare per legem
 compesci à sua gloriatione homines debeant, quia per eam
 inexcusabiles à peccatis suis maximè redduntur, quæ per eam
 cognouerunt potius quàm amiserunt, immò etiam auxerunt,
 & in sequentibus dicturus est. *Vt fiat supra modum peccans peccatum*
per Nunc autem.] Dixi ex operibus proprijs legis scriptæ .i. fi-
 guratiuis illis præceptis quæ lex naturalis ignorat, neminè iu-
 stificari apud Deum, sed nunc .i. in tēpore gratiæ iustitiæ Dei .i.
 quā De⁹ approbat, & per quā apud Deum iustificamur. .i. caritas
 est manifesta, per Euangelicam. .i. doctrinam. *Sine lege.*] .i. car-
 nalibus illis & proprijs obseruantijs legis, Illa tamen dico, *Iu-
 stitia testificata à lege & prophetis.*] qui eam quoque præcipiunt.
 Vnde verò hæc iustitia pendeat, statim annectit dicens, *Iusti-
 tia autem Dei.*] Fidem Christi dicit quam de ipso habemus,
 eum siue ei vel in eum credendo. Vnde & cum adiecit, *qui
 credunt,* non addidit horum aliquem, vt æquè ad omnia se ha-
 beret. Ex fide, quam de Christo habemus, caritas in nobis est
 propagata, quia per hoc quod tenemus Deum in Christo no-
 stram naturam sibi vnisse, & in ipsa patiēdo summam illam
 caritatem nobis exhibuisse, de qua ipse ait, *Maiorem hac dile-
 ctionem nemo habet, &c.* tam ipsi quàm proximo propter ipsum

insolubili amoris nexu cohæremus. Vnde & in sequentibus scriptum est, *Quis ergo nos separabit à caritate Dei ? tribulatio, &c.* Et rursum, *certus sum enim quia neque mors, &c.* Iustitia dico habita supra omnes fideles .i. in superiori eorum parte, i. in anima, ubi tantum dilectio esse potest, non exhibitione operum exteriorum.

Non est enim] Benedixi super omnes pariter, tã Gentiles scilicet, quàm Iudæos, quia nulla est eorum differētia ex hac iustitia Dei per fidem Christi, sicut olim erat ex operibus legis. Quia sicut omnes peccauerunt, ita indifferenter iustificati sunt per hanc summam gratiam à Deo nobis exhibitam. Et hoc est quod ait, *Omnes enim peccauerunt & egent gratia Dei.* i. opus habent quasi ex debito Dominum glorificare. *Iustificati gratis.*] i. quia iustificati sunt non præuenientibus meritis eorum, sed per gratiã ipsius .i. Dei qui prior dilexit nos. Quæ verò sit illa gratia .i. gratuitum & spirituale ipsius donũ, supponit dicens, *Per redemptionem nostram factam per Christum, quem proposuit nobis Deus Pater propitiatorem.*] i. reconciliatorẽ *In sanguine suo.*] i. per mortem suam, & quia non omnibus, sed solis credentibus hæc propiciatio proponitur à Deo .i. constituitur, addit: *Per fidem,*] quia eos solos hæc reconciliatio contingit, qui eam crediderunt & expectauerunt. *Ad ostensionem suæ iustitiæ.*] i. caritatis, quæ nos, vt dictum est, apud eum iustificat .i. ad exhibendam nobis suam dilectionem, vel ad insinuandum nobis quantum eum diligere debeamus, qui proprio filio suo nõ pepercit pro nobis. *Propter remissionẽ.*] i. vt per hanc iustitiam, .i. caritatem remissionem peccatorum assequamur, & sicut per semetipsam Veritas de beata Peccatrice ait, *Remittuntur ei peccata multa, quoniam dilexit multum.* Remissionem dico habitam, vel præcedentium, inquam, delictorum. *In subtentatione Dei.*] i. propter patientiam Dei, qui non statim punit reos & perdit peccatores, sed diu expectat vt redeant per pœnitentiam, & cessent à peccato, & sic indulgentiam consequentur. *Ad ostensionem.*] Primo dixerat simpliciter ad ostensionem iustitiæ suæ, nunc vero addit: *In hoc tempore gratiæ.*] i. amoris potius quàm timoris. Cùm itaque ait iustitiæ eius .i. suæ in hoc tempore scilicet gratiæ, apertè insinuat quam iustitiam primo intellexerit .i. caritatem quæ hominibus nostri temporis .i. temporis gratiæ tanquam pro-

pria conuenit. Potest & quod dicitur in *sustentatione Dei*, ad consequens referri .i. ad hoc quod subiungitur, *ad ostensionem iustitiæ eius in hoc tempore*, ut sit videlicet sensus, Dominum ad hoc sustinuisse vel distulisse in præcedenti tempore, ut manifestaret iustitiam suam quam diximus .i. caritatem in hoc tempore. *Ut sit ipse iustus.*] voluntate, & iustificans operatione .i. ut & velit implere per Christum quod promiserat, de redemptione scilicet vel iustificatione nostra, & sicut voluerit opere adimpleat. *Eum qui ex fide est Iesu Christi*] .i. qui credit eum Iesum .i. saluatorem, per hoc quod Christus est .i. Deus & homo.

QVÆSTIO. Maxima hoc loco quæstio se ingerit quæ sit ista videlicet nostra redemptio per maiorem Christi, aut quando in eius sanguine iustificari Apostolus dicat, qui maiori supplicio digni videmur, quia id commisimus iniqui serui, propter quod innocens Dominus occisus sit. Primo itaque videtur quærendum qua necessitate Deus hominem assumpserit, ut nos secundum carnem moriendo redimeret, vel à quo nos redemerit qui nos vel iustitia vel potestate captos tenet: & qua iustitia nos ab eius potestate liberauerit, qui præcepta dederit, quæ ille suscipere vellet ut nos dimitteret. Et quod dicitur, quod à potestate diaboli nos redemerit qui per transgressionem primi hominis, qui se ei sponte obediendo subiecerat iure quodam, omnem quoque eius potestatem possidebat, ac semper possideret nisi liberator veniret. Sed cum solos electos liberauerit, quando eos diabolus possidebat siue in hoc seculo siue in futuro magis quam modo. Nunquid & pauperem illum, qui in sinu Abraham requiescebat, sicut diuitem damnatum diabolus cruciabat, licet minus eum torqueret, aut & in ipsum Abraham dominium habebat, ceterosque electos? Quando in eum malignus ille tortor dominium haberet, qui portatus ab Angelis in sinum Abraham commemoratur, de quo etiam ipse Abraham testatur dicens: *Nunc autem hic consolatur, tu vero cruciaris?* Et insuper chaos magnum firmatum esse asserit inter electos & reprobos, ut nequaquam hi ad illos transire possint, ne dum diabolus omnibus nequior ibi dominium habeat, ubi nullus iniquus locum vel & transitum habet. Quod etiam ius in possidendo hominem diabolus habere poterat, nisi fortè quia

eum Domino permittente aut etiam tradente ad torquendum ipsum susceperat. Nunquid enim si aliquis seruus Dominum suum deferere vellet, & alterius potestati se subdere, & sic agere liceret, vt non iure si vellet eum Dominus requireret, atque reduceret? Quis etiam dubitet quòd si seruus alicuius Domini persuasionibus suis conseruum suum seducat, & ab obedientia proprii domini declinare faciat; quantò amplius apud Dominum suum reus constituatur seductor quàm seductus, & quàm iniustum sit vt is qui alium seduxerit aliquod inde priuilegium vel potestatem in eum quẽ seduxit habere meruerit, qui etiã si quod prius in eum ius haberet ex hac ipsa seductionis suæ nequitia ius illud amittere meruerit? Scriptum quippe est, *Priuilegium meretur amittere, qui commissæ sibi potestate abutitur.* Quòd alter alteri ex his conseruis præponendus esset, & potestatem in eum accepturus, nequaquam oporteret nequiores præesse qui nullam penitus habet priuilegij rationem: sed magis rationi consentaneum esset, vt is qui seductus est, in eum qui sibi seducendo nocuit, districtiorem exerceret vindictæ. Præterea diabolus immortalitatem quam homini ex transgressione promisit, dare non potuit; vt per hoc iure aliquo retinere posset. His itaq; rationibus conuinci videtur quod diabolus in hominem quem seduxit nullum ius seducendo acquisierit, nisi forte vt diximus, quantũ ad permissionem Domini pertinebant, qui eum illi quasi carcerario vel tortori suo ad puniendum tradiderat. Nec enim ille nisi in Dominum suum peccauerat, cuius obedientiam deseruerat. Si ergo Dominus suus ei dimittere peccatum vellet, sicut & Mariæ Virgini factum est, & multis etiã ante passionem suam Christus fecit, vt dictum est de Maria Magdalene, & quemadmodum scriptum est ad paraliticum Domino dicente, *Confide fili, remittuntur tibi peccata tua*: Si ita, inquam, sine passione homini transgressori ignoscere Dominus vellet, & dicere tortori suo, Nolo vt amplius eum punias: quid iustò torqueri posset tortor, qui nil, vt ostensum est, iuris in torquendo acceperat, nisi ex ipsa Domini permissione? Si ergo Dominus hoc permittere cessaret, nullum tortori ius superesset, cui quidem conquerenti vel murmuranti aduersus Dominum statim responderi à Domino conueniret, *An oculus tuus nequam est quia ego bonus sum?* Non fecit Dominus iniu-

riam diabolo, cum de massa peccatrice carnem mundam & hominem ab omni peccato immunem suscepit. Qui quidē homo nō hoc meritis obtinuit, ut sine peccato conciperetur, nasceretur, & perseveraret: sed per gratiam susipientis eum Domini. Nunquid eadem gratia si ceteris hominibus peccata dimittere vellet, liberare eos à pœnis potuisset? Peccatis quippe dimissis, propter quæ in pœnis erant, nulla superesse ratio videtur, ut propter ipsa amplius punirentur. Qui ergo tantam exhibuit homini gratiam, ut eum sibi vniret in perlonam; non posset minorem impendere, dimittendo scilicet ei peccata? Quæ itaque necessitas, aut quæ ratio, vel quid opus fuit, cū sola visione sua diuina miseratio liberare hominem à diabolo potuisset: quid, inquam, opus fuit propter redemptionem nostram filium Dei carne suscepta tot & tantas inedias, opprobria, flagella, sputa, denique ipsam crucis asperriam & ignominiosam mortem sustinere, ut etiam cū iniquis patibulum sustinuerit? Quomodo etiam nos iustificari vel reconciliri Deo per mortem filij sui dicit Apostolus, qui tantò amplius aduersus hominem irasci debuit, quantò amplius homines in crucifigendo filium suū deliquerunt, quàm in transgrediendo primum eius in paradiso præceptum vnus pomi gustu? Quo enim amplius multiplicata sunt per homines peccata, nasci Deum hominibus amplius iustum fuerat. Quod si tantum fuerat illud Adæ peccatum, ut expiari non posset nisi per mortem Christi, quam expiationem habebit ipsum homicidium quod in Christum commissum est, tot & tanta scelera in ipsum vel in suos commissa? Nunquid mors innocentis filij in tantum Deo patri placuit, ut per ipsam reconciliaretur nobis, qui peccādo commisimus, propter quod innocens Dominus est occisus? Nec nisi hoc maximum fieret peccatum, illud multo leuius potuit ignoscere, nec nisi multiplicatis malis tantum bonum facere. In quo etiam iustiores facti sumus per mortem Filij Dei, quàm ante eramus, ut à pœnis iam liberari debeamus. Cui etiam pretium sanguinis datum est ut redimeretur, nisi ei in cuius potestate eramus. i. ipsius ut dictum est Dei, qui nos tortori suo commiserat? Neque enim tortores, sed domini eorum captiuorum componunt aut suscipiunt. Quomodo etiam precio hos captiuos dimisit, si ipse prius hoc precium exegerit aut instituerit,

rit, vt captiuos dimitteret. Quàm verò crudele & iniquum videtur, vt sanguinem innocentis in precium aliquod quis requisierit, aut vllò modo ei placuerit innocentem interfici, nedum Deus tam acceptam filij sui mortem habuerit, vt per ipsam vniuerso reconciliatus sit mundo? Hæc & his similia non mediocrem mouere quæstionem nobis videntur, de redemptione scilicet vel iustificatione nostra per mortem Domini nostri Iesu Christi.

SOLVITIO. Nobis autem videtur quòd in hoc iustificati sumus in sanguine Christi, & Deo reconciliati, quòd per hanc singularem gratiam nobis exhibitam, quòd filius suus nostram suscepit naturam, & in ipso nos tam verbo quàm exemplo instituendo vsque ad mortem perstitit, nos sibi amplius per amorem astrixit: vt tantò diuinæ gratiæ accensi beneficio, nil iam tolerare propter ipsum vera reformidet caritas. Quod quidem beneficium antiquos Patres etiam hoc per fidem expectantes, in summum amorem Dei tanquam homines temporis gratiæ non dubitamus accendisse, cum scriptum sit: *Et qui præibant, & qui sequebantur, clamabant dicentes; Osanna filio David, &c.* Iustior quoque .i. amplius Dominum diligens quisque sit post passionem Christi quàm ante, quia amplius in amorem accedit completum beneficium quàm speratum. Redemptio itaque nostra est illa summa in nobis per passionem Christi dilectio, quæ nos solum à seruitute peccati liberat, sed veram nobis filiorum Dei libertatem acquirit; vt amore eius potius quàm timore cuncta impleamus, qui nobis tantam exhibuit gratiam, qua maior inueniri ipso attestante non potest. *Maiorem hac, inquit, dilectionem nemo habet, quàm vt animam suam ponat pro amicis suis.* De hoc quidem amore Dominus alibi ait, *Ignem veni mittere in terram, & quid volo nisi vt ardeat?* Ad hanc itaque veram caritatis libertatem in hominibus propagandam se venisse testatur. Quod diligenter attendens Apostolus in sequentibus ait, *Quia caritas Dei diffusa est in cordibus nostris per Spiritum sanctum qui datus est nobis. Vt quid enim Christus. &c.* Iterum. *Commendat autem suam caritatem Deus in nobis. Quoniam sicut adhuc, &c.* Quæ quidem plenius suo loco exponemus. Nunc autem succinctè, quantum ad expositionis breuitatem pertinet, de modo nostræ redemptionis quod videtur nobis sufficiat. Si qua verò desunt

perfectiōni, Theologiæ nostræ tractatui reseruamus; *Vbi est.*] Dixi sine lege iustitiam manifestari nunc per fidem Christi super omnes pariter qui credunt. Igitur ô Iudæ vbi est amplius gloriatio tua, illa scilicet singularis, quam habebas de lege & corporalibus eius obseruantijs? Nam exclusa est .i. ablata tibi & annullata. *Per quam legem.*] .s. est exclusa per legem *factorum.*] .i. aliquorum exteriorum operum? *Non,* *sed per legem fidei,*] vt dictum est, Iesu Christi .i. caritatem ex fide nostræ saluationis per Christum venientem. Nam & antequam aliquis baptizaretur, si iam credit & diligit, sicut Abraham de quo scriptum est, *Credidit Abraham Deo, & reputatum est ei ad iustitiam,* & fortasse Cornelius nondum baptizatus, cuius eleemosinæ susceptæ sunt à Deo, & de preteritis peccatis verè poenitet, sicut publicanus qui de templo descendit iustificatus: eum iustum dicere non dubito, seu iustitiam habere, qui vnique reddit quod suum est. Vnde & ex vtero sanctificatos Ieremiam & Ioannem dicimus, vbi specialiter illuminati Dominum iam cognoscebant, & diligebant; quamuis eis adhuc necessarium esset suscipere circumcisionem, quæ tunc locum obtinebat baptismi. Quare ergo, inquires, istos tales postea circumcidi vel baptizari oportuit, qui iam antea erant, ex fide .s. & caritate quam habebant, & quos si tunc moreretur saluari necesse esset? Nemo quippe iustè mori potest, vel habens caritatem, qui damnatur. Rursus nemo sine baptismo vel martyrio post datam de baptismo sententiam saluari potest. Mori tamen poterat cum caritatem habebat ante baptismum vel martyrium, eo quidem tempore quo inquires si moreretur & saluari eum necesse esset & dānari. Nos autē cum dicimus omnem, qui Dominum sincerè & purè propter ipsum iam diligit, prædestinatum ad vitam, nec vnquam præueniendum morte, donec ei vel per prædicationem vel per Spiritum sanctum Dominus reuelet quicquid ei de sacramētis fuerit necessarium, & insuper facultatem hoc percipiendi tribuit. Quod verò opponitur, tum qui ante baptismum iam iustus erat, credendo atque diligendo Deum in eo tempore etiam esse, in quo si moreretur & saluari eum & dānari deberet. Hoc opponi potest de quolibet criminaliter peccante, qui ad vitam prædestinatus est, sicuti de David adulterante. Sicut enim illum, qui iustus erat, saluari oporteret; sic iustū

qui prædestinatus est sicut non baptizatum damnari necesse esset, sic istum adulterantem. Fuit itaque & David in quodam tempore, in quo si moreretur, & damnari eum & saluari oportebat. Sed rursus, si in illo tempore fuit, in quo non posset mori benè, & in nullo in quo nō malè posset mori, quamdiu habuit liberum voluntatis arbitrium: non tamen omninò in aliquo fuit, in quo necesse esset eum & benè & malè mori. Immo in nullo tempore necesse fuit aliquem benè mori, vel in nullo aliquē malè mori, sed in singulis temporibus, in quibus potest aliquis benè mori, potest in eisdem malè mori. In nullo tamen coniunctim verum est dicere, eum posse mori simul benè & malè. Sic & de illo qui caritatē habet ante baptismum, & per hoc iustus est, concedimus quòd in nullo tempore fuerit, in quo necesse esset eum saluari & damnari simul si moreretur. Posset quippe is qui caritatem habet ante baptismum sine caritate tunc esse, & sic mori & damnari tantum. Posset & mori baptizatus in eo tempore, in quo nondum est baptizatus, & sic saluari. Quòd si dicas coniunctim eum posse simul & habentem caritatem & non baptizatum, non recipio magis quàm si diceres aliquem posse mori adultum & prædestinatū. Sic verò eum qui prædestinatus est bene agere oportet, ut saluetur: sicut eum, qui iam iustus est, credendo & diligendo baptizari propter fixam Domini sententiam de baptismo, vel propter ipsam iustitiæ perseuerantiam. Si enim is qui caritatem antequàm baptizari habet, priusquàm baptizetur vitam finiret, nequaquam in ipsa caritate perseueraret ut de æterna beatitudine penitus desperaret, & se statim in ipso exitu esse in perpetuo damnandum præsentiret. Sicut autem ante baptismum aliquem ex fide .i. dilectione iustum iam dicimus, cui tamen in baptismo nondum sunt peccata dimissa .i. pœna eorum penitus condonata: sic & post baptismum paruulos & qui nullius discretionis sunt, quamuis remissionem perceperint peccatorum, nondum tamen iustos dicimus, quamuis mundi sint apud Deum, qui nondum aut caritatis aut iustitiæ capaces esse possunt, nec aliqua merita habere. Qui tamen si in hac imbecillitate moriantur, cum incipiunt de corpore exire, & vident sibi per misericordiam Dei gloriam præparatam, simul cum discretionē caritas Dei in eis nascitur. Nequis itaque Iudæorum nobis, immò Apo-

stolo posset opponere, nos quoque per legem factorum .i. exteriorum operum, sicuti baptismi iustificari : sufficiat nos hoc de nostra iustificatione, immò omnium quæ in caritate consistit interposuisse, & antequam sacramenta suscipiantur siue nostra siue illorum. Quod & Propheta considerans ait : *In quacunque hora peccator ingemuerit saluus erit.*

ARBITRAMVR enim.] Nos scilicet, quos Dominus præposuit .i. censemur vel testificamur. Vnde ut ait Haymo, arbitros dicimus Iudices siue testes. *Hominem omnem.*] scilicet tam Iudæum quàm Gentilem, *Per fidem*] tanquam scilicet ei necessariam, quia sine fide impossibile est Deo placere. Per fidem dico, *Sine operibus legis*] illis videlicet exterioribus & corporalibus obseruantijs. *An Iudeorum.*] Arbitrantur & bene, quia etiam Gentes gratiam Dei assequuntur per fidem, quæ tamē legis opera non seruant, sicuti Iob Gentilis olim, & nunc etiā Gentiles conuersi. Et hoc est quod ostendit dicens, *An Iudeorum tantum* est Deus per gratiam. *Quoniam quidem*] Ac si diceret, utrorumque est per gratiam, quia utrosque iustificat per fidem, quæ ad caritatem, ut diximus perducit. *Circumcisionem*] .i. Iudæos. *Præputium*] .i. Gentiles. Quod dicit, *ex fide in fidem*, diuersitas est locutionis, non sententiæ. Vnde August. in lib. de spiritu & littera, *non ad differentiam dictum est tanquam sit ex fide aliud per fidem, sed ad varietatem locutionis.* *Legem ergo.*] Quoniam quidem per fidem sine operibus legis dicimus homines posse saluari, ergo legem destruimus per fidem .i. per commendationem fidei eam irritam mōstramus. *Absiti: immò legem statuimus.*] .i. volumus ut lex per omnia cōpleatur. Ille enim veraciter etiam figuralia nunc implet præcepta, qui illud facit vel credit, quod nunc tantum illa habent figurare, non efficere; non tam sonum vocis, quàm sensum & intentionem attendens iubentis. Denique ut ipse ait Apostolus, *plenitudo legis est dilectio*, de qua etiam commemoratis eius præceptis Dominus ait diuiti, *Hoc fac & viues.*

QVID ergo.] Quoniam quidem exteriora illa opera legis iustitiam non habent conferre, quid ergo iustitiæ vel utilitatis? *Dicemus inuenisse Abraham secundum carnem.*] .i. per illas carnales obseruantias, veluti circumcisionis vel sacrificiorū. Ac si diceret, nihil. *Cum dicit patrem nostrum.*] .i. quem imitari debemus quasi filij eius per doctrinam : quæstionem suam

agitat, quasi & nos eam in istis sequi debeamus. *Si enim.*] Et verè non est per illa exteriora iustitiam assecutus, diuino iudicio, quia per illa nullum apud Dominum pretium habet, & hoc est: *Si iustificatus est ex operibus.* .i. si exteriora, quæ iustitiæ hominibus videbantur, exercuit. *Habet quidem gloriam, sed non apud Deum.*] .i. apud homines, qui de visibilibus iudicant, magnus per hoc habetur: nec apud Dominum, qui cordis inspector est & renum probator, & in abscondito videt. *Quid enim.*] Et bene dico, non ex operibus Abraham iustificari apud Deum, sed ex fide, quia sic habemus ex testimonio scripturæ. Et hoc est, *Quòd enim dicit scriptura.*] hoc est, attendimus quod scriptum est in Genesi, hoc videlicet quod sequitur.

CREDIDIT Abraham Deo.] .i. promissionibus diuinis, siue exeundo de terra sua, vt multiplicaretur in aliena, siue de promissione filij sui, de quacunque ei promisit, quantumcumque incredibilia vel magna videntur. Hæc autem est vera illa fides, quæ per dilectionem operatur. Cùm itaque dicit, *credidit Deo*, tale est: credendo executus est libenter iussa Domini. *Et reputatum est hoc ei à Domino ad iustitiam.*] .i. ad obedientiam fidei eum apud Dominum iustum constituit: non circumcisio, vel ceteræ corporales obseruantia, quæ in lege postea scripta sunt. *Ei autem.*] Ac si diceret, Non sine causa dico quòd Abraham si ex operibus iustificaretur haberet gloriam .i. maximam laudem inter homines, sed nō apud Deum: sed propter hoc dico, quod ei *qui operatur, imputatur.*] ab hominibus, *Mercès secundum debitum.*] hoc est suæ acquisitionis & propriæ virtutis id dicitur esse, non ex aliena gratia conferri, cum apud Dominum sola amantis fides ad iustitiā sufficiat. Et hoc est quod sequitur, *Ei verò qui non operatur.*] legalia videlicet opera, sed per fidem ei verè cohæret, qui iustificat impium, & hoc est, *Credenti in eum qui iustificat impium*] deputatur ab eo scilicet, qui iustificat impium .i. à Deo. *Fides autem ad iustitiam.*] .i. remunerat eum pro hac fide tanquam iustum. Hic apertè Apostolus determinauit, cùm ait, *credenti in eum*, qualem fidem intelligit. Aliud est enim credere Deum, vt videlicet ipse sit: aliud est Deo .i. promissis vel verbis eius, quòd vera sint: aliud in Deum. Tale quippè est credere in Deum, vt ait August. super Ioannem, amare,

credendo diligere, credendo tendere ut membrum eius efficiatur. Credunt itaque dæmones quoque & reprobī Deum, credunt Deo, sed non in Deum; quia non diligunt, nec diligendo se ei incorporant .i. Ecclesiæ, quæ eius corpus est, per deuotionem aggregant. Quomodo autem deputatur supponit, *Secundum propositum gratiæ Dei.*] Secundum hoc quod in proposito diuinæ bonitatis consistit, quæ magis animum quàm opera remunerat. Alioquin multi, qui facultatem operandi non habent, cùm tamen habent voluntatem, reprobarentur.

Sic ut & David dicit.] .i. exponit nobis, *Beatisudinem hominis cui Deus accepto.*] .i. per suam misericordiam susceptionis ipse surgere per se ad Deum non valeret. *Fert iustitiam*] quia ipse cui affertur sumere per se non poterat. *Fert, inquam, sine operibus legis,*] scilicet legalibus. Quod enim ait, *Beati quorum remissæ sunt iniquitates, &c.*] generaliter dicitur, Quicunque sint siue Iudæi siue Gentiles, remittitur iniquitas quando pœna eius condonatur per gratiam, quæ exigī poterat per iustitiam: ac per hoc iam ipsam gratiam quasi fundamentum scriptura constituit, ut quicquid deinceps superædiferetur, præeunti gratiæ deputetur. Remissis autem iniquitatibus qualiter ad perfectionem diuina gratia hominem perducatur profectitur, cùm deinde addit peccata tegi, ac denique nec imputari. Remittuntur quidem peccata per pœnitentiæ gemitum, de quo dicitur: *Quacunque hora peccator ingemuerit.* Quia priusquàm ei verè displiceret iniquitas, & omnis mala eius voluntas abscedit: iam ita est Deo peccator reconciliatus, ut à gehennæ pœnis sit liberatus, nec vnquam gehennam incurrat si in hoc gemitu moreretur, paratus ad omnē quam posset satisfactionem. Tunc autē tecta sunt peccata, quando in hoc seculo satisfactio sequitur. Quæ quidem satisfactio & purgatorias extinguit seculi alterius pœnas, cùm prius pœnitentia pœnas deleuerit damnatorias & gehennales. Tunc ergo tecta sunt ante oculos Iudicis peccata, quando nec pro eis nihil videt quod puniat.

Beatus vir.] Eum primum plurali numero beatum enunciat, & virum nominat dicens, *Beatus vir, &c.* Nisi quia diuinæ gratiæ beneficia vsque & ad singularem illum hominem ostendit, qui in vnā Christi personam Deo vnitus est.

Cuius etiam beatitudinem eodem Propheta describente, in ipso statim capite libri scriptum est, *Beatus vir qui non abiit*. Vir quippe à viribus dictus est idèd, quia ille qui nihil debilitatis ex corruptione peccati traxit, qui fortior fortem alligauit, & arma diripuit, quasi vir singulariter per excellentiam dicitur. Alij verò cooperatione ipsius quasi effeminati & molles omnes existunt, terrenis voluptatibus subjacentes. Huic autem omninò si sit immunis à peccato, nullum Dominus imputauit peccatum, quia nulla eum pœna pro peccato dignū iudicauit aliquo vel originali vel proprio, qui nec in peccato conceptus fuerit, nec peccatum aliquod commiserit. Possumus etiam tunc beatitudinem nominata hominum saluatorum vel saluandorum genera intelligere. Vnum quidem genus est paruulorū baptismo vel martyrio sanctificationum, & quorumlibet verè pœnitentium, quibus in hac vita satisfactionem pœnitentiæ non licet explere. Aliud verò genus est, quasi per condignam satisfactionem peccata corrigere. Tertium verò genus in vnius saluatoris singularitate, vt expositum est, permanet. Cum itaque ait, *Beati quorum remisse sunt iniquitates*, solam intelligit remissionem, quam scilicet nulla hîc satisfactio sequitur. Paruuli autem, iuxta Psalmistam, in iniquitatibus concepti sunt: illi, in quibus concepti & nati, iniquitates remittuntur, dum originalis peccati damnationem pro eis, vt diximus, non incurrunt. Cæteri enim, sicut suprà meminimus, per satisfactionem bonorum operum peccata corrigunt præterita. Et hoc quidem ipsa constructionis proprietates exigere videtur, vt cum hæc dicuntur, *quorum & quorum*, non eisdem intelligamus, sed diuersos. Alius enim sensus si semel proferatur *quorum*, hoc modo: *Beati quorum remisse sunt iniquitates & secta sunt peccata*. Alius si repetitum bis dicatur, sicut præsens habet littera. Semel quippe dictum eisdem, duplicatum diuersos insinuat.

QVÆSTIO de gratia Dei & meritis hominum hoc loco se ingerit, quæ sint apud Deum videlicet merita nostra, cum omnia bona eius tantum gratiæ tribuenda sint, qui in nobis operatur, eodem attestante Apostolo, & velle & perficere pro bona voluntate. Vnde & alibi ait: *Quid autem habes quod non accepisti? Si autem accepisti, quid gloriaris quasi non acceperis?* Quærendum est in quo merita nostra consistant, in voluntate

scilicet tantum, an etiam in operatione .i. quid ad gloriam sine pœna Deus in nobis remuneret, & vtrum virtus ad beatitudinem sufficiat, & si in operatione non prorumpat, & vtrū opus exterius quod bonam vel malam voluntatem sequitur, meritū augeat, & cum omnis virtus sit animi, & in ipso fundata consistat, vtrum omne peccatum similiter animi sit, & quid inter vitium animi & peccatum differat, & quot modis peccatum dicatur. Sed quia hoc maximè ad Ethicam pertinet considerationem, & diutiùs in his dirimendis immorandum esset, quàm breuitas expositionis postulat, nostræ id Ethicæ discussioni reseruemus.

BEATITUDO *ergo.*] Quandoquidem ostensum est quot modis beatitudo dicatur siue habeatur, illud etiam videamus à quibus habeatur .i. à circumcisis tantum an etiam à præputiatis. Et hoc est, quod quærendo ait: ergo hæc beatitudo, quam videlicet in Deum assequimur si non operibus etiam legis credendo, *Manet in circumcisione tantum.*] .i. in circumcisis, an etiam in præputiatis? Quæ verò sit hæc beatitudo, quam videlicet in Deum assequimur, determinat; dicens eam esse quam Abraham consecutus est, cum ex fide fuit iustificatus. Et hoc est quod subdit, *Dicimus enim.*] .i. ex supposito conuincimus testimonio, *quia Abrahæ fides.*] qua, ut expositum est, 'in Deum credidit, *reputata est ei apud Deum ad iustitiam.*] .i. Deus eum iustum esse reputauit, & remuneratione iustorum dignum iudicauit. Dixi reputata est, ergo quæramus in ipso Abraham *quomodo.*] .i. quando sit ei reputata fides eius ad iustitiam, vtrum videlicet antequam circumcideretur, vel post, ut per eum videlicet, & de cæteris hominibus iudicare possimus, vtrum videlicet soli circumcisi hanc beatitudinem iustitiæ assequantur, an non. Et hoc est quod ait, quomodo scilicet requirendo, & statim soluendo. *In circumcisione.*] .i. priusquam circumcisis fuit, *In præputio.*] .i. antequam circumcideretur, dum adhuc videlicet præputium retineret. *Et signum accepit.*] Forte quæreret aliquis quare superflue circumcisionem acceperit Abraham, cum ante iustificatus fuerit, nihilque in ea iustificationis acceperit. Et ideo hanc quæstionem præueniens ait, non ad iustificationem aliquam cum hoc signum exterius suscepisse, sed ad sanctificationem & ostensionem iustitiæ, quam iam habebat

habebat in mēte dū adhuc in præputio esset. Et hoc est quod dicitur *signū accepit, &c.* .i. circumcisiōē accepit pro signo, & cuius rei signo statim supponit. *Signaculum.* .i. pro signaculo .i. signo, *Iustitia fidei.*] quæ est etiā in præputio .i. in præputiaris nihilominus quàm in circumcisiis, vt videlicet tali signo iustitiam potius designaret quàm adipisceretur. Iustitia fidei dicitur, quæ est in mente, ad differentiam illius quam solent homines iustitiam appellare, quam scilicet exterius exercēt in vindicta malorum, vel in beneficijs aliquibus exigendis. Vnde scriptum est, *Attendite ne iustitiam vestram faciatis coram hominibus vt videamini ab eis.* Possumus etiam ita variare signū & signaculum, vt circumcisiō ipsa alterius rei signum sit, alterius verò signaculum: signum quidem sit carnalium Abrahamæ filiorum, & signaculum spiritualium; cū ipse tam Iudæorum secundum carnem quàm Gētilium per fidem pater sit constitutus. Est quippe iuxta Haimonem signaculum quasi sigillum quod alicui rei imprimitur vt lateat, atq; ideo benè referendum videtur ad spirituales filios Abrahamæ ex Gētibz futuros, qui nondum apparebant. Circumcisiō itaque, quæ in ipso incœpit, & in carnali eius posteritate est reseruatā, tam signum quàm signaculum fuit, quia & per eam distinguebantur à cæteris populis filij Abrahamæ carnales, & præsignabantur futuri ex gentibus filij eius spirituales, qui v. per fidem imitarentur. Vnde & bene Ismael, quē secundū carnem, nō secundū virtutē miraculi genuit, circumcisi⁹ legitur, per quod v. carnalium Abrahamæ filiorū circumcisiō signaretur: exterior per quam, vt dictum est, carnalis Israel cognosceretur. Isaac verò qui postea natus est, gentilis populi postea vocati spirituales à vicij circumcisiōem exprimit, quam & proseliti figurabant. Rectè itaque Apostolus signum & signaculū distinguens quantum ad Iudæos carnales Abrahamæ filios, & Gentiles filios eiusdem etiā spirituales dixit primitus signum circumcisiōis .i. signum carnalis Israel, per quod videlicet populus ille à cæteris distinguebatur, & post modū signaculum iustitiæ fidei, quæ est in præputio .i. sacramentum spiritualis circumcisiōis, quam solam habent fideles ex gentibus co. ecti. Potest etiam signaculum quasi expressum signum intelligi, iuxta quod in laude apostatæ Angeli dicitur, *Tu signaculum similitudinis, &c.* Per hoc quippe circumcisiōis

signum maximè iustus ac spiritualis homo exprimitur, qui voluptatibus carnis propter Deum renunciat, & à se illas amputat, quæ maximè in renibus dominantur, & per genitalia exercentur. Potest & signaculum quasi diminutivum accipi à signo .i. primum signum iustitiæ Abraham. Non enim erat magnum illam cuticulam ad imperium Dei amputare, ad comparationem eorum quæ postea spirituales Abraham filij tam Martyres quàm reliqui Sæcti pro Christo sustinuerunt. Potest & sic distingui signum & signaculum, ut quod signum magnum est in carne tam bonis videlicet quàm malis commune, paruum est signum iustitiæ, quia pauci sunt qui Abraham ita per iustitiam cohæreant sicut per carnem. Signum itaque est secundum carnem, sed signaculum .i. paruum signum secundum iustitiam, quia in multis Abraham posteris secundum carnem est dilatatum, sed in paucis secundum iustitiam contractum. Vnde bene dicit signum circumcisionis, scilicet exterioris, quæ omnibus equè conuenit, & signaculum iustitiæ quæ paucorum est.

N V N C verò pauca de virtute & sacramento circumcisionis discutienda sunt, quid videlicet ipsa conferret aut figuraret, & quare potius in membro genitali & virili, non femineo instituta sit, & in octava die iussa fieri in infantibus. In adultis quippe nullum erat circumcidendi determinatum tempus, nisi quando ad Iudaismum conuerterentur. Constat autem hoc idem apud antiquos circumcisionē valuisse, quod nunc apud nos baptismus efficit. Vnde ait August. de nuptijs & concupiscentia lib. 1. *Ex quo enim instituta est circumcisio in populo Dei, quod erat tunc signaculum iustitiæ fidei, ad significationem purgationis valebat & in parvulis veteris originalis peccati, sicut & baptismus ex illo valere cepit ad innoationem hominis, ex quo est institutus.* Greg. in Moral. lib. 1111. *Quod valet apud nos aqua baptismatis, hoc egit apud veteres vel pro parvulis sola fides, vel pro maioribus virtus sanctificij, vel pro his qui ex Abraham stirpe descenderant mysteriū circumcisionis.* Ex his itaq; liquet circōcisionem apud Antiquos eandē vim obtinuisse in remissione peccatorū, quam habet modo baptismus: & tamē qui modo baptizati statim moriuntur, regnū cœlorū statim ingrediuntur: quod tunc non fiebat, quia scilicet hostia nondū erat soluta, in effusione videlicet sanguinis Christi, sicut nec illi qui baptismo

Christi baptizati fortassis ante passionē ei⁹ mortui sunt, ianuæ celestis aditū adhuc habere poterant. Non enim nisi per mare rubrum transitum habuerunt Israelitæ ad terram promissionis, hoc est baptismus qui per mare designatur non potest sine rubore .i. sanguinis Christi effusione quenquam ad veram promissionis terram .i. cœlestem Ierusalem transmittere. Quemadmodum verò baptismo Christi hostia postmodum adiuncta regnum cœlorum contulit, ita eadem circumcissione præcedentium subsecuta idem eisdem præstitit. Est autem circumcisio carnis signum interioris animæ circumcissionis, sicut ablutio exterior baptismi signum interioris animæ mundationis per peccatorum remissionem. Maximè autem in genitali membro, quo per carnalem concupiscentiam culpæ originalis peccatum vna cum prole propagatur, hoc sacramentū fieri oportuit; vt illo merito membro plecteretur peccatum quod per ipsum ad posteros transmittitur. Mulier verò cui dictum est, *In dolore paries filios*, non huiusmodi pœna afficienda fuit, cui ad pœnam satis esse debuit in genitali suo, per quod similiter peccatum transfunditur, partus grauiissimus dolor, quem in eo sustinet: cui ni fallor sexui sacrificium pro eo oblatum ad indulgentiam sufficit, atque ad originalis peccati remedium. Videtur insuper nobis ob hoc præcipue genitale viri potius quàm mulieris circuncidendum fuisse, vt in hoc significaretur omnibus in populo illo, qui per illud membrum gignerentur, huius sacramenti remedium esse necessarium, per quod ipsi à veteris hominis expiarentur contagione. Quod non ita est de muliere, cùm Dominus Iesus ex muliere absque omni peccato natus fuerit. Potest etiam viri circumcisio beatum eundem virum spiritualiter designare, qui solus sine concupiscentia conceptus carnem puram & penitus absque præputio immunditiæ suscepit. In cuius quidem typo femur Abraham, quod primo circumcissum est, seruus eius in sacramento suscepit, quasi in eum iurās qui ex semine illo nasciturus ei primo fuerat promissus .i. in Christum. Circumcisioni verò infantium certa dies .i. octaua recte præfixa est, vt in hoc videlicet præfiguraret illius octauæ claritatem, & beatitudinem quæ sanctis promissa est illis solis deberi qui innocenter more paruulorum vixerunt, nec purificationis sacramentum ad hoc sufficere, nisi innocentia.

custodiatur vitæ. Ad quod nos Dominus adhortans constituto in medio paruulo ait, *Nisi conuersi fueritis, & efficiamini sicut paruulus iste, &c.* Octaua dies, qua circunciditur paruulus, futuram Sanctorum claritatem in die resurrectionis significat, quâdo v. resumptæ carnis veritas permanebit, siue superaddita corruptela peccati, quæ erit vera circūcisio, in expolatione scilicet veteris hominis cum actibus suis, cum iam videlicet carnalis concupiscentiæ stimulis manentibus angelicè nobis viuendum fuerit: vbi, inquit Veritas, *neque nubent neque nubentur, sed erant sicut Angeli Dei.* Quia verò totum præsentis vitæ tempus per septem dies peragitur, rectè illa vitæ futuræ perpetua claritas per octauam intelligitur. Vnde & Psalmos, qui intitulantur pro octaua, ad diem resurrectionis certum est pertinere.

QVÆRITVR autem de infantibus ante octauam diem morientibus, utrū dānentur, cum eos videlicet nondū iuxta præceptum Domini circuncidi liceat, nec pro eis legamus sacrificia esse offerenda ante diem maternæ purificationis .i. à natiuitate masculi quadragesimum. At verò cum scriptū sit, *Omnis anima cuius caro præputij non fuerit circumcisa, peribit de populo suo.* Et rursus si præcepto Domini ante octauam diem à circumcissione parui inhi-beantur, videtur crudelis diuina sententia in damnationem talium, qui & his circumcissionem necessariam instituit, & circuncidi quando possent nō permittit. Neque autem à Salvatore quicquam præcipi vel institui oportuit quod saluti obssisteret, nec eneruari debuit remedium quod pluribus proficere posset, vt pote fides parentum, siue sacrificiorum ritus, quibus antea paruulos siue adultos mundari constat, iuxta illud Gregorij quod nouissimè adiecimus. Sed hoc quidem obiectioni in nostri quoque sacramenti institutione .i. baptismi redundare videtur, cum v. propter aquæ tantum absentiam deesse nonnullis baptismum contingat, quem in aqua solummodo Dominus constituit, nec tamen eos cum vel ipsi ad hoc nitantur, vel alij propter eos, saluandos esse definimus absque baptismo, nisi interueniat martyrium. Prouidentia itaque diuinæ omnem eius dispositionem committentes, qui solus nouit quare hūc elegerit, illum verò reprobauerit, auctoritatem scripturæ quam ipse dedit immobilem teneamus; vt videlicet tēpore

circumcisionis nullos de semine Abraham sine illa mortuos temerè asseramus saluari, nisi fortè pro Domino interfecti sint, sicut de innocētibus creditur. Attende autē quod dictū est, *de semine Abraham*, cū nonnulli fideles etiam post institutionem circumcisionis ante aduentum Christi circumcisi morientes lege naturali nihilominus quā circumcisi saluati sunt, sicut Iob & nonnulli fortasse alij gentiū naturali lege contenti, & sacrificiorum ritu quæ Iob quoque pro filiis obtulisse legitur, ab originali peccato seu proprijs expiati, sicut Abel vel Noe ante legem, vel circumcisionis institutionem: de qualibus supra Apostolus meminit, dicens, *Cum enim gentes quæ legem non habent, &c.* Vnde & Isidorus de summo bono lib. i. cap. xv. *Christi*, inquit, *aduentum non tantum plebis Iudæa sancti prophetantes expectauerunt, sed fuisse etiam in nationibus plerosque sanctos viros prophetia donum habentes, quibus per Spiritum sanctum Christus reuelabatur, & à quibus expectabatur, sicut Iob, Balaam, qui Christi utique predicauerunt aduentum.* Licet autem Iob ex Abraham quoque & Isaac per Esau descēdisse credatur, non tamen in semine Abraham vel Isaac quisquam est computandus, qui ex Patriarcharum filiis in cultu Dei minimè remanentibus sit procreatus. Vnde & Dominus Abraham leniens molestiam eius, de expellenda scilicet Agar ancilla & Ismaele filio suo ad imperium Sarræ, *Non tibi*, inquit, *videatur asperum super puero & super ancilla tua. Omnia quæ dixeris tibi Sarra, audi vocem eius, quia in Isaac vocabitur tibi semen. Sed & filium ancillæ faciam in gentem magnam, quia semen tuum est.* Hoc etiam Apostolus in inferioribus præsentis Epistolæ prosecutus & quasi spiritualiter exponens ait, *Non enim omnes qui ex Israel hi sunt Israelitæ; neque qui semen sunt Abraham omnes filij, sed in Isaac vocabitur tibi semen.* i. nō qui filij carnis hi filij sunt Dei, sed qui filij promissionis sunt æstimantur in semine. Itaque iuxta historię veritatem, neque Iob neque alij multi licet de genere sint Abraham, tamen semen Abraham vocandi non sunt, quia de infidelibus ut dictum est nati sunt. Patres tamen talium, licet infideles fuerint, ut pote Ismael siue Esau, semen Abraham sunt, quia non de infidelibus geniti, iuxta quod Dominus Abraham supradixit de Ismael, *quia semen tuum est.* Et tamen nullum semen Abraham vocandum erat sicut in Isaac. Aliud est itaque Isaac siue Is-

mael vocari semen Abraham. Tale quippe est, *In Isaac vocabitur tibi semen*, ac si diceret, in posteris Isaac, tam videlicet carne quàm fide ei coniunctis, non aliquibus interuenientibus patribus in posteris Isaac, tam videlicet carne quàm fide eis à cultu Dei recedentibus. Hoc enim credo significari, cum Dominus circumcisionis pactum cum Abraham & semine eius iniens præmissis istis, *Statuam pactum meum inter me & te, & inter semen tuum post te in generationibus suis*, mox adiunxit, *fædere sempiterno, ut sim Deus tuus & Deus seminis tui post te*. Tale quippe est in generationibus suis fædere sempiterno ut sim Deus tuus, &c. Ac si diceret, In posteris tuis mihi continuè per obedientiam fæderatis, nec à cultu meo per interpositionem infidelium patrum disiunctis. Hoc autem modo neque Iob neque cæteri Gentiles ab Ismael vel Esau descendentes in semine Abraham sunt estimandi, nec ad eos quicquam vel circumcisio vel cætera legis figuralia præcepta pertinent; cum hæc solummodo Abraham & semini eius, ut supra determinauimus, iniuncta sint. Scriptum quippe est de circumcisione, Domino sic eam Abraham primò præcipiente, *Statuam pactum meum inter me & te, & semen meum post te in generationibus suis fædere sempiterno, ut sim Deus tuus & seminis tui post te, daboque tibi & semini tuo terram peregrinationis tue, omnem terram Chanaan in possessionem æternam, eròque Deus eorum. Et tu ergo custodies pactum meum & semen tuum post te in generationibus suis. Hoc est pactum meum quod obseruabitis inter me & vos & semen tuum post te. Circumcidetur ex vobis omne masculinum, & circumcidetis carnem præputij vestri, ut sit in signum fæderis inter me & vos. Infans octo dierum circumcidetur in vobis. Omne masculinum in generationibus vestris tam vernaculus quàm emptitius circumcidetur, & quicumque non fuerit de stirpe vestra, eritque pactum meum in carne vestra in fædus æternum. Masculus, cuius præputij caro circumcisa non fuerit, peribit anima illa de populo suo, quia pactum meum irritum fecit. Et post aliqua, super Ismael quoque exaudiui te, & multiplicabo eum valde. Pactum verò meum statuam ad Isaac quem pariet tibi Sarra. August. de nuptijs & concupiscentia lib. 1. de circumcidendis. Deus sic manifestauit infantibus, Masculus qui non circumciditur præputij sui carne octauo die, disperiet anima eius de genere suo, quia testamentum meum dissipauit. Dicat iste si potest quomodo puer ille octo dierum testamentum dissipauit. Quantū ad ipsum*

*proprie attinet, innocens infans. Tunc ergo dissipauit testamentum Dei, nec hoc de imperata circumcissione, sed illud de ligni prohibitionem, quando per unum hominem peccatum, & per peccatum mors, & ita in omnes homines transiit, in quo omnes peccauerunt. Ecce beato exponente Augustino quomodo unusquisque in primis parentibus testamentum siue pactum Domini .i. primam eius à Domino legem datam in Paradiso transgressi sunt, ut saltim originalis peccati vinculo teneatur, & paruulus cum de Abraham cæterisque fidelibus natus parentibus de populo suo .i. à sorte & beatitudine fidelium patrum suorum sit excludendus, nisi ei ut dictum est circumcissionis remedio subuentum fuerit. Quod verò in præcepto circumcissionis additum est, *tam vernaculus quam emptitijs circumcidetur, & quicumque non fuerit de stirpe vestra*, ita est intelligendum, ut de vernaculis vel emptitijs eorum, siue fuerint Hebræi .i. de stirpe sua, siue non, hoc præcipiat Dominus, non de alijs nationibus. Tale ergo, *Tam vernaculus quam emptitijs circumcidetur, & quicumque non fuerit, &c.* Ac si diceret, de vernaculis & emptitijs etiam omnes illi qui non fuerint de stirpe vestra. Non est igitur circumcissionis generale præceptum, sicut est baptismi, sicut Euangelij, sed populo tantum Israel eam esse traditam, non gentilibus. Quod diligenter Origenes in posterioribus ostendit, distinguens ex ipsis litterarum testimonijs quæ præcepta legis sint generalia, tam ad Iudæos scilicet quam ad Gentiles pertinentia, quæ non. Vnde etiam constat nec traditionem legis esse generalem. Quod ipse quoque Moyses diligenter distinguens, in Deuteronomio ait: *Et nunc Israel audi præcepta & iudicia quæ ego doceam te, ut faciens ea viuas, & ingrediens possideas terram quam Dominus daturus est vobis. Itē. Quæ est enim alia gens sic incluta, ut habeat cerimonias, iustaque iudicia, & uniuersam legem quam ego proponam hodie ante oculos vestros? Et iterum, Docebis eam filios tuos ac nepotes. Et post aliqua, Te elegit Dominus Deus tuus, ut sis ei populus peculiaris de cunctis populis qui sunt super terram. Et Psalmista, Qui annunciat verbum suum Iacob, iustitias & iudicia sua Israel. Non fecit taliter omni nationi, & iudicia sua non manifestauit eis. Apostolus quoque patenter legem non omnibus loqui, vel datam esse supra professus est, dicens: Scimus autem quoniam quæcunque lex loquitur, his qui in lege sunt loquitur.**

His autem à nobis de circumcisione prælibatis, licet succinctè antiquorum dicta ad eam pertinentia non preterire. Orig. super hanc Epistolam Pauli verbis superius citatis *Sicigitur præputium, &c. Dixit Deus ad Abraham, Tu autem testamentum meum servabis, & omne semen tuum post te in generationes suas. Et hoc est testamentum inter vos & me, & inter me & inter medium seminis tui post te. Circumcidetur omne masculinum vestrum, & puer octava die. Circumcidetur in vobis omnis masculinus in generationibus vestris vernaculus & pecunia emptus.* Discutiamus utrū mandatum etiam eos, qui ex gentibus crediderunt constringat. Nunquam fecit proseliti mentionem .i. aduenæ, sed vernaculum servum vel precio mercatum circumcidi iubet, non liberum. Perscrutemur etiam Leuitici legem. *Loquere, inquit, filiis Israel, & dices ad eos: Mulier si pepererit masculum, octavo circumcidet die.* Intuere etiam hic quemadmodum de lege circumcisionis tantum ad filios Israel Moyses loqui iubetur, & alienigenarum nulla sit mentio, cum in quibusdam mandatis non solum filijs Israel, sed proselitis .i. aduenis loquatur. Necessario utique obseruanda distinctio est. Quia sicubi dicitur, *loquere ad Aaron*, & alibi, *ad filios Aaron*, & alibi, *ad Leuitas*, certum est non subiacere reliquos his legibus, quæ filijs iubentur Israel, nec alienigenæ memoria vlla fit. Non ergo putandum est commune esse mandatum, vbi appellationis habetur exceptio. Sic ergo nec alius quisquam circumcisionis lege constringitur, nisi ex Abraham originem trahēs, vel vernaculus eorum, vel pretio emptus. Item, Hæc dicta sunt à nobis vt ostenderem præcipue de circumcisionis præcepto, quod non alijs quàm his qui ex Abraham genus ducunt, vernaculisque eorum vel precio coemptis esset iniunctum circumcisioni. Liberos vero esse ab huiusmodi legibus eos qui per Christū Deo ex gentibus condicuntur *. Item de circūcisione quid etiam allegoricis legibus sit videamus. Circumcisione ex genitali membro, per quod carnalis propago ministratur, amputare aliquam partem. Per hoc indicari figuraliter reor amputandam esse ab anima si qua excusatio† ei carnis adhæret impuritas. Idcirco ista dissectio genitalibus infligitur, quòd huiusmodi vitia animæ non ex propria substantia, sed ex incentiuo carnis adueniant. Præsentī seculo septimana deputata est. Octauus dies autem futuri seculi

seculi mysteriū tenet. Illorū ergo est circumcisio spiritalis qui futuro seculo militant, in quo neq; nubēt neq; nubētur, & eorū qui seipsos castrauerūt propter regnū Dei, & quorū in terris ambulantiū in cælis est cōuersatio. Sed apud Ezech. dicit Dominus, *Omnis filius alienigena incircumcisus corde & carne non introibit in sancta mea.* Sed videamus ne forte referri queat ad duo generalia præcepta, vt sit incircūcisus corde qui nō habet fidē, incircūcisus carne qui nō habet opera. Altera nāq; sine altera reprobat, quia & fides sine operibus mortua dicitur, & sine fide nemo viuificatur. Item, & dicitur circuncidia auribus, cū secundum Salomonis monita non recipit auditionem vanam, & incircumcisus labijs dicitur, qui non circuncidit blasphemiam, scurrilitatem, turpiloquium de ore suo, qui non posuerit ori suo custodiam. Cur non simili forma incircumcisus præpucio carni lux dicatur qui erga naturalem coitus motum immoderatiū effluit? Circumcisus vero habeatur qui huiusmodi negotio legitimis & quātum posteritati sufficit vtatur officijs? Vnde quoniam de circumcisionis ratione tractauimus, & illud adiungere non absurdum videbitur, quōd filius Naue ex præcepto Domini filios Israel secundo circumcidisse cultris saxeis memoratur. Quod vtriq; quantū ad litterā impossibile videtur. Semel enim circumcisis in carne præpucijs, quid inuenire potest secunda circumcisio? Iesus verd noster qui verē post Moysen filios Israel in terram sanctam induxit, euident est quomodo secundo circumcidat † credentium populorum. Prima namque est circumcisio, quæ ab eis vel idolorum cultum vel cōmenta Philosophicæ persuasionis rescuit. Secunda autem veteris hominis consuetudinem ac vitia carnis abscidit. Et tunc impletur quod in Iesu Naue scriptum est, *Hodie à vobis abstuli opprobria Ægypti.* i. Ægyptiorum morem & motus animi barbaros. Stoici aiunt, Indicet aliquid mysticum circumcisio, & figuram teneat allegoriæ. Itāne oportuit, vt cum pœna & periculo paruulorum, cum cruciatibus teneræ & innocentis infantis figurarum species & legis ænigmata crederentur? Sic non habebat legislator vbi firmas iustitias poneret nisi in deculcatione verecundorum locorum, & Dei signaculum nisi in obscœnis partibus? Itāne Deus & animæ creator & corporis, superfluū se plasmasse partem illam corporis notat,

quam postmodum abscindi mandat, & per miserorum supplicia proprium emendat errorem, aut quod vtiliter fecit nō rectē mandat auferri? Propterea, si curæ est Deo plurimos ad cultum sanæ religionis adduci, maximum ex circumcissione obstaculum nascitur. Cū eo enim quod supplicium vnusquisque declinat, tunc etiam quod irrisiōis turpitudinem refugit. Quibus respondere necessarium puto. Nemo sapiens in alijs notat quæ apud se honesta ducit & magna. Etenim circumcisio apud nos Gentiles ita manifesta habetur, vt non passim vulgo ignobili, sed solis Sacerdotibus, & hijs qui inter ipsos electioribus studijs mancipati fuerint, credatur. Nam apud Ægyptios qui in superstitionibus vestris vetustissimi habentur & eruditissimi, à quibus prope omnes reliqui ritum sacrorum & ceremonias mutuati sunt; apud hos, inquam, nullus aut Geometriæ studebat, aut Astronomiæ, quæ apud illos præcipua ducitur. Nullus certē Astrologiæ & Geneseos, qua nihil diuinius putant, secreta rimabatur nisi circumcissione suscepta. Sacerdos apud eos aut aruspex, aut quorumlibet sacrorum minister, vel vt illi appellant propheta omnis circumcissus est. Litteras quoque Sacerdotales veterum Ægyptiorum nemo discebat nisi circumcissus. Omnes vates, omnes cœli vt putant inferni que simiustes & confcius apud eos esse non creditur, nisi circumcissus fuerit. Hoc ergo apud nos turpe iudicatis, quod apud vos ita honestum habetur & magnū, vt cœlestium infernorumq; secreta non nisi per huiusmodi insignia enunciari nobis posse credatis. Vnde si replicetis historias vestras, inuenietis non solū Ægyptiorum Sacerdotes vfos esse circumcissione, sed etiam Arabas, & Ætiopas, & Phenices, aliosque quorum studia erga huiusmodi superstitiones nobilius viguere. Hæc dicta sunt aduersus Gentiles. Nunc ad eos sermo dirigatur, qui Christo quidē credunt, sed legem non recipiunt & Prophetas. Scriptum est in Epistola Petri, quia redempti sumus precioso sanguine vnigeniti, ab aliquo sine dubio empti cuius eramus serui, qui & pretium proposuit quod voluit, vt dimitteret quod tenebat. Tenebat autē nos diabolus, cui distracti fueramus peccatis nostris. Poposcit ergo pretiū nostrū sanguinē Christi. Vnde donec Iesu daretur, necessarium fuit eos qui instituebantur in lege, vnumquemque pro se ad imitationem

quandam futuræ redemptionis sanguinem suum dare. Et propterea nos, pro quibus completum est pretium sanguinis Christi, non necesse habemus pro nobis precium sanguinem circumcisionis offerre. Si ergo culpabile videtur quod Deus inferri iubet infantibus, hoc etiam in Christo factum culpabitur, qui & circumciscus est, & cum crucis pœna sanguinem effudit. Quod verò circumcisionis horrore difficilis ad religionem videtur accessus, difficilius multo videbitur ingressus ad Euangelium; ut non partem exignam corporis, sed ipsam quis animam ponere iubetur. Sed & exempla Martyrū secundum nos prohibebunt homines accedere ad fidem. An eo magis creditur firma religio, quòd nihil remissum, nihil delicatum pollicetur aut molle? Quòd si & nihil sacramenti circumcisio teneret, quid esset absurdi si ad distinctionē ceterarum gentium populus, qui sub lege Dei instruebatur, proprium aliquod gestaret insigne? Et si necessaria visa est partis alicuius amputatio, quid tam conueniens fuit quàm eam minuere, quæ videbatur obscena, & illa auferre quorum diminutio nihil ad officium corporis impediret? Quod vero dicunt, quia si necessaria non erat pars illa membri, à creatore fieri non debuit: si necessaria facta est, non debuit auferri. Interrogemus & nos, si necessariam dicant filiorum procreationem. Necessary sine dubio respondebunt. Erūt ergo culpabiles, qui continentia & virginitatis obtentu necessarijs naturæ officijs nō ministrant. In sūma verò dicendū est, quòd sicut necessariae erant multæ hostiæ antequam vna hostia agnus immaculatus semetipsum patri offerret hostiam Christus, ita etiam multis circumcisionibus opus fuit quousque vna in Christo circumcisio omnibus traderetur: & multorum sanguinis effusio præcessit quousque per vnius sanguinem omnium redemptio fieret.

AMBROSIUS in Epistola ad Constantium maximè Origeni in supradictis de circumcisione consentiens: Plerosque, inquit, mouet quæstio, qua causa circumcisio & veteris testamenti autoritate quasi utilis imperetur, & noui Testamenti magisterio quasi inutilis repudietur? Quod ergo dicemus secutum Patrē Abraham, ut id primus instrueret, quod eius non sequeretur hæreditas? Item, Reperimus autem in historia veterum non solum Ægyptios, sed etiam Ætiopum

& Arabum, & Phœnicum aliquos circumcissione erga suos vſes; & hanc putant ſe adhuc probandæ viam ſeruare rationis, eò quòd ſui corporis primitus & ſanguinis iniciati inſidias dæmonum, quas illi generi ſuo molliuntur, exiguæ partis arbitrantur conſectionibus deſtruenda. Sed arbitror iam nō ocioſam cauſam in hanc portiunculam mēbri æſtimare, quæ circuncidatur puer octaua die, quando incipit mater in ſanguine eſſe puro, quæ ante octauam diē fertur in ſanguine immūdo ſedere. Hierony. in Epist. ad Rom. Quæritur quare data ſit circumciſio ſi per ſe non prodeſt. Primum vt agnoſceretur Dei populus inter gentes. Quando ſoli erant in heremo, circumciſi non fuerunt. Siue vt corpora illorū cognoscerentur in bello. Nam quod in tali membro ſignatur, hæc cauſa eſt, primum ne aliud membrum aut debile fiat aut turpe, quod publicè videtur. Item, propter gratiæ promiſſionem, in qua erat per caſtitem placendum, ſiue vt Chriſtus ſignificaretur ex eius ſemine naſciturus, vſque ad quem futura erat iſta carnalis, quia ſpiritualem habebat afferre, cuius typum gerens Ieſu Naue, qui populum ſecundo circumcidere iubetur.

*ſ. quare

SOLET, memini, nonnulla eſſe quæſtio, quando * videlicet Iofue cultris petrinis ex præcepto Domini filios Iſrael ſecundò circumcidit, quaſi qui antea circumciſi eſſent rursus circumcidi potuiſſent. Beatus verò Auguſtinus in lib. quæſtionis veteris & nouæ legis omnem huius dubitationis errorem remouens, docet ſecundam hanc circumciſionem non in eiſdem perſonis, ſed in eodem populo factam fuiſſe. Quod & patenter continent verba ipſa hitoriæ libri Iofue, hæc videlicet. *Eo tempore, ait Dominus ad Iofue, fac tibi cultros lapideos, & circuncide ſecundò filios Iſrael. Fecit quod iuſſerat Dominus, & circuncidit filios Iſrael.* Hæc autem cauſa eſt ſecundæ circumciſionis. Omnis populus qui egreſſus eſt ex Ægypto generis maſculini vniuerſi bellatores viri mortui ſunt in deſerto per longiſſimos viæ circuitus, qui omnes circumciſi erant. Populus autem qui natus eſt in deſerto per quadraginta annos itineris latiſſimæ ſolitudinis incircumciſus fuit, donec conſumarentur qui non audierant vocem Domini. Horum filij in locum ſucceſſerunt patrum, & circumciſi ſunt à Iofue, : quia ſicut nati fuerant in præpucio erant, neque eos in via aliquis

circumciderat. Postquam autem omnes circumcisi sunt, manserunt in eodem castrorum loco donec sanarentur, dixitque Dominus ad Iosue: *Hodie abstuli opprobrium Egypti à vobis.* Miror itaque Origenem tam litteratum virum in hac secunda circumcisione per Iosue factam adeò errasse, ut eam superius assereret nullo modo iuxta literam fieri potuisse. Quam tamen historia ipsa mox à Iosue factam adiecit, dicēs: *Fecitque quod iusserat Dominus, & circumcidit filios Israel.* Nunc ad expositionem Epistolæ redeamus.

V T *sit pater omnium*] Duo dixerat, quòd videlicet Abraham in præpucio .i. dum præpucium haberet, reputata est fides sua ad iustitiam, tanquam iam spiritualiter circumciso: & quòd postea carne quoque circumciscus est, ut per hæc duo videlicet sit pater atque author cæteris in exemplo & doctrina propositus, tam de spirituali quàm carnali circumcisione. Et hoc est, *ut præpucium*, in quo iustificatus antequam circumciscus sit pater credentium, in hoc scilicet quod credentes sunt reputetur etiam illis ad iustitiam, quamvis desit exterius signum. *Et sit pater circumcisionis.*] Videlicet exterioris. .i. primus omnibus in spirituali simul & carnali circumcisione in exemplo & autoritate propositus. *Non his tantum.*] scilicet pater. *Qui sunt ex circumcisione.*] .i. quibus præcepta est carnis circumcisio. *Sed & his qui sectantur, &c.*] .i. qui habent fidem cum præpucio. Sic construe. Vestigia fidei patris nostri Abraham, quæ scilicet fides est in præpucio .i. in præpuciatibus æquè ut in circumcisis. *Non enim per legem.*] Cùm superius ostenderet hominem ex fide sine operibus legis iustificari, & per hoc glorificationem legis Iudæis auferret, manifestum de Abraham patre ipsorum interposuit exemplum. Vnde nunc ad glorificationem legis euacuandam reuertitur, ac si iterum supradicta ut ea probet repetens dicat: Dixi superius me arbitrari hominem iustificari per fidem sine operibus legis, quod in ipso etiam patet Abraham, qui opus maximum, legis scilicet circumcisionem suscipiens, potius per iustitiam fidei, quàm per opus ipsum legis iustificatus est, & merito. *Non enim per legem.* .i. per aliquod legis, vel per obedientiam legis, quæ nondum data erat, meruit promissionem hæreditatis accipere, sed per *Iustitiam fidei.*] .i. per fidem iustificantem, suo per iustitiam ex fide venientem, aut semini eius .i. exemplo eius in-

structi, *ut hæres esset mundi.*] .i. perpetuus possessor vniuersorum bonorum quæ per fecunditatem terræ promissæ significantur. Vniuersa quippe possidet bonâ, qui omnia habet necessaria, & ei nihil deesse dicitur qui nullo indiget. Vnde Apostolus de his qui exemplo Abrahæ peregrinantes terrena despiciendo cœlestia appetunt ait, *Tanquam nihil habentes, & omnia possidentes.* Vel esset hæres mundi .i. soli ex vniuerso mundo eligerentur, ut fierent hæredes. *Si enim qui.]* Bene dico per opera legis non perueniri ad hæreditatē fidelibus promissā. *Alioquin fides esset exinanita.]* .i. meritū fidei euacuatū, cū æquē infideles sicut fideles opera illa legis habere possint, & per hoc hæredes fieri. *Et promissio abolita.]* .i. inefficax & irrita facta. Per quam quidem promissionem in semine Abrahæ gentes sunt benedicendæ, quæ legis opera non habent. Et hoc est, si qui ex lege sunt, subaudis sunt hæredes .i. qui opera legis habent, pro hoc hæreditatem merentur, &c.

Lex enim.] Iterum probat per legem .i. opera illa legis exteriora, quæ lex præcipit, non acquiri hæreditatem, immò magis reos constitui homines per legem, ut hæreditatem amittant. Multa quippe sunt opera legis ita grauiâ, ut eos à quibus vel in quibus fiunt adeo affligant, ut vix eis aut nunquam præcepta eorum placeant, nec voluntariè possint impleri, sicut est, dentem pro dente & oculum pro oculo tollere, & nonnullis mortem inferre. Quis enim in his quos diligit hæc libenter exerceat, aut in se ea libenter excipiat? Vnde Petrus in Actibus Apostolorum eos refellens, qui Christianis opera legis imponere volebant, ut ea videlicet ipsi quoque seruarent, ait: *Viri fratres, quid tentatis Dominum imponere iugum super cervicem discipulorum, quod neque patres nostri, neque nos portare potuimus: sed per gratiam Domini Iesu credimus saluari, quemadmodum & illi.* Lex itaque carnalem & duræ cervicis populum ex operibus legis magis reum effecit, quàm purgavit. Spiritualibus verò nihil iustitiæ contulit, per illa videlicet propria sua opera exteriora. Et hoc est quod ait: *Lex enim illa legalia opera iram Dei in eos potius operatur quàm veniam vel aliquam iustificationem. Et quare iram? Quia transgressores sui facit eos, non alios s. & hoc est: Vbi enim non est lex, &c.]* Idem illi quibus illa legalia præcepta non sunt data,

præuaricationis & trāsgressionis reatum per illam non incur-
runt, cū eis voluntarie non obediunt. *Idco ex fide.*] scilicet
sunt hæredes. Quandoquidem non ex lege. Vel ita conti-
nua. Dixi non per legem esse factam promissionem hæredi-
tatis, sed per iustitiam fidei. Ideo, ex fide sunt hæredes. Et
hoc est, *Vt sit firma promissio.*] scilicet hæreditatis .i. ad effe-
ctum perducta. *Omni semini Abrahe.*] .i. fidem eius imitanti,
tam Gentili scilicet, quàm Iudæo. Et hoc est quod subdit,
Non solum ei qui est ex lege.] .i. Iudæo qui legi subiaceret, *sed ei*
etiam qui ex fide est Abrahe.] .i. gentili, qui sola fide Abraham
imitatur, secundum gratiam scilicet Dei, sit firma promissio
eius non secundum merita legalium operum. *Qui est pater.*]
scilicet Abraham. *Omniū nostrum.*] tam Iudæorum scilicet
quàm gentiliū .i. in exemplo ad imitandū hominibus pro-
positus est. *Sicut scriptum est.*] in Genesi scilicet, ac si diceret:
Eo videlicet modo pater est atque author omnibus in exem-
plo ad imitandum propositus, quo promittitur à Domino pa-
ter esse multarum gentium, .i. diuersarum regionum, credē-
do scilicet magis quàm opera legis exercendo. Quod paten-
ter insinuat, cū subdit, *An Deum cui credidisti*] Verba Domi-
ni loquentis ad Abraham sunt ista. *Quia patrem, &c.* Sic quip-
pe scriptum est. *Non vocabitur nomen tuum Abraham, sed vocabe-
ris Abraham, quia patrem multarum gentium constitui te.* Innui-
tur itaque ex his verbis interpretatio nominis Abraham, quod
sonat pater multorum. Sed quod additur *gentium*, explana-
tio est potius quarum rerum multarum sit intelligendum,
quàm interpretatio. Sed & quod ait Apostolus, *ante Deum,*
cui credidisti, vel nostræ translationis est subtractum, vel ex
parte Apostoli additum, vt videlicet determinaret Abraham
ex fide in omnibus in patrem esse propositum magis quàm ex
circumcisione. Pater ponitur .i. constituitur ante Deum, .i.
in beneplacito eius, qui filios non quærit sibi generare, sed
Deo: nec concumbendo suæ voluptati satisfacere, sed exem-
plo fidei magis quàm propagatione carnis filios Dei præpa-
rare. Quod patenter insinuat cū subdit, *cui credidisti.*] De
omnibus scilicet eius promissis. Ac si diceret, Posui te patrē
ante Deū cui credidisti .i. vt per hoc quod ei credidisti mini-
stros sibi similes exēplo tuæ fidei illi generares. Quod Deus
loquens ad Abrahā ita fatur: *Patrē multarum gentiū posui te ante*

Dominū. Et nō dicit, ante me : sed ita de se quasi de alio loquitur. Cōsuetudo est Hebraici sermonis. Vnde & ipse legislator, qui hoc scripsit, semper de se ipso quasi de alio consuevit loqui: veluti cū ait, *Dixit Dominus ad Moysen.* Et item: *Et erat Moyses mitissimus, &c.* quod tamen non sine causa factum videtur, vt .v. alius quasi de alio loquatur. Cōstat quippe in sanctis & maximè in Prophetis, Dominum potius quàm ipsos loqui. Vnde Prophetæ aliquid dicturi frequētet aiunt. *Hac dicit Dominus.* Et Veritas in Euangelio ad discipulos: *Non enim vos estis, inquit, qui loquimini.* Apparens quoque & loquens Dominus Abrahæ olim vel cæteris, quoniam id per Angelum exhibebat, veritatem ipsius apparentis vel loquentis Angeli à seipso prouidè distinguebat, vt ipso quoque locutionis genere alius intelligeretur qui verba firmaret, quàm ipse de quo verba erant .i. Angelus à Domino.

QVI viuificat.] Et merito ei credidisti de suis promissis, quia talis est qui viuificat mortuos .i. infideles prout vult ad fidem conuertit. Mortui dicuntur infideles, vulnerati, peccatores. Vita quippe iustorum fides dicitur, iuxta illud: *Iustus ex fide uiuit.* Qui infidelis est, nihil penitus boni habet, quo Deo placere possit, *quia sine fide,* vt ipse dicit Apostolus, *impossibile est Deo placere. Et vocat.*] .i. ita suis verbis facit obedire non existentia. *Dixit enim, & facta sunt: mandauit, & creata sunt,* sicut existentia. *Qui contra spem.*] Commendata potentia Domini, vt de eius promissis nullatenus sit dubitandū, commendat & constantiam fidei Abrahæ, ad quam imitandam adhortatur. Cū primitus Abraham desperasset de Sara, sperauit de Agar se hæredem suscipere. Postea verò è contrario per promissionem Domini credidit, ac sperauit: & hoc est; *credidit in spe contra spem* .i. credendo diuinis promissis ductus est in spem suscipiendi scilicet hæredis contrariam priori spei. Aliter. Quando duxit Sarram credidit eam fecundam & secundum naturam ei filios in iuuentute parituram. Postea verò frustratus hac sua spe è contrario penitus credidit & sperauit, propter promissionem Domini .i. eam sterilem in senectute contra naturam parituram. Quod mirabile fuit eum potuisse credere, iuxta illam Dialecticæ regulam. Si enim quod magis videtur inesse non inest, nec quod minus videtur inesse inerit. *Vt fieret pater.*] .i. vt per

tantam constantiam fidei de promissionibus Dei mereretur proponi in exemplo etiam gentibus. *Secundum quod dictum est ei à Domino.*] scilicet in ipsa Genesi. *Sic eris sementium.*] .i. homines exemplo fidei tuæ mihi generandi, ita scilicet innumerabiles. *Sicut stella, &c.* Possumus & per stellas & arenam Iudaicum & Gentilem populum distinguere, ex quibus spirituales Abraham filij pariter sunt collecti, ut non solum filiorum multitudo, verum & populorum diuersitas exprimat. Stellis Iudæi comparantur per fidem ex lege iam illuminati, & à fluxu mundanarum concupiscentiarum per legem coerciti, & quasi cœlestes in spe sua facti, cum è contrario Gentiles nulla lege constricti per omnem concupiscentiam libere effluerent terrenis tantum desideriis inhiantes. Sed quia de gentibus tantum, in quibus maximè fides Abraham fructificatura erat, promissionis verba sunt. Possumus fortassis conuenientius in stellis & arena maris tres Ecclesiæ ordines distinguere, per stellas quidem quæ & igneæ sunt & lucidæ duos sublimiores, continentium scilicet .i. contemplatiuorum, qui diuini amoris igne vehementius feruent, & prædicatorum qui alios doctrina sua illuminant: per arenam verò maris coniugatorum, qui quasi in mari & in humidis habitant luxuriæ indulgentes, & mundanarum sollicitudinum curis fluctuant, & earum amaritudinem grauiter tolerant. Credidit inquam, *Et non est infirmatus in fide:*] .i. non fuit remissa in aliquo vel debilis fides eius quantumcumque differretur promissio, vel impossibilis videretur: sed æquè firmiter credidit id quod cōtra naturam esse penitus sciebat, sicut illud quod per naturam fieri prius expectauerat.

Nec considerauit corpus suum emortuum.] .i. non attendit impossibilitatem suæ naturæ vel vxoris, sed potentiam promittentis. Corpus emortuum dicit .i. omnino iam per naturam impotens ad generationem quæ promittebatur. *Cum*] .i. quamuis iam ipse Abraham. *Ferè esset centum annorum.*] .i. nonaginta nouem, *Et emortuam vuluam Sarre.*] ad opus similiter generationis, tam propter senectutem .s. quàm propter sterilitatē. Et attende cum ait de Abraham, cum ferè centū esse annorum, innuit eum propter ætatem tantum, non propter sterilitatem ad generandum minimè valere, nec tamen tam impotens penitus ad generandum Abraham credendus

est, qui mortua Sarra postea Cethuram duxit, de qua filios generauit. Quippe potuit in iuuentute id natura senis, quod non potuit in vetula & sterili. Quod & satis ipsa verba Apostoli determinant. Non enim ait simpliciter emortuum corpus Abrahæ, sed statim adiunxit, *& emortuam vuluam Sarra*, vt per adiunctionem Sarra Abraham impossibilitatem ostendat, & cum Sarra scilicet non cum alia. Non repetijt negatiuam cõiunctionem, sed copulatiuam interposuit. Non enim ita dixit: Non considerauit corpus suum emortuū, nec emortuam vuluā Sarra. Sed potius ita adiunxit, *& emortuā vuluā Sarre*. Ex quo intelligi innuit, nec vnumquēque per se ad generandum penitus esse impotentem, sed coniunctum inuicē. Notandum verò quòd hæc promissio, *Sic erit semen tuum sicut stellæ cæli & sicut arena maris*, non inuenitur facta fuisse Abrahæ quando ei promissus est Isaac, sed postquam iuxta præceptū Domini voluit eum immolare Domino. Sic enim scriptum est, *Per memetipsum iuravi, dicit Dominus, quia fecisti rem hanc, nec pepercisti filio tuo unigenito propter me; benedicam tibi, & multiplicabo semen tuum sicut stellæ cæli, & velut arenam quæ est in litore maris*. Scimus quidem antequam Ismael etiam natus esset Deum Abrahæ promississe sic fore semen eius innumerabile sicut puluerem terræ, & alia vice postea sicut stellæ cæli. Sed nihil de arena maris tunc addidisse. Hæc autem idèò notauimus, quia videtur Apostolus ita extremam promissionem & conceptionem .i. Isaac disponere, vt ante facta illa promissio videatur quàm Isaac conciperetur. Sic enim superius ait: *Qui contra spem in spem credidit, vt fieret pater multarum gentium, secundum quod dictum est: Erit semen tuum sicut stellæ cæli & sicut arena maris; & statim adiunctum est, & non est infirmatus in fide, &c.* Ad illud verò tantū quod interponitur, *vt fieres pater, &c.* illud spectat quod subditur, *secundū quod deinde est, sic eris, &c.* Quærendum existimo quādo non fuerit Abraham infirmus in fide de promissione Isaac, cum ipse quoque sicut & Sarra de promissione hac quasi diffidenter loqui, & risisse narretur. Sic enim scriptum est in Genesi: *Cecidit Abraham in faciem, & risit, dicens in corde suo: Putas ne centenarius nascetur filius, & Sarra nonagenaria pariet? Dixit ad Dominum: Vtinam Ismael uiuat coram te*. Sed profecto cum præmittitur, *Cecidit Abraham in faciem suam*. i. adorādo atque supplicando gratias retulit pro-

missioni, pariter innuitur quia de ea non desperavit. Quod nequaquam Sarra fecisse legitur, cūm riserit. Dicitur etiam de Sarra, quōd riserit occultè post ostium: de Abraham verò, quod riserit corde potius quàm ore. Videlicet, risus cordis gaudiū intelligitur mentis, non risio promissi. Et verba illa quæ sequuntur, *putasne centenario, &c.* admirationis potius quàm desperationis sint. Et quod adiunxit, *utinam Ismael viuat coram te*, ostendit humilitatem Abraham non tam præsumpsisse de bonitate diuinæ gratiæ quantum Deus ipse non petenti offert, sed potius Abraham satis esse, si vel Ismael viuat ei pro semine.

[IN *repromissione, &c.*] De duobus factæ sunt Abraham promissiones, de semine scilicet ei dando vel multiplicando, & de terra Chanaam ei danda, vel semini eius. Sæpius autem vtramque promissionem factam ei fuisse legimus, dum compleri differretur. Sed maximam illa de possessione terræ dilationem accepit, quæ longe post mortem illius complenda esse promittitur. Hanc itaque secundam promissionem repromissionem dicit Apostolus, ac si diceret: Non solum in prima promissione, de semine scilicet non dubitauit, sed nec etiam in secunda, de possessione, videlicet terræ. Licet longè postea futura, in quarta scilicet vel in quinta generatione filiorū Iacob in Ægypto profectorū. *Non hesitauit diffidentia.*] i. non habuit dubitationē in corde, sicut in ore verba quidō dubitationis habuisse videtur, & non statim credidisse. Non prius in visione signo accepto sicut statim credidit promissioni priori de semine. Sic enim scriptum est de Domino & de Abraham. *Qui egredietur de utero tuo ipsum habebis heredem. Eduxitque eum foras, & ait: Suspice cælum, & numera stellas si potes. Et dixit ei: Sic eris semen tuum. Credidit Abraham & reputatum est illi ad iustitiam. Dixitque ad eum: Ego Dominus, qui eduxi te de Hur Chaldeorum, ut darem tibi terram istam, & possideres eam. At ille ait: Domine unde scire possum quōd possessurus sum eā? Et respondens Dominus: Sume, inquit, mibi vaccam triennem, &c.* Hæc itaque dubitationis verba signum requirementia ad confirmationem posteriorum magis quàm suam Abraham assumpsisse credimus. Sicut & Ioannes Baptista Dominum non sibi, sed discipulis requisivit dicens: *Tu es qui venturus es, &c. Sed confortatus fide.*] i. expectatione, non re ipsa, quæ longo

scilicet post mortem eius erat futura, dans gloriam Deo .i. grates ei pro his referens, non meritis suis quicquam tribuens. *Plenissimè sciens.*] .i. firmiter credens, *quia quacunque.*] Prouidam repromissionem ostendit & rationabilem, nihil scilicet promittentis nisi quod implere potest, vel etiam debet. Certum quippe est quia nō potest facere nisi quod debet .i. quod conuenit ei. *Ideoreputatum est.*] quia scilicet confortatus est fide, dans gloriam Deo, plenissimè sciens, &c. Hoc est, etiam hæc fidei firmitas, si opera cessarent exteriora, imputatur ei à Domino pro iustitia, ut videlicet ad eum iustificandum sufficiat.

Non est autem.] Quasi quis diceret, Quid ad nos relatio tantæ laudis Abraham? Respondet quòd hæc laus eius *non est scripta tantum propter ipsum.*] .i. ad commendationem ipsius, sed & *propter nos.*] quibus videlicet exemplo eius instructis. i. reputabitur ad iustitiam. *Credientibus in eum, &c.*] .i. si credendo in Deum Abraham imitemur. In eum dicit, non eum, vel ei, sicut superius exposuimus. *Qui suscitauit.*] .i. qui iam cōpleuit in semine Abraham per Christum quod Abraham expectabat futurum, & quod sibi in promissione terræ vel benedictione ipsius seminis intelligebat figuratum. Tota quippe exultatio Abraham de figurato Isaac .i. Christo, potius quàm de figuratiuo fuisse intelligitur. Vnde & per se ipsam Veritas ait, *Abraham pater vester exultauit ut videret diem meum, vidit & gaudius est.* Totam autem humanæ reparationis & salutis summam tam in capite quàm in mēbris Apostolus hoc loco paucis comprehendit, dicens videlicet Christum resurrexisse à mortuis qui traditus est, &c. Nota autem quod dum ait Apostolus Deum patrem suscitasse Christum, & quod potentiz est specialiter Deo patri assignat, diuinam potentiam ad personam Patris maximè pertinere insinuat, sicut diuinā sapientiam ad filium, & diuinæ gratiæ bonitatem ad Spiritū sanctum. Quod plenius Theologiæ nostræ textus edisserit. *A mortuis.*] .i. de inter mortuos corpore, quorū ipse vnus erat. *Qui mortuus est.*] Causa mortis Christi, quam resurrectionis causam ad nos reducit. Duobus modis propter delicta nostra mortuus dicitur, tum quia nos deliquimus propter quod ille moreretur, & peccatum commisimus cuius ille pœnam sustinuit, tum etiam ut peccata nostra moriendo tolleret .i. pœ-

nam peccatorum introducens nos in Paradisum precio suæ mortis auferret, & per exhibitionem tantæ gratiæ. Quia, ut ipse ait, *maiorē dilectionem nemo habet*, animos nostros à voluntate peccandi retraheret, & in summam suam dilectionē intenderet. *Et resurrexit propter iustificationem nostram.*] Iustificationem dicit perseuerentiam iustitiæ quæ iustum facit. Non enim iustus dicitur qui aliquando iuste agit, sed qui hoc in consuetudinem habet. Quod itaque dicitur, *Resurrexit propter iustificationem nostram*, tale est ut spe gloriæ resurrectionis, quam in seipso nobis exhibuit, nos in operibus iustis perseuerantes faciat.

IUSTIFICATI ergo à fide.] Quandoquidem & propter CAP. V.
nos scriptum est de iustificatione Abrahæ per fidem, ut videlicet exemplo eius similiter iustificemur. Ergo ex fide potius quàm ex operibus legis nos iustificati. *Pacem habeamus apud Deum.*] .i. sic reconciliemur ei, & quantumcumque iusti fuerimus, mediatore Christo nobis opus est. Addit, *Per Dominum nostrum Iesum Christum.*] à quo ad nos tanquam à capite ad membra omne bonum emanat tum exemplo vitæ tum prædicatione doctrinæ. Et hoc est, *per quem habemus accessum in gratiam istam in qua stamus.*] & quæ sit illi gloria supponit dicens, *in spe gloriæ filiorum Dei.*] .i. ex spe illa quā habemus adipiscendi illam summæ beatitudinis, quæ filiis non seruis est debita. Et hoc est per fidem præeuntem. Ex fide enim spes nascitur, cum electi ex fide quam habent ad spem supradictā assurgunt, ac nemo sperare aliquid potest nisi quod primitus credit. Gratiam dicit gratis datam non pro meritis scilicet collatam, quia non sunt condignæ passionēs huius temporis ad futuram gloriam. *Non solum autem.*] scilicet gloriamur in spe gloriæ Filiorum Dei, *sed & gloriamur in tribulationib.*] .i. magno nobis honori imputamus affligi pro Deo, secundū quod in Actibus Apostolorum scriptum est, *Ibant gaudentes à conspectu Concilij, &c. Sciētes etiam,*] hoc est attendentes maximum fructum, in his tantū gloriamur quod videlicet tribulatio. *Patientiam operatur.*] .i. in opere virtutem exhibet patientiæ atque ipsum tribulationis exercitium fortiores ad castolerandas nos reddit. *Patientia autem.*] secundum quod scriptum est, *Tanquam aurum in fornace probauit electos Dominus.*] .i. tam tibi quàm alijs eorum constantiam .i. probitatē

exhibuit. *Probatio verò spes.*] ut iam videlicet tã nos ipsi quàm alij de nostris per gratiam Dei meritis cõfidamus. Et ne spes ista irrita videretur sicut de impijs dicitur, *spes autem impiorũ peribit*, addit, *spes autem.*] scilicet hæc, *non confundis.*] .i. erubescientiam nobis non acquirit in futuro, quia speratum obtinebimus, & quasi qui requireret vnde hoc scire possumus, adiungit: *Quia charitatem habemus per quam speramus*, promeremur. Et hoc est, *quia charitas Dei, &c.*] Dei dicitur .i. purè propter Dominum habita, ad differentiam carnalis dilectionis. Caritatem .i. dilectionem diffusam dicit, quæ inimicum quoque complectitur. De qua scriptum est, *Omnis consummationis vidi finem, latum mandatum tuum nimis* .i. perpendi atque intellexi latum tuum de caritate mandatum finem esse omnis consummationis .i. illud esse ad quod vniuersorum tuorũ mandatorum intentio dirigitur. *Propter Spiritum sanctum qui datus est nobis.*] .i. per operationẽ gratiæ diuinæ nobis collatæ. Aug. de doctr. Christia. lib. iiii. *Patientiã operatur tribulatio, &c.* agnoscitur figura quæ Latine à quibusdam est appellata gradatio, cùm verba vel sensus connectuntur alterum ex altero, sicut hic ex tribulatione patientiam, ex patientia probationem, ex probatione spem connexam videmus.

U t quid enim.] Merito dixi caritatem diffusam in cordibus nostris. Nam propter quid aliud, nisi videlicet ut in nobis dilataretur caritas Dei? *Christus mortuus est secundum tempus.*] .i. quasi ad horam & in transitu mortis detentus, qui citò resurrexit. *Pro impijs mortuus est.*] ut eos videlicet à damnatione liberaret. *Cum adhuc infirmi essemus.*] Notandum verò est Apostolum hoc loco modũ nostræ redẽptionis per mortem Christi patenter exprimere, cum videlicet eum pro nobis non ob aliud mortuum dicit, nisi per veram illam caritatis libertatem in nobis propagandam, per hanc videlicet qua nobis exhibuit summam dilectionem, sicut ipse ait: *Maiorem hac dilectionem nemo habet, &c.* De quo quidem redemptionis modo suprã nos satis arbitrordisseruisse. *Vix enim.*] Dixi Christum pro impijs mortuum esse, ut caritas in cordibus nostris diffunderetur, quasi hoc magnum esset quod fecerit. Et verè magnum hoc & salutarium fuit, Deum scilicet pro impijs mori, quia vix pro homine iste homo mori sustinet. Dixi vix, ex toto negavi, quia fortasse etsi rarissimè potest reperiri, qui

pro amore boni hominis .i. iusti mentiuntur. Et hoc est, *Nā pro bono.*] scilicet homine, *forſitan quis.*] .i. aliquis, *audeat mori.*] Sciens se à Domino remunerandum. Cū dicit *forſitan*, & *audeas*, difficultatem inſinuat. Chriſtus autem non ſolum auſus mori, ſed & mortuus eſt pro peccatoribus, & per exhibitionem tantæ gloriæ, *Commendat Deus.*] .i. ædificat ſiue confirmat *ſuam caritatem in nobis.*] quoniam ſcilicet Dei *Chriſtus Filius pro nobis mortuus eſt cum adhuc peccatores eſſemus.*] Quod ſi ita reſpexit cū eſſemus peccatores, morti ſcilicet vnicum ſuum pro nobis tradendo. *Multo magis ergo.*] .i. multo facilius ſiue libentius vel probabilius nunc reſpiciet nos ad ſaluationem iam iuſtificatos in ſanguine ſuo .i. iam per dilectionem, quam in eo habemus, ex hac ſumma gratia, quam nobis exhibuit, pro nobis ſcilicet adhuc peccatoribus moriendo. Et hoc eſt, *ſalvi erimus ab ira.*] ſcilicet futura .i. à peccatorū vindicta, *per ipſum.*] videlicet Chriſtum pro nobis ſemel morientem, & ſæpius orantem, & aſſiduè nos inſtruentem.

Si enim cum.] Dixi quia iuſtificati in ſanguine Chriſti ſalvi erimus ab ira Dei per ipſum. Et merito, quia iam reconciliati ſumus Deo per mortem illius, cū prius nos pro inimicis haberet ad puniendum. Et ſi tantum mors eius potuit vt nos ſcilicet iuſtificaret vel reconciliaret, multò magis vita ipſius nos protegere poterit & ſaluare ab ira ſua. Conſtat quippe plūs poſſe vnumquemque viuum quàm mortuum. *In vita ipſius.*] .i. ipſum iam ſuſcitatum & viuentem. *Non ſolum autem.*] ſcilicet ſalvi erimus .i. ſaluari per ipſum impetrabimus. Et hoc eſt, gloriationem maximam adepti ſumus, & maximo honori nobis imputamus, quòd talem nobis reconciliationē Dominus dedit. Et hoc eſt, *gloriamur in Deo.*] non in nobis .i. de tanto beneficio eius, ex gratia eius, non ex meritis noſtris nobis per Chriſtū collato. *Propterea ſicut.*] Littera idèd hæc defectiua videtur, niſi cū ſuperioribus vel inferioribus quomodo cōiungere nitamur. Sic autē ſuperioribus fortasſe cōtinuabitur, ac ſi dicamus: Reconciliationē, inquā, per Chriſtū accipimus, propterea .i. propter hoc quod ſupradictū eſt, quia .v. pro nobis mortuus eſt, ſicut è contrariò damnationem per Adam incurrimus. Et hoc eſt quod addit, *Sicut & per vnum hominem.*] videlicet Adam, *peccatum intrauit.*] quia prior peccans aditum peccato dedit. *in hunc mundum.*] .i. in hanc

partem mundi scilicet terrenam, in qua homines habitant, non veri homines qui antea peccauerant. *Et per peccatū mors.*] scilicet corporis. *Et ita.*] videlicet ab Adam incipiendo tam mors quā peccatum, saltem originale, *Pertransiit in omnes homines.*] vnum inquam hominem .i. Adam, *in quo omnes reliqui peccauerunt.*] .i. pœnam peccati incurrerunt. Poterit & fortassis versus incipere, *propterea*, & ad inferiora longe postea constructio dirigi, illuc scilicet sic, *& per vnius iustitiam in omnes homines, &c.* Ac si diceretur propter, quia scilicet per Christum reconciliationem accepimus, sic per vnius iustitiā, subaudi iustificationem vitæ, in omnes homines, sicut per vnum hominem in hunc mundum peccatum intrauit, &c. Cetera vero quæ interponuntur suspensiuam litteram tenent.

VSQUE ad legem enim.] Bene dico in omnes pertrāsijt peccatum, cum nec vlli, qui ante legem fuerunt à peccato immunes extiterint. De quibus magis videtur, cum adhuc nullius scriptæ transgressionis eos reos faceret, *vsque ad legem*, id est toto tēpore illo antequam lex per Moysen daretur, peccatum erat in mundo, licet non imputaretur .i. ab hominibus argueretur, vel puniretur per aliquam legem, cum videlicet lex nondum scripta esset, sed tantum naturalis per quam boni vel mali discretionem nonnullam habebant, ex qua cognoscere peccatum possent. Potest etiam sic dici peccatum ante legem non imputari ab hominibus, .i. à nullis vel paucis cognosci quid esset peccatum, antequam scilicet concupiscentiam lex tanquam peccatum interdiceret, & doceret in corde potius quā in opere peccatum consistere. Quod quidem in sequentibus patenter Apostolus edocens ait, *Lex peccatum est? absit. Sed peccatum non cognoui nisi per legem. Nam concupiscentiam nesciebam, &c.* Peccatum itaque non imputabatur siue originale siue proprium, id est ignorabatur ab hominibus donec ipsum lex diceret. Nam & ipsum primorum parentum peccatum etiam in concupiscentia fuit, sicut scriptum est: *Vidit ergo mulier quod bonum esset lignum ad vescendum, & pulchrum oculis aspectuque delectabile, & tulit de fructu illius, & comedit.* Et licet peccatum ante legem, ut dictum est, non imputeretur ab hominibus, tamen etiā tunc imputabatur à Deo, quoniam pro ipso pœnam corporalis mortis omnibus inferebat, insinuans per hoc nobis à proprijs

prijs maximè peccatis esse cauendum, cùm hoc sustineremus propter aliènum. Et hoc est: *Sed regnauit mors.*] scilicet corporalis .i. quietum obtinuit dominium, & ante legem, id est, *ab Adā usque ad Moysen etiā in eos qui non peccauerunt.*] scilicet transgrediendo sicut Adam fecit .i. in paruulos vel quoslibet innocentes, qui scilicet Adam vetus est *forma futuri.*] .i. similitudo noui Adæ .i. Christi post eum futuri, Adam sicut homo commune nomen est tã viri quàm feminæ. Ideò cùm dicitur nouus Adam, tale est ac si diceretur nouus homo, & veteri homini per obedientiam omninò contrarius. Similitudinem Adæ & Christi ipse Apostolus aperit, ostendens videlicet ita Christum omnium spiritualium esse patrem, sicut est Adam carnalium. Hoc est, ita præesse omnibus ad generandum in Deo, sicut ille est ad generandum mundo: & hūc sic ad vitam & requiem esse authorem, sicut ille est ad mortē & pœnam. Potest etiam ad hanc similitudinem, Adæ videlicet & Christi, illud reduci quod alibi idem Apostolus intelligens ait: *Sacramentum magnum ego dico in Christo & in Ecclesia,* sed litteræ præsentī sufficit similitudo prædicta, quam ipse Apostolus prosequitur, de carnali. s. & spirituali generatione.

SED non sicut delictum.] Adæ, *ita est & donum.*] Christi .i. non sunt æqualia in istis quæ ad posteros suos transmittuntur, & plura per Christum ad posteros transmittuntur in salutem, quàm per Adam in damnationem: & merito, quia plus conueniens fuit diuinæ iustitiæ siue pietati, vt per Christum plus prodesset, quàm per Adam noceret. .i. plura per hūc cōmoda quàm per illum incommoda daret. Lōge quippe est pronior Deus ad bonum conferendum, quàm ad malum inferendum. Et hoc est, *si pro vnius delicto.*] scilicet Adæ, vno videlicet non pluribus, *multi mortui sunt.*] .i. damnati, sicut paruuli non baptizati, qui ob aliud non sunt perditī: multò magis in plures .i. multos similiter, non in vnum tantum hominem, vt absolutè videlicet non comparatiuè intelligatur, abundare debuit gratia Dei, & donum in gratiam Christi .i. per dona Dei homini illi collata, de plenitudine cuius nos omnes accepimus, & qui nobis meritis suis impetravit quicquid boni habemus, & non sicut per vnum scilicet hominē, Adam pertransijt, subaudi vt supra diximus *peccatum.*] scilicet vnum in omnes, hoc est originale, *ita & donum.*] similiter

vnum pertransijt per vnum hominem videlicet Christum, immò multa dona ad multos. Et hoc est quod Apostolus in superiori versu iam comprehenderat, sed repetijt vt probaret dicens.

NAM *iudicium quidem, &c.*] .i. ex vno peccato, Adæ scilicet, est iudicium Dei *in condemnationem.*] posterorum eius .i. deputat eos æternæ pœnæ tradendos. Sed gratia Dei .i. gratuitum remissionis donum ex multis delictis, tam originali scilicet quàm proprijs per Christum condonatis est nobis *in iustificationem.*] idest ad pœnarum absolutionem. Apparet itaque plura nobis à Christo collata esse ad salutem, quàm ab Adam ad condemnationem: cùm ille videlicet Adam vnum peccatum intulerit mundo, idest vnus peccati scilicet originalis pœnam, iste vero remissionem tam illius quàm cæterorum. Et meritò quia plus oportuit tot & tanta bona istius iuuare quàm illius vnum delictum, nec magnum aliorum cōparatione nocere. Vnde Hieronymus ad filiam Mauricij hoc etiam peccatum extenuans ait: Adæ magis parcendum fuit, qui adhuc nouellus erat, & nullius ante peccantis, & propter peccatum suum morientis retrahebatur exemplo. Tibi verò post tanta documenta, post legem, post Prophetas, post Euāgelia, post Apostolos, si delinquere volueris quomodo indulgere possit ignoro. Sic expone. Quandoquidem per delictum vnus scilicet Adæ, & per vnum scilicet delictum *mors.*] etiam animæ *regnauit.*] idest quietè posteros obtinuit: multò convenientius & iustius per vnum Iesum Christum omnium bonorum plenitudine perfectum posterius eius spirituales accipientes abundantiam diuinæ gratiæ, idest plura bona super merita ipsorum eis collata, bona dico donationis & iustitiæ. Donationis solummodo illa dona dicuntur quibus nullum est meritum adiunctum, sicut in paruulis. Iustitiæ verò, vbi aliquid pro meritis datur. Iustitia quippè dicitur, quæ unicuique reddit quod suū est. Regnabunt in vita scilicet æterna, idest vitam quasi regnum, non quasi consulatum instabile obtinebunt. Ne mireris hanc sententiam sæpius Apostolum memorare, cùm maximè Christum in hoc attendat commendare, & ratione valida velit astruere plus de Christo omnibus esse confidendum, quàm de Adam timendum. Quod vt firmiter memoriæ commendet, sæpius replicat.

IGITUR *sicut per unius.*] Quandoquidem per Adam incurrimus damnationem, & per Christum assequimur iustificationem, idest remissionem: igitur per vnum, idest per vnum illud confertur, & hoc est sicut per vnius delictum, agitur subaudi. *Ad condemnationem.*] vt videlicet obnoxij sint etiam propter illud morti eterne. *In omnes homines.*] tam videlicet in eos qui non peccauerunt in similitudinem prauaricationis Adæ, vt suprameminit, quàm in alios: vel tam in eos qui ante legem fuerunt, quàm in alios vt supra quoq; meminit. Ita & per vnius iusticiam agitur ad iustificationem vitæ, idest ad remissionem peccatorum, quæ vitam conferat æternam, in omnes similiter homines, non quidem in singulos, sed in vtraq; hominum genera determinata. Quod enim non de singulis dicat Apostolus statim sequentia insinuant, vbi solummodò *multi*. Multi non omnes dicuntur. Et plane Apostolus exprimit quomodo superius supradixerit priorem Adam formam, idest similitudinem secundi, idest Christi, in hoc videlicet quod sicut quod suum est transfundit ad posteros idest peccatum, ita ille quod suum ad suos, idest gratiam iustificationis.

SICUT enim.] verè per delictum & iusticiam sic actum est, quia per inobedientiam & obedientiam. Et hoc est, *sicut enim, &c.* Per peccatum Adæ multos dicit, non omnes constitui peccatores .i. æternæ pœnæ tradi. Vt enim prætermittamus hominem Christum ab omni peccato semper immunem, sunt multi quibus iam per sacramenta Ecclesiæ peccatum originale condonatum est, & postea proprijs condemnantur peccatis, quos nequaquam eo modo quo dictum est peccatores Adam constituit, sed ipsimet ipsos, quia iam non peccatum Adæ in eis puniri videtur, quippe quod iam eis condonatum est, sed propria ipsorum tantum peccata. Quamuis nonnulli iuxta parabolam Domini de duobus conseruis dimissa etiam peccata in damnatis atque ingratis redire, & iungi ad pœnam ita velint, vt quod iam condonationem accepit iterum puniatur. Cùm id plane Apostolus in sequentibus contradicat, dicens sine pœnitentia esse dona Dei & vocationem. De quo quidem suo loco diligentius differeamus. Possumus etiam fortasse nullos saluandos ab Adâ peccatores vt determinatum est constitui .i. æternæ morti subijci, sed solos sine sacramento damnatos.

PER *unius obedientiam.*] Qui videlicet factus obediens
 usque ad mortem, *constituentur iusti.*] idest ab omni peccato
 penitus immunes etiam per pœnam. Nota quòd in Adam di-
 cit: *constituti sunt*, in Christo, *constituentur*. Ipsum quidẽ Adæ
 peccatum in nobis transfusum quasi præsens & determinatũ
 est per pœnam sui. Iustificatio autem illa per Christum qua-
 si futura est adhuc, cùm sit occulta, & maximè, quia Chri-
 stiani qui sunt, afflictionibus in hoc mundo subjaceant. Vn-
 de Ioannes Apostolus, *filij Dei sumus & nondum apparuit quid*
erimus. Scimus quoniam cùm apparuerit similes ei erimus, &c. Et
 ipse Paulus, *Vita*, inquit, *nostra abscondita est cum Christo in Deo.*
 Non autem legniter prætereundum est, quod hoc loco Apo-
 stolus de peccato & gratia per Adam & Christum transfusis
 toties replicat, & quod quasi necessaria ratione ac manifesta
 iustitia exigente astruit plura per Christum bona, licet non
 pluribus debere conferri quàm per Adam mala, quasi plus
 in iuuando iste potuerit quàm ille in nocendo: quod aper-
 tum est. Sed ex hoc ni fallor contuendo nobis Apostolus
 reliquit Deum in incarnatione filij sui id quoque sibi ma-
 chinatum fuisse, vt non solum misericordia, verum & iu-
 stitia per eum subueniret peccantibus, & ipsius iustitia
 suppleretur quod delictis nostris præpediebatur. Cùm e-
 nim filium suum Deus hominem fecerit, eum profectò sub
 lege constituit quam iam communem omnibus dederat ho-
 minibus. Oportuit itaque hominem illum ex præcepto di-
 uino proximum ipsum tanquam se diligere, & in nobis cha-
 ritatis suæ gratiam exercere, tum instruendo nos, tum pro
 nobis orando. Præcepto itaque diuino & pro nobis, & maxi-
 mè pro dilectione ei adhærentibus orare cogeatur, sicut in
 Euangelio Patrem sæpiissimè interpellat pro suis. Summa ve-
 rò eius iustitia exigebat, vt in nullo eius oratio repulsam su-
 stineret, quem nihil nisi quod oportebat velle vel facere vni-
 ta ei diuinitas permittebat. Quod ipse Apostolus duobus
 alijs locis diligenter insinuauit, scribens de eo ad Galatas,
factum ex muliere, factum sub lege, vt eos qui sub lege erant re-
dimeret. Et ad Hebræos, qui in diebus preces
 supplicationesque ad eum qui possit illum saluum facere à
 morte, cum clamore valido & lacrimis offerens, est exau-
 ditus pro sua reuerentia, &c. Homo itaque factus lege ipsa

dilectionis proximi constringitur, ut eos qui sub lege erant, nec per legem poterant saluari, redimeret: & quod in nostris non erat meritis, ex suis suppleret. Et sicut sanctitate singularis extitit, singularis fieret utilitate in aliorum etiam salute. Alioquin quid magnum sanctitas eius promeretur, si suæ tantum saluationi, non alienæ sufficeret? Nunquid Adam obediendo seipsum saluasset, quod unusquisque etiam Sanctorum per gratiam Dei obtinet? Multò plus aliquid in illo singulari iusto diuina operari gratia debuit. Non sunt etiam copiosæ potentis diuitiæ, quæ alios ditare non sufficiunt.

De Originali peccato quæstiones sue objectiones.

Nunc ad illam veterem humani generis querelam & interminatam quæstionem, de originali scilicet peccato, quod à primo parente in posteros redundare Apostolus præsentis loco commemorat, veniendum nobis est, & prout poterimus in eius solutione laborandum. Primò itaque id quæritur, Quid originale peccatum dicamus, cum quo singuli homines procreantur. Deinde qua iustitia pro peccato Patris innocens filius apud misericordissimum Iudicem Deum reus constituatur, quod non apud seculares Iudices approbaretur, & quod iam ei qui commisit dimissum credimus, vel in cæteris per baptismum deletum, in filiis puniatur, qui nec adhuc peccato consentire valuerunt: & quos proprium non obligat peccatum damnet alienum, & prioris iniquitas Patris magis quàm proximorum quantocumque grauior in damnatione trahant. Quantum etiam sit crudele, & summæ bonitati Dei incongruum, qui saluare magis quàm perdere animas desiderat, ut pro peccato parentis filium damnet, quem pro eius minimè iustitia saluaret. Pluribus autem modis peccati nomē Scriptura sacra accipit, vno quidem modo & propriè pro ipsa animæ culpa & contemptu Dei, idest praua voluntate nostra, qua rei apud Deum statuimur. Altero autem modo peccatum dicitur ipsa peccati pœna quam per ipsam incurrimus, vel cui propter ipsum obnoxij tene-
mur. Secundum quam quidem significationem dicuntur peccata dimitti, idest pœnæ peccatorum condonari, & Dominus peccata nostra portasse. i. pœnas peccatorum nostrorū

Quot modis peccatum dicitur.

Breuit
perstringit
quid sit o-
riginale
peccatum.

sustinuisse. Et cum aliquis dicitur habere peccatum, vel cum peccato adhuc esse, qui tamen per voluntatem malam non peccat, sicut est aliquis iniquus dormiens: tale est ac si adhuc cum obnoxium pœnæ proprii peccati fateamur. Tertio autem modo ipse Christus ab Apostolo peccatum dicitur, id est hostia pro peccato. Cum itaque dicimus homines cum originali peccato procreari & nasci, atque hoc ipsum originale peccatum ex primo parente contrahere: magis hoc ad pœnâ peccati, cui videlicet pœnæ obnoxij tenentur, quam ad culpam animi & contemptum Dei, referendum videtur. Qui enim nondum libero vti arbitrio potest, nec vllum adhuc rationis exercitium habet, quasi eum recognoscat authorem, vel obedientiæ mereatur præceptum, nulla est ei transgressio, nulla negligentia imputanda, nec vllum omnino meritum, quo præmio vel pœna dignus sit magis quàm bestiis ipsis, quando in aliquo vel nocere vel iuuare videntur. Vnde August. in libro de fide ad Petrum, de anima irrationalium differens animalium: Ideò, inquit, nec æternitas irrationabilibus spiritibus data est, nec aliquod eis iudicium præparatur, in quo eis vel beatitudo pro bonis, vel damnatio pro malis reddatur operibus. Ideo in eis nulla operum discretio requireretur, quia nullam intelligendi facultatem diuinitus acceperunt. Propterea ergo eorum corpora resurrectura non sunt, quia nec ipsis animalibus aut æquitas aut iniquitas fuit, pro qua eis aut æterna beatitudo sit retribuenda, vel pœna. Idem in lib. quæst. lxxxiii. Cap. xvi. Deus iustus est gubernans vniuersa, nullam pœnam cuiquam sinit immerito infligi, nullum præmium immerito dari. Meritum autem pœnæ peccatum, & meritum præmij rectè factum est. Nec peccatum aut rectè factum imputari cuiquam rectè potest, qui nihil propria fecerit voluntate. Est ergo & peccatum & rectè factum in libero voluntatis arbitrio.

De libero
arbitrio.

BOETIVS autem lib. iiii. editionis secundæ in Perihermeneias, quid sit liberum arbitrium diligenter aperiens ait, Nos enim liberum arbitrium ponimus nullo extrinsecus cogente in id quod pro nobis faciendum vel non faciendum iudicantibus perpendentibusque videatur: ad quam rem præsumpta prius cognitione perficiendâ & agendâ venimus, ut id quod sit ex nobis ex nostro principium iudicio lumet, nullo

extrinsecus aut violenter cogente aut impediēte. Item: Nos autem liberum voluntatis arbitrium non id dicimus quod quisque voluerit, sed quod quisque iudicio & examinatione collegerit. Alioquin multa quoque animalia habebunt liberum voluntatis arbitrium. Illa enim videmus sponte quædam refugere, quibusdam sponte concurrere. Quod si velle aliquid vel nolle hoc rectè liberi arbitrij vocabulo teneretur, non solum hoc esset hominis, sed cæterorum quoque animalium, quibus hanc liberi arbitrij potestatem abesse quis nesciat? Sed est liberum arbitrium, quod ipsa quoque vocabula produnt, liberum nobis de voluntate iudicium. Quotiescumque enim imaginationes animo concurrunt, & voluntatem irritant, eas ratio perpendit, & de his iudicat: & quod ei melius videtur cùm arbitrio perpēderit & iudicatione collegerit, facit. Atq; ideo quædā dulcia & speciē vtilitatis mōstrātia spernimus, quædā amara licet nollentes, tamen fortiter sustinemus: adeò non in voluntate, sed in iudicatione volūtatis liberum constat arbitrium, & non in imaginatione, sed in ipsius imaginationis propensione consistit. Atq; ideo quarundam actionum nos ipsi principia non sequaces sumus. Hoc est enim vti ratione, vti iudicatione. Ex his itaq; verbis Boetij patet, liberum arbitrium nihil aliud esse quàm ipsam animi facultatem deliberandi ac dijudicandi id quod velit facere, an scilicet sit faciendum, an non quod elegerit sequendum. Vnde & qui nihil actu deliberat, quia tamen ad deliberandum aptus est, libero non caret arbitrio. Quam quidē facultatē nemo sani capitis paruulis deesse contradicet, siue furiosis aut mente captis, qui discretionis iudicium non habent, nec in his qui agunt sola voluntate, vel impetu mentis agitati, non aliqua deliberatione animi commoti, aliquid eos promereri concedet vel pœnæ vel præmij: nec legibus etiam hominum subjaceret, vt vel humano iudicio rei pro aliquo censeantur. Vnde & ipse Aug. in lib. quæst. veteris & nouæ legis: Quomodo, inquit, reus constituitur qui nescit quid fecerit? Et Hieron. super Ezechiel: Quamdiu anima in infantia constituta est, peccato caret. Ac rursus: Obijcies mihi illud suprapositum B. August. dictum, quòd Deus nullam pœnam cuiquam finit immerito infligi, nullum præmiū immerito dari .i. nulli qui non meruit aut pœnam aut

Quib; sit
liberum
arbitrium.

præmium conferri. Quod quidem non solum in paruulis tam propter originale peccatum damnatis quàm per solam gratiam baptismatis saluatis reprehensibile videtur, verum etià in plerisque alijs, sicut in Iob percusso, & illo quem Dominus sanauit, à natiuitate cæro facto: non vt ait Dominus, quia ipse peccasset aut parentes eius, sed vt manifestarentur opera Dei in illo. Quod diligenter beatus Gregorius attendens, diuersa promissionum genera in 1. distinguit Moraliū. Quis etiam nesciat Deum non solum promittere, verum & iubere vt inimicis nostris non secundum merita eorum bona retribuamus pro malis, & nos à Deo per gratiam, quæ nos præuenit vel subsequitur, multa obtinere, non per merita. Vnde Apostolus, *Si autem ex operibus, iam non ex gratia. Alioquin gratia iam non est gratia.* Quid itaq; illud Aug. velit quod primo posuimus & postmodū opposuimus, Dominū .v. nulli immerito aut pœnam inferri, aut præmium conferri permittere, non facile absolui posse video: nisi in eo vim quandam notemus, quod cum dixerit Deus, addidit iustus, vt videlicet notet non id Dominum ex iustitia permittere quod tamen aliqua permittat dispensatione, aut ex abundantia caritatis potius fieri iubet, quàm ex æquitate iustitiæ. Est quippe iustitia quæ reddit vnicuique quod suum est, non plusquàm quod suum est, aut minus: hoc est id tantum quod ille cui redditur meruit. Si quis autem alicui plus boni conferat quàm ille meruit, aut minus infligat mali, gratiæ id est potius quàm iustitiæ. Sicut è conuerso iniquitatis esse videtur, si quis alicui minus boni conferat, vel plus mali reddat quàm ille meruit. Vt ergo ad propositum reuertamur, quanta est illa crudelitas æstimāda, quam Deus in paruulis exercere videtur, vt videlicet cum nullum inueniat meritum, grauissimam tamen infernalis incendij pœnam inducit? Hinc enim illud est Augustini in lib. de fide ad Petrum, Firmissimè tene, & nullatenus dubites non solum homines iam ratione vtentes, verum etiam paruulos, qui siue in vteris matrum viuere incipiunt & ibi moriuntur, siue iam nati sine sacramento baptismatis, quod datur in nomine Patris & Filij & Spiritus sancti, de hoc seculo transeunt, ignis æterni supplicio sempiterno puniendos. Quia etsi peccatum propriæ actionis nullum habuerunt, originalis tamen peccati damnationem carnali conceptione &

natiuitate

natiuitate traxerunt. Nunquid etiam apud homines iniquissimum iudicaretur, si quis innocentem filium pro peccato patris flammis istis transitorijs traderet, nedum perpetuis? Eset utique inquam hoc in hominibus iniquum, quibus etiā interdicitur propriæ vindictæ iniuriæ. Sed non ita in Deo qui dicit, *mihî vindictam, ego retribuam*. Et alibi, *Ego occidam, & ego viuere faciam*. Non enim iniuriam creaturæ suæ Deus facit, quocunque modo eam tractet, siue ad pœnam eam deputet, siue ad requiem. Alioquin animalia, quæ ad laborem humani obsequij creata sunt, iustè conqueri & murmurare aduersus Creatorem possent. Quibus quidem murmurantibus super se illud Euangelij responderet, *An non licet mihi quod volo facere?* siue illud Apostoli, *O homo, tu quis es qui respondeas Deo?* Nunquid dicit figmentum ei qui se finxit, quid me fecisti sic? *An non habet potestatem figulus luti ex eadem massa facere aliud quidem vas in honorem, aliud in contumeliam?* Nulla profecto ratione cum eo posset contendere. Hac quidem ratione profiteor, quoquomodo Deus creaturâ suam tractare velit, nullius iniuriæ potest argui. Nec malum aliquomodo potest dici, quod iuxta eius voluntatem fiat. Non enim aliter bonum à malo discernere possumus, nisi quod eius est consentaneum voluntati, & in placito eius consistit. Vnde & ea quæ per se videntur pessima, & ideo culpanda, cùm iussione fiunt Dominica nullus culpare præsumit. Alioquin Hebræi spoliâtes Ægyptios furti grauiter arguendi essent, & qui suos occiderunt proximos cùm Madianitis fornicâtes non tã ultores quàm homicidæ iudicarentur. Adeo autē boni vel mali discretio in diuinæ volūtatis dispositione consistit, cui hoc attendētes quotidie clamamus, *fiat volūtas tua*, ac si ita dicamus: Ordinentur optimè cuncta, vt ad eius iussionem vel prohibitionem eadem fieri alio tempore bonum sit, alio malum: cùm pro temporum diuersitate antiqui & noui contrariæ pœnitus nonnullæ videantur obseruantix. Quis enim nesciat antiquo populo prius esse præceptum, vt de sua quisque tribu duceret uxorem, & omnino modo est inhibitum: & tunc præcipuè nuptijs implicari, nunc libertate continentix frui; & circumcisionem & cætera legis sacramenta, quæ in summa veneratione ex præcepto diuino tunc fuerunt, nunc abominabilia esse? Constat itaque, vt diximus totam

boni vel mali discretionem in diuinæ dispensationis placito consistere, quæ optimè cuncta nobis ignorantibus disponit, nec quicquam benè fieri dicendum aut malè, nisi quod eius optimæ voluntati consentaneum est aut aduersum: vt quem admodum proposuimus, quocunque modo Deus tam paruulos quàm cæteras eius creaturas tractare velit, id optimo fieri non dubitemus, & si eas omnes vt voluerit ad pœnam ordinet, nec eum iniuriæ argui posse, quocunque modo eas ordinet, siue ad gloriam siue ad pœnam.

SED quia parum est ad diuinæ dispositionis cōmendationem in hac paruulorum damnatione ab iniuria Deum absolvere, nisi & aliquam bonitatis eius gratiam valeamus astruere, videtur quoq; id nobis agi ex multiplicis gratiæ ipsius dispensatione, tam in ipsos scilicet paruulos, quàm in alios redūdātis. Scimus quippe hanc esse mitissimā pœnam, B. in Enchir. Aug. sic attestante: Mitissima sanè omniū pœna erit eorum, qui præter peccatum, quod originale traxerunt, nullum insuper addiderunt. Quam quidem pœnam non aliam arbitror quàm pati tenebras, idest carere visione diuinæ maiestatis sine omni spe recuperationis. Quod ni fallor conscientia tormentum ignem perpetuum B. August. supra nominauit. Credimus etiam huic mitissimæ pœnæ neminem deputari morte in infantia præuentū, nisi quem Deus pessimum futurum si viueret præuidebat, & ob hoc maioribus pœnis cruciandum. Vnde nonnullam in hac remissione vel alleviatione pœnæ diuinæ bonitatis gratiam percipere paruuli non immeritò videntur. Bene etiam Deus ad correptionem nostram hac mitissima paruulorum pœna utitur, vt videlicet cautiorefficiamur ad euitandum propria peccata, cum tales & tam innocentes, quibus nec sepultura vel orationes fidelium conceduntur, damnari quotidie credamus propter aliena, & ampliores Dei gratias referamus: Cum nos ab illo perpetuo igne post multa etiam perpetrata crimina per gratiam suam immunes habeat, à quo minimè illos saluat. Voluit etiam statim ostendere in prima & fortasse modica primorum parentum transgressione, quam ita in posteris nihil adhuc merentibus vindicat, quantum omnem abhorret iniquitatem, & quantam pœnam maioribus culpis & frequentibus referuet, si hoc semel commissum in vnus poni repara-

bilis esu ita in posteris punire non differat. Vnde Hieron. in Epistola ad filiam Mauricij, siue ad virginem Deo consecratam. Adæ, inquit, magis parcendum fuit, qui adhuc nouellus erat, & nullius ante peccantis, & propter peccatum suum morientis retrahebatur exemplo. Tibi verò post tanta documenta, post Legem, post Prophetas, post Euangelia, post Apostolos, si delinquere volueris, quomodo indulgere possis ignoro. Sunt & in singulorum paruulorum damnatione propriæ & familiares quædam causæ, licet nobis occultæ, quas ille nouit qui nihil non optimè disponit. Et nos quidē aliquas huiusmodi ex his quæ frequenter accidere videmus, conijcere possumus. Sæpe quippè accidit, ut talium paruulorum mortem in vitam suorum parentum diuina gratia commutet, cum ipsi videlicet maximè de eorum damnatione quærentes quanta eis per concupiscentiam propriam generatis intulerint, propriæ id culpæ totum tribuant, & sibi ascribant, & tam ipsi quam cæteri hoc videntes timidiore in Deum, & de proprijs peccatis magis compuncti vel resipiscences efficiantur, cum tam seueram in paruulos ex concupiscentia, in qua omnes genuerunt, viderint sententiam. Ex quo etiam ad continentiæ bonum potius inuitamur, quod tam periculosa indulgemus concupiscentiæ, per quam tot animæ incessanter inferis transmittuntur. His vel consimilibus rationibus apparere arbitror, Dominum de mitissima illa damnatione paruulorum non solum iniuriæ non esse arguendum, verum etiam ex nonnulla gratiæ suæ tam in paruulos, ut dictum est, quàm in cæteros collatione glorificandum.

EST ergo originale peccatum, cum quo nascimur, ipsum damnationis debitum quo obligamur, cum obnoxij æternæ pœnæ efficiamur propter culpam nostræ originis. i. primorum parentum, à quibus nostra incepit origo. In illo enim ut supra meminit Apostolus, peccauimus, id est peccati eius causa æternæ damnationi ita deputamur, ut nisi diuinorum sacramentorum nobis remedia subueniāt æternaliter damnemur. Et notandum quòd licet dicamus peccasse paruulos in Adā, ut expositū est, non idèò simpliciter annuamus eos peccasse, sicut nec cum dicimus aliquem tyrannum adhuc viuere in filijs suis, idèò cum simpliciter viuere concedimus. Damnan-


Plena diffinitio originalis peccati.

tur itaque, inquires, qui non peccarunt, quod est iniquissimum: puniuntur qui non meruerunt, quod est atrocissimum. Sed hoc fortasse quantum ad homines, non quantum ad Deum est concedendum. Alioquin quomodo paruulos quoque poena diluuij vel incendij Sodomitaram Deus affligens non arguitur? Aut quomodo B. Iob & Martyres sanctos affligi vel occidi permisit? denique & vnicum suum morti tradidit? dispensatione, inquires, commodissima gratiae suae id fecit, bene & argute: sic etiam, inquam, homines aliqua saluberrimi consilij dispensatione & innocentes pariter ut nocentes affligere possunt, nec in hoc peccare: veluti cum propter alicuius Tyranni malitiam boni Principes terras eorum depopulantes atque depradantes, & bonis fidelibus qui eis subiecti sunt & possessione non mente coniuncti nocere compelluntur, ut paucorum electorum damno plurimorum utilitati provideatur. Potest etiam contingere, ut aliqui falsi testes, quos tamen refellere non valeamus, aliqua de aliquo imputent quem innocentem scimus. Quorum quidem testimonia postquam id egerint quod eis adiudicatum fuerit, cogimur etiam contra conscientiam nostram grauare innocentem, ut quod mirabile dictum est, dum legibus obtemperamus, iuste cum puniamus qui iuste non punitur, & iuste id agamus quod iustum non est, competenti super hoc deliberatione habita, ne vni parcendo pluribus noceamus. Sic etiam in paruulorum damnatione, cum quod non meruerint plectuntur, multae possunt existere causae diuinae dispensationis saluberrimae, praeter has etiam quas assignauimus, ut non sit iniquum eos sic puniri, licet non meruerint: quoniam Deus qui talium poena tam ipsis quam alijs non inutiliter utitur, ut supra aliquibus non improbabilibus assignauimus opinionibus, ut magis ad gratiam Dei quam ad iustitiam haec mitissima paruulorum poena referenda videatur, & in quo maxima Dei videretur crudelitas, magnae dispensatio gratiae sit praedicanda. Nec hoc rationi contrarium est, si quod dimissum est in parentibus, puniatur in filijs: licet hoc filij non ex culpa contrahunt parentum. Aliqua enim pro parentibus satisfactio intercedit, & eis tantum sufficiens est, non etiam filijs. Verbi gratia, egerunt Adam & Eua eiectione de paradiso in sudore vultus & dolore partus vel caeteris afflictionibus poenitentiam de commissa transgressionem,


& propiciatus est eis Deus propria ipsorū satisfactione. Mor-
te denique temporali cū sint pro illa transgressione quam
commiserant ipsi puniti, nequaquam propter ipsam æternæ
morti sunt reseruandi, iuxta illud Propheticum, *Non iudica-
bit Dominus bis in idipsum, & non consurget duplex tribulatio*, id-
est nemo de vno eodemque proprio peccato & corporali
& æterna morte puniendus est. Filijs autem illorum, vide-
licet primorum parentum, quibus pariter omnibus etiam
pro culpa ipsorum patrum iratus est Deus, tanquam in pec-
cato carnalis concupiscentiæ conceptis, quam ipsi videlicet
patres ex prima trāsgressione incurrerūt, singulis propria ne-
cessaria est absolutio, quæ leuissima nobis instituta est in bap-
tismo, vbi pro alieno quo obligantur peccato aliena fides pa-
trinorumque confessio intercedat. Quippe qui obligatus
peccato nascitur, pro ipso quo tenetur nondū satisfacere vel
pro se valet, sed diuinæ gratiæ sacramento mūdatur. Non mi-
rum videri debet si quod indulgetur parentibus, exigatur à
filijs; cum ipsa vitiosa carnalis concupiscentiæ generatio pec-
catum transfundat, & iram mereatur. Vnde Apost. *natura fi-
lij ira*, à qua quidem ira parentes primi satisfactione propria
sunt liberati. Potest autem vsu euenire vt cū aliquis pauper
Domino alicuius se subiugauerit, & paruulos suos, ipse tamē
postea propriæ virtutis facto aliquo vel precio libertatem sibi,
non filijs acquirat. In ipsis etiam rerum naturis non incon-
gruam nobis Dominus huius rei similitudinē impressit, quæ
huiusmodi objectioni satisfacere quodāmodo videatur, cū
tam .v. ex oliuæ quàm ex oleastri semine non nisi oleaster na-
scatur, sicut tam ex carne iusti quàm ex carne peccatoris non
nisi peccator nascitur, & ex frumento à palea purgato non
purgatum, sed cum ipsa palea frumentum producat: sicut
ex parentibus per sacramentum à peccato mundatis nemo
nisi cum peccato nascitur.

V T R V M autem ex proximis quoque parentibus sicut ex
primis peccata contraxerimus, & multiplicatis originalibus
peccatis tantò quisque nascatur deterior quanto posterior,
ante quæritur. Beatus verò August. in Enchiridion
cap. xvi. hoc probabiliter dici consentit, vt proximo-
rum quoque parentum peccatis filij obligentur, vbi videlicet
ait parentum quoque peccatis paruulos obligari, non solum

F F ff iij



primorum hominum, sed etiam ipsorum, de quibus ipsi nati sunt, non improbabiler dicitur. Illa quippe diuina sententia, *reddam peccatum patrum in filios*, tenet eos utique antequam per regenerationem ad testamentum nouum incipiāt pertinere, quod testamētum prophetabatur cū dicitur per Ezechielem, non accepturos filios peccata patrum, nec ultra futuram in Israel parabolam hanc: *Patres manducauerunt vnam acerbam, & dentes filiorum obstupuerunt*. Item idē est instituta regeneratio, quia vitiosa est generatio vsq; adeo, vt de legitimo matrimonio procreatus dicat, *in iniquitatibus cōceptus sum, & in peccatis cōcepit me mater mea*. Neq; enim hic dixit, in iniquitate vel peccato, quia & in verbo vno quod in omnes homines pertransijt, tam magnum est vt mutaretur vel conuerteretur in necessitatem mortis humana natura. Reperiuntur, sicut supra disserui, plura peccata, & alia parentum, quæ & reatu obligant filios, nisi gratia diuina subueniat. Sed de peccatis aliorum parentum ab ipso Adam vsque ad patrem suum disceptari potest, vtum omnium malis actibus & multiplicatis delictis originalibus qui nascitur implicetur, vt tanto peius quantō posterius quisque nascatur. Hæc tamen Beati Augustini dicta magis ad opinionem aliorum, sicut ipsemet innuit, probabilem, quàm ad ipsius assertionem referenda videntur. Quis namque Hieremiam & Ioannem Baptistam sanctificatos in utero longe posteriores quàm Cain deteriores nasci arbitretur? Denique & Dominus Iesus ex multis peccatoribus patribus originem ducens secundum carnem longe post Cain natus est ex virgine. Et cū plures quàm Cain peccatores haberet antecessores, nihil tamen ei obfuit numerositas talium patrum, quorum carnem accepit in virgine. Sed verò illud in admirationem venire debet, quod cū originale peccatum condonatur, status immortalitatis, qui per ipsum amissus est, non recuperatur. Satis quippe ad diuinæ gratiæ largitatem nobis debet esse, si vel grauissimam & æternam euitemus mortem: quia per illud peccatum incurrimus vtramque. Non est enim aliud Deum condonare peccatum, quàm æternam eius relaxare pœnam. Ad hoc enim vt arbitror pœna ista corporalis & transitoria mortis reseruetur, vt eo minus vitam habere temporalem appetamus, quod facilius eam finire prospicimus, & ærumanis subiacere, & eam



amplius diligamus quæ verè beata est , & finem non habet. Hæc de originali peccato non tam pro assertionem quàm pro opinione, nos ad præsens dixisse sufficiat. Nunc ad expositionem litteræ redeamus.

Lex autem subintravit.] Ac si aliquis quæreret. Quid ergo egit lex ante aduentum Christi, si postea Christus adueniens peccata abstulit? Respondet quia lex non solum peccata non abstulit, sed auxit, vt necessariò Christus ad auferendam quoque habitudinem peccatorum descenderet. Et hoc est lex scilicet scripta, *subintravit*, post naturalem, *vt abundaret delictum.*] Hoc autem dictum est, quomodo si dicatur de aliquo, *exiuit vt moreretur*, idest exiuit, & propterea mors est subsecuta, non quod hac intentione exiret. Sic & per hoc quod lex data est populo rebelli, peccatum per transgressionem plurimam abundauit. *Vbi autem.*] idest in eodem populo, in quo per transgressionem etiam legis scriptæ, *abundauit peccatum, superabundauit & gratia.*] Christi, idest bonæ ab eo gratis non pro meritis collata, tum quia ibi salutem nostram specialiter operatus est, tam patiendò scilicet quàm prædicando. Vnde ait, *Non sum missus nisi ad oues quæ perierunt domus Israel*, vel remittendo peccata, aut miracula faciendo, siue patiendò, resurgendo, ascendendo, Spiritum sanctum mittendo: quàm Apostolos & priores electos inde colligens, per quos vniuersus postmodum orbis acquisitus est Deo. Abundasse peccatum dicit, & superabundasse gratiam, quæ non solum peccatum abstulit, verum etiam virtutes contulit & multiplicauit, tam visibiliter in miraculis, quàm spiritualiter in interioribus animæ bonis, *vt sicut.*] id est ad hoc abundauit hæc gratia, idest donæ à Christo gratis collata, *vt ipsa regnat per iustitiam,*] idest regnum iustitiæ in nobis ædificet, quæ omnibus imperet libidinibus, & illicitos refrænet motus, præparando nos ita, *in vitam æternam.*] & hoc, *per Christum.*] seipsum pro nobis hostiam offerentem. *Sicut antea regnauit.*] idest regnum suum & dominium habuit, *in nobis peccatum.*] ducens nos ita, *in mortem.*] scilicet æternæ damnationis.

Quid ergo dicemus p. &c.] Quandoquidem vbi abundauit delictum. s. g. diceret aliquis, quid dicemus nisi vt perseueremus in peccato, vt sic in nobis *gratia abundet.*] sicut in

illis? *Absit.*] Inquit Apostolus ex sua parte, hoc concedamus, scilicet perseuerandum vnquam esse nobis aliqua occasione in peccato. *Qui enim mortui sumus peccato.*] Ac si diceret: Non est nobis permanendum in peccato, quia nec manendū aliquo modo, cum ei sumus iam mortui, per gratiam scilicet nobis collatam de remissione etiam peccatorum, *An ignoratis.*] Ac si diceret, etiam ipso sacramento & similitudine mortis Christi, quam accepistis in baptismo, admonemini postquam mortui facti estis peccato, non esse viuendum in illo. Sicut enim ille semel mortuus corpore semel resurrexit à morte, non vltra scilicet moriturus: ita & vos à morte animæ, idest peccato, per gratiam baptismi Christi, non Ioannis, liberati, redire ad peccatum non debetis. Et hoc est, Nunquid vos qui ita opponitis, ignoratis sacramentum, idest sanctificationem baptismi Christi, idest ignoratis quod *quicumque baptizati sumus in Christo Iesu.*] idest baptismate eius potius quàm Ioannis, *sumus baptizati in morte ipsius?*] idest in similitudine & significatione corporalis mortis. Sicut dictum est, vt videlicet sicut ille semel mortuus est corpore, & resurrexit; ita & nos semel mori peccato nitamur, & non vltra velle peccare, etiam si per pœnitentiam valeamus resurgere. *Consepulti enim.*] Post similitudinem mortis & sepulturæ adiungit etiam resurrectionis, dicens nos ad hoc in baptismo consepultos esse Christo in morte peccati, idest similitudine tridua eius sepulturæ, per quam morimur peccato, accepisse, ad hoc inquam vt, *Quomodo Christus semel resurrexit.*] semel iterum casurus in mortem, *per gloriam Dei Patris.*] idest per potentiam diuinitatis, quæ specialiter nomine patris exprimitur, ita nos ambulemus per gradus virtutum, quæ nouum hominem faciunt, non reuertentes ad vitia quæ sunt mors animæ. *Si enim.*] Dixi nos accepisse similitudinem mortis & sepulturæ Christi in baptismo, vt similitudinem resurrectionis per nouitatem vitæ teneamus. Et merito, *Quia si complantati fuerimus similitudini mortis Christi.*] idest si in gratia baptismatis, quæ est similitudo mortis, Christi firmiter radicati fuerimus, sicut ille obedientia mortis sibi iniunctæ à patre immobilis extitit. Quæ quidē mors eius fuit quasi plantatio grani fructificandi, & multiplicandi sicut ipse dicit, *Nisi granum frumenti, &c. simulerimus & resurrectionis eius.*] idest peruenimus

mus per gradus virtutum ad resurrectionis eius gloriam, siue ad ipsam nouitatem vitæ, quæ est etiam in terris quædam similitudo future vitæ, quam resurgendo primus Christus nunciavit. Nouitas vitæ est, vt ait Origenes, vbi veterem hominem cum actibus suis deponimus, & induimus nouum qui renouatur in agnitione Dei. Quotidie sic dici potest ipsa nouitas innouanda esse. Sic enim dicit: *Nam & is qui foris est homo noster corrumpitur, sed qui intus renouatur de die in diem. Qui in fide proficiunt, semper bonis operibus adiungunt meliora.*

Hoc *scientes.*] .i. attendentes & considerantes, in ipso genere mortis Christi significari quod non simul cum Christo sit, *Crucifixus* .i. in nobis, *vetus homo.*] .i. transgressor Adæ, vt quemadmodum scilicet Christus corporaliter crucifixus mortuus est, ita spiritualiter in nobis veterem hominem per baptismum mori credamus & crucifigi .i. omnem transgressionem, per quam imitamur veterem & priorem Adam, condonari. Et hoc est quod exponens subiungit, ita vt *destruatur in nobis totū corpus peccati.*] non vnum membrū .i. vniuersa peccata, tam originale scilicet quàm propria, non hoc tantum vel illa condonentur. Crucifixus quilibet ita totum corpus extensum habet, vt mouere membra non possit, tanquam omnia sint mortificata. Per quod significatur in baptizatis omnia deleta esse peccata. *Vt ultra.*] .i. ad hoc nobis gratia remissionis est collata, vt ei quantum possumus cohærentes, & in hac mundicia permanentes *non seruiamus ultra peccato.*] .i. non dominetur nobis longa peccati consuetudo, quæ etiā nolentes quasi seruos in perpetuum retinet, non tanquam famulos ad horam subiectos habet. *Qui enim.*] Bene dixi crucifixum esse & mortuum in nobis veterem hominem, vt amplius ille in nobis peccato non seruiat, quàm mortuus quilibet, vt ait Hieronymus, iustificatus est à peccato .i. ab opere peccati iam alienus, licet penitus voluntate peccandi non careat, sicut libero caret operandi arbitrio: *Si autem.*] .i. si morte peccati imitamur mortem Christi. *Credimus.*] .i. mente firmiter tenemus, *quia simul etiam viuemus cum Christo.*] tam corpore quàm anima glorificati in perpetuum. Cuius quidē vitæ perpetuitatem subiungit dicens, *scientes*] nunc per experimentum quia nunc credimus, *Quod scilicet Christus resurgens ex mortuis.*] id est de inter mortuos, quorum vnus erat. *iam*]

i. in presenti seculo, *Non moritur*] neque etiā in futuro: & hoc est, *Mors illi ultra non dominabitur.*] Sed quid est quod ait, *non dominabitur*, quasi prius dominata fuerit, & cum tanquam inimicum oppresserit. Et fortasse qui vsque adeo mortem visus est expauisse vt diceret, *Pater, si possibile est, &c.* & iterum, *verumtamen non sicut ego volo, &c.* mori nullatenus voluit, sed permisit? Secundum diuinitatem verò, sicut vnum est cum Patre, ita & vnius voluntatis est: iuxta quod ipse de se ait, *Nemo tollit animam meam à me, sed ego pono eam.* Et iterum: *Potestatem habeo ponendi animam, & iterum sumendi eam.* Et Isai. *Oblatus est, inquit, quia voluit.* Desiderauit quidē anima hominis illius salutem nostram quam in morte sua consistere sciebat, & propter illam quam desiderabat hanc tolerabat: sicuti infirmus vel sauciatus aliquis propter sanitatem quam desiderat, multa tolerat aspera coactus, non spontaneus, per quam sanitatem se adepturum existimat. Quæcunque autem coactus quis sustinet, non vtique velle, sed magis tolerare dicendus est. Nihil quippe affligendo grauat aliquem, nisi quod contra eius geritur voluntatē. Et in nullo quis patitur, nisi quod eius voluntati aduersatur. Anima itaque Christi non tam afflictiones passionum velle quàm tolerare dicēda est. Sed quia etiam Christus ipse alibi profitetur non se venisse voluntatē suam facere, sed voluntatem Patris. Vnde & pro magno id merito & virtute reputandum est, cū amore quis Dei suæ penitus abrenuntiat voluntati, immo & vt ipse alibi Christus ait, adhuc & animam suam oderit. Quodam itaque modo mors ipsa humanitati Christi dominata est, quando eam videlicet præ angustia sua reformidabat, & transire potius quàm venire volebat, quasi nolens sustinuit propter iniunctam sibi à Patre obedientiam. Qui etiam sub lege factus est, cū omnino legi nil deberet. Tale est itaque quod ait Apostolus, *Mors illi ultra non dominabitur.*] ac si diceret; Non opprimeret nolentem, vel non affliget violenter innocentem. Quasi enim violentiam mors in eum exercuit, cum innocentem, & nulli peccato penitus subiacentem oppressit, quānō nisi peccati causa homini est immissa. Potest enim conuenientius distingui quod dictū est, *iā non moritur, & mors illi ultra non dominabitur*, vt videlicet illud primum ad mortē corporis, secundum verò ad mortem animæ referatur. Tale quippe est,

non moritur iam, ac si dicatur, præsentem vitæ mortem .i. corporalem non incurret. Tale est verò, *mors illi ultra non dominabitur*, ac si dicatur, mors illi vltior, quæ in reprobis corporalem sequitur, & etiam post resurrectionem impijs dominatur, eum nullatenus opprimeret. Quæ videlicet mors omnibus quos arripit dominatur, & neminem nisi inuitum detinere potest. Hanc autem distinctionem sequens littera exigere videtur quæ ait, *quia enim mortuus est, &c.*] Hinc enim probat quod mors illa, quæ vltima est .i. quæ post hanc transitoriam sequitur, æterna illi non dominabitur, quia ille semel mortuus est in corpore tantum.

Quod enim mortuus est peccato penitus.] .i. in nullo penitus vnquam fuit peccato, siue actuali siue originali, pro quo videlicet peccato mors illa damnationis debetur, ideo semel tantum mori potuit vt dictum est .i. corpore tantum, non anima. *Quod autem viuit.*] Mortuus est, inquam, sed viuit iam suscitatus. Et quod viuit, *viuit Deo.*] sicut mortuus fuerat peccato, immo quia mortuus existit in præsentis sæculo peccato, necesse est vt in futuro viuatur Deo. Viuit peccato qui viuēdo peccat, viuit Deo qui ab eius voluntate non discordat. Quod quidem soli Christo siue in ipso capite siue in eius glorificatis membris veraciter assignatur. *Ita & vos.*] Quod præmisit de capite per similitudinem quandam ad membra reducit, vt videlicet peccato moriantur & Deo viuant. Et quia possent illi dicere se ignorare quando peccato, quando Deo viuerent, præueniens atque auferens hanc excusationem, dicit vt saltem pro existimatione sua & capacitate suæ intelligentiæ id implere studeant. Et hoc est quod ait. *Existimate, &c.*] hoc est ita saltem viuatis, vt vos non reprehendat vestra cōscientia, sed mundum ad plenum qualiter viuendum sit cognoscatis: quia & si aliter sapitis, vt ipse alibi Apostolus ait, id quoque Deus vobis reuelauit, corrigendo scilicet vestræ simplicitatis minus doctam existimationem. *In Christo Iesu.*] .i. per gratiam vobis in Christo collatam, cum quo vobis collata sunt omnia, non per merita vestra.

Non ergo,] Ad superiora illa reuertitur vbi dictum est. *Quid ergo dicemus? permanebimus in peccato? ut gratia hæc. &c.* Et multis rationibus interpositis concludit non esse permanendum in peccato .i. non oportere aliqua de causa pecca-

tum regnare in nobis. Continuatio. Quandoquidem sic viuendum est vt existimetis vos mortuos esse peccato. Ergo *non regnet peccatum in vestro mortali corpore*, hoc est non perseueret in fragilitate vestræ carnalitatis. Non dicit, non sit, sed *non regnet*. i. non dominando perseueret. Quod autem non dicat, non sit, insinuat dicens. *In vestro mortali corpore*. i. in fragili & ad peccandum prona humanæ naturæ substantia. Difficile quippe est, immò quodāmodo impossibile, vt quandoque nostra hæc mortalitas ad peccatum inclinetur, sed eū humanum peccare, diabolicum est, non humanum perseuerare. Quomodo autem regnet in nobis peccatum, & dominium obtineat, determinat subiungens: *ut obediatis c.e.*] Quasi transitum, non regnum in nobis habet peccatum, quando quod suggerit concupiscentia ratio refrenat. Tunc verò quasi regnans & dominans stabilem in nobis mansionē facit, quando malum quod mente concipimus, opere implemus, vel quod peius est, in consuetudinem ducimus, nolentes id per pœnitentiam emendare. Est itaque obedire concupiscentiæ peccatum ita ad affectum ducere, sicut praua concupiscentia quæ peccati est persuadet. *Sed neque.*] Non solum non obediatis malæ concupiscentiæ, verū & ipsam ita præuenire vestra prouidentia studeat, vt cū voluerit dominari non possit. Quod quidem facietis, si non exhibueritis, *membra vestra a. i. p.*] .i. non præparabitis ea instrumenta cōceptę animo iniquitatis. i. malæ concupiscentiæ, ad peccatum opere cōplendum. Tunc autē præparamus mēbra nostra ad malam concupiscentiam quæ ad actum perducitur, quando nimio cibo vel potui indulgemus, vnde lasciuire facile caro possit, vel quando cōponimus nos atq; adornamus, vt mulieribus placere valeamus, vel quādo pugillatoriē vel gladiatorie insistimus, vt per ea quos voluerimus opprimamus, vel in causis linguam exercemus, vt indē pecuniam acquiramus, & quibuscunque modis vel aliquam partem nostri corporis ad aliquid mali operandum facilem siue habilem efficimus. *Sed exhibete.*] .i. præparate vos Deo, hoc est diuinæ voluntati dicite, vt pote per fidem ab eo spiritualiter suscitati à morte animæ. Et hoc est *tanquam exhibete membra vestra.*] Et quia fides sine operibus mortua est, addit & *membra vestra*, scilicet exhibete *anima iustitia Deo.*] .i. instrumenta quibus omnis ad

iusta opera utatur, veluti si quis abſtinentia gulam domet, ut quod ſibi ſubtrahit alteri largiatur: vel manus in labore exerceat, ut habeat unde tribuat neceſſitatem patienti: vel aures prædicationi & oculos ſacræ lectioni applicet, ut alios quoque valeat erudire, &c. *Peccatum enim.*] Dixi ut exhibeatis membra veſtra Deo, & id præcipue debetis propter appoſitā gratiam Euangelij, & grauiffimam pœnam legis remotam. Et hoc eſt peccatum .i. lex peccati .i. pœnæ potius quàm gratiæ. *Vobis.*] ad Chriſtum iam conuerſis, *non dominabitur.*] .i. non opprimit atque affliget illis intolerabilium pœnarū vindictis. Vnde cauſam annectit, dicens.

Non enim ſub.] .i. non eſtis iam ſub legalibus institutionibus obnoxij, tanquam illo legis iugo grauiffimo preſſi, dentem pro dente, oculum pro oculo, &c. ſed ſub gratia ſcilicet Euangelij. Quod ſcilicet Euangelium teſtamentum amoris & miſericordiæ eſt dicendum, ſicut illud timoris & vindictæ extitit. Vnde & in laudem Chriſti Pſalmiſta præcinit, *Diffuſa eſt gratia in labijs tuis*, hoc eſt dilatatā uſq; ad inimicos caritatem, iuxta quod alibi dicit: *latum mandatum tuum nimis*, & tota tua reſonat prædicatione. Quæ quidem omnia ita dimitti præcipit, ſeu perſuadet, ut incuſſum ſperemus remiſſionem à Deo peccatorum, niſi omnibus omnes iniurias dimittamus. *Quid ergo peccabimus?*] occasione præmiſſorum quæſtionem interſerit atque ſoluit dicens. Quid ergo, ſcilicet dicendum eſt aut tenendum? hoc eſt, quæſtionem quaſi rationabiliter incurrimus hanc, peccabimus quoniam non ſumus ſub lege: .i. libertatem hanc gratiæ quam accepimus conuertemus ad peccādum, quia ſcilicet vindictam hanc corporalē non timeamus? *Absit.*] quod videlicet non eſſet hæc libertas, ſed ſeruitus. Et hoc eſt quod ſubdit. *An nescitis.*] .i. tã ſtolidi eſtis quod ignoratis, *quod ſerui eſtis eius cui vos preparatiſ ſervos ad obediendum.*] .i. cui vos ſponte traditis non coacti, ut quod præcipit exequamini, non attendentes videlicet an non ſit faciendū, ſed quod ſit ab eo præceptum, *ſive peccati.*] .i. prauæ voluntatis ducentis ad mortem .i. damnationem, quaſi ſuggerem præcipientis praua opera, *ſive obediſionis.*] ſcilicet ſerui .i. bonæ voluntatis, ſeu præceptionis, cui eſt obediendum ad iuſtitiā .i. ad aliquam iuſtam operationem. *Gratias autem.*] Dixi ſive peccati ſive obediſionis, quaſi dubitarē cuius ſerui ſitis,

sed gratias .i. grates Deo, subaudi refero, quòd cùm fuissetis prius serui peccati, nunc estis facti serui obeditionis. Et hoc est, *obeditis autem ex corde.*] .i. amore potius quàm timore, in eam formam .i. secundum illum modum doctrinæ, in qua à prædicatoribus estis eruditi, & sic liberati à seruitute peccati, cui videlicet prius obediebatis. *Serui facti estis iustitiæ.*] .i. iustæ vel rectæ voluntatis, seu diuinæ præceptionis, quæ non solum iusta, verum etiam ipsa est appellata iustitia. *Humanum dico.*] Ac si diceret, & quia nunc à iugo peccati liberati ad obedientiam iustitiæ estis traducti.

LIBER TERTIVS.



HUMANVM dico.] Adhortando vos, vt in ea perseueretis, & quia vos infirmos adhuc & carnales intueor .i. pronos relabi ad peccata, humanitus vobis loquor .i. remissiùs quàm iustum sit, vt videlicet si non plus saltem tantùm studeatis implere opera iustitiæ, quàm studuistis iniquitati deseruire. Et hoc est illud humanitus dictum, *propter infirmitatem carnalitatis eorum.*] .i. quam ex carnalibus trahunt desiderijs, quod statim adiungit dicens: *Sicut enim.* Ac si diceret, verè humanum vobis dico, quia hoc vt videlicet sicut olim exhibuistis.] .i. apertè atque impudenter præparastis, *membra vestra seruire immundiciæ.*] .i. carnalibus turpitudinibus, luxuriæ vel gulæ, *iniquitati.*] .i. spiritalibus vicijs, sicut est ira vel odium in alterum, seu cupiditas rei alienæ: illis, inquam, exhibuistis seruire ad iniquitatem, scilicet perpetrandam, vt videlicet peruersum mentis desiderium in effectum duceretis, ita præparate nunc illa *seruire iustitiæ.*] .i. iustis desiderijs *in sanctificatione.*] .i. in effectum sancti operis. Qui non tam ex infirmitate quàm ex studio peccant, membra sua præparant ad iniquitatem: sicut nonnulli calidis vtuntur, vt luxuriæ; vel salis, vt potui vacare diutius possint, atque ipsa sui corporis membra sæpè contra ipsorum naturam ad turpitudines cogunt. Manum quoque suam ad iniquitatem perpetrandam præparat, si ei gladium prouidet, quem in eum quem odit exerceat. E contrario

membra sua iustitiæ præparat, si ea sic temperare satagit, & coercere, ne ad illicita prorumpant, sed ad coronam proficiant; quibus quidem cum potuit non est transgressus, immò viriliter in eis omnem prauæ suggestionis impetum extinxit, & quæ eis potuit ad bene operandum monstrauit, vt oculis sacras litteras, auribus lectiones, manibus elemosynarû munera vel religiosi laboris instrumenta.

Cum enim.] Bene dixi, quia liberati modo à peccato serui facti estis iustitiæ, quia è contrario olim serui existentes peccati liberi fuistis iustitiæ. i. à seruitio iustitiæ alieni. Locus à contrarijs. Sicut seruus iustitiæ dicitur qui ei famulatur, ita è contrario liber eius dicitur qui ab eius seruitio remotus est, i. qui eam implere non curat. *Quem ergo.*] i. quandoquidem olim ita peccato seruistis à iustitia penitus alieni, quem tunc fructum. i. vtilitatem habuistis, scilicet supra positis, immunditia scilicet & iniquitate, in quibus. i. de quorum perpetratione, nunc erubescitis. Et hic est finis illorum, scilicet ad quod ducit, vel effectus prius eis debitus mors est, animæ videlicet. i. perpetuæ cruciatus pœnæ. *Nunc verò liberati à peccato.*] i. à graui malæ consuetudinis iugo, *habetis iam hic fructum vestrum in sanctificationem.*] i. ipsam remissionem peccatorum, qua sanctificati estis, habetis pro remuneratione. *Finem vero.*] i. exitum, ad quem hæc sanctificatio perducit, habetis iam vobis præparatum. *Vitam æternam.*] Merito finem dicit tam vitam quàm mortem animæ æternam, quæ vita ista corporis & morte temporali finitis extremæ consequuntur. *Stipendia enim.*] ad duo illa præmissa, *Nam finis illorum, & Hinc verò liberati, &c.* ista duo subnectit, *stipendia enim, & gratia autem Dei, &c.* ostendens videlicet qualiter ad duos illos fines, quos distinxit, mortem scilicet ac vitam perueniatur. Ad mortem quidem ex iustitia, ad vitam autem ex gratia per Iesum ante collata. Non sunt enim condignæ passionibus huius temporis ad futuram gloriam, quæ reuelabitur in nobis. Vnde bene remunerationem peccati de morte vocat stipendium, remunerationem autem obedientiæ Dei de vita æterna non stipendium sed gloriam nominat. Stipendium quippe à stipe nomine, & penso pensas verbo dicitur. Stipes autem vel stips dicitur merces quæ militibus redditur pensato eorû labore, siue considerata dominorum vtilitate. Haimo verò

sic ait: Stipendia .i. remuneratio stipendium dicitur à stipe pendenda .i. substantia ponderanda. Antiquitus enim potius ponderabatur pecunia quàm numerabatur. Sic continua. Dixi quia finis illorum .i. immundicie & iniquitatis, mors est, & bene quia omnis peccati stipendia sunt .i. iusta & debita remuneratio mors, his videlicet qui in eo perseuerant: sed vita æterna potius est gratia Dei dicenda quàm stipendia nostra .i. gratis potius nobis collata, quàm meritis nostris debita. Et hoc est per Christum Iesum, per quem Deo reconciliati sumus.

CAP. VII. *AN ignoratis.*] Dixerat superius Apostolus, *Non enim sub lege estis, sed sub gratia*: & rursus hic nouissimè adiecit, *per Iesum Christum Dominum nostrum.*] potius quàm per legem; nos hanc gratiam vitæ æternæ assecutos. Vnde quia aliquis possit quærere: Post legem datam quando aliquis sine eius observationibus potest saluari cuicunque apponatur gratia, cōuenienti similitudine Apostolus talē præuenit & soluit quæstionem; ostendens videlicet quòd quemadmodum mulier priore viro defuncto potest ad alium inculpabiliter transire, ita populus Dei prius iugo legis alligatus quasi mulier viro cui debet obedire, potest iam lege defuncta ad libertatem Euangelij sine culpa meare. Vsq̃ue ad Ioannem enim, qui interpretatur gratia Dei .i. ad tempus gratiæ singularis aduentus Christi, lex & Prophetæ. Quod quidem tempus sicut in Epistola ad Hebræos ipse commemorat Apostolus, de mutatione scilicet testamenti .i. de interitu veteris & natiuitate noui, Dominus per Hieremiam promiserat dicens: *Ecce dies veniunt, dicit Dominus, &c.*] Continuatio. Dixi nos iam non esse sub lege, nec iam post Christum eam nobis esse necessariam insinuavi. Nec hoc quidē mirabile videri debet. Quia, *nunquid ignoratis fratres* .i. non credo quod ignoretis, quia lex in homine dominatur .i. ei ab homine est obediendum, quādiu ipsa viuit .i. tanto tempore quod ei à Domino præfinitū est & concessum, vt eius obedientia valeat & integrè in ipsis etiam figuralibus præceptis custodiatur. Quod autem interponit, *scientibus autem loquor* .i. vobis qui legem iam dudum didicistis: ostendit hanc inuectionem ad eos qui ex Iudæis crediderant, specialiter spectare, de quibus quasi causam hinc interserit, quod id quod dicit non ignorent, quia legem didicerunt,

dicerunt, quæ hoc docet, tempus videlicet eam habere præfixum, vel à Deo determinatum, ut non semper ut dictum est viuat, sicut supposito Hieremiæ testimonio confirmatur, siue alijs veteris testamenti locis.

N A M quæ.] Probat competenti similitudine, quia lex eo tempore tantum quo viuit dominari habet populo subiecto. Quia & vir quilibet vxori sibi alligatæ non habet dominium nisi dum viuit. Et hoc est, *Nam quæ sub viro est mulier.*] .i. ei tanquam superiori copulata est, *eo viuente alligata est legi ipsius.*] .i. legi maritali, ut videlicet alij nubere non possit. *Ergo viuente.*] quia scilicet alligata est ita legi matrimonij. *Itaque fratres.*] Præmissam adaptat modo similitudinē, dicens & ita .i. quæadmodū vos qui primitus legi viuebatis per obedientiam ei subiecti, mortui iam facti estis ei per corpus Christi, .i. per ipsam præsentiam veritatis in Christo vobis exhibitam. Cuius quidē veritatis vmbra in lege præcessit. Postquā enim res ipsa venit, quæ per se sufficit, iam non est opus figuris illis, quæ in signū rei futuræ præcesserūt, & in spe tantū illius venerabiles æstimantur, ne si & figuræ illæ adhuc perseverarēt adhuc expectaretur futurū quod iam est præteritū: & Iudæi de sua adhuc vorustate gloriantes nostrę insultarent nouitati, & amplius de operibus ipsis quàm de fide Christi nonnulli confiderent, quam sine operibus minime sufficere crederēt. Notandum verò quod cum iuxta similitudinem inductam conuenientiùs dicendum videretur legē nobis fuisse mortuam, quàm nos legi: quia tamen eadem est sententia nil refert siue hoc siue illo modo dicatur. *Vt sitis aliterius.*] .i. Christi, eius tantum obedientiæ atque Euangelicæ doctrinæ præceptis alligati. At ne quis opponeret ipsum quoque Christum iam fuisse mortuum, & sic à iugo eius iam suos absolutos esse, prouidē adiunxit, *qui ex mortuis resurrexit*] idest de inter mortuos propria virtute in vitam se erexit perpetuam, ut spe & desiderio eius gloriæ accensi *fructificemus* non mundo, sed *Deo.*] idest spiritualibus bonis quibus oblectatur Deus potius abundemus quàm mundanis & terrenis, quæ Iudæi semper auidē requirebant: quorum, iuxta literam quā insistent, nulla nisi terrena promissio reperitur: ut ita mundo potius quàm Deo fructificare ex promissione legis dicendi essent. Quodenim Deus illum duræ ceruicis populum ampliùs desiderare nouerat, eis promittebat; ut sic magis eos

qui carnales erant, i. carnalibus potius quàm spiritualibus bonis intenti, ad obedientiam alliceret. Et attende quòd cū ad hoc quod promisit, *ut sitis alterius qui ex mortuis resurrexit*, adiunxit *ut fructificemus Deo*; non ait *ut fructificetis*, sed *ut vos & nos pariter*. i. omnes fructificemus, siue prædicando siue obediendo.

Cum enim essemus.] Dixi *ut sitis alterius discipuli* scilicet & imitatores quàm hucusque fuistis, *ut fructificetis Deo*. i. *ut sitis spirituales per desiderium potius quàm carnales*, sicut olim fuistis temporalem legis promissionem sequentes. Et merito sic monet, quia tunc per illam legis promissionem vos carnalium desideriorum amatores nequaquam spirituales Deo fructum reddere poteratis, sed morti potius. i. mortalem & damnabilem habebatis fructū magis ac magis semper per concupiscentiā terrenis adhærentes: iuxta quod scriptū est,

Crescentem sequitur cura pecuniam,

Et alibi.

Crescit amor nummi quantum ipsa pecunia crescit.

Sic lege, *Cum essemus in carne*. i. carnalibus, non spiritualibus desiderijs inhiantes, passionibus peccatorum. i. concupiscentiæ diuersæ nos peccare facientes, *ut sit quasi intransitiuè dictum, passionibus peccatorum*. i. quæ peccata erant, sicut dicitur *Creatura salis*, vel substantia aut corpus lapidis, id est creatura quæ est sal, vel substantia aut corpus quod est lapis. Quæ quidem passionibus, *erant per legem*.] laudantem scilicet atque pollicentem eorum quæ multum desiderabant magnam abundantiam, terram videlicet optimam lacte & melle manantem, & pacem & prosperitatem in ea maximam, & vitam longævam, & quicquid ad terrenam pertinet felicitatem, quam præcipuè desiderabant. Et quorum quidem laude, promissione, & spe amplius in eorum desiderium accendebantur, quàm si ea minimè sperarent, vel tanta esse didicissent. A quibus enim ideò desperamus, non multum aut diu eorū desiderio tenemur. *Operabantur in membris nostris, ut fructificarent morti*.] hoc est damnationis mortalem nobis acquirebant exitum. Concupiscentiæ operantur in membris, quando conceptum mente desiderium per aliquod membrum opere implemus, ut per genitalia libidinem, per manus furtum aut rapinam. Nunc autem absoluti sumus ab obedientia illa legis, quæ pro remuneratione, ut dictum est, tempo-

ralium impendebatur. *Ita ut iam seruiamus Deo.*] mente potius quàm opere spiritualiter illas legis figuras magis quàm corporaliter adimplentes, sicut alibi dicitur : Littera enim occidit, spiritus autem viuificat. *In nouitate spiritus.*] .i. in spiritualibus desiderijs & intelligentia, quæ ante non erant, & non in vetustate litteræ .i. in antiquis operibus quæ iuxta litteram tantum fiebant, sicut erat carnalis circuncisio, observatio Sabbati, sacrificia & alia innumera.

QVÆRIT fortassis aliquis, cur etiam promissionem Quæstio.
 æternæ vitæ lex non habuerit, ut non solum terrenorum, verum & cœlestium donorum desiderijs amplius ad obediendū populus alliceretur, sed quia imperfecta habuit præcepta, sicut alibi idem Apostolus commemorat, dicens quòd *lex ad perfectū nihil adduxit.* Et Veritas per semetipsam, *Audistis quia dictū est antiquus, &c.* Et, *nisi abundauerit iustitia vestra, &c.* Nō potuit eius esse remuneratio perfecta, nec terrenis desiderijs cœlestia cōpetebant, neq; Deo aliquis tā pro terrenis quàm pro cœlestibus seruiens aptus esse potest. Vnde Veritas per semetipsam admonet dicēs, *Nescias sinistra tua quid faciat dextera tua.* .i. ne admisceas in aliquo tuo opere terrenam intentionem cœlesti, ut simul pro transitorijs & æternis bonis obedias Deo. Sed fortasse dum propositæ quæstionis nodos soluere cupimus, maiores ex ipsa solutione incurrimus. Cū enim in lege de dilectione & Dei & proximi præceptum sit, & hæc duo præcepta sufficiant ad vitam : Vnde & Dominus diuiti quærenti quid faciēdo vitam æternam possideret, respondit ut hæc duo præcepta seruaret & sufficerent, & Paulus ipse plenitudinem legis esse dilectionem profitetur ; Mirabile videtur quòd lex ad perfectionem nihil duxerit, & quòd ipsa non suffecerit ad vitam, ut merito propter hoc Evangelica deberet abundare iustitia. Reuera quia præcepta legis siue de dilectione siue de alijs ad perfectum non duxerint, id est ad salutem sufficere non poterant : sed necesse erat ut veniret Christus, qui est finis & consummatio legis, cū videlicet sine ipso in lege promisso lex adimpleri nullatenus valeret. Sed & si diligenter verba legis scrutemur, nusquam lex nomen proximi nisi ad homines eius populi .i. Iudaici extendit, nec vsquam apud nos in tota lege Moyse scriptum reperitur, *diliges proximum*, sed, *diliges amicum tuum.*

Quod quidem & Dominus ipse diligenter attendens, cū ei mandata legis diues interrogatus recitaret, & diceret: *Diliges proximum tuum sicut teipsum*, proximum pro amico vel benefactore poni ex adiuncta parabola patenter insinuauit: ostendens ex ipso diuitis iudicio eum tantum qui misericordiam impenderat illi qui inciderat in latrones, proximum eius extitisse. Ac per hoc manifestum est cū dilectio proximi ad amicum tantum secundum litteram legis accommodetur, nequaquam præceptum dilectionis, quod in lege est, perfectum esse sicut est Euangelij, in quo præcipimur & inimicos diligere, atque eis quoque benefacere, ut simus perfecti sicut Pater cœlestis, qui solem suum facit oriri super bonos & malos. Quod quidem ipse Apostolus attendens, non ait, *qui diligit proximum*, iustitiam vel Euangelium adimplet: Sed, *legem adimplet*.

At verò rursus grauem quæstionis nodum incurrimus, quod diuiti interroganti quid faciendo vitam æternam possideret, & ab ipso postea recitatis duobus de dilectione Dei & proximi mandatis, respondit ei dicens: *Hoc fac, & uiues*, præsertim cū ipse alibi dicat. *Si enim diligitis eos qui vos diligunt, quam mercedem habebitis?* Sed perfectò nemo melius vel proximus vel amicus intelligendus erat, quàm is quem designabat Samaritanus ille, qui misericordiam vulnerato impenderat. i. Christus qui perfectò proximus erat Iudæis tam cognatione quàm veræ caritatis affectu, vel beneficijs innumeris, siue scilicet prædicando, siue miracula faciendo. Si ergo diues ille omnem tunc proximum siue amicum diligeret, utique per Christum. Et sic ei & præceptis eius coherendo vitam utique meretur æternam. Nec tamen ided præceptum de dilectione proximi & amici vel benefactoris, quod lex dederat, perfectum extiterat, cū nequaquam omnem hominem comprehenderet, tam amicum scilicet quàm inimicum, licet etiam in tempore Christi videretur, immo per ipsum Christum qui iam aduenerat, & proximus ut dictum est factus fuerat: perfectionem autem tunc haberet mandatum siue lex, si ex se ita sufficeret ut nihil vnquam ad integritatem iustitiæ deesset obedientibus sibi, nec opus esset aliud adiungi. Quod nequaquam verum est, cū ante aduentum Christi, illorum qui tunc erant proximorum & amicorū dilectio

imperfecta esset, nec usque ad inimicos extenderetur, sicut postea per Christum extensa est. Quod verò supradiximus proximum in lege secundum litteram non omnem hominē accipi, non solum ex ipsa lege, verum etiam ex nonnullis Ecclesiasticorum doctorū testimonijs astrui potest. Vnde Ambros. super Epistolam Pauli ad Romanos, vbi dictum est, *Nemini quicquam debeatis, &c.* Pacem vult, inquit, nos habere, fieri si potest, cum omnibus; dilectionem verò cum fratribus. Et hoc erit nulli quicquam debere, vnicuique pro loco suo officium exhibere. Item infra. Dilectio proximi malum non operatur. Malum non operatur, quia bona est dilectio, nec peccari potest per illam, quæ legis perfectio est. Sed quia tēpore Christi addi aliquid oportuit, non solum proximos, sed etiam inimicos diligere præceptū est. Vnde plenitudo legis dilectio est, vt iustitia sit diligere proximum, abundans vero & perfecta iustitia etiam inimicos diligere. Hæc cœlestis iustitia est, hæc Deo Patri similes facit, qui & non colentibus se annua dona largitur. Nec nos latet plurimos Sanctorum Patrum in ipso de dilectione proximi mandato omnem hominem proximum intelligere, atque id verisimilibus confirmare rationibus. Vnde August. de doctr. Christ. lib. 1. vtrum ad illa duo præcepta & dilectio Angelorum pertineat quæri potest. Nam quod nullum hominum exceperit qui præcepit vt proximum diligamus, & Dominus ostendit, & Paulus Apostolus. Item duo præcepta protulerat, atque in eis pendere totam legem & Prophetas dixerat. Item Dominus ait, *Vade & fac similiter*, vt videlicet eum esse proximum intelligamus, cui vel exhibendum est officium misericordiæ si indiget, vel exhibendum si indigeret. Ex quò est iam consequens, vt & ille à quo nobis vicissim exhibendum est, proximus sit noster. Proximi enim nomen ad aliquid est. Nec quisquam esse proximus nisi proximo potest. Item Paulus dicit. *Nam non adulterabis, non homicidium facies, non furtum facies, non concupisces*, & si quod est aliud mandatum, in hoc sermone recapitulatur, *Diliges proximum tuum tanquam teipsum*. Itē: Quisquis ergo arbitratur non de omni homine Apostolum præcepisse, cogitur fateri quòd scelestissimum est visum fuisse Apostolo non esse peccatum. Si quis aut non Christiani aut inimici adulterauerit uxorem, &c. Item, iam verò si vel cui

præbendum, vel à quo à nobis præbendum officium misericordiae, rectè proximus dicitur; manifestum est hoc præceptum, quo iubemur diligere proximum, & sanctos Angelos contineri, à quibus misericordiae impenduntur officia. Hæc quidem diligentissimi doctoris nostri Augustini verba, omninò convincere videntur proximum in lege omnem hominē intelligendum. Alioquin per proximi dilectionem nequaquam impleri lex videretur, quæ etiam de alienigenis multa præcipit, quorum offensio sicut & proximorum vitanda est. Sed cum duo dilectionis sint rami, dilectio scilicet Dei, cuius Veritas ipsa primum & maximum dicit esse mandatum, & dilectio proximi, quando per dilectionem proximi lex impletur, nisi hæc dilectio illam quoque complectatur: cum nemo rectiùs nobis proximus vel amicus sit intelligendus quàm ipse conditor noster & redemptor, à quo tam nos ipsos quàm omnia bona habemus, sicut ipse Apostolus commemorat dicens: *Quid autem habes quod non accepisti?* De cuius quidē circa nos ineffabili caritate alibi dicit: *Commendat autem suam caritatem Deus in nobis, quoniam sic cum adhuc peccatores essemus, Christus pro nobis mortuus est.* Item rursum, *Proprio filio suo non pepercit, sed pro nobis omnibus tradidit illum.* Et per semetipsum Filius ait: *Maiorem caritatem nemo habet ut animam suam, &c.* Unde hunc spiritualiter proximum in hoc dilectionis mandato Origenes intelligens, in sequentibus huius Epistolæ ait. Si diligentius requiras quis sit proximus noster, discas in Evangelio illum esse, qui iacentes nos inclinatos ad stabulum Ecclesiæ detulit, & stabulario Paulo, vel ei qui Ecclesiæ præest duos denarios veteris ac novi Testamenti ad nostræ curæ concessit expensas. Hunc proximum si diligamus, legem implemus. Finis enim legis Christus. Cum itaque proximi nomen etiam Deum, & maximè ipsum comprehendat (neque enim aliter dilectio proximi impleret legem) constat profectò per ipsam quoque, sicut & per dilectionem Dei, legem impleri, quia qui Deo verè per dilectionem cohæret, nullum eius præceptum contemnit sicut scriptum est, *si quis diligit me, sermonem meum servabit.* Quomodo etiam vera potest esse dilectio, quæ caritas dicitur, nisi ad Dominum referatur. Et ipse August. de doct. Christ. lib. quarto, caritatem voco motum animi ad fruendum Deo propter Deum. Idem lib. de moribus Ec-

clisæ contra Manichæos, scriptum est quia *propter te affici-
mur tota die*. Caritas non potuit signari expressius quàm quod
dictum est *propter te*. Quisquis ergo caritate Deo cohæret, qua
scilicet sola discernuntur filij Dei à filiis diaboli, atque ideo
eius satagit obtemperare præceptis, implere studet tã ea quæ
pertinent ad alienos quàm quæ attinent ad proximos, & in
vtrisque pariter diuinam sequi voluntatem nititur. Nihil
ergo refert vt salua reuerentia patrum seu fratrum loquamur
& longè à perfectione Euangelij legem absistere fateamur,
omnemque insuper tam Apostolicam quam Euangelicam
authoritatem conseruemus. Nihil, inquam, refert siue pro-
ximum in lege omnem hominem intelligamus, siue minimè:
dummodo, vt dictum est, in proximo cõprehendatur Deus,
& dilectionem quoque Dei dilectio includat proximi. Quip-
pe cùm dicitur, *diliges proximum tuum*, atque additur *sicut te-
ipsum*, quomodo implere id possemus, nisi & nos ipsos dilige-
remus? Quomodo autem diligere vel nos ipsos possumus, si
mandata Dei contemnentes iniquè agamus? Qui enim dili-
git iniquitatem, odit animam suam.

Q V I D ergo dicemus? *lex peccatum est?*] Continuatio. Dixi
passiones peccatorum per legem olim operari, vt utile etiam
nobis esset à lege absolui quasi à peccato. Quid ergo dice-
mus, idest quid de lege sentiendum est, quam bonam puta-
bamus? nunquid iam ipsa non videtur potius mala dicenda
esse quàm bona? Et hoc est quod quasi sibi met obijciendo ait:
Nunquid lex peccatum est .i. ad damnationem potius quàm ad
salutem pertrahens, vt videlicet damnationem potius quàm
salutem nobis promereatur, & solummodo nocere, non iu-
uare queat, & in se nihil boni habeat magis quàm peccatum?
Absit.] vt hoc videlicet credamus. *Sed peccatum.*] .i. immò
potius peccato contraria est, ipsum penitus docendo & pro-
hibendo vt caueatur, ita vt non solummodo facta, verum
etiam concupiscentias inhibeat, sicut & Euangelium: sed
longe minus, cùm ipsa videlicet ad ea tantum quæ proximi
sunt, eas restringat, dicens: *Non concupisces rem proximi tui, nec
desiderabis quæ illius sunt*. Quare autem necesse esset pecca-
tum doceri à lege prætermittit, dicens quia ante documentũ
legis, in quo præcipuè peccabatur, ignorabatur: in corde vi-
delicet magis quàm in opere. Et hoc est quod de se dicit in

perſona generali hominum , quorum iam per transgreſſionem priorum parentum obtenebrata tunc erat , vt potius opera quàm deſideria culparent , peccatum non cognoui .i. diſcretionem ad veram notitiam peccati non habui , niſi per documentum legis ; quia id in quo tantummodo videlicet vel maximè peccatur .i. concupiſcentiam peccatū eſſe ignorabam. Et hoc eſt quod ſupponit, *Nam concupiſcentiam.*] .i. prauum animi deſiderium, in ambitione ſcilicet terrenarum vel carnalium voluptatum nesciebam eſſe, videlicet quod ipſa eſſet peccatum , niſi lex id docendo diceret : *Non concupiſces* .i. non interdiceret concupiſcentiam, licet non generaliter , ſed de rebus , vt dictum eſt, proximi. Nota quòd cùm dicitur : *Non concupiſces*, ſimul & docetur peccatum , & prohibetur vt vitetur. Vnde legem penitus bonam eſſe conuincit, quia quicquid ſuum eſt bonum, ſiue in docendo ſcilicet ſiue in prohibendo, nec vitio legis , ſed hominum eſt imputandum, ſi peccatum poſt legem abundauit, & deteriores & inexcusabiliores effecti ſumus poſt doctrinam præceptorū & negligentiam eorum , quàm ante ; ſecundum quod ſcriptum eſt. *Seruus ſciens, & non faciens voluntatem Domini ſui, vapulabit multis.* Item : *Melius eſt non cognoscere viam veritatis, quàm poſt agnitam retrò abire.* Benè itaque dictum eſt, *Absit, vt lex peccatum ſit* .i. inutilis & mala ex ſe , ſed tamen occasione peccati quod ante non erat ex ipſa accepimus, ſicut ex nonnullis bonis quæ Deus erat, ſæpè concupiſcentiam incurrimus ſi his careamus : vel ſuperbiam, ſi ipſa habeamus. Non tamen ideo mala ſunt ipſa dicenda, ſi malè ipſa deſideremus, vel male ipſis vtamur. Sic lege, *peccatum.*] .i. pœna & afflictio huius vitæ temporalis, quam ex culpa priorum parentum ſuſtinemus, operata eſt in nobis omnem *Concupiſcentiam.*] quorumlibet ſcilicet terrenorum bonorum, vt per eorum videlicet abundantiam omnem præſentium ærumnarum euitemus anxietatem. Et quomodo id operata ſit demonſtrat dicens.

ACCEPTA occasione per mandatum.] .i. per legis obedientiam hæc terrena bona promittentis. Quod enim lex propter obedientiam ſui hoc promittebat, non videbamus peccare, quantumcumque illa cōcupiſceremus, ſi requiſitam obedientiam impenderemus. Hoc autem quod hoc loco peccatū nominat,

nominat, ipsum fomitem & nutrimentum peccati esse insinuat, de quo nobis in præcedenti libello, cum de originali peccato ageremus, non est prætermisum. *Sine lege enim.*] .i. antequam lex præcepta & promissiones auferret, peccatum illud .i. fomes ille ut dictum est peccati, etsi tunc etiam erat quia minores habebat vires ad exluscitandam concupiscentiam, quam postea. Quo enim certius id quod desideramus expectamus, amplius in eius concupiscentiam accendimur, sicut supra meminimus. *Ego autem vinebam aliquando.*] .i. aliquo modo, si non ex toto, morte illius fomitis carebam, & quasi sine concupiscentia eram ad comparisonem subsecute post legem concupiscentiæ. *Sed cum venisset mandatum.*] lege data, *reuixit peccatum.*] .i. post præceptum inualuit concupiscentia, vel reuixit in prole quod præcessit in parente, idest concupiscentia ita est nobis post præceptum excitata, sicut in primis parentibus post præceptum inchoata; præsertim cum sæpe etiam ardentius desideretur quod prohibetur, iuxta illud poeticum,

Nititur in vetitum semper, cupimusque negata.

Ego autem mortuus sum.] Qui prius quasi infirmus, non mortuus eram, & quasi corrigendus, non damnandus; flagellandus, non occidendus, minore merito si qua erat concupiscentia stimulatus. *Et inuentum est mihi.*] .i. occasione legis, ut dictum est, ex qua melior esse debui, factus sum longè deterior, & vnde vitare peccatum debui, amplius incurri. Et hoc est quod subiungit: *Nam peccatum accepta occasione.*] .i. inuenta causa incitandi nos ad concupiscentiam per mandatum, idest legem, de cuius obedientia nimium præsumebamus, *seduxit me*] .i. fefellit reputans me scilicet singulariter Deo carum esse, propter obedientiam legis quam ei exhibebam; ut vix aut nunquam de damnatione mea vererer quicquid facerem, & maxime concupiscentiam promissorum quantacumque esset non arbitrans esse damnabilem, cum præceptis obediremus, pro quorum obedientia illa erant promissa. *Et per illud me occidit.*] .i. damnauit. *Itaque lex quidem.*] Quandoquidem lex ad cognitionem peccati, & ad vitam data est potius quam ad mortem: ergo lex quidem sancta est .i. in nullo vitiosa siue culpabilis, & mandatum eius sanctum, nihil iubens atque prohibens, nisi quod oportet, atque ideo iustum in se & bo-

num, idest vtile ac salubre obedientibus.

QVOD ergo bonum est.] Duo dixit, scilicet & mandatum eius bonum, & per illud tamen accepta occasione se esse occisum. Vnde quasi rationabiliter obijciens quærit ergo quod bonum est in seipso, videlicet præceptum factum est mihi mors .i. damnatio. *Absit.*] Nulli enim debet dici damnabile præceptum, nisi cuius obedientia damnosa est, sicut fuit præceptum diaboli ad Euam. *Sed peccatum.*] Dixi quia mandatum bonum est, nec mihi nec alicui mors .i. damnabile dicendum est, sed tamen ipsum causa quodammodo mihi damnationis factum est, ex ipso vt dictum est occasione concupiscentiæ accepta, iuxta illud Historiographi: *Omnia enim mala orta sunt ex bonis inijs.* Sic lege. *Sed peccatum.* .i. fomes ille, vt diximus, peccati; *per bonum*, subaudi mandatum legis, siue per legem ipsam vt supra monstrauius, *operatum est mortem animæ* .i. omnem concupiscentiam, ita vt *appareat peccatum*] idest culpa illa concupiscentiæ sit manifesta, & inexcusabilis, & ita vt sit maxima. Et statim quòd maxima sit ostendit, dicens: *vt peccatum.* .i. fomes ille supradictus peccati, *fiat peccans supra modum.* .i. ad peccandum nos maximè inclinans, *per mandatum.* .i. occasione accepta, vt dictum est, ex lege.

Quæstio.

FORTE quærat aliquis, quomodo mandatum legis, seu ipsa lex bonum dicatur, vel ad vitam datam: vel quare etiam Deo datum, si saluare obedientes non poterat? Ad quod respondemus, legem in hoc esse datam ad vitam, vt etiam populo Dei vitæ æternæ meritum iniciaret, non perficeret: & idè bona tantummodo, quia omnia eius, vt dictum est, iusta sunt præcepta, etiam secundum litteram si non perfecta, & causas habent rationabiles quæcunque Dominus præcepit, etsi ea ignoremus. Fuit autem magnæ dispensatio prouidentiae, rudi adhuc penitus & indisciplinato populo ac duræ cervicis semper atque rebelli inchoationis aliqua, nō perfectionis dare mandata: vt saltem in aliquo addiscerent obedire qui nullam adhuc, aut penè nullam expertus fuerat obediētiā, vt Poeta meminit.

Est quoddam prodire tenus, si non datur vltra.

Nec nos cū iumenta domamus, magna eis onera primū imponimus, sed in paruis eorum primitus excitatam insolentiam ad magna perferenda paulatim conducimus. Credimus tamen eos omnes qui imperfectioni mādatorum amore Dei

potius quàm timore obtemperabant, ante diem sui exitus, quod de perfectione ei per ignorantiam deerat, quod lex tacuerat, vel per spiritualem aliquem doctorem, vel per internam diuinæ gratiæ inspirationem ei reuelari. Multos quippe homines spirituales, atque iam per inspirationem doctrina Euangelicæ predicationis instructos prior ille populus, qui etiam habuit inimicorum quoque dilectionem, non solum scriptis, verùm etiam factis plurimum docuerunt. Vnde Psalmista; *Si reddidi, inquit, retribuētibus mihi mala, &c.* Et iterum, *Cum his qui oderant pacem eram pacificus.* Qui etiam si inimicum suum Saulem sibi à Domino in manus traditum non solum non occidit, sed etiam occisum grauitè planxit, & cum qui se eius occisorem professus est morte statim puniuit. Salomon quoque beneficentiam in inimicos commendans ait, *Si esurierit inimicus tuus, ciba illum, &c.* Longe tamen à perfectione Euangelica tam legis quàm Prophetarum dicta disiuncta sunt. Ad quam quidem perfectionē discipulos adhortans Veritas dicebat. *Mandatum nouum do vobis, ut diligatis inimicos vestros, sicut dilexi vos.* Hæc est illa vera & sincera dilectio, quā Apostolus describens ait: *Non querit quæ sua sunt, Omnia suffert, omnia credit, omnia sperat, omnia sustinet;* vt etiam pro fratribus animam parata sit ponere, nec sua tantum illis, sed seipsam impendere. Ac si diligenter attendamus quod ait Veritas, *sicut dilexi vos*, & Apostolus, *Caritas non querit quæ sua sunt*, reuera inueniemus Euangelicū de dilectione proximi mandatum singulare ac nouum. Tam sincera enim circa nos Christi dilectio extitit, vt non solum pro nobis moreretur, verùm etiam in omnibus, quæ pro nobis egerit, nullum suum commodum vel temporale vel æternum, sed nostrum quæreret; nec vlla propriæ remunerationis intentione, sed totum nostræ salutis desiderio egit. Reuera hæc vera & sincera dilectio, quam diligenter attendens Apostolus tam scripto nobis quàm exemplo commendans, ait: *Sicut & ego per omnia omnibus placeo, non querens quod mihi utile est, sed quod multis, vt salui fiant.* Certus tamen debet esse qui sic agit, de amplissima tantæ dilectionis remuneratione: nec tamen hac intentione hic agit, si perfectè diligit. Alioquin sua quæreret, & quasi mercenarius, licet in spiritualibus esset. Nec iam est caritas dicenda, si propter nos eum .i. pro

nostra utilitate, & pro regni eius felicitate, quam ab eo speramus, diligere potius quam propter ipsum: in nobis videlicet nostræ intentionis finem, non in Christo statuentes. Tales profecto homines fortunæ potius dicendi sunt amici quam homines, & per avaritiam magis quam per gratiā subiecti. Quod quidem diligenter B. attendens August. in lib. quæst. 73. cap. 37. Nihil aliud, inquit, est amare quam propter semetipsam aliquam rem appetere. Rursus idem id quod scriptum est exponēs, *Voluntariē sacrificabo tibi, & confitebor nomini tuo quoniam bonum est.* Quid offeram, inquit, nisi quod ait, *sacrificium laudis honorificabis?* Cur voluntariē? Quia gratis amo quod laudo, gratuitum sit quod amatur & quod laudatur. Quid est gratuitum? ipse propter se, non propter aliud. Si enim laudas Deum, quod tibi det aliquid, iam non gratis amas Deum. Erubescere, si te vxor tua propter diuitias amaret, & forte tibi paupertas accideret, de adulterio cogitaret. Cū ergo te à coniuge gratis amari vis, tu Dominum propter aliud amabis? Quod præmiū accepturus es, o avarus? Non tibi terrā, sed seipsum seruat qui fecit cælum & terram. *Voluntariē sacrificabo tibi.* Noli ex necessitate. Si enim propter aliud laudas, ex necessitate laudas. Si adesset tibi quod amas, non laudares. Item contemne omnia, ipsum attende: & hæc quæ dedit, propter dantem bona sunt. Item ipsum gratis dilige, quia melius ab eo non inuenis quid det quam seipsum: aut si inuenis melius, hoc pete voluntariē quod gratis. Quoniam bonū est nihil aliud nisi quod bonum est. Ex his itaque B. Augustini verbis aperte declaratur, quæ sit vera in aliquem ac sincera dilectio, ipsum videlicet propter sua diligi. Denique si Deum quia me diligit diligam, & non potius quia quicquid mihi faciat, talis ipse est qui super omnia diligendus est, dicitur in me illa Veritatis sententia: *Si enim eos diligitis qui vos diligunt, quam mercedem habebitis?* Nullam profecto mercedem iustitiæ, quia non æquitatem rei dilectæ, sed utilitatem meā attendo. Et æquē alium plus diligere, si æquē mihi vel amplius prodesset; immodò nec eum iam diligere, si in eo utilitatem meam non sperare. Vnde quamplures & penè omnes in tam reprobū sensum deuoluti sunt, ut planè fateantur se nullatenus venerari Deum siue diligere, si eum sibi minime profecturum crederent: cū tamen ipse non minus di-

ligendus esset, si cum puniret, cum id non nisi iuste faceret, & eius praeuenientibus meritis, vel aliqua causa rationabili, quae hoc ipso quod iusta esset omnibus placere deberet. Denique quis aliquem dignum gratia censeat, quem non sibi gratis, sed cupiditate retributionis deseruire nouerit? Si pro hoc seruitio gratiae cuiquam rei sunt referendae, magis rebus nostris, pro quibus nobis seruitia; quam ijs qui deseruiunt exhibendae sunt. Veluti cum mihi mercenarius, quem conduxim, pro multa mercede multum deseruit ac proficit, aut cum mihi aliquis amore alterius, non mei ipsius mihi famulatur. Sed quae est gratia referenda ijs, pro quibus id fit, non eis qui faciunt est reddenda. At fortasse dicis, quoniam Deus seipso nos non alia re est remuneraturus, & seipsum, quo nihil maius est, ut B. quoque meminit August. nobis est daturus. Unde cum ei deseruis pro eo quod expectas ab eo .i. pro aeterna beatitudine tibi promissa, utique propter ipsum id pure ac sincere agis, & pro illa qua debes remuneratione, sicut ipsemet admonet, dicens beatos illos qui seipsos propter regnum caelorum castrauerunt. Et Psalmista, *Inclinaui, inquit, cor meum ad faciendas iustificationes tuas propter retributionem.* Ac tunc profecto Deum pure ac sincere propter se diligeremus, si pro se id tantummodo, non pro nostra utilitate faceremus: nec qualia nobis donat, sed in se qualis ipse sit attenderemus. Si autem eum tantum in causa dilectionis poneremus, profecto quicquid ageret vel in nos vel in alios, quoniam non nisi id optime faceret, cum ut dictum est aequè diligeremus, quia semper in eo nostrae dilectionis integre causam inueniremus, qui integre semper & eodem modo bonus in se & amore dignus perseuerat. Talis est verus paternae dilectionis affectus in filium, vel castae uxoris in virum, cum eos etiam sibi inutiles magis diligunt, quam quoscunque utiliores magis habere possent; nec si qua propter eos incommoda sustinent, potest amor minui: quoniam amoris integra causa substitit in ipsis quos diligunt, dum eos habent non in commodis suis quae per eos habeant. Quod bene in consolatione Iuliae uxoris Corneliae Pompeius victus & profuga commemorans ait; *Quod desles id amasti.* Saepè etiam qui liberalis sunt animi homines, etiam magis honestatem quam utilitatem sequuntur. Si qui forte sui consimiles viderint, à quibus tamè nihil emo-

lumentis sperent, maioris eos dilectionis amplectuntur affectu, quàm proprios seruos à quibus quotidiana suscipiunt cōmoda. Vtinam & in Dominum tam sincerum haberemus affectum, vt secundum quod bonus est in se magis, quàm secundum quod nobis vtilis est, eum diligeremus, & ei quod suū est nostra integrè iustitia seruaret, vt quia videlicet summè est bonus, summè ab omnibus diligeretur. Quòd autem fidelis anima supradixit in Psal. se inclinatham ad bona opera fuisse propter retributionem, inchoationem bonæ operationis, non perfectionem ostendit. Quisque etiam imperfectus primò ad bene operandum .i. ad præcepta Dei implenda spe retributionis allicitur, & timore potius quàm amore, sicut scriptum est, *Initium sapientiæ timor Domini*. Cuius quidem caritas est consummatio, siue finis .i. perfectio, sicut alibi dicitur: *Omnis consummationis vidi finem, latum mandatum tuum nimis*. Benè, inquam, dixit, *inclinavi* .i. in initio suæ operationis, spe & desiderio retributionis id aggressus est. Quòd vero eos Veritas laudat beatos, qui se castrauerunt propter regnum cœlorum .i. continenter vixerunt propter beatitudinē æternam; ita intelligendum puto, quòd hi per continentiam illam sunt assecuti, sicuti cū de aliquo dicimus eum exisse vt moreretur .i. exisse, & ideò mortem consecutum esse nō hac intentione vt ei accideret.

S C I M V S enim.] Probat quod dixerat, legem videlicet Moyse bonam esse, licet occasionem inde in peccatum acceperit: quia videlicet est spiritualis lex, non secularis, tanquā digito Dei scripta .i. Spiritu sancto dictate composita & data, non ab hominibus inuenta. *Ego autem carnalis sum.* } .i. carnalibus voluntatibus & terrenis inhians desideriis, atque adeo carnalis sum, *vt sim venundatus sub peccato.*] .i. sponte me peccato & eius seruituti subijciens pretio terrenorum bonorum .i. exercens omnem concupiscentiam propter illa acquirenda & obtinenda, vel etiam in primis parentibus venundatus cum ipsis sub peccato, ob dilectionem scilicet & gustū pomi quod Eva concupiuit. Ecce vnde facti sumus captiui, vendere non potuimus, redimere non possumus. Sanguis innocens datus est pro nobis, nec nostris nos viribus à dominio peccati liberari possumus, sed gratia Redemptoris. *Quod enim operor.*] Quantum carnalis & infirmus sit factus, & quanto

prauæ consuetudinis iugo depressus ostendit, dicens se committere scienter malum ipsum quod non vult, quasi si aliquis cogente Domino id quod non vult operetur. Et hoc est quod *non operor*, non intelligo esse operandum .i. non credo ut fieri debeat, immò indubitanter scio esse malum, & ideo non esse faciendum. *Non enim quod.*] Probat se malè agere contra propriam conscientiam, quia etiam quod bonum esse regnoscit dimittit, & quod non dubitat esse malum facit. Et hoc est quod dicit, *si ago.*] .i. non facio bonum, *quod volo.*] .i. quod approbo debere fieri, & cui per rationem consentio. *Sed malum quod odi.*] .i. quod ut dictum est non volo, sed non rationis iudicio reprobato atque damno. *Si autem.*] Redit ad commendationem legis, ut ex nostro quoque iudicio eam bonam esse conuincat, quia id videlicet prohibet quod nos per rationem esse malum deprehendimus, sicut est concupiscentia, cum ait, *non concupisces.* Et hoc est, *si facio quod nolo.* .i. quod non approbo, consentio & concordo legi de hoc quod bona est, cum eam videlicet ea prohibere video, quæ ego ipse mala esse iudico: sicut concupiscentia, de qua superius dixit, siue ira, odium, inuidia. Quod etiam nolentes habemus, quia profecto concupiscere nollemus, licet quod concupiscimus volentes & cum dilectione peragamus.

CUM itaque dicitur, *Omne peccatum voluntarium*, & cum dicitur, *Nemo peccat inuitus*, de actu hoc peccati, non de concupiscentia est intelligendum. Omnis quippe actus peccati voluntarius potius quam necessarius dicitur, quia ex voluntate quacunque præeunte tempore descendit, siue per aliquam fiat coactionem. v. g. iacit aliquis lapidem improvidè, & fortuitu, non scienter hominem interfecit: hoc profecto ex voluntate iaciendi lapidem, non interficiendi hominem procedit. Est & alius qui irrudentem super se hostem coactus interficit, ne ab eo scilicet interficiatur, & peccare inuitus dicitur, cum id quoque ex voluntate euadendi mortem potius quam ex desiderio antea habito occidendi hominem agat. Omnis itaque actus peccandi voluntarius & non necessarius in eo dicitur, qui ex quacunque ut dictum est voluntate descendit. Si quis tamen dicat occasionem illam hominis per iactum lapidis voluntariam, non concedo, sicut iactum lapidis voluntarium dico. Frequenter enim nomina ex ad-

Determina-
tiones que-
dam.

iunctis suas variant significationes, ut cum omnem substantiam concedamus, non tamen idem omnem hominem: ita & cum omne peccatum dicamus voluntarium, & omnem peccati actum ex aliqua ut dictum est voluntate procedere; non tamen occasionem illam concedimus voluntariam .i. ex voluntate quam aliquis haberet occidendi illum esse commissam. Hoc itaque modo cum coacti peccata committimus, simul & quod volumus & quod nolumus efficimus, ut supraposito exemplo dum coacti hominem occidimus, mortem per hoc evitamus quod volumus, & homicidium facimus quod nolumus. Sic & in coitu vxoris alterius ipse nobis placet concubitus, non adulterij offensa, vel reatus quem incurrimus. Coitu itaque tantum, non adulterio delectamur, quia nihil ad voluptatem adulterij reatus pertinet, sed magis ad conscientiae tormentum. Et quominus peccaremus atque adulterium vitaremus, eam cum qua fornicamur nequaquam coniugatam esse vellemus. Cum itaque dicitur, *non quod ago, sed quod nolo*, nihil obest si nolle & velle proprio & usitato modo sumamus pro placere & displicere; quia frequenter, ut dictum est, in eodem actu & quod placet & displicet inuenimus, sicut in ipso coitu carnalis voluptatis & adulterij culpa. Possumus & iuxta superiorem velle & nolle pro approbare & improbare accipere, quando & Deus nonnulla velle & nolle dicitur. Neque enim in eo potest esse commotio animi, quae in nobis voluntas seu voluptas .i. delectatio dicitur: sed est cum velle aliquid dicimus, aut eius approbationem aut dispositionem significamus. Alioqui cum dicit Veritas: *Quotiens volui congregare filios tuos, & noluisti*, vel Apostolus, *Qui vult*, inquit, *omnes saluos fieri, & neminem perire*: & rursus Psalmista, *Quaecunque voluit fecit*, vel idem Apostolus, *Voluntati enim eius quis resistit?* maximam incurreremus controuersiam. In superioribus itaque duobus locis velle Dei approbare dicitur, ut id videlicet quod approbat seu consulit ut fiat, & quod si factum sit tanquam sibi placitum remunerat, velle dicatur. Reliquis vero duobus inferioribus locis velle eius disponere dicitur, atque apud se stabilire quod facturum est. Quae quidem voluntas nunquam effectu carebit, nec ei ab aliquo resistetur.

N V N C *autem.*] Postquam ita videlicet legi consentio per rationem,

rationem, & à me ipso dissideo per ipsam rationem, & per carnalem concupiscentiam, dum spiritus videlicet aduersus carnem, & caro aduersus spiritum concupiscit. *Iam non ego illud malum operor, sed peccatum.*] .i. praua concupiscentia. Nō dicit simpliciter, *non ego illud operor*, sed ita dicit, *non ego, sed peccatum*: quod est dicere, Non ad hoc ex natura, sed ex vitio naturæ iam ei dominante pertrahor, immò ex natura, per quam rationalis sum à Deo creatus, reluctor concupiscentiæ, & eam damno potius quàm consentio. Cùm dicit, *quod habitas in me peccatum*, & non dicit, quod est in me, quasi aduenientem incolam, non naturalem ciuem ipsum demonstrat, & iam habitaculum in se habentem per diutinam consuetudinem, non transitum. *Scio enim.*] In me iam, vt dictum est, carnali factò peccatum inhabitat .i. assiduè manet, vt iam quasi in habitum sit mihi conuersum. *Quod bonum.*] .i. virtus quæ est optimus animi habitus, iam non manet in me carnali factò, quod significat cùm dicit, *Hoc est in carne mea. Nam velle.*] Probat se virtute destitutum cùm bonum quod vult .i. per rationem faciendum esse approbat, implere per infirmitatem carnalis concupiscentiæ non queat. Perficere bonum, est bonæ voluntati factum adiungere: quod in me, inquit, non inuenio, si bene me circumspiciam, & diligenter discutiam. Velle itaque mihi naturaliter adiacet, quia ex me ipso & propria creatione rationem habeo, per quam bonum faciendum esse approbo, sed ex me illud perficere non habeo, nisi videlicet ex apposita mihi gratia. *Non enim quod.*] ac si diceret, Non inuenio me perficere bonum. *Quod volo*] quia ex contrario illud dimitto, & malū facio, & ita vt supra quoque meminit. Sed *quod nolo illud facio. Non ego operor, &c. Inuenio igitur.*] Quandoquidem lex vt supradictum est cognitionem peccati mihi attulit, per quam quidem cognitionem volo bonum facere, quod ipsa docet; & ei per rationem consentio, licet inde peccatum occasionem acceperit. *Igitur inuenio* .i. per memetipsum propriæ rationis iudicio comperio, legē esse bonā & rem vtilē mihi vel ministrā magni boni, cùm per eius doctrinā boni seu mali discretionē adeptus sim: mihi, inquā, volenti eā facere .i. bonū quod ipsa præcipit implere. In hoc quippe ipso quod id quod præcipit facere volo, & per rationē appetere, reuera recognosco quod bona est, in suis vi-

delicet præceptis. Quare autem dixerit, *volenti potius quam facienti*, supponit dicens, *Quoniam mihi malum adiacet.*] idest graui consuetudinis iugo premor, quæ bonam impedit voluntatem.

CONDELECTOR enim.] Quia dixit se velle facere bonum quod lex præcipit, & tamen non facere, vnde vtrumque accidit exponit dicens, quia se condelectari legi secundum interiorem hominem .i. placere ei quod lex præcipit, & se illud per rationem appetere, quod hoc loco interiorem hominem appellat .i. spirituales & inuisibiles Dei imaginem, in qua factus est homo secundum animam, dum rationalis creatus est, & per hoc cæteris prælatus creaturis. Et rursus dicens se videre aliam legem in membris suis, &c. .i. se cognoscere ipsum peccati fomitem carnis vel concupiscentiæ stimulos, quibus tamquam legi per carnis infirmitatem obedit, in membris corporis sui regnare & sibi dominari, sicut gulositatem in gula, luxuriam in genitalibus, & cætera vitia in cæteris partibus corporis per quas exercentur. Legem illam concupiscentiæ dico repugnantem .i. contrariam, *Legi naturali meæ mentis.*] .i. rationi, quæ me quasi lex regere debet. Per rationem quippe bonum, per concupiscentiam appeto malum. *Et captiuantem me.*] .i. quasi captiuum & nolentem me trahentem, *in legem.*] .i. in obedientiam peccati mente concepti, ut opere illud impleam. Quæ scilicet lex ita me captiuans, & à Deo proprio Domino meo auertens, sicut iam dictum est, *In membris meis.*] Vnde & concupiscentia dicitur oculorum, per quam visa concupiscimus, & similiter dici potest cæterorum membrorum, secundum videlicet sua exercitia in carnalibus voluptatibus. Quod verò repetit, *quæ est in membris meis*, ad exaggerandam & amplius nostræ memoriæ commendandam infirmitatem nostram facit, qui quia quot membra habemus, tot fere in eis hostes iugiter sustinemus & inseparabiliter nobiscum ipsos portamus. Vnde vehementer exterritus querendo exclamat.

INFELIX ego homo.] subaudis reuera sum, qui tot hostibus in ipso corpore modo circumfessus sum, quibus, ut superius dixi, à me ipso sum venundatus & captiuus traditus, nec iam per me ab hac seruitute liberari possum aut redimi. Et quia ita est, *Quis me liberabit.*] .i. quis erit tam potens & tam

benignus mihi, vt me liberet à corpore huius mortis.] .i. ita prono & præparato ad interficiendam animã, ne carnales .i. suggestiones mihi præualeant, & cedat spiritus carni .i. ratio victa succubat & consentiat voluptati. *Gratia Dei.*] .i. non lex, non propriæ vires, non quælibet merita, sed diuina beneficia gratis nobis per Iesum .i. saluatorem mundi collata. Cum autẽ subdit Christum & Dominum nostrum potentiam & iustitiã qua saluare queat, nos ostendit. Christus quippe .i. vnctus, regiã quam habet, potestatem exprimit. Cum verò ait, Dominum nostrum ius quod habet in nobis tanquam seruis suis demonstrat vt nos iustè à dominio peccati siue diaboli possit eruere, & à captiuitate prædicta tanquam suos reducere. *Igitur ego.*] Quandoquidem per rationem, vt dictum est, bonũ quod lex præcipit volo, sed per peccatum quod habitat in carne mea malum operor. *Igitur mente*] .i. ratione seruo legi Dei Dominus videlicet ad obediendum ei per rationem. Sed ego ipse carne .i. carnalis desiderio voluptatis stimulante, *seruo legi peccati.*] .i. prauis concupiscentiæ suggestionibus quasi legi obedio.

N I H I L ergo.] Quia videlicet vt dictum est, gratia Dei per Christum suos liberat, ergo *nil damnationis his qui, &c.*] .i. qui in hoc superædificati sunt fundamento. Quomodo autem hos cognoscere valeamus determinat. *Qui videlicet non ambulat secundum carnem.*] .i. si quando per infirmitatem carnis aliquam labuntur, sicut fecit Petrus mortem timens corpoream, non perseuerant post concupiscentias suas eundo de vitio in vitium. Lex enim dixit quia gratia Dei liberabit eum per Christum, & quomodo id fiat nunc aperit, quia lex spiritus vitæ .i. lex caritatis & diuini amoris potius quàm timoris, sicut erat lex vetus, *in Christo Iesu*] .i. per eum nobis data & exhibita, liberabit me à lege peccati, & ideò mortis .i. à præceptis vel suggestionibus carnalis concupiscentiæ, ne eis scilicet consentiendo obediam. Spiritus vitæ .i. Spiritus sanctus, qui est vita animarum quia amor est, ideò lex huius spiritus lex amoris dicitur filios generans, non seruos constringens .i. Euangelium, quod totum caritate refertum est. Vnde & ad Christũ dicitur, *diffusa est gratia in labijs tuis*, quia tota eius prædicatio caritate plena est. Vnde & Spiritus Apostolos replens scientiã sicut promiserat filius dicens, *Ille vos doce-*

bis omnia. Quæ etiam doctrina significatur, cùm dicitur, *factus est repente de cælo sonus .i. sermo intelligentiæ factus eis per inspirationem in mente, merito in igneis demonstratus est linguis, cùm eorum scilicet linguæ nihil nisi caritatis feruorem essent prædicaturæ.*

NAM quod] Exponit quomodo in Christo sit liberatus à lege peccati. *Nam Deus Pater.*] .i. diuinæ potentie maiestas. *Misit filium suum in similitudinem carnis peccati.*] .i. cõternam sibi sapientiam fecit humiliari vsque ad assumptionem passibilis & mortalis hominis, ita vt per pœnam peccati cui subiacebat, ipse etiam carnem peccati .i. in peccato conceptam habere videretur. *Et de peccato.*] .i. de pœna peccati, quam pro nobis sustinuit in carne .i. in humanitatẽ assumptam non secundũ diuinitatẽ, *damnauit peccatũ.*] .i. pœnam peccati à nobis remouit, qua etiã iusti tenebantur antea, & cælos aperuit. *Per iustificatio legis.*] Nō dicit opera legis, quæ nequaquã iustificãt, sed quod lex præcipit de his quæ ad iustificationẽ attinet, sine quib⁹ iustificare nō possumus, sicut est Dei & proximi caritas; quã lex imperfectã facit, sicut supra monuim⁹: sed per Christũ in nobis perficitur. Et hoc est quod ait, *vt caritas Dei & proximi*, quam lex præcipit, in nobis perfecta nos iustificaret. Ipsum quippe Christum tanquam Deum ipsum proximum verè diligere, summum illud beneficium, quod nobis exhibuit compellit: quod est in nobis peccatum damnare .i. reatum omnem & culpam destruere per caritatem ex hoc summo beneficio. Quod verius, inquit, habetur apud Græcos *pro peccato damnauit peccatum ipse hostia pro peccato factus.* Per hanc hostiam carnis quæ dicitur pro peccato, damnauit .i. deleuit peccatum, quia remissionem quoque peccatorum nobis in sanguine suo, & reconciliationem operatus est. Vel de peccato à diabolo vel à Iudæis in se commisso, damnauit peccatum in nobis, vt dictum est, malis etiam ipsis optimè vtens, & in bonum conuertens. Duo illa quæ præmissa sunt ad duo supposita sunt referenda & copulanda. Ad hoc quidem quod ait, *De peccato damnauit peccatum*, illud subiungit quod impossibile erat legi scilicet damnare vel auferre peccatum. Ad illud verò quod subditur, *vt iustificatio legis impleretur*, illud est annectendum, in quo infirmatur ipsa lex scilicet per carnem .i. ad habendam plenam & perfectam iustificationem lex in-

firma fuit propter carnalem populum, cui data fuit, ut supra ostendimus, de imperfectione mandatorum eius agendo. Impossibile itaque erat legi per obedientiam sui peccatum auferre; cum perfecta, ut dictum est, non haberet præcepta. Ad quam præcipuè perfectionem infirmabatur & impedi- batur propter insolentis populi carnalitatem.

Qui enim secundum.] In nobis dico impleretur per Chri- stum qui eius doctrina & exemplo, & summa illa caritatis exhibitione spirituales, per desiderium carnales effecti su- mus. Et hoc est, *qui non ambulamus secundum carnem.* .i. carna- libus desiderijs iam non inducimur, sed gratia Dei .i. Spiritu sancto regimur, & de virtute in virtutem promouemur. *Qui enim.]* Dixi iustificari eos qui non secundum carnem, sed secundum spiritum ambulant. Et meritò, quia qui secundum carnem sunt .i. carnalibus desiderijs irretiti, illa *sapiunt.]* .i. illorum experimentis utuntur, *quæ carnis sunt.]* .i. quæ carna- les attinent voluptates. Qui verò secundum spiritum sunt .i. qui spiritualibus accenduntur desiderijs, sentiunt experien- do dona ipsa Spiritus sancti. *Nam prudentia.]* verè qui secun- dum carnem sunt, quæ carnis sunt sapiunt, quia mortem sci- licet animæ, idest damnationem, per ipsa carnalium de- sideriorum experimenta, quæ nos alliciunt, acquirimus: sicut è contrario prudentia spiritus .i. experientia virtutum & bonorum Dei *Vita]* fiunt nobis & *Pax]* .i. quietam ab om- ni perturbatione conferunt vitam. *Quoniam sapientia.]* Ideo prudentia carnis mortem acquirit, quia Deo contraria est, & omninò displicens: & quare displiceat statim annectit, quia legi Dei non est subiecta .i. præceptis diuinis obedire non si- nit. *Neque enim potest.]* obedientiam Dei seruare. *Qui autem]* Exponit quid sapientiam carnis dicat Deo inimicam, hoc est esse in carne .i. in carnalibus delectari voluptatibus, & per hoc displicere. Continuatio. Dixi sapientiam carnis inimi- cam Deo, nec sine causa, sed ideo quia *qui in carne sunt, &c.* *Vos autem.]* Ne desperarent Romani, quibus scribebat, au- diētes quòd qui in carne sunt Deo placere non possunt, quasi propter se etiam dictum esset, consolatur eos dicens: Vos au- tem gratia Dei iam, *Non estis in carne, sed in spiritu.]* .i. non in carnalibus, sed spiritualibus desiderijs. Et ne iterum de hoc quod testatur quasi certus esset nimis, confidenter & ad su-

perbiam amplius incitarentur, quibus maximè ad elationem eorum reprimendam scribit, quasi dubitatiuè hoc se profiteri insinuat, dicens: *Si tamen spiritus.*] hoc est spiritum Dei habetis habitatorem potius quàm hospitem .i. permanentò in vobis per inhabitantem gratiam suam, non à vobis recedentem vel per vos transeuntem. Quantum autem sit periculum spiritu Dei carere annectit dicens: *Quod si quis non habet spiritum Christi, hic non est eius.*] videlicet membrum, quia spiritus eius ipse est amor & vinculum, quo huic capiti membra sua coherent. De quo quidem spiritu specialiter dicitur, quia Deus caritas est. Cùm autem primò dixit spiritum Dei, & præterea Christi, ipsum profectò Christum, cuius etiam dicit diuinum spiritum, dictum esse demonstrat. *Si autem.*] ac si diceret, sed spiritum Christi Dei habemus: quod est dicere, si Christus per spiritum suum .i. per gratiam donorum suorum, vtpote remissionem peccatorum, & collationem virtutum in nobis est, *Corpus quidem nostrum mortuum est.*] .i. corporali morti obnoxium. *Propter peccatum*] scilicet primorum parentum, siue carnalis concupiscentiæ maculam, in qua est conceptum. *Sed spiritus noster viuus propter iustific.*] .i. ex virtutibus quæ eam iustificat, mortem damnationis euertat. Ac si apertè dicat, licet in Christo remissionem etiã carnalis originalis peccati consequamur, cuius quidem mors peccati etiã carnis est pœna, non tamen hanc abstulit pœnam qui remouit causam.

Quæstio.

VND E non minima fieri quæstio solet, quare videlicet pœna hæc reseruatur vbi peccatum, quod eius causa est, condonatur: vt qui videlicet in baptismo plenã peccatorum remissionem percipiunt, statim illam saltem quam in paradiso ante peccatum habebant, immortalitatem recuperent? Ad quam quidem quæstionem Isidorus de summo bono respondens lib. 1. cap. 23. ait, Si à pœna præsentis homines liberarentur per baptismum, ipsum putarent baptismi precium, nō illud æternum. Ergo soluto reatu peccati, manet tamò quædam temporalis pœna, vt illa feruentius vita requiratur, quæ erit à pœnis omnibus aliena. Quis etenim nesciat omnes ferè homines plus temporalem vitam quàm æternam appetere, cùm pro ea quam retinere non possunt multò amplius quàm pro æterna laborent, & plus corporis quàm animæ mortem.

pauere, & magis sollicitari de præsentis vitæ ærumnis quàm futuræ? Si huius itaque animalis vitæ felicitatem se detinere consideret, amplius ad Ecclesiæ sacramenta propter istam quàm propter æternam præpararent; & huius qualicunque refrigerio contenti, illius profectionem gloriæ vel omninò contemnerent, vel minùs appeteret: in hoc ipso iniqui, quòd summo bono inferius anteponerent.

Qv o d si spiritus.] Dixi quia corpus nostrum mortuum est .i. morti temporali subiectum remanet, etiam post remissionem peccatorum omnium. Sed ab hac etiam mortalitate ipsum liberabitur in resurrectione, vt non solum animā, verum etiam corpus diuina glorificet gratia. Et hoc est quod ait, *si spiritus eius* .i. patris, quo videlicet patre diuina specialiter designatur potentia. *Eius*, inquam, *qui* per propriam potentiam *suscitauit* iam caput nostrum à mortuis .i. *Iesum*.] habitans vt dictum est in nobis, ipse idem qui suscitauit Iesum non ab infirmitate, sed à morte, &c. Ideò resurrectionem Christi repetit, vt ea sæpiùs memorata securiores nos reddat. *Viuificabit etiam nostra mortalia corpora.*] vt eandem resurrectionis gloriam in capite & membra participent, viuificabit non quomodo corpora reproborum, quæ passibilia erunt, & cruciatui apta; sed propter *inhabitantem spiritum*.] .i. prout debetur reuerentiæ spiritus Christi, qui in corporibus illis quasi in templo iam habitat & quiescit, iam per eius gratiam repressis motibus carnalibus.

N O N parua est quæstio, cùm diuina substantia humanam sibi in vnā Christi personam coniunxerit, & eadem sit penitus Patris & Filij & Spiritus sancti substantia indiuidua, cur Filius potius quàm Pater aut Spiritus sanctus dicatur incarnatus: vel cùm sint opera Trinitatis indiuisa, videlicet vt quicquid vna personarum facit & cæteræ faciant, quomodo filius carnem assumpsisse dicitur, & non Pater aut Spiritus? sed hoc ex Atropologia* nostra petatur. *Ergo fratres.*] Quandoquidem qui in carne sunt Deo placere non possunt, ergo non sumus debitores carni, idest desiderijs carnalibus obedire non debemus, quia nihil cuiquam contra Deum debemus, qui etiam propter Deum animam ponere rectè iubemur. Hoc seculares attendant Potestates, nullā sibi scilicet à subiectis obedientiam deberi, cùm aliquid quod

Quæstio;

*f. Atropologia.

Deus prohibet eis iniungunt, etiam si fide vel sacramento eos sibi in hoc astrixerint. *Vt scilicet carnem vestrā.* } Exponit quod promisit, quomodo videlicet intelligendum sit nos non esse debitores carni, ne fortè hoc aliquis de substantia carnis dictum acciperet, cui quidem debitores sumus quātum ad necessariam eius curam pertinet, in victu videlicet & vestitu, ut hæc ei ministremus. Tale est ergo ac si dicat: Non sumus, inquam, debitores carni, ita ut secundum carnem viuamus, licet in carne .i. ut carnalia sectemur desideria. *Si enim.* } .i. non estis obnoxii carni, quia eius obedientia vos damneret. Et hoc est, *moriemini.* } .i. mortem animæ, quæ est peccatum, incurretis ei consentiendo, si ea stimulante non quantū potestis reluctemini. *Si autem spiritus.* } .i. dono aliquo diuinæ gratiæ magis quàm vestra virtute mortificaueritis facta carnis. } si nondum penitus suggestiones extirpare potestis, *Viuetis.* } E contrario vera animæ vita, siue hinc in virtutibus, siue in æterna beatitudine, facta mortificantur, tanquam si paruulus in utero conceptus antequam nascatur extinguatur, dum mala quę mente concipimus ne vsque ad opera prodeant præuenimus, omnem eis quantum possumus occasionem auferentes, sicut scriptum est: *Beatus qui tenebit, & allidet paruulos suos ad petrā,* .i. concepta per aliquam suggestionem mente peccata adhuc quasi paruula sint mortificabit atque interficiet, allidendo ad petram. .i. confringendo ea & dissipando ad illud bonorū omnium stabile fundamentum, quod Christus est: dū quod per infirmitatem carnis mens humana concupiscit, per amorem Christi ratio roborata ne perficiatur satagit. Sicut alibi idem Apostolus commemorat dicens: *Caro concupiscit aduersus spiritum, spiritus aduersus carnem.* .i. ratio carnis suggestiones reprimens, ne scilicet vsque ad opera procedant. Et Salomon, *Melior est, inquit, patiens viro forti: & qui dominatur animo suo, expugnatore urbium.*

Q V I C V N Q V E enim. } Bene, inquam viuetis, si spiritu scilicet facta carnis mortificaueritis, quia quicumque aguntur potius quàm coguntur .i. amore alliciuntur magis quàm timore compelluntur, *Spiritu Dei.* } Filij sunt Dei potius quàm serui .i. per amorem ei magis quàm per timorem subiecti. *Nō enim.* } Ac si aliquis quæreret: Habétne Deus plures filios, cum eius vnigenitus dicatur Christus? Respondet, habet quidem

quidem plures, sed per adoptionem, non per naturam. Quia & vos ipsi spiritum adoptionis accepistis, in quo efficiuntur Filij Dei. Vnde & ipse alibi dicit, *Quòd caritas Dei diffusa est in cordibus nostris per Spiritum sanctum qui datus est nobis.* Spiritus itaque adoptionis donum dicitur caritatis, per quod adoptamur à Deo in filios. *In quo.*] scilicet spiritu .i. in professione & recognitione cuius doni, nos ad Dominum *clamamus* intentè, atque exultanter dicimus, *Abba Pater.*] i. eum potius profiteamur esse patrem quàm Dominum, ac per hoc nos potius filios quàm seruos recognoscimus. Sic enim & Veritas in Euangelio frequenter docuit nos scilicet Deum potius vocare Patrem quàm Dominum, ut ex hoc quoque ad filialè nos hortaretur subjectionè. Vnde & cùm illà discipulis spiritualè traderet orationè: *Orantes, inquit, dicite, Pater noster qui es in caelis, &c.* Vnde bene Abbates Monasteriorum Patres dicimus, ut ex ipso nomine magis amari tanquàm patres, quàm time-ri tanquàm Domini apertè admoneantur. Clamamus, inquit, nos Hebræi *Abba*, nos ex gentibus *Pater*, cùm hoc .s. nomen sit Hebræum sine Syrum; illud Græcum siue Latinum. August. in Epist. ad Galatas. *Abba Pater*, duo sunt verba, quæ posuit, ut posteriore interpretetur primum. Nam hoc *Abba* quod pater, propter vniuersum populum, qui de Iudæis & Gentibus vocatus est; ut Hebræum verbum ad Iudæos, Græcum ad gentes pertineat. Idem lib. III. de consensu Euangelistarum. Hoc est *Abba* Hebraicè quod est Latinè *Pater*. Haymo super hunc locum: *Abba* Hebræum est & Syrum, *Pater* Græcum & Latinum. Præuidens ergo Apostolus utrosque populos ad fidem colligendos, posuit duo nomina sub vna significatione, ut qui credunt ex Hebræis & Syris dicant, *Abba miserere*, qui ex Græcis aliisque dicant, *Pater*. Tale quid in Euangelio Marci habetur, dicente Domino: *Abba Pater si possibile est transeat calix iste à me.*

SPIRITVM seruitutis in timore.] Dicit donum illud seruilis timoris, quo non à mala voluntate, sed à mala cōpescimur actione, formidine pœnæ; sicut antea Iudæi per pœnas legis corporales. *Non accepistis spiritum.*] Per Euang. sicut olim Iudæi per legem. *Ipse enim spiritus.*] Adoptionis quem diximus & habemus facere recognoscere spiritum nostrum. i. rationem. *Quod sumus filij Dei.*] .i. ei per amorem subiecti. Nihil enim

melius quisque quàm propriam recognoscit conscientiam, & vtrum seruus an filius potius dicendus sit. Notandum verò Apostolum in his, quibus loquitur Romanis, quorum nonnulli vehementer erant reprehendendi, generalem fidelium Patrè hoc loco se intelligere, & nō tam quales illi essent quàm quales esse deberent exponere. *Si autem filij.*] scilicet adoptionis, vtique & *heredes*] quia ad hoc adoptantur .i. gratis eliguntur, vt hereditatem assequantur. *Heredes quidem Dei*] .i. Patris, & *Coheredes Christi.*] .i. naturalis eius filij, in illa scilicet beatitudinis professione perpetua. Ostendit quantum sit assequi illam hereditatem Dei, per quam filio eius Christo similes efficiamur. *Si tamen.*] Dixi *heredes sumus*, hac tamen intentione, si compatimur ipsi Christo, quia non coronabitur quis nisi qui legitimè certauerit, aduersus hostium videlicet seu vitiorum impugnationem. Et quia vt ait Cyprianus, martyrem non facit pœna, sed causa: addit vt conglorificemur .i. si ita patimur vt Christo glorificari digni simus. Quod tunc fit quando caritas ad patiendum præparat, non necessitas trahit, & pro Christo sicuti pro nobis; vt sic ei mutuum soluamus. Omnes itaque quantum in ipsis est pro eo compatiuntur, quicunque vt diximus pro eo pati parati sunt, si videlicet ipsi persecutori non desunt, licet eis desit persecutor. *Existimo enim.*] Ac si aliquis quæreret: Estne tanta illa hæreditas, vt pro ea promerenda patiendum sit vsque ad mortem sicut Christus passus est? Respondet, immò tantam esse existimo, vt omnia merita hominum, quantumcumque ipsi patiando mereantur, longe excedat. Et hoc est quod ait, *Non sunt condigna passionibus huius temporis.*] .i. temporales illæ & transitorie tribulationes, quantæcumque fuerint, non sunt tanti meriti, vt eis debeat illa ineffabilis & æterna gloria futura vitæ, quæ reuelabitur in nobis: quia iam *filij Dei sumus*, sicut scriptum est, *sed nondum apparet quid erimas.* Nulli enim transitorio, quamuis sit bonum ex debito, redditur perpetuum bonum, sed per gratiam Dei meritis nostris superadditam id obtinemus, ad quod nequaquam meritis ex nostris sufficebamus. Et si diligenter attendamus, nihil transitorium etiam boni remuneratione dignū est. Sola quippe caritas, quæ nunquā excidit, vitam promeretur æternam: & quicunq; æquales sunt caritate, pares apud Deum habent remunerationes: et-

si alter effectū caritatis priuetur aliquo casu præpeditus. Vnde & merito B. August. æqualem de martyrio coronam asserit habere Ioannem, qui passus non est, quantam & Petrus habet qui passus est, vt non tam passionis effectum quàm affectum Deus attendat.

NAM expectatio.] Bene dixi futuram gloriam, quæ reuelabitur in nobis, scilicet filiis Dei; quia hanc reuelationem scilicet gloriæ filijs Dei debitæ expectatio fidelium omnium expectat. Ac si diceret: Expectans vnusquisque expectat, sicut dicitur, *Euntes ibant*, hoc est perseueranter atque confidenter sperant, bonis scilicet operibus eam promerentes. *Reuelationem filiorum Dei.*] .i. remunerationem illam, in qua reuelabitur qui filij Dei sint, & ad vitam prædestinati, quod adhuc occultum est. Creaturam eos dicit, quia creationem Dei in seipsis incorruptam satagunt custodire, ac reformare imaginē Dei in qua creati sunt, peccatis quæ eā delent vel maculant quantum valent resistendo. Et verè hanc reuelationē expectant fideles, quia propter eam contemnunt vitæ præsentis vanitatem, & nolentes eam sustinent; concupientes etiam iam potius dissolui & esse cum Christo. Et hoc est quod ait, *Creatura ipsa subiecta est nolens* .i. hanc vanam vitam, quæ & transitoria est, & ærumnis plena, sustinet inuita, quantum in se est. *Sed propter eam*] scilicet eam tolerat, qui subiecit eam in spe illius] scilicet futuræ reuelationis .i. in hac eam affligendo humiliat, vt in illa quæ speratur exalter. Quod verò sit spes illa creaturæ .i. quòd sperent hic afflicti fideles, supponit dicēs, *Quia & ipsa, &c.*] .i. hic sperant qui liberabuntur ibi à iugo passibilis & corruptibilis carnis, quo hoc opprimuntur inuiti. Libertatem dicit illius vitæ gloriam, in qua nulla erit oppressio, cum nemo aliquid contra voluntatem suam incurrerit.

SEI MV S enim.] Ostendit per partes creaturam hic afflictam ad illam, quam ibi sperat, libertatem gloriæ toto desiderio anhelare, quia videlicet tam hi qui inter fideles sunt minores, quam illi qui maiores. Minores autem distinguit per hoc quod dicit, *Omnis creatura*. Maiores verò per hoc quod supponit, *primitias spiritus habentes*. Quod itaque dicitur, *omnis creatura*, tale est ac si diceret, hi qui omnino sunt creatura, vel qui toti sunt creatura, non creatores, nullos videlicet creare

vel generare Deo per prædicationem volentes. Apostoli verò & eorum vicarij tanquam aliorum, vt diximus, creatores quodammodo sunt, iuxta quod alibi ipse dicit Apostolus: *In Christo enim Iesu per Euangelium ego vos genui.* Et iterum, *Filioli mei quos iterum parturio donec formetur, &c. Ingemiscit & parturit.*] i. ingemiscendo parturit. Gemitus autem fidelium hi vel de terrena afflictione proueniunt, secundum istud: *Euntes ibant & flebant, mittentes semina sua,* vel de coelestis patriæ desiderio, sicut est illud: *Hei mihi quia incolatus meus prolongatus est.* Et rursum, *Super flumina Babilonis illic sedimus & fleuimus donec recordaremur tui Sion.* Parturiunt autem .i. labore maximo fructum bonorum operum proferre meditantur. *Et satagunt usque adhuc*] .i. non horariè, sed quamdiu viuit. Parturio enim verbum est meditationis formæ, non perfectæ: & ideo bene minoribus atq; imperfectis aptatur, qui quasi sunt in initio cogitationis, non in perfectione operationis. Hæc autem Apostoli verba cum ait, *Ingemiscit & parturit*, illis Dominicis concordant verbis quibus dicitur, *Mulier cum parit tristitiam habet &c. Primitias spiritus habentes.*] .i. maiora sancti Spiritus dona, sicut prædicatores sancti, qui secum & alios Deo acquirunt. Ad quod quidem prædicationis officium tanquam ad maximum Spiritus sancti donum ipse nos Apostolus in II. Epist. ad Corint. adhortatur dicens, *Emulamini enim carismata meliora, & adhuc excellentiorem viam vobis demonstro.* Et post pauca, *Sequitamini caritatem, emulamini spiritualia, magis autem vt prophetetis* .i. vt officium Prophetarum prædicando assumatis.

Et ipsi gemimus.] gemimus, grauati scilicet passibilitate & corruptione carnis, sicut cæteri scilicet ex spe consolationem habentes, quæ scilicet spes quasi anchora est nauis nostræ inter huius seculi fluctus, quia statim consolationem adiecit, dicens: *Expectantes.*] .i. cum fiducia sperantes, *adoptionem filiorum Dei.*] de ipsis Gentibus .i. ipsos adoptari à Deo & constitui heredes in regno celesti. Adoptionem hanc dico *redemptionem carnis nostræ.*] .i. Ecclesiæ, cuius membra sumus. Nihil quippe est aliud nos à Deo sic adoptari, quàm per Vnigenitum suum à diaboli potestate seu iugo peccati nos redimi: vt hæc tota adoptio diuinæ gratiæ, non meritis nostris tribuatur. *Spe enim.*] Dixit superius quia reuelationem filiorum Dei expectamus sperando, & quod præsentis vitæ vanitati in

hac spe subiecti sumus, ne propter labores diffidamus. Et ne quis obijceret spem istam non esse certitudinem, & idè in ea non esse confidendum, idè dicit, quòd omnes quotquot saluamur, per spem saluamur. Et statim quod spes de non apparentibus tantum dicatur annectit, dicens: *spes autem*] .i. cognitio quæ de apparentibus est, nequaquam spes dicenda est. *Nam quod videt*] hoc est, quid sperat aliquid quod videt? Ac si diceret, nihil est quod videndo speret ipsum, vt si quis videat se diuitem factum esse, & fortasse antea sperauerat: iam non de hoc spem vel existimationem, sed certitudinem habet. *Si autem quod.*] Ostendit quomodo spe salui facti fiamus, quia videlicet illa spes, quæ dicta est vitæ futuræ, nos patientes reddit; ne in tribulatione vitæ præsentis deficiamus. Et hoc est, *Si enim*, quia scilicet quod non videmus speramus, patienter illud expectamus non in agone præsentis certaminis deficientes, *Similiter autem*, Sicut videlicet spes nos adiuuat patientiam præstando, ita & Spiritus sanctus in hoc agone nostram adiuuat infirmitatem, necessarias nobis oratione suggerendo. Et hoc est: *Nam quid ita*; scilicet *ut oportet*, & nobis necessarium est, *Oremus.*] in tribulationibus videlicet positi, frequenter ignoramus, in multis scilicet dubitantes quid eorum videlicet nobis vtile sit, sicut & ipse Apostolus quando ter Dominum rogauit stimulum satanæ sibi auferri. *Sed ipse spiritus postulat pro nobis.*] .i. postulare nos facit, quod scilicet nesciebamus docendo, & eius desiderium maximum inspirando. *Qui autem.*] Dixi quòd nos postulare facit gemitibus inenarrabilibus .i. tantis desiderijs vt potius sentiri quàm edisseri queant. Sed licet sint inenarrabiles, ei tamen sunt cogniti, qui scrutatur corda, & inspector est cordis, ea videlicet potius attendens quæ versantur in corde, quàm quæ proferuntur de ore. *Quid desideret.*] idest desiderare nos faciat, quia postulat pro sanctis .i. sanctos postulare facit, *secundum Deum.*] .i. secundum hoc quod ipse spiritus Dei à Deo accepit, qui à Deo habet esse, procedendo scilicet ab ipso, & secundum quod in ipsa Dei dispositione ordinatum esse nouit. Vnde certum est Deum non posse latere quid agat spiritus eo disponente.

SCIMVS enim] Tanquã aliquis opponens diceret, quomodo adiuuet spiritus quos tot videmus afflictionibus laborare,

dicit quia & ipsas afflictiones & quæcunq; accidunt sanctis, tã
 prospera .i. quã aduersa, in bonũ eis cõuertit, & ad corũ vtili-
 tatẽ perducit. Qui verò sunt diligentes Deũ, supponit dicens:
His qui vocati sunt sancti.] .i. internæ vocationis inspiratione
 sanctificati, *secundũ propositum Dei*] potius quàm secundũ eo-
 rum præcedentia merita .i. secundũ hoc potius quod diuinæ
 gratiæ placuerit, quàm secundum hoc quod ipsi meruerunt.
Nam quos præsciuit.] Exequitur diligenter quomodo secundũ
 propositum Dei .i. diuinæ gratiæ placitum sint sanctificati,
 dicens quia quos præsciuit postmodum, & prædestinando
 conformes Christo reddidit. Scire dicitur Deus ea quæ ap-
 probat, & quæ eius notitia sunt digna, iuxta illud: *Nonis Do-*
minus viam iustorum, sicut è contrario mala ignorare vel nes-
 cire dicitur. Iuxta quod ipse filius reprobis ait; *Nescio vos.* Il-
 los itaque præscisse dicitur, quorum antequam essent futu-
 ram electionẽ approbavit. Quoscunque itaque sic præsciuit,
 eos postmodum *prædestinavit.*] .i. donis gratiæ suæ preparauit.
 Prædestinatio quippe diuina, dicitur præparatio gratiæ, quæ
 in electis tantum est. *Prædestinavit, inquam, Conformes fieri.*]
 .i. ad hoc vt similes fierent, *Imaginis filij sui.*] .i. Christo, qui est
 imago Dei .i. expressa similitudo Patris, in omnibus scilicet
 bonis ei æqualis secundum diuinitatem, iuxta illud quod ait:
Philippe, qui videt me videt & Patrem, ac si diceret, quia ex me
 integrè cognosci potest qualis vel quàm bonus ipse sit Pater.
 Tunc autem Christo conformamur, si veterem hominem
 cum actibus suis deponentes, ipsum induamus Christum, si-
 cut scriptum est: *Qui dicit se in Christo manere, debet sicut ille*
ambulauit & ipse ambulare. Ita, inquam, conformes fieri, *vt*
fit ipse videlicet Christi primogenitus in multis fratribus.] .i. inter
 multos qui eiusdem Patris sunt filij per adoptionem, ipse qui
 per naturam filius est more primogenitorum excellat digni-
 tate, non eis adæquetur similitudine, sicut & ipse Patri æqua-
 lis est, cuius imago est. *Qui autem.*] prædestinantur electi .i.
 ad vitam æternam præparantur per fidem illuminati, quam
 primò tanquam omnium bonorum fundamentum suscipiunt,
 vocantur postmodum per spem illexi, cum iam misericordia
 Dei & virtute sacramentorum cognita ad bene operandum
 alliciuntur, propter æternorum scilicet retributionem; de-
 inde iustificantur sinceræ caritatis affectu, non iam Deo tam

propter sua quàm propter ipsum adhærentes, & denique magnificantur in cælesti scilicet patria sublimati.

QVÆSTIO se hoc loco ingerit de diuina scilicet prouidentia, seu prædestinatione, quæ liberum nobis arbitrium auferre videtur, cum omnia videlicet sicut à Deo præuisa sunt, necesse sit euenire, nec aliquè prædestinatum possibile sit perire. Certum quippe est omnia antequàm fiant eo modo quo futura sunt à Deo esse præuisa, siue bona sint siue mala; nec in aliquo prouidentia eius posse falli. Cum itaq; hunc hominè, qui forte mœchaturus est, præuiderit mœchaturum esse, necesse est eum mœchaturum esse. Quod si eum necesse est esse mœchaturum, hoc est inuitabile, iam non est libero eius arbitrio seu potestate peccatum hoc euitare. Nō ergo propter hoc peccatum, quod nullatenus euitare potuit, reus est constituendus. Atque ita omnia mala in Dei prouidentiam tanquam eorum necessariam causam retorquenda videntur, & sic omnia eo modo quo eueniunt necessariò prouenire: cum scilicet sic à Deo præuisa fuerint, nec vllō modo aliter posse contingere. Nos autem concedimus, eum qui mœchaturus est necessariò mœchaturum esse, cum id Deus præuiderit; sed non ideo simpliciter dici conuenit eum esse necessariò mœchaturum. Non enim hæc modalis cum determinatione illam simplicè infert, de quo quidem diligentius differendum Theologiæ nostræ reseruamus, & quæ differentia sit prouidentia ac prædestinationis seu fati.

QVId ergo.] Quandoquidē Deus ita de nostra sollicitus est salute, ut præscierit, prædestinet, prædestinatos vocet, vocatos iustificet, iustificatos magnificet. Quid dicemus ad hæc i. cōtra hæc quod impedimentum poterimus inuenire? Nullum utique: quia etsi ex nobis infirmi sumus, *Quis contra nos*] preualere poterit? *Si Deus pro nobis* .i. cum Deum habeamus patronum. De cuius quidem patrocinio vel defensione quia securi esse valeamus, adnectit commemorans eius singularem dilectionem, quam nobis exhibuit, dicens: *Qui non pepercis etiam proprio filio suo.*] consubstantiali, non adoptiuo: sed *tradidit illum.*] videlicet ad mortem pro nobis omnibus, scilicet quos præsciuit, seu ut dictum est prædestinauit; ut in eius sanguine nostrorum maculas dilueret peccatorum. Quod verò ait, *etiam proprio filio*, innuit Deum & alijs adoptiuis filiis

antea pro nobis non pepercisse sicut Isaia, seu Ieremia, vel nonnullis alijs Prophetarum, qui ad populum Dei missi, tanquam Martyres pro salute hominum sunt occisi. *Quomodo enim etiam*] .i. qua ratione potest dici ut in tanto de traditione filij sui dono non dederit nobis omnia, nostræ scilicet salutis necessaria? *Quis accusabit?* Quandoquidem Deus de nostra ita, ut dictum est, sollicitus est salute, cuius accusatio quicquam aduersus nos obtinere poterit? Nunquid accusatio ipsius Dei, qui non solum non accusat, verum etiam ut dictum est iustificat? ac si diceret: non. Aut si etiam accusator esset quis, in nostra condemnatione perstiterit. Nunquid ipse Christus, qui tantam nobis exhibuit dilectionem, sicut ipse ait: *Maiorem hac dilectionem, &c.* ut pro nostra moreretur salute? ac si diceret, non. *Immo qui.*] Quasi corrigens quod dixerat, qui mortuus est, quod est infirmitatis, supponendo resurrectionis gloriam in ipso nobis exhibitam, atq; promissam, quæ nos in omni tribulatione maximè consolatur, & quoniam resurrectio nonnullorum fuit iterum mortuorum sicut Lazari, ut etiam reproborum erit ad sinistram constituendorum, subdit. *Qui est ad dexteram Dei.*] .i. secundum ipsam humanitatem resuscitatus in æterna beatitudine perseuerat, ibi quoque non immemor nostræ salutis, ubi tanquam aduocatus Patrem interpellat pro nobis, ipsam .v. in qua tanta pro nobis passus est, humanitatem oculis Patris semper presentando, & sic nos ei tanquam mediator reconciliando. Interpellat igitur ut dictum est, tanquam inter nos & Deum medius intercedat, per ipsam ut dictum est nostræ naturæ substantiam. Sanctos etiam ipsos intercedere & orare pro nobis dicimus affectu potius caritatis vel meritorum suorum suffragijs, quam prolatione vocis. Vnde & cum dicimus, *Sancte Petre ora pro nobis*, tale est ac si dicamus, *Miserere nostri Deus propter merita B. Petri.*

Quis ergo nos] Quandoquidem tantis beneficijs tantam nobis gratiam Deus exhibuit, & in seipso confirmavit, quæ res nos ulterius poterit auellere ab eius dilectione? Ac si diceret, nulla. Atque id statim comprobatur per ea quæ maximè videntur posse homines à Deo auertere. Ac primò de aduersis sic ait, *Tribulatio*,] ac si diceret, Non. Tribulatio dicitur quæcunque corporis afflictio vel verberatio, angustia, mentis anxietas, ut & metus, persecutio de loco ad locum, propulsio,

sio, periculum, mortis apparatus, gladius, ipsa mors. *Sicut scriptum*] in Psal. XLIII. ac si diceret, utique verum est quod nihil horum poterit separare, quia sicut dicit Propheta *propter te*] i. quia inseparabiliter tibi adheremus, periculis vitæ afflictī subiaceamus. *Tota die.*] i. toto tempore vitæ nostræ, quod quidem ad comparisonem vitæ infidelium, qui in tenebris ambulant, dies est dicenda, fide videlicet illuminata. *Æstimati*] sicut scriptum est de impijs dicentibus de iustis: *Nos vitam illorum æstimabamus insaniam, &c. Oves occisionis.*] i. dignæ occisione, & nihil alterius utilitatis habentes, nec de ipsa etiam morte sua fructum aliquem ad esum tribuentes, nec vllatenus interfectores suis tum pro imbecillitate suæ naturæ, cum etiam pro mansuetudine sua resistentes. *Sed in his*] Dixi, non poterunt omnes oppressiones istæ constantiam nostram superare, ut videlicet à Deo separet, sed è contrario hæc omnia perseuerando vincimus per gratiam Dei potius quàm per nostram virtutem. Et hoc est quod ait, *Propter eum qui datus nobis*] i. propter eius adiuuantem gratiam. *Certus sum.*] Ided tam fiducialiter loquor de diuina gratia fideles adiuuante, ut nullis .v. de causis à Deo possint separari, quia iam de his non solum fidem, verum etiam certitudinem imaginis assecutus sum experimentis, quod videlicet neque mors comminata. *Neque vita*] promissa scilicet in hoc mundo, *Neque Angeli*] i. angelica dignitas, à quocunque nos tentante nobis promissa, sicut diabolus Eux promisit, quod essent sicut dij. *Neque etiā principatus, neque virtutes*] i. istorum ordinū excellentia, quæ maior est dignitate Angelici ordinis, quos quidem ordines diligenter Beatus Gregorius distinguens, ait, Græca lingua Angeli nuncij, Archangeli summi nuntij vocantur. Qui minima nunciant Angeli, qui verò summa Archangeli vocantur. Hinc est quod ad Mariam non quilibet Angelus, sed Gabriel Archangelus mittitur. Item Virtutes vocantur illi, per quos signa & miracula frequentius fiunt. Potestates vocantur qui hoc potentius cæteris in suo ordine perceperūt, ut eorū ditioni virtutes aduersæ subiectæ sint, quorum potestate refrenantur ne corda hominum tantū tentare præualeant, quantum volunt. Principatus vocantur qui ipsis quoque bonis Angelorum spiritibus præsunt, qui subiectis alijs dum quæ sunt agenda disponunt, eis ad explenda mysteria principan-

tur. *Neque instantia*] .i. præsentia bona vel mala , *Neque fortitudo*] .i. violentia cuiuscunque potestatis , *Neque altitudo , neque profundum* .] .i. sublimatio alicuius humanæ gloriæ, vel deiectio atque humiliatio in quamcumque vtilitatem. Ac si diceret, neque prosperitas aliqua humana , neque aduersitas. *Neque creatura aliqua*] quam videlicet suprapositæ .i. Angeli, potestates , &c. *A caritate Dei*] quia videlicet cum sincere propter ipsum diligimus. *Quæ est in Christo Iesu*] .i. per Christum Saluatorem nostrum nobis inspirata , siue in ipso ædificata atque radicata , & fundata.

CAP. IX. VERITATEM dico.] Quod dixit se & consimiles sui fideles à caritate Dei non posse auelli , experimento proprio vult probare dicens videlicet se dum maximus Ecclesiæ persecutor existeret, ad hoc laborasse, vt seruos ad fidem Christi conuersos inde auerteret , & hoc est in Christo Iesu , hoc est per Christum Iesum iurans veraciter dico , quantum ad ipsius rei euentum , & ita se habet vt dico. *Et non mentior , testimonium mihi perhibente conscientia mea* .] .i. reus mendacij non sum , cum sic credam sicuti dico. Potest quippe aliquis quantum ad rei euentum veritatem in verbis per ignorantiam habere , & tamen contra conscientiam loqui, & per hoc incurrere mendacij reatum. Non enim mentitur apud Deum .i. reus mendacij non reputatur à Deo , nisi qui per duplicitatē loquitur. Loquenti conscientia sua perhibet testimonium, quando non dissidet animus à verbis .i. quando creditur ab ipso sicut dicitur : Mihi, inquit, qui eam noui, etsi non nobis, conscientia dico mea existens. *In Spiritu sancto* .] .i. fundata & radicata in caritate Dei. Ex qua scilicet caritate pullulare mendacium non potest. Vnde & bene spiritus veritatis dicitur, hanc videlicet dico veritatem. *Quoniam tristitia est mihi magna*] quantum ad computationis quantitatem, & continua] quantum ad diuturnitatem. *Cordi meo*] .i. non simulata in exteriori habitu , sed vera in ipso animi affectu, & vnde se tristitia supponit, quia videlicet *optabam*] olim , non modo. *Ego ipse*] qui modo aliquid magni esse videor , & præ cæteris aduersari Iudaismo , & pristinæ vitæ contrarius, *Optabam*, inquā, *pro fratribus meis esse anathema à Christo* .] .i. nitebar modis omnibus fieri separatio nostratum .i. ludæorum à Christo, vt non solum scilicet ego separatus essem à Christo , sed ipse aliorū

essem separatio, & tam verbis quàm factis eos quoque, qui ei iam per fidem adhæserāt, ab eo auerterem, sicut scriptum est: *Saulus adhuc spirans minarū*, &c. Vel ita ut fratres meos auerterem à Christo, omnes generaliter auertere cupiebam, sicut scriptum est, ut si quos inueniret huius viæ viros, non videlicet solum Iudæos, &c. Quod autem fratres generaliter dicat quicumque de suo genere sunt .i. quoslibet Iudæos declarat subdens: *Qui sunt cognati mei secundum carnem*] .i. de cognatione mea carnali, & ideò tunc vehementius animo meo inhærentes, ut plurimum pro eis agerem, & ne tantum eos intelligamus, qui ad tribum Benjamin pertinent, vnde erat Apostolus, immo generaliter totum genus Iudæorum, addit, *qui sunt Israelitæ* .i. de genere Iacob Patriarchæ, qui prius Iacob à parentibus, postmodum Israel à Domino appellatus est .i. vir videns Dominum. Vnde & præcipuè nomine eius tota posteritas insignita gloriabatur, quasi solis ipsis Deum videre .i. cognoscere concessum esset, quasi iam ulterius nec Christi, nec alicuius doctrina indigerent, ut hinc quoque ipse Paulus Christi disciplinam nonnulla de causa se præmisisse insinuet, necnon ex iis quæ sequuntur, de condemnatione scilicet illius olim peculiaris populi Dei, cum ait, *Quorū adoptio est filiorū*] hoc est de primo per gratiam adoptati sunt à Deo in filios, qui specialiter ab eo dilecti innumerabilium beneficiorum exhibitione monstrantur. *Et gloria*] .i. glorificatio in præsentī ex adoptione ista procedens, qua se & nunc in Ecclesia gentibus conuersis præponere volebant. Vnde autem adoptio vel glorificatio eorum maximè processerit, diligēter prosequitur, dicens eorum esse testamentum, & ad eos primitus, non ad gentes latum fuisse, sicut scriptum est: *Non fecit taliter omni nationi, & iudicia sua non manifestauit eis*. Ad hoc quidem illud pertinet quod superius dixerat. *Quid ergo amplius Iudæo, &c. Multum per omnia*. Primum quidem quia *credita sunt* .i. e. d. *Et obsequium*] .i. publicum diuini cultus officiū, in tabernaculo vel in templo, & *Premissa*] munera tam de terra Chanaam possidenda, & terrenis commodis, quàm de spiritualibus etiam bonis per Christum ex eis nasciturum, sicut mox annectit dicens, *Quorum sunt patres secundum carnem* potius, quàm secundum fidei imitationem illi, ex quibus & ipse Christus est secundum carnem, ut pote ipsi patriarchæ Abra-

ham, Isaac, & Iacob, quibus de Christo promissiones factæ sunt, quod in semine eorum scilicet benedicerentur omnes gentes. Quod vero dixerat Patres Christi, ne per hoc videretur Christus à patribus illis inceptisse, addit. *Qui est super omnia benedictus,*] & laudandus & glorificandus *in secula.*] .i. per omnes temporum successiones ab ipso tanquam à diuina sapientia optimè ordinatas. *Amen.*] .i. verum est. Geminatio assertionis tam oris quàm cordis professionem indicat, sicut & ibi, *Amen amen dico vobis.* Et, *sit sermo vester est est, non non.*

LIBER QVARTVS.



NON autem quod exciderit.] Diceret fortasse aliquis, Et quomodo promissa diuina Israelitis facta sunt, quæ pro nequitia sua obtinere populus ille non potest, semper Deo rebellis existens, & iam ab ipso penitus reprobatus? Ad hoc Apostolus, *Non ita,* inquit, promissa eis facta sunt, quod exciderit verbum ipsum promissionis .i. quod sit cassa promissio, & nullatenus impleatur. Stare quippe, siue manere promissio dicitur, quæ impletur; excidere autem è contrario. Tale superius animaduerte. Cum enim quæsitum fuisset, quæ utilitas circumcisionis, & responsum multum per omnem modum, primum quidem, &c. subjunctum est, Quid enim si quædam illorum non crediderunt, nunquid incredulitas illorum fidem Dei euacuat? Ita igitur & hoc loco dicitur, quod promissio, vt dictum est, Israelitis facta non est cassata, si in quibusdam qui de genere Israel, secundum carnem sunt, nequaquam sit completa. *Non enim omnes.*] Soli quippe illi inter filios Israel computandi sunt, qui in cultu vnius Dei permanentes fidem sui patris Israel .i. Iacob imitantur, sicut mox per simile in Abraham demonstrat dicens: *Neque qui semen sunt Abrahæ*] secundum carnem scilicet omnes in filiis Abraham computantur. Quod statim testimonio ipso ex Genesi sumpto confirmat, dicente Domino ad Abraham, postquam Sarra-Agar ancillam expelli cum filio iusserat: *Omnia quæ dixerit tibi Sarra, audi vocem eius, quia in Isaac vocabitur tibi semen. Id est non qui.*] Exponit Apostolus quod præmissum est, *In Isaac vocabitur tibi semen.* Filios carnis dicit, qui ex Patre Abraham solam carnis originem ducunt, non fidei sumunt exemplum. Cum autem dicendum videretur, hi filij sunt Abraham, dicit potius Apostolus, *Hi filij sunt Dei*]

ostendens .v. non alios dicendos esse filios Abraham, nisi qui filij sunt Dei, i. qui fideles sunt. Abraham quidem fidem significat. Ideoque Abraham filij illi soli recte dicuntur quos sibi Dominus per fidem adoptat tam ex Iudæis quàm ex gentibus, sicut & ipse superius meminit Apostolus, cum de Abraham loqueretur dicens, Vt sit pater credentium omnium, non his tantum qui sunt ex circūcisione, sed & his qui sectantur vestigia fidei, quæ est in præputio. *Sed qui filij sunt promissionis*] filios promissionis dicit, qui ad fidelē Isaac pertinent, cum .s. fide imitando, quoniā .i. Abraham ex senili & sterili matre per solā promissionē Dei, non per naturā carnis generavit. *Estimantur in semine*. v. Abraham .i. inter filios Abraham reputandi sunt. Quibus autem verbis promissio facta sit Abraham de futuro filio Isaac, supponit dicens.

PROMISSIONIS enim, &c.] Hæc sunt verba Angeli ad Abraham loquentis, *secundum hoc tempus*] .i. in tali tempore quale modo est anno .s. reuoluto, *veniā & eris*] .i. per aduentū, & operationē meam potius quàm per naturā tunc Sarra concipiet. Hæc autē sententia his verbis in Genesi est expressa: *Revertēs veniā ad te tempore isto vita comite, & habebit Sarra filium vxor tua*. Itē infra: *Visitauit Dominus Sarra sicut promiserat, & impleuit quod loquutus est, concepitq; & peperit filiū in senectute sua, tempore quo prædixerat ei Dominus*. Ex quibus quidē verbis non satis liquet cū dicitur, *eris Sarra filius*, an de cōceptu eius siue partu sit intelligendū. Cū autē dicitur *in senectute sua*, patenter innuit quod dixit, filiū hunc non tam esse carnis quàm promissionis .i. non naturæ, sed gratiæ. Et licet dictū sit, *In Isaac vocabitur tibi semē*, non tamē in omnibus ex Isaac secundū carnē nascituris, cū ipse statim Esau reprobarus sit, & solus Iacob à Deo electus. Quod nunc prosequitur dicens, *Non solū autē illa*] .i. Sarra, subaudi promissionē habuit de prole à Deo, sed etiā Rebecca iā quidē habēs in vtero, antequā .s. promissionē illā haberet, *habens in quā in vtero, ex vno concubitu Isaac Patrē nostrū*] non tam per carnē quàm per fidē. Et verē promissionē hanc quomodo habuit, quia istā de electione .s. minoris filij, quod .v. maior seruiret minori. Et hæc est, *Cū enim natus nati essent*] Illi .v. quos ista habuit ex Isaac, *Aut aliquid*] .i. nec aliquid adhuc meritū haberent ex bono vel malo opere suo. Posset quippe contingere vt more Hierem. vel Ioan. Bapt. in vtero illuminati Deū

cognoscerent, & iam cum diligendo vel non diligendo aliquid mererentur, ut Scilicet qui nondum aliquid promeruerant. *Maneret propositum Dei secundum electionem*] ipsius in altero ipsorum .i. in Iacob, non in Esau .i. secundum hoc quod Deus apud se proposuerat, & in altero providentia sua ab æterno disposuerat, maneret electio Iacob .i. perseveraret immobilis eius prædestinatio: *Non ex operibus*] .i. propter meritum aliquod operum eius, qui electus est; sed tantum ex Deo, *Vocante eum*] .i. ex sola gratia eius, qui cum per internam inspirationem postea ad se traxit.

DICTVM est ei] .i. Rebeccæ, quia *maior*] .i. Esau qui primogenitus futurus erat, *serviet*] posteriori fratri .i. Iacob. Quæ quidem servitus non tam in personis duorum fratrum quam in posteritatibus eorum accipienda est. .i. in populis qui ex ipsis nascituri promittuntur, Domino ad Rebeccam dicente: *Dux gentes in utero tuo sunt, & duo populi ex ventre tuo dividuntur, populus populumque superabit, & maior serviet minori.* Si enim ad personas fratrum respicias, nunquam Esau deservisse, vel in aliquo subiectum extitisse Iacob reperies, immò magis Iacob semper Esau maximè timuisse, & ei se plurimum humiliasse. De populis autem planum est hoc accipi, cum etiam secundum præceptum legis interdictum sit Israelitis servos habere de populo suo, sed de gentibus tantum. Vnde in Levitico scriptum est, cap. 84. *Si paupertate compulsus vendiderit se tibi frater tuus, non eum opprimes servitute famulorum, sed quasi mercenarius & colonus erit, usque ad annum Iubileum operabitur apud te, & postea egredietur cum liberis suis, & reverteretur ad cognationem & possessionem patrum suorum. Mei enim sunt servi. Non veniat conditio servorum, non affligas eum per potetiam. Servus & ancilla sint vobis de nationibus, hos habebitis famulos, & hereditario iure transmittetis ad posteros, ac possidebitis in æternum. Vocante dico eum sicut scriptum est.]* In Malachia scilicet Propheta, his quidem verbis: *Nonne frater erat Esau Iacob, dicit Dominus, & dilexi Iacob, Esau autem odio habui.* .i. hunc eligendo vocavi, illum autem respui. De quali quidem electione superius idem dicit Apostolus, *& quos vocavit hos & iustificavit.*

QV ID ergo.] Congruam sumit Apostolus ex proximè dictis objectionem, quasi in accusationem & iniuriam Dei, qui

antequam aliquid Esau promereri posset, cum non prædestinando dignum odio suo iudicauit, & quia alteri fratri dedit gratiam, qui similiter antea nil meruerat, ei subtraxit, qua ei subtracta constat eum bene agere non posse, atque ita non tã culpa Esau accidere videtur quod iniquus fuerit quàm ipsius Dei qui ei gratiam, qua bene operari posset, dare noluit. Huius autem objectionis ipsemet Apostolus postmodum solutionem ponit, vbi ait: *O homo tu quis es*, &c. vsque illuc verò totum quod interpositum est, de obiectione est. Continuatio. Quandoquidem Iacob electionem suam & vocationem non magis quàm Esau ex meritis suis, sed ex arbitrio tantum vocantis obtinuit, neque Esau ex meritis antea suis illam amisit, quid diceremus, quid poterimus dicere, & ad huiusmodi objectionem respondere, quæ statim sequitur: *Nunquid iniquitas est apud Deum*] .i. qua ratione poterimus Deum à culpa defendere, atque astruere quòd non sit reus iniquitatis, qui gratiam scilicet suam subtrahendo ei qui nondum meruit eum reprobum fecit? Sic enim dictum est, Cum nondum nati fuissent aut aliquid boni, &c. *Absit*,] inquit statim Apostolus ex sua parte, vt videlicet villo modo iniquitas credatur vnquam in Deo esse, sed priùs quidẽ quàm hoc ostendat quod propter objecta non sit Deus iniquus dicendus, ipsam adhuc objectionem more boni argumentatoris corroborat, vt quantò validior fuerit obiectio, tantò difficilior ac mirabilior appareat postmodum solutio. *Mors verò*,] Ac si diceret, Bene quæsitum est ad propositam quæstionem, vt videlicet Deum à culpa defendere valeamus, & penitus ex ipsis quoque scripturæ testimonijs in talibus culpabilis atque inexcusabilis videtur Deus, cum habeat in potestate quibuscunque velit misericordiam impendere qua saluẽtur, & sine eius misericordia nemo saluari possit. Quod vero hanc habeat potestatem præmittit dicens: *Miserebor*, &c. Quod verò non nisi præueniente misericordia eius quisquã saluari queat, statim adiungit dicẽs, *Igitur non volentis & currẽtis. Cuius misereor*] prædestinando, antequam .s. vllum sit hominis meritũ, *miserebor*, postea vocando eum per internam inspirationem, & ei denique cuius miserebor vocando misericordiam præstabo, in ipso scilicet supernæ vocationis brauiò. Ergo, inquit Apostolus ex persona componentis, h. subaudi, diuinæ col-

latio misericordiae, non est hominis quantumcumque eam *volentis neque currentis*] .i. quantumcumque festinantis atque nitentis ad eam obtinendam, sed tamen *Dei misericordis*] .i. non est in potestate nostra eam accipere, sed in manu eius eam dare, ut per hoc astruendum videatur neminem esse in culpa si ab ea sit alienus misericordia, non eum qui largiri eam habuit nec voluit.

DICIT enim] Ostendit à contrarijs quòd misericordis est Dei quod homines saluantur: quod obdurantis est quod dānantur, sicut in Pharaone ex ipso Dei testimonio patet. Nec dicit tamen obdurantis, sed quasi impellentis ad malū, cum ait: *Excitavi*. Et ut culpam Dei augeret, addit: *Ut ostendam in te, &c.* quasi ideò damnaret alios Deus, ut se glorificet, & gloriam suam in morte aliorum quærat, quod iniquissimum videtur. *In hoc ipsum*] .i. ad affligendum populum vel persequendum, siue etiam me non exaudiendum, sicut scriptum est: *Indurabo cor Pharaonis. Excitavi te*] .i. resistendo tibi feci magis exardescere malitiam tuam contra me, ut sicut scriptum est: *Qui iustus est amplius iustificetur*. Per quod quasi aurum in fornace tribulationis purgatur, & *qui in sordibus est amplius sordescat. Virtutem meam*] idest potentiam, tam in plagis scilicet Ægypti quàm in submersione Ægyptiorum. *Ut per hoc annuncietur nomen meum*] idest dilatetur notitia potentiae meæ ubique terrarum. Quod dicit ut per hoc magis effectiuū esse quàm causatiuū videatur. Quomodo solet dici de aliquo, exiuit ut moreretur. i. exiuit, & mortis nō consecutus est effectus: ita & hic dicitur excitavi te, ac per hoc postea ostendi in te virtutem meam .i. in his quæ egi circa te, & tuos.

ERGO cuius vult] .i. Et ita apparet, inquit Apostolus, ex persona adhuc opponentis, quòd cuius vult miseretur, & quem vult indurat .i. pro velle eius atq; arbitrio potius quàm pro meritis suis homines vel saluātur per eius misericordiam, vel damnantur per eius in peccatis suis indurationem, quam videlicet obdurationem ipse non miserando efficit, ut sic diuino totum arbitrio de saluatione vel damnatione hominum tribuendum esse videatur. *Dicis itaque mihi*] Inquit Apostolus ex propria persona, vel quorumlibet fidelium Deum in omnibus laudantiū .i. tu aliquis quicumque sis rationabiliter dicere

dicere videris, & opponere, vt supradictis testimonijs & rationibus id scilicet quod sequitur: Quid adhuc queritur. j. conqueritur Deus. i. vnde potest iustè querimoniam vllam aduersum nos mouere, de offensis scilicet nostris, quia omnis videlicet culpa eius sola vel maximè videtur accidere, cum vt dictum est quos vult induret, & vt nunc dicitur, voluntati eius nemo queat resistere. Adhuc .i. post tam manifesta testimonia vel rationes in accusationem illius, *Voluntati eius*. i. dispositioni, de qua scriptum est, *Quaecunque voluit fecit*. Alio etiam modo dicitur Deus velle, non disponendo scilicet, sed consulendo nobis, vt faciamus per quæ saluemur iuxta illud. *Quoties volui congregare, &c.* Et quia vult omnes saluos fieri i. consulit vt faciant.

O homo tu.] Hoc loco Apostolus suprapositis objectionibus, quæ Deum penitus in culpam trahere videntur, ex sua parte respondet, easq; sufficienter dissoluit congrua de figulo inducta similitudine. Dicit itaq; questione quæstionē dissoluens & satisfaciens, *ô homo*. i. carnalis & potius animalis quàm spiritualis, qui hucusque in Deum inuectus es, quasi eum de iniquitate arguendo, sicut ibi inceptum est: *Nunquid iniquitas apud Deum?* Et postea exemplis vel rationibus exaggeratum est: *Tu quis es*, inquam, *qui respondeas Deo*] .i. qui iustificas te, qui Deum modis supradictis accusas, ipsi responde vt te ipsum defendas ab inconuenienti, si te ipse scilicet ita interroget, dicens: *Nunquid dicit*] .i. iustè potest conqueri de figulo quod tale ipsum fecerit, *Figmentum*] .i. vas de luto fictū. i. compositum. Fingere namq; cōponere dicitur. *An non habet potestatem*] .i. non licet figulo sine iniuria aliqua, quam vasi .s. inferat, *aliud quidem vas facere in honorem*] .i. ad aliquod honorabile officium, *aliud in contumeliam*] .i. ad aliquod vile & abjectum ministerium? Et hoc est, *Ex eadem massa terre*] idest etiam si nulla sit huius contumeliæ causa ex qualitate materiæ quæ est eadem. *Figulus luti*] .i. formator humidæ & mollis terræ, non creator ipsius materiæ. Ex quo quidem apparet eum minus iuris habere in opere suo quàm Deus habeat in suo, qui non solum formator, sed etiam materiæ creator est. Quicquid ad proposita homo iste respondeat, quasi cornuto vulneratur stillo. Si enim respōdeat quia non habet figulus hanc potestatem, penitus officium damnat

figulorum, & vtilitatem publicam, & commune commodū atque necessarium impudenter accusat. Sin autem quod manifestum est eligat, vt videlicet sine iniuria aliqua, quam vasis contumeliæ inferat, ea faciat talia, liquet similiter, immò multo magis Deo licere quocunq; modo voluerit creaturam suam tractare atque disponere, qui obnoxius nullo tenetur debito, antequam quicquam illa promereatur. Alioquin vniuersa animalia ad laborem creata rectè aduersus eum murmurare & conqueri possent, quare ipsa scilicet tantum ad laborem & ad seruitium hominum condiderit, cū huiusmodi afflictionem, quæ vsque ad mortem perseuerat, ipsa non meruerint. Quod si ad glorificationem sui, vel ad aliquam vtilitatem hominum, hoc est ad laborem creata esse rectè cōceduntur, eadem profecto ratione concedendum est quibusdam merito Deum gratiam suam subtraxisse, nec eos ab iniquitate liberasse, cū nulla sit iniquitas qua Deus optimè non vtatur, & nihil accidere sine causa permittat, ipso etiam secularis sapientiæ iudicio. Vnde & Plato in Timæo suo; Nihil fit, inquit, cuius ortum non legitima causa, & ratio præcedat. Quis enim fidelium nesciat quàm optime vsus sit summa illa impietate Iudæ, cuius execrabili proditione totius humani generis redemptionem est operatus? Multo profectò vtilius est operatus in nequitia Iudæ quàm in iustitia Petri, & huius opere malo quam illius bono longe melius vsus: est nō, inquam, quantum ad Iudam pertinet, sed ad communē omnium vtilitatem, quæ familiari semper est præponenda. Prædicatione quidem Petri & exemplo vitæ aliqui conuersi sunt & saluati, sed illa Iudæ traditio in salutem omnium conuersa est, quæ à Patre quoque & filio pariter facta est, sed intentione diuersa. Ita etiam quantæcumque fiant malitiæ, diuina dispositione optimè ordinantur, & in omnibus quæ facit vel facere permittit, causas ipse nouit, licet occultas nobis & inuestigabiles, quia sic .s. eum facere vel permittere conueniat. Alioquin quædam irrationabiliter faceret vel permetteret.

R E C T E autem querendum arbitror, etsi iniuriæ Deus argui non possit, quod aliquibus gratiam suam dare nolit: quomodo tamen iniquis hominibus, quibus ipse gratiam dare noluit vt saluarentur, imputandum sit quod damnantur,

ut videlicet sua culpa damnari dicantur. Aut si nulla eorum culpa est, quo merito suo ipsi damnari dicantur à Deo, qui unicuique reddit secundum opera eius. Sed quæ rursus culpa est hominis si non saluetur, cui Deus gratiam per quam saluaretur nunquam dare voluit, nec ipse sine illa potuit? Sed fortasse quis dicat, quòd culpa eius sit quòd Deus gratiam ei illam dare noluerit, quam illi æqualiter obtulit sicut & iustis, sed oblatam ipse accipere noluit. Ad quod respondeo, quòd nec ipsum accipere sine gratia Dei potest esse. Quia quidem gratiam accipiendi oblatum donum, cum Deus illi eam dare noluit, nec ipse sine hac gratia queat illud accipere, falso id culpæ eius ascribitur quod oblatam gratiam non accepit: veluti si medicus ad infirmum veniens potionem offerret qua curari ille posset, sed nequaquam infirmus ad suscipiendum medicamentum erigere se valeret, nisi ipse quoque medicus eum subleuaret: quæ est culpa infirmi si curationem oblatam non suscipit, aut quæ est commendatio medici in offerendo, si efficaciam medicaminis auferat non subleuando? Dicimus itaque non esse necesse * in singulis bonis operibus nouam nobis gratiam à Deo impertiri, ut nequaquam scilicet bona operari vel velle possimus sine nouo diuinæ gratiæ præeunte dono, sed sæpe Deo æquale gratiæ suæ donum aliquibus distribuyente, non eos tamen æqualiter operari contingit, immò sæpe cum minus operari qui plus gratiæ ad operandum suscepit. Ut enim de amore vel desiderio temporalium rerum euenit, ita de veris & æternis bonis accidit. Venit præpotēs aliquis, & opes suas aliquibus egenis pariter exponit in mercede atque offert, si quod eis præcipit impleuerint. Alius itaque ex eis desiderio ostensæ & promissæ sibi mercedis accensus laborem operis arripit ac perficit. Alius autem cum piger sit ac magni laboris impatiens, tantò minus desiderio illo accenditur, quantò ampliùs laboris magnitudine deterretur, ac sæpe id euenit ut qui fortior est corpore, ignauior sit mente, & qui pauperior est pigrior existat. Quid est ergo quod cum æqualiter ostensæ sint & oblatae pro mercede vtriusque diuitiæ, alius desiderio earum accensus laborem tolerat ut dictetur, alius laborare negligit, & diutinam magis eligit paupertatem quàm ad horam sustinere laborem? Quid est hoc quæso, nisi huius probitas & illius ignauia? Quid amplius.

* Super hoc videtur fuisse notatus Abaelardus. Impossibile enim ei fuit, quòd diceret liberum arbitrium per se sufficere ad aliquod bonum. Sed longe aliud dicitur, scilicet sine noua gratia, non tamen sine gratia.

vni quàm alteri diues ille fecit , qui vtrisque pariter parem
 mercedem exhibuit & promisit ? In isto , inquires , tamen de-
 siderium accendit, vt laboris eum patientem efficeret & con-
 summátorem. Sed hoc, inquam, ex actione illa diuitis conse-
 cutum est, non aliquid de ipsa actione est .i. non eius aliqua
 pars est. Quod ergo impedimentum in altero habuit, quod
 similiter eum non permouet ? Nullum profecto ostendere
 poteris, nisi eius ignauia, qui laborē renuit. Sic & Deo nobis
 quotidie regnū cœlorū offerente, alius regni ipsius desiderio
 accensus in bonis perseuerat operibus, alius in sua torpescit
 ignauia. Æquè tamen Deus vtrisque offert illud, & quod suū
 est efficit, tantumq; erga vtrumq; operatur regni ipsius beati-
 tudinem exponendo & promittendo, quòd ad desiderium
 vniuscuiusque accendendum sufficiat, absque noua alia gra-
 tia apposita. Quo enim maior esse merces cognoscitur, magis
 vnūquodq; naturaliter suo allicitur desiderio, præsertim cum
 ad ipsum obtinendū sola sufficiat, multoque minori impensa
 vel sudore seu discrimine ab omnibus perueniri possit, quàm
 ad acquisitionem terrenorum regnorum. Ad desiderium ita-
 que nostrum in Deo accendendum, & ad regnū cœleste con-
 cupiscendum, quam præire gratiam necesse est nisi vt beatitu-
 do illa, ad quā nos inuitat, & via qua peruenire possimus, ex-
 ponatur atque tradatur ? Hanc autem gratiam tam reprobis
 ipse quàm electis pariter impertit, vtrosq; .v. de hoc instruendo
 æqualiter, vt ex eadē fidei gratia, quam perceperunt, alius
 ad bona opera incitetur, alius per torporis sui negligentia in-
 excusabilis reddatur. Hęc itaq; fides quæ in isto per dilectio-
 nem operatur, in illo iners & segnis atque otiosa vacat; gratia
 Dei est quæ vnumquemque electum præuenit, vt bene velle
 incipiat, ac rursus bonæ voluntatis exordium subsequitur, vt
 voluntas ipsa perseueret: nec necesse est vt per singula quæ
 quotidie noua succedunt opera, aliam Deus gratiam præter
 ipsam fidem exponat, qua .v. credimus pro hoc quod facimus
 tantū nos præmium adepturos. Nam & negociatores seculi
 cum tot & tantos sustineāt labores, vna spe mercedis terrene,
 quam ab initio conceperunt, omnia tolerant, & cum diuersa
 operentur, non diuersa spe ad illa permouentur, sed vna &
 eadem trahuntur.

Quod si volens. Ostendit Apostolus cōgrua similitudine

Inducta de figulo Deum nequaquam iniuriæ argui posse, si aliquibus gratiam nolit dare, per quam saluentur, sicut Pharaoni vel Esau, de quibus objectio præcessit. Nunc verò ad ipsam Dei commendationem conuertit hoc ipsum quod de eis actum est, ostendendo .s. Deum multa patientia sua malitiæ Pharaonis sustinuisse vt resipisceret, & cum illum incorrigibilem omnino monstrasset malitia eius, vindicta ad communem aliorum vtilitatem optime vsum fuisse, vt. v. populus ille liberatus. i. Iudæus siue vniuersus mundus hoc audiens timore saltem poenarum à malo coerceatur, & ad bonum inuiteatur. Continuatio. Sicut ostensum est, non est arguendus iniuriæ Deus, si quibuscunque velit gratiam suam non conferat, qua saluentur. Neque tu homo, qui Deum primitus arguebas, habes quid ad eum respondeas de præsentis similitudine pulsatus; sed multò magis vnde eum laudes, cùm in his etiam, in quibus tibi maximè crudelis videtur, eius sit misericordia prædicanda. Et hoc est, *Quod* .i. sed quid respondeas vel dicere poteris, cùm ipse in hoc, quod de Pharaone fecit *nolens* ad alios impios deterrendos, *Ostendere iram suam* .i. vindictam, quam exercet in impijs, & potentiam suam in miraculis, quæ fecit tam in plagis Ægypti quàm in submersione Ægyptorum. *Sustinuit in multa patientia* .i. per multam suam patientiã, *vasa iræ* .i. diu tolerauit iniquos illos, cùm ipsi penitus ab eo deleri mererentur. Vasa iræ dicit eos, qui omnibus vicijs pleni sunt, quibus statim irascendū est. Et hoc est quod subdit determinans, *apta in interitum* .i. digna penitus deleri. *Sustinuit, inquã* nō sine causa, sed propter hoc vt secundū hoc quod abundat oppressionis malitia, abundaret in oppressis diuinæ miserationis potentia, qua suos eruat ad glorificationem sui. *Diuitias gloriæ* .i. excellentiam potentia suæ, qua glorificetur in *Vasa misericordiæ* .i. erga electos suos, quos misericorditer cōseruat, ne aduersitatibus frangātur: Bene vasa iræ & vasa misericordiæ dicit secundum propositam de vasis figuli similitudinem. Quæ .s. vasa misericordiæ *preparauit in gloriam* .i. prædestinauit ad æternæ vitæ beatitudinem, vel in gloriam suam, vt & ipsi eum laudando de misericordia percepta glorificent. *Quos & vocauit.*] Iuxta rei significationem, non præmissi nominis proprietatē, relatiuum nomē supponit dicens: quos, masculino genere, non quæ neutro, cùm tamen

permissum nomen quod est & vasa, ad quod relatio sit neutri sit generis. Tale est & apud virgiliū mutatio generis secundū significationē cū dicitur, *Præste sub ipsa*. Quos. s. & ipse vocauit. i. interna inspiratione ad se traxit, nō per se ad eū venerūt, maximè & in istis, quæ omnibus exhibuit, de Pharaone miraculis, sicut supradictum est, vt enuntietur nomen meum in vniuersa terra. *Non solum ex Iudæis*] inquam vocauit eos, sed etiam *ex gentibus*] cū videlicet audissent gentiles quantum manum in Pharaonem exercuisset, sicut & Raab receptis exploratoribus confitetur, *sicut in Osee*] .i. per Osee Prophetam dicit ipse, scilicet Dominus. De vocatione gentium primo testimonium inducit, præterea de Iudæorum ibi. *Isayas autē &c. Vocabo*] .i. gētiles, qui prius mihi subiecti nullatenus erāt, timore terribilium mihi subiugabo, quia initium sapientiæ timor Domini, sed consummatio caritas, cū de seruis fiunt amici, sicut & mox adiungit dicens: *Et non dilectum dilectum*] .i. postmodum eos de seruis in amicos transferam, sicut scriptum est, *Iam non dicam vos seruos, &c. Vocabo*. i. veraciter vocari faciam, *& non misericordiam consequutam, misericordiam consecutam.*] Multo plus est filium fieri quā misericordiam cōsequi. Illud quippe inchoationis est, hoc est perfectionis, misericordiam consequimur cum nos Deo vocante, & nisi conuertamur comminante, ad ipsum conuertimur, ne ab ipso puniamur. Filij vero efficimur cū iam perfecta caritas foras mittit hunc timorem. Duobus itaque præmissis duo hæc sigillatim referuntur, quasi confirmatio & expositio præmissorum. *In loco*] .i. in terra Gentilium, vbi nec plebs mea primitus erat, hoc est nec etiam per timorem mihi subiecti. *Fily*] .i. filiali reuerentia seruientes. *Dei viui*] dicit differentiā Deorum, quos scilicet antea gentilitas vario delusa errore, vel ex insensatis rebus, vel ex mortuis hominibus constituerat.

Isayas autem] supradictam vocationem gentium Osee propheta scilicet ita Isayas apertè de futura conuersione Iudæorum, *Si fueris*] quamuis innumerabiles fuerint Iudæi in sua sterilitate .i. in infidelitate perseuerantes. *Sicut arena maris*] quæ innumerabilis est & sterilis. *Tamen reliqui eorum saluabuntur*] quos videlicet sibi Dominus reliquit alios à gratia sua repellens atque abijciens à se, vel reliquias dicit populi simplices & idiotas, qui abiecti sunt inter eos, sicut Apostoli

fuerunt, & multi de turba Christo adhaerentes, sicut & ipsi profitentur impij dicentes: *Nunquid alicui ex principibus crediderunt in eum?* Sed turba hæc quæ non nouit .i. m. & c. Quia vero aliquis quæreret cuius prædicatione ista vocatio fiat vtriusque populi, Respondet prædicatione scilicet propria ipsius, Domini incarnati. Et hoc est, *Quod faciet Dominus*] per semetipsum *verbum breuiatum super terram*] .i. prædicationem compendiosam scilicet quod dicitur sapiens paucis innotescit verbis: *Super terram*] .i. quæ super & omnem terrenæ & humanæ sapientiæ doctrinam, sicut & magnus ille Domini Ioannes profitetur dicens: *Qui de terra est, de terra loquitur, & c.* Quomodo autem superemineat hæc doctrina cæteris omnibus præmittit dicens, *Quia verbum consummans & abbrevians*] videlicet faciet. Consummare est perficere, quando videlicet id quod inchoatum est ad perfectionem ducitur. Euangelica itaque prædicatione, quam per semetipsum Dominus attulit, ædificationem necessariam in veteri lege inchoatam consummauit .i. perfecit, addendo scilicet quæ ad plenitudinem iustitiæ deerant, sicut ipsemet profitetur dicens: *Nisi abundaueris iustitia vestra, & c.* Consummans in æquitate .i. supplens quod de equitate minus fuerat .i. quod de perfectione iustitiæ atque virtutum defuerat. Et prætermis- sis innumeris obseruantijs carnalibus, abbrevians scilicet in duobus præceptis caritatis ipsam æquitatem, vbi videlicet diuiti illi, qui de salute animæ suæ consuluerat eum, respondit: *Hoc fac & viues. In his enim duobus mandatis tota lex pendet & Prophetæ.* Possumus etiam dicere quantum ad multitudinem verborum in nouo testamento, quod vetus præceperit abbreviatum, quia pauca sunt quæ in monte Dominus cū nouum traderet testamentum Apostolis dixit, ad comparationem eorum quæ per Moysen præcepit: & parua sunt quatuor Euangeliorum volumina ad comparationem quinque librorum Moyli. Magna itaque est Euangelij commendatio, vt & in sententia sit perfectius, & in verbis breuius. *Et sicut prædixit idem Isayas, nisi Dominus (abaoth)*] .i. exercituum, qui aduersum regnum diaboli suos quotidie dirigit bellatores, sicut scriptum est, *Vt castrorum acies ordinata. Reliquisset nobis semen*] .i. cū pro culpa sua nostrum populum .i. Iudaicum excrucaret, & à gratia sua remoueret, & quasi ab arca sua cor-

ruptam annonam proijceret, retinuissetque sibi aliquos tanquam semen, sicut Apostolos & ceteros Ecclesie primitiue fideles. *Sicut Sodoma fuisset & sicut Gomorra*] Vbi pariter cum prole sua parentes sunt exterminati, ut nec semen relinquerent. In semine conseruatur utilitas prioris annonae, & antiqua reuiuiscunt & renouantur, & ex paucis multa procreantur. Sic in Apostolis & ceteris primitiue Ecclesie membris precedentium patrum utilitas est recompensata, & reuixit religio, magnaue inibi diuinæ messis per vniuersum mundum pullulauit utilitas. *Quid ergo.*] Quandoquidem non dilectam fecit dilectam, & nunc est conuerso videmus dilectam factam non dilectam. i. electo populo gentili totum fere Israel reprobatum esse, quia causa id accidisse dicemus, de reprobatione. v. populi sui? Et hoc est, quid dicemus, super hoc. s. quod gentiles, qui primitus non nouerant iustitiam. i. fidem quæ ad iustitiam perducit. *Nunc apprehendant iustitiam*] illam. s. veram animi iustitiam quæ ex fide est, non quæ in exterioribus consistit operibus. *Israel vero*] .i. populus Iudæorum *secundo legem iustitiæ*] .i. exercendo authoritatem corporalis vindictæ, *non peruenit in legem*] .i. non recepit perfectam Euangelij doctrinam, quæ sola iustificat. Quare hoc, inquit? quia non apprehendit, subaudi iustitiam, quæ ex fide est, sed quasi iustitiam non verè iustitiam, quæ ex operibus. i. legis litteram occidentem sequens in exterioribus & carnalibus obseruantijs, spirituali & mystica intelligentia quæ ex fide Christi ædificat, non est iustificatus, & iustificatus sicut scriptum est: *Iustus ex fide uiuit.* Et hoc ideo quia *offenderunt in lapidem offensionis*] .i. per Christum scandalisati sunt quem propter humanæ naturæ infirmitatem Deum minimè crediderunt. Solent pedes impingere atque offendi in paruis lapidibus, qui præ paruitate sua vix aduerti possunt. Sic & Christus pro paruitate suæ humilitatis, quam mundo exhibuit, à Iudæis contemptus lapis eius offensionis factus est, ut in eum Iudæi non credentes, ad ea quæ diceret indignarentur. *Sicut scriptum est*] in ipso videlicet Isaya, *Ecce pono*] verba Patris sunt & promissio de filio suo mittendo, *Ecce pono.* .i. iam apud me ponendum delibero, in Ecclesia humile fundamentum, sed forte. i. verbum incarnatum. Quia enim lapis est, forte: quia offensionis, humile, & ab offendentibus in eum conculcandum. *Omnes*] siue Iudæus siue gentilis, *in eum*] non ei tamen, vel cum,

non confundetur] .i. non erubescet frustratus sua spe. Ideo dicit lapidem offensionis, & petram scandali, & hoc in Prophetis frequenter euenit, vt in eadem sententia varientur verba. *Sion*] .i. specula dicitur Ecclesia, quæ in altum se per desiderium attollens omnem suam sollicitudinem quam habet actionem circumspicit, ne supernum eius impediatur desiderium.

FRATRES.] Ne videretur Apostolus, qui à Iudæis recesserat, ex aliquo odio magis quàm ex studio corrigendi eos vituperasse, ostendit in effectu quantum caritatis affectum in eos & compassionem habeat, dicens se intentum pro salute eorum Deum exorare. Cum enim dicit, *Voluntas cordis & obsecratio*] ex deuotione cordis orationem procedere demonstrat, & magis eam in deuotione quàm in verbis consistere. Ac si dicat; Licet sic eos vituperem, tamen o vos fratres orare pro illis vt saluentur non desisto. Vnde & Ecclesia singulis annis specialem pro Iudæis orationem habet, vt Deus auferat velamen à cordibus eorum, & agnita veritate, quæ Christus est, ad ipsum conuertantur. Fratres eos, quibus scribit Apostolus, dicit, secundum quod Veritas ait: *Vnus est enim pater vester qui in celis est*, vt eius correptionem quasi à fratre & cōpare non superiore libentiùs susciperent. Vnde hæc & in Ecclesia inoleuit consuetudo, vt in exordijs lectionum, quæ de Epistolis Apostolicis sumuntur, fratres prænuncietur. Quia autem pro Iudæis orandum est, vel eorum maximè errori sic compatiendum, supponit dicens, *Testimonium enim*] Ex me ipso qui olim similiter faciebam. *Æmulatio est non secundum scientiam*] .i. zelum in Deum non rationabilem nec bonum, quia erroneum putantes scilicet quod non est iuxta illud Veritatis, scilicet. *Venit hora n. o. q. v. a. o. s. p. d. & hæc facient, quia non nouerunt Patrem, neque me.* Zelus siue bonus siue malus dicitur feruor quilibet atque commotio accensi animi, ad aliquid gerendum. Quomodo autem non secundum scientiam statim adiungit, dicens: *Ignorantes enim*] quæ Deus approbat, quæ est videlicet ex fide Christi, & suam] .i. quam ipsi pro iustitia reputant & approbant, in obseruantijs scilicet carnalibus, *volentes statuere*] .i. immobilē conseruari, *Iustitia Dei*] .i. illis Dei præceptis quæ obediētes iustificant non sunt subiecti .i. obediētes; quale est illud: *Creditis in Deum? & in me credite. Finis enim*] verè ignorantes Dei iustitiam, quia

CAP. X.

fidem Christi non habent, qua unusquisque fidelis iustificatur. Quod verò ex fide Christi quisque iustificetur, & non ex sua iustitia, legalium scilicet operum, sic dicit. *Quia omni credenti*] .i. unicuique fideli, *Christus*] .i. fides Christi, *ad iustitiam*] .i. ad hoc ut per ea iustificetur, vel finis legis .i. legalium operum, quæ gaudium in illis operibus spem salutis constituunt, Christus eis non proderit. Vnde & ad Galatas dicit, *si circumcidimini, Christus vobis nihil proderit*. Et per semetipsum Christus dicit, *usque ad Ioannem lex & Propheta*.

MOYSES enim.] Ostendit ipsius legislatoris Moysei testimonijs ex iustitia legis impleta, in operibus scilicet illis carnalibus, neminem assequi vitam æternam, nec fuisse promissam, sed potius ex fide Christi. *Iustitiam quæ ex lege est, qui fecerit homo*] .i. legalia opera impleuerit, *Viuet*] super terram s. *in ea*] .i. propter ipsius legis obseruantiam vitæ huius bonis fructur, non æternæ. *Quæ autem ex fide est*] .i. quoniam fides de non apparentibus est, vitam illam æternam, quæ in Christo abscondita est, potius promittit, quàm præsentem; & inuisibilia potius, quàm visibilia bona. Et hæc est illa iustitia, quæ ex fide est Christi. i. ipsa fides in Christum habita nos iustificans. Sic loquitur ibidem, scilicet in Deuteronomio, per ipsum Moysen, qui per eam verè iustus erat, nos corroborās, ut in nullis deficiamus vel desperemus aduersis. Hoc est, ipse ex illa iustitia, quam iam habebat, sicut dicit. *Ne dixeris in corde tuo*] .i. non cogites tu homo quicumque, vel tu popule Israel, *Quis ascendet in cælum*] .i. ne desperes de vita illa cœlesti, in qua fides Christi consistit, & cuius nos promissione maximè Christus allicit, quasi ad vitam illam conscendere humana minimè possit natura: quia hoc esset, inquit Apostolus, ex sua parte Christum ipsum ab illa vita deducere .i. credere nec ipsum illuc ascēdisse in humana quam assumpsit natura. *Aus quis descendet in abyssum*] .i. usque ad ipsum etiam infernum, aut quos videlicet non liberauit ad cœlestia secum perducatur, quia hoc esset Christum in abyssum, hoc est credendo reducere Christum siue retrahere ab illo descensu, quo fideles suos mortuos ab inferno liberauit & secum ad cœlestia transtulit. *Sed quid dicunt*] .i. inquit Apostolus, attende quod ibidem subiunctum est ab ipso Moyse, hoc videlicet, *prope est verbum, &c.* .i. facile est te in Christo hoc profiteri completū

vel credere, de assensu scilicet hominis ad cælestia, & descensu hominis ad inferna. Ideò facile quia rationi non est aduersum, sed maximè congruum diuinæ clementiæ, hoc est, inquit Apostolus *verbum fidei*] .i. verbum de eo quod fides habet, & de eo quod creditum fideles facit. Quod verbum scilicet nos Apostoli prædicare missi sumus. Et merito, quia in huius verbi confessione & fide salus nostra consistit.

Et hoc est, *quia si tu*] quicumque sis, &c. Ore suo confiteatur, qui quod enunciat intelligit. Corde suo credit qui cor & voluntatem suā applicat his quæ credit, ut ipsa videlicet fides eū ad opera trahat: veluti cum quis credendo Christū à mortuis resurrexisse in vitā æternā, satagit prout potest ut vestigia eius sequēdo ad eiusdē vitæ beatitudinē perueniat. Notandū verò frequēter euenire, quòd cum de veteri testamēto aliqua in nouo testimonia inducuntur, facile est inducta testimonia applicari ad id confirmandū ad quod inducta sunt, si per se ipsa considerentur. Si vero loci illius vnde sumpta sunt circumstantias simul attēdamus, & quomodo superiora scripturæ vel inferiora ei quod inde sumptum est coherere queāt, plurimū nostra angustatur intelligentia. Quod in hoc quoque ipso, quod nunc expositum est, contingit testimonio. Quod ut diligentius intueamur, ipsius Scripturæ verba latius replicemus. Scriptum est enim in Deuteronomio cap. LVII. cum post legem datam Moyses ad obseruantiam legis populum exhortaretur his verbis: *Mandatum hoc quod ego tibi præcipio hodie, non supra te est neque procul positum, nec in cælo situm ut possis dicere: Quis nostrum valet conscendere ut deferat illud ad nos, ut audiamus atque opere impleamus? Neque trans mare positum ut causeris & dicas, Quis ex nobis transfretare poterit mare, & illud ad nos usque deferre, ut possimus audire & facere quod præceptum est?* Item cap. LVIII. *Sed iuxta est sermo valde in ore tuo, & in corde tuo, ut facias illum.* Ecce ex his verbis si ea iuxta litteram sequamur, hoc totum Iudæos admonere videtur, ut non cōquerantur de difficili intelligentia legis, quasi per ænigma aliquid obscurè sit dictum, sed omnia ita apertè præcipi, ut per se queant intelligi, nec aliquam habere excusationem si præceptis differat obedire, quia ea non valeat intelligere. Sed quoniam Apostolum legis peritissimum maximè nos sequi conuenit, oportet nos iuxta eius sensum ad fidem Christi

quæ dicta sunt accommodare. Sciens itaque Moyses legem ipsam, quam dederat, mysticis & obscuris sensibus esse plenā, qui non nisi per aduentum Christi, & assensionem eius aperiendi essent, sicut scriptum est. *Et incipiens à Moyse & omnibus Prophetis, interpretabatur eis scripturas*, & sicut ipse dicit, *nisi ego abiero, &c.* Et iterum, *Paracletus autem, &c.* admonet populum ne desperet de spiritali illa legis intelligentia tanquā aperienda, quasi non esset mundus habiturus qui de cœlo veniret, ut sensum Dei quem in lege habuerat aperiret, quia reuera filius Dei de cœlo venturus erat, & iterum assensurus ut hanc mundo intelligentiam ministraret tam per seipsum quā per Spiritum sanctum post assensionem ad hoc ipsum mittendum. Notandum verò hoc quod adiunxit Apostolus, *aut quis descendet in abyssum*, nequaquam in suprapositis Moyse verbis contineri, sed pro hoc ibi esse dictum, *neque trans mare positum, &c.* Hæc itaque verba, vel ipse Apostolus sensum prosecutus adiunxit, vel forte iuxta aliam, qua nunc utimur, translationem, ea tantum collegit quæ congruere propositæ sententiæ vidit. Potest quippe quod dicitur, *non est trans mare positum*, ita intelligi ut non sit in abyssu. i. in inferno locatum: ut videlicet propter ipsum illuc oporteat aliquem descendere, & mare huius seculi ut ad illud profundum inferni perveniat penetrare ut tale sit ultra mare. Ac si dicatur deorsum post mare. i. in illa ulteriori amaritudine inferni post miseriam præsentis vitæ.

CORDE enim.] Benè dixi, confitearis & credas, quia utrūque necessarium est, quia corde creditur ad hoc ut iustificetur ipse qui credit, quia sine fide impossibile est Deo placere. Et postea confessio sit de hoc ipso quod credit ut Ecclesiæ fidelis aggregetur, & sacramenta eius participet. *Dicit enim*] ut superius in Isaia comprehensum est, *non enim*] dixi omnes siue scilicet Iudæos siue Gentiles, & merito quia ad hanc obtinendam salutem nihil refert diuersitas populorum dummodo vna sit fides, quia in eum credamus potius quā ei vel eū, ut supra meminimus. *Dixes in omnes*] .i. sufficiens veris omnes ditare diuitijs, *qui inuocant*] non qui vocant, Vocatio quippe exteriorum sonus est verborum, de qua dicitur. *Non omnis qui dicit mihi, Domine Domine, intrabit in regnum cælorum.* Inuocatio verò est interior clamor .i. deuotio animi ad Deū

suspirantis, de qua Moyſi dicitur, *Quid clamas ad me? Omnis enim*] ab authoritate Iſaie, *nomen Domini*] .i. notitiam eius & manifestationem deuotione postulat, de qua dicitur, *Et manifestabo ei meipsum*. Et Psalmista : *Satiabor*, inquit, *cum appa-rueris gloria tua*. *Quomodo ergo*] suum & aliorum Apostolorum officium commendat, ostendendo scilicet quam necessaria sit eorum prædicatio vt credant homines & saluentur. Continuatio. Quandoquidem qui inuocauerit saluabitur, ergo inuocandus est hominibus vt saluentur. *Sed in quem nondum crediderunt*] ergo quomodo inuocabunt? ac si apertè dicat, nullo modo *ei*] .i. non solum in eum, sed nec ei .i. præceptis vel admonitionibus eius, *Quem non audierunt*] neque per seipsum prædicantem neque per alium qui eum prædicaret, *sine prædicante* [vel ipso vel alio, *prædicabunt aliqui nisi mittantur*] sicut ipse filius à Patre, & Apostoli ab ipso filio, ita eis dicente : *sicut misit me Pater, & ego mitto vos*. Hic pseudo tangit Apostolos, qui non missi à Deo per seipsos ad prædicandum veniunt, de quibus ipsa Veritas : *Omnes*, inquit, *quotquot venerunt, fures sunt & latrones, sicut scriptum est*.] Orig. exemplum hoc de Iſaia videtur assumptum. Ambr. hoc propheta dicit Naum Apost. pedes speciosi fuerunt, quia affectus eorum à contagio terrenæ cupiditatis mundi extiterunt, & puri in Deo non quæ sua sunt de prædicatione quæretium, sed quæ Iesu Christi, nec vëtri, sed Deo seruientium. Vnde & benè eorum pedes à Domino abluti sunt, quos etiam propter hanc mysticam eorum speciositatem calceamentis abscondi prohibuit, quia deforme est quod occultatur, & vbi malè agitur lux absconditur. *Euangelizantium pacem*] .i. prædicantium atque docentium reconciliationem ad Deum. In quo etiam mysterio omni domui quæ intrarent dicere præcipiuntur, *pax huic domui. Bona*] scilicet vera, quæ nec oculus vidit, &c. In hac quidem vita pacem hanc & reconciliationem ad Deum per pœnitentiam iam assequimur, sicut scriptum est : *Conuertimini ad me, & ego conuertar ad vos*. Bona verò illa postmodum in futura vita. Vnde benè præmisit pacem, & postea bona. *Euangelio*] .i. diuinæ prædicationi.

Qui s credidit] .i. quis per hoc quod à nobis audiuit fidem habuit? Ac si diceret, nulli vel pauci, *Ergo*] .i. ex isto testimonio apparet, quod fides habetur ex auditu, *per verbum Christi*]

potius quàm nostrum, quia non ex nobis loquimur, sed ex eo quod nos ipse docuit, ut ad ipsius gloriam vel offensam specialiter spectet quicquid de prædicatione nostra accidat. *Nūquid non*] .i. potest se aliqua mundi pars excusare de infidelitate sua per ignorantiam quasi ad omnes non venerit vel ventura sit Evangelica prædicatione? Ac si diceret, nequaquam. Quod statim testimonio Psalmistæ conuincit, dicens: *Esquid*] licet non omnes obediant, *sonus eorum*] .i. fama Apostolorum siue prædicatorum Euangelij, &c. usque & *in fines orbis terræ verba* per quæ prædicabant, *Dixi in fines* .i. ad externas etiam partes mundi, quas incolæ certum est à gentilibus. Sed nunquid ideò non cognouerunt Iudæi, quod scilicet prædicatione transiit tam longe ad gentes? .i. nunquid ideò se possunt excusare quasi eis non fuerit oblata prædicatione, & hoc prædicantium culpæ imputare? Nec dicit tantum, non audiuit, sed etiam non cognouit .i. non aduertit ipsius prædicationis veritatem. Ac si diceret: Reuera fecit, licet malitiæ & inuidiæ, seu terrenæ cupiditatis zelo resisteret. Vnde & peccatum eius irremissibile in Spiritum sanctum persistit. Et hoc ipsius Moyse testimonio astruit, qui sicut primus Prophetarum scripserit, ita & prius hanc eorum malitiâ scripto etiam prophetauit. *Ego ad.*] Verba sunt Dei, *ad emulationem*] .i. per me ipsum prædicando dicit filius Dei, *Adducam vos*] in inuidiam & odium tam meipsum quam meorum. Cum autem inuidia sit odiû alieni boni, monstratur profectò eos scienter in Christum deliquisse. *In non gentem mittam vos per insipientem gentem*] .i. per dispersionem vestram faciendam ab infidelibus Romanis, faciam vos non esse populum. Non enim rectè populus vel gens dicitur, nisi hominum congregatio. *In iram vos mittam*] aliorum hominum etiam dispersos, ut duris exactionibus vos semper opprimant atque affligant. *Isaias autem.*] Non solum Moyse, sed etiam Isaias patenter de reprobatione eorum & electione gentium sic audet dicere, etsi se ab eis occidendum præuideret. *A non querentibus me*] dicit Dominus .i. à gentilibus, *Palam*] quia multo amplius Ecclesia de Deo quàm Synagoga erudita est, *non interrogabant*] .i. nihil etiam à me requirere nouerant, quem penitus ignorabant. *Ad Israel autem*] .i. Iudæos tota die .i. toto tempore prædicationis meæ, quæ verè dies & illuminatio mundi est di-

cenda, *expandi manus meas*] .i. ad eos colligendos vltroneum me obtuli, per manus .i. opera eis quotidie exhibita, à via scilicet gentium penitus declinans, vt eis omnino vacarem. *Sed contradicentem*] quod peius est modis omnibus me calumniantem.

Dico ergo.] Quia tot autoritatibus confutauerat Iudæos & nouissimè gentium electionem & eorum reprobationem manifestè prophetatā docuerat, ne hinc maximè occasione gloriandi aduersus Iudæos Gentiles in sua altercatione præsumerent, quasi intelligentes populum illum penitus esse reprobatum: incipit etiam Gentilibus hanc gloriationem & Iudæis desperationem auferre, & iam ad inuersionem gentilium redit, vt eorum quoque superbiā conterat. Continuatione. Quandoquidem tam manifestis testimonijs reprobatio Iudæorum confirmata est, dico .i. arbitror quærendum quod sequitur & soluendum. *Populum suum* .i. Iudæos ex toto repulit, vt nullum inde vltèrius assumat. Israelita .i. vidēs, non proselitus, & de genere Abraham, non Ismael vel Esau, descendens; sed per Benjamin & de generatione maledicti Saul, cuius reprobata est à regno posteritas. *Plebē suā quā præsciuit*] .i. illos quos de populo illo quondam .s. peculiari suo prædestinauit. *In Helia*] .i. vbi de Helia loquitur in lib. Reg. *Quemadmodum*] scilicet ipse Helias, *interpellas Deum aduersum Israel*] .i. orandavel conuincendo prouocat Deum ad vindictam in nequā persequentium se Iudæorum. *Occiderunt*] subaudi Iesabel, *sed erunt*] .i. à fundamento penitus euerterunt, vt idola tantum colerentur. *Sed quid dicit*] .i. putauit ita se solum remansisse, sed ipsius Dei testimonio errare comprobatur. *Reliqui mihi*] .i. non abieci à gratia mea *Baal*] .i. idolum Baal & Iesabel. *Sic ergo*] Quandoquidem de Helia exemplum induximus, ad quid inductum sit assignemus. Et hoc est quod dicit, sic etiam nunc, *Reliquia*] .i. illi quos non abiecit Dominus, *secundum electionem gratie Dei*] non merita ipsorū. *Si autē gratie*] .i. per gratiam, subaudi saluæ factæ sunt, *ia non ex operibus*] .i. ex meritis suis. Non dicit per merita, sed ex meritis, quia & gratia Dei merita Pauli & aliorū non excludit. Sed ex meritis esset, non ex gratia, si... à meritis nostris procederet, nec gratia Dei præiret, quæ fidem saltem inspiraret, vel prædicatores dirigeret. *Alioquin*] .i. si aliter, .i. con-

traſio modo quàm dico eueniſſet, id quod modo eſt gratia .i. gratis collatum, non præuenientibus meritis noſtris gratia Dei, *non eſſet gratia*] ſed meritum ſolum. Conuenienter ab Helia ſimilitudinem ad tempus noſtrum Apoſtolus induxit & conuenienti exemplo temerarium iudicium gentium cōfutare incipit, cum etiam tantum virum de conſimili præſumptione à Domino viderint reprehenſum. Scimus Ioannem Baptiſtam quaſi alterum Heliam primum Domini aduentum præceſſiſſe, & populum Iudæorum quaſi de eorum deſperaret ſalute grauiter arguiſſe his verbis, *Genimina viperarum, &c.* vt in hoc quoque tempore gratiæ de quo ſcriptum eſt, *uſque ad Ioānem lex & Prophetæ*, ea quæ nunc de Helia dicta ſunt conſonare videantur.

QVId ergo] Quādoquidē ex electione gratiæ Dei potiùs quàm ex meritis ſuis reliquiæ tantum Iſrael ſalutæ vel ſaluatæ factæ ſunt, igitur quid ſubaudi dicendum ſit patet, hoc .ſ. quod ſequitur quia *quod quærebat Iſrael*] .i. requirebat à Deo quaſi ſuum, & per opera ſibi debitum, *non eſt conſecutus*] vitā .ſ. æternam, vel æternā hæreditatem. *Electio verò*] .i. Pauli qui de populo illo per gratiam Dei electi ſunt, quod quærebat, id eſt vitam æternam, *conſecuta eſt: ceteri verò execati ſunt*] non ſolū non aſſecuti, quod quærebant, ſed ne vlteriùs credant penitùs reprobatī. *Sicut ſcriptum eſt, Dedit illis ſpiritum compunctionis*] Orig. vbi ſcriptum ſit, dedit illis Dens ſpiritum compunctionis, oculos vt non videant, & aures vt non audiant, uſque in hanc diem hætenus inuenire non potui: puto autem hoc modo dixiſſe Apoſtolum: *Ceteri vero execati ſunt, & ſicut ſcriptum eſt de illis, dedit eis ſpiritum compunctionis*, Sed ea quæ de cecitate oculorum & de auditu aurium per Iſaiam dicta ſunt: *Auditū audietis & non intelligetis, & videntes videbitis & non videbitis. Incraſſatum eſt enim cor populi huius, &c.* Nunc ergo ſenſum Iſaiæ videtur Apoſtolus ſuis ſermonibus protuliſſe. Similiter & de his faciendum quæ de Dauid ſcriptura pronunciat, *ſiat menſa eorum, &c. Spiritum compunctionis, &c.*] .i. inuidiæ & odij, quibus eorum mentes pungerentur .i. ſtimularentur aduerſus Chriſtum, & ſuos *Oculos*] .i. rationem per ſe videre non valentem, & *aures* .i. non alio docente intelligentes, *ſiat menſa eorum.*] Quod ex Iſaia vel ex Dauid videtur aſſumptum, in vtroque vnus ſenſus quodammodo expo-

nitur. Item idem quod dixit *in captionem*, in Psalmo non habetur scriptum, neque in LXX. neque in Hebræo. Et rursum in Psalmo habetur *coram ipsis*, Apostolus autem non posuit coram ipsis. *Mensa eorum coram illis*. i. scriptura veteris Testamenti eis tradita, & ab eis frequentata, unde cibum animæ intelligentes sumunt, *in laqueum & in captionem*] .i. vt laqueū, quo ipsi non alios capiant, sed capiantur, & detineantur ne via veritatis incedant, quæ ait: *Ego sum via, veritas, & vita*, dum. s. nihil ibi mysticè accipiant, sed ad litteram, quæ occidit, cuncta exponunt, vel in captionem, dum sæpe Domino vel sanctis Doctoribus confligentibus cum eis, his quæ de scriptura eis obijciuntur testimonia ita capiuntur & constringuntur, vt se expedire ab objectis non valeant. Quale est illud quod Dominus eis opposuit dicens: *Quomodo ergo David in spiritu vocat eum Dominum, &c. In scandalum & in retributionem*] hoc est in retributionem scandalum animæ suæ .i. damnationis, non salutis. Sed verbum Domini, quo ait: *Est qui accuset vos Moyses*, Et secundum quod Apostolus dicit, Et qui in lege peccauerint per legem iudicabuntur. Scandalum etiam lex eis facta est offensæ & indignationis causa cū multa Christum & suos vel dicere vel facere viderent, quæ legi contraria crederent. Vnde illud est quod dixerunt. *Nos audimus ex lege, quia Christus manet in æternum. Obscurentur*] vnde scandalū hoc procedat, vel illaqueatio supponit, ex excæcatione scilicet ipsorum, & cupiditate terrenorum, quæ semper in Iudæis maxima regnat. *Incurua*] verbum est imperatiuum, ac si dicatur. Tu Deus incurua dorsum eorum, vt cupiditate appetendi terrena non erigantur ad cœlestia. Notandū verò huiusmodi verba quæ imprecationis videntur cum à sanctis dicuntur, magis ad propheticam enunciationem quàm ad desiderium vindictæ pertinere, vt videlicet cum dicitur fiat, tale sit ac si prædiceretur. Sicut enim quandoque futuro indicatiui modi verbi imperatiue vtitur scriptura, vt *diliges Dominum* pro dilige: *Non occides*, pro non occide: ita è conuerso nonnunquam facit. Quid etiam obest si aliquis sanctus per spiritum illuminatus diuino assentiens iudicio optet fieri de vindicta etiam malorum quod rectè faciendum esse intelligit, & in diuina præfixum videt esse sententia? Velle quippo fieri quod iustum est fieri, quæ est iniustitia? Alioquin quædā

nobis displiceret iustitia, & ipsam quoque Domini sententiā cognitam haberemus exosam. Sed de hoc diligētius Theologia nostrā tractandum reseruamus.

Dico ergo] Quandoquidem sic de eorum reprobatione prophetatum: *Nunquid offenderunt Deum*] videlicet vt non tantum titubarent in fide, sed penitus *Caderent*] .i. sine recōpensatione alicuius commodi damnarentur à Deo, qui omnibus malis bene vtitur, *sed illorum delicto*] dum videlicet prædicationem Christi à se repellerent, & Apostoli ad gentes transirent, tanto facilius à gentibus essent recepti; quantò à Iudæis summis earum inimicis repullos eos & afflictos viderent, vel in hoc etiam quod dispersi per mundum in perpetuam captiuitatem pro peccato in Christum commisso fidei nostræ plurimum attestantur & magna potentia Christi præconia præbent. *Vt illos emulentur*] .i. vt deinceps è conuerso gentes faciant Iudæis quod olim Iudæi faciebant gentibus in profelitis .i. zelo Dei illos ad imitationem sui conuertant vel prouocent. Emulari aliquem est zelum .i. vehemens desiderium erga eum habere vt illum imitetur vel ille eum è conuerso, iuxta quod statim dicturus est, *si quomodo ad emulandum prouocem, &c.* *Quod si*] emulantur illos, & meritò. Quod si delicto eorum tam benè vsus est Deus .i. tanta inde consecuta est utilitas, vt vniuersus inde mundus in gentibus profecerit, quanta erit utilitas de ipsorum pariter conuersione cum gentibus? Et hoc est, *Quod si delictum illorum diuitie sunt mundi*] .i. ex delicto illorum, & reprobatione populi mundus in cæteris spiritualiter est ditatus, & *diminutio eorum*] .i. quod minus in illis modo habet mundus, de spiritalib. bonis recompensatur in gentibus. *Quantomagis plenitudo*] ei erit, subaudi, diuitiæ mundi .i. si & ipsi pariter cum gentibus mundū impleant bonis operibus, multò ampliùs ipse ditabitur. Et hoc est quidem istud, quod quidam, sed aduersatiuum, ad hoc scilicet quod primitus dixerat de eorum peccato, & nunc de conuersione loquitur: vt sic videlicet iuxta litteram continuetur ad præmissa. Ita delicto eorum ditatus est mundus in gentibus. *Quod si delictum illorum, &c.* *Vobis enim*] Et quasi aliquis de hac plenitudine futura desperaret, iam penitus Iudæos vltèrius à Deo reprobatos esse ostendit, proposito exemplo desperandum non esse, quia & ipse ad hoc quotidie

laborat, cum sit Apostolus gentium, ut etiam aliquos ex Iudæis conuertat. Quod quidem est officium suum prædicandi scilicet honorare .i. maximè commendare, cum ex abundanti hos etiam dico lucretur, quorum Apostolus .i. prædicator non est ipse constitutus *Apostolus gentium*] Et si videlicet minimè Iudæorum, *si quomodo*] tam verbis quàm exemplis, tam autoritate quàm ratione, tam aperta veritate quàm utili simulatione vel dissimulatione, de qua alibi dicit, *factus sum Iudæis Iudæus, & omnibus omnia factus ut omnes lucrifaciam. Caræm meam*] .i. Iudæos, qui de genere meo sunt, *ad emulandum*] .i. imitandum me in conuersione, *Aliquos*] saltem si non multos. *Si enim*] Et merito in hoc persisto, ut etiam eos conuertam, quia cum amissio illorum reconciliatio sit mundi in gentibus, ac per hoc utilis, multo mirabilior & utilior erit assumptio eorum quæ erit quasi mortuorum resuscitatio. Mirabilius est enim mortuum suscitare, quam illum qui non vixit animare .i. vitam reddere quàm dare. Quotidie enim scimus in vteris matrum naturaliter carnes animari nec miramur, mortuos autè reuiuiscere miraculi esset potius quàm naturæ. Gentes itaque conuersas ad Deum, quarum populus antea per fidem non vixit, animari .i. viuificari potius dicere possumus quam resuscitari. Iudæos verò, si redeant ad Deum, & conuertantur corda Petrum in filios, quasi mortui suscitantur, cum populus ille .s. antea per fidem vixerit. Et certè difficilius est iustum cum lapsus fuerit suscitare, quàm qui iniquus perstiterit ad iustitiam trahere. Quod quotidie in ipsis conuentibus Religionum experimur, cum eos qui de seculi malitia ad monachatum conuertuntur facilè in bono perseuerare videamus proposito: seculares verò monachos vix aut nunquam redire. Amissio Iudæorum merito dicitur cum eos Deus per infidelitatem amiserit, quos priùs subiectos per fidem tenebat. Mundi nominie gentiles designat, qui magis inter insensibiles mundi partes sensu ac ratione carentes dum idola colerent, quàm inter homines rationales creaturas computandi fuerant.

Quæ eris.] .i. cuiusmodi .s. *assumptio*] Iudæorum amissorum, *nisi vita ex mortuis*] .i. nisi resuscitatio mortuorum in peccatis? *Quod si*] deliberatio est degustatio alicuius partis sumptæ de toto, per quam explorari possit quale illud sit totum.

i. cuius saporis. Semper autem in populo Iudæorum fuit aliqua massa fidelium incarnationem Dei & passionem in suam redemptionem expectantiū, quales Zacharias & Elizabeth, Simeon & Anna, Natanael & Nicodemus, & nonnulli alij in tempore etiam Christi reperti sunt, quibus quidem reuelata est persona ipsa diuinitus & determinatè ostensa, in qua promissum quod expectauerant crederēt esse complendum. Et fortasse tales antea omnes sancti fuerunt Apostoli; unde tam facile vocantem Christum sequerentur siue antea diuinitus inspirati, siue testimonio Ioannis edocti. Quorum vnus Andreas discipulus Ioannis Simoni fratri dixit, *Inuenimus Messiam*. Et Philippus Natanael, *Quem scripsit Moyses & Propheta in lege inuenimus Iesum*. Ex quibus quidem verbis ostenditur eos ex lege & Prophetis instructos Christū expectauisse, sed nondū præfinitum tempus nec determinatam personā cognoscere. Ad quod quidē cognoscendū siue etiā alijs manifestādū diuina eos gratia assūpsit, & eis assumptis de massa præcedentiū fideiū, & tā facile ad vnus iussiohis vocē Christū secutis omnibus suis quasi delibatio facta est, in qua possit ostēdi cuius fidei massa illa extiterit. Vnde ipsi quasi reliquæ sunt assumpti ad hoc quod fide tenuerāt, visibiliter vel re ipsa exhibendum. Continuatio. Et quomodo, inquit Apostolus, ex tam nequam populo & tam rebeli semper possunt aliqui assumi? Bene, inquit Apostolus, & secundum suæ originis naturam facilius quam ex gentibus, quia massam oportet ibi sanctam fuisse, unde delibatio facta est. Quia qualis delibatio, talis massa: & è conuerso, sicut mox adiungit. *Et si radix sancta, & rami*] Radicem quippe massam illam fidelium præcedentiū dicit ramos, modo credentes dicit eos qui inde assumpti sunt. *Quod si quidam ex ramis*] .i. aliqui de massa illa fidelium, quod antea recte crediderant adhuc futurum expectantes, *fracti sunt*] .i. statum pristinum fidei, quem habebant, amiserunt. *Tu autem*] gentilis scilicet, *cum Oleaster esses*] .i. sterilis naturaliter & siluestris, *infectus es in illis*] .i. aliena operatione loco illorum substitutus. *Et socius radicis*] oliuæ frugiferæ factus per fidem, & pinguedinis per caritatem. Pinguedo enim calidæ naturæ est, & ideò caritatis ignem significat, & fides radix est & fundamentū caritatis. *Noli gloriari aduersus ramos*] .i. eis insultare de suæ fractionis detrimento, & de suo superbire statu, id. s. meritis vel virtuti tuæ tribuēs. *Quod si glo-*

riaris] scias quod *nō tu radicē portas*] .i. à radice eorum processit ad te quod habes, non à te ad radicē, quia populus Iudeorū fidelis asina est mater pulli. i. paries in fide gentilem populum.

D I C I S *ergo*] quia v. contra radicem nō potes gloriari, vis te saltem ramis illis præferre, in hoc quod *fracti sunt* illi vt tu inseraris .i. fracti sunt illi & . . . iterum situ inserti loco eorū. Benè quidem dicit Apostolus .i. verum est quod dicit, sed non ideo potes gloriari, quia non sunt illi fracti propter bonum tuum quod ante haberes, vnde te Deus eligeret inferendum, sed propter malum suum .i. incredulitatem. *Noli altum sapere*] superbiendo .f. aduersus eos, *sed time*] .f. committere tale quid vnde & tu frangaris. Et reuera oportet te timere. Quid autem timeat subiungit, *Si enim non pepercis*] à fractione .f. ramis nationalibus, illi videlicet suæ radici, ex qua erant, time subaudi ne forte, &c. Et vt hoc timeas siue exemplo aliorum correptus, siue susceptæ gratiæ amore succensus, attende memoriter bonitatem gratiæ & seueritatem iustitiæ si permanseris in ipsa bonitate suscepta .i. si culpa tua susceptam gratiam amiseris. Alioquin .i. aliter si erit quàm moneo, *etiam tu excideris*] à radice sancta in qua per accidens es insertus, non ex ea natus. *Sed & illi*] etiam post fractionē suam inferentur loco tui excisi, sicut tu è conuerso prius loco illorum fractorum. Et quasi quæreretur, quid hoc possit facere, cum Deus pro culpa sua eos fregerit, dicit quia ipsemet per misericordiam suam id facere potest qui eos fregit propter ipsorū culpam. Et hoc est quod dicit, *Potens est enim Deus iterum*] .i. post tuam insertionem, & suam fractionem. Dixi quia potens est Deus & illos inferere, nec mirum, quia multo id facilius & conducibilius naturæ videtur secundum suprapositā de oliua similitudinē, vt proprii rami inferi possint, quā alieni. Et hoc est quod à minori ostendit, dicens: *Nā si tu gentilis excisus es ex Oleastro*] tibi naturali. i. ex arbore infœcūda gentilis populi assūptus, *contra naturā*] .i. consuetudinē inferendi. Neq; enim infructuosæ arbores inferi solent fructuosis, nec siluestres domesticis, nec surculus fructum radicis ferre solet. Sed propriæ naturæ quanto magis .i. quàm facilius secundū naturam suæ originis *inferentur suæ origini*] ex qua videlicet nati fuerunt. *Nolo enim*] ac si diceret: Ideo cōmemoro toties ô gentiles vestræ electionis gratiam & reprobationis illorum

iustitiam, & postmodum conuersionem ipsorum futuram. *Quia volo vos i. h. m. i. h.]* diuinæ dispensationis occultum iudicium, quia videlicet *Cecit et conting. in Israel ex parte]* .i. quidam Iudæorum excecati aduentum Christi, per quem de fide illuminarentur non recognouerant, donec plenitudo gratiæ intrauit, id est de vniuersitate omnium gentium multi conuertentur, & spirituales Dei ciuitatem, .i. Ecclesiam intrabunt, & sic] tandem post eorum introitum *omnis Israel]* secundum singulas videlicet tribus, unde multi conuertentur in fine per prædicationem Enoch & Helix, non tamen omnes, cum de Antichristo Veritas eis dicat: *Alius in nomine suo veniet, illum suscipietis*, ut nec in fine mundi, sicut nec in aduentu Christi omnes Iudæi conuertentur, sed solæ Domini reliquæ. Unde Ieronimus ad Edibiam de quaestione nona scribens, Clamat Isaias pro Israel: *si fuerit numerus filiorum Israel, &c.* .i. etiamsi multitudo non crediderit, tamen pauci credent. De fine autem seculi ita Isidorus loquitur lib. 2. contra Iudæos cap. vi. Malachias quoque ante finem mundi Heliam sic esse dicit mittendum ad conuersionem Iudæorum; *Ecce ego mittam vobis Heliam Prophetam, antequam veniat dies Domini magnus & terribilis, & conuertet corda patrum ad filios, & cor filiorum ad patres eorum.* Item, Hic est populus in nouissimis conuertendus, quem Iacob Patriarcha sub figura Benjamin lupum mane comedentem & vespere spolia diudentem prophetat, quia initio legem accepit, in vespere autem mundi crediturus diuidet inter nouum Testamentum & vetus. Idem cap. 12. Amos Prophetæ, *domus Israel cecidit, non adiciet ut resurgat.* Ergo Israel proiecta est in terram suam, non est qui suscitaret eam. Sequitur in eodem Prophetæ, *venit finis super populum meum Israel.* Quæ omnia pertinent ad carnale ipsius regnum vel obseruationem quia ultra in reprobabilia erunt. Nam illæ repromissiones reparationis, quas earum sermo complectitur illi parti promittuntur, quæ ex Iudæis creditura est. Nam nec omnes Iudæi redimendi sunt, nec omnes salui erunt, sed qui fide electi fuerint saluabuntur. Quod autem nonnulli sanctorum dicunt in fine per prædicationem Helix & Enoch conuertendos esse, quibus & ipse Apostolus concordare videtur dicens: & sic omnis Israel saluus fiet, aut secundum vniuersitatem tribuum, non personarum, est accipiendum ut

diximus, aut fortasse hi qui primitus Antichristum suscep-
runt ritus Iudaicos reducentem, postea per prædicationem
Helix & Enoch correcti, vel viso interitu eius de quo Veritas
dicit, *Et nisi breuiati fuissent dies illi, non fieret salua omnis caro,*
conuersi ad Christum saluabuntur. Greg. in Moral. lib.
sed in extremo Israelitæ omnes ad fidem cognita Helix præ-
dicatione occurrent, & tunc illud eximium multiplici ag-
gregatione populorum conuiuium celebratum. Remigius
in Psal. xii. Cum auerterit Dominus cap. &c. Dum Iudaica
perfidia in sua crudelitate impœnitens extitit, duriori se cap-
tiuitatis laqueo irretiuit. Quæ tamen captiuitas soluetur
ad prædicationem Helix & Enoch, cum ad eorum prædi-
cationem omnes in Christum Iudæi crediderint. Haimo. Im-
pietates à Iacob auertet pleniter sicut scriptum est, *Et ipse re-
dimet Israel ex omnibus iniquitatibus eius.* Et cum plenitudo
gentium intrauerit, tunc omnis Israel saluus fiet. *Vt non sitis vobis
ipsis sapientes*]. i. Ideo nolo vos istud occultum ignorare, ne
visa illorum excæcatione de illuminatione sapientiæ quam
habetis superbè illis insultantes, de dono Dei quasi de vestro
proprio gloriemini, quod esset sapientem esse sibi potius quam
Deo. i. ad gloriam sui non dantis sapientiam suam accommo-
dare. Haimo. Mysterium est res occulta, & secretum aliquod
in se continens, quare Iudæos quondam peculiarem populū
abjecerit, & gentiles peccatores per fidem sibi copulauerit.

Sic ut scriptum est] Or. In Isaia, vnde testimonium istud
Paulus assumpsit, scriptum est, *veniet propter Sion,* & quod ait
hic, *cum abstulero peccata eorum,* ibi omnino scriptum non est.
Apostoli tamen autoritate præsumptum est, Sion .i. Ierusa-
lem pro Iudæa ponit, partem videlicet quæ caput regni est,
pro toto ipso. Et tale est quod dicit, *veniet de Iudæa*] nasce-
ndo scilicet in ea qui Iudæos saluet, vel secundum Origenis
verba, *veniet propter Sion .i. saluandum sicut determinat
dicens: Qui eripiat*] eam, & liberet à captiuitate diaboli siue
iugo peccati, quod animam captiuat à Deo. Et hoc statim
aperiens dicit. *Et auertat impietatem à Iacob*]. i. à populo Iudæo-
rum. Possumus etiam sic distinguere, eripiat scilicet à pecca-
to cum quo nascimur, originali vel eo quod ipse in eis inue-
nit, & auertat à reliquis quæ commissuri essent, nisi ipse illa
auerteret. Attende cum dicit cum nasciturum in Iudæa, vel

propter Sion venturum quandam in Iudæis gloriam ascribere, qua superbam gentium insultationem reprimat. *Et hoc à me illis*] vbi nos dicimus testamentum in Hebræo dicitur pactum .i. firma promissio. *Dicit Dominus*] Nam & quæ testamento confirmantur maximè stabilia sunt: promissio, inquā, tunc implenda. *Cum abstulero*] .i. remiserō peccata eorum secundum Euangelium.] Isti duo nominatiui plurales *inimici*, & *carissimi*, vnde pendeant secundum seriem constructionis non satis apparet, nisi longe superius ad præmissa referantur, vbi videlicet dictum est, quanto magis hi secundum naturam inserentur s. o. ipsi quidem inquam subaudi etiam *inimici* modo secundum Euangelium propter vos, &c. Et fortassis iuxta Hebraicæ linguæ cōsuetudinem nominatiuis sine verbo absolute vsus est Apostolus, sicut ibi dicitur. *In conuertendo Dominus, & Dominus in cælo sedes eius.* In Epistola ad Galatas ipse Paulus de perniciosa simulatione Petrum arguens, *Sic tu*, inquit, *cum Iudeus sis gentiliter viuis, & non Iudaicè, quomodo gentes cogis iudaizare?* Item, *Ego autem fratres si circumcisionem p. q. a. p. p.* Ex quibus apparet Paulum maximè & cæteros liberatis Euangelicæ prædicatores maximas à Iudæis & conuersis inimicitias sustinere propter onera legis, quæ gentibus nolebant imponere, scientes iam legales illas obseruantias omnino inutiles, & gentes vix aut nunquam in eas induci posse. Et hoc est quod nunc Paulus meminit, dicens: *illi dico inimici*] .i. aduersantes mihi & consimilibus meis secundum Euangelium .i. sicut ex nostra patet prædicatione eorum gloriationi maximè infesta, cum onera legis penitus interdicat, & hoc propter vos ô gētiles, quibus hæc onera imponere nolumus. *Sed tamen carissimi nobis*] .i. pro cæteris nostro inhaerentes desiderio, vt conuersi saluentur *propter patres ipsorum*] iustissimos & magnæ authoritatis, Patriarchas scilicet & Prophetas. *Secundum electionem*] tamen Dei magis quàm secundum propria eorū merita, qui eos per gratiā suam gentibus reprobaris elegit, ac miraliter sublimauit. Nam & Deum ipsum erga filios propter patres gratiam suam exhibuisse non ignotum est, quem Salomoni idolatræ propter iustum patrem pepercisse nouimus, & Moysen veniam delinquenti populo propter merita patrum implorasse atque impetrasse.

Sine pænitentia enim] Quasi aliquis diceret, quæ cura de illa

electione antiquorum patrum, seu promissionibus vel beneficijs à Deo illis olim factis, cum nunc prorsus appareat in malitia filiorum eorum quæ in precibus egerit Dominus ipsi displicere. Respondens Apostolus, immò, inquit, sine pœnitentia sunt dona Dei & v. d. i. nunquam ei displicet se alicui quicquam donasse, vel ad fidem quenquam vocasse, quia videlicet incommutabilis est omnino eius voluntas, nec unquam quod semel faciendum esse iudicat se illud fecisse improbat: quod utique esset de facto suo pœnitere. Alio tamen modo etiam Deus nonnunquam pœnitere dicitur, mutando scilicet vel dolendo quod fecerat, non improbando factum suum. i. non iudicando illud fuisse malum, quod proprie pœnitentia diceretur iuxta illud Philosophi, Pœnitentia enim malum factum comitatur. In electis Dei dona eius eorum vocationem præcedunt, dum eorum scilicet prospexit voluntatem, ut vocanti eos ad se assentiant, & iubenti obediant. *Sicut enim*] Dixi plenitudine conuersarum gentiũ, etiam Iudæos ad fidem conuertendos. Nec mirum si fiat ita de illis, ô vos gentiles, sicut & de vobis factum est. Et hoc est, *Sicut enim, &c. Propter illorum*] i. dum videlicet illis repellentibus à se prædicationem Apostoli ad gentes transire cito cõpuli sunt. *Ita & isti* i. Iudæi *nunc non crediderunt in vestram misericordiam*] i. non receperunt prædicationem qua vos misericordiam à Deo consecuti estis, ut post vos ad fidem postmodum & ipsi veniant, & eò humiliores efficiantur quod ad fidem vos sequantur, quasi exempli vestri magisterio hinc edocti. *Conclufit autem*] i. cæcitate infidelitatis iam constringi omnes, tam Iudæos scilicet quàm gentes promisit, ut in omnium postmodum conuersione magnam suam clementiã ostenderet, quibus videlicet ante fidem nullum inesse meritum constat, quia sine fide impossibile est placere Deo.

O altitudo.] Exclamatio admirantis est super istam multã abyssum diuini iudicij, de prima scilicet electione Iudaici populi, & reprobatione gentilium, & de noua nunc electione gentilium in conuersione multorum, & reprobatione Iudæorum, tam paucis modo scilicet conuersis, sed post modũ plenius conuertendis: ut qui olim in fide gentes præcesserant, postmodum sequantur, & fiant nouissimi primi. *Altitudo*] i. profunditas occulta nobis diuitis & copiosæ sapientiæ] Dei, quantum ad præscientiam ipsius, & scientiæ quantũ ad ipsius.

operis effectum, ex quo praeuisa illa iam sciri possunt. *Quam incomprehensibilia*] .i. quam impossibiles sumus ad causas illas cognoscendas dispensationum vel dispositionum eius, quare videlicet sic decuerit agendum esse antequam fierent, & post effectum operum, *Inuestigabiles viae eius*] viae quippe Dei, quibus videlicet ad cognitionem eius venit, eius sunt opera, sicut idē Apostolus supra meminit, dicens : *Inuisibilia enim ipsius à creatura, &c.* Opera itaque Dei, quae sensu quotidie experimur, inuestigabilia nobis sunt, quia occultas eorum naturas nondum discutere ratione suscipimus. Nec mirū. *Quis enim cognouit sensum Dei*] .i. rationem quam habuit in sua praescientia de his quae facturus erat comprehendere per se potuit, aut quem de his quae facturus erat consuluit, ut eius instrueretur consilio quid vel qualiter agendum esset? *Aut quis*] post summam incomprehensibilem Dei sapientiam ostēdit summam eius bonitatem, quia omnia nobis prius largitur quam à nobis quicquam accipiat. Deinde in actione gratiarum Apostolus admirationem suam terminans, ait : *Quoniam ex ipso sunt omnia*] .i. quaelibet substantiae natura tanquam ab ipso creata ut esset, *per ipsum*] scilicet conseruata ut maneret, *in ipso*] tanquam fine optimo consummata, dum eorum videlicet opifex optimus atque dispositor in ipsis glorificatur atque laudatur, propter quod ea condidit atque conseruat, sicut in Prouerbijs scriptū est, *uniuersa propter semetipsum creauit Deus, impium quoque ad diem malum.* Ut quinto super Genes. B. meminit August. quaelibet creaturarū quātum in te vespera est, quantum verò ad laudem creatoris relata mane dicitur, & in se considerata quasi defectum habet; in laude verò Creatoris profectum. Quærat fortasse aliquis quomodo natura quaelibet substantiae conseruetur, ut maneat, cum spiritus irrationalium animalium carne regi, & cum carne deficere penitus credantur. Sed profectò si illi quoque spiritus sicut & nostri substantiae sunt, quædam scilicet raritas elementorū ut quibusdam videtur, cum deserunt esse spiritus .i. viuificare cessant corpora illa, non tamen deserunt esse substantiae sicut & caro, cum qua deperire dicuntur : cum caro deseret esse, non tamen corporeæ substantiae naturam amittit. Quæri etiam potest cum Deus ipse propter se potius quam propter opera sua sit laudandus, quomodo dicat Apostolus, cum propter

opera sua esse glorificandum .i. maxima laude dignum. Ex se ipse quippe bonus vel laude dignus est, potius quàm ex operibus suis & propter ipsum opera eius potius sunt laudanda vel bona quàm ipse propter opera. Sed licet ex seipso potius quàm ex effectis suis ipse bonus sit, vel dignus laude, actio tamen ipsa gratiarum vel effectus laudis nostræ, quam ei persolvimus ex operibus quæ per ipsum cognoscimus, consequitur sicut & cuiuslibet artificis laus in operibus eius cognoscitur, & quamvis propter sciētiam quam habet iam dignus sit laude, ex notitia tamen operum eius laudatio eius consequitur. Nec Apostolus hoc loco dicit Deum dignū laude propter opera quæ fecit, sed nos ad eius hortatur laudem propter opera eius quæ cognoscimus. *Ipsi gloria*] inquit, sit .i. optima & summa & late patens fama, *In secula*] .i. per omnes successiones temporum, *Amen*] .i. fiat quod est adverbium optandi, aliquando etiam confirmandi, quando videlicet ponitur pro, ita est, vel verum est.

O B S E C R O itaque] quia videlicet talis vel tantus est, ex CAP. XII. quo omnia, per quem, &c. obsecro vt vos ipsos ei hostiam præparetis potius, quàm pecora vestra ipsi mactetis. Quasi adiurando eos coarctat, cum dicit: *per misericordiam Dei*] ac si diceret, sicut de misericordia eius confiditis, ita & ad ipsam obtinendam quantum valetis vos præparetis. Corpora pecorum cum offerebantur in sacrificio occidebantur, nostra autem corpora cum Deo immolantur vitijs ita moriuntur, vt vita non priuentur. Et hoc est quod dicit, hostiam viventem, & tunc profecto immolationis nostræ obsequium rationabile est, si nos ipsos ita immolemus potius quam pecora nostra ei mactemus, vel nos ipsos propter eum interficiamus. *Conformari huic seculo*] .i. seculares qui præsentem vitam diligunt imitari, *sed reformamini*] .i. studete reparare ac renouare humanæ rationis sensum peccatis iam dudū obtenebratū. *Vt sic probetis*] .i. cognoscere valeatis, vel etiā alijs ostendere, & ratione probare possitis: *Quæ sit voluntas Dei*] .i. quid Deus à nobis fieri velit vt boni simus in nobismet ipsis, imò alijs quoque, vel ipsi Deo beneplacentes, & tandem perfecti in virtutibus consummati, crescendo semper in melius, vel in cælesti vita perfectæ beatitudinis. *Dico enim.*] Dixi, *nolite conformari huic seculo, sed reformamini*, &c. & merito id vos moneo,

quia hoc dico *per gratiam quæ data est mihi*. i. per magisterium mihi super vos iniunctū dicere compellor omnibus qui sunt i. v. i. apud gentes confusis, quare specialiter Apostolus sum destinatus, *Non plus sapere quàm oportet, sed sapere usque ad sobrietatem*] Ille sapit plusquàm oportet, qui mala ipsa non solum notitia rationis à bonis discernit iuxta illud Philosophi, mali quippè notitia iusto deesse non potest, verum etiam experientia dicit, secundum quam lignum scientiæ boni & mali dictū est. Et hic quidem est sensus, seculi .i. secularium & carnaliū hominum, ut experientia voluptatum, quasi quadam saporis dulcedine illecti mala ipsa cognoscunt. In qua quidem experientia sobriæ & honestæ vitæ terminos excedūt dum voluptatibus suis turpiter inseruiunt. *Et unicuique*] scilicet nostrū hoc ipsum dico .i. non plus sapere. &c. *Sicut Deus diuisit mensurā fidei*] .i. prout credit faciendum esse, ita hoc impleat, *sicut enim*.] Ac si aliquis quæreret, Est ne in discretionē boni & mali diuersa existimatio infidelibus? Respondet Apostolus quod est, sed & diuinæ gratiæ dona in eis sunt diuersa, & hoc est quod cōpetenti similitudine demonstrat, dicens: *Sic enim & non eundem actum habent*] .i. non idem officium ita multi nos secundum personarum diuersitatē in vno corpore Christo & in eisdem sacramentis vniti sumus. *Alter alterius membra*] .i. supplentes officium suum pro altero, & ei administrantes quod iste implere non potest. Tunc enim oculus quasi membrum manus efficitur, cum visum subministrat, ut illa operari queat: & similiter vnusquisque fidelium donum gratiæ quod habet in alterum ministrare debet, ut maximè sibi inuicem caritate colligētur fideles cū sibi vicissim subueniūt, & vnusquisq; alterū esse recognoscit. Dixi, singuli alter alterius mēbra, sed merito quia *habētes*] dona diuersa gratiæ Dei illis collata. Quæ statim dona sub diuidit dicens, *sive prophetiā*. i. habentes .i. gratiā interpretādi .i. exponēdi verba diuina. vnde & ad Corin. dicit: Nā qui prophetat hominibus loquitur ad ædificationē *secundum rationem fidei*] Prophetam habet qui in sua prædicatione secundum hoc quod credit auditoribus esse necessarium verba sua moderatur, & quid his siue illis pro capacitate eorum prædicari oporteat discernit ut modo lac paruulis, modo solidum cibum maioribus ministret, sicut & ipse Paulus ad eosdem Corinthios scribēs proprio docet exemplo. Quam quidem Apostolorum discretio-

nem Psalmista præuidebat cum diceret, *Dies diei eructat verbum, & nox nocti indicat scientiam.* Tale est ergo, secundum rationem fidei suæ, ac si diceretur, secundum discretionem quam se credit habere, vbi forte si errauerit, caritas eius ignorantiam eam excusat. *Sive ministerium in ministrando.*] Per hæc omnia subaudiendum est secundum rationem fidei, vt videlicet omnia discrete faciamus, secundum quod faciendum esse credimus. Ministerium dicit corporalis operis officium, sicut est suendi vel fabricandi. Ministerium habet in ministrando alijs, qui inde maiorem vtilitatem aliorum quam propriam quærit, sicut idem Apostolus alibi ait: *Nemo quod suum est quærat, sed quod alterius.*

Sive qui docet in doctrina sit] .i. doceat quæ docenda credit. *Similiter qui exhortatur*] .i. ad persuadendum. Loquitur secundum rationem fidei, qui prophetiã quam superius intellexit per doctrinam & exhortationem non distinguit. Quisquis enim ad ædificationem loquitur, aut docendo aliquid, aut exhortando aliquid loquitur. Sic expone', siue qui docet. s. rationem fidei, *in exhortando* sit discernens scilicet quantum valet, quæ quibus hominibus persuadenda sint, sicut & docenda, iuxta illud Veritatis, *Nolite sanctum dare canibus, neque margaritas ante porcos.* *Qui tribuit*] .i. sua largitur egentibus, *In simplicitate*] subaudi id faciat .i. non duplicem ibi habeat intentionem, tam pro temporali scilicet quàm æterna remuneratione. Quod & alibi prohibet Dominus dicens, *Cum facis elemosynam, nesciat sinistra tua quid faciat dextera tua.* Aliter in simplicitate .i. non sit duplex finis in intentione, vt videlicet elemosynæ suæ finem tam in se quàm in Deo constituat, sed tantummodo in Deo, vel ita vt non dolose id faciat, sicut hypocritæ faciunt, qui aliud simulant quàm intendant, cum se videlicet propter Deum id facere fingant, quod magis propter humanam gloriam agunt, vel sicut faciunt qui aliquid largiuntur alicui, amplius inde se recepturos sperantes, se id ex caritate facere simulant, quod ex cupiditate potius agunt. *Qui pro alijs*] .i. Prælati vicem gerit. *In solitudine*] subaudis prælit, eorum scilicet lucra quærendo potius quàm sua. De qua quidẽ sollicitudine Prælatorum erga subditos Salomon admonet, dicens: *Fili mi si sponderis pro amico tuo, defixisti apud extraneum manum tuam, illaqueatus es verbis oris sui, &*

*captus es proprijs sermonibus tuis. Fac ergo quod dico fili mi, & te-
metipsum libera quia incidisti in manum proximi, discurre, festina,
suscita amicum tuum. Ne dederis somnum oculis tuis, ne dormitens
palpebra tue.*

Qui misereatur] .i. ignoscit delinquentibus in se, lætus &
sine omni rancore animi hoc faciat, non erubescentiam infe-
rat pœnitenti, neque illi turpiter peccatum suum imprope-
rans, quasi magis tristem se ostendat de propria læsura quam
hilarem de conuersione peccatoris. *Dilectio*] subaudis sit im-
mutabilis, vera, non simulata: sicut alibi scriptum est, *filioli
non diligamus verbo neque lingua, sed opere & veritate. Odientes*]
vicia. *Adherentes*] virtutibus, vel recedentes conuersione
seu moribus à peruerso homine, & imitantes bonum, atten-
dentes quod scriptum est: *Cum sancto sanctus eris, &c. Carita-
tem fraternitatis*] .i. effectus fraternæ caritatis inuicem exer-
centes, vt vnusquisque alijs tâquam fratri subueniat, & Deo
tâquam Patri obediat. Non solum de vtilitate proximorum,
verum etiam de honore ipsorum prouidendum admonet, di-
cens, *honore*] scilicet alter alterum .s. *præuenientes*] .i. inter
vos hoc prouidentes, vt cùm alius vos honorare voluerit, vos
prius eum honoretis, & beneficium eius vestrum præueniat,
vt quasi debitum vobis reddatur potius quàm tribuatur. Sũt
autem qui nostris non egent beneficijs, & qui magis ad dile-
ctionem honore quàm vtilitate trahuntur: ideoque post vti-
litatem beneficij de honore quo diligunt Apostolus proui-
dit. *Sollicitudine non pigri*] hoc est effectus prouidentix nostræ
erga subiectos implere non differentes, sicut scriptum est,
*Quaecunque potest manus tua instanser operare, &c. Spiritu feruen-
tes*] Ac si diceret, Et si non poteritis hæc supradicta penitus
implere, zelo saltem caritatis ad hæc implenda ferueatis, &
boni desiderij voluntas apud Deum sufficiet. *Domino seruien-
tes.*] Post fraternam caritatem erga proximum, ad caritatem
Dei, qua deseruitur conscendit. Benè autem cùm dicturus
esset, *Domino seruientes*, præmisit Apostolus, *Spiritu feruentes*,
vt hæc seruitus filialis reuerentiæ subiectio ex amore potius
quàm seruilis ex timore intelligatur, Christiana magis quam
Iudaica. Soli Domino seruimus, cuicunque seruitium im-
pendamus, si totum nostræ subiectionis finem in Deo consti-
tuamus, si videlicet solam reuerentiam, quam Prælati exhi-

bemus, propter Deum, cuius vicarij sunt, & à quo prælationis potestatem acceperunt, eis exhibemus. Qui enim legato vel vicario alicuius prælati obsequium impendit, propter ipsum tantummodo prælatum, à quo destinantur, ipsi solummodo prælato in hoc deferuire dicuntur, & ei soli propter quem tantum id agitur seruitium vel honorem impendere. *Spe gaudentes*] vt videlicet sitis, *in tribulatione patientes*.] Vnde & Apostolus Iacobus, *Omne gaudium, inquit, existimate fratres mei, cum in tentationes incideritis, scientes quòd probatio, &c. Diciturus, in tribulatione patientes*, benè præmisit, *spe gaudentes*, vt spes remunerationis præcedens fortes efficiat contra passionem, dum illud attendunt quod scriptum est, *in paucis vexati, in multis bene disponentur, &c. Spe gaudentes*] .i. expectatione futuræ beatitudinis, cum spes non nisi de bono sit & de futuro, & quia ex nostra virtute hanc in passione constantiam habere non possumus, vt orationem super hoc frequentemus admonet, dicens: *Orationi instantes*] .i. in oratione superstantes potius quàm iacentes. Quasi enim iacentes sunt, qui se ad Deum per deuotionem non erigunt, vt oratio suà consequatur effectum, & verba solummodo præparant, non corda: de quibus Dominus per Isaiam conqueritur. *Populus hic labijs me honorat, cor autem eorum longè est à me. Neceffitatibus sanctorum communicantes*] .i. fidelibus penuriam vel aduersitatem patientibus ita compatientes, vt eorum penuriæ vel tribulationis participes efficiamur, dum videlicet quod nobis subtrahimus eis impendimus, vel pro ipsis etiam eripiendis seu defendendis periculum vel damnum incurrimus. Vnde alibi dicit: *Alter alterius onera portate. Hospitalitatem sectantes*] non solum impendentes, cum videlicet recedentes à nobis insequimur, vt etiam reluctantes ad hospitium trahamus, sicut Loth in susceptione Angelorum egit.

BENEDICITE *persequentibus vos*] hoc est, illis etiam vt bene sit orate, vt sic in eis caritatem ædificetis, sicut scriptum est: *tunc enim carbones ignis congeres super caput eius*: vel ideo vt oratio vestra tanto facilius effectum assequatur, quanto Deo gratior erit, qui ait. *Si enim diligitis eos qui vos diligunt, quam mercedem habebitis? Quam quidem dilectionis perfectionem tam Dominus ipse quàm Protomartyr eius Stephanus in passionibus suis pro inimicis orando nobis exhibuerunt. Benedi-*

cite & nolite maledicere.] Bis dicit, *benedicite*, ut tam in ore quā in corde benedictionē habeamus. Nec dixit, ne maledicatis, sed *nolite maledicere*. Cū enim aliquem pro suæ culpæ obstinatione excommunicamus, profecto in eum maledictionis sententiam intorquemus. Ipse etiam Paulus in Actibus Apostolorum ei maledixisse legitur cui ait, *destruat te Dominus paries dealbate*. Sed quia zelo iustitiæ cōpulsī talia sancti faciunt, maledictionis actionem habent, non voluntatem. Hoc vno loco non dicitur, ut penitus non maledicant, sed ut maledicere non velint, ut videlicet voluntas maledictionis nō actio prohibeatur sicut & Dominus dicit: *nolite iurare*. Voluntatō potius iurandi interdicit quam actionem. Sic & iudex cū aliquem lege sua coactus occidit, non voluntariē ab homicidio excusatur, quia id ab eo voluntate non geritur, cui omnino displicet quod ille qui punitur illud commiserit, pro quo lex eum interfici præcipit, ut magis eum lex ipsa quā homo puniat, immō ipse Deus legem instituens qui ait: *Ego occidam & ego viuere faciam, & mihi vindictam, ego retribuam*, quia ipse minister Dei. Non immerito quærendum videtur cū ad corda potius Deus quam ad verba respiciat, tamen verbis etiam ipsum deprecemur. Sed duabus id causis geri existimo. Vna quidem ad honorem Dei, altera est ad vtilitatem nostram accommodata. Cū enim aliquid à Deo orando postulamus, ex ipsis verbis nostris ostendimus non nisi ab eo id nos posse habere, quod oramus. Ipsa verba quæ proferimus affectum nostrum & deuotionem intellectu suo in Deum excitant, & commouent: ut tanto efficacior ipsa sit oratio, quāto in orante maior est deuotio.

G A V D E R E *cum gaudentibus.*] Infinitiuus pro imperatiuis utitur, dicendo scilicet *gaudere & flere* pro gaudete & flete .i. cum fidelibus de profectu eorum exultate, vel de ipsorum effectu compatiendo contristemini. Est enim falsa lætitia iniquorum, cui congaudendum non est, & falsa eorum tristitia, cui contristandum minimē est. Vnde Dominus; *Mundus, inquit, gaudebit, vos autem contristabimini*. Et Salomon in Prouerb. de peruersis, *Qui letantur cū malē fecerint, & exultant in rebus pessimis*. Cū autem idem Salomon alibi dicat; *Non constribabit iustum quicquid ei acciderit*. Et ipse Apostolus supra, *Scimus quoniam diligentibus Deum omnia cooperantur in bonum*.

bonum, &c. Quid potest accidere electis vnde flendum sit, aut quomodo rationabiles sunt illæ lacrimæ Rachel de interfectione filiorum, de miseria sic ad beatitudinem transeuntium? Vnde & de illo fletu fidelium in transitu B. Martini scriptum est: Cùm sentiret magis esse gaudendum, si rationem vis doloris amitteret. Ieronymus ad Tyrasium de morte filix, Tantas talesque tempestates vitæ, tot impugnationes diaboli, tot corporis bella, tot seculi clades euasit: & lacrimas fundimus, quasi ipsi nesciamus quid quotidie patiamur. Propter quod & Dominus sic admonet discipulos: *Si diligeretis me, gauderetis vtrique, quia vado ad patrem.* Plane mortuum Lazarum fleuit, doluit non morientem, sed potius resurgentem, & flebat quem cogeatur pro saluandis alijs ad seculum reuocare. Hanc vitam dans Dominus ingemiscibat, quam tu doles esse sublatam. Contra lacrimas eius pugnant tuæ. Ille nolebat reddere laboribus quem dilexerat, & tu amare te credis, cui laborum volebas adhuc restare tormenta. De hostili patria migravit ad cælum. Apostolus memorat, *Quamdiu sumus in hoc seculo, peregrinamur à Deo.* Vnde ergo illæ lacrimæ Rachel? vnde compassio fidelium super interfectione iustorum quæ finit in eis miseriam & cōfert gloriam? vel etiam cùm omnia quæ accidunt electis, eis vt dictū est cooperantur in bonum? vel quicquid eis accidat non contristentur? Vnde nos super eos dolere conuenit, vel ipsos de aliquo pœnitere, quos in alia vita licet suorum peccatorum memores, constat tamen nullo modo dolore pœnitentiæ affici: attendentes scilicet ipsa etiam peccata sibi in bonum fuisse cooperata. Denique cùm omnia optimè à Deo non dubitemus, adeo vt ipsa quoque mala bonum sit esse, & iuxta veritatis vocem necesse sit, vt veniant scandala; quid contingere potest vt rationabiliter doleant? Si enim vt B. meminit Augustinus, bonum est malum esse, quisquis de malo dolet, de hoc profecto dolet quod bonum est esse: & quisquis vult ipsum non esse, vtrique vult non esse id quod bonum est esse: & ita tam diuinæ dispositione quam rationi contrarius esse videtur, & frustra dicitur ad Deum, *fiat voluntas tua*, cuius scilicet voluntati seu dispositioni quantū in se est aduersatur. Sed quia hæc discutere altioris est philosophiæ, perfectioni nostræ reseruamus Theologiæ.

ID ipsum inuicem sentientes] per caritatis videlicet affectum
 ita alios sicut seipsos reputantes, iuxta illud Veritatis, *Quae
 vultis ut faciant vobis homines, & vos eadem illis facite.* Et illud:
Quod tibi non vis, alij ne feceris, vel ita idipsum cum alij sentiē-
 tes, quasi bona eorum sicut detrimenta nostra esse reputan-
 tes, vel idipsum de fide sentientes, vt nulla sint scismata in fi-
 de Catholica. Ad quod maximè pertinere videtur quod sub-
 ditur: *Non alta sapientes*] .i. non superbe aliquid per hæresim
 præsumentes, dum ex nouitate aliqua quærimus gloriari. *Sed
 humilibus*] quibus videlicet Deus dat gratiam, superbis resi-
 stens, *Consentientes*] in fidei scilicet vnitare nos eis sociantes.
 Quod qualiter faciamus docet cū adiungit, *Nolite esse pru-
 dentes apud vosmetipsos*] .i. prudentiam vestram, si quam habe-
 tis nolite ad gloriam vestram conuertere, nec de illa in vobis
 gloriari, vos etiam dico *Nulli malum pro malo reddentes*] .i. ne-
 minem quia nos lesit, sed potius quia iustum est punientes.
 Possumus etiam quod dictum est, *nolite esse prudentes, &c.*] ita
 accipere, vt hoc illi competentius adiungatur, ille etenim
 prudens apud semetipsum dicitur, qui totus suo iudicio ni-
 titur, vt quicquid istum esse decreuerit, exequi velit: vt cum
 nemini irascenti sua ira videatur inuisa in quocunque offen-
 ditur vlciscendum putat. Cui quidem periculo occurrit, di-
 cens: *Nulli malum pro malo reddentes.* Superius dixerat, *nolite
 maledicere persequentibus vos*: hic facta mala sicut etiam verba
 mala prohibet. *Prouidentes bona, &c.*] .i. nitentes quantum
 possumus vt opera nostra non solum Deo, sed etiam homini-
 bus bona videantur, vt ea scilicet imitari velint, vel Deum
 indè glorificent, sicut & Veritas ait: *luceat lux vestra coram ho-
 minibus, &c.* Si fieri potest cum omnibus hominibus pacem habentes]
 itaq; vt diximus nulli. v. malū pro malo reddentes, & prouidē-
 do bona etiam corā hominibus. *Quod*] .s. pacem habere cum
 omnibus, *ex vobis est*] .i. ex propria natura habetis, vt. v. eis ma-
 ximè concordēs sitis, quos per naturam affiniōres conspici-
 tis. Vnde alius dicit Apostolus, *Qui enim proximum quem videt non
 diligit, Deum quem non videt quomodo potest diligere?* Quo enim
 natura magis sumus affines, ampliū ipsa nos ad dilectionem
 inuitat. Adeo inquam cum omnibus pacem habentes, vt si
 aliquem offendendo exceſſeritis, *non vosmetipsos defendatis*]
 .i. proprias culpas excusetis, *sed date locum iræ*] .i. cedite irato

& offenso fratri patienter, scilicet eius iram ferentes, non cū iterum per excusationem vestram commouentes. Tūc enim iræ eius resisteremus vt amplius æstuarer, vel in eo remaneret, non cederemus vt ab eo transiret.

SCRIPTVM est enim] scilicet in Prouerbijs, *mibi vindictam*] Ac si diceret, idēd cum offenditis alios debetis offensos patienter tolerare, & eorum iram quantum poteritis lenire, quia etiam si ab eis offensi essetis, hortatur vos Dominus ne vos indēd vindicetis: sed ei vindictam reseruetis dicenti: *Mibi vindictam*, subaudi reseruate, & ego retribuam, illam, vt scilicet vlciscar vos. Et notādum quōd si hoc intelligatur exhortatio ad perfectionem potius quā præceptum, sicut & quod veritas ait, & *tua ne repetas*: potest & illud quod dictum est superius, *non nosmetipsos*, &c. ita exhortatio perfectionis intelligi, vt cū à persecutoribus defendere nos possimus, perfectiūs tamen dicat esse omnino non defendere, sed potius inde nobis illatam sustinentes, quā defendendo corpus animam nostram vulnerātes, eum videlicet per iram interficiēdo, à quo fortasse nos aliter defendere non possumus. Sed sicut & illud superius pro præcepto exposuimus, potest forsitan & hoc pro præcepto intelligi, *Mibi vindictam*, &c. sicut enim iudex lege vel amore Dei qui legem instituit constrictus reum interficit, non tantum ipse hoc facere dicitur quam lex vel Deus ipse qui hoc facere præcipit, & ad hoc faciendum tanquam instrumento vtitur, ita & cum zelo iustitiæ vel amore vindicta est imputanda. Quod itaque præcipit Deus, sibi vindictam reseruari, vt ipse illam faciat, tale est vt nemo vindicare præsumat, nec vt dictum est, Deus hoc per ipsum agat, qui ait: *Ego occidam, & ego vinere faciam*: Vnde August. quæst. in Leuit. cap. 71. Cū homo iuste occiditur, lex eum occidit, non tu. Idem de Ciuit. Dei lib. 1. Non occides, his exceptis quos Deus occidi iubet. Non autem ipse occidit qui ministerium debet iubenti, scilicet adminiculum gladio videnti. Tunc itaque homo occidit cū ex se id, non ex Deo agit. Cū vero ex diuina institutione vel iussione id facit, Deus potius tanquam instrumentum id facit, quā homo ipse. Sic quippe quemlibet potentem aliquid ædificare vel facere dicimus, cum ad eius imperium illud geritur. Homini itaque, non Deo prohibitum est occidere. Sic & for-

tasse nostra repente prohibemus, quia .v. nostra sunt, sicut & diligere eos qui nos diligunt .i. quia nos diligunt. Quæ enim propter nos habere non debemus, vt huius .s. possessionis in nobis finem constituamus, multo minus propter nosmetipsos repetere ablata debemus: quod videlicet fortasse Deus per alios melius quàm per nos disponere vult, vel qui nobis nocitura præuidebat. Itaque repetere licet nos quæ Dei sunt potius quàm quæ nostra sunt. i. propter Deū potius, vt secundum voluntatem ea disponamus quæ propter nos, & tunc potius Deus in nobis sua repetit, quam nos nostra, dum hoc videlicet agimus vt potius Dei faciamus esse quàm nostra.

SED *si.*] Dixi, non vindicetis vos, sed potius Deus, vt dictum est, sed è contrario benefacite malè facientibus. Et hoc est, *sed si, &c. Hoc enim*] Reddit causam quare sic faciendū sit inimicis, quia propter hoc facile poterimus ad salutem trahere. Caput quidem est principalis pars in corpore, tanquā in omnibus sensibus corporis ornatum, mentem siue animā nostram significat. Carbones ignis incendia sunt caritatis, vel lamenta pœnitentiæ quibus anima penitus excrucietur, & contra semetipsam indignationis flammis accenditur. Hos itaque carbones super mentem inimici nostri congeramus, ei benefaciendo; dum per hoc eum ad amorem erga nos vel ad pœnitentiam malorum, quæ nobis intulit, accendimus. *Noli vinci*] .i. superari à vitio tuo, si .v. ira tibi adeo dominatur, vt reddas malum pro malo: sed vince & reprime ipsam iram tuam per bonum malo recompensatum. Non enim malum est seruire homini, sed vitio. Vnde statim adiungit.

CAP. XIII. OMNIS *anima*] .i. quælibet rationalis creatura *subdita sit*] .i. libenter obediat. Quod quidem aduersus quorundam fidelium opinionem dicit, quibus omnino iniustum & inconueniens videbatur vt quislibet iam ad fidem Christi conuersus terrenæ potestati amplius deseruiret, seu obediret: quasi tales omnino potestates à Deo constitutæ non essent. Vnde & Dominus ipse pro seipso & Petro censum Cæsari persolvere dignatus proprio ad hoc nos hortatus est exemplo. *Sublimioribus*] .i. sibi prælatis à Deo .s. sicut statim annexit dicens, *Non est enim potestas*] siue bona scilicet siue mala videatur, *nisi à Deo*] .i. per eius dispensationem constituta. Cum enim Principes boni sunt, diuini muneris est. Cū autem mali,

vel ad vindictam peruersorum hominum, vel ad purgationem seu probationem bonorum à Deo sunt institui, qui quālibet impietatem etiam benè disponit. Vnde & potestas diaboli vel cuiuslibet impij bona perhibetur, licet voluntas eorū sit pessima, vel operatio peruersa. Potestatem quippe à Deo accipiunt, à se verò voluntatem malā habent. Vnde & iniquo Pilato Veritas ait: *Non haberes in me potestatem, nisi datum tibi esset desuper.* Et diabolus in nullo aggredi Iob poterat, donec huius potestatis licentia sibi à Deo concessa. *Quæ autē sunt à Deo*] scilicet instituta, sed non tamen permissa. Nam & peccata Deus ipse permittit, non instituit. *Ordinata sunt*] .i. rationaliter instituta. *Itaque qui.*] Quandoquidem omnis potestas à Deo est instituta. *Damnationem acquirit*] .i. hoc faciendo damnari merentur, quia Deo potius quàm homini resistunt. Aliud est autem resistere tyrannidi mali Prælati, aliud iustæ eius potestati quam à Deo suscepit. Cū enim aliquid per violentiam agit quod ad eius potestatem & institutionem non pertinet, profectò cū ei in hoc resistimus, tyrannidi magis quàm potestati obuiamus, homini potius quàm Deo: quia hoc ex se præsumit, non ex Deo agit. Quando vero in his ad quæ legitimè constitutus est ei resistimus, tunc potestati contraimus. *Nam Principes*] .i. eorum potestas non est timenda his qui bene operantur, sed male. Quod statim ostendit dicens: *Vis*] tu aliquis, *non timere potestatem*] potius quàm hominem, bene operare, & parcendo tibi approbabit opera tua, & te bene agere testificabitur. *Gladium portat*] .i. non irrationabiliter ad occidendum etiam est instructus, quia .v. in hoc Deo deseruit, qui super hoc eum instituit, vt vindicet mala. Et hoc est, *Dei enim, &c. vindex in iram*] .i. vindex irascendo male agenti potius quam homini. i. malitię potius eius quam substantiæ. Ideo quia. s. minister est Dei, obediētes ei estote tāquā Deo, & hoc *necessitate*] .i. pro manifesta vtilitate, quam ex ministerio Principū percipitis, *non solum propter iram*] eorū. s. *sed & propter conscientiam vestram*] .i. nō solū propter fortitudinē vindictę ipsorū qui nos inobediētes sibi statim punirent, verū etiā quia vobismetipsis cōscij estis eos vobis necesarios esse ad malitiam reprimendā. *Ideo enim*] quia .v. ita vobis necessarij sunt, vindicādo. s. de his qui malè agūt vt dictū est, *tributa*] eis persoluitis, *In hoc ipsi*] .s. Deo seruiētes, quod vindicāt

mala, vt de hoc ipso quod tributa suscipiunt officium suum implere valentes, quod nequaquam sine his expensis possent exercere, & ideo quia sic conscij estis, vel quia hic ita Deo militant.

RED DITE *illis omnibus*] quæ pro hoc debetis. *Cui tributum*] scilicet debetis *tributum*] reddite. Origenes, Tributa terræ vectigalia negociationis. Haymo. Cui tributum debetis reddere, reddite: sicut & ipse conditor pro se & pro Petro didragma. Tributum dicitur à tribunis, & Tribuni à tribus, siquidem Romulus in tres partes populum sibi subditum diuisit, in Senatores scilicet qui & Cōsules vocabantur, in milites & agricolas, & vnicuique parti principem vnum constituit, qui etiam tribunus dicebatur eo quod vni ex partibus præesset. Census verò qui à subditis exigebatur tributum dicebatur. *Cui vectigal*] vectigal est tributum fiscale, & dicitur à vehendo, eo quòd accipiatur de vecticijs .i. deportatis mercibus. *Cui timorem*] Iracundis maximè Prælatis timor est exhibendus, ne ira commoti plus vindicent quàm oporteat. Mansueti verò tanto amplius sunt honorandi, quo eos patientia digniores vel benigniores facit.

LIBER QVINTVS.



EMINI *quicquam debeatis*] .i. ita ab omnibus debitis absoluite, vt nihil præter caritatem debere vos recognoscatis. Quæ sic semper est soluenda vt semper debeat, & sic semper est impendenda, vt tunc maximè retineatur cùm impenditur. Pecunia autem cùm persoluitur ei cui redditur accedit, & à reddente discedit. Diligere alterum est ei propter ipsum bene optare. *Inuicem*] .i. inter vos vt sit mutua dilectio. Proximum intellige omnem hominem qui humanitatis natura nobis coniunctus est, & ex eodem patre Adam cōmunem nobiscum dicit originem: si enim Apostolus proximum intelligat Iudæum tantum secundum quod in lege dicitur, *non fānerabis proximo tuo*, sed alieno: nequaquam stare potest quod ait, cum qui diligit proximum non adulterari, &c. cùm videlicet hæc etiā

committi in infidelibus possint. *Legem*] Moyſi dicit ubi quæ ſubiungit præcepta continentur. *Nam non adulterabis*] Adulterari ſiue mœchari pro omni illicito concubitu lex ponere videtur alioquin nuſquam illam fornicationem excluderet, quæ ab eis committitur qui coniugati non ſunt. Cùm itaque dicit, non adulterabis, ſpeciem pro genere ponit, ſicut è conuerſo ſubdit: *Non occides*, genus pro ſpecie. Non enim occidi ab homine beſtiam, ſed hominem vetat. Tunc autem homo hominem occidit, non Deus per eum, ut ſupra quoque innuimus, quando id propria gerit voluntate, non diuinę legis ſanctione conſtrictus, de qua quidem iniuſta occiſione Dominus Petrum inſtruens ait: *Qui acceperit gladium, gladio peribit*. Qui per ſe acceperit ait, non cui à poteſtate traditur, ad iuſtitiam ſcilicet exercendā, gladio perire dignus eſt. Tunc etiam ipſe tantummodo abſque Deo id facit .i. cum ad propriam voluntatem implendam non ad iuſtitiam exercendam id agens homicida ſit. Vnde Auguſt. quæſt. in Exod. cap. xxvi. i. Cùm miniſter iudicis occidit eum quem lex iuſſit occidi, proſectò ſi id ſponte faciat, homicida eſt, & ſi eum occidat quem ſcit à iudice occidi debuiſſe. *Non furaberis*] .i. non fraudulentè aliena tolles. Non enim Hebræi furtum fecerunt, cùm iuſſu diuino Ægyptios ſpoliauerunt ab his quæ Dei magis quàm ipſorum erant. *Faluſum teſtimonium*] contra conſcientiam ſcilicet loquendo. *Non concupiſces*] aliena ſcilicet non tantummodo non tolles. *Et ſi*] mandatum ſubaudi dilectionis in hoc præcepto completur, *diliges, &c.* Aliud eſt dicere ſicut te, aliud eſt quantum te. Ibi quippe ſimilitudo, hîc æqualitas oſtenditur. Vnde & cùm Veritas ait, *Eſtote miſericordes, ſicut & pater veſter celeſtis*, ſimilitudinem potius miſericordiæ quàm æqualitatem expreſſit. Si autem vnumquemque quantum me diligere deberem, omnes æqualiter à me diligendi eſſent. At verò cùm nemo niſi propter Deum diligere debere videatur, tanto amplius quiſque diligere dignus eſt, quanto Deo carior habetur & melior eſt. Si enim Deus quia melior eſt ſuper omnes eſt diligendus quicunq; poſt eum meliores ſunt, amplius diligendi ſunt quàm alij. Aliter quippe caritas ordinata non eſt. Eum autem plus diligimus cui ut beatior ſit optamus, licet ei de corporalibus bonis minus quam de noſtra vel eorum qui ſpecia-

liter nobis adhærent curam agamus. Tunc autem quemlibet sicut nos diligimus, cum eum ad beatitudinem sicut nos peruenire volumus, eadem scilicet intentione circa eum habita, qua circa nos, quia videlicet hoc ei bonum existimamus esse sicut & nobis. Fortassis enim cum quis alium odit, eum in paradiso iam esse vellet, quo nil melius ei optare potest: nec tamen ideo eum diligit, cum id non tam propter eum quàm propter se ab eo liberandum faciat. *Dilectio proximi*] vere qui diligit proximum non adulterabit, non occidet, &c. quia nullum penitus malum operatur. Vnde apparet David dum cum Bersabee fornicaretur vel Vriam ad mortem proderet, nequaquam proximum dilexisse: sed & cum alius dicat Apostolus: *Qui enim non diligit proximum quem videt, Deum quem non videt quomodo potest diligere?* utique nec Deum tunc dilexisse videtur. Quomodo etiam dici potest alterum diligere sicut semetipsum, cum nec semetipsum vere diligat, qui à morte animæ sibi parcendo non parcat? Scriptum quippe est, *Qui diligit iniquitatem, odit animam suam.*

PLENITUDO ergo.] Quandoquidem .s. proximi etiam dilectio legem implet, ut dictum est: ego multo magis de genere ipsius, quod est dilectio, id recipi constat. Cum verò tota meritorum nostrorum summa in dilectione Dei consistat, & proximi, diligenter utraque si possumus à nobis est describenda, & insuper demonstrandū quomodo prætermissa Dei dilectione, quæ maior est, ausus sit Apostolus dicere dilectionem proximi legem implere. Dilectio Dei ex toto corde in nobis est optima illa erga Deum voluntas, qua ei tantò amplius placere studemus, quantò amplius ei placendum esse recognoscimus. Ex toto autem corde seu ex tota anima id agimus, quando sic ad eum penitus nostræ dilectionis intentionem dirigimus, ut non tam quid nobis utile sit quàm quid ei placitum sit attendamus. Alioquin nos potius quàm ipsum dilectionis nostræ finem .i. finalem & supremam instituere-mus causam. Dilectio vero Dei erga nos est ipsa diuinæ gratiæ de salute nostra dispositio. Proximum verò tanquam se diligit qui propter Deum tam bonam erga eum voluntatem habet, ut sic se propter eum gerere studeat, ne ille de se iuste conqueri possit, sicut nec ipse sibi ab illo vult fieri, de quo iuste conqueri queat. Ad hanc autem proximi dilectionem illa
duo,

duo naturalis legis præcepta pertinent: *Quod tibi non vis fieri, alteri ne feceris*: Et, *quæ vultis ut faciant vobis homines, & vos eadem facite illis*. Quorū quidem præceptorū intelligentia quæ sit habenda, non fortassis omnibus patet. Sæpe enim alijs ex caritate honorem aut beneficium impendimus, quod ab alijs suscipere recusamus, vel sæpe alios pro iustitia punimus, vel etiam interficim⁹, cū hoc ab alijs nullo modo pati velimus. Quis etiam nesciat nonnunquam nos velle ipsa i obis fieri quæ non conuenit? non tamen ideo nos alijs ea facere debere. Vt si velim mihi assentiri in malo, nūquid alijs similiter assentiri debeo ad peccandum? Sæpe etiam Prælati de subditis exigunt talia obsequia quæ nequaquam conuenit eos subditis reddere, & pauperes à diuitibus multa sibi fieri volūt, quæ minimè ipsi alijs facere possunt: vt videlicet hoc implere queant, *quæ vultis ut faciant vobis, &c.* nisi forte dicatur hoc non esse generale præceptum, sed his tamen hoc præcipi, qui vicem beneficiorum referre possunt, sicut & cū dicitur, *dare eleemosynam*, vel, *frange esurienti panem tuum*, ijs tantum qui hoc possunt iniungitur. Vt autem breuiter objectis respondeamus, cum dicitur, *Quod tibi non vis, &c. & quod vultis ut, &c.* sic accipi debent, vt illud de iniurijs cauendis, istud de beneficijs impendendis intelligas, ac si dicatur: Sicut iniuriari non vis, sic ab alienis abstine offensis, & sicut tibi in necessitatibus tuis vis misericorditer subueniri, ita & alijs subueni si possis in suis. Nemo autem bonus se id posse fatetur, qui sui iuris non esse, vel sibi minimè conuenire credit. Cū autem Deus propter se tantum sit diligendus, proximus autem propter Deum, constat in dilectione proximi dilectionem Dei includi: cū videlicet sine dilectione Dei esse non possit. Vnde & cū eam describeremus prouidè propter Deum adieciimus. Dilectio vero Dei cum naturaliter prior sit dilectione proximi, sicut & Deus naturaliter prior est proximo, non ita è conuerso dilectionem proximi necessariò cōprehendit, vt sine proximo Deus diligere sicut esse potest. Vnde benè dilectionem proximi, quam dilectionem Dei legem adimplere videtur Apostolus dixisse. Non immeritò quæri potest, si eos quoque diligere debeamus, qui in inferno sunt, vel qui prædestinati ad vitam non sunt, aut si sancti in alia etiam vita omnem proximum ita vt se diligant, tum eos scilicet quos dam-

natos iam vident vel damnatos Deo reuelante prævident, quã electos. Sed cùm in proximo sicut diximus omnis homo sit intelligendus, quomodo dilectionẽ proximi retinebunt, si quosdã non diligant, aut quomodo ibi quàm hic perfectiores habentur si in eis dilectio proximi sit cõtracta vel diminuta? Neque enim cũ sanctos Angelos diligamus, peruersos diligere debemus. Quomodo ergo rationalis est vel eorum vel nostra dilectio, si in ipsa etiam diaboli mēbra cõplectamur? Nunquid quia in hac vita qui prædestinati sint vel non sint ignoramus, ideo rationabiliter omnes diligimus, vel pro omnibus etiam oramus? aut si hoc fieri rationabile non est, quomodo id facere iubemur pro ipsis, & non potius pro nobis, cùm nobis magis quàm ipsis proficiat? Quomodo etiam recta intentio quæ erronea? quia enim id eis profuturum esse credimus id agimus, aut si nos adhuc ignorantia excusat, quid de hoc respondemus quod cum non omnes saluandos esse sciamus, vel paucissimos iuxta illud veritatis, *multi vocati pauci verò electi*: & , *arcta est via quæ ducit ad vitam*, &c. tamen omnes saluari volumus, & pro omnibus oramus, scientes scilicet nec nostram voluntatem nec orationem effectum consequi debere? Sed dicis illud Augustini: Habe caritatem, & fac quicquid vis. Et recordaris illud Hieronymi, Caritas mensuram non habet. Vnde sepe caritas modum nos ita excedere compellit, vt fieri velimus quod fieri nequaquam bonum est aut iustum, & è contrario nolle fieri quod fieri bonum est, sicut interfici sanctos vel affligi qui etiam eis cooperantur in bonum. Sed hanc Ethicæ nostræ reseruamus discussionem.

ET *hoc scientes.*] Sic construe. Et hoc scientes tempus, quia *hora est iam nos de somno surgere.*] Abijciamus opera tenebrarum, &c. de somno & negligentia vel torpore boni operis. Cùm dicit, hora quæ modicum est tēpus, non dicit vel hebdomadam seu mensem vel annum, sine dilatione nos id facere adhortatur. Quo enim breuius est tempus quo aliquid est agendum, citius hoc faciendum est. *Non enim*] Ideo celeriter surgendum nobis est à somno, quia non iam fidei nostræ bonis operibus superadditis propinquiore sumus ad percipiendum æternæ vitæ brauium, *quia eum primo credimus*] in ipso scilicet nostræ conuersionis exordio. Metaphora quæ ducitur à somno, iam nobis surgendum esse conuenientibus

prosequitur verbis, dicens iam noctem præcessisse, quæ dormitionis est tempus, & diem aduenisse. Nox ignorantia salutis est, dies cognitio vel illuminatio. Non mirum dum hac nocte premebamur, si pigri ad operandum eramus. Expulsa est cæcitas infidelitatis de cordibus adueniente doctrina Christi qui ait, *Ego sum lux mundi*. Nec tam nos ab hac nocte quàm ipsa à nobis recessit, nec tã nos ei quàm ipsa nobis appropinquauit: quia nobis nequaquam id requirentibus diuina sic operata est gratia, sicut de ipso scriptum est Domino, *Inuentus sum à quærentibus me, &c. Abijciamus ergo.*] Quandoquidẽ .s. nox ista iam præcessit, & dies appropinquauit. Nec dicit iã abijciantur sed abijciamus, quia iam per fidem illuminati operari valemus. *Opera tenebrarum.*] Dicit mala opera iuxta illud veritatis, *Omnis qui male agit odit lucem*, vel opera infidelium & tenebroforum, quibus nondum soli iustitiæ ille ortus est, vt eorũ illuminet corda. *Arma lucis*] virtutes sunt fidelium quibus contra vitia vel diabolicas tentationes dimicant. Sic, inquam, induamur arma lucis, vt ita induti honestè ambulemus tanquã in die, quando preciosioribus indumentis quisque induitur, *Non in*] quæ sint abiicienda opera, prius docet, *Non in commessionibus*, subaudi ambulemus. i. pedes nostros qui affectus animi intelliguntur, in istis non ponamus. Commessatio dicitur conuiuium de diuersis familiis cõgregatum, vbi quisque de suo aliud ponit, & ideo securius comedit tanquam de suo vescens atque auidius, ne quasi minus cibi consumens & æqualiter expendens iniuriari videatur, & tanto licentius gulæ indulget, quando plurimorum exemplis incitatur. Dicitur itaque commessatio quasi corporis vt dictum est esus, à comedendo. i. simul edẽdo. Hieron. Commessatio est mensæ collatio. Quales quidẽ commessiones & Salomon in Prouerbiis interdicens ait, *Noli esse in conuiuiis potatorum, nec in commessionibus eorum qui carnes ad vescendum conferunt, quia vacantes potibus & dantes symbola consumentur*. Haymo. Cõmessatio dicitur mensæ alternatio: sunt enim conuiuia quæ celebrantur alternatim, & præparantur à socijs per dies & vices. Sunt alia quæ ex communione, quando vnus affert panem, alius carnes, alius vinum, &c. Bria genere masculino dicimus calicem aptum potationi, à quo dicitur ebrietas, quæ est potatio nimia. Quod autem hoc loco dicit Apo-

stolus, *non in commensationibus & ebrietatibus*, ad illud respicit quod in Euangelio Dominus ait, *videte ne grauentur corda vestra crapula & ebrietate* .i. superfluo cibo & potu.

Non in cubilibus] Quæ commensationes & ebrietates sequantur, consequenter adiungit, vt eo amplius vitentur, quo ex eis peiora proueniunt. Cubilia proprie ferarum sunt, vel irrationalium animalium, quibus ebriorum lecti comparantur, in quibus, imagine Dei .i. ratione per ebrietatem extincta, facti sunt sicut equus & mulus, quibus non est intellectus. Ebrietatem quoque impudicitia sequitur. Vnde & idem alibi adhortatur Apostolus : *Nolite inebriari vino, in quo est luxuria*. Quod pessimo nobis exemplo B. Loth ebrietas exhibuit. Tale est ergo in cubilibus & impudicijs, ac si diceret in cubilibus impudicis, vbi absque omni reuerentia quasi pecudes ebrij luxuriantur. Ad has maximè commensationes & ebrietates impudiciæ prædicator Ouidius fornicarios venire adhortatur, vt inde facile fornicationum suarum occasionem assumant. *Non in contentione*] Tumultuosa est ebrietas, & facile in contentionem prorumpit, vt litiget. Emulationem dicit zelum malum, idest commotionem odij in alterum, quod maximè ex conuicijs vel iniurijs contentiones sequantur: fere enim omnes & maximè liberales homines magis ex turpitudine verborum quàm ex iactatione dānorum in odium accenduntur. Post opera tenebrarum, quæ abijcienda dicit, arma lucis .i. virtutes Christi quas induamur supponit dicens, *sed induimini*] Agnum vel leonem induere dicitur quicumque habitum mansueti vel crudelis assumit: Sed & Christum qui plenitudo est omnium virtutum induere dicitur, qui eius sequendo vestigia, omnibus pro posse suo studet se adornare virtutibus. Dicit idem Apostolus alibi de Christo : *Qui factus est sapientia nobis à Deo, & iustitia, & sanctificatio & redemptio*. Ac si apertè dicat. Eum nobis omnes virtutes fieri, vt cū virtutibus adornamur Christum induere recte dicamur. Et vt specialiter Christum induere possitis, carnaliter ne viuatis, cū videlicet caro aduersus spiritum concupiscat .i. Christum, *Curam ne feceritis in desiderijs*] in desiderijs, inquit .i. non in superfluitate voluptatum, sed in necessitate alimentorum. Oporteret enim & corpori quoque nostro necessaria impendi, sicut superflua subtrahi: vt vide-

licet naturæ substantia conseruetur, & vitiorum fomenta denegentur. Non ergo ait simpliciter, *carnis curam ne habueritis*, sed, *in desiderijs*. i. in voluptatibus potius quàm in necessitatibus. Non enim naturæ, sed vitiorum hostes esse debemus.

INFIRMVM autem.] Cum superius dixisset, *non in contentione*, hic præcipuè cuidam peruersæ contentioni in primitiua Ecclesia statim expositione finem imponere studet. Quidam enim ad fidem nouiter conuersi Iudæi & nondum de libertate Christianæ fidei satis instructi, putabant adhuc etiam carnales obseruantias legis retinendas esse, & præcipuè à carne porcina, & cæteris cibis quos lex interdixit, nostrum quoque abstinendum esse eo maximè fortassis quod quicquid abstinentiæ esse videtur virtuti deputatur. Sicut ergo superius superfluas commestationes interdixit, hic ita superfluis abstinentijs consulit, ne per huius contentionis dissensionem infirma adhuc .i. imperfecta Iudæorum conuersorum à Deo scandalizaret, vt ad Iudaismum redirent, si ab his .s. interdicerentur abstinentijs, quas lex antea sanxerat, immò ipse Dominus per legem, vnde his qui inter Romanos perfectæ fidei vel doctrinæ iam erant, consulit Apostolus, vt si quis de nouiter conuersis Iudæis adhuc infirmus .i. imperfectus in fide sit, nondum .v. credens Christum seu Euangelicam doctrinam ad salutem sufficere sine carnalibus legis obseruantijs, non ideo eum abijciant, sed assumant eum venientem scilicet ad conuersionem, non disceptantes de cogitationibus eius .i. de hoc quod in talibus credit, non contendentes: facile enim contingere potest vt qui in exordio suæ conuersionis imperfectæ est fidei, paulatim postmodum instructus ad perfectionem perueniat. *Alius enim*] vnde disceptationes huius sint exponit dicens, quia alius quam ille .s. præmissus, qui imperfectæ est fidei. *Credit se manducare omnia*. i. licere sibi quibuscumque cibis vesci, vt nullum .v. indè reatum propter legem incurrat. *Qui autem*] Ac si diceret, sed qui hoc non credit, abstineat ab his .s. quos v. cibis, ne .v. contra conscientiam propriam agens peccet. Et hoc est: *Qui infirmus est*, in hac scilicet fide verborum timens .s. se contaminari quibusdam cibis, *olus manducet*] .i. id ei consulo, vt eis utatur cibis, quos & facile possit habere, & minus scādali alijs inde præbere, & nonnullam etiam suæ Religionis commen-

dationem acciperè. Si enim alias carnes ederet, alias non; facile iudaizare conuinceretur. Sed cùm ab omnibus communiter abstinet, & vilioribus cōtentus est cibus, religioni potius quàm errori fidei deputatur.

Is qui] Postquam dixit in talibus non esse contendendū; dicit etiam non ab altero in corde suo, & quasi damnandum censeat, qui non manducat omnia .i. à quibusdam abstinet. *Et qui non manducat*] scilicet omnia simpliciter, nō ideo iudicet .i. damnandum censeat manducantem, quasi legis transgressorem. *Deus enim illam*] tam scilicet qui manducat quàm qui abstinet, assumit, non abjicit: multi etenim ad fidem conuersi sunt in multis adhuc errantes, & postea paulatim inde correpti & edocti sunt. Nota quod ait *assumpsit*] potius à Deo quàm per se venientem iuxta illud veritatis: *Nemo venit ad me nisi Pater meus traxerit eum. Tu quis es.*] Ac si diceret, Quem te esse existimas, qui præsumis seruum alterius iudicare. .i. de his quæ agenda sunt ei pro tuo arbitrio disponere? Quod est dicere: Dimitte hanc ordinationem vitæ serui Domino suo, qui vel per seipsum vel per vicarios suos de his cùm voluerit eum instruat, non tu qui conseruus es nec venisti imperare, sed obedire sicut & ille: *suo Domino*] .i. arbitrio Domini sui tam bonus eius status in fide, vnde lapsus in errorē relinquendus est, & ad ipsum tantummodo spectat vtrumque à quo ipse quod meruerit recepturus est. *Stabit autē*] ac si diceret, dixi, *stat aut cadit.* Sed quia quæ dicta sunt in meliorem partem interpretari vel exponere debemus, dico potius stabit .i. non propter hoc damnabitur, quod vel zelo legis abstinet, ne contra conscientiam peccet. *Potens est enim*] Ac si diceret, Ideo quidē melius est opinor vel caritatiue assero, quia nil aduersari videtur quin hoc sperandum non sit. Et hoc est, *Potens est Deus, &c.* Ideo enim Deus posse dicitur quod ne ab eo fiat nulla impediri ratione videtur .i. vel authoritate contradicitur. Tale est ergo, *potens est Deus*, ac si dicatur. Nulla ne hoc faciat contraire ratio videtur. *Nam alius*] vnde ita alij alios iudicent vel repræhendant subiungit Apostolus, ex proprijs scilicet conscientijs, cùm alius scilicet censeat obseruandum in abstinentia supradictorum *diem inter diem*] .i. diem aliqua alia die interposita, sicut modo quarta & sexta feria, quibus maximè ab omnibus quoque carnalibus abstineri solet prop;

ter edomandam scilicet carnem, non propter aliquod legis mandatum. *Alius omnem diem*] scilicet obseruandum esse, ab his videlicet carnibus, quas lex interdicit.

Vnusquisque] in talibus his scilicet diiudicandis vel deliberandis, de quibus nulla adhuc discussio vel ratione vel authoritate facta est. *Abundet in suo sensu*] .i. suam magis opinionem quàm alterius sequatur. Nondum enim ab Apostolo vel alijs doctorib⁹ manifesta ratio tradita Romanis istis fuerat, cur propter præceptum legis hæc abstinencia seruanda non esset. *Qui sapit diem*] Ac si diceret, Ideo quisque nostrum in talibus adhuc prorsus iudicio relinquatur, quia aliter contra conscientiam agendo peccaret, sicut postmodum scilicet dicitur quia omne quod non est ex fide peccatum est, & hoc est, *Qui sapit diem*, hoc est credit aliquam obseruari debere, ad honorem Domini hoc facit, cui .s. per abstinentiam hanc moderatam placere se credit. *Et qui manducat*] .i. à nullis sibi vnquam abstinendum credit, cùm videlicet nullam rebellionem carnis quæ domanda sit sentiat, vel infirmitatem patiatur quæ abstinentiæ contraria sit. Nondum enim in tempore Apostolorum quadagesimæ vel sextæ feriæ sic institutam esse abstinentiam vel confirmatam credimus. *Domino manducat*] .i. ad honorem eius similiter, propter hoc videlicet quod statim subiungit, quia *gratias ei agit*] .i. laudē refert, de refectione scilicet ab eo sibi præstita. Ex quo propendendum est, quantæ sit culpæ has grates post cibum Domino non referre. *Et qui non manducat*] .i. penitus abstinet propter legem ab his quæ ipsa prohibet ad honorem Domini, non manducat .i. abstinet. Non enim hanc obedienciæ reuerentiam legi exhibet, nisi propter Deum qui eam dedit, & cùm abstineat insuper de perceptione alterius cibi concessi, & à Deo præstiti, gratias agit. *Nemo enim*] Ideo & manducans & abstinens ad honorem Dei hoc agit, quia semper tam viuendo scilicet quam moriendo electi Dominum honorant atque glorificant: viuendo quidem glorificant iuxta illud veritatis, *luceant opera vestra bona, ut glorificent patrem vestrum qui in cælis est*. Mors quoque iustorum Dominum glorificat, sicut de Petro dicitur *significans qua morte clarificaturus esset Deum*, quādo nec in exitu quoque suo iustus à bonis operibus & oratione & à laude sui creatoris cessat. Tanto enim

sollicitius quisque se præparat, quanto amplius ad coronæ suæ perceptionem propinquat. Sibi vivere vel sibi mori dicitur, quia ad cōmoda sua vel propter gloriā potius quā ad honorem Dei disponere intendit. Multi etenim morte quoque sua magnitudinem animi sui ostentantes, gloriam sibi acquirere cupierunt, vel sibi etiam inferentes manus morte cruciatus suos finendos esse crediderunt.

SIVE ergo] Quandoquidem scilicet nos electi Deo, non nobis, ut dictum est, vivimus aut morimur. ergo morimur. **Ac** per hoc siue vivimus .i. tam vita nostra quā mors Deo potius, ad cuius honorem fit, quā nobis est ascribenda .i. eius potius pro hoc dicenda est quā nostra. *In hoc enim]* ac si diceret. *In hoc quod mortuus est]* pro nobis scilicet & propter iustificationem nostram, sicut idem supradixit Apostolus, meruit tam morti nostræ quā vitæ dominari, ut sicut utrūque fecit pro nobis, ita tam moriendo quā vivendo non nisi ei obedire, & eius voluntatem implere quæramus. Aliter enim mortuorum Dominus non est, sed quasi hostis puniendo, nisi etiam usque ad mortem in eius obedientia persistamus, parati animam non solum propter eius confessionem, sed etiam pro fratribus ponere. *Tu autem qui]* Post quam dixit, *Tu quis es qui i. a. s.* addit nunc, *fratrem tuum*, ut si hoc videlicet pro iniuria quam facit Domino suo non dimittit, saltem pro fraterna dilectione, ne scilicet fratrem suum scandalizet, cum sic iudicare desistat. Aut si non iudicas, quare *spernis]* in talibus ubi magis intentio quā actio discutienda est, cum nondum videlicet inde certa sit prælata sententia. Pro talibus enim & similib⁹ diffiniēdis vnde Romani altercabantur, in ipso Epistolæ suæ principio Apostolus dixit se ad eos desiderare venire, ut aliquē in eis sicut & in cæteris gentibus fructū haberet. *Quis enim]* Ac si diceret, Non ita præsumatis dubia iudicare, qui de cæteris à Deo cū alijs omnibus hominibus estis iudicandi: sed ei potius hoc iudiciū reseruate, qui omnibus habet iudicare. Et hoc est, *oēs enim]* vnde & Veritas, rectè de *Nolite iudicare, & non iudicabimini* .i. nō appetatis iudicare, ne hinc quoq; iudicemini atq; damnemini. Et ipse alibi cens Apostolus, *Nolite ante tempus iudicare quoadusque, &c.* Si autem diligentius consideremus, sicut Dei est potius occidere quā nostrum, sic & iudicare. Et postremò sicut omnia
ad

ad gloriam eius debemus facere, ita ipse potius per nos cuncta hæc operari debet, quàm nos ipsi. Tunc vero Deus iudicium facit potius quàm homo, quando ipse vel per legem aliquam vel inspirationem internam quid dicendum sit nos instituit, ut à nobis recitandum postea sit eius iudicium non faciendum. Tribus itaque modis de aliquo prius dubio iudicari videtur, per Dominum videlicet ipsum sicut exposuimus, per aliquam rei manifestationem, per hominem de sua scilicet opinione præsumentem. Cum autem aliquo euentu rei quod dubium fuerat manifestatur, ipsa res iudicare, non homo dicitur. In dubijs itaque tantum homo iudicare dicitur, quod omnino prohibetur, quando videlicet propriam tantum existimationem sequens præsumit definire, cum nec per Deum adhuc, nec per ipsam rei experientiam contingit eum certum esse. *Stabimus*] dicit quasi erecti, ut cognosci ab omnibus possimus, *ante tribunal*] .i. sedem iudiciariam Dei potius qui falli non potest, & iustus est, quàm hominis. Hanc quidem sedem Dei hominem à verbo assumptum intellige. Pater enim omne iudicium dedit filio, quia filius eius est. In hoc quippe homine assumpto filius Dei tam mortuus est quàm resurrexit sicut nunc diximus, & inde maximè iudiciū damnationis imminet, si mortuo pro nobis, ut dictum est, & resuscitato pro nobis tam mors nostra quam vita inseparabiliter non adhæreat, atque ad obediendum parata sit.

SCRIPTUM est enim.] Isaïæ testimonio probat quod omnes à Deo sint iudicandi. *Vino ego*] Ac si diceret, per memetipsum indeficienter vivētem iuro. Genu flectitur iudici quādo suppletur eius sententia; expectatur cui resisti non potest. Omnis lingua in illo iudicio confessionem laudis Deo faciet, quia nullius conscientia contra illius iudicis rectitudinem murmurare poterit. Vnde mali quoque pœnitentiam inter te agentes & ingemiscentes, hoc ipso quod facient attestabuntur iustam te damnationis accipere sententiam. In illo itaque iudicio tam iudicantes quàm iudicandi, vel qui iam etiam iudicati sunt genu flectent, quoniam omnes vel timore pœnarum vel perceptæ gratiæ beneficio sub tanto se iudice humiliabunt. Itaque quia videlicet ita omnes a stabimus ante tribunal tanti iudicij. *Rationem reddet*] .i. quantum ratio exegerit recipiet à Domino de pœna vel præmio. *Non ergo.*]

Quia videlicet ipse ita de omnibus & maximè de his quorum dubia est intentio iudicare habet. *Amplius*] .i. post admonitionem hanc nostram seu præceptionem. *Inuicem*] Alter videlicet alterum pro talibus damnandum esse reputando, *sed hoc magis*] .i. potius obseruandum censere ne *Ponatis offendiculum fratri*] .i. ne aliquid faciatis, cuius exemplo corruptus ipse corruat, vel scandalizatus & exasperatus reprehensione vestra à fide recedat. Et quoniam tota hæc contentio ex cibis lege interdictis nascebatur, dicit neminem ex qualitate ciborum contaminari, sed ex conscientia tantum transgressionis si eis contra conscientiam vescatur. Et hoc est, *scio*] .i. nō ex me, sed confidenter hoc dico, ex doctrina Domini qui ex his solummodo quæ de corde exeunt, non ex his quæ intrant in os, coinquinari hominē dicit. Et mittens ad prædicandū discipulos ait, *edentes & bibentes quæ apud illos sunt*, quia nullus cibus communis & immundus est per ipsum .i. ex semetipso, sed potius ex conscientia comedentis. Et hoc est, *Nisies*] Ac si diceret, sed ei qui existimat quem .i. aliquem cibum esse immundum .i. animam suam inde pollui, illi immundus est, quia contra conscientiam suam illum comedendo peccat. Quæ communicantur siue publicantur, tantò amplius immunda sunt quanto minus custodiuntur: ideoque commune pro immundo ponitur. Vnde & in actibus Apostolorum inquit Origenes, Dominus dicit ad Petrum, *Quod Deus mundauit tu ne commune dixeris*. Marcus etiam Euangelista communicare pro coinquinari ponens ait, *Non intelligitis quod omne extrinsecus introiens in hominem non potest eum communicare, quia non introit in cor eius, sed in ventrem vadit. Quæ de homine exeunt illa communicant hominem. Si enim.*] Dixi, non ponatis offendiculum fratri, Quia quisquis es, si propter cibum tuum, &c. .i. si sustines eum sic offendere. *Noli*] Post offendiculum vetat etiam scandalum, quia offensus facile recederet à fide, *pro quo*] scilicet saluando, *etiam Christus*] Ac si diceret, ne paruiendas salutem eius, pro quo tantum precium datum est.

Non ergo] generaliter admonet nos vitare blasphemiam omnem, per quam videlicet à nostra fide alios repellamus, ac si dicat: Quia videlicet exemplo Christi lucrandi sunt potius homines nobis quàm perdendi, caueamus facere quantum

possumus per quod bona nostra fides blasphemetur. *Novest*] .i. nullo genere cibi vel potus promeremur vt Deus in nobis regnet vel habitet. Quæcunque enim exterius bene fieri videntur, & maximè quæ ad abstinentiam pertinent, æquè reprobis vt electis communia sunt, & hypocritis sicut veris fidelibus, *Sed iustitia*] æquitas illa per quam quod tibi non vis alteri ne facias, & *pax*] inde .i. proueniens à concordia cum fratribus, & deinde *gaudium*] spirituale hinc exortum, *in hoc*] scilicet quod dixi, vt scilicet scandalum fratris vitet & iustitiam segetur & pacem, vt dictum est. *seruit Christo*] hoc est, ei hoc præcipienti obedit, & *probatus est*] .i. hominum quoque iudicio probatur, laudatur atque commendatur. *Itaque*] .i. & ita .s. vt dixi scandala vitando prius quæ ad pacem pertinent, vt dixi *segetemur*] .i. maximè studeamus concordiam teneri, cum fratribus quoque vt dictum est infirmis, & sic postmodum quæ sunt ædificationis, *inuicem custodiamus*] .i. alter qui perfectioris est fidei alterius imperfectam adhuc fidem instruat, & ad perfectionem promouere intendat. *Noli*] tu .s. qui perfectiorem habens fidem omnia comedis, scandalizando nouiter conuersum, & adhuc infirmum fratrem, *Opus Dei*] .i. illud fidei quod iam habet in eo destruere. *Omnia quidem*] Ac si diceret, Reuera tecum assentimur, quia nulla genera ciborum esu suo polluant animam, sed damnosum est tamen hoc scienter comedere, vbi offenditur frater. *Bonum est homini*] Ac si diceret, ita vt dixi comedere malum est, sed è contrario penitus abstinere propter offendiculum fratris vitandū salubre est, exēplo Daniel qui à vino quoque infidelis regis abstinebat, Iudæi etiam conuersi ab omni vino infidelium abstinendum censebant. *Offenditur*] penitus à fide recedendo vel saltem scandalizatur .i. apud se perturbatur quasi talem fidem, ad quam conuersus sit, iudicans legi contrariam & peruersam. *Aut infirmatur*] in fide scilicet suæ professionis de ipsa dubitando si non penitus eam damnando. *Tu fidem*] Ac si diceret, tu quidē qui omnia credis manducanda, *habes fidem apud te*] .i. hoc est tuo iudicio approbatam, sed, *habe illam & coram Deo*] .i. vt ei placeat & eius iudicio approbetur. Ea enim quæ coram nobis sunt videre possumus atque cognoscere, & ea Deus scire dicitur quæ approbat, & nescire quæ reprobat.

BEATVS est] subaudi *qui non iudicat semetipsum*] hoc est qui non acquirit sibi damnationem ex his quæ ipse potiùs quàm Deus probat .i. approbat, vel non improbat esse faciēda: ac si diceret, qui tantæ discretionis est vt etiam de his quæ credit licite fieri ita peruidet, ne ipsa indiscretè faciendo dānationē vel iram Dei incurrat. Vt enim Salomon ait, *sunt via hominis quæ videtur recte, nouissima autē illarū deducunt ad mortē.* Et ad Cain Dominus ait, *Nonne si recte offeras, rectè autem non diuidas, peccasti? Qui autem*] Ac si diceret, sicut ille beatus est, qui à licitis abstinet, ne his indiscrete vtendo ad scandalū, scilicet fratris damnationem incurrat, ita è contrario ille qui contra conscientiam suam illicitis vtitur, peccat. Et hoc est, *Qui autem* discernit .i. distinguit quosdam cibos edendo, eos scilicet propter prohibitionem legis non esse comedendos, & tamen contra cōscientiam suam eos comedit, dum videlicet credit ab ipso non debere comedi, reus per hoc statuitur, quia non ex fide est quod facit, immò contra fidem suam agit, idest contra hoc quod credit agit. Credit enim non esse comedendum, & tamen comedit, ac per hoc peccat. *Omnem enim*] ac si diceret, *Quia quicquid contra hoc quod creditur fit, siue in esu siue in alijs, peccatum est*] Deus enim qui cordis inspector est, non tam quæ fiunt quàm quo animo fiunt attendit. Non immeritò autem quæri potest de his qui interficiebant fideles quos seductores putabant, iuxta illud veritatis, *venit hora ut omnis qui interficit vos a. o. s. p. Deo, utrū in hoc peccauerint.* Si enim credebant eos seductores animarum, & ideo dignos morte, quomodo contra conscientiam suam eis parcere debebant? Quippe si parcerent, contra conscientiam suam agerent, & ita peccarent. Sed rursus cum interficiunt innocentes, immò electos Dei, quod iniquum est, dicemus eos non peccare, aut eos in hoc bonam intentionem habere, quia maximè errat, ideoq; bona æstimatur potius esse quàm sit. Quomodo etiam ignorantia excusat eos à peccato cum cōstet nōnulla etiā peccata ignorantie dici? Alioquin quomodo Psalmista diceret ad Deū: *Effunde iram tuā in gentes, quæ te non nouerunt.* Et Veritas de persecutoribus suis, *Pater ignosce eis, quia nesciūt quid faciūt.* Vbi enim culpa non præcessit, quid est opus ignoscere? Si enim ignorantia vel etiā fidei error excuset penitus à culpa, vnde Iudæi aut Gentiles, vel quilibet infideles de infidelitate sua dānandi sunt, cum vnusquisq; fidem

suâ rectâ esse putet? Quis enim sponte in ea persistat fide, quâ erroneam credat, ut sibi partem eligat deteriore? De talibustamen Veritas ait, *Qui non credit, iam iudicatus est.* Sed huius rei discussionem Ethicæ nostræ reservamus.

QUÆRENDUM quoque arbitror cur hoc loco Apostolus consulat alimentis & cibis propter scandalum infirmorû fratrum abstinendum, cum in Epistola ad Galatas dicat se in hoc Petro restitisse, quia reprehensibilis erat, sed hoc definiendum illi loco reservamus. Quærendum etiam si iuxta ipsum Apostolum omnia munda mundis, & nil reiiciendum in cibis quod cum gratiarum actione percipiatur. Cur enim Apostoli vel sancti Patres quædam nobis in cibo sicut etiam lex interdixit? Vnde etiam in Actibus Apostolorum continetur, *Surrexerunt quidam de heresi Phariseorum qui crediderant, dicentes quia oportet circumcidi eos, præcipere quoque lege Moysi.* Surgens Petrus dixit ad eos, *Quid tentatis Dominum imponere iugum super cervicem discipulorum quod neque Patres nostri, neque nos portare potuimus? Sed per gratiam Domini Iesu credimus salvari quemadmodum & illi.* Item respondens Iacobus & dicens, *Nosm à seculo est Domino opus suum, propter quod ego iudicio non inquietari eos, qui ex gentibus conuertuntur ad Deum, sed scribere ad eos ut abstineant se à contaminationibus simulacrorum & fornicatione & suffocatis & sanguine.* Moyses enim à tēporibus antiquis, habetur in ciuitatibus singulis quæ eum prædicant, in synagogis vero per omne sabbatum legitur. Origenes in hac Epistola supra ubi scriptum est, *si igitur præputium legis, &c.* Vis autem videre usque sanguis est ipsius, quod inuenies superius in II. quaternione Ambros. in Epist. ad Galat. de Apostolis. Præterea cum legem dedissent, non molestari eos qui ex gentibus credebant, sed ut ab ijs tantum obseruarent. i. à sanguine & fornicatione & idololatria, non utique ab homicidio prohibiti sunt, cum videntur à sanguine obseruare: Sed hoc acceperunt quod Noe à Deo didicerat ut obseruarent à sanguine edendo cum carne. Quæ sophistæ Græcorum non intelligentes, scientes tamen à sanguine abstinendum adulterarunt, scriptum quarum mandatum addentes, & à suffocato obseruandum, quia iam supradictum erat quod addiderunt. Hieronymus in Ezechiel. Omne morticinium & captum à bestia de auibus & pecoribus non comedunt Sacerdotes, & iuxta litteram omni

generi electo, regali scilicet & sacerdotali, quod propriè ad Christianos refertur, qui vncti sunt oleo spirituali, de quo scriptum est: *Vnxit te Deus oleo exultationis præ participibus tuis.* Hæc præcepta conueniunt, vbi morticinum non comedant tam de auibus quàm de pecoribus, cuius nequaquam sanguis effusus est. Quod in actibus Apostolorum dicitur suffocato, & quia necessario obseruanda Apostolorum Epistola monet, & capitur à bestia, quia & ipse similiter suffocatus est. Ex pœnitentiali Theodori. Animalia quæ à lupis seu canibus lacerantur non sunt comedenda, nec auis nec capra si mortui inuenti fuerint, nisi forte ab homine adhuc viua occidantur prius, sed porcis & canibus dentur. Aues verò & animalia cætera si in retibus strangulentur, non sunt comedenda, nec si oppresserit accipiter, & si sic mortua inueniuntur, quia in Actibus Apostolorum præcipitur abstinere à fornicatione, à sanguine suffocato, & idololatria. Itē si porci vel gallinæ sanguinem hominis comederunt, mox occidantur, & penetralia proijciantur, & cætera caro manducetur: si autem tardatur occidi non comedantur: si autem cadauera lacerauerint mortuorum macerentur, & post anni circulum comedantur. Si autem porci occiderint hominem, statim interficiantur, & sepeliantur. Item, Qui manducat carnem immundam aut morticinam aut dilaceratam à bestiis, quadraginta dies pœniteat. Si autem necessitate famis contingat, multo leuius est. Item, Qui sanguine vel quocunque immundo polluitur, si nescit quod manducat leue est. Item, Qui sanguinem aue semen biberit pro aliqua re, iiij. annis pœniteat. Item, piscis mortuus inuentus in flumine non est edendus. Si verò piscando tactus fuerit & ipso die inuentus, qui non hæsitat manducet: qui autem dubitat, non manducet. Ex Concilio Gangrensi post Nicenum Concilium cap. 11. Si quis carnem manducans ex fide cum religione præter sanguinem & idolis immolatum & suffocatum ediderit, condemnandus tanquam spem non habens quid eas manducat, anathema sit. August. de fide ad Petrum, Firmissime tene, & nullatenus dubites omnem creaturam Dei bonam esse & nil rejiciendum esse quod cum gratiarum actione percipitur: & Dei seruos qui à carnibus aut vino abstinent, non tanquam immunda quæ à Deo facta sunt respicere, sed à fortiori cibo & potu pro

sola corporis castigatione abstinere. Sed si hæc in Apostolis & Apostolicis viris, quæ contraria videtur diliguntur, in ipsa radicis intentione discutiamus, reperiemus hæc & illa pro tēpore & loco modo prohibenda esse modo concedenda, & nonnunquā in aliquibus prohibēdis magis de honestate vitæ quàm de religione fidei præuisū esse. Sic enim in Examer. B. Ambros. allium quod ad medicamen sumi concedit, ad cibū sumi interdicat: quod .s. fœtore ipsi⁹ honesti viri facile scādalizētur. Sic & de nōnullis alijs vilibus cibis propter honestatem conseruandam fieri credimus. Nec mirum etiam si ea discretione, qua Apostolus hic à cibis quibusdam esse abstinendum propter scandalum scilicet infirmorum fratrum, & Iacob in primitiua Ecclesia quæ infirmæ adhuc fidei erat, eorum interdixit esum, in quibus fideles tunc maximè offendi considerabat. Nam & Apostolus ipse cū penitus circūcisionem interdicat, ad horam tamen ei cessit, Timotheum circumcidi permittendo, vel seipsum etiam in ritu Iudaico cum quibusdam conuersis Iudæis consecrando. Quod ergo aliqui sanctorum Patrum in quibusdam locis vel temporibus propter scandalum eorum, cum quibus conuiuebant, rationabiliter prohibuerunt, postmodum alij fide nostra iam optimè roborata laudabiliter concesserunt. Alioquin Moyse Apostolus inueniretur contrarius, si videlicet quod vno tempore prohibitum est vel permissum, semper esset tenendum. Nonnulla etiam quæstio esse potest de Iudæis seu proselitjs ante aduentum Christi per legis obseruantias professionem suam seu votum facientibus, vtrum postmodum ad fidem conuersi votum illud vel in cibis vel in alijs transgredi queāt. Tunc quippe statum suum adhuc lege retinente legitime factum fuisse votum huiusmodi videtur. Vnde nequaquam violandum esse videtur, nec ille qui tunc illud fecit postea factus Christianus ab abstinentia illa ciborum absolutus esse videtur: maximè cū remissius viuatur à nullis abstinendo, quàm à quibusdam: nec votum legitime votum bene quis intermittat, nisi ad maiora conscenderit, quæ illud tenere impediant. Ad quod quidem respondendum arbitror, quod si hoc non tam pro antistate legis non obseruet, quàm pro voti sui dispositione, nequaquam culpandus est, nec ab hoc absolueudus est voto, nisi fortè propter aliquorum scandalū eum

adhuc in hoc Iudaizare credentium, quasi nunc quoque statum suum legitime retinere crederet, & ob hoc abstineret. Videtur nec tale votum legitimè vel rationabiliter tunc esse factum, sed per errorem ab eo in professionem illud promissum esse, cum legem scilicet in pristino vigore suo perseveranturam crederet.

DEBEMVS] Dixi superius nil esse commune, immò omnia munda fidelibus, sed tamen debemus eorum qui aliter credunt & infirmiores sunt in fide debilitatem tolerare, & *non nobis placere*] .i. non nostram de eis voluntatem implere, ipsos scilicet repellendo, sed eorum quærere salutem, eos scilicet tolerando. Placeat, .i. placere studeat in eo quod culpabile non est, propter *adificationem*] scilicet ipsius. Aliter enim à nobis ædificari non poterit nisi nostram doctrinam susceperit, & hoc exemplo Christi faciamus. Et hoc est, & *enim.*] .i. homo ille assumptus à verbo, qui secundum eius vñctionem specialiter Christus dicitur, non tã humane quàm diuinæ voluntatis placitum implere studuit. Vnde & ipsemet ait, *Non veni facere voluntatem meam, sed eius qui misit me.* Voluntas quippe hominis ea propriè dicitur, quæ ex infirmitate vel passibilitate carnis illata eã naturaliter quietare appetit, quæ nullis affligatur molestijs, sed ab omni penitus pœna sic immunis, sicut & primis parentibus ante peccatum concessum est, & in futura vita plenius nobis concedendum est. Sicut enim miseriæ pœnam, sic quietem constat esse, & sicut quod beatitudinis vel quietis est quisque appetit, sic quod miseriæ vel laboris est, refugit. Talis itaque appetitus humana in nobis voluntas dicitur, quã voluntatē quisq; obediendo sequitur. At inquires, Quomodo Christ⁹ nō sibi placuit si placuit Deo patri? Nūquid alteri placere potest quod alteri displiceat? Nunquid omnes iusti Christo placent sicut & patri? An voluntas Patris est alia quàm voluntas Christi? Quid itaque est, Christus non sibi placuit, vel non venit facere voluntatem suam, nisi quod nūquam homo ille assumptus aliquid facere appetiuit quod hic sibi suaue esse sperauit, sed quia hoc Deo placere credidit? Omnes vero alij quantumcumq; sint sancti, quia omnino expertes peccati .i. non sunt, nonnulla ex infirmitate vel passibilitate carnis appetunt, non alia de causa nisi vt ipsi infirmitati satisfaciant, & præsentem passionem

tionem vel afflictionem euitent. Quod quidem est sibi placere, ut suam voluntatem facere .i. ad tantum vel præcipuè agere, quia sibi credat illud esse suaue, in seipsis scilicet huius actionis suæ finem constituentes. Quod à Christo longe penitus fuit. Tale est ergo, Christus non placuit sibi, sed videlicet Deo patri, quia nil homo ille appetiuit quod suaue ipsi esset, sed quia hoc Deum approbare sciret, vel eius in hoc præceptum haberet. Cui & ipsemet ait, *Propter verba labiorum tuorum e. c. v. d.* Quam quidem passionis aut laboris pœnam propter obedientiam susceptam Apostolus statim adiungit, ut videlicet per hoc ostendat eum Patri magis quàm sibi placuisse, sed sicut scriptum est in Psal. 78. *Improperia, &c.* Quisquis enim exprobrat nuntio alicuius, vel eum in aliquo deturpat seu honorat, non tam ei qui mittitur, quàm ei qui mittit imputandum est. Vnde & Saulo dicitur, *Saule Saule quid me persequeris?* me, inquam, potius quam meos, quia propter me potius quam propter ipsos. Quid autem improbare * Deo ^{*f impro:} patri, nisi irridere generationem esse in diuinitate, quam car- ^{perare} naliter eorum intelligentia capere non poterat? Hæc ergo irrisionis super Christum cecidit, quia dum hanc generationem prædicaret, vel se filium Dei diceret, Patris in hoc gloriam, non propriam quærendo, nō solum irrisioni indè est habitus, sed ad mortem quoque traditus, sicut scriptum est, *Deum se Patrem habere gloriatur, videamus si sermones illius veri sint, &c.* Et in Euangelio, *Confidit in Deo, liberet eum nunc si vult. Dixit enim quia filius Dei sum.*

QVAECVNQVE scripta sunt] ac si diceret, Quid ad nos nouæ legis professores testimonium veteris testamenti, maxime cum eius opera respuamus? Respondet quia quæcunque scripta sunt, tam in veteri scilicet quam in nouo Testamento, ad nostram .i. Christianorum, &c. Non enim illi in veteri Testamento docentur, sed excæcantur qui litteram occidentem ibi sequuntur, sed illi maxime qui frangentes exteriorem crustam mica interiore saginātur, sed & seculares litteras nō nisi ad doctrinam aliquam vel morum vel literaturæ, vel ut in aliquo sacræ scripturæ opitulentur Deus scribi permisit, licet hoc illarum scriptores ignorarēt. *Uper]* Ad hoc inquam eis instruimur, & docemur, ut per *patientiam]* videlicet in aduersis, & *consolationem]* in scripturis factā de brauiis videlicet

æternæ beatitudinis, spe per omnia corroboremur in Deo,
 scientes quia si compatimur & conregnabimus, & in patien-
 tia vestra possidebitis animas. Hæc autem spes illa est, de qua
 superius dictum est, *Spes autem non cōfundit*. Bene autem cum
 de aduersitatibus præmisisset dicens, *Impropéria impropéria-
 tum, &c.* patientiam contra illa scilicet necessariam & con-
 solationem scripturarum apposuit. Cum autē in exordio hu-
 ius Epistolæ prædixisset omnem scripturam diuinam aut do-
 cere aut mouere intendere, quomodo nunc dicit, *quæcun-
 que scripta sunt ad nostram doctrinam scripta esse*? sed profecto ea
 etiam quæ admoneret ad doctrinam scripta sunt, non quidō
 vt doceant quod fiat, sed vt doctrina efficaciam habeant. i. vt
 implere velimus quod edocti sumus. *Deus autē*] .i. sicut Chri-
 sti non placuit sibi, sed Deo, nec propriam gloriam, sed Patris
 quæsiuit: ita ipse Deus, cuius est & patientiam & consolatio-
 nem dare, det vobis id ipsum s. i. a. i. inter vos hoc quærere, vt
 alter alteri placeat in bonum *secundum Iesum Christum*] .i. eius
 vt dictum est exemplo, *vt unanimes*] .i. communiter tam in-
 firmi in fide quàm firmi, *concordi ore*] laudetis, *Deum*] de mi-
 sericordia scilicet redemptionis nostræ per filiū suū nobis
 exhibita. Vnde & cū dixisset Deum, addit eundem, &
Patrem Domini nostri Iesu Christi] Qui non solum ad gloriam
 suam, sed ad nostram etiam saluationem habere talem filium
 gloriatur, vt per eum etiam noster sit pater, qui descēdit quæ-
 rere fratres. *Propter quod*] vt videlicet ita communiter ab om-
 nibus honorificetur Deus, *suscipite*] vos inuicem, .i. non ab-
 iiciat vel exasperet alter alterum, sed qui firmior est in fide at-
 que perfectior infirmum toleret. Et hoc exemplo Christi fa-
 cite, qui nos videns & duræ ceruicis non solum infirmos fi-
 de, sed mortuos in infidelitate non repulit, sed suscepit; im-
 mō etiam traxit ad glorificandum Deum scilicet & laudan-
 dum tam de nostra scilicet conuersione quàm de aliorum per
 nos, *ministrum fuisse circumcisiui*] .i. Iudæorum, quibus solis
 per semetipsum prædicando verbum vitæ ministravit, sicut
 & ipse ait, *Non sum missus nisi ad oues quæ perierunt domus Is-
 rael. Propter veritatem Dei*] .i. vt promissio Dei consisteret, qui
 specialiter & frequenter eis se mittere saluatorem promise-
 rat. Et hoc est quod subdit *ad confirmandas*] .i. vt firmæ & in-
 concussæ permaneant promissiones illæ antiquis patribus

factæ de Christo eis mittendo. Voluit enim debitorem se teneri promittendo, vt solutor fieret propitiando.

GENTES autem] Ac si diceret, Dico Christum ministrum, &c. sed & gentes dico, subaudis *super misericordia*] sibi à Deo impensa, præcipuè nunc *honorare Deum*] Qui videlicet quanto amplius olim per idololatriam à Deo remoti fuerant, tanto nunc ad cultum Dei maiori copia propinquauerunt, vt vbi abundauit peccatum superabundaret & gratia. Et nota quod superius propter promissionem Iudæis factam non tam misericordiam dixit quàm debitum intellexit. In gentibus verò tantum rectius misericordiam vocauit, quantò eis pro multiplici sui erroris culpa minus debebatur, *sicut scriptum est*] in Psalm. loquēte scilicet ad Patrem in persona Christi dicentis Patri, *Confitebor tibi in gentibus* .i. laudari te faciam etiam à gentibus conuersis, & tibi per me acquisitis. Quarū quidem primitiæ Magi fuerunt, siue Samaritani etiam illi, quibus per Samaritanam illam innotuit, & fortasse etiam Gentiles illi, qui circa passionem per Philippum & Andream ad eum accesserunt, eum videre cupientes : de quibus ait, *Nunc clarificatus est filius hominis. Et nomini tuo*] ad honorē tuum v. tuam dilatandam notitiam spiritualibus canticis eos vacare faciam. Quod verò ait propterea superius, continuatur in Psalmo vbi præmissum est, *Et ab insurgentibus in me erue me, &c.* Exaltatus quippe est per ipsos qui eum crucifigentes nomen eius delere crediderūt, de qua quidem exaltatione ipse quoque prædixerat, *Et ego si exaltatus fuero à terra, omnia traham ad me ipsum*, non solum videlicet Iudæos, sed & gentes conuertendo. *Et iterum*] per Isayam scilicet præuidens Ecclesiam tam ex Iudæis quàm ex gentibus congregandam, hortatur communiter vtrosque ad exultandum & laudandum Deum de sua conuersione. Plebem Dei & quondam peculiarem populum eius Iudæos dicit, *Et iterum*] per ipsum David *magnificate*] idest bonis operibus glorificate, *omnes populi*] idest quælibet fidelium multitudo, non solum ex gentibus congregata, *Erit radix*] Aliud testimonium de conuersione gentium post incarnationem scilicet Domini ab eo regendarum, & in eo sperandarum, sicut radix residuum est arboris incisæ, & si in terra sit recondita, multas ramusculorum emittit propagines. Ita Iesse patre David olim de-

functo, & tanquam arbore de vita præsentis abscisso, quasi radicem & residuum sui Christum habuit longe postea de semine suo nasciturum. Radix hæc in terra recondita est, dum in ipsa carne sua, quæ terrenæ substantiæ est, sepultus iuxta quod de semetipso ait, *sicut fuit Ionas in ventre ceti*, &c. in multam propaginem fidelium resurgendo pullulavit, secundum illam ipsius parabolam, *Nisi granum frumenti*, &c. Scimus autem & tunc maximè radicem quolibet generari, & quasi impinguari, ut multiplicetur, si ei fimus adhibeatur, & stercora iuxta illud Dominicæ parabolæ, *dimitte & hoc anno, ut mittam stercora*. Quid autem fimus vel stercora sunt huic radici admota, nisi sordes peccatorum nostrorum quæ suscepit & portavit in corpore suo, ut de ipso tanquam radice & omnium origine in numeri propaginis fructus in Ecclesia nascerentur? Nil quippe nasci profuit, nisi redimi profuisset. Hoc itaque spiritus per Isaiam promittens, ait: *Erit radix Iesse* .i. eo defuncto, supererit ei de suo semine posteritas per quam restitueretur vberius in prole quod deperijt in arbore, quia plures fideles orientur quàm antea de Iesse exiterant, *Et qui]* Ac si diceret, & ille erit ista radix, *qui exurget]* conscendendo vehementer donec eius corpus quod est Ecclesia ubique dilatetur, quarum regimini ipse semper tanquam caput præerit, sicut & promittit dicens, *Ecce ego vobiscum sum omnibus diebus usque ad consummationem seculi*. De quo etiam regimine idem Propheta alibi dicit, *Et puer parvulus minabit eos, in eum]* .i. de gratia eius, non de lege vel suis viribus confident, hoc est radix, de qua idem etiam quodam loco dicit Propheta, *Radix Iesse quæ stat in signum populorum, ipsum gentes deprecabuntur, & erit sepulchrum eius gloriosum*, de quo scilicet sepulchro radix illa exurgens in magnam crevit ramorum fructicem. *Deus autem.]* Dixi, *letamini gentes, & in eum gentes sperabunt*, & hoc in vobis Romanis ipse impleatur. Et hoc est Deus spei, de cuius gratia sperandum est omnibus, soli electi omne gaudium habere possunt tam in hac scilicet vita in spe quàm vel illa in re & pace] remouendo scilicet à vobis superbam illam contentionem, pro qua sedanda hæc scripta est Epistola. *In credendo]* ac si diceret, ut ex fide, per quam creditur, & quæ omnium bonorum est fundamentum proficiatis in spe & caritate, quæ naturaliter inde sequuntur. Virtutem quippe Spiritus

sancti amorem Dei in nobis dicit qui contra omnia fortis est, sicut scriptum est, *valida est sicut mors dilectio*. Et iterum, *omnia suffert, omnia sustinet. Certus sum*] Quos culpando diu terruerat, laudando ne desperent in fine mitigat, dicendo scilicet etiam apud eos esse qui & dilectione & scientia pleni sunt, ut scilicet alios instruere velint & possint. Et hoc est, *certus sum*, ac si diceret: Ac si ita corrigam vel moneam, & ipsi] .i. sicut in quibusdam personis pleni estis superba contentione vel ignorantia, ita & ipsi in quibusdam pleni, &c. *Omni scientia ita ut*] .i. ad hoc sufficientem habetis scientiam, ut possitis inuicem vos adhortari ad bene operandum. *Audacius autem ex parte*] .i. aliquantulum maiori fiducia scripsi vobis, qui in loco mihi commissio estis, qui scilicet doctor specialiter sum tam gentium quam Iudæorum. Et hoc est quod exponit, dicens, ut pote sollicitus de vobis, *propter gratiam*] .i. officium Apostolatus prædicandi gentibus mihi iniunctum, de qua quidem gratia ipsemet ait, *Gratis accepistis, gratis date*. Minister Christi prædicator est, dum non sua lucra, sed Christi quærit, & quia nonnulli benè prædicantes malè viuunt, addit, *sanctificans*] .i. vita quoque mea commendans prædicationem quæ de Deo facio, ut oblatio .i. oratio etiam mea quam pro ipsis facio, *fiat accepta Deo*] .i. *sanctificata in Spiritu sancto*] .i. per Spiritum sanctum, qui ut supra dictum est, docet nos quid orandum sit, & postulat pro nobis gemitibus .i. sanctum consequatur effectum ut nos omnes sanctos efficiat.

HABEO ergo] Quia videlicet ita facio quæ Christi sunt quærendo, habeo *gratiam*] hinc pro Christo, cui in hoc deferuo, ad quod *Deum*] .i. pretium diuino iudicio, si non humano, hinc acquirō. Quod quidem dicendo exemplo suo ad fraternæ dilectionis sollicitudinem eos adhortatur. *Non enim*] ostendit quomodo sanctificet vel commendet prædicationem suam, dicens se non præsumere aliquid loqui .i. sibi imputare per iactantiam, quorum non habeat efficaciam, sicut pseudo Apostoli faciebant. *In obedientia gentium*] .i. propter hoc ut obedientiam inter gentes traham, hæc efficit inquam, *in verbo*] .i. per verbum suum, & *factis*] .i. per miracula. Quæ statim facta subiuidit dicens, *in virtute*] .i. per potentiam mihi collatam, *signorum & prodigiorum*] .i. signorum mirabilium. Sunt enim signa quædam naturalia, de quibus

non miramur, sicut de planetis scriptum est, ut sint in signa & tempora. Quæ verò contra naturam, .i. vsitatum naturæ cursum veniunt, ut leprosos mundare, vel mortuos suscitare, hæc prodigia .i. admiratione digna dicuntur. Vnde prodigiū quasi prodendum digito dicitur. *Virtute Spiritus sancti*] .i. ex potestate per gratiam Dei mihi collata, ad differentiam scilicet miraculorum Antichristi seu magorum. O R I G. Signa appellantur, in quibus cū sit aliquid mirabile indicatur quoque aliquid futurum. Prodigia verò in quibus tantummodo mirabile aliquid ostēditur. Scriptura interdū abusiue & prodigia pro signis, & signa pro prodigijs ponit. Signa & prodigia pro vno accipiuntur hoc loco, *Ita ut*] gloriam, inquam, habeo apud Deum, tantum scilicet de labore meo, ut totam illam terram ab Ierusalem vsque ad Illiricum repleuerim prædicatione Euangelij, ut videlicet ostendat dignum se à Romonis exaudiri, qui à tot & tantis sit exauditus. Haymo. Illiricum Prouincia est finis Asiæ ad principium Europæ. *Sic autem*] scilicet verbo & factis & virtute signorum in his locis, vbi prius de Christo nil omnino auditum fuerat, ut videlicet non sit mirabile si apud vos iam Christum confessos prædicationis mea locum habeat. *ne super*] ac si diceret, hoc scilicet mihi contingente, ut nisi ædificium fidei collocarem super aliorum prædicationem præcedentem, quæ quasi meæ prædicationis fundamentum esset. In quo difficilius ostendit quod ibi fecit quàm quod apud Romanos facere cupit. *Scriptum est*] in Isaia .i. ut per me contingeret quod per illum prophetatum est *de eo*] .i. Christo, *videbunt*] scilicet intelligendo. Quod statim exponens ait, *& qui, &c. propter quod*] quia videlicet ad tot penitus ignaros intendebam conuertendos. *Impediebar*] ut pseudoapostolorum commenta excludat dicentium cum ad tales vel tantos accedere non audere, & maximè presentibus, vel ut se rationabili causa excuset, *plurimum dicit*] .i. maximè quia & aliæ nonnullæ potuerunt huius impedimenti esse causæ, *locum*] scilicet prædicandi vel causam morandi omnibus bene confirmatis. O R. Videtur hoc in Achaiæ positum dicere apud Corinthum. In Hispania, in transitu se eos videre promittit, quasi innuens apud eos qui iam conuersi erant non diu sibi immorandum esse, sicut & in exordio Epistolæ eos in aliquibus confirmandos dixit potius quàm con-

uertēdos, decet etiam quemquam bonum virum minus promittere quā facere, & boni doctoris tanto gravior mora sit, & amplius desideratur, quantō breuior speratur. Præuenit ita illos, vt in aduentu suo se præparent, & de quibus instrui velint præuideant. *Spero.*] Nil videlicet ex meipso de me præsumens, sed totum Deo committens, & *à nobis*] Vult enim eos comites itineris sui esse, tum vt authoritate Romanorum cæteræ gentes facilius subiectæ conuertantur, tum etiam vt aduersus pseudoapostolos & quoslibet ei detrahentes prædicationem eius quā ipsi audierint valeant attestari, & eis diu secum in prædicatione circumeuntibus sic saltem recompenset quod in transitu eos viderit. Bene dicit deduci se ab illis, quasi tutum se ostendens per conductum eorum quæ cæteris imperant. In quo & eos de mora sua apud illos consolatur, quasi in eorum arbitrio hanc constituens. *Si vobis*] Haymo. Frui est aliquid cum delectatione possidere, & amplecti & videre, & attende quod cū propriè Dei frui sit, vt B. meminit Augustinus, hic non dicit frui simpliciter, sed frui ex parte, sicut & ad Philemonem cum diceret, *fruar te*, adiunxit statim *in Domino*, Deo quippe omnino fruimur dum illum propter se tantum obtinere cupimus, proximo verò fruimur ex parte, dum sic eum propter vtilitatem ipsius per amorem amplectimur, vt tamen huius fruitionis finem. i. finalem & supremam causam in Deo ponamus. Partim quippe proximus in causa est, sed causa Deus suprema est. Ex parte itaque fruimur proximo, sed ex toto fruimur Deo, quia ipse fruitionis suæ tota est causa, proximus verò non tota suæ fruitionis vt diximus causa est, cum sit superior Deus, cum videlicet de proximo quoque propter Deum cogitemus. Nota quod dicit proficisci cœpero, quia cum ad Romanos propter ipsos veniat, non sibi imputat proficisci ad Hispaniam, nisi cum ab ipsis recesserit, quando videlicet propter Hispanos totum egerit. Et attēde quòd cū dicit, si vobis primum, iterum eorum beneuolentiam captat, quasi necessarium sibi iudicet, nec se aliter de Hispanis facere posse, nisi prius eos visitet.

N V N C ergo.] Quia videlicet hic vltimus, non habeo locum, *nunc*. i. antequam veniam ad vos, cū in gentibus specialiter Apostolatū accepissem. Vnde & solus doctor gētium

appellatur quantam etiam de Iudæis cōuersis habeat curam ostendit, sed quod alibi ait, sollicitudo omnium Ecclesiarum. Quod etiam fortassis ad excusationem quandam sui prætendit, si ad eos scilicet venire differat, *Ministrare sanctis*] .i. illis qui ibi sunt fidelibus ex Iudæa conuersis, cibum ad necessitatem eorum à me collectum illis deferre. Habebat quippe in consuetudine Apostolus sicut sæpe testatur de illa Ierosolimitana Ecclesia per ipsum Christum olim & per Petrum & Iacobum ceterosve Apostolos conuersa, in corporeis necessitatibus maximam sollicitudinem, ut eis saltem corporalem cibum ministraret, quibus aliorum prædicatio spirituales. Præcipuè verò eis subueniendum putabat pluribus de causis. Plurimam quoque auctoritatem fidei nostræ dabat populus ille conuersus, qui locus à Deo legem suscipiens peculiaris eius populus vocatus est, & cum primo credidisset quasi in nostræ fidei fundamento & cæteris exemplo positus plurimū ne deficeret sustentandus erat. Denique sicut in Act. Apost. legitur, tanta deuotione conuersi sunt ut omnino propriū relinquētes, omniaquæ habebant ad pedes Apost. ponerēt, & sicut ipse in Epist. ad Heb. meminit, maiore violentiam Iudæorum in amissione suarum rerum sustinuerant. Hinc autem præcipuè formam & exemplum Epistolis Apostolus proponit, ut cum pauperes Ecclesias seu Monasteria conspexerint, eorum prædicatio eis alimēta colligat. *Probauerunt enim*] Vide quā cautè Romanos aliorum exemplo ad hanc elemosynam similiter Hierosolymitanis faciendam inuiter, dicens eos qui hanc tribuant, per seipsos id faciendum probasse .i. laudasse potius quā aliqua coactione vel exhortatione Apostoli. Vnde & dicit, *probauerunt* .i. quasi suo id iudicio approbantes ad hoc me compulerunt. Haymo. Isti qui scientiam prædicandi non habebant, ut ad prædicandas gentes possent ire, erant in Ierusalem vacantes orationibus & ieiunijs. Quibus etiam Apostoli de singulis prouincijs & locis in quibus prædicabant, quicquid pecuniarum, argenti & auri & frumenti & vestimentorū accipiebant, eis mittere satagebāt. Maximè tamen Paulus, qui pluribus gentibus prædicabat. Vnde dicunt doctores, quòd aliquandò amplius quā tres aut quinque modios argenti eis mittebat. Item, Macedonia & Achea, quæ Achaia vocatur, à qua & populi eius dicuntur

euntur Achei, Prouinciæ sunt nobilissimæ Græcorum sibi adjacentes, quas Apostolus Ecclesijs repleuit. Cum dicitur Macedonia & Achaia, continens ponitur pro contento, idest nomina terrarum propter nomina habitatorum, sicut & potū calicem appellamus. *Collationem*] quam symbolum Græcè dicimus, vbi scilicet diuersa conferuntur à diuersis, sicut in cōmessationibus fieri solet. Isti verò substantias, sed paupertim commessationes de suo congregabant. *Placuit enim*] ac si diceret, benè dixi, *proba*, vt hoc voluntarij potius quàm coacti agant. Quia ex eorum voluntate magis quàm ex nostra concitatione id geritur, & merito placuit, quia scilicet *debitores sunt*] Quod statim à minori conuincit dicens, *nam si spiritualium eorum participes facti sunt, Gentiles debent & in carnalibus ministrare eis*] .i. cū spiritualium bonorum, quæ illi habebant, sicut legis, Prophetarum, vel etiam orationum & obsequiorum diuinorum, quæ quotidie ibi pro salute gentium celebrant, *hoc ergo*] quia videlicet illis sicut iustum est placuit.

Cū consummauero] .i. perfecero hanc legationem, & perueniens illuc *assignauero eis fructum hunc*] videlicet eleemosynæ, hoc est, distinxero qui benè eis mittant, vt pro eis tanquam benefactoribus suis orent, *proficiscar, &c.*] Quamuis dicat Apostolus se profecturum in Hispaniam, incertum est adhuc vtrum id fecerit, propter diuersorum opiniones. Iero. in Isai. lib. IIII. *Volabunt in nauibus alienigenarum, & mare simul depredebuntur.* Quod de vnius Pauli Apostoli intelligamus exemplo, qui per Pamphiliam & Asiam & Macedoniam & Achaia, & diuersas Insulas atque prouincias ad Italiam quoque, & vt ipse scribit ad Hispanias alienigenarum portatus est ratibus. Cassiodor. super hanc ipsam Epistolam Pauli, *proficiscar per vos in Hispaniam*, quod frequenter dicit, sed nūquam legimus fuisse completum. Vnde desideratur quod dicitur, sed non prophetali veritate completur. Nemo tamen Apostolum reum mendacij arguat, si hoc quod credidit non impleuit. Non enim per duplicitatem locutus est, vt videlicet aliud diceret quàm intenderet .i. ore quàm corde. *Scio autem quoniā veniens ad vos*] .i. spiritu reuelāte didici, quāuis scilicet me transitum per vos habere dixerim. In quo quidem notandum est, quòd dum hoc sibi reuelatum dicit, vt

sciat, innuit illud quod de Hispania præmisit ex opinione potius quam ex assertione protulisse. *In abundantia benedictionis Christi veniam*] vt videlicet sicut de Ioseph legitur, ad introitum meum Dominus largam vobis cælestis gratiæ benedictionem infundat .i. in spiritualibus multiplicet. *Obsecro ergo vos fratres*] vt videlicet quod volo possim *per Dominum nostrum Iesum Christum & per caritatem Spiritus sancti, vt adiuuetis me,*] si videlicet in eo amplius perficere vultis, & dilectionem Dei habetis, *in orationibus ad Deum vt liberer ab infidelibus qui sunt in Iudæa, & obsequij mei.*] Multorū enim princeps fidelium quamuis imperfectorum multum apud Deum obtinere credit. *Ab infidelibus*] dum ita scilicet pro fidelibus qui ibi sunt laboro, *obsequij mei*] .i. mihi inimica ab his qui per me hoc mittunt, vel etiam à Domino qui me ministrum siue dispensatorem Ecclesiæ constituit. *Oblatio*] eis tanquam ad altare Dei sacrificium per me delatum, *accepta fiat in Ierosolyma sanctis vt veniam ad vos in gaudio per voluntatem Dei*] .i. placens & læta. Si enim mihi graue aliquod ibi propter hoc acciderit, maximè contristabuntur, *refrigerer vobiscum*] tum à longo labore requiescendo, tum desiderium meum implendo. *Deus autem*] siue scilicet veniam siue non. *Pax sit cum omnibus vobis amen*] .i. vos inuicem à superba contentione pacificās. Quod quidem in fine Epistolæ reseruans, ad quod præcipue ipsa tendat Epistola insinuat, & quæ in ea finalis sit causa siue intentio.

CAP. XVI. COMMENDO autem vobis Pheben]. s. precibus meis. Phebe per quam hanc Epistolam Romanis de Corinthio mittere creditur, diues quædam & nobilis mulier dicitur, quæ de facultatibus suis vel aliorum fidelibus illis qui erant Cēchris necessaria ministrabat, exemplo scilicet sanctarum feminarū, quæ Domino seu Apostolis fecisse memorantur. Hæc autem negotium quoddam habebat, pro quo Romam venire necesse habebat. Pro hac ergo Romanos Apostolus adhortatur & rogat vt eam honorifice suscipiant, & in suo negotio quantum possint adiuuent. *Sororem nostram, & assistatis ei in quo negotio vestro indiguerit*] fide, non carne. Ministerio .i. obsequium illorum fidelium qui sunt Cēchris .i. in eo loco qui sic vocatur, & dicitur esse portus Corinthi. *Suscipiat*] hospicio, *in Domino*] .i. amore Dei, & ita honorifice ac benignè

suscipiatis, prout dignum est atque conueniens sanctis susci-
pere sanctam. *Et assistatis ei*] .i. adiuuetis eam. *Et enim ipsa quo-
que assistit multis & mihi ipsi*] Quod enim debetur ex multis
eius præcedētibus meritis, vt non tam hoc ei tribuatur quàm
reddatur. O R. Apostolica autoritate docet etiam femi-
nas in ministerio Ecclesiæ constitui, in quo officio positam
Pheben apud Ecclesiam, quæ est Chone, magna cum laude
& commendatione prosequitur, quia in necessitatibus Apo-
stolicisque laboribus astiterit. Locus hic duo docet, & habe-
ri feminas ministras in Ecclesia, & tales debere assumi in mi-
nisterium, quæ astiterint multis, & per bona officia vsque ad
Apostolicam laudem meruerint peruenire. Hieron. In mi-
nisterio Ecclesiæ & nunc etiam in oriētalibus locis Diaconis-
sæ mulieres in suo sexu ministrare videntur in baptismo siue
in ministerio verbi, quia priuatim docuisse feminas inueni-
mus, sicut Priscillam cuius vir Aquila vocabatur. Idem in
Epistola ad Timoth. *Adolescentiores autem viduas deuota*, in
ministerio diaconatus præponere. Sanctus Epiphanius Ioan-
ni Ierosolimitano: Nunquam ego ordinaui Diaconissas &
ad alias nisi prouincias, neque feci quicquam vt Ecclesiam
scinderem. Quas itaque antiquitus Diaconissas. i. ministras,
nunc Abbatisas. i. matres vocamus. Cassiodorus super hunc
eundem locum Pheben significat Diaconissam fuisse matris
Ecclesiæ, quod in partibus Græcorum hodie quasi militiæ
causa peragitur, quibus & baptizandi vsus in Ecclesia non
negatur. Claudius quoque in expositione huius Epistolæ.
Hic locus docet etiam feminas in ministerio Ecclesiæ consti-
tui, in quo officio positam Pheben apud Ecclesiam, quæ est
Cenchris, Apostolus cum magna laude & commendatione
prosequitur.

SALVATE Priscam & Aquilā adiutores meos] In fine Epi-
stolæ quosdam nominatim salutando plurimum commēdat,
vt eorum præcipue consilio & authoritati qui perfectiores
erant cæteris acquiescant. Priscam hic appellat Apostolus,
quæ in Actibus Apostolorum Priscilla nominatur, pulchra
quadam fortassis nominis allusione, vt eam .i. susensu,
& moribus matrem insinuet. Erat autem Priscilla vxor A-
quilæ, & ambo de Iudaismo conuersi ad Christum. *In Christo*
Iesu qui] .i. pro Christo adiutores in multis fuerunt, quas

olim cum cæteris Iudæis per Claudium Româ expulsas Apostolus Corinthum veniens ibi inuenit, & quia eiusdem artis erat penitus .i. scenefactoriæ, iunxit se illis, vt simul operarentur. Vnde Beda in Act. Apost. Erant enim scenefactoriæ artis quasi exules & peregrini, tentoria sibi quibus in via vtantur ædificant. Scenæ enim Græcè tabernacula dicuntur, etymologia ab obumbrando ducentia, apud quos vmbra scena dicitur. Scenæ enim vel scenomata quasi vmbacula sonant, quæ ex lineis aut laneis aut cilicinis, siue ex arborû frõdibus, aut virgultis veteres esse ponebant. Misticè autem sicut Petrus piscando nos à fluctibus seculi extraxit, ita Paulus vmbacula protectionis erigendo ab imbre nos criminum, ab arbore tentationum, & à ventis insidiarum verbo factisque defendit. Chrysost. in Epistola ad Heb. serm. i. Qui est splendor gloriæ & caracter substantiæ eius Apostolica sententia, magis autē Spiritus sancti, miranda gratia. Non enim ex intellectu proprio hæc loquebantur. Vnde enim ille hoc? Nūc ex scalpellis, aut pellibus, aut in . . . hæc operatio maiestatis? Non enim has intelligentias sua mente procurabant, quæ tunc erat tam debilis & extrema, vt nil amplius haberet à plebeis & populis. Quomodo enim aliquid diuinum posset ille sentire, qui circa precia vendendi & circa confectioem pellium totam suam vitam, totumque suum studium continebat? Ambros. de Priscilla & Aquila: Hi credentes facti sunt socij laboris Apostoli, vt etiam ipsi exhortarentur ceteros ad fidem. Denique & Apollo quamuis fuerit exercitatus in scripturis, ab istis iam viam Domini diligentius instructus est. Ideo socios laboris sui dicit eos in Christo Iesu. Cooperatorij enim eius fuerunt in Euangelio. Vnde præcipuè docet quantum obedire eis Romani debeant. O R. Potest autem fieri, vt quia illo tempore pulsus ex vrbe Iudæis per præceptū Cæsaris Corinthum venerunt, rursus edicti cessante seditia regressi salutarentur à Paulo. Quod tamen apparet Iudæorū insidijs Paulo periclitante semetipsos objecisse, vt ille liber abscederet. *Qui pro anima mea suas cervices supposuerunt, quibus non ego solus gratias ago, sed & .i. vita conseruanda morti se opposuerunt. Cunctæ Ecclesiæ.]* quatum. v. Apostolus prædicator seu doctor specialiter dicitur, *domesticam eorum Ecclesiam. Salutate Ephenetum dilectum mihi qui est] .i. totam ipsorum familiã ad fidem similiter conuersam, primitiuus Asia in Christo. Saluta-*

te Mariam] Haymo. Siue quia prius omnium credidit, seu etiā quia magnæ dignitatis atque nobilitatis erat, vt ostenderet nobiles etiam ad fidē venire, ac per hoc inuitaret primos Romanorū ad fidem. *Quemultū*] O R. Docet etiam debere etiā feminas laborare pro Ecclesijs. Laboratur cum docetur adolescentulas omnia quæ de officijs mulierum scripta referuntur. *Laborauit in nobis. Salutate Andronicum & Iuliā*] Ambros. Ad exhortationem illorum. Haymo. laborauit officium .s. prædicationis feminis sui sexus impendēdo per domos. Nam in Ecclesia non docebant mulieres. *Cognatos*] Ambros. etiam iuxta carnem & S. Spiritum. *Concaptiuos meos qui sunt nobiles*] Haym. Isti sunt exules effecti propriæ sedis ob gratiam Dei, sicut & Paulus. *In Apostolis qui & ante me fuerunt*] .i. inter prædicatores. Videtur hoc loco etiam feminam Apostolicā dicere, nisi forte istum qui ad Andronicū tantū & supradictos viros violenter referamus. *In Christo. Salutate Ampliatū dilectū mihi in Domino. Salutate Vrbānum adiutorē nostrū in Christo & Stachin*] .i. in fide Christi. *Nostrū*] mei .s. & aliorum. *Dilectū meum* [salutate] etsi non ita adiutorē, *Appellē*] O R. Puto hūc Appellē post multas tribulationes transisse sapienter, & idēdō pronunciauit probū secūdū quod ipse in alijs dixit quia operatur patientia probationē. Videndū est ne ipse sit qui in actibus Apostolorū nuncupatur Alexandrinus in scripturis eruditus. Ambros. hunc Appellem non quasi amicū aut principem operis salutat, sed propterea quod tentationibus probatus est in Christo fidelis inuentus. Haymo. Licet quidā faciant ex hoc duo nomina propria, dicentes ita, salutate Appellem & Probū .i. probatū in fide, & laude dignū. *Aristoboli domo. Salutate Herodionē*] fortasse hic iam defunctus erat, quem satis laudat, familiam eius salutando, & fidem eius in ea commendando. Ambros. Iste congregator intelligitur fuisse fratrum in Christo. *Cognatū meum. Salutate eos qui sunt ex*] Ambros. Quem cognatū tantum appellat ostendit deuotū in caritate, non tamen vigilantiam eius designat. *Narcissi domo, qui sunt in Domino. Salutate Triphenam & Triphosam quæ,*] O R. Neque dilectos neque probos neque adiutores nominat, sed forte nil vtile habebant in meritis, idcirco eos solo titulo salutationis honorauit. *Ex Narcissi domo*, Videntur plures fuisse ex Narcissi domo vel familia, sed non omnes in domo fuisse. Ambros.

Narcissus hic illo tempore Presbyter dicitur fuisse, sicut legitur in alijs codicibus, & quia præsens non erat, salutat sanctos qui ex eius erant. Hic ergo Narcissus Presbyter peregrini officioungebatur exhortationibus firmans credentes. *Laborat in Domino. Salutate Rufum.*] O R. Multi laborant, sed non in Domino. Ambros. Has vno ore dignas declarat in Christo, laborant .s. ministrando sanctis. *Qua multum*] O R. Videtur hic magis laudari & in exhortatione & in ministerio sanctorum, & in pressura, & in egestate propter Christum, quia & domus suas relinquebat fugatis, & opprobrio erat infidis. *Electum in Domino, & matrem*] Haymo .i. promotum ad sacerdotium eius, & meam.] Sic prius legi matrem eius & matrem meam, vt dux sint vel vt eadem sit illius scilicet mater secundum carnem, Apostoli secundum beneficium quod fortassis cum olim alibi de sua substantia tanquam mater aleret, vel pro reuerentia sanctitatis eam matrem suam dicit cui .s. tanquam matri honor sit deferendus. *Asincritum & Phlegontem, Hermem, Patrobam, & qui cum eis sunt fratres. Salutate Philologum & Iuliam, Nereum & sororem eius, & Olympiadem, & omnes qui cum eis sunt sanctos. Salutate*] Ambros. Hos simul salutat, quia sciebat eos esse concordēs in Christo .i. vnitos in amicitia Christiana, nec fideles in amicitijs. *Hermen*] O R. Puto quod Hermes iste sit scriptor libelli illius qui Pastor appellatur, quæ scriptura mihi valde utilis videtur, & vt puto diuinitus inspirata. Quod verò nil laudis scripsit, illa opinor est causa, quia videtur sicut scriptura illa declarat, post multa peccata ad poenitentiam fuisse conuersus. Intelligatur quod simul habitauerint hi quorum salutatio sociata est. Ecclesiastica Historia lib. III. cap. I. Et libellus Hermæ qui appellatur Pastoralis, cuius Paulus in Epistolis suis meminit, à plurimis non est receptus, ab alijs autem necessarius iudicatus est propter quæ primi ad fidem institutionis imbuuntur. Vnde & in nonnullis Ecclesijs legitur, & multi veterum scriptorum vsi sunt testimonio eius. Hieronym. de illustribus viris cap. x. Hermem, cuius Apostolus Paulus ad Romanos scribens meminit, *salutate Phlegontem, Hermem*, asserunt authorem esse libelli qui appellatur Pastor, & apud quasdam Ecclesias Græciæ publicè legitur. Reuera utilis liber, multique de eo veterum scriptorum vsurparunt testi-

monia. Sed apud Latinos penè incognitus est. *Philologum & Iuliam.*] O R. Potest fieri ut coniuges fuerint , cæteri domestici eorum. Hieron. suo exemplo nos docet quales debemus nostris litteris salutare non diuites seculi facultatibus honoratos, sed gratia Dei & fide locupletes. Ideo paulò ante primitiuos Ecclesiæ Africæ istos omnes quos salutat intelligimus, vel ex omnibus fuisse peregrinos quorum exemplo atque doctrina non absurdū existimat credidisse Romanos. *Inuicem in osculo*] .i. nos ipsos. Quia sigillatim omnes salutare non poterat, præcipit ut ex parte eius & loco eius mutuo se saluent, sicut ipse faceret si adesset, & sic inuicem sibi osculo reconciliati superbam finiant contentionem. Osculo salutant vos non luxurioso aut subdolo quale fuit Iudæ proditoris, sed quod nos in amore fraterno conciliet. *Omnes Ecclesiæ Christi*] .i. congregationes Christianorum, ad differentiam scilicet Ecclesiæ malignantium, quam Psalmista denotat, eodem affectu dilectionis quo ego optant vel orant vobis salutem. Qui enim alterum salutando dicit ei, saluè, profecto ut saluus sit precatur.

R O G O autem vos fratres ut obseruetis eos qui.] Pseudoapostolos tangit, ut ab ipsis caueant, ne fides eorum per illos corrumpatur *obseruetis*, .i. discernatis, *dissertationes*] .i. pericula errorum in fide. Illi dico existentes, *propter doctrinam quam vos didicistis faciunt*, & *declinate ab illis*. Huiusmodi enim Christo Domino nostro non seruiunt, sed suo ventri, & per] idest mollicijs carnalibus intenti, *dulces sermones*] .i. adulationes. Hieron. in Amos lib. 11. Pulchrè adulator apud Philosophos definitur blandus inimicus, vertens amara. Vnde Apostolus, *Inimicus vobis factus sum veritatem dicens*, & *amicus*, *obsequium amicos, veritas odium parit*. Quapropter & Pascha cum amaritudinibus comedamus, &c. Vas electionis docet Pascha celebrandum cum veritate & sanctitate. *Benedictiones, seducunt corda*] quasi dona Spiritus sancti per manuum impositionem vel cōsignationem conferentes, *Innocentium*] .i. simplicium vel imperitorum, qui eos deprehendere non valent. *Vestra enim obedientia in omni loco diuulgata est.*] Ideo id vos rogo, quia tanto periculosior esset seductio vestra, quantò fidei vestræ obedientia magis est diuulgata, tanquam in capite scilicet mundi cōstituta. *Gaudeo igitur in vobis, sed volo vos sapientes esse in bono*]

Quia .v. ita est diuulgata in bono .s. discernendo. *Et simplices in malo*] .i. quasi nescientes cuiquam illud machinari, iuxta illud Veritatis, *prudentes sicut serpentes, & simplices sicut columbe. Deus autem pacis conterat.*] Ac si diceret, Ego quidem ita rogo, vt fiat, sed Deus pacis potius quàm dissentionis ita vt postulo efficiat. *Satanam*] .i. omnem animæ vestræ aduersariū *conterat sub pedibus vestris velociter*] .i. quasi impotentem vobis subiiciat, vt ei per omnia præualere possitis, & eorum omnia machinamenta conculcare, sicut ea quæ sub pedibus præmuntur, *velociter*] scilicet in aduentu meo. Quos iterum sicut deprecor obseruetis. *Gratia Domini nostri Iesu Christi vobiscum. Salutat vos Timotheus.*] Quamuis dixerit, salutant vos omnes Ecclesiæ, specialiter tamen & nominatim ex parte illorum quos habebat præcipuos salutare ipsos decreuit, vt tãtorum testimonio virorum scripta Epistola roboraretur. *Adiutor meus, & Lucius & Iason.*] In prædicatione scilicet tanquam Coepiscopus vt ait Ambros. Hic est ille discipulus Pauli filius cuiusdã mulieris Iudææ fidelis ex patre gentili, quem ipse Paulus circumcidere compulsus est, sicut in Act. Apost. continetur. Orig. Lucium quidam perhibent esse Lucam, qui Euangelium scripsit, pro eo quod soleant nomina interdum secundum primam declinationem Græcam Roman. proferri. Iason ille est, de quo etiam in Actibus Apostolorum scribitur, quod dum Tessalonicam pro Paulo & Sylea seditionem commouentibus turbis semetipsum dederit, vt Apostolis discedendi faceret libertatem. *Sosipater, cognati mei. Saluto vos ego*] Suspicio quod ipse sit qui in Actibus Apostolorum scribitur Sosipater Piriberonensis. Mouebit quomodo Paulus ex Hebræis Timothei consanguineus dicatur, vel Iasonis vel Sosipatris. Nunc verò cum cæteris nequaquã hoc nomen indulgeat, certum est cum quandam nominationem nominare quam cognationem vel consanguinitatem sine dubio sciat. Ambros. Cognatos dicit partim generis, partim fidei causa. *Tertius, qui scripsi Epist. in Domino. Salutat vos Gaius*] hoc est primum nomen eius qui dictante Paulo hanc Epistolam scribebat, tanquam notarius Apostoli sicut nũc est Cancellarius Apostolicus, quod fortasse diuino quodam factum est præfagio, vt videlicet ille tertius diceretur nomine, qui tertius erat in operatione. Spiritus quippe sanctus inspirabat quæ

quæ Apostolus dictabat seu proferebat, quæ iste qui Tertius dicitur vt dictum est sua manu scribebat. Ambros. Hic est scriba Epistolæ cui Apostolus concessit suo nomine salutare populū Romanum. Quia nec immerito factum est vt proprijs scilicet ille vteretur verbis, quæ humano tantum sensu probata sunt. *Hospes meus.*] Orig. Videtur indicare de eo quod vir fuerit hospitalis, qui non solum Paulum receperit, sed & Ecclesiæ vniuersæ in domo sua conuenticulum præbuit. Fertur traditione maiorum, quod iste Gaius primus Episcopus fuerit Thessalonicensis. Ambros. Hic est Gaius, vt arbitror, ad quem scribit Ioannes Apostolus exultans in caritate eius, quam exhibebat fratribus præbens sumptus illis necessarios. Haymo. Iste est Gaius etiam captiuus, qui baptizatus est ab Apostolo, sicut dicit in Epist. ad Corin. *Neminem vestrū baptizauit nisi Crispū & Gaium. Et vniuersa Ecclesia. Salutat vos Erastus*] Ambros. Hic nominatiuum pluralem intelligit, ac si diceretur, salutant vos vniuersa Ecclesiæ. Sed melius est, secundum Orig. genitiuus singularis, vt dictum est, vt videlicet ita intelligatur, hospes meus, & hospes vniuersæ Ecclesiæ. Cum enim iam superius dixisset Apostolus, *salutant vos omnes Ecclesia Christi*, quid opus erat vt hoc repeteret, *salutant vos vniuersa Ecclesia?* *Erastus arcarius ciuitatis.*] Orig. Puto esse Erastum quem dicit, quia remansit Corintho, arcarium eum .i. dispensatorem illius ciuitatis, cuius conditor est Deus. Secundum Hieronymum. vocatur archarius ciuitatis secundum hoc quod olim fuerat, non modo. Haymo. Archarius, id est princeps vel dispensator qui præerat archæ, vbi census ponebantur Regis tributorum & vectigalium. *Et Quartus frater*] Proprium nomen est, sicut & Tertius, *Gratia Domini nostri.*] Iero. hæc est scriptio manus eius in omnibus Epistolis, vt in ea etiam commemoret beneficia Christi. Haymo. Gratia dicitur gratis data, & nomine gratiæ debemus intelligere quicquid boni gratis accipiunt electi à Deo, vt videlicet spem, caritatem, remissionem peccatorum.

Ei autem qui potens est vos.] Capitulum hoc Marcion, à quo scripturæ Euangelicæ atque Apostolicæ interpolatæ sunt, de hac Epistola penitus abstulit. Sed & ab eo loco vbi scriptum est, *nunc autem quod non est ex fide peccatum est*, vsque ad finem cuncta dissecuit. In alijs verò exemplarijs quæ non sunt à

Marcione temerata, hoc ipsum capitulum vel diuerse positū inuenitur. In nonnullis etiam codicibus post eum locum, *Omne autem quod non est ex fide peccatum est*, statim habetur. *Ei autem qui potens est vos confirmare*. Alij verò codices in fine id ubi nūc est positum continent. Consummata salutatione eorum terminat Epistolam suam in actione gratiarum, quasi de expleto Opere suo ei grates referens, qui hoc ei inspirauit. Ac si ita continuet, vobis inquam sit gratia, sed ei qui potens est &c. perpes sit gloria. Et notandum quod cum dictum sit, *ei qui potens est*, videtur superfluere ad sensum vel constructionem, quod in fine subposuit, *cui*, cū in principio scilicet dixisset *ei*, nisi forte propter longam interpositionem id fieri dicatur. Multa quippe sunt interposita inter illud *ei*, quod est præmissum, & hoc quod in fine subiungitur, *honor & gloria*. Ideoque quasi oblitus sit imperitus lector cui adiungatur honor & gloria, suppositum est *cui*. Vt ergo litteræ constructio quoquomodo texatur, ita huius versiculi principium fini coniunge. *Ei autem qui potens est vos, &c.*] honor & gloria sit, subaudi & rursus, *cui* subaudiatur est, ac si videlicet dicatur: *Ei sit honor & gloria*, cuius est, ac si dicatur sicuti reuera est, sit inquam per Iesum Christum, per quem glorificandus est Pater. Ex hac quidem fine Epistolæ arbitror Ecclesiasticos doctores expositiones & sermones suos consimili fine concludere, in actione videlicet gratiarum Dei. *Confirmare*] in fide scilicet quæ est omnium bonorum fundamentum, *iuxta Euangelium meum & predicationem Iesu Christi*] secundum doctrinam meæ prædicationis, quæ est etiam Iesu Christi, non alia prædicatio, quia idem quod ille prædico Euāgeliū meum siue prædicationē Iesu Christi dico factam, *secundū reuelationē mysterij*] vel confirmari secundum reuelationem meam. Mysterium dicitur secretum & occultum. Vnde & mystica locutio dicitur significatiua, quæ non est aperta. Mysterium quod nunc patefactum est, ipse est redemptionis nostræ modus, qui olim latebat in prophetis scriptis nondum expositis: sed nunc ipsis tam à Christo quam à nobis expositis, reuelatus est. De Christo quippe scriptum est, quia *incipiens à Moyse & omnibus prophetis .i. s. taciti aternis temporibus, quæ .i. v. patefactum est per scripturas prophetarum secundum præceptum .i. Dei ad obeditionem fidei*] .i. absconditi vsque nunc semper, nec

per expositionem reuelati vnquam vltcrius. Quippe cùm ipsi quoque septuaginta interpretes in suis translationibus quæ de filio Dei dicuntur maximè reticuisse, vel velasse credantur, prophetarum dicit potius quam legis, quia maximè hoc mysterium in Prophetis continetur, vbi apertius siue plenius de Christo erat prophetatum. Patefactum est dico in omnibus gentibus secundum præceptum æterni Dei .i. Christi dicentis, *Euntes in mundum vniuersum, &c.* Dei dico, *Æterni*] licet secundum hominem initium habuit. Ad hoc, inquit, est patefactum, non solum vt credant omnes gentes, sed magis vt ei obediant .i. secundum fidem operentur. *Et*, inquam, *cognito nunc per Iesum Christum soli sapienti Deo*] .i. qui nunc singulariter sapiens apparet ex hoc quod per Christum egerit in hoc redemptionis nostræ mysterio, de quo ait Ioannes. *Ex prudentia sua percussit superbum.* Solus sapiens dicitur in cuius comparatione nullus est sapiens dicendus, sicut & bonus iuxta illud Veritatis, *Nemo bonus nisi solus Deus.* Solus quoque sapiens dicitur, quia solam illam & singularem habet sapientiam quam nil latere potest. *Honor & gloria*] .i. gloriosus & singularis honor, *Amen.*

MAGISTRI
PETRI ABAELARDI
NANNETENSIS,
SERMONES PER ANNVM LEGENDI,

Ad Virgines Paraclitenses in Oratorio
eius constitutas.

EX VETERI COD. MS. NOBILISS.
*Viri FRANCISCI AMBOSII, Regis
in sanctiore Consistorio Consiliarij, &c.*





MAGISTRI
 PETRI ABAELARDI
 NANNETENSIS,
 SERMONES PER ANNUM LEGENDI,
Ad Virgines Paraclitenses in Oratorio eius constitutas.

EPISTOLA AD HELOISSAM.

LIBELLO quodam Hymnorum vel Sequentiarum à me nuper precibus tuis consummato, veneranda in Christo & amanda soror HELOISA, nonnulla insuper Opuscula Sermonum, iuxta petitionem tuam, tam tibi quàm spiritualibus filiabus tuis in Oratorio nostro congregatis, scribere præter consuetudinem nostram vtrumque maturavi. Plus quippe lectioni quàm sermoni deditus, expositionis insisto planitiem, non eloquentiæ compositionem: sensum litteræ, non ornatum Rhetoricæ. Ac fortasse pura minus quàm ornata locutio quanto planior fuerit, tanto simplicium intelligentiæ commodior erit; & pro qualitate auditorum ipsa inculti sermonis rusticitas quædam erit ornatus urbanitas, & quoddam condimentum saporis paruularum intelligentia facilis. In his autem scribendis seu disponendis ordinem Festiuitatum tenens, ab ipso nostræ redemptionis exordio sum exorsus. Vale in Domino eius ancilla, mihi quondam in seculo cara, nunc in Christo carissima: in carne tunc vxor, nunc in spiritu soror, atque in professione sacri propositi consors.

IN ANNUNTIATIONE BEATÆ VIR-
GINIS MARIAE,

Ad Virgines Paraclitenses.

SERMO. I.



XORDIVM nostræ Redemptionis, hodiernus est Conceptus Dominicæ Matris. Conceptit Dominum femina, vt Creatorem pareret creatura. Communis quidem salus hæc est hominum, sed specialis gloria feminarum. Primus Adam de terra plasmatus, non de femina est natus: imò de eius costa femina est formata. Secūdus Adam, ac prioris & omnium tam factor quàm Redemptor, nostri sexus formam de femina decreuit assumere: vt in vtróque sexu consisteret gratia, sicut in vtróque præcesserat culpa: & eadem naturæ, per quas vulnus est inflictum, curationis afferrent medicamentum: & vnde illata est plaga, inde mirabiliter conficeretur cataplasma. Actor plagæ diabolus, minister curationis Angelus. De quo nunc dicitur: *Missus est Angelus Gabriel à Deo, &c.* Serpens à diabolo immissus, hic à Deo memoratur missus; vt ex ipsa statim fronte lectionis, spe diuinæ gratiæ saucij releuentur ad nuncium salutis. Benè autem Angelus ex nomine designatur, cùm dicitur Gabriel; vt cùm idem referatur missus ad Mariam, quem jam superius Euangelista dixerat missum ad Zachariam: sic & ista promissio complenda credatur, sicut illa completa iam noscitur. Vnde & ipse postmodum Angelus illam in huius argumentum inducens: *Et ecce, inquit, Elizabeth cognata tua, &c.* Quò verò mittatur, diligenter Euangelista describit, cùm ait: *In ciuitatem Galilee, cui nomen Nazareth.* Ciuitas quippe non paucorum, sed multorum est. Et ista curatio non vnius languidi, sed totius humani generis est futura. Et quia non singulorum hominum, sed eorum tantùm, qui in sua non remanentes ignauia, de valle vitiorum migraturi sunt ad montem virtutum; rectè ciuitas ista memoratur esse de Galileæ. Quæ & benè Nazareth, hoc est flos, nominatur; vbi hodie ille flos conceptus

ceptus est à virga, de quo Isaias prædixerat: *Egredietur virga de radice Iesse, & flos de radice eius ascendet.* Qui etiã de semetipso ait: *Ego flos campi, & liliū conuallium.* Vt ergo hunc florem virga illa producat, ad Virginem ipsam Angelus mittitur, qui eam ad hoc præparet, & quasi quodam suæ annunciationis sarculo ad fecunditatem excolat. Vnde & post locum, quò mittitur, de persona subditur, ad quam iste legatione fungitur: *Ad virginem, inquit, desponsatam.* Virginem præmittit desponsatæ, non tam temporis quàm dignitatis ordine. Sed quæ ista, quæso, est dignitas, esse Virginem in carne, si iam per consensum corrupta fuerat mente? non enim desponsari, vel matrimonium contrahi, nisi pari duorum consensu potest; nec aliter ipsa coniunx vel vxor Ioseph vocaretur ab Euangelista. Quis igitur iste consensus fuit? Nunquid commixtionis carnalis, vt in hoc iam Virgo consensisset, quòd florem dignitatis amitteret? Absit hoc à pijs mentibus, vt quæ prima virginitatis munus obtulisse Deo creditur, in hunc consensum ducta æstimeretur, in quem tot virgines ne venirent vitæ dispendium elegerunt; & sic Agnum sequi quocumque ierit, non solum permanentes virgines, verum etiam factæ mulieres. Quis hic autem consensus intelligendus sit, tam in sponsa quàm in Virgine, sequentia ni fallor insinuant. De sponso quidem, cùm nec nomen ipsius reticetur, cùm dicitur: *viro cui nomen erat Ioseph.* Ioseph quippe, quod interpretatur augmentum, quid aliud nobis innuit, quàm magnam in eo perfectionem virtutum? Quem etiam, vt beatus meminit Hieronymus, virginem sicut sponsam ipsius constat permanuisse. A qua profectò virginitatis perfectione si per consensum imminutus esset carnalis concupiscentiæ, nequaquam dignum esset ab Euangelista commemorari eum Ioseph nominari. Qui postmodum comperto Virginis conceptu, tantò grauius id eum ferre non est mirabile, quanto se magis illudum dolebat, quem ad continentiae consensum sponsa pertraxerat. Ipsa etiam Virgo, cùm de se postmodum ait *Quomodo fiet istud, quoniam virum non cognosco*, patenter innuit, nequaquam in vsum carnis eam consensisse, nec in concupiscentia se viro fœderasse. Vt quid enim diceret, *quomodo fiet hoc, quia virum non cognosco*, si in mente haberet viro commisceri? Et si enim jam commixta non esset, posset vtique postmodum commisceri, vt miran-

dum non esset, si ipsa quoque, sicut Elizabeth per diuinæ gratiæ donum ex viro conciperet. Sciebat etiam nec homines latere integritatem virginitatis suæ. Cur ergo quasi admirans quæreretur, qualiter id fieri posset; cum virum ipsa non cognosceret? Si hanc, inquam, cognitionē viri ad commixtionem carnis referret, quomodo de Adam vel nonnullis aliis dictum est, quia cognouerunt vxores suas? Quid est ergo quod ait, *virum non cognoui*, nisi quia nulli vmquam consensu carnali me commisceri adqueui? In quo ergo consenserat Ioseph cum ab eo desponsaretur, nisi vt castimonix virtutem pari custodirent consensu? Videbat quippe se à parentibus ad nuptias cogi, ex ipsa maximè Legis sanctione, quæ sub maledicto ponebat omnes, qui non relinquerent semen in Israël. Nouerat virgo virginem Ioseph, quem ex castimonix amore, & cognitionis propinquitate familiarem habebat. Hunc igitur elegit in sponsum, quem in suum trahere confidebat consensum, ne si alium cogeretur accipere, quod vouerat Deo non posset custodire. De qua etiam cum dicitur, *Et ingressus est ad eam Angelus*, diligenter sanctum eius propositum describitur, quæ non in plateis exterius cum secularibus feminis reperitur: sed clauso cubiculi sui ostio Deo deuotè supplicans & orans; vt continentix quod fecerat votum tam sibi quàm sponso suo custodiat inuiolatum. Vnde & in ipsis suis precibus de sua petitione statim consolationem meruit accipere, & securitatem obtinere. De hoc autem cubiculi sui secreto tanquam oraculo diuino, quàm sancto ibi occupata esset studio, beatus Ambrosius libro de Virginitate secundo his scribit verbis. Hæc ad ipsos ingressus Angeli, inuenta domi in penetralibus sine comite, ne quis intentione arrumperet, ne quis obstreperet. Neque enim comites feminas desiderabat, quæ bonas cogitationes habebat. Quin etiam tunc sibi minus sola videbatur, cum sola esset. Nam quemadmodum sola, cui tot libri adessent, tot Archangeli, tot Prophetæ? Denique & Gabriel eam virginem vbi reuilere solebat inuenit, & Angelum Maria quasi virum specie mutata trepidauit, quasi non incognitum audito nomine recognouit. Ita peregrinata est in viro, quæ non est peregrinata in Angelo, vt agnoscas aures religiosas, oculos verecundos. Denique salutata obmutuit, & appellata respondit. Sed quæ primò turbaucrat affectū, postea promisit obsequium.

Ecce studium non tam desponsatæ quàm virginis, non se ad nuptias præparantis, sed Deo penitus vacantis; non curis seculi, sed sacræ prorsus intentæ lectioni, non sponsi quarentis solatium, vt colloquium mereretur Angelicum. Attendite Virgines, quæ non virum, sed Deum elegistis sponsum, & sacræ formam professionis à Maria sumpsistis. Desponsata illa homini, non hominem in publico, sed Deum quærebat in secreto. Non oculos retorquebat ad mundum, sed eregibat ad cælum. Non canticis nuptiarum aures præbebat, sed sacræ lectionis pabulo mentem reficiebat. Ex quo liquidum est quàm sit verum, quod diximus, nunquam eius animum ad nuptias declinasse, quia nullam certum est curam eam suscepisse. Vnde & ab Angelo salutata, cuius vita non carnalis erat, sed Angelica, audire meruit:

Ave gratiâ plena. Gratiam dicimus gratis datam, hoc est beneficium diuinum supra merita collatum. Vnde & Apostolus: *Si autem ex operibus, iam non ex gratia. Alioquin gratia iam non esset gratia.* Constat vero vnumquemque fidelium nonnihil gratiæ præter merita sua collatum habere. Mariæ verò non participatio gratiæ, sed plenitudo ascribitur, vt tantum ei conferri demonstraretur, quantum humanæ naturæ infirmitati promittitur. Quod quidem qualiter fieret, si iam in consensum carnalis concupiscentiæ tracta fuisset, nulla ratio habet. Vnde autem amplitudinem gratiæ adepta sit, subinfertur cum dicitur, *Dominus tecum.* Tecum, inquit, potius quàm in te. Qui enim vbique per præsentiam diuinitatis iam se vnire disponebat carni virginis per assumptionem humanitatis; vt tecum, hoc est, cum carne tua vnum fiat in persona. *Benedictus tu in mulieribus.* Numquid & in viros non redundat benedictio Mariæ? Numquid & ipsa de semine Abraham, & per illam Christus descendit: in quo videlicet semine omnium gentium benedictio fuerat promissa? Quid est quæso in mulieribus, & non magis in omnibus viris pariter ac mulieribus? Hæc iterum dico virgines attendite, & in vos specialiter istam benedictionem Mariæ redundare gaudete. Paucos quippe virorum reperimus, qui in virtute virginitatis Christum imitentur. Multas sequaces hæc Mariæ gratia in vobis habet, quarum tanto virtus, gratior, quanto sexus infirmior. Virtus quippe in infirmitate perficitur. Quid est autem benedictio, nisi diui-

nã gratiæ multiplicatio? Benedicta igitur Maria in mulieribus
 potius quàm in viris dicitur, quia hæc eius gratia virginalis
 propositi in feminis maximè per eius imitationem multipli-
 canda fuerat, sicut & Psalmista antea prædixerat, dicens:
Astitit Regina à dextris tuis, &c. Et rursus: *Adducentur Regi*
Virgines post eam, adducentur in templum Regis. Post eam, in-
 quit, adducentur in templum Regis, quia per imitationem
 huius summæ Regina, virgines innumeræ in verum Dei tem-
 plum sunt consecrandæ. *Quæ cum audisset, turbata est.*
 Ad verba loquentis, & magno præconio laudis eam salu-
 tantis turbata memoratur esse, non eum qui loquebatur as-
 picere. Fixis quippe oculis in lectione, vel terræ affixis in ora-
 tione, quò animus intendebat tota inhiabat, atque immo-
 bilis hærebat; nec humanum curabat aspectum, quæ tan-
 tum intendebat diuinum. Vnde autem turbata? Diuersis
 vndique de causis. Tum quia viri consortium fugiebat,
 tum quia lectioni vel orationi totam operam impendebat,
 quarum assiduitatem præpediri grauitè sustinebat. *Et co-*
gitabat, inquit, qualis esset ista salutatio. Ex qua videlicet
 intentione procederet vtrum adulationis verba hæc essent,
 an veritatis: qua temeritate, quo aditu ille cubiculi sui se-
 cretum inquietare præsumeret? Quam ita perturbari Ange-
 lus non perferens, *Ne timeas, inquit, Maria.* Non quidem ait,
 Ne perturberis; sed, ne nimia sollicitudine affligaris: ne aut te
 obtinere desperes quod vouisti, aut tanquam rea maledictum
 incurras legis. Et hoc quidem loco cùm ait, *Maria:* primum
 eam vocat ex nomine, vt quasi familiarem sibi maiori re-
 leuet consolatione. Cur autem non sit ei timendum, hoc
 est de petitione sua differendum, adnectit cùm ait: *Inuenisti*
gratiam apud Deum. Hoc est, supra omnia merita illi grata
 facta es, atque accepta. Quomodo autem tam legis maledi-
 ctum euitet si virgo permaneat, quàm propositi sui votum
 incorrupta custodiat, patenter exponit dicens eam pariter
 tam esse parituram quàm Virginem permansuram. Paritu-
 ram, inquam, non solum hominem, verùm etiam hominum
 Saluatorem; hoc est Iesum. Cuius quidem virginici partus
 quanta sit excellentia, diligenter describit dicens: *Hic erit ma-*
gnus, & filius Altissimi vocabitur. Ac si apertè dicat: Attende
 in hoc ipso incomparabilem gratiam, singularem gloriam

tuam, vide ipse qui Dei filius dicatur & tuus. *Et dabit illi Dominus Deus sedem David patris eius*, hoc est, id in eo perficiet quod in typo eius David promissum est, sicut & ipsemet profite-
 tur dicens: *Iuravi David seruo meo, usque in eternū preparabo san-
 ctū tuū. Et edificabo in generatione & generationem sedem tuā.* Do-
 mus Iacob, in qua regnaturus in eternum promittitur, Ecclesia
 est gentium, quæ tempore prætorum, & gratiâ priorum Sy-
 nagogâ supplantavit, & benedictionem ei surripuit. Finem hoc
 regnum non accipit, quia nec cum vita præsentis deficit: quod
 tantò in cælestibus est verius, quantò felicius. *Dixit autem Ma-
 ria, quomodo fiet istud?* Tanquam si diceret: Magna quidem pro-
 missio, & incomparabiliter nō solum feminæ virtutem, sed om-
 nem humanam transcendens dignitatem. Quo itaque modo
 quòve ordine futura est completio rei tātæ? *Virum enim*, inquit,
nō cognosco. Ac si diceret: Longè hoc à meo remotum proposito
 videtur, ut videlicet partum habeam, quæ virgo persistere de-
 creui. Et hoc est, ut suprà jam meminimus, eā virū nequaquam
 cognoscere, nulli vñquam in commixtione carnali per consen-
 sum adqueuisse. Legerat quidem Abrahæ factam de Christo
 promissionem, sicut & ipsa postmodū proficitur, inquiens: *Sus-
 cepit Israel puerum suum, recordatus misericordie suæ. Sicut locutus
 est ad Patres nostros, Abrahā & semini eius.* Vnde nequaquam de
 hac promissione dubia, de modo requirebat quo esset complē-
 da, vtrum scilicet per admixtionem viri sine dilectione peccati,
 sicut in paradiso fieret si homo nō peccasset, an integritate cor-
 poris pariter & mentis conseruata, sicut in eius proposito fue-
 rat. Benè autem Angelus, cū ei filium promitteret, modum
 conceptionis reticuit, donec ipsa videlicet manifestato voti sui
 proposito, cū ab eo requireret: ne videlicet quia eā audieramus
 desponsatam, crederetur per concupiscentiam hanc inisse co-
 pulam.

SPIRITVS *sanctus superueniet in te.* Hoc est, supe-
 riori dono Dei ditaberis, ut virgo pariter ac mater sis. Ve-
 nit Spiritus in multas fidelium animas, per aliquod diuinæ
 gratiæ donum, sed in Mariam superuenit, cū ei superiorem
 & excellentiorem omnibus gratiam contulerit. Quid autem
 Spiritus Dei, nisi diuinæ bonitatis amor seu donum intel-
 ligitur, cū aliquid nobis supra merita confertur? Cū er-
 go mysterium hoc Incarnationis totum per operationem

bonitatis diuinæ magis quàm per solitam institutionem naturæ fuerit gestum, rectè Spiritui sancto est ascriptum. *Et Virtus Altissimi obumbrabit tibi.* Virtus Dei Filius, hoc est coæterna eius sapientia intelligitur, iuxta illud Apostoli: *Nos autem predicamus Christum Dei virtutem & Dei sapientiam.* Sicut enim Deus omnia in sapientia sua fecit, sic & per ipsam perditam restaurauit: ab hoc, vt suprà meminimus, nostræ redēptionis exordio restorationem istam inchoans. Virtus itaque Dei Filius dicitur, qui brachium eius seu fortitudo, ad omnia quæ disposuerit peragenda sufficiens. Hæc Virtus obumbravit Virgini, dum in ipsa suæ diuinitatis fulgorem velamine carnis operuit, & sic ad nos quasi calciata Diuinitas processit, vt in nostra Deus visibilis appareret natura, qui permanet inuisibilis in sua. Hæc autem diuinæ Majestatis obumbratio in illo præfigurata est electro, cuius speciem de medio ignis Propheta Ezechiel conspexit. Electrum quippe est metallum ex auro simul & argento commixtum. In qua quidē mixtura argentum ad claritatem proficit, aurum verò à suo temperatur fulgore. Electrum igitur istud ipse intelligitur Christus, in cuius vna persona diuinitatis & humanitatis duæ naturæ ita sibi adinuicem sunt vnitæ; vt inferior natura, quæ per argentum exprimitur, sese visibilem præbeat, & diuinæ maiestatis splendor carnis velamine obumbratus, qui per aurum figuratur, inuisibilis persistat. Hoc electrū in igne, Deus homo est in passione.

I D E O Q V E & quod nascetur ex te sanctum, vocabitur Filius Dei. Ac si apertè dicat: Ac per hanc vnionem Verbi Dei ad hominem vitæ factam, non solummodò ipsum Verbum Filius Dei dicetur, verumetiam ipse homo à Verbo assumptus Filius Dei vocabitur. Et attende, quod ait, *vocabitur*, de homine potius, quàm de verbo, cui competit esse. Quod diligenter Euangelista considerabat, cū diceret: *In principio erat Verbum.* Non enim dixit, vocabatur Verbum, sed erat. Esse namque proprium est incommutabilitatis diuinæ, sicut ipse ad Moysen loquitur. *Hæc dices filiis Israel, Qui est misit me ad vos.* Qui est, inquit, hoc est, qui incommutabiliter consistit: quia nequaquam verum habet esse, nisi quod est incommutabile. Vbicumque mutatio fit, esse pariter & non esse concurrunt. Illi ergo proprium est esse, qui penitus ignorat

non esse. Vnde benè dictum est, *erat Verbum*, potius quàm vocabatur. Vocatio quippe non est æternitatis, sed temporis; nec ad naturam, sed ad placitum hominum spectat impositio nominum. Vnde rectè cum de homine assumpto à Verbo loqueretur, cuius natura non est æterna, nec per naturam, sed per gratiam & vnionem Verbi habet esse Filius Dei, dictum est *vocabitur*, potius quàm erit. Quodd si etiam personam totam in duabus naturis consistentem dicamus ex Virgine nasci secundum corpus, quod indè traductum est, & totam illam personam, non solum humanitatem, Filium Dei vocari, non incongruè dicitur. Nam & surculus trunco alterius naturæ insertus toti arbori propriæ naturæ confert vocabulum: vt si esculus cœtano inseritur, esculus, non cœtanus tota arbor dicetur, à digniori scilicet parte quæ fructum affert ita nominanda, sicut & ex fructu suo cognoscenda. Quædam autem insertio diuinitatis in humanitate facta est hodie, & tanquam vna arbor facta est ex duabus naturis in vnâ sibi personam conuenientibus. Scriptum quippe est de sapientia, quæ Dei Verbum intelligitur, quia *lignum vitæ est his qui apprehendunt eam*. Quid autem humanitas, nisi arbor maledicta, & tanquam lignum mortis antea erat? Quasi ergo lignum vitæ ligno mortis insertum intelligite, cum in Virgine velut in bona terra hæc insertio sit facta. Cuius quidem insertionis ipse spiritus in eam superueniens operator fuit, tanquam illam præuidens diem, quæ ad inserendum commodior videtur; sicut communis hominum opinio tenet, qui inserendi peritiam habent, & longa hoc experientia didicerunt. Vnde & confidenter asserunt, vix aut nunquam aliquam insertionem quæ hac die fiat inutilem esse.

E t ecce Elizabeth. Ne de possibilitate partus Virginis quicquam suboriretur dubitationis, quasi hoc esset impossibile quod solitus cursus non haberet naturæ: in memoriam reducit Elizabeth conceptus, quæ cum tam senio quàm sterilitate esset infœcunda, obtinuit ex gratia quod habere non poterat ex natura. Vnde benè ab Angelo tam senectus eius quàm sterilitas memoratur. *Quia non erit impossibile apud Deum omne verbum.* Verbum Dei hoc loco ipsa est diuina locutio, quæ à beato describitur Augustino, diuina dispositio non habens sonum strepentem & transeuntem, sed vim in perpetuo

manentem. Nullum igitur verbum Dei impossibile est ipsi, cum quicquid ipse disponit ut faciat, nullo impediri casu queat. *Dixit autem Maria: Ecce ancilla Domini.* Quid est quod ais Domina? quid est quod respondes Regina non solum hominum, sed & Angelorum ex hoc futura? Non dicis, Ecce mater Domini, vel etiam dilecta Dei, vel etiam ab ipso electa; cum sis singulariter preelecta. Quanto te ad sublimiora promissio intollit Angelica, tanto summa humilitatis virtus te deijcit ad inferiora. Vbi, obsecro, illud est honorabile nomen quod Unigenitus tuus fidelibus suis imponit, cum ait, *Id non dicam vos seruos, sed amicos?* Ille de honore suorum in ipso quoque nomine dignatus est prouidere, tu e contratio seruilem tibi conditionem non erubescis ascribere. Ita Domina, ut ex te precipue illa humilitatis exempla sumantur, ad quae nos Scriptura exhortans ait: *Quanto maior es, humilia te in omnibus.* Ex hac maxime humilitatis virtute ad huius promissionis celsitudinem meruisti conscendere. Ex hac tuae disciplinæ regula virgo illa tui imitatrix Agatha, & vna de numero prudentum, instructa dicebat: Ancilla Christi sum, ideo me ostendo seruilem personam. Et iterum, Summa ingenuitas ista est, in qua seruitus Christi comprobatur. In hanc tamen regulam & humilitatis formam tuus ipse, ni fallor, quasi auus te induxerat, dicens: *Audi filia, & vide, & inclina aurem tuam, &c.* Cum enim de altitudine huius promissionis ad te filiam suam factæ pramississet, dicens: *Astitit Regina à dextris tuis, &c.* statim de humilitate conseruanda admonuit, subiungens, *Audi filia, &c.* Ac si apertè dicat: magnum est, filia incomparabile bonum te cœlestis Regis sponsam effici spiritualement, ut quasi Regina cœlorum ei iuncto latere assistas, & cum eo ceteros omnes præcedas in vestitu deaurato; hoc est in corpore solido & incorrupto, omni virtutum diuersitate intus adornata. Sed quia magna sunt femineæ naturæ tanta præconia, & humane infirmitatis tam excellens gloria, audi quæ dicuntur, & intelligendo vide: ut cum hæc tibi nunciabuntur, non diffidas impleri, & tantæ promissionis altitudinem aure humili suscipe, quasi obliuiscendo populum tuum, & domum patris: hoc est, non superbiendo de genere Iudæ & regia stirpe, nec attendendo quid habeas ex natura; sed quid tibi conferatur ex gratia. Atque ita Rex ille cœlestis concupiscet

piscet decorem tuum, qui superbis resistit semper & humilibus dat gratiam. Cuius quidem exhortationis Domina non immemor facta, dixisti: *Ecce ancilla Domini*. Et rursum, *Quia respexit humilitatem ancillae suae*. Ex qua profecto humilitate meruisti quod sequitur obtinere. *Fiat mihi secundum verbum tuum*. Hoc est, ut ipsum Dei Verbum iuxta tuae promissionis verbum concipiam integra, & pariam incorrupta, Amen.

IN NATALI DOMINI,

Ad easdem Virgines,

SERMO II.

ET ENTUR cœli, & exultet terra; quoniam hodie cœlorum Rex ortus singulas terras insigniuit, ut hinc cœlestes ciues colligeret, per quos cœlestia restauraret damna. Vnde & Angeli de reparatione sui lapsus & nostro profectu exultantes, in ipso statim huius Natiuitatis die, tam suum quàm nostrum commune gaudium nunciarunt, dicentes: *Gloria in altissimis Deo, & in terra pax hominibus bonae voluntatis*. Ac si aperte fateantur: Natus est hodie, de quo spiritualiter* à supernis Spiritibus sit laudandus, & per quem forti armato alligato, immò prostrato, credentes in eum & sperantes veram pacem adipiscantur. Natus est hodie Deus in terris, ut homines nascerentur in cœlis. Natus est hodie de Virgine matre, qui ante tempora genitus est ex Deo patre. Hinc enim ad eum Pater ipse loquitur: *Ex utero ante Luciferum genui te*, hoc est, ex ipsa mea substantia, antequam Lucifer crearetur, es genitus. Vtraque Natiuitas eius mirabilis, vtrâque ipsius generatio ineffabilis: ut ad vtramque pariter, tam ad temporalem videlicet ex matre, quàm ad æternam generationem eius ex patre, illud Isaia non incongruè referatur: *Generationem eius quis enarrabit*? In huius itaque typo ille præcessit Rex & Sacerdos Melchisedech, quem tantum sine patre vel matre, hoc est sine genealogia commemorat Apostolus extitisse. Non quòd ille quidem patre vel matre caruerit; sed quod

* al. specialiter,

eius genealogiam scriptura non doceat, ut à nobis commemorari queat. Sic & Christus Rex vniuersorum per diuinitatis potentiam, Sacerdos hominum factus per assumptæ humanitatis hostiam; sine patre vel matre dicitur esse, non quòd vtrumque non habeat, sed quòd neutrum quis quomodo sit discere queat, ut sicut ibi Scripturæ testimonium, ita hîc rationis humanæ deficiat ingenium; & tantò eius utrâque Natiuitas sit mirabilior, quantò ineffabilior: cùm illa videlicet ex patre sit sine matre, ista ex matre sit sine patre.

DE huius quoque nouitate mirabili, quam habet ex matre, scriptum est Hieremia prophetante: *Creauit Dominus nouum super terram, femina circumdabit virum.* Ac si apertè dicat: Ille qui, sicut scriptum est, fecit quæ futura sunt; iam altissimo suæ dispensationis consilio, futuram cuiusdam hominis creationem nouam, & ceteris omnibus dissimilem prædestinavit. Qui cùm adiunxit, non in terra, sed *super terram*, ostendit hanc creationem non tantum supra merita hominum esse; sed etiam superiorem & excellentiorem ceteris omnibus creationibus terrenis existere. Quæ sit autem huius creationis nouitas, subsequenter exponit dicens: *Femina circumdabit virum.* Hoc est ex propria substantia mulier sola sine virilis seminis ammixtione præbebit corpus, quo se diuinitas circumdet ac vestiatur, viri formam in ea suscipiens. Vnde & benè virtus Virginis, quasi circulus omni parte integer, virum illum in se conceptum, non per coitum extrinsecus immissum, vndique circumdare dicitur. Totum quippe corporale indumentum ex substantia Virginis est cōtextum, & vir ille in ea quasi in circulo continuo fuit: quia eius integritatem nec conceptus nec natus dissoluit. Quantum verò noua, & à ceteris sit diuersa huius creationis nouitas, animaduertemus; si ceteras hominum creationes ab exordio reuoluamus. Primus homo de terra formatus, nec ex patre nec ex matre carnis originem traxit. Eva autè, quæ de costa eius formata est, ex patre solo est, non ex matre. Ceteri vero homines ex patre simul & matre generantur: hoc vno quidem excepto, qui ex sola matre, ut dictum est, nascitur. Vnde & proprie ipse solus filius hominis, nō hominū, dictum est: quia cum videlicet secundum carnem sola virgo

genuit, & ipse ei quoque solus & vnicus filius extitit sicut & patri, vt eius excellentiæ singularitas per omnia commendetur.

Hvius quidem caro Virginis, qua se verus Agnus induit, illud est niueum vellus innocentissimæ ouis, de quo Psalmista longè antè cecinerat: *Descendet sicut pluuia in vellus*, &c. Legimus in Libro Iudicum, ad petitionem Gedeon, vt confirmaretur ad prælium per visibile signum, vellus in area positum rore ita fuisse madefactum, vt circumquaque sicca terra maneret: ac postmodum ad petitionem eiusdem econuerso contigisse. Quo quidem signo præfiguratum dicitur, gratiam Dei, quæ rore designatur, Iudaico populo in medio terrarum olim habitandi, quasi velleri in area posito, collatam primò fuisse, gentili populo reprobato: ac postmodum ab hac gratia vellere siccato, id est Iudæa priuata, eam circumquaque terrarum in gentes defluxisse. Sed quia ros comparatione pluuiæ tenuis est, & minus irrigare sufficit; descensum diuinæ gratiæ in Virginem pluuiæ seu stillicidijs magis quàm rori Psalmista comparauit. Omnè quippe, vt diximus, tam Iudaici quàm Gentilis populi gratiam ea transcendit, quæ Matri Domini collata est: & eius dona, quæ quasi terra & stillicidia suscepit, ceteris donis longè sunt eminentiora. Vellus cum sit de corpore, carnis infirmitatem ex læsura non sentit in dolore, & ab omni corporeo sensu penitus alienum est. Et Virgo virginum cum infirmitate carnalis concupiscentiæ concepta fuerit vt ceteri homines; hanc tamen penitus infirmitatem ipsa numquam ex consensu pertulit in mente, nec vllum illecebræ carnalis attactum experta est in carne. Vnde factum est, vt sic de carne orta esset, vt vitia carnis ignoraret, & sic de carne esset quasi caro non esset; & tanquam mortua in carne, & tota viuens in spiritu, carnalium sensuum, qui maximè in concupiscentia carnis vigent, oblectationem nesciret. Vnde meritò ipsam præ cæteris cælestis Regis filius quasi palatium suæ habitationi congruum, quod ante non inuenerat, adipisci gauisus est, & in ipsa quasi pluuia in vellus à supernis placido descendit illapsu. Pluuia quippe in vellus veniens, ipsum ita inundat & abluir, vt nullo ei sensu passionem ingerat: & dum ab eo non sentitur, sic in eo est quasi non sit. Ita & superna sapientia,

Cuius haustus aquæ comparatur, iuxta illud : *Aqua sapientiæ potauit eos Dominus*, quia de plenitudine eius omnes accepimus, vt de Virgine carnem acciperet, ipso suo descensu gratiæ suæ donis eam irrigando, ab omni humanæ infirmitatis contagio inundauit, & nullam ei passionem carnis vel in conceptu vel ex partu attulit; & dum eam tam ante partum, quàm post partum Virginem consecrauit, sic in ea fuit quasi non fuerit: & sic ipsa grauida facta est quasi grauida non esset, eùm nullum inde passionis grauamen incurreret. Stillicidia autem pluuiæ terram, quam inebriant, ab ariditate sua in fecunditatem conuertunt. Et spiritus sui donis ita eam Filius Dei repleuit, vt non solum ipsa Deum pariendo fructum afferret, verumetiam fidelibus omnibus ipsum conferret, quæ salutem omnium mundo peperit.

⁊ spiritualis H A E C illa est fidelium omnium terra communis, & ager specialis *, cuius & Spiritus sanctus colonus, & verbum Dei semen extitit. Quod etiam suprà memoratus Prophetam per spiritum præuidens, ad singularem secum exultationem, & diuinæ laudis confessionem, omnes pariter admonet dicens: *Confiteatur tibi populi Deus, confiteantur tibi populi omnes: terra dedit fructum suum.* Quod quidem si quis de terrenæ segetis fructu accipiat, quid ad David ista exhortatio laudis; quasi in diebus eius terra inciperet fructificare, vel copiosior fructum afferre? Isaac seminasse, & centuplum collegisse tanquam in admirationem diuini beneficii meminisse Scriptura: sed nullam inde gratiarum actionem, de tanta scilicet fructus abundantia eum Domino persoluisse. Intelligamus itaque David in Prophetia huius fructus, quem alibi sibi à Domino commemorat promissum esse, dicens: *De fructu vëtræ sui ponam super sedem tuâ*, ad congratulandū sibi omnes pariter adhortari, quorum in hoc communē considerat salutem. Hic est ille fructus terræ sublimis, quem & Isaias præuidens, *Erit, inquit, germen Domini in magnificentia, & in gloria, & fructus terra sublimis: & expectatio his qui saluati fuerint de Israel.* Quid enim germen Domini, sublimē fructū terræ, cōmunēq; omniū hinc exultationē fideiū, nisi Christū oportet intelligi: qui & ante secula genit⁹ ex Patre, & hodie quasi de terra prodijt natus ex Virgine? Cuius quidē sublimationē ac magnificentiam definit Apostolus, dicens: *Propter quod & Deus illū exaltauit, & donauit*

illi nomē quod est super omne nomē. Quod etiā nomen, id est Iesum, quod Saluator interpretatur, idem Propheta, cū de ipso terræ fructu alibj præconaretur, ait: Rorate cæli de super, & nubes pluant iustum, aperiatur terra, & germinet Saluatorem: & iustitia oriatur simul. Ego Dominus creavi eum. Quid enim cœli vel nubium nomine, nisi Angeli vel sancti Patres dignitate cæteris præminentes, & tanquā in supernis animo cōuersantes, intelligendum est? Qui dum aduentum Mediatoris vel parabolicè, vel manifestè prænunciauerunt: quasi rorem vel pluuiam verba ipsorum fideles susceperunt. Ros quippè pluuiæ subtilior, & minutissimas habens guttas, vt vix cōspici queat: verba sunt allegorica ad intelligendum difficilia. Quæ verò aperta sunt, pluuiæ comparantur. Hæc igitur verba terram sanctam, id est immaculatam irrigarunt Virginem, vt hunc nobis fructum afferret: quia promissionibus tam per Angelos quā per Prophetas de Christo factis erudita, dum eorum auditui credidit, quasi aure concepit; & ex fide audibilis verbi illud concipere Verbum Dei meruit; de quo scriptum est: *In principio erat Verbum*, sicut & consequenter ostenditur cū dicitur, *Et Verbum caro factum est.* Ad hunc itaque rorem seu pluuiam diuinarum promissionum suscipiendam terra se aperuit, cum per intelligētiam & fidem non solum corporis, sed etiā cordis aures eis apertas habuit: vt quæ videlicet dicerentur simul intelligeret & crederet. Vndè benè in eam verba ista plueri iustum potius quā peccatorem dicuntur; quia solus iste sine concupiscentia carnali cōceptus ab omni penitus peccato fuit alienus. Tale est ergo, *pluant iustum*, ac si diceretur: doctrinæ suæ Verba conceptum, à peccato prorsus immunem, conferant Virgini: & ad illa per fidē suscipienda se se aperiat terra, hoc est, de impossibilitate talis cōceptus nec dubitet femina, quando videlicet hæc semina in eam tanquā in terram promissio jecerit Angelica, dicens: *Ecce concipies, &c.* Cum quo simul iustitia oritur, quia ipse non solum iustus in se, sed etiam nos per fidem sui, non per opera legis iustificans, *factus est*, vt ait Apostolus, *sapientia nobis à Deo & iustitia. Ego Dominus creavi eum.* Hoc est, ab æterno iam disposui hanc eius creationem, non per concubitus virilem, sed per meæ potentia peragere virtutem. Quod ergo ibi tanquā futurum prædicitur, *aperiatur terra & germinet Saluatorem*, hîc quasi iam completum ostenditur, *Terra dedit fructum suum.*

QVOD verò subditur, *Benedicat nos Deus*, oratio est postulantis efficaciam huius fructus, in illa videlicet benedictione in demundo promissa, quæ Abraham primò facta est, cum ei à Domino dicitur, quia *in semine tuo benedicentur omnes gentes*. In primo quippe Adam terra maledicta, in secundo benedictionem recepit: quia ille in condemnationem omnes secum pariter traxit, à qua nos iste solus liberans, ut propriè Iesus, id est Saluator vocaretur, obtinuit. Ante aduentum quippe ipsius iusti etià apud inferos propter peccatum primi hominis plectebantur; pro quib. indè liberandis ipse quoque ad inferos descendere dignatus est, illud Osee complens vaticinium: *O mors, ero mors tua: morsus tuus ero, inferne*. Aperta itaque per ipsum iam nobis ianua Paradisi, ut videlicet nullus electorum amplius à regno differatur, illam iam querimoniam fidelium sopiuit: *Patres nostri comederunt vnam acerbam, & dentes filiorum obstupescunt*. Quorum quidem querimoniæ statim ipse respondens, & tempus gratiæ de aduentu suo promittens, ait: *Vivo ego, si erit ultra fabula hæc in prouerbum in Israel*. Et in sequentibus, *Anima*, inquit, *quæ peccauerit ipsa morietur. Filius non portabit iniquitatem patris, &c.* Quid est autem comestio vix acerbæ, quæ à patribus facta, in pœnam etiam filiorum redundat, tanquam ipsi quoque vnam illam comedissent; nisi transgressio priorum parentum, quæ posteros omnes ante aduentum Domini opprimebat, ut nullus quantumcumque iustus ad beatitudinem transiret: sed vnius vetitæ arboris comestionem tota posteritas plecteretur? Eam verò arborem, quam scientiæ boni & mali Dominus appellat, plerique Iudæorum vitem esse autumant, cuius fructus hoc loco vix esse dicitur. Quam etiam indè scientiæ boni & mali, sicut Dominus appellat, meritò dici volunt, quia sicut vinum moderatè sumptum acuit ingenium, ita cum modum excedit obtundit ipsum. Vnde quasi bonum & peruersum sensum conferens, scientiæ boni & mali arbitrantur dici. Cui etiam opinioni non mediocriter illud suffragari videtur, quòd post comestionem statim in se illi motum luxuriæ sentientes, erubescentiâ confusi pudenda texerunt. *Luxuriosa* quippe *res vinum est*, sicut scriptum est. Et Apostolus, *Vinum*, inquit, *in quo est luxuria*. In medio autem paradisi tam lignum vitæ, quàm lignum scientiæ boni & mali fuisse referuntur, quasi sibi inuicem ita copulata, ut alterum alteri adhæreret, sicut vitis ab vlmo ferri solet,

& quasi in vno mors & vita simul sint collocata, tanquam lignum vitæ ex proprio fructu vitam ministraret, & ex adiacente vite mortem inferret. Dominus quippe Iesus in ruinam & in resurrectionem multorum positus est, & ex se ipso vitam credentibus præstat: & reprobos, quos diu tolerando portat, per iustitiam condemnat. In cuius, vt dictum est, aduëtu illud præmissum prouerbum cessare promittitur, quia in electis, qui per Israel designantur, iam illa pœna originalis peccati finem accepit: vt iam vlteriùs nullus credentium nisi ex proprio delicto differatur à regno, sed anima, quæ peccauerit in Israel, hoc est inter videntes Deum, etiam rationis compotes, ex proprio tantum peccato, non ex alieno puniantur: nec iam filius peccatum patris portet, vbi nullum fidelium iam originale peccatum à beatitudine separat. Vndè benè hoc tempus gratiæ, quo plenam remissionem consequimur, sicut illud iræ dici conuenit. De hac plenitudine temporis & abundantia diuinæ gratiæ, quæ decreuerat Deus implere quod cœperat, & consummare quod promiserat, ait Apostolus. *At ubi venit plenitudo temporis, misit Deus filium suum factum ex muliere, factum sub lege, &c.*

Hæc igitur mulier sexu, sed infirmitatis, ignara muliebris, quæ virgo perpetua diuino consecrata est partu, porta illa est Orientalis semper clausa, quam Ezechiel sibi per spiritum reuelatam describit, dicens: *Porta hæc clausa erit, non aperietur, & vir non transibit per eam: quoniam Dominus Deus Israel ingressus est per eam.* Per hanc quippe Virginem quasi portam quandam ad nos quasi in templum suum Dominus ingreditur, dum se in ea nostræ copulat naturæ. Sed hæc eadem porta semper clausa permanet, & vir per eam non transiet; quia nullus virilis coitus. Quæ benè porta ad Orientem respicere dicitur, secundum quod ipsa Orientali congruè comparatur. Sicut enim ibi sol iste corporalis oritur, & indè ad ceteras mundi partes diffunditur: sic in ista sol verus iustitiæ Christus, secundum quod scriptum est, nascens, (quod enim in ea natum est, de Spiritu sancto est) claritatis suæ radios ad illuminandas totius mundi tenebras dilatauit. Vnde & Euangelista Ioannes: *Erat, inquit, lux vera, quæ illuminat omnem hominem venientem in hunc mundum, &c.* Hæc itaque lux, idest Verbum Patris, & coæterna eius sapientia, sic ad nos per Virginem, quemadmodum claritas per solidissimi vitri specular ingreditur. Omnibus quippe metallis vitrum so-

lidius est ac splendidius, sed tamen fragilius, nec post fracturam ita reparabile ut cetera. Et sanctæ Virginis integritas, quam definiens Apostolus ait, *Ut sit sancta corpore & spiritu*, maximam habet soliditatem, & tantò Deo resplendet acceptabilior, quantò est huius virtus sublimior. Sed quia hæc facile deperire potest, statim videlicet si vel mens corrupta fuerit, nec iam ulterius recuperari vel integrari valet: quàm sit hoc tamen bonum fragile liquet, & quàm diligenti custodia indiget. De hoc itaque tanquam fragili vitro ipsa Dei virtus & sapientia, cui velle posse est, quasi specular quoddam in Virgine sibi composuit; per quod se nobis summus ille diuinæ claritatis splendor infudit, & nec per conceptum ingrediens, nec per partum egrediens illud dissipauit. Et notandum quòd specular quidem plenam lucis claritatem suscipit, sed adeò plenam non refundit; nec tantam reddere potest, quantam capit. Sic & ille diuinus fulgor, cum se ad nos per illud virginale specular immittit, longe ampliore gratia Virginem quàm nos illustrat per Virginem. Unde & benè ab Angelo gratia plena salutatur, & in eâ superuenire Spiritus sanctus nunciatur. Ipsa quippe, quantum humana capere potest natura, omnibus diuinæ gratiæ donis cumulata totum simul accepit quod particulatim distribuitur aliis. Venit itaque sæpe Spiritus sanctus in alios fideles per aliquod gratiæ suæ donum, sed in istam superuenit: quia longe superiorem hic aduentum habuit, ubi fidelium omnium operatus est salutem. Secundum quam quidem operationem Saluator ipse non solum ex Virgine natus, sed de ipso quoque Spiritu natus esse dicitur; seu conceptus. Aliter tamen ex illa, aliter ex illo. Ex illa videlicet tanquam ex matre, de cuius substantia carnem accepit: de illo autem non ut de patre, sed tanquam de huius natiuitatis operatore. In hac quippe conceptione vel natiuitate non consuetudo naturæ, sed diuinæ operatio gratiæ consideratur: nec quid natura possit, sed quid omnipotens voluit attenditur. Quòd verò ad gratiam Dei magis quàm ad merita hominum respicit, Spiritui sancto specialiter tribuitur, quia ipse amor seu bonitas Dei propriè nuncupatur.

H v r v s tanquam artificis cuiusdam operatione, lapis ille de monte sine manibus abscissus est, qui in Daniele statuam comminuisse legitur, ac postmodum in montem magnum creuisse,

& vni:

& vniuersam terram impleuisse dicitur. Quem etiam lapidem per Isaiam nobis Dominus promittens, ait: *Ecce ego mittam in fundamentis Sion lapidem probatum, angularem, preciosum, &c.* De quo & Psalmista antè cecinerat: *Lapidem quem reprobauerunt adificantes, hic factus est in caput anguli. A Domino factum est istud &c.* Huius lapidis de monte sine manibus abscisio facta, ipsa est incarnatio diuina, in quam illa, quæ Virginem repleuit, sola operata est Spiritus sancti gratia. Ipse quippe sua operatione carnem illum, qua indueretur filius Dei, de carne Virginis separauit, & in membra formauit. Quid autem manus, nisi humanam operationem significant? Sine manibus igitur id actum est, vbi nulla humani coitus operatio fuit. Mōs, de quo lapis hic est abscisus, virginalis eminentia est dignitatis, quæ cælestem in terris ducebat vitam. De cuius quidem substantia secundum carnem homo ille est assumptus, qui in vnā personam Verbo Dei est vnitus, quod totum est Iesus Christus. Hic grandem & sublimem statuam comminuit, quia dilatatam in gentibus idololatriā destruxit, sicut & ipse per Isaiam antea promiserat, dicens: *Ecce Dominus ascendet super nubem leuem, & ingreditur Ægyptum: & mouebuntur simulacra Ægypti à facie eius.* Ægyptus quippe, quæ tenebræ interpretatur, mundus est summa idololatriæ cæcitate percussus? In quem Dominus per carnem manifestè veniēs, huic ipsi carni quasi leui nubi insedit, quia homo ille à Verbo assumptus, de quo scriptum est, *Verbum caro factum est*, nullum ex corruptibili corpore, quod aggrauat animam, pondus traxit peccati. Sol vapore suo exhalationes terræ generans nubem attrahit, de qua postea manans pluuia terram inebriat vt fructificet. Vapor itaque siue calor solus, Spiritus ipse est à Deo procedens, qui & ipsius amor dicitur. Hic vbi vult spirans, & terrena corda in Deum accendens, quasi quasdam exhalationes terræ generat, dum ipsorum gemitus atque suspiria in Deum excitat. Vnde & Apostolus, *Ipse*, inquit, *Spiritus postulat pro nobis gemitibus inenarrabilibus*, dum nos videlicet postulantes facit, & orantes quæ suggerit. Summa ergo in antiquis Patribus hæc ad Deum oratio fuit expectatio, vt promissum eis mitteret Saluatorem: sicut & de beato illo legitur Simeone. Quod & beatus commemorans Augustinus intelligit: Fratres, inquit, quantum desiderium habebant antiqui Sancti videre Christum! Sciebant illum esse venturum, & om-

nes qui cupiebant dicebant: O si me inueniet illa natiuitas! O si quod credo in Scripturis Dei videam oculis meis! Idem post aliqua de beato illo prædicto sene quasi desiderante & suspirante, quotidie in orationibus suis dicente: Quando veniet, quando nascetur, quando videbo? Putas durabo? putas hic me inueniet? putas isti oculi videbunt, per quem cordis oculi reuelabuntur? Dicebat ista in orationibus suis, & pro desiderio suo accepit responsum, quòd nō gustaret mortem donec videret Christum Domini. De his quoque Sanctorum desideriis & vehementissimo clamore cordis illud est Isaia: *Clamabunt ad Deum à facie tribulantis, & mittet eis Saluatorem. &c.* Tales igitur clamores vel gemitus fidelium, quasi quædam erant exhalationes terrarum. Ad quorum quidem postulationem & expectationem, sol sibi verus vapore suo nubem attraxit, dum operatione Spiritus sancti Verbum Dei de Virgine carnem accepit. De qua etiam carne tanquam de nube pluuiam dedit, cum incarnationis eius mysterium prædicatio terris omnibus nunciavit, & fidei fructum inde extulit. Cum hac itaque, vt dictum est, carne, ipso in Ægyptum veniente, mōta sunt simulacra Ægypti, quia inde remota est idololatria, conuersis ad ipsum gentibus. Et tunc profecto iuxta Daniele, statua comminuta lapis ille in montem magnum creuit, & vniuersam terram repleuit: quia eius corpus non solum hanc morientium, quod est Ecclesia, vbi terrarum fides, dilatauit, cum infidelitatem expulerit. Quod denique corpus non solum hanc morientium, sed magis illam viuentium est terram repleturum. Hic est mons ille Domini præparatus in vertice montium, qui per diuinitatis eminentiam omnium transcendit cacumina Sanctorum. Qui nobis hodie quasi de valle nascitur, quia de inferiori sexu & humillima Virgine, summus ille diuinæ maiestatis splendor ad humanos hodie prodit obtutus, carnis velamine obumbratus, vt in nostra saltem videri possit substantia, qui inuisibilis persistit in sua.

Hæc illa species electri, quam Ezechieli Prophetæ legimus reuelatam. Electrum quippe quædam est auri & argenti mixtura; in qua & argentum ad claritatē proficit melioris s. admixtione metalli, & aurum à suo fulgore temperatur, dum inferiori metallo sociatur. Sic & Christum vnā ex duabus naturis intelligimus personam, in quo diuinitas auro, humanitas verò infe-

riori comparatur metallo. In hac igitur persona, quæ Christus est, hoc est Deus & homo, sic sibi diuina & humana coniunctæ sunt naturæ, ut ille incomprehensibilis diuinæ claritatis fulgor carnis velamine obumbratus, humanis se oculis temperaret, & suscepta humanitas ad claritatem proficeret: cum videlicet homo ille quasi quædam lutea testa sapientiæ supernæ illius, cui est vnitus, incomparabili luce accensus, nostræ illuminans tenebras, tam verbis quàm exemplis, omnium nobis plenitudinem virtutum exhiberet, & longè puriorem & intelligentia potiorem, quàm in paradiso creata esset, nostram repararet naturam. Ut autem Verbum Dei carnem de Virgine sumens, hoc se velamine obumbraret, ipsum quoque Virgini prius obumbrasse dicitur, ut postmodum ex illa sic obumbratum nasceretur. Cum enim magnus ille cælestis Paranympheus Gabriel Archangelus Virgini prædixisset, *Spiritus sanctus superueniet in te*: statim exprimens in quo hic superior aduentus Spiritus sancti consisteret, adiecit dicens: *Et virtus Altissimi obumbrabit tibi. Et quod nascetur ex te sanctum, vocabitur Filius Dei*. Virtus quippe Patris Filius dicitur, quem Dei virtutem & Dei Sapientiā Apostolus nominat; eo quod quæcunque per sapientiam facta disponit, per eandem potenter efficit. Hæc igitur Patris coæterna Sapiencia obumbrasse Virgini dicitur, quasi videlicet eam occultasse, & de vniuersa humani generis massa ipsam sibi specialiter elegisse, atque attraxisse, in qua nostræ reparationis operaretur mysterium, & altissimum suæ dispensationis compleret arcanum. Quod autem nunc à Gabriele dicitur, *Virtus altissimi obumbrabit tibi, & quod nascetur ex te sanctum*, &c. hoc in Isaia diligenter iuxta Hebraicæ lingue proprietatem iam expressum fuerat. Vbi enim nos dicimus, *Ece Virgo concipiet, & pariet filium*, in Hebræo pro virgine ponitur *alma*, quod sonat abscondita. Quam igitur ibi Propheta dicit absconditam, hanc nos secundum assertionem Angelicam dicimus obumbratam.

QUALITER autem diuina Sapiencia obumbrauerit Virgini, id est, quàm sapienter Deus, ut dictum est, eam sibi occultauerit, illæ quoque rationes nos docent, quibus de desponsata nasci voluit, nec eam grauidam à viro separari permisit: quem ipsa etiam occurrens infamiae hominum vnigeniti sui patrem appellare decreuit, ne videlicet conceptus sui vel


partus veritas audita nec credita pœnam ei vel infamiam apud infideles magis compararet quàm gloriam. Duobus itaque modis à Deo dicitur obumbrata, cùm & veritatem partus eius occultauerit mundo, & eam absconderit protegendo: ad illum videlicet modum, quo dicitur à Propheta, protectio in vmbraculum & in absconsionem esse. Et illud Psalmistæ, *sub umbra alarum tuarum protexit me*. Quod enim protegimus, ne lædatur occultamus. Hanc verò Virginis absconsionē illa etiam quæ in ea præcesserunt vel quæ subsequuta sunt, non incongruè insinuant. Missus quippe ad illam Angelus ad eam ingressus esse memoratur, ut eam scilicet non in publico cum secularibus feminis ludentem, sed in occulto vacantem Deo, & tanquam orantem cubiculo clauso reperisse doceretur. Cuius etiam corpus nunc vsque absconditum humanis obtutibus penitus est subtractum. Benè etiam abscondita dicitur, quæ in hoc conceptu vel partu nec viro est cognita, nec naturæ vel sexus sui legem experta: ut ei soli huius mysterij ratio reseruetur, qui de abscondita natus est absconditus, & de obumbrata processit obumbratus: ut sedentem in tenebris & umbra mortis vera suæ lucis claritate mundum illustraret, & qua rediremus ad patriam ipse nobis viam ostenderet, & facultatem præberet, & aditum patefaceret. Denique nec ipsam Christi genealogiam, quam enarrandam susceperunt Evangelistæ, vsque ad matrē ipsius texuerunt, sed potius ad Ioseph sponsum eius perduxerūt: innuētes quidem huic, non tamen exprimentes, Mariam quoque de stirpe David præcedere; cùm referant eam secundum legē contribuli suo desponsatam fuisse, tanquam in hac quoque sua narratione illud supradictum attendentes Propheti cū, *Generationē eius quis enarrabit*? Narrant quippe vtrumque, sed non enarrāt, & rem tangunt, sed non pertingunt, quia Mariæ proximos parentes non exprimunt, magisque seriem generationis ad sponsum, ut dictum est, quàm ad sponsam perducunt, ut illius patefacta, huius relinquatur abscondita. Vnde & huic quoque benè Apostolus Christo Melchisedech comparauit, quòd eum sine genealogia esse dicit. Sicut enim illius generationem scriptura non exprimit, ita nec humanam etiam Christi generationem, ut dictum est, ipsa definit. Quod ergo supputata genealogia Ioseph Matthæus adiecit, *Christi autem generatio sic erat*, non tam ad præcedentia spectare videtur, quàm ad se-

quentia vbi mox subinfertur: *Cùm esset desponsata mater eius, &c.* Ac si apertè diceretur: Talis est generatio Ioseph ex supradictis Patribus vsque ad ipsum deducta, sed humana generatio Christi patrem nesciens ex sola est Virgine per operationem Spiritus sancti facta. Quam etiam absconsionē ipsi infideles Iudæi ex promisso vaticinio profitentes dicūt: *Sed hunc scimus vnde sit: Christus autem cùm venerit nemo scit vnde sit.* Legimus homines olim naturalium suorū venerationem celebrare solitos esse, sicut & Euangelista commemorat de Herode. Postquàm verò Creator omnium tantam nobis exhibuit gratiam, vt nascendo de Virgine nostram super Angelos sublimaret naturam; statim totam hanc natalium nostrorum deferentes vanitatem, ad eius Natiuitatis conuertimur celebrationem, non iam attendentes quando hīc nascamur, sed quomodo per ipsum cœlo renascamur. Cui est cum Patre & Spiritu sancto vna essentia, eadem maiestas, & inseparabilis gloria per infinita seculorum secula, Amen.

IN CIRCVMCISIONE DOMINI,

Ad easdem Virgines,

SERMO III.

IRCVMCISIONIS Dominicæ seu Baptismi rationem quærentibus, prima nobis occurrit quæstio, cur illa in antiquo populo præcesserit: Deinde cur postmodum ea cessante Baptismus ei successerit. Denique cur post Ioānis aduentum, vsque ad quem Lex & Prophetæ, Dominus utrâque suscepit: maximè cùm id, pro quo auferendo instituta dicuntur, nullatenus habere potuerit. Quas quidem tres quæstiones, si Domino annuente soluere poterimus, præsentis intentionis operam consummabimus. Nunc de prima primū videamus. Constat ante Abraham, à quo circumcisio incæpit, nonnullos extitisse iustos, velut Abel, & Enoch, siue Noc, & ipsum quoque Abraham per veram cordis circumcisionem prius quàm circumcideretur carne, iustum fuisse: sicut ex testimonio Genesis apertè conuincit, sic de hoc inter cetera

scribens ad Romanos: *Quid ergo dicemus inuenisse Abraham patrem nostrum secundum carnem? Si enim Abraham ex operibus iustificatus est, habet gloriam, sed non apud Deum. Quid enim dicit Scriptura? Credidit Abraham Deo, & reputatum est ei ad iustitiam. Et post aliqua: Dicimus quia reputata est Abrahæ fides ad iustitiam. Quomodo reputata est? in circumcisione, an in præputio? Non in circumcisione, sed in præputio. Et signum accepit circumcisionis signaculū iustitiæ fidei, quæ est in præputio, &c.* Ex quo liquidè conuincit Apostolus, quòd is qui ex Dominico præcepto primus est in carne circumcissus, ante hanc circumcisionem dum adhuc præputiatus esset, ex fide sit iustificatus, nec iustitiam ex circumcisione sit consequutus. Pro signo autem iustitiæ iam habitæ circumcisionem suscepit, ut videlicet interiorem mentis à vicijs circumcisionem, hoc est iustitiam fidei, exterior circumcisio carnis ostenderet potius quàm faceret. Interim autem præcedentium Patrum iustitia Deo acceptabilis extitit, ut vnus eorum, id est Enoch, vitæ præsentis ærumnis subtraheretur, in Paradisum viuus à Domino sit translatus, sicut Ecclesiasticus quoque meminit, & Isidorus de ortu & obitu Patrum his asserit verbis: Enoch meruit in eum locum transferri viuens, vnde fuerat protoplaustus expulsus, in consummationē mundi restituens cum Helia mortalis vitæ conditionem. Alius verò cum tota domo sua, id est Noe, à diluuiο liberatus, in seminarium humani generis solus reseruari meruit. Iob quoque gentilis sanctitas, quem longè post Abraham constat extitisse, ad eò Dominico testimonio commendatur, ut non sit ei vir similis in terra, nimirum eo tempore quo multi de filijs Abrahæ iam circumcissi supererant. Quem quidem lex naturalis, sicut & plerosque alios Gentiles veriùs iustificauit, quàm Iudæos scripta fecerit. De qualibet quidem in eadem Epistola, supra commemorans Apostolus ait: *Non enim auditores legis iusti sunt apud Deum, sed factores legis iustificabuntur. Cū enim gentes, quæ legem non habent, naturaliter ea quæ legis sunt faciunt, eiusmodi legem non habentes ipsi sibi sunt lex, qui ostendunt opus legis scriptum in cordib. suis testimonium illis reddente conscientia ipsorum.* Et post aliqua: *Si igitur præputium iustitiæ legis custodiat, nonne præputium illius in circumcisionem reputabitur, & iudicabit quod ex natura est præputium legem consummans te, qui per litteram & cir-*

*cumcisionem carnis prauaricator legis es? Non enim, qui in manifesto Iudeus est, neque qua in manifesto est in carne circumcisio; sed qui in abscondito Iudeus est, & circumcisio cordis in spiritu, non littera: cuius laus non ex hominibus, sed ex Deo est. Et rursum: Arbitramur enim hominem iustificari per fidem sine operibus legis. An Iudeorum Deus tantum? nonne & Gentium? Imò & Gentium. Quoniam quidem unus est Deus qui iustificat circumcisionem ex fide, & præputium per fidem. Quod & beatus Hieronymus diligenter attendens, & talium vitam tanquam Deo acceptam commendare non veritus, quodam loco Mathæum exponēs, ait: Ex eo quodd malus seruus ausus est dicere, *Metis ubi non seminasti, & congregas ubi non sparsisti*, intelligamus etiam Gentilium & Philosophorum bonam vitam recipere Deum, & aliter habere eos qui iustè, aliter eos qui iniustè agunt: & ad comparisonem eius, qui naturali lege seruiat, condemnare eos qui scriptam legem negligunt. Constat ergo in antiquo populo æquè incircumcisos sicut & circumcisos ex fide iustificari: nec eos qui circumcisi sunt, ex circumcisione hoc, ut iusti fierent, assecutos esse; sed magis ex fide per dilectionem, ut ait Apostolus, operante. Quid igitur causæ fuerit ut hoc circumcisionis signum solus Abraham cum semine suo, vel quos possidebat tam de cognatione sua quàm de alienigenis ex præcepto Domini susceperit, merito quæritur. Ipsa quippe iustitiam, cuius hoc signum esse Apostolus ait, æquè in cæteris, ut dictum est, sicut in Abraham, constat extitisse: nec tamen ad hoc signum eos constringit præceptum, sed solùm, ut diximus, Abraham cum semine suo, vel ad possessionem suam pertinentibus. Hinc enim scriptum est, Domino ad Abraham dicente: *Statuam pactum meum inter me, &c. & inter semen tuum post te in generationibus suis fædere sempiterno; ut sim Deus tuus, & seminis tui post te. Daboque tibi & semini tuo terram peregrinationis tue.* Et rursus: *Et tu ergo custodies pactum meum, & semen tuum post te in generationibus suis. Hoc est, quod obseruabitis inter me & vos, & semen tuum post te. Circumcidetur ex vobis omne masculinum, & circumcidetis carnem præputij vestri: ut sit in signum fæderis intra me & vos. Infans octo dierum circumcidetur in vobis, omne masculinum in generationibus vestris. Tam vernaculus quàm emptitijs circumcidetur, & quicumque non fuerit de stirpe vestra: eritque pactum meum in carne mea in fædus æternum.**

*Masculus, cuius præputij caro circumcisa non fuerit, peribit animam illa de populo suo, quia pactum meum irritum fecit. Et post aliqua: Sara uxor tua pariet tibi filium, vocabisque nomen eius Isaac. Et cōstitutam pactum meum illi in fœdus sempiternum, & semini eius post eum. Super Ismael quoque exaudiui te, ecce benedicam ei, & multiplicabo eum valde. Pactum verò meum statuam Isaac. Quem quidem Isaac solum ad semen Abraham pertinere, postmodum Dominus patenter indicauit, dicens: quia in Isaac vocabitur tibi semen. Iuxta quod etiam ipsum Isaac vocat vnigenitum Abraham, dicens: Quia fecisti rem hanc, & non peperisti filio tuo vnigenito, &c. Constat itaque neminem circumcisionis præcepto constringi, nisi Abraham cum semine suo, & his qui ad domum vel possessionem eorum pertinent. Cuius quidem circumcisionis causam Dominus quoque interserens, ait: *Vt sit in signum fœderis inter me & vos.* Ac si apertè dicat: non ut vos mihi fœderet atque iungat, sed ut fœderatos ostendat. Rufinus quoque iuxta Origenem Epistolam Pauli ad Romanos exponens, occasionem huius præcepti de circumcisione facti tam in hoc quàm in ceteris diligenter assignat ex verbis ipsius legis, quæ præcepta eius ad solos Iudæos, quæ ad omnes generaliter homines pertineant. Discutiamus, inquit, utrum hoc mandatum etiam eos, qui ex gentibus crediderāt, constringat. Nunquam fecit profelyti, idest aduenæ mentionem: sed vernaculum seruum vel precio emptum circumcidi iubet, non liberum. Perscrutemur ergo Leuitici legem: *Loquere, inquit, filiis Israel, & dices ad eos, Mulier si peperit masculum, octaua die circumcideretur, &c.* Intueamur & hîc, quemadmodum de lege circumcisionis tantū ad filios Israel Moyses loqui iubetur, & alienigenarum nulla sit mentio: cum in quibusdam mandatis non solum filijs Israel, sed & profelitis, id est aduenis, loquatur. Necessariò utique obseruanda distinctio est, quia sicut ibi dicitur: *Loquere ad Aaron, & alibi, ad filios Aaron, & alibi, ad Leuitas:* certum est non subiacere reliquos his legibus etiam quæ filijs iubentur, nec alienigenæ memoria vlla sit. Non est putandum comme esse mandatum, vbi appellationis habetur exceptio. Sic ergo nō alius circumcisionis lege constringitur, nisi ex Abraham originem trahens, vel vernaculus eorum, vel precio emptus. Vis autem videre quia sicubi vult etiam alienigenas lege connecti,*

uecti, significanter ostendatur? Audi quid scriptum sit: *Homo ex filiis Israel & aduenis, quicumque manducauerit omnem sanguinem, animam illam disperdam: quia anima omnis carnis, sanguis illius est. Et ego dedi vobis vt ex ipso super altare propitiaretur pro animabus vestris, quia sanguis pro anima expiabit.* Vides ergo hanc legem, quæ aduenis data est, obseruari & à nobis, qui ex Gentibus credimus? Ergo legem de obseruatione sanguinis communem cum filiis Israel & gentium suscepit Ecclesia. Hæc namque ita intelligens in lege scripta, tunc beatum illud Apostolorum Concilium decernebat, decreta gentibus scribens, vt abstineret à sanguine & suffocato. Verùm requireres fortassè, si etiam de suffocato communis filijs Israel cum aduenis data sit lex. Audi, *Homo*, inquit, *ex filiis Israel, & ex aduenis qui sunt ex vobis, quicumque venatus fuerit feram aut auem quæ manducatur, effundat sanguinem eius, & cooperiat terra, quia anima omnis carnis sanguis illius est.* Verùm quia inter illa, quæ de Leuitico superiùs protulimus, etiam hoc refertur: *Homo ex filiis Israel vel aduenis qui sunt in eis, quicumque fecerit holocaustum aut sacrificium, & ad ostiam tabernaculi non adduxerit illud facere Domino, exterminabitur de populo suo.* Et per hoc videbitur etiam de Gentibus Ecclesia holocaustis obnoxia fieri. Nō vt faciat iubet, sed si fortè fecerit, quomodo facere debeat docet. Certum est enim quòd cum Hierosolymis templum constaret, & Religio tradita patribus vigeret, plurimi etiam gentium veniebant ad templum, adorare & offerre sacrificium. Sed hoc quoniam in loco vno fieri præceptum est, de quo etiam hîc mandat, vt ad ostium tabernaculi iugulanda victima deducatur: tamdiu potuit legitimè fieri, quamdiu status loci permansit incolumis. Denique Saluator ad decem leprosos, quos mundaerat, inquit. *Ite, ostendite vos sacerdotibus, & offerte pro vobis hostias, sicut præcepit Moyses.* Nunc verò quid exigitur ab aduenis, quod exhibere quidem nec proprijs cultoribus licet? Quam quidem Dominicæ rationis causam si diligentius inspiciamus, facile est ad omnem objectionem nos satisfacere.

PRIMVS Abraham de terra Chaldæorum & cognatione sua diuino eductus imperio, propriæ terræ promissionem sibi & semini suo suscepit à Domino. In qua videlicet terra populus Dei à gentibus viueret separatus, & diuino cultui ser-

uiet expeditus : cū antea fideles passim cum gentibus habitare & victitare consueuissent. In hac igitur terra tanquam in ciuitate quadam populum suum Dominus congregaturus, & à Gentibus eum tam loco quàm vita segregaturus, decreuit ei legem instituere, à circumcissione inchoans. Vnde ut suprà meminimus, facta promissione terræ, qua populus Dei ab infidelibus disiungeretur, & Domino firmitus coniungeretur ac foederaretur, statim circumcissionis præceptum inducitur, quod sit videlicet in huius fœderis signum. Ex genitali quippe membro humane generationis est propagatio. Hoc igitur membrum circumcisum Abraham & suos à ritu & moribus originis suæ, idest infidelium Chaldeorum, segregatos esse ostendit, & hac carnis expoliatione iam eos veterē & carnalē exuisse hominem, & nouum ac spiritalem induisse, qui secundū Deum creatur & renouatur de die in diem. Ad quod etiam huius signi consideratione præcipuē admoneretur. Cuius insuper signi, quasi diuini cuiusdam in homine signaculi non mediocriter commodum Dominus præuidebat ad fidelium salutem tutius muniendā, & eos ab infidelibus maxime diuidendos. Constat quippe tātas esse carnis voluptatis illecebras, ut faciliē homines ad idololatriam quoq; istam cōcupiscentia inclinet, sicut de summo sapiente actum est. Ne igitur fideles infidelibus feminis copulati, in ritu earum transirent, & à Domino recederent, quasi quadā maceria interposita, hoc signo maxime, talium copularum familiaritatem abscidit: ut si videlicet rursus filij Dei filias hominum cōcupiscerent, illæ tamen eorum copulam spernerēt, huius membri detractionem tanquā turpissimam abhorrentes: & illi cōtrā hoc signo fœderis Dei membra sanctificata à turpitudine infidelium seruarent intacta. Vnde & populus Israel eo tēpore, quo in deserto segregatus à Gētibus fuit, nequaquā circūcidi cōpulsus est. tūc verò maxime hāc maceriā interponi necesse fuit, cū in Abrahā fideiū peregrinatio inter infideles cœperit, & in ea cuius iā acceperat promissionē terra. Faciliē nāq; peregrinantes ab incolis qua possunt occasione familiaritatē captant, quā ex matrimonijs maxime contrahi constat. Quo quidem contactu si populus Dei populo Chananzorum vinciretur, difficile illum delere, vel à terra expellere sustinerent, sicut postmodum diuino actum est consilio. Solet etiam

communio mensæ maximum familiaritatis vinculum esse. Vnde & lex postmodum delictos interdicens cibos, hanc quoque familiaritatis abstulit occasionem. Et quo difficilioribus obseruantijs Iudæos implicuit, tantò ampliùs ab eis gentes remouit, & maiores inimicitias hac interposita maceria peperit. Quod quidem tunc fieri opus fuit, cùm nondum Gentilem populum vocare Deus decreuerit, sed tantùm Iudaicum. In plenitudine verò temporis gratiæ, cum Gentilē quoque populum sua vocatione dignaretur Deus, vt Ecclesiam in duos populos dilataret, & eos sibi capiti in vno corpore coniungeret, & magna inuicem concordia ligaret; illam legalium obseruationum maceriam remouit, quæ inimicitias pepererant, vt sic eos adinuicem vinculo caritatis colligaret. Quam quidem diuini consilij prouidentiam summus Ecclesiæ Doctor & specialis Gentium Magister ad Ephesios scribens his aperit verbis: *Propter quod memores estote, quòd aliquando vos gentes eratis in carne, qui dicimini præputium, ab ea quæ dicitur circumcisio in carne manufacta: quia eratis illo tempore sine Christo, alienati à conuersatione Israel, & hospites Testamentorum, promissionis spem non habentes; sine Deo in hoc mundo. Nunc autem in Christo Iesu, vos, qui aliquando eratis longè, facti estis propè in sanguine Christi. Ipse est enim pax nostra, qui fecit vtraque vnum, & medium parietem maceriæ soluens inimicitias in carne sua, legem mandatorum decretis euacuans; vt duos condat in semetipsum, in vnum nouum hominem, faciens pacem, & reconciliet ambos in vno corpore Deo, &c.* Iudæi quippe quasi peculiaris populus Dei de legitimis suis gloriantes, quamdiu lex statum suum obtineret, semper Gentes despicerent, nec se illis æquari patrentur. Qui etiam post Euangelium de præterito statu legis adedò intumescabant, vt hoc sibi priuilegio singularem in Ecclesia prærogatiuam vendicarent. Ad quam quidem superbiam maximè reprimendam Apostolus frequenter in Epistolis opera legis & eius gloriationem deprimere vel extenuare compellitur, & ea omnino remouere decreuit; ne videlicet de his Iudæi Gentibus insultarent, aut Gentes eorum Legi se subdere prorsus dedignarentur, de qua illi maximè aduersus eos gloriabantur. Quā quidem Apostoli discretionem intantū postea sancti Patres æmulati sunt, vt cùm in Gētibus Ecclesiasticas dignitates secundum pristinos ciuitatum

gradus ordinarent, in illo Hierosolimam honore illam quondam Dei egregiam ciuitatem extulerunt; imò ipsam adeò depresserunt, ut eam Metropoli subiugarent: ne forte priuilegio ciuitatis suæ vel templi gloriari superbus ille posset populus, sicut nec vel cerimonijs suis. Vnde nec in illis parasceuz solēnis orationib⁹, cū pro Gētilibus & Hereticis quoq; siue Schismaticis genua flectam⁹, solos in hoc Iudæos præterimus, qui genu flexo illudentes Domino dicebant: *Aue Rex Iudeorū.*

Si c v t autem lege cessante perfectior Euangelij doctrina successit, ita post circumcisionē, Baptismi subijt sacramētum, quod tam viros quàm feminas æque sanctificat, & eum iā venisse demonstrat, qui nos à peccato penitus abluat, & ipsam etiā peccati pœnā cœlos referendo deleat. Vnde & bene hoc sacramentum super totum hominem, non in aliqua eius parte agitur: quo post Saluatoris hostiam ita penitus peccatū deletur, ut pœna quoque peccati omnino relaxetur. Quod etiam Sacramentum tantò ampliùs Dominici aduentus gratiā cōmendat, quanto & ad salutem perfectius est, & ad tolerandū leuius, ut tantò lex noua sit gratior, quanto quæ præcessit fuerat onerosior: & qui legis iugum ferre consueuerant Gētiles, nulla Sacramentorum difficultate vel multitudine territi repellerentur. A quo quidem oneris grauamine ad Euangelicam libertatem Dominus inuitans aiebat: *Venite ad me qui laboratis & onerati estis. Tollite iugum meum super vos, & discite à me quia mitis sum. Iugum enim meum suauē est, & onus meum leue.* Ut enim legalium vindictarum seueritatem prætereamus, ubi dicitur, *dentem pro dente, &c.* quis vitam tenera parte corporis acutis lapidibus circūcidi non horreat? Non enim alio instrumento hanc fieri lex monstrat, cū & Sephora vxor Moyfi sic filium circumcidisse scribatur, & Iosue cultris lapideis ex præcepto Domini populū circumciderit: quanquam id modo pro difficultate rei nequaquā Iudæi obseruent. Quod diligenter Apostolorū Princeps considerans, manifestè fatetur, neque se, neque Patres suos iugum legis portare potuisse. Nec solū perfectione vel lenitate sui baptismus commendatur; verum etiam quadam in semet specie decoris adornatur, cū videlicet quælibet anima Deo copulanda huius ablutione sacramenti cōuenienter innuat, neminē ei, nisi qui à sordibus peccati lotus fuerit, sociari. Quoddā namq; specialis desponsationis cōiugium in baptismo cum Deo inimus,

cum prius in scrutinio catechuminum ei sponsione nostra foederati & quasi desponsati, postmodum in baptismo corpori eius, quod est Ecclesia, conuenimur; * tanquam si sponsa post balneum in amplexus sponsi suscipiatur. Sunt qui etiam circūcisionem ad originalis peccati, siue actualium quoque remissionem dixerint fuisse necessariam, & ob hoc institutam. Nobis autem illa, quam supra reddidimus, causa probabilior atque rationabilior videtur; cum videlicet constet priores iustos hoc sacramento nequaquam eguisse, nec feminas, quæ eisdem obligatæ sunt peccatis, & à quibus peccatum incæpit in nobis, hoc sacramento sanctificari. Quis etiam dubitet antiqua sacramenta excellentiæ nouorum multum derogatura esse, & in maximum errorem nos tractura, si ipsa quoque cum nouis pariter remanerent: tanquam hæc scilicet sine illis sufficere non valerent? Hæc ad propositas duas priores quæstiones: de institutione scilicet circūcisionis seu legis, & postmodum cessatione, dicta nunc sufficiant.

SUPER EST autē, vt tertiæ respondentes, præsentem operam consummemus. Cur videlicet Dominus legem finiens, & Euangelium inchoans, ipsa etiam quæ finiuit legalia suscepit, quasi nos suo adhortans exemplo, vt à lege incipientes, in Euāgelio consummemur, nec sic ad noua transeamus sacramenta, vt derelinquamus antiqua. Et quippe, vt Salomon ait, *Oculi sapientis in capite eius*. Quod quasi exponens Apostolus: *Qui dicit se in Christo*, inquit, *manere, debet sicut ille ambulauit & ipse ambulare*. Sicut ergo Dominus, qui ait, *Non veni soluere legem, sed adimplere*, post circūcisionem suscepit baptismum, post veteris Paschæ sacrificium celebrauit nouum; ita nos eius vestigia sequentes, ab his minimè, inquiens, cōuenit declinare. Sed id profectò rectè diceretur, si eadem nunc in nobis ratio esset, quæ in illo quondam extitit. Vt enim scandalum declinaret, & hoc quoad possemus vitandi formam nobis præberet, antiqua suscepit sacramenta. Alioquin apertè reus legis crederetur, & à semine Abrahamæ & toto Iudæorum populo penitus alienus, vnde promissus expectabatur. Iuxta namque Domini sententiam, quisquis in illis circumcissus non fuerat, de populo suo peribat, cum sine hoc sacramento nemo tunc posset connumerari Iudæis, sicut nec modo sine baptismo Christianis. Vnde & pro scandalo Iudæorum vitando in exordio nascentis Ecclesiæ,

nondum Euangelica veritate roborata , intantum Apostoli superfluis iam legis operibus dispensatiue ad tempus consenserunt , vt Paulus ipse maximus Legis persecutor Timotheum discipulum circumcideret, & ipse postmodum ex consilio Iacobi, & qui Hierosolymis erant fidelium, assumptis quibusdam alijs viris secundum Nazæorum ritum obseruare se legem exhiberet. Qui tamen postmodum de ipsa legis simulatione Petrum manifestè arguit, vbi iam videlicet Euangelicam veritatem confirmatam esse intellexit: Diuersis itaque de causis, sed vtrisque rationabilibus, Deus tam antiqua quàm noua suscepit sacramenta. Illa quippe, vt dictum est, pro vitando scādalo, hæc in nostræ imitationis exemplo. Sicut enim mediator Dei & hominum factus duas in se naturas habuit, diuinam scilicet atque humanam, quas reconciliare venit: ita duos populos sibi coniungens, & quasi duos parietes lapis angularis colligans , tam priorum fidelium quàm posteriorum sacramenta suscepit : vt iuxta illud Apostoli, omnibus omnia factus omnes lucrifaceret. Si enim se à sacramentis Iudæorum subtrahens eos scandalizaret, magis eos à se repelleret, quàm sibi alliceret. Quisquis enim ab his inter quos viuit, dissimilem vitam eligit, magis eorū familiaritatem sibi tollit. Vnde & Angeli hominibus olim apparentes, cum nec hospitio nec cibo egerent, hæc tamen pro necessitate postulantes vel accipientes, tantò nos sibi eos familiariores reddebant, quantò infirmitati nostræ magis condescendebant, & eorum ad quos veniebant consuetudinem nō respuebant. Hanc & Dominus prouidentiam tenens, nihil in cibis vel in humana conuersatione præter peccatum tam à se quàm à discipulis vitari decreuit. Qui si etiam legis onera non suscepisset, nequaquam postmodum hanc remouisse videretur, tam propter mutilationem eius, quàm propter grauamen ipsius. Qui nunc profectò ampliùs à nobis diligendus videtur, quoniā & illius onera propter nos ipse suscepit, & ab ipsis postmodum nos liberauit. Sunt & alia nonnulla, quæ & Dominum egisse meminimus, & ea tamen salubriter declinamus omninò, vel alio tempore & alio modo conuenienter celebramus. Legimus quippe ad nuptias Dominum inuitatum cum matre & discipulis conuiuium illi interfuisse : quod nunc quidem prouida dispensatione sacerdotibus Christi locis specialiter obtinentibus à Sanctis Patribus interdictum est penitus. Alia quippe in

illo ratio fuit, alia in nobis. Nostra namque infirmitas ad tentationem prona, in conuiujs maximè non solùm religionis, verum etiam communis honestatis modum excedit. Nec ille ad nuptias tam propter conuiuium, quàm propter miraculi beneficium, quo se manifestaret, & in se discipulos confirmaret, venire dignatus est. Quod diligenter Euangelista considerans, ait: *Et crediderunt in eum discipuli eius.* Scimus & ipsum post baptismum statim in heremum condescendisse, & x l. dierum ieiunium tunc inchoasse, & sic consummasse, nec ipsos Apostolos ab eo sacramentum corporis & sanguinis sui ieiunos accepisse. Quæ tunc quidem sic fieri oportebat, & nunc aliter alia ratione in consuetudinem venerunt Ecclesiæ. Sic & Dominus ne Iudæos scandalizaret, circumcisionem suscepit, & nos postea vt dictum est repelleremus, hæc omnino respuimus. Multa quippe sunt, quæ secundum temporis oportunitatem alio tempore sunt probanda, & alio improbanda: etsi ab eisdem prius & postmodum gerantur personis. Habent quippe in omnibus loca & tempora suas rationes, secundum quas in eis eadem modo fieri, modo vitari conuenit. Adeo pro scandalis vel repulsionem gentium vitandis, quædam nunc à nobis legitima caueri manifestum est, vt pote circumcisionem & sabbati seu festorum observationes, & sacrificiorum ritum, siue quorumdam abstinentiam ciborum; quòd in quibus Apostoli vel sancti Patres nullum præsenferunt scandalum, imò aliquid vtilitatis vel decoris intellexerunt, ea retinere non abhorruerunt. Vnde & adhuc **iiii.** Temporum ieiunia celebramus, & ipsos Ecclesiasticorum Officiorum gradus, ab Ostiario scilicet, vel ab ipsa etiam clericatus tonsura vsque ad Episcopum: necnon & sacerdotalis vel Ecclesiastici cultus ornamenta ex antiqua retinemus & confirmamus auctoritate. Veluti candelabra, coronas, & vela; Ecclesiarum quoque dedicationes, vel altarium consecrationes, in tantum ex antiquitate suscepimus, vt in his peragendis nihil fere nisi de veteri testamento cantetur vel recitetur: vbi & ad antiquæ aspersiois exemplum hyssopum & cinerem adhibemus. Quis etiam illud intelligens, *Tu es sacerdos in æternum secundum ordinem Melchisedech*, ignoret nostri sacrificij formam legem etiam præcessisse, & inde originem seu testimonium accepisse? In quo quidem nos Latino azimo vescentes aliquam etiam de veteri Pascha retinemus figuram, iuxta illud Aposto;

li: *Itaque epulemur non in fermento veteri, sed in azimis sinceritatis.* Ipsam denique mixturam salis & aquæ in aspercionem fidelium quotidianam exemplo Helisæi conficimus, sicut & ipsa benedictionis verba testantur.

Cum igitur aliqua ex antiquitate retineamus, aliqua respuamus; causæ vel opportunitates pensandæ sunt in singulis. Quod quidam minus attendentes, inde omnia iam respuenda iudicant, quia figuræ fuerunt subsequutæ veritatis, & per Christum iam completæ. Vnde meritò illa iam omnino superflua cēsent, ubi quam præfigurabant veritas completa est: ne fortè si adhuc cum ipsa veritate retinerentur figuræ, quæ ipsam præsignarunt, adhuc expectaretur futurum quod iam est completum. Sed iuxta hanc profectò rationem, omne rei futuræ sacramentum vel figuram mysticam manere non conuenit postquam res eius completa est. Vnde & coniugium, quod Christi & Ecclesiæ continet sacramentum, vel ipsam Regum & Sacerdotum vñctionē, cum his, quæ prædiximus à nobis retineri, cessari iam oportet. Vt iam videlicet nec sacrificium Melchisedech in figuris sequamur, nec altaria chrismate consecremus, nec Ecclesias dedecemus, nec candelabra in Ecclesiis erigamus, & cetera quæ diximus penitus remoueamus. Quod quia nemo fidelium vel discretorum approbat, constat aliquas esse rationes, cur ex veteri testamento nonnulla in rerum signis sicut in verbis omnia retinemus. Quamuis enim prolationes verborum manifestius quàm figuræ sacramentorum demonstrent id quod significant; nulla tamen veteris Testamenti verba respuimus, etiam cum aliter loqui videntur quàm se iam rei veritas habeat: veluti cum dicitur, *Ecce virgo concipiet.* Quid ita mirum, cum tam rebus quàm verbis ea quæ nunc completa sunt vetus Testamentum prænūciat, nonnulla eius sacramenta post rerum etiam completionem suscipiamus, cuius nulla respuere verba præsumimus? Tantò quippe maior est concordia veteris & noui Testamenti, & hoc ex illo magis confirmatur, quantò non solum verbis verum etiā rebus ipsis coniuncta videntur.

NOTANDUM verò quod solis infantibus circumcidendæ certum præfinitum tempus, id est octaua dies, quia eos solos, qui innocenter viuunt, quasi modo geniti infantes, rationabiles, sine dolo, certum est ad illius veræ octauæ gaudia peruenire: ubi tam animarum quàm corporum veram ac perfectam circumcisionem

circumcisionem assequimur, veterem penitus hominem tam per culpam scilicet quam per pœnam exuentes, vbi mens omnino sit libera, & caro à corruptione vel passibilitate pariter aliena. Totum quippe tempus vitæ præsentis vñ 1. diebus comprehenditur. Vnde meritò perpes illa Sanctorum claritas, quæ post septenarium huius vitæ sequitur, octaua nominatur. Iuxta quod Psalmi qui specialiter ad resurrectionem pertinere videtur, intitulari pro octaua dicuntur. Legimus à Iosue filios Israel cultris petrinis secundò circumcisos esse: cum post transitum Iordanis iam in terra promissionis essent introducti. Populus quippe de Ægypto egressus, & in heremo defunctus, filios in deserto natos incircumcisos reliquerat. Quos postmodum Iosue circumcidens, secundò circumcidisse filios Israel dicitur: non quidem iuxta historiam in eisdem personis conuenientius accipere possumus. Multi quippe alij in populo Iudæorum multos circumciderunt, & nemo præter Iosue secundam circumcisionem dicitur peregrisse. Legimus Abraham priorē circumcidi vel circumcidisse, primò quidem Ismahelem & verna- culos suos, postea vero Isaac. Sephoram quoque vxorē Moyfi cum acutissima petra filium circūcidere Dominus coegit. Nulla tamen harum circumcisionum secunda siue prima dicta est, vel ex ordine distincta, nisi quæ à Iosue memoratur facta. Vnde igitur iste solus secundò circumcidisse dicatur, vel cuius primæ cō- paratione hæc secunda circumcisio vocetur, non facile solui credo, nisi ad allegoriam stilo conuerso. Ad quam nos quidem Apostolus inuitans: *Hæc, inquit, omnia in figura contingebant il- lis.* Secunda autem circumcisio dicitur, cum terræ promissio- nis heredes efficimur, hoc est cum terram viuentium in illa fe- lici, quam diximus, octaua consequimur. Prima verò est cir- cumcisio, quæ hic mentem & carnem à vitiis, vel carnalibus illecebris, quantum nobis datum est abscindimus, vt illam quam suprâ meminimus, veram & integram circumcisionem illic assequamur, à vero s. Iosue, id est Iesu nostro, imò om- nium Saluatore. Hic quippe ille Iosue, qui Moyfi successit, & in terram promissionis introduxit, tam nomine ipso quo Iosue dicitur, id est Iesus, quam factorum suorum excellen- tia specialiter exprimere videtur. Qui, vt dictum est, Moyfi succedens, & populum de Ægypto profectum in terram pro- missionis introducens, quod ille inœpit consummauit: quia

lex per Moysen tam significata quàm data, nihil, ut ait Apostolus ad perfectum adduxit. Impossibile enim est, inquit, sanguine hircorum aut taurorum auferre peccata. Vnde Moysi Iosue succedere necesse fuit, quia frustra processisset legislator, nisi sequeretur Saluator. Qui profectò post transitum Iordanis introductos in terram promissionis cum petra circumcidit, dum videlicet nos in baptismo regeneratos, atque ad supernæ vocationis hereditatem perductos, veram sibi nobis circumcisionem per semetipsum in petra figuratum tribuit, cui est cum Patre & Spiritu sancto æqualis gloria, coæterna maiestas, per infinita seculorum secula, Amen.

IN EPIPHANIA DOMINI,

SERMO IIII.

EPIPHANIAE præsens sollemnitas vocabuli sui proprietatem multis & varijs rerum euentibus mundo exhibuit. Quod enim Theophania vel Epiphania Græcè dicitur, id Latine Dei Apparitio, vel Superapparitio nuncupatur. Saluator igitur mundi post illam temporalis sui ortus apparitionem, qua de utero prodiens Virginis carne se visibilem mundo præbuit, & in præsepio Pastoribus innotuit: vna postmodum per reuolutionem temporum die signis mirabilibus sese amplius manifestare decreuit: ut qui eum ex scriptura non cognoscerent, rerum saltem admiratione traherentur ad fidem. Nouum quippe cœlestis Regis ortum in terris noua stella Magis reuelauit: & super baptizatum Dominum cœlis apertis, & columba in eum descendente, & paterna voce de filio testificante, non solum populo circumstanti, verum etiam ipsi Baptistæ Ioanni plenariè quantus esset inuotuit, sicut & ipse Ioannes profiteretur dicens: *Quia vidi Spiritum descendentem quasi columbam de cælo, & mansit super eum. Et ego nesciebam eum. Sed qui misit me baptizare in aqua, ille mihi dixit: Super quem videris Spiritum descendentem & manentem super eum: hic est qui baptizat in Spiritu sancto. Et ego vidi, & testimonium perhibui, quia hic est filius Dei.*

Denique miraculo aquæ in vinum cōuersæ diuinitatis eius potentia declaratur, sicut Euangelista cōmemorat dicens: *Hoc fecit initium signorum Iesus in Chana Galilææ, & manifestauit gloriam suam. Et crediderunt in eum discipuli eius.* Nunc igitur singulas istas reuelationes Domini ordine prosequentes, ad præsentis diei gloriam inceptam consummemus operam.

BENE' Magi primitiæ gentium ad fidem primò tracti fuerunt, vt qui maximè erroris tenuerant magisterium, ipsi postmodum etiam suæ conuersionis exemplo fidei facerent documentum, & magistrorum conuersio discipulorum maxima fieret ædificatio: sicut & in Gamaliele, Nicodemo, Paulo, Dionysio Arcopagita, & multis alijs tam in lege quàm in Philosophia præminentibus, postmodum actum est. Quis enim Magos, siue Ariolos intantum detestandos esse ignoret, vt non solum ipsos, sed etiam quemlibet ad eos declinantem lex interfici iubeat? Quorum nefariam & execrabilem doctrinam à dæmonibus inuentam atque assumptam, ipse quoque Hieronymus in Esaiam his asserit verbis: Magi ab Oriente docti à dæmonibus, vel iuxta Prophetiam Balaam intelligentes natum filium Dei, qui omnem artis eorum destrueret potestatem, venerunt Bethleem, & ostendente stella adorauerunt, puerum. Isidorus quoque etymologiarum lib. ix. Magorū etiam proprietatem distinguens, Magi sunt, inquit, qui vulgò malefici, ob facinorum magnitudinē nuncupantur. Hi elementa conuertūt, turbant mentes hominum, ac sine vllō veneni haustu violentia tantum criminis interimunt. Vnde & Lucanus:

Mens hausti nulla sanie polluta veneni

Incantata perit ———

Dæmonibus enim accitis audent ventilare, vt quisque suos perimat malis artibus inimicos. Hi etiam sanguine vtuntur & victimis, & sæpè contingunt corpora mortuorum. Quod verò ait Hieronymus, quòd edocti à dæmonibus Magi venerint quærere Saluatorem, per quem magisterium suum destrui formidabant, non ita accipere cogimur, vt hac eos intentione diabolica suggestio vel exhortatio mitteret, vt se ad Dominum Christum conuerterent, sed magis vt eum inquirēdo proderent, quem Herodis siue Iudæorum nequitia ad perdendum inueniret; quasi ab eo metuentes, vel summum eum magum, vel maleficum opinantes, ad quem tam citò magos cōfluere vi-

derent. Vnde & callidè eos ad Herodem & metropolim Iudæorum urbem primò direxit, vt consulendo eos proderent quem querebant. Qui enim cōcubitus hominum quando fuerit non ignorat: nō immeritò videtur agnouisse eū de Virgine natū fuisse, cuius nullū nouerat cōcubitum, & siue per Angelum ad Mariā primò missum, siue per Angelos postmodum Pastorib. apparentes, vel certum habere vel suspicatum esse quàm excellēs ipse fuerit, & suę contrarius malignitati. Cui etiam nonnulla alia præcedentia signa, quæ in Historijs continentur Ecclesiasticis, satis indicio potuerunt esse, quanta rerum in proximo naturus excellentia præmineret. Qualia quidem sunt illa, quæ Paulus Orosius Antiquitatum ab Vrbe condita libro v i i. commemorat. Docet quippe ibi, Augusto Cæsare ab Oriente triumphos importante, tantam à Domino pacem mundo esse collatam, vt ipse Augustus sopitis finitisque omnibus bellis, iam portas pacis prorsus obstruxerit, cuius in templo arma conseruabantur. Vt etiam iuxta litteram illa impleretur Isaia Prophetia, qua pax mundo maxima in aduentu Domini fuerat promissa, cum dicitur: *Et conflagrant gladios suos in vomeres, & lances suas in falces. Non leuabit gens contra gentem gladium, nec exercebuntur ultra ad prælum.* Hodie, inquit prædictus Paulus, primū ille Augustus consalutatus est, atque ex ea die summa rerum & potestatum penes vnum esse cœpit & mansit, quod Græci Monarchiam vocant. Porro autem hunc esse eundem diem dicit v i i i. Idus Ianuarij, quo nos hodie Regi summo Epiphaniæ laudes excolimus. Ad quem etiam hodie quasi salutandum atque adorandum, fideles gentium primitiæ Magi conueniunt, quasi cum alterum Augustum, imò plus quàm Augustum æstimantes, quem cælum pariter & terra tantis signis prædicarent tam apud Romam, quæ caput erat Gentium, quàm apud Hierosolymam Metropolim, vt dictum est, Iudæorum.

REFERT quippe idem Paulus in eodē tractatu, prædicti tēpore Imperatoris hora circiter tertia repentè liquido serenōque die circulum ad speciem cælestis arcus orbem solis ambisse, & Romæ sub eodem Cæsare de taberna meritoria olei largissimum liquorem per diem integrum emanasse. Quæ profectò quid aliud prætendebant, nisi eum eodem tempore nasciturum esse, qui tam cæli quàm terræ Monarchiam obtineret.

Quid enim prædicta solis corona, aut de terra vñctio profluēs, nisi cœli pariter ac terræ promittebat Regem? Ipse quippe Saluator tam Soli iustitiæ, quàm Christus à chrismate, id est vñctus ab vñctione nuncupatus est. Hæc autem secundum humanam naturam largæ eius vñctio, illa est spiritualium donorum & septiformis gratiæ plena & perfecta ei facta collatio, de qua ipsi dicitur: *Vñxit te Deus tuus oleo letitiæ præ consortibus tuis.* De huius plenitudine vñctionis, sicut scriptum est, omnes accepimus, tanquam de taberna exuberanter oleum manat, secundum quod ei dicitur: *Oleum effusum nomen tuum.* Quasi namque taberna quædam eius seu tabernaculum assumpta humanitas fuit, in qua, vt Apostolus meminit, plenitudo diuinitatis corporaliter inhabitabat. De hac itaque ipsius humanitate, diuinæ gratiæ donis, vt diximus, inuncta; hoc in nobis gratia deriuante, quasi de taberna oleum per totum diem manans exuberat. Diem autem totum hoc tempus gratiæ vocat, quod aduentus sui præsentia Dominus illustrauit, de quo illud est Apostoli: *Nox præcessit, dies autem appropinquauit.* Per hanc totam diem oleum indeficienter à capite illo nostro defluit ad membra, cùm de eius plenitudine tempus hoc gratiæ specialiter dicatur. Vnde hoc ipsum eius nomen, quod Christus est, ad huius quoque gratiæ abundantiam denotandam, quasi vnguentum in nobis effusum atque dilatatum rectè dicitur, dum ex eius nomine insigniti, à Christo vocamur Christiani. Meritoria autem taberna illa domus æstimatur, vbi emeriti milites fouebantur. Quæ tanto magis eorum necessitatibus quotidianis sufficere poterat, quanto amplius eius porticus venalium rerum abundabat copia. Hoc in loco Basilica S. Mariæ, quæ ideò fundentis oleum agnominata Romæ adhuc ostenditur, celebris habetur. Merito autem domus illa, quæ propitiationis benè merentibus existerat, assumptæ à Domino humanitati comparatur, per quam vniuersis fidelibus propitiatus est Deus. Quis enim Spiritu sancto suggerente factum esse non videat, vt cùm in tantam sublimatus gloriam Augustus præmineret, se Dominum vocari omnino interdixit, nec vel ioco id se appellari, sed solummodò Augustum permetteret; quasi quadam diuina dispositione venturo Christo huius appellationis decus reseruaret, qui discipulis ait: *Vos vocatis me Magister & Domine, & benè*

dicitis: sum etenim. Vnde & eius humilitatem Dominus ipse respiciens, qui ait, *qui se humiliat exaltabitur*, ipsum Augusti nomen proprium adeò extollere decreuit, vt deinceps Romani Imperatores se generaliter Augustos vocitari gloria- rentur: & quod priùs erat proprium atque personale, factum est generale vocabulum & Imperiale. Patenter cum auunculo suo Iulio Cesari in humilitate cōtrarium videmus, cū ille, vt Lucanus quoque meminit, omnium dignitatum gradus in se retinens, iam non se numero singulari, sed plurali proferri permittet; non se iam quasi vnum hominem, sed plures iuxta dignitatum multitudinem considerans. Quem adhuc nostra superbia quantum valet æmulans, non solum rerum, sed etiam nominum gloriam intantum amplectitur, vt non solum Abbates, verumetiam Domni vocari gloriemur; & magnæ imputemus iniuriæ nos, qui humiliores esse debemus, si in appellatione nostra subiecti alterum prætermittant vocabulum. Sed nec illud à tempore gratiæ & veræ libertatis alienum est, quod omne seruorum genus à suo penitus dominio remouit, nec à se aliquem seruitute opprimi ferret; sed omnium libertate gauderet, quibus tanquam amicis prodesse magis quàm tanquam seruis præesse eligeret, & amari potius quàm timeri appeteret. Qui etiam intantum seruitutem à regno suo studuit extirpare, vt sicut prædictus Historiographus meminit, omnes seruos, quorum dominos reperit, eis restituerit, ceteros verò seruos omnes necari fecit: ne videlicet eorum posteritas in regno remaneret. In quo quid aliud præsignabat, quàm Christianam libertatem futuram, & seruitutem tam legis quàm peccati per Christum remouendam, qui ait: *Iam non dicam vos seruos, sed amicos.* Et alibi, *Si vos*, inquit, *filius liberauerit, verè liberi eritis.* Hinc & Apostolus tempus timoris sub lege à tempore gratiæ distinguens conuersis inter Romanos Iudæis scribit: *Non enim subditi estis iterum in timore, &c.* Idem ad Galathas: *Vos*, inquit, *in libertatem vocati estis fratres: tantum ne libertatem in occasionem detis carnis, sed per caritatem seruite inuicem.*

SUNT qui prædictos Magos non sic appellari autumant, quia fuerint malefici; sed quod Astorum periti, quasi Astro- nomici, vel quacumque alia de causa sic vocati. De quibus quid antiquitus scriptum fuisse Chrysostomus referat,

non est incongruum hoc loco subijcere. Ait quippe sic prædictus Doctor, cum Mathæum exponeret. Legi apud aliquē Magos istos, ex libris Balaam Diuinatoris apparituræ illius stellæ scientiam accepisse, cuius diuinitio posita est & in veteri Testamento. *Orietur stella ex Iacoq, &c.* Et audiui aliquos referentes de quadam scriptura, etsi non certa, non tamen destruyente fidem, sed potius delectante; quoniam erat quædam gens sita in ipso principio Oriētis iuxta Oceanum, apud quos ferebatur quædam scriptura inscripta nomine Seth, de apparitura hac stella, & muneribus eiusmodi offerendis, quæ per generationes studiosorum hominum patribus referentibus filiis suis habebatur deducta. Itaque elegerunt seipso XII. quidam ex ipsis studiosiores, & amatores mysteriorū cælestium, & posuerunt seipso ad expectationem stellæ illius: & si quis moriebatur ex eis, filius eius, aut aliquis propinquorum, qui eiusdem voluntatis inueniebatur, in loco constituebatur defuncti. Dicebantur autem Magici lingua eorū, quia in silentio & voce tacita Deum glorificabant. Hi ergo per singulos annos post messem trituratoriam ascendebant in montem aliquem positum ibi, qui vocabatur lingua eorum mons victoralis, habens in se quandam speluncam in saxo, fontibus & electis arboribus amœnissimus, in quem ascendentes & levantes se orabant & laudabant Deum in silentio tribus diebus. Et sic faciebant per singulas generationes expectantes semper ne fortè in suas generationes stella illa beatitudinis oriretur, donec apparuit eis descendens super montem illum victorialē, habens in se quasi formā pueri parui, & super se similitudinē crucis: & locuta est eis, & docuit eos, & præcepit ut proficiscerentur in Iudæam. Proficiscentibus autem eis per biennium præcedebat stella, & neque esca neque potus defecit in peris eorum. Cetera autem, quæ gesta esse referuntur ab eis, in Euangelio compendiosè posita sunt. Tamen cum reuersi fuissent, manserunt colentes & glorificantes Deum studiosius magis quàm primum, & prædicauerunt omnibus in genere suo, & multos erudierunt. Legimus mortem terrenorum Regum, vel commutationes Regnorum stellis quibusdam, quas Cometas appellant, designari solere: non tamen nouis, sed nouiter de se quasi quendam crinem producentibus. Vnde & Cometæ, quasi à coma, crinitæ sunt appellatæ. Summi verò Regis nouum natiuita-

tis modum, sicut & conceptum, noua stella & incomparabili splendore præsignare debuit. Cuius etiam mortem tanquam expauescens, vel de sceleris magnitudine dolens sol obscuratus, mundo indicauit vniuerso; vt tam ortum quàm occasum veri solis & cælestis Regis gloriam cælestia protestarentur signa.

SUNT qui non mediocri admiratione mouentur, quomodo tam paucis diebus, à Natali scilicet Domini vsq; ad Theophaniam, Magi ab Oriente vsque Bethleem peruenire potuerunt. Quod quidem tunc rectè mirarentur, & quærerēt, si constaret hanc stellam nequaquam ante Dominicam natiuitatem apparuisse, nec Magos iter hoc arripuisse. Cùm verò Chrysostomus ex supradicta Scriptura commemoret eos per biennium proficiscentes stellæ apparentis ducatum habuisse, & tandem Domino iam nato Hierosolimam peruenisse, nihil quæstionis relinquitur. Illud autem fortassis plurimum mouet, quomodo tantus, vt dicitur, splendor stellæ solos commouerit Magos, nec ab Herode vel ceteris comperiri potuerit; maximè cùm eam propinquiorem quàm ceteris extitisse plerisque arbitrentur, quo melius super puerum veniens locum magis designaret. Sed cùm nihil impossibile Deo esse credatur, non est dubitandum eum quibus voluerit hanc stellam occultasse, & eis tantùm qui digni fuerant reuelasse. Potuerunt & isti Magi tanquam præ ceteris Astrorum habuisse notitiam, vt soli nouam animaduernerent stellam, & in eius progressu vel statione non oberrarent. De quibus cùm scriptum sit, quia *viderunt eam in Oriente*; & rursum quia *antecedebat eos stella, vsque dum veniens staret supra ubi erat puer*: patet profecto eos à terra sua vsque Hierosolymam, & rursum à Hierosolyma vsque Bethleem, præcedentis stellæ ducatum habuisse. Quòd ergo illis ab Herode recedentibus scriptum est, *Et ecce stella quã viderant in Oriente antecedebat eos*: Et iterùm, *Videntes autem stellam, gausi sunt gaudio magno valde*, satis innuitur quòd ex consortio Herodis, vel impiæ Urbis ad quam diuerterunt, stellæ apparitionem quamdiu ibi fuerunt amiserunt. Quòd eo maximè factum esse credimus, vt per hoc eis Dominus intimaret, nequaquam se ab Herode & sceleratis illis hominibus cognosci voluisse.

NONNULLI hos Magos Reges arbitrantur fuisse, iuxta
illam

illam Psalmistæ Prophetiam : *Reges Arabum & Saba dona adducent.* Vnde & Isidorus contra Iudæos cap. x i i i. ita meminit, Quia ei magi munera obtulerunt, Isaias ait : *In tempore illo deferetur munus Domino à populo terribili.* Hoc autem propter Persarum gentem terribilem, & cuius potentia nullus populus comparabatur. De his muneribus & David, *Reges Tharsis & Insule, &c.* Nam & Magos Reges habuit Oriens. Quot verò isti Magi fuerint, ex numero trinæ oblationis tres eos fuisse multi suspicantur ; cum hoc tamen nulla auctoritate scripturæ definiatur, & iuxta hoc quod Chrysostomus superius retulit, x i i. Magi fuisse memorentur ; ac si iam in ipsis gentium primitiis, primi discipulorum Christi præsignarentur Apostoli. Cum autem præsens solemnitas, ut supra meminimus, non solum ex apparitione stellæ mirabilis, verumetiam ex Dominico baptismo, vel nuptiarum miraculo habeatur insignis, iuuat & de istis pauca memorare in huius maxima diei laude.

FACTVM est, inquit Euangelista, *cum baptizaretur omnis populus, & Iesu baptizato & orante apertum est cælum, Et descendit Spiritus sanctus corporali specie sicut columba in ipsum. Et vox de cælo facta est, dicens : Tu es filius meus dilectus, in te complacui.* Quod Dominus cum populo ad baptismum venerit, vel inter turbas dignatus sit baptizari, magnum est humilitatis indicium, atque congruum mysterij signum. Baptizatus quippe cum ceteris, nequaquam circumcisis fuisse legitur cum alijs. Ex quo non absurdum est præsignare, non iam populo Dei circumcisionem necessariam esse, sicut baptismi sacramentum, quod constat generaliter cunctis ab ipso institutum esse. Quod baptizatus ad orationem se conuertit, innuit patenter his qui baptizati sunt semper necessarium esse opem diuinam postulare, ut in ea quam perceperunt sanctificatione valeant permanere, & sic sibi aperiri ianuam cælestis vitæ. Quod statim declaratur, cum eo iam baptizato & orante cœli aperiri referuntur, & spiritus descendere commemoratur. Baptismus quippe cœlos reseat, & perseuerantiæ gratiam oratio nobis impetrat. Multis cum Iesu pariter baptizatis, nemo est præter eum, super quem aperiri cælum, vel spiritus descendere memoretur : quia quicumque in corpore eius, quod est Ecclesia, non continentur, tam à ianua cœli quàm à gratia Dei

sunt exclusi. Solus quippe ipse est qui aperit, & nemo claudit, per quem vnumquemque saluandum ad vitam ingredi necesse est.


DE columba autem, in qua Spiritus sanctus figuratus ostenditur, sicut & de stella, sciendum est, vt ex elementis scilicet creata nouiter vtræque credantur: quæ officio suo ad quod creata sunt completo esse desierunt, in elementa ipsa resolutæ. Spiritus autem, qui per præsentiam diuinitatis vbi-que est, nec localiter quoquam descendere potest in sua substantia incorporali atque inuisibili, dicitur tamen descēdisse super Dominum in specie corporali sicut columba: eò videlicet quòd ad plenitudinem Spiritus sancti, quam semper habuit, demonstrandam, vera illa columba licet nouiter facta, super eum insederit iuxta illud Propheticum: *spiritus Domini super me, eò quòd vnxit me: ad annuntiandū mansuetis misit me.* Vnde & benè in huiusmodi aue, quæ præ cæteris intantum blanda & mansueta esse creditur, vt iracundiæ felle carere dicatur. Quanta mansuetudine vel innocentia iste Agnus Dei, sicut de ipso Baptista protestatur, præminuerit, vniuersa eius opera loquuntur atque præcepta, quæ tantam suauitatē redolent caritatis, vt nec inimicis liceat irasci. Nec putandū est ita Spiritum sanctū in specie columbæ visum esse, vt vllatenus ei incorporaretur, aut in personam vniretur; sed solummodo ea vsum esse pro signo, sicut & linguis illis igneis, quib⁹ super Apostolos ostensus est. Vnde & beatus meminit Augustinus, numquam Spiritum sanctum patre minorem dici legimus, secundum aliquem vnionem naturæ: cū tamen filius secundum humanitatis assumptionem, Patrē se maiorem esse testetur. Columba super Dominum insidente, & cum à cæteris distinguente, & tanquam digito suo, qui Spiritus intelligitur, Patre ipsum demonstrante, vox desuper Patris audita est. Quæquidem vox in persona patris in aere facta est siue per Angelum, siue quocumque alio modo formata. Non enim Pater corpus habet, aut ipsum vnquam assumit, vt corporalibus instrumentis ipse vocem formare possit. Diligenter verò dictum est, non in quo placuit, sed in quo complacuit, vt non solum caput ipsum sibi placere insinuet, sed cum ipso etiam ac per ipsum membra eius grata sibi denunciet.

RESTAT denique tertiam Dominicæ manifestationis apparitionem, in miraculo scilicet nuptiarum, breuiter comprehendere. De quo quidem Ioannes refert, quòd post vocationē Philippi die tertio, ab hac videlicet eius vocatione nuptiæ factæ sunt, ad quas Iesus & discipuli eius conuocati fuerunt. Quod autem Dominus ad nuptias venire dignatus est, & eam præsentia sui, quàm beneficio miraculi decorare, eorum hæresim patenter damnat qui nuptias damnant. Sunt nonnulli Clericorum, qui hoc ipsum Domini factum in exemplum trahentes, molestè sustinent, & grauiter ferunt quòd ad conuiuium nuptiarum Sanctorum auctoritas Patrum parcere decreuit atque inhibere. Non quidem attendentes, Dominus qua illud ratione gesserit, & quòd opportunè hoc eis postmodum interdictum sit. Venit quippe ad nuptias Dominus, qui nulla tentatione commoueri poterat, sed ut præsentia sui magis eas sanctificaret, & ipsum de nuptijs ut dicitur, sponsum magnitudine miraculi ad se traheret, & nuptiarum copulam non esse improbandam, virgo ipse probaret. Si quis igitur Clericorum tantæ opportunitatis occasionē se habere confidit, accedat intrepidus: gerat quæ Christus, & ei indulgemus. Cùm autem vita hominis tentatio sit, & inter epulas maximè sobrietas pereat, honestas periclitetur, luxuria conualescat: tantò hæc conuiuia amplius vitanda sunt, quantò eorū in virtutibus præminere decet. Quod verò a quis in vinum conuersis conuiuas Dominus refecit, patenter ostendit nequaquā ex indigētia eibi se ad nuptias venisse, sed quasi more illorum qui symbola conferunt plus illic posuisse quàm sumpsisse. Ipse quippe est, qui nihil gratis accipit, teste Apostolo qui ait, *Beatus est dare magis quàm accipere.*

QUANTVM igitur præsentī sollemnitati vniuersa debeat Ecclesia, ex his quæ dicta sunt attendat. Magos primitias Gē-
tium noua hodie stella quasi quodam prædicationis modo ad fidem conuertit, & ad Christum adduxit. Vnde nos, qui de Gentibus vocati venimus, hanc præcipuè festiuitatem tanquam nostræ conuersionis exordium celebremus. In baptismo etiam Christi ipsum totius Christianitatis initiū nobis commendatū veneremur. Honor denique nuptijs exhibitus per ipsum, magnum est solatium infirmitati coniugatorum. Benè omnia fecit, & benedictus in secula sit, Amen.

IN PURIFICATIONE S. MARIE,

SERMO V.


*U*M essemus paruuli, Apostolus ait, *sub elementis mundi eramus seruientes. At ubi venit plenitudo temporis, misit Deus filium suum, factum ex muliere, factum sub lege, ut eos qui sub lege erant redimeret, ut adoptionem filiorum reciperemus. Quoniam autem estis filij Dei, misit Deus spiritum filij sui in corda nostra clamantem, Abba Pater. Itaque iam non est seruus, sed filius. Quod si filius, & heres per Deum. Quanta perfectione doctrinae pariter & vitae Christiani debeant praeminere, praesens Scripturae locus patenter insinuat, plenitudinem temporis gratiae ab imperfectione praecedentium temporum & perfectionem Euangelij ab inchoatione distinguens legis. Cum essemus, inquit, paruuli, &c. Tota haec Epistola, quae Galatis scripta est, ad eos specialiter intedit, qui de Iudaismo conuersi pristinum onus Legis reducere volebant, non arbitantes sufficere ad salutem Euangelicę doctrinae perfectionem. Quibus se connumerans Apostolus tanquam similiter conuersus ait: Cum essemus paruuli, &c. Constat paruulos, cum ad disciplinam litterarum applicantur, prius litteralium elementorum figuras vel pronunciationes addiscere, quàm integras orationes valeant formare. Elementa itaque mundi hoc loco dicuntur imperfecta documenta legis, quae carnali populo & amatoribus mundi, tam doctrinam quàm vitam paruulis, primò per Moysen lata est. Ut enim ad Hebraeos idem Apostolus scribit, *Nihil ad perfectum adduxit lex, sed quod illius imperfectioni ad consummationem iustitiae defuit, abundantia suppleuit Euangelij. Vnde & nouum Testamentum Discipulis Dominus tradens; Nisi abundauerit, inquit, iustitia vestra, &c.* Benè etiam documenta legis rudi populo data, litteris cõparantur potius quàm dictionibus vel orationib. Littere quippe carent significatione. Et intellectus Legis tanquàm littere occidētis mysticis obūbratus verbis rudi illi populo nō patuit. Verba itaq; legis quasi litteras Iudæi habuerunt, quia in eis spirituales & mysticos sensus nō intellexerunt, in quibus praecipuè utilitas cõsistit intelligentiae. Quare quidē spiritualis intelligentia legis spiritus vitae est in rotis, sine*

qua lex ipsa literę comparatur occidenti. Qui enim solo litterę sensu cõtenti sunt, & in hoc iustitię finē sibi constituunt, ipsam sibi literā in mortē conuertunt. Vt enim b. meminit Hieron. Timere seruorum est, amare filiorum. Sub elementis istis seruiunt qui timore pœnarum in lege constitutarum, cū dicitur, *densem pro dente, &c.* ad obedientiam coguntur vt serui, non amore ducuntur vt filij. Vnde & postmodum ipse Apostolus duo Testamenta per Agar ancillam, & Saram liberam distinguens, illud in seruitute, istud in libertate declarat populum Deo generare, & quasi ad obediendum ei creare. Vnde & illud seruitutis, hoc Testamentum dicitur libertatis: illud timoris, hoc amoris: illud inchoationis, hoc perfectionis. De qua nunc perfectione subiungit. *At ubi venit plenitudo temporis.* Plenitudinem temporis perfectam mundi ætatem dicit, post illud tempus paruulorum quod præmisit. Non enim iam paruuli vita vel doctrina Christiani dicendi sunt, sicut illi fuerunt. Dicitur etiam plenitudo temporis consummatio eorum, quæ promissa fuerant de aduentu Christi. Quale est illud Iacobi Patriarchæ: *Non auferetur sceptrum de Iuda, &c.* Et illud in Daniele de numero hebdomadum annorum, & de institutionis defectu vel sacrificij, quando inungetur Sanctus Sanctorum. Hæc ergo plenitudo quasi quidam est defectus legis, vt cū ritus eius deficeret, & Moyse de functus esset, Euangelium legi, & verus Iosue succederet Moyse, vt consummarentur in istis quæ incœpta fuerant in illis. *Vbi venit*, inquit. Nam etsi Deus quod promittit differat, nullatenus tardat, sed singula tempora sic disponit, vt in eis peragat quod promittit. Hinc & Abacuc dicit: *Si moram fecerit, expecta eum, quia veniens veniet, & non tardabit.* Longe ante aduentum Christi de ipso promissum id fuerat. Aliud est itaque moram facere, aliud tardare. Moram quippe facere est differre per aliquod tempus spacium quod faciendum est. Tardare verò propriè dicitur, cū differatur aliquid, quando debere fieri videtur. Deus itaque etsi differat implere quod promittit, tardare nullatenus potest, quia nō segnius id agit quàm debet. Quod patenter & in geminatione illa monstratur qua dicitur; *quia veniens veniet*, hoc est, indilatè, & absque impedimento, cū oportuerit id ager. Sollicitus de nostra salute Dominus non tardat implere promissum, prout nobis iudicat necessarium. Vtinam sic & de illa solli-

citi, ad obediendum sine tarditate essemus prompti!

Misit Deus filium suum, videlicet Pater. Pater quippe sicut à nullo est, sic à nullo mitti potest. Filius verò, vel Spiritus sanctus ab illo mitti ad nos dicuntur, cum aliquid pro nobis vel in nobis agunt: quia sicut ab ipso habent esse, ita & ab ipso quod faciunt habent facere. Quod & patenter Filius tam de ipso quàm de Spiritu profitetur, dicens; *A me ipso non loquor*: vel, *à me ipso facio nihil*. Et rursus de Spiritu: *Non enim loquitur à se-metipso*. *Suum*, inquit, hoc est proprium & consubstantialē, non adoptivum. *Factum ex muliere*, quia temporalem secundum humanitatem, quam assumpsit de matre qui natus est; non factus secundum aeternitatem, quam habet ex patre. Quidam hoc loco natum ex muliere potius quàm factum ex muliere dicunt. Sed diligentius Apostolus factum quàm natum hoc loco dixit, ut hanc natiuitatem ab illa, quæ de patre est, patenter distingueret, cum eam temporalem his verbis ostenderet. Be-da super Lucam: *Beatus Venter qui te portauit, &c.* Neque enim audiendi sunt qui legendum putant, *natum ex muliere, factum sub lege*, sed *factum ex muliere*. In utero Virginali carnem non de nihilo, non aliundè, sed materna traxit ex carne. Alioquin nec filius hominis diceretur, qui originem non haberet ex homine. Ne parum videretur pro nobis actum ad humilitatis exemplum, quod de inferiori sexu Dominus est incarnatus, additur quod etiam sub lege factus, hoc est, obedientiam legis non necessitate, sed dispensatione complens. Non enim in eo erant peccata, cui legis sacramenta essent necessaria. Circumcissus tamen est more aliorum, & cum hostiis templo præsentatus, & more feminarum mater eius purificationem obseruauit legalem, in qua nihil purificandum fuerat purgandum. Quæ enim Virgo de Spiritu sancto concepit & peperit, nihil legi debebat in ritu purificationis.

Quod igitur Euangelista dicit, *dies purgationis eius*, in qua, ut dictum est nihil culpæ purgandum fuerat in lege: ritum, non effectum purgationis purgationem vocauit. Qui profecto ritus in lege sancitus, cum his tantum mulieribus iniungatur, quæ suscepto viri semine pepererunt, patenter ostenditur, nequaquam subiacere huic legi, quæ Virgo concepit & peperit, quod insuper dicitur, *aperiens vulnam*, nihil ad eam pertinere censetur, cuius integritas nulla est apertione dissoluta. Ille

quippe clauso vtero matris est natus, qui clausis ianuis postmodum ad discipulos est ingressus. Sic ergo mater, sicut & filius, legem in sacramentis tenuit, non aliqua, ut dictum est, necessitate, sed magna humilitatis dispensatione. Nec solum sub lege diuina obtemperando facti sunt, verumetiam sub humana. De matre quippe legimus, quod cum viro profecta est Bethleem, ut persoluedi census Cæsaris susciperet legem: ac sub illa perfectione cum ibi morarentur, ipsa peperit vnigenitum. Qui etiam postmodum non solum, ut dictum est, legi Dei, sed etiam legi obtemperans mundi, censum Cæsari persoluit, quem & persolvere ceteros admonuit, dicens: *Reddite quæ sunt Cæsaris Cæsari, & quæ sunt Dei Deo.* Scriptum in Matthæo. *Cum venissent Capharnaum, accesserunt qui didragma exigebant ad Petrum, & dixerunt: Magister vester non soluit didragma? At ille, Etiam. Et cum intrasset in domum, prænexit eum Iesus, dicens: Quid tibi videtur, Simón? Reges terræ à quibus accipiunt tributum vel censum, à filiis suis an ab alienis? At ille dixit, Ab alienis. Dixit illi Iesus, Ergo liberi sunt filij. Ut autem non scandalizemus eos, vade ad mare, & mitte hamum. Et cum piscem qui primus ascenderit tolle: Et aperto ore eius inuenies staterem: Illum sumens, da eis pro me & pro te.*

BENÈ ergo factus sub lege dicitur, qui cum nihil penitus legi deberet, sub lege tamen tam Dei quàm seculi sese humiliavit, & filius Dei pariter & hominis tam Deo quàm homini se per legem subiecit: ne quis fortè per elationis timorem cuiuscumque potestatis contemneret prælationem. Ecce, fratres, à censu vel tributo secularium potestatum liberos nos absoluit, qui sibi libertatem vindicare voluit. Filii hominum sumus, & de seruili conditione, vel vilissima plebe Deo nos ipsi mancipauimus, & propitios in hoc terrenos Dominos habuimus, qui cum suæ dominationis dispendio manumissos dedicauerunt Deo, & eius dominum prætulērunt proprio. Ipsi Domini nostri cum ante nos venerint, submissis capitibus habitum nostrum venerantes, Deum in nobis adorant. Securi iam supplicationem illorum suscipimus, ad quorum conspectum prius trepidabamus. Tanquam Dominos suos ipsi nos recognoscunt, quorum graue dominium fugientes, necessitate magis quàm voluntate hanc fortasse libertatem elegimus. A lege seculi & intolerabili iugo liberati, illius suaue iugum, & onus leue suscepimus, cui seruire regnare est. Magna hæc dignitas, & egre-

gia libertas, si non tam corporalis sit quàm spiritalis, nec tam seruitutem hominum fugiamus quàm vitiorum. Non enim turpe est aut damnosum hominibus seruire, sed vitiis; nec istà tollere seruitutem, sed illam Dominus venit. quem nec Apostolus dicit sub lege factum, vt eos qui sub lege erant redimeret. Quid est hoc, fratres, quod legis onus suscepit, & sic ab eo liberauit, & vt nobis parceret sibi non pepercit? Quæ est ista quæso, vel ratio fuit, vt non in se illam prius quassaret, & sic postmodum proprio exemplo nos ab ea liberaret? Attendite ergo summi Consiliarij summum consilium, & supernæ sapientiæ magnum prouidentia profundum. Certè si legis onus suscipere renuerit, de qua ipse ait, *vsque ad Ioannem lex & Propheta*, videretur eam tanquam non à Deo datam improbare, nec tam eam pro eius inutilitate, quàm pro difficultate præceptorum à se remouere. Vnde illud est in Homelia Ioannis Episcopi de prodicione Iudæ: *Vbi vis paremus tibi māducare Pascha?* Non illud quod nostrum est, sed Iudæorum. Illud quidem discipuli præparabant, istud autem quod nostrum est ipse constituit. Sed ipse factus est Pascha. Et cur illud māducavit? quia omnia quæ legis sunt adimpleuit. Nam quando baptizabatur dicebat: *Sic enim decet nos implere omnem iustitiā*. Item, Deus filiū suum misit natum de muliere, factum sub lege, vt eos qui sub lege erāt redimeret, & ipsi legi requiem daret: & vt nemo dicat quia idè eam euacuauit, quia eam complere vt molestam & arduam non valuit, ipse prius eam compleuit, & sic fecit requiescere.

FACTVS est itaque sub lege, vt sic competentius nos liberaret à lege, & de seruitute legis in libertatem transferret Evangelij, & de timore seruorum in amorem traduceret filiorum. Liber quippe est, quem timor ad seruiendum non cogit, sed ad obediendum amor spontaneum facit. Quæ duo diligenter idem Apostolus attendens, & libertatem filiorum, quorum perfecta caritas foras mittit timorem, à conditione seruorum distinguens, quodam loco Romanis scribit. *Non enim accepiſtis Spiritum seruitutis iterum in timore, sed accepiſtis Spiritum adoptionis in quo clamamus, Abba pater*. Et in hac ipsa Epistola: *Vos, inquit, in libertatem vocati estis fratres: tantum ne libertatem in occasionem detis carnis, sed per caritatem seruite inuicem*. Omnis enim lex in vno sermone impletur, *Diliges proximum tuum sicut teipsum*.

Attendite,

Attendite, fratres, quòd cùm dixisset, *In libertatem vocauit nos Deus*, statim adiecit, *tantum ne libertatem detis in occasionem carnis*. Tanquam si diceret: Hoc vnum in hac obedientia libertatis prouidentes, ne fortè quia legis pœnam non timemus, occasionem de impunitate sumentes securiùs carni seruiamus, & libertas corporalis delectat spiritalem. Quam & alibi præueniens occasionem, Romanis dicebat: *Peccatum vobis nō dominabitur. Non enim sub lege estis, sed sub gratia. Quid ergo? Peccabimus, quoniam non sumus sub lege, sed sub gratia? Absit. Nescitis quoniam exhibetis cui vos seruos ad obediendum: serui estis cui obedistis, siue peccati ad mortem, siue obeditionis ad iustitiam*. Quibus patèter verbis dedecorosam & damnosam inhibet seruitutem peccati, qui hominibus seruire sæpè iubet. Quale est illud: *Omnis anima sublimioribus potestatibus subdita sit*. Non est enim potestas nisi à Deo. Et rursum: *Seruus vocatus es? non sit tibi cura: sed si potes liber fieri, magis vtere. Qui enim in Domino vocatus est, seruus est, Christi pretio empti estis, nolite fieri serui hominum*. Quo enim expeditius Deo deservire possimus, minus hominum seruitutem appetere debemus. Quam vtique si iam incurrimus, iniustum est vt debitum eis seruitium subtrahamus, cum quo seruitus Christi humiliùs conseruatur. Hinc iterum dicit, *Serui obedite Dominis carnalibus cum timore & tremore in simplicitate cordis vestri, sicut Christo: Non ad oculum seruientes, quasi hominibus placentes: sed vt serui Christi, facientes voluntatem Dei ex animo: cum bona voluntate seruientes sicut Domino, & non hominibus*. Cùm enim propter Deum homini seruitur, Deo magis quàm homini seruitium impenditur. Vnde scriptum est. *Dominum Deum tuum adorabis, & illi soli seruias*. Quod vt liberum possit esse seruitium, ipse Dominus sub lege factus nos à seruitutē legis redemit, vt adoptionem filiorum reciperemus. Filius Dei, fratres, facere venit, & vt nos in filios sublimaret de seruis. Vnde & Euangelista meminit dicens, *In propria venit, & sui eum non receperunt. Quotquot autem receperunt eum, dedit eis potestatem filios Dei fieri*. Propter quam causam, vt hic idem Apostolus ad Hebræos scribit, non confunditur fratres eos vocare, dicens ad Patrem: *Nuntiabo nomen tuum fratribus meis*. Et in Euangelio ad Mariam loquitur: *Vade ad fratres meos, & dic eis: Ascendo ad Patrem meum & patrem vestrum, Deum meum & Deum vestrum*. Qui & omnino seruorum nomen à filiis

remouens iuxta illud Isaia, *Et seruos suos vocabit alio nomine*, ait illis : *Iam non dicam vos seruos, sed amicos*. Hoc quippe sunt amici Christi, quod filij Dei, amore iustitiæ magis quàm timore pœnæ Deo subiecti. Hæc vera libertas de qua ipsemet dicit : *Si vos filius liberauerit, verè liberi eritis*. Moyses quamquam fidelis in domo Dei, sicut ipse Apostolus Hebræis scribit, tamen famulus eius, non filius erat, nec liberare potuit qui seruitutem legis attulit.

CHRISTVS verò factus pro nobis maledictus, sicut factus sub lege, nos à maledicto legis, & eius intolerabili iugo quod suscepit, absoluit. Factus est pro nobis maledictum secundum legem, dum ignominiosum crucis patibulum sustinuit, quod in maledictionem, hoc est pœnam reorum, maximeque blasphemorum lex instituerat. Hanc ergo legis maledictionem, hoc est pœnam subiens, ab vniuerso legis maledicto nos absoluit; vt iam nemo nostrum quicquid delinquat, propter præceptum legis debeat puniri: magisque seculi leges ad vindictam malorum sunt reseruatae, quàm lex diuina, & instituta Cæsaris potius quàm Dei: ne videlicet superbus ille Iudæorum populus habeat aliquid vnde possit gloriari. Has tamen seculi leges nequaquam iussas, sed permissas Christianis intelligimus, vt misericordiæ locus reseruetur. Quod nequaquam in lege licebat, quæ ad vindictas omnes ex præcepto cogebat, cùm nullum vindictæ præceptum, sed misericordiæ tantum nouum habeat testamentum, nec timore pœnæ, sed amore iustitiæ malitiam reprimat. Nemo quippe tam innocens est dicendus, qui timore, non voluntate à malo cessat, magisque animi quàm corporis esse malitia est dicenda; sicut virtutes vel vitia ad animum tantum, non ad corpus pertinent. Vt ergo veros innocentes Christus efficeret, necessitatem in voluntatem, & timorem conuertit in amorem. Quem videlicet amorem per hoc plurimum ampliauit, atque ad perfectum duxit, quod onus legis voluit suscipere, à quo nos venerat liberare: tanquam per hoc nobis propitius magis factus quàm sibi. Vnde nunc rectè dicitur, sub lege factus, qui legi non erat obnoxius, vt à seruitute legis redimeret, quos in Dei filios adoptaret. Ipse quippe vnigenitus Dei solus eius est filius naturalis atque consubstantialis, cuius summa bonitas, cùm fratres ha-

bere non posset proprios, quæsiuit adoptiuos; nec solus hereditatem patris habere voluit, qui cohæredes sibi fecit. Quomodo autem hanc adoptionem filiorum Deus compleret, post missionem filij adnectit Apostolus missionem Spiritus sancti: ut nihil pater consubstantialiale habuerit quod nobis per gratiã non impertierit, tam videlicet proprium filium quàm Spiritum sanctum ad nos dirigens. Et de filio quidem ipse Apostolus ad Romanos dixerat, *Si Deus pro nobis, quis contra nos? Qui etiam filio suo proprio non pepercit, sed pro nobis omnibus tradidit illum. Quomodo non etiam cum illo omnia nobis donauit?* Tanquam si diceret, Qui post tantum donum noluit dare donum. Nunc verò cum dicitur, non solum filius, sed & Spiritus ad nos missus, maxima circa nos diuinæ bonitatis sollicitudo monstratur, qui nihil proprium habuit per naturam, quod non communicaret nobis per gratiam. Misit primò filium suum, hoc est coæternam sibi sapientiam, cuius doctrina nos instrueret, ubi salutis summa consisteret. De quo & alibi scriptum est: *Erat lux vera, quæ illuminat, &c.* Misit & Spiritum sanctum, hoc est sui castum nobis infudit amorem, quo sincerè eum diligere propter ipsum, nec tam in eo commoda nostra quàm eius gloriam, & honorem quærentes.

Hunc Spiritum & ipse Filius tanquàm suum dedit. Vnde & discipulis insufflans ait: *Accipite Spiritum sanctum.* Hunc & ipse qui misit ait: *Cum assumptus fuero mittam eum ad vos.* Hic amor cum nos voluntariè operari facit quod Filius docuit, nos adoptat in filios, quos timore pœnæ non constringit ut seruos. Vnde nunc dicitur: *Quoniam nunc estis*, hoc est ad efficiendum id quod iam estis, missus est Spiritus, hoc est, caritas Dei diffusa est in cordibus nostris. *Spiritum*, inquit, *filij sui*, ut sicut ille naturalis filius per dilectionem patris obtemperat, factus obediens vsque ad mortem, sic & nos adoptiui pro nostro faciamus modulo. *Clamantem Abba*, hoc est recognoscere firmiter nos facientem, quòd eum magis pro patre quàm pro Domino habeamus, reuerentiã filiali, non timore serui obediens. *Abba*, Hebraicum nomen vel Syrum, id est quod Græcè vel Latinè *pater dicitur*. Ne igitur hæc filiorum adoptio ad solos eos pertinere videretur, quibus de Iudaismo conuersis superius dixerat, *Cum essemus paruuli, &c.*

ponit diuersa nomina linguarum, quibus nunc in diuersis terris inuocatur Deus, qui prius in Iudæa tantum habebatur notus. Itaque quia videlicet Spiritum filij sui nobis dedit, iam non est aliquis nostrum seruus per Deum, quia neminem iam cogit obedire timore pœnarum, sed amore spontaneos ducit. *Quod si filius*, inquit, *& heres*. Seruus quippe non manet in domo in æternum, nec perpetuam hereditatis possessionem meretur, quamuis non omnino mercede priuetur. Scimus & Iudæos nullam de obedientia sua in cælestibus promissionis remunerationem accepisse, sed tantum abundantiam terrenorum in mercedem eis constitutam esse, quos timor seruos, non amor faciebat filios. Vt autem nos homines efficeret filios Dei, & cohæredes suos in regno patris, id est Dei filios, fieri dignatus est filius hominis, ut nostræ particeps infirmitatis, communicaret nobis suæ fortitudinem æternitatis: & cum ad ima descenderet, nos ad sublimia subleuaret. Felix commercium nobis Domine non tibi, participans nostra, communicans tua, infirmus factus, ut nos fortes efficeremur.

IN huius tantæ gratiæ typum, qua de Adam secundo fuerat Ecclesia formanda, de costa primi Adæ ita est femina creata, ut pro costa Dominus nequaquam in viro costam reportaret, sed pro costa carnem suppleret. Quid enim costa, quæ est ossæ naturæ, nisi fortitudinem, vel quid caro mollis nisi debilitatem figurat? Cum ergo de costa viri mulier creatur, & nec caro pro costa suppletur, vnde vir infirmatus est, inde femina fortis facta est: quia nostræ infirmitatis in Christo susceptio nostra facta fortitudo: & vnde ille est infirmatus, nos fortes, ut dictum est, facti sumus. Et hæc quidem costa de Adam dormiente in mulierem est traducta, quia memoria Dominicæ Passionis ad omnia pro ipso toleranda, fortes nos facit, & vnde ipse pro nobis obdormiuit in morte, inde nos in præceptis suis facit vigilare, tanquam illud semper cum Propheta dicentes: *Quid retribuam Domino pro omnibus quæ retribuit mihi? Calicem salutaris accipiam, & nomen Domini inuocabo*. Calicem salutaris accepit, qui passioni communicat Christi. Ex qua & ipse Iesus, hoc est Salutaris siue Saluator est dictus, quia per eam nos saluauit, quam sustinuit. In hoc maximè Christo pro nobis mortuo vicem reddimus,

dum vsque ad mortem pro eo dimicamus : illud totum implentes quod possumus. Vnde & ipsemet ait : *Maiorem hac dilectionem nemo habet , ut animam suam ponat quis pro amicis suis.* Sed quia hæc virtus non est ex nobis , ipse est inuocandus vt hanc nobis conferat , qui exemplo suæ passionis nos ad eam inuitat. Ipse nomen dicitur Dei, qui plenam eius notitiam mundo attulit. Nomine quippe suo res quælibet declaratur, & quodammodo dignoscitur. Quædam nobis tribuit Deus, quædam retribuit. Nos verò nihil ei possumus tribuere, sed non nihil retribuere. Ipse quippe est, qui operatur in nobis & velle & perficere pro bona voluntate. Ipse nos præuenit vt velimus, ipse nos subsequitur vt possimus; & ipsam voluntatē quam inspirat, adiuuat ne deficiat, voluntatem quā mereamur gratis tribuit, & ipsa merita quæ in nobis efficit remunerat retributione mercedis. Non enim in nobis remunerat, nisi dona sua, vt tam meritum quàm retributio non ex nobis sit, sed ex ipso. Ipse nobis tribuat per quod mereamur, cuius est retribuere cum meruerimus. Ipse nos offerrat Patri suo, cui hodierna die cum nostræ carnis substantia præsentatus est in Templo. Ipse quod fidelibus promisit, in nobis compleat, vt vnusquisque nostrum qui eum expectat cum beato Simeone dicere queat, *Nunc dimittis Domine seruum tuum in pace, Amen.*

IN SEPTVAGESIMA,

SERMO VI.



CCLESIASTES ad huius vitæ vanitatem & inconstantiam contemnendam nos adhortans ait : *Omnia tempus habent, & suis spatijs transeunt vniuersa sub cælo.*

Et post aliqua, quid nobis in hac mutabilitate & incertitudine vitæ sit faciendum vel expectandum supponit dicens : *Tempus flendi, & tempus ridendi. Tempus plangendi & tempus saltandi.* Omnia, inquit, *sub cælo tempus habent*, hoc est temporaliter mutantur, & more temporis incessanter defluunt. *Sub cælo*, inquit, non super cælum : quia hic vanitas, ibi veritas : hîc defectus, ibi perennitas : hîc incerta prosperitas & miseriæ semper lætitia permixta, ibi sicut indeficiens,

ita & inestimabilis felicitas. *Suis*, inquit, *spatys uniuersa trans-*
eunt, quia quò maius spatium vitæ quilibet habuit, tantò bre-
 uius est habiturus, & singulorum vita quanto longior extitit,
 tanto breuior est futura, & suis incrementis semper ad defe-
 ctum properat. Id quoque ipsum, quod vitæ dicitur, ita mi-
 serijs est implicitum, vt mors potius quàm vita sit dicendum;
 defectus, non profectus sit appellandum: nocti potius quàm
 diei, mœrori magis quàm gaudio sit comparandum. Quod
 Philosophi mundi, mundum maximè contemnentes, ad cœ-
 censuerunt, vt cùm se multis annis vixisse cernerent, eos tan-
 tum dies ascriberent vitæ suæ, quos se sine molestia recorda-
 bantur egisse: vix in centū annis inuenientes duos dies, quos
 ipsi morientes sepulturæ suæ titulo inscriberent, cum dierū
 vitæ numerum assignarent. Iacob Patriarcha verior Dei
 Philosophus quàm mundi, interrogatus à Pharaone quot
 vitæ dies haberet, cùm Rex eum conspiceret longæuū, res-
 pondit, *Dies peregrinationis vitæ meæ centum triginta annorum*
sunt. In qua quidem interrogatione vel responsione diligen-
 ter nobis intuendum est, quòd cùm homo Gentilis quasi ve-
 ræ vitæ ignarus de diebus vitæ requireret; nequaquam homo
 sanctus vitam istam reputans vitam suam, peregrinationem
 vitæ potius quàm vitam censuit appellandam esse. Vt enim
 Apostolus ait: *Dum sumus in corpore, peregrinamur à Deo, & per*
exilium properamus ad patriam, & quasi per mortem festi-
namus ad vitam. Quibus idem alibi Apostolus ait. *Si consur-*
rexistis cū Christo, quæ sursum sunt querite, ubi Christus est ad dex-
teram Dei sedens: quæ sursum sunt sapite, non quæ super terram. Mor-
tui enim estis, & vitæ vestra abscondita est cum Christo in Deo. Ab-
 scondita, inquit, est vita fidelium, sicut manifesta vita repro-
 borum, qui hoc exilium pro patria ducunt, & quasi conciuēs
 iumentorum tam corpore quàm mente in terram proni, ne-
 quaquam quæ sursum sunt quærunt, nec conciuēs esse sara-
 gunt Angelorum. Terra quippe ista brutis animalibus pro pa-
 tria, & vita præsens eorum est propria, ad quam solam ipsa
 cōstat esse creata tam corpore quàm anima hīc desitura. Ho-
 rum igitur rectè conciuēs dicendi sunt, qui sensibus magis
 quàm ratione reguntur, & cælestium obliti, ad quæ sunt con-
 diti, solis inhiant terrenis, pecudes magis quàm homines vo-
 candi. Qui tantò ardentius vitæ huius amaritudinem appe-

eunt, quanto futuræ dulcedinem minus aduertunt. Ad quam ille vehementer suspirabat inter regias epulas, qui dicebat. *Quàm magna multitudo dulcedinis tuæ Domine, quam abscondisti timentibus te.* Timentibus Deum potius quàm mundum, & animæ magis quàm corporis damnum. Hæc dulcedo dicitur abscondita, tanquam eis solis in futurum reposita & reseruata, non pro reprobis communicanda.

Hoc illud est Manna absconditum quod in Apocalypsi legimus à Domino fidelibus promissum. *Vincenti*, inquit, *dabo manna absconditū*, hoc est cælestis panis refecionem. In cuius typum corporale manna refecit in deserto populum, cuius satietatem is quoque vt diximus confidenter expectabat cum diceret: *Satiabor cum apparuerit gloria tua.* Quibus utique hîc se semper esurire demonstrat, vt ibi satiari mereatur, iuxta illud Veritatis: *Beati qui nunc esuritis, quia saturabimini.* Cum apparuerit, inquit, gloria tua, satiabor: quia cum de ipsa visione, quæ nunc latet, me refeceris, nihil superest requirendum, quousque, donec perueniam: quantiscumque interim delicijs affluam, semper mendicum me recognoscā. Qui & alibi ad patriæ suæ beatitudinem totis votis anhelans & vitæ presentis exilium deplorans, ingemiscit dicens, *Hæc mihi! quia incolatus meus prolongatus est: habitavi cum habitantibus Cedar, multum incola fuit anima mea.* Tanquam si diceret: Væ mihi peregrinanti in huius exilio vitæ, & tam tardè ad patriam venienti! Quid enim est incolatus nisi peregrinatio extra proprium solum? Vnde & exilium meminimus dictum. Prolongatum itaque suum dolet incolatum, quia præsentem vitam, qua, dum sumus in corpore peregrinamur à Deo, & tanquam exules patriam desideramus, qui, vt ait Apostolus, *non habemus hîc manentem ciuitatem; sed futurā inquirimus*: sicut & ipse qui dicebat: *Cupio dissolui, & esse cum Christo*, grauius sustinemus, & longiorem quàm vellemus esse, cum quærimus quātò ad illā, quæ sine fine est, citiùs peruenire cupimus. Nec solum hanc vitam peregrinationi, verumetiam tenebris cōpārans, quo grauiorem eam demonstret, *Habitavi*, inquit, *cum habitantibus Cedar*, hoc est cum his qui in tenebris commorantur. Cedar quippe interpretatur tenebræ. Et comparisonem supernæ claritatis tenebræ dicendus est status vitæ præsentis, & nox potius quàm dies appellandus. Vnde &

longæ peregrinationis grauamen replicans, adhuc ingemiscit dicens : *Multum incola fuit anima mea.* Ac si apertè dicat: Multum hîc & diu me peregrinari doleo, qui alibi patriam recognosco.

IN cuius profectò peregrinationis & patriæ figuram ipse Israelitici populi longe postmodum per Babylonios captiuati deplorationem describens, ait : *Super flumina Babylonis illic sedimus, & fleuimus, dum recordaremur Syon. In salicibus in medio eius suspendimus organa nostra, &c.* Duæ quippe sunt electorum & reproborum ciuitates, quæ hoc loco sub specie Hierusalem & Babylonis describuntur. Altera hîc prosperatur, quæ reproborum est, & Babylonia dicitur. Altera hîc iugiter per illum afflicta tantò ampliùs ad supernæ pacis visionem anhelat, quantò grauiores pressuras hîc tolerat. De hac itaque vita fideles ad supernam mentis oculos erigentes, & tanquam de exilio ad patriam suspirantes, & de captiuitate Babylonica liberari, ad libertatem ciuitatis suæ Hierusalem semper anhelant hi, quorum nunc persona Psalmus iste cõpositus ipsos ad modum exulum deplorantes inducit, cùm ait : *Super flumina Babylonis, &c.* Flumina Babylonis vitia sunt, quibus consentiendo si quis ea intrauerit, ad Babyloniā, id est confusionem defluit, quia damnationem incurrit. Habet quoque ciuitas electorum propria flumina, de quib. scriptum est : *Fluminis impetus latificat ciuitatem Dei.* Et rursus, *Qui credit in me, sicut dicit Scriptura, flumina de ventre eius fluent aqua viua.* Ad differentiam igitur horum bonorum fluminum noxia flumina sunt Babylonis dicta, sicut est gulositas, luxuria, auaritia, & his similia. Quæ vtique tanquam flumina Babylonis fideles attendentes, nequaquam hæc per consensum intrant: sed quasi desuper sedendo premunt, dum eorum motus quasi quosdam intumescences fluctus in seipsis reprimunt, contrarijs virtutibus quasi quibusdam nauigij remis ipsos ne præualeant contundentes. Sic igitur super flumina pestifera sedentes, quæ tanquam obstaculum & impedimentum maximum ad transitum patriæ conspiciunt more captiuorum, in recordatione illius à qua se adhuc differri dolent, flere memorantur, cùm dicitur : *Et fleuimus, dum recordaremur tui Sion.*

SION mons est, in quo ciuitas Hierusalem sita est. Per hunc

hunc ergo montem celsitudo supernæ patriæ; in qua est Hierusalem, id est continua visio veræ pacis exprimitur. Cuius desiderio fideles accensi ad illam iugiter quasi flentes suspirant, & de hac valle lacrimarum tanquam de captiuitate Babylonica, quo amplius conscendere cupiunt, differri ab illa grauius gemunt. Ordo congruus prius sedere super flumina, & postmodum fletus referuntur lamenta; quia nemo dum vicijs subiicitur, & voluptatibus subiugatur, erigere se per desiderium ad supernam valet ciuitatem: nec nisi prius à malo declinemus, bonis faciendis operam damus. Quantum autem voluptates seculi fugiant electi, ne libidinibus depressus animus minus se attollere ad superna valeat, sequentia declarant: *In salicibus*, inquit, *in medio eius suspendimus organa nostra*. Salices infructuosæ sunt arbores; & in humidis locis abundant, vbi diabolus quasi sus immunda volutatur, & quiescit; qui loca in aquosa perambulans requiem non inuenit. Vnde bene in descriptione Behemot dicitur; *Sub umbra dormiit in secreto calami, in locis humentibus*. Infructuosæ itaque reproborum mentes, in fluxu carnalium voluptatum radicatæ, salices sunt in medio Babylonis plantatæ, & carnalis concupiscentiæ vitijs irretitæ, atque in profundo vitiorum, quod Babylonis intelligatur medium, iam submersæ. Inter tales electi conuersantes, quamdiu præsens vita tanquam arca quædam simul grana continet & paleas, suspendunt organa sua; dum fletibus magis & lamentis vacantes, à canticis exultationis cessant, tam ærumnas suas vel dilationem patriæ, quàm aliorum mortem deflentes. Vt autem organa sua inter tales suspendant, hoc est à vocibus gaudij cessant; ne illas in terra maledictionis deponant, quas cælo potius reseruandas iudicant; subinferunt: *Quia illic, &c.* hoc est qui nos captiuauerant, nobis insultantes, & sollemnitatum nostrarum celebrationem irridentes; tanquam Deus quem colimus nos de manibus eorum liberare non possit, *Interrogauerunt nos verba cantionum*, hoc est, illudentes improperebant nobis, vt nunc quoque cantaremus more pristino. Ac si aperte dicerent, causam huius rei manifestam esse, quia vanis canticis illi nos constat deseruisse, de cuius plurimum confidebamus ope. Vnde & has laudes diuinas non tam cantica quàm cantilenas, & fig-

menta quædam iudicant appellandas.

SATELLITES isti prædonesque Babylonici, per quos captiuamur, & de amœnitate Paradisi, quo quiete vix vnus tanquam de terrena Hierusalem in has misérias dejecti sumus, dæmones intelliguntur. De quibus adhuc subditur: *Et qui abduxerunt nos*, hoc est ab illa nos excusserunt amœnitate, dicebant, subaudis: *Hymnum cantate nobis de Canticis Sion.* Quod est dicere: Laudem illam Dei, quam dicebatis Hierusalem in illis canticis vestris, ad nos conuertite: tanquam diuino cultu derelicto dæmonibus seruiendo, qui subiectis promittunt quæ dare non possunt. Quorum vnus in tantam prorupit insaniam, vt ipsi fidelium capiti dicere auderet: *Hæc omnia tibi dabo, si cadens adoraueris me.* Quorum quidem illusioni competenter respondent electi, & eorum electionem manifesta refellunt oratione, dicentes: *Quomodo cantabimus canticum Domini in terra aliena?* Hoc illud est veritatis documentum, quo fidelibus præcipit: *Nolite sanctum dare canibus, nec margaritas vestras spargatis ante porcos*, quia immundis & irrisoribus diuinorum verborum, & more canum adhuc oblatrantibus, non sunt eloquia committenda diuina, ne vilescere videantur irrisa. Terram alienam dicit infidelium vitam à sorte fidelium exclusam, & dæmonibus magis quàm Deo subiectam. In hac itaque tam manifesta dæmonum possessione laudes Dei penitus sunt reticendæ, & lamenta potius assumenda quàm cantica. Quibus, vt dictum est, lamentis non solum patriæ dilationem in miserijs huius peregrinationis deploremus, sed magis diabolicas fraudes, per quas tot miseri deluduntur.

Hic tempus flendi nobis debetur, alibi ridendi promittitur. De quo & Ecclesiastes post illa, quæ in exordio Sermonis præmisimus, verba, subiecit post aliqua. *Tempus flendi, & tempus ridendi. Tempus plangendi, & tempus saltandi.* Prius inquit, flendi siue plangendi, & postmodum ridendi seu saltandi: quia deplorandæ sunt præsentis miseriæ, vt de his liberatis veræ succedant gaudia lætitiæ. Vnde & Psalmista: *Qui seminant in lacrimis, in gaudio metent.* Quod per semetipsum Veritas: *Beati qui nunc fletis, quia ridebitis. Beati eritis cum vos oderint homines, & exprobrauerint propter filium hominis: Gau-*

de te in illa die, & exultate. Ecce enim merces vestra multa est in cælo. Verumtamen vae vobis diuitibus, qui habetis consolationem vestram. Vae vobis saturati, quia esurietis. Vae vobis qui ridetis nunc, quoniam lugebitis. & flebitis. Vae vobis cum benedixerint vobis omnes homines. Et alibi hanc reproborum & electorū sortem distinguens: Mundus, inquit, gaudebit, vos autem contristabimini; sed tristitia vestra vertetur in gaudium. Quam mox tristitiam & subsequitur gaudium, in comparisonem mulieris parientis conferens ait: Mulier cum parit tristitiam habet. Cum autem pepererit puerum, iam non meminit pressuræ propter gaudium. Quid enim partus mulieris cum dolore parientis, nisi opera fortia sunt animæ fidelis, quæ per filium magis quàm per filiam designantur? Hæc illa sunt fidelium semina, de quibus suprà meminimus: Qui seminant in lacrimis, hoc est in huius vitæ pressuris tanquam hieme quæ colligant in æstate. Seminemus & nos, carissimi, flentes, quæ metamus ridentes. Ad quod nos præcipuè ipsa quoque præsentis temporis institutio admonet, quòd in lamentis pœnitentiæ præuenit lætitiā Resurrectionis Dominicæ. Vbi & illæ speciales gaudij voces Alleluia, & Gloria in excelsis Deo, subtractæ, mœroris potius quàm lætitiæ tempus istud insinuant esse, & planctus magis quàm cantici. In quo ad modum captiuorum, quos diximus, organa nostra suspendentes, & à canticis cessantes, mœrori magis quàm exultationi vacare nos conuenit, semper attendentes exilium quod sustinemus, & ad patriam suspirantes, ad quam creati sumus. Cuius quidem patriæ felicitas in resurrectione capitis membris est exhibita, sed nondum in ipsis completa. Vnde tanto ardentius nos conuenit ad illam suspirare, quanto certius in capite nouimus hanc completam esse; ut nec post luctum pœnitentiæ perfectis desint dilationis lacrimæ dissolui cupientibus, & cum Christo esse. Totum itaque tempus vitæ præsentis in lacrimis deducendis vel pœnitentiæ vel dilationis, sicut est prædictum, hoc temporis intercapedo, à præsentis scilicet die vsque ad octauas Paschæ, vnde ipsa dicta est Septuagesima, nobis figurat. Quid enim dies octauus Dominicam Resurrectionem subsequens, nisi communem fidelium exprimit resurrectionem? Quæ tanto se-

curius expectatur à membris , quanto illa certius in capite præcessit. Cuius desiderium ipse sic in nobis semper augeat , ut de hac peregrinatione ad patriam , de hac valle lacrimarum ad supernæ felicitatis trahat gaudium , Amen.

IN RAMIS PALMARVM,

SERMO VII.



HODIERNÆ solemnitas & tanquam Imperialis pompæ triumphalis iocunditas , qua Dei filius Regio more à turbis est susceptus , & tanquam filius David recognitus & salutatus , longè antea fuit ab ipso David prophetata exhortante nos ad eam reuelatione prophetica : *Lapidem quem reprobauerunt ædificantes , hic factus est in caput anguli. A Domino factum est istud , & est mirabile in oculis nostris. Hac est dies quam fecit Dominus , exultemus , & letemur in ea. O Domine saluum me fac , o Domine bene prosperare : benedictus qui venit in nomine Domini. Benediximus vobis de domo Domini , Deus Dominus , & illuxit nobis. Constituite diem solemnem in condensis usque ad cornu altaris. Quos enim ædificantes hoc loco dicit , nisi Sacerdotes Iudaici populi , qui subiectos per fidem Christi ædificare deberent in templum Dei ? Hoc ipsum destruere nitebantur fundamentum , in quo erigendum fuerat ædificium. Ut enim Apostolus ait , fundamentum aliud nemo potest ponere præter id quod positum est , quod est Christus Iesus. Hæc est illa petra , in cuius fide fundata perseuerat Ecclesia , sicut & ipse Petro ait , cui eam commisit. Hic est lapis sine manibus de monte abscisus , qui hoc loco ab ædificantibus dicitur reprobatus , à turbis hodie recognitus est & susceptus : ut cum ædificatores respuerent , ædificandi susceperent ; & excæcatis magistris illuminarentur discipuli , & in condemnationem seniorum resonarent pueri laudem Dei. Referente Ioanne nouimus , quòd hodie Hie-*

rosolymis multa iam erat turba non solum ex Iudæis, verum etiam ex gentibus qui conuenerant ad proximam Paschæ sollemnitatem. Sic enim de gentilibus & ipse adiecit: *Erant autem gentiles quidam ex his qui ascenderant, ut adorarent in die festo. Hi ergo accesserunt ad Philippum, qui erat à Bethsaida Galilee, & rogabant eum dicentes: Domine, volumus Iesum videre. Venit Philippus, & dicit Andree. Andreas rursus & Philippus dixerunt Iesu. Iesus autem respondit eis, dicens: Venit hora ut clarificetur filius hominis.*

Ab his itaque gentilibus pariter & plebe Iudaica Dominus hodie susceptus, tanquam lapis reprobatus ab ædificantibus in caput anguli est à Domino constitutus: sicut de illo lapide sine manibus abscisso dictum est, quod in mōtem magnum cresceret & vniuersam terram impleret. In angulo domus duo parietes conueniunt, nec nisi conuentu duorum angulus fieri potest. Nouimus in Ecclesia, quæ domus Dei est ex Iudæis & gentibus congregata, quasi duos parietes sibi conuenientes erigi, sicut hodie cœptum esse legimus. Vnde & ipse Dominus ait: *Venit hora ut clarificetur filius hominis.* Tanquam si diceret: Iam est incœptum de multiplicatione fidelium in vtroque populo, per quod maximè filius hominis sit postmodum glorificandus, ut dum à Principibus Iudæorum reprobatur, ab vniuerso mundo suscipiatur. Factus est itaque in caput anguli, hoc est à Domino constitutus, ut in hac iunctura duorum parietum, tanquam in angulo quodam conuenientium ipse fidelibus præsit vniuersis, sicut caput in corpore ceteris membris, & tanquam vna persona ex ipso fiat Ecclesia, in qua ipse sit caput, & illa corpus. Hoc & ipse Dominus hodie per semetipsum declarauit, cum Hierosolymam veniens tam asinæ primū quàm pullo postmodum insedit. Asina quippe mater pulli fidelis est populus primo ad Christum ex Iudæis conuersus, sicut Apostoli & ceteri fideles in primitiua Ecclesia, qui postmodum sua prædicatione gentilem populum ad fidem conuertendo, tanquam mater illum pariendo genuerunt Deo. Quorum vnus ex eis dicebat: *Filioli mei quos adhuc parturio donec Christus formetur in vobis.* Et iterum: *In Christo enim Iesu per Euangelium ego vos genui.* Sedere autem Christum super vtrumque populum, est eis tanquam equitem & rectorem præsidere, & eos quos iustificat per gratiam inhabitare. Vnde & in Prouerbiis anima iusti se-

des dicitur Sapientiæ, hoc est habitatio Christi, quia sapientia dicitur Dei. Cū his, super quos sedet, Hierosolymā venit, quia eos tantummodo quibus hic regendo præsidet ad cælestem Hierusalem æternæ pacis visionem introducit. Hos quoque duos populos per asinam & pullum Iacob Patriarcha designauit, cū in typo Christi Iudam filium suum, de quo ipse ortus est, benedicens ait: *Et ipse erit expectatio gentium, ligans ad vineam pullum suum, & ad vitem ô fili mi asinam suam.* Ipse quippe Dominus discipulis ait, *Ego sum vitis, & vos palmites.* Ad vitem itaque, hoc est ad teipsum, Domine Iesus, asina est ligata, & ad vineam pullus, hoc est ad palmites ipsius vitis: quia tu Domine propria prædicatione primos ex Iudæis fideles tibi copulasti, per quos & postmodum gentiles conuertisti, & eis aggregasti, qui tuam minime viderunt in carne præsentiam.

Hoc ipsum igitur quod tam asinæ quàm pullo Dominus insidens exhibuit, hoc præsens versiculus Psalmi, lōge antè præcinit, dicens: *Hic factus est in caput anguli*, hoc est constitutus à Deo in caput, vt diximus, duorum parietum, in vna domo Dei sibi coniunctorum. A quo verò tam magnum quid factum sit, supponitur cum dicitur: *A Domino factum est istud.* In quo patenter ostendit frustra eos laborasse, qui quod disposuerat Deus nitebantur euertere. Vnde & in mortem eius conspirati dicebant: *Videtis quia nihil proficimus. Ecce mūdus totus post eum abiit. Et est mirabile in oculis nostris.* Quid enim mirabilius in oculis hominum, quàm diuinæ dispositionis profundum, de quo ipse ait: *In iudicium ego veni in hunc mundum, vt qui non vident videant, & qui vident cæci fiant?* Ecce Doctores legisquem in lege promissum expectabant venturum, venientem tanquam incognitum reprobauerunt. Errauerunt magistri, in quo non errauerunt discipuli. Cæcitas ex parte facta est in Israel, vt plenitudo gentium subintraret. Fracti sunt oliuæ rami naturales, vt syluestris insereretur oleaster. Peculiaris ille quondam Dei populus ex magna parte Deum reprobandō meruit reprobari à Deo, & quasi filijs alienatis, in eorum locum successerunt alieni. Quod altissimum Dei consilium in tantam admirationem venit mentibus fidelium, vt ipse Apostolus super hoc exclamans dicat: *O altitudo diuitiarum sapientiæ & scientiæ Dei! quam incomprehensibilia sunt iudicia eius, & inuestigabiles viæ eius! Quis enim cognouit sensum Domini, aut quis Consiliarius eius fuit? Ad*

huius temporis plenitudinem gratiæ exultare admonemur, & lætari, cum dicitur: *Hæc est dies, &c.* Tanquam si diceret: Hoc est illud tempus fidelibus optatum, quod per semetipsum Dominus copia repleuit omnium bonorum. *Exultemus*, inquit, & *lætetur.* Ingeminat gaudium, præuidens in duobus populis Ecclesiæ clementum. Ad hanc itaque temporis gratiam totis votis ipse Psalmographus anhelans, in quam suam & omnium fidelium salutem expectabat futuram, exorat dicens: *O Domine saluum me fac.* Me, inquam, qui te recognosco, qui in te solum tanquam omnium Iesum, id est Saluatorem, spem totam constituo; quantacumque cæcitate populus meus sit percutiendus. Et ut saluum facias, *benè prosperare.* Hoc est, prosperè agas in omnibus quæ disponis, tuæ voluntati obtemperantibus sibi causa salutis æternæ. Quantum autem prosperari debeat in his quæ agit, demonstrat cum supponit: *Benedictus qui venit in nomine Domine.* Benedictus, inquit, hoc est à Deo sanctificatus, & ex utero matris omnibus donis Spiritus sancti consummatus. In nomine Domini, sicut & ipse ait: *Ego veni in nomine Patris mei: & alius veniet in nomine suo, & eum suscipietis.* In nomine Patris venit, qui non propriam gloriam, sed Patris quærit; nec tam nosci vult ut honoretur, quam cum cognosci facit ut glorificetur. Qui venturus est, inquit, quoniam tempore Prophetiæ hoc erat futurum, quod in nostro nouimus esse completum.

A DEO autem ad præsentem diem Psalmus iste pertinet, ut hæc ipsa verba Psalmi populus hodie acclamauerit in laudem Domini. Vnde & Mathæus meminit. Turbæ autem quæ præcedebant, & quæ sequebantur, clamabant dicentes: *Osanna filio David: Benedictus qui venit in nomine Domini.* Hinc & Hieronymus Damaso de Osanna scribit his verbis: Ipsa Hebræa verba ponenda sunt. In c x v i i. Psalmo, ubi nos legimus, *O Domine saluum me fac, &c.* In Hebræo legitur. *Anna Adonay Osanna, &c.* Et quia *Osianna*, quod nos corruptè propter ignorantiam dicimus *Osanna*, saluifica, siue saluum me fac, exprimatur, omnium interpretatione signatum est. Et post aliqua: Hebræi habent interiectionem, ut quando volunt Dominum deprecari, dicant, *Anna Domine*, quod Septuaginta interpretati sunt, *ô Domine.* *Osi* ergo saluifica interpretantur, *anna* interiectio deprecantis est. Si ex duobus velis compositum verbum facere, di-

ces Oſanna , ſiue vt nos loquimur oſanna, media vocali littera elifa. Item, vbi nos legimus in Latino: *O Domine ſaluum me fac, o Domine benè prosperare*, iuxta Hebraum legere poſſumus, Obſecro Domine ſaluum me fac, obſecro Domine prosperare. Mathæus, qui Hebræo ſermone ſcripſit, ita poſuit, *Oſanna bar-rama*, id eſt Oſanna in excelsis. Tale eſt ergo iuxta Hieronymū, *Oſanna in excelsis*, tanquam ſi diceret: Precamur Domine, vt veram nobis ſalutem conferas in cælis.

BENEDIXIMVS vobis. Poſt benedictionem ſaluationis Domini, qui factus eſt in caput anguli, ad benedictionem quoque membrorum tanquam duorum parietum ad eum coniunctorum conuertens verba dicit Pſalmiſta, vobis de domo Domini exiſtentibus, & in ea tanquam duobus erectis parietibus; vobis, inquam, benediximus, &c. hoc eſt, pro ſanctificatione veſtra, & Eccleſiæ multiplicatione futura, nos Propheta Domini ſæpe rogauimus, & tanquam de re iam completa certi eum laudauimus. In huius typo futuræ benedictionis ſuper vtrumque populum, Iacob Patriarcha filios Ioseph, Eſſraim, & Manasse, manibus cancellatis, hoc eſt in modum crucis obligatis, legitur benedixiſſe. Vbi quidem patèter innuitur vtriuſque populi ſaluationem futuram in Chriſti conſiſtere paſſione, & hanc benedictionem tam ipſi Iacob, quàm Iſaac & Abrahæ in eorum ſemine promiſſam eſſe. Ac ne fortè quiſquam quæreretur à Propheta tam longè ante aduentum Chriſti exiſtente, quis hoc ei ceteriſque reuelauerit de longinquo, tanta cæcitate in Iſrael facta de proximo, vt ſubintraret gentium plenitudo? quaſi reſpondens ait: Ipſe idem Dominus, qui nunc per ſemetipſum apparens iſtos illuminauit, nobis quoque ſuper hoc longè ante illuxit. *Conſtituite diem ſollemnem.* His præmiſſis, quaſi conſolutionem ſupponit, qui nos exhortatur ad ſollennitatem præſentis diei, tanquam ſic inferens dicat: Quandoquidem ita Dominus in duobus populis Eccleſiam multiplicauit in figura, quorum qui præcedebant & qui ſequebantur hodie Dominum ſuſcepſiſſe referuntur & benedixiſſe. Igitur & quicumque fideles in memoria tanti beneficii gratias acturi, *Conſtituite diem ſollemnem in condenſis.*, hoc eſt in magna multitudine populi, & quaſi denſitate quadam ſpiritualium arborum incomparabilibus illis ramis palmarum vel oliuarum, quas hodie populus accepit, ſignificatarum. Quid enim illi rami vel frondes de arboribus

bus anulæ prætendebāt, nisi vtriusque populi aggregationem de massa peccatorum assumptam? In quorum repræsentationem populus fidelium hodierna die arborum ramis vel frondibus, quas gestauit, totam Ecclesiam vsque ad altare, quasi fructuum replent densitate: vt iuxta litteram quoque videatur accipi quod dicitur, *In condensis vsque ad cornu altaris*. Mysticè autem cornu altaris dicitur sacrificium Christi. Per altare quippe sacrificium, per cornu altaris extremitas eius intelligitur. Sacrificium itaque Christi, quod veteri sacrificio legis successit, per cornu altaris figuratur, cum sit extremum hoc sacrificium, & suprema hostia complens ceteras. In cornu quoque altaris tãquam in angulo quodam duo altaris latera sibi iunguntur: vt quemadmodum Christum factum superius diximus in capite anguli, ad quem duo populi iunguntur; ita etiam dicamus ad sacrificium Christi duos ritus sacrificij cõuenire, sacrificij s. Melchisedech in pane & vino, & sacrificij legis in carnalibus hostijs. Vtraque quippe sacrificia in figura nostri præcesserunt, & in significatione illius conuenerunt. Constat etiam animalia cornuta, cum in transgressum pugne venerunt, vim maximam & robur pugnandi in rigore & fortitudine cornuum habere. Cùm igitur Christus pro nobis immolatus virtute huius sacrificij diabolum strauerit, quasi cornu suo eum vulnerauit, atque vulneratum deiecit.

BENE itaque per cornu altaris, sacrificium Christi tanquam vituli nostri figuratur, cùm hoc efficax & forte, vt dictum est, fuerit in pugna, corneum magis dicendum quàm carneum; rigidum, non molle; robustum, non debile. Vsque ad hoc cornu altaris celebratio nostræ porrigitur sollennitatis, cùm tantæ victimæ dignitate festiuitates decorantur Christianæ. Ad hoc cornu altaris specialiter hodierna sollēnitas peruenit, cùm in eius Missa primùm Christi Passio recitatur, qua pro nobis ipse est immolatus. Hac die Dominus Hierosolymam veniens passioni se obrulit, decima videlicet tunc die mensis, sicut ex Euangelio perpenditur Ioannis. Ibi quippe habemus quòd post resurrectionem Lazari, Iudæis in mortem Domini iam omnino conspiratis, ipse Dominus iam nō palam ambulabat apud eos, sed abiit in regionem iuxta desertum, in ciuitatem quæ dicitur Effrem, & ibi morabatur cum discipulus suis. Deindè cum iam Pascha proximum esset, venit Bethaniam ante sex dies Pas-

chæ, quasi ad victimam verus Agnus accedens, capiendus in Pascha vt immolaretur. Inde in crastinum veniens Hierosolymam susceptus est hodie à turbis, & tanquam Rex Israel, & David regis heres recognitus & salutatus. Quintò itaque die ante illud Pascha Iudæorum, hoc est hodie, qui decimus dies mensis huius, venit Rex in Hierusalem. Pascha enim celebratur in quartodecimo die. Decimo autem voluit ideò ingredi, quia ita præfiguratum erat in lege, vbi præcipitur. *Decima die mensis huius tollat vnusquisque agnum per familias & domos suas.* Et paulò post: *Et seruabitis eum vsque ad quartamdecimam diem mensis huius. Immolabitque eum vniversa multitudo filiorum Israel ad vesperam.* Decima autem die mensis primi agnus qui in Pascha immolaretur, domum introduci iussus est, quia Dominus decima die eiusdem mensis, hoc est ante quinque dies Paschæ in ciuitatem in qua pateretur erat ingressurus. Hanc igitur diem secundum mysterium legis competenter elegit, qua se vt dictum est offerret passioni, quam antea nonnunquam refugerat sese abscondendo, vel tentus à Iudæis liberè per medium eorum transeundo, vel frequenter ab eis declinando, quia nondum venerat eius hora. Qua profectò die quo magis honorificè suscipi voluit à turbis, & ingressus templum eiecit inde liberè omnes vendentes & ementes, & mensas nummulariorum, & cathedras vendentium columbas euertit, & his expulsis, accedentes ad eum cæcos & claudos in ipso templo sanauit, eo amplius inuidiam peruersorum contra se commouit, vt quod iamdudum voluerant perficere maturarent, & ab eo daretur facultas, in quibus præcesserat voluntas. Ipse quippe est, qui ait: *Nemo tollit à me animam meam, sed ego pono eam.* Nemo quippe vim ei facere potuit, vt tanquam inuitum & coactum occidere, vel etiam comprehendere posset. Vt autem maiori incitarentur inuidia, qui de morte Domini iam tractabant, & Deo magis indignarentur, quo amplius eum honorari viderent, tantum sibi honoris hodie permisit exhiberi, quantum nulli Regum legimus exhibitum. Vt enim de diuinis laudibus taceamus, & ramos vel frondes quos in via sternebant prætereamus, quàm mirabilis fuit illa singularitas honoris, qua plurima turba sub pedibus vilium iumentorum prosternebant vestimenta, nec pedibus illis, quibus ipsa Dominum baiulabat, contingi tolerabant. In quo nec modicum aduertendum est my-

sterium. Quibus enim cælestis præsidet diis * nequaquam terram suis contingunt pedibus, quia quorum desiderium conuersatur in cælis, eorum affectus non adherent terrenis; nec animos suos deiciunt in caducis, qui sursum Christum querentes solis inhiant æternis. Quos ut imitari possimus, rogamus te, Domine Iesu ut nos quoque tua facias iumenta, quibus in fidem & regendo digneris præesse, Saluator mundi, cui dicitur in alio Psalmo, *Homines & iumenta saluabis Domine, quemadmodum multiplicasti misericordiam tuam Deus. Amen.*

IN EADEM DIE,

SERMO VIII.

ERAT autem spelunca & lapis superpositus, & ait Iesus: Tollite lapidem &c. Miserationes Domini vniuersis operibus eius Psalmista præferens ait; *Et miserationes eius super omnia opera eius.* Miserationum itaque Domini recordantes, tantò hinc eum ampliùs glorificare debemus, quanto hæc eius opera ceteris præesse, & magis necessaria nobis cognoscimus esse. Vnde & à turbis hodiè meruit honorari, maximè quod mœrentium sororum Lazari miseratus, suscitatum eis reddidit fratrem iam in monumento quatuor dies habentem. Ut enim Ioannes scribit, propter hoc hodie turba ei obuia venit, quoniam hoc audierant factum. Ad quod tanquam hodiernæ festiuitatis originem oculos mentis reducentes, tantò diligentius eius mysterium intueri debemus, quanto hæc magna Domini misericordia maiorem tribuit peccatoribus consolationem. Tres quippe mortuos à Domino legimus suscitatos, quibus vniuersa peccatorum genera Doctores nostri dixerunt figurari. Suscitauit enim filiam Archisynagogi adhuc in domo iacentem antequam foras efferretur. Suscitauit filium viduæ extra portam ciuitatis Naim iam deportatum. Suscitauit & hunc, de quo nunc nobis sermo est, videlicet Lazarum, cum iam in monumento quatuor dies habe-

ret. Vnde & quattriduanus mortuus dicitur. Tres igitur isti mortui tria peccantium genera signant, qui per præsentiam diuinam inspirante gratia reuiuiscere dicuntur: & feliciùs isti à morte animæ, quam illæ à morte corporis per Dominum suscitantur.

PVELLA quidem mortua, quæ adhuc in domo tenebatur clausa quando est suscitata, illos significat peccatores, quorum peccata mente tantum concepta, nondum per operationem exteriùs sunt progressa. Iuuenis autem extra portam delatus eos significat, quorum peccata iam in effectum proruperunt, vt videri iam ab omnibus possint. Lazarus verò non solum sepultus, verum etiam quattriduanus, eos significat, qui longa consuetudine peccandi magna peccatorum mole premuntur, & diuinæ consuetudinis exemplo alios etiam corrumpunt: vnde & fœtere dicuntur. Tres itaque mortes animæ, tres isti mortui, vt diximus, designant: peccatum scilicet cogitationis, hoc est contemptum Dei adhuc in mente latentem, nondum progressum in operationem; & peccatum operationis, hoc est, iam per operationem apparens, atque peccatum consuetudinis, & iam dudum in operatione habitum. Hæc tria genera peccatorum tanquam tres animæ mortes in capite primi Psalmi à beato viro dicuntur remoueri, cum talis ipse describitur, qui non abierit in consilio impiorum, non steterit in via peccatorum, non federit in cathedra derisorum. At quoniam resurrectio Lazari ad præsentem, vt diximus, sollemnitatem maximè pertinere dignoscitur, mysterium eius sermo noster vt cœpimus prosequatur. Quod vt faciat diligentius, paulò historia altius replicetur.

REFERT itaque Ioannes, quod cum facta essent encarnia in Hierosolymis, & ibi esset Dominus Iesus, & quærerent eum Iudæi apprehendere, exijt de manibus eorum, & abiit iterum trans Iordanem, vbi fuerat Ioannes baptizans, & mansit illic. Et tunc Lazaro iam languente, miserunt ad eum sorores eius Maria & Martha, dicentes: *Domine, quem amas infirmatur.* Quo audito mansit Dominus in eodem loco duobus diebus. Deinde cum dixisset discipulis, Lazarum interim mortuum esse, venit Bethaniam cum ipsis, & inuenit Lazarum quatuor dies iam in monumento habentem. Et suscitaturus mortuum peruenit ad sepulchrum. Erat autem, vt diximus, spelunca & lapis superpositus ei. Et ait Iesus:

Tollite lapidem. Vt ergo tulerunt lapidem, voce magna clama-
uit Iesus, *Lazare veni foras.* Et statim prodijt qui fuerat mor-
tuus, ligatus pedes & manus institis, & facies illius sudario
erat ligata. Dicit eis Iesus, *Soluite eum, & sinite abire.* Multi
ergo ex Iudæis, qui venerant ad Mariam, & viderant quæ
fecit, crediderunt in eum. Quidā autem ex ipsis abierunt ad
Pharisæos, & dixerunt eis quæ fecit Iesus. Collegerunt ergo
Pontifices & Pharisei concilium, & dicebant: *Quid facimus?*
quia hic homo multa signa facit. Si dimittimus eum sic, omnes cre-
dent in eum, &c. Ex quo profecto liquet, ex hoc denique mi-
raculo aduersus Dominum Iudæos maximè cōmotos fuisse,
& in eius nece ex tunc præcipuè conspirasse: tanquam eum
occidendo possent delere, per quem mortuos nouerant sus-
citatos esse, quasi mortuus non posset resurgere post tri-
duum, qui quatruiduanum suscitauerat Lazarum. Cuius qui-
dem resuscitatio tanto diligentius descripta est ab Euangeli-
sta, quāto plenius nostræ salutis continet mysteria, quos quo-
tidie diuina misericordia felicius, vt diximus, resuscitat à
morte animæ, quàm tunc & semel Lazarum à corporis mor-
te. Lazarus quippe, vt diximus, iam sepultus, & quatrdua-
nus mortuus, illum significat peccatorem, qui longa con-
suetudine peccati interim dejectus est in profundum, vt in
illo profundo tãquam in sepulchro putrescat quatruiduanus,
nec se tantum perimens, verumetiam alios exemplo quasi
fœtore quodam suæ putredinis corrumpens. Vnde & benè
fœtere describitur quasi quatruiduanus. Quatuor enim dies
quos in monumento habuit, vniuersitatem peccatorum ex-
primunt, quibus quisque pessimus est inuolutus, tanquam in
illo profundo vitiorum sepultus, de quo scriptum est: *Pecca-*
tor cū in profundum vitiorum venerit, contemnet: quia cū in
longa perstiterit consuetudine peccandi, quæ iam ei facta est
quasi altera natura, graui iugo ipsum deprimat, salutiferas fi-
delium exhortationes vel diuina monita respuens cōtemnit.
Vnde ipsi necessarium est, vt pro illius obstinatione deuotio
fidelium intercedat, vt interuentu eorum diuinæ gratiæ re-
spectum assequatur, quo illi pœnitentiæ gemitus inspiretur,
& conuersus saluetur. Vnde benè pro fratre Lazaro sanando
sorores eius interuenerunt, eius infirmitatem Domino nun-
ciando. Quem ad subueniendum inuitantes, satis hoc esse

cessuerunt, vt Domino nunciarent amici sui mortem, & propriam de infirmitate fratris desolationem. Sic enim mandantes dixerunt. *Domine, ecce quem amas infirmatur.* nec addiderunt, veni & cura eum: nec tam orando quàm nunciando quod volebant postulauerunt. Satis enim crediderunt Domino nunciare anxietatem amici sui, atque suam; tanquàm illud prouerbiũ attendētes. Amicus & medicus in necessitate probantur. Vnde satis æstimauerunt amicitiam fieri cùm dicunt: *Ecce quem amas.* Magna fiducia earum in hac sua petitione plurimum nos confirmat, vt nihil hæsitantes à Domino necessaria constanter postulemus. Interueniunt pro infirmo nondum mortuo, quia viuus adhuc, non defunctis supplicatio fidelium proficit vt salubrem pœnitentiam habeant.

IN Maria & Martha vniuersi fideles comprehenduntur, tam contemplatiuæ scilicet vitæ quàm actiuæ. Quarum orationes dum sibi coniunguntur, facilè pro alijs quoque impetrant quæ illi non merentur. Et notandum quod adueniente Domino Bethaniam Martha occurrit illi. Maria autem domi sedebat. Ex quo diligenter actiuorum & contemplatiuorum vita describitur. Actiui quippe sunt, qui circa proximi causam maximè occupati temporalia bona procurant, vt habeant vnde tribuant necessitatem patienti; & in exterioribus actionibus laborantes, illa implent opera misericordix, de quibus illis Dominus dicturus est. *Esurini, & dedisti mihi manducare, &c.* Contemplatiua verò est vita, quæ amore Dei vehementer succensa, tantò sincerius ei vacat, & in eius contemplationē, & status supernæ vitæ oculos meritis perfectius erigit, & eò magis in hac speculatione suspensa delectatur, quanto à curis seculi amplius remota quiescit. Martha itaque tanquam in exteriori administratione occupata, Domino venienti statim occurrit, Maria verò domi sedens quiescit, nequaquam istis visibilibus intenta bonis, sed supernis inhians gaudijs, quæ nec oculus vidit, nec auris audiuit. Quam etiam Euangelista in tantum quietem suam amare describit, vt nequaquã de domo egressa, nisi à Domino prius vocata; cùm ei videlicet Martha diceret: *Magister adest, & vocat te.* Nonnumquam viri contemplatiui de secreto intimæ quietis Deo inspirante coguntur exire, & populo illo po;

stulante curis implicantur Ecclesiasticis, sicut in beato factū est Martino. Quanto autem contemplatiuorum maior religio feruentiori studio adhæret Deo, tantò Mariæ deuotionem Euangelista magis commendans ait: *Maria autem cum venisset ubi erat Iesus, videns eum cecidit ad pedes eius. Et dixit ei: Domine, si fuisses hic, non esset mortuus frater meus. Iesus ergo ut vidit eam plorantem, & Iudeos qui venerant cum ea plorantes, &c.* Nequaquam enim Martha, quæ Domino prior occurrerat, vel ad pedes eius adorando prostrata, vel super fratre dicitur lacrimata. Prior ad Dominum Martha venit, quoniam actiua vita licet in meritis sit posterior, naturaliter tamen in ordine temporis est prior. Ut enim beatus meminit Gregorius à minimis quisque inchoat, ut ad maiora perueniat. Et imperfectior actiuorum vita quædam est fidelium inchoatio, in qua se prius exerceant, quàm ad perfectionem contemplationis conscendant.

QVOD verò Dominus Lazarum suscitaturus infremuisse spiritu, & seipsum turbasse dicitur, hoc in seipso exhibuit quod misericorditer in nobis agit. Quo enim quisque pœnitens maiora commiserit, magis horrore gehennæ infremere ac turbari cogitur de peccatorum suorum magnitudine. Hic verò qui quatrduanus mortuus dictus est, per hos quatuor dies, quos iam in morte habuerat, omni peccatorum genere contaminatus fuisse innuitur. In eo quippe tam cogitationis quàm operationis peccatum præcedens in consuetudinem venerat, & tandem alios per exemplum corrumpendo, in morte pariter tam aliorum quàm propria consummatū erat, primò ut dictum est, in cogitatione, secundo habitum in opere, tertio dictum in consuetudine, quarto in aliorum corruptione. Quòd verò Dominus interrogat, *Vbi posuistis eum?* tanquam ignorans sepulcri locum; hoc nobis insinuat, tales maxime à Deo ignorari, quorum opera magis improbat, iuxta illud quod reprobis ait: *Amen dico vobis, nescio vos.* Primò lapidem præcipit tolli qui mortuum premit, ut sicut mortuus resurgere possit; quia talibus, ne de magnitudine peccatorū desperent, indulgentia Euangelij magis est prædicanda, quia dictum est adulteræ: *Vade, & amplius noli peccare*, quàm legis in lapide scriptæ duritia in contaminationem inducenda. Hic itaque longa consuetudine peccandi detentus, & prauæ con-

suetudinis iugo grauitè depressus, atque intantum libero arbitrio in ipso iam debilitato, ut non solum ad eum surgere non posset, ut eum requireret, sed nec pro se orare satageret; venit ad eum misericors Dominus, cum ei genitum poenitentiae inspirat, & viribus omnino destitutum erigat ægrotum. Ad quem voce magna clamans, *Lazare veni foras*, ipso clamore insinuat, quàm longe remotus hic ab eo absistat. *Veni foras*, inquit, hoc est, per temetipsum culpam, quæ est in mente, propala confessione, & spiritali medico vulnus ostende, à quo suscipias cataplasmæ medicinæ. Vocat Dominus Lazarum, cum peccatori salubris poenitentiae inspirat gemitum. In quo quidem gemitu mortuus reuiuiscit, quia mors animæ, quod est peccatum, per eum abscedit. Quippe qua hora peccator ingemuerit peccatum suum, saluus erit. Et quia post poenitentiam confessio restat peccati, vocatus Lazarus foras exit, dum se poenitens per confessionem peccatorum prodit, & de profundo vitiorum tanquam de sepulcro surgit.

SED quia hic talis excommunicari meruerat, & ab Ecclesia expulsis vinculis anathematis adhuc relegatus erat pro tam manifestis criminibus suis, procedere dicitur ligatus pedes & manus, & sudario faciem inuolutus. Quislibet excommunicatus à Prælati, qui iam per poenitentiam & confessionem Deo sit reconciliatus, tamen ab ipsis Ecclesiæ ministris anathematis vinculis est absolueudus; ut satisfactione peracta consortium ei reddatur fidelium ab ipsis per quos fuerat exclusus. Pedes & manus ligatos habet, cui adhuc introitus Ecclesiæ non est concessus, ut satisfactionis opera sint iniuncta, quæ pro qualitate vel quantitate peccatorum à Prælati sunt imponenda: ut sicut non est liber ad incedendum quod voluerit, ita nec ad operandum quod ipse decreuerit. Qui enim diu malè viuendo abusus est potestate sua, iam non proprio, sed alieno quod deliquit corrigere debet arbitrio, nec iam sui iuris est in talibus agendis, sed alieni. Faciem quoque inuolutam habet, quia ante satisfactionis impletionem deuotio poenitentis, & verus poenitentiae gemitus non potest cognosci. Per faciem quippe, qua quisque cognoscitur, notitia designatur. Faciem itaque poenitentis inuolutam aperiant, qui eius instituta satisfactione, ipsius, ut dictum est, deuotionem cognosci faciunt, & reddendo ei Ecclesiam tanquam

• quam fidelem eum recognoscunt, qui eum habebant prius tanquam incognitum, & sicut Ethnicum vel publicanum. Soluunt itaque discipuli resuscitatum à Domino, & liberum ire sinunt, qui prius extra Ecclesiam fuerat relegatus, dum introitum Ecclesiæ, & consortium fidelium ei reddunt, & in arbitrio eius proponunt quocumque vitæ tramite velit ad Deum tendere, & quibus operibus id possit eligere. Et hoc est quod eis Dominus ait: *Soluite eum, & sinite abire.* Ecce Dominus mortuum corporaliter suscitando, discipuli suscitatum soluendo multum meliorem tam suscitationem, quam solutionem iustitiæ nobis proponunt, prout exponendo persecuti sumus.

ILLUD semel miraculum Dominus egit in corpore, quod multo felicius in animabus pœnitentium agit quotidie. Reddidit Lazaro vitam, sed rursus morituro temporalem. Tribuit pœnitentibus vitam, sed sine fine mansuram. Illud mirabile in oculis hominum, sed istud maximum iudicio fidelium. Quo verò maius, eo appetendum ampliùs. Scriptum est hoc de Lazaro, non ipso Lazaro, sed pro ipso; sed nobis, & pro nobis. *Quæcumque*, inquit Apostolus scripta sunt, *ad nostram doctrinam scripta sunt.* Semel vocauit Dominus Lazarum, & suscitatus est à morte corporali. Sæpiùs nos vocat, ut melius resurgamus à morte animæ. Semel ei dixit, *Veni foras*, & statim prodijt ad vnum Domini præceptum. Quotidie nos Dominus per scripturam inuitat ad confessionem, hortatur ad emendationem, promittit vitam quam dare paratus est nobis, qui mortem non vult peccatoris. Negligimus vocantem, spernimus inuitantem, cōtemnimus promittentem, Inter Deum & diabolum tanquam inter patrem & hostem constituti, paternis monitibus ad vitam hostiles præponimus ad mortem. *Non ignoramus*, inquit Apostolus, *astutias Sathanae*: astutias, inquam, illas eius maximas, quibus nos ad peccatum inducit, & ab emendatione retrahit. Peccatum suggerens, duobus nos exuit, quibus illi maximè potest resisti, timore scilicet, ac pudore. Quod enim vitamus, aut timore cuiusque damni, aut reuerentia pudoris dimittimus. Honesti quippe viri plusquàm rerum cauent detrimentum, sicut econuerso inhonesti faciunt. Cùm ergo Sathanas quemlibet ad peccatum impellit, facilè hoc efficit, si primo illum ti-

more, vt diximus, & pudore priuauerit. Cùm autem id effecerit, eadem ei reddit quæ prius abstulit, vt sic eum à confessione retrahat, & in peccato suo mori faciat. Tunc ei latenter susurrat in animo: Leues sunt Sacerdotes, &, difficillimum est compescere linguam. Si hoc vel illud talibus confitearis, secretum esse non poterit: & cùm in notitiam venerit, imminebit periculum, vel incurres famæ detrimentum, vel damnum te sustinere, vel confundi necesse est ex vilitate. Sic misero diabolus illudens, cùm ea primum ei abstulerit, quæ per peccatum vitare debuit, eadem postmodum ei reddidit, per quæ ipsum in peccato detinere possit. Timet captius temporale, non animæ damnum. Erubescit homines, contemnit Deum. Pudet hoc in notitiam hominum venire, quod non puduit eum in conspectu Dei, & totius Curie supernæ committere. Formidat humanum iudicium, qui non veretur diuinum. De quo Apostolus ait: *Horrendum est incidere in manus Dei viuentis.* Et per semeipsam Veritas: *Nolite, inquit, eos timere qui occidunt corpus, animæ verò non habent quid faciant: sed potius timete eum qui potest corpus & animam mittere in gehennam.*

SUNT animæ morbi, sicut & corporis. Et ided diuina pietas medicos vtrisque sanandis præuidit. Ipse quippe Dominus Iesus se spiritalem Medicum appellans, ait: *Non est opus valentibus Medico, sed malè habentibus.* Huius locum Sacerdotes in Ecclesia tenent, quibus tanquam animarum medicis peccata confiteri debemus, vt ab eis satisfactionis cataplasma sumamus. Qui mortem corporis timet, qualicumque corporis parte patiatur, quantumque secreta, quantumlibet obscœna, medico reuelare, & ad curandum exponere, non differt. Quælibet dura, quælibet aspera sustinet, vt mortē differat, non euadat. Quicquid preciosum habet, dare non dubitat, vt ad modicum mortem hanc corporalem depellat. Quid ergo pro morte animæ faciendum est, quantumcumque sit grauissima, sine magno labore, sine magnis sumptibus imperpetuum medicari potest. Nos ipsos Dominus, non nostra quærit, nec nostris indiget qui omnia præbet. Ipse quippe est, cui dicitur: *Bonorum meorum non eges.* Apud eum quisque tanto maior est, quanto apud se per humilitatē minor. Tantò magis iustus, quantò proprio iudicio magis reus. Tantò am-

plius ibi nostra tegimus, quantò hîc ea prôptius per confessionem propalamus. Ab hac itaque, fratres, nos retinentes, attendamus quod scriptum est: *Est confusio adducēs gloriam, & est confusio adducens peccatum.* Et rursum: *Veniensque Babylonem; ibi liberaberis.* Confusio quippe duplex est erubescentiæ. Altera quidem salubris, cum erubescimus nos turpia cômisisse in conspectu Dei. Altera lethalis, cum magis homines quàm Deum verentes ad confessionem venire nos pudet: vel quotiens aliqua humilia propter Deum agere recusamus, ne viliores apud stultos habeamur. Hæc profectò confusio est adducens peccatum, quia ne vilescamus hominibus, vilescere Deo sustinemus. Illa verò confusio veram nobis acquirit gloriam, qua vilescere hominibus nō refugimus, vt gloriosi Deo efficiamur, & magni diuino veriùs quàm humano iudicio simus. Ad hanc vtrique Babylonem, id est confusionem laudabilem cum peruenerimus, vt de peccato scilicet erubescamus, ab ipso statim liberabimur, parati iam ad confessionem, & condignam satisfactionem. Vnde & Psalmista: *Delictum meum cognitum tibi feci, & iniustitiam meam non abscondi. Dixi, confitebor aduersum me iniustitiam meam, &c.* Delictum suum cognitum Deo facit, qui Vicario eius locum ipsius in Ecclesia tenenti confiteri peccatum nequaquam erubescit. Sicut enim ipse in membris suis persecutionem sustinere vel beneficium suscipere se testatur, dicens: *Saule, Saule quid me persequeris?* Et, *Quod uni ex minimis meis fecisti, mihi fecisti:* ita & in vicarijs suis Sacerdotibus cognitū sibi fieri peccatum dicit. Quod statim Psalmographus exponens adnectit, *Et iniustitiam meam non abscondi*, hoc est, non solum opera, verumetiam meritis nequitiam in confessione accusans.

DIXI, *confitebor aduersum me iniustitiam meam Domino.* hoc est, Stabiliui apud me, ac deliberaui iniustitiam meam confiteri Sacerdoti. Confitebor, inquit, aduersum me, nulum alium in me inde accusans. Sunt enim nonnulli, qui in sua confessione, vt suam minuunt culpam, alios magis trahunt in culpam, dicentes, ad ea quæ commiserunt ab alijs se indutos & quasi compulsos, siue diabolo, seu hominibus. Qualis quidem illa confessio fuit, cum ille in vxorem, illa in serpente culpam retorquens, se magis excusare quàm accusare videbatur. Vnde & statim debita pœnæ sententiam excipere

meruerunt. Iustus verò , qui sicut scriptum est , in primordio accusator est sui , quo se amplius accusat , eo se magis apud supremum ac misericordissimum Iudicem excusat ; & veniam impetrat se accusando , qui pœnam incurreret se excusando. Vt enim Tullius in Rhetorica docet , Confessio peccati , quæ à Iudicibus pœnam institutam suscepit , apud superiorem Senatus potestatem indulgentiam potest assequi. Iudices quippe à superiori potestate instituti , & legibus iurati , pœnæ sententiam non habent relaxare , sed inferre. Superior autem potestas , cuius est tam legem promulgare quàm Iudices instituere , in arbitrio suo habet rigorem legis temperare , & pœnas institutas misericorditer relaxare. Non enim super se habet potestatem quam metuat , vt non liberè misericordiam cui decreuerit impendat. Quantò magis summa illa cœlestis potestas , quæ de misericordia illa cœlesti nos consulens ait : *Euntes discite quid est , misericordiam volo , & non sacrificium : & iustitiam Dei plus quàm holocausta*. Iustitiam Dei quasi propriam eius dicit , quam ipse sibi , quod maximè suum est , & eum specialiter decet , reddit : tùm ipse videlicet misericordiam impendit , quia maximè glorificandus est à nobis. Vnde & idem Propheta : *Et miserationes* , inquit , *super omnia opera eius*. Cùm autem præmisisset , *Dixi , confitebor aduersum me , &c.* statim quasi Deo sibi apparente & appropinquante , sermonem ad eum conuertit , & gratias agens dixit : *Et tu remisisti impietatem peccati mei*. Quisquis enim iam paratus est ad confessionem , & suscipiendam indè peccati satisfactionem , ex hoc statim suo proposito ita reconciliatus est Deo , vt si aliquo casu præuentus hoc implere præpediatur , nequaquam de eius salute sit desperandum , cùm in eo non remanet quod totis appetit desiderijs.

PRO hac scilicet impietate remittenda sanctus etiam quilibet orat , tantò minus de se præsumens , quantò magis est humilis , & de se ampliùs sollicitus attendens semper quod scriptum est : *Beatus homo qui semper est pauidus*. Orat , inquit , in tempore opportuno , & orationi congruo : hoc est in præsentī vita tentationibus & ignorantijs plena. Vnde & illa est exhortatio Apostolica : *Qui stat , videat ne cadat*. Qui etiam cùm maximis præmineret virtutib⁹ , nec quid in se accusaret , conscientia eius reperiret : nequaquam tamen in hoc se iu-

stum esse censuit, qui in iudicio sui errare potuit. *Sed neque meipsum, inquit, iudico*, hoc est, in nullo propria me arguit cōscientia. *Sed non in hoc iustificatus sum*. Hoc est, iustus esse idēdō dicendus non sum. Vt enim Salomon ait, *Stultorum infinitus est numerus, & est via quæ videtur homini iusta: nouissima, autem eius deducunt ad mortem*. Et rursum, *Quis poterit dicere, Mundum est cor meum, purus sum à peccato? In multis enim offendimus omnes*. Denique quicumque in infidelitate permanent, hoc eis accidit per errorem. *Qui autem, ait iudicat me, Dominus est*. Ac si diceret, Ille in iudicio mei non errat, & qualis sim verraciter pensat, cuius oculis omnia nuda sunt & aperta. Quòd si viri sancti tantò minus de se præsumunt, quantò humiliores fiunt, nec pro seipsis quamuis iusti sint orare desistunt: quid nobis miseris faciendum est, quibus tantò ampliùs frequentanda est oratio, quantò nos magis recognoscimus reos? Tantò sollicitiùs ira Dei est placanda, quanto contra nos eius indignatio magis est accensa? Quibus, ne quis fortè desperet de venia, resuscitatio prædicta Lazari in exemplo mystico est proposita. Vocatus à Domino statim est viuificatus. Viuificato dictum est vt prodiret, nullaque est mora retardatus. Progressus foras, & adhuc ligatus, confestim à discipulis est absolutus.

O REMVS itaque, fratres, Dominum, vt quod tunc in corpore mortuo est actum, ipse compleat feliciùs in nostris mortuis animabus. Ipse per internam inspirationem verum pœnitentiæ genitum immittat, quo pœnitens viuificatus à morte animæ resurgat. Ipse nos omni deposito pudore ad confessionem promptos efficiat, qui hoc vnum erubescere debemus, nequid turpe in oculis eius committamus. Ipse per Ecclesiæ ministros ita nos absolvere dignetur, vt nullis deinceps peccatorum vinculis constringi mereamur. Ipse nos de peccatis ita hic satisfacere concedat, vt quid in futuro puniendum sit, Iudex ipse districtus non inueniat, spes nostra, salus nostra. Cuius honor & imperium tam finem ignorat, quàm principiū, Amen.

IN EADEM DIE,

SERMO IX.



FERCULUM fecit sibi Rex Salomon de lignis Libani. Columnas eius fecit argenteas, reclinatorium aureum, ascensum purpureum. Media caritate constravit propter filias Hierusalem. Ferculum hoc loco à ferendo, id est portando, vehiculum dicitur, quasi lectica potentum vel infirmorum, quâ molliter deferantur. Ligna Libani, duo ligna sunt crucis. Libanus quippe candidatio interpretatur. Ligna itaque crucis, ligna sunt candidationis & emundationis nostræ: quia in illis verus immolatus est Agnus, cuius sanguine à peccatis mūdati sumus. Vnde & Apocalypsis ita meminit: *Hi sunt, qui lauerunt stolas suas & dealbauerunt eas in sanguine Agni.* Hæc ligna Libani, ex quibus Dominica Crux fuit composita cedrina; & ob hoc imputribilia esse dicuntur. Vnde Hieronymus in Cantico Canticorum: Ferculum Crucis secundum Historiam de lignis Libani cedrinis factum est. Quid autem per hæc imputribilia ligna, nisi Dominicæ passionis perpes memoria in cordibus fidelium est expressa? Quam præcipuè nobis Dominus commendans ait: *Hoc facite in meam commemorationem.* Et Apostolus: *Quotiescumque, inquit, manducabitis panem hunc, & calicem bibetis, mortem Domini annunciabitis donec veniat.* Hæc Domini passio dum per prædicatores annunciat, quasi quodam ferculo atque vehiculo Crucis verus Salomon per mundum defertur.

CRUX itaque duobus lignis composita, vehiculum est Salomonis. Qui dum crucifixus prædicatur, in ipsa cruce tanquam vehiculo, ut dictum est, quodam vbique circumfertur. Hoc vehiculum ipse sibi Salomon fecit, qui bonis operibus Iudæos in inuidiam accēdēs, ipsos ad hoc commouit ut eum crucifigerent. Quod nequaquam factum est per illorum coactionem, sed tantummodo per eius præmissionem, atque optimam ipsius dispensationem. Ipse quippe est qui ait: *Nemo tollit à me animam meam, sed ego pono eam.* Et rursus: *Potestatem habeo ponendi animam meam, &c.* Ferculi columnas ipse idem fecit ar-

genteas, quæ sunt Apostolicæ prædicationis eloquia, & de ore ipsius accepta documenta. De quibus eloquiis Psalmista prædixerat: *Eloquia Domini eloquia casta, argentum igne examinatum.* Casta eorum prædicationis dicitur, quia sicut vnus eorum dicit, non erant adulterantes verbum Dei, quia prædicationem suam gratis impendebant: non spe alicuius terreni lucri vendere intendebant, nec se in pretio more adulterarum siue meretricum ponebant. Argentea dicuntur Apostolicæ prædicationis verba, quia claritatem habent intelligentiæ, non obscuritatem velaminis, sicut lex & Prophetiæ, quæ mysticis magis quàm apertis vtuntur verbis. Hæc tanquam columnæ ferculum sustentant, & Dominicam crucem corroborant, dum passionis Dominicæ Crucis virtutem annuntiant. Et quod dicunt edixerunt. Vnde benè per excellentiam eloquia dicuntur, quasi extra ceteras sacræ doctrinæ locutiones, quibus sunt ex utilitate longè commodiores. Omnis quippe locutio ad intelligentiam est accommodata, & propter eam in auditore faciendam etiam reperta, & ad hoc vnum instituta. Quælibet itaque verba quò intelligibilia sunt, & ita quod debent magis efficiunt: ceteris vtique præponenda sunt.

Sic vt autem Apostolicæ prædicationis verba columnas feruli diximus, sic & ipsos ex virtute verborum suorum, vel gratia miraculorum eis collata, qua corroborant sua dicta, columnas nouimus appellatas. Vnde & vnus eorum, nomen cuius suprà meminimus, Galatis scribit: *Iacobus, & Cephas Ioannes, qui videbantur columnæ esse.* Reclinatorium dicitur, non lectus in quo iacendo moriamur, sed locus quidam in quem se reclinando qui sedent paululum quiescendo se refouent, & fatigatos se ad horam recreant. Reclinatorium igitur in ferculo à Salomone præparatum, somnus est Dominicæ mortis in Cruce, de quo scriptum est: *Et inclinato capite tradidit spiritum.* Hic somnus sicut velociter aduenit, ita & velociter transijt. Scimus quippe Dominum hora sexta crucifixum, circa nonam expirasse, & Pilatum miratum fuisse quod tam celeriter obierit, antequàm latrones fractis cruribus mori cogerentur. Velox quoque ad transeundum iste somnus fuit, quia citò Dominus resurrexit. Quasi ergo in reclinatorio Dominus obdormiuit, quia mortis somnum velocem & transitorium habuit. Somno, qui maxime fessos recreat, mors fidelium comparatur, qui quantò

amplius hic pro Deo laborauerunt, ad maiorem requiem moriendo transire meruerunt. De hac igitur dormitione & maturae eius resurrectione Psalmista in eius persona praedixerat. *Ego dormiui, & separatus sum, & exsurrexi.* Dormit fidelis & separatur, quia moriendo ad illum requiem transit, qua maximè oblectatur, & eo iam Dei visione fruente, summum desiderium ipsius impletur. Vnde & Hieronymus de praedicta Christi dormitione ait: dormire Dei est, cum vnigenitus Patris in assumpta carne mori pro nobis dignatus est. Cur? mors rectè dulcis somnus praedictus est, ipso dicente per Hieremiam: *Idèò quasi ex somno excitatus sum, & vidi, & somnus meus dulcis est mihi.* Aureum dicitur reclinatorium Salomonis, quia cum sit preciosa mors Sanctorum in conspectu Domini, preciosissima dicenda est Christi, quem non solummodo sanctum, verumetiam constat esse Sanctum Sanctorum. Quanti quippe pretij mors illa est dicenda, quæ in nostræ Redemptionis pretium data vitam omnibus emit, & Paradisi ianuam aperuit? Vnde bene hoc singulare precium excellentiori metallo est comparatum, ubi reclinatorium est descriptum aureum.

Ad quod denique reclinatorium ipsius, Salomon purpureum aptasse memoratur ascensum: & horum media, tam reclinatorium scilicet quàm ascensus purpurei, interposita caritate constrauisse, & tanquam hæc sibi coniunxerit illius interpositione. Ascensus iste purpureus ad illud reclinatorium iam in Christo completum, nobis etiam ab ipso est factus; cum per eius exemplum & exhortationem malis resistimus vsque ad sanguinis effusionem, & sic tanquam purpureum ascensum ad supernæ quietis, quod iam ille præcessit, peruenimus reclinatoriū. Sed quia humanæ infirmitatis non est, mortem excipere, sed naturaliter fugere, caritate media hic ascensus & illud reclinatorium sibi coniunguntur, quia nullus hominum in tanto agone persisteret vt illuc perueniret, nisi caritas, quæ omnia suffert, omnia sustinet, interueniret. Denique cum adiungit propter filias Hierusalem hunc ascensum ad reclinatorium fieri, vel media eorum caritate consterni: patenter innuit per hanc caritatis interpositionem, hoc tam arduo ascensu illuc conscendere nostram infirmitatem. Quod enim filias dicit potius quàm filios, ex infirmiori sexu humanam exprimit imbecillitatem. Sicut filix Babylonis animæ intelliguntur reprobæ, sic filix Hierusalem.

lem electæ. Dux quippe sunt istæ ciuitates Dei & diaboli, quarû hæc in malo, sicut illa generat in bono. Potest etiam quod dicitur, *media caritate*, accipi intransitiuè: ad eundem casum, s. ablatiuum, sibi sociantur substantiuum & adiectiuum. Et tunc quidem ita est legendum, quòd illum ascensum purpureum media caritate constrauit, dum eius videlicet gradibus eam interpositam inseruit. Tres quippe sunt gradus, quibus ad supernæ quietis reclinatorium conscenditur; fides videlicet, caritas, & spes. Primus itaque gradus fides est, secundus caritas, tertius spes habetur. Non enim rectè speranda est illa felicitas, nec de ea confidendum, nisi cùm eam ex caritate meruerimus: nec caritas haberi potest, nisi fide præeunte, tanquam omnium bonorum fundamento. Caritas ergo his duobus extremis gradibus quasi media inseritur, quia de fide ad caritatem, de caritate ad spem, vt diximus, est procedendum. Quod quidem est, ascensum illum purpureum media caritate consterni.

Hic igitur præmissis de illo s. ferculo Salomonis, & reclinatorio aureo, & ascensu purpureo, filiabus Hierusalem per Christum præparato, ipsæ filiæ consequenter inuitantur egredi ad videndum ipsum Salomonem in diademate suo. Sic quippe subinfertur. *Egredimini filie Sion, &c.* Vt enim in agone passionum viriliter pro Christo persistamus, ipse semper præ oculis est habendus, & eius passio nobis semper esse debet in exemplo ne deficiamus. In cuius videlicet passionis recordatione, ipse corporis & sanguinis sui sacramenta frequentari præcepit in Ecclesia, vnde & Apostolus: *Dominus, inquit, Iesus qua nocte tradebatur accepit panem, & gratias agens fregit, & dixit: Hoc est corpus meum quod pro vobis tradetur. Hoc facite in meam commemorationem. Similiter & calicem. Quotiescumque manducabitis panem hunc, & calicem bibetis, mortem Domini annuntiabitis donec veniat.* Sed quid prodest nobis hoc in nostram reducere vel aliorum memoriã, nisi sic ei compatiatur, sicut idem dicit Apostolus, vt & cõgloffificari resurgẽdo mereamur? Alioquin illud terribile iudicium incurremus, quod ipse consequenter adnexuit, dicẽs: *Itaque qui manducauerit vel biberit calicẽ Domini indignè, reus erit corporis & sanguinis Domini. Qui enim maducat & bibit indignè, iudicium sibi manducat & bibit, non dyjudicans corpus Domini.* Per ascensum, vt dictum est, purpureum condescendendum nobis est ad reclinatorium aureum; quia nisi cõmunicemus passioni Christi, parti-

cipes nō crim^o sue resurrectionis. Quod ut eo trahēte possimus,
ipse manum porrigat, qui ut conscendamus inuitat, Amen.

IN EADEM DIE, SERMO X.

E GREDIMINI filia Sion, & videte Regem Salomonem
in diademate suo quo coronauit eum mater sua in die des-
ponsationis illius, & in die letitiæ cordis eius. Quò egredi
admoneantur filia Sion, ipse textus Cantici Canti-
corum ex illis quæ præmissa sunt patenter insinuat. Cum e-
nim dixisset, *Ferculum fecit sibi Rex Salomon de lignis Libani,*
atque ipsum miraculum quàm mirabile fuerit diligenter des-
cripisset, statim filias Sion egredi hortatur ad ipsum Regem
in hoc ferculo suo conspiciendum. Hæ verò sunt ipsæ, quas
in proximo dixerat filias Hierusalem, cū ait: *Media caritate*
constrauit propter filias Hierusalem. Quas tanquam ad conscen-
dendum in ipsum ferculum admonens, iubet eas egredi, ut in
ipso ferculo Rege conspecto eius amore ad eum ascendere ni-
terentur in ipsum eius feretrum, hoc est eius imitatione cru-
cem eius tollendo, sicut ipsemet admonet dicens: *Qui vult ve-*
nire post me, abneget semetipsum, & tollat crucem suam, & sequatur
me, hoc est, passiones sustinens me imitetur. Filia itaque Sion,
id est Hierusalem, non Babylonis, fideles animæ sunt, quæ ad
ciuitatem Dei tanquam ciues pertinent, non diaboli. Has tan-
quam filias vera Hierusalem, hoc est mater Ecclesia Deo parit
vel generat, dum eas prædicando instruit, vel baptizando re-
generat. Vnde & Apostolus tam matri quàm patri se compa-
rans ait: *Filioli mei, quos adhuc parturio, donec Christus formetur in*
vobis. Et rursum: *Nam & si multos habetis pedagogos, sed non mul-*
tos patres. In Christo enim Iesu per Euangelium ego vos genui. De hac
matre nostra, cuius conuersatio in cælis est, & per desiderium
semper sursum inhabitat, idem Apostolus ait: *Illæ autē, quæ sur-*
sum est Hierusalem, libera est, quæ est mater nostra.

Huius itaque Sion prædictas filias Salomon exhortatur e-
gredi, ut verum Salomonem nostrum, id est Christum, egressæ
mereantur videre. Egressæ, inquam, maximè de terrena conuer-
satione, ut in his tam sanctis diebus Dominicæ passionis per ab-
stinentiam carnem macerantes, crucem eius tollamus: attendē-

tes quod scriptum est, quia *si compatimur, & conregnabimus*. Qui enim dicit se in Christo manere, debet sicut ille ambulauit & ipse ambulare. Mactantes in nobis vitia, nos ipsos præparemus tanquam hostiam viuentem & Deo placentem. Nemo enim ad eius hostiam, quæ nunc generaliter Pascha imminente vniuersis proponitur Christianis, dignè accedere poterit, nisi se ille prius talem, ut diximus, hostiam præparauerit. Alioquin de mensa vitæ mortem sumemus, & quasi pro cibo venenum hauriemus. Vnde & Apostolus Corinthijs ait: *Quicumque manducauerit panem, vel biberit calicem Domini indignè, reus erit corporis & sanguinis Domini. Probet autem seipsum homo, & sic de pane illo edat, & de calice bibat. Qui enim manducat & bibit indignè, iudicium sibi manducat & bibit, non dijudicans corpus Domini.* Idem ad Hebræos: *habemus, inquit, altare, de quo edere non habent potestatem, qui tabernaculo deseruiunt. Quorum enim animalium inferatur sanguis pro peccato in Sancta per Pontificem, horum corpora cremantur extra castra. Propter quod & Iesus ut sanctificaret per suum sanguinem populum, extra portam passus est. Excamus igitur ad eum extra castra, improprium eius portantes. Non enim hic habemus manentem ciuitatem, sed futuram inquirimus.* Altare nostrum altare Christi est, in quo sacrificium eius celebramus, immò ipsum in sacramento proprii corporis & sanguinis patri offerimus. De quo scilicet altari edere non habent qui tabernaculo deseruiunt, quia de hoc tanto ac spiritali sacrificio digni sumere non sunt qui carnaliter viuunt. Tabernaculum quippe dicit huius mortalis corporis, quod nunc habemus habitaculum, quod dissolubile est atque infirmum, sicut tabernacula, id est vmbracula pastorum vel peregrinantium, quæ non sunt firmæ domus ac stabiles, sed mobiles, & ad modicum inhabitandæ mansiones. Tabernaculo ergo deseruit, qui mortalis carnis concupiscentijs obedit. Regendum est corpus, & caro spiritui subiicienda, seruire potius quàm dominari digna. *Quorum enim, &c.* Ac si apertè dicat: Benè dixi eos nequaquam sacrificio Christi dignos, qui tabernaculo deseruiunt, hoc est, carnalibus indulgent concupiscentijs. Hoc enim & in sacrificio veteri, quod figura nostri fuit, Dominus præsignare decreuit, cum animalium corporibus extra castra in heremo crematis, purus eorum sanguis offerretur à Pontifice in Sancta Sanctorum. San-

guis quippe, in quo maximè vita carnis consistit, iuxta illud Moyli, *quia anima omnis carnis in sanguine est*, bona fidelium vita vel anima est. Quod quidem per Pontificem Christum, qui pro nobis interpellat, quasi sacrificium offertur in Sancta Sanctorum, quod est secundum tabernaculum, dum dignando efficitur, ut ad supernam mansionem assumatur, ubi pura & perfecta est sanctitas, per Sancta Sanctorum significata. Sed ut hoc fiat, necesse est priùs in hac vita horum animalium corpora cremari extra castra: hoc est carnem affligi atque macerari zelo diuini amoris nobis sic extra castra positus, hoc est extra voluptates carnis constitutis. Hæ quippe voluptates quasi quædam castra vel carceres animæ sunt, qui ipsam constringunt & comprimunt, ne se omnino erigat ad superna, & liberè toto affectu surgat ad cælestia. Propter quod etiam significandum ipse noster Pontifex passus est extra portam, hoc est extra septa Hierusalem, non intra: ut videlicet significaret non aliquos per suum sanguinem sanctificandos atque redimendos, nisi qui, ut dictum est, extra castra positi, id est voluptates carnis, ipsum imitarentur. Ad quod consequenter nos adhortans Apostolus, ait: *Exeamus igitur*, hoc est, imitando eum sequamur, extra castra, ut determinatum est, facti: ut eum apprehendere possimus in supernis. Improprium hoc est pati, pro eo quæcumque probrosa vel turpia tolerare, sicut & ipse pro nobis nulla respuit perferre. *Non enim &c.* Exeamus, inquam, ad eum relictis castris, hoc est properemus ad ipsum peruenire per quæcumque aduersa, postpositis voluptatibus carnis: quia non habemus in hac vita stabilem mansionem, nec ad hanc vitam creati sumus, sed futurâ, quæ indeficiens est, apprehendere nitimur.

Quod igitur Apostolus hoc loco nostrum exire dicit, hoc Salomon superiùs nostrum egredi præsignauit, dicens: *Egredimini filia Sion, &c.* Tanquam si diceret, egredimini mente semper ad eum conspiciendum, qui extra portam crucifixus pro vobis, vestrum factus est sacrificium. A nobis ad eum egredimur, cum ab renunciâtes proprijs voluptatibus, eius voluntati nos dicamus, & eum imitando sequimur; qui patri usque ad mortem obediens ait: *Non veni facere voluntatem meam, sed voluntatem eius qui misit me.* Hoc utrique modo crucem post Iesum portamus, quod de illo Simeone Cirenæo Lucas

refert, cùm vsque ad mortem in eius obedientia persistere parati sumus, crucifigentes corpora nostra cum vitijs & concupiscentijs, sicut & Apostolus præcipit. Simon quippe obediens interpretatur, qui post Christum crucem eius baiulans eos significat, qui per imitationē eo vsque Christum sequuntur, vt consummatam obedientiam vsque ad mortes ei exhibere parentur. De qua profectò perfectione obedientiæ etiā ipse Simoni Petro ait: *Sequere me*, vt videlicet id quod ille Simon Cirenæus egit in ministerio, iste Simon Petrus Ecclesiæ typum gerens consummaret in factō. Refert suprā memoratus Euangelista, quòd Simone post Iesum Crucem eius baiulante, sequatur illum multa turba populi & mulierum, quæ plangebant, & lamentabantur eum. Non enim hic Simon solus per passionem Christum imitatur, verùm innumera fidelium multitudo tam in viris quàm in feminis per martyriū Christum sequitur, & ad Deum extra portam passum hoc modo egrediuntur. Quem & nos hodie egressum præsentamus, cùm de vrbibus, vel castellis, aut villis, Clerus pariter ac populus cum sanctuario Crucem adorare procedunt in campo, ipsa videlicet die qua primùm in anno Dominica recitatur passio. Qua quidem generali fidelium processione, tanquam ad Dominum extra portam passum egredientes, passionis ipsius nos memores esse profitemur, quasi eum præ oculis crucifixum pro nobis aspicientes. Ad quem vtique aspectum admonemur cùm dicitur, vt post egressum nostrum videamus Regem Salomonem in diademate, quo coronauit eum mater sua: mater, inquam, sua, hoc est Iudæa, de qua ipse natus est secundum carnem.

DIADEMATE coronauit eum, hoc est, ad modum victoris eum exaltauit, qui in ipsa morte maximè de diabolo triumphauit. De hac exaltatione in ipsa crucis suspensione, ipsemet Nicodemo ait: *Sicut Moyses exaltauit serpentem in deserto, ita exaltari oportet filium hominis*. Legimus & à Iudæis ipsum Dominum corporaliter spinea corona esse coronatū. Quod cùm illi ad irrisionem & pœnam intenderent, mysteriū ignari gesserunt rei conuertendæ in gloriam. De qua & Psalmista dudum prædixerat: *Minuisti eum paulò minus ab Angelis, gloria & honore coronasti eum: & constituisti eum super opera manuum tuarum*. Omnia subiecisti sub pedibus eius. Quod quidem

testimonium Apostolus prosequens, Hebræis scribit: *Eum autem, qui in modico quàm Angeli minoratus est, videmus Iesum per passionem mortis gloria & honore coronatum.* Scriptum quoque est in Ioanne, quia *exiuit Iesus portans spineam coronam: ut etiam iuxta litteram nobis ad eum sit exeundum, sicut prædictum est, in diademate suo videndum.*

SIVE ergo coronatus, siue crucifigendus exire Christus memoratur, ut reprobatis Iudæis, qui in eum ista commiserunt, gratiam suam præsignaret transiturem in latitudinem Gentium, ubi videlicet crucifixionis salus, & exaltatio ipsius in acquisitione multorum populorum vno Iudæo reprobo, sese dilatauit. Vnde & benè hodie ad crucem eius in campo adorandam procedimus, in hoc mysticè demonstrantes, tam gloriam quàm salutem de Iudæis egressa esse, & in Gentibus sese dilataste. Quod autem postmodum reuertimur ad loca nostra, vnde fueramus egressi, significat in fine mundi ad Iudæos redituram gratiam Dei: quando videlicet per prædicationem Enoch & Helix constat eos conuertendos esse. Vnde & Apostolus. *Nolo, inquit, vos ignorare, fratres, quia cecitas ex parte contingit in Israel, donec plenitudo gentium intraret, & sic omnis Israel saluus fieret, sicut scriptum est: Veniet ex Sion qui eripiat & auertat impietatem à Iacob.* Vnde & ipsum Caluarix locum, quo Dominus crucifixus est, nunc intra ciuitatem nouimus contineri, cum prius extra fuerit. *Coronauit, inquit, eum mater sua in die desponsationis illius.* Tunc enim magna iocunditas Regibus exhiberi solet, quando desponsatis vxoribus sollemnia celebrant nuptiarum. Dies autem Dominicæ crucifixionis quasi dies ei fuit desponsationis, quia tunc Ecclesiā veraciter sibi quasi spōsam sociauit, cum eodem die animas fidelium ad inferos descendens, hoc in eis indè assumptis compleuit, quod latroni promisit dicens: *Amen dico tibi, hodie mecum eris in Paradiso.* Hæc itaque dies desponsationis dies lætitiæ illi fuit, quando illud ad quod venerat, & quod maximè in eius desiderio erat, in salute credentium compleuit.

LÆTITIÆ, inquit, *cordis eius*, quia tanquā tristis in corpore fuit, in quo molestias doloris tolerauit: sed dum caro tristitiam doloris afferret de his quæ inferebantur exterius, cordis, id est animæ, summa exultatio erat inferius, de nostra scilicet salute, quam sic operabatur. Vnde & cum ad

crucifigendum exiret, benè mulieres super eum lamentantes compescuit, dicens: *Filie Hierusalem, nolite flere super me, sed super vos ipsas flete, & super filios vestros.* Tanquàm si diceret: non est propter me dolendum in his passionibus, tanquàm hinc aliquod incurrant damnum; sed potius vobis imminet super vos ipsas & filios vestros, grauissima vindicta, quæ in me committuntur plexuros. Sic & nobis, fratres, super nos potius quàm super ipsum flendum est, quòd ea .v. commiserimus ex culpa, quæ ille tam grauitè portauit in pœna. Sic de ipso gaudeamus cū ipso, vt de nostris doleamus offensis, quod huius s. seruorum reatus commiserit, quod innocens Dominus tantā pœnam sustinuit. Ipse nos docuit flere nos ipsos, qui numquam se flere legitur; sed nos fleuit Lazarum suscitaturus, pro cuius suscitatione honor hodiernus est ei à turbis exhibitus. Fleuit & hodie cū à turbis exultantibus susciperetur, sicut Lucas meminit, dicens: *Et cū appropinquaret iam ad descensum montis Oliueti, cæperunt omnes turba descendentiū gaudentes laudare Deum voce magna, super omnibus quas viderat virtutibus dicentes: Benedictus qui venit in nomine Domini, pax in cælo, & gloria in excelsis. Et vt appropinquauit, videns ciuitatem fleuit super illam, dicens: Quia si cognouisses & tu, &c.* Fleuit Lazarū, quem de refrigerio & sinu Abraham reuocaturus erat ærumnis præsentis vitæ. Flebat ruinam ciuitatis nostra videlicet damna, non propria. Vtinam sic nos mala nostra deplorare possemus sicut & ille, sic solliciti de nobis essemus sicut ipse. Qui de ipso lætatur tanquam de Salvatore nostro, cuius morte redempti sumus, super nos defleamus, qui quod ille tam grauitè plexus est commisimus. Egredientes itaque semper mēte ad eum, vt diximus, & ipsum sic pro nobis coronatum memoriter intuentes, sequamur ipsum, crucem eius tollentes. Quòd si iam in eo tempore non sumus, vt pro eo mori cogamur: quotiens tamen nos pro ipso affligimur, crucem eius tollimus. Crux quippe à cruciando dicta est. Crucem eius tollimus, cū quaslibet aduersitates pro eo sustinemus, vel abstinentiæ virtute carnem nostram macerando, dominio spiritus eam subijcimus. Quod his præcipuè diebus nobis est prouidendum, quibus spiritaliter nos præparari conuenit, ad ipsum Dominum in sacrificio propriæ carnis & sanguinis suscipiendum. Certè, si quis potentum vel amicorum hospitio

suscipiendus à nobis expectaretur, cum omni diligentia domū nostram præpararemus, ne quid immundum vel indecens oculos intrantis offenderet. Quanta igitur cura, quanto studio prouidendum est, ne ipsum creator ac redemptor à nobis, ut diximus, suscipiendus, immundum reperiatur habitaculum; cum propriā iniuriā tantò grauius vindicet, quantò amplius potest ac debet? Et quoniam eius quoque est gratiæ in nobis sibi mansionem parare, ipse sibi hanc præpararet, qui hoc nobis sacrificium ad salutem instituit, non ad iudicium, Amen.

DE REBUS GESTIS IN DIEBUS PASSIONIS,

SERMO XI.



Vo magis nostræ Redemptionis tempus, & Dominicæ Resurrectionis appropinquat solemnitatis, crebrius ædificandi sacris exhortationibus sumus; ut tantis beneficijs digni reperiāmur, & redemptionis participes simus, & resurrectionis consortes. Et quoniam plerumque ipsa rerum gestarum historia deuotionē simplicium excitat magis quàm mystica; iuuat secundum litteram omni dulcedine refertam, omni pietate plenam, ea quæ Dominus his diebus gessit referendo contexere, & ad exhortationem nostram in mentem reducere. Refert itaque Ioannes, quòd resuscitato Lazaro multi Iudæorum, qui hoc viderant, crediderunt in Iesum. Quidam autem ex ipsis abierunt ad Phariseos, & dixerunt eis quæ fecit Iesus. Collegerunt ergo Pontifices & Pharisei concilium, & dicebant, *Quid facimus, &c.* Ab illo ergo die cogitauerunt ut interficerent eum. Interficerent, inquam, mortuos suscitantem, & pro vita reddita mortem inferrent. Occæci pariter & peruersi! Nunquid qui vitam restituit mortuus, à morte sibi non potest prouidere, & machinamenta vestra si velit dissoluere? Et de potestate quidem eius non ambigitis, quem totiens in his vel in alijs experti estis. Alioquin non tanquam ignarum dolo tenere ad occidendum cogitaretis, sed ipsum ut comprehenderetis. Sed quàm stultè hoc vestrum consilium & peruersam cogitationem cum latere credatis, Euangelista patenter ostendit. Cum enim præmisisset: *ab illo ergo die cogitauerunt ut interficerent eum,* statim

statim hoc eum nequaquam ignorare patenter insinuat, dicens: *Iesus ergo non iam palam ambulabat apud Iudeos, sed abiit in regionē iuxta desertum in ciuitatem quæ dicitur Effrem, & ibi morabatur cum discipulis suis.* Quod itaque percutiōnem scienter ad horam declinat, nequaquam hoc per ignorantiam, sed per dispensationē ab eo fieri constat. Nondum quippe tempus aduenerat, quo in eum ista compleri deberent. Propterea passionem declinando dispensatione, ut dictum est, magis quàm timore, nos exemplo sui reuocat à præsumptione: ne fortè Deum tentando, certo nos quando non oportet obijciamus periculo. Quod enim ad hoc eum nequaquam metus impulerit, ut videlicet passionem declinans ad prædictum locum secederet, ibique cum discipulis suis moraretur, sequentia declarant cùm dicitur: *Proximum autem erat Pascha Iudeorum.* Et rursum: *Dederant autem Pontifices & Pharisei mandatum, ut si quis cognouerit ubi sit, indicet ut apprehendant eum.* Iesus ergo ante sex dies Paschæ venit Bethaniam.

ATTENDITE, fratres, quid illa velit conclusio, qua dicitur, *Iesus ergo, &c.* & vnde ista pendeat illatio: & videbitis Domini, ut dictum est, non timorem, sed dispensationem. Præmissio quippe, quia proximum erat Pascha, in quo ipse postmodum se tradendum nouerat, dicens: *Scitis quia post biduum Pascha fiet, & filius hominis tradetur, ut crucifigatur.* Et hoc insuper adiuncto, quia *dederant Pontifices & Pharisei mandatum, ut si quis cognouerit ubi sit, indicet ut apprehendant eum:* statim subinfertur; *Iesus ergo ante sex dies Paschæ, &c.* Ac si apertè dicatur: Quia tempus passionis appropinquabat, & ad hoc perficiendum iam omninò Iudæi conspirauerunt: ergo ipse Dominus ad hoc se iam præparat intrepidus, & Hierosolimam accedit, ubi se nouerat esse passurum, ut de se iam Iudæis præbeat facultatem ad peruersam eorum complendam voluptatem, ut cùm sua damnatione nostram operarentur salutem. Venit quidam à prædicta regione iuxta desertum, vel in ciuitatem gentium, quæ dicitur Effrem, tanquam per hoc etiam ad literam compleret illam orationem propheticam: *Emitte Agnum Domine dominatorem terræ de petra deserti ad montem filia Sion.* Quid enim petra deserti nisi gentilitas est à Deo derelicta, cuius per gratiam mundi in amorem sui Dominus emollierat corda? Hunc etiam locum tanquam petram Dominus inhabitabat, in quo sibi tutum ac firmum habitaculum prouiderat. Inde igitur Agnum suum Dominus mittit ad montem Syon filia suæ, quando Christus à prædicta gen-

tium ciuitate iuxta desertum sita Bethaniam primò venit. Deinde passurus Hierosolymam peruenit in monte Sion positam. Quam profectò ciuitatem quasi filiam Deus olei habuit, cum eam ceteris per gratiam extulit, ut specialiter ipsa nuncupetur ciuitas sancta, tam videlicet Dei templo quàm sanctuario adornata, & in capite regni constituta.

ANTE sex dies Paschæ venit Bethaniam, inde in crastino, id est quinto die ante Pascha processurus Hierosolymam; ut tempore quo decebat mystici Agni perageret sacramenta, sicut iam superius in alio sermone meminimus. Cum autem Dominus Bethaniam venisset, fecerunt ei cœnam ibi, & Martha ministrabat. Lazarus verò erat vnus ex discumbentibus cum eo. Maria ergo accepit libram vnguenti nardi pistici preciosi, & vnxit pedes Iesu, & exterisit capillis suis, & domus impleta est ex odore vnguenti. Qui verò cœnam istam parauerint, vbi Lazarus cõuiuatur, Martha cibum, Maria ministrat vnguentum, Euangelista non exprimit; quia per has personas quas nominat satis insinuatum intelligit. Ut enim de Lazaro taceamus, nequaquam congruū erat, ut sanctæ feminae in domo alterius, vel de alienis ministrarent sumptibus. Conuiuatur Lazarus cum Domino, ut bina eius probetur resurrectio. Vnde & Hieronymus in II. contra Iouinianum, de ipso Domino ait: Comedit quidem post resurrectionem, ut veritatē sui corporis cõprobaret. Nam quotienscumque mortuum suscitauit, iussit ei manducare dari, ne resuscitatio phantasma putaretur. Et Lazarus post resurrectionē ob hanc causam scribitur cum Domino inisse conuiuiū. Benè autem mulieres, quæ Dominū suscipiunt quem viri persequuntur, & cum insuper reficientes, generale maiorum Christū persequentium non verentur edictum. Quæ, ut diximus, Christo ministrantes, fratre ipsarum Lazaro recumbente, tantò felicius in anima insinuantur suscitatae, quanto maiore Christo assistere monstrantur deuotione.

LEGIMVS Dominum ministrasse mensis discipulorum, sicut & ipse profiteretur, dicens: *Nunquid maior est qui recumbit, an qui ministrat? Nonne qui recumbit? Ego autem in medio vestrum sum, sicut qui ministrat.* Solas autem feminas Scriptura cõmemorat Domino ministrasse. Nouimus & ipsum pedes discipulorū abluisse, nullū autem virorum hoc ei obsequium exhibuisse; sed solam peccatricem illam, quæ pœnitentiæ lacrimis pedes eius lauit, capillis ter sit, vnguentis recreauit. Nec solum pedes, verū etiam caput

ipsius mulier inungens, corporaliter eum Christū fecit, & tam Regis quā Sacerdotis in eo sacramēta peregit. Attendite viri humilitatem Domini ita vt diximus ministrantis : perpendite feminæ dignitatem vestram, quæ sic ei in omnibus ministrare meruistis. Quod verò sapius pedes Christi mulier vnxisse perhibetur, patenter innuitur nequaquam eum calciatum incedere, cuius pedes ad vngendum ita inuenirentur parati ; cū tamen ipse discipulis sandaliorum calciamenta indulserit. Ex quo apertè iuxta literam patet, quia duras habuerit vias, de quibus ipse ad patrem loquitur : *Propter verba labiorum tuorum, &c.*

Quod verò in crastino de Bethania primo Betphage ad montem Oliueti venit, deinde Hierusalem peruenit ; nequaquam à mysterio vacat. Betphage quippe viculus est sacerdotum, & interpretatur domus buccæ, sicut Bethania domus obedientiæ. De Bethania itaque Betphage venit, quia solus is dignus est prædicare, qui prius didicerit obedire ; vt antè discipulus fuerit obsequendo, quā magister fiat præcipiendo. Benè autē hic viculus sacerdotū, hoc est prædicatorum, ad montem Oliueti esse describitur ; quia qui tales vt diximus fuerint, altiores in Ecclesia tam dignitate ordinis quā meritorum habentur. Vnde & Dominus : *Qui autem fecerit & docuerit sic homines, hic magnus vocabitur in regno cælorum.* Oliuetum quoque, quod oleum ministrat, sanctis prædicatoribus rectè congruit. Oleum quippe de igne, quem nutrit, lucem spargit : & prædicatores sancti igne caritatis accensi tanquam lucerna sunt ardens & lucens : ardens videlicet in se, lucens alijs, qui eorum illuminantur prædicatione. Lucas verò refert quod cū appropinquaret iam Dominus ad descensum montis Oliueti, cœperunt omnes turbæ descendendum gaudentes laudare Deum voce magna super omnibus quas viderant virtutibus, dicentes : *Benedictus qui venit Rex in nomine Domini : pax in cælo, & gloria in excelsis.* Benè autem descendens de monte Dominus à turbis glorificatur ; quia nisi se quis humiliauerit, nequaquam meretur exaltari, sicut & de ipso scriptum est Domino : *Humiliauit semetipsum factus obediens usque ad mortem, mortem autem crucis. Propter quod & Deus exaltauit illum, & dedit illi nomen quod est super omne nomen, &c.* Deinde turbis ei, vt dictū est, laudes acclamantibus, vt appropinquauit, videns ciuitatem, fleuit super illam, dicens : *Quia si cognouisses & tu, quia venient dies, &c. Et non relinquet in te lapidem super lapidem, eo quod non cognouisti tempus visitationis tue.*

O S V M M A erga impios pietas, & incomparabilis erga crudeles benignitas! Inter laudes quæ ei dantur, & occurrentium gaudia turbarum, quæ tam sollicitè ab his exhibentur, non exultat laudibus, non congaudet gaudentibus: sed condolens perituris, quos à morte reuocare non valet, iam quasi mortuos deflet. Deplorat eorum mortem ut resipiscant, deterret ne pereant. Ventura denunciat mala, per quod sibi providere possent à pœna. Dolet quòd non exauditur, deflet illorum casum, non contemptum suum, qui saluare venerat, non perdere. Vnde & Iesus proprio nomine est vocatus. Deplorat supremam & irreparabilem gentis illius exterminationem per Romanos Principes, Titum videlicet ac Vespasianum futuram. Hi sunt duo vrsi, qui de saltu prodeuntes, quadraginta duos pueros perdiderunt, qui Heliseo de Hierico, ubi sanauerat aquas, ascendenti Bethel illudebant, dicentes: *Ascende calue, ascende calue*. Vrsi quippe siluestres, Principes sunt Gentiles à disciplina legis alieni, & à ciuitate Dei remoti, & more ferarum indomiti. Hos cum Gentilitas mittit, quasi de inculto saltu prodeunt, quia de illo prodeunt populo, qui nullam diuinæ doctrinæ culturam nouerat. Qui dum imbellione Iudaici populi suam iniuriam intenderent vindicare, diuina hoc actum est dispensatione, ut Christi magis iniuriam puniret ignari quàm propriam. Sic quippe & de Assur Dominus ait: *Assur virga furoris mei, ipse autem non sic arbitrabatur*. Cum enim per populum Assur Dominus in populo suo vindictam exercet, ipse Assur quasi virga est iræ Dei, hoc est flagellum vindictæ ipsius: Quòd tamen hoc diuina dispensatione geratur ignorat, quia hoc totum quod præualet non diuinæ ordinationi, sed proprijs virtutibus ascribit. Tale quid & de istis Romanis Principibus Psalmista præuidens, exterminationem suæ gentis deplorabat, sic ad eum conquerens: *Quanta malignatus est inimicus in sancto*? Ac si diceret: O quantas malitias & abominationes ille Romanorum populus exercuit in ipso etiam Templo & Sanctuario diuino. Et gloriati sunt qui oderunt te verum Deum, tanquam idololatriæ cultores, quia dæmones. Gloriati, inquam, in medio sollemnitatis tuæ, hoc est inter dies Paschales, quos tu ipse ad honorem tui solemnes institueras. Iustum quippè fuit ut Iudæi, qui in sollemnitate Paschali Christum occiderant, locum & gentem per eum amittere metuentes; in eadem sollemnitate capti per istos in perpetuum exterminarentur, vel omnino perderentur. Per istos, inquam, Vespasianum s. patrem, & Titum eius filium

punirentur illi, qui in Deum Patrem & eius Filium tam grauitèr deliquerunt. Gloriatì sunt de victòria quam obtinuerunt, nescièntes quòd propter peccata illius populi hæc Deus permiserit fieri. Vnde & sequitur. *Posuerunt signa sua*, hoc est vexella crexerunt, tãquam victoriæ signa. *Sicut in exitu*, hoc est more triumphantium, qui in portis captarum ciuitatum erigunt sua trophæa super summũ, hoc est in altiore loco ciuitatis, vnde magis ab introeuntibus vel exeuntibus conspici possint. Et cùm tanta Deo permittente agerent, non tamen cognouerũt, quid sc. agerent, quia suam tãtum iniuriam vlcisci crediderunt, sed non diuinam: & suis viribus hoc magis potuisse, quàm promissione diuina, qua tradidit impios.

P V E R I itaque paruuli, quos prædicti perdiderunt vrsi, quia illuserunt Helisæo, ipsi sunt Iudæi tanquam sensu carentes, neque per legem, neque per tot signa Christum cognoscentes, & sic à vera sapientia, quæ ipse est, alieni & in reprobum sensum traditi. Non enim taliter Christo illuderent ante crucifixionem, nec Pilato inclamarent, *Crucifige, crucifige eum*; Quod est quasi dicere Christo, *Ascende calue, ascende calue*. Crucifixu quippe Christi ascensio est crucis. Caluum vocant, quem terrenis auxiliis vel opibus destitutum vident. Tale est ergo, *Ascende calue*, tanquàm si dicerent, Tu miser omnibus bonis destitute, qui te à nobis exaltandum esse prædixeras, veni huc, ascendēs crucem exaltare. Hoc enim per ironiam illudentes dicebant, quod in veritate de exultatione crucifixi, & de electione gentium Dominus disponebat. Bene illi perditì pueri quadraginta duo fuisse memorantur, secundum videlicet numerum annorum, quos eis Dominus ad pœnitentiam indulserat. Quadagesimo quippe anno secundo à passione Domini, hæc eis calamitas accidit. Sed nec à mysterio vacat, quòd sanatis aquis Hierico Elisæus Bethel, hoc est ad domũ Dei ascendebat: cùm & Dominus in Ramis Palmarum Hierosolymam veniens, cùm per Hierico transiret, egressus inde duos cecos sanauerit. Qui profecto antequam per Christum tam corpore quàm anima illuminarentur, & ob hoc eum sequerentur, quasi aquæ steriles erant, dum adhuc omni vento doctrinæ fluctuantes quid credere deberent certum non habebant, & ob hoc fructu spiritali carentes.

V T autem nostræ narrationis textum superioribus, quæ intermissa fuerant, copulemus, cùm, vt diximus, Dominus Hierosolymam veniens futuram ciuitatis ruinam deplorasset ac prædixisset, ciuitatem ingressus cum multo exultantium barbarum co-

mitatu ad templum tanquam propriam domum peruenisse refertur, & in ipso tam iustitiam quàm misericordiam exercēs, cum indè negociatores potenter expulisset, cæcosque ibidem & claudos sanaret, ipsam Domini domum reconciliauit. Eiecerat iam alia vice tales de templo, quod solus Ioannes commemorat. Sed de hac vltima eiectione scribunt alij, quando videlicet factò flagello de funiculis omnes eiecit. Marcus verò refert hanc eiectionem non in Ramis Palmarum, sed sequenti die cùm rediret Dominus Hierosolymam, factam fuisse. In Ramis tamen Palmarū ipse quoque Dominum commemorat intrasse templum, sed in eo nihil exegisse, nisi circumspēctis omnibus quæ aderant, cum iam vespera esset in Bethaniam cum xii. redisse. Quod igitur alij Euangelistæ, Mathæus scilicet ac Lucas, hoc prætermisso eiectionem illam commemorent, succinctè per anticipationem dixisse videntur, & ad ea quæ præmiserant congruè connexionisse. Mathæus quippè cum præmisisset Dominum dixisse discipulis, *Ite in castellum quod contra vos est, &c.* & Lucas retulisset Dominum ruinam ciuitatis defleuisse, consequenter exprimere curauerunt, quorum culpa præcipuè illa contrarietas vel ista ruina contingerent, hoc est sacerdotum vel ceterorum templi ministrorum. Vnde in ipso templo hanc in eos vltionem decreuit exercere, tanquam per hoc patenter insinuans eorum malitiam, & circa Deum negligentiam, horum quæ diximus causam existere.

PRIMO itaque cum magno comitatu barbarum laudes acclamantium templum ingressus, & omnibus circumspēctis hinc egressus Bethaniam redijt, & in crastinum vt diximus hanc potestatem exercere distulit. In quo quidem nos moraliter instruit, & potentia suæ magnitudinem ostendit. Prius enim mala quæ corrigamus diligenter inquirere, & prænoscere debemus, quàm ea vindicemus, & per patientiam ad horam sustinere, ne præcipitanter sentētiā inferamus vindictæ. Vnde benè Dominus prius conspicere voluit mala domus suæ, quàm in ea seueritatem exercere iustitiæ. Sicut enim & de ipso Genesis refert, quòd cùm superbiam edificantium turrem ex confusione linguarum vellet reprimere, & sic eos per regiones dispergere, prius Dominus descendit vt videret illam superbiorum stultitiam, quàm in eā daret sententiam. Sic & peccata Sodomæ & Gomorræ puniturus, *Descendam*, inquit, *& videbo utrum clamorem qui venit ad me opere compleuerint, an non est ita, vt sciam.* Sic & hoc loco prius in templo circumspēctis malè agentibus, ostendit se cognouisse quid de-

beret vindicare. Exhibuit patientiam differendo vindi&am. Noluit vindi&am exercere, quasi prædictarum turbarum confusus ope, quo maior eius potestas appareret, cum hoc sine turbis perageret. Solos quippe pueros tunc adesse, & clamantes in templo, *Osanna filio David*, Mathæus commemorat, ut in laudibus horum recompensaretur quod commiserat in Helisæo puerorum irrisio. Vespere facta, ut dictum est, de templo Dominus egressus in Bethaniam cum Apostolis rediit, tanquam de domo inobedi&tiæ ad domum se conferens obedientiæ. Nemo enim Deum habitorem meretur habere, nisi qui præceptis eius præsto est obedire. De ciuitate ad modicam procedit villam, quia ut ipsemet ait, multi vocati sunt, pauci verò electi. Hierusalem & templum tanquam propriam ciuitatem & domum relinquens, cum ibi nō haberet vbi caput reclinaret, illud quod de seipso scriptum est adimplet.

In propria venit, & sui eum non receperunt. Hierusalem, imò iam non Hierusalem, quæ dicitur visio pacis, sed asylum factam tyrannidis. Iam enim in eum ita manifestè conspirauerant maiores ciuitatis ut in ea hospitium non inueniret. Nec tamen hoc eius impotentia, sed patientia tribuendum est. Posset nisi vellet securus hospitari, cui certum est à nemine posse vim inferri, cuius potentia est corda hominum quò voluerit inclinare. Nam & cum voluit liberè ibidem quicquid decreuerat egit. Discipulos illuc dirigens ut asinam & pullum soluerent & sibi adducerent nemine contradicente, sicut dixerat impleuit, cum tamen in se conspiracyonem factam nō ignoraret: De qua his, quos mittit, discipulis ait: *Ite in castellum quod contra vos est, hoc est in locum Deo pariter & vobis aduersantem, nec iam ciuitatem dicendum, hoc est conuentum hominum ad iure viuendum, sed tyrannicæ munitionis castellum.* Ite, inquit, confidenter in locum quamuis talem, atque adeò vobis contrarium, & quod præcipio securi peragite. Vnde & subnectit, *Et si quis vobis aliquid dixerit, dicite quia Dominus his opus habet, & confestum dimittet eos.* O mira potentia confidentia! tanquam Dominus ex imperio mandat id eis, quos in mortem suam iam omnino conspirasse nouerat. Sic mandat, sic præcipit, & sic obedire compellit. Nec dubitant missi quod eis iniungitur peragere, confisi de mittentis potestate. Quam & illi qui hanc maximè conspiracyonem fecerant experti, de templo nō semel sunt eie&ti, cum vni resistere non valerent multi. Qui etiam post hanc eie&tionem, & eorum, ut diximus conspiracyonem, cum

esset cotidie docens in templo, quàm intrepidus esset patenter ostendebat, cui omnia pater in manus dederat. Denique cum voluit secundum legem Pascha celebrare in ipsa qua disposuerat tradi nocte, missis iterum discipulis ubi voluit, domum sibi in qua is faceret in ipsa ciuitate parauit. Qui ergo totiens in talibus potenter egit, nunc quoque si vellet ubicumque vellet parare hospitium posset, nec in Bethaniam coactus rediret. Duo itaque in hoc egit prouidè, vt videlicet illos quos vitabat habitatione sua indignos ostenderet, & dilectis hospitibus copiam sui in extremis daret, vt hoc ipsum iam quasi mercedem hospitalitatis haberent.

M A N E autem facto ipse cum discipulis de Bethania Hierosolymam reuertens esuriit, vt Marcus ait. Et videns à longè ficum habentem folia, venit quærens si quid forte inueniret in ea, & nihil inuenit præter folia. Non enim erat tempus ficorum. Et ait illi: *Numquam ex te fructus nascatur in perpetuum.* Et audiebant discipuli eius, & arefacta est continuo ficulnea, & veniunt Hierosolymam. Et cum introissent templum, cœpit eijcere vendentes & ementes in templo, & mensas nummulariorum & cathedras vendentium columbas euertit. Et non sinebat vt quisquam transferret vas per templum. Et cum vespera facta esset, egrediebatur de ciuitate, & abiit rursus in Bethaniam, sicut refert Mathæus, ibique mansit. Et hæc secunda die à Ramis Palmarum, hoc est die Lunæ, sicut Marcus scribit, gesta fuerunt. Quid est, Domine Iesu, quòd esuriens mane, cibum quæris in arbore, quem præ omnibus constat esse solitum ieiunare? Neminem discipulorum legimus tunc esurire, sed te solum. Ministrabas aliis quod tibi nunc indulgebas. Ieiunus aliis ministrabas, & esuriens discipulos reficiebas, qui ministrare veneras, non ministrari. Pauperes fortassis, etsi spontaneos, habueras hospites. Nimum reputasti, quod larga eorum paupertas discipulos refecit. Pepercisti impensæ solus abstinendo, pro quo impensa omnia constat esse. Cibum requiris in arbore, quem natura sponte præbeat, non quem hominum præparet cura, aut qui largiores augeat expensas. Quæris vtiq; cibum, ubi certus es nequaquam haberi eum. Non ergo id pro refectioe corporali, sed magis pro mysterio agis. Quippè cum non ignores, non tunc tempus esse ficorum. Tanquam iratus maledicis arbori, quòd fructum non habeat, eo tamen tempore quo secundum naturam nequaquam habere debebat. Maledicta statim aruit, & potentiam maledicentis inuisibilis sensit, & quasi

quasi damnata est quæ non meruit. Cur ita Domine? Nequaquam id crudelitate, sed magis pietate nouimus gestum esse. Ad terrorem hominum, & correptionem malorum gestum est in arbore, quod gerendum erat in homine. Exhibita est virtus potentiæ in re insensibili, cuius offensa cauere debuit à rationali. Factis terret, verbis docet incredulam plebem; ne in sua malitia pereat, quam etiam crebris miraculorum beneficiis ad pœnitentiā inuitat. Ipse Angelus consilij quibus potest modis ne pereant, consulit perituris, vt vel pœnitentes saluentur, vel inexcusabiles damnari mereantur. Et hæc quidem in secunda gesta sunt feria.

DIE autem tertio, sicut Marcus & Mathæus referunt, cū à Bethania rediret Hierosolymam, viderunt discipuli arefactam ficulneam. Et recordatus Petrus dixit ad Iesum. *Rabi, ecce ficus cui maledixisti aruit.* Et cū venisset in templum, accesserunt ad eum docentem Principes Sacerdotum, & Seniores populi. Quibus ipse plura in parabolis locutus, & multa eis improprians peccata, grauiter eos contra se commouit, quod maturius perficerent quod de morte ipsius tractauerāt: qui deinceps cū egressus de templo iret in montem s. Oliueti, sicut Mathæus & Marcus patenter insinuant, adnectendo videlicet quod ibi sedens discipulos doceret, vnus discipulorum ait illi: *Magister, aspice quales lapides & quales structura.* Cui respondit Iesus: *Vides has omnes magnas edificationes? Non relinquetur lapis super lapidem qui non destruatur.* Deinde profectus ad mōtem Oliueti, cū ibi sederet, sicut Mathæus scribit, accesserunt ad eū discipuli eius secreto dicentes: *dic nobis quando hæc erunt, de destructione s. Hierusalem, & quod signum erit aduentus tui, in fine s. mundi, & ipsius consummationis seculi.* De qua cū plura Dominus prædixisset, & prolixum eis sermonem habuisset, subiungit Mathæus: *Et factum est, cū consummasset Iesus sermones hos omnes, dixit discipulis suis: Scitis quia post biduum Pascha fiet, & filius hominis tradetur vt crucifigatur.* Post biduum, hoc est in fine quintæ feriæ, quando tunc oportebat vetus Pascha celebrari de immolatione agni seu hœdi ad vespertinū. Hoc enim Pascha hoc loco dicit, quod secundum legem omnibus erat notum. Tertia itaque feria, hoc est die Martis, sermonem illum habuit in monte Oliueti, & eo finito dixit discipulis, quia post biduum Pascha fiet. Tunc quippe illo anno accidit, vt post illud biduum. in quinta, vt diximus, feria, quartadecima eueniret luna, vt eo die ad vespertinum secundum legem veteris Paschæ fieret sacrificium. Quo quidē fi-

nito, veteri s. Paschæ sacrificio in carnibus hædi vel agni cum azimis & lactucis agrestibus, statim ipse Dominus nouum Pascha cū fecerit in sacramento corporis & sanguinis sui, & sic vetus Pascha terminauit.

COMPLETIS autem vtriusque Paschæ sacramentis, de eadē nocte est traditus ad passionem. De qua consequenter traditione subiungit vt dictum est, *Et filius hominis tradetur ut crucifigatur. Tūc congregati sunt*, inquit Mathæus, *Principes Sacerdotum, & Seniores populi consilium fecerunt, vt Iesum dolo tenerent & occiderent: Dicebant autem, non in die festo*, subaudis hoc faciendum esse, *Ne forte tumultus fieret in populo*: hoc est, ne turbæ, quæ illum cum exultatione susceperant, vel sicut Prophetam habebant, in eos commouerentur, & ipsum eriperent. O cæci & pessimi! Dolo eum vultis tenere, tanquam ignarum machinationis vestræ. Nec in die festo istud perficere, non quidem pro reuerentia diei, sed pro metu quem diximus populi. Diem festum dicit primum diem azimorum post Pascha. Pascha quippe propriè vocatur in quartadecima luna, vbi immolatio fiebat ad vesperum. A quinta verò die decima sequente vsque ad septimum diem erant dies azimorum, quòd videlicet post diem Paschæ septem diebus azimis vescerentur. In quibus quidem videlicet diebus azimorum, primus dies eorum & septimus celebriores erant ceteris & sollennes, cum ipse dies Paschæ nullam sollemnitatis dignitatem ex auctoritate legis obtineat. Hinc in Exodo scriptum est de his septem diebus azimorum: *Dies prima erit sancta atque sollennis, & dies septima eadem festiuitate venerabilis*. Nihil operis facietis in eis, exceptis his quæ ad vescendum pertinent. Illum ergo primum diem azimorum intelligunt, cū dicūt, *non in die festo*. Tunc enim omnes pariter secundum legem ab operibus vacantes congregati in ciuitate, facilius tumultum credebantur excitare. Quod verò Mathæus ait, *Tunc congregati sunt, &c.* Illud tūc, referendum est ad prædictam feriam tertiam, quando ait Dominus, *Scitis, quia post viduum, &c.*

QVId autem ipse Dominus postea egerit in illa tertia die, vel in quarta sequente, non exprimit Scriptura manifestè. Credimus autem vt hoc definitum consilium Iudæorum euitaret, nec eis facultatem peragendæ malitiæ præberet, ante diem traditionis siue passionis eius congruam. Quod vero adiecit Euangelista, *Cū autem esset Iesus in Bethania in domo Simonis leprosi, &*, vt Marcus ait ibidem; *recumberet, accessit ad eum mulier habens*

alabastrum, &c. Incertum est vtrum hoc fieret in prædicta die tertia, an in quarta sequente. Nonnulli tamen istud recumbere in domo Simonis, putant illam fuisse cœnam, de qua Ioannes ait, *Quia ante sex dies Paschæ venit Iesus Bethaniam, fecerunt autem ei cœnam ibi, & Martha ministrabat, &c.* Et quidem illi, qui hanc cœnam, quam Mathæus & Marcus commemorat, illam eandem esse voluit, quam Ioannes ante sex dies Paschæ factam asserit, dicunt nunc eam nequaquam secundum ordinem rei gestæ ab Euangelistis narrari; sed tanquam inde prius factam ad memoriam reduci, ut videlicet innuerent inde Iudam occasionem accepisse vendendi Dominum, quasi hoc precio illud suum damnum restauraret. At verò si diligenter hanc & illam cœnam sibi conferamus, videbimus quia nequaquam decebat in alterius domo, vel de alienis sumptibus Domino ministrare. Præterea Ioannes ibi Mariam non refert nisi pedes Iesu vnxisse & capillos extersisse, nec isti Euangelistæ referunt hic eam nisi super caput ipsius recumbentis vnguentum posuisse. Quod non incommodè in aliena domo facere potuit, cum fortasse qui cibum daret vnguētum non præberet. Benè autem prius Domini longa via fatigati pedes vnxit mulier, ut sic eum à labore viæ recrearet. Nunc autem satis esse arbitrata est caput quiescentis inungi, tanquam hoc vnguento remedium conferens contra illius frequentissimæ terræ calores. Denique in illa priore cœna, qua Martha ministravit, Ioannes neminem refert de vnguento murmurasse nisi Iudam proditorem. In hac verò secunda cœna nequaquam Iudas de hoc ab Euangelistis notatur, sed indefinite super hoc discipulos indignatos fuisse referunt. Ex quibus omnibus quasi quibusdam cōiecturis hanc & illam cœnam nequaquam eandem fuisse, & deuotionem mulieris tanto circa Dominum maiorem extitisse, quantò sæpius hoc ei beneficium ministravit. De hac autem & secunda cœna, sicut Matheus patenter ostendit, Iudas abiit ad Principes Sacerdotum, & iniit cum eis pactum, ut pro triginta argenteis Iesum traderet illis. Cum enim retulisset Mathæus, Dominum approbasse effusionem vnguēti super caput eius à muliere factam, statim adiunxit: *Tunc abiit vnus ex duodecim qui dicitur Iudas, &c.* In quo & Marcus similiter consentit. Quod ergo vtrique tunc Iudā ad hoc quod diximus abisse referunt, satis diligenter innuunt, ad hoc eum inde commotum fuisse atque indignatum, quod hac etiam vice confusus precium vnguēti non potuit obtinere.

QVI D autem Dominus quinta feria egerit, hoc est die cœ-
M M M m m ij.

na, quo tunc vt diximus, Pascha Iudæorum contigit, ex ipso
 certum est Euangelis, vbi scriptum est. Prima autem die azimo-
 rum accesserunt discipuli ad Iesum, dicentes: *Vbi vis paremus ti-
 bi comedere Pascha? Et misit Petrum & Ioannem, dicens: Euntes pa-
 rate nobis Pascha, vt manducemus. At illi dixerunt, vbi vis pare-
 mus? Et dixit ad eos: Ecce introeuntibus vobis ciuitatem, occurret vo-
 bis homo amphoram aqua portans. Sequimini eum in domum, in quam
 intrat, & dicetis patrifamilias domus: Dicit tibi magister, vbi est diuer-
 sorium, vbi Pascha cum discipulis meis manducem? Et ipse osten-
 det vobis cœnaculum magnum stratum, & ibi parate. Euntes autem
 inuenerunt sicut dixit illis, & parauerunt Pascha. Et cùm facta esset
 hora, discubuit, & duodecim Apostoli cum eo. Discubuit quidem ad
 vetus Pascha primò celebrandum. Quòd verò tam Mathæus
 quàm Marcus dicunt, hoc esse factum prima die azimorum, quæ
 videlicet dies propriè Pascha dicebatur, vt suprà meminimus, si-
 cut septem dies sequentes azimorum vocabantur; sciat lector ip-
 sum diem Paschæ nomine quoque azimorum comprehendi pos-
 se, cùm in eo etiam azimis cum lactucis agrestibus vescerentur.
 Paschæ quoque nomine nonnunquam è conuerso dies azimo-
 rum continetur iuxta illud Ioannis, *Ante diem festum Pascha.*
 Sæpe etiam Pascha ipsa hostia Paschæ potiùs quàm dies appella-
 tur, iuxta illud: *Vbi vis paremus tibi comedere Pascha?* Et alibi:
Venit autem dies azimorum, in qua necesse erat occidi Pascha. Et A-
 postolus, *Pascha nostrum immolatus est Christus*, hoc est ipse nostra
 hostia. Paschalis. Quod verò Ioannes ait: *Et cœna facta, cùm*
diabolus iam misisset in cor vt traderet eum Iudas, surgit à cœna,
 vt videlicet pedes lauaret discipulorum. Et postmodum ablu-
 tione facta subiungit: *Cùm recubuiisset iterum dixit eis, Scitis quid*
fecerim vobis, &c. hoc insinuare videtur, quòd intra cœnam ve-
 teris Paschæ, & cœnam Dominicam, pedes Dominus ablueret, per
 hoc patenter innuēs, neminem ad sacrificium Christi dignum ac-
 cedere, nisi priùs ablutis pedibus, hoc est affectionibus animi mū-
 datis, alioquin iudicium sibi comedit & bibit. Quod verò di-
 ctum est, *Et cùm recubuiisset iterum*, innuit eos post sacrificium ve-
 teris Paschæ ad cœnam conuiuii ciborum accessisse. Non enim
 tantæ virorum familiæ vnus comestio agni vel hœdi ad refectio-
 nem diei sufficeret. Præterea Lucas cùm retulisset Dominum de
 veteri Pascha dixisse discipulis, *Desiderio desideravi hoc Pascha*
manducare vobiscum, &c. duos calices postea commemorat Do-
 minum discipulis dedisse, vnum quidē statim post vetus Pascha,*

alterum in celebratione noui Paschæ. Et de illo quidem primo calice Dominus discipulis ait: *Accipite & diuidite inter vos. Dico enim vobis, quia non bibam de generatione vitis, donec regnum Dei veniat.* De alio verò calice scriptum est, quia dedit illis, dicens: *Hic est sanguis meus noui Testamenti. Dico autem vobis, non bibam amodò de hoc genimine vitis vsque in diem illum, cum illud bibam vobiscum nouum in regno patris mei.* Prior itaque calix post vetus Pascha, & ante nouum susceptus, & ille secundus recubitus post ablutionem pedum, non ad sacrificium, sed ad refectionem corporum pertinere videretur. Nihil enim de potu in veteri Pascha lex præcipit, sed tantum de carnibus agni vel hœdi cum panibus azimis & lactucis agrestibus. In hac itaque conuiuij refectione, discipulis edentibus, videtur Dominus de panibus illius mensæ, non de azimis Paschæ accepisse, & nouum Pascha cōfecisse. Non enim illo die Paschæ interdictum erat, ne panes etiam fermentati, qui propriè panes sine adiectione dicuntur, in domibus reperirentur, sed sequentibus tantum septem diebus, qui ob hoc dies azimorum specialiter dicebantur. Vnde & Græci non de azimo pane, sed de fermentato Dominum dicunt nouum Pascha cōfecisse; quasi nihil de veteri Pascha in nouo vellet retinere. Qui etiam, vbicumque nos habemus in nouo Pascha dictum à Domino, quòd *accepit panem & benedixit*, pro pane in Græco habetur *ἄρτος*, quod fermentatum significat.

QVOD verò discipulis edentibus Dominus ait, quòd vnus eorum esset eum traditurus, & eum deinde præsignauit, dicens: *Qui intingit mecum manum in parapside, siue in catino, hic me tradet,* ad esum veteris Paschæ referendum est; vt cum illud ederent hoc eis diceret. Signum autem parapsidis, quo proditor designatur, sic accipiendum videtur, quòd cum proditor audisset Dominum dixisse, quia vnus discipulorum esset eum traditurus, ne hoc de se dici putaretur, quem iam conscientia sua super hoc accusabat, temeritate quadam prouidit demonstrandum, nequaquam de se suspicandum esse, qui sic de Domino confideret, vt in eodem vase cibum communem habere non trepidaret. Vnde tunc in eius parapsidem manum illam sceleratus intulit, qua eum ipsa nocte traditurus ad mortem fuerat. Sicut quoque intelligi potest signum illud parapsidis, quod Dominus, qui mens ministrabat discipulorum, in consuetudinem haberet postquam mensæ deseruisset cum Iuda refici, qui quasi procurator communis loculos impensæ deferebat. Tertiò Dominus prodit-

torem designare curauit, quo eum amplius à sua compesceret iniquitate. Cum enim primò dixisset, *qui intingit mecum manum in parapside, hic me tradet*, ac postmodum traditor tanquam conscius sui, & quasi iam designatus ex parapside, requireret dicens: *Nunquid ego sum Rabi?* Respondit ei Iesus, *Tu dixisti*. Ac si diceret. Tu iam pacto cum Iudæis inito, & te hoc facturum esse pollicitus, quod nunc dico eis prædixisti. Refert etiam Ioannes, quòd cum ipse Dominus dixisset, *Qui manducat panem meum leuabit contra me calcaneum suum*. Et ipse Ioannes recubens super pectus Iesu requireret ab ipso quis ille esset, respondit. *Ille est cui intinctum panem porrexero*. Et cum intinxisset panem dedit Iudæ, & post buccellam tunc introiuit in illum Sathanas. Dixit ei Iesus: *Quod facis fac citius*. Cum autem accepisset ille buccellam, exiuit continuo. Erat autem nox. Ecce hoc tertio proditor manifestè designatus, potest buccellam statim exijt ad conceptum scelus peragendum, tanquam iam omnino de Domini gratia desperans, cum eius mentem ita diabolus omnino possideret, ut redire ad veniam nullatenus posset. Mirum tamen est quomodo adqueuit ut intinctam buccellam acciperet, si prius audierit Dominum hoc dixisse in signum fieri futuræ prodicionis. Credimus ergo Dominum hoc priuatim Ioanni recumbenti super pectus eius respondisse, itaut proditor id nequaquam intelligeret. Nam & Petrus secretò hoc demonstrari petijt, innuens Ioanni potius quàm loquens, ut à Domino requireret quis ille esset de quo diceret. De illa autem buccella panis, quam ad proditorem designandum intinctam ei porrexit, plerisque videtur quòd de ipso pane sacrato eam acciperet, unde inter ceteros ita eum communicaret. Quam quidem communionem cum indignèsumeret, iudicium potius quàm salutem ibi acciperet, sicut & Apostolus asserit de indignè communicatis. Unde & post buccellam Sathanas in Iudam introisse, & sic eum plenius possedisse memoratur. Nam & quod huic quoque communioni proditor interfuerit, Lucas patenter insinuare videtur. Qui, dum nouum Pascha celebraretur à Domino, refert eum dixisse: *Verumtamen ecce manus tradentis me mecum est in mensa*. Continuo tamen accepta buccella proditor non expectat communionem finiri, vel hymnum post refectionem Domino persolui; sacrum statim collegium egreditur, quo prauum desiderium amplius maturarer, sicut & Dominus prædixerat dicens: *Quod facis fac citius*. Idèò autem panem intinctum soli proditori dedit, ut eius mentem

iam conceptione peccati infectam & maculatam significaret. Ceteris autem, qui puram habebant conscientiam, sacramenta corporis & sanguinis sui separatim distribuit, quasi panem per se & vinum per se separatim ministrans. Vnde benè statutum est in Ecclesia, vt quando fideles communicantur, hæc separatim accipiant. Sunt verò qui panem illum intinctum nequaquam de sacrificio Christi fuisse intelligunt, sed buccellam illam de quocumque pane acceptam esse ad proditorem solummodò designandum. Quorum etiam nonnulli volunt Iudam in sacramento Domini corporis participasse. Augustinus super Ioannem: Et cum intinxisset panem dedit Iudæ. Non autem, vt putant quidam, tunc Iudas corpus Christi accepit. Intelligendum est enim, quòd iam omnibus eis distribuerat Dominus sacramentum corporis & sanguinis sui, vbi & ipse Iudas erat, sicut Lucas euidentissimè narrat. Deinde per buccellam tinctam atque porrectam suum exprimit traditorem. Hilarius super Mathæum, Vbi vis paremus tibi Pascha manducare? Post quæ Iudas proditor iudicatur, sine quo Pascha accepto calice & fracto pane conficitur. Dignus enim æternorum sacramentorum communione non fuerat. Nam discessisse statim intelligitur, quòd cum turbis reuersus ostenditur. Neque sane bibere cum Domino poterat, qui non erat bibiturus in regno, cum vniuersos tunc bibentes ex vitis istius fructu bibituros secum postea polliceretur. Notandum tamen nequaquam in verbis Domini vniuersos haberi, quamuis hoc beatus intelligat Hilarius, sed ita indefinitè à Domino dici: *Cum illud bibam vobiscum nouum in regno patris mei*. Multa quippe nouimus ad hunc modum Apostolis Dominum loqui, quæ monita generaliter sunt accipienda, vt Iudæ quoque possint conuenire. Quale est illud: *Beati oculi qui vident quæ vos videtis, & sedebitis vos super sedes duodecim, &c. & Gaudete, quia nomina vestra scripta sunt in cælis*. Et rursum, *Et ego dispono vobis, sicut disposui mihi pater meus regnum, vt edatis, & bibatis super mensam meam in regno meo*. Sæpè etiam cum generaliter aliquid dicitur, non est tamen generaliter accipiendum. Vnde illud est Hieronymi ad Damasum in parabola Domini de filio frugi & luxurioso. Et omnia mea tua sunt, Quomodo autem Dei omnia Iudæorum sunt? Numquid Angeli throni? Omnia ergo intellige Prophetias, eloquia diuina, secundum illud quod sæpè exposuimus, non semper omnia ad totum esse referenda, sed ad partem maximam, vt, *Omnes declinauerunt: &*

Omnes qui ante me venerunt, fures fuerunt & latrones: & , Omnibus omnia factus sum: & , Omnes quæ sua sunt quærunt, non quæ Iesu Christi. Denique si ponamus Iudam quoque communioni interfuisse, qua completa Dominus illud ait: *Non bibam amodò de hoc genere vitis usque in diem illum, cum illud bibam vobiscum novum in regno patris mei,* non cogimur idèd fateri tunc Iudam adfuisse, cum hoc Dominus dixerit, nec eum expectasse finem Cœnæ Dominicæ, qui continuò, ut supradictum est, exiit post acceptionem buccellæ, ut eos conuocaret quibus Dominum traderet. Post cuius quidem egressum, Dominus, ut Ioannes refert, prolixum sermonem ad discipulos habuit. Cuius primam partem, dum adhuc recumberet, dixit usque ad eum s. locum, ubi ait: *Sed ut cognoscat mundus quia diligo patrem, & sicut mandatū dedit mihi pater sic facio. Surgite, eamus hinc.* Quem quidem locū beatus exponens Augustinus, ait: Tanquam diceretur, Cur ergo moreris, si non habes peccatum, cui debetur mortis supplicium? continuo subiecit: *Sed ut cognoscat mundus, &c. Eamus,* dixit. Quò, nisi ad illum locum, vnde fuerat tradendus ad mortem? Habebat ut moreretur mandatum Patris.

POST QUAM autem dixit discipulis suis, *surgite, eamus hinc,* illis de accubitu mensæ surgentibus, & hymno gratiarum dicto, de quo Mathæus & Marcus scribunt, aliam partem sermonis confirmavit, usquequo de domo illa exierit secundum consuetudinem suam in montem Oliueti. Vnde & Lucas de Domino meminit, dicens: *Erat autem diebus docens in templo, noctibus verò exiens morabatur in monte qui vocatur Oliueti.* Et iterum: *Egressus ibat secundum consuetudinem in montem Oliuarum.* Secuti sunt autem illum & discipuli. De nostra quippe salute Dominus sollicitus, die prædicationi intendebat, nocte in oratione pernoctabat. Ad quam quidem faciendam secretum requirebat locum, & à tumultu seculi remotū, quò puriùs suis discipulis esset orandum. Quò cum ipse peruenisset atque orasset, eos quoque ad orationem inuitat, dicens: *Vigilate & orate ut non intretis in tentationem. Spiritus quidem promptus est, caro autem infirma.* Tanquā si diceret, prolatio vobis facilis est ad me confitendum, & cum Petro dicendum, quia parati estis mecum & in carcerem & in mortem ire; sed adhuc infirmi estis ex carne ad resistendum tentationibus. Quòd humanitas Christi imminente passionis articulo se ad orationem conuertit, & discipulos hinc scandalizandos ad orationem hortatur; patenter nos instruit,

instruit, ne vnquam de viribus nostris in aliquo periculo præsumamus constituti, quia non est homini mortem constantia superare, nisi hanc virtutem nobis Domino ministrante. Ter in die Daniel in anxietate positus orasse Dominum legitur, tanquã hunc vnum in tribus personis intelligens. Trinam & nunc Dominus orationem assumit, qua veram infirmitatem carnis se habere demonstrans verum se hominem probaret, & similem nobis in omnibus absque peccato, vt vera eius passio, sicut & carnis susceptio credatur. Orans itaque dicit, *Pater si possibile est, &c.* Et rursum: *Pater, si non potest hic calix transire, &c.* Si possibile est, inquit, hoc est conueniens, vt alio modo redemptionis quàm per mortem meam possit humanum genus saluari. Calicem dicit mortem suam transitoriam, citò resurrekturus. Qua videlicet morte tanquam poculo quodam desiderium suum de nostra redemptione, quasi sitim suam erat refecturus. Sed nunquid mortem timuit, ad quam nos minimè timendam adhortatur, dicens: *Nolite timere eos qui occidunt corpus?* Certè neminem Martyrum, cùm ad agonem venirent, quod passuri erant, orasse memini vt ab eis passio transiret: sed læto animo & magno desiderio eam suscipere, tanquam illud implentes Apostoli, *Cupio dissolui, & esse cum Christo.* Nunquid ipse morti se offerens, plus eam timuit quàm ceteri, aut tristis ad eam venit, ad quam alij occurrere dicuntur læti? Sic quippè de ipso Marcus refert, quòd cœpit pauere & tædere; & tam ipse Marcus quàm Mathæus eũ scribunt dixisse, *Tristis est anima mea usque ad mortem.* Nec non & eum passionis amaritudinem profiteri non velle, & suam in hoc voluntatem à voluntate patris dissidere, cùm ait: *Verumtamen non sicut ego volo, sed sicut tu.* vel ita: *Sed non quod ego volo, sed quod tu.* Et in Luca legitur: *Pater, si vis transfer à me calicem istum. Verumtamen non mea voluntas, sed tua fiat.* Vbi & subditur: *Apparuit autem illi Angelus de cælo, confortans eum, & factus in agonia prolixius orabat. Et factus est sudor eius sicut gutta sanguinis decurrentis in terram.* Neminem alium præ timore mortis sanguinem legimus sudasse, quod supra naturam humanam constat esse. An fortè plus quàm ceteri timuit, quem timor passionis ad hoc coegit? an sponte magis quàm anxietate timoris hunc sudorem emisit? Quem denique fortem athletam ita periculo mortis anxiatum, & tanquam ex desperatione legimus esse perturbatum, vt de Domino scriptum esse videtur? *Nunc anima mea,* inquit, *turbata.* Et quid dicā? *Pater saluifica me ex hac hora.* Et post aliqua:

Cum hac dixisset Iesus turbatus est spiritu. Vt autem ponamus in quibusdā videtur * in his verbis, timoris vel tristitiæ cum membra sua in se transformasse, vt ex persona s. membrorum hæc dicerentur aut fierent : nunquam certè in eorum persona sudor iste iuxta literam accipiendus est. Beatus autem Ambrosius pluseum quàm ceteros passionem mortis horrere non veretur asserere. Sic quippe ait de fide ad Gratianum scribens, in Libro II. Petrus dicit, *Animam meā pono pro te.* Christus dicit, *Animam meam turbatur.* Vtrumque verum est, & plenum vtrumque rationis, quòd inferior non timet, & superior gerit timentis affectum. Ille enim quasi homo vim mortis ignorat, iste quasi Deus in corpore constitutus fragilitatem carnis exponit ; vt eorum qui sacramentum Incarnationis abhorrent excluderetur impietas. Ex quibus patenter verbis ostenditur, re vera eius animam, quæ per vnionem Verbi omnia scientis tam bene summum mortis cruciatum tanquam esset experta nouerat magis eum horruisse, quàm ceteræ possent animæ. Quanto autem plus mortem timuit, & in passione constantior perstitit, tanto virtus obedientiæ maior in eo claruit, & maiorem nobis, pro quibus passus est, dilectionem exhibuit. Vbi & infirmioribus membris consolationem proponere voluit: ne cum ad agonis passionem trepidarent, pro hoc infirmitate sua desperarent à venia. Quam constanter autem Dominus passioni occurreret, & in passione persisteret, quisquis diligenter attendit, iudex secundum magnitudinem timoris, incomparabilem in eo fortitudinem enim omittam cetera, quis non illud miretur, quòd à Pilato interrogatus cum respondere nollet, ab eo audierit, *Mihi non loqueris ? Nescis quia potestatem habeo dimittere te, &c.* Qui etiam ab ipso ad Herodem missus, tanquam ad eius potestatem pertinens, cum esset Galilæus, vt sic per eum facillè liberari posset, nil ei respondere dignatus est, cum multis interrogaretur sermonibus, nedum ei signum aliquod ostendere, quod ille maximè cupiebat.

Quod ergo pauendo tædere, vel perturbari ad eò videtur, vt quasi desperans diceret, & *quid dicam ?* signa sunt omnia non ignauitæ vel diffidentitæ, sed timoris maximi ad infirmitatis probationem assumptæ : vt quod mortem præuenit, ipsa iam grauius videatur morte. Angelus apparens in persona patris eum confortat, sicut & antea factum fuerat, ipso ad eum dicente,

Et clarificaui, & iterum clarificabo. Hæc quippe consolatio orationis complendæ, qua pro suis orabat; intelligenda est responsio, qua discipuli audita consolarentur. Quis fidelium, Domine, hanc etiam tuæ passionis anxietatem sine compassione possit audire? hanc pro nobis tuam perturbationem queat sustinere? Ait Apostolus: *Si vnum patitur membrum, compatiuntur omnia membra, &c.* pro se inuicem sollicita. Quid ergo pro capite dolores nostros & peccata portante nos oportet facere? Quis siccis oculis hoc intelligat? cuius cor lapideū dolor iste non scindat? Scissum est velum templi in tua Domine passione, & ad terræ motum ipsa etiam fissa est duritia petrarum. Sol obscuratus est tanquam immunitatem sceleris cōspicere non ferret. Ipsa quoque insensibilia, tanquam tuam sentirent passionē, compassionis exhibuerunt affectum. Vt autem & hæc compassio nostra penetret ac scindat corda, ad intermissa, non dimissa, caritas suspirans stilum reducat.

EGRESSVS itaque Dominus ad montem Oliueti, sicut Mathæus refert, venit inde cum discipulis in villā quæ dicitur Gessemani. Quem profecto locum Marcus prædiū nominat, Ioannes dicit, *trans Iordanem Cedron ubi erat hortus, in quem frequenter Iesus conueniebat cum discipulis*, tanquam secretissimum, atque ad docendum discipulos, siue orandum conuenientem. Idem itaque intelligitur, *villam Gessemani*, quod, *locum illum trans torrentem Cedron*, ad radicem montis Oliueti existentem. Cum dicitur, *torrentem Cedron*, genitiuus Græcus est *Cedrôn*, pro *Cedrorum*. Torrentem dicunt, quia in valle Iosaphat aqua illa vicissim currit, non semper, in qua & cedri crescunt. Qui locus Abrahæ hortus erat, qui circa Salē plures hortos & mansiones habebat. Quē locum Iesus cum discipulis suis frequentabat, qui & benè erat indè notus. Igitur hic cum quærit ad tradendum, & ibidem inuenit quæsitum, sicut statim ipse Ioannes prosequitur, dicens: *Iudas ergo cum accepisset cohortem, & à Pontificibus & Phariseis ministros, venit illuc cum laternis & facibus & armis.* Cohortem quidem Gentilium à Pilato præside, vt nec Gentiles in eius traditione deessent, qui hos quoque sua venerat morte redimere; vt videlicet tam à Iudæis quàm à Gentilibus ad mortem tradere-tur, qui pro salute omnium mortem pateretur. Lucas verò refert ipsos etiam Principes Sacerdotum, hoc est Pontifices & Magistratus templi, & seniores venisse. Quod sic accipiendum videtur, vt hoc in ministris suis, non in personis proprijs

ageret. Ceteris quippe referentibus Euāgelistis, nouimus Dominum à cohorte & ministris cōprehensum, ad Annā siue Cayphā Pontifices fuisse perductum. Venientes afferunt laternas, ut qui sunt in tenebris cæcitatibus ipsam lucem capiant mundi. Fustibus & armis veniunt muniti, ut per hanc resistenti vim facerent, vel eum à se propulsarent. Iesus itaque omnia quæ ventura erant super eum præcessit. Dum homines Deo vim facere parant, sponte Dominus non intractus occurrit passioni, sicut ipse dixerat: *Nemo tollit à me animam meam, sed ego pono eam. Sciens, inquit, omnia*: hoc est, non ignorans eorum machinamenta, & per dirum mortis supplicium se salutem vestram consummaturum, ac deinceps tam Resurrectione quàm Ascensione, vel sancti Spiritus aduentu glorificandum. Qui antè à passione declinauerat, quia nondum venerat hora eius, & discipulis præceperat, *Cum vos persecuti fuerint de ciuitate in ciuitatem, fugite in aliam*; sciens iam aduenisse tempus congruum passioni, offert se in Pascha, tanquam Pascha vel Agnus ad immolandum. Processit, & dicit, *Quem queritis?* Verè, inquam, tanquam ignorans eorum nequissimam inquisitionem, quia tuum est ignorare malà quæ improbas, & cognoscere bona quæ approbas. Sic quippe Adam, quem ante peccatum noueras, post peccatum tanquam incognitum requiris dicens: *Adam ubi es?* Qui etià mulieris factum quod improbas, tanquam incognitum interrogans, ais: *Quare fecisti?* Et fatuis virginibus respondens, dicis: *Amen dico vobis, nescio vos.* Cum e contrario Moyse dicas, *noni te ex nomine, & scriptum sit, nouit Dominus qui sunt eius.* Responderunt ei, *IESUM Nazarenum.* Ocæci & verè in tenebris venientes contra lucem, & in nocte aduersum diem, cum ei vos ipsum querere responderetis quem perdere venitis! Procedit ad bellum tanquam signifer ante suos. Non eum recognoscitis Dominum, quem occurrere videtis solum. Si enim recognosceretis, nequaquam vestræ machinationis dolum responsione vestra ei panderetis. Contra sapientiam venientes, quia eam non cognoscitis, stulti permanetis, nec præsentem potestis animaduertere, nisi eo se vobis indicante. Iesum responderis, & ne ipse de semetipso in vestra responsione possit errare, tanquam eum & de seipso docentes, subnexa determinatione additis, *Nazarenum.* Et utinā Iesum, quem profitemini tanquam Iesum, id est Saluatorem, quæreretur, ut quod in ore habetis, corde teneretis; ne, dum Saluatorem perdere queritis, vos ipsos potius perdatis.

DICIT ei Iesus, *Ego sum*. Non enim cognoscere eum nisi ipso poterant indicante, sicut nec ipsum capere nisi ipso se tradente. Stabat autem & Iudas, qui tradebat eum, cum ipsis. Lucas refert, quia antecedebat eos, & Marcus quod cum venisset statim accedens ad eum ait, *Rabbi*, & osculatus est eum. At illi manus iniecerunt in eum, & tenuerunt eum. Vnde mihi videtur, quod quando proficisci coeperunt, Iudas tanquam dux eos antecedebat. Vbi autem appropinquare coeperunt, ipse conscientia sua confusus & perturbatus, vel hesitans, ita se retinuit, & gradum suppressit, ut illi praeederent. Vnde nunc Ioannes dicit, illis ad Iesum peruenientibus, Iudam stare cum illis potius quam praecedere. Stabat quidem cum ipsis, non ut caeteri cum Domino. Stabat tanquam stupefactus & concepti sceleris immanitate perturbatus, & ex conspectu Domini maxime confusus, aut fortasse tanta caecitate percussus, ut nec eum posset cognoscere, nisi eo seipsum indicante. Ut tamen impleret quod dixerat, *Quemcumque osculatus fuero ipse est, tenete eum*, omni pudore postposito non Deum, sed homines veritus accessit ad osculum, tanquam eum designans, qui iam semetipsum indicauerat, ut nil in se fieri nisi seipso disponente Dominus declararet. Vnde & sequitur: *Ut ergo dixit eis, Ego sum, abierunt retrorsum, & ceciderunt in terram*. Quid agitis missi? Ecce praesto est quem quaeritis, & seipsum offerens, dicit, *Ego sum*, nec istam eius vocem ferre sustinetis, cui vim facere confidebatis. Abeuntes retrorsum, non ei valentes appropinquare, quem venitis comprehendere, in terram resupini corruistis. Hic quippe casus proprius est reproborum, sicut cadere in faciem proprium est electorum: Vnde & illud est beati Gregorij in Ezechielem Homil. Electi in faciem, & reprobi retrorsum cadi, quia qui post se cadit, ibi cadit ubi non videt. Iniqui vero qui inuisibilib. cadunt, post se cadere dicuntur, quia ibi corruunt, ubi quid eos tunc sequatur modo videre non possunt. Iusti vero, quia in istis visibilibus semetipsos sponte dei iiciunt, ut in visibilibus erigantur, quasi in faciem cadunt, quia timore compuncti videntes humiliantur. Iterum ergo eos interrogavit, *Quem quaeritis*: Illi autem dixerunt: *Iesum Nazarenum*. Respondit Iesus, *Dixi vobis quia ego sum*. Qui abierunt retrorsum, non solum corpore corruentes, verum etiam in tantam extasim pauoris & perturbationis facti, ut Dominum nec ad iudicium suum, nec ad proditoris osculum agnoscere possent. Secundo interrogat eos quem quaerant, & se iterum illum esse docet, quem se illi quaerere respondent. In quo patenter ostendit

dicur & ipsius perseuerantia in passione, & illorum in obstinatione suæ malitiæ.

Si ergo me queritis, sinite hos abire. Vt impleretur sermo, &c. Si me, inquit, non alium queritis, sicut ex duabus iam patet responsionibus vestris, sufficere vobis debet vestram in me complere malitiam, hoc inquit, discipulos qui aderant intelligens, vt solus ipse torcular passionis intraret, sicut ex persona eius Isaias prædixerat: *Torcular calcavi solus, &c.* Sermo, inquit Euangelista, quæ ipse Dominus antea dixerat, ad Patrem loquens: *Quos dedisti mihi custodiri, & nemo ex ijs perijt nisi filius perditionis.* Augustinus in Ioanne super hunc locum: Cur si tunc morerentur perderet eos, qui nisi quia nondum sic in eum credebant, quomodo credunt quicumque non perituri? Item, Petrus si negato Christo hinc iret, quid aliud quam periret? *Sinite*, inquit, *hos abire*, sed non adiecit, & capite me: ne videlicet pietatem præcipiens, impietatem quoque quam fieri permittebatur iubere videretur. Accedens autem proditor ad Dominum dixit, *Aue Rabbi.* Et osculatus est eum. Iesus autem dixit ei: *Amice ad quid venisti?* Siue vt Lucas ait, *Iuda, osculo filium hominis tradis?* Hoc osculum non pacis, sed proditionis signum est illud, de quo Mathæus commemorat: *Dederat autem traditor eius signum eis, dicens, Quemcumque osculatus fuero ipse est, tenete eum, & ducite eum.* Ecce dux cæcorum & miserrimè miserrorum, quæ est ista cautela, ad quam eos hortatur insania tua? tanquam sapientiæ Dei præualere hominum cautela possit. Impudentissime proditor, omnium scelerum abhominaciones tuis iustificans sceleribus. Dispensatoris curam inter ceteros à Domino susceperas, loculos habens, & ea quæ poteras furto surripiens, marsupium tuum, non Dominicum volens augere, ipsum præsumpsisti Dominum vendere, & in precio pecuniæ ipsum mundi pretium ponere. Ad cumulum malitiæ tuæ, ipsos conceptæ proditionis gradus intinere, vt nullam abhominationem impudentiæ deesse cognoscas proditioni tuæ. Ipsa nocte qua tractabas eum tradere, ad cœnam præsumens accedere, in eius parapside manū sceleratam, & tanquam ipsius sanguine cruentatam inserere non timuisti, vt hoc facto quasi teste tuæ cōscientiæ bonæ omnem suspicionem à te remoueres. Consors in participatione tam veteris quam noui Paschæ, ac deinceps in ipsa traditione eum vt Magistrum salutans, & vt lupus agnum osculans, fili perditionis à manfucto patre audis, *Amice ad quid venisti?* Amice quidem non amans, sed amate, non diligens, sed dilecte, quantum ad exhibitio-

nem familiaritatis & amicitiae. Ad quid, inquit, venisti? tanquam si diceret: Attende miser quantam sine causa præsumis execrationem cum prædictis gradibus ad conceptam peruenis proditionem. In quo & Dominus signum prodicionis detestans, ait: *Iuda osculo filium hominis tradis?* hoc est, Cur infelix osculum in signo prodicionis elegisti, quod inter inimicos etiam summa fœderatio solet esse pacis? Infelicissime omnium hominum, bonum tibi esset si natus non fuisses, quia more abortiuorum in vtero moriēs grauissimam non meruisses pœnam.

VIDENTES autem hi, qui circa ipsum erant, quod futurum erat, dixerunt ei: *Domine, si percutimus in gladio?* Simon ergo Petrus ardentior ceteris habens gladium, eduxit eum, & percussit seruum Pontificis, & abscidit eius auriculam dexteram. Respondens autem Iesus ait: *Sinite usque huc.* Et cum tetigisset auriculam eius, sanauit eum. Quærunt alij à Domino, vtrum percutiendo debeant eum vindicare. Non sustinet Petrus responsum, vt audiat documentum; nec mensuram habet amor vehemens, nec immensa caritas attendit quid excedat. Nouerat Dominicæ mansuetudinis patientiam, quem iam olim prædicentem suam passionem cum secretò correpsisset, dicens, *Propitius esto tibi Domine, ne fiat hoc,* audiuit ab ipso, *Vade post me satana, non sapis ea quæ Dei sunt.* Nouerat & qui generaliter ipse discipulis præceperat, dicens: *Audistis quia dictum est, Oculum pro oculo, dentem pro dente. Ego autem dico vobis non resistere malo. Sed si quis te percusserit in dextra maxilla tua, præbe ei & alteram.* His & similibus patientiæ documentis Petrus instructus nouerat, Dominum nequaquam hanc ei vindictam concessurum. Ne ergo reus inobedientiæ percutiendo fieret, si hoc responsum expectaret, præuenit ipsum, tanquam alijs in hoc quid agerent, præbens exemplum, vt pote Princeps vel primus eorum: vt sicut Iudas ex aduersa parte dux erat ad malitiam, sic iste in acie Domini dux fieret ad vindictam. Dum ergo alij quærunt an percutiant, iste percutere non differens materialis gladij vindictam usurpat sibi nequaquam commissam. Vnde & à Domino sine mora corrigitur. Quod tamen non rectè tunc gestum est in opere, in mysterio vacuum est assumptione. Luca quippe referente nouimus duos gladios in Cœna Domini fuisse. Sic quippe scriptum est de Domino, & discipulis, Et dixit eis: *Quando misi vos sine sacculo, & pera, & calciamentis, num quid defuit vobis? At illi dixerunt: Nihil. Dixit ergo eis: Sed nunc qui habet sacculum, tollat similiter & peram, & qui non habet, vendat tunicam suam, & emat gladium. Dico*

enim vobis, quoniam adhuc quod scriptum est oportet impleri in me : Et tūminiquis deputatus est. Etenim ea quæ sunt de me finem habent. At illi dixerunt: Domine, ecce duo gladij hic. At ille dixit eis, satis est. Et egressus ibat secundum consuetudinem in montem Oliuarum. Secuti sunt autem illum & discipuli. Sacculus maior est quàm pera, & ideò necessarius est ad plurimorum viaticum deferendum. Pera verò singulis sufficere videtur. Benè ergo Dominus, dum præsens hic esset, eorum necessitudinibus omnino prouidebat, ne quid eis in via deferre necessarium esset, vt post eius recessum à terris, tantò eius præsentia ampliùs amaretur ac desideraretur, quanto hi eam sibi magis necessariam experti fuerant. Sed nunc qui habet, hoc etiam deinceps tam vobismetipsis quàm alijs in pera vel sacculo prouidete sumendo: & qui non habet, subaudi sacculum vel peram vnde comparare gladium possit, vendat tunicam quæ magis necessaria videtur, vt hinc eum emat. Quod quidem iuxta literam, vt sequentia innuūt, ob hoc videtur dictum, vt cū armati ad locum traditionis venirent, tanto maior patientia Domini probaretur, quanto potentior ipse veniret in sua defensione. Finem habent, id est consummationem, vt ipsa omnia perficiantur in me quæ scripta sunt de me. Duo autem gladij illi siue in Cœna Domini fortuitu reperti, siue ab aliquibus discipulorum imminente passione ad protectionem illic allati, duos in Ecclesia gladios significant, materiale quo Rex vtitur in vindicta corporali, & spiritalem quo animam Sacerdos percutit per sententiam excommunicationis. Hunc spiritalem gladium Petrus assumens, auriculam eius dextram abscidit, qui aduersus Christum venit, quia qui Christi contrarius est præceptis, sententia feriendus est anathematis: & sic ei auricula dextra amputatur, dum à diuini verbi prædicatione remouetur, & ei Ecclesiæ aditus interdicitur. Sinistra quippe auris est, qua terrenis intendimus, dum die his instruimur. Dextera verò auris est, quæ his auditum præbet, quæ de celestibus, vel quæ ad salutem animæ pertinent, prædicantur. Quod ergo Petrus egit, quamuis in opere sit reprehendendum, in mysterio tamen est officiosum. Officium quippe dicitur actus cuique personæ congruus. Benè autem auris dextera non tam auris hoc loco dicitur quàm auricula, hoc est auris parua. Pauci quippe sunt electi, ad ea quæ de salute animæ dicuntur accommodantes auditum: & quod de cælestibus prædicatur vix capi potest, & pro subtilitate intelligentiæ, quasi tenui auris foramine ad animi peruenit intellectum. Quod verò de
duobus

duobus prædictis gladijs Dominus ait, *satis est*, & post amputationem auriculæ dixit, *sinite huc usque*, ad mysterium respexit rei significatæ. Duo quippe gladij superius distincti ad exercendam iustitiam sufficiunt Ecclesiæ, ut quemadmodum homo ex anima constat & carne, ita in his duobus duo exerceantur gladij, Regis quidem in corpore, sacerdotis in anima. *Sinite*, inquit discipulis, *usque huc*, ut videlicet contenti vestra potestate, non plus, ut dictum est, præsumatis vindictæ, quàm dextram auriculam amputare. Amputatam à Petro auriculam Dominus restituens, percussum sanat, quia eius est poenitentiam inspirare, qua peccator redeat, & verbo salutis reconciliatus intendat. O misericordia Saluatoris! ô impietas persequentis! Sanat percussum Dominus, & persequi non cessat sanatus. Beneficium suscipit, & in obstinatione sua ingratus persistit. Vident persecutores miraculum, nec persequendi immutant animum. Corrigitur persecutor, ut cesset persecutio.

CONVERTE, inquit Petro, *gladium tuum in vaginam. Omnis enim qui acceperit gladium, gladio peribit*. Qui acceperit, inquit, ad occidendum, non cui traditus est à potestate, ipse gladio dignus est interire. *An putas quia non possum rogare Patrem meum, & exhibebit mihi modo plus quàm xii. legiones Angelorum?* Ac si aperte dicat: Non egeo vestri duodecim hominum patrocinio, cui si vellem in auxilio adesset tanta Angelorum multitudo. In illa hora dixit Iesus turbis: *Tanquam ad latronem existis cum gladijs & fustibus comprehendere me. Cotidie apud vos sedebam in templo, & non me tenuistis. Cum cotidie vobiscum in templo fuerim, non extendistis in me manus. Sed hæc est hora vestra, & potestas tenebrarum. Hoc autem totum factum est, ut implerentur scripturæ Prophetarum. Tunc discipuli omnes relicto eo fugerunt. Adolescens quidam sequebatur eum amictus sindone super nudo, & tenuerunt eum. At ille relicta sindone nudus profugit foras ab eis. Latrones in viis insidias tendunt, fures in domibus. Quod autem ait, tanquam ad latronem, tale est tanquam ad eum, qui viam obsidens transeuntibus insidiatur, nec tutum aut liberum ei transitum promittit, cum tu Domine, ipsa sis potius via, qui dixisti: *Ego sum via, veritas, & vita*. Cotidie, hoc est frequenter in templo, ubi omnes conueniunt, sedens quasi securus, non in abscondito more latronis latens. Vnde & à latendo latro est appellatus. Et cum manifestè sic sederem & docerem, nec manus in me ausi estis extendere, nec tunc etiam cum eos flagellatos eijcerem de templo. Nondum*

enim venerat eius, hoc est tempus passioni congruum, quod in eius dispositione fuerat præfixum. Ex quo patenter ostendit, nihil eos in eo agere posse, nisi eo permittente ac disponente. *Hora vestra sicut & mea.* Vestra quidem ad perdendum, mea verò ad saluandum. *Potestas tenebrarum,* hoc est vobis cæcis à me ipso in me permissa. *Si enim cognouissent, nunquam gloria Domini crucifixissent.* Hoc autem totum, de captione s. Domini, & prodicione Iudæ. Hæc etiã verba non tam Euangelistæ quàm Domini esse videntur. Vnde & subditur, *Tunc discipuli omnes.* Ac si diceretur: Cùm eum audirent asserere de sua passione sancitum in Prophetis esse, nec vllatenus eis vindictam permittere, fugerunt innocente impijs derelicto, & lupis agno. Hoc enim & ipse prædixerat extestimonio Prophetiæ dicentis, *Percutiam pastorem, & dispergentur oves gregis.* Hunc adolescentem quidam intelligunt Ioannem per cæteris à Domino dilectum, qui cæteris iunior estimatur, nōnulli Iacobum fratrem Domini. Beda in Marco super hunc locum, quis iste adolescens fuerit, Euangelista non dicit. Item, neque aliquid vetat intelligi hunc Ioannem. Hieremias in minori Breuiario, Psal. xxxvi. Iudæi vim faciebant vel Petro cùm dicerent, *Nam & tu ex illis es:* vel Iacobo, qui cum traderetur, sindone relicta nudus aufugit. *Super nudo,* sub ipso existente, cum super sindonem nullum haberet indumentum. Fortassis enim ad dominicum dictum tunicam suã, vel aliud indumentum pro gladio emendo dederat, vel pro mutuando posuerat. Quod dicitur, *tenuerunt eum,* cùm ceteris iam dispersis eum sequentem inuenirent solum, patenter innuitur nequaquam eos fuisse ausos aggredi Apostolos, dum simul armati Domino assisterent.

C O H O R s ergo, & Tribunus, & ministri Iudæorum, qui apprehēderunt Iesum, ligauerunt eum, & adduxerūt ad Annã primum. Tribunus cohorti gētili præerat. Dicitur autē Tribunus siue à tribus, vel à tribubus, id est plebibus, & minoribus. Tres quippe huiusmodi prælatos dicitur primū Roman⁹ populus sibi præcepisse, vt quēadmodū Duces militibus, ita isti præessent plebibus. Ligauerunt eū tanquā ex consilio illius qui dixerat, *& ducite eum cautē,* ne videlicet posset effugere. O cæci! numquid is qui aurem tā citò restituit, vincula dissolvere nō posset si vellet? Sed vincula sustinet impiorum, vt in omni patientia probatus vincula solueret peccatorū. Ligatur à seruis Dominus ad horã, qui fortē armatū religaret perēniter satanã. Vincētus vt latro ducitur humano destitutus auxilio, cui Angelorū assistebat multitudo. Primū adducitur ad

Annā Pōtificē socerum Caiphę, qui videlicet Caiphas erat Pōtifex anni illius. Vices quippe suas diuersi Pōtifices iam facti agebāt per diuersos annos. Primum ad Annam illudendus ibi adducitur, deinde ad Caipham, tandē ad Pilatum, vt sapius illusus erubescētia cōfunderetur, sēpius afflīctus deficere cogeretur. Pōtificib. tanquā legis peritis primo præsēntatur: vt ab his, qui legem se cognoscere testabātur, secundū legem iudicaretur, & ab eis inciperet malitia, per quos potius esset refrenanda. Quamuis Caiphas administraret eo anno Pontificatū, non indignatur tamen prius adduci Iesum ad Pontificem alium, vt tantō liberius & securius damnaret reum, quantō eum conspiceret iam ab alio damnatum, vt sic in ore duorum testium staret verbum.

*SEQUEBATUR autem Iesum Simon Petrus, & alius discipulus. Discipulus autē ille notus erat Pontifici: Et introiuit cū Iesu in atriu Pōtificis. Petrus autē stabat ad ostium foris. Exiit ergo discipulus alius, qui erat notus Pontifici, & dixit ostiaria, & introduxit Petrum. Ceteri Euāgelistę de solo Petro referunt, quōd à longē sequeretur Iesum. Qui enim propinquior ei astiterat in captione, & in vindicta feruētior, aurem serui Pontificis amputādo; cū iā ceteri in fugā dispersi essent, & vt Marcus refert, adolescēs cōprehēsus relicta sindone nudis profugisset, iam tremefactus Petrus à lōge Dominum sequebatur, à quo eum penitus separari non patiebatur vis amoris: quia quātūcumque in aduersis trepidet Ecclesia per Petrum significata, etiam si timore in aliquibus membris cogatur eum ad horā negare; fundamētum tamen caritatis non sinit eam periclitari, nec à Christo prorsus separari. Quod verō Ioannes refert aliū discipulū Petro sequenti Christum fuisse adiunctum, quamuis nō exprimat quis ille fuerit, humiliter tamen se videtur innuere. Qui, vt beatus meminit Augustinus, talibus se verbis solet significare, vt videlicet dicat, *alius discipulus*. Nam & ipse solus, ceteris iam dispersis, vnā cum Domini matre ei crucifixo astitit, sicut & ipsemet Ioannes scribit. Quod enim Petrus plus Christum diligere & Ioannes plus à Christo diligi cum dicitur, & dicitur, maiorem eo tempore dilectionem vtrunque illi decebat exhibere.*

PONTIFEX ergo interrogauit Iesum de discipulis & doctrina eius. Respōdit ei Iesus: *Ego palā locutus sum mundo. Ego semper docui in Synagoga & in tēplo, quō omnes Iudaei cōueniunt, & in occulto locutus sum nihil. Quid me interrogas? Interroga eos qui audierūt, quid locutus sum ipsis. Ecce hi sciūt quae dixerim ego.* Hoc autē cū dixisset, vnus assistentiū ministrorū dedit alapā Iesu, dicens; *Sic respōdes Pontifici?*

Respondit ei Iesus: *Si malè locutus sum, testimonium perhibe de malo: si autem benè, cur me cadis?* Tanquam superfluam & inconuenientē Dominus arguit Pontificis interrogationē. Superflua quidē, quia quod palam dictū fuerat, & omnibus notum, documento nō eget. Incōgrua verò, quia nemo proprio cōmendādus est testimonio. Vnde benè Dominus eos, qui audierunt, potius quàm se super his censet interrogādos esse. *Hoc autē cū dixisset, unus assistēs ministrorum, &c.* Tāquam cōtemptor præcepti Pontificis, qui de se ad eius imperium testimoniū nō dedit, alapa ceditur. *Testimonium perhibe de malo*, quia ante pœnam criminis testes sunt inducēdi. Principes autem sacerdotum & omne consilium quærebāt falsum testimoniū cōtra Iesum, vt cum morti traderent. Et non inuenerūt, cū multi falsi testes accessissent. Nouissimè autem venerunt duo falsi testes, & dixerūt: *Hic dixit, Possum destruere templum Dei, & post tri-duum reedificare illud.* Tāquam occasionem hinc sumētes, quod dixerat Iesus, *Si malè locutus sum, testimonium perhibe de malo.* Falsos testes inquirunt de maledictis eius, qui veros inducere nō possunt, nec facta eius arguere. Duo falsi testes, tanquam in ore duorū falsorum veritas staret, falsos esse conuincuntur in his quæ Domino imponūt. Qui enim dixerat: *Soluite templum hoc*, nequaquam se illud facturū esse vel facere posse prædixerat, sed hoc ab illis potius esse faciēdum innuerat, non quidem de tēplo manu facto, sicut illi mentiebantur, sed de templo corporis sui morte per eos dissoluēdo. Et surgens princeps sacerdotum ait illi: *Nihil respondes ad ea quæ isti aduersum te testificantur?* Iesus autē tacebat, & princeps Sacerdotum ait illi: *Adiuro te per Deum viuū, vt dicas nobis si tu es Christus filius Dei viui.* Surgens Pontifex, & impatiens, cū non inueniret locum calumnię, motu corporis indicat insaniam mentis, & prouocat ad respondēdum, vt quamlibet occasionē accusandi inueniat. Tacet Dominus ad obiectum testimonium, quod tam manifestè falsum nulla ex occasione vel responsione censet dignum. Quod & Pontifex intelligens adiurando eum extorquere nititur blasphemiam, qua manifestè conuinci videatur, & summæ falsitatis reus, summam profitens veritatem. Adiuratus Dominus per Deum viuum ne tantæ maiestatis læsę reus fieret, veritatem profitetur pro veritate damnandus, qui & ipsa est veritas. Dicit itaque illis Iesus * * *

Cetera desunt.

IN DIE PASCHÆ, SERMO XII.

QUANTVM ad deuotionem vel honorem feminarum Paschalis exultatio sollempnitatis pertineat, tam veteris quàm noui Testamenti paginæ testantur. Veteri quippe Pascha in Ægypto à populo Dei primum celebrato, & ea nocte per submersionem Ægyptiorum fidelibus liberatis, Canticum gratiarum non solum viri, sed etiam feminæ, vt Exodus narrat, Domino persoluunt. Scriptum quippe ibidem est: *Tunc cecinit Moyses & filij Israel carmen hoc Domino, & dixerunt: Cantemus Domino, gloriose enim, &c.* Vbi & de cantu quoque feminarum seorsum adiungitur: *Sumpsit ergo Maria Prophetissa soror Aaron tympanum in manu. Egressæque sunt omnes mulieres post eam, cum tympanis & choris, quibus præcinebat, dicens: Cantemus Domino gloriose enim, &c.* Quod quidem feminarum Canticum quanto mysterio plenum describatur, diligenter attendite. Hic quippe Maria, quæ choro illi feminarum præcinebat, quæ cum virum habuisse non legatur virgo intelligitur, vt non solum vocè Cantici, sed etiam priuilegio dignitatis præiret cæteris, non solum cantasse memoratur sicut Moyses vel populus; sed etiam Prophetes esse describitur, & tympanum in manu tenuisse. Quid enim Prophetes nisi videns interpretatur? Cum visionem autem, id est reuelationem cantat, cui verborum quoque mysteria Dominus reuelat; cum in illa videlicet populi liberatione, & hostium submersione non tam corporum salutem attenderet, quàm animarum figurari prospiceret, quam quotidie in sacramento baptismatis diuina operatur gratia. Tympanum autem quod manu gestabat, mortificationem carnis insinuat, quam habebat in opere, quod eius Canticum Deo magis esset acceptum. Vnde & Psalmista in tympano Deum laudare nos adhortans, ait: *Laudate eum in tympano, &c.* Sæpe autem tympanum in ore magis quàm in manu habemus, cum sanctorum mortificationem carnis ita prædicamus, vt eam opere non imitemur. Tanto diligentius Mariæ Canticum describitur, quantò ipsum deuotius & Deo gratius fuisse intelligitur.

QVOD si noui quoque Testamenti reuoluamus seriem, &

in hac Maria & ceteris cum ea feminis alteram Mariam & cum ipsa deuotas feminas, quibus primum Dominus suæ resurrectionis gaudium exhibuit, competenter intelligamus, reperimus singula his conuenienter aptari. Illa quippe Prophetes memoratur, hæc Apostolorum Apostola dicitur. Illa corporale tympanum sumpsit, hæc spiritale habuit. Quo enim hæc viuentem Dominum ampliùs dilexerat, super eius morte ampliùs afflicta, & quasi mortificata fuerat. Vnde & prima de resurrectione cōsolationem meruit, quæ de eius morte ampliùs anxia & mœsta fuit. Apostolorum autem Apostola dicta est, hoc est legatorum legata: quòd eam Dominus ad Apostolos primum direxerit, ut eis resurrectionis gaudium nunciaret. Maria illa ceteris in Canticopræcinebat, & hæc ante alias gaudio resurrectionis primo est potita; & hæc prima nunciando præcinit quod prima viderat. Post ipsam verò ad ceteras feminas hoc gaudium resurrectionis priusquàm ad Apostolos vel quoslibet viros peruenit. Quas etiam Dominus ad Apostolos dirigens ait: *Ite, nunciate fratribus meis ut eant in Galileam, &c.* Vbi præposterus quidem ordo beatior & honorabilior pensandus est. In veteri quippe Pascha prædicti viri primitus, etiam postmodum feminæ cecinisse memorantur. In nostro autem Pascha, hoc est Dominicæ Resurrectionis die spiritale Canticum exultationis de apparitione Resurrectionis priùs feminæ quàm viri adeptæ sunt. Pascha autem Hebraicè, Phase Græcè, Latinè transitus dicitur. In veteri quippe Pascha Dominus per Ægyptum transiens, primogenitis interfectis, & per transitum maris rubri populum suum liberans, de nomine transitus hanc sollemnitatem insigniuit. Præsens quoque Dominicæ Resurrectionis dies non incongruè Pascha dicitur. Ipsa quippe immutatio humanæ naturæ de mortalitate ad immortalitatem, de corruptione ad incorruptionem, quidam in Christo transitus & motus fuit. Transit quippe in aliam statim, & quodammodo mouetur, quia in aliud quàm priùs fuerat, commutatur; veluti cum quod mortale erat fit immortale, & quod corruptibile & passibile siue mutabile in contrarium vertitur.

H VNC quidem transitum & Euangelista considerans: *Sciens* inquit, *Iesus, quia venit hora eius, ut transeat ex hoc mundo ad patrem, &c.* Quid enim nomine patris, nisi potentia diuinæ Maiestatis exprimitur? In hoc autem mundo, hoc est in præsentī vita ærumnosa & misera, quasi impotens & infirmus secundum

fragilitatem assumptæ humanitatis extiterat, & quasi à Patre, hoc est, diuinæ potentie virtute se humiliando descenderat, ac quodammodo recesserat, minor etiam Angelis in hoc effectus. Nunc autem in resurrectione omnem hanc infirmitatem deponens, ad Patrem ascendere vel transire dicitur, cum iam in se nihil infirmitatis vel potentie retinet: sed totum quod habet, potentie ac virtutis est, ut quasi iam totus in Deum transit, qui iam non ut ceteri homines, homo propriè, id est animal rationale mortale dicendus est. Quod & beatus Apostolus diligenter attendens, cum electionem suam à cæteris Apostolis distingueret, ad Galatas scribens ita exorsus est: *Paulus non ab hominibus, neque per hominem, sed per Iesum Christum, & Deum Patrem qui suscitavit eum à mortuis, &c.* Ceteri quippe Apostoli, ut beatus meminit Augustinus, à Christo tanquam homine, id est adhuc mortali, sunt electi. Hi verò postmodum Christo iam quasi toto Deo facti, id est iam diuinitus magis quàm humanitus in perpetuum viuentē, singularem sortitus est electionem. Quod quidem, ut ita dicam, deificationem, & immortalitatis gloriam statim Apostolus exponens, ait: *Qui suscitavit eum à mortuis.* Et attēde quod iuxta hanc immutabilitatis & stabilitatis gloriam, quam à die resurrectionis in Christo humanitas est adeptā, non incongruè tam dies ipsa Resurrectionis quàm Ascensionis Domini, quæ iam non de mortali & mutabili, sed de immortalī & immutabili celebrantur, feriarum variationem non habent, sed in eadem feria semper observantur. Ceteræ verò Christi sollemnitates à die conceptionis eius vsque ad Pascha, sicut & Sanctorum quælibet festiuitates per ferias variantur, ut modo videlicet in prima feria, modo in secunda vel in alia celebrētur.

SOLER nonnullos mouere, cur dies Dominicæ passionis, quæ maximè nostram operata est salutem, celebritatis non habeat exultationem, sed in mœrore potius quàm in lætitia peragatur: præsertim cum singulorum passionibus Sanctorum festiuam iocunditatem Ecclesia persoluat. Ad quod respondendum arbitror pro Dominicæ Resurrectionis gloria, quæ tertio die passioni succedit; diligenter ab Ecclesia id esse constitutum, ut quò maior præcesserit in nobis de passione Domini compassio, gratioꝝ de resurrectionis gloria sequatur exultatio. Vnde & Paschalis sollemnitatis lætitiæ non solum proximum mœstitiæ biduum præponitur, verum etiam totius Quadragesimæ abstinentia præmittitur. In qua quidem Quadragesima, voces illæ

gaudij, *Alleluia*, *Gloria in excelsis Deo*, & apud Clericos etiam, *Te Deum laudamus*, reticentur, & Paschalibus gaudijs reseruantur: ut eò tunc gratiores sint quasi nouæ; quominus antea fuerant vsitatæ. Constat quippe Quadragesimam Dominicæ abstinentiæ, ad cuius exemplum vel imitationem nostra est instituta, nequaquam eo tempore extitisse, quo nunc nostra peragitur: sed à die Theophaniæ ipsa incœpisse, ipsumque Dominum post baptismum statim ad desertum transisse, sicut Marcus commemorat, ibique quadraginta dierum & noctium abstinentiam habuisse; non in diebus proximis Paschæ, sicut nunc nostra fit Quadragesima; ea quam diximus congrua dispensatione, ut videlicet eò gravior Dominicæ Resurrectionis exultatio fiat, quo maior abstinentiæ maceratio, vel pœnitentiæ præcessit afflictio. Quid igitur mirum, si & biduum illud Dominicæ passionis ac sepulturæ in luctu compassionis præcipuè ducimus, ut post fletum gravior habeatur risus, nec iam Dominicæ pressuræ recordemur, resurrectionis gloria superueniente. Vnde & Apostolus: *Etsi Christum nouerimus secundum carnem, sed iam non nouimus*. Ac si aperte dicat, Etsi olim corpus Christi carnale, hoc est infirmum ac passibile seu mortale fuisse non dubitemus, iam ipsum quasi spirituale factum nouimus; nec iam tam infirmitatem illam quæ præcessit, quàm gloriam resurrectionis, quæ subsequuta est, attendimus. Quæquidem gloria si in ipsis quoque membris Christi, sicut in ipso capite iam esset completa, nequaquam eorum passionis vel dormitionis solemnem haberent celebrationem. *Cum enim*, inquit Apostolus, *venerit quod perfectum est, euacuabitur quod ex parte est*. Perfecta autem glorificatio Sanctorum in Resurrectione est futura, ubi tunc singulis erunt geminæ stolæ, quibus iam datæ sunt singulæ. Ad eò autem propter excellentiam Resurrectionis proximæ dies Crucifixionis sollemnitatem non habet, quòd ubi Paschæ sollemnitas imminet, festiua iocunditate Crucis venerationem celebramus; quod totum ad Dominicæ Passionis honorem pertinere dubium non est: propter quam solummodò hæc tota reuerentia Cruci exhibetur. Vnde & hymni vel cetera quæ de Pasione sunt, ibidem decantantur.

ILLUD quoque non prætermittendum æstimo, primitias dormientium Christum ab Apostolo dictum esse: quòd primus in hanc immortalitatis gloriam surrexerit. Nam etsi plures antecum, vel ab ipso, vel à Prophetis suscitati sunt, iterum mortui

mortui esse non dubitantur. Illi quoque, quos in testimonium suæ Resurrectionis suscitatos Euangelium narrat, cùm dicitur: *Et petra scissa sunt, & monumenta aperta sunt, & multa corpora Sanctorum qui dormierant surrexerunt, & exeuntes de monumento post resurrectionem eius, venerunt in sanctam ciuitatem, & apparuerunt multis;* nequaquam ex his verbis intelligendi sunt ipso die Dominicæ Crucifixionis resurrexisse, sed tunc tantum in fissura petrarum eorum sepulchra aperta fuisse, & postmodum ipso die Resurrectionis post eius resurrectionem suscitatos esse, & statim in ciuitatem venisse, & fidelibus apparuisse. Quod itaque dicitur, *exeuntes de monumentis,* post resurrectionem eius manifestè indicat non ante eos resurrexisse. Quod igitur Euangelista & apertionem sepulchrorum, & resurrectionem eorum, breuiter & succinctè commemorat, quasi simul facta sint, per anticipatiōnem rei futuræ narrationem suam breuiavit. Notandum quoque ad gloriam Dominicæ sepulturæ, de qua Isaias præcinit, *Et erit sepulchrum eius gloriosum,* non minimum profuisse tam horum fidelium quàm ceterorum Sanctorum sepulturas, qui Hierosolimis fuerant, ita nunc occultas esse, vt vbi fuerint ignoretur, nullasque ibi reliquias Sanctorum ibidem tumulorum apparere: sed omnes indè vel asportatas esse, vel Deum eas occuluisse, vt tota celebratio honoris Dominico vacet sepulcro.

Q V O N I A M verò infidelium multi in tantum de resurrectione hominum dubitant, vt nullatenus corpora nostra in puluerem reducta, & dissoluta iterum suscitari æstiment posse, decreuit diuina pietas non solum verbis, verum etiam rerum exemplis hanc nobis exhibere, ne quod in minimis sæpiùs operatur natura, nonnunquam in maximis facere diuinæ potentix dubiteretur gratia. Nemo quippe est qui Phœnicis naturam cognouerit, & quam ei gloriam sæpiùs morienti & suscitata diuina gratia contulerit, qui de nostra quandoque resurrectione futura diffidere debeat. Cuius quidem auis naturam & resurrectionis modos si ad Christum mysticè referamus, conuenienter singula ei conuenire videbimus. Hæc quippe auis quia vnica esse perhibetur, nec masculini, nec femininiexus esse cognoscitur; & quia pullos non generat, nequaquam nidificat. Quæ cùm sibi mortem post annos plurimos imminere præsenferit, struem quandam & domunculam sepulcri ex ramusculis aromaticis vel ipsis aromatibus sibi præparat, tanquam fœtorem cadaueris sui per fragrantiam exprimere sa-

ragat. In hanc itaque aromatum structuram se conferens expirare dicitur, & sole desuper æstuante, & aromata ipsa calefaciente, combustus in cinerem soluitur. Vnde post aliquot dies in modum apis suscitatus, paulatim alas & plumas induens in pristinum redit statum. Quæ singula nulli tã congruè vt Christo videntur conuenire. Quod enim vnica est auis, nec parem vel dignitate vel coitu cognoscit, tam excellentiæ quàm virginitati Christi pulcherrimè aptatur. Quis enim vnicus & dignitate singularis itaut Christus? In quo quoq; nec masculum, nec feminam Apostolus esse dicit: quia in Christi corpore, quod est Ecclesia, nullam dignitatem diuersitas sexuum operatur; nec sexuum qualitatem, sed meritorum Christus attendit. Nidum hæc auis vt ceteræ non curat, & Filius hominis vbi caput reclinet non habet, nec etiam in proprio, sed in alieno natus est. Sepulcrum sibi præparat, quo & aromata congregat. Et Dominus ipse per Ioseph siue Nicodemum tam sepulcrum sibi quàm aromata præparauit, quibus ipse hanc deuotionem inspirauit. Concrematio quoque Phœnicis à Christi mysterio non discrepat, in cuius typo carnes Paschalis agni non elixæ, sed assæ præcesserunt. Resurgens Phœnix formam apis induit, quæ corruptionem carnis nescit; quia in illa resurrectionis gloria neq; nubet neque nubentur, sed erunt sicut Angeli Dei in cœlo. Quam quidē gloriam & vos Christi virgines iam in terris adeptæ, nec tam humanè quàm Angelicè viuentes, tanto huius sollemnitatis diem deuotius colite, quantò eam, vt ante præfati sumus, ad excellentiam vestri honoris amplius pertinere constat.

EXPOSITIO DOMINICÆ ORATIONIS,

In diebus Rogationum, quæ Litania dicuntur.

SERMO XIII.

*Habetur &
alia huius
Orationis
Expositio su-
pra post Epi-
stolas.*



PRAESENTES Rogationum, id est Orationum, dies ex ipso quoque nomine suo nos nunc præcipuè ad orationem inuitant. Constat autem inter vniuersas Orationes eam tam dignitate quàm utilitate præminere, quæ ab ipso Domino discipulis tradita Dominica indè est appellata, & ob hoc à fidelibus potissimum frequentanda, vt de ipsa præcipuè Iacobus videatur dixisse: *Multum enim valet oratio iusti assidua.* Quantum autem valeat & possit oratio iusti, illud Hie-

ronymi super Hieremiam manifestè declarat, Domino ad Prophetam dicente: *Tu autem noli errare pro populo hoc, & non obfistis mihi, quia non exaudiam te.* Hieron. Quod autè dicit, *& non resistas mihi*, ostendit quòd Sanctorum oratio iræ Dei possit resistere. Vnde & loquitur ad Moysen: *Dimitte me, ut percutiā populum istū.* Quod si tantumdem oratio Sanctorum posse habeat, utpote Moyse vel Hieremiæ; quid de ipsa Domini sperandum est Oratione, quam ipsemet dictauit, ipse misericorditer instituit, ut sic eius iram vertamus in misericordiam? Sed quoniam orationis fructus aut nullus est, aut paruus, quam deuotio intelligentiæ non comitatur, cùm cordis potius quàm oris sit inspector Deus, iuuat Orationis huius præcipuè sensum aperire; ut eò magis fructuosa sit orationibus, quò deuotius intellecta dicatur. Quod quidem Apostolus diligenter attendens, Corinthijs ait: *Nam si orem linguâ, spiritus meus orat; mens autem, anima mea sine fructu est. Quid ergo? orabo spiritu, orabo & mente. Psallam spiritu, psallam & mente.* Lingua tantum sine spiritu orat vel psallit, qui flatu suæ prolationis verba tantum format quæ non intelligit. Mente insuper hoc agit, qui intellectum applicat his quæ dicit. Vnde & illud est beati Benedicti: Sic stemus ad psallendum, ut mens nostra concordet voci nostræ. Intantum autem verborum intelligentiam Apostolus commendat, ut nihil in Ecclesia dici permittat, quod non comitetur intelligentia. Alioquin eos pro insanis habendos iudicat, qui quod prædicant prophetare, hoc est exponendo interpretari minimè sufficiunt; aut benedictionibus, quas non intelligunt, amen supponit. Sic quippe consequenter adnectit: *Si ergo conueniat vniuersa Ecclesia in vnum, & omnes linguis loquantur, intrent autem idiotæ aut infideles, nonne dicent quod insanitis?* Idem suprà: *Ceterum, si benedixeris spiritu, quis supplet locum idiotæ? quomodo dicit amen super tuam benedictionem? quoniam quid dicas nescit.* Nam tu quidem benè gratias agis, sed alter non edificatur. Et post aliqua de vniuersis quæ in Ecclesia dicuntur concludens, ait: *Quid ergo? cùm conuenitis, omnia ad ædificationem fiant.* Et ad Ephesios: *Implemini, inquit, Spiritu sancto, loquentes vobismetipsis in Psalmis, & hymnis, & canticis spiritualibus, cantantes & psallentes in cordibus vestris Domino.* Et quisque ei loqui propriè dicitur, à quo eius verba intelliguntur, cùm hoc vnū sit verborum officium, ut in auditore generet intellectum. Tūc itaque nobismetipsis loquimur, cùm ex his quæ dicimus intellectis deuotionem excitamus mentis: & tunc corde pariter &

ore psallimus, cum quod exteriùs profertur, interiùs per intelligentiam capitur. Quid autem magis ridiculũ, quàm cum aliquid orando petimus, quod oramus ignoremus? nec vtrum salubria sint vel nociua discutere valemus? Duabus denique causis verbis quoque Domini constat orandum, vt hoc videlicet ad eius honorem, & ad nostram fiat vtilitatem. Ad eius quidem honorem, cum quod ab ipso postulamus, ab ipso potiùs quàm à nobis hoc esse fateamur quod petimus; & eius gratiæ potiùs quàm virtuti nostræ hoc acceptum tribuamus. Ad vtilitatẽ quoque nostram verba quoque commendantur, cum intellecta deuotionẽ excitant, & compunctionem generant, vt eo faciliùs audiantur à Domino, quò deuotiùs proferuntur à nobis. Solet quippe dolentium hoc esse naturale vel quasi proprium, vt cum hoc vnde dolent verbis exprimunt, ipsa in eis verba dolorem accendant, & suis querimonijs mens compuncta facile prorumpat in lacrimas ex ipsis suis quas refert miserijs. Sic & pœnitentes cum in orationibus suis ea quæ commiserunt referunt, ipsa eorũ verba quasi quædam punctiones mentes gementiũ vulnerant, vt lacrimas inde producant, vt medullatũ vel pingue sacrificiũ offerant.

CONSTAT autem orationem Dominicam tam à Mathæo quàm à Luca conscriptam esse, sed ab illo plenius, qui non solũ Euangelista, verum & Apostolus ipsam ex ore Domini audierit, quando eam Dominus in monte ipsi ceterisque simul Apostolis tradidit. Vnde nunc eam præcipuè nostra prosequitur expositio, quæ plurimũ auctoritatis, sicut & perfectionis habet, in VII. videlicet petitionibus distincta, cum illa Lucæ quinque sit contenta, quæ non Apostolis, sed cuidam discipulo memoratur tradita. Sic quippe in ipso scriptum esse Luca meminimus de Domino: *Factum est, dum ipse esset in quodam loco orans, ut cessauit dixit vnus ex discipulis eius ad eum: Domine, doce nos orare, sicut & Ioannes docuit discipulos suos. Et ait illis. Cum oratis, dicite, Pater, sanctificetur nomen tuũ. Adueniat regnũ tuum, fiat voluntas tua sicut in cælo & in terra. Panem nostrũ quotidianũ da nobis hodie, & dimitte nobis peccata nostra. Siquidẽ & ipsi dimittimus omni debenti nobis. Et ne nos inducas in tentationẽ.* Matheus verò Dominicã Orationẽ Apostolis tanquã doctõibus & perfectioribus perfectius traditã eam interserit sermoni ad eos in monte habito, quẽ & perfectiorẽ esse constat quàm ille fuerit, quem Lucas refert in cãpestrib. ad turbas factũ. Sic quippe scriptũ est in Mathæo, Domino ad Apostolos dicente: *Cum oratis, non eritis hypocrite, qui amant in Synagogis*

in angulis platearum stantes orare ut videantur ab hominibus. Amen dico vobis, receperunt mercedem suam. Tu autem cum orabis, intra in cubiculum tuum, & clauso ostio tuo ora patrem tuum in abscondito. Et pater tuus, qui videt in abscondito, reddet tibi. Orantes autem nolite multum loqui, sicut ethnici. Putant enim quod in multiloquio suo exaudiantur. Nolite ergo assimilari eis: scit enim pater vester quid vobis opus sit, antequam petatis ab eo. Sic autem orabitis: Pater noster qui es in calis, sanctificetur nomen tuum. Adueniat regnum tuum. Fiat voluntas tua sicut in celo & in terra. Panem nostrum substantialem da nobis hodie. Et dimitte nobis debita nostra, sicut & nos dimittimus debitoribus nostris. Et ne nos inducas in tentationem, sed libera nos a malo. Diligenter nos Dominus de oratione instruens, non solum verborum pronuntiationem tradit, verum etiam de intentione nos erudit, ut oratio fructuosa nobis esse possit.

Sic ut hypocrite, inquit, hoc est, non ea intentione qua illos constat orare. Quorum quidem intentionem aperiens, ait, ut videantur ab hominibus potius quam a Deo, dum eis placere appetunt, a quibus sic laudes vel terrena commoda requirunt. Qui ut a pluribus conspici possint, amant, inquit, in synagogis & in angulis platearum, hoc est in publicis conuentibus hominum hoc agere: Non dicit simpliciter eos ibi orare, quia ibi a pluribus videri possunt. Nec dicit in plateis, sed in angulis platearum, quasi conspectum hominum fugere videantur, se in angulis occultando, quem maximè appetunt. Stantes orant potius quam sedentes vel procubantes: ut eo religiosiores putarentur, quo se in oratione magis affligere creduntur. Perceperunt, inquit, mercedem orationis ab hominibus in presenti, non eam postmodum a Deo percepturi. Merces siue remuneratio orationis his redditur, cum laudes humanas vel terrena commoda, quas inde requirunt, adipiscuntur. Tu autem quicumque es cum orabis, &c. Cubiculum nostrum, in quo requiescimus, mens nostra est, a perturbationibus mundanis se-mota, ut Deo vacantes priorem habeamus orationem tota intentione nostra in eum directa. Ingressi cubiculum, ostium eius claudimus, ne ab alijs, sed a solo Deo videamur, cum modis omnibus prouidemus, ne sic per orationem nostram hominibus placeamus, ut Deo displicere mereamur. In abscondito magis quam in manifesto Deus videre dicitur, quia probator cordis & renum non tam quæ fiunt, quam quo animo fiant attendit, nec tam opera quam intentionem remunerat. Orantes autem nolite, &c. Hoc est, ne appetatis prolixitate verborum in oratione, ea qua infideles faciunt

intentione. Putant enim, quòd quanto prolixior verbis oratio sua fuerit, tanto magis à Deo exaudiri posset, quem non vbique præsentem æstimant, & verbis indigere putant, quib. ei quod volumus insinuemus. Nolite ergo in hac s. intentione similes ei fieri.

PATER noster. Octo autem partibus hæc secundū Mathæum oratio distinguitur. Quarum prima pars est inuocatio qua dicitur, *Pater noster qui es in cælis.* Deinde septem petitiones sequuntur. Tres verò priores ad Deum pertinent, quatuor verò reliquæ ad nos. Huius igitur ordinis intendentes expositioni, ipsum prius oremus Dominū, vt orationis suæ nobis conferat intelligentiam, quæ ipsam nobis faciat fructuosā. Cū dicit, *Pater*, potius quàm, *Domine*, nos ei per amorem potius quàm per timorem admonet deseruire. Timere quippe seruorum est, amare filiorum. Vnde & Apostolus Christianam seruitutem à Iudaica distinguens, conuersis iam Iudæis aiebat: *Non enim subditi estis iterum in timore, sed accepistis spiritum adoptionis, in quo clamamus, Abba pater.* Notandum verò hoc loco, cū dicitur, *Pater*, non vnā tantum Trinitatis personam intelligi, sed indifferenter ad Deum orationem dirigī, cui communiter à fidelib. per amorem deseruitur. Non mediocris videtur beniuolentiæ captatio, cū eum quem oramus patrem vocamus, quasi ex tam dulci nomine ad paternæ dilectionis affectum moueatur, & non tam quòd seruis quàm quòd filiis debeat recordetur. Cū dicit vnusquisque *noster*, potius quàm, *meus*, filium se Dei per adoptionem, quod commune multis est, potius quàm per substantiam, quod solius Christi est, profiteatur. Benè autem hæc orationem non singulariter, sed pluraliter ab vno quoque fit, cū dicitur, *noster*, vel *nostrum*, nobis vel nos, potius quàm *meus* vel *meum*, vel *mihi* vel *me*: quia tantò facilius impetramus quod postulamus, quanto per fraternæ dilectionis affectum alios nobis in orationem sociamus. *Qui in cælis es*, hoc est per gratiam inhabitas, in his qui quasi cælestes sunt, cælum potius quàm terram habitantes, & in superioribus, non in infimis cōstituri. De qualibus Dominus ait; *Cælum mihi sedes est*, hoc est anima sublimis virtutibus & desiderijs feruens spiritalibus.

SANCTIFICETVR nomen tuum. Post inuocationem petitiones adiungit, & quia plus gloriam Dei quàm vtilitatem nostram quærere nos conuenit (hic quippe finis esse debet in omnibus quæ agimus, vt glorificetur Deus) tres istæ petitiones vt diximus priores glorificationem eius postulant. Per Hezechielem

Dominus de reprobis Iudæis conquerens, & eos increpans, ait: *Nomen sanctum meum quod polluiſtis in Gentibus.* Quæ & Apostolus sententiam inducens, ait: *Nomen enim Dei per vos blasphematur inter gentes, sicut scriptum est,* in hoc ipso scilicet ut dictum est per Prophetam. Quemadmodum ergo nomen Dei pollui siue blasphemari, hoc est irrideri vel vilificari ab infidelibus videtur cum peruerſe agere videret eos qui se populum Dei vocabant: ita e contrario ipsum sanctificatur atque benedicatur, seu laudatur & glorificatur, cum eius populus sanctè ac religiose vixerit, & illud viuendo compleuerit, quod ipsemet præcipit, dicens: *Luceat lux vestra coram hominibus, ut videant opera vestra bona, & glorificent patrem vestrum qui in celis est.* De qua etiam glorificatione Dei, vel sanctificatione diuini nominis per eundem Prophetam consequenter Dominus adiungit: *Et sanctificabo nomen meum, quod pollutum est inter gentes, quod polluiſtis in medio earum.* Quod etiam qualiter fiat, sublequenter exponit, dicēs: *Et faciam ut in præceptis meis ambuletis, &c.* Sicut enim quantum in nobis est, in honoramus Deum, cum eius præcepta contemnimus; ita & e contrario nostra eum honorat obedientia. Nomen itaque eius, quod in se sanctum est, in nobis etiam sanctificatur, cum sic sub nomine eius viuimus, ut ipse, cuius filij esse dicimur, ex vita nostra glorificetur. Ut autem ita nomen eius sanctificetur in nobis, orandum nobis est ut expulso à nobis regno diaboli siue peccati. De quo dicit Apostolus: *Non regnet peccatum in vestro mortali pectore ad obediendum concupiscentijs eius.* Regnum Dei adueniat in nobis. Et hoc est quod secundo petimus dicentes: *Adueniat regnum tuum,* hoc est tuum in nobis ita sit dominium, ut tibi spontaneam in omnibus exhibeamus obedientiam. Quod ut fiat à nobis, *Fiat voluntas tua in nobis,* quæ est tertia petitio. Tua inquam, quæ errare non potest, vel mala esse. Tunc autem voluntatem Dei facimus, cum quod ipse approbat & nobis consulit implemus. *Fiat, inquam, sicut in cælo, & in terra:* ut ipsa etiam in cælum conuertatur terra. Hoc est sic à carnalibus & terrena quærentibus illa impleatur, sicut à spiritalibus & cælestia desiderantibus.

PANEM nostrum supersubstantialem da nobis hodie. Præmissis, ut dictum est, tribus petitionibus, ad honorem Dei pertinentibus, ad quatuor reliquas stilum conuertit, quibus quatuor postulatur virtutes, in quibus fidelis animæ perfectio consistit, prudentia s. iustitia, temperantia, fortitudo. Sicut autem prudentia tam tempore prior est quàm natura, ita & eius petitio prior

ponitur, cùm dicitur, *Panem nostrum &c.* quæ est petitio quarta. Sic iunge, vt ab omnibus tua voluntas impleatur. Has nobis virtutes impertire, quæ perfectionem confirmant animæ. Cibus animæ est, & spiritalis eius panis, intelligentia diuini verbi, de quo per Moysen dicitur. *Non in solo pane viuit homo, sed in omni verbo quod procedit de ore Dei.* Hunc panem, id est intelligentiam sacræ scripturæ qui non ruminat, & in eo diuisionē vngulæ non habet, immundum animal lex iudicat, quia nulla est mentis munditia, vbi eorum quæ præcipit Deus manet ignorantia. Verbum Dei ruminat, qui ipsum frequenter reuoluit, vt diligentius intelligat sicut scriptum est; *Et in lege eius meditabitur die ac nocte.* Diuisio autem vngulæ qua incedimus, discretio est quam in verbis diuinis habemus; cùm videlicet diligenter attendimus, quid iuxta litteram sit accipiendum, quid ad sensum mysticum vel moralem sit applicandum. Ex qua quidem intelligentia triplici, dum quasi quibusdam ferculis anima reficitur, vera prudentia illustratur, nec generare potest fastidium ista diuersitas ferculorum. Panis autem supersubstantialis hic intelligentia dicitur, quia longe hic cibus animæ excellentior est, quàm quodlibet substantiale, id est corporale alimentum, quod cum animalibus nobis est commune. Bene ergo nostrum dicit panem istum, hoc est proprium rationalium animarum. Quod dicit *hodie*, tale est ac si diceret, in hac præsentī vita, hic nobis viaticum ministra, ne deficiamus in via. Non sine admiratione videtur accipiendum quod apud nos in consuetudinem Ecclesiæ venerit, vt cùm orationem Dominicam in verbis Mathæi frequentemus, qui eam vt dictum est perfectius scripserit, vnum eius verbum ceteris omnibus retentis commutemus, pro *supersubstantialem* s. quod ipse posuit, dicentes *quotidianum*, sicut Lucas ait: præsertim cùm huius panis dignitas non minus exprimi videatur, cùm supersubstantialis dicitur, quàm cum cotidianus appellatur. Denique si arbitremur à Mathæo melius dicendum fuisse *quotidianum*, quàm *supersubstantialem*, quis hoc præsumptioni non imputet, vt non solum Apostolum, verum etiam Dominum corrigere velimus, cùm ille sic eam scripserit sicut eam audierat Apostolis tradi, & ab eis ipsam credimus frequentari sicut eis est tradita, & ab Apostolo in eadē etiam lingua prius scripta?

QVINTA autem petitio, quæ dicitur, *Et dimitte nobis debita nostra, sicut & nos dimittimus debitorib. nostris*, æquitatem postulat iustitiæ. Acquum quippe est, & hoc iustitia exigit, vt quales per misericor-

misericordiam nos exhibemus proximo, talem nobis inueniamus
 Deum. Debita dicit, pœnas pro peccatis debitas. Cùm dicit, *sicut*
& nos dimittimus alijs sua debita, ad eò nos ad misericordiam con-
 stringit, vt hæc oratio à nobis potiùs ad dānationem quàm ad sa-
 lutem dicatur, si misericordes non fuerimus. Debitores nostros
 hic dicit, sicut sequentia Euangelij patenter insinuāt, qui pro his
 quę in nos commiserunt quodam debito pœnæ astringuntur, vt
 pro his scilicet puniri sint digni. Quib. quidem hanc pœnā quan-
 tum in nobis est remittimus, cùm in eis ad satisfactionem paratis
 nullū propter hoc vindictā exerceri volumus. Et hoc est nos pœ-
 nas delictorum ad similitudinem Dei ignoscere, cùm illis de illatis
 iniurijs pœnitentibus & ad satisfactionem paratis, omnem eis vin-
 dictam relaxamus, vt iam eos in nullo penitus pro his puniri veli-
 mus. Alioquin nō sunt digni venia quamdiu impœnitentes in sua
 persistūt malitia, nec debere volumus, vt quādiu tales sint à pœna
 penitus absoluantur: nec nos velle cōuenit quod scimus fieri non
 posse, vel minimè conuenire. Sed dicis, qua ratione his qui iā verè
 pœnitent, nec in peccato persistunt, pœnæ pro peccato debeātur,
 maxime illæ quæ sunt damnationis æternæ? Aut si iam non debē-
 tur, quomodo dimitti possunt? Sed profecto cùm nullū peccatum
 credatur impunitum, nequaquam à debito pœnæ ipsi etiam pœni-
 tentes prorsus sunt absoluti: vt si non damnatorijs, saltē purgato-
 rijs in hac vita siue in futura subiaceant pœnis. Quarum quidem
 pœnarum, futuræ s. vitæ, quālibet grauiorē esse beatus asserit Au-
 gustinus, quàm quæcūque pœna sit vitæ præsentis. Has ergo pœ-
 nas, quæ adhuc pœnitentibus debētur, nobis dimitti postulamus,
 ne de magnitudine ipsarum per impatientiam ad peccata relaba-
 mur, sicut illi faciunt, qui supra id quod possunt tentati succum-
 bunt victi: à quo quidem patientiæ defectu, dum probamur in ad-
 uersitatibus, liberari precamur, cùm subditur: *Et ne nos inducas in*
temptationem. Talem temperantiæ virtutem rogat, ne suggestioni-
 bus voluptatum præbeam⁹ assensum. Tale est ergo, *ne inducas nos*
in temptationem, ac si dicatur: ne permittas nos ita tētari, vt in aduer-
 sitatibus deficiamus, vel prauis concupiscentijs succumbamus vi-
 cti. *Sed libera nos à malo*, hoc est da fortitudinem & robur animi in-
 uictum ad aduersa quālibet toleranda, ne motu aliquo vel pusilla-
 nimitate declinemus à rectitudine. Notandum verò quòd velut
 beatus meminit Augustinus in Enchiridion cap. xx. septem has
 petitiones, quas Mathæus distinxit, Lucas in quinque, quas posuit,
 breuiter comprehendit. Lucas quippe in duabus primis petitioni-

bus, quas & ipse ponit, hoc est, *Sanctificetur nomen tuum, & Adueniat regnum tuum*, tertiam comprehendit quam Mathæus distinguit, scilicet, *Fiat voluntas tua*; tanquam arbitremur illa non fieri, nisi hoc etiam compleatur. Vltimam verò, quam Mathæus supponit, & Lucas tacet, *Sed libera nos à malo*, ita ex præcedenti pendere Lucas autumat, ut illi in vnam petitionem sit coniungenda. Quod & ipsa innuit coniunctio, *sed*, interposita. *Amen*, id est fiat.

DE CRUCE, SERMO XIV.



QUANTA deuotione Dominicæ Crucis venerationem prosequi debeamus, beatus Apostolus ad Galatas scribens diligenter declarat: *Mihi autem absit gloriari, nisi in Cruce Domini nostri Iesu Christi*. Tanto quippe amplius Crux Dominica, in qua sumus redempti, à nobis est glorificanda: quantò veriùs ex hoc genere redemptionis homo redemptus gloriari valet. Quid est autem gloriari, nisi quemcūque se aliquid magnum & pretiosum æstimare? In nullo autē quælibet res quāti sit ita cognosci potest, sicut in precio eius. Sic & homo quāti fuerit apud Deum, quantam semper sollicitudinem diuina super eū gesserit clementia, quātæque pietatis visceribus eum sit amplexatus, pretium ipsum pro redemptione hominis datum patēter insinuat. Quod diligenter Apostolus intuens, & de hoc singulariter glorians, sicut suprà meminimus, ait: *Mihi autem absit gloriari, &c.* Ac si patenter dicat: Gloriētur alij in quocumque voluerint, preciosos se æstimēt quibuscumque diuitijs vel honore. Mihi autem absit gloriari nisi in hoc redemptionis meæ genere, quod apud infideles ignominiosius iudicatur & vilius. Quo enim Dominus indigniora pro homine sustinuit, digniorē apud se & gratiorē eū haberi demonstrauit. Nullū autem patibulū execrabilius cruce antiquitus cēsebatur, nulla mors adeò turpis & detestabilis iudicabatur. Vnde & hoc genus patibuli non solum ad pœnam Christi, verum etiam ad ignominiam impij eligere decreuerunt, sicut ante per sapientiam de ipsis prophetatum fuerat dicentibus, *Morte turpissima condemnemus eum*. Et Apostolus cum dixisset, *factus obediēs vsque ad mortem*, quasi parum hoc videretur, nisi etiam ipsum genus mortis tanquam abhominabile determinaret, statim adiecit, *mortem autem crucis*. Quod est dicere, non solum vsque ad mortē, sed vsque ad tam ignominiosam mortem, qua specialiter blasphemē

mi, hoc est qui in aliquam blasphemiam Dei præsumebant, puniebantur. Vnde & Domino improperantes quòd se filium Dei diceret, aiebant: *Blasphemauit. Quid adhuc desideramus testes?* Et quasi hoc genus mortis ex blasphemia promeruisset, exclamabant: *Crucifigatur.* De quo etiam genere mortis, quàm detestabile videretur, & diuina maledictione plenum, Deuteronomij liber his verbis proficitur. *Quando peccauerit homo quod morte plectendum est, & adiudicatus morti appensus fuerit in patibulo, non permanebit cadauer eius in ligno, sed in eadem die sepelietur, quia maledictus à Deo qui pendit in ligno: & nequaquam contaminabit terram tuam, quam Dominus dederit tibi in possessionem.* Cuius quidem capituli memor Apostolus cùm Galatis scriberet ait: *Christus nos redemit de maledicto legis, factus pro nobis maledictum, quia scriptum est, Maledictus omnis qui pendet in ligno.*

Ex his itaque verbis liquidè monstratur, quàm ignominiosum Crucis patibulum apud Iudæos præcipuè habebatur, qui solam literę superficiem, non mysticos sensus in lege perquirunt. Sed quid est magis absurdum, quàm omnes eos diuinæ maledictionis damnatione dignos credi, qui hoc genere mortis potius quàm alio puniuntur? Non enim modus pænæ, sed lapsus culpæ reum efficit. Vnde & scriptum est: *Iustus qua morte præoccupatus fuerit, in refrigerio erit.* Sin autem velamen Moysei detrahentes reuelata facie legem interiùs speculemur, conuenienter hanc maledictionē tam singulis hominibus per culpam quàm ipsi Christo per pœnam poterimus applicare. Pro peccato quippe priorum parentum, quod in ligno vetito commissum est, omnes indè damnationem incurrimus, & tanquam in ligno morimur, qui cum originali peccato nascimur iuxta quod & Dominus Adā increpās, & quasi maledictionis sententiā intorquēs ait: *Maledicta terra in opere tuo.* Omnes itaq; sententiam hanc damnationis ab Adam cōtrahētes, quasi cadauer sine vita nascimur & permanemus, antequā ex aqua & spiritu renati, ab hac animæ morte viuificemur. Cadauer autē suspensione ligni mortuū eadem die sepeliri præcipitur, quia in hac ipsa vita præsentī qua nascimur, cōsepeliendi Christo per baptismū sumus; ne videlicet terra nostra cōtaminetur, hoc est, ne in cōtagio terrenę generationis remaneamus, si regenerati specialiter nō fuerimus. Benè itaque dicitur maledictus à Deo qui pendet in ligno, quia etsi nondum propria incurramus peccata, illud tamen vnum quod originale dicitur peccatū in ligno, vt dictum est, sciētię boni & mali cōmissum ad dānationē nostrā sufficit, cui diuino iudicio

deputati sumus, & ob hoc à Deo quadam maledictione percussi. Quæ quidem maledictio, & in Christum retorquetur per pœnam, quem percussus à Deo & attritus propter scelera nostra Propheta longè ante prædixerat. Et sicut ceteri in ligno, ut dictum est, mortem animæ incurrerunt, sic iste mortem corporis, ut per hanc ab illa nos liberans maledictionem nostram in benedictionem cōuerteret. Vnde & Apostolus cum præmisisset, *factus pro nobis maledictum, sicut scriptum est*, statim adiecit, ut in gentibus benedictio fieret. Sicut ergo in ligno, id est pro trāsgressionem ligni vetiti, Christus corporaliter est mortuus, ita & corporaliter per pœnam à Deo maledictus, hoc est ex sententia Dei pœnæ huic deputatur. Hinc enim & peccata nostra suscepisse seu portasse dicitur, hoc est peccatorum nostrorum pœnam tolerasse, & sic quodammodo nostræ maledictioni communicasse. Cuius quidem pœnam vel passionem, qua perductus est ad mortem, si per singula reuoluamus, reperiemus ea quæ mortem præcesserunt, longe grauiora & intolerabiliora morte ipsa fuisse. Imminente quippe passionis articulo in tantam animam eius anxietatem legimus * ut sudor eius fieret tanquam guttæ sanguinis decurrentis in terram. Qui enim nouerat quantus passionis dolor in illa dissolutione corporis & animæ futurus esset, mirabile nō est si iuxta infirmitatem assumptæ humanitatis hanc supremam passionem amplius horreret. Captus autem postmodum & tentus, & insuper Ioanne referente vinctus, ad sacerdotes primū adductus est, ubi, sicut Marcus meminit, cœperūt quidā conspuere eum, & velare faciem eius, & ut scribit Mathæus in eā conspuere, & tam colaphis quàm alapis ipsum cædere, atque illudere dicētes; *Prophetiza nobis Christe quis est qui te percussit?* Vbi inter cetera, cum à Pontifice interrogaretur de discipulis suis & doctrina eius, & ipse respondisset, *Ego palam locutus sum, &c.* Vnus assistens ministrorum dedit alapam ei, dicens: *Sic respondes Pontifici?* Hæc autē in nocte captionis suæ constat in eum facta esse. Mane autē facto, de Concilio Sacerdotum ad Pilatum præsidem ipsum adhuc vel iterum vinctum perduxerunt. Quo adducto, ut Mathæus ait, stetit ante præsidem. Stetit, inquam, ut dictum est, ligatus, potius quàm sedit, ut videlicet in utroque, tam statione scilicet quàm ligatione, cū affligerent. Quanta autem constantia illic persisteret, patenter ostēditur, ubi interrogatus à Pilato, responsū ei non reddobat. De qua eius confidentia, & quasi de suo contemptu Pilatus admirans: *Nescis*, inquit, *quia, potestatem habeo crucifigere te, & potestatem habeo dimittere te* qui etiam à Pilato ad Herodem missus, cum multis

ab ipso quoque interrogaretur sermonibus, nihil ei respondebat. Vnde tam ab ipso quàm ab exercitu eius spreus & illusus est, veste alba indutus, & sic ad Pilatum remissus.

A PRINCIPIBVS itaque interrogatus, qui ad eum liberandum plurimum poterant, responsione sua dignos eos non censuit; qui tamen vt suprâ meminimus à ministro Pontificis percussus, blandam ei responsionem non negavit, dicens: *Si malè locutus sum, perhibe testimonium: si autem benè, cur me cadi?* Quanta denique apud Pilatum sustinuerit, non ignoramus. Qui cum tertio, vt Lucas meminit, eum innocentem esse confessus esset, idque ipsum ex ablutione manuum demonstraret, ipsum tandem flagellauit, quasi illud implens quod antea dixerat, *Corripiam eum & dimittam*, vt sic saltem ad misericordiam Iudæorum flecteret sœuitiam. Quod cum efficere non posset, cælum eum flagellis tradidit eorum voluntati. Tunc milites, vt Mathæus refert, suscipientes eum, congregauerunt ad eum vniuersam cohortem. Quibus quidem congregatis, & hoc ei obijcientibus & improperantibus quòd se Regem faceret, quasi in modum Regis illudentes ei, exutum vestimentis suis vili purpura induerunt, & pro diademate spinis coronauerunt, & pro sceptro arundine ipsum insignierunt, & genu flexo ipsum quasi Regem salutantes, ac dicentes: *Aue Rex Iudæorum*, simul & in faciem eius iterum spuebant, & caput eius arundine percutiebant. Item Pilatus, vt Ioannes refert, exiens ad eos, ipsum secum tam crudeliter tractatum adduxit, tentans verum ex hoc si quomodo eorum duritiam mollescere posset, & ad pietatem inclinare. Ad quos quidem egressus: *Ecce, inquit, adduco eum vobis foras, vt cognoscatis quia in eo causam nō inuenio.* Exijt ergo Iesus portans spineā coronam, & purpureum vestimentum, & dicit eis, *Ecce homo.* Ac si diceret: *Ecce quod humanæ infirmitatis est, in me vobis apparet, non quod diuinæ fortitudinis.* Postquam autem, vt prædictum est, illuserunt ei, exuerunt eum purpura, & induerunt vestimentis suis, quibus iterum nudauerunt eum cum crucifigendus esset: quæ postea inuicem partiti sunt, sicut Ioannes commemorat. Susceptus tandem vt ad crucifigendum duceretur, ipsum quoque crucis patibulum gestare compulsus est, vt nec interim ei parceretur, ipso Crucis pondere prius afflictus, quàm in ea crucifixus. Qui cum pro vinculis suis vel pro prædictis afflictis expeditè vel celeriter nō gustaret, moras mortis eius impij non ferentes, quendam alium Simonem nomine crucem

coegerunt portare. Crucifixus denique ad summam eius ignominiam inter latrones constituitur, ut ex similitudine pœnæ simul reus crederetur culpæ. Pœna autem huius patibuli quanta sit, nemo est qui possit ignorare. Quæ tanto prolixior est, nec statim suspensum interimit; quantò eius passio grauior diutius affligit. Quid etiam hoc patibulo grauius, ubi totum corpus ita clauis confixum extenditur, ut non minus ex pondere suo, quàm ex ipsa fixura clauorum suspensus crucietur? Vnde rectè hoc vnum mortis patibulum, crux à cruciando cognoscitur dictum.

Eccē seriem Dominicæ passionis, prout memoriæ occurrit, ex Euangelicis collegimus scriptis; quæ super singula ut dictum est consideremus, ea quæ mortem præcesserunt ipsa morte profecto grauiora, vel intolerabilia fuerunt. Vnde nec ut moreretur, frangi ei crura sicut latronibus vel lancea vulnerari necesse fuit, qui ad celerem mortem ex tot & tantis, quæ ante crucem tulerat, perductus est. Conferant martyres quæ passi sunt, & videant in comparatione Dominicæ passionis nulla esse vel parua quæ passi sunt. Vnde & benè in eius persona suspirantis, Hieremiæ lamentatio proclamat: *Attendite & videte si est dolor similis sicut dolor meus.* Attendant hoc mulieres, & ut Ezechiel meminit, facta voce supra firmamentum, stent animalia, & submittant alas suas. Quid autem firmamentum aliud, quàm beati Angeli ceteris corruentibus confirmati, est intelligendum? Qui cum nobis adhuc mortalibus dignitate quadam sint superiores, longè tamen supra eos Deus homo præminet. Fit autè quandoque nobis vox de firmamento, cum videlicet de illa beatitudine Angelorum, quæ nobis promittitur, aliquid prædicatur, vel interiori verbo mente concipitur. Desuper firmamentum alia fit vox, cum ea quæ Deus pro nobis humanitus gesserit, corporis vel mentis auribus concipitur: quod profecto cum fit, quasi in admiratione vel in timore sancta stant animalia, & alas deponunt, dum in consideratione tantæ rei propriæ virtutes illis vilescunt. Cùm autem de firmamento, ut dictum est, aliquid audiunt, quasi erectas adhuc alas habent; quia pro magno vel mirabili non ducunt, quòd per tot agones ad illam Angelorum beatitudinem perueniunt, quam illi per Dei gratiam humilitate seruata perceperunt. Ecce Martyres multa propter Deum passi, & in magnis virtutibus probati, plurimam gloriam di occasionem viderentur adepti, nisi occurreret Dominum

vel tanta vel maiora pro ipsis fuisse passum. Quod profectò dum occurrit, statim ut dictum est, summittunt alas, pro nihilo ducentes quæ passi sunt serui in considerationem Dominicæ Passionis. Quæ tantò grauior ac miserabilior, quanto ignominiosior extitisse probatur. Ut enim omittamus cetera, quis tam turpiter, quis tam diu illus, ut ipse? De captione quippe primum ad Iudæos adductus, post tot colaphos & alapas, quos velata facie suscepit, impijs impropertantibus ut prophetaret, ita est consputus & sputis deformatus, ut iuxta Isaiam non esset ei species neque decor: & pro tanta vilitate nouissimus omnium videretur virorum. Qui & inde postmodum Pilato presentatus, hanc quoque iniuriã cum ceteris ibidem sustinuit. Quis vnquã Martyrũ ita sputis oblitus & deformatus iniuriari legitur? Quis totiens illus modo apud Iudæos, modo apud Pilatum vel Herodem nunc expoliatus, nunc indutus suis vel alienis vestibus, & per tot loca tam impiè distractus, ut ab omnibus magis illuderetur? Quis denique Sanctorum ipsum, quo necandus esset, patibulum baiulare compulsus est? Quid ad hoc, fratres, cogitare, vel dicere valemus, nisi illud Propheticum in nobis semper ingemiscere: *Quid retribuam Domino pro omnibus quæ retribuit mihi?* & pro viribus nostris ad vicem tantæ caritatis eius reddendã nos præparare, sicut & subditur: *Calicem salutaris accipiam, &c.* Quod quia virium nostrarum non est, ut calicem salutaris accipiamus, hoc est passioni Iesu patiundo communicemus, & nostram quoque crucem baiulando eum sequamur; ipse sua gratia nobis conferat, ad honorem cuius ipsam, qua redempti sumus, Crucem die veneramur hodierna, Amen.

IN DIE ASCENSIONIS, SERMO XV.



ASCENSIONIS Dominicæ festiua iocunditas, quædam est ab Angelis Christo triumphanti pompa victorialis exhibita. Ipse quippe Rex hominum pariter atque Angelorum, alteram ab hominibus, alteram ab Angelis huiusmodi venerationem sicut iustum fuerat suscepit. In Ramis quippe Palmarum Hierosolymam veniens, Imperiali more à turbis cum laudibus est susceptus, tanquam Rex Israel & heres Davidicæ stirpis ab eis salutatus ac benedictus. Cuius humili, cui insidebat, iumento deuotione populi non solum

ramos arborum, sed etiam propria vestimenta substernente, aliquid supra consuetudinem terrenorum Regum hæc eius veneratio habuit. Inde ad templum tanquam ad proprium palatium populis laudes acclamantibus deductus, sacrilegium negotiatorum inde potenter expellens, tanquam Regia usus potestate ipsum expiauit, & diuina virtute cæcos illic illuminans miraculorum beneficijs domum suam consecrauit. Sicut autem ibi tunc ab hominibus more triumphalis pompæ, vt diximus, est honoratus; ita hodierna die ascēdens in cælum ab Angelis ei occurrentibus est susceptus. Quorum duo assistentes in albis sollemnibus pia allocutione discipulos consolantur, dicentes: *Viri Galilæi, &c.* Huius autem ascensus mirabilem gloriam illis mutua laude concinentibus, cum alijs admirantibus sæpius quærent, *Quis est iste Rex gloriæ?* alij respondentes dicebant, *Dominus fortis & potens, Dominus potens in prælio.* Et rursum, *Dominus virtutum ipse est Rex gloriæ.* Horum duplex responsio, quorum & duplex præcesserat iussio, bis ita dicentium: *Attollite portas Principes vestras, & eleuamini portæ æternales.* Super quo alij hoc audientes, quasi quadam admiratione commoti, geminata iussioni geminam subnectunt interrogationē, cum videlicet aiunt: *Quis est iste Rex gloriæ?* Legimus Dominum eiectis à terrestri Paradiso primis hominibus, diligentem atque solertem Angelorum custodiam, quæ minimè falli possit, ibi constituisse. Vnde & benè Cherubim, id est plenitudo scientiæ à Propheta vocantur. Hi ergo gladio quodam flammeo atque versatili eiectos illos ab aditu paradisi arcentes atque inhibentes, hoc ipso gladio quasi quibusdam portis introitum clausurant atque obstruxerant paradisi. Ad quos quidem Principes, id est Angelos ibi ad custodiam illam præsidentes in figura cælestis Paradisi, hodie nobis in ascensu Christi reſerati, nunc dicitur: O vos Principes, id est præpositi Paradisi custodes, attollite iam vestras portas, id est summouete illam vestram quam diximus obstruentem clausuram, & illum versatilem auertite gladium, qui proinde versatilis, id est mobilis potius quàm fixus est dictus, quia quandoque auertendus & summouendus est. Et o vos portæ eleuamini æternales, id est sublatae & summotæ in æternum estote, & introibit Rex gloriæ: non quidem terrenus, sed qui ad cælestis gloriæ celsitudinem suos de potestate diaboli creptos in hoc hodierno triumpho secum pariter introducat. Super quo tam glorioso & admirabili triumpho, alijs quæ-

rentibus

rentibus, & cum summa admiratione dicentibus: Quis est iste, ut dicitis, tantus Rex, quem in humana forma, & à nobis olim despecta super omnem naturam, id est Angelicam conscendere videmus altitudinem; vel unde inferior natura hanc adipisci meruit dignitatem? Alij respondentes concinunt. *Dominus iste est fortis & potens, Dominus potens in praelio.* Fortis scilicet ad omnia aduersa toleranda, nec remissus in aliquo; quamuis in forma humanæ infirmitatis appareat. Potens, sicut statim determinans, subiungit, *potens in praelio*, nec ita ut verus Adam à tentante superatus diabolo, sed ipso mortis auctore morte sua triumphato, quasi spoliatorum trophæa in suis, quos eruit, captiuus, nunc refert gloriosa: sicut & de ipso olim Psalmographus præcinerat dicens, *Ascendens in altum captiuam duxit captiuitatem.* Captiua quippe captiuitas genus humanum bis à diabolo captiuatum dicitur. Primò videlicet eius persuasionem à Paradiso exulatum, & præsentibus ærumnis expositum, postmodum de hac luce ad inferni tenebras dejectum. Suos itaque, ut diximus, bis captiuatos, nunc secum ad cœlestia perducens, quasi victor hodie de antiquo hoste superato, triumphat. Dominus ipse virtutum, non solum videlicet hominum quos sic liberat, verum etiam supernarum virtutum; per quas ubicumque vult operatur magnalia. Conferamus autem cum gloria huius triumphi illam, quam diximus venerationem in Ramis Palmarum ei primum exhibitam, & qua similitudine iungantur per singula videamus: ita tamen ut hanc illi longè præcellere consideremus.

Ut igitur Ioannes refert, illa prior generatio pro resurrectione Lazari ei facta est, cui nec ipse Lazarus cum eo Hierosolimam veniens defuisse credendus est. Sicut ergo resurrectio Lazari illud præconiū laudis ab hominibus meruit, ita prædictæ liberationis captiuitatis triumphales hodie laudes ab Angelis habuit. Et ibi quidem Hierosolimam veniens, ut dictum est, benedictus à turbis. Hic autem cœlos ascendens benedixit discipulis, ut tanto excellentior hæc dies habeatur, quanto felicior ex benedictione diuina efficitur. Nec solum qui præibant, verum etiam qui sequebantur, laudes ibi præcinebant. Sic & hodie tam præcedentium Angelorum chori, quàm captiui liberatorem suum sequentes, summa & ineffabili iubilatione victori laudes acclamabant, sicut scriptum est, *Ascendit Deus in iubilatione, & Dominus in voce tubæ*, id est cum signo victoriæ. Denique

illo ibi ingrediente ciuitatem, cum tanta turbæ circumstantis exultatione, alij admirâtes quærebant: *Quis est hic?* Et alij quærentibus respondebant: *Hic est Iesus Propheta à Nazareth Galilee.* Sic & in hodierno triumpho, alijs Angelis vt diximus interrogantibus, *Quis est iste Rex gloria?* alij respondebant, *Dominus fortis, &c.* Turbis comitantibus vsque ad templum, id est propriæ domus palatium, Dominus perductus est. Et sicut legimus in Daniele, in illo Angelorum comitatu quasi oblatus paternæ maiestati, vsque ad antiquum dierum filius hominis eductus ab Angelis peruenit. Et ibi quidem pigro iumento insidere, hîc leui nubi describitur præsidere. Tunc quippe adhuc corruptibile corpus, quod aggrauat animam, id est mortale gestabat. Iâ verò omni mortalitatis pōdere deposito, nubi præsidere voluit, & sic ascendere; vt quantæ leuitatis hæc graua, quæ nunc gestamus, corpora futura sint, in se nobis primum exhiberet. Sicut enim nascendo ex nobis, & patiendo pro nobis summū nobis honorem vel caritatem exhibuit; ita postmodum resurgendo, vel discipulis apparendo, & nunc denique ascendendo futuram corporum gloriam demonstrauit: vt tantò libentiùs corporalium passionum agones sustineant membra, quantum in ipso capite habent experimentum de futura corporum gloria. In resurrectione quippe corporum immortalitatem nobis exhibuit. Ianuis verò clausis ad discipulos intrans appariturus illis, subtilitatem eorum qua quælibet solida penetrare possint ostendit. Nunc verò super altitudinem cœlorum ascendens quantā sit habitura leuitatem demonstrat, vt videlicet vbicumque voluerit animus, illuc statim sine difficultate transferatur corpus. Vt igitur Apostolus ait, ipsum nunc mente sursum quæramus, vbi est in dextera Dei sedens, vt postmodum etiam corpore ad ipsum, nunc mente mereamur peruenire, non tam ascensuri quàm ab ipso trahendi, cui honor est & gloria per infinita seculorum secula, Amen.

IN OCTAVA ASCENSIONIS, SERMO XVI.



MINIMIS Dominus inchoans, vt ad maiora perueniat, tanquam à minore ad maius argumentum ducēs, fidem ex infimis astringit summis; vt cū in istis magna viderimus, in illis talia mirari desistamus. Vnde contra

infidelium errores de his, quæ in seipso mirabiliter gessit, quædam in creaturis exempla præmiſit, quibus quælibet hereseos scismata scindi ac dissipari possint. Verbi gratia, Partum virginis adeo nonnulli abhorruerunt heretici, vt dicerent; Si virgo peperit, phantasma fuit. Cuius quidem erroris vulnere medicamentum Dominus apponens, nonnumquam equas, vt beatus in Ciuitate Dei asserit August. à spiritu ventorum concipere facit; quò mirari desistamus, si ex Spiritu sancto virgo cõceperit. Coruos quoque in osculo concipere & numquam coire, pluribus non esse ignotum nouimus. Apes quoque sine detrimento suæ integritatis fructu non priuantur prolis. Cotidie insuper ex insensibilibus & vilissimis rebus, vermes innumeros, & animantium diuersa genera procreari videmus. Vnde nec vermi comparari Dominus dedignatur, cui dicitur: *Noli timere vermis Iacob.* Qui etiam de semetipso dicere non erubescit: *Ego sum vermis, & non homo.* Desperationem quoque resurrectionis Phœnicis defuncti sæpius in tanta viuificatio tollit. Denique & Domini Ascensionem raptus Helix præcessit, qui mortale adhuc corpus & corruptibile gestans, curru igneo translatus est in paradisum. Constat ignei elementi naturam ceteris longè subtiliorem esse atque leuiorem. Si ergo Helix corpus adhuc terrena grauitate ponderosum illa ignis leuitas sustinere, nec comburere potuit, quid mirum si Christi vel nostra corpora iam immortalia facta, nec tam animalia quàm spiritualia dicenda, illud quoque igneum & supremum cœlum, quod agnis contegi constat, conseruare possit illæsa.

QVONIAM autem ad Ascensionis Dominicæ fidem, Helix translationem induximus, iuuat denique mysterium huius ascensionis ab Helia sumere. Quem ergo rectiùs Helias ex ipsa quoque nominis interpretatione vel affinitate, quàm Christum verum animarum solem figurat? De quo, vt beatus meminit Gregorius, in Cantico Abacuch Prophetæ ita continetur: *Elevatus est sol, & luna stetit in ordine suo.* Post ascensionem quippe Domini missus ab eo Spiritus sanctus, sicut ipse promiserat, dicens: *Nisi ego abiero, &c.* Ecclesiam, quæ per Lunam significatur, intantum ordinare studuit, vt peruersos in ea nequaquam toleraret, sed statim à palea grana purgaret: sicut per Petrum de Anania & Saphira egit. Quod & Petrus Ananiam increpans profiteretur. *Cur, inquit, tentauit Sathanas cor tuum,*

mentiri te Spiritui sancto? Et post aliqua: Non es mentitus hominibus, sed Deo. Cum enim Veritas Apostolis dicit: Non enim vos estis qui loquimini, sed spiritus Patris vestri qui loquitur in vobis, quotiens spiritus aliquid occultum reuelat fidelibus, de quo interrogant, ipse potius quàm ipsi hoc agere dicitur, cum inspiratione vel suggestionem hoc faciunt. Sublato etiam Helia in cœlū, & spiritu eius in Helisæo geminato, cōgregatis filiis Prophetarū ad Helisæū, tantò magis ordinatā duxerunt vitam, quantò maioris abstinentiæ vel continentię virtutem arripuerunt, in solitudine monasticæ vitæ perfectionem inchoantes, quam & Apostoli post ascensionem Domini per Spiritus sancti missionem non minus seruare studuerunt. Helias sublatus in cœlum, dimisit in terram pallium suum. Christi verò pallium, corpus quod se Verbum induit intelligitur, de quo per Iacob prædictum fuerat: Lauabit vino stolam suam, & sanguine vultus pallium suum. Hoc itaque pallium Christus ascendens ad dexteram Patris in sacramento dereliquit, cuius participatione purgati, & sic quodammodo Christum induti, præcedentium peccatorum scditatem tegimus. Helisæus pallio Helix assumpto, Deique ipsius nomine inuocato, aquas Iordanis eo percussas diuisit. Et nos virtute diuini sacrificij, & inuocatione superni auxilij aquas diuidimus, ne in ea submersi pereamus, dum carnales concupiscentias quasi quosdam noxios humores in nobis reprimimus vel exsiccamus: vt quasi sicco vestigio ad veram promissionis terram perueniamus, ad quam caput nostrum conscendisse nouimus. Quod quia nostrarum virium non esse scimus, ipse nos illuc post se gratia sua trahat, cuius regnum & imperium permanet in secula seculorum, Amen.

IN DIE PENTECOSTES SERMO XVII.



DUM sunt solemnitates Dominicæ tam auctoritate præclaræ, quàm vtilitate præcipuæ. Hæ verò sunt Pascha & Pentecoste, quæ tam in veteri quàm in nouo sancitæ sunt Testamēto. Et si enim prior populus Abraham magis vmbra rerum quàm veritatem haberet, nec Pascha tamē, nec Pentecosten mysticis eius figuris defuisse certum est. Illi quippe vt de seruitute liberarentur Ægyptia, primū Pascha

in Ægypto celebrauerunt, assas igni carnes cum lactucis agrestibus immolantes. Inde quadragesimo die in monte Sinai lege suscepta, ritū postmodum perpetuo diem Pētecotes, id est quinquagesimæ singulis annis ex Dominico celebrauerunt præcepto. A Pascha quippe VII. hebdomadas dierum, id est quinquaginta dies iussi sunt computare, & extunc sollennitatē Pentecotes celebrare, quando in susceptione legis digito Dei scriptæ perceperunt à Domino potiotis donum gratiæ. Cuius quidem gratiæ prærogatiuam nulli tunc alij populo concessam Psalmista considerans, & hinc maximè populum illum ad gratiarum actionem exhortans, cum præmisisset, *Lauda Hierusalem Dominum, lauda Deum tuum Sio*, vnde id præcipuè debeat subiunxit, atque ita consummauit: *Qui annuntiat verbum suum Iacob, iustitias & iudicia sua Israel. Non fecit taliter omni nationi, & iudicia sua non manifestauit eis.* Hanc & Paulus gratiā longè ceteris præferens donis, *Quid, inquit, amplius est Iudæo, aut quæ utilitas circumcisionis? Multum per omnem modum. Primum quidem quia credita sunt illis eloquia Dei.* Ac si apertè dicat: Hoc amplius & hoc primum, id est maximum donum, Iudaicus populus præ ceteris à Domino habuit, quod ei credita sunt, id est commissa scripta diuina. Vnde & idem Apostolus, horum scriptorum amplius scientiam adeptus, ad hanc sollennitatē Pentecotes plurimum anhelans, cum summo quoque periculo vitæ eam Hierosolymis festinabat celebrare, sicut in Actibus Apostolorum his continetur verbis; *Nauigantes sequēti die venimus contra Chium, & alia die applicuimus Samum, & sequenti die venimus Miletum.* Proposuerat enim Paulus transnauigare Ephesum, ne qua mora illi fieret in Asia. Festinabat enim, si possibile ibi esset, ut diem Pentecotes faceret Hierosolymis. A Mileto autem mittentes Ephesum, vocauit maiores natu Ecclesiæ. Qui cum venissent ad eum, & simul essent, dixit eis: *Vos scitis à prima die, qua ingressus sum in Asiam, qualiter vobiscum per omnem tempus fuerim, seruiens Domino cum omni humilitate, & lacrimis, & tentationibus, quæ mihi acciderunt ex insidijs Iudæorum: quomodo nihil subtraxerim utilium, quominus annunciarer vobis, & docerem vos publicè, & per domos, testificans Iudæis & Gentilibus in Deum pœnitentiam, & fidem in Dominum nostrum Iesum Christum.* Et nunc ecce alligatus ego spiritu vado in Hierusalem, quæ in ea mihi ventura sunt ignorans, nisi quod Spiritus sanctus super omnes ciuitates protestatur mihi dicens, quoniā vincula & tribulationes me manent. Sed nihil horum vereor, nec facio animam meam preciosiorem quàm me, dummodo consummè cursum meum,

& ministerium quod accepi à Domino Iesu, testificari Euangelium Dei. Multas tam in antiquo quàm in nouo populo solēnitates institutas legimus, verùm ad nullam earum Hierosolymis celebrandam, vel hunc Apostolum, vel ceteros, postquam ad gentes transierunt, nisi ad istam vt dicimus, redisse nouimus. Venit itaque Paulus Hierosolymam cum summo, vt dictum est, vitæ suæ discrimine, præsciens eorum quæ ibi pateretur. Venit, inquam, celebraturus Pentecosten, non tam veterem cum Iudæis in templo, quàm nouam cum Christianis in cœnaculo. Ibi quippe vberiore Spiritus sancti gratia discipulis infusa, Angelicam custodiam de templo migrantem nouerat consistere, & antiquam gloriâ Synagoga ad nouitatem Ecclesiæ translata esse. Quod & beatus cōmemorans Augustin Epistolæ Ioannis Homelia 11. sic ait: Vbi inchoat Ecclesia, nisi vbi venit de cœlo Spiritus sanctus, & impleuit totū locum? Et factus est sonus quasi ferretur flatus vehemens, & linguæ diuise sunt velut ignis.

L I Q V E T itaque quantum huic sollemnitati debeat Ecclesia, quæ do, vt dictum est, vberiore gratia suscepta, quam discipulis Dominus promiserat, dicens: *Vos autem baptizabimini Spiritu sancto non post multos hos dies,* vitæ spiritualis sumpsit exordium donis omnibus cumulata, tantò proindè à carnali Synagoga amplius discreta, quanto spiritalior effecta. In huius quidem Cœnaculi typo, carissimæ sorores, & Virgines Paraclitenses, vestrum Oratorium constructum, & ipsius summi Paracliti nomine glorioso insignitum, quanta sit deuotione tam vobis quàm toti populo dei venerandum perpendite, quantum vos spiritales oporteat esse semper attendite: quæ Spiritus sancti proprio templo, eique spiritaliter consecrato, ex professione vestra estis dicatæ. Sic ergo uiuite in hoc manufacto & corporali templo, vt ipsius spiritale templum effici mereamini. Huius quanta sit offensa, & quam periculosa in eam trāsgressio facta, ipsa Veritas testatur, dicens: *Quicumque dixerit verbum contra filium hominis, remittetur ei. Qui autem dixerit contra Spiritum sanctum, non remittetur ei neque in hoc seculo, neque in futuro.* Si autem offensa in Spiritum dicti tantam habet pœnam, quæ vindicta manet facti transgressionem? Non autem sufficit vobis à transgressionem cauere, nisi & ei toto affectu studeatis placere, à quo speranda sunt omnia dona diuinæ gratiæ. Qui cū ea singulis prout vult diuidit, prout vult distribuit, adeb vt nō solum dator eorum, verumetiam ipsum Dei dicatur donum: quātum satagere debemus, vt hunc talem ac tantum dispensatorem

habeamus propitium? Quisquis in cuiuslibet potentis familia cōuersari desiderat, nihil aut parum ei prodest habere gratiam Domini, si careat gratia dispensatoris: præsertim cū ipse idem simul & Dominus domus sit & dispensator, sicut de Spiritu sancto manifestè clamat Apostolus. *Diuisiones, inquit, gratiarum sunt, idē autem spiritus. Et diuisiones ministrarionum sunt, idem autem Dominus. Et diuisiones operationum sunt, idem vero Deus qui operatur omnia in omnibus.* Qui etiam consequenter enumerans dona diuinæ gratiæ, quæ Spiritus ipse distribuit, dicens: *Alij quidem datur per spiritum sermo sapientiæ, alij sermo scientiæ, &c.* ita hanc donorum distributionem conclusit. *Hæc autem omnia operatur unus atque idem Spiritus, diuidens singulis prout vult.* Ex quibus quidem patenter insinuat eundem distributorem ac dispensatorem diuinorum donorum, tam Dominum esse quàm Deum, & pro arbitrio suo ipsum tanquam Dominum, non sub Domino dispensatorem cōstitutum, ea quibus voluerit liberè impertire. Cuius hodie largitas vberior ampliore gratia præsentem diem tanquam propriam sollemnitatem ditauit, in qua diuinorum beneficiorum promissiones compleuit. Post aduentum quippe filij in mundum, post eius ad patrem in ascensione reditum, Spiritus sancti hodiernus restabat aduentus, per quem complerentur omnia quæ per Filiū ad salutem nostram fuerunt inchoata. Vnde & ipse Filius: *Mitto, inquit, promissum Patris mei in vos. Vos autem sedete in ciuitate, quoadusque induamini virtute ex alto.* Et rursum: *Paraclitus autem Spiritus sanctus, quem mittet Pater in nomine meo, ille vos docebit omnia, & suggeret vobis omnia quæcumque dixero vobis.* Et iterum. *Adbuc multa habeo vobis dicere, sed non potestis portare modo. Cū autem venerit ille spiritus veritatis, docebit vos omnem veritatem.*

Ex his itaque testimonijs veritatis liquet quanta gratia sit prædita sollemnitas hodierna, in qua discipuli Christi tam virtute constantiæ, quàm perfectione scientiæ sunt cōsummati. Quid est enim virtute indu. : alto, nisi fortitudine animi contra terrores seculi, & quaslibet diuersitates armari? Quid enim Apostoli ante S. Spiritus aduentum fuerant, nisi quædam vt ita dicam lutea figuli vasa nondum ignis coctione solidata, vt alicui vsui fierent apta? Hæc vasa tanquam figulus antea Christus de terra plasmauerat, cū eos à terrena carnalis populi conuersatione assumptos fide instruxerat. Quos postmodum Spiritus adueniens zelo diuini amoris accensos, quasi quædam lutea & adhuc cruda vasa hoc igne solidauit & coxit, vt cum fiducia verbum Dei deinceps

vbique prædicarent. Vnde factum est, vt ipse Apostolorum Princeps, qui prius vnus ancillæ voce territus Christum negauerat: nec semel id, sed ter præsumpserat, ante gladios Neronis, & erectū sibi crucis patibulum in confessione & prædicatione Christi intrepidus staret. De hoc igne dilectionis, & flamma caritatis, ipse olim Filius dixerat: *Ignem veni mittere in terram, & quid volo nisi ut ardeat?* Ac si apertè dicat, Omnia quæ in mūdum veniens egi tam nascendo quàm prædicando, tam moriendo quàm resurgēdo, seu etiam ascendendo, ad hunc vnum terminum & supremum finem spectabant, vt hoc igne s. terram concremarem, hoc est Spiritu sancto, qui diuini amoris dicitur ignis, terrena ipsius & frigida corda hominum inflammarem. Ascendit Filius, vt descenderet Spiritus sanctus, sicut ipsemet testatur, dicens: *Expedit vobis, vt ego vadam. Nisi ego vadam, paraclitus non veniet, &c.* O quàm gloriosus, quàm dignus iste sancti Spiritus est descensus, qui nequaquàm potuit fieri, nisi per ascēsum Filij, nec ita mitti potuit Spiritus, nisi ad eum mittendum ascenderet Filius. Ipsa itaque Christi ascensio quasi paraſceue hodiernæ festiuitatis est, & quædam præparatio. Passio quoque Christi quantum ad hoc diuini amoris domū pertineat, Apostolus diligenter declarat. Cū enim præmisisset, *Caritas Dei diffusa est in cordibus nostris per Spiritum sanctum qui datus est nobis*, consequenter adiecit: *Vt quid enim Christus cū adhuc infirmi essemus, secundum tempus pro impijs mortuus est?* Ac si diceret: Propter quid aliud, nisi propter hanc caritatis effusionem in cordibus nostris faciendam, mortuus est ad tempus, id est transitoriam & quasi horariā sustinuit mortem, cū adhuc infirmi essemus, hoc est debiles in fide, vel in toleranda persecutione? Diffusa caritas est, dilata & ampla in cordibus facta, & vsque ad inimicos etiam extēsa; de qua & per Psalmistam Christo dicitur: *Diffusa est gratia in labijs tuis*, hoc est tota prædicatio tua nihil aliud quàm perfectionem resonat caritatis. De qua & Apostolus, *Finis præcepti caritas, de corde puro & conscientia non ficta.*

S I C V T ergo præcepta Dei, sic & præcepta Christi ad hunc vnicum finem, id est ædificandam in nobis caritatem, tota intendit. Cuius quidem intentionis perfectio per Spiritum sanctum hodie consummata, & omnium bonorum gratia distributa, tantò præsentem sollemnitatem fecit gratiorem, quantò potioribus donis hanc esse præstitit ditiozem, quam vt dictum est tam fortitudine quàm scientia peregit clariorem. Simul quippe Spiritus hodie adueniens corda discipulorum & corroborat, vt dictum est;

est: & illuminat, ut promissum est, eorum s. quæ Filius dixerat intelligentiam suggerendo, & omnem eos veritatem docendo. Cuius quidem aduentum diligenter hodie descriptum audiuius, cum illud Actuum Apostolorum legeretur, *Factus est repente de cælo sonus, tanquam aduenientis Spiritus vehementis, & replevit totam domum ubi erant sedentes. Et apparuerunt illis diuersæ lingue t. q. uam ignis, &c. Et repleti sunt omnes Spiritu sancto, &c.* Aduentus Spiritus sancti in sono declaratur venti, quem ventū hoc loco dicit vehementem spiritum. Flatus quippe venti cum sit inuisibilis, tamē est audibilis. Sic & inspiratione spiritus in discipulorū cordibus videri non poterat interiūs, sed exteriori auditu ex diuersitate linguarum spiritualis gratiæ donum perpendebatur. Repentinus sonitus iste fuit, quia super humanam existimationem huius inspirationis gratia creuit. Vehemens iste venti flatus dicitur, ut virtus verbi hodie collata, contra quælibet obstacula vel humanæ sapiētiæ rationes ostendatur valida. De qua quidem virtute verbi loquens Apostolus Corinthijs: *Arma, inquit, militiæ nostræ non sunt carnalia, sed potētia Deo ad destructionem munitionum consilia destruentes, & omnem altitudinem extollentem se aduersus scientiā Dei, & in captiuitatem redigentes omnem intellectum.* Et per semetipsam Veritas Apostolorum corroborans animos, ne de imperitia sua contra sapientes seculi desperarent aut trepidarēt, ait: *Ponite ergo in cordibus vestris non premeditari quemadmodum respondētis. Ego enim dabo vobis os & sapientiam, cui non poterunt resistere & contradicere omnes aduersarij vestri.* Et alibi: *Non enim vos estis qui loquimini, sed Spiritus Patris vestri qui loquitur in vobis.*

RECTE igitur hæc impremeditatę responsionis per spiritum facienda suggestio præfiguratur hodie flatu venti repentino. De cælo sonus fieri dicitur, quia de commotione aeris, quæ ventus dicitur, audiebatur sonitus, in typo videlicet sūmi spiritus loquuturi per Apostolos linguis omnibus, sicut scriptū est: *Non sunt loquele neque sermones, quorum non audiantur voces eorum. In omnem terram exiuit sonus eorum, &c.* Et attende quod nō ait, sonus aduenientis spiritus, sed *tanquam aduenientis*, ut cum in veritate corporalis sonus venti fuerit, quadam tamen similitudine sonum validū exprimeret prædicationis futurę: vel quādam in cordibus factam vocem locutionis internæ, spiritu s. suggerente interiūs, vnde loquerentur exteriūs. Meritō vehemens sonus ille dicitur quasi flatus fortissimus, ut videlicet designaret prædicationē Apostolicā, non infra terminos vnus ludæ, sicut Prophetarum, esse conclu-

dendam, sed quasi per vniuersum mundum flaturam & dilatandā. Flatus ille vehemens donū replet, non concutiendo vel impellēdo subruit, quasi Spiritus sancti est supplere imperfecta, non destruere inchoata bona. Vnde veritas: *Nō veni soluere, inquit, legem, sed adimplere.* Et de hoc ipso aduētū spiritus, & de perfectione doctrinæ promiserat, dicens: *Ille docebit vos omnem veritatem, & suggeret vobis omnia quaecumque dixerō vobis.*

LEGIMVS: ventum à Sathana immissum, cum ruina domus quam concussit ioseph & filia Iob extinxisse, quia illius est perdere, non saluare, & destruere magis quàm ædificare. Hic autem flatus venti nequaquam domum labefactat, sed incolumem conseruatā intrat, & vehementis motus agitatione ignem concitans in aere ipsam quam intrat illuminat. Ignis, qui & splendet & calet, hoc flatu venti super Apostolos generatus in aëre, illuminatio mentis est, & flamma caritatis Apostolorum cordibus hodie inspirata, & in superiore hominis parte, hoc est in animam per spiritum facta. Ignis iste in forma linguarū exteriùs apparuit, quia per verba prædicationis, quid intus scientiæ, quid caritatis habeatur, audiētibus innotescit. Linguarū ignear, hoc est de igni factæ memorantur, cum Apostoli ex ipsa caritate qua feruebant, & scientia quam ob hoc aperiunt, prædicare compulsi: his quoque duobus corda auditorum iam illuminaturi erant atque accensuri. Dispertitæ in se sunt linguæ, non solum pro diuersitate earum, verumetiam pro discretionē prædicantium. Sicut enim pro diuersitate gentium diuersis vtendum est linguis, ita etiam pro qualitate auditorū prædicationem temperari conuenit, vt paruulos lacte nutriamus, adultos pane reficiamus. Super sedentes in domo ignis ille apparēs sedisse dicitur, quia super humilem & quietum spiritum suum requiescere Dominus testatur; & qui superbi sunt, diuini amoris ignem suscipere non merentur. Hinc quoque benè illis intedisse dictus Ignis ille, quia percepta illa gratia cum eis erat perseueratura: sicut & antea Dominus de ipso spiritum promiserat dicens: *ut maneat vobiscum in æternum.* In vna domo congregati spiritum perceperunt, quia quicumque non sunt de Ecclesia, sunt alieni à gratia. Vnde & Agnus Paschalis in vna domo comedi præcipitur, quia extra Ecclesiam veri sacrificij locus non habetur: & quicumque in Arca non fuerunt, submersi diluuiō perierunt. Iam iuxta quædam dona Spiritum sanctum acceperant, quibus insufflans Veritas dixerat, *Accipite Spiritum sanctum, quorum remiseritis peccata, &c.* sed repleti Spiritu sancto non erant, sicut ho-

die factum esse monstratur cū dicitur: *Repleti sunt omnes Spiritu sancto*. Primò eaque quibusdam donis initiati, hodie cumulati sunt & confirmati. De qua quidem repletionē spiritus quasi statim eructuantes, cœperunt loqui alijs linguis, sicut in Græco habetur, quàm antea fecerant. Nam sua propria lingua, id est Hebraica, nequaquam tunc loqui incipiebant, sed alijs quas ignorauerant, pro diuersis scilicet hominum ex omni natione, quæ sub cœlo est, ad diem factum Hierosolimis congregatorum. De qua quidem diuersitate linguarum, quo mirabilior habeatur, id quidam senserunt, vt cū omnes vnius linguæ prolatione vterentur, singulis auditoribus propria cuiusque lingua loqui viderentur. Sed hoc profecto nequaquam esset loqui alijs linguis, sed videri alijs loqui; nec veritas esset linguarum, sed opinio deceptorum hominum: nec de linguis quicquam esset Apostolis collatum, sed de intelligentia auditoribus inspiratum. Falsum denique & illud esset quod ab auditoribus dicebatur: *Audiui- mus eos loquentes linguis nostris*. Si enim locutio linguarum non erat, sed videbatur, falsum est eos audisse in illis verbum quod non erat in ipsis.

Non solum igitur de intelligentia interioris verbi, verum etiam de pronuntiatione soni hodie sunt instructi, nequid desit eis in vlla gratia. Vnde præsens sollemnitas quanto multipliciore gratia sit prædita tanto maiore deuotione est celebranda, & omnium linguarum laudibus honoranda, quando ad prædicandum gentibus vniuersis genera omnia linguarum Apostolis sunt collata. Atque vtinam vos, Sponsæ Christi gloriosæ, quibus vt suprâ meminimus, hæc sollemnitas specialiter incumbit celebranda omnium linguarum generibus, diuinas in ea laudes resonare possitis! Quod quia non sufficitis, vel hoc saltem effici- te, vt doctrinæ trium principalium linguarum, quibus duo testamentum conscripta sunt, & Dominicæ Crucis titulus insignitus, operam dantes, aliquid amplius quàm ceteri fideles his festiuis addatis præconijs. Quod & ipse spiritus ad honorem sui vobis suggerere dignetur, qui vbi vult spirans sine sono docet interiorius, siue calamo scribit in mentibus: nec moras patitur in docendo, nec dilationem habet in scribendo. Ipse infirmitatem vestram in sancto roborat proposito, qui hodie Apostolos induit ex alto. Ipse fictilia vasa vestra, & luteam adhuc crudam testam igne diuini amoris excoquendo solidet, quo discipulorum corda hodie repleuit. Ipsum sponsus vester Dominus Iesus Christus ve-

stris semper mentis inspiraret, & tanquam arrham desponsationis & spiritale pignus dotis vobis custodiat, ut sicut Apostolis promisit, maneat vobiscum in aeternum, Amen.

FERIA II. PENTECOSTES,

SERMO XVIII.



MAXIMAM apud vos festiuitatem Pentecostes quanto maiore studio celebrare nitimini, tanto pluribus exhortationum Sermonibus ad hoc cupitis incitari. Octo itaque diebus eam celebrantes, in singulis istis singulos exigitis Sermones. Quod ut perficere queam, hoc ab ipso spiritu mihi vestris precibus impetrate. Et quoniam iuxta Dominicam assertionem, scriba doctus in regno Dei similis est homini, qui profert de thesauro suo noua & vetera, hanc imperitia mea doctrinam quantum valet, cupiens imitari, de nouo Testamento ad veteris testimonia stilum conuertere curat: ut eò gratior hæc sollemnitas habeatur, quo eius dignitas amplius commendatur. Hanc itaque sancti Spiritus tam gloriosam sollemnitatem per eundem Spiritum Psalmista præuidens, eamque ut oportet Ascensioni Dominicæ copulans, ad eius iocunditatem celebrandam nos vehementer admonens quodam loco ait: *Regna terre cantate Deo, psallite Domino. Psallite Deo, qui ascendit super cælum cæli ad Orientem. Ecce dabit voci suæ vocem virtutis, date gloriam Deo super Israel: magnificentia eius & virtus eius in nubibus. Mirabilis Deus in sanctis suis, Deus Israel: ipse dabit virtutem & fortitudinem plebi suæ benedictus Deus.* Diuino itaque spiritu illuminatus Psalmista etiam post ascensionem Domini descensionem eiusdem spiritus mirabilem, & gratiam in nationes vniuersas effusam: nec iam ut ante in Iudæa Deum intelligens, vniuersa regna iam per hanc gratiam Deo adquisita, ad ipsum glorificandum inuitat, dicens: *Regna terre cantate Deo, psallite Domino*, hoc est vniuersæ gentes, quæ iam à seruitute diaboli liberatæ regnare cœpistis, glorificate super hoc Deum voce cantando, ac simul operatione psallendo. Ac ne Deum negaremus, quem iuxta humanitatem assumptam localem vel mobilem audiremus, ipsi, inquit, *psallite qui ascendit, &c.* Superius quidem dixerat, *Iter facite ei qui ascendit super occasum.* Nunc verò dicit, *qui ascendit super cælum cæli ad Orientem.* Prius

itaque de resurrectione, sicut primum facta est, illud dixit. Nunc verò de ascensione hoc subjungit. Occasum itaque veri solis corporalem eius obitum dicit, de quo ipse dixerat. *Nisi grannum frumenti cadens in terram mortuum fuerit, &c.* Super hunc igitur occasum ascendit, quando de morte resurrexit, more videlicet solis, qui post occasum conscendit ad ortum. Ita ei faciunt discipuli, qui se dignos præparant, eum confidenter expectando: ut sicut promiserat ad eos resuscitatus redeat.

Quod autem hic dicitur, *qui ascendit ad Orientem*, potest Psalmista non incongruè dicere secundum loci positionem. Ipse quippe mons Oliueti, de quo Dominus ascendit in cælum, ciuitati Hierusalem assistere dicitur versus Orientem. Potest quoque intelligi quod ubicumque mons ille fuerit, Dominus ad Orientem ascenderit, si facie sua illuc versa hoc egerit. Qui enim ad Occasum dorsum habet, faciem ad Orientem intendit. Ei autem post dorsum iam omninò erat Occasus, quia resurgens à mortuis ultra non moritur, nec amplius ad illū quem sustinuit occasum est rediturus. Super cælum cæli conscendit, quia celsitudinem ætherei, quæ aërio præminet transcendit. Quid autem post ascensionem suam, misso Spiritu sancto discipulis sit factururus, consequenter adiungitur: *Ecce dabit voci suæ vocem virtutis.* Vocem suam, hoc est propriam Dei locutionem dicit internam eius inspirationem, quæ hodie per Spiritum plenior facta est, cum sine sono interiùs omnem eos veritatem docuerit. Huic autem interiori locutioni cum per eundem Spiritum exterioris locutionis diuersa sint genera addita, quasi diuinæ voci, quæ interiùs fit, vox humana est adjuncta: ut videlicet verbum mente conceptum interiùs, per audibile verbum proferatur aut manifestetur exteriùs, & ita voci diuinæ vox humana datur; ut quod Deus inspiratione sua intus nobis loquitur, nos prolatione nostra homines doceamus. Benè itaque dicit, Domino ascendente, quia vocis suæ per Spiritum, ut dictū est, in Apostolis factæ, dabit etiam vocem prolationis humanæ; ut quod rectè senserunt, congruè quibuscumque proferre ac disseminare possint. Quam insuper vocem virtutis dicit, quæ hodie super Apostolos vento præfigurata est vehementi, sicut in hesterno Sermone meminimus. Virtutem prædicatio habet, & valida est, cum quis quod dicit disseminare sufficit, ut confutari non possit, vel cum animo præstanti prædicat, nec timore aliquo, veritatem; vel cum ea, quæ prædicat, moribus non oppugnat, nec

conscientia reprobae vitae erubescantiam timeret de praedicatione. Quae omnia in Apostolis clarum est praeminere, ut eorum praedicationis vox virtutis merito dicenda sit. Iplis quippe Dominus promiserat, *Ego dabo vobis os & sapientiam*; cui non poterunt resistere & contradicere omnes aduersarij. Os scilicet ad loquendum, sapientiam ad intelligendum, vel quid cui dicatur, quando & quomodo discernendum. Scriptum & de ipsis est, quod cum fiducia verbum Dei praedicarent. Qui etiam quam religiosae vitae essent, vel quanta sollicitudine prouiderent, ne turpitudine suae vitae adulterarent, aut infamarent verbum Dei, vnus eorum testatur, dicens: *Castigo corpus meum, & in seruitutem redigo, ne forte cum alijs prae-dicauerim, ipse reprobus efficiar*. Et attende quod cum dicit in his, quos Spiritus sanctus replet, interiori verbo exterius coniungi, patenter eos à daemoniacis secernit. Quos enim daemonia replent, & torquendo in insaniam vertunt, verba eis tantum, non sensum ministrant, & caliginem fumi potius quam splendorem ignis mentibus eorum immittunt. Spiritus autem sanctus cum in electis loquitur, primum intus illuminat ipsos, quam exterioribus eorum verbis alios. Vnde bene hoc loco voci diuinæ, ut dictum est, vox humana dicitur addita; ut quod per inspirationem alijs nunciatur. Nec tamen idè credendum est, ut quotiens per Prophetas Spiritus sanctus loquutus est, quicquid in verbis illis intellexerit, hoc totum eis per quos loquebatur inspirauerit: sed modo vnum tantummodò, fortassis plures quos ibi prouidebat sensus haberi, eis reue-labat. Vnde cum aliquam prophetiam variè à Doctoribus exp- i videmus, nequaquam necesse est ut omnes illos sensus ibi p- ophetam habuisse credamus: sed quicquid ibi conuenienter intelligi potuit, spiritus praesciuit.

S I C V T ergo diues aliquis per oeconomum suum diuersis artificibus proprium tradit aurum, ut diuersa ei faciant ornamenta: ita & Spiritus per Prophetas sua nobis tradit eloquia diuersis sententijs referta, quae cum diuersis exponimus modis, quot indè sententias producimus, quasi tot opera de vna materia fabricamus. *Date gloriam Deo*. Regna terrae, quae superius ad cantandum & psallendum Deo imitauerat, rursus ad glorificandum ipsum adhortatur ea, ut de tanta his diebus collata gratia vberiore laudum dent gloriam Deo. Tanto enim hæc gratia vbique terrarum est amplius praedicanda, quantò ipsa vbique melius est operanda, & per eam vniuersa Deo sunt acquisita re;

gna, & de regno diaboli in regnum Christi translata. Quod quidem per quos factum sit, consequenter adjungit; dicens: *Magnificencia eius, & virtus eius in nubibus*. Ac si diceret, Inde date gloriam Deo, quia ipse nubibus suis, id est Apostolis, magnificentiam & virtutem dedit, per quem vos in regnum suum conuerteret. Nubes de imo surgunt in altum, & de alto imbrem emittunt, quo irrigata terra fructificat, & sedentes Apostoli spiritum perceperunt; quia humilibus Deus dat gratiam, & superbis resistit semper. Per hanc gratiam hodie in virtutibus sublimati, & vberioribus donis magnificati tanquam de alto terram compluunt, dum diuini eloquij verbis corda terrenorum hominum omnium linguarum generibus loquentes erudiunt. Quos itaque Deus sic magnificauit, & in tantas virtutes tot donis ipse promouit, rectè magnificentiam & virtutem eis contulisse dicitur, quos & miraculis coruscare, & tam verbi quàm animi virtute fecit præminere. De quibus adhuc subditur: *Mirabilis Deus in sanctis suis*, per quos videlicet maiora quàm per semetipsum operari dignatus est, tam miraculorum exhibitione quàm prædicationis operatione, tanquam spiritu Helix in Helisæo geminato. Vnde & eis promiserat, dicens: *Qui credit in me, opera quæ ego facio & ipse faciet, & maiora horum faciet*. Scimus & primogenitum fratrem, id est Christum, quasi sine liberis defunctum, & fratres eius, id est Apostolos, sponsam eius, id est Ecclesiam suscepisse, & in ea prolem filiorum innumeram generasse, & ab his deinceps diebus vniuersum mundum collegisse.

Vnde quantum huius sollemnitatis gratiæ mundus debeat, semper attendat, ad quem vndique colligendum collata sine modo vniuersa genera linguarum. Intuemini vniuersas Christi sollemnitates ab ipsa eius Natiuitate vsque ad Ascensionem, & quid tunc mundus perceperit huic gratiæ comparate, & longè ceteris hanc festiuitatem videbitis præminere. In hac quippe centum viginti discipulis in Cœnaculo cōgregatis Spiritus sanctus infusus, per ipsos eadem die circiter tria millia hominum lucratus est. Quod quidem vt fieret, dispersos olim sub Antiochi persecutione Iudæos de vniuersis nationibus Hierosolimis in præsentem festiuitate congregauerat; quod nunquam in alia festiuitate legimus factum esse. Ex quo etiam liquet, quantum ad præsentem gratiarum festiuitatem populi vndique conuenire debeant, qui spiritualis gratiæ dona desiderant. Hæc vna festiuitas vbique terrarum Ecclesiam dilatauit, & cum ipsa pariter

diuinas sollempnitates per vniuersum mundum plantauit celebrandas, & omnium linguarum generibus laudes Dei disperdit; vt hinc appareat quantum huic festiuitati ceterę omnes sint obnoxia, per hanc videlicet vbique terrarum disseminata. Vnde & ad huius diei præconia cum præmissum sit, mirabilis Deus in sanctis suis; & vt dictum est, quodammodo in eis mirabilior quàm in semetipso, statim adnexuit, vnde nunc maximè mirabilis apparuit: *Ipse, inquit, dabit virtutem & fortitudinem plebi suę.* Plebem quippe suam discipulos dicit, illiteratos, rusticanos, de humili plebe assumptos, per quos mirabile est tanta eū operari. De quibus vnus eorū Corinthiis scribens, & reprobatis sapientibus & potētibus seculi, tales idiotas & impotentes eligi considerans, ait: *Non misit me Christus baptizare, sed Euāgelizare. Non in sapientia verbi, vt non euacuetur crux Christi. Verbum enim crucis pereuntibus quidem stultitia est, his autem qui salui sunt, idest nobis, virtus Dei est.* Scriptum est enim, *Perdam sapientiam sapientium, & prudentiam prudentium reprobabo. Vbi sapiens, vbi scriba, vbi inquisitor huius seculi? Nonne stultam fecit Deus sapientiam huius mundi? Nam quia in Dei sapientia non cognouit mundus per sapientiam Deum, placuit Deo per stultitiam predicationis saluos facere credentes. Quoniam Iudei signa petunt, & Græci sapientiam querunt. Nos autem predicamus Christum crucifixum, Iudeis quidem scandalum, gentibus autem stultitiam. Ipsis autem vocatis Iudeis atque Græcis Christum Dei virtutem & Dei sapientiam. Quia quod stultum est Dei sapientius est hominibus, & quod infirmum est Dei fortius est hominibus. Videte enim vocationem vestram fratres, quia non multi sapientes secundum carnem, non multi potentes, non multi nobiles, sed quę stulta sunt mundi elegit Deus vt confundat sapientes, & ignobilia & cōtemptibilia mundi elegit Deus & ea quę non sunt, vt ea quę sunt destrueret, vt non gloriatur omnis caro in conspectu eius. Nō enim mirabile esset si super potentes vel sapientes seculi magna operaretur, quod humanę virtuti potius quàm diuinę ascriberetur. Vnde benè sicut hīc dicitur, ipse Deus Israel, qui videlicet antiquum populum elegit, ipse, inquam, non alter aut recens Deus. His plebeis & pauperibus viris de populo eodem assumptis, & nunc virtute ex alto indutis, dabit virtutem verborum contra seculi sapientes, & fortitudinem animorum contra potentum impugnationes. Benedictus Deus, subaudis, sit: hoc est ab omnibus glorificatus & laudatus, qui per tales talia operatus est his diebus, Amen.*

FERIA

FERIA III. PENTECOSTES, SERMO XIX.




ESTERNVM Sermonem ex testimonijs sexagesimi septimi Psalmi collegimus. Nunc autem ad septuagesimum Psalmum cōuertentes stylum, iuuat hinc quoque huius sollemnitatis præconium subinferre. Scriptum ibi est: *Notam fecisti in populis virtutem tuam, in brachio tuo populum tuum, filios Iacob & Ioseph. Viderunt te aquæ Deus, viderunt te aquæ, & timuerunt & turbatæ sunt abyssi. Multitudo sonitus aquarum, vocem dederunt nubes, &c.* Ad Deum Psalmista loquitur, præuidens in spiritu, quæ per eundem spiritum his diebus Apostoli mirabilia sunt operati: *Notam fecisti*, inquit, *in populis multis virtutem tuam*, illā. v. quā Apostolis promiserat, dicens: *Vos autem sedete in ciuitate donec induamini virtute ex alto.* Atque ita in brachio tuo, hoc est, in illa virtute vel fortitudine redemisti populum tuum à seruitute s. peccati, liberaisti per spiritum videlicet iatum: de quo dicit Apostolus: *Vbi spiritus Domini, ibi libertas.* Quisquis enim ex caritate, quæ per Spiritum sanctum infunditur, potius quàm ex timore Deo seruit, amicus potius quàm seruus dicendus est, & liberum, non coactum impendit obsequium. *Filios Iacob & Ioseph.* Cum superius dixisset populos secundum multitudinem hominum, vel diuersitatem terrarum, aut regionum; & nunc adjecisset populum secundū vnitatem fidei, vel dilectionis vinculum, quomodo & diuersas Ecclesias & vnā diximus, ne videretur populi nomine aut Iudaicum tantum, aut Gentilem accipere, addit *Filios Iacob & Ioseph*, id est posteros tam Iudaici quàm Gentilis populi, vt videlicet in Ecclesia duo parietes, ad vnum angulatē lapidem, id est Christum iungerentur. Iacob quippe supplantator Esau, qui eum hereditate sua priuauit, Iudaicus est populus, qui expulso Gentili terram promissionis obtinuit. Ioseph verò, qui augmentum interpretatur, Gentilis est populus, qui sicut multitudine hominum transcendit Iudaicum, ita & munero conuersorum fidelium magnum Ecclesiæ dedit augmentum. Paucos quippe vel nullos ex Iudæis cōparatione Gentilium Ecclesia continet. Quod quidem augmentum Ecclesiæ de conuersis Gentibus statim prosequitur, dicens: *Viderunt te aquæ Deus*, hoc est credendo te intellexerunt populi nationum, qui prius quasi aqua omni

vento doctrinæ circumferebantur, nec quicquam certitudinis quid sequi deberent ex lege didicerant. De quibus in Apocalypsi scriptum est, *aquæ populi multi*. De quibus adhuc subditur, quia viso Deo timuerunt, non tam videlicet seruili timore, quàm pro cōmunicatione pœnarū, quàm casto vel filiali ei⁹ quē diligunt offensam præcauentes. *Et turbata sunt abyssi*, hoc est profunditates secularis Philosophiæ, quæ prius quasi limpidissimæ aquæ videbantur, & gratissimum habebant hauustum: quasi turbatæ ac cœnulentæ viluerunt comparatione simplicitatis Euangelicæ.

MULTITUDO *sonitus aquarum*, subaudi vocem dedit. Et quare? quia *vocem dederunt nubes*. Multus quippe sonus diuinæ laudis resonat in conuersis populis, voce nubium, id est prædicatione Apostolorum edoctis. *Etenim sagittæ tuæ ô Deus*, per has nubes de Iudæa transferuntur ad gentes. Sagittæ quippe sunt verba Euangelicæ prædicationis, quæ quasi quibusdam diuini amoris iaculis corda vulnerant auditorum, sicut in Cantico Sponsa dicit: *Vulnerata caritate ego sum*. Et hæc quidem sagittæ prius in Iudæa tanquam in pharetra tenebantur conclusæ, donec Iudæis Euangelium repellentibus transierunt ad gentes Apostoli, sicut vnus eorum ad ipsos ait: *Vobis oportebat primum predicare verbum Dei, sed quia vos repulistis illud, ecce conuertimur ad Gentes*. *Vox tonitru*, hoc est de supernis per Spiritum in Apostolis facta per totum orbem est dilatata. Et quia de his scriptum est, quod *profecti predicauerunt ubique Domino cooperante sequentibus signis*; tonitruo illi verborum coruscationes sunt additæ miraculorum. De quibus nunc dicitur: *Illuxerunt fulgura eius orbi terræ*. Et quoniam infideles magnitudine signorum magis, quàm auctoritate scripturarum mouentur ad fidem, visis coruscationibus commota est terra; quia miraculorum admiratione terrena hominum corda de pristina infidelitate sunt mutata. Atque ita Deus petit habere in mari vias, & in aquis semitas: cū videlicet à Iudæa tãquam à propria terra recedens, & gratiam suam gentibus impertiens, vno reprobato populo multos acquisiuit. Mare maius est aquis & amaritudine plenum: & vita coniugatorum quæ multos capit, & curis seculi est implicita, quot molestias sustinet, tot amaritudines habet. Via latior est quàm semita, & vita coniugatorum laxior est quàm continentium. Venire autem ad nos siue propinquare Deus dicitur vt nos ad se trahat, cū bonorum ope-

rum nobis affectum inspirat. Per vias igitur incedit in mari, quia laxiora opera habet in non coniugatis, sicut strictiora in continentibus quæ semitis operantur. Et hæc quidem vestigia Domini in Gentibus non cognoscentur, ut videlicet de peculiari populo suo Iudaico gratiam suam ad gentes transferat, & sic eo derelicto ad gentes transeat, quia nullus eo tempore id potuit prænoscere. Vnde & ipse Apostolorum Princeps cum adhuc de vocatione Gentium per prædicationem suam facienda certus non esset, vase quodam omni genere reptilium pleno per visum sibi ostenso de hoc ipso admonetur atque doëctur. Cur autem hæc vestigia Dei in Gentibus ignorarentur, ut cæcitate facta in Israel Gentes illuminarentur, sine Psalmi concluditur. Ac si videlicet diceret. Ideo ab homine prænosci non potuit, ut reprobatis Iudæis Gentes illuminarentur, quia illum priorem populum quasi gregem proprium semper habueras, cui Moysen & Aaron tantos pastores deputaueras, & tantam manum in Gentibus delendis propter illum exercueras, & hoc est quod ait, *Deduxisti, &c. de Ægypto videlicet eum adducens, & in terram repromissionis inducens, sub regimine & ducatu Moyfi Ducis & Aaron Sacerdotis.*

FERIA III. PENTECOSTES, SERMO XX.

 VID etiam Amos Propheta, imò ipse Spiritus per eum in huius sollemnitatis suæ præconio dixerit audiamus. Dominus, inquit, *Deus exercituum, qui tangit terram, & tabescet; & lugebunt omnes habitantes in ea. Et ascendet sicut riuis annis, & defluet sicut fluuius Ægypti. Qui adificat in cælo ascensionem suã, & fasciculum suũ super terram fundabit. Qui vocat aquas maris, & effundet eas super faciem terræ. Dominus nomen eius.* Exercitus Dei, quibus ipse præsidet, tanquam principes, & aërias debellat potestates. Castra illa sunt Angelorum vel fidelium hominum, quæ plerumque scriptura commemorat. Refert Genesis quòd de Mesopotamia Iacob in terra Chanaan ad patrem reuertenti, fuerunt obuiã Angeli Dei, tanquam in protectionem ipsius milites missi. Quos cum vidisset, ait: *Castra Dei sunt hæc.* Et appellauit nomen loci illius Manahim, id est castra. Ecclesiam quoque in castrorum aciem ordinatam, tanquam in præcinctu belli procedentem, Canticum Canticorum describit.

Militia est vita hominis super terram. Tanquam in castris semper militant, qui minimè pacem hinc habentes contra diabolicas tentationes vel impetus carnis, aut impugnationes iniquorum hominum, iugem pugnae sustinent conflictum: in agone illo vel pugna constituti, de quo Apostolus ait: *Omnis qui in agone contendit, ab omnibus se abstinet.* Et rursum: *Sic pugno, non quasi aërem verberans.* Et iterum in alia eius Epistola: *Non est nobis colluctatio aduersus carnem & sanguinem, sed aduersus principes & potestates, aduersus mundi rectores, contra spirituales nequitia in caelestibus.* Sed ut horum Deus exercituum proprio exemplo nos pugnare doceret, & vincere daret, sicut ipse promittens ait: *Confidite, et vici mundum,* terram tetigit sicut prophetica lectio nunciat, dum terrenae substantiae nostrae naturam in vnam sibi vniuit personam primo de Spiritu sancto in Virgine conceptus, & postmodum ex ea natus. Vnde & ad Spiritus sancti gratiam commendandam, per quem ille quoque factus est conceptus in nostrae redemptionis exordium, bene hinc videmus Prophetam exorsum, & narrationem suam in beneficijs diuinis deinceps perducere, vsque ad missionem eiusdem Spiritus factam in praesenti tempore. Ab illo quippe Dominicæ conceptionis exordio, quo ut expositum est, terram tetigit, ita diligenter quid in hac terra egerit, comprehendere curauit, ut nec mortem ipsius, nec resurrectionem, nec ascensionem praetermittens, ad excellentiam festiuitatis hodiernae commendandam perueniret. Congruo quidem ordine tanquam à capite ad membra per mirabilem sancti Spiritus operationem deducens, cum ipse scilicet, cuius operatione conceptus est, Dominus Apostolici virtutem consummauit exercitus.

T R I A itaque à Domino tacta quodammodo tabescunt, dum ab ipso humanitas assumpta vsque ad dissolutionem perducta est mortis. Vnde & ipsemer de hac dissolutione mortis ad patrem ait: *In puluerem mortis deduxisti me.* Et quia de morte ipsius maximè contristati Apostoli fuerunt, hanc maximam eorum iustitiam luctum appellat Propheta cum subiungit: *Et lugebunt omnes habitantes in ea.* De quo etiam luctu quasi vespertino ante matutinam resurrectionis eius lætitiā Psalmista praedixerat: *ad vespertum demorabitur fletus, & ad matutinum lætitia.* In terra quasi tabescente fideles habitant, dum in assumptae humanitatis morte spem suae redemptionis collocant. Quam videlicet spem nequaquam retinerent, nisi de


mortis casu conscenderet resuscitatus. Vnde & subditur : *Et ascendet sicut riuus amnis , & defluet sicut fluuius Ægypti.* Riuus quamdiu in alueo suo conclusus cohibetur , nec se erigens alueum excedit , nequaquam terras circumiacentes irrigare valet. Quasi ergo de alueo viuus amnis ascendit, cum incarnata Dei sapientia de ipso mortis loco, quo depositus fuerat , hoc est de sepulcro resurgit. Tunc circumiacentem terram irrigat vt fructificare possit , dum desperata prius discipulorum corda fide corroborauit, vt spe futuræ beatitudinis, quam eis resurgēs exhibuit, bonorum operum fructus proferant. Quod autem riuum amnis prius appellauit, consequenter fluuium Ægypti nuncupans diligenter describit congrua parabola illi fluuio Ægypti, qui Nilus appellatur, Dominum comparans. De hoc quippe fluuio, & singulari quadam eius natura Beda in libro de natura rerum ita meminit: Nili flumine pro pluuijs vititur Ægyptus, propter solis calorem imbres & nubila respuens. Mense enim Maio dum ostia eius quibus in mare influit, zephиро flante vndis eiectis arenarum cumulis perstruuntur, paulatim intumescens ac retro propulsus plana itrigat Ægypti. Vento autem cessante, ruptisque arenarum cumulis, suo redditur alueo. Nilus itaque de paradiso manans ipsa Dei sapientia est de supernis descendens, vt nos de fonte vero potaret, & huius mundi Ægyptum, id est tenebras ipsa carnis assumptæ præsentia illustraret, de qua scriptum est: *Erat lux vera, quæ illuminat, &c.* Hic fluuius per septem ostia in mare dicitur defluere. Quæ scilicet ostia dum vento flante arenis obstruuntur, refluxum habent in terram. Habent non liberum exitum in mare. Sic post resurrectionem Domini antequam septiformis gratia spiritus effunderetur in magnum mare nationum, quibusdam quasi arenis vento flante obstruebatur fluuius iste; dum metu Iudæorum Apostoli compressi de Iudæa, in qua erat facta cæcitas, tanquam de Ægypto egredi non permittebantur, vt de hoc fluuio per prædicationem suam Gentes reficerent. Quid enim ventus nisi diabolica suggestio? Quid arenæ, nisi qui influxu seculi per concupiscentiam terrenorum huc illucque defluunt? Vento itaque flante arena cumulata fluuium obstruit, dum cupiditas Iudæorum locum vel gentem amittere metuens, Apostolicam compescit prædicationem. Sed hoc postmodum metu de cordibus eorum per Spiritum sanctum expulso, ruptis arenis liberè fluuius in mare defluit, dum ad Gentes de Iudæa prædicatione Apostolica omni timoris obstaculo repulso constanter exiit, sicut

vnus eorum intrepidus ait, *Vobis oportebat primū prędicare verbum Dei: sed quia vos indignos æternę vitę iudicastis, ecce conuertimur ad Gentes.* Quia tamen dum in Iudęa tenebantur conclusi, nequaquam à fructu prorsus erant vacui, cū ibi quoque nonnullam hominum multitudinem Deo lucrarentur. Prędictus fluuius, id est Christus, quodam ibi suo refluxu fructificauit, antequam in immensum mare gentium defluens Ecclesiam vndique colligeret.

ASCENSVM itaque fluuij Ægypti refluxum expositum in Iudęam dicit, ac deinde ordine cōgruo defluxum eius in vniuersum mundum ad corda gentium irroranda supponit. Quod cum nonnisi post ascensionem Domini, & Spiritus sancti aduentum constet esse factum, rectē de vtrisque subditur: *Qui edificat in cælo ascensionem suam, & fasciculum suum super terram fundabit.* Non ait solum modo, *qui ascendit in cælum*, sed, *qui edificat in cælo ascensum suum*: vt non transitoria hæc eius ascensio intelligatur, tanquam ad conuersationem terrenam ipse iterum reuertatur: sed absque huiusmodi reuersione firmam ibi deinceps habeat mansionem. Fasciculum suum iam in cælo consistens super terram fundauit, cū ipso Spiritu sancto corda discipulorum adhuc dissoluta, & timore mortis titubantia, nec vlla fortitudine animi solidata, per Spiritum sanctum in modum fasciculi tam sibi quàm inuicem summę caritatis vinculo astrinxit, & sic etiam super terram eos fundauit, hoc est in omnibus confirmauit bonis: vt ipsi etiam in Ecclesia quædam aliorum fierent fundamenta, iuxta illud quod de ipsa prędixerat Psalmista; *Fundamenta eius in montibus sanctis.* Aquas autem maris salvas esse cōstat. Et ampliùs benè ait: *vos estis sal terra*, quo videlicet terrena corda condienda sunt, & vestra prædicatione quasi quodam sale sapientiæ in bonis moribus componenda. Aquæ itaque huius salis verba sunt Apostolicę prædicationis. Istæ aquæ à Deo vocantur, & super terrę faciem effunduntur, dum Apostoli Christi ad officium prædicationis ab ipso vocati admittuntur, non more pseudoapostolorum per se veniunt. Quales quidem veritas arguens dicit: *Omnes quotquot venerunt, fures fuerunt & latrones.* Tanquam si diceret, venerunt per se, non missi à me. Vocat itaque Dominus aquas maris, dum Apostolicę prædicationis verba in omni genere linguarum, & per vniuersum mundum dirigit. Et hæc non solum super terram, verum etiam super faciem terrę effudit, dum non solum exterius sonant, verum etiam intellecta mentem intus illuminant. Per fa-

ciem quippe, qua vnusquisque cognoscitur, non incongruè notitia designatur. Super terram itaque verba fiunt, sed vsque ad faciem non peruenerunt, cùm enigmata legis vel prophetiarum uelamen habent in littera, non ad pertionem in intelligentia Evangelica vel Apostolica doctrina, quia non ita mysticis referta est verbis: super terræ faciem effunditur, dum quæ pro feruntur intellecta cognoscuntur. Quis verò iste sit, qui hæc tanta peragit, competenter subdit: *Dominus nomen illi*. Quæ cùm simpliciter Dominum vocat, nec quorum sit determinat, generale ipsius dominium, & vniuersale innuit imperium, quo cuncta regit atque optime disponit in secula seculorum, Amen.

FERIA V. PENTECOSTES, SERMO. XXI.



TA M ipsum diem Paschæ quàm Pentecostes dono Spiritus sancti legimus insigniri, vt non solum hanc, verum etiam illam sollemnitatem, quæ præcipuæ habentur, ad honorem quoque Spiritus sancti referendas esse sciamus. Vt enim Ioannes commemorat, cùm esset serò die illo, & fores essent clausæ ubi erant discipuli congregati propter metum Iudæorum, venit Iesus, & stetit in medio eorum, & dixit eis, *Pax vobis*. Et cùm hæc dixisset, ostendit eis manus & latus. Gausi sunt ergo discipuli viso Domino. Dicit ergo eis iterum Iesus: *Pax vobis, sicut misit me Pater, & ego mitto vos*. Hæc cùm dixisset, insufflauit & dixit illis: *Accipite Spiritum sanctum, quorum remiseritis peccata, remittuntur eis, & quorum retinueritis retenta sunt*. Et quidem ætatum esse constat in extremæ eius apparitione illarum quinque, quas illo die legitur habuisse, videlicet quinta vice apparens, tunc spiritum daret in terra, quem postmodum de cælo missurus erat, quinta de eadem completa. Quam quidem missionem, & supremum Spiritus sancti aduentum, quem nunc colimus, ipse antea promiserat. Ego, inquit Veritas, *veritatem dico vobis, expedit vobis vt ego vadam. Si enim non abiero, Paraclitus non veniet ad vos, si autem abiero, mittam eum ad vos*. Quæ est ista, obsecro necessitas, ad Spiritus sancti aduentum, vt prius abire oporteat Christum? Numquid in terra consistens eum dare non poterat, cuius plenitudinem ipse semper habebat? Quid causæ extitit, vt in cælum ascenderet, tanquam missurus spiritum de lōginquo, quem dare poterat de proximo? Non enim localis est spiritus non solum diuinus, sed nec

humanus, nec more corporum spiritualis natura moueri habet de loco ad locum. *Cælum*, inquit Deus, & *terram ego impleo*. Et sicut Veritas ait, *Spiritus est Deus*, qui *vbi vult spirat, diuidens singulis prout vult*. Cuius immensitatem & diuinitatis potentiam locis omnibus præsentem Psalmista conspiciens, ad Dominum ait: *Quo ibo à spiritu tuo, & quò à facie tua fugiam? Si ascendero in cælum, tu illic es: si descendero in infernum, ades*. Ac si apertè dicat, si summa tua bonitas, de quo illud est, *Dilexisti iustitiam, & odisti iniquitatem*, meis te peccatis iratum reddiderit, quò mihi patebit à præsentia tua locus fugiendi vel tua abditus abscondendi? Quem statim per hanc incircumscripti spiritus sui maiestatem vbique conspiciens præsentem, adiecit, *Si ascendero in cælum, &c.* Tanquam si diceret, Nullus mihi tutus locus refugij, tam in supernis quàm in infimis, cum me persequi decreueris, cum ad quolibet agenda tibi sint cuncta loca præsentia. Denique & in ipso die resurrectionis, ut iam suprà meminimus, Spiritum sanctum ab eo Apostolis datum esse nouimus.

Quæ ergo iam dederat in terra spiritum, quid ad eum iterum dandum necesse fuit eum ascendere in cælum? tanquam eum ibi reperiret, quem in terra nō haberet, aut inde illum mitteret, quem in terra iam sicut priùs de se insufflando dare nō posset. Adeo, inquam, necesse fuit ut diceret: *Nisi ego abiero, &c.* Aut fortassis hæc missio spiritus superior fuit ac maior, ut de cælo dàda esset, quàm illud prædictum donum in remissione peccatorum per insufflationem Apostolis in terra collatum. Reuera lōgè superior & eminentior dignitate, si diligenter & illud donum discernere valeamus. Ibi quippe potestas illa collata est Apostolis, quæ omnibus eorum vicarijs, hoc est Episcopis, creditur esse communis, in remittendis s. vel retinendis aliorum peccatis. Hæc vero Spiritus sancti gratia, quæ die Pentecostes Apostolis est infusa, quanto magis est rara, tantò amplius pretiosa. Quid enim illæ igneæ linguæ super Apostolos apparentes, nisi summam hominis exprimunt perfectionem in tribus consistentem? tribus his, inquam, quæ in omnibus bonis hominem cōsummant. Hæc verò ita sunt. Illuminatio mentis, ne simplicitas eorum vllis deinceps oberraret infidelitatis tenebris, sicut & ipse Dominus eis promittens, ait: *Cum autem venerit ille spiritus veritatis, docebit vos omnem veritatem*. Sed quia ut beatus meminit Petrus, melius est non nosse viā veritatis, quàm post agnitam retrorsum abire, post fidei lucem necesse est infundi caritatis ardorem, ut quæ jam agenda esse per Deū

nouimus

nouimus, per eius amorem implere studeamus, qui Spiritus sanctus intelligitur. Vnde & Apostolus, *Caritas inquit, Dei diffusa est in cordibus nostris per Spiritum sanctum, qui datus est nobis.* Ignis itaque, in quo dispersitæ apparuerunt linguæ, quia ex propria natura tam lucem habet quàm calorem, duas prædictas gratias tam de illuminatione fidei, vel saluberrimis documētis, quàm de inflammatione caritatis diligenter exprimit. Forma verò linguarū, quæ dispersitæ memoratur, prædicatio est futura, non vno genere linguæ, non in vna parte per Apostolos proferenda, vt non solum sibi, sed omnibus viuant. Duæ quippe priores gratiæ hominem in se moribus consummant, & beatitudine dignū efficiunt. Sed qui adhuc prædicare non sufficit, quasi sibi tantum ad hoc proficiens nō aliis viuit. Et si enim præcepta Dei iā tenet in vita; quia tamen alijs prædicare non sufficit illa, nondum magnus est in regno cœlorū, iuxta illā Domini sententiā: *Qui autem fecerit & docuerit sic homines, hic magnus vocabitur in regno cœlorū.* Nullus quippe in Ecclesia maior est, quàm qui præcepta Dei viuendo custodit, & ad imitationē sui alios prædicando trahit. Quid ergo de Apostolis æstimādū est, quorum prædicatione non pars vna terrarum, sed vniuersus mundus conuersus est ad Deum? Quæ diuinæ dona largitatis huic, quā diximus, eorum trinæ gratiæ poterit comparari? Quam quidem vt Apostoli mererentur accipere, in cœlum primitus Dominum oportebat ascendere, & sic eis ibi locum quodammodo conuersationis, sicut ipse promiserat parare. Vnde & Paulus: *Nostra, inquit, conuersatio in cœlis est.* Illuc ego Christus conscendit opere, vt cum Apostoli sequerentur mēte, & tātō ardētius appeterent esse, quod Dominum suū nouerāt præcessisse. Vnde & prædictus Apostolus nos adhortās ait: *Quæ sursum sunt, querite; ubi Christus est in dexterā Dei sedens: quæ sursum sunt sapite, non quæ super terram.* Vt enim beatus meminit Hieronymus, nihil maius potest parari seruo, quàm esse cū Domino. Et profecto quisquis præsentia alicuius plurimū diligit, maioribus in absentē desiderijs in ardescit. Abire ergo in cœlum eum oportuit vt spiritum mitteret, quia recedendo ab eis, quanto amplius ad sequēdū se desideria ipsorū accendebat, tanto perceptione maioris gratiæ dignos eos efficiebat. Benè prius spiritum quo peccata dimitterētur dedit eis in terra: quia vbi committitur, ibidem remissio est facienda, & quisquis indulgentiā non meretur in hac vita, frustra eā expectat in futura. Hāc ergo, Domine, per spiritum tuum, qui pro sanctis postulat, nobis hic impetra: illic te comprehendere mereamur, quò vt te sequi tua membra va-

lerent, spiritum nunc illis misisti de supernis. Illum, inquam, spiritum, de quo Propheta confidens, ait: *spiritus tuus bonus deducet me in terram rectam*. Quæ enim terra recta, nisi illa viuientium ab iniquitate penitus aliena, per hunc nobis spiritum in hac terra nõ recta remissionem tribue peccatorum, vt ad eam quæ recta per ei⁹ veniamus ducatum, Saluator mundi, qui cum Patre & eodem spiritu vnus es Deus in æternum, & vltra, Amen.

DE S. PETRO, SERMO XXII.



BEATI Petri Apostolorum Principis solemnitas tantò celebriùs ab Ecclesia veneranda est, quantò ipsi à Domino amplior Principatus in Ecclesia concessus est. Ipsum quippe quasi fundamētum Ecclesiæ Dominus collocauit, cùm in confessione fidei suæ, qua dictum est, *Tu es Christus filius Dei viui*, tanquam in petra quadam firmissima Ecclesiã suam ædificandam esse prædixit: & ei specialiter ligandi atque soluendi potestatem commisit. Cuius quidẽ petræ fundamētũ beatus cõsiderans Cyprianus in Epistola quadam ad Iubaianũ ita meminit: Manifestũ est autem & per quos remissa peccatorũ dari possit. Nã Petro primũ Dominus, super quem ædificauit Ecclesiã, dedit vt id solueret in terris quod ille soluisset. Idem de eodem ad Quintum, Petrũ quem primum Dominus elegit, & super quẽ ædificauit Ecclesiã suam. Ambrosius quoq; ipsum Petrum, super quẽ . . . intelligens quodam loco ait: Hoc ipsa petra Ecclesiæ canente culpã diluit. Et Hieronymus ad Marcellam, de fide nostra & Mōrani heretici dogmate scribens, de hoc ipso ait: Si igitur Apostolus Petrus, super quẽ Dominus fundauit Ecclesiã, &c. Quanta autẽ firmitas & cõstãtia Petri esset in fide, vt hiñc ipse meritò petra vocaretur, Dominus ipse alibi protestatur, dicens: *Ego pro te rogaui Petre, vt nõ deficiat fides tua*. Ac si diceret: quantumcũq; alij titubent, quātũcũq; de morte mea desperent, tua fides incõcussa manebit. Ex qua quidem fidei firmitate, & ipse Petrus fratres confirmare admonetur, cùm ei statim à Domino dicitur: *Et tu aliquando conuersus confirma fratres tuos*. Neq; enim credendum est tunc fidem Petri defecisse, cùm diuina dispēsatione Dominum permissus est negare, ex infirmitate s. carnis & timore mortis. Hic est Petrus, vt dictũ est, tanquã vnicum ceterorum firmamentum & confirmatio, cui post trinam amoris sui cõfessionem Dominus oues suas & agnos committēs,

ipsum totius Ecclesiæ summum constituit pastorem. Vnde & merito Sedes eius, quam passionis suæ martyrio decoravit, inter vniuersas Ecclesias Primatum accepit, vt sicut ille omnibus Apostolis, ita Episcopatus eius prælatus sit ceteris. Scimus antiquitus tres tantum Patriarchatus, hoc est tres principales Episcopatuum sedes Ecclesiam habuisse, Romanā scilicet, Alexandrinam, Antiochenam. Quarum quidem dignitas ad honorem B. Petri maximè respicit: cum videlicet tam Antiochena quàm Romana Sedes eius propriæ fuerint, & tertia id est Alexandrina, Marco eius discipulo cesserit. Hic est Petrus post Christum quasi alter Helisæus post Heliam.

LEGIMVS post raptum Helix, ad Helisæum filios Prophetarum congregatos esse, eosque iuxtafluenta Iordanis in casulis habitantes, quasi monasticam & cœnobialē vitam cum ipso duxisse. De quorum conuersatione B. Hieronymus quodam loco meminit, dicens; Filij Prophetarum, quos *Monachos legimus in veteri Testamento, &c.* Sicut autem tunc ad Helisæum illi, vt diximus, sunt congregati, Monasticè & communiter cum ipso viuentes: ita & post ascensionem Domini fideles ad Petrum adunati hanc vitæ perfectionem vel etiam maiorē arripuerunt. Quod quidem in Actibus Apostolorum Lucas diligenter describens, *Multitudinis*, inquit, *credentium erat cor vnum & anima vna*, nec quisquam eorum quæ possidebat aliquid suū esse dicebat, sed erāt illis omnia cōmunia. Constat etiā Helisæum, quia vidit Heliam, quando à se tollebatur, duplicatū spiritum Helix, id est ampliōrē gratiam in miraculis accepisse. Qui nō solū viuus sicut Helias mortuos suscitauit, verū etiam mortuus cum tactu ossium suorū defunctum vitæ reddidit. Quid est Heliā intueri, quādo sustollitur, in cælum scilicet aëreū, nisi Christum ad Patrem ascendentem cernere, hoc est eū Patre nō esse inferiorē credere, sed per diuinitatis naturā ipsum ei tanquam æqualem occurrere? Vnde & Psalmista: *A summo cælo egressio eius, & occursum eius vsque ad summum eius.* Summū quippe cælum Dei Patris excellētiam dicit, qui per hoc quod ab alio nō est summus per existentiam dicitur potius quàm per dignitatem. Ex hoc vtiq; cœlo filius nascendo procedit, quia Platoni mens ex summo Deo nata dicitur, hoc est sapientia de ipsa Patris substantia existens tanquā genita. De hoc quidē egressu generationis Filij de Patre illud est Propheticum, *Et egressus eius ab initio à diebus eternitatis.* Et ipse Filius, *Exini*, inquit, *à Patre.* Qui nē inferior vel indignior patre videretur, occursum eius vsque ad summū eius annectitur, quia per ple-

nitudinem diuinitatis Patri cœqualis assurgit. Cuius quidem æqualitatis dubitationem ipse increpans in Maria dicit: *Noli me tangere, nondum enim ascendi ad Patrem meum.* Ac si diceret, non es me digna manib. tuis contingere in terris, quæ nondum fide me tanquam Patri equalem contingis in supernis, quod est, me nondum tibi ad Patrē ascendisse: hoc est, te nondum credere me illi per plenitudinem diuinitatis equalem occurrere. Quod quia Petrus ceteris firmior in fide amplius credidit, quasi alter Helisæus Heliam sustolli vidit. Vnde & spiritum Helix quasi geminatū vel multiplicatum accipere meruit, qui ab ipso Christo maiorem miraculorū gratiā accepit, quàm ipse Christus per semetipsum exhibuit, sicut & ipse antea promiserat, dicens: *Qui credit in me, opera quæ ego facio & ipse faciet, quia ad Patrem vado:* hoc est in corde ipsius per fidem ad æqualitatem Patris conscendo. Quo itaque Petrus in hac fide firmior extitit, maiorem quàm ceteri gratiā miraculorum meruit. Qui non solū infirmos & vmbra corporis curauit, verum etiam eadem vmbra suæ virtute dicitur suscitasse. Vnde August. in Psal. cxxx. In Christo, inquit, maiora fecisse videntur Apostoli, quàm ipse Dominus Iesus. Ad vocem Domini surrexerunt mortui. Ad vmbra transeuntis Petri surrexit mortuus. Isidorus de vita & obitu Sanctorum Patrum: Simō Petrus præteriens vmbra mortuos suscitauit. Quod ergo Dominus ait, *Qui credit in me, maiora horum faciet,* vt dixit generaliter quicūque, sic specialiter ad singularem cōstantiā fidei Petri visus est retulisse. Mirabilius autē fuit miraculum vmbra Petri, quàm fimbria Christi. Fimbria quippe aliquid veritatis habet, vmbra verò similitudinem tenet, & illa permanet, hæc præterit.

Qv o d si post hanc miraculorum gratiam, dignitatem quoque honoris, quam Petrus à Domino est adeptus, consideremus: videbimus Sedem Petri ipsi quoq; propriæ sedi Dei, quā ab initio Hierosolymis habuit, præminere, vt ex hoc etiam quodāmodo in terris Christus videatur præferre. Quis enim nesciat ipsam quoque Hierosolymitanā Ecclesiam, sicut & ceteras Romanæ subiaceret? Quam tamē Ecclesiā ipsum fratrem Domini Iacobum primū habuisse constat Episcopū: nec tamē illa eius primā Cathedra vel ceterorum Apostolorū festiuitatē in Ecclesia meruerunt, vt hoc soli Petro priuilegiū reseruaretur. Qui etiā successorib. suis in Syluestro Papa id proprijs acquisiuit meritis, vt deinceps Roman⁹ Pōtīfex Vicarius quoq; Cōstātini in vrbe Imperiali ab ipso cōstitutus, à quo & insignia, quæ hanc exornāt dignitatē cōcessa sunt: quasi iuxta ordinem Melchisedech perfectus tam sacerdotali quàm re-

gia præmineret dignitate, vt in Ecclesia Petrus, in vrbe Cæsar habeatur. Geminam quippe gratiam tam in constantia fidei quàm in feruore dilectionis adeptus, tam Ecclesiasticam quàm regiam meruit sibi Monarchiam vindicare. Ceteris quippe discipulorum opinionem hominum magis, quàm assertionem suam de Christo proferentibus, & cum ipse Dominus ab eis requisisset, *Vos autem quem me esse dicitis?* quasi adhuc hæsitando reticentibus, Petrus vt fluctuantes confirmaret respondere non distulit: *Tu es Christus filius Dei viui.* Vnde statim specialiter ac solus beatus à Domino prædicatur, ac singulariter priuilegiū Ecclesiasticæ potestatis suscipere meretur, cum ei à Domino totum cælorum regnum, non pars, ei commendandum à Christo promittitur: *Tibi dabo, inquit, claues regni cælorum.* Quamuis enim generabiliter dictum sic omnibus Apostolis, *Quæcumque ligaueris super terram, &c.* Soli tamen Petro insuper claues regni cælorum datæ sunt. Sicut enim multæ ciuitates sunt in vno regno, ita multæ partes in populo Christiano. Regnum itaque Christi vniuersalis est Ecclesia, ita in potestatem Petri tradita, vt nihil in ea fieri nisi ordinatione vel permissione liceat Romani Pontificis: nullus alius generalem super omnes habet excommunicationem vel absolutionem. Qui etiam nonnullis discipulorum recedentibus, & omnibus plurimum dubitantibus, cum eis Dominus requireret: *Nunquid & vos vultis abire?* tanquam scilicet in quodam anxietatis articulo constitutus; ne quaquam reticere Petrus sustinens respondit: *Domine, ad quem ibimus? verba vite æternæ habes.* Ex hac denique intrepidus constantia, quam tunc in animo gerebat, & maxima semper dilectione flagrabat, profiteri non timuit, *Et si omnes scandalizati fuerint in te, ego nunquam scandalizabor.* Et rursum: *Etiam si oportuerit me mori tecum, non te negabo.* Et iterum: *Domine tecum paratus sum, & in carcerem & in mortem ire.* Non enim minori caritate succensus, quàm fuerat fide firmus. Quæ namque illa erat in eo amoris flamma, cum Dominū nec pro redemptione sua pati toleraret, cū ei passionē suam prædicenti respōderet: *Propitius esto tibi Domine ne fiat hoc.* Quē deniq; zelum amoris in ipsa captione Domini ceteris omnibus fugientibus ita exhibuit, vt in tanto trepidationis articulo seruo Principis aurem amputaret. Aqua quidem vltione nec ceteris Dominum comprehendentibus parceret, nisi ab ipso Domino citò correptus fuisset.

MEMOR itaque illius Dominici sermonis, *Maiores hac dilectio-*

nem nemo habet, quàm ut animam suam ponat quis pro amicis suis, morti se opponebat à qua Dominum liberare volebat. Qui cōtra vitia ipsamque radicem omnium malorum cupiditatem quanto armaretur zelo, vindicta illa in Ananiam & uxorem eius patenter ostendit; quos non gladio sicut dictum seruum percussit, sed mirabilius serui sui virtute peremit. Toleravit diu Dominus auaritiam Iudæ, iste nec ad momentum sustinuit sacrilegium cupiditatis commissæ. Quo enim amplioris zeli virtute feruebat, omne virtuti contrarium minus tolerabat. Et quo se amplius à Domino sublimari nouerat, magis se pro Domino semper humiliare studebat. Vnde & ad passionem crucis tandem veniens: quo videlicet genere mortis Dominum maximè secutus est, sicut ei antea prædixerat, non tam de passione sua trepidus, quàm de honore Domini sollicitus, nequaquam crucifigi se permisit ut Dominum, sed capite deorsum versum pedibusque sursum erectis, ex ipsa quoque corporis sui positione augmentum elegit pœnæ. Ex qua etiam sua humiliatione quantum à Domino meruit exaltari, dubium non potest esse, à cuius etiam honore nec id reor alienum esse, quòd quantocius mundi caput præminebat Romana Sedes eius facta est, ut hoc etiam iure in toto mundo Principatum obtineret. Per eam videlicet omnium regnorum Principem, quam ipse proprio sanguine Domino consecrauit, & hoc tanquam indissolubili bitumine quasi aliarum fundamentum fundauit. Ad cuius insuper ciuitatis gloriam id à Domino collatum est, ut cùm ceteræ Sedes Apostolorum reliquis eorum sint priuatae, hoc de Romana Dominus non tulerit, ne ad comparisonem eius ceteræ possint gloriari: imò & de corpore Coapostoli Pauli eam voluit insigniri, ut hæc quoque ciuitas ex his duobus gratiæ donis quasi geminatum acciperet spiritum, sicut & de hoc Helisæo nostro præfati sumus. Vnde factum est, ut hæc ciuitas à duobus fratribus Remo videlicet & Romulo prius ædificata, multò felicius à maioribus fratribus Petro & Paulo sit postmodum in Christo fundata. His duobus tota distributa est grātia quæ ad totius mundi confessionem sufficeret, cùm Petrus in miraculis, Paulus emineret in verbis. Quæ videlicet duo ipse Paulus distinguens: ait: *Iudæ signa potuit, & Græci sapientiam quarunt.* Ne quem fortè moueat, quòd ex priuilegio diuini amoris, Ioannes Petro præferri videbatur in meritis; cùm iste plus à Domino diligeretur, sicut ille amplius Dominum diligere creditur: agnoscat secundum bea-

eum August. hoc nequaquam de personis ipsis esse accipiendū, sed deduabus vitibus per eos significatis intelligēdū. Nec enim dubitat eum, qui plus diligit Christum, esse meliorē, nec eum qui plus à Christo diligitur beatiorē. Quòd si cui fortè displiceat nos ad mysterium hic declinare, nec in ipsis personis veritatem historię dissentire: si in eo, vt opinamur, Ioannes magis à Christo diligi dicatur, quod Christus maiorem ei caritatem vel familiaritatem exhibebat in opere: tum pro mundicia carnis, qua ille tanquam virgo præminebat: tum etiam quia pro iuuenili ætate maiorem circa eum prouidentię curam habebat. Plus igitur ipsum Christus amare dicitur per effectum operis, non per affectum dilectionis. Habeat itaque Ioannes hunc dilectionis effectio à Domino tanquam virgo, ita tamen vt Martyri, & per affectum amoris meliori non inuideat Petro. Vtrique autem suis nos magnis meritis ita iuuent apud Dominum, vt ad eorum pertingere valeamus consortium.

IN CONVERSIONE S. PAVLI, SERMO XXIII.


PRAECIPVI Gentium Doctoris conuersio tantò deuotius à conuersis per eum Gentibus est celebranda, quantò ipsas ipsi amplius esse constat obnoxias. Sola eius conuersio, per quam vniuersus conuersus est mūdus, vel diligentius de fide instructus, ac perfectius edoctus, sollemnitatem in Ecclesia meruit obtinere. Solus inter Apostolos ipse est, qui Propheticiis præconijs olim mundo promissus est, atque proprijs vaticinijs designatus, & à ceteris discretus itaque segregatus. Hic est rinoceros seu monoceros ille diuinis hodie loris adstrictus, qui pristinam feritatem deposuit, & Domini iugo deditus, diuinumque aratrum trahens, glebas vallium frangere cœpit. De cuius mirabili conuersione & ipse Dominus ad beatum Iob loqueris, & virtutem suam, qua id potuit, magnificans, ait: *Nunquid rinoceros volet seruire tibi? ac si diceret, sicuti mihi, aut morabitur ad præsepe tuum? Nunquid alligabis rinocerotem ad arandum loro tuo, aut confringet glebas vallium post te? Numquid habebis fiduciam in magna fortitudine eius, & derelinques ei labores tuos? Nunquid credis ei, quòd reddat sementē tibi, & aream tuam congreget?* Quod B. Gregorius libro Moralium, xxxi. de beato denique Paulo diligenter exponit. Rino cerotus

inquit, indomitæ omnino naturæ est, ita ut si quando captus fuerit, teneri nullatenus possit. Impatiens quippe, ut fertur illic moritur. Eius verò nomen Latina lingua interpretatum sonat, in nare cornu Rinocerus, qui etiam monoceros Græcis exemplarijs nominatur, tantæ esse fortitudinis dicitur, ut nulla venantium virtute capiatur. Sed sicut hi asserunt, qui describendis staturis animalium laboriosa inuestigatione sudauerunt, virgo ei puella proponitur. Quæ venienti sinum aperit, in quo ille omni ferocitate deposita caput deponit. Sicque ab eis, à quibus capi quæritur, repente velut eneruis inuenitur. Buxei quoque coloris esse describitur. Qui etiam cum elephantis quando certamen ingreditur, eo cornu, quod in nare singulariter gestat, ventrem aduersantium ferire perhibetur, ut cum ea quæ molliora sunt vulnerat, impugnantes se facile sternat. Potest ergo per hinc rinocerotem, vel certè monocerotem, unicornē, ille populus intelligi, qui dum de accepta lege non opera, sed solam inter cunctos homines elationem sumpsit, quasi inter ceteras bestias cornu singulari certauit. Inde passionem suam Dominus, Propheta canente, prænuncians ait: *Libera me de ore leonis, & à cornibus unicornium humilitatem meam.* Tot quippe in illa gente unicornes vel rinocerotes extiterunt, quot contra prædicationem veritatis de legis operibus gloriati, & fatua elatione confisi sunt:

BEATO igitur Iob Ecclesiæ typum tenenti dicitur: *Nunquid volet rinoceros seruire tibi?* Ac si dicatur, nunquid illum populum, quem superbire in nece fidelium stulta sua elatione cōsideras, sub iure tuæ prædicationis inclinas, subaudis ut ego? qui & contra me illum singulari cornu extolli conspicio; & tamen mihi cum voluero protinus subdo? Sed hoc melius ostendimus, si de genere ad speciem transeamus. Ille ergo ex hoc populo & primus in superbia, & postmodum præcipuus testis in humilitate nobis ad medium deducatur. Qui dū contra Deum se quasi de custodia legis nesciens extulit, cornu in nare gestauit. Vnde & hoc ipsum naris cornu per humilitatem postmodum inclinans dicit: *Qui prius fui blasphemus, & persecutor, & contumeliosus, sed misericordiam consecutus sum, quia ignorans feci.* In nare cornu gestabat, qui placitum se Deo de crudelitate confidebat, sicut ipse postmodum semetipsum redarguens dicit: *Et proficiebam in Iudaismo supra multos coetaneos meos in genere meo, abundantius emulator existens paternarum mearum traditionum.* Huius autem

autem rinocerotis fortitudinem omnis venator extimuit, quia Sauli sæuitiam vnusquisque prædicator expauit. Scriptum, namque est: *Saulus autem adhuc spirans minarum & cedis in discipulos Domini, &c.* Cum flatus nare reddendus trahitur, spiratio vocatur. Et illud sæpe per odorem nare deprehendimus, quod oculis non videmus. Rinocerus ergo iste nare gestabat cornu quo percuteret: quia minarum & cedis spirans postquam præsentem interfecerat, absentes quærebat. Sed ecce omnis ante illum venator absconditur, omnis homo, id est rationale sapiens opinione mortis eius effugatur. Vt ergo hunc rinocerotem capiat, sinum suum virgo, id est secretum suum ipsa per se inuoluta carne Dei sapientia expandit. Scriptum quippe est quòd cum Damascum pergeret, subito circumfulsit eum die media lux de cœlo, & vox facta est, dicens: *Saule, Saule, quid me persequeris?* Qui prostratus in terra respondit: *Quis es Domine?* Cui illico dicitur: *Ego sum Iesus Nazarenus quem tu persequeris.* Virgo nimirum rinoceroti sinum suum aperuit, cum Saulo incorrupta Dei sapientia incarnationis suæ mysteriū de cœlo loquendo patefecit. Et fortitudinem suam rinocerotus perdidit, quia prostratus humi omne quod superbum tumebat amisit. Qui dū sublato cœlorum lumine manu ad Ananiam ducitur, patet iam rinocerus iste quibus Dei loris astringitur, quia videlicet vno in tēpore cæcitate prædicationis baptismo ligatur. Qui etiam ad Dei præsepe ligatus moratus est, quia ruminare verba Euangelij dedignatus non est. Ait enim: *Ascondi Hierosymam cum Barnaba assumpto & Tito. Ascendi autem secundum reuelationem, & contuli cum illis Euangelium.* Et qui prius ieiunus audierat: *Durum est tibi contra stimulum calcitrare?* mira postmodum virtute præsentis pressus, ex verbi pabulo vires obtinuit, & calcem superbiæ amisit. Loris quoque Dei non tantum à feritate restringitur; sed quod magis sit mirabile, ad arandū ligatur: vt non solum homines crudelitatis cornu non impetat, sed eorum etiam refectioni seruiens, aratrum prædicationis trahat. Ipse quippe de Euangelizantibus quasi de arantibus dicit: *Debet enim in spe qui arat, arare: & qui triturat in spe fructus percipiendi.* Qui ergo tormenta prius fidelibus irrogauerat, & pro fide postmodum flagella libenter portat: qui scriptis etiam Epistolis humilis ac despectus prædicat: qui dudum terribilis impugnabat, profecto benè ligatus sub aratro desudat ad segetem, qui vivebat in campo malè à timore liber. De quo rectè dicitur: *Quis*

confringeret, &c. Iam si Dominus quorundam mentes intrauerat, qui illū veraciter humani generis redemptorem credebāt. Qui tamen cū nequaquam à pristina obseruatione recederēt, cū dura litteræ prædicamenta custodirent, eis prædicator egregius dicit: *Si circumcidamini, Christus vobis nihil proderit.*

QVI ergo in humili mente fidelium legis duritiam redarguendo contriuit, quid aliud quàm in valle post Dominū glebas fregit, ne. v. grana seminum quæ excussus aratro fidei sulcus cordis exciperet, per custodiam litteræ pressa deperirent. De quo adhuc benè subditur: *Nunquid fiduciam habebit, &c?* In rinocerotis huius fortitudine fiduciam Deus habuit, quia quanto illum crudeliùs dura sibi inferentem pertulit, tanto pro se constantiùs tolerantem aduersa præciuit. Cui labores etiam, quos ipse in carne pertulerat, dereliquit; quia conuersum illum vsq; ad imitationem propriæ passionis traxit. Vnde & per eundem rinocerotem dicitur: *Suppleo ea quæ desunt passionum Christi in carne mea.* De quo adhuc subditur: *Nūquid credes ei quod reddat seminātib; & aream tuam congreget?* Consideremus Paulum quis fuerit, cū ab ipsa adolescentia lapidatium adiutor existeret, cum alia Ecclesiæ loca vastaret, & acceptis Epistolis vastando alia peteret, cū mors ei fidelium nulla sufficeret, sed semper ad aliorum interitum alijs extinctis anhelaret. Et profecto cognoscimus, quia tunc nullus fidelium crederet, quòd ad iugum Deus suæ fortitudinis veritatem elationis inclinaret. Vnde & Ananias voce Dominica hunc & postquam conuersum audiuit, extimuit dicens: *Domine, audiui à multis de viro hoc, quanta mala sanctis tuis fecerit in Hierusalē.* Qui tamen repente commutatus, ab hoste prædicator efficitur, & in cunctis mundi partibus Redemptoris sui nomen insinuat, supplicia pro veritate tolerat, pati se quæ irrogauerat exultat. Alios blandimentis vocat, alios ad fidem terroribus reuocat. Istis regnum pollicetur cælestis patriæ, illis minatur ignes gehennæ. Hos per auctorem corrigit, illos ad viam rectitudinis per humilitatem trahit, atque in omni latere ad manum se sui rectoris inclinat. Et tanta arte Dei arcam congregat, quanta illam priùs elatione ventilabat.

SED neque hoc abhorret à Paulo, quòd rinocerus buxei coloris dicitur, & elefantorū vètres cornu ferire perhibetur. Quia enim viuere sub rigore legis assuevit, artius in illo ceteris custodia vniuscuiusque virtutis molliuit. Quid enim per colorē buxeum, nisi abstinentiæ pallor exprimitur? Cui ipse se tenaciter

adhærere testatur dicens: *Castigo corpus meum, & in seruitutem redigo, ne fortè cum alijs prædicauerim, ipse reprobus efficiar.* Qui diuinæ legis eruditione præditus, dum aliorum ingluuiem redarguit, cornu elefantos in ventrem ferit. In ventremque elefantos percusserat, cum dicebat: *Multi ambulant, quos sæpè dicebam vobis. Nunc autem & flens dico, inimicos crucis Christi. Quorū finis interitus, quorū Deus venter est, & gloria in confusione ipsorum.* Et rursum: *Huiusmodi Christo Domino non seruiunt, sed suo ventri.* Cornu suo igitur rinocerotus iste non iam homines, sed bestias percutit: quando illas Paulus doctrinæ suæ fortitudine nequaquam perimendos humiles impepetit, sed superbos ventris cultores occidit.

Quod si de prædicta Iob gentilis Regis prophetia trāsire ad Patriarcharum vel Prophetarum vaticinia iuuat, primum illud nobis occurrit, quòd in benedictione nouissimi & dilectissimi filij sui Benjamin, Iacob Patriarcha prædixit, in typo videlicet huius Apostoli, qui de tribu Benjamin, sicut ipsemet asserit, fuit. *Benjamin, inquit, lupus rapax: mane comedet prædam, & vespere diuidet spolia,* vel secundum aliam translationem, *diuidet escas.* Libet autem ea quæ de Benjamin fuerunt altiùs repetere, vt quòd congruè singula Paulo aptari possint euidenter appareat. Benjamin ergo inter fratres nouissimus, & patri carissimus, matrem suam Rachel nascendo peremit. Quæquidè moriens eum Benonim, id est filium doloris mei nuncupauit. Pater verò postea commutans, ipsum Benjamin, id est filium dextræ vocauit. Benjamin itaque, fratres, fratrum nouissimus, & patri dilectissimus Paulus ipse est, qui nouissimè post Apostolos à Deo vocatus, tãto extitit Deo carior, quanto in meritis fuit excellētior. De quo Hieronymus ad Paulinū: Paulus, inquit, nouissimus in ordine, primus in meritis est; quia plus omnibus laborauit. Cōstat insuper eum non solum martyrem, sed & virginem extitisse; vt quæ in Petro & Ioanne Apostolo diuisæ videntur meritorum palmæ, in ipso reperiantur conjunctæ. De prærogatiua autem virginalis palmæ ipsius illud est Ambrosij in prima ad Corinthios. *Dico autem non nupti, &c.* Non diceret, *Bonum est innuptis vt sint sicut & ego,* nisi esset integer corpore. Nec diceret, *Omnes homines volebā esse sicut meipsum.* Si enim habuit vxorem, & hoc dixit, virgines esse voluit. Sed absit. Sic enim à pueritia spiritu ferbuit, vt huius rei studium non haberet, quippe cum iuuenculus anticipatus sit à gratia Dei. In eo adiuuatur quis quod videtur auiditate mentis appetere. Item in ij. Epistola ad Corinthios, Omnes Apostoli

excepto Ioanne & Paulo uxores habuerūt. Hinc Hieronymus docet ad Eustochiū virginē*, inter cetera sic scribit: *De virginibus* inquit Apostolus, *præceptū Domini non habeo*, quod ipse ut esset virgo non fuit imperij, sed propriæ voluntatis. Nec enim audiendi sunt, inquit, qui in eum uxorem habuisse cōfingunt: cum suadēs perpetuam castitatem intulerit, *Volo autē omnes esse sicut me ipsum*, Qui etiam in libro Hebraicorū nominū, & ipsa interpretatione nominis Pauli excellentiā eius cōmendans, ait: Paulus mirabilis siue electus interpretatur, quem Dominus ipse vas electionis vocauit, & tam vita quā doctrina inter Apostolos mirabilē fecit. Benjamin, ut dictum est, nascens matrē parientem peremit, quæ præ dolore partus moriens, Benonim eum, id est filium doloris appellauit. Pater verò nomine cōmutato, eum Benjamin, id est filium dextræ nominauit. Paulus quippe in Christo iam renascens, matrē suam Iudæā, quæ eum in doctrina legis genuerat, & educauerat, quasi peremisse dicitur; cum præcipuē carnaliū observationū præcepta, in quibus viuebant, euacuerit, & totā eorum gloriā ad nihilum redegerit, quasi de utero matris exiens, & à scola synagogæ per conuersionē recedens, iuxta quod ipsemet ait: *Qui me segregauit ex utero matris meæ, & vocauit per gratiā suam*. Vnde & bene mater eum Benonim, id est filium doloris sui vocauit: quia quo plus errorem eius Paulus infestauit, ampliū eam dolere fecit, & quo præ sapientiæ suæ excellentia gratior extiterat habitus, ampliū eam contristauit amissus. Benè autem pater nomen cōmutare voluit, ut potius eum filiū dextræ, id est prosperitatis seu fortitudinis appellaret quā doloris: quia, ut hīc dixim⁹, interitus Synagogæ, qui per Paulū factus est, in prosperitatē potius fideiū, & communē Ecclesiæ exultationem, quā in dolorē reputandus est. Qui etiā qua fortitudine animi vigerit, innumeræ in eū persecutiones indicant. Quod verò dicitur manē rapere prædam, & vespere escas diuidere, significat eum primitus persecutorem Ecclesiæ fuisse, & postea ei verbi refectiōem doctrina suæ prædicationis administrasse. Quod autē iuxta aliā translationē dicitur distribuere spolia, significat eum posteaquā conuersus est multas animas diabolo eripuisse, & quasi spolia fugato hoste hos retinuisse: quod postea per Ecclesiastica officia, vel quæcumque fidelium ministeria ordinauit. Hieronymus verò in libro Hebraicarum Quæstionum asserit secundum Hebræos, quod altare in quo immolabātur hostiæ & victimarū sanguis ad basim illius fundebatur, in parte tribus Bējamin erat.

Quod quidem conuenienter iste Christiani sanguinis effusor intelligit, de quo scriptum est *spirans minarum & cedis in discipulos Domini*, vbi Christi membra tanquam lupus oues laniet in terris.

Vt autem de Patriarchis ad Prophetas transeamus, quid de hoc Benjamin nostro maximus ille Regum & Prophetarum Dauid prædixerit, audiamus: *Præuenerunt Principes coniuncti psallentibus in medio iuencularum tympanistiarum. In Ecclesiis benedicite Deo Domino de fontibus Israel. Ibi Benjamin adolescentulus in mentis excessu.* In initio quippe nascentis Ecclesiæ Apostoli principes eius in electione præcesserunt, quia prius à Christo sunt electi, per quos conuerterentur ceteri. Qui si non tantæ perfectionis fuerunt ut verbo prædicationis alios generare possent, psallentes tamen, id est psalmum in bona operatione habentes dicuntur. Psalmus quippe, id est melodia instrumenti, quod Psalterium dicitur, impulsione manuum in cordis affectum bonæ operationis actiones significat. Manibus quippe ad operandum magis quàm cæteris vitimur membris. Ideoque per manus opera significantur. Principes itaque in Ecclesia coniuncti sunt psallentibus, quia qui verbo prædicationis insistant, subiectis plebibus, quæ ad hoc non sufficiunt, sed tamen bona operantur quæ possunt, in vna fide sociantur. Prælati autem & subiectis plebibus adolescentulas tympani striae coniungit, id est vitam continentium, qui magnæ tympanum mortificationis gestant, & tantò ad nouitatem Christi amplius accedunt, quanto à vetustate primi hominis longius recedunt. Quasi ergo in medio istarum duo præmissi ordines consistunt, quia vita continentium quo maioris est meriti, amplius rectorum & subiectorum plebium ordines quasi ambiendo suis virtutibus munit, & orationibus protegit. Sed quia tam continentes quàm subditæ plebes de doctrina prædictorum principum, quasi de haustu quorundam fontium imbuuntur: hortatur ut de his fontibus Deum maximè glorificemus, qui tales Ecclesiæ suæ præesse disposuit. Quorum ille Benjamin noster, quo perfectioris doctrinæ aqua imbuit corda fidelium, tantò rectius à Domino vas electionis, & crater præclari nuncupatur. De cuius excellentia statim adnectitur: Ibi, hoc est inter illos fontes, quasi vnus ex ipsis est Benjamin per electionem, ut dictum est, nouissimus, sed per dignitatem primus. De cuius excellentia & gratia singulari ei collata statim subditur, *In mentis excessu*, hoc est in extasi mentis factus, & tanta contemplatione vsque ad tertium cælum assumptus,

& suprà hominem raptus, vt ipsemet ignoret vtrum in illa sublimitate reuelationis anima eius in corpore fuerit, an extra. Cùm enim Dominus Moyſi quærenti eum videre respondit, *Non videbis me homo & viuet*, profectò supra hominem fuisse tunc videtur, qui tanta visione in cælestibus fruebatur, vbi tanta se audisse commemorat, quæ homini loqui non liceat.

QVANTO autem ibi perfectius instructus fuit, tantò nobis perfectiorem doctrinam reliquit. Quæ quidem doctrina quantum cæteris præferatur, non solum à Christianis, verum & à Philosophis non ignoratur. Ipse quippe Coapostolus eius atque Apostolorum Princeps Pauli Epistolas, in quibus tamen se reprehendi nouerat, plurimum commendans, *Et sicut carissimus*, inquit, *frater noster Paulus secundum datam sibi sapientiam scripsit vobis*. Sicut in omnibus Epistolis loquens de his in quibus sunt quædam difficilia, intellectu, quæ indocti & instabiles deprauant, sicut & ceteras scripturas, ad suam ipsorum damnationem. Hinc & Hieronymus Pammachio scribit; Paulum Apostolum quotienscumque lego, videor non mihi verba audire, sed tonitrua. Quantus autem & apud Philosophos habitus sit qui eius vel prædicationem audierāt, vel scripta viderant, insignis ille tam eloquentia quàm moribus Seneca in Epistolis quas ad eum dirigit his verbis protestatur: Libello tuo lecto de plurimis ad quosdam litteris, quas ad aliquam ciuitatem seu populum caput Prouinciæ direxisti, mira exhortatione vitam mortalem contemnentes, vsquequaque reſecti sumus. Quos sensus non puto ex te dictos, sed per te: certè alioquin & ex te, & per te. Tanta etenim maiestas earum rerum est, tantaque generositate clarent, vt vix suffecturas putem hominum ætates, quibus institui perficique possint. Meminit & Hieronymus huius laudis Senecæ erga Paulum in libro de Illustribus viris, cap. x i i. ita scribens: Lucius Anneus Seneca Cordubensis Fotini Stoici discipulus & patruus Lucani Poëtæ, continentissimæ vitæ fuit, quem non ponerem in Catalogo Sanctorum, nisi me Epistolæ illæ prouocarent quæ leguntur à plurimis Pauli ad Senecam, vel Senecæ ad Paulum. In quibus, cùm esset Neronis Magister, & illius temporis potentissimus, optare se dicit esse eius loci apud suos, cuius sit Paulus apud Christianos. Tempus me, fratres, deficeret, si per singula laudem Pauli prosequens virium mearum facultatem excedere præsumam. Sed quia scriptum est, *Si quid residuum fuerit igni comburatur*, Deo cetera relinquamus, & ad Missarū sollempnia super his hostiam laudis immolaturi nos præparemus.

DE S. IOANNE EVANGELISTA, SERMO XXIV.

QVI Sermones in Sanctorum festiuitatibus componunt, à prærogatiua, hoc est dignitate ipsorum non incongruè sumunt exordium; ut eorum festa tantò deuotius à fidelibus celebrentur, quanto amplius ipsorum commendatione audita & eos gratiores intelligimus, & de meritis ipsorum magis confidimus. Constat autem inter vniuersos Apostolos, sicut & beatus meminit Augustinus, Epistolam Pauli ad Galathas exponens, tres honorabiliores extitisse, Petrum videlicet, Iacobum, & Ioannem: qui ut memoratus ait Apostolus, videbantur columnæ esse, quasi fulcimentum scilicet ac robur aliorum. Hos quippe tres familiarissimos Christo fuisse ex multis locis Euangeliorum colligimus, & his seorsum Dominum sua secreta sæpius commisisse, & tanquam inseparabiles comites eos habuisse. His enim seorsum assumptis transfigurationis suæ gloriam in monte reuelauit, & ad passionem veniens eisdem secreto assumptis ait: *Tristis est anima meā usque ad mortem. Sustinete hic, & vigilate mecum.* Ad quos etiam post orationem regressus, *vigilate, inquit, & orate, ne intretis in tentationem.* Vnde patenter innuitur, quàm inseparabiliter isti tres ei semper adhæserint, quos & in gloria trāsfigurationis, & in agonia passionis, & tam in vigilijs quàm in oratione tanquam comites indiuisos habuerit, nec à se vquam sicut ceteros separari permiserit.

CVM itaque isti, ut dictum est, inter Apostolos non dubitentur honorabiliores, quanto præmineat honore Ioannes quis dubitet, qui inter hos quoque qui honorabiliores extiterunt, ex priuilegio Dominicæ dilectionis ampliorem quendam honorem est adeptus, & ab ipso Domino matri eius virgini tanquam alius filius pro ipso est virgo substitutus? Sic enim vtrisque cruci eius adstantibus de ipsa cruce loquitur, dicens: *Mulier, ecce filius tuus.* Ad discipulum autem: *Ecce mater tua.* Vbi & ipsemet Ioannes adnexit, *Ecce filius tuus,* dicens: *Et ex illa hora accepit eam discipulus in sua.* In sua, inquam, subaudis stipendia, & quasi virginitatis suæ primi*, non in sua quasi vxorem. Felix hæc incomparabilis remuneratio discipuli, cui virgine matre saluatoris commendata, quasi alter filius ei à Domino deputatus est, ut eius gaudijs, eius colloquijs assiduè frueretur, ei sedulius usque ad exitum ministra-

ret, eius corpusculum immaculatum virgineis & quasi Angelicis manibus sepulturæ præpararet, & præparatum in sepulcro componeret: beatos illos oculos clauderet, Angelicam illam faciem aptaret, & tam manibus quàm ceteris membris deuotè compositis officij sui deuotionem sacerdos magnus consummaret. Cuius sanctissimæ postmodum vitæ atque immarcessibili carni nec rosam martyrij, sicut nec lilium virginitatis certum est defuisse, sequenti, vt scriptum est, Agnum quocumque ierit. Hic quippe & in feruentis olei dolium missus, & in exilio diutino relegatus, illud constantiâ mentis impleuit, quod de calice Dominicæ passionis bibendo Dominus antea tam ipsi quàm fratri eius prædicens, *Calicem*, inquit, *meum bibetis*. Cuius quoque constantia & insuperabilis caritas maximè circa crucem probata est, cùm ipse solus Apostolis per fugam dispersis cruci assisteret intrepidus, & cum matre Domini crucifixo Domino compateretur. Ex qua denique perseuerantia constantiæ stipèdium illud quod diximus singulare de commendatione matris à Domino meruit suscipere. O beatum commercium! ô commutatio incomparabilis! Abstractus à nuptijs virgo est, & ab vxore diuisus, & à lecto concupiscentiæ sequestratus, vt immaculatus immaculatam susciperet Domini matrem, filius efficeretur virginis, & spiritalis frater Christi, potius quàm maritus vxoris. Cui profecto tam in hoc quàm in ceteris Christus quantam exhibuerit dilectionem, multis manifestum est indicijs. Soli quippe ipsi concessum est suprâ pectus Domini in cœna recumbere, & tanquam impavidum & fide constantem quiescere in illo imminentis passionis articulo, vbi iam omnium corda fluctuabant, vt hinc quoque constantia eius probaretur, sicut Ionæ Prophetæ, qui de imminente periculo ceteris desperatis securus in sentinam vt dormiret descendit. Quod quidem Apostolus nequaquam præsumeret, nisi de nimia eius familiaritate confideret, vt in eius gremio tanquam in stratu aliquo, & in eius pectore quasi in puluinario quodam sese reclinaret. De quo quidem pectore, vbi, sicut Paulus meminit, omnes sapientiæ & scientiæ thesauri erant absconditi, fluenta Euangelij ceteris altius exhaurire meruit: vt plus ex hac quasi dormitione sua perciperet recumbendo, quàm ceteri prolixum illum Cœnæ sermonem audiendo. Vnde & ab ipso tantum sermo ille postmodum est descriptus, cuius spiritalibus auribus per reuelationem ampliùs fuerat impressus. Cuius etiam vitæ longitudo vsque ad senium porrecta patenter indicat quàm necessarium Dominus ad instructionem

Ecclesiæ

Ecclesiæ suæ tamdiu eum reseruaret in mundo. Quem nec ita vt ceteros Apostolos passionibus exposuit, nec affligi permisit, cum & eum in feruenti oleo custodierit illæsum, & vt eius citius terminaret exilium, in persecutorem eius vindictam maturauit Domitianum. Cuius omnibus decretis à Senatu quassatis occulta Dei dispensatione ab exilio ipse reductus fidelibus populis cū summa exultatione est restitutus. In quo etiā exilio ei à Domino quæ sit collata cōsolatio, reuelatio ibidem ei facta, quæ Apocalypsis dicitur, manifestè testatur. Qui etiam quàm mirabilem & iocundum vitæ habuerit terminū, in morte quoq; circa eum summa dilectio Domini claruerit, multorum relatione didicimus. Solum quippe ipsum ab ipso Domino legimus inuitatum, vt ad supernum fratrum suorum conscenderet conuiuium: vt eo veniente sic omnium compleretur gaudiū. Qui & vt voluit, & quando voluit, animam suā in manus Domini cōmendans, tam alienus extitit à dolore mortis, quàm ignarus fuerat à corruptione carnis. Cuius denique corpus nec corruptione vel putredine corruptum in specie mannae perhibetur conuersum, vt ex eius speciei candore munditia carnis probaretur immaculata. Quod nonnulli quoque Sanctorum iam gloria resurrectionis donatū astruere non dubitauerunt. Vnde illud est Augustiniani sermonis in Natale Martyrū, Vt taceam⁹ quia omnia possibilia sunt Deo, & quod clausis tumulis possit corpus spirituale educere, Ioannis tantū Apostoli habemus exemplum, quem tumulus susceptū claudere potuit, custodire nō potuit. Nā depositum corpus perdidit, nō assumpsit. Hic enim clausis tumuli foribus gratiā resurrectionis ablatū est, vt constaret sepultura, nec inueniretur sepultus. Denique cum sacerdotes honorandi causa corpus inquirerēt, reserato aditu tumulus nō potuit reddere quē suscepit. Cuius etiam locum, quo castissimū corp⁹ eius tenebatur cū Euangelium scriberet, vel orationi instaret, quanta gratia Deus insignierit, Gregorius Turonēsis lib. Miraculorum 1. commemorat, dicens: In Epheso habetur locus, in quo hic Apostolus Euangelium scripsit. Sunt autē in summitate mōtis illius proximi 1111. parietes sine tecto, vbi orationi insistens Dominum exorabat, obtinuitque ne in loco illo imber & . . . descenderet, donec ille Euāgelium ad impleret. Sed vsque hodie ita præstatur à Domino, vt nulla ibi descendat pluuia.

Ex his itaq; specialis iste dilectus Domini quàm honorabilis inter ceteros, quàm acceptus extiterit Deo, quantis præmineat meritis, quantis sit extollendus præconijs, & vos Deo dilectæ Virgi-

nes attendite, tantoq; deuotiùs eius sollempnitatem celebrate, quāto amplius eius excellētiā sanctam imitamini puritate. Cuius nos intercessio ita in sancto confirmet proposito, vt ad illud supernū, quo ipse inuitatus est, conuiuiū perueniatis: vt illic mentē feliciùs quā hie carnem reficiatis, sponso vestro cælesti perenniter coniunctæ, cuius præsentia visio ipsa summa est beatitudo.

IN ASSUMPTIONE B. MARIÆ, SERMO XXV.



ICVTEX dictis Ecclesiasticorum doctorum collegimus, Domino ascendente in cælos quidam Angelorum dubitantes, vel potius admirantes, de tanta glorificati hominis magnificentia, ceteros assistentes non semel interrogabant, *Quis est iste Rex gloriæ?* Sic & in hodierna Dominicæ matris Assumptione de tanta infirmi sexus exaltatione nō incongruè per Angelicā admirationem dictū esse credimus: *Quæ est ista quæ ascendit sicut Aurora consurgens, pulchra ut luna, electa ut sol, terribilis ut castrorum acies ordinata?* Aurora quippe consurgēs primam claritatem diei affert. Surgere autē electorum est, hoc est ad culmen virtutū, & ad comprehendēdum Deū sese attollere: sicut è contrario reproborum cadere, atque in profundū vitiorum se immergere. Vnde ad torpentes somno negligētiæ, & in sua iacētes ignauia, vox illa est exhortationis. *Surge qui dormis, & exurge à mortuis, & illuminabit te Christus.* Surgunt quidam & per pœnitentiā à morte animæ quasi suscitati resurgunt, sed ad tanta virtutū merita nō excreuerunt, vt in exemplum perfectionis assumi queant, nec quasi Aurora claritatem doctrinæ, his, qui ad perfectionem vitæ se student attollere, valent exhibere. Beata verò Dei genitrix quanto in virtutibus excreuit perfectiùs, tantò perfectionis suæ claritatem more surgentis Auroræ amplius dilatauit, & cædoris virginei proposito prima resurgens, huius perfectionis viam, qua solæ virgines agnum sequuntur quocumque ierit, proprio declarauit exemplo: sicut & Aurora, vt dictū est, prima diei claritatem affert. Et si enim nōnulli virgines eam præcessisse credātur, sicut de Helia, vel Hieremia, vel Daniele, vel quibusdam alijs æstimant; non hāc eos virtutem tam ex deuotione facti propositi quā ex necessitate quadam, atque oppressione persecutionis credimus habuisse: præsertim cū eo tempore maledictioni subjacerent ex lege, qui semē in Israel non relinquerēt, & quædam legis coactiones ad nuptias cō-

pellieret. Vsq̃ue adeò nāq; lex ista matrimonij vigeat, vt ipsa quoque mater Domini tam à parētibus quàm à lege coacta desponsari sustineret. Diuina tamē reuelatione confidens. virginē quoq; illū, cui & virgo nubebat, ad virginitatis seruandæ cōsensum se trahere non desperabat. Pro quo maximè impetrādo in ipso desponsationis tempore secretum orationis cubiculum tenere credenda est, quo ingressus fuisse Angelus memoratur ad eā missus. Non enim eā exterius cum secularib. feminis morantem reperit, sed abditam pudicitia & cubiculi ostio clauso deuotè Dominū orantē, & sinceræ orationis puritate propositi sui concordia Domino cōmendantem. Vnde & in medijs precibus suis Angelicam visionem meruit, qua sic ad integrū cōfortaretur, vt & votū virginitatis ei Dominus custodiret, & à maledictione legis de ipsa nascendo ei pariter prouideret, & per eā in mulierib. benedictam, sicut & ipse mox Angelus cōmemorat, vniuerso mūdo benedictionē infunderet, illud ei s. semen largiendo, de quo Abraham promiserat, dicens: *In semine tuo benedicentur omnes gentes.*

HAE C itaq; tanquā Aurora cōsurgens, prima claritate mūdam illustrauit, quia prima castimoniae nitore, & sactę virginitatis propositum in exemplū proposuit. Sed quia nō satis est ad laudem ipsius vnū virginitatis bonum, si ceterorum gratia desit: Lunæ quoque cōparatur eius pulcritudo, quia toti⁹ Ecclesię dona in ea sunt collata, & quod per partes diuersi fideles percoperūt, in eā transsum est totum: & quæ in ceteris diuisa sunt dona, in ipsa reperiūtur coniūcta. Et quoniam parū est quantamcūque gratiam donorum habere, si desit in eis virtus perseueratiæ, de qua scriptū est, *Qui perseuerauerit, hic saluus erit*, adiunctū est, *electa ut sol.* Non enim sicut Lunæ, claritas Solis defectui subdita est, sed in suo vigore perseuerat. Tria itaq; in laude hui⁹ Virginis præmissa sunt. Primo quippe cōparata est auroræ pro exēplo pudicitia, quæ per eam mūdo innotuit: postmodū Lunæ, pro plenitudine omniū gratiarū: deinde Soli, pro perseuerantia in eis accepta. Quibus quidē donis adornata, & quasi quibusdam spiritalibus armis munita, tandē terribilis memoratur vt castrorum acies ordinata. Talis quippe acies & suis est amabilis, & aduersarijs terribilis: si videlicet ita vt cōuenit ordinata fuerit. Tunc verò benè est ordinata, cū aduersus singulos . . . irruentes hostes prouisi sunt, qui eis resistere valeant, ne quis locus pateat, quò irrumperē ad feriendū hostis queat. Scimus scriptum esse, quia *militia est vita hominis super terrā*: & qui in agone illo contendit, de quo dicitur, *Nō coronabitur nisi qui legitimè certauerit.*

rit, ab omnibus se abstinere, ne coronam s. victoriae perdat. Hostes fidelis animæ, & inimici satellites, qui eam suis tētionibus persequuntur, demoniaci spiritus sunt, sicut est spiritus fornicationis, & qui ceteris præsunt vitijs. Aduersum quos Principes & Potestates, ut ait Apostolus, colluctatio nobis est, qui omnibus fulti virtutibus nō apparemus. Nec tā de victoria metuēdi sumus illis, quā illi nobis. Dei verò genitrix omniū munimē est virtutū adornata, & cōtra impetus quarūcūq; tētionū vel vitiorū, singulariter habitu virtutum roborata, magis illis terribilis, quā ei ipsi apparent.

LEGIMVS ascendenti Domino Angelos astitisse, qui discipulos eius consolantes dixerunt, *Viri Galilei, &c.* A quibus etiam ceteris prae admiratione quærentibus Angelis, *Quis est iste Rex glorie?* responsum fuisse credimus, *Dominus fortis & potens, Dominus potens in praelio.* Et rursum, *Dominus virtutum ipse est Rex gloria.* Vtrorumque verò Angelorū quasi quadam triūphali pōpa deductus ad Patrē, à dextris eius cōsedisse noscitur. At vero si diligēter illū tūc occursum Angelorū, & triumphalem pōpam Christo exhibitam, hodiernę festiuitatis comparemus iocunditati: videbimus plus aliquid in assumptione matris ei deferri, quā in ascēsiōne Filij ipsi exhiberi, & huius pompæ occursum illo non mediocriter digniorem. Soli quippe Angeli ascendenti Christo occurrere potuerūt: ipse verò pariter cum tota superna curia, tā Angelorū quā fidelium animarū eius animam suscepit, in qua ipse tā animā quā carnem antea susceperat. Nec animā solū, verū etiam corpus ad cælos hodie sustulisse creditur, ut animæ pariter & carnis glorificatione eā remuneraret, in qua, ut dictum est, simul animam & carnē decreuit assumere. Cui quidem rei plurimū attestatur sepulchrū vacuū penitus repertū, sicut & antea fuerat Dominicū: ut ipsa quoque resurrectionis gloriā & geminā stolam adepta credatur, sicut manifestē festina huius diei oratio cōtinet, his verbis: *In qua sancta Dei genitrix mortē subiit temporalem, nec tamen mortis nexibus deprimi potuit &c.* Cū enim præmissum sit, *mortē tēporalem*, patenter ostēditur, id quod subiūctū est de vinculis mortis, ad mortē illā carnis referēdum esse, nō ad mortē animæ, cuius vinculis nō detineri cōmune est omnibus electis. Quod diligēter beatus quoq; Gregorius Turonensis attendens cū de trāsitu eius scriberet, maturę quoque resurrectionis eius gloriā asserere nō dubitauit. Vnde Miracul. li. x. ca. iiii. ita meminit: Post Dominic. Ascens. gloriā Apost. Domini cū B. Maria matre eius in vnā cōgregati domū, omnia ponebāt in medio, nec quisquā suū aliquid esse dicebat, sed vnusquisq; cuncta

possidebat in caritate, sicut sacer Apostolicæ actionis narrat stitissus. Post hæc dispersi sunt per regiones diuersas ad prædicandum verbum Dei. Denique impleto beata Maria huius vitæ cursu, cum iam vocaretur à seculo, congregati omnes sunt Apostoli de singulis regionibus ad domum eius. Cumque audissent quia esset assumenda de mundo, vigilabant cum ea simul. Et ecce Dominus Iesus aduenit cum Angelis suis, & accipiens animam eius, tradidit Michaeli Archangelo, & recessit. Diluculo autem leuauerunt Apostoli cum lectulo corpus eius, posueruntque illud in monumento, & custodiebant ipsum aduentum Domini præstolantes. Et ecce iterum astitit eis Dominus, & susceptum corpus sanctum in nube deferri iussit in paradysum, vbi nunc resumpta anima cum electis eius exultans æternitatis bonis nullo occasuris sine perfruitur. Ex qua quidem tanti viri assertionem, quàm gloriosus iste summæ Virginis transitus sit liquet. Ad quod videlicet consecrandum seu celebrandum tam ipse Dominus cum Angelis de supernis occurrit, quàm Apostoli de vniuersis regionibus sunt congregati, vt exequias eius isti præpararent, quam illi susciperent.

SCIMVS Apostos in morte Domini metu fuisse dispersos, & in fugam conuersos. Nunc autem diuina dispensatione factum est, vt quod in filio minus est augmentum, in obsequio matris recompensetur; & quod ibi deliquerant dispersi, hinc emendarent congregati. Ex quo etiam apparet, quantò amplius de honore matris ipse Dominus, quàm de proprio fuisse videatur sollicitus, si quis tam vitam matris quàm exitum penset. Ipse quippe, non solum in passionem, verumetiam antea tanta sustinuit probra, vt homo vorax, & potator vini, & dæmonium habens diceretur, nulla prorsus infamix macula matris excellentiam respergi pertulit. Vnde & de ipsa nasciturus sponsum ei prouidit, per quem non solum eius corporalibus necessitudinibus prouideret, verumetiam tam maledicti quàm infamix crimen ab ea propulsaret. Triduo Dominicum corpus in sepulchro iacuit, & à die resurrectionis quadraginta diebus ascensionem suam distulit. Quam quidē dilationem nequaquam, vt dictum est, in matre pertulit. Deniq; & sacrum corpus clam prius in paradysum sustulit quàm resuscitauit, quo mirabilior exanimis corporis assumptio fieret ac resurrectio, nullatenus iam ipsum suscitatum terreno contactu iudicans dignum. Creatum extra paradysum legimus Adam, in paradiso Euam: resuscitatum in terris Dominum, in cœlestibus

verò corpus maternum. Perpendant feminæ quanta inferiorem earum sexum gloria Dominus sublimauit, & quàm eis esse naturalis videatur tam cœlestis quàm terrestris paradysus. In hoc quippe femineus sexus tam corpore quàm anima primum creatus, in istum hodie anima pariter cum corpore sublimatur. De veteri Adam creata est Eua: nouus autem Adam & veteris redemptor generatur ex Maria. Illa de paradiso illum suum tam virum quàm parentem expulit: hanc hodie suus tam sponsus quàm filius ad feliciorum paradysum assumpsit. Qui quemadmodum cœlos ascendens, à dextris Dei sedisse describitur, ita hodie matrem assumptam à dextris suis collocasse non dubitat, cui olim per Prophetam dictum fuerat, *Assuit Regina à dextris tuis, in vestitu deaurato*, hoc est in corpore semper immaculato, etiam immortalis & incorruptibili facto. Aurum quippe ceteris metallis splendidius & solidius, nec igne consumi, nec rubigine potest corrumpi.

SICUT ergo Dominus in seipso viris, iã in matre feminis gloriam resurrectionis exhibuit: quo videlicet vtriusque sexus desideria spe futuræ beatitudinis amplius in se concitaret. Ad hanc specialiter illa vox Sponsi dirigitur, qua tam dulciter inuitatur: *Surge, propera amica mea, & veni. Iam enim hiems transiit, imber abiit, & recessit.* Amicam simul & formosam eam appellat, quæ tanta est caritate Dei vulnerata, vt nulli inimici telo in ea locus pateat. In cuius singulari laude, & ab ipso ei dicitur: *Immaculata mea, & macula non est in te.* Etsi enim multi amici Dei dicantur, iuxta quod ipse Sponsus Apostolis ait, *Vos autem dixi amicos*: comparatione tamen Dominicæ Matris, cui ab Angelo dicitur, *Aue gratia plena*, nulla est fidelium anima immunis à macula. *Surge, propera*, hoc est, matura resurrectionem, ad me filii mater es perducenda. Per hiemem & imbrem, hoc est gelu & pluuiam, totam hiemalis temporis comprehendit grauitatem. Tanto autem quisq; amplius in hac vita grauatur, & inuitus tenetur; quanto securior de futura, maiori desiderio ad eam festinat. Quis autem fidelium sic ad Dominum, sicut mater peruenire cupiebat ad filium? Tanto ergo hanc vitam magis pro hieme habebat, & grauius sustinebat, quanto ad æstatem supernæ serenitatis amplius anhelabat. Vnde rectè nunc dicitur ei iam hiems transisse, & imber abiisse, quæ finitis omnibus molestijs, non ad illum Abraham sinum & refrigerium fidelium, quo pauper Lazarus perductus est, sed ad ætherei throni culmen est

assumenda. Non ignoramus beatum Hieronymum, cùm huius Assumptionis sermonem scriberet, intantum dubitasse de resurrectione hac, quam diximus in Matre Domini completã, vt diceret nihil pro certo hinc haberi, nisi quòd hodierna die migravit de corpore. Sed cùm in Daniele scriptum sit: *Pertransibant plurimi, & multiplex erit scientia*, & beatus Benedictus in Regula dicat, quia reuelat Deus sapè iuniori quod non reuelat maiori: potuit contingere, vt quod tempore Hieronymi latuit incertum, postmodum reuelante spiritu fieret manifestũ. Quod si etiam à minori ad maius argumentum ducamus; quis in hoc mendacij arguere præsumat prædictum Gregorium, quòd Domini matrem iam resuscitatam asserit, cùm hoc etiam de Ioanne Apostolo ipsius Dominicæ Matris Paranymphe beatus Ambrosius astruere non vereatur, sicut in sermone Natalis eius cõmemorauimus?

ASCENSVRVS Dominus discipulis promisit, se ire parare illis locum. Et vos ergo virgines, vel quæcumque feminæ Christo deuotæ, huius summæ Virginis tanquàm discipulæ, à qua sancti propositi documentum suscepistis, & per continentix votum eam secutæ, templum Dominicum estis factæ, sicut scriptũ est: *Adducentur Regi virgines post eam, proxima eius afferentur tibi. Afferentur in letitia & exultatione, adducentur in templum Regis.* Ita & vos in eius discipulatu perseuerate, vt per eam vobis æternas parari mansiones mereamini; & quæ vos proprio exemplo incitauit ad cursum auxilio suo perducatur ad brauium. Quanta hodie in terris, quanta exultatio est habenda in cœlis? quanta Angelis pariter atque hominibus læticia confertur, cùm hæc eorum collegio sursum est aggregata, & per quam hominibus patuit via, & ex hominibus Angelorum restaurata sunt damna? Hæc nostra est mediatrix ad filium, sicut & ipse filius ad patrem. Rogantem pro nobis matrem filius non exaudire non potuit, nec nulla eam repulsa offendere, qui honorem parentum maxime commendat. Iræ Domini sanctorum preces intantum resistere legimus, vt nequaquaquam debitam possit exercere vindictam. Quod diligenter beatus attendens Hieronymus cùm illum Hieremix locum exponeret: *Tu autem noli orare pro populo hoc, ne roges vt misericordiam consequatur, & non ob sis tibi, quia non exaudiam te*, ait: Quod autem dicit, *& non resistas mihi*, ostendit quia Sanctorum oratio iræ Dei possit resistere. Vnde & loquitur ad Moysen, *Dimitte me ne percutiam populum istum.* Si

ergo Sanctorum oratio tantum valet ad placandam superni Iudicis iram ; quid de oratione matris sperandum est, de qua tantò amplius peccatoribus est confidendum, & quodam debito in hoc ipsam teneri ; quanto magis apud omnes constat, huius gloriæ singularem honorem ut mater Dei esset , non nisi pro peccatoribus adeptam fuisse. Ad quod quidem debitum persolvendum , quàm prompta , quàm spontanea sit ipsa , & omnibus qui eam inuocant in necessitatibus subuenire parata , multorum iam comperimus experientia Sanctorum , quorum nonnulla deducentes in medium , sic à minimis inchoamus ut perueniamus ad maxima : ut cum eam de paruis meminerimus curare , de maioribus ipsam non dubitemus sollicitam esse.

VINUM in nuptijs defecisse legimus , ad quas filius eius cum ipsa & discipulis venerat inuitatus. Vino itaque ibi deficiente, dicit mater Iesu ad eum, *Vinum non habent. Et dicit ei Iesus. Quid mihi & tibi mulier? nondum venit hora mea. Dicit mater eius ministris. Quodcumque dixerit vobis facite.* Et post aliqua : *Dicit eis Iesus: Implete hydrias aqua, &c.* Ecce mater Christi de corporali beneficio sollicita, intercedendo inuitat filium ad præstandum beneficiū, & quasi ab ipso objurgata grauitè, non destitit, donec quod intendebat obtinuit. Et quidem si diligenter attendimus , non tam beneficium eam videbimus rogasse , quàm defectum vini nunciasse. Cum enim dixerit quia defecisset vinum, nequaquàm rogasse legitur ut hoc ipse præberet ; sed hoc solum sufficere arbitrata est ad impetrandum quod volebat , si nunciaret quod deerat: nec iam apud filium precem suam esse necessariam, cum videretur suam insinuassee voluntatem. Nec rogata quidem à conuiuiis fuerat , ut hoc eis beneficium impetraret. Quid ergo per precem factura est, cum à fidelibus exorata , pro ipsis apud filium intercesserit, & pro salute quorum se ab ipso electam , & eis debito obligatam esse recognoscit? Quæ quanto sanctior & iustior est , tanto in persolvendo debito sollicitam magis esse constat. Quod non solum ratione , verumetiam exemplorum manifestum est luce. Ad Collocenses Apostolus scribens, quodam loco de Deo patre & Domino Iesu Christo sic ait : *Et vos cum mortui essetis in delictis, conuiuificauit cum illo, donans vobis omnia delicta, delens quod aduersus nos erat cyrographum decreti, quod erat contrarium vobis; & ipsum tulit de medio, affigens illud cruci, expolians Principatus & Potestates.* Ad hunc itaque modum & Domini mater miserrimo atque desperato Theophilo execrandum ac detestandum

testandum restituens cyrographum, ad consolationem multorum in vno tunc egit homine, quod filius eius in humano genere cognoscitur egisse. Denique quantum velox & prompta sit his qui eam inuocant, ferre opem non solum contra dæmones, verumetiam contra terrenorum Principum tyrannidem, ille Iuliani Imperatoris interitus protestatur, quem in vita beati Basilij legimus. Quanto ergo securius de protectione & suffragio confidimus, tanto nos deuotius eius interesse festiuitati conuenit, & vnumquemque nostrum ad eam suspirantem incessanter clamare: *Trahe me post te, curremus in odorem vnguentorum tuorum.* Tracta quippe est vt trahat, assumpta est vt assumat, quæ creata est vt saluet, & formata vt reformet. Quo enim mirabilior in reparatione nostra fieret operatio diuina, per eadē quibus corruimus erecti surreximus, si naturas potius quàm res ipsas pensemus. Diabolus quippe in serpente de ligno vetito primos parentes tentauit, virum & feminam captiuauit, & per hæc quatuor damnati sumus, scilicet lignum prohibitum, serpentem suadentem, Eua seductam, Adam deceptum. Per totidem etiam reparati sumus. Dum Angelo ad se misso Maria credidit, sicut diabolo Eua consensit. Adam nouus in ligno Crucis redemit, & de ligno ligni damna reparauit, & noxiij pomi lethiferum gustum quasi medicamine quodam curauit; fructibus illis de arbore Crucis assumptis, de quibus ipsemet ait: *Ascendam in palmam, & apprehendam fructus eius.* Quid enim per palmam, qua victoria designatur, nisi Crux Dominica significatur, qua ipse diabolum triumphauit, & in ea nostram redemptionem operans, ea quæ ad salutem nostram pertinent consummauit? Vnde & expirans ait: *Consummatum est,* hoc est completum humanæ salutis medicamentum. Quo quidem medicamine ipse animæ nostræ morbos curare dignetur, qui se verum medicum quodam loco profitens ait: *Non est opus valentibus Medicus, sed malè habentibus.* Quod quia nostris obtinere meritis nequaquam sufficimus, ipsa eius genitrix hoc nobis impetret, quæ eum ad hoc genuit, vt hoc ipse nobis medicamentum afferret. Vnde & Saluator solus propriè nuncupatur; hoc, vt ait Apostolus, nomen quod est super omne nomen patre ipsi donante, cum quo viuit & regnat in vnitæte Spiritus sancti Deus per infinita seculorum secula, Amen.

EXPOSITIO IN EVANGELICA LECTIONE

IPSIVS DIEI.



INTRAVIT *Iesus in quoddam castellum.* Castellum municio est & refugium defensionis ab incurso hostium. Hoc intrat Iesus, dum Verbum Dei naturam nostram in Virgine assumpsit, in qua nostram operatus est redemptionē; & diabolus triumphans, quandam in eam nobis constituit munitionem. Hanc ingrediens in dōmo Marthæ suscipitur, quia in terram Iudææ exterioribus operibus intendens est incarnatus, & à quibusdā illius populi primo est per fidem susceptus, sicut à Simeone, Anna, vel à populis inde collectis. Soror Marthæ Maria Gentilitas est conuersa, id est Ecclesia Gentium vnum patrem Deum habens cum Martha, hoc est cum fidei Synagoga quæ iam Christum susceperat, paucis Iudæorum primò ad Christum conuersis. Martha suscepto per fidem Christo refectionem parat, dum Iudæa de obseruatione corporalium operum obsequium Deo ministrat, & cum Esau exterius egressa de venatione siluestri patrē reficere laborat. Sollicitatur Martha circa diuersa, dum Legem simul & Euangelium, vmbra & veritatem conseruare nititur. Vnde conuersis Gentibus indignata grauiter perturbatur, & scandalizatur, quod eis quoque iugum legis non potest imponere; ob hoc quasi murmurans à Domino requirit, vt sibi in omnibus Mariam societ: dum videlicet primitiua illa Iudæorū Ecclesia postulat à vicarijs Christi Apostolis, vt gentes quoque iudaizare compellant. Sed dum Martha constat in opere laborando, & foras ad exteriora progreditur, Maria secus pedes Domini sedens, & iam lege sepulta soli Christo adhærens quasi Iacob de domesticis animalibus interiorē atque meliorem parat refectionem, iuxta illud Psalmistæ: *In me sunt, Deus, vota tua, quæ reddam laudationes tibi.* Quæ quàm sollicitè Christo intendat, monstratur & dicitur, quia audiebat verbum illius, & sedens iuxta pedes, non à longē. Sicut enim in vna Christi persona diuinitas, quæ superior est natura, capiti cōparatur; ita per pedes humanitas eius intelligitur. His pedibus quasi sedendo adhærens, audit verbum Christi potius quàm Moyse, sequendo scilicet Euangelium magis quàm Legem: quæ tam firma fide humanitatem eius amplectitur, vt

hanc eius vnam hostiam ad salutem sufficere non dubitet, nullumque iam legis sacrificium necessarium fore putet. Vnde & subditur; *Porro unum est necessarium*, quia cum venerit quod perfectum est, euacuabitur quod ex parte est: hoc est, cum accesserit veritas, recedet umbra; & superueniente Euangelica perfectione cessabit inchoatio legis. Optima pars Mariæ, veritas, quam elegit reprobata umbra, intelligitur. Quæ non auferetur ab ea, quia finem non accipient Euangelica præcepta, sicut ea quæ de lege sunt Marthæ sunt ablata: quia conuersis Iudæis legalia sunt interdicta, cum per Paulum dicitur: *Si circumcidimini, Christus vobis nihil proderit.*

IN DIE SANCTI MARCELLINI PAPÆ

ET MARTYRIS,

Ad Monachos Rothomagenses reliquias habentes.

SERMO XXVI.

SUPERNA pietas, fratres, membris suis omnibus ex omnipotentia prouidens, sicut fortibus à præsumptione, sic infirmis prouidet à desperatione. Vnde & in utrôque seipsum primo constituens in exemplum, nunc persecutionem declinans se abscondit, nunc passionis imminente articulo in tantum pauere ac tædere scribitur, vt in agonia factus, quasi sanguineas guttas pro sudore contra humanam naturam emitteret, & sæpius ad patrem orans calicem passionis à se transire, si possibile esset, postularet. Qui etiam infirma mēbra in tantum transferre in seipsum dignatus est, vt diceret: *Nunc anima mea turbata est.* Et quid dicam? *Pater saluifica me ex hac hora.* Ac si diceret; Da mihi constantiam in passione, ne timor præualeat infirmitati humanæ. Quare, ô fratres, Christus dixerit securus per omnia se nullo timore passionis, nullo cruciatu doloris posse superari? nostram vtique, fratres, infirmitatem his verbis intendebat consolari, non aliquam imbecillitatem quam haberet exponere. Nobis in his omnibus consulebat, non sibi prouidebat, ne forte si aliqui fideles tempore passionis trepidarent, aut ab ea declinarent, desperatione percussi & de venia diffidentes dicerent se ad Christum minimè

pertinere. Contra quam etiam desperationis plagam non solum Thomæ dubitationem, verum etiam trinam Petri negationem infirmis opposuit, & saluberrimum inde cataplasma confecit. Denique & Marcellinum nostrum beati PETRI Vicarium, cuius tempore crebræ passionibus multos terrebant, nonnullos etiam abnegare cogeant, titubare ad horam Dominus pertulit, & ad tempus cadere, sed non confringi, sicut scriptum est: *Cum ceciderit iustus non collidetur, quia Dominus supponit manum suam.*

TERTIO negavit Petrus, nec simpliciter negavit, sed sicut scriptum est, *cæpit detestari & iurare quia non novisset hominem.* Quod verò Mathæus ait *detestari*, Marcus discipulus ipsius Petri, & per ipsum de scribendo Euangelio instructus, dixit *anathematizare*, hoc est excommunicationi se subdere, à quo alij absolutionem expectabant. Nec in vna tantum negatione Petri Mathæus iuramentum commemorat, sed quasi leuioribus culpis grauioribus adnectens primò dixit Petrum negasse, postea cum iuramento, tandem cum detestatione simul & iuramento. Marcellini verò iuramentum vel detestationem siue anathematizationem non nouimus, nec etiam verba negationis ipsius legimus: sed quasi timore mortis extra se factum, nec deliberare aliquid permissum. Audiuius ipsum in sacrificio idoli incensum solummodo posuisse, nec istam transgressionem eum tolerasse, sed statim conuocatis Episcopis in seipsum sententiam depositionis dedisse: cum nequaquam Petrus de trina sua negatione tantam egerit satisfactionem, nec etiam ad confessionem venisse legatur, aut satisfactionem aliquam inde suscepisse.

QVOD si post Petrum, Paulum quoque summum Coepostolum eius Marcellino conferamus, leuissimam Marcellini culpam in hac transgressionem censebimus. Legimus quippe Paulum secundum ritum legis, cuius corporales obseruantias maximè impugnabat, compulsus à Iudæis, ut more Nazæeorum Deo se consecraret, necnon & Timotheum discipulum suum ad circumcidendum eis traderet: quando tamen circumcisionem intantum superfluam vel periculosam iudicabat, ut diceret, *Si circumcidimini, Christus vobis nihil proderit: & generaliter de obseruantijs legis, Qui in lege, inquit, iustificamini, à gratia excidistis.*

NEGATVRO Petro Dominus prædixerat quòd negaret, & ille constantiam sui promittens e contrario maiora promittebat,

& se omnibus præponēs dicebat: *Et si omnes scandalizati fuerint, sed non ego.* Et rursum: *Tecum paratus sum & in mortem & in carcerem ire.* Quanto præsumptio promissionis maior extiterat, tantò reprehensibilior Petri ruina, & lapsus est grauior, quantò contra hunc professio fuerat maior. Nemo Marcellinum de transgressione, quæ facta est, præmunierat: nullius exhortatione ne id præsumeret præuentus erat. Mendax in promissione Petrus, sicut & in negatione repertus est. Nec in vna tantum, vt dictum est, negatione, sed trina, nec simplici, sed cum anathematizationis detestatione. Qui quāuis pœnituerit, multo tamen tempore passionem suam distulit. Quam denique fugiens, sicut scriptum est, à Domino illi obuiante quasi nolens redire compulsus est, iuxta quod ei Dominus prædixerat; *Cùm autem senueris, extends manus tuas, & alius te cinget, & ducet quo tu nō vis.* Scriptum denique esse vestra nouit fraternitas, *Septies cadit iustus, & resurgit*, ac si apertè dicat: Quamquam fidelis crebris tentationibus pulsatus septem principalibus vitijs succumbat victus, diuino tamen non destitutus auxilio, à profundo tanto vitiorum emergit, illam à Domino postulationem adeptus: *Nō me demergat tempestas aquæ, neque absorbeat me profundum, neque urgeat super me puteus os suum.* Tertio negauit Petrus, septies cadit iustus. Semel Marcellinus titubauit magis quàm cecidit, qui tam citò surrexit, & titubationem suam confestim non tam pœnitentiæ lacrimis vt Petrus, quàm virtute passionis expiauit intrepidus. De qua quidem perfectione virtutis Dominus ait, *Maiorem hac dilectionem nemo habet, &c.*

SCIMVS, fratres, diuina disponente gratia summos in virtutibus viros magnos quandoque peccatorum pertulisse casus, tamen propter humilitatis concordiam ac prouidentiae curam contra desperationis insaniam Domino per Psalmistam nōs ita consolante, *Nunquid qui dormit, non adiiciet vt resurgat?* Quis enim dormiens non piger ad operandum, & per negligentiam torpens atque ad horam deficiens? Quales quidem adhortans Apost. ait: *Surge que dormis, & exurge à mortuis &c.* Ecce Petrus, qui prius Simō dictu, postmodum à Christo Petra Petrus est appellatus, hoc est à firmitate firmus, cui & Dominus dixit: *Ego rogavi pro te, vt non deficiat fides tua, & tu aliquando conuersus confirma fratres tuos.* Tertio lapsus ore solummodo, non mente Christum abnegat. Ecce Marcellinus Petri successor, & tā infirmitatis trepidatione quàm postmodum cum fortitudine Vicarius eius, semel labitur titubans, nec deficiens, confestim conualescens; his quibus præerant

in exemplo sunt positi, ne propter quemlibet lapsum de venia desperent. Dictum est Petro à Domino quamuis negaturo, vt confirmaret fratres. Nouimus & Marcellinum confirmatam à se Thebeam legionem in fide ad caelos præmisisse. Cuius & discipulus Marcellus Papa & Martyr ei succedens sanctum Magistri exitum confirmauit, sicut & ante actam eius vitam Thebæana legio comprobauit: vt tam priora eius quàm posteriora commendatione digna totam medijs dubitationem tollant vel desperationem. Sicut autem istos Dominus in clero, ita Dauid Salomonem præmisit in populo, qui graui suo lapsu peccata solarentur, ne post quantacumque crimina de indulgentia desperarent. Maximus ille Regum ac Prophetarum Dauid, adulter simul, proditor, & homicida, quanto in virtutibus amplius creuerat, tanto maius præcipitium de culmine pertulit virtutum. Quo enim altior gradus, tanto grauior casus. Salomon ille Idida, hoc est dilectus Domini, de quo & Dominus prædixerat: *Ego ero illi in patrem, & ipse erit mihi in filium*, in tantum abominationibus lapsus est puteum, vt concupiscentia carnis deuictus diuinum cultum omnino defereret, & tanto tempore idolis deseruiret, à quo nec idolorum excelsa sunt ablata. Nec id timore mortis, sed concupiscentia egit mulieris. De cuius tamen indulgentia, ne desperemus, ipse quoque nos Dominus consolatur. Cum enim præmisisset quod dictum est, *Ego ero illi in patrem, & ille erit mihi in filium*, statim adnexuit, dicens, *Qui si iniquè aliquid gesserit, arguam eum in virga virorum, & plagam filiorum hominum. Verumtamen misericordiam meam non auferam ab eo, sicut abstuli à Saul, quem amoui à facie mea.* Quid enim facies Dei nisi notitia ipsius, cum vnusquisque homo ex facie sua cognoscatur? Quid est itaque Deum sic alicui misericordiam impendere, vt non amoueatur à facie sua, nisi hanc ei gratiam reseruare; vt cum ille peccando quasi oblitus creatoris sui per negligentiam fuerit, postmodum, per pœnitentiam rediens eum recognoscat, & tam timore districti iudicis, quàm amore Domini eum expectantis peccata corrigat?

BENE ergo binos tam in clericis quàm in laicis de rectoribus ipsorum, ibi, videlicet Petrum & Marcellinum, hic Dauid & Salomonem, contra summam illam desperationis ruinam præmisit; nequis tam in clero quàm in populo, post quantacumque flagitia diffidat à venia, dummodo præuideat de pœnitentia. Benè, inquam, binos tam hic quàm ibi quasi testes sperandæ reconciliationis & indulgentiæ impetrandæ. Vt enim scriptum est, quantum-

cumque splendida fuerit persona, vnius testimonium non sufficit, sed iuxta diuinam legem *in ore duorum vel trium testium stabit omne verbum*. Si autem in ore, quātomagis in opere? Vt autem, fratres, finem nostri sermonis ad diuinam misericordiam circa nos habitam deducamus. Perpendite, quæso, quantum de salute nostra Dominus prouiderit, quantum Saluator noster sollicitus sit nostri, ex cuius etiam nomine insignitus est locus iste. In multis, fratres, delinquimus, in multos incidimus lapsus, sed ne desperemus, ne correptionem differamus, magnus Domini martyr & patronus noster nobis à Domino missus est, in exemplo propositus, quem apud Deum habemus aduocatum, & de quo præcipuè si volumus nobis est confidendum. Princeps iste est ordinatus à Domino, vt dictum est, tentari, & grauiter labi, vt de potestate tāta quam accepit, amplius possit, & de lapsu quem pertulit ad indulgentiam lapsorum & veniam postulandam pronior fiat, qui sicut de Patre dicitur, in seipso didicit qualiter aliorū infirmitati compati debeat, atque misereri. Festum igitur eius tanta deuotione celebremus, vt quod nostris precibus non valemus, eius meritis assequamur, præstante Domino nostro Iesu Christo, cui est &c.

IN DEDICATIONE ECCL. SERMO XXVII.



DEDICATIONIS sollemnitas quantum ceteras antecedit, non tam Scripturarum auctoritas, quàm ratio manifesta declarat. Ab hac quippe ceterarum omnium exordium manat, cū in hac locus consecratur, quo ceteræ celebrentur, & Dominica sacramenta conficiantur. Hic est ille locus, quem sibi Dominus specialiter eligens, & propriæ domus vocabulo insigniens per Moysen ait: *Vide ne offeras holocausta tua in omni loco, sed ubi fuerit memoria nominis mei*. Et rursum: *Domus mea domus orationis vocabitur*. Et ceterarum quidem celebratio festiuitatum, quas antiquo populo tanquam præcipuas Dominus instituit, nequaquam septenarium dierum excesserunt. Templi verò dedicationem septenario geminato Salomon & vniuersus Israel in holocaustis innumeris, & multiplici musicorum instrumentorum modulatione XIII. diebus exsoluit. Ex quo liquidum est quanta dignitate pariter atque auctoritate celebritas ista sit prædita, & quanta deuotione sit ab omnibus peragenda. Cuius quidem institutio non à lege, non à Propheta, sed à Patriarcha Iacob initium habuit. Qui & futuri postmodum templi locum desi-

gnasse dicitur, & sacramenta dedicationis primus exhibuisse, sicut in Historia Genesis continetur. Hic nempe relictis parentibus persecutionem primogeniti fratris declinans, cum veniret ad quendam locum vespere, & in eo requiescere vellet, tulit vnum de lapidibus qui iacebant in terra, & capiti suo supponens obdormiuit. Viditque in somnis scalam stantem super terram, cuius cacumen cælum tangebatur. Angelos quoque per eam ascendentes & descendentes, & Dominum inuixum scalæ dicentem sibi: *Terram in qua dormis tibi dabo, & semini tuo.* Cumque euigilasset Iacob ait: *Quàm terribilis est locus iste! non est hic aliud nisi domus Dei, & porta cæli.* Surgens ergo mane tulit lapidem, quem supposuerat capiti, & erexit in titulum, fundens oleum desuper. Votum etiam vouit, dicens: *Si fuerit Deus mecum, & custodierit me, cunctorum quæ dederis mihi decimas offeram tibi.*

E c c e, fratres, historiam succinctè percurrimus. Nunc ad ædificationem nostram intelligentiam præcipuè moralem in ea perquiramus, & melioris dedicationis typum in his quæ gesta sunt aperiamus. Quid enim dedicatio Ecclesiæ, nisi illa est fidelis animæ sponsio, quæ à seculo recedens se penitus Deo dedicat, & quasi propriam Sponsam Christo se copulat, ut ei deinceps tota vacet, & sic ei voto suæ professionis obligans tanquam proprium templum Deo se consecrat? Sicut enim in vna villa multæ hominum domus, & vna Dei dicitur, quam Ecclesiam vocamus, ita & in populo Dei inter illos qui coniugati sunt, quælibet anima conveniente voto Deo cōsecrata proprium eius habitaculum facta est. Qualem quidem animam Apostolus describens, & eius prærogatiuam à ceteris distinguens, ait: *Qui sine uxore est, sollicitus est quæ Domini sunt, quomodo placeat Deo. Qui autem cum uxore est, sollicitus est quæ sunt mundi, quomodo placeat uxori, & diuisus est. Et mulier innupta & virgo cogitat quæ Domini sunt, ut sit sancta & corpore & spiritu.* Iacob itaque persecutionem, ut dictum est, primogeniti fratris fugiens, relictâ domo parentum peregrinatus, fidelis anima est de seculo ad Dominum conuersa, quæ carnalium affectionum ruptis vinculis more Abraham, de terra sua & de cognatione progreditur, & de domo parentum procedit ad claustrum, illud Psalmistæ non solum audiens, verum exaudiens: *Audi filia, & vide, & inclina, &c.* Nec non & illud Domini documentum amplectens: *Qui non odit patrem suum & matrem, non est me dignus.* Primogenitus talis animæ frater caro est in vnâ personam animæ coniuncta, & prius in utero formata quàm ei anima sit infusa. Cuius quidem

dem carnis tentationes, de quibus scriptum est: *Caro concupiscit aduersus spiritum*, dū fugimus à seculo recedentes, quasi primogeniti fratris impugnationem vitamus. Et quia hæc virtus continentiae & remuneratio seculi ab aduentu Christi, quæ vltima ætas est mūdi, maximè cœpit. Vnde Iacobus post solis occubitū, id est in vespere, ad locum peruenit, vbi dormiens requiescat. Hic autē locus claustralis vita est cōtinentiū, qui à tumultuosa seculi vita ad quietem Monasticā transeunt, & Marthæ sollicitæ & circa plurima turbatę tranquillitatem præferunt Mariæ. Quæ quidem tranquillitas à domino nomine lecti, à Spōsa in Cātico nomine lectuli designatur cū dicitur: *Erunt nocte illa duo in lecto. In lectulo meo per noctes, &c.*

IN hoc itaque lectulo dormiturus Iacob, de lapidibus quos intuetur eligit vnum, quo supposito capiti suo dormiat, cū anima quælibet locū sanctæ congregationis ingressa, multos circūspicit fideles tanquā lapides viuos & fortes ad omnia tolerāda, in summo lapide Christo fundatos; vt eorū s. exēplis ad perfectionē instituantur. Sed quia vnū Christum omnibus præfert, cui se fidelis anima quasi spōsam copulat, & dedicat, & velut in amplexib. eius lectulo contēplationis dormit corpore, sed vigilat mente, iuxta illud Spōsæ: *Ego dormio & cor meū vigilat*, vnus ex vniuersis eligitur lapidib⁹. Iuxta quod & ipsemet de dilecto ait, *Electus ex millibus*. Hūc capiti suo supponit vt dormiat, cū totā suæ mētis intentionē in eo defigit, vt à curis seculi penitus quiescat, & tota ei per desideriū inhecreat. Caput quippe principalis pars corporis mētē designat in nobis. Hūc profecto somnū continētiū dilectus ille Domini & virgo Ioannes specialiter expressit, qui in Dei gremio recubēs, quasi hoc lapide supposito capiti obdormiuit. Scalā dormiens Iacob intuetur, quia tanto ampliùs scripturā sacram quisque intelligit, quāto ab occupatione secularium curarū magis quiescit. Scala hæc dormiēti apposita vsq; ad cœlū porrigitur, quia per doctrinā ipsius de terrenis ad desiderāda cælestia subleuamur, & illuc mēte conscendimus, vbi Christus est in dextera Dei sedēs. Huic scalę Dominus innititur, & indē nobis loquitur, quia per eius doctrinā nostris imprimitur mētibus, & de ei⁹ verbis nostras in se mētes erudiēs accēdit. Huius scalæ, hoc est sacræ scripturæ, quasi duo latera duo sunt Testamēta, quæquidē ad inuicem quasi quibusdā gradibus insertis cōnectūtur, dū per expositiones Doctorū rota rotæ applicatur, & quod in veteri fuerat prædictū, in nouo mōstratur exhibitū. Angeli per hanc scalā ascendentes & descēdentes, sancti sunt Prædicatores, quorū vnus de se & aliis ait: *Quomodo predicabūt, nisi mittātur?*

& & & &

De qualibus & per Malachiā dicitur: *Labia sacerdotis custodiūt sciē-
tiam, & legem inquirent ex ore illius, quia Angelus Domini exercituum
est.* Ascendunt verò per scalam istā vel descendunt dūmodò in sua
prædicatione de natura diuinitatis vel secretis cælestibus nos in-
struūt, modò de assūpta humanitate, vel cōponēdis moribus no-
stris erudiūt; vel cūm modò ad altā cōtinentiæ virtutē nos hortā-
tur, modo infirmitati nostræ per indulgentiā nuptiarū consulunt.
Terrā in qua dormit Iacob ei & semini eius Dominus promittit,
quia terrā viuentium, cuius desiderio anima cōtemplatiua à terre-
nis curis quiescit, in remuneratione pollicetur tā ei quā sequaci-
bus eius, & in hoc proposito ipsam imitātibus. Euigilās de somno
cōtēplationis anima illa, & de illa cælesti habitatione ad sanēta stu-
dia totius contēplationis oculos reflectens, & quasi homines pari-
ter ammonēs, vt spe promissæ sibi terræ in proposito perseuerent,
Verè Dominus est, inquit, in loco isto, & ego nesciebā. Ac si diceret: *Qui
vbiq; est per diuinitatis præsentia, hic specialiter inhabitat per gra-
tia.* Pauēs quoque, *Quā terribilis, inquit, est locus iste.* Terribilem,
hoc est summa reuerentia dignū esse recognoscit: in quo, vt dictū
est, tanquā in spiritali tēplo, ac sibi penitus dicato, per abūdātoris
gratiæ dona Deus inhabitat. Sed quia multi hanc reuerentiā loco
deberi recognoscunt, nec tamē illi hāc exhibēt, nec illam Apostoli
comminationem expauent, *Si quis violauerit templum Dei, disperdet
illum Deus.* Benè præmissum est, *pauens*, vt quod pauendum esse nō
dubitāt, offendere in eo non præsumat. Et attende, quòd cūm præ-
miserit, *Domus Dei*, statim adnexuit, & *porta celi.* Hic est talis aditus,
regni cælestis, ex quo sine dilatione, de huius vitæ obseruatione il-
luc introcatur, nulla videlicet purgatione interposita.

S V R G I T mane Iacob, & lapidem, quem supposuerat capiti suo
erigit in titulū, ipsumq; oleo desuper infuso, more Pontificis votū
explet dedicationis: quasi in hoc primogenitorū dignitatē quam
emerat exercens. Primogenita quippe tūc fuisse dicūtur vestis seu
dignitas sacerdotalis, quā primogeniti fratres per benedictionem
paternā accipiebāt, vt soli inter fratres sacerdotali fungerētur of-
ficio. Et à matre vestibus Esau valde bonis indut⁹ fuisse Iacob me-
moratur. Et nota, sicut Melchisedech sacramenta Ecclesiæ anti-
quiora vidētur quā Synagoga: ita in Patriarcha Iacob noster de-
dicationis ritus videtur præcessisse, qui tā altare quā Ecclesiā ip-
sam oleo cōsecramus. Quod nequaquā in tabernaculo vel templo
factū esse legimus. Mane surgit Iacob de loco, in quo quiescens vi-
derat visionē, & eius loci sanctitatē cognouerāt, cūm anima quæli-

bet prædicta, peracto iā suæ probationis tēpore, ad professionē cō-
 scēdit regulæ, experta iā huius propositi simul ac loci religione: &
 tūc se penitus Deo dedicās, & proprio voto illi se obligās, spiritualis
 tēpli dedicationē in seipsa celebrat. Tūc lapidem, in quo dormie-
 rat, erigit in titulū, hoc est, oculis suis affigit in signū, quasi nihil a-
 liud vlti⁹ debeat intueri, quia iā facta professione respicere retro
 nō licet, ne cū vxore Loth pereat. Primū ei tamē in imo lapidis iace-
 bat, quia nō tāto debito ei antea cohærebat. Erectū lapidē oleo su-
 perfuso sibi cōsecrat, dum toto dilectionis affectu ipsum cōprehē-
 dēs, tot vnguētis delinit eū, quot desiderijs amplectitur ipsū. Quid
 autē vnguēta, nisi quædā est recreatio dolorū, & fomēta dolentiū?
 Dolet autē Christus de nobis cū nostra ei cōuersatio secularis
 displicet, & sic eū exasperādo, malis operibus cōtra nos cōmoue-
 mus. Placatur autē penitus, & quasi quibusdā vnguentis hic eius
 dolor mitigatur, cū à seculo recedētes totis ei visceribus inhæ-
 remus, & perfectione virtutis nos iā ei penit⁹ copulamus, iuxta il-
 lud Apostoli, *Qui autem adheret Deo, vnus spiritus est.* Cautē autē ac
 prouidē votū faciens Iacob de persoluēdis decimis, nō de suis vi-
 ribus, sed de misericordia Dei præsumēs, quasi apposita cōditione
 ait: *Si fuerit mecū Deus, & custodierit me,* quia ei⁹ gratiæ est quicquid
 boni agimus. Vnde & Paulus, *Gratiæ Dei sum id quod sum.* Et rursum
 cū dixisset, *Plus omnibus laboravi,* statim adiecit, *Non ego autem, sed*
gratiæ Dei mecū. Decimas omniū Deo persoluit, qui decalogum le-
 gis in nullo excedit, nec à mandatis Dei quæ per decalogum illū
 intelligūtur in aliquò recedit. Quod in semet nobis sic cōplere cō-
 cedat, vt quod visibilibus sacramētis exteriū actū est, in corporali
 templo ipse inuisibiliter in nobis operādo templū nos veriū effi-
 cere dignetur summus Pontifex & Rex Iesus Christus, cuius tam
 sacerdotium quàm regnum perseuerat in secula seculorū, Amen.

DE S. SVSANNA, SERMO XXVIII.

Adhortationem Virginum.

AVDISTIS, carissimæ, atque vtinā exaudissetis beatam
 illā spōsæ sollicitudinē in Cātico Canticorū ad exhorta-
 tionē vestrā diligenter descriptā. Quæ cū diu quæsitū
 in lectulo dilectū inuenire nō posset, *Surgā,* inquit, *& cir-*
cuibō ciuitatem: per vicos & plateas quærā quem diligit anima mea. In
 lectulo dilectum quærit, & non inuenit, cū anima perfecta fatuis
 vīginibus adiūcta opera ipsarū considerans, exemplis earū instrui
 cupit, quas de continentia carnis in magna virtutū perfectione es-

se credit. Cùm enim etiam ista carnis continentia, & huius tã ardui propositi obseruantia paucorum sit, talium vita à tumultu seculi remota lectulo potius quàm lecto comparatur, quia magna quies est à molestiis nuptiarum vacare, & voluptatibus carnis operã nō dare. Sed quia non magnū quid hanc continentiam, quæ paucorū est, imperiti æstimant, & ideò facile ex caritate sua in elationē simplices trahit, nō potest in talibus Christus reperiri, qui superbis resistit semper, & humilibus dat gratiã. Hoc itaq; sponsa conspiciens quasi de lectulo surgit, & egressa circuiuit ciuitatem, quærens ibi sponsum per vicos & plateas, quē in lectulo reperire nō potuit: dū mente foras exiens bonã vitã fidelium intuetur, qui in hoc seculo tãquã in ciuitate, quæ multos capit, conuersantur, & quas imitetur exempla virtutum inde assumit, in quibus per gratiã Domini habitare nō desperat. Et quoniã in omni gradu fidelium alij perfectiores sunt alijs, quosdam ibi in plateis, quosdã in vicis reperit, quia quorundam vita quo altior est in meritis in paucioribus consistit, qui quasi in vicis moratur, qui strictiores sunt quàm plateæ, quales Iob & Susannam legimus, & plerosq; alios, qui de magna virtutū perfectione tam viris quàm feminis in exemplo sunt positi. Quorum tantò laudabilior vita extitit, quanto in seculari conuersatione religiosior fuit, & quasi purissimum aurum in fornace non arsit.

Et quoniã de virtutib. Iob, quas diligenter cōmemorat Scriptura, superuacuū me nunc vobis scribere arbitror, ad Susannã cōiugatã, quæ vestri . . . minoris propositi, & maioris virtutis fuit, stilū cōuerto; vt in ei⁹ cōparatione, si quæ sacri propositi femina minus quàm nouerint habeant, de suo defectu erubescāt. Primaverò laus eius describitur, cū eam pulchram nimis, & timentem Dominū Scriptura cōmemorat. A pulchritudine corporis ad decorē mentis ascendit, iuxta illud Gregorij, A minimis quisq; inchoat, vt ad maiora perueniat. Pulchra corpore, sed pulchrior mēte, tantò laudabilius hæc duo simul, quātò difficilius custodiebat. In altero habebat pugnãdi materiã, ex altero cepit victoriæ coronã. Ex illo in cōcupiscētiã ei⁹ exarserūt Sacerdotes, vt hoc per cōstātiã virtutis probaretur, cū morti addicta vitę periculū elegit, ne cōtagiū incurreret corporis, atq; ipsū corp⁹ quod appetebatur ad culpam, hostiã offerret immaculatã. Proh dolor! proh pudor! Tot videm⁹ in sacro proposito cōstitutas adeo deformes, vt sicut scriptum est larua nō indigeāt, quas diuinę reuerētię, ac voti sui prors⁹ oblitas ita libidinis furor exagitat; vt cū ad turpitudinē peragēdã gratis aliquos habere nequeāt, emere incestuosos cogantur, & quæ de for-

ma cōfidunt, venales sese prostituūt; aut si de mercede diffidunt, ipsas luxuriæ sordes quas excipiunt pro mercede sibi cōstituunt. Adulteras tam leges seculi quàm diuinæ morte puniendas censuerunt. Quanta autem vindicta in Sponsas Christi corruptas exercenda sit, datur intelligi, quibus vix locum etiam pœnitentiæ Canones reliquerunt. Sunt & nonnullæ inter eas vetulæ meretrices, quæ cū iam se omninò contemni præsenserint aliena corpora vendendo, cū propria non possunt, detestanda exercent lenocinia. De qualibus quodam loco me scripsisse recolo: Vetus meretrix se propagat in adolescentulis.

QVAM seueram quoque sententiam de lænis Sancti Patres instituerint, ex eorum manifestum est scriptis, quas in fine quoque à communione priuarunt. Vnde & illud est Eliberitani Cōcilij Cap. xi. Mater vel parens, vel quælibet fidelis si lenociniū exercuerit, eò quòd alienum corpus vendiderit vel suum, placuit nec in fine communicandam. Quòd si in feminis seculi adeò lenocinium sunt detestati, quantū in sponis Christi istud est abhorrendum, vbi proprium Dei templum violatur, & hæc ei vindicta specialiter reseruatur? Si quis, inquit Apostolus, templum Dei violauerit, disperdet illum Deus. Beata laica, & seculi, non claustrī, femina prædicta, hominis potius cōiunx quàm Christi sponsa dicenda, surget in iudicio, & condemnabit generationem hanc pessimam: quæ vt hominis seruaret fidem, elegit interire munda, ne viueret immunda. Vnde autem tanto castimonix zelo succensa, tanto constantix muro esset munita, subinfertur cū dicitur: *Parentes autem eius cū essent iusti, erudierunt filiam suam secundum legem Moysi.* De iustis parentibus iustissima filia nata memoratur, & in communi eorum laude sanctissima studia prædicantur. Quod & beatus Hieronymus diligenter attendens, cū in explanatione Danielis ad hunc locū veniret, ait: Hoc vtendum est testimonio ad exhortationem parentum, vt doceant iuxta legem Domini, sermonemque diuinum, non solum filios, sed filias suas. Hoc adhuc sacrarum litterarum zelo Iudaicus populus in ipsis etiam tenebris cæcitatissimæ plurimum feruens, non mediocriter nostram, id est Christianorum negligentiam accusat. Tanto quippe ardore legem amplectūtur, vt quislibet eorum quantumcūque pauper, quotquot habeat filios, neminem diuinas litteras ignorare permittat. Quorum tanto zelo Apostolus maximè compatiens, ait: *Fratres, voluntas quidem cordis mei & obsecratio ad Deum sit pro illis*

*in salutem. Testimonium enim perhibeo illis quòd emulationem Dei habent, sed non secundum scientiam, hoc est magnum feruorem in Deum, ac desiderium in mandatis eius, quæ in lege acceperant, cognoscendis atque implendis, licet in magno persistentes errore, cùm hæc ad salutem sufficere credant. Emulatio quippe seu zelus quislibet animi feruor vehemens ad desiderium cuiuslibet nuncupatur. Vnde & tam bonus quàm malus zelus dicitur vehemens scilicet commotio animi ac sollicitudo ad aliquid agendum. Nulli verò, vel pauci Christianorum sunt, qui Evangelicæ doctrinæ perfectionem tanto studio vel causa amplectuntur, vt eius desiderio filios suos sacris imbuerent litteris curent, sed temporalis tantummodo commodi causa, vt huius vitæ necessaria sibi ipsis vel illis inde provideant aut de officijs clericorum, aut de habitu Monachorum. Vnde rectè ab intentione talium patrum Susannæ parentes distinguuntur, cum tam in eorum laudibus quàm in ipsius Susannæ dicitur, quia *parentes eius cùm essent iusti, erudierunt filiam suam, &c.* Cùm essent enim iusti, dictum est, non, cùm essent auari: quia quod isti nunc per avaritiā agunt, illi per religionē egerunt; & amore Dei, nō ambitione seculi, tāquam illud quod scriptum est attendentes: *Beatus homo quem tu erudieris Domine, & de lege tua docueris eum.* Quos in hac spe sua nequaquam frustratos fuisse præsentis historię sequentia clamant, tantam filiæ suæ describendo perfectionem, quam de diuinæ legis eruditione prouenisse, præcedentia insinuant, ob hoc videlicet commemorata.*

QUALI autem agone matrona mirabilis mirabiliter triumphauerit, perpendite virgines, vt ex ea discatis qualiter & ipsæ dimicare debeat, & sponsionis votum se seruare Christo, sicut illa fidem custodiuit marito. Comprehendentes igitur eam senes, & ad consensum adulterij cogere nitentes, *Ecce, inquit, ostia pomarij clausa sunt, & nemo nos videt. Quam ob rem assentire nobis, & commiscere nobiscum. Quod si nolueris, dicemus contra te testimonium, quòd fuerit tecum iuuenis, & ob hanc causam emiseris puellas à te.* O cæci cæcorum duces, & expertes iustitiæ iudices, numquid si ostia pomarij sunt clausa, ianua cœli nōne est aperta? Frustra hominum conspectum fugitis, qui conspectum Dei fugere non potestis. Hoc illa præcipuè attendebat, cùm diceret. *Melius est mihi absque opere incidere in manus vestras, quàm peccare in conspectu Domini.* Nemo, dicitis, nos videt. Quid si Deus? Pudet ab homine deprehendi, & non à Deo conspici: mortē cor-

poris temporalem ab hominibus deprehendi timetis; mortem animæ perpetuam non formidatis, cuius comparatione nec illam dici mortem illa profitetur. Sic quippe ait. *Si enim hoc egero mors mihi est; si autem non egero, non effugiam manus vestras.* Mortē utique potius animæ quàm corporis appellandam cēsuit; & quia illam plus timuit, vtramque pariter euitare meruit. Vos autem econuerso, hanc magis quàm illam metuentes, à neutra fuistis immunes. Illa iudicem Deum plus quàm hominem verita, tam diuino quàm humano iudicio liberata, quorum neutrum vos ipsi Iudices effugere non potuistis.

ATTENDITE Sponsæ Christi, quid dixerit ac fecerit coniunx hominis, & si quis profanus, & Dei prorsus oblitus, consimilem à vobis exegerit turpitudinem, & in tantum etiam fortasse perstiterit, ut vim facere præsumat: respicite vestrum maritum non hominem, sed Deum, non Ioachim, sed Christum, & intrepida Susanna vestrum vnaquæque dicat, *Si hoc egero, mors mihi est.* Latere Ioachim fornicatio poterat vxoris, sponsum autem vestrum quis latere potest? Iniuriam suam tam ipse, quàm gloriosa mater eius, ac tota pariter cœli curia desuper intuebitur. Quæ adeò impudens, adeò insana, ut hunc maximè non erubescat, & expauescat aspectum? Cùm quis te falsi nominis Christianus super hoc conuenire, imò circumuenire tentauerit, sufficit tibi vno te statim responso absolvere. Assentiam tibi in isto, si peragi potest in scio sponso meo, aut si fortiores eo fuerimus, quo eius offensam minus timeamus. Denique instantibus impudicis senibus, cùm vi non posset eos Susanna repellere, ore vsa pro manibus quod vnum restabat impetum eorum compescuit, dicens*: Perpendite virgines virtutem cōiugatæ, & de maioribus minora cogitate. Non timetis mortis periculum, si à vobis incestuosos repuleritis, sicut illa, ut dictum est, faciebat. Non est tanta vis eorum, ut ab ipsis clamore liberari sitis compulsæ. Aut si clamare necesse sit, faciliùs vos sponsus quàm Susannam exaudiet maritus, & quo potest ampliùs, liberabit citiùs.

*Hic videtur aliquid deesse.

EGRESSÆ itaque de lectulo mente, Susannam in vico requirite; ut quas non inuenitis in claustro virtutes, reperiatis in seculo. Videte quid in secreto comprehensa, quid in publico gesserit accusata. Et quia partem agonis eius iam diximus, quæ restant breuiter perstringamus. Deducitur illa, ut dictum est, ad iudicium cum parentibus & filiis, & vniuersis cognatis suis. Flebant igitur sui, & omnes qui nouerant eam. Consurgentes

autem duo Presbyteri in medio populi, posuerunt manus suas super caput eius. Quæ flens, suspexit ad cœlum. Erat enim cor eius fiduciam habens in Domino, & dixerunt Presbyteri, *Cùm deambularem in pomerio soli, &c.* Et vos itaque piæ virgines innocentem matronam, & tantam sustinentem iniuriam pio prosequimini fletu, ut quo maior vestra fuerit compassio, iocundior existat innocentis liberatio. Flebant non solum sui, sed omnes qui nouerant eam. Non quidem omnes, qui eius laudem audierant, quæ nullos aut paucos latere poterat, sed qui rei veritatem multis indicijs experti fuerant. In medium matrona sanctissima trahitur, & innocens pro rea statuitur. Anxius maritus, anxij tam parentes quàm filij, & omnes qui nouerant eam, quâto pudore confusi, quâtis lacrimis perfusi eius innocentiam deplorarent, quis commemorare vel cogitare non plorando queat? Sol tam naturæ quàm humanitatis immemores senes in eius iudicium, imò suum potiùs consurgere ausi, & immundas manus sanctæ vertici eius imponentes tanquam testimonium accusationis in eam dicturi, *Cùm deambularem*, inquit, *in pomerio soli, &c.* Benè, inquàm dicitis, *deambularem*, & *soli*, qui concupiscentiæ stimulis agitati, à Deo pariter & lege iam eratis alieni.

BENE autem cùm dictum sit, *Consurgentes in medio populi, manus suas super caput eius*, statim adiunctum est, *quæ flens suspexit ad cœlum, erat enim cor eius fiduciam habens in Domino.* Quid est quòd hucusque cùm sui eam deflerent, non est memorata flere, sed tunc tantum cùm castissimum eius caput contingerent manus impudicæ? Nunquid tunc primò vel præcipuè de periculo timebat vitæ? Quod quidem ne suspicemur, mox adnectitur: *Erat enim cor eius fiduciam habens in Domino.* Quamuis enim superius dixisset, *Si autem non egero, non effugiam manus vestras*, & postmodum dicat, *Et ecce morior, cùm nihil horum fecerim*; consilia tamen & secunda de salute animæ, & gloria palmæ, nequaquam tristis erat de transitoria morte, per quam se transituram sciebat ad gaudia perennis vitæ. Vnde & benè suspicere ad cœlum memoratur quo eius intentio toto desiderio ferebatur. Cur igitur flebat tunc tantum cùm eius capiti manus imponent illi, ac non potiùs cùm ad mortem duceretur; nisi quod ea quæ mortem non timebat, ab obscœnis manibus caput suum contingi dolebat, quibus nec inferiores corporis partes tangi consenserat? Audite hæc, & intelligite virgines sacræ, quæ corpora quoque vestra tanquam propria Deo templa consecratis, ut nullo lasciuix

lasciuæ tactu hæc pollui permittatis, nullo immunditiæ sacrilegio violari. *Si peccauerit vir in virum*, Samuel ait, *placari ei Deus potest. Si autem in Deum peccauerit, quis orabit pro eo?* In virum suum peccare Susanna timuerat, si aliquo lasciuæ tactu corpus suum ei dicatum contingi permetteret. Quid igitur sponsæ Christi faciendum est, cum quis incestus ad eam accesserit, summam iniuriam Deo facturus, si hoc eius proprium templum aliquod lasciuæ contagium præsumpserit? Cui Iudici nisi summo hæc summa iniuria; cui nisi cuius est propria vindicanda seruatur? Ei utique qui ad timorem sui maximè nos adhortans, ait: *Nolite timere eos qui occidunt corpus, animæ verò non habent quid faciant: sed potius eum timeate, qui habet potestatem corpus & animam perdere in gehennam*, Ac si apertè dicat, Non est eorum guerra plurimum metuenda, quæ in vna tantum nostri ac minori parte est, hoc est in corpore, & citò præterit; sed ea præcipuè, quæ in vtraque parte perenniter sæuit. Quam & Apostolus considerans, ingemiscit, dicens, *Horrendum est incidere in manus Dei viuentis*. Si enim illas, quæ thorum maritalem maculauerunt, lex diuina senserit morte puniendas, quid eas manet, quæ ipsum Dei templum prostituerint? Nunquid præjudicium illis fecit, quæ minus deliquerunt, si maiora crimina, & proprii thori maculas expiauerit minore vindicta? Certum est, vt suprà memoratus Apostolus ait, in manufactis templis nequaquam Deum habitare, sed magis in illis, qui vera eius templa spiritalia sunt dicendi. De qualibus ipse quibusdam ait: *Nescitis quia Dei templum estis, & spiritus Dei habitat in vobis*. Si quis templum Dei violauerit, disperdet illum Deus. Templum Dei sanctum est, quod estis vos. Qui autem intra parietes corporalis templi sordes aliquas corporales intuens, non eas statim asportare festinet? Qui sibi fornicari non abhorreat, ac magis illud, quàm verius animæ tēplū pollueretrepidat?

FLEBAT, vt dictum est, Susanna, & fletus eius causa iam ex parte est exposita, pro cōtactu scilicet obscœnarum manuum, quæ nec ad horam sustinere potuit. Flebat utique de præsentē, & si diligentius attendimus, non solum corporis contactum, sed & famæ futurum flebat detrimentum, cum illi scilicet ad testificandum prorumperent, quorum testimonio plurimum credi prouidebat, sicut & postmodum Sriptura cōmemorat, dicens. Credidit eis multitudo quasi senibus populi, & Iudicibus, & condemnauerūt eam ad mortē. Flebat opprobrium domus suæ, nec tam suam calamitatem quàm suorum deplorabat anxietatem,

Quid enim? Quid inquā? Circūstantes suos virū, parentes, filios, cognatos, vt dictum est, & omnes qui nouerant eam in summa anxietate positos, & tam innocentiam eius quā suam infamiā deplorare cernebat. De quorū cōpassione magis quā de propria passione dolebat; nec tam corporis mortē quā infamiæ labem plangebat. Quo enim quæque castior est, verecundior esse cognoscitur, & castimonix summū istud est argumentū. Vnde benè sicut re, ita & nomine pudor, & pudicitia ita sunt adiuncta, vt frequenter nomine pudoris ipsa castitas designetur, quod vt dictū est signū, est eius præcipuum argumentum. Quod & Apostolus diligenter attēdens cū muliebris honestatis habitum describeret, id in commendatione ipsarum primum assumpsit, per quod eas maximè commendari censuit. *Mulieres in habitu ornato, cū verecūdia, & sobrietate, &c.* Hinc ecōtrario scriptū est, *Frons mulieris meretricis facta est tibi, noluisti erubescere.* Heu: quid iam nouimus, vel audiuius inter eas, quæ per habitum sanctum Deo mentiuntur, non solum turpitudinem carnis incurrere, sed nec infamiæ notam abhorrere. Quibus hoc ipsum pro gloria videtur, quod Christo dedecorato amari hominum, imò detestanda scorta dæmonum prædicantur. A quibus si nōnulla munuscula quandoque suscipiunt, tam Christi quā sui oblitæ miserandam mortē suam, cum summo dedecore sui quibus audent ostentant, quasi non parui se æstimantes, quæ se aliquib. vendere possint: plura tamen fortassis largituræ quā accepturæ. Paucos quippe emptores reperiunt vt magis damnum quā lucrū conspiciunt; & quæ minùs appetuntur merces, facilius omnibus exponuntur, & publicatæ citius obtinentur.

* ad pro-
positum

Vt autem à proposito * reuertamur, & de summa ignominia Christi ad laudem feminæ secularis redeamus: Cū falso testimonio senum populus credidisset, & eam ad mortem condemnassent, exclamauit voce magna, & dixit: *Deus sterne, qui absconditorum es cognitor, qui nosti omnia antequam fiant, tu scis quoniā contra me falsum tulerent testimonium, & ecce morior cū nihil horum fecerim.* In iudicio prius constituta, cum illi in accusationē eius testificarētur, nō loqui, sed flere, & in cælū suspicere narratur, vt eius patiētia primū probaretur, quā & in Christo Propheta prædixerat his verbis: *Tanquam ouis ad occisionē duceretur, & quasi agnus coram tondente se obmutescet, & non aperiet os suum.* Expectabat ibi tacita, damnationis suæ sententiam, & tacens hominibus, soli Deo fletu loquebatur. Nunc verò damnationis accepta senten-

ria, ad excusationem sui, nō liberationē, suam innocentiam protestata, famæ potius quàm vitæ decreuit consulere, & suos saltē de morte sua minus sollicitos reddere, quam minimè dubitarēt ad feliciorē vitam transire. Certissimum quippe vel innocentia, vel culpæ testimonium est, extrema confessio damnatorum, maximè cum quicquid iam dicatur apud homines, sibi profuturum desperent, & tantò amplius de seruanda veritate sunt solliciti, quanto se magis ad diuinum iudicium propinquare trepidant. Benè autem dicitur exclamasse voce magna, non quæ solum aures hominum tetigit, sed quæ ad pijsimas aures Dei perfectius venit, nec tam terrā quàm cœlum repleuit. Quod statim subsecutus indicat effectus, cum dicitur: *Et exaudiuit Dominus vocem eius.* Quam obsecro vocem eius audiuit, imò vt audistis exaudiuit? Quid enim orauit, vnde meruit exaudiri? *Tu Domine, inquit, omnia nosti antequā fiant: tu scis quā falsum cōtra me tulerent testimonium.* Nunquid orando adjecit vt liberaretur à pœna, quam non meruerat ex culpa? nequaquam id rogare decreuerat, quæ sic se ad vitam transire magis quàm mori attendebat, nec tam de morte quàm de infamia propulsanda curabat, vt suis potius quàm sibi consuleret. Dominus autem, cui conscientia magis quàm lingua loquitur, non solum ab infamia, verum etiam à morte ipsam liberare non differens, in eo vocem eius exaudiuit, quòd confessionis suæ veritatem certis indicijs comprobauit. Vnde & subditur: *Cumque duceretur ad mortem, suscitauit Deus Spiritum sanctum pueri iunioris, cui nomen Daniel.* Spiritum, inquit, potius quàm corpus suscitauit, cū ætatem pueri iunioris mirabiliter exaltauit, vt Spiritus sanctus, qui in eo iam erat per gratiam, per Prophetiæ cognosceretur efficaciam; & per virginem puerum pudicitia defensore impudici senes iudicati dānarentur. Ex qua quidem spiritus suscitatione ad pudiciz, vt dictum est, defensionem matronæ, & condemnationem impudicorum senum, id non immeritò puerum hunc meruisse credimus, vt perpetuæ virginitatis florem obtineret. Hinc quoque non incongruè credimus in tantam puerum famam ex hoc tam mirabili iudicio suo creuisse, vt ipse quoque Nabugodonosor, qui eum captiuauerat, cum cæteris eum præcipuè toti terræ suæ quasi Iudicem præficeret.

EXCLAMAVIT autem voce magna, & dixit: *Mundus ego sum à sanguine huius.* Et conuersus omnis populus ad eum, dixit: *Quis est iste sermo quem locutus est?* Qui cum staret in medio eorum

ait: *Sic fatui viri Israel, non iudicantes, neque quod verum est cognoscentes, condemnastis filiam Israel? Reuertimini ad iudicium, quia falsum testimonium in locuti sunt aduersus eam.* Reuersus est ergo populus cum festinatione. Quod verò tam mirabile, vel tam diuinæ virtutis manifestum signum, vt tam citò ad vnius pueri subitam increpationem totus subsisteret populus, & eo diligenter audito ad iudicium festinanter rediret? Quid in eo cernebat, quæ ætas paruulum monstrabat & despicabilem, nec omnino ad tantum negotium sufficientem ostendebat? Profectò non est ambigendum cum quo repletus est, spiritum aliquo manifesto signo in eo esse visum, & quiddã diuinum in vultu eius vel habitu apparuisse, sicut de Domino creditur, cum ipse solus omnes pariter tã euentes quàm videntes de templo eijceret. Reuerso autẽ ad iudicium populo, quàm constanter, quàm sapienter iudex senũ puer, imò in puero Spiritus sanctus loquatur audiamus. *Separate eos ab inuicẽ procul, & dyjudicabo eos.* Et primò quidem grauiter increpando atque arguendo eos dixerat: *Sic fatui filij Israel, non iudicantes, neque quod verum est cognoscentes, &c.* Quæ est ista obsecro confidentia eius, qui non solum puer, sed & iunior memoratur, vt vnus duos tam acriter arguat, tam publicè puer increpet seniores, & tamen citò iudicium ipse consumet? Audistis pueri constantiam, sed miramini prudentiam, de qua in examinandis testibus vniuersa per orbem Ecclesia sumpsit auctoritatem. Puer erat, & captiuus, etiam Ecclesiæ legẽ non scripto, sed facto promulgabat. Quid est puer quod audes præsumere, & supra ætatem pueri, & non trepidas dicere, *dyjudicabo eos*? Dic saltem, *dyjudicabat eos Dominus.* Sed quia, vt ait Apostolus, *qui adheret Deo vnus spiritus est*, securè profiteris quod per diuinum agatur, per tuum fieri spiritum. Præsertim cùm & Veritas dicat, *Non enim vos estis qui loquimini, sed spiritus Patris vestri qui loquitur in vobis.*

QV ID interim agis, ô Susanna? quanta subsistis admiratione suspensa? quòd à puero speras auxilium, quæ per commune damnaris iudiciũ? Sed quia scriptum legisti de tuo & omnium Salvatore, *Puer natus est nobis, &c.* ne diffidas eum te per hunc puerum saluare, quem vt omnes saluet puerum fieri credideras ex lege. Non attendas pueri ætatem, sed præidentem puero deitatem, de cuius potentia scriptum meministi: *Dixit, & facta sunt; mandauit, & creata sunt.* Confidens Domino, atque omni auxilio destituta præter diuino, illud Apostoli jam in te completum expectaris: *Si Deus pro nobis, quis contra nos*? Filia Iuda, vt ipse Daniel

profiteretur, & de regio sanguine clara, atque Dominicæ stirpi per cognitionem coniuncta, quem fueras habitura cognatū, iam in agone tuo præsentis propitiū; vt quod speras de salute animæ, iā experiaris in corporis liberatione, vt ex beneficio mīnori certior reddaris de maiori, & de perceptione amplioris gratiæ ei sēper studeas deferuire. Audistis, Virgines & Spōsæ Christi, virtutem laicæ cōiugatæ, quā à vobis de lectulo, vt dixim⁹, foris egressi volumus cōspici: vt eā s. imitātes spōsum vestrū reperiatis in vico, quē fortassis nō habetis in claustro. Audistis & vos tā Presbyteri quā Clerici iudiciū vestrū, qui circa sponfas Dei aliqua de causa conuersantes, vel eis familiaritate qualibet adhærentes, tantò à Deo longiùs receditis, quantò eis turpiter amplius propinquatis. Maculare hominis thorum præsumentes Presbyteri, dignam, vt dictum est, mortis sententiam exceperunt. Quid eos maneat perpendite, qui proprium Dei lectum non verentur polluere. Cū apud ipsas Missarum sollemnia celebratis, vel ad infirmas venire cogimini, sæpè vt audio earum ori hostias porrigitis manibus illis, quibus ipsarum nates vel obscœnas partes contrectare soletis. Si corruptis Monialib. vix à sanctis Patribus remedium indulgetur, quid de ipsis sentiendum est corruptoribus? Quorum sexus quo naturaliter est fortior, tantò & eorum lapsus damnabilior. Ac ne prolixitate tam abhorrendæ maculæ finem nostri scēdemus sermonis, sufficit vtrisque suum nos proposuisse iudiciū, & de propositæ historiæ iudicijs à minori ad maius traxisse argumentum. Dominus ipse, sorores carissimæ, qui sicut audistis, cubile hominis seruauit immaculatum, proprium quem ei consecratis lectum custodiat incontaminatum, & longè à vobis releget fornicationis spiritum: & qui sancti propositi vobis inspirauit voluntatem, ipse perseverandi tribuat facultatem, Amen.

DE ELEEMOSYNA, SERMO XXIX.

Pro Sanctimonialibus de Paraclito.



NTER vniuersas Domini parabolas, fratres, illa præcipuè de villico iniquitatis ad eleemosynæ fructum nos inuitat. Qui cū villicationis suæ rationem reddere Domino non sufficeret, hoc nouissimum habuit consilium, vt de pecunia Domini sui, & de redditibus ipsius villæ cui præerat, quos ipse antea in seipso prodigus consumpserat, amicos sibi præpararet. Qui cū expulsus à Domino suo fuisset, eum susciperent

beneficiorum eius memores. Factum est itaque, ut cum ipsius villæ redditus colligeret, de rebus Domini sui intantum alijs largus existeret, ut ei qui centum cados olei debebat, quinquaginta condonaret, id est dimidietatem, & ei qui centum coros tritici, viginti remitteret, octoginta s. accipiens. Et sic in eo completum est illud vulgale prouerbum. De alterius corio largæ corrigiæ. Quo audito, Dominus eius, qui eum à villicatione, hoc est à præpositura illa villæ remouere decreuerat, laudauit ipsum villicum iniquitatis, qui v. iniquè eum pecunia sua defraudauerat, quod prudenter fecisset, de alieno v. ære sibi amicos comparando. Quam quidem parabolam suam Dominus Iesus tali fine concludens ait; *Et ego dico vobis, facite vobis amicos de māmōna iniquitatis: ut cum defeceritis, recipiant vos in æterna tabernacula.*

E c c e ipsum villicum Dominus dicit iniquum, qui iniquè s. Dominum suum pecunia sua defraudauerat, & ipsam mammonam, id est pecuniam iniquitatis appellat, tanquam Domino fraude surreptam. Et tamen hanc ipsius villici siue mammonæ iniquitatem excusat prouidentia villici, quæ laudatur in amicis scilicet sibi comparatis: ut hinc maximè colligatur, quanta sit eleemosynæ virtus, quæ de malè etiam acquisitis, & iniquè Domino surreptis æterna cælestis mansionis habitacula nobis promeretur. Quicumque enim in hac vita possidet aliquid, quasi villicus summi regis est, nec sua sunt quæ habet, sed à Domino sibi commissa tanquam procuratori & ministro. Quas quidem res Domini sui ita debet administrare, ut inde necessaria vitæ habeat, & quæ superfluerint Domino reddat. Iniquè verò agit & fraudulenter, si ultra necessaria sua quicquam retinet, & non de residuis ipsum Dominum in pauperibus pascit & vestit, sicut ipsemet ait: *Amen dico vobis, quod uni ex minimis meis fecistis, mihi fecistis.* Diuina autem inspirante gratia tunc apud Dominum suum se defamari villicus intelligit, quod non videlicet Domini sui fidelis extiterit dispensator aut procurator, quando peccatis obstinatiæ suæ, & auaritiæ, & clamore pauperum, quibus subuenire, & sua illis reddere noluit, se apud Deum grauitè accusari recogitat, & eos sibi inimicos fecisse, quos amicos debuit comparasse. Attēdit etiam se à villicatione remouendum esse, cum eius rationem Domino non sufficiat reddere, quia hoc ipsum est villicationem amittere, fructum de administratione rerum terrenarum apud Deum non obtinere. Quem tantò amplius quisque debet timere, & de reddenda ratione sollicitior esse, quantò sibi ab eo plura recognoscit commis-

sa esse. Cum enim augentur dona, rationes etiam crescunt donorum. Quod quidem attendens villicus prouidus & prudens, quem Dominus suus multis præfecerat, præparat sibi amicos, qui se à Domino exclusum recipiant. A Domino se excludendum iudicat, cum in se non recognoscit vnde Deo placeat, attendens quàm terribile quid de diuite Dominus alibi dicat: *Facilius est camelum intrare per foramen acus, quàm diuitem in regnum cælorum.* Vt ergo illic per alios introeat, amicos sibi illos comparat, quorum ipsum est regnum, ipsa veritate sic attestante: *Beati pauperes spiritu, quoniam ipsorum est regnum cælorum.* His ergo communicat sua terrena, vt illi sua ei communicent cælestia. Audi Salomonem, & exaudi plus quàm Salomonem, quia *redemptio anime viri, propria diuitia.* Et Dominus ipse Iesus Christus, *Date, inquit, & dabitur vobis. Date eleemosynam, & ecce omnia munda sunt vobis, quia sicut aqua extinguit ignem, ita eleemosyna extinguit peccatum.*

Valde contraria sunt, fratres, ignis & aqua, quibus Dominus eleemosynam comparat & peccatum. Ille inter elementa calidissimus est, hæc frigidissima est. Et scitis, fratres, quia caritas, quæ nos iuxta Apostolum spiritu feruentes facit, igni meritò comparatur. De quo quidem igne Veritas ait: *Ignem veni mittere in terram, & quid volo, nisi vt ardeat?* Ac si apertè dicat: *Quid aliud veni quærere in mundum, nisi ipsum flamma dilectionis accendere?* Peccatum autem quod per inuidiam eius intrauit in orbem terrarum, qui frigiditas hominum inhabitat mentes, sicut scriptum est: *Ponam sedem meam in Aquilone,* id est præparabo mihi regnum in cordibus hominum igne caritatis carentibus, rectè per aquam frigidissimum elementum designatur. Cum autem caritas in Deum ferueat semper, maximè illa feruere cognoscitur, quæ per compassionem fraternam in eleemosynis exhibetur. Vnde & per excellentiam quandam ipsa eleemosynæ largitas quasi proprio iâ vel speciali nomine caritas vocari consuevit. Sic e contrario obduratio mentis in pauperes maximè frigidam mentem esse conuincit, & ab omni caritatis igne priuatam, sicut scriptum est. *Qui enim non diligit proximum quem videt, Deum quem non videt quomodo potest diligere?* Bene itaque hanc obstinationem animi frigidissimo comparauit elemento, sicut illam benignitatem calidissimo. Huius itaque benignitatis effectum pauperibus exhibentes, à regno diaboli recedimus, & in regnū Christi transferimur. Sicut ab Aquilone pandetur malum: ita Deus ab Austro veniet. Inde enim venire quisque habet, vbi inhabitat. Et diabolus, qui malorum

aſtor eſt, in frigidis habitat mentibus, quæ per Aquilonem frigidiffimum ventum intelliguntur; & Deus in his, quæ caritatis igne ſunt ſuccenſæ, quas benè Auſter, qui calidiſſimus eſt, deſignat.

Ad has ſibi mentes parandas ipſe in Canticis Sponſus dicit: *Surge Aquilo, & veni Auſter, & perſe hortum meum, & fluant aromata illius.* Hortus Domini ſancta eſt Eccleſia, quam excolit & irrigat doctrinis & exhortationibus ſanctis: Hic hortus habet duo aromata, id eſt precioſa ſancti Spiritus vnguenta, quorum altero Deum, altero proximum quaſi vngere dicitur: Dei videlicet, ac proximi dilectionem, quia per illam propriè Deum in ſeipſo tangit, & ad ipſum toto ſe deſiderio ſuspendit, & per iſtam ad procurandas proximi neceſſitudines ſe inclinât atque demittit. Ab hoc horto ſurgit recedendo Aquilo, & venit Auſter, quando frigida priùs hominum corda caritatis accenduntur flamma. Perflando Auſter ſentitur, & caritas per eleemoſynam exhibetur. Eſt Auſter, ſed nondum flat; caritas mente concepta, nondum in opere exhibita. Tunc autem flatu ſuo educitur atque ſentitur, dum in opere neceſſitatibus proximorum exhibetur. Tunc aromata, quæ priùs in mente quaſi recondita latebant, fluunt, cum tã Dei quàm proximi dilectio viſibili effectû operum exhibetur. Tum aromata fluentia pariter fragrantiam ſuam dilatant, quando impenſæ caritatis bonus odor ad multorum veniens notitiam, multos aliorum exemplo ad bonæ operationis imitationem trahit.

Eccē, fratres hic congregati, hortus Dei eſſe debemus. Oremus ipſum Dominum horti, vt ad eius imperium ſurgat Aquilo ſicut expoſuimus, & veniat in eum Auſter perflans ipſum, vt fluant aromata: vt veſtra videlicet caritas pauperibus impenſa, non ſolum vos Dominus lucretur, ſed exemplo veſtro alios ei adquirat. Facite iuxta ipſius exhortationem, de mammona iniquitatis amicos, vt cum defeceritis recipiant vos. Eſt enim mammona iniquitatis, eſt & pecunia æquitatis, id eſt iuſtitix. Iniquitatis eſt, quæ iniquè Domino fraudata, cum pauperibus debuerit erogari tot pauperes vt homicida peregit*, quos ſuſtentare potuit. Vnde Hieronymus in Epift. Pauli ad Romanos: Nam ſi viderit illum fame periclitari, nonne ipſe illum occidit, ſi illi cum affluit non dedit victum? Quicumque enim in neceſſitate ſuccurrere morituris poteſt, ſi non fecerit, occidit. Auguſtinus contra Fauſtum: Itaque ſi occurras in eum famelicum qui mori poſſit, niſi cibum porrigendo ſubuenias, iam tu homicida teneberis lege Dei, ſi non

*f. peremit

non dederis. Leo Papa in Sermone II. Dominicæ quadragesimæ. Quisquis enim pascendo hominem seruare poteris, si non pueris, occidisti. Nobilis quoque gentilis Seneca, & naturali præditus lege, hoc quoque diu ante in prouerbijs suis sanxerat, dicens: Qui succurrere perituro potest, cum non succurrit occidit. Quantum hic, fratres, nobis periculum indicitur, si sic pauperes membra Christi avaritia nostra interficit, imò ipsum iterum in membris suis Christum occidit? Ipse quippe de his omnibus, quæ his pauperibus fiunt, per semetipsum loquitur: *Quod uni ex minimis meis fecistis, mihi fecistis*. Etiam in calo consistens persecutori suo clamat, dicens: *Saule, Saule, quid me persequeris?* Ipse propter pauperes suos semel occisus est, nos eum adhuc quotidie in ipsis pauperibus interficimus. Prior eius illa occisio, per quam redempti sumus fructuosa nobis fuit, hæc autem solummodò damnosa. Suscepit Iudas mammonam iniquitatis, ut Christum traderet. Nos mammonam retinentes iniquitatis, ipsum interficere non cessamus. Accusamus Iudam, quod eum propter pecuniâ semel tradidit. Non accusamus nos, quòd per pecuniæ cupiditatem eum quotidie quasi iterum crucifigentes interficimus. Transferamus, fratres, istam mammonam iniquitatis in mammonam æquitatis atque iustitiæ. De qua scriptum est: *disperisit, dedit pauperibus, iustitia eius manet in seculum seculi*. Illa est mammona æquitatis, id est pecunia iustitiæ, quam virtus iustitiæ fideliter dispensat, sicut illa est iniquitatis, quam avaritiæ defraudat iniquitas.

Ne putetis, fratres, cum hæc pauperibus impenditis, vos eis vestra dare, sed sua reddere. Quicquid enim supra necessaria vitæ retinetis, ipsorum sunt, & per rapinam sua violenter occupastis, quibus ablatis eos interficitis. Vnde Gregorius in Pastoralibus: Ea, inquit, de qua sumpti sunt, cunctis hominibus terra communis est, & idcirco alimenta quoque communiter omnibus proferri. Incassum se ergo innocentes putant, qui commune Dei munus sibi priuatim vendicant, qui cum accepta non tribuunt, in proximorum nece grassantur. Nam cum quælibet necessaria indignantibus ministramus, sua illis reddimus, non nostra largimur. Iustitiæ potius debitum soluimus, quàm misericordiæ opera implemus. Vnde & Veritas cum de misericordia cautè exhibenda loqueretur dixit: *Attendite ne iustitiam vestram faciatis coram hominibus*. Et Psalmista: *Disperisit, dedit pauperibus, iustitia eius manet in seculum seculi*: Est enim iustitia, quæ unicuique reddit quod suum est. Cum autem pauperibus sua restituimus, maxima est adhibenda

discretio, ne scilicet quod alterius est alteri demus, aut cui magis debemus, minus demus. Est enim discretio mater omnium virtutum. Et si recte offeras, sed non recte diuidas, peccasti. Et omnia lex immunda censet animalia, quæ non ruminant, & non findunt vngulâ. Non enim infidelibus deneganda est misericordia, sed maxime fidelibus impendenda. Iuxta quod scriptum est, *maximè autem ad domesticos fidei*, si tanta sit largitas stipis porrigendæ. Sed Apostolus docet faciendam quidem ad omnes eleemosynam, sed maxime ad domesticos fidei. De quibus & Saluator loquebatur: *Quos recipiant in æterna tabernacula*. Sed inter etiam ipsos fideles pauperes multa est differentia, cum alij pauperes mundi sint necessitate, alij pauperes Dei propria volûnate: de quibus dicitur: *Beati pauperes spiritu, quoniam ipsorum est regnum cælorum*. Quod & prædictus doctor diligenter attendens, consequenter adiecit: Nūquid & isti pauperes, inter quorum pannos & ingluuiem corporis flagrans libido dominatur, possunt habere æterna tabernacula, qui nec præsentia possident nec futura? Nō enim simplices pauperes, sed pauperes spiritu beati appellantur, id est ut ei tribuat qui erubescit accipere, & cū acceperit dolet metes carnalia, & seminans spiritualia. Sed inter ipsos iterum, qui Dei potius quàm mundi pauperes sūt, nō nulla est differentia, cū alij pl⁹ egeant, alij min⁹. Hi quidē, qui seculo penitus abrenunciātes Apostolicā imitātur vitam, veriores sūt pauperes & Deo propinquiore. Sed sunt huius professionis nō solummodo viri, sed etiam feminae, quæ cū sint fragilioris sexus, & infirmioris naturæ, tātō est earū virtus Deo acceptabilior atq; perfectior, quanto est natura infirmior, iuxta illud Apostoli: *Nam virtus in infirmitate perficitur*.

ISTAE cū terrenis coniugijs vel carnaliū voluptatum illecebris spretis sponso immortalī se copulāt, sponsæ summi Regis effectæ, omniū eius seruorū efficiuntur dominæ. Quod diligenter attendens B. Hieronymus cū ad vnā harū sponsarū Eustochiū scriberet, ait: Hæc iccirco domina mea Eustochiū. Dominā quippe debeo vocare spōsam Domini mei. Quod si tāt⁹ Ecclesiæ doctor veraciter profiteri non erubuit, & vos eas Dominas vestras rebus ipsis magis quam verbis recognoscētes, ne differatis earū inopiæ subuenire, & vos longè amplius Domini vestri sponsis debere, quàm seruis, & eas apud sponsum proprium plus posse quàm seruos agnoscatis. Inter ipsas quoq; Sanctimoniales hæc in eleemosynis adhibenda est discretio, ut quæ maiori paupertate sunt oppressæ maiori subsidio sustententur. Sūt enim Monasteria feminarum sicut & Monachorū

antiquitus à potentibus seculi fundata, vel copiosis possessionibus ditata. Hoc verò monasteriū nouiter cōstructū, nec à diuite quodam fundatum est, nec possessionibus ditatū. Quod tamen in diuinis officijs, & disciplina regulari non minōri studio perseuerare quàm cetera Dei gratia nouimus. Sed nouella eius adhuc & tenera plantatio, vestris vt crescat colenda est eleemosynis. Eligēdi vobis sunt pauperes, & eleemosyna qua regnum cælorum emere vultis, non temerè cui libet porrigēda, sed sūdet, sicut scriptū est, eleemosyna in manu tua, donec inuenias qui dignus sit, donec tibi occurrat vbi eā possis benè collocare, quam in precio tantæ rei vis ponere. Considerandi sunt pauperes, qui te possint meritis suis & orationibus illuc introducere; quia stultum est ab illis æterna tabernacula sperare, qui vt ea obtineant minimè seu parum laborant, qui coactione magis quàm voluntate sunt pauperes, rebus potius quàm spiritu, inuiti potius quàm spōtanei. *In carcere eram*, Dominus inquit, *& venistis ad me*. Nōnulla misericordia est eis etiam subuenire, qui in carceribus hominum inuiti tenentur; sed maxima est his subuenire, quæ se sponte Domini carceribus in perpetuo mācipauerunt, donec sponso occurrentes cū ipso intrēt ad nuptias, sicut ipsemet sponsus asserit dicēs: *Et quæ paratæ erant intrauerūt cū eo ad nuptias*, vt illuc v. quasi vxores assidua cohabitationē fiāt, quæ hic extiterūt tāquā spōsæ. Ad quā quidem cælestiū societate nuptiarū & æterna tabernacula, ipsæ vos meritis & intercessionib⁹ suis sponsæ secū introducāt, vt illic per eas percipiatis æterna, quæ hic à vobis suscipiunt temporalia, præstante ipso earum sponso Domino Iesu Christo, cui est honor & gloria, per infinita seculorum secula, Amen:

IN NATALI S. STEPHANI, VEL CETERORVM

Diaconorum, qui ab Apostolis derivati sunt obsequio

Sanctarum viduarum.

SERMO XXX.



N lectulū Salomonis sexaginta fortes ambiunt ex fortissimis Israel, omnes tenentes gladios, & ad bella doctissimi. Vniuscuiusque ensis super femur suum propter timores nocturnos.

Quàm gloriosus & quàm preciosus, fratres, iste sit lectulus Salomonis; cui tam diligens custodia tot & tantorum virorum sic præparatorum, sic armatorum deputatur, mirari

Habetur et
alius specia-
lis de S. Ste-
phano pro-
thomarijre
Sermo supe-
rius inter po-
steriores Epi-
stolas

magis quàm eloqui possumus. Quid in noctibus Rex tantus metuebat, qui ex ipso quoque nomine suo quantam sit adeptus pacem insinuat? Quid, inquam, in noctibus potius quàm in diebus verebatur, vt tanta custodiæ prouidentia lectulum suum ambiente muniret? Cur hæc denique quies eius lectulo magis quàm lecto comparatur? Lectum quidem in Euangelio legimus duos in se continentem, quorum alterum assumi, & alterum relinqui veritas testatur. De lectulo autem, qui in hoc Cantico Canticorum sæpius memoratur, nihil tale dicitur; nec quisquam in eo quiescens relinqui perhibetur. Lectus itaque qui maior est, & multos capit, quorumlibet continentium vitam designat. Hi namque quo amplius ab inquietudine secularium curarum sunt remoti, nec cōiugalibus molestijs impliciti, ampliori quiete fruuntur. Sed quia & inter virgines nonnullæ fatuæ inueniuntur, quæ à sponso clausa ianua repelluntur, & multi post sacrum propositum apostatantur, & ob hoc assumi à sponso non merentur, derelinqui dicuntur. Lectulus verò, qui artior est, & paucos capit, sanctæ continentiae quietē exprimit, cuius vitæ perfectio Deo se artius astringit, & quasi cum eo vnus spiritus fit. Talium vita Deo penitus vacans, atque illi soli dedita, sponsæ nomine rectè censetur, sed tunc rectius & specialiter, cū tanta virtus in feminis præminet, quæ virili copula spreta, & contemptis voluptatibus Christum sibi pro marito proposuerunt, non solum Virgines, vt Maria, sed etiam viduæ, sicut Anna, & quæ abrenunciantes seculo, Apostolico adhærebant Collegio. Quas denique Apostoli tãto pietatis amore sunt amplexi, vt cum crescente numero fidelium ipsi iam vt antea mēsis earum non sufficerent ministrare, septem huic officio Diaconos, id est ministros deputauerūt, quibus earum necessitudini diligenter prouidentibus, ipsæ spiritali lectuli quiete fruerentur ampliore. De quorum quoque numero, sicut & de cætu Apostolico diabolica tentatione vno cribrato & ventilato, sex tantū Diaconi huius viri Salomonis lectuli custodes, & tanquam excubiæ nocturnæ remanserunt. De quibus nunc dicitur, *En lectulum Salomonis &c.* Ac si patenter diceretur, Iam in hac incarnati Verbi manifesta fœderatione veri Salomonis lectulū sexaginta viri fortes diligenter ambiendo, & circumspiciendo protegunt: ne quo diabolice tētationis adulterio violetur, ne quo carnalium voluptatum contagio maculetur, aut curæ mundialis tumultibus inquietetur.

SEXAGENARIUS numerus constat ex senario atque denario, quia sexies decem sexaginta fiunt. Sex autem illi Diaconi tam senarium, in numero suo habuerunt, quàm in perfectione

& custodia mandatorum Dei, quæ per decalogum legis designantur, denarium tenuerunt. Sic igitur in eis senario atque denario pariter coniunctis, rectè sexaginta fuisse perhibentur. Fortes præcipuè, nec in carnalibus remissos voluptatibus esse oportuit, qui sanctarum castimoniarum feminarum custodes præpositi. De quorum collegio ille solus expelli meruit, qui zelo pulchræ coniugis suæ nimium accensus, nec ab hac concupiscentiæ carnalis infirmitate vel correptus destitit: sed vehemētis doloris vesania commotus, tam illam suam, de qua corripiebatur, quàm ceteras feminas publicari censuit. Quem adeò detestandum Apostoli decreuerunt, ut in locū eius neminem iudicaret substituendum, sicut in Mathia Iudam restaurauerūt. In omni quippe Religionis Conuentu tolerabilior avaritia videtur, & minoris infamiæ, quàm turpitudine luxuriæ, & maximè in deuotis feminis. Hæc labe est detestanda, & ab eis penitus semouenda. Expulso denique illo misero, & tam infirmī animi Nicolao, à prædicto illo Diaconorum forti consortio, mysticus ille quem diximus sexagenarius numerus rectè est conseruatus. Ex fortissimis Israel hi sunt Diaconi electi, quia ex discipulis Christi mira continentiarum & abstinentiarum virtute præditis sunt assumpti. Vnde gladijs armati, & ad bella doctissimi describuntur, quia doctrinis instructi diuini verbi, qui gladius spiritus nuncupatur, quolibet antiqui hostis tentamenta cum hoc gladio ressecabant, & tam continentiarum quam abstinentiarum clypeis muniti ignea tela illius nequissimi quasi quodam umbone valido repellebāt. Qui etiam in qua sui parte gladios præcipuè gestarent prouide est determinatum cum subditur: *Vniuscuiusq; ensis super femur suum.* Qui enim sanctimoniarum præerant feminarum, & prædictū miserum de concupiscentia carnis damnatum à consortio suo mouerant eiectum, ab hoc sibi vitio maximè prouidebant, & incentiua libidinis continentiarum gladio à se maximè ressecabant. Vnde & bene super illam corporis partem enses habere describuntur, ubi sedem luxuriæ constat esse tanquam proprijs partibus libidinis. Quod diligenter maximus ille Christianorum Philosophus Origenes attendens, corporali quoque gladio in semetipso usus manus sibi inferre sustinuit, quo sine suspitione infamiæ ad mulieres quoque instruendas liberum accessum posset habere. Ex primo quoque Dialogorum beati Gregorij libro didicimus venerabilem Equitium Abbatem, ut feminarum quoque Monasterijs præesse deberet, ab Angelo per visum ita spiritaliter

eunuchizatum esse, ut incentiua carnis quibus primò grauius incestabatur sic in eo penitus extinguerentur, ac si omnino deinceps viueret sine sexu.

Sunt qui super femur alienum potius quàm super suum gladium habent: cum aliqui non tam benè viuentes quàm prædicantes, aliorum incestuosam vitam magis corrigunt quàm propriam. Timores nocturni sunt sollicitudines sanctorum de quibuslibet diaboli vitandis insidijs. Tanquam enim in tenebris omnis insidians latet, & perfecti quilibet, qui iam manifesta vicerunt tentamenta. De his superest ut cogitent quæ magis sunt occulta, & difficilius deprehendi possunt. Vnde & secundum veterem Ezechielis translationem, ut beatus meminit Gregorius, sancta illa quatuor animalia oculos in dorso habere dicuntur. Quod ipse diligenter exponens, ait: Et hæc quidem vitia quæ virtutibus finitima sunt, maiori sollicitudine considerata sunt, ne per speciem fallant. Et post aliqua: Ea enim quæ in facie sunt sæpè etiam peccatores custodire solent. Iusti autem quia se & in eis custodiunt, quæ in promptu & in facie non videntur, in dorsis oculos habent; quia & ea quæ in oculis sunt discutunt, & ab his se custodiunt quæ latent. Pensate itaque, dilectissimæ sorores, quam obsequij vicem his tam egregijs ministris referre debeat, & tantò maiori deuotione natalitia ipsorum celebrate, quanto fidelibus his viris dispensatoribus amplius estis obnoxia. Perpendite & quanto vos honore diuina gratia sublimauit, qui vos primum suas & postmodum Apostolorum habuit Diaconas, cum tam illis quàm istis sanctis viduis de suis facultatibus constet ministrasse. Vnde & ipsas tam Diaconas quàm Diaconissas antiquitus appellare Doctores sancti consuevere. De quarum etiam mensis ordo Diaconatus in prædictis viris inceptus ad Dominicam altaris mensam postmodum est translatus, ut qui Diaconarum fuerant Diaconi, nunc Leuitæ efficiantur Christi. Quibus pariter & feminas in hoc Diaconatus ordine ab Apostolo coniunctas esse, Doctores sancti multis profitentur in locis. Qui ad Romanos Epistolam scribens: *Commendo, inquit, vobis Phæben sororem nostram, quæ est in ministerio Ecclesiæ, quæ est Cheneris.* Quem quidem locum Cassiodorus in huius Epistolæ Commentarijs suis exponens: Significat, inquit, Diaconissam fuisse matris Ecclesiæ, quod in partibus Græcorum hodie vsque peragitur, quibus & baptizandi vsus in Ecclesia non negatur. Hinc & Claudius ita meminit: Hic locus Apostolica

auctoritate docet etiam feminas in ministerio Ecclesie institui, in quo officio positam Phœben apud Ecclesiam, quæ est Chencris, Apostolus magna cum laude & commendatione prosequitur. Hieronymus quoque illum Apostoli locum ad Timotheum scribentis exponens, dicit, Adolescentiores autem viduas deuita in ministerio Diaconatus præponere, nec malum pro malo detur exemplum.

Idem quoque Apostolus cum supra in eadem Epistola post Episcopos etiam Diaconorum vitam ordinaret, institutionem quoque Diaconarum illis coniunxit, dicens: *Diaconos similiter pudicos, non bilingues, non multo vino deditos, non tempore lucrum sectantes, habentes mysterium fidei in conscientia pura. Et hi autem probentur primum, & sic ministrent nullum crimen habentes. Mulieres similiter pudicas, non detrahentes, sobrias, fideles in omnibus. Diacones sint unius uxoris viri, qui filiis suis bene præsent, & suis domibus, &c.* Vbi & illud notandum est, quod quemadmodum hoc loco Diaconos quoque sicut Episcopos, unius uxoris viros approbat, ita & postmodum Diaconissarum ordinem instituens, eas etiam unius viri uxores maximè commendat, *Vidua*, inquit, *eligatur non minus sexaginta annorum, quæ fuerit unius viri uxor*, ut videlicet tanto sit ad sui ordinis administrationem idoneior, quanto iam calore corporis refrigescente, ardorem libidinis minus sentit: & tantò solertiùs Ecclesiasticis ministerijs valeat præesse, quantò magis in rei familiaris cura benè cognoscitur exercitata. Quæ de intemperantia libidinis ne plurimum possit notari, si videlicet per plures decurrerit viros, unius viri uxor eligenda cèsetur. Vos tandem, alloquor, virgines, ut ministeriorum quoque differentiam de vestra cogitetis prærogatiua. Ecce enim sanctarum obsequio viduarum ab Apostolis, locum quorum obtinent Episcopi, minoris ordinis viros, idest Diaconos, videtis deputatos: ab ipso vestro Christo in matre eius virgine didicistis, quid vobis debeant Episcopi. Non enim illi Diaconum, sed Apostolum dedit ministrum, per hoc patenter insinuans tanto vos digniores promereri ministros, quantò ad excellentiam Dominicæ matris ampliùs propinquatis. Quæ quidem non Diaconum, sed Apostolum in obsequio sui ministrum adeptam, quid vobis Episcopi debeant insinuat, qui Apostolorum gradum in Ecclesia possident. Vnde & deuotis communiter feminis tam virginibus quàm ceteris, quanto studio tam Apostolorum, quàm prædictorum Diaconorum ab eis electorum festiuitates sint celebrandæ, nolo vos ignorare. Quo-

rum vos intercessionibus plurimum adiutas ille vos in sacro proposito custodiat, qui tales vobis deputauit ministros, & eisdem apud se vestros habeat aduocatos sponfus vester Dominus Iesus Christus, qui cum Patre.

DE S. IOANNE BAPTISTA, SERMO XXXI.



OMINVS ad beatum Iob in parabolis loquens, cum per ibices, & parturientes ceruas Rectorum ordinem descripsisset, consequenter, dilectissimi fratres & commonachi, ad institutionem vestri propositi stilum conuertit, & eius libertatem ceteris præferens ait: *Quis dimisit onagrum liberum, & vincula eius quis soluit? Cui dedi in solitudine domum, & tabernacula eius in terra falsuginis? Contemnit multitudinem ciuitatis, & clamorem exactoris non audit. Circumspicit montes pascue sue, & virentia quæque perquirat.* Magnum, fratres, in multis virtutibus Iob fuisse, tam ipsius Historia quam Dei testimonia monstrauerant. Quem ne tantarum magnitudo virtutum in elationem fortè traheret, vitæ ipsius coniugali tam Rectorum quàm continentium dignitas præ oculis ponitur, vt eorum scilicet cōparatione se compescat ab elatione. Et quia tam continentia quàm abstinentia virtus præminet in Monachis, sub onagri specie huius prærogatiua describitur vitæ. Onager quippe non domesticus, sed siluestris Asinus dicitur. Hic tantò liberius in solitudine conuersatur, quantò à commiseratione hominum magis remotus nec onere grauat, nec vinculis coercetur, sicut econtra domesticus sustinet asinus. Vnde merito huic vita coniugatorum, sicut illi continentium comparatur. Quod enim vinculum maius quàm copulæ coniugalis? Quæ grauior seruitus, quàm vt homo proprii corporis potestatem non habeat? Quæ denique vita onerosior, quàm molestijs quotidianæ sollicitudinis tam pro vxore quàm pro filijs cruciari? Aut quæ vita pigrior ad obsequium Dei, quàm eius qui tot affectionum vinculis mūdo ligatus adstringitur? Vnde nec ab huius vitæ cōparatione pigri iumenti tarditas dissidet. Monachi verò tantò expeditiores vel promptiores ad diuinum sūt obsequium, quāto ampliùs secularium affectionum vinculis absoluti, omnibusque renunciantes ab illa, quam diximus, seruitute longiùs absistunt, & liberiores fiunt.

De qua nūc libertate Dominus ad Iob loquitur: *Quis dimisit onagrum*

onagrum liberum. Ac si diceret, quis, nisi ego, hanc libertatem quieti Monasticæ dedit, quæ longè præminet illi tuæ coniugali seruituti? Magnum utique hoc tantæ gratiæ donum, ut inspiratione & virtute diuina homines in carnalibus concupiscentijs nati, & in secularibus illecebris educati, contra vel supra humanæ naturæ infirmitatē ita in carne viuant, ut vitia carnis nesciāt, & humanitatis obliti virtute fiant Angelici. *Et vincula eius quis soluit?* hoc est affectiones carnis, quibus naturaliter quasi quibusdā vinculis mundo ligatus erat, quis dirupit? Quàm cōgruè autem vitam continentium, quæ ut dictum est in Monachis præminet, onager designet, illa eius natura indicat, quā Isidorus, & qui de naturis animalium scripserunt referunt. Qui enim mares sunt in onagris, filios suos castrare dicuntur. Quod quidē ne fiat, matres quantum possunt eos occultate nituntur. Mares autem in onagris, fortes in proposito suo sunt Monachi, qui eos quibus quasi filijs præsunt, vel quos in suam congregationem suscipiūt, spiritualiter castrando in sua continentia seruant. Quales quidem Eunuchos, qui se v. propter regnum cœlorum castrauerūt, tam Esaias quàm ipsa Veritas plurimum cōmendat. Quòd autē de Monachis, id est solitarijs hæc de onagro dicta sint intelligenda, patenter insinuat, dicens: *Cui dedi in solitudine domū,* hoc est à tumultu seculi ad secretum heremi traxi, ut ibi s. quanto quietius habitaret, tanto perfectius mihi vacaret. *Et tabernacula eius in terra falsuginis.* Tabernacula mobiles domus sunt, nullaque stabilitate fixæ, qualia sunt pastorum vel peregrinantium obūbracula. His corpora nostra cōparantur morte adhuc dissolubilia, nec stabilitatē immortalitatis adepta. De qualib. dicit Apostolus: *Si dissoluatur domus nostra terrestris, habemus in cælum domum nō manufactam à Deo paratam.* Dum ergo in his luteis & mortalibus corporibus sumus, in tabernaculis magis quàm in domibus habitamus. Qui ergo hīc adhuc peregrinantes quasi tabernaculū habemus, cum ad cœlestis Hierusalem patriā venerimus, domum potius habituri sumus. In cuius rei typo populus Dei primū habuit tabernaculū in deserto, & postea templū in Hierosolimis, terrā adeptus promissionis, & maxima pacis iocunditate fruēs sub Salomone, qui ex nomine quoque suo, sicut & Hierusalē, ubi templū ædificauit, pacē prætendit, quæ nusquā nisi in illa Hierusalē superna potest esse vera. Scribens etiā ad Heb. Apostolus mortale cuiuslibet corpus tabernaculo comparat dicens: *Habemus altare, de quo non habent edere qui tabernaculo deseruiunt,* hoc

est concupiscentijs carnis magis quàm spiritui obediunt, & ventri magis quàm Deo famulantur. Terra saluginosa loca sunt arida, & sicca, quam perambulans diabolus requiem non inuenit qui in locis humentibus dormit, sicut ad eundem Iob Dominus dicit. Onagri ergo tabernacula in terra sunt arida, quia virtus abstinentiæ in eis viget, quorum corpora fluxu carnalium concupiscentiarum nequaquam sunt humida.

C O N T E M N I T *multitudinem ciuitatis.* Ad duo quæ nouissimè dixerat duo subjungit, quasi singula singulis reddens. Ad illud quidem, *Cui dedi in solitudine domum*, istud refert quod nunc dicitur, *Contemnit multitudinem ciuitatis*, id est frequentiam secularium hominum, quæ multos capit atque oblectat. Multi quippe sunt vocati, sed pauci electi, & spaciosam & latam viam mortis multi perambulant. Sunt qui timore vel necessitate aliqua commoti ad occulta solitudinis se conferunt, & hoc ex coactione magis quàm ex voluntate faciunt; sicut in Helia primo antiqui populi Anachoreta, vel in Paulo postmodum primo heremita factum esse legimus. At verò egregius est à seculo recessus & Deo acceptus, cum quis propter Deum relinquit mundum, nec tam eum mundus expellit, quàm ipse mundum reijcit. *Et clamorem exactoris non audit*, ac si diceret: Ex hoc apparet eum in terra saluginis habere tabernacula, quia quotidianæ abstinentiæ moderatis ieiunijs carnem domat, vt & concupiscentias reprimat, & defectum naturæ non incurrat. Importunus & quotidianus exactor in nobis venter est, qui cibum à nobis exigendo quasi quotidie murmurat, & clamat; Affer, affer. Hic quidem vocem moderatam habet in necessarijs, sed clamorem intemperatum in superfluis. Onager ergo iste, quia necessaria ventri alimenta non subtrahit, sed superflua tollit, clamorem exactoris, vt dictum est, non audit, quia ei non obtemperat in superfluis. De quo adhuc subditur, *Circumspicit montes pascuæ suæ, & virentia quæq; perquirit.* Montes pascuæ volumina sunt sublimioris doctrinæ, id est sacræ scripturæ. Quo ergo iste spiritalis onager amplius cibis corporalibus abstinet, tanto consolatione melioris cibi, id est pabulo diuini verbi magis indiget; & quo illam minus curat, hac refectione animam magis satiat. Bene autem circumspicere dicitur montes pascuæ suæ, hoc est diligenter inquirere ac providere, in quibus montibus, id est sacris voluminibus aptiorem sibi refectionem ex intelligentia ipsorum possit reperire. Non enim

omnibus omniū librorū lectio cōpetit, nec omnes ab omnibus intelligi possūt, nec in omnibus ferculis omnes pariter oblectantur. Et quoniā in diuinis Libris quædā reprehēdūtur, quædā cōmendantur, nec solum vita bonorū quam sequamur, verum etiā malorum quam fugiamus describitur; montes isti non solum viridem, sed etiam siccam continent herbam. Quæ enim ad secularem pertinent vitam fœno comparanda sunt, quod abscissum de terra suæ viriditatis vigorem amisit. Et vita reproborum à terra viuentium aliena, his caducis inhians rebus, quæ in defectu consistunt, fœno comparatur; sicut econtrario vita electorum, quæ quotidianum habens profectum, ad immarcescibilem patriæ cœlestis, quasi semper virentis tendit amœnitatem, virentium pratorum speciem gerit. His igitur onager noster in illis montibus reficiendus. Non sicca pabula, sed virentia quærît, quia hæc assequi nititur, per quæ ad æternam pertingitur vitam, & his tantum animam suam hic reficere curat, quibus ad supernam illam refectiōem perueniat.

HÆC quidem de onagro in generali, vt ita dicam personam Monachorum, expositio nostra prosecuta est. Quæ nunc de genere ad speciem transferētes, in summo illo Monachorū Principe, cuius hodie sollēnitas agitur, iuuat hæc omnia diligētius cōsiderare, vbi ea perfectiūs possimus inuenire; qui sine professione regulæ viuens, omnē regulæ transcendit perfectiōē. Hic quippe, vt dictū est, in spiritu & virtute veniēs Helix, huius propositi vitā, quam ille inchoauit, ipse cōsummauit. Ab his duobus tanquā ducibus nostri propositi, seu principibus huius Philosophiæ Christianæ tam in veteri quàm in nouo populo studia sunt exorta. Hieronym. ad Paulinum in Epist. II. Habet vnumquodque propositū Principes suos, & vt ad nostra veniamus, Episcopi & Presbyteri habeāt ad exemplum Apostolos & Apostolicos viros, quorum honorem possidentes, habere nitantur & meritū. Nos autem habeamus propositi nostri Principes, Paulū, Antonium, Hilarionem, Macharium. Et vt ad Scripturarum authoritatem redeam, noster princeps Helias, Helisæus, nostri duces Prophetarum filij, qui habitabant in agris & solitudine, & faciebant sibi tabernacula propè fluentia Iordanis. De his sunt & illi filij Recab, qui vinū & cicerā non bibebant, qui morabantur in tentorijs, qui Dei per Hieremiam voce laudantur, quòd non deficiat de stirpe eorum vir stans coram Domino. Idem ad Eustochiū virginem, de diuersis generibus Monachorū. Ad tertium

genus veniam, quos Anachoretas vocant, & qui de Cœnobijs exeuntes excepto pane & sale amplius ad deserta nihil perferūt. Huius vitæ auctor Paulus, illustrator Antonius, & vt ad superiora conscendā, princeps Ioānes Baptista fuit. Talem virum quoque Hieremias describit, dicens : *Bonum est viro cum portauerit iugum ab adolescentia sua, sedebit solitarius & tacebit, quoniam sustulit per se iugum, &c.* Chrysostomus homilia xxiii. quæ sic incipit, *De Ioanne dicitur, Fuit homo missus à Deo, cui nomē erat Ioannes.* Gratia in nomine comprehenditur. Ioannes enim interpretatur Domini gratia, quia maiorem accepit gratiam. Propterea in heremo philosophatur, & reseruat se in aduentum Christi, quia nunciaturus erat Christum. Statim in heremo nutritur, statim ibi crescit. Non vult cum hominibus conuersari, in heremo cū Angelis philosophatur.

CONSIDERATE Monachi dignitatem vestrā, Ioannes princeps vestri est dogmatis. Ipse Monachus statim vt natus est in heremo viuit, in heremo nutritur, Christum expectat in solitudine. Eo tempore quo Ioannes natus est, & erat in heremo, hoc templum quod videmus esse destructū, quātas habebat diuitias, quid auri, quid argenti, Iosephus describit; quantum gemmarum, quantū serici: quanti erant Sacerdotes, scribæ, & vniuersa genera officiorum. Videte quomodo semper Christus humilitatem diligit. Christus Dei filius in templo nescitur, & in heremo prædicatur. Humilis enim humiles diligit. Hoc totum quare dico? Vt doceam dogmatis nostri principem esse Ioannem Baptistam. Hic alter, vt dictum est, Helias in spiritu, imò quodam priuilegio vitæ maior habitus, tanto maiorem à Domino gratiā percepit, quantò huius excellentiam gratiæ, ex præcepto Angeli natiuitatem eius nunciantis, talique nomine, quod hāc exprimeret gratiā, meruit insigniri. Ipse reuera onager liber fuit, qui ab infantia ruptis carnalium affectionū vinculis, spretaq; domo parentū, ad horridum heremi desertum se contulit: non quidem vt Helias metu persecutionis coactus, sed abstinentiæ virtute spontaneus. Qui in illa solitudine, quam salugineos & aridæ terræ tabernaculum efficeret corpus suum, Euangelia docēt. Vbi naturalibus cibis, & quæ vltro terra dabat, contentus, nec pane, nec colere, nec aliquo cocto vesci legitur, sed tantum mellesiluestri & locustis, & aqua sustentatur. Helias non solum cibi Monastici, verumetiam carniū alimentum coruis ministrantibus habuit. A quibus non semel in die, sed tam mane quā

vespere ad eum hæc pariter cum pane deferebantur. Qui & de torrente Charit poculum habens, in tribus istis, pane videlicet, carnibus, & aqua, non magnæ * abstinentiæ grauamen sentiebat. *f. magnū* Filij quoque Rechab nullam ieiuniorum laudem adepti, de abstinentia tantum vini, non carniū, vel quarumcumque deliciarum, commendantur à Domino. Ioannēs verò eiusque discipuli in abstinentia corporali quotidiana, non solū priores Patres, verumetiam ipsum Christum, vel eius discipulos transcendisse legitur, sicut Mathæo referente didicimus: *Accesserunt*, inquit, *ad Iesum discipuli Ioannis dicentes: Quare nos & Pharisei ieiunamus frequenter, discipuli autem tui non ieiunant? Et ait illis Iesus: Numquid possunt filij lugere, quamdiu cum illis est sponsus? Qui etiam quarta vestium asperitate, ne in istis aliquam sentiret mollietē, nec eadē Euangelia, nec ipse Dominus reticet in laude eius. Scriptum quippe est. Ipse autem Ioannes habebat vestimentum de pilis camelorum, & zonam pelliceam circa lumbos suos? Pro cucullis quidē laneis hispida de pilis camelorum habebat indumenta. Pro femoralibus lineis, zona pellicea circa lumbos utebatur, ut v. frigiditate & duritia pellicis calorem & molliciem reprimeret libidinis. Filius ipse Pōtificis qui tunc hereditatio iure patri succedebat, populo contempsit præesse in ciuitate, ut perfectius Deo vacaret in solitudine. Huius onagri fuerunt montes pascuales viri prædicti altitudine vitæ in antiquo populo præminentes, ad quos intentionis suæ oculos leuans, iuxta illud: *Leuaui oculos meos in montes*, quot indē virtutum sumpsit exempla, quasi tot virentis herbæ habuerit pabula. Nō enim in singulis omnia diuinę gratia dona reperiēbat, sed ex diuersis diuersa colligens, quasi ex multis vnum hominem perfectum componere studebat. Huius itaque vitā tam de continentia quā de abstinentia Dominus præferēs vniuersis, nec tā humanā quā Angelicam censens eam, cum præmisisset in eius laude, *Sed quid existis videre? Prophetam? Dico vobis, plus quā Prophetam*, statim adiecit: *Hic est, de quo scriptum est, Ecce mitto Angelum meum, &c.**

Qui d autem, fratres, tanti Principis nostri vitam commendare prodest, si eam imitari contemnimus? Sicut ait Apostolus, *Quaecumque scripta sunt, ad nostram doctrinam scripta sunt, ut per patientiam & consolationem scripturarum spem habeamus* Quātum nobis imminet periculum, si ea non impleamus documenta, quę specialiter ad ædificationem nostram sunt scripta, si eis instruiunt exemplis, quæ nostri propositi mores describunt perfectius? Quo enim diligentius hæc nobis exposita videmus, maius iudicium de

contemptu incurrimus eorum. Vnde & veritas, *Servus*, inquit, *sciens & non faciens voluntatem Domini sui, plagis vapulabit multis*. Ecce in onagri supraposita descriptione quid nos sequi debeat patenter expressum est, sed quàm contraria incedamus via non minus liquidum est. Iam quippe refrigercente, imò extincto religionis fervore, postmodum de labore proprio vivere debemus, quod vnum verè Monachos efficere B. Benedictus meminit, inimicam animæ sectantes ociositatem, de alieno labore vitam quærimus: & huius noxiæ quietis peruersa libertate utentes, & tam luxui rerum quàm multiloquio vacantes, veram prædicti onagri libertatem amisimus. Vnde secularibus nos implicantes negotijs, dum cupiditate terrenorum nobis dominante, ditiores fieri studemus in Monasterio quàm fueramus in seculo, terrenis nos dominis potius quàm Deo subiecimus. Villas & homines & seruos pariter & ancillas à potentibus seculi tanquam in eleemosyna sumentes, & ipsum nos graui iugo subiugamus, & nonnunquam pro pauca re accipimus multa persoluimus. Quæ cum de suo potius, quam de nostro sibi prouenire censeant, nullas his habent grates, quæ sibi non tam dari quàm reddi autumant. Sæpè & pro tutela horum ad forinseca iudicia trahimur compulsi, & ante seculares iudices publicam agentes causam, adducò non impudenter contendimus, vt homines nostros non solum ad iuramenta, verumetiam ad deum pro nobis egenda cum summo vitæ suæ periculo compellantur. Quod quidem in secularibus quoque Christianis Apostolus arguens ait: *Iam quidem omnino delictum est in vobis, quod iudicia habetis inter vos. Quare non magis iniuriam accipitis? Quare non magis fraudem patimini? Sed vos iniuriam facitis, & fraudatis, & hoc fratribus. An nescitis quia iniqui regnum Dei non possidebunt?* Quis etiamnum ignoret in ipsos subiectos nostros exactiones grauiiores nos exercere, & maiori debacchari tyrannide, quàm seculares faciunt potestates? Denique & in tantam insaniam prorumpimus, vt de tributis & vectigalibus, & teloneis victum nobis acquiramus: cum inter magna Domini miracula deputetur, quòd à teloneo vocatione sua potuit abducere Mathæum.

Vt autem de secularibus ad Ecclesiasticas transeamus potestates, non minora hinc grauamina nostra ambitio sustinere videtur. Cum enim ea quæ sunt Clericorum nobis vsurpamus, & ab Episcopis quocumque modo parochiarum redditus tam in decimis quàm in oblationibus obtinemus, sæpè quæ non rapui-

mus ex soluere cogimur. Hinc ad Synodos & ad Concilia frequenter tracti, & ad publicas causas quotidie profecti, non modico precio Indices, vel qui nostras iniurias pallient conducimus oratores. Certè & in ipsis Concilijs quanta sit auaritiæ nostræ rapacitas, frequens querimonia monstrat. Rarò ibi Episcopos, raros Clericos inuicem contendere videmus. Omnes ferè controuersæ aut Monachorum, aut de Monachis ortæ. Denique ut omittam harum sollicitudinum seruitutem & vincula, quibus se mundo vehementer obligant, quid de affectionibus carnalium propinquitatum vel affinitatum dicam, pro quibus innumera de rebus Monasterij committunt sacrilegia? Verbi gratia cum filios, aut nepotes, vel quacumque sibi cognatione vel affinitate coniunctos habent in seculo, furtim si manifestè non possunt, quæ fratribus suis, illis impendunt. Quos si fortè ad Monachatum traxerint, vel ministros in domibus suis habuerint, hos in prælationibus sublimant, & pro arbitrio ipsorum cuncta dispensantur. Contra quos si quis dixerit, statim læsa maiestatem sentit. Isti Monasterii sunt domestici hostes, illi quotidiani fures, cæto magis noxij, quanto plus assidui. Quorum patrocinio ad quæuis turpia, ad quælibet illicita ipsi Monachi tantò facilius prorumpunt, quanto de ipsorum propinquitate vel affinitate amplius confidunt. Tabernacula prædicti onagri in solitudine à Domino præparari dictum est. Isti autem è contrario suggerente diabolo solitudinis quietem fugientes, & seculi tumultibus se impudenter ingerentes, in ciuitatibus & castellis habitare lætantur, non tàm Monachi, hoc est solitarij, quàm ciues appellandi. Quorum impudentiam maximus ille Monachorum & Ecclesiasticorum Doctor Hieronymus arguens, & nostram ac Clericorum vitam diligenter distinguens, ait: Si Episcopatus te vel opus vel onus fortè delectat, viue in vrbibus & castellis, & aliorum salutem fac lucrum animæ tuæ. Si cupis esse quod diceris Monachus, id est solus, quid facis in vrbibus, quæ vtrique non sunt solorum habitacula, sed multorum? Idem alibi: Interpretare vocabulum Monachi, hoc est nomen tuum. Quid facis in turba, qui solus es? Tântò autem periculosius in secularibus turbis, & in frequentia hominum habitamus, quanto eorum nostro maior est numerus, & plures cernimus seculares quàm religiosos homines. Quod quidem periculum tunc maximè incurrimus, cum bini, vel terni, & nonnumquam singuli inter hos conuersamur. Etiam hæc loca nostra, quæ Abbantias dicere non possumus, Obedientiarum

nomine commendamus; tantò in hoc mentientes apertius, quantò ab obedientia regulæ, & ab ordine professionis nostræ amplius remouemur. Vbi enim iuxta institutionem regulæ ordo non tenetur, quis inordinatam domum dicere vereatur? Denique duo tantum genera Monachorum commendat auctoritas, Cœnobitarum scilicet atque Anachoretarum. Qui autem in seculo bini vel terni aut singuli conuersantur, nec tantum fratrum numerum habent, ut obseruantiam Regulæ impleant, profectò nec Cœnobitæ sunt, nec Anachoretæ. Cœnobitæ quidem cum sub Regula non degant, sed nec Anachoretæ cum in solitudine non viuunt.

Quod si nec monita, nec exempla sanctorum Patrum nos à seculo tentationibus pleno reuocant & plus lucra corporalia cupimus quàm animarum damna timemus: ipsa saltem rerum nostrarum incommoda, quæ de communi hominum conuersatione frequenter sustinemus, nos ab hac præsumptione compescant. Incurfu quippe hostium ciuitates ipsas vel quæ ciuium sunt depopulante, res nostræ pariter cum rebus eorum iunctæ, à communi clade non possunt esse disjunctæ. Cessantibus quoque hostibus frequenter in ciuitatibus contingunt improuisa domorum incendia: per quæ tam Oratoria, quàm officinæ Monachorum penitus consumuntur. Ipsa saltem damna, quæ fugiendo incurrimus, refugere ad solitudinem doceant, ut quasi mercibus nostris tempestate amissis, de procellis seculi vel nudi properemus ad quietis & solitudinis portum. Sunt qui in solitudine tabernacula sua collocant, sed minimè perseuerant. Quod quidem multis de causis accidit. Alij quippe paupertatis suæ modum excedentes, & maiora suis viribus aggredientes, quod non habet de proprio, supplere coguntur ex alieno, & pro necessitudinibus suis se rursus seculo ingerere, quod proposuerant fugere. Sunt & qui longa heremi conuersatione, & abstinentia tantum religionis nomē adepti sunt, ut à potentibus seculi vel secularibus viris sub aliqua pietatis occasione sæpius inuitentur, & sic diabolico cribro more paleæ ventilati, de heremo renouentur in seculo. Qui multis adulationum fauoribus dona diuitum venantes, tam suam quàm illorum iugulant animas, sicut scriptum est: *Vae vobis qui consuitis puluillos sub omni cubitu manus, & cervicalia sub capite vniuersæ ætatis ad capiendas animas.* Et rursus, *Popule meus, qui te beatificant, ipsi te decipiunt, & vias gressuum tuorum dissipant.* Quid est autem puluillos cubitis, vel cervicalia capitibus supponere, nisi secularium hominum vitam blandis sermonibus demulcere, quam nos magis

magis asperis increpationibus oportebat corrigere, & de horrore diuini iudicij, & pœnis gehennæ ad pœnitentiã trahere. Quorum dona cum sustulerimus, eos utique de suffragio nostrarum orationum confidentes, in suis iniquitatibus relinquimus secures. Qui nec ea se male adquisisse vel possidere credunt, unde religiosos viros eleemosynam petere cernunt. Quam cum suscipimus, mammonæ iniquitatis frequenter communicamus. De qua quidem mammona iniquitatis à Domino vocata, beatus Hieronymus ad Edibiam de diuersis scribens quæstionibus. Fac tibi amicos de māmōna iniquitatis. Pulchrè dixit de iniquo. Omnes enim diuitiæ de iniquitate descendunt, & nisi alter perdiderit, alter non potest inuenire. Vnde illa vulgata sententiã mihi videtur esse verissima. Diues autē iniquus, aut iniqui hæres. Seneca in Proverbijs: Lucrum sine damno alterius fieri non potest. Item prædictus Doctor in Isaia: Principes tui socij furū. Principes Scribas vocat & Phariseos, qui à Domino recedentes, socij fuerunt proditoris furisque Iudæ. Quod quidem & nos cauere debemus, ne accipientes ab hominibus munera, qui per rapinas miserorumque lacrimas diuitias congregant socij furum appellemur, dicaturque nobis, *Videbas furem, & currebas cum eo &c.* Omnes diligunt munera: non dixit qui accipiunt, hoc enim sæpè necessitate fit, sed sunt qui non putant amicos, nisi à quibus dona perceperint; nec os considerant amicorum, sed manus: & eos sanctos iudicant, quorum exhauriunt marsupiū. De quibus & Ecclesiastes loquitur: *Qui loquitur pecuniam, non implebitur.* Sequuntur retributiones, vt laudent eos à quibus aliquid acceperint, vel certè nulli quippiam tribuāt, nisi à quo se recepturos putauerint.

Si quis autem diligenter consideret, quod ait Dominus, *Facite vobis amicos de mammona iniquitatis*, hoc est à vobis vel alijs malè adquisita, & de alieno damno in lucrum nostrum suscepta, & consilium Domini voluerit propositæ de villico paraboli competentius aptare, viderit hoc ita intelligi debere, vt eis quibus abstulimus sua, restituam⁹ eorum damna, & sic eos nobis in amicitia conciliemus, quos in odiū vestri concitaueramus. Nō enim veros Christi pauperes donis nostris amicos efficimus nostros, qui suos quoq; diligunt inimicos, sed potius eos quos diximus, & eo modo quo diximus. Quod quidē parabola, quā de villico Dominus præmiserat, diligēter exprimit, cum his quos ille generauerat dāna sua restituit, nō quæ ab ipsis acceperat alijs distribuit. A quibus etiā in æterna tabernacula recipiendus dicitur, cum id eis fecerit, unde re-

cipi mereatur nō tā in sua quā in Dei superna tabernacula. Quis deniq; nesciat quātū nostra religio his quoq; vilescat, à quibus vocati venire nō recusamus, & nō solū eorum dona suscipimus, verū etiā inordinatis eorum mēsis & familijs admiscemur. Quod si non pro reuerētia Dei, saltē prohibitō nostræ famæ detrimēto fugere deberem⁹. Scriptū quippe est in Ecclesiastico: *Aduocatus à potētiore discede, ex hoc enim te magis aduocabit.* Et Hieronymus ad Nepotianum: Facile contemnitur Clericus, qui sapē vocatus ad prandium ire non recusat. Nunquam petētes rarō accipiamus rogati. Nescio enim quomodo etiam ipse, qui deprecatur vt tribuat, cū acceperis viliorē iudicat te. Quod si hoc est in Clericis arguendū, quāto magis in Monachis est detestandum?

Vt autem nunc documenta sanctorum omittam, gentilium saltem Philosophorum exempla nostræ cupiditatis impudētiā reprimant. Hi quippe sine vlla regulæ professione adeo mūdū cōtempserūt, vt non solum potentum respuerēt dona, verum etiam possessiones amplissimas abdicarēt. Quorum nonnulli tāta frugalitate referuntur contenti, vt vel vnum retinere ciphum censerent superfluum, cū ad hauriēdum aquæ poculum proprias manus viderent sufficere. Ex quib. illum Diogenem famosissimum, & de cōtemptu mundi notissimum, Doctor prædictus cōtra Louinianū in II. inducens, inter ceteras eius laudes id quoque adiecit: Quodam verō tempore habēs ad potādum caucum ligneū, vidit puerum manu cōcaua bibere, & elisise illud fertur ad terrā, dicēs: Nesciebā quod & natura haberet poculū. Ad quē etiā potētissim⁹ Alexāder multa ei donalia offerēs, cū dolio eius tāquā dator importun⁹ adisteret, hoc vnum ab ipso suscepisse dicitur respōsum: Ne obstes mihi iuuenis à sole. Socrates quoq; Archelai Regis dona respuēs, hoc vnum in excusatione prætendit, nolle se suscipere tāta, quibus referre nō posset æqualia. Vnde Seneca de beneficijs Libro v. Alexāder Macedonum Rex gloriari solebat à nullo se beneficijs victum. Item: Archelaus Rex Socratem rogauit vt ad se veniret. Dixisse Socrates traditur, nolle se ad eum venire, à quo acciperet beneficia, cū reddere illi paria non posset. Primum, in illius potestate erat non accipere. Deinde ipse dare beneficium par incipiebat. Veniebat enim rogatus, & id dabat, quod vtiq; ille non erat Socrati redditurus. Ep̄iam nec Archelaus daturus erat aurum & argentum, recepturus contemptum auri & argenti. Non poterat referre Archelao Socrates gratiam? Et quid si Regem in luce media errantem ad rerum naturam admisisset, si il-

lum negare veruisset? Quare ergo hoc Socrates dixit, vir facetus, & cuius per figuras sermo procedere solitus erat, derisor omnium maximè potentum? Maluit ei nasutè negare quàm contumaciter aut superbe. Timuit fortasse ne cogeretur accipere quæ noller. Timuit ne quid indignum Socrati acciperet. Diceret aliquis: Negasset si noller, sed intelligasset in se Regem insolentem, & omnia sua magno æstimari volentem. Vis scire quid verè voluerit? Noluit ire ad voluntariam seruitutem, is cuius libertatem libera ciuitas ferre non potuit.

Quod si de Philosophis ad Apostolos, imò ad ipsam Sophiã Christum, quasi à minimis ad maxima cōscendere velimus, vt eorum videlicet exemplis & auctoritate amplius instruati, dona libentius respuamus, Paulum Doctorem Ecclesiæ maximum ponamus in medium, qui non solum data, sed etiam sibi debita recipere, nō adqueiuit; ne, vt ipse ait, vel gloriam suam minueret, vel occasionem turpis questus exemplo suo alijs relinqueret. Qui enim secundum legis auctoritatem, & Dominicam institutionē de labore prædicationis suæ victum accipere merebatur, sicut ceteri faciebāt Apostoli, hac tamē potestate, sicut ait ipse, vti verebatur, prædictis v. causis, & summo opere cauebat, ne quod offendiculū daret Euāgelio Christi. Prouidebat quippe vir discretissimus, & animo liberali præditus, si seminando spiritalia meteret carnalia, nō tam māducare vt euangelizaret, quàm euāgelizare vt māducaret, nequid * tam ex caritate quàm ex ambitione id facere, nec tam quæ Christi sunt quàm quæ sua quærere. Si ergo ipse ne turpem incur-

* f. nequē

reret suspicionem debita quoque suscipere de tanto lucro animarū erubuit, quanta est impudentia nostra, qui nō deprecatione vel conuersione hominum victū suscipimus, si de adulatione potētū ipsum qualibet arte possumus extorquemus. Qui etiam nonnumquam in tantam prorumpimus ignominiam, vt filacteria nostra dilatantes, & interdum cassas cum reliquijs sanctorum circumferentes venali prædicatione mundo discurremus: & nonnumquam pseudo prædicatoribus conductis, quæ veritate non possumus mendacijs lucratur. Quod si quandoque sub obtentu eleemosynæ aliqua largimur, ad hoc vtique intendimus, vt maiora recipiamus: & quasi modicam escam in hamo ponimus, vt sic magnum piscem extrahamus, nec tam alij quàm nobis beneficia impendimus, nec tam alij quàm nobis caritatem exhibemus, si fortè in talibus vel beneficium, vel caritas dici queat. Seneca quippe maximus morum adificator beneficium, & B. Grego-

rius caritatem non nisi erga alteros haberi asserunt. Ille quidem in suprâ memorato de beneficijs libro sic meminit: Nemo sibi beneficium dat, sed naturæ suæ paret à qua ad caritatem sui compositus est, nec liberalis est qui sibi donat. Beneficium est, quod quidem non sua causa dat, sed eius cui dat. Is autem qui sibi beneficiū dat, sua causa dat: nō est ergo beneficium. Hieronymus, Binos, inquit, in prædicatione discipulos mittit. Quia enim duo sunt præcepta caritatis, Dei v. amor & proximi, & minus quàm inter duos haberi non potest. Nemo enim propriè ad semetipsum habere caritatem dicitur, sed in alterum dilectione se extēdit, vt esse caritas possit. Binos ad prædicandum Dominus discipulos mittit, quatinus hoc nobis tacitus inquat, quia qui caritatem erga alterum nō habet, prædicationis officium suscipere nullatenus debet.

Cum ergo id non pro lucro animarum, sed nummorum geritur, iuxta quod per Hieremiam Dominus conqueritur, dicens: *Sacerdotes mei non dixerunt, ubi est Dominus.* Ac si diceret, sed ubi est nummus? non tam id beneficium quàm lucrum, non tam caritas quàm cupiditas est appellandum. A quo quidem turpi quæstu memoratus Apostolus tam proprio quàm Dominico exēplo nos vehementer dehortans, & impudentiam nostram reprimens, Luca in Actibus Apostolorum referente ait: *Argentū, & aurum, aut vestem nullius concupiui, ipsi scitis, quoniam ea quæ mihi opus erant, & his qui mecum sunt ministrauerunt manus istæ. Omnia ostendi vobis, quoniam sic laborantes oportet suscipere infirmos, ac meminisse verbi Domini Iesu, quoniam ipse dixit: Beatius est magis dare quàm accipere.* In quantum autem ad dandum magis quàm ad accipiendū Christus manum extensam haberet, ipse patēter insinuat, cum diuiti de perfectione iustitiæ consulenti respondit: *Si vis perfectus esse, vade, vnde omnia quæ habes, & da pauperibus, & veni, & sequere me.* Nō vtique ait, veni, & affer quæ habes ad nos, sed alijs priº ergo tua, & sic post modū suscipe nostra. Nos verò ecōtrario quēlibet ad cōuersionē veniētem, non tam lucrū animæ quàm pecuniæ quærentes, vt quæ habet afferat exhortamur, nec tam ei nostra largimur quàm vēdimus. In quo ei profectò nō mediocrem tentationis occasionē damus. Facile quippe de his quæ attulit intumescēs, cū quid ei defuerit indignatur & murmurat, & se miserū ac proditū clamat, cū se his coequari viderit, qui minus, aut omninò nihil attulerint. Has igitur omnes occasiones Christº amputās, nudū magis quàm suffarcinatū decrevit assumere. Qui enim discipulis præceperat, *Gratis accepistis, gratis date*, hoc in se ipso primū voluit exhibere non tam

verbo suo quàm exemplo nos ad hoc cupiēs incitare. Qui enim proter Deū relinquit propria, impudēter exigit aliena. Ac longē melius vel honestius esset ei sua retinuisse, vt haberet de proprio fructum eleemosynæ, quàm ad aliena mendicantem famæ suæ detrimentum incurrere, & non mediocriter religionis propositæ dignitatem lædere. Qui dum marsupia hauriunt aliena, ea proculdubio congregant, quæ religioni maximè sint contraria, & iuxta Dominicam parabolam spinas plantant messem Domini suffocaturas. Quid enim tam congruum religioni, quàm frugalitas, j. voluntaria paupertas? Quid tam noxium quàm abundantia rerum? Vnde & Philosophi Gentium nequaquam virtutes cum diuitijs retineri censuerunt. Quorum vnus, vt ceteros omittam, ille fuit, quem de contempu mundi nobis exemplum prædicto contra Iouinianum libro Hieronymus proponens, ait: Crates ille Thebanus proiecto in mare non paruo auri pondere, Abite, inquit, pessum malæ cupiditates. Ego vos mergam ne ipse mergar à vobis. Item ad Paulinum Presbyterum: Socrates ille Thebanus homo quondam ditissimus, cū ad Philosophiam Athenas pergeret, magnum auri pondus abiecit; nec putauit se posse & virtutes simul & diuitias possidere. Nos suffarcinati auro Christum sequimur pauperem, & sub prætextu eleemosynæ pristinis opibus incubantes, quomodo possumus aliena fideliter distribuere, qui nostra timidi reseruamus? Idem ad Pammachium de morte Paulinæ: Non est profecto & consummato viro opes contemnere, pecuniam dissipare, & proijcere quod in momento & perdi & inueniri potest. Fecit hoc Socrates Thebanus, fecit Antisthenes, fecerunt plurimi, quos viciosissimos legimus. Plus debet Christi discipul⁹ præstare, quàm mundi Philosophus. Christus sanctificatio est. Christus redemptio, idem redemptor & præcium. Christus omnia, vt qui omnia propter Christum dimiserit, vnū iuueniat pro omnibus, vt possit liberè proclamare, *Pars mea Dominus*. Sunt & qui de Monasterijs ad seculum prodeuntes, intantum sibi religionis nomen vendicant, & mirabiles videri appetunt, vt miraculorum quoque gratiam se habere simulent, atque id de se prædicari glorientur. Quales nonnullos temporibus nostris vidimus, qui frequentiam hominum quàm maximè fugere debuerant, hac potissimum arte conuocabant. Denique & in tantum hac simulatione gratiam potentum vel fauorem Ecclesiasticarum potestatum venantur, vt relicto proposito Mōnachi secularibus Cle-

ricis præficiantur Episcopi. Quod quidem cum ad religionem non adducant, in secularitatem eorum facile declinant, & ex eorum misera conuersatione, & religiosorum fratrum separatione notum illud Psalmistæ prouerbiū vel non attendunt, vel contemnunt, *Cum sancto sanctus eris, & cum peruerso peruerteris.* De quā quidem eorum sublimatione, ad quam non tam ab alijs tracti, quā à se ipsis sunt intrusi, illud non incongruè accipitur, quod ad Deum dicitur: *Deiecisti eos dum alleuarentur.* Certum quippe est spiritales viros de Monasterij quiete ad Pontificalem administrationem compulsos, ab illa quam habuerant virtutum gratia per tot occupationem curarum esse diminutos, sicut de semetipso s. proficitur Martinus, & B. Gregorius deplorat.

Si ergo viri tanti hoc sine detrimento pristinarum virtutum ad Martham transire de Maria non potuerunt; quid de his quos diximus restat æstimandum? Steriles, inquiunt, sunt Monachi, & spiritualium filiorum beatorum fecunditas. Sed nunquid nuptiæ præferendæ sunt continentiæ, aut habentes filios coniugatæ sunt virginibus anteferendæ? Numquid lippæ fecunditas Lix pulchritudine Rachel infœcundæ gratior extitit Patriarchæ? Denique ista fecunditati sororis inuidens, cum in hac quoque resumum desiderium suum impleisset ipso suo partu extincta est, & quæ infœcunda vixerat incolumis, de fecunditate sua mortem incurrit. Tales profectò isti sunt, qui ad Episcopatum anhelantes, cum de Monasterijs reuocantur ad seculum, & quasi de sterilibus fecundi, ut dictum est, fieri gloriātur, ex hac ipsa gloria dignitatis periculum incurrunt religionis. Quod diligenter Sponsa in Canticis attendens, spōso ad eius ostium pulsanti, ut sibi aperiatur postulanti, ne ipsum hoc consentiat, talibus se respōsis excusat: *Expoliaui me tunica mea, quomodo induar illa? Lani pedes meos, quomodo inquinabo illos?* Quid enim sponsa in lectulo quiescēs intelligitur, nisi fidelis anima, quæ relicta seculi tumultuosa vita tranquillitatem solitariæ tantò amplius diligit, quantò in ea liberius Deo deseruit? Quam cum fidelis populus ad regimen sui requirit, ut .v. ipsa Ecclesiasticis implicetur negotijs, quasi ad ostium Cellæ ipsius Christus pulsat in membris suis, & ut sibi aperiatur postulat; hoc est, ut fideles ad se admittat potius quā excludat, eisque præesse sustineat, & multorum salutem suæ perfectioni præponat. At illa seculi tentationes præcauens, vel meritorum suorum diminutionem non ferens, deuotioni pulsantium tale in excusationem sui affert responsum,

Exui me tunica mea, hoc est exteriorem seculi curam ex voto reliqui. Tunica quippe, quæ camisiæ vel pelliciæ superponitur, exterior est administratio secularium rerum. Laui pedes meos, hoc est affectus ab inquinamentis secularium tentationum mundaui, & ab illecebris mundanarum curarum purgaui. Pedibus quippe ducimur, & affectu nostro ad effectum operis trahimur, ideoque per pedes affectus exprimuntur. De lectulo ad terram pedes deponere timet ne inquinentur, quia nunquam veram munditiam reputat extra secretum suæ quietis. Vnde & Apostolorum quoque pedes Dominus abluens patenter innuit, nequaquam sine aliquo contagio pulueris perfectos etiam viros mundum perambulare posse. Hoc est, nequaquam diu inter tentationes atque illecebras seculi conuersari, vt non inde aliqua macula nostræ infirmitatis effectus respergantur, etsi non vsque ad opera tentatio pertrahat.

PROLIXA, fratres, imò superflua digressionem sermonem nostrum fortasse videor protendisse, & ab exordio nostri propositi longius recessisse. Laudare Ioannem incœperam, sicut hodiernæ sollemnitatis dignitas exigebat, & nunc inde ad vituperationem nostram stilum conuerti, quasi eorum vitium incurrens, qui Tulliana reprehensione digni laudare aliquos nesciunt, nisi alios redarguant; nec vtillos extollere, nisi alios deprimant. Sed quia sermo noster hodiernus non tam ad Ioannis laudem quàm ad nostram intenditur ædificationem: (non enim quæ scribuntur ad vtilitatem præcedentium hominum, sed subsequentium ædificationem fiunt) ita vitam Ioannis tanquàm Principis nostri commendare cœpimus, vt ad imitationem eius nos maximè prouocaremus. Quod quidem nequaquam diligenter fieri decreuimus, nisi prius exposita perfectione ipsius, quid nostræ quoque imperfectioni desit ex comparatione illius annotaremus, & cum profectu eius defectum etiam nostrum præ oculis poneremus, & eorum quæ in ipso laudauimus, contraria in nobis reprehenderemus. Ecce enim à solitudine Monachi vocamur, id est solitarij. Etsi enim monos, vnus interpretatur, non tamen Monachus ita vnus personaliter dicitur, sicut etiam quilibet de plebe, sed ex solitaria vitæ conuersatione. Vnde & August. in Psal. cxxxii. Ex voce huius Psalmi appellati sunt & Monachi. Quare ergo & nō appellamus Monachos, cum dicat Psal. *Ecce quàm bonum & quàm iocundum habitare fratres in vnum*. Monos enim vnus dicitur, & non vnus quocumque modo. Nam &

vnus in turba est, sed cum multis vnus dici monos non potest, id est solus. Qui ergo sic viuunt in vnum, vt vnum hominem faciant, *vt sit illis*, verè, quomodo scriptum est, *vna anima, & vnū cor*, rectè dicitur monos, id est vnus solus. Hinc & Hieronym. ad Heliodor. Monachum. Interpretare vocabulum Monachi, hoc est nomen tuum. Quid facis in turba, qui solus es? Et post aliqua: O heremus familiaris Deo gaudens! Quid agis frater in seculo, qui maior es mundo? quamdiu te rectorum vmbra premunt, quamdiu te famosarum vrbium carcer includit? Et ad Paulinum Presbyterum. Quia igitur, frater, me interrogas per quam viam incedere debeas, reuelata tecum facie loquar. Si officium vis exercere Presbyterij, si Episcopatus te vel opus vel onus fortè delectat, viue & vrbibus & castellis, & aliorum salutem fac lucrum animæ tuæ: sin autem cupis esse quod diceris Monachus, id est solus, quid facis in vrbibus, quæ vtique non sunt solorum habitacula, sed multorum? Et ad Rusticum Monachum: Filij Ionadab, qui vinum & siceram non bibebant in tentorijs, & quòd nox compulerat sedes habebant, scribuntur in Psalmo, quòd primi captiuitatem sustinuerint, quia exercitu Chaldaeorum vastate Iudæam vrbes introire compulsi sunt. Viderint quid alij sentiant. Vnusquisque enim suo sensu ducitur. Mihi oppidum carcer, & solitudo Paradisus est. Quid desideramus vrbium frequentiam, qui de singularitate censemur? Moyses vt præfesset populo Iudæorum, xl. annis eruditur in heremo. Pastor ouium, hominum factus est pastor. Et attende hanc Epistolam Hieronymi ad Monachum scriptam non tam ex nomine Monachi quàm Presbyteri, intitulatam esse. Censuit quippe Doctor discretissimus, eum qui nondum ad solitudinem transierat, Presbyterum magis quàm Monachum esse vocandum.

Quid autem de his dicendum est Monachis, qui non solum vrbes, aut secularium habitacula non fugiunt, sed etiam asciscunt. Quem quidem Ioannes tanto ampliori desiderio est amplexus, quanto in ea prouidit Deo deseruire perfectius. Vnde benè in eius laude meminimus à Domino præmissam esse: *Cui dedi in solitudine domum*. Semel à seculo recessit ad heremum, nulla deinceps pietatis occasione, vel indigentia necessitudine reuocatus ad seculum, donec ab Herode tractus ad carcerem, lilio virginitatis rosam martyrij copulauit. Qui cum tantus videretur, vt Christus credi posset, & summo desiderio ab omnibus requireretur in heremo, multa facile in ciuitatibus posset corrigere,

& secularibus hominibus persuadere, si aliqua ratione sibi congruum iudicaret ad seculum redire. Quis etiam nesciat eo tempore, quo patri succedere in Episcopatu habebat, iam in Israel cæcitate facta, quantum locum in hac dignitate religio eius haberet, quàm conuenientiùs eum quàm Annam & Caipham Pontificari oporteret, si ad humanum iudicium magis, quàm ad diuinam dispensationem respiciamus? Eo tamen tempore, quo Pontificandi maiorem nactus opinionem videtur fuisse, Monachatum Pontificatui præposuit, & lucro aliorum proprium melioris vitæ meritum prætulit. Semel itaque recedens à seculo, immobilis perstitit in heremo, & cum omnes ad eum de Hierosolymis & de Iudæa, vel de regione circa Iordanem causa baptismatis vel ædificationis exirent, ipse ad neminem intrabat, & qui semel vincula ruperat, nodare postmodum nullatenus adquiescebat. Qui quantò ampliùs homines fugiebat, eisque rarior apparebat, tanto carior omnibus maiori desiderio requirebatur. Ad quem & Dominus ipse cum populo exire non dedignatus ab ipso vnà cū eis est baptizatus, sicut & Lucas meminit, dicens: *Factum est, cū baptizaretur omnis populus, & Iesu baptizato, &c.* Ad seruum Dominus, ad Monachum summus Pontifex venit, vt ab eo baptismum susceperet, ab eo testimoniū haberet, sicut & alius Euangelista cōmemorat: *Vidit Ioannes Iesum venientem ad se, & ait: Ecce Agnus Dei, &c.* Nec semel, sed sæpiùs ad eum veniebat Dominus, cū eum ad Dominum numquam venisse legamus. Mittere pro eo Dominus posset, vt ad se baptizandū veniret, aut vt ei Apostolatus officiū sicut cæteris iniungeret, si hoc congruum iudicaret. Sed profectò quem nihil latebat, id nouerat nequaquā proposito tātæ vitæ vt ad seculum reuocaretur conuenire, & sic eum facile vilescere, nec testimonium eius tātā vlteriùs auctoritatem habere. Qui enim partē Mariæ parti prætulerat Marthæ, nequaquā excellentiæ Ioannis congruere censebat, vt eum de quiete Mariæ ad laborē venire compelleret Marthæ. Sciebat & quid ipse sub persona sponsi de sponsa præceperat olim: *Ne suscitetis*, inquit, *neque euigilare faciatis dilectam, donec ipsa velit.* Qui enim, vt suprà meminimus, debitum sibi reliquerat Pontificatum, nequaquam sponte susceperet Apostolatatum. Et qui conuersari non sustinuit in ciuitate, multò minus adquiesceret per mundum discurrere.

MONACHVS, fratres, seu heremita, nomen est religionis. Episcopus autem siue Clericus vocabulum est officij & operis, magis

quàm deuotionis. Vnde Apostolus: *Qui Episcopatum, inquit, desiderat, bonum opus desiderat.* Idem alibi de seipso & cōsimilibus ait: *Sic nōs existimet homo ut ministros Christi, & dispensatores, &c.* Non apud Dominum domus eiusdem gradus sunt sponsa eius in secreto thalami manens, & minister exterioribus intendens, quāuis & de sponsa ipsa nonnullam prouidentiam & curā gerat. Sic & in Ecclesia Dei Clericorum vel Episcoporum occupatio laboriosa nequaquam quieti Monastica contemplationis est cōæquanda: quantum, inquam, ad meriti pertinet quantitatem, non Ecclesiasticam dignitatem. Vnde & plerumq; videmus non solum Clericos, verumetiam Episcopos pro emendatione vitæ ad humilitatem Monachorum descendere, habitu pariter cum vita mutato. Monachos autem ad officia Clericorum ascire non solet Ecclesia præsumere, nisi tantum ad summū sacerdotij gradum: & hoc vt diximus, non sine aliquo religionis detrimento. Quòd cū euenerit, nequaquā is, qui Episcopus factus est, quāuis religionem minuat, habitū tamen religionis non mutat. Ad quam quidem religionem cū filij quoque sacerdotū transeūt, qui de adulterio parentum tantam infamiae labem trahunt, vt nec tonsuram Ecclesiasticam suscipere permittantur, postquam Monachi fuerint, tota illa labes sanctitatis lauacro deletur, vt deinceps per singulos Ecclesiasticorum ordinū gradus vsque ad Episcopalem conscendant altitudinem. Quantum deniq; Monachi Clericis præmineant in meritis, ipsa Ecclesiastica consuetudo testatur, cū videlicet in supplicatione letaniæ dicatur ab omnibus: Omnes sancti Monachi & heremitæ orate pro nobis. A nullis autem dici præsumitur, omnes sancti Clerici, vel Episcopi, seu Canonici, orate pro nobis. Horum quippe nomina seu vita non ita vt illorum sanctitate præminent.

Sic igitur sic est, imò quia sic est, vt videlicet vita Monastica sanctitate præmineat Episcopali administrationi, sicut econuerso ista illi præminet dignitate prælationis, nemo profecto est plus sanctitatem quàm dignitatem appetens, qui hanc derelinquere, vel minuere propter illam velit. Sed fortassis inquires, quia hoc inuiti Monachi onus suscipiunt, constrikti videlicet obedientia prælatorum, & maxime pro lucro aliorum suæ religionis tolerant dispēdium, eligētes magis mediocre meritum cum multis habere commune, quàm magnum habere singulare. Atque vtinam ita sit, vt inuiti s. trahantur, & hac saltem intētionē qua diximus, de Monachis fiant Episcopi pro salute s. aliorum;

sicut econuerso, vt dictum est, de Episcopis nonnunquam Monachi fiunt, qui propriæ student salutis. Sed profectò sicut credibile est eos, qui sponte de diuitijs ad paupertatem trāseunt, causa religionis id facere; ita verisimile iudicatur, si è conuerso fiat, ambitionis causa maximè peragi. Quod quidem qua intentione cœperint, vita sequens indicat; cùm videlicet remissiùs ac molliùs uiuant Episcopi, quàm fecerant Monachi, & delicatiùs se tã in cibis quàm in vestimentis gerant. Quod qui non faciat, neminem videmus, & si quis hoc non fecerit, vt videlicet delicijs affluat, nec eas sentiat, supra hominem eum æstimamus: & forti animo se prædicant esse, qui ea quæ religioni maximè aduersantur, & quæ alij pro religione dimittunt, cum religione possidere confidunt. Nec quicumque tales sunt, à tentatione Dei recedere videntur. Quid enim est aliud tentare Deum, quàm sponte periculo ingerere quod possit vitare? Verbi gratia, Si quis flammis se iniiciat, confidens se indè diuina liberari virtute. A quo tamen periculo sibi cauere potest absque animæ suæ detrimento, id vtique est Deum tentare. Quid autem diuitiæ, vel seculi sunt illecebræ, nisi quædam flammæ vel incentiua vitiorum, quæ desiderijs carnalibus animam æstuarè compellunt?

QUOD si fortè respondeas, te ad hoc onus per obedientiam cogi, vel nec vllatenus te id posse recusare sine dāno animæ tuæ; non facile tibi à quoquam credendum arbitror. Sed cum obedientiæ actionem opponis, illud omnes de te prouerbiū susurrare scias: Satis catus nouit cuius barbam lambit. Et certè cùm quis Episcopus vel Abbas sub nomine obedientiæ Monachum ad Episcopandum inuitat, non vtique diffidit ab impetratione suæ iussionis, etiam quando illum cùm hoc iniungit reluctari videt in verbis, & seipsum tanquam indignū accusare, & nonnunquam qualescumque lacrimas fundere. Ita quippe naturaliter omnibus honoris ambitio insita est, vt cùm quis ad eum peruenit, quo se ante indignum censebat, modis omnibus sibi vēdicare ac defendere contendit, & cùm accusatur vt dignus depositione videatur, quantumcumque potest excusare se nititur, vt honorē susceptū retineat, quē antequā susciperet eo se indignū censebat. Ex quo liquidū est excusationē illā simulatoriā magis quàm verā fuisse, & se amore magis quàm coactionē in hac prælatione præsidere. Notū quippe omnib⁹ prouerbiū est, Quæ sine amore possidētur, sine dolore amittūtur. Sed inquires, illud mihi **B. August.** obijciens: Qui famā suā negligit crudelis est. Adde

etiam hoc plurimā afferre perniciē, si fictis criminibus mali bonos deiciant, & præualeat iniquitas sanctitati. Sed ab hoc quidem periculo, & famæ detrimento, cum qui vi ad Episcopatum tractus est, facile sibi est providere; & quod cū amore non possidet, cum honore dimittere, nec ut sibi tollatur expectare. Si enim de suscepta prælatione debitam prælatis reuerentiam aut subditis curam nolit impendere, & hoc exhibere modo quod reuera inuitus tolleret onus, tam famæ suæ quàm animæ pariter consulere poterit. Quod si de sanctitate sua confidens æstimet se ad hanc administrationē melius quàm ceteros posse sufficere. Et hoc utique superbissimum est, & in illam Helix præsumptionem incidere, quo dicebat. *Domine Prophetas tuos occiderunt, altaria tua suffoderunt, & ego relictus sum solus, & querunt animam meam.* Sed quid, inquit Apostolus, dicit ei diuinum responsum? *Reliqui mihi septem milia virorum, qui non curuauerunt genua ante Baal. Sic ergo & in hoc tempore reliquia secundum electionem gratia facte sunt salua, &c.*

Si ergo Propheta tantus vnum se cæteris præferens, de hoc suæ præsumptionis temerario iudicio à Domino correptus est, quis nostrum nullā Prophetiæ gratiam adeptus se alijs meliorē æstimare audeat, maximè cū id iuxta Regulam B. Benedicti à proposito Monasticæ Religionis sit remotissimū? Vnde illud est in præfata Regula cap. vii. vbi de gradibus humilitatis Monachum instrūēs, ait: Septimus humilitatis gradus est, si omnibus se inferiorem & viliorem non solum sua lingua pronuntiet, sed etiam intimo cordis credat affectu, humilians se, & dicens cum Propheta, *Ego autem sum vermis, &c.* Qualiter autem quislibet de congregatione assumptus inferiorem alijs se æstimare potest, & assentire eo loco se poni, quo melior se dignus sit. Aut quidem perniciosus est, alios se inferiores æstimare, & non audire Apostolum dicentem, *Tu quis es qui iudicas alienum seruum?* Maximè cū & iuxta Bedam quæ dubia sunt in meliorē partē debeamus interpretari. Quod Apostolus quoque attendens, cū præmississet, *Tu quis es, qui iudicas alienum seruū?* suo Domino stat, aut cadit. adjecit, *Stabit autem,* in meliorem .v. partem dubium conuertēs. Quid deniq; periculosius, & in superbiā pronius, quàm alios inferiores se attēdere, etiā si inferiores & impares meritis videātur? Vnde & Phariseus Publicanū respiciens statim intumuit, & ex comparatione minoris magnum se æstimans, quæ habuerat merita perdidit; sic econuerso Phariseus de comparatione illius

tanquam maioris per humilitatē excreuit in meritis. Nihil quippe ad superbiam ita nos trahit, sicut inferiores respicere, & quæ illis bona desunt in illis attendere. Nihil ita proficit ad obtinēdam vel conseruandam humilitatem, quemadmodum eos intueri, qui nos præcedunt in meritis, vt sciamus quid desit nobis, non quid desit alijs. Quod diligenter Apostolus considerans, Philippensibus scribens, ait : *Fratres, ego me nondum arbitror comprehendisse. Vnum autem quæ quidē retro sunt obliuiscens, ad ea vero quæ sunt priora extēdens meipsum, ad destinatū proficor brauium supernæ vocacionis Dei in Christo Iesu. Quicumque ergo perfecti sumus, hoc sentiamus.* Quod ergo Dominus ad reprimēdā superbiam cōsiliū dederat, proponēs nobis Pharisei & Publicani parabolā, ad hoc postmodū Apost. proprio incitauit exēplo, dicens se nōdū arbitrari se cōprehendisse id ad quod tēdit. Hoc est, nōdum se illi^o esse meriti quod desiderat adipisci. Quod quidem vt obtineat, qualiter id possit, diligēter aperit, dicēs se in hoc vno occupari, vt quæ retro sunt obliuiscatur, & ad ea quæ ante sunt extēdat se, hoc est hanc in operib. vel meritis hominum rationem habeat, vt quæ dignitate priora sunt ad exemplum imitationis aspiciat, non quæ posteriora sunt respiciat. Nemo quippe, vt ipse Dominus ait, *mittens manum ad aratram, & respiciens retro, aptus est regno Dei*, quia quisquis ad bona opera festinat, si deteriores respiciat se, & non meliores attendat, regni cælestis aditum sibi claudit, quia de comparatione minorum in suis meritis amplius confidit, sicuti Phariseus ille, qui cū Abraham & superiores in meritis Patres aspicere debuisset, publicanū respexit, quem inferiorem meritis estimauit. Ita fratres, cū quis de cœtu Monachorum ad Episcopatum assumptus se ceteris tanquam inferioribus comparat, quibus se ad hāc administrationē digniorē æstimat, mirādū, valdeq; mirādū est, si de sua electione ceteris reprobatis in elationē nō incidat. Vt enim rhetoricę cōplexionis argumētatione vtar, quam cornutū syllogismū Hieron. vocat, profectō aut meliorem se ceteris, & ad hoc digniorem æstimat, aut non æstimat. Si æstimat, quo magis ab humilitate Monachi recedit, tātō deterius in elationem cadit, & eo ipso quo se meliorem credit, deteriorē efficit. Si non æstimat, se v. ceteris ad hoc esse meliorem, sed vel æqualem alijs vel inferiorem, profectō nonnullum & in hoc periculū occurrit. Si enim æqualē alijs, excidit à supraposito Regulæ Ca. quo præcipitur ad humilitatis custodiam, vt se ceteris inferiorem non solum pronunciet voce, verum etiam teneat in corde. Sin autē deteriore vt oportet se æstimat,

quāta sit praesumptio videat locum occupare melioris, & per ambitionem sacrilegium rapinae committere. Denique cum Apostolus diligenter Episcopum describens, dicat: *Oportet ergo Episcopum irreprehensibilem esse, unius uxoris virum, doctorem, non cupidum, suae domui bene praepositum, filios habentem subditos cum omni castitate. Si quis autem domui suae praesse nescit, quomodo Ecclesiae Dei diligentiam habebit? Oportet autem illum & testimonium habere bonam ab his qui foris sunt, ut non in opprobrium incidat, &c.*

MULTA in descriptione illius, qui Episcopali dignus sit electione, cura diligenti collegit, ex quibus pauca in hunc locum contulimus, sed ea quae sufficere credimus his in excusationem sui praetendere, qui se inuitos ad Episcopatum trahi profitetur. Si enim dixerint his, à quibus trahuntur, se Apostolicam super hoc sententiam velle audire, & qualem eligi oporteat Episcopum ab ipso cognoscere, cum recitata ex integro fuerit ab Apostolo prolata descriptio: nulla ni fallor reperiet, quibus se rationabiliter poterit excusare, quo magis Apostolum, imò spiritum Dei in eo loquentem, quam coactionem hominum sequi debeat. Quid est enim quod statim in ipsa fronte descriptionis praemisit *irreprehensibilem*? Quis de salute sua sollicitus hoc audito statim pedem non retrahat, & non magis illud alterius Apostoli dictum attendat, *in multis enim offendimus omnes*? Quanto etiam diligentius illud est attendendum, quod secundo loco adiecit, *unius uxoris virum*, & post modum rationem supposuit, dicens, *habentem filios subditos cum omni castitate. Si quis autem domui suae, &c.* Consulens quippe probatas in seculo personas de minoribus ad maiora transferri iuxta illud Dominicum, qui fidelis erit in minimo, fidelis erit & in maiore, hoc potissimum praebet consilium, ut qui in matrimonio positi fuerant, & circa domesticam curam bene se gessisse probati sunt, quasi spiritalem uxorem ducant, & Dominicae domus curam suscipiant. Quod & ipse Dominus proprio declaravit exemplo, cum XII. Apostolos congregans, quorum Episcopi locum obtinent, nullos aut paucos nisi coniugatos assumpsit. Et quamvis Ioannem virginem magis quam Petrum copulam nuptiarum expertum, & domui suae diu praepositum dilexerit, non tamen illum sicut istum Principem Apostolorum constituit. Quo ergo quisque de monastico cætu assumptus circa curam uxoris & domesticorum minus probatus est, magis ad Episcopatum accedere trepidet. Qui etiam doctoris officium quanto minus est expertus, iuxta illud Hierony. Monachus non doctoris, sed plangentis officium habet, qui se & mundum lugeat, & Do-

mini pavidus præstoleatur aduentum tãto magis ignorat quid popu-
lũ doceat, qui à populo iam toto tẽpore sequestratus vixit. De-
nique quod ait Apostolus, quia oportet eũ habere bonũ testimo-
nium, & ab his qui foris sunt, attẽdat is qui electus est de subiectione
ad prælationem, de paupertate ad abundantiã translatus, quã
difficile sit eũ bonũ testimonium retinere, vbi de ambitione maior
quã de religione surrepit opinio. Nemo autẽ mihi obijciat quod
in antiquis temporibus multis de Monastica religione ad Episco-
patũ tractis per eos Ecclesia in magnã fidelium messem & virtutũ
copiã excreuit. Scimus & nos ista, nec negamus cognita. Sed edo-
cti de proximo tempora discernimus, & cum præteritis præsentia
confuentes reperimus officiũ Episcopi tantò nunc laudabilius &
salubrius respui, quanto laudabilius & salubrius olim suscipieba-
tur. Tunc honorabile nomẽ Episcopi, & salubre officiũ fuit: cùm
Episcopi non tã honorem quã onus susciperent, nullis adhuc
opibus Ecclesia ditata, sed assiduis tribulationibus afflicta, quan-
do in eam persecutione sæuiente eos primũ aut plurimũ infi-
deles persequerentur, quos in capite nouerant constitutos. Nunc
autẽ Ecclesia corporalem pacem adeptã, sicut in primo de ciuitate
Dei B. meminit August. lōgẽ grauiores expressiones à vitijs intus
sustinemus, quã tũc externis ab hostibus. Nunc enim libertate
pessima crapulæ & ebrietati, & omni luxui vacantes, interfectores
nostrarũ efficimur animarum, sicut illi antea corporũ, & ciuilibus
quibusdã & intestinis bellis perit Ecclesia, sicut olim destructa est
Roma. Tãquã enim ad dignitatẽ Episcopi pertineat ita in diuitijs
abundare, sicut in prælatione perire, nõ aliter se dignẽ censent E-
piscopari, nisi splendidius & accuratius viuant, & obliti cibarium
panem, quo antea vescebãtur, corde in Ægyptum reuertentes de
heremo, ollis carniũ impudẽter incũbant. Qui cùm de Aposto-
lica dignitate gloriẽtur, pauperem eorum vitã & frugalitatẽ bea-
tã omnino refugiunt, quã Dominus ipsis in fundamento consti-
tuens, ait: *Beati pauperes spiritu, quoniam ipsorum est regnum cælorũ.*
Quibus quidem verbis patenter ostendit, non per honorẽ præla-
tionis, sed per onus voluntariæ paupertatis cœlos promereri.

QVANTA sit autẽ impudentia tales Episcopos de Monachis
factos habitũ Monachi retinere, & nõ Monasticẽ viuere, imò suæ
professioni contraria prorsus agere, quis non videat quãta sit im-
pudentia? Quis ignoret de talibus, vt verbis vtar Apostolicis, quia
primã fidem irritam fecerunt, & quã cõtrarij reperiãtur sanctis
Patrib. similiter promotis? Nõ B. Martinus asperitatem cilicij seu

cibi pro praelatione mutauit Episcopali. Quare in hoc officio non
 quæ sua essent, sed quæ Iesu Christi quærebat. Quis denique non
 miretur, quod hoc tempore soliti sunt præsumere, ut v. Romam
 pergentes cum necessitas exegerit aliqua ut ad summum Pontifi-
 cem vadant, ipsum quoque Monasticæ religionis habitum depo-
 nant; quo liberius in viâ sub laicali habitu seculariter viuere audeant,
 & simulatione pessima se id esse quod sunt tam re quàm voce mē-
 tiantur. Qui nec Clericatus signa retinentes comam pariter & bar-
 bam nutriunt, quo facilius intuentes fallant, atque tutius sub ha-
 bitu leccatorum, leccaciter se gerant, ut tam à Monachi quàm Epif-
 copi proposito apostatantes, nec Monachi meritum habeant, nec
 Episcopi reuerentiam seruent. Quos prædictus onager noster tã-
 tò amplius accusat, quantò perfectius sine professione Monasticæ
 Religionis Monachum exhibuit, & Episcopali dignitati austeri-
 tatem huius vitæ præposuit. Cui nec à Domino gratia miraculorū
 est collata, quo magis frequentiam populi declinaret, cum ipse, si-
 cut in Ioanne scriptum est, nullum fecerit signum. Quæ quidem
 gratia quantum quieti & humilitati Monachorum sit noxia, ille
 diligenter attendebat, quem Postumianus de peregrinatione sua
 scribens, in exemplum huius gratiæ non appetendæ, imò summo-
 pere nobis fugiendæ ad medium deduxit. Cuius sanctitas cum in-
 ter cetera in expellendis dæmonibus singularem gratiā esset adepta,
 & de hoc se inquietari, tam hominum frequentia, quàm vana glo-
 ria videret, rogauit Dominum, ut ipsis dæmonibus, quos expelle-
 bat, in seipsum potestatem daret, simulque his fieret v. mēsis, quos
 ab hac oppressione curabat. Quod cum impetrasset à Domino, cor-
 reptus est à dæmone, tentus in vinculis, omnia illa quæ energu-
 meni solent ferre perpeffus. Quinto demū mense purgatus est, non
 tamen dæmone, sed quod illi erat utilius atque optatius vanitate.
 Sed mihi, inquit Postunianus ista replicanti, nostra infelicitas, no-
 stra occurrit infirmitas. Quis enim nostrū est, quem si vnus hom-
 mucus humilis salutauerit, aut fatuus, atq; adulatibus verbis fe-
 mina vna laudauerit, non cōtinuò elatus sit superbia, nō statim in-
 flatus sit vanitate? Aut etiam si non habeat conscientiam sanctita-
 tis, tamen quia vel stultorum adulatione, aut fortassis erroris, san-
 ctus esse dicatur, sanctissimum se putabit? Iam verò si ei munera
 crebra mittantur, Dei se magnificentia asserit honorari, cui dor-
 mienti atq; resoluti, necessaria conferantur. Quod si vel de modi-
 co ei aliqua virtutis signa succederent, Angelum se putaret. Ceterū
 cum neque opere, neque virtute cōspicius sit, si quis clericus fuerit
 effectus,

effectus, dilatat continuo fimbrias suas, gaudet salutationibus, inflatur occursionibus. Ipse etiam ubique discurrit. Et qui ante pedibus aut a fello ire cōsueuerat, spumeo equo superbus inuehitur. Parua prius ac vili cellula contentus habitare, erigit celsa laquearia, cōstruit multa cōelauia, sculpit ostia, pingit armaria, vestē respuit grossiorem, indumentum molle desiderat: atque hęc caris viduis, ac familiaribus mādāt tributa virginibus. Illa vt birrū rigētem, hęc vt fluētem texat lacernam. Verū hęc mordacius describenda B. viro Hieronymo relinquamus.

QV ID ad hęc illi dicturi sunt, quos hoc tēpore in tantū vidim⁹ præsumere, vt de solitudine ad turbas procedētes, sicut de ficto religionis nomine tumebāt, ita & de simulatione miraculorū gratia videri mirabiles appetebāt? Omitto cōtact⁹ & benedictiones aquarū, quas lāguidis in poculū dirigebāt, vt sic curarētur, cōtrectationes vel cōsignationes mēbrorū, vt dolores infirmat⁹ appellerēt, eulogias in panibus fractas, & ad infirmos destinatas. Ad maiora veniā, & summa illa miracula de resuscitādis quoque mortuis inaniter tētata. Quod quidem nup̄t præsumpsisse Nobertum, & coapostolum eius Farsitum mirati sumus, & risimus. Qui diu pariter in oratione coram populo prostrati, & de sua præsumptione frustrati, cū a proposito cōfusi deciderēt, obiurgare populū impudēter cœperunt, quòd deuotioni suæ & cōstātī fidei infidelitas eorū obsisteret. O calliditas incautorū! ō excusatio friuola inexcusabiliū! Aliquos aliquādo in talib. decipere possūt, sed iuxta Veritatis assertionē, nihil occultū quod nō reueletur, & iuxta Hierony. sentētiā, falsus rumor citò opprimitur. Nō ignoramus astutias taliū, qui cū febricitātes à lenib. morbis curare præsūmūt, pluribus aliqua vel in cibo vel in potu tribuūt vt curent, vel benedictiones vel orationē faciunt. Hoc utiq; cogitant, vt si quoquomodo curatio sequatur, sanctitati eorū imputetur. Sin verò minimē infidelitati eorum vel desperationi ascribatur. Tale cōsiliū quidā secularis astutus cuidam pauperculæ sibi notæ fertur dedisse. Cū enim illa, vt dicitur, ad paupertatem nimiam deuenisset, & à pradiāo viro eleemosynam postularet, miratus ille quòd eam mendicantem videret, quam antea nouerat abundantem, dedit ei tandem consilium, vt se medicari scire simularet, & herbas quascumque colligeret, & ægrotantib. indē curationem præpararet, & hac arte sibi victum quæreretur. Addebat enim, dicens, quòd si alicui pro medicamine aliquid daret, & sanitas quacūq; de causa indē aliquo curato sequeretur, ille sanatus hanc curationem eius me-

dicinæ deputans, multos exemplo sui ad medicamenta illius inuitaret. & sic in breui magnum sibi nomen medicinæ acquireret. Quæ cum in aliquibus medicamentis suis efficaciam nō haberet, morbo id imputaretur, quod incurabilis esset, & contra mortē nihil medicamēti vires posse. Quid plura? fallaci homini ut multos falleret adqueiuit illa, & magna tandē in opinione hominū de virtute medicamenti habita est. Sic isti de miraculis præsumentes, sicut illa de medicaminibus, quodā simulationis pallio se ornātes, multarū febriūcularū curationē præsumunt, ut cū in aliquibus quocūque casu sanitas consequatur, hoc eis imputari possit. Cū verò in aliquib⁹ defecerint, infirmæ fidei hominū adscribatur, qui digni non fuerant ut hæc beneficia susciperent aut etiam viderēt.

NONNVLII quoque de nomine Religionis gloriantes, cū gratiā miraculorū assequi nō valēt, ut hinc maximè religio ipsorū cōprobetur, hoc ad cōsolationē suam afferre solēt, nō iā hoc tempore, sed fides corroborata est, miracula sic esse necessaria quomodo quodā in primitiua Ecclesia. Ad quod etiā testimoniū de Apostolo inducentes, dicūt: Linguæ in signum sunt non fidelib⁹, sed infidelibus, prophetiæ autem non infidelibus, sed fidelibus. Sicut ergo cuilibet genera linguarū collata subito pro signo habentur apud infideles, & cum admiratione magna ab eis quasi magnū quid suscipiuntur, ut his tanquam miraculis ad fidem moueātur: ita & quæcumque miracula infidelib⁹ potius quàm fidelibus necessaria dicūt. Ideòq; hoc tempore his, qui inter fideles cōuersantur, hāc signorum gratiā nō esse necessariam, qua illi fideles efficiātur qui iā fideles sunt. Sed profectò cū fides sine operibus mortua sit, & seruus sciens, & non faciens voluntatē Domini sui multis vapulet plagis, nō minus propter opera quàm propter fidē conferēda, hoc etiam tempore necessaria videntur miracula. Sed nec adhuc infidelium tā hereticorum quàm Iudæorum siue Gentiliū nobis copia deest. Ad quorum conuersionem faciendam, vel oppugnationem reprimendam non minus miracula nunc quoque sicut olim necessaria videntur. Sed quia non sunt qui hāc promeruerint gratiam, nec tā ad salutem aliorum, quàm ad ostētationē sui quisque eam desiderat, iamque omnino fides illa periit, de qua Saluator ait: *Si habueritis fidem sicut granum si naps, dicetis huic mōti ut se transferat, & transferet*, cessantur penitus illa miraculorum beneficia, quæ prædictus onager, quāuis his indignus non esset, respuit, & qui digni non sunt appetunt, & impudenter simulant. Qui denique clamorē exactoris non audiens, & in montanis virentia quæ-

que perquirēs, quāto hęc ampliūs ad glōriā suā peregit, tantō hęc magis ad ignominiam nostrā conuertit. Quis enim tā insatiabilis vel importunus exactor, quā modo venter Monachorū vel potius Epicureorum porcorum, de quibus quidem illud Horatianū,

Me quoque iam nitidum, bene curata cute, vises,

Cūm ridere voles Epicuri de grege porcum.

Quilibet in seculo macilenti, cūm ad viuaria Monasticorū claustrorum peruenerūt, ita in breui dilatati ac imbringuati fiunt, vt si post modicū tēpus eos visites, vix agnoscere eas. Inter mille laicos, si paucos adhibeas Monachos, plures in eis pingues, plures nitidos, plures ex nimio calore inebriatos, sæpius capitis caluos reperies.

IN VI. FERIA POST OCTAVAS NATIVIT. * DOM.

SERMO XXXII.

* leg. vide-
tur, Ascen-
sionis, vt ex
ipsius Sermo-
nis lectione
pates

Res sollemnitates in lege sanctas nouimus, Paschæ v. Pētecostes, atq; tabernaculorū, de quibus in Exodo scriptum est: *Tribus vicibus per singulos annos mihi festa celebrabitis, sollemnitatem aſimorū, tempore mēſis nouorū, sollemnitatē quoque in exitu anni, quādo congregaueris omnes fruges tuas de agro. Ter in anno apparebit omne masculinū tuū corā Domino Deo. Hinc & in Deuteron. scriptū legimus: Obseruamenſem nouarum frugū, & verni primū tēporis, vt facias phase Domino, & celebrabis diē festum hebdomadarū Domino: sollēnitatē quoq; tabernaculorū celebrabis per septē dies, quādo collegeris de area & torculari fruges tuas. Has tres sollēnitates illos dies intelligim⁹, de quib. in primo Regū de Helchana dicitur: Et aſcēdebat vir ille de ciuitate ſua ſtatutis diebus, vt adoraret & ſacrificaret Domino in Sylo. Ex his autē trib. sollēnitatib. sub nominibus priſtinis, quāuis in diuerſa ſignificatione, apud nos quoque duę permanēt. Iudei quippe Paſcha in immolatione agni figuratiui agebāt, nos in reſurrectione veri agni Paſcha celebramus. Illi à diē Paſchæ in Ægypto celebrati, primo diē lege ſuſcepta, sollēnitatem Pentecoſt. in veneratione legis ſuſceptæ ſecūdā habuerunt. Nos verò in aduentu Spiritus ſancti, quo tāquā digito Dei lex ſcripta eſt, & tā legis intelligētia quā verborū Chriſti per eūdem ſpiritū Apoſtoliſ mihiſtrata Pentecoſten recolimus. Fetiuitatē autē tabernaculorū, quā his ſolis, qui de genere Iſrael ſūt præceptā legis, Eccleſia Gentiū nō ſuſcepit. Quā quidē Dominus inſtituens, & Iſraelitico populo celebrādā cōmendās, in Leuit. ait: *Omniſ qui de genere Iſrael eſt, manebit in tabernaculis, vt diſcāt poſteri veſtri quod in**

tabernaculis habitare fecerim filios Israel. Nulla autem occasio se nobis offert, qua festiuitatem tabernaculorū Ecclesia Gētiū retineret, præsertim cū tabernacula peregrinantiū sint, nō in domib. suis cōmoratiū. Quæ est autem domus vel patria nostra nisi cælestis illa, de qua dicit Apostolus: *Si dissoluatur domus ista terrestris, habemus in celis domum non manufactam.* Prior itaque populus ille aduentum Domini præcedens, cui nondum cæli ianua patebat, tanquam in peregrinatione, non in patria fuit. Subsecuta verò Gentium Ecclesia, quæ post passionem Domini iam à regno non differitur, & ad cælū quotidie migrat, patriæ magis quàm peregrinationis sollemnitates celebrat, cū futuræ vitæ gaudia in natalitijs Sanctorum frequentat: nec tam quòd terris nati sunt, quàm quòd cælo nascuntur, nostra iam deuotio curat. Domus itaque mansionem magis quàm exilij peregrinationem celebrare nos conuenit, quibus cælestis iam patet felicitas in præmii constituta: cū terrena tantū prosperitas in remuneratione legis antiquo populo fuerit à Domino promissa.

PRÆTERMISSA itaque Tabernaculorum festiuitate, ad suprapositas duas reuertentes, Pasche v. atq; Pentecostes, diligenter eas inter se cōferam⁹, vt hāc illa tam in veteri quàm in nouo Testamēto nō inferiorē esse probemus, imò præ cæteris quādā obtinere prærogatiuā mōstremus. Legim⁹ Dominū Moyse præcepisse, vt populū sanctificaret, eūque vestimentis suis ablutis ab vxorib. abstinentem, sic ad legem præpararet in tertio die suscipiendā. Nullā autē aliā festiuitatem ita lex cōmendat, vt talem ei sanctificationis præparationem instituat, præsertim cū Apostolo attestāte inter vniuersa Dei dona Iudæis antiquitus collata illud primū sit, hoc est maximū, quia credita sunt illi eloquia Dei, hoc est veteris Testamenti doctrina illis, non cæteris nationum populis data. Sed nec ille dies, qui propriè Pascha vocabatur, agnum vel hœdū immolās ad vespērū septem sequentes dies, qui azimorum dicebantur, aliquid festiue celebrationis ex præcepto Domini habuit, sed in ea tantū immolati agni ad vespērū iussa est fieri. Nostra quoque sollemnitas Pentecostes quid utilitatis vel dignitatis præ cæteris adepta sit, multis clarum est indicij. Lex hodie in mōte Sinai vni populo, & in vna lingua tradita, obscuritatis caligine fuit inuoluta, & tā fumo potius quàm luce referta, sicut & patēter præfigurabatur cū ipsa traderetur. Spirit⁹ verò super Apost. hodie descēdēs tā legis quàm ceterorū diuinorū verborū intelligētiā attulit, & omnia genera linguarū, quib. hæc vbiq; prædicarētur discipulis cōtulit, &

notū prius in Iudæa Deum vniuerso mūdo declarauit, & ipsum ei adquisiuit. Die Paschæ Dominū in corpore resurrexisse nouim⁹. Hac verò die id actū est per S. Spiritus aduētū, per quod vniuersus mūdus felicius in anima resuscitaretur. Die Resurrectionis siue Ascensionis fides & spes discipulorū cōfirmata est. Hac verò die caritas per Spiritum, qui amor Dei dicitur, infusa, discipulos cōsummauit, iuxta illud Apostoli: *Caritas Dei diffusa est in cordib. nostris per Spiritū S. qui datus est nobis.* Diffusa, inquit, potius quàm infusa; hoc est dilatata in plenitudine donorū, non stillata. Legimus & Dominū die resurrectionis Spiritū Apostolis insufflādo dedisse, atq; dixisse: *Accipite Spiritum S. quorum remiseritis peccata, &c.* Et tūc quidē Spiritus Apostolis est infusus, nō in eis diffusus: hoc est, ad vnū potestatis donū eis collatus, nō ad omnia charismata dilatatus. Quod utiq; dōnū in subiectos potius redundaret, quàm in ipsis fructificaret. Hac verò die, qua intelligentia sunt illuminati, & igne caritatis accensi, in omni bonorum perfectione sunt consummati. Ad hanc eos cōsummationē tam Resurrectio Domini quàm Ascensio præparauit: sicut populus Dei legem suscepturus biduo ad hanc susceptionem est præparatus Domino per Moysen dicente: *Estote parati in diem tertium, &c.* Hinc de resurrectione pariter & ascensione scriptū est: *Nondum enim erat Spiritus datus, quia Iesus nondū fuerat glorificatus.* Et rursum: *Expedi vobis vt ego vadam. Nisi enim abiero Paraclitus non veniet.* Vt ergo Spiritus S. veniret, tam resurrectionis quàm ascensionis gloria Christus fuerat exaltandus; vt sic discipuli tam fide quàm spe futuræ beatitudinis roborati promissum Spiritum accipere mererentur, vt per eum, qui amor dicitur cōsummatētur in caritate. Caritatem, quippe, quæ post fidem & spem perfectū efficit, & sola filios Dei à filiis diaboli discernit; hæc dies Apostolis contulit, sicut scriptum est, *Caritas Dei diffusa est, &c.*

Hæc ergo festiuitas caritatis tantò cæteris excellentior videtur, quātò caritas ceteris virtutibus siue donis Dei præminere noscitur. Et quia minus est ad hominis perfectionē Deū amare, nisi & alios in amorem eius nostra prædicatio sciat accēdere, vt quod facimus alios doceamus iuxta illud Veritatis præconium: *Qui autē fecerit & docuerit sic homines, hic magnus vocabitur in regno celorum,* caritati discipulorū doctrina est addita, vt in vtroque ipsos præsens consummaret dies. Vnde & benè in igneis linguis super eos apparētibus S. Spiritus reuelatus est aduētus, vt v. ignis & linguarum specie manifestū signū amoris & doctrinæ; vt per

amorem sibi, per doctrinā proficerent alijs. Lex data in mōte Si-
 nay, timorē incutiens in seruitute genuit. Spiritus verò in supe-
 rioribus coenaculi datus, de quo Apost. ait, *Vbi Spiritus Domini, ibi*
libertas, seruos in filios conuertit, sicut idē Apost. ad Rom. scribit:
Non enim accepistis spiritum seruitutis iterū in timore, sed accepistis spi-
ritum adoptionis, in quo clamamus, Abba pater. Et ad Galathas, *Quo-*
niam, inquit, estis filij, misit Deus spiritum filij sui in corda vestra clamā-
sem, Abba pater. Itaque iam non est seruus, sed filius. Quod si filius,
et heres per Deum. Iste est spiritus, ex quo in baptismo regenerati,
 & ab Episcopo confirmati, nitimur in Christo Christiani effecti.
 Ipse est spiritus, cuius donis in omni perfectione virtutum con-
 summantur electi. Eius præsens solemnitas ceterarum omnium
 consummatio est, & diuinarum perfectio promissionum. Vnde
 & Veritas Apostolis ait: *Mitto promissum Patris mei in vos. Vos au-*
rē sedete in ciuitate, donec induamini virtute ex alto. De hoc spiritali
 virtutis dono Psalmista præcinit, *Et spiritu oris eius omnis virtus eo-*
rum. Et rursus: *Dominus dabit verbū Euangelizantibus virtute mul-*
ta. Vera quippe caritas, quæ omnia suffert, omnia sustinet, & cu-
 ius flamma nullis persecutionum fluctibus extinguī potest, iuxta
 illud Cantici Cantic. *Fortis est ut mors dilectio, dura sicut inferus*
amulatio. Aquæ multe non poterunt extinguere, nec flumina obruent il-
lā. Omnis discipulorū virtus facta est, cū eos Spiritus S. amore
 tanto scientiāque repleuerit, ut non solūm prudētes, verum etiā
 iustos, nec non & fortes seu tēperantes effectos in virtutib. qua-
 tuor consummaret. Quas quidē virtutes omnes in caritate com-
 prehēdi beatus asserit Aug. ut ipsa v. caritas sit sapientia vera di-
 cenda, ipsa etiam sit iustitia, ipsa fortitudo pariter in aduersis, ac
 temperantia in prosperis vocetur secundum diuersa quæ in no-
 bis operatur. Vnde benè dictum ostenditur caritas per illum dif-
 fusa in illis, quia *spiritu oris eius omnis virtus eorum.*

TANTO ergo hæc sollēnitas ceteris præminet, quanto maioris
 gratiæ plenitudo donis omniū virtutū discipulos cōsummauit,
 quibus eos quasi quibusdā armis induit; ut his præmuniti vniuer-
 sum debellare mundū, & adquirere Deo sufficerēt. Quod quidē
 indumentū Christus eis promittens ait, *Donec induamini virtute*
ex alto. Tanquā si diceret, donec inermes armaturam, & imbecil-
 les accipiat fortitudinem. Vnde & cū baptizati à Presbyteris
 confirmātur postmodum ab Episcopis, & per impositionē ma-
 nus traditur eis Spiritus S. hæc ipsa eorum confirmatio quædam
 est virtutum armatura spiritalis ad resistendum vitij, vel perse-

uerandum in illa quā in baptismo perceperunt munditia plena
 ibi remissione peccatum percepta. Legimus & de caritate, quæ
 vestis illa nuptialis dicitur, quia operit multitudinem peccato-
 rum, & quia discipulis à Domino dictum est, *Vos autem bapti-
 zabimini Spiritu sancto non post multos hos dies.* Vnde patēter intel-
 ligi datur, quia spiritus adueniens discipulos simul & à peccatis
 mundauit, & ornamētis virtutū eos tanquā antea nudos induit,
 tanquā simul baptizarentur & cōfirmarētur omniū plenitudine
 bonorū, tunc percepta, vt iam nulla gratia *, quæ ad illorū perti-
 neat salutē, aut etiam ad aliorū vtilitatē. Ipsi quippe non solum
 sapientiā, vel virtutē præditi, verum etiā omnium genera lingua-
 rum adepti totum simul quod vel sibi vel alijs necessarium esset.
 De hoc ornatu tantū in Libro Iob scriptum est de Domino, quia
spiritus eius ornavit celos, hoc est eos qui tãquā terreni, & per me-
 rita erant infimi, superiores iam per tot dona factos in spirituales
 cōuertit cœlos. His ergo gratijs ornati, & virtutibus armati dis-
 cipuli, securi quasi bellatores intrepidi per vniuersum dirigūtur
 mundū, etiā multis aduersitatibus probari permittuntur, quos
 antea Dominus suprā id quod possent nequaquā tentari permi-
 serat. Vnde & ipse ad passionē captus neminē corū secum capi
 voluit, dicens: *Si me queritis finite hos abire, ut impleretur sermo quem
 dixit, quia quos dedisti mihi non perdidisti ex ipsis quemquā.* Vt enim B.
 meminit Aug. nondū sic in eum credebant, quomodo credunt
 quicumq; non perituri. Petrus si negato Christo hinc iret, quid
 aliud quàm periret? Cū igitur Apostoli ante aduentū Spiritus
 sancti tanquā imbecilles & inermes existerent, nō eos Dominus
 ad fortia bella destinauit, ne in aduersitatibus deficerent victi,
 qui statim ad eius captionē in fugā sunt cōuersi, & ipse princeps
 eorum tam nomine quàm firmior fide, tam leuiter cum nec se-
 mel negauerit. Die autem Pentecostes in omnibus, vt dictum
 est, bonis consummati, in omnibus fuerant postmodum virtu-
 tibus probandi, vt Ecclesiam sibi commissam non solū erudirēt
 verbis, verum etiā confirmarent exēplis ne deficerēt in aduersis.

Cum itaq; die Pentecostes tanta bonorū perfectione sint A-
 postoli cōsummati, nequaquā hæc festiuitas apud nos, sicut nec
 apud Iudæos septē dies sequentes in celebrationē habet, vt vsq;
 ad octauā diem ipsa protendatur. Quid enim perfectioni potest
 superaddi? Præparare se quisque ad perfectionē potest, sed cū
 illuc peruenerit, quid requirat non super est. A Pascha vsque ad
 Pentecostē festiua quædam iocunditas per l. dies continuatur,

* Locum con-
 ruptum.


ob reuerentiam s. ac dignitatē sequētis Pentecostes. His quippe diebus austeritas pœnitentiæ relaxatur , nec in oratione genua flectimus, vt in eo ampliùs ob tēpus nos excitet in amorē Dei, & præparet deuotiores ad venturam festiuitatem Spiritus, qui specialiter amor Dei dicitur, quo minus ipsum pœnale est ob gratiā vt diximus festiuitatis prædictæ in omnibus spiritualibus gratijs consummare. Benè autē duodecima mansione populus Israel egressus de Ægypto legē in die quinquagesimo suscepit, vt hoc v. numero māsionū ipse numerus signaretur Apostolorū, quibus per Spiritum S. l. die dandū, & legē amoris potius quàm timorīs imprimendā cordibus eorum promiserat, dicens: *Rogabo Patrem meū, & alium Paracletū dabit vobis, vt maneat vobiscum in æternum.* Et rursus, *Apud vos, inquit, manebit, & in vobis erit.* Illa utique mansio xii. Iudæorū, qua lex datur, spiritū præsignabat veriā Apostolis legē crediturū, & in eis non transitum, sed mansionem facturum. Populus ille ad legē illam imperfectam tertio die suscipiendam duobus se præparauit diebus. Nos ad supremum Spiritus S. aduentū, qui legis perfectionē Apostolis attulit, his saltē duobus præparemus diebus, vt tātæ gratiæ participes mereamur esse. Post ascensionē Apostoli à mōte Oliueti Hierosoly. reuerſi, cū in Cœnaculū ascendissent, orationibus & ieiunijs promissū S. Spiritus aduētū meruerunt. De quibus profectō ieiunijs post ascensionē suā futuris Dominus ipse prædixerat: *Venient dies, cū auferetur ab eis sponsus, & tunc ieiunabunt.* Hos itaque dies ieiuniorū, istos dies sequentes post octauas Ascensionis, & præcedentes diem Pentecostes, non incongruè accepimus. Cū enim festiuitas Ascensionis habeat octauas, totum illud tempus octo dierum Ascensionis est dicendum; quia sponsus in cœlos ascendens obtutibus Apostolorum per præsentiam carnis subtractus dicitur vel ablatus. Vnde nunc duo præſentes dies secundum Dominicam sententiam ieiunijs deputandi videntur. Quæ profectō ieiunia non pœnitentiæ sunt vt à peccatis purgemur, sed vt desiderijs accensi ad sequendum sponſum, tanto ampliùs S. Spiritus mereamur descensum, quanto ardentius ad illum, sequendo Christum, anhelamus ascensum. Vnde & ipse ait, *Nisi ego abiero, Paracletus non veniet.* Quod est dicere, Nisi ego à vobis recessero superius ascendendo, nequaquam illis vos desiderijs accendam, quibus aduenientis Spiritus promereamini gratiam. Hanc ipse Spiritus gratiam nos ita faciat præuenire, vt ipsum ab eo mereamur percipere, Amen.

MAGISTRI
PETRI ABAELARDI,
NANNETENSIS,

INTRODVCTIO AD THEOLOGIAM,
DIVISA IN III. LIBROS.

*Ex Bibliotheca Canoniorum Regularium S. Victoris Paris.
Ordinis S. Augustini.*





M A G I S T R I
 PETRI ABAELARDI,
 NANNETENSIS,
 INTRODVCTIO AD THEOLOGIAM,
 DIVISA IN III. LIBROS.

P R O L O G V S.



SCHOLARIVM nostrorum petitioni, prout possumus, satisficientes, aliquam sacrae eruditionis Summam, quasi diuinæ Scripturæ Introductionem conscripsimus. Cùm enim à nobis plurima de Philosophicis studijs & secularium litterarum scriptis studiosè legissent, & eis admodum lecta placuissent; visum illis est, vt multo faciliùs diuinæ paginæ intelligentiam, siue sacrae fidei rationes nostrum penetraret ingenium, quàm Philosophicæ abyssi puteos, vt aiunt, exhausisset. Addebant etiam nec me aliter Philosophiæ cursum consummare, nec ad eius peruenire metam, aut aliquem ex ea me fructum colligere; nisi eius studium ad Deum, ad quem omnia referri conuenit, terminarem. Ad hoc quippe fidelibus secularium artium scripta & libros gentilium legere permissum est; vt per eas locutionum & eloquentiæ generibus, atque argumentationum modis, aut naturis rerum præcognitis, quicquid ad intelli-

gentiam vel decorem sacræ Scripturæ, siue ad defendendam vel alstruendam veritatem eius pertinet, assequi valeamus. Quo enim fides nostra, id est Christiana, inquit, difficilioribus implicita quæstionibus videtur, & ab humana ratione longius absistere; validioribus utique munienda est rationum præsidij: maximè verò contra impugnationes eorum, qui se Philosophos profitentur. Quorum quantò subtilior videtur inquisitio, tantò difficilior ad soluendum, & ad perturbandam fidei nostræ simplicitatem faciliior inuenitur. Ad has itaque dissoluendas controuersias cùm me sufficere arbitrantur, quem quasi ab ipsis cunabulis in Philosophiæ studijs, ac præcipuè Dialecticæ, quæ omnium magistra rationum videtur, conuersatum sciant, atque experimentò, ut aiunt, didicerint; vnanimiter postulant ne talentum mihi à Domino commissum multiplicare differam, quod cum vsuris utique districtus ille & horrendus Iudex quando exigat ignoratur. Addunt etiam nostræ iam ætati ac professioni conuenire; ut sicut mores & habitum, ita commutem & studium, & humanis diuina præferam volumina, qui ad Deum sæculo relicto totum me iam transferre proposui. Et quia olim studium ad lucrandam pecuniam institueram, nunc ad lucrandas animas hoc conuertam. Ut saltem circa vndecimam ad excolendam Dominicam vineam prout possum introeam. Hæc & his similia discipulis nostris frequenter impropertantibus, ut si non propter rationem, vel propter improbitatem nostrum assequerentur assensum; in hoc tandem consensimus, ut pro viribus nostris, imò diuinæ gratiæ supplemento, quod postulant aggredi tentaremus; non tam nos veritatem dicere promittentes, quàm opinionis nostræ sensum quem efflagitant exponentes.

In quo quidem Opere, si culpis meis exigentibus à Catholica; quod absit, exorbitauero intelligentia vel locutione; ignoscat ille mihi, qui ex intentione opera pensat, parato semper ad satisfactionem de malè dictis vel corrigendis vel delendis; cùm quis me fidelium vel virtute rationis, vel auctoritate scripturæ correxerit. Scio namque quod scriptum est, *Corripiet me iustus in misericordia, & increpabis me: oleum autem peccatoris non impinguabit caput meum.* Et in Prouerbijs: *Via vite, increpatio disciplina: qui autem odit increpationes, insipiens est.* Et

iterum: qui custodit increpationes, astutior fiet: & qui increpationes odit, morietur. Et rursus: Non amat pestilens eum, qui se corripit: si autem corripueris sapientem, intelliget disciplinam. Item: Viro qui corripientem dura seruire contemnit, repentinus superueniet interitus. Ad hoc autem & beatissimi Augustini exemplo provocamur, qui cum à Deo tantam eloquentiam ac sapientiam assecutus esset; plura tamen in scriptis suis erroneè posita retractando atque corrigendo professus est, dicens: Neque enim quisquam nisi imprudens, ideo quia errata mea reprehendo, me reprehendere audebit. Vt volet quisque accipiat hoc quod facio, me tamen Apostolicam illam sententiam intueri & in hac re oportuit, ubi ait: Si nos ipsos iudicaremus, à Domino non iudicaremur. Illud etiam quod scriptum est, Ex multiloquio non effugies peccatum. Item: Quem verò filiorum † suorum non terruit Christus, ubi ait; Omne verbum ociosum quodcumque dixerit homo, reddet rationem pro eo in die iudicii. Vnde & Apostolus Iacobus: Sit, inquit, omnis homo velox ad audiendum, tardus autem ad loquendum. Et alio loco: Si quis in verbo non offendit, hic perfectus est vir. Ego hanc perfectionem mihi nec nunc arrogo cum sim senex, quanto minus cum iuuenis cæpi scribere? Tanti itaque viri instructus exemplo, si qua fortè per errorem proferam, nulla in his per contemtionem defendam, aut per elationem præsumam. Vt si nondum ignorantia vitio caream, hæresis tamen crimen non incurram. Non enim ignorantia hæreticum facit, sed magis superbiæ obstinatio: cum quis videlicet ex nouitate aliqua nomen sibi comparare desiderans, aliquid inusitatum proferre gloriatur, quod aduersus omnes defendere inopportunè nititur: ut vel ceteris superior, vel nullis habeatur inferior. Vnde Gennadius Marsiliensis Episcopus de orthodoxa fide Ecclesiasticorum dogmatum: Quolibet quis acquiescat modo, non est hereticus, nisi in contentione hereticus fiat. Augustinus in Epistola ad Optatum: Si de anima falsitatis assertio proferatur, & falsitas mendacem, & falsitatis inopportuna defensio hereticum facit. Rursus idem super Genesim: Non ob aliud sunt heretici, nisi quod scripturas Canonicas non rectè intelligentes, suas falsas opiniones contra earum veritatē pertinaciter asserunt. Qui & in libro de utilitate credendi, hæreticum diligenter describens: Hæreticus, inquit, est, ut mea fert opinio, qui alicuius temporalis cōmodi, & maximè glorie causa

† al. fidelium.

falsas ac novas opiniones vel gignit, vel sequitur. Item idem in xviii. de Ciuitate Dei: Qui in Ecclesia aliqua praua sapiunt, si correcti contumaciter resistunt, & sua pestifera dogmata emendare nolunt, sed & defendere persistunt, heretici fiunt. Rursus idem de unico baptismo lib. iiii. Istum hereticum nondum dico, nisi manifestata sibi doctrina Catholica fidei resistere maluerit, & illud quod tenebas elegerit. Sed hæc hæc tunc. Nunc ad propositum accedamus.

ARGVMENTVM OPERIS.

PRIMVS iste Liber Theologiæ breuiter comprehendit summam totius prædicti Tractatus, in Fide scilicet, & Caritate, & Sacramentis. Quid sit Fides, quid Spes, quid Caritas, quid Sacramentum. Quomodo propriè siue impropriè Fides dicatur. Quæ sit Fides Catholica. Positio sententiæ de fide sanctæ Trinitatis, siue unitatis. Quare solus Pater dicatur ingenitus. Quid velit distinctio trium personarum in una diuinitatis essentia. Quod vocabulo Patris diuina potentia specialiter designetur. Quare opera trium personarum indiuisa dicantur. Quod nomine Filij seu Verbi diuina sapientia exprimat. Quod Spiritus sanctus diuina caritatis bonitas appelletur. Testimonia Prophetarum de Trinitate. Testimonia Philosophorum.

SECUNDVS Liber Theologiæ differit ea quæ de Trinitate primus Liber proposuit, & ad testimoniorum auctoritatem intelligentiæ commendat rationem.

TERTIVS Liber superposita replicando, diligentius de potentia, & sapientia Dei, & bonitate, in quibus Trinitas consistit, perfectius inquit ac differit.

LIBER PRIMVS.



IRIA sunt, vt arbitror, in quibus humanæ salutis summa consistit. Fides videlicet, Caritas, & Sacramentum. Spem autem in fide, tanquam speciem in genere, comprehendi ciestimo. Est quippe fides existimatio rerum non apparentium, hoc est sensibus corporis non subiacentium. Spes verò, expectatio aliquod commodum adipiscendi, quando videlicet quis credit se aliquod bonum assecuturum esse. Est itaque fides tam bonarum quàm malarum rerum, & tam de præsentibus vel præteritis, quàm futuris, sicut in principio Enchiridion beatus differit Augustinus. Spes autem de bonis est tantùm & de futuris. Expectatio quippe alicuius incommodi non tam spes dicenda est quàm desperatio, hoc est diffidentia à bono. Caritas verò est amor honestus, qui ad eum videlicet finem dirigitur, ad quem oportet: sicut econtrariò cupiditas, amor inhonestus acturpis appellatur. Amor verò est bona erga alterum ipsum voluntas, qua videlicet optamus, vt eo modo se habeat, quo se habere bonum ei credimus esse, & hoc eius potiùs quàm nostri causa desideramus. Sæpè namque contingit, vt aliquem odientes, & ab eo quoquomodo nos deliberare volentes, optemus eum ad cælestia iam transferri, & superna illa gloria frui: quo melius ei contingere nil potest. Nec tamen id eius amore gerimus, quia pro nobis id potius quàm pro ipso agimus: nec tam illius vtilitatem, quàm nostram in hoc attendentes. Cui fortassis in hoc ipso melius quàm nobismet ipsis optamus; magis adhuc præsentis vitæ miseriam, quàm futuræ gloriam nobis cupientes. Quod Tullius quoque, cùm amicitiam in secundo Rhetoricæ definiret, diligenter providebat, dicens: Amicitia est voluntas erga aliquem rerum bonarum, ipsius illius causa, quem diligit. Vbi profectò cùm adiecit, ipsius illius causa, quem diligit; veram à falsa distinxit amicitiam. Sunt enim qui alios amare dicuntur, quacumque intentione benè alij esse desiderent. Qui cùm id causa sui potiùs quàm illorum agant, non tam

hominem diligunt, quàm fortunam eius sequuntur, nec tam commoda ipsius quàm sua in illo venantur, nec tale desiderium tã charitas, i. amor honestus, vt dictum est, quàm cupiditas, i. amor inhonestus ac turpis est dicendum. Illa quippe amor Dei, hæc amor seculi nuncupatur: quia per illum Deo copulamur, per istum mundanis occupamur curis, & terrenis deseruimus desiderijs. Et per illum quidem quæ Dei sunt curamus, per istum quæ nostra sunt prouidemus. Et in illo finis est Deus, j. finalis & suprema causa, ad quem nostra dirigitur intentio, quando videlicet tam ipsum quàm proximum diligimus propter ipsum, nec tam nostram quàm ipsius sequimur voluntatem. In isto autem ipsi nosmetipsos finem constituimus, quibus satis est si desideria nostra compleamus, & voluntati nostræ pareamus. Quales & Apostolus præuidens, *Erunt*, inquit, *homines seipso amantes*, hoc est in se potius quàm in Deo sui amoris finem constituentibus. Cum enim proximum tanquàm nos ipsos amare iubeamur, nequaquam peccamus nos amando; sed amoris, vt dictum est, finem in nobis collocando. Et cum nostri quoque sicut & proximi curam in necessarijs agere debeamus, nonnulla propter nosmetipsos agere nos oportet, vt & nos eorum quæ agimus causa quædam existamus; sed non, vt dictum est, finis, id est superior & suprema causa, quæ Deus est. Hoc ipsum quippe quod pro nobis gerimus, si rectè agamus, propter Deum facimus, cui hoc placere credimus, & eius dilectio nostræ causa est: vt nos quoque propter ipsum, non eum propter nos diligamus. Alioquin peruersè agentes in nobis potius quàm in ipso nostræ dilectionis finem constitueremus. Tunc verò propter ipsum tam nosmetipsos quàm proximum diligimus, cum ideò nos amamus, quia hoc ei credimus placere: non quia nobis utile fore, licet id constet inutile nobis esse non posse. Nihil igitur amandum est, nihil omninò faciendum nisi propter Deum, vt in Deo finem omnium constituamus. Vnde & ipse & a dicitur, hoc est principium & finis. Principium quidem supremum à quo omnia; finis, id est finalis & suprema causa, propter quem omnia. Neque enim comedere, nec dormire, nec uxorem ducere, nec omninò aliud facere nisi propter ipsum debemus. Alioquin bestialiter viueremus, non sicut tantum voluptatibus dediti. Comedere autem propter ipsum

debemus, hoc vno saltem vt corpori quod suum est, ac nobis commissum, necessaria impendamus, quibus in eius obsequio sustentetur. Similiter & dormiendo ipsum reficere debemus, vt vigilare cùm oportet in eius obsequio valeamus. Vxor quoque ab eo qui est incontinens ducenda est, non solum propter filios ipsi generandos, verumetiam ne eum ex fornicatione offendamus. Qui etiam cùm pro nobis ipsi oramus, aut aliquid quod nobis apud eum prosit efficimus, ipsa eius etiam charitas ad hoc nos compellit, per quæ ad eum, quem super omnia diligimus, peruenire cupimus. Sic & cetera omnia propter ipsum facienda sunt, alioquin ab ipso frustra remunerationem expectaremus, si ea quæ agimus propter ipsum non ageremus. Quod diligenter Apostolus attendens, in 1. ad Corinthios Epistola dicit, *Sive ergo manducatis, sive aliud quid facitis, omnia in gloria Dei facite.*

SACRAMENTVM verò est visibile signum inuisibilis gratiæ Dei, veluti cùm quis baptizatur, ipsa exterior ablutio corporis, quam videmus, signum est interioris ablutionis animæ; cùm ita interior homo à peccatis mundatur, sicut exterior à corporalibus sordibus. Nunc autem tribus suprà positis breuiter assignatis atque descriptis, scilicet Fide, Charitate, & Sacramento; de singulis diligentius est agendum, quantum pertinet ad propositam humanæ saluationis summam: & de his quæ præcipuè maioribus implicita quæstionibus videntur. Ac primum de fide, quæ naturaliter ceteris prior est, tanquam bonorum omnium fundamentum. Quid enim sperari, vel speratum amari potest, nisi prius credatur? credi autem potest, si non speretur vel ametur? Ex fide itaque spes nascitur, cùm quod credimus bonum nos adepturos esse per Dei misericordiam confidimus. Vnde Apostolus, *Fides*, inquit, *est sperandarum rerum substantia, argumentum non apparentium.* Substantia sperandarum rerum, hoc est fundamentum & origo, vnde ad speranda aliqua perducimur, credendo videlicet prius ea esse, vt postmodum speremus. Argumentum non apparentium, hoc est probatio quòd sint aliqua non apparentia. Quia enim nemo fidem esse dubitat, oportet ex hoc vt aliqua non apparentia esse concedat: cùm fides, vt dictum est, propriè non dicatur nisi de his quæ nondum apparent. Vnde

HHHhhh

II.

iuxta Apostolum, cum nunc tria manere dicantur, fides scilicet, spes, charitas; sola charitas nunquam excidit, tam in hoc scilicet saeculo, quam in alio futuro perseveratura. Ex quo & meritò maior dicitur tam dignitate perseverantiæ, quam remunerationis debito; cum ipsa videlicet sola, ut arbitror, remuneratione sit digna. Si quis autem de apparentibus quoque fidem haberi dicat, fidem abusiue nominat. Reperitur tamen fides dici de apparentibus quoque, sicut de non apparentibus. De utroque autem exempla præ manibus habemus. Gregorius Homilia vi. lib. ii. in Evangelia, cum Apostolus dicat, *Est fides sperandarum rerum substantia &c.* profectò liquet, quia fides illarum rerum argumentum est, quæ apparere non possunt. Quæ enim sunt apparentia, fidem non habent, sed agnitionem. Idem Dialog. lib. iiii. cap. viii. Cum Paulus dicat, *Est enim fides sperandarum substantiarum rerum, argumentum non apparentium*, hoc veraciter debet credi quod non valet videri. Nam credi iam non potest quod videri potest. Augustinus super Ioannem: *Et nunc dico vobis priusquam fiat, ut cum factum fuerit credatis.* Quid est hoc, cum magis hæc credere habeat antequam fiat id quod credendum est? Hæc est enim laus fidei, si quod creditur non videtur. Nam quid magnum est si id creditur quod videtur, secundum illam Domini sententiam, qua discipulum arguit dicens, *Quia vidisti, credidisti? Beati &c.* Sed aliud vidit, aliud credidit. A mortali quippè homine diuinitas videri non potuit. Hominem igitur vidit, & ideo confessus est, dicens: *Dominus meus, & Deus meus.* Nam ipsa fides ita est diffinita: Est autem fides sperandarum rerum substantia, quæ non videntur. Quapropter quid sibi vult, *ut cum factum fuerit credatis?* Nam & ille cui dictum est, *Quia vidisti credidisti*, non hoc credidit quod vidit. Cernebat carnem, & credebat Deum latentem in carne. Sed & si dicimus credi quæ videntur, sicut dicit unusquisque oculis suis se credidisse, non tamen ipsa est quæ in nobis ædificatur fides, sed ex rebus quas videmus, agitur in nobis, ut ea credantur, quæ non videntur. Item creditura non fide noua, sed aucta, aut certe cum mortuus esset defecta, cum resurrexisset resecta. Item sermone trigesimo nono, quid promittit credentibus? *Cognoscetis veritatem*, non quia cognouerunt, sed ut cognoscerent crediderunt. Credimus ut cognoscamus, non cognoscimus

ut credamus. Quid est enim fides, nisi credere quod non vides? Fides ergo est, quod non vides credere, veritas quod credidisti videre. Veritas est, sed adhuc creditur, non videtur. Idem in libro de verbo Domini, & quibusdam sententijs Pauli Apostoli, sermone octuagesimo. *Iustus ex fide vivit, quia credit quod non videt, filij Dei sumus, & nondum apparuit quid erimus; Quamdiu enim sumus in corpore peregrinamur à Deo. Per fidem enim ambulamus, non per speciem. Cum venerimus tenebimus, & iam visio erit, non fides; & iam res, non spes. Amabimus videndo & tenendo. Ergo charitas perfecta erit, sicut ait Apostolus, Fides, spes, charitas, tria hæc, maior autem horum est charitas. Securi illo adiuuvante perseverantes in eo dicamus. Quis nos separabit à charitate Christi? Tribulatio, an angustia, &c.* Idem libro secundo Quaestionum Evangeliorum. *Iustitia Dei in eo reuelatur ex fide in fidem*, intelligitur quidem fides qua creduntur ea quæ non videntur.

Sed tamen est fides etiam rerum, quando non verbis, III
sed rebus ipsis præsentibus creditur quod futurum est, cum iam per speciem manifestam se contemplandam præbebit sanctis ipsa Dei sapientia. De qua fide rerum lucisque ipsius præsentia forsitan Paulus dicit, *Iustitia enim Dei in eo reuelatur ex fide in fidem*. Dicit enim alio loco, *Nos enim reuelata facie gloriam Dei spectantes in eandem imaginem transformabimur à gloria in gloriam*. Sicut enim dicit hic à gloria in gloriam, ita & ibi ex fide in fidem. De gloria scilicet Evangelij, quo nunc credentes illuminantur, in gloriam manifestæ veritatis. Apud Philosophos quoque de apparentibus etiam fides dici videtur. Quo etiã videlicet res quælibet ita animo tenetur, ut de ipsa non dubitetur, siue per opinionem, siue per experimentum quoque sensuum. Vnde Boëtius super Topica Ciceronis libro primo. Argumentum est ratio quæ rei dubiæ facit fidem. Multa enim inquam sunt quæ faciunt fidem, sed quia rationes non sunt, nec argumenta esse possunt, ut visus facit fidem his quæ videntur. Sed quia ratio non est visus, nec argumentum quidem esse potest. His itaque testimonijs patet fidei nomen modo propriè, modo impropriè poni, cum videlicet non solum de occultis, verum etiam de manifestis fides dicatur. Sunt autem plura ad Deum pertinentia quæ credi vel non credi nostra non interest, quia siue credantur, siue non

credantur, nullum incurrimus periculum, veluti si credamus Deum eras pluuiam facturum vel non facturum, vel huic nequissimo homini misericordiam impensurum, vel non. Ei vos quæ de fide ad ædificationem loquitur, ea sola tractare ac docere sufficit, quæ si non credantur damnationem pariunt. Hæc autem sunt quæ ad fidem Catholicam pertinent.

IV.

CATHOLICA quippè est fides, id est vniuersalis, quæ ita omnibus necessaria est, vt nemo discretus absque ea saluari possit. Benè Athanasius cum præmisisset, *hæc est fides Catholica*, statim id aperiens, vndè scilicet dicatur Catholica, & velut exponens ait. *Quam nisi quisque fideliter firmiterque crediderit, saluus esse non poterit.* Sunt & qui velint fidem Catholicam ad differentiam fidei Catholicorum non vbique, cum Ecclesia dilatata, sed quasi in angulo aliquo latitantis, vel in aliqua terrarum parte conclusæ. Fides autem Catholica partim circa ipsam diuinitatis naturam, partim circa diuina beneficia & quascumque Dei necessarias dispensationes vel ordinationes consistit, quæ nobis diligenter Apostolorum vel Sanctorum patrum symbolis expressa sunt. Ac primum de his quæ ad diuinitatis naturam pertinent, consideremus: qualiter videlicet in vna & eadem penitus diuinitatis substantia tres personæ credantur. Pater scilicet, ac filius, ac Spiritus sanctus, & quid rationis vel vtilitatis hæc in vno Deo habeat personarum distinctio. Primò itaque hanc fidei summam ponamus, de vnitatem scilicet ac trinitatem diuinam, deinde positam prout Dominus dederit differamus.

V.

TENET igitur Christianæ fidei religio vnum solummodo Deum esse, ac nullo modo plures esse Deos, vnū omnium dominum, vnum creatorem, vnum principium, vnum lumen, vnum bonum, vnum immensum, vnum omnipotentem, vnum æternum, vnā substantiam, siue essentiam incommutabilem penitus ac simplicem, cui nec partes aliquæ, nec aliquid quod ipsa non fuerit, possit inesse, ac per omnia solam prædicat, ac credit vnitatem, excepto quod ad personarum pertinet multitudinem. Huic itaque tam simplici seu indiuiduæ ac meræ substantiæ, tres inesse personas sibi per omnia cœquales ac cœternas, non numero rerum, sed pluralitate proprietatum, diuersas veraciter confitetur. Deum videlicet Patrem vt dictum est, ac Deum filium eius, atque Deum spiritum

eius, ab vtrisque procedentem. Non est autem vna persona altera, licet sit hoc ipsum quod altera: neque enim qui pater est filius est, aut Spiritus sanctus: nec qui filius est, Spiritus sanctus est, sed tamen quod pater est, est filius, est & Spiritus sanctus & e contrario. Idē quippē Deus tam pater est, quā filius seu Spiritus sanctus, vnum quippē prorsus in natura, vnum tam numero quā substantia sunt: sed iuxta eorum proprietates ita personaliter ab inuicem distinguuntur, ut alius sit iste quam, ille non aliud, homo est personaliter non substantialiter diuersus, cum hic videlicet non sit ille, licet hic sit penitus hoc quod ille, id est eadem penitus sit substantia quæ & ille, non persona. Vnde Sedulius. Non quia quæ summus pater est & filius hic est; sed quia quod summus pater est, & filius hoc est.

PROPRIVM autem est Dei Patris ingenitum esse, hoc est à seipso non ab alio existere, sicut filij proprium est à patre genitum esse, non creatum vel factum, & Spiritus sancti ab vtrisque procedere, nec creatum nec factum esse. Quod enim æternaliter subsistit, atque initio caret, nec creatum nec factum convenit dici. Solum itaque patrem ingenitum dicimus, hoc est à seipso non ab alio. Vnde August. aduersus Felicianum Arrianum. Patrem ingenitum dico, quia non processit ex altero. Isidorus Ethimol. lib. sexto. Pater, inquit, solus non est de alio; ideo solus appellatur ingenitus. Aliud itaque dicere est patrem ingenitum, aliud non genitum. Sicut aliud est dicere aliud iniustum, aliud non iustum. Quippē quod iniustum est necesse est esse non iustum, sed non ē conuerso: lapis quippē non iustus, nec tamen iniustus est. Sic & cum Deus pater sit ingenitus, constat profectō eum esse non genitum, id est non esse filium. Spiritus verò sanctus ipse quoque est non genitus, cum ipse etiam non sit genitus, hoc est non sit filius, nec tamen ideo est ingenitus, cum ipse ab alio sit, tam à patre scilicet, quā à filio procedens. Solus itaque pater ingenitus dicitur, sicut solus filius genitus. Spiritus verò sanctus, nec genitus est, nec ingenitus, sed ut dictum est, non genitus. Vnde & August. ad Orosium. cap. secundo, Spiritum sanctum nec genitum nec ingenitum fides certa declarat, quia si dixerimus ingenitum, duos patres affirmare videbimur: si autem genitum, duos filios affirmare † culpamur.

VI.

Sed quod certa fides tenet nec inginitus est, nec genitus, sed ab vtrisque procedens, id est à patre & filio. Idem & Gennadius de orthodoxa fide Ecclesiasticorum dogmatum cap. i. asserit his verbis. Pater ergo principium deitatis, à quo filius est natus, à quo Spiritus sanctus non natus, quia filius non est, nec inginitus quia non est pater. Hinc & beatus Papa Greg. in symbolo Epistolis suis præscripto meminit dicens. Credimus Spiritum sanctum nec genitum nec inginitum, sed coæternum de patre & filio procedentem. Cum autem vnaquæque persona harum sit Deus aut Dominus siue Creator, nec vna persona sit altera; non tamen ideo plures Dij vel domini sunt, siue creatores, sicut plures sunt personæ. Quippè cum dicimus Deos, aut dominos seu Creatores, rerum quendam numerum ostendimus, quarum vnaquæque Deus sit, aut dominus siue Creator cum in indiuiduitate nulla rerum possit esse multitudo, vnde & indiuiduam dicimus Trinitatem. Cum verò multas in deo profiteamur personas, proprietatum non rerum multitudinem, vt supra meminimus, demonstrauimus. Quædam itaque de singulis tantum dicuntur personis, vt inginitus de solo patre, genitus siue incarnatus de solo filio, procedens ab vtroque, de solo spiritu sancto: quædam coniunctim tantum & non singillatim, vt trinitas de tribus tantum personis: quædam tam diuisim quam cõiunctim de eis æque dicuntur, vt Deus, Dominus, Creator, omnipotens, sapientia, virtus iustitia, &c. Solum verò hoc nomen quod est persona pluraliter proferimus, cum videlicet plures proferimus personas, non Deos aut dominos nec vllam in cæteris pluralitatem recipiamus. Vnde August. de Trinit. lib. vii. cap. vii. Pater ad se dicitur persona, non ad filiũ vel spiritũ. Item hoc solum non est, quod cum dicatur de singulis ad se pluraliter non singulariter accipitur in summa. Dicimus itaque Pater est persona, & filius est persona, Spiritus sanctus persona: Patet tamen & filius & Spiritus sanctus non sunt vna persona, sed plures. Quarum quidem tamen personarum sicut eadem prorsus est substantia, ita indeterminans est gloria, indiuisa operatio ac voluntas. Hac autem fidei summa circa vnitatem ac trinitatem proposita, superest vt aduersus inquisitiones dubitantium, congruis etiam similitudinum exemplis defendamus atque astruamus. Quid enim ad doctrinam loqui proficit, si quod

docere volumus exponi non potest ut intelligatur? Quod diligenter beatus attendens August. cum difficillimum de Trinitate illum exponere vellet locum, quod videlicet Evangelista Ioannes exorsus est, dicens. *In principio erat verbum, & verbum erat apud Deum, & Deus erat verbum*, hoc inquit, animalis homo non percipit. Quid ergo fratres? Silebimus hinc? Quare ergo scribitur, si siletur? aut quare auditur, si non exponitur? Sed ut quid exponitur, si non intelligitur? Itaque quoniam rursus non dubito in numero vestro quosdam esse, à quibus possit non solum expolitum capi, sed antequam exponatur intelligi; non fraudabo eos qui possunt capere, dum timeo superfluum esse auribus eorum qui non possunt capere.

P R I M U M itaque nobis differendum occurrit, quid sibi velit in vna diuinitatis natura personarum ista distinctio, ut eadem scilicet pater, eadem filius, eadem Spiritus sanctus sit appellata. Deinde qualiter vna penitus & individua permanente substantia, Trinitas personarum queat assignari, & quòd de vnitae ac Trinitate diuina ante proposuimus contra vehementes Philosophicas impugnationes deffendi. Videtur autem nobis suprapositis trium personarum nominibus summi boni perfectio diligenter esse descripta, ut cum videlicet predicatur Deus esse pater & filius & Spiritus sanctus, cum summum bonum atque in omnibus perfectum hac distinctione Trinitatis intelligamus.

P A T R I S quippè nomine diuinæ maiestatis potentia designatur, qua videlicet quicquid velit efficere potest, vnde August. in Enchiridion. Neque enim veraciter vocatur omnipotens, nisi quoniam quæcumque vult potest, nec voluntate cuiuspiam creaturæ voluntatis omnipotentis impeditur effectus. Idem in lib. de spiritu & litera. Non potest facere iniusta, quia ipse est summa iustitia & bonitas. Omnipotens verò est, non quod possit omnia facere, sed quia potest efficere quicquid vult. Sicut autem Dei patris vocabulo diuinæ maiestas potentiae exprimitur specialiter, ita filii seu verbi appellatione sapientia Dei significatur, quia scilicet cuncta discernere valet, ut in nullo penitus decipi queat.

A T verò Spiritus sancti vocabulo ipsa eius charitas seu benignitas exprimitur, qua videlicet optimè cuncta vult fieri seu

VII.

VIII.

IX.

disponi, & eo modo singula prouenire quo melius possunt, in alijs quoque benè vtens, & optimè singula disponens, & ad optimum finem quoque perducens. Non est autem perfectus in omnibus, qui in aliquo impotens inuenitur, nec perfectè beatus est qui in aliquo decipi potest, nec penitus benignus qui omnia optimè fieri non velit ac disponi. Vbi verò hæc tria conueniunt, vt tam videlicet potentia quàm sapientia, quàm bona voluntate sit perfectus: nil boni est quod eius plenitudini desit. Tale est ergo Deum patrem ac filium & Spiritū sanctum nos profiteri, ac si ipsum, vt dictum est, summum bonum esse prædicemus: cui inquam bonorum omnium plenitudini nil desit, & cuius participatione bona esse, cetera constet. Nec solūm hæc Trinitatis distinctio ad summi boni perfectionem, vt dictum est, describendam conuenit, verum etiam ad persuadendum hominibus diuini cultus religionem plurimum proficit, vt ob hoc præcipuè ipsa Dei sapientia incarnata in prædicatione sua eā rectissimè decreuisse assumere. Duo quippè sunt quæ nos omnino subiectos Deo efficiunt, timor videlicet atque amor. Potestas quippè & sapientia maximè timorem incutiunt, cum eum quem iudicem esse scimus, & cuncta quæ voluerit, punire posse, & nil eum latere cognoscimus. Benignitas autem ad amorem specialiter pertinet, vt quem benignissimum habemus, potissimum diligamus. Ex quo etiam certum est eum impietatem vlcisci velle, quia quo plus placet ei æquitas, magis ipsi displicet iniquitas, sicut scriptum est, *Dilexisti iustitiam & odisti iniquitatem*. Nec solūm ad timorem vel ad amorem Dei hominibus incutendum hæc Trinitatis distinctio necessaria est, verum & ad vniuersorum operum eius commendationem plurimū valet, vt quæcumque agit, egregiè fieri credantur, vt pote qui omnia quæ velit, efficere possit, & in omnibus modis conseruare sciat, & optimè cuncta fieri seu procedere velit. Vnde & cum ad aliud per nos operandum diuinam imploramus gratiam, antè commemorationem Trinitatis facimus, dicentes. In nomine Patris & Filij & Spiritu sancti, vel, In nomine sanctæ & indiuiduæ Trinitatis, vt videlicet diuinam potentiam & sapientiam seu benignitatem commemorando quæcumque Deus efficiat, egregiè fieri demonstramus. Vnde & Moyses cum de vniuersa mundi ageret creatione in ipso statim Genes

Genesis exordio Deum patrem & filium & Spiritum sanctum commemorat, ut quæcumque à Deo fieri narrat, egregiè facta credantur. Cum enim ait, *In principio creauit Deus cælum & terram*, & postmodum adiecit, *Spiritus Domini ferebatur super aquas*, diuinam Trinitatem diligenter expressit. In Deo quidem creatore patrem insinuans, hoc est diuinam commemorans potentiam, per quam creari omnia de nihilo potuerit. Quamquam etiam non incongruè hoc nomen, Deus, iuxta propriam interpretationem innuit quod hoc videlicet quasi Θεός, id est timor interpretetur, cum potestati reuerentia timoris maximè exhibeatur. Nomine verò principij filium designat, id est diuinam rationem seu sapientiam, in qua per prouidentiam cuncta prius consistere quodammodo habuerunt, atque ibidem incipere quam in effectum operis ducerentur. Vnde & Euangelista de verbo patris differens, *quod factum est*, inquit, *in ipso vita erat*. Sic & Macrobius Platonem insecutus, mentem Dei, quam Greci νοῦν appellant, originates rerum species, quæ Idææ dictæ sunt, continere meminit. Antequam etiam, inquit Priscianus, in corpora prodirent, hoc est in effecta operum prouenirent. Spiritus verò Domini apertè Spiritum sanctum insinuat, id est diuinæ gratiæ bonitatem, iuxta hanc quidem diligentem Prophetæ considerationem, cum ad excellentem hominis creationem ventum esset, prouidè hoc opus cæteris imponens, & quasi pro ceteris commendans distinctionem potenter Trinitatis fecerit, ubi videlicet à domino potius dictum est *Faciamus hominem*, quàm *faciam*: *ad imaginem*, inquit, *& similitudinem nostram*; virum quidem ad imaginem, mulierem verò ad similitudinem. Vir quippè iuxta Apostolum, imago Dei est, non mulier. Sed sicut vir imago est Dei, ita & mulier imago dicitur viri. Imago quippè expressa alicuius similitudo vocatur, similitudo autem dici potest, & si non multum id cuius est similitudo exprimat. Vir itaque ad imaginem Trinitatis est factus, quia quo perfectior conditus est quàm mulier, descriptæ summi boni perfectioni similior existit. Qui & per potestatem tam mulieri quàm cæteris mundanis prælatus est creaturis, & per sapientiam dignior, & per amorem ad ea quibus perfectio est pronior extitit. Benè & eum à serpente non esse seductum, cum seduceretur mulier, testatur Apostolus; qui tamen amo-

re mulieris gustatum ei fructum porrigentis, cum eam contristare noller, in transgressionem prorumpit, amplius de misericordia Dei quàm oporteret præsumens, quem ad ignoscendum facilem existimabat, pro tam leui quæ ei videbatur, offensa; si quoquomodo commissam sibi a Domino non scandalizaret mulierẽ, præsertim cum hæc piẽ magis, quàm maliciosẽ fieri videretur, à quo etiam amplius amari Deum quàm à muliere, quis non consentiat? Quomodo enim illa tunc Deum verẽ dilexerit, quem sibi in dolo fuisse locutum crediderit, cum serpentis acquieuerit consilio?

X.

Q u o d autem nomine Patris diuina potentia, nomine verò Filij seu verbi diuina sapientia, nomine Spiritus sancti ipsa Dei benignitas seu charitas specialiter exprimat, nec nos auctoritas nec ratio subterfugit. Potentiam quidem nomine patris specialiter exprimi, ex multis colligitur testimoniis. Vnde Maximus Episcopus in expositione symboli quod dicitur Apostolorum, quæ legem in quinta quadragesimæ Dominica his verbis insinuat. Credis in Deum, inquit, patrem omnipotentẽ. In Deo natura innascibilis, in patre vni-geniti veritas, in omnipotente plenitudo virtutis ostenditur. Est namque per ingenitam deitatem omnipotens, & per omnipotentiam Pater. Innascibilem hoc loco, increatum dicit, ingenitam deitatem patris appellat, hoc est cum solum ex tribus personis ingenitum esse profitetur, cum videlicet, vt iam supra meminimus, solus ipse non sit ab alio. Ceteræ verò personæ ab ipso sunt. Quod verò dicitur ipse Pater per ingenitam deitatem esse omnipotens, hoc est per hoc quod cum sit Deus, insuper vt dictum est, ipse solus sit ingenuus, & rursus per omnipotentiam Pater, apertẽ innuitur, quod sicut ingenuum esse proprium est Dei patris, ita & ad proprietatem eius specialiter diuinam potentiam pertinere, licet vnaquæque aliarum personarum cum sit eiusdem cum patre substantiæ, eiusdem sit penitus potentia. Iuxta proprietates quippè trium personarum, quædam specialiter ac tanquam propriè de aliqua earum dici vel accipi solent, quæ tamen iuxta earum naturam, vnionem singulis inesse non ambigimus, vt sapientia filio: charitas Spiritu sancto specialiter attribuitur, cum tamen tam Pater, quàm Spiritus sanctus, seu etiam tota Trinitas sapientia sit, & similiter tam pater ipse, quàm filius cha-

ritas dici possit. Sic etiam iuxta personarum proprietates, quædam opera specialiter alicui personæ attribuuntur, quamvis indiuisa totius Trinitatis opera prædicentur, & quicquid ab vna earum fit, à singulis fieri constet. Soli quippè filio carnis susceptio assignatur: & ex aqua & spiritu tantum, non ex aqua etiam ex patre vel filio regenerari dicuntur, cum tamen in istis totius operatio Trinitatis affuerit. Sic & iuxta ipsam patris proprietatem specialiter ei & maximè quæ ad potentiam pertinent assignari solent, cum ex ipsius, vt dictum est, nomine, diuina specialiter potētia designetur, & eo ipso quod solus ipse ingeni tus dicitur, hoc est à seipso, non ab alio, existens; quædam ei secundum substantiæ modum propria maneat potentia. Vt cùm videlicet ipse pater omnia facere possit quæ filius & Spiritus sanctus, hoc insuper habeat, vt a se ipso solus ipse queat existere, nec necesse habeat ab alio esse. Non minus tamen aut filium aut Spiritum sanctum omnipotentem prædicamus quàm patrem. Vt enim beatus meminit August. non propter aliud omnipotens dicitur Deus, nisi quia quicquid vult potest efficere, vt non scilicet in aliquo efficiendo vllum eius voluntati impedimentum obsistat. Ideo autem trium personarum indiuisa opera, id est communia dicuntur, quod quicquid potentia geritur, id sapientia moderatur, & bonitate conditur. Vnde & meritò in his quæ facere Deum exoramus, commemorationem facimus Trinitatis dicentes. In nomine sanctæ & indiuiduæ Trinitatis, vel, In nomine Patris & Filij, & Spiritus sancti. Vt sicut trium personarum est indiuisa operatio, ita & eorum sit inseparabilis inuocatio. Atque hoc modo cum fides ipsa postulati beneficij astruatur, tamen ipsa operis diuini efficacia commēdetur. Facile enim creditur facturum esse bonum quod rogatur, qui & facere id sicut voluerit, potest, & benignissimus esse cognoscitur. Nomine verò patris, vt dictum est, omnipotentia Dei, nomine spiritus, summa eius benignitas commemoratur. Cum autem & sapientiæ diuinæ commemoratio additur, quæ scilicet nomine filij exprimitur, per quam in omnibus quæ efficit modum tenere nouerit, egregius effectus ostenditur qui ab eo proueniat, qui omnia quæ velit facere queat, & in omnibus faciendis modum sciat seruare, & optimè cuncta velit fieri. At verò cum vnaquæque trium personarum indè

omnipotens dicatur, quòd quicquid earum quæcumque velit efficere possit complere; non tamen necesse est eodem modo se penitus habere vnam quo alteram, cùm in suis proprietatibus diuersæ sint. Solus quippè pater potest esse pater siue ingenuus, & solus filius genitus, sicut & solus Spiritus sanctus procedens. Quicquid itaque vna persona facere potest, & alia potest, & ideo vnaquæque omnipotens dicitur, sed non quicquid vna esse potest, vel cuius modo vna esse potest, necesse est alteram esse. Hoc autem teste Hieronymo plus habere pater à filio inuenitur, quod solus à seipso est, filius verò à se non est, sed à patre tanquam genitus. Sic quippe ait Niceni concilij exponendo fidem, symbolum. Absit ergo in filio Dei aliud plus minus-ve, aut in loco aut in tempore, aut in potentia, aut in scientia, aut in æqualitate, aut in subiectione, cum dicitur hoc vt diuinitati eius ascribatur, non carni. Si enim plus minus-ve aliud inuenitur, excepto hoc quod genuit pater filium, & excepto hoc quod filius non ex semetipso natus est, sed de patre natus est, propriè aut inuidens aut impotens pater, insuper etiam temporalis agnoscitur. Ex his quidem verbis Hieronymi, cum profitetur nil plus in patre quàm in filio, vel minus in filio quàm in patre reperiri, excepto quod filius à seipso non est, sicut & pater profecto: videtur iuxta naturam vel modum existentiae, non operationis: hanc quasi propriam patri ascribere potentiam, quod solus ipse per se subsistere queat, vel à seipso existere habeat: hoc est non ab alio: ceteras verò duas in Trinitate personas ab ipso necesse sit esse, nec per se habeant subsistere. Cui & illud beati consonat Ambrosij, qui in Epistola Pauli ad Ephes. vbi scriptum est, *Vnus Deus & Pater omnium, qui super omnes, &c.* Si itaque potentiam tam ad naturam subsistendi, quàm ad efficaciam operationis referamus, inueniemus ad proprietatem personæ patris propriè vel specialiter omnipotentiā attinere, qui non solum cū ceteris duabus personis Deus omnia efficere potest, verū etiā ipse solus à se non ab alio existere habet, & sicut ex se habet existere, ita etiam ex se habet posse. Ceteræ verò personæ sicut ab ipso habēt esse, ita & ab ipso habēt posse quod volūt efficere, vnde & per semetipsum filius dicit *Non possum ego à meipso facere quicquam*, Et alibi. *Et à meipso facio nil*, vel, *à meipso nō loquor*. Cum itaque de patre Maximus dixerit, quod per ingeni-

tam deitatē sit omnipotens, id est per hoc quod cū sit Deus, sit etiam ingenitus: illa quoque propria patris potentia qua solus ipse à se nō ab alio subsistit, vnde solus ipse ingenitus dicitur, in omnipotentia comprehenditur, & sic cum intellexit omnipotentem, vt quicquid ad potentiam attinet, non solum quantum ad operationis effectum, verum etiam quantum ad subsistendi modum, ei tanquam propriam attribuerit: vt tale sit scilicet quod dixerit per ingentam deitatem omnipotens, ac si apertè diceret: Per hoc quod Deus est & ingenitus, eum vtroque modo, vt diximus, propriè omnipotentem esse. Sic & cum statim subiunxerit, & per omnipotentiam pater, tale est, ac si hanc quam intellexerit omnipotentiam ipsum propriè habere fateamur. Fortasse autem & in hoc diligentius accipi potest per omnipotentiam pater, ac si dicamus eum per omnipotentiam, quæ ei, vt dictum, est specialiter tribuitur, de ipso Sapientiam suam tanquam filium generare, cū ipsa scilicet diuina Sapientia aliquid sit de diuina omnipotentia, cū sit ipsa quoque aliqua potentia. Sapientiam namque dicimus potentiam discernendi, siue à deceptione siue à fallacia prouidendi, ne in aliquo decipi possit, vel aliud eum latere queat. Est itaque diuina sapientia quædā diuina potentia, per quam videlicet Deus cuncta perfectè discernere atque cognoscere habet, ne in aliquo errare per insciētiam possit, secundū quod scilicet verbum ipsum Dei de ipsa Patris substantia esse dicitur, quod est Filium ex Patre genitum esse, sicut postmodum ipso annuante plenius disceremus, cū ad huius scilicet generationis modum exponendum ventum fuerit. Nunc verò præsentis est operæ auctoritates inducere, quibus vocabulo Patris diuinam maximè asstruamus potentiam exprimi. Quod si etiam tam Euangelica quam Apostolica discutiamus dicta, intelligemus iuxta ipsius locutionis proprietatem, ea quæ ad potentiam pertinent, Patri specialiter ascribi, vt hic quoque apertè celligi possit vocabulo patris ipsam specialiter omnipotentiam designari. Ait quippè Filius. *Quæ Pater posuit in sua potestate*, non quæ ipse Filius vel Spiritus sanctus, licet eadem sit trium personarum potestas. Et alibi, *si ut disposuit inquit, mihi Pater*. Qui etiam videlicet Filius quotiens humanitas eius opem vnitæ sibi diuinitatis implorat, aut quascunque ei preces fundit, solo patris vtitur vocabulo, ipsam scilicet

commemorando potentiam qua potens est efficere quod rogatur, veluti cum dicit. *Pater sancte serua eos. Pater in manus tuas comendo spiritum meum, & similia* quæ ad orationem pertinent. Quod & adhuc maximè mos Ecclesiasticus obseruat, vt in illis specialibus orationibus quæ in celebrationibus Missarum ad Altare fiunt; quæ scilicet orationes ad solum patrem locutionem dirigentes intendunt. Sed & cum ait Apostolus Christum surrexisse à mortuis per gloriam Dei patris, id est per virtutem diuinæ potentia, vel patrem eum à mortuis suscitasse, & viuificaturum esse corpora nostra, vel ab eo Filium, vel Spiritum sanctum missum esse, vel ei Filium obedisse, quasi propriè vel specialiter patri tribuit, quæ ad potentiam pertinere videntur, vt ex his quoque insinuetur maximè ad personam patris iuxta eius, vt dictum est, proprietatem, ea quæ potentia sunt ascribenda esse, sicut filio ea quæ ad animi rationem vel sapientiam pertinent, sicut est iudicare, quod discretionis est. Vnde scriptum est. *Pater omne iudicium dedit Filio* quia potentia cedit sapientiæ in discussione iudicij, vbi æquitas magis examinanda est, quam vis potentia exercenda. Quod autem supponitur quia filius hominis est ex quo diuinum maximè pendeat iudicium, declarat secundum quod ipse filius protestatus est. *Si non venissem & locutus eis fuisset, peccatum non haberent. Nunc autem excusationē nullam habent de peccato.* Ac si dicatur ex hoc maximam impios condemnationem iuste incurrere, quia tanto diuino beneficio ingrati inexcusabiles exstiterunt, missum etiam à Patre filium respuentes. Ad hoc etiam illa inscriptio Psalmi non pertinet quæ ait. Pro occultis fili scilicet iudiciis, de quibus in eodem Psalmo subiunctum est. *Cognoscetur Dominus iudicia faciens, & alibi, Iudicia tua abyssus multa.* Quia videlicet sicut dictum est, sapientiæ est iudicare, id est quod ex iustitia cuique debeat, cognoscere. Christum autem *Dei sapientiam & Dei virtutem* Apostolus nominat. Sapientiam quidem per quam omnia ad integrum nouit, virtutem verò, per quam omnium bonorum efficaciam complet, secundum quod scriptum est. *Omnia per ipsum facta sunt, & alibi. Omnia in sapientia fecisti.* Vnde & dextera siue manus patris appellatus est, per quam Pater omnia operatus est. Qui etiam benè mens patris, siue ratio, siue Angelus consilij dictus est, quia omnia in hac sapientia rationabiliter Pater disponit,

siue creando mundum, siue reparando eundem post lapsum: & in hoc Pater verum consilium nostræ ignorantie dedit, cum eo incarnato nos visitauerit. Sed & quando hominibus apparere ad aliquid docendum Deus legitur, filio id magis quàm alteri personæ tribuitur: eo quod docere ad sapiētiam necesse pertineat. Siue ergo ad aliud docendum antiquis temporibus in Angelo vel in aliqua specie corporali Deus apparuerit, siue tempore gratiæ per hominem assumptum se mundo visibilem exhibuerit, filio id propriè aut specialiter propter suprapositam causam ascribitur. Per ipsum enim Deus nos erudiens tanquam verbo suo nos instruit, quotiens de plenitudine ipsa sapientiæ suæ nobis aliud impartit, sicut scriptum est. *Et de plenitudine eius omnes accepimus.*

XI.

LOGOS itaque filius Dei cum dicitur, id est Verbum, secundum illam significationem sumitur, secundum quam λόγος apud Græcos ipsum etiam mentis conceptum seu rationem mentis significat, non vocis prolationem. Vnde Boetius in Cathegorijs Aristotelis lib. secundo, quoniam Græca oratione λόγος dicitur etiam animi cogitatio, & intra se ratiocinatio. λόγος quoque & oratio, ne quis Aristotelem, cum diceret λόγόν, id est rationem quantitatem esse, de eo putaret dicere quem quisque λόγόν in cogitatione disponderet, addidit, quæ sit cum voce. Hinc & beatus meminit Augustinus lib. questionum octuagesimo tertio. cap. XLIIII. *In principio*, inquit, *erat Verbum*, quod λόγος Græcè dicitur, Latine autem orationem & Verbum significat. Sed hoc loco meliùs Verbum interpretatur, ut significetur non solum ad patrem respectus, sed ad illa etiam quæ per Verbum facta sunt. Ratio verò et si nihil per eam fiat, necesse ratio dicitur. Idem in lib. contra quinque hæreses. *In principio erat Verbum*, meliùs Græci λόγόν dicunt. λόγος quippè Verbum significat & rationem. De quo quidem verbo Dei scilicet intelligibili, quod ut dictum est, sapientia intelligitur, Beatus quoque Greg. in Homelia Euangeliorum, septima ita loquitur, distinguens scilicet ipsum intelligibile verbum à verbo audibili, quod est vox. Scitis, inquit, quia vnigenitus Verbum patris vocatur, Ioanne attestante qui ait, *In principio erat Verbum*. Ex ipsa nostra locutione cognoscitis quia prius vox sonat ut Verbum postmodum possit audiri: Ioannes ergo vocem se esse asserit,

quia verbum præcedit. Idem in Homelia xxiii. de Ioanne Baptista. *Ego vox clamantis in deserto.* Ideo, inquit, vox à propheta vocatus est, quia verbum præibat, quod est dicere. Sicut verbum audibile in auditore præcedit intelligibile, quia videlicet prius vox sonat, ut postmodum ex ea intellectus concipiatur: ita Ioannis prædicatio anteibat, Aduentum Domini nunciando. Verbum itaque dicit conceptum mentis, & quandam intelligentiæ locutionem, quæ in mente formatur, ad cuius similitudinem vnigenitus Verbum Dei, & quasi quædam eius intellectualis ac perpetua locutio, in cuius prouidentia omnium ab æterno præfixa consistit ordinatio atque operatio. Vnde & Moyses cum in diuersis rerum creationibus faciendis præmittat, *Dixit Deus*, & ad dictum statim adiungat effectum dicens, *Et factum est ita*. Cuncta Deum condidisse in verbo, hoc est in sapientia sua ostendit, id est omnia rationabiliter. De quo etiam Psalmista ait. *Dixit & facta sunt*, id est ratione cuncta condidit siue ordinauit. Qui etiam hoc verbum alibi apertius demonstrans, non esse verbum audibile, & transitorium, sed intelligibile & permanens, ait. *Qui fecit cælos in intellectu*, hoc est ad modum illum quo eos primum ordinauerat in verbo mentis, id est in conspectu suæ perpetuæ omnia prouidentis intelligentiæ. Hanc autem intellectualem Dei locutionem, id est æternam suæ sapientiæ ordinationem August. de Ciuit. Dei lib. xvi. cap. vi. describens, Dei, inquit, ante factum suum, locutio sui ipsius facti est incommutabilis ratio, quæ non habet sonum strepentem atque transeuntem, sed vim sempiternè manentem, & temporaliter operantem.

XII.

QVEMADMODVM verò quæ ad potentiam pertinent, patri; quæ ad sapientiam, filio specialiter tribuuntur: ita quæ ad operationem diuinæ gratiæ attinent, ac diuinæ charitatis bonitatem, Spiritui sancto ascribuntur: sicut est remissio peccatorum, & quorumcumque donorum distributio, ex sola bonitate eius, non verò ex meritis nostris proueniens; qualis est regeneratio in baptismo ad dimittenda peccata, confirmatio per impositionem manus Episcopi, ad dandam armaturam virtutum, quibus scilicet virtutibus post remissionē peccatorū perceptam, resistere valeamus inimico tunc vehemētius insurgēti. Sic & cetera sacramēta quæ in Ecclesia conficiuntur, ex bonitate

bonitate Dei Spiritui tribuenda sunt, ut ex hoc patenter innuatur ipsum diuinæ bonitatis affectum, atque diuinæ gratiæ dulcedinem Spiritus sancti vocabulo exprimi. Spiritu quippe oris nostri, id est anhelitu maximè affectus animi patefunt, cum videlicet aut præ amore suspiramus, aut præ laboris aut doloris angustia gemimus. Vnde in hoc loco Spiritus sanctus pro affectu benè ponitur, iuxta illud Sapientiæ. *Benignus est spiritus Sapientiæ &c.* atque illud Psalmistæ. *Spiritus tuus bonus deducet me in terram rectam &c.* Vnde & Apostolus, *Deus charitas est*, quia teste Gregorio, spiritus ipse amor est. De quo etiam August. in primo super Genesim, eo loco quo scriptum est. *Spiritus ferebatur super aquas*, ita meminit. Egenus atque indigens amor ita diligit, ut rebus quas diligit subijciatur. Propterea cum memoraretur Spiritus Domini in quo sancta eius beneuolentia dilectioque intelligatur, superferri dictus est, ne faciendo opera sua per diligentiae necessitatem, potius quam per abundantiam beneficentiæ Deus amare putetur. Idem in xiv. de Trinit. denique si in nobis Dei nil est maius charitate, & nullum est maius donum Dei quam Spiritus sanctus; quid consequentiùs, quàm quod ipse sit charitas quæ dicitur Deus, & ex Deo? Quod si charitas qua diligit Pater filium, & Patrem diligit filius ineffabiliter communionem amborum demonstrat, quid conuenientiùs quàm ut ille propriè dicatur charitas quæ spiritus est communis amborum? Idem supra lib. v. Spiritus sanctus secundum id quod dictum est, quia Deus spiritus est: potest quidem vniuersaliter dici, quia & Pater spiritus, & Filius spiritus, & Pater sanctus, & Filius sanctus, & post pauca. Spiritus sanctus quædam patris filiique communio est, & ideo fortasse sic appellatur, quia patri & filio potest eadem appellatio conuenire. Ut ergo ex nomine quod utrisque conuenit, vtriusque communio significetur, vocatur donum amborum Spiritus sanctus. Idem in xv. Multis exemplis dici possunt multarum rerum vocabula & vniuersaliter poni, & propriè quibusdam rebus adhiberi. Hoc ideo dixi, ne quisquam propterea nos inconuenienter existimet charitatem appellare Spiritum sanctum, quia & Deus Pater, & Deus filius, possunt charitas appellari. Clarum itaque, ex supra positis arbitror testimonis, diuinam ut diximus.

potentiā vocabulo patris exprimi, diuinam sapientiam filium intelligi, ac diuinæ gratiæ bonitatem Spiritum sanctum appellari. Tale itaque est dicere Domini potestatem, ac si dicamus diuinam potentiam, ex qua diuina genita est sapientia. Tale est & dicere, Deum filium; quasi diceremus, diuinam sapientiam ex diuina genitam potentia. Spiritum verò sanctum cum dicimus, tale est, ac si commemoremus diuinæ bonitatis charitatem, ex patre & filio pariter procedentē. Modum verò huius generationis seu processions proūit Dominus dederit, in sequentibus exponemus. Nunc autem ad nostræ fidei assertionem aduersus vniuersos Christianæ fidei derisores, tam Iudæos scilicet quàm Gentiles, ex scriptis eorum testimonia inducere libet, quibus hanc Trinitatis distinctionem omnibus annunciatam esse intelligant, quamquidem diuina inspiratio & per Prophetas Iudæis, & per Philosophos Gentibus dignata est reuelare, vt vtrumque populum ad cultum vnius Dei ipso summi boni perfectio agnita inuitaret, ex quo omnia, per quem omnia, in quo omnia, & facilius hæc fides Trinitatis tempore gratiæ susciperetur ab vtroque populo, cum eam à doctoribus quoque antiquis viderent esse traditam.

XIII.

PRIMUM ipsa legis exordia occurrant, vbi legislator Moyses fidem Catholicam de vnitae pariter & Trinitate tanquam omnium bonorum fundamentum anteponit. Cum enim dicitur, *In principio creauit Deus cælum & terram*. Pro eo quod apud nos dicitur Deus, Hebraica veritas habet, *Heloym*, quod est plurale huius singularis, quod est *Hel*. Quare ergo non dictum est *Hel*, quod est Deus, sed *Heloym*, quod apud Hebræos dii siue iudices interpretatur, nisi hoc ad multitudinem diuinarum personarum accommodetur: vt videlicet eo modo insinuetur pluralitas in Deo, quomodo & Trinitas; & quodammodo multiplex dicatur Deus quomodo & trinus, non secundum quandam substantiæ diuersitatem, sed secundum personarum proprietates? Vt videlicet tale sit quod dictum est *Heloym*, ac si diceretur, non res multæ, sed personæ multæ, quarum vnaquæque sit Deus, alioquin plures etiam dicerent Deos, cum vnus sit tantum. Nam & ibidem de vnitae substantiæ demonstranda cautè prouisum est, cum dicitur *Creauit*, non creauerunt, seruata singularitate numeri in ver-

bo secundum vnitatem substantiæ per subiectum nomen intelligentiæ, quamuis scilicet istud nomen secundum formam vocis & terminationem declinationis sit pluralis numeri, sicut è contrario cum dicitur, Turba ruunt, ad nomen singularis numeri plurale verbum applicatur, iuxta intelligentiam scilicet pluralitatis rerum per subiectum nomen intelligentiæ. Tale est ergo *Heloym* creauit, ac si diceretur, Trinitas personarum diuinarum creauit, id est cooperata est. Vbi & statim in sequentibus distinctionem personarum annectit: quasi ad determinandum quod ad hanc denotandam *Heloym* pluraliter dixerat. Spiritus quidem sancti æternitas patenter ostenditur, cum dicitur, *Spiritus domini ferebatur super aquas*. Verbum verò, id est filius, simul & patenter insinuatur, cum dicitur, *Dixit Deus fiat*: hoc est in dicto suo seu verbo, id est, in coæterna sapientia sua pater ordinauit facienda. Non enim de corporali locutione hoc accipi potest. In eo quoque quod scriptum est, *Et vidit Deus quod esset bonum*, Bonitas Dei quam Spiritum sanctum dicimus, insinuatur: sicut in eo quod dicitur, *Dixit Deus*, intelligitur verbum & pater. Tale est enim quod dicitur, *Vidit Deus quod esset bonum*, ac si dicatur intelligendo, quia opus quod facerat bonum esset, amauit illud, eo ipso quod bonum erat. Ex quo & ipse bonus esse liquidò monstratur. Quid etiam apertius ad documentum Trinitatis esse potest, quam illud quod postea in creatione hominis subiungitur, dicente Domino, *Faciamus hominem &c.* Quid enim pluraliter dictum est *Faciamus*, nisi vt cooperatio totius Trinitatis exprimatur? Quippè quos cohortaretur Deus ad creandum hominem, aut ad se in aliquo iuuandum, cum ipse solus creaturus sit? Scriptum namque est, *Quis adiuuit Spiritum Domini? aut quis Consiliarius eius fuit? Cum quo inijt consilium &c.* Benè autem ad imaginem, & similitudinem Trinitatis, hoc est ad expressam similitudinem quandam trium personarum, homo fieri dicitur, qui & patrem per potestatem, quam in ceteras creaturas accepit, imitatur: & filium per rationem, & spiritum per innocentiae benignitatem, quam postmodum per culpam amisit. Ad hanc quoque pluralitatem diuinarum personarum illud attinere videtur, quod in sequentibus per serpentem dictum est. *Eritis sicut dy*, quod vt superius dictum est in Hebraico sonat *Heloym*, id est diuinæ

personæ potius quàm Dij diuersi, nec non & illa dominica increpatio. *Ecce Adam quasi vnus ex nobis factus est, & rursus istud quod Dominus ait. Descendamus & confundamus linguam eorum, cum hoc solus deus compleuerit. Vnde & subditur. Atque ita diuisit eos.* Nunc autem post legem, ad Prophetas transcamus.

AIT itaque maximus Prophetarum & Regum David, qui suam ceteris intelligentiam præferens dicit: *Super omnes docentes me intellexi. Et: Super senes intellexi.* Ait inquam distinctionē Trinitatis patenter insinuans: *Verbo Domini cæli firmati sunt, & spiritus oris eius omnis virtus eorum.* Qui & alibi vnitatem pariter cum Trinitate insinuat dicens, *Benedicat nos Deus, Deus noster; benedicat nos Deus, & metuant eum omnes fines terre.* Trina quippè confessio Dei, Trinitatem exprimit personarum, patris scilicet, & Filij, & Spiritus sancti. Benè autem filium Dei designans addidit, *noster*, quasi eum participem nostræ naturæ, & à patre nobis esse datum ostendens, cum per incarnationem verbi diuina nos sapientia illuminauit. De quo etiam verbo Apostolus ait, *Proprio filio suo non pepercit, sed pro nobis omnibus tradidit illum.* Vnitatem verò diuinæ substantiæ Psalmista in eodē aperit, cum post ternam diuini neminis prolationem, vnum tantummodo Deum in tribus personis intelligens, non coniunxit eos pluraliter, sed singulariter. Hinc & illud consonat Isaïæ quod dicit se vidisse Seraphin & audisse clamantia. Sanctus, Sanctus, Sanctus, Dominus Deus sabaoth. Rectè autem vocabulo Domini vsus est Propheta ad potentiam designandam, quia dominorum est præesse. Quæ videlicet potentia plerūque etiam hoc nomine Deus assignatur. Eo videlicet quod Θεός Græce, id est Deus, teste Isidoro, timor interpretatur, & potestas quælibet timor est subiectorum. Quod autem verbum Dei, ipsa sapientia eius sit intelligendum, apertè in Ecclesiastico monstratur his verbis. *Omnis sapientia à domino Deo est, & cum illo fuit semper & est ante eum. Sapientiam Dei precedentem omnia quis inuestigauit? Prior omnium creata est sapientia, & intellectus prudentiæ ab æuo, fons sapientiæ verbum Dei in excelsis, &c.* David quoque æternam filij generationem ex patre Deo apertè insinuat, vbi personam filij introducit loquentis sic, *Dominus dixit ad me, filius meus es tu, ego hodie genui te, postula à me & dabo tibi gentes ha-*

reditatem. Tale est autem quod ait, *Ego hodie genui te*, ac si diceret. *Æterna lux ex ipsa mea substantia es*: nam quia in æternitate nihil, præteritum aut futurum, sed tantummodo præsens, id circo aduerbio temporis præsentis, pro æternitate est usus dicendo hodie, pro æternaliter. Benè autē ad hodie addidit genui, quasi præsens præteritum, ut videlicet ipsam generationem per hodie præsentem, semper, per genui, perfectam esse indicaret, nunquam scilicet aut cessare, aut inceptam esse. Quippè quæ præterita sunt, iam completa sunt & perfecta, ideoque præteritum quasi pro perfectione posuit, ostendens scilicet filium ex Patre semper, generari & semper genitum esse. Qui & alibi apertius æternitatem filij protestatur dicens. *Permanebit cum Sole & ante Lunam, in generatione & generationem, & rursus, Tecum principium.* de hac etiam ineffabili & æterna generatione, siue etiam temporali, quarum utraque mirabilis est, Isaïas admirans ait. *Generationem eius quis enarrabit?* Ac si apertè diceret. Non est hoc differere humani ingenii, sed solius Dei, cuius tamen spiritus in his fidelibus quos vult loquitur, ipso attestante qui ait: *Non enim vos estis qui loquimini, sed spiritus patris vestri qui loquitur in vobis.* Hieronymus etiam super Ecclesiastem eo loco quo dicitur, *Quis scit spiritus filiorum hominū si ascendat sursum, & spiritus pecoris descendat deorsum in terra?* Illud quod dictum est, *Generationem eius quis enarrabit?* ad exemplum difficilis non impossibilis trahit dicens, *Adiiciendo, quis, difficultatē rei voluit demonstrare.* Pronomen enim quis, in scripturis sanctis, non pro impossibili, sed pro difficili semper accipitur, ut ibi. *Generationem eius quis enarrabit?* id est Christi, &c. Hæc etiam sapientiæ coæternitas cum patre planè in Prouerbiis monstratur his verbis: *Ego sapientia habito in consilio. Dominus possedit me in initio viarum suarum antequam quicquam faceret ab initio; ab æterno ordinata sum, antequam terra fieret. Necdum erant abyssi, & ego iam concepta eram; necdum fontes, necdum montes. Ante colles ego parturiebar. Adhuc terram non fecerat, & cardines orbis terre. Quando preparabat celos aderam, quando appendebat fundamenta terre, cum eo eram cuncta componens, & delectabar per singulos dies ludens coram eo omni tempore.* Quid enim apertius ad æternam generationem Verbi, quàm id quod ipsa sapientia perhibet se ante constitutionem mundi conceptā esse & parturiri, & se cum

patre æternaliter permanentem semper ludere coram eo? Quippè quod conceptum parturitur, utique in ipso est à quo generatur, & sapientia in ipsa substantia siue in essentia potentia est. Cum ipsa scilicet quædam sit potentia, sicut posterius ostendemus. Tale est ergo sapientiam conceptam parturiri à Deo, ac si dictum sit, ipsam sapientiam ex ipsa patris substantia ex qua est gigni. Tale est sapientiam ludere coram patre, & cum ipso cuncta componere, ac si dixerit ipsam diuinam potentiam omnia in sapientia pro bonitatis suæ arbitrio disponere, ut in ipso ludo ipsum bonitatis effectum intelligamus, de quo scriptum est, *Spiritus oris eius, omnis virtus eorum*. Quod autem ait, Sapientiam coram Deo patre semper assistere, tale est omnipotentiam ipsam nil efficere nisi præeunte ratione & ducatu sapientia. Item in eisdem Prouerbijs de filio Dei & ineffabili nomine ipsius quoque filij manifestissimè scripsit, quasi inducens personam admirabilis cuiusdam prophetæ, hanc inenarrabilem generationem prophetantis atque admirantis. Dicit quippè sic. *Visio quam locutus est vir cum quo est Deus, & quæ Deo secum morante confortatus, ait: Quis suscitauit omnes terminos terræ? quod nomen eius, aut quod nomen filij eius? Quam firmum etiam & quam apertum fidei nostræ testimonium in Ecclesiastico occurrit, ubi quidem sapientia Dei & se primogenitam ante omnia dicit secundum diuinitatis naturam, & postmodum creatam secundum naturæ nostræ assumptionem, cum ipsa videlicet ad imperium patris per Incarnationis habitum uisita-uerit Israel? Scriptum quippè est ibi, Sapientia in multitudine electorum habebit laudem, & inter benedictos benedicetur dicens. Ex ore altissimi prodij primogenita ante omnem creaturam, ego in cælis feci ut oriretur lumen indeficiens, & sicut nebula texi omnem terram. Ego in altissimis habito, & thronus meus in columna nubis. Cirum cæli circuiui sola, &c. Et post pauca. Tunc precepit & dixit mihi creator omnium, & qui creauit me requieuit in tabernaculo meo, & dixit mihi. In Iacob in habita, & in Israel hereditare, & in electis meis mittere radices. In eodè quoque Libro apertissimè peccatorum remissionem consistere in incarnatione diuinæ sapientia quæ Christus est prophetat dicens, peccata David per Christum purgata esse. Ibi enim cum de laude David plura dicerentur, summa totius laudis in hoc vno collecta est quod subditur. Christus pur-*

gavit peccata ipsius, & exaltauit in æternum cornu eius, & dedit illi testamentum regum, & sedem glorie in Israel. Micheas quoque de hac æterna verbi generatione ex patre, nec non & de temporali ex matre ait. *Et tu Bethleem Effrata paruula es in millibus Iuda, ex te egredietur qui sit dominator in Israel, & egressus eius ab initio à diebus æternitatis.* Dicant rebelles & increduli Iudæi, de quo nascituro in Bethleem hoc dictum sit, quod videlicet egressus eius ab initio sit à diebus æternitatis. Æternum quippe est quod origine caret. Quod si hoc referant ad Messiam illum, scilicet maximum prophetam, vt aiunt, quem expectant, qui tamen secundum eos homo purus erit, non etiam Deus, ostendant quis egressus eius æternus sit, vel vnde æternaliter egrediatur. Si autem dicant eum æternaliter egredi ex Bethleem, eo quod eius natiuitas in eo loco futura ab æterno præuisa sit à Deo & prædestinata, hoc vtique modo cuiuslibet hominis, vel cuiuslibet rei natiuitas æterna est, quia videlicet ab æterno præuisa. Discant itaque æternam generationem esse quam ex scriptura legunt, & legendo profitentur, & profitentes non credunt. Respondeant etiam mihi cum audiunt prophetam dicentem, *Verbo Domini cæli firmati sunt, & spiritu oris eius omnis virtus eorum*, quid per verbum Domini, quid per os eius, & per spiritum intelligant. Vnum quippe omnium aliarum rerum principium Deum constare esse. Et omne quod est, aut Deus est, & ideo æternum, aut ab æterno illo principio manet creatum. Scriptum præterea est. *In principio creauit Deus cælum & terram*, vnde ante hoc nihil creatum esse volunt. Verbum itaque illud quo cæli firmati sunt, & ideo prius est his quos constituit, creatum non est, imo creator ipse qui Deus, quo cæli firmati sunt. Si autem hoc verbum locutionem aliquam dei transitoriam appellant, sicut & verbum hominis, eo videlicet quo scriptum est. *Dixit Deus, & facta sunt*, atque ita Deus quoque sicut homo modo loquatur, cum ait, *fiat lux*, modo conticeat, profecto permutabilis est diuinitatis æternitas, cum non semper dicat fiat lux & c. quæ iam condita sunt. Quid etiam opus verbo audibili fuit ante mundi constitutionem, cum nondum esset qui loqueretur, vel qui audiretur? Nunquid inane verbum non protulit, si opus verbo non fuerit? præsertim cum sola voluntas sufficeret, nec ad hæc aliquis esset, qui audito verbo instrueretur. Quo

etiam proferendo verbum emitteret, cum nullus adhuc locus creatus esset, nec aer adhuc conditus ex quo verba formantur. Quibus etiam instrumentis verba formaret, cum nec os, nec pars aliqua inesse possit ei qui omnino simplex est, & indiuisibile? Omne quippè quod partibus constat, posterius est naturaliter his ex quibus constat, & quorum conuentu perficitur, cum ex ipsis suum esse contrahat ex quibus est constitutum. Omne etiam, inquit Plato, quod iunctum est natura dissolubile est. Quod si Spiritum domini ventum intelligant, sicut ibi accipere volunt, *Spiritus Domini ferebatur super aquas*, eo, ut aiunt, quòd ventus in aquis quas commouet, maximè appareat: quomodo spiritus, id est flatus domini oris esse dicatur, cum videlicet neque os, neque aliquam partem ut dictum est habeat? Quomodo etiam per ventum virtus cœli consistit & terræ? Intelligant ergo hunc esse illum spiritum Domini, cuius septiformem gratiam Isaias describens ait. *Et requiescet spiritus Domini super eum, spiritus sapientiæ & intellectus, spiritus consilij & fortitudinis, &c.* Et alibi. *Et nunc dominus misit me & spiritus eius.* Et rursus, *Spiritus domini super me, eo quod unxerit me, ad annunciandum mansuetis misit me.* De quo etiam in Sapientia dicitur, *Spiritus sanctus effugiet discipline fictum, benignus est enim spiritus sapientiæ, &c.* De quo iterum cum subditur, *Et hoc quod continet omnia scientiam habet vocis*, apertè ipse spiritus Deus esse perhibetur, cum omnia continere dicatur. Et iterum ad Deum loquens Sapientia dicit. *Sensum autem tuum quis sciuit, nisi tu dederis sapientiam, & miseris spiritum tuum sanctum de altissimis?* Et rursus, *O quàm bonus & suavis domine spiritus tuus in nobis!* Hinc etiam cum ipse spiritus sapientiæ describeretur, verus Deus planè prædicatur, cum inter cætera de eo scriptum sit in Sapientia sic, *Omnes habens virtutem, omnia prospiciens, & qui capiat omnes spiritus.* Quem etiam Heliud in libro Iob confitetur creatorem dicens, *Spiritus Domini fecit me, & spiraculum omnipotentis viuisificauit me.* Cuius & filius ipse Dei in Euangelio æqualem sibi & patri dignitatem ascribens dicit, *Ite, docete omnes gentes &c.* Nec non & Apostolus teste Augustino, cum templum spiritus sancti nominauit, apertè eum esse Deum pronunciat, cum solius templum Dei esse dicatur. Scriptum quippè est in Apostolo, *Nescitis quoniam templum Dei estis, & spiritus Dei habitat in vobis?* Vbi apertè in-

sinuat

XII.

sinuat Deū ipsum cuius est tēplum, & spiritū Dei quem inhabitare dicit idē esse. Sic & beatus Petrus in actibus Apost. Spiritū sanctū deū esse profitetur dicens, *Vt quid mentitus es Spiritui sancto Anania? non es mētitus hominibus, sed Deo.* De quo iterū spiritu in eisdē actib. continetur. Hoc dicit spiritus iubens. *Separate mihi Barnabā & Paulū &c.* & rursum. *Placuit Spiritui sancto & nobis.* Et Psalmista Spiritū Dei vbiq. esse tanquā incircūscriptum profitetur dicens. *Quo ibo à spiritu tuo? Qui & statim ut ipsum spiritum Dei, quem vbiq. esse profitetur, idem esse cum ipso Deo ad quem loquitur, insinuet; per hoc patenter ostendit quod statim spiritum ipsum vbiq. esse assignat per ipsum Deum quem vbiq. esse astruit, dicens: Si ascendero in cælum tu illices &c.* Sed & cū veritas ipsa perhibet, peccatum in spiritum non esse remissibile, cum peccatum in patrem vel in filium remissibile dicat, cui apertē non insinuet spiritum ipsum non minorem esse patre vel filio, & per hoc etiam ipsum Deū plenum esse sicut est pater ipse vel filius? Liquet itaque ex suprapositis tam verbum Dei quàm spiritum eius, Deum esse; sicut & ipse cuius est verbum vel spiritus. Intelligant igitur, ut dictum est, hoc verbum Deum, id est filium Dei, non transitorium verbum, non audibile, sed intellectuale, hoc est ipsam rationem siue sapientiam coeternam Deo, quam dici conuenit omnisapientiam sicut & dicimus omnipotentiam, vnde & scriptum est, *Omnis sapientia à Domino Deo est, & cum illo fuit semper, & est ante auum.* Qui etiam in libro Sapientiae verus Dei filius & consubstantialis monstratur, ad differentiā scilicet adoptiuorum filiorum, de quibus per prædicationem eius Deo acquisitis scriptum est. *Quotquot autem receperunt eum, dedit eis potestatem filios Dei fieri, his qui credunt in nomine eius.* Sic quippè cum eius passio in Sapientia manifestè prophetaretur, inter cætera ab impijs dictum est. *Si enim verus Dei filius est, suscipiet illum & liberabit de manu contrariorum.* Hanc & apertè generationem profitetur sancta anima per Deum liberata cum in Ecclesiastico dicit, *Inuocaui Dominum patrem Domini mei, ut non derelinquat me in die tribulationis meæ.*

N V N C autem post testimonia Prophetarum de fide sanctæ Trinitatis, libet etiam testimonia Philosophorum supponere, quos ad vnius Dei intelligentiam cum ipsa Philosophiæ ratio perduxit, qua iuxta Apostolum, *Inuisibilia ipsius Dei à*

XV.

creatura mundi per ea quæ facta sunt, intellecta conspiciuntur, tum etiam ipsa continentissimæ vitæ sobrietas, quodam eis merito idipsum acquisiuit. Oportebat quippè tunc etiam, ut in ipsis præsignaret Deus per aliquod abundantioris gratiæ donum quàm acceptior sit ei qui sobriè viuit, & se ab illecebris huius mundi per contemptum eius abstrahat, quàm qui voluptatibus eius deditus, spurcitijs omnibus se immergit. Quantæ autem incontinentiæ vel abstinentiæ Philosophi fuerint, sancti etiam Doctores tradunt, qui & eorum vitam ad nostram increpationem aduehant, & pleraque ex documentis eorum moralibus, vel testimonijs fidei, ad ædificationem nostram assumunt: quod qui ignorat, legat saltem Hieronymum contra Iovinianum, & viderit quanta de eorum virtutibus & ceterorum gentilium referat, ad impudentiam scilicet illius hæretici conterendam. Maximè autem & nos opere hoc testimonijs seu rationibus Philosophorum niti convenit, in quo aduersus eos præcipuè agimus, qui fidem nostram Philosophicis nituntur oppugnare documentis, præsertim cum nemo nisi per ea quæ recipit, arguendus sit aut conuincendus; & ille nimia confusione conteratur, qui per eadem vincitur, per quæ vincere nitebatur. Philosophos autem vnum tantummodo Deum cognoscere vnus ex ipsis Tullius in primo Rhetoricorum perhibet dicens: Eos qui Philosophiæ dant operam non arbitrari deos esse, ac si aperte dicat, immo vnum deum, non deos plures. Qui etiam qualiter deo reuelante ad ipsius diuinæ Trinitatis cognitionem conscenderint, Paulus quoque Apostolus in Epistola ad Romanos patenter insinuat dicens, *Quod notum est Dei, manifestum est in illis, Deus enim illis reuelauit. Inuisibilia enim ipsius à creatura mundi per ea quæ facta sunt, intellecta conspiciuntur. Sempiterna quoque eius virtus & diuinitas, ita ut sint inexcusabiles, quia cum cognouissent Deum, non sicut Deum glorificauerunt, aut gratias egerunt, sed euenerunt in cogitationibus suis &c.* Vnde & Claudianus Prætorio Patricio de statu animæ scribens, his meminit verbis. Et quoniam mortalium generi natura datum est, ut abstrusa fortius quærat, ut negata magis ambigat †, ut tardius adepta plus diligit; eo flagrantius animaduertetur veritas, quo diutius desideratur, vel laboriosius queritur, vel tardius inuenitur. Hinc factum, ut Philosophi quoque excellentibus ingenijs

longi seculi de veritate quærentes abvsque Pitagora Italico, vel Ionico Talete semper extiterint, qui dissidentibus aliis, vel in parte operis aliud dignum tanta indage senserunt. Vnde etiam doctor gentium non tam ignaros veri Philosophos, quàm cognitionis contemptores accusat, inquiens, *Inuisibilia Dei à creatura mundi per ea quæ facta sunt intellecta &c.* Hinc etiam illud est Augustini de ciuitate dei lib. viii. Homo Christianus literis tantum Ecclesiasticis eruditus cauet eos, qui secundum elementa huius mundi philosophantur. Admonetur enim Apostolico præcepto. *Cauete ne quis vos decipiat per Philosophiam & inanem seductionem secundum elementa mundi*, Deinde ne omnes tales arbitretur, aliud audit ab eodem Apostolo de quibusdam, *quia quod notum est Dei, manifestum est in illis &c.* Et vbi Atheniensibus loquens, cum rem magnam de Deo dixisset, & quæ à paucis posset intelligi, *Quod in illo viuimus, mouemur, & sumus*, adiecit, *sicut & vestri quidam dixerunt.* Idem in lib. de spiritu & litera. Vita sapiens quæ fecit mundum, contemplato mundo intelligitur. Interroga mundum & ornatû cœli, terram fructificantem herbis, & lignis, & animalibus plenam, mare quantis natantibus plenum est, aerem quantis volatilibus, interroga omnia & vide si non omnia specie sua tanquam voce tibi respondeant, Deus nos fecit. Hæc Philosophi nobiles quæsierunt, & ex arte artificem cognouerunt. Isidorus de summo bono lib. i. cap. iv. sicut laus operis in artificem retorquet laudem, ita & rerum creator per creaturam suam laudatur, & quanto sit excellentior ex ipsa operis conditione monstratur. Item collaudant Deum & insensibilia per nos, dum ea considerâtes Deum laudamus. Dixerunt antiqui quia nihil sit quod non sensum habeat in Deum, nemo itaque miretur, si ab ipsis quoque Philosophis, qui tot sanctorum assertionibus ad diuinitatis notitiam ipso etiam Domino reuelante conscenderunt, testimonia inducamus. Licet eorum plurimi ab ipso quoque Apostolo grauer arguantur, eo quod iuxta illud quod ipsemet ait, *scientia inflat*, ex ipsa diuinæ notitiæ prærogatiua superbiendo reprobi facti sunt: non enim eos in exēplo viuendi hoc loco assumimus, sed docendi siue credendi, sicut & Salomonem frequenter. Cuius tamen sapientiæ excellentia ipsius etiam Domini testimonio omnibus præferēda, per concupiscentiā carnalesque volupta-

tes deuicta idolatriæ consensit, diuino cultu derelicto, quem in scripturis suis & docebat & prædicabat. Ad quæ etiam cultû Dei magnificandum ipse iussu Dei templum ædificauit, à quo pater eius iustus inhibitus fuit. Deus autē reprobis & infidelibus nonnumquam maxima dona distribuit, quæ aliorû doctrinæ vel vsui necessaria fore videt. Nec nō & per reprobos multa miracula operatur, de quibus veritas in Euāgelio: *Multi dicent mihi in illa die, Domine, Domine, nonne in nomine tuo prophetauimus, & in nomine tuo demonia eiecimus, & in nomine tuo virtutes multas fecimus? Et tunc confitebor illis quia non noui vos, discedite à me omnes qui operamini iniquitatem.* Deus autē cū per reprobos aut miracula ostēdit, aut prophetias loquitur, aut quælibet magna operatur, non hoc ad vtilitatem ipsorum agere quibus vititur tanquam ministris, sed potius aliorum, quos instruere per istos intendit. Qui & per indignos ministros gratiæ suæ dona non deserens, quotidie sacramenta Ecclesiæ ad inuocationem sui nominis spiritualiter conficit in salutem credentium. Benè autem & per indignos siue infideles maxima Deus operatur, qui verbis Asini Prophetam docuit, ne si per magnos tantum magna operaretur, virtutibus meritisque hominum magis quàm diuinæ gratiæ hæc tribuerentur. Nequando tamen de salute omnium desperet Philosophorum, aut omnium vitam existimet reprobā, qui dominicam incarnationem præcesserunt, beatum audiat Hieronymum, Euangeliū Mathæi exponentem. Ait quippe sic inter cætera. Ex eo quod malus seruus ausus sit dicere, *Metis ubi non seminasti, & congregas ubi non sparsisti*, intelligamus etiam gentiliū Philosophorum bonam vitam recipere Deum, aliter habere eos qui iustè & aliter eos qui iniustè agunt. Si enim supra positam ab Apostolo causam discutiamus, qua videlicet quosdam eorum post diuinam quam assecuti sunt notitiam, in reprobum sensum tradi meminert, cum in suis scilicet euanescerent cogitationibus, dicentes se esse sapientes, id est suam sapientiam proprio studio vel ingenio ascribentes, non diuinæ gratiæ dono tribuentes, reperiemus eos qui præcipui habentur, omnem præcipuè philosophiam diuinæ tribuere gratiæ, veluti Socratem siue Platonem. Socratem quidem lib. ix. de ciuit. Dei beatus August. talibus effert præconijs. Socrates magister Platonis, vniuersam philosophiam ad corrigendos componendosque mores

exegisse commemoratur. Hic animum intendit ad hoc quod esset beatæ vitæ necessarium, per quam vnam omnium philosophorum inuigilasse ac laborasse videtur industria. Nolebat immundos terrenis cupiditatibus animos se in diuina conari, quandoquidem ab eis causas rerum videbat inquire, quas primas atque summas, non nisi in vnius vim ac summi Dei voluntate esse credebat. Vnde & non eas putabat nisi mundata mente posse comprehendere, & ideo purgandis bonis moribus vitæ censebat instandum, vt deprimentibus libidinibus exoneratus animus, naturali vigore in æterna se attolleret, naturamque incorporalem atque incommutabilis luminis, vbi causæ omnium factarum naturarum stabiliter vniuntur, intelligentiæ puritate conspiceret. A Platone quoque in primo de republica personam Socratis & Thimæi inducente scriptum est ita. Socrates. Ergo agè, Thimæe, deliba cœptum, vocata, vt mos est, in auxilium diuinitate. Thimæus. Verè mi Socrates. Nam cum omnibus mos sit, & quasi quædam religio, qui de maximis vel minimis rebus aliquid sunt acturi, precari auxilium diuinitatis, quantò nos æquius est, qui vniuersitatis naturæ substantiæ quæ rationem præstaturi sumus, inuocare diuinam opem, nisi planè sæuo quodam furore atque implacabili raptemur amentia? Ecce aperte ex his verbis Platonis asseritur morem hunc esse Philosophis, vt tam in maximis quàm minimis quæ agenda sunt diuinum inuocent auxilium, & pro summo furore atque implacabili amentia id si dimittatur apud eos haberi. Quod itaque ait Apostolus, quosdam philosophorum & gentilium sapientum, hoc quod de Deo vel exteris intelligebant, sibi potius quàm Deo ascripsisse, atque hinc excæcari meruisse, paucis potius quàm multis imputandum videtur, sicut & ipsa turpitudinis pœna quam consequenter adiungit dicens. *Propterea tradidit illos Deus in passionem ignominie.* Et rursus. *Masculi*, inquit, *in masculos turpitudinem operantes, &c.* Constat quippè philosophos maximè continenter vixisse, atque ad continentiam tam scriptis quàm exemplis multas nobis exhortationes reliquisse. Sed si quis sine fide venturi eos saluari posse contradicat, quomodo id comprobare poterit, quod in eum scilicet non crediderint, quem etiam per gentilem fœminam, id est Sibyllam multo ferè apertius, quàm per omnes prophetas vaticinatū viderint? Neque enim ideò

astruendum est eos incarnationem Domini futurā non expectasse, aut nō credidisse, quia hoc in scripturis eorum minimē reperitur, cum nec fortasse in omnibus eorum prophetarum scriptis ipsa satis sit expressa, diuino id disponente consilio, ut non quibuscumque, aut per quoslibet, tantum reuelaretur arcanum, cum etiam prouida dispensatione septuaginta interpretes in multis scripturarum locis quas transferebant scriptū Dei filium reperiētes, hoc penitus præterisse ac reticuisse dicuntur, ne scandalum scilicet infidelibus auditoribus magis commouerent, quā fidem astruerent. Scimus quippē Philosophos cum de dijs, quos populus venerabatur, diuersa à cæteris sentirent, & ideo à populo in fide dissentirent, metu tamen compulsos, communia cum illis templa tenere, & cærimonias eorū interesse, ac se patiter idolatras simulasse. Vnde August. de vera Relig. Sapientes, inquit, quos philosophos vocant, scholas habebant dissidentes, & templa communia, non enim vel populos vel sacerdotes latebat de ipsorum natura Deorum quam diuersa sentirent. Omnes tamen cū sectatoribus suis diuersa & aduersa sentientibus ad sacra communia nullo prohibente veniebant. Sed certē illud satis quantum mihi videtur, oportet aliud eos in religione suscepisse cum populo, & aliud eosdem ipso populo audiente deffendisse priuatim. Socrates tamen audacior cæteris fuisse perhibetur, iurando per canem quemlibet aut lapidem, & quicquid iuraturum quasi ad manum occurrisset. Credo intelligebat qualiacumque opera naturæ, quæ administrante diuina prouidentia generentur, multo quam hominum meliora, & ideo diuinis honoribus digniora quā ea quæ in templis colebantur. Non quod verē canis aut lapis essent colenda sapientibus, sed ut hoc modo intelligerent, quod possent tanta superstitione euersos esse homines, ut esset tam turpis demonstrandus gradus, ad quem venire si puderet, viderent quanto magis pudendum esset in turpiore consistere. Similiter & illos qui mundum istū visibilem summū Deum esse opinantur, admonebat turpitudinis suæ, docens esse consequens, ut quilibet lapis tamquam summi Dei particula iurē coleretur. Item, Socrates cum populo simulachra venerabatur, & post eius damnationem mortemque nemo ausus est iurare per canē, nec appellare quemcumque Iouem, sed hoc tantūmodo memoriæ literisque mā-

dare. Quod vtrum timore an aliqua cognitione fecerint; iudicare non est meū. Ex his itaque verbis apertè docemur quod scholæ id est doctrinæ Philosophorum longè in fide dissentirent à vulgo, eum quo tamen habebant Tempia communia, cum eos omnes à se in fide dissidere tam populus quàm sacerdotes sentirent. Nec solùm diuersos à fide, sed aduersos etiam existere. Qui cum manifestè cum populo exteriorem religionem Templis exhiberent. *Stultorum* scilicet, quorū *infinītus est numerus*, multitudinem metuentes, priuatim tamen, & quasi sapientiam loquentes inter perfectos, ipso etiam nonnunquam populo audiente, sectam fidei contrariam profitebantur atque defendebant. Quorum quidem Soerates maximus idololatriæ derisor, in tantū plures Deos, id est idola, contemptū adduxit, vt eis canē præferre auderet, per quem ad hanc irrisiōnem iusiurandum susceperat, vnde & antiquorum nominum gloriam ipsis abstulit Idolis. Superest nunc vt proposita quoque Philosophorum proferamus de fide testimonia, vt vtrumque populum infidelem ex ipsis suis doctoribus confutemus: Iudæos scilicet ex Prophetis, Gentiles ex Philosophis.

PRIMVS autem nunc ille antiquissimus Philosophorum, & magni nominis occurrat Mercurius, quem pro excellentia sua Deum quoque appellauerunt. Cuius quidem testimonium de generatione verbi August. contra quinque hæreses disputans inducit, dicēs: Hermes, qui Mercuri⁹ Latinè dicitur, scripsit lib. qui appellatur λόγος τέλειος, id est verbum perfectum. Audiamus quid loquatur de verbo perfecto. Dominus, inquit, & factor omnium deorum secundum fecit dominum, hunc fecit primum, & solum & verum. Bonus autem ei visus est, & plenissimus omnium bonorum: latatus est, & valde dilexit eum tanquam vnigenitum suum. Item alio loco. Filius benedicti Dei atque bonæ voluntatis, cuius nomen non potest humano ore narrari. Augustinus quem primo factum dixit, postea vnigenitum appellauit. Quantum plenissimus sit Ioannes Euangelista ait. *De plenitudine eius omnes accepimus*. Deos autem, hoc est animalia rationalia immortalia, Philosophi planetas, seu etiam mundum ipsum vocare consueuerunt, vnde & Prophetæ solem & lunam & cætera, miliciam cœli vocat, morem gentilium secutus, qui eis tanquam rectoribus & protectori-

XVII.

bus, suis immolabant. Horum autem Deorum excellentiores, iuxta Platonem, summus Deus, cum de creatione hominis facienda alloquitur, quasi omnia quæ in terris deorsum sunt à superioribus, per occultas planetarum ac syderum naturas administrantur. Ita enim dicit, Dum Deorum quæritur opifex idem paterque ego: opera siquidem mea dissolubilia natura, me tamen ita volente indissolubilia &c. Ad hoc & illud pertinet, quod in octauo de Ciuit. Dei de Platonis dicitur. Omnium, inquit, animalium in quib. est anima rationalis, tripartita diuisio est, in Deos, homines, dæmones. Deorum sedes est in cælo, hominum in terra, in aere dæmonum. Et Boëtius super Porphyrium. Quandocumque, inquit, supponimus Deum animali, secundum eam opinionem facimus, quæ cælum stellasque atque hunc mundum totum animatum esse confirmat, quos etiam Deorum nomine appellauerunt. Beatus verò August. quod dicitur de sole & cæteris cælestibus luminaribus, nequaquam refellere audeat, sed sibi incertum esse profiteatur; vtrum videlicet quidam rectores spiritus illis insint, per quos etiam viuificentur, & quod mirabile dictu videtur, dicit etiam se ignorare, vtrum hæc quoque pertineant ad societatem eorum quos nos Christiani Angelos vel cælestes spiritus dicimus. Vnde in Enchiridion ita dicit: Vtrum Archangeli appellentur virtutes, & quid intra se distent sedes siue dominationes, siue principatus, siue potestates: dicant qui possunt, si tamen possunt probare quod dicunt. Ego me ista ignorare profiteor. Sed nec istud certum habeo, vtrum ad eandem societatem pertineant sol & luna, & cætera sydera, quamuis nonnullis lucida esse corpora non consensu vel intelligentia videantur. Nequis fortè sacris eruditus literis abhorreat Hermetis Philosophi verba, quibus videlicet ait de Deo patre, qui secundum fecerit Dominum, hoc est genuerit filium; cum profectò Deus filius à Deo patre nec factus nec creatus, sed tantum sit genitus. Sciat etiam à Catholicis & sanctis doctoribus multa de eadem generatione similiter abusiue prolata, cum nonnumquam patrem auctorem filij, vel eum procreasse, vel filium à patre formatum, ipsius patris esse effectum abusiue pronuncient. Vnde Hilarius de Trinitate lib. 111. Secundum Apostolum quia in *Christo inhabitat omnis plenitudo diuinitatis corporaliter*, sed incomprehensibiliter

liter, inenarrabiliter ante omne tēpus & secula, vnigenitū ex his quæ ingenita in se erant procreauit, omne quod Deus est per charitatē atq; virtutē, natiuitati eius impartiens, ac si ingenito, perfectō, æternoq; patri, vnigenitus, & perfectus, & æternus est filius. Ea autē quæ ei sunt secūdū corpus quod assumpsit, bonitatis eius ad salutē nostrā voluntas est. Idē in xi. *Verba quæ loquor vobis, non à me loquor.* Nā dū nō à se loquitur, Auctori eū necesse esse est debere quod loquitur. Itē ad id quod agit secūdū natiuitatē sibi pater auctor est. Rursus Idē in 12. de non nato deo patre, & nato ab eo filio loquēs ait: Neque ipsum non natū atque nasci, quia illud ab altero, hoc verò à nemine est, & aliud est sine auctore esse semper æternū, aliud quod patri, id est auctori, est æternū. Vbi enim pater auctor est, ibi & natiuitas est; at verò vbi auctor est æternus, ibi & natiuitatis æternitas est, quia sicut natiuitas ab auctore est, ita & ab æterno auctore æterna natiuitas. Item quod ex æterno natū est, id si non æternū, natū iam non erit, & pater auctor æternus. Si quid igitur ei qui ab æterno patre natus est, ex æternitate de fuerit, id ipsum auctori quidē pater est, nō est ambiguū defuisse quod gignenti est infinitū, infinitū est etiam nascēti. Itē ex æterno nil aliud quā æternū, quod si non æternū, iam non pater, qui generationis est auctor, æternus est. Itē ex te natus ostēditur, vt nil aliud quā te sibi significet auctore. Idē in Psal. 137. *Tu formasti me. & posuisti super me manū tuā,* vtrūque significat, vt quod formauit antiquū sit, quod superposuit manū nouissimū sit. Quod enim secūdū naturā diuinitatis formatus sit, Apostolus docet dicens, *Qui cum in forma Dei esset.* Quod enim in forma est, formatur. In forma & ei pater naturæ & diuinitatis est, vt referri possit ad patrem, & formatus ab ipso sit, August. Quæst. veteris & nouæ legis cap. LVII. Deus pater Deum filium genuit, in quo ipse videtur qui nil ab eo distaret vt magnitudinē suā cōgruus responderet affectus. Item simillimum itaque filium suum creans addidit, ex se quasi alterum se. Idem in eodem. Habuit itaque ante mundum creatæ sobolis principatum, vt pater rerum futurus ante esse debuerit pater proprius, hoc est proprii sui foetus. In Ecclesiastico, etiam ipsa Dei sapientia quæ filius eius dicitur, tam ab ipso creata, quā genita commemoratur. *Sapientiam, inquit, Dei precedentem omnia quis inuestigabit? Prior omnium creata est sapientia, & intellectus prudentie ab euo. Fons sapientie verbum Dei in excelsis.* Et iterum, *vnus est*

Altissimus creator omnipotens & dominus Deus, ipse creauit illam in Spiritu sancto, & effudit illam super omnia opera sua. Item infra, Sapientia inter benedictos benedicetur dicens. Ego ex ore altissimi prodij primogenita ante omnem creaturam. Girum cæli circuiui sola &c. & rursum. Ab initio & ante secula creata sum, & usque ad futurum seculum non desinam &c. Quid itaque mirum cum in verbis quoque Ecclesiasticorum ac sanctorum doctorum nonnulla tam abusiue proferantur, ad generationem verbi demonstrandam, ut Deus pater auctor esse filii sui, & cum procreasse, vel filius ab eo procreatus, vel eius dicatur effectus esse, secundum id videlicet quod ab eo est genitus potius quam creatus vel factus, & ille tantum genitor potius quam creator vel auctor. Quid, inquã, mirum si prædictus Philosophus Hermes, videlicet in illis Ecclesiasticis imbutus disciplinis, abusionem verborum non curauerit, dicendo scilicet fecisse, pro genuisset? Quid etiam cum secundum à patre filium dixerit, à verbis quoque sanctorum alienus non existit? Vnde Hilarius de Trinitate in x i i. Filius ex te Deo patre Deus verus & à te genitus, post te ita confitendus ut tecum; quia æternæ originis, siue æternus auctor es. Nam dum ex te est, secundus à te est. Secundus, inquã, ex modo existendi, non ex differentia dignitatis. Hic quippè à Deo patre quasi primo loco subsistit, cum spiritus tanquam tertio loco ab utrisque sit. Vnde & patrem Hieronymus principalem spiritum ad filium nominat, opere videlicet illo suo de tribus virtutibus. Ita loquens Dauid in Psalmo tres spiritus postulat dicens. *Spiritu principali confirma me, Spiritum rectum innoua in visceribus meis, Spiritum sanctum tuum ne auferas à me.* Qui sunt isti tres spiritus? Spiritus principalis pater est, rectus spiritus Christus est, Spiritus sanctus, Spiritus sanctus est. Augustinus veteris & nouæ legis cap. lvi i i. Spiritum sanctum qui tertius sit à patre, secundus autem à Christo secundum numeri ordinem, ac si diceret, secundum ordinatam ac congruam computationis ordinationem, iuxta videlicet ipsam existentie seriem, quæ in ipsis est personis, non secundum aliquos earum dignitatis gradus. Pater quippè à nullo est, filius à patre solo est, Spiritus sanctus ab utrisque simul esse contrahit.

REVOLVATUR & ille maximus Philosophorum Plato,
XVII. eiusque sequaces, qui testimonio sanctorum Patrum præcete-

ris gentium Philosophis fidei Christianæ accedentes, totius Trinitatis summam post Prophetas patenter addiderunt, ubi videlicet mentem quam *νοῦς* vocant, ex Deo natam, atque ipsi coæternam esse perhibent, id est filium, quem sapientiam Dei dicimus, ex Deo patre æternaliter genitum, qui nec Spiritus sancti personam prætermisisse videntur, cum animam mundi esse astruxerunt tertiam à Deo *νοῦς*, personam. Quod verò Plato sanctæ Trinitatis fidem non solum docuerit, sed & ita esse conuicerit, Claudianus Præfectorio patricio, de statu animarum scribens, his astruit verbis: Plato, inquit, procedat in medium, qui tantis equidem sæculis ante puerperium virginis, ante incarnationem Dei, ante prædictam summæ Trinitatis in gentibus veritatem, ineffabiliter vnum, tres in diuinitate personas, mirabili ingenio, immutabili eloquio quæsiuit, inuenit, prodidit: patrem Deum, paternamque mentem actionem siue consilium, & vtriusque horum amorem mutuum, vnā summam æque ternam indiuisam diuinitatem, non solum ita credi oportere docuit, sed ita esse conuincit. Quod autem Claudianus mutuum amorem adinuicē patris & filij dixerit, non incongruè animam mundi, id est vniuersorum fidelium vitam, atque salutem, Plato nominauit. In quo videlicet amore dei, quælibet anima mortua iacet. Ne qua quidem anima mundi ea diligenter consideremus quæ à Platone dicta sunt, à quo cæteri quoque Philosophi quod de anima ipsa dixerint habuisse creduntur. Hanc itaque videlicet mundi animā, quasi tertiam à Deo, & *νοῦς* personam distinguens, prolixiori ac diligentiori descriptione prosequens, eam tam in seipsam quam in effectis suis integerrima designatione declarat, iuxta quam & nos Spiritum sanctum modo secundū effecta operum suorum dicere solemus, modo secundum naturalem bonitatis eius affectum, quem in seipso ab æterno habuit, sicut diligentius postmodum distinguemus. Nunc autē illa Platonis verba de anima mundi diligenter excutiamus, ut in eis Spiritum sanctum integerrimè designatū esse agnoscamus. Dicit itaque Plato hanc ante mundi constitutionē factā siue genitam à Deo esse, in quo Spiritus sancti perpetuam processionem, qua ex Deo patre est, nobis, ni fallor, insinuat. Solent quippè philosophi factum ex Deo siue genitum dicere, omne quod à Deo habet esse. Vnde & Hermes superius, filiū

de factum à deo dixit, secundum hoc quod ab ipso habet esse
 tamquam æternaliter genitus, non temporaliter ab ipso factus
 aut creatus. Plato quoque omne quod à Deo habet esse,
 genitum dicit ex ipso, non tamen ideo omne quod à deo est
 filium eius esse, velut ipsum mundum & cætera eius opera. At
 autem sic, cum de mundo antea locutus ad animam venisset
 mundi, Nec tamen, inquit, eo quod nos ad præsens loquimur,
 eo ordine ortum animæ deus annuit, minoremque ac poste-
 riorem corporibus fecit eam: neque enim docebat rem anti-
 quorem à postgenita regi. Itemque, Deus tam ab antiquita-
 te quam virtutibus præire animam naturæ corporis iussit,
 dominamque eam & principalitè voluit esse: circa id quod
 rueretur. In quo etiam notandum est, quod dum eam præ-
 esse regimini mundi ut dominam dicit, profecto eam omni
 præfert creaturæ, & deum esse astruit, quam postmodum his
 verbis animam mundi vocauit. Hoc dicit, Et demum reli-
 quas prioris concretionis, ex qua animam mundi commis-
 euerat, &c. Benè autem Spiritum sanctum animam mundi
 quasi vitam vniuersitatis posuit, cum in bonitate Dei omnia
 quodammodo viuere habeant, & vniuersa tamquam viua sint
 apud deum, & nulla mortua, hoc est nulla inutilia, nec etiam
 ipsa mala, quæ optimè per bonitatem ipsius disponuntur. Iuxta
 quod tam apud Euangelistas quam apud Platonicos, scriptum
 esse meminimus. *Quod factum est in ipso vita erat.* Ac si diceret,
 Omnia temporaliter facta per ipsum, hoc est per ipsam dei
 bonitatem condita, in ipsa dei bonitate quodammodo peren-
 niter vivebant, cum apud diuinam prouidentiam omnia ab æ-
 terno per eius bonitatem optimè essent ordinata, ut tam benè
 singula procedere vellet, quantum oporteret. Hinc non incōgruè
 illud Apostoli cōsonare videtur, quod perhibet philosophorū
 quosdam dixisse, *Quod in Deo vivimus, mouemur & sumus*, ac si
 hanc animam mundi ipsum intelligerent deum. Quod verò
 dicit deum excogitasse tertium animæ genus, quod animam
 mundi dicimus, tale est ac si tertiam deo & non personam
 astruat esse Spiritum sanctum in illa spiritali diuina substan-
 tia. Excogitare deus dicitur, hoc est ex integro percipere
 vnius personæ discretionem, quam nos dignè cogitare, atque
 ab ipso patre & filio plenè distinguere non sufficimus. Soli
 quippè sibi Trinitas diuina verè cognita est. Tantumdem

etiam videt aliud ex deo excogitari aliquo modo, quantum illud se habere illo modo, hoc est ita veraciter esse. Deinde statim huius tertie personæ, quam animam mundi collocat, diligentem adhibet descriptionem, cum animam ipsam ex indiuidua & immutabili substantia consistere perhibet, ac rursum ex diuidua, secundum quod scilicet seipsam anima scindere putatur per corpora. Tale quippè est quod dicit animam ex hoc & illo constare, tanquam si diceret ipsam sic tam hoc quàm illud in se habere, vt ipsa animæ substantia & indiuidua & quodammodo diuidua sit. Nam & Spiritus sanctus & in seipso simplex omnino substantia est, & ex natura diuinitatis omnis inuariabilis atque incommutabilis in seipso perseuerat. Atque idem spiritus per effecta multiplex quodammodo vocatur, & septem spiritus nonnumquam dicitur, secundum septiformis gratiæ suæ efficientiam. Vnde & in laude diuinæ sapientiæ spiritus & vnicus, & multiplex, & discurrens, & stabilis esse describitur. Dicit itaque Philosophus animam ipsam esse ex indiuidua semperque in suo statu perseuerante substantia. Itēque alia quæ inseparabilis comes corporum per eadem corpora se scindere putatur, quia Spiritus sanctus & huiusmodi est qui ex suo statu, quem in seipso non in effectis suis habet, omnino simplex esse, atque incommutabilis, & quodammodo multiplex esse secundum effecta putatur, quod est seipsum in corpora scindere, secundum quod ipsa videlicet anima inseparabilis comes est corporum, cum hanc scilicet multiplicis scissuram nullomodo quantum ad seipsam habere possit, sed, vt dictum est, quantum ad effecta suorum videlicet distributione donorum, cum etiam isti gratiam, aliam illi tribuat, & seipsum singulis non æqualiter vel eodem modo conferat: vt hinc quoque alium spiritum iste, alium ille habere dicatur. Egregiè quoque putari dictum est & non esse, quia si verè ac propriè loquamur, non est hæc multiplicitas spiritus, sed effectorum ipsius, cum eum videlicet in hoc vno multiplicem dicamus, quia multiplicia facit: quod est effecta eius magis esse diuersa quàm ipsum. Cum itaque in ipsa anima mundi indiuidua & diuidua, siue, vt dictum est, eadē & diuersa cōcurrat substantia; addidit his duobus in ipsa anima concurrētibz quandā mixturam effici ex indiuiduo & diuiduo scilicet: siue ex eodem & diuerso, hoc est incommutabili & mutabili.

In quaquidem , vt ita dicam , mixtura Spiritus sancti proprietas distinguitur , & integrè videtur expressa tam in seipso quàm in effectis , vt dictum est , suis. Dicit itaque , quia Deus hoc tertium substantiæ genus, ita vt dictum est, mixtum, locauit medium inter vtramque substantiam, indiuiduam scilicet atque diuiduam, quia cum sit ipse spiritus ex Deo , tamquam ab ipso procedens , vtrumque eorum ab ipso habet agi à quo esse habet. Et hoc est dicere, quod Deus locauit hoc ipsum animæ genus inter vtraque supra dicta quasi medium horum hoc est mixtum ex eis : ac si diceret , quod ab ipso Deo à quo est ipsa anima tam hoc quàm illud habet, vt videlicet & indiuidua sit vt substantia sua & diuidua secundum effecta. Quod autem dictum est locauit, congruè dictum est iuxta metaphoram locutionis qua dictum est medium quasi inter aliqua circumstantia collocandum. Postquam autem assignauit mixturam animæ ex indiuiduo & diuiduo, transit ad mixturam ex eodem & diuerso, dicens animam eandem eodem modo ex eodē & diuerso consistere, sicut ex indiuiduo & diuiduo cōstitit. Cuius, inquit, pars idem par diuersum vocetur, cum videlicet spiritus ille & idem sit in substantia cum Deo & ^{no}, id est cum patre & filio, & diuersus in proprietate personæ. Possumus & eundem hoc est incommutabilem eum in se dicere, & diuersum quodammodo per effecta esse, cum non solum ipse quæ diuersa sunt, fecerit, secundum quod superius dictum est ex diuidua constare substantia, verumetiam ea per temporum successionem mutat, & narrat prout oportunum esse indicat, iuxta illud Boëtij,

--- *Stabilisque manens dat cuncta moueri.*

Et iam quidem superius eum incommutabilem esse assignauerat cum ait. Semperque in suo statu perseuerante substantia. Sed quod variabilis per effectum & suorum mutationem esset, nondum addiderat quod nunc facit. Benè itaque dicit animam ipsam quoddam medium esse, id est mixtum ex indiuidua in se substantia, & diuidua per coniunctionē corpoream, id est coniunctionem ipsius ad corpora, quando scilicet ipsa ad rem quamlibet creandam vel regendam atque disponendam se applicat, sicut animalis anima corpori suo sua impertiens beneficia, cui etiam philosophus totam vim & concordiam proportionalem numerorum tribuit, vt diuinæ gratiæ bonita-

re vniuersarū rerū concordia consistere doceat. Omnis quippè
 ordo naturæ & concinna dispositio numerorū proportionibus
 vestigatur atque assignatur, & omniū perfectissimū exemplar
 numerus occurrit, qui rebus congruit vniuersis. Quiquidem
 eos non latet qui philosophiæ rimantur arcana. Hinc est e-
 tiam quod Arithmetica, quæ tota circa proportionem numero-
 rum consistit, mater & magistra ceterarum artium dicitur:
 quod scilicet ex dissectione numerorum, ceterarum rerum
 vestigatio doctrinaque pendeat. Cuius etiam ut ineffabilem
 exprimerent benignitatis eius dulcedinem, totam ei musica-
 rum consonantiarum adscribunt harmoniam, qua & ipsum
 iugiter resonare firmamentum, & superiores mundi partes
 repleti perhibent. Nihil quippè est quod ita oblectet, & nimia
 suauitate sui alliciat animos, sicut melodia; nihil ita prouocum
 ad eos componendos vel commouendos vel pacandos, ut
 iuxta illud primi capituli Boetianæ musicæ scirent philosophi,
 quod nostræ tota animæ corporisque compago musica co-
 aptatione coniuncta sit. Adeo quidem ut iracundiam insaniam-
 que melodia sedari, & grauissimarum infirmitatum dolores
 curari animaduernerent atque efficerent. Quod qui ignorat,
 nec experimento didicit, adhuc legat dictum musicæ capitu-
 lum & inueniet quomodo Pythagoras ebrium adolescentem
 sub Phrigij modi sono incitatū, sponte luccinente reddidit
 duriores & sui compotem. Nam cum scortum inquit, in riu-
 lis domo esset clausum, atque ille furens domum velle com-
 burere, cumque Pythagoras stellarum cursus (ut ei mos erat)
 nocturnus inspiceret, ubi intellexit sono Phrigij modi incitatū
 multis amicorum admonitionibus à facinoribus noluisse de-
 sistere, mutari modum præcepit, atque ita furentis animum
 adolescentis ad statum mentis pacatissimæ temperauit. In-
 ueniet etiam ibidem, quod cum vinolenti adolescentes tibia-
 rum etiam cantu, ut sit, instructi in literis pudicæ fores frange-
 rent, admonuisse tibicinem ut spondeum caneret dicitur Py-
 thagoras. Quod cum illa fecisset tarditate modorum & gra-
 uitate canentis, illorum petulantiam consedasse. Videbit ite-
 rum & quomodo Terpander atque Arion Lesbios atque Io-
 nes grauissimis morbis cantus eripere præsidio. Necnon &
 qualiter Ismenias Thebanus, Boetiorū pluribus, quos inficia-
 ti doloris tormenta vexabant, modis ferunt cunctas abster-

esse molestias. Vbi etiam Empedocles cum eius hospitem in
vitis patrum quidam gladio furibundus inuaderet inflexisse
modum capendi, itaque adolescentis iracundiam temperasse.
In tantum verò, inquit Boetius, priscę philosophiæ studiis vis
musicę artis innotuit, vt pythagorici, cum diurnas in somno
resoluerent curas, quibusdam cantilenis vterentur, vt eos le-
nis & quietus sopor reciperet, itaque expergefatti alijs quibus-
dam modis stuporem somni confusionemque purgarent. Id
nimirum scientes, quod tota nostra animę compago corporis-
que musica coaptatione coniuncta sit, nam vt sese corporis
affectus habet, ita etiã pulsus cordis moribus incitantur. Quod
scilicet Democritus Hypocrati medico tradidisse fertur, cum
eum quasi insanum cunctis Democriti ciuibus id opinantibus
in custodia medendi causa viseret. Sed quorsum isthęc?
Quia non potest dubitari quin nostrę animę & corporis sta-
tus eisdem quodammodo proportionibus videatur esse com-
positus, quibus harmonicas modulationes posterior disputa-
tio coniungi copularique demonstrabit. Quod si parua fide-
libus videantur, quę iuxta Philosophos de virtute diximus
harmonica, nisi & sacrę scripturę testimonio id confirme-
mus, occurrat memorię qualiter spiritu malo in Saül irruen-
te, actum est prudentiũ virorum consilio vim harmonicę sua-
uitatis non ignorandum, vt vesanię tantę stimulus Dauidi-
ci moduli mederentur. Vnde & postmodum vir Deo plenus
cum ad diuini cultus religionem amplificandam Templum
ædificare disponderet, Psalmos qui decantarentur, cōposuit, &
omnium musicorum instrumentorum genera congregauit, vt
tam vocum quam sonorum consonantijs rudem alliceret po-
pulum, per quę antea diabolicum in reprobo rege mitigauit
tormentum. Ex quo præcipuè traditur quàm naturalis sit
harmonica modulatio, quę ita naturam eius suauitate sui
componere ac reparare valet, vt maligni quoque spiritus
tormenta eam perturbare non queant. Legimus & quorum-
dam sanctorum animas ne quid doloris in exitu suo pateren-
tur, ad melodię dulcedinem spontè hinc egressas fuisse. Vn-
de & in vitis patrem scriptum esse meminimus, quod dum
quidam frater videre vellet animam peccatoris & iusti quo-
modo abtrahatur à corpore, & non vellet Deus contristare
in desiderio eius, inuenit hominem peregrinum iacentē
in pla-

in platea agrotum, non habentem qui ei curam adhiberet. Et cum venisset hora dormitionis eius, conspicit frater ille Michaellem & Gabrielem descendentes propter animam eius. Et sedens vnus à dextris, & alius à sinistris eius, rogabant animam eius vt egrederetur, & non exhibat quasi nolens relinquere corpus suum. Dixit autem Gabriel ad Michaellem, Assume iam animam istā vt exeamus. Cui Michael respondit, Iussi sumus à Domino vt sine dolore eijciatur, ideoque non possumus cum vi auellere eam. Exclamauit ergo Michael magna voce dicens. Domine quid vis de anima hac, quia non acquiescit nobis vt egrediebatur? Venit autem ei vox; Ecce mitto Dauid cum cythara, & omnes psallentes Hierusalem, vt audiens psalmum ad vocem ipsorum egredia-
tur. Cumque descendissent omnes in circuitu animæ illius cā-
tantes hymnis, sic exiliens anima illa sedit in manibus Michaelis, & assumpta est cum gaudio. Benè itaque Philosophi, imo Dominus per eos id forsitan ignorantes, tam ipsi animæ mundi, quàm superioribus firmamenti partibus nimiam ac summam modulationis suauitatem assignant, vt quanta pace, quanta fruantur concordia, quàm diligentius possent exprimerent, & quàm concorditer cuncta in mundo diuina disponit bonitas, quam illi animam mundi, veritas Spiritum sanctum, vt dictum est, nominat. Quis etiam si diligenter attenderit, non animaduertet quid de cœlesti dixerint harmonia, quæ in superioribus firmamenti partibus incessanter resonat? cum cœlestes videlicet Spiritus ex assidua diuinæ maiestatis visione, & summa inuicem concordia ligentur, & in eius quem conspiciunt laudes iugi & ineffabili exultatione illud decantent. Quod iuxta Esaiam Seraphin die ac nocte conclamare non cessant, *Sanctus, Sanctus, Sanctus Dominus Deus Sabaoth, &c.* Superiores itaque cœli vel firmamenti partes, beatos hos Spiritus vel eorum mansionem intelligimus, quos etiam septem planetarum nomine propter excellentiam claritatis ipsorum, quos spiritualiter diuina gratia, quæ septiformis dicitur, illuminat, non incongruè de signasse videntur. Qui & benè apud Esaiam Seraphin id est incendium ex hac spiritali illuminatione gratiæ in amorem Dei maximè succensa nuncupatur.

Superior autem eorum mansio tam dignitate quàm positione dicenda videtur, à qua hi qui superbierint in hunc caliginosum & densum aerem detrusi dicuntur, qui loci quoque positione inferior, sicut in habitatione deterior, inferni nomine non incenuenienter accipi potest. Benè & beati Spiritus illi siue superna eorum mansio firmamento comparatur, qui cæteris per superbiam cernētibus, hoc in suæ fidelitatis & humilitatis remunerationem acceperunt, ut sic in contemplatione diuinæ maiestatis firmarentur, ut ulterius omnino labi non queant. Vnde Gregorius in Iob. lib. xxvi. Prius, inquit, cælum factum dicitur, & hoc idem post modum firmamentum vocatur, quia natura Angelica, & prius subtilis est in superioribus condita, & post, ne vnquam cadere potuisset, mirabilius confirmata. Idem super Ezechielem Homilia, *Creauit Deus cælum, quod postmodum vocauit firmamentum.* Cælum ergo fuerunt, hi, qui primò benè sunt conditi, sed postmodum firmamentum appellati sunt, quia ne omnino iam caderent virtutem immutabilitatis acceperunt. Illud quoque quod ait Plato, animam locatam esse à Deo in medietate mundi, eamque per omnem globum teretis orbis æqualiter porrigi: pulchrè designat gratiam Dei omnibus communiter oblatam, cuncta prout salubre vel æquum est, benignè in hac magna domo sua seu templo disponere. His autem illud libri Sapientie apertè cōcinit. *Spiritus Domini repleuit orbem terrarum, &c.* Atque illud Psalmistæ. *Spiritu oris omnis virtus eorum.* Quod verò totum, mundum vnum animal Plato dicit, maximam concordiam vniuersorum operum Dei demonstrat, quasi diuersorum membrorum in vno corpore animalis, quibus omnibus vna præest anima singulis tota præsens, & in diuersis vna, & eadem operans diuersa. Sic & Apostolus totius Ecclesie concordiam vnitatemque demonstrans, eam vnum corpus Christi appellat, per quosdam nexus, & compagem fidei, & charitatis, ex diuersis fidelibus coniunctum, sibi ita inuicem seruientibus & administrantibus, quasi diuersa membra in vno corpore, ex quibus alterum alterius eget obsequio, vno omnibus spiritu præsidente, & diuersa in diuersis operante, sicut anima in diuersis totius corporis membris. *Hæc enim, inquit, omnia operatur vnus atque idem Spiritus, diuidens singulis prout vult.* Quam patenter similitudinem Beatus Ambrosius in prima

Pauli Epistola ad Corinthios ad mundani quoque corporis institutionem patenter applicauit dicens. Multa membra cum inuicem sui egeant, non discrepant in vnitatem naturæ, quamuis diuersa sint: quia diuersitas hoc in vnum concurrat, ut corporis vnitatem expleatur: sicut & ea quibus mundus constat, cum sint diuersa non solum officiis, sed & naturis, ad vnius tamen mundi proficiunt perfectionem, & ex omnibus his nascitur temperies quædam. Huic etiam inuolucro, de positione scilicet animæ in medio mundi locatæ, hoc est de diuina gratia omnibus communiter oblata, ipsa etiam diuina facta secundum allegoriæ ministerium, manifeste concordant: cum videlicet doctrinam suam, & veræ religionis cultum propagaturus Dominus in mundo, Hierusalem, quæ in medio est terræ, elegit, quam quasi caput constituit Regni sui, in qua primum ad magnificandum cultum suum ædificare sibi templum, quasi regale palatium voluit, & ibi etiam vberissimam Spiritus sancti gratiam Apostolis infudit, per quam per eos totus spiritualiter mundus vegetaretur. Vnde scriptum est. *Deus autem Rex noster operatus est salutem in medio terræ.* Et rursus, *De Syon exhibet lex, & verbum Domini de Hierusalem.* Medium autem mundi, & quasi umbilicum terræ, super illum Ezechielis locum, quo scriptum est. *Hec dicit Dominus. Ista est Hierusalem in medio gentium posita, & in circuitu eius terra.* Hieronymus his asserit verbis, Hierusalem in medio mundi sitam. Hic idem Propheta testatur, umbilicum terræ eam esse demonstrans. Et Psalmista Domini exprimens passionem, *Operatus est, ait, salutem in medio terræ.* Hinc plantata est vinea, quæ extendit palmites suos usque ad mare, cum hic vitis vera Christus, Apostolis suis quasi palmitibus per vniuersum orbem directis, vniuersum mundum vbertate doctrinæ spiritualis inebriauit. De hac autem vegetatione ac viuificatione Spiritus sancti, Sanctus Saluianus Episcopus, ad Sanctum Salonium Episcopum, lib. I. de gubernatione Dei, Pythagoricum testimonium inducit dicens.

PYTHAGORAS Philosophus, quem quasi Magistrum suum ipsa Philosophia suscepit, de natura ac beneficiis Dei disserens sic locutus est. Animus per omnes mundi partes commeans atque diffusus, ex quo omnia quæ nascuntur animalia vitam

XVIII

capiunt. Quomodo igitur mundum negligere Deus dicitur, quem hoc ipso satis diligit, quod ipsum semper totum mundi corpus intendit? De Saluiano autem ipso Massiliensis Ecclesiæ Episcopo, & de libro eius ad Salonium Episcopum, & alijs operibus ipsius, Gennadius Massiliensis Presbyter de illustribus viris scribens, inter illustres viros & eorum opera mentionem facit. Qui etiam post Pythagoræ testimonium, Tullium inducens Deum ipsum, quem Pythagoras animum vocat, mentem à Tullio appellari commemorat, dicens.

XIX.

TULLIUS quoque: Nec verò Deus ipse, inquit, qui intelligitur à nobis, aliò modo intelligi potest quàm mens soluta quædam & libera & segregata ab omni congregatione mortali, omnia sentiens & mouens. Alibi quoque. Nihil est, inquit, præstantius Deo, ab eo igitur mundum regi necesse est. Nulli igitur naturæ obediens aut subiectus est: Omnem igitur ipse regit naturam. Augustinus quoque lib. XII. de Ciuit. Dei. cap. XXXII. de Varrone loquens, ait. Dicit etiam idem auctor acutissimus atque doctissimus, quod hi soli & videantur animaduertisse quid esset Deus, qui crediderunt esse animam, motu ac ratione mundum gubernantem. Mentem itaque, id est animum siue animam, Deum dixerunt, secundum quod totius mundi regimini quasi anima corpori præest. Vnde & per sapientem quendam adhortantem non dignè Deum excolere, nisi mente scilicet à vitijs purgata, & virtutibus adornata, pulchrè in ipso suæ adhortationis & disciplinæ exordio dictum est.

*Si Deus est animus nobis ut carmina dicunt,
Hic tibi præcipuè sit pura mente colendus.*

Ac si appertè filiam instruens dicat: Cum Deus sit animus, nobis hoc est vera & spiritualis vita, sicut & ipsa perhibet scriptura Poetarum, velut illa Virgilij verba, quæ super hoc ipsum Macrobius inducit, sicut postmodum ostendemus, hunc præcipuè, scilicet Deum, benè viuendo glorifica. Benè etiam cum animal esse Plato mundum dixerit, ipsum quoque intelligentem, hoc est rationale animal esse perhibuit, secundum hoc scilicet quod eius anima quanto cæteris præstantior extitit, tanto rationabilius in ipso cuncta agit atque disponit. De cuius quidem summæ rationis ordinatione cum subditur, quod hæc videlicet ipsa mundi anima causas om-

nium quæ proueniunt prouidet, diuinam & omnium naturarum prouidentiam assignat & diuinæ plenitudinem scientiæ, ex quo etiam ipsa Deus esse innuitur, metiri ac deliberare ea quæ futura sunt ex præsentibus dicitur, quia iuxta ea quæ iam sunt oportet præparari, vt eis congrua ordinatione coherere possint atque aptari. Quod autem subditur ex reliquijs concretionis mundanæ animæ, nostras, id est mundanas animas esse confectas, tale est ac si diceret eam animam mundi in potentijs ac virtutibus imitari, sed longè hoc ipso à dignitate eius abscedere, vt videlicet quemadmodum anima illa totius mundi administrationi præest, sic singulis corporibus singulæ animæ suæ vitam eis animale non spiritalem præbentes. Et benè hæ quasi reliquiæ mundanæ animæ dicuntur, quæ scilicet ad animale pertinent vitam, quia hæc inferioribus ipsa relinquit animabus quæ per eam expleri dignum non est. Vnde & eorum hæresis confutatur, qui Dominum Iesum non aliam animam quam sanctum spiritum habere profitentur. Reliquias etiam mundanæ animæ non incongruè dicit ea quæ ad operationem, eius quam in nobis habet, pertinent, secundum quod in corporibus ipsa degenerare dicitur, sicut suo loco exponemus. Sicut enim reliquiæ his quibus supersunt inferiora quidem & indigniora videntur, ita hæc quæ non ad æternitatem spiritus, sed ad temporales eius operationes attinent, posteriora dignitate censentur. Congruè etiam dicit animam mundi non alicuius rei in mundo, sicut & animam hominis dicimus, non alicuius membri humani. Anima quippè ab animando dicta est, nec aliud propriè animari dicitur nisi id in quo tota vis vegetationis ita consummatur, vt nil corpori illi vegetato adhærere extrinsecus necesse sit ad vegetationem quam habet in ipso conseruandam. Cum itaque mundus iuxta philosophos vniuersa concludat, vt nil extra ipsum diuinitus disponendum relinquatur, rectè anima mundi sicut & anima hominis dicta est, cum vniuersa vis animæ in eo consummetur: adeo vt nec ipsum mundum oculos vel cætera sensuum instrumenta habere oportuit, sicut & ipse perhibet Plato, cum nulla extra ipsum remaneant, ad quæ ista aliquam oportunitatem habeant. His ex Platone breuiter collectis, atque ad nostræ fidei testimonium satis, vt arbitror, diligenter expositis, consequens

existimo ad sequaces eius commere, ut ea quæ ab ipsis quoque de anima mundi sunt dicta, nulla ratione conuenienter accipi posse monstremus, nisi Spiritu sancto per pulcherrimam inuolucris figuram assignentur. Hoc quippè loquendi genus Philosophis quoque sicut & Prophetis familiarissimum est, ut videlicet ad arcana philosophiæ cum veniunt, nil vulgaribus verbis efferant, sed comparationibus similitudinum lectorem magis alliciunt. Quæ enim quasi fabulosa antea videbantur, & ab omni utilitate remota, secundum literæ superficiem gratiora sunt, cum magnis plena mysterijs postmodum reposita, magnam in se doctrinæ continent ædificationem. Ob hoc enim, teste Augustino, teguntur ne vilescant, qui secundo quidem Libro de doctrina Christiana, cum causas difficultatis vel facilitatis sacræ Scripturæ aperiret, ait. Obscurè quædam dicta densissimam caliginem obducunt, quod totum prouisum esse diuinitus non dubito, ad edendam labore superbiam, & intellectum à fastidio reuocandum, cui facilè inuestigata plerumque vilescunt. Item qui prorsus non inueniunt quod quærunt fame laborant: qui autem non quærunt, quia in promptu habent, fastidio sæpè marcescunt. Igitur salubriter Spiritus sanctus ita scripturas modificauit, ut locis apertioribus fami occurreret, obscurioribus autem fastidia detergeret. Quasi ergo in latebris Dominus quiescere gaudet, ut quo magis se occultat, gratior sit illis quibus se manifestat. Ex quo magis ex difficultate scripturæ laboratur, meritum lectorum augeatur, de quo Psalmista. *Posuit, inquit, tenebras latibulum suum*, Et rursum: *Tenebrosa aqua in nubibus aeris*, Quia inquit Gregorius, obscurata est sententia in prophetis, de quo scriptum est in lege, *Accessit Moyses ad caliginem in qua erat Deus*. Et Salomon in Paralipomenon ait, *Dominus pollicitus est ut habitaret in caligine*, Idem in Prouerbijs. *Gloria est Dei celare verbum, & gloria Regum inuestigare sermonem*. Qui etiã ad scripturarum obscuritatē quasi ad latebras in quibus nunciatur Deus, perscrutandas, inuitat nos in Prouerbijs dicens, *Sapiens cum adnertit parabolam & interpretationē, verba sapientiū & anigmata eorū*. Quæ quidem tanto cariora sunt intellecta, quanto in his intelligendis maior operæ facta est impensa. Hinc est illud Hieronymi ad Magnum Oratorem scribentis, super hoc ipsum quod in exordio Prouerbiorum Salomon commonet ut intelligat;

mus, *Sermones prudentia, versutiasque verborum, parabolas & obscurum sermonem, dicta sapientum & anigmata*, quæ propriè Dialecticorum sunt & Philosophorum. Quantum etiam semper Philophia arcana sua nudis publicare verbis dedignata sit, & maximè de anima, de Diis, per fabulosa quædam inuolucra loqui consueverint, ille non mediocris Philosophus, & magni Ciceronis expositor Macrobius, diligentissimè docet. Remotis enim generibus figmentorum siue fabulorum, quæ philosophos non decet, supposuit illud quod honestissimè assumunt.

At namque, quod quando sacrarum rerum notio sub pio velamine figmentorum honestis & recta rebus, & vestita nominibus enuntiant, hoc est figmenti genus quod cautio de diuinis rebus philosophantis admittit. Idem post pauca. Sciendum est, inquit, in omnem disputationem Philosophos admittere fabulosa, sed his uti solent, cum vel de anima, vel de æthereis potestatibus loquuntur. Ceterum autem cum ad summum Deum & principem omnium, qui apud Græcos τὸ ἀγαθόν, qui & θεογονία nūcupatur, tractatus se audet attollere, vel ad mentem, quàm Græci νοῦν appellant, originales rerum species, quæ Idææ dictæ sunt, continentem, ex summo natam & perfectam Deo: cum de his, inquam, loquuntur summo deo & mente, nil fabulosum penitus attingunt. Sed si quid de his assignare conantur, quæ non sermonem tantummodo, sed cogitationem quoque superant humanam, ad similitudines & exempla confugiunt. Sic Plato cum de τὸ ἀγαθόν loqui esset animatus, dicere quid sit non ausus est, hoc solum de eo sentiens, quod sciri qualis sit ab hominibus non possit. Solum verò ei simillimum solem de visibilibus reperit, & per eius similitudinem, viam sermoni suo attollendi se ad non comprehensibilia patefecit, ideo & nullum eius simulachrum cum Dijs alijs constitueretur finxit antiquitas. Quia summus Deus & nata ex eo mens: sicut ultra animum, ita sunt supra naturam, quò nil fas est fabulosum peruenire. De dijs autem, ut dixi, ceteris, & de anima, non frustra se, nec ut oblectent, ad fabulosa conuertunt; sed quia sciunt inimicam esse naturæ apertam nudamque expositionem sui, quæ sicut vulgaribus hominum sensibus intellectum sui vario rerum tegmine operimentoque subtraxit, ita à pru-

dentibus arcana sua voluit per fabulosa tractari. Sic ipsa mysteria figurarum cuniculis operiuntur, ne vel his adeptis nudum rerum talium natura se præbeat, sed summatis tantum viris sapientia interprete, sui arcani conscijs contenti sint reliqui ad venerationem figuris defendentibus à vilitate secretum. Iuxta quod & Veritas ipsa de integumento parabolarum suarum Apostolis loquitur dicens: *Vobis datum est nosse mysterium regni Dei, ceteris autem in parabolis; ut videntes non videant, & audientes non intelligant.* Ex hac itaque Macrobij traditione clarum est quæ à Philosophis de anima mundi dicuntur, per inuolucrum accipienda esse. Alioquin summum Philosophorum Platonem, summum stultorum deprehenderemus. Quid enim magis ridiculosum quàm mundum totum arbitrari vnum animal esse rationale, nisi per hoc integumentum sic prolatum? animal quippè esse non potest nisi sensibile sit, cum sit nota diffinitio, animalis substantia animata sensibilis. Quis autem ex quinque sensibus mundo inesse poterit, nisi forte tactus, qui omnibus est communis animalibus. Desunt ei quippè ceterorum sensuum instrumenta, ipso attestante Platone, vbi videlicet ostendit quare ei oculi, aut nares, aut ceteræ partes humani corporis necessariae non fuissent. Atque est pars corporis mundi qua ipse si tangatur, sentire queat magis quàm arbores vel plantæ, quæ terræ radicibus affixæ, eadem anima viuificari dicuntur. Nunquid ex effossione terræ potius sentiret mundus quàm arbores ex frondium auulsione vel totius corporis sui abscissione? Arbores tamen & quaslibet plantas insensibiles esse constat, ideoque ad exclusionem earum in diffinitione animalis post animatum ponitur sensibile. præterea cum dicant animam mundi singulis infusam corporibus ea animare quæ ad animandum apta reperit, quid opus erat creatione nostrarum animarum, quas postea factas Plato esse commemorat? aut quid opus est animam mundi his corporibus nostris inesse quæ non animant? Quid enim euentius quàm corpora nostra ex propriis animabus humanis magis quàm ex anima mundi vitam animale habere? His quippè animabus præsentibus statim animata sunt & iisdem absentibus inanimata, licet ut aiunt, in eis anima mundi etiam post mortem perseueret, quæ in omnibus tota est corporibus, & in his in quibus vacat. Quid etiam est quod
absentibus

absentibus humanis animabus, anima mundi corpora nostra, licet eis insit, animare non sufficit, cum ipsa, testante Platone, cunctis inuisibilibus præstantior à præstantissimo auctore facta sit? Nunquid minoris efficaciar est in nobis quàm cæterar animar, aut cum iam corpora nostra defuncta sunt, non sunt idonea ad animandum, sicut antea erant præsentibus humanis animabus? Possunt ex vno corpore innumeros vermes viuificare, cum iam ipsum corpus non valet animare? Quæ deest aptitudo defuncto corpori, nec item quo animetur, nisi tantum præsentia humanar animar, quæ & præsens corpus viuificat, & recedens ipsum mortificat? Quod si ad inuolucrum ista deflectamus, quæ de anima mundi à Philosophis dicta sunt, facile est rationabiliter cuncta accipi, nec à sacræ fidei tenore exorbitare. Conferant animar humanar corporibus nostris animalem vitam, conferat anima mundi. Nisi fallor Spiritum sanctum intellexerunt Philosophi ipsis animabus nostris vitam spiritalem, distributione scilicet suorum donorum, vt sicut singulæ animar vita corporum, Spiritus autem sanctus vita animarum, quas vegetando ad profectum bonorum operum promouet. Quod itaque modo animar nostrar corpora Sancti Spiritus dicendæ sunt, quas ipse per aliquod gratiar suar donum quasi templum inhabitat, & virtutib. viuificat. Vnde & illud est Augustini sermone vi. de verbis Domini. Sicut enim vita corporis anima est, sic vita animar Deus: sicut expirat corpus cum animam emittit, ita anima cum Deum amittit. Deus amissus mors animar, anima amissa mors corporis. Mors corporis necessaria, mors animar voluntaria. Sed & illud quod aiunt, animam totam singulis corporibus infusam omnia viuificare, atque animar quæ ad viuificandum idonea reperit, nulla illorum duritia vel diuersitas, natura impediente, pulchrum inuolucrum est, quia charitas Dei quam Spiritum sanctum dicimus, cordibus humanis per fidei siue rationis donum primitus infusa, quædam viuificat ad bonorum operum fructum non promouendo, vt vitam assequamur æternam, & in quibusdam ipse Spiritus vacare dicitur prauitatis eorum duritia repugnante. Hanc autem animar videlicet mundanar doctrinam præcipuè diligentissimus Philosophorum in expositione Macrobius reliquit. Cuius quidè verba si diligenter inspiciamus, totam fidem ferè nostram do-

Spiritu sancto in ipsis expressam inueniremus, cum hanc ipsam animam & Creatorem nominet, atque ex Deo patre & *100*, hoc est Deo filio astruat esse. Quam dum quandoque mentem nominat, mentem pro anima vel spirituali natura generaliter ponit. Aliter itaque filium *100*, id est mentem dicit, aliter animam ipsam mentem appellat. Mens quippè patris filius dicitur, secundum quod sapientia ipsius vel ratio dicitur. Animam quoque cum mentem nominat, spiritualis eam esse naturæ, non corporeæ insinuat. Quod quidem & per semetipsum aperiens dum quædam Virgilij verba exponeret, ait Ut puritati eius attestaretur, mentem nominauit. Item, ut illius mundanæ animæ assereret dignitatem, mentem esse testatus est. Ac si apertè doceat ob hoc eam mentem vocari, ut sinceritas naturæ spiritualis & dignitas in ea demonstraretur. Sic enim & cum Dominum Iesum mentem humanam habuisse dicimus, mentis vocabulo ipsam eius animam nominamus. Hæc autem sunt illa quæ proposuimus Macrobij verba. Anima ergo, inquit, creans sibi & condens corpora. Nam ideò ab anima natura incipit, quam sapientes de Deo & *100*, mente nominant, ex illo purissimo fonte, quem nascendo de originis suæ hauserat copia, corpora cœli, & siderum quæ condidit, prima animauit, Et post aliqua cum ipse ipsius animæ vires distingueret, quas in corporibus exercet, secundum quas omnium animatorum ordinata est natura, ut alia scilicet alijs præsent, adiecit dicens. Hunc ordinem rerum, & Virgilius expressit, nam & mundo animam dedit, & ut puritati eius attestaretur, mentem vocauit. Cœlum enim, ait, terras & maria & sidera Spiritus intus alit, id est anima: & ut illius mundanæ animæ assereret dignitatem, mentem esse testatus est. Mens agitat molem. Nec non ut ipse ostenderet per ipsam animam constare & animalia vniuersa quæ viuunt, addidit.

Hinc hominum pseudumque genus, &c.

Utque asseueraret eundem esse in anima semper vigorem, sed usum eius hebescere in animabus corporis densitate, adiecit.

--- Quantum non noxia corpora tardant.

Hæc quidem omnia tam Virgilij quàm Macrobij verba, facillè est iuxta propositum nostrum ad nostræ fidei tenorem accommodare, nec aliter ea exponi. Quod itaque ait usum animæ.

hebescere in animalibus corporis densitate, tale est Spiritus sancti gratiam suorum beneficiorum efficaciam minus habere in carnalibus, scilicet deditis voluptatibus, ut ipsam densitatem corporis carnalium illecebrarum magnitudinem intelligamus. Qui etiam ubi ait ipsam animam creare sibi corpora & condere, eam creatorem rerum, & per hoc Deum astruit esse, & creatarum rerum ordinationem & præparationem ad bona opera donorum suorum distributione, ut sibi eas dignum habitaculum efficiat. Ab anima naturam dicit incipere, quia per gratiam Spiritus sancti nascimur spiritualiter, ac sumus filij Dei magis quam serui. Sicut enim subtracta gratia hac moreremur in vitijs: ita & eadem collata nascimur in veram virtutum vitam. Quamquidem per naturam habemus, & contra naturam vitia, cum sit vitium corruptio naturæ. De Deo & mente anima nominatur, quia tam patris & filii idem est Spiritus cum ab utroque procedat. Vnde etiam ut ait Augustinus in xv. de Trinitate, cap. xix. quia ipse Spiritus communis est ambobus, id vocatur ipse propriè quod ambo communiter, cum videlicet tam pater ipse quam etiam filius Spiritus sit & Sanctus. Cum autem de Deo vel *scilicet* nasci, aut creari siue fieri anima quandoque à Philosophis dicitur, abusio est verborum magis quam sententiæ. Creari namque vel fieri necessariò non dicitur nisi in his quæ cœperunt, hoc est æterna non sunt. Nasci verò, hoc est de substantia ipsa patris existere, proprium est filii, de quo suo loco postmodum serius differemus. Creari tamen siue nasci seu fieri pro esse aliquo Philosophi nonnunquam ponunt, ut suprà meminimus. Vnde & Macrobius eam *scilicet* ipsam à Deo, quam animam à *scilicet* creatam dicit, hoc est ex ipso esse. In eadem quoque significatione nasci, hoc loco abutimur. Hermes quoque superius cum dixerit quod Deus secundum fecit Dei filium, ipsum ex Deo patre esse ostendit; fontem sapientiæ purissimam ipsam *scilicet* appellat, hoc est sapientiam patris, quam nihil quantumcumque sit obscurum latere potest. De copia huius fontis ipsa Dei bonitas animavit prius cœli corpora ac siderum, hoc est ipsos angelos vel cælestes spiritus, qui ante hominē conditi sunt, secundum quod scriptum est. *De plenitudine eius omnes accepimus.* Cœli ac siderum dictum est secundum dignitatis differentiam, cum alios Spiritus aliis prælatos ac superiores credamus, unde & angelos & Ar-

changelos dicimus seu Dominationes. Corpora summi spiritus dici possunt etiam angeli, ab eo ut dictum est spiritualiter viuificati, vel etiam corpora dicit, secundum quod omnem creaturam corpoream dicimus, hoc est circumscriptam. Vnde Gennadius in lib. de Orthodoxa fide, cap. x. Nihil, inquit, incorporeum & inuisibile in natura credendum est nisi Deum solum. Qui ex eo incorporeus creditur, quia vbique est, & omnia complet, & ideo inuisibilis omnibus creaturis, quia incorporeus est. Creatura omnis corporea, angeli & omnes cœlestes corporeæ, licet non carne subsistant. Ex eo autem corporeas credimus esse intellectuales naturas, quod localiter circumscribuntur, sicut & anima humana quæ carne clauditur, & demones qui per substantiam angelicæ naturæ sunt corporei. Benè autem dictum est ex ipsa sapientia eos esse aminos, quia hæc est vita æterna, ut cognoscamus sicut & cogniti sumus, facie ad faciem Deum videntes. Haurit spiritus de fonte illo, cum nos de diuinæ Sapientie intelligentia imbuit, secundum quod dictum est. *De meo accipiet & annuntiabit vobis.* Vnde & spiritus sapientie siue intellectus, siue scientie dictus est. Quod verò dictum est, Mens agitat molem, hoc est totius mundanæ fabricæ quantitatem quasi cuncta in mundo viuificet aut moueat, superius expositam Platonis sententiam prosequitur de spiritu Dei, quod scilicet cuncta optimè disponit,

--- *Stabilisque manens dat cuncta moueri.*

Quamquidem agitationem animæ Salomon quoque in Ecclesiaste diligenter exprimens ait. *Oritur sol & occidit, & ad locum suum reuertitur, illustrans vniuersa. In circuitu pergit spiritus, & in circulo suo reuertitur.* Quis est ille circulus, nisi ambitus globosi & teretis orbis, de quo scriptum est, quia *Spiritus Domini replenit orbem terrarum?* Diuinæ quippè bonitatis gratia sic omnia replet, ut nihil peritus ab operationis suæ administratione vacet, quæ sicut solem visibus nostris oriri facit seu occidere, sic & cætera quæquæ disponit optimè. Adeo autem prædicta Virgilij verba de anima mundi, veritate plena videntur, ut ea quoque quasi in auctoritatem assumere doctores sancti non abhorrerint. Vnde & Hieronymus cum illum Ezechielis locum exponeret, ubi scriptum est. *Introductus in atrium interius per viam orientalem,* ait. Si autem

exterius & interius accipimus atrium, sic intelligendum, quod Deus & circumfusus sit & infusus, dicens per Prophetam, Qui tenet cœlum palma, & terram pugillo, ut videantur omnia ab illo concludi, & rursus, Cœlum autem thronus est, terra autem scabellum pedum meorum, ut intra omnia esse credendum sit, iuxta illud Virgilianum.

*Principio cœlum ac terras, camposque liquentes,
Lucentemque globum Luna, Titaniaque astra
Spiritus intus alit, totâque infusa per artus
Mens agitat molem, & magno se corpore miscet.*

Idem in Epistola Pauli ad Ephesos lib. 11. Diuersitas autem propositionum, in quibus dicitur vnus Deus & pater omnium, qui super omnia, & per omnes, & in omnibus diuersam intelligentiam sapit. Super omnia enim est Deus pater qui auctor est omnium. Per omnes filius qui cuncta transcurrit, vaditque per omnia. In omnibus Spiritus sanctus, quia nil absque eo est. Tale quid de creaturis & de Deo etiam Zeno cum Stoicis suspicatur, quem sequitur Virgilius. Deum namque,

————— ire per omnes
terrasque inanis ————— & reliqua

Et

*Principio cœlum & terram, camposque liquentes.
Lucentemque globum Luna, Titaniaque astra
Spiritus intus alit. &c.*

Viuerè quippè in Deo cuncta dicuntur, ut supra meminimus, secundum hoc quod in ipso nulla sunt mortua, hoc est inutilia, sed omnia utiliter, aut conuenienter facta seu ordinata, vnde scriptum est, *Quod factum est in ipso vita erat*, hoc est in ipsa antequam fierent prouidentia diuinæ Sapientiæ commodissime erant ordinata. Hinc rursus dicitur, *Deus cui omnia viuunt*. Et Apostolus. *In quo*, inquit, *uiuimus, mouemur, & sumus*, tam homines quàm pecudes viuificat. Cuius dona aliqua ad vitam tam sapientissimi quàm simplices atque idiotæ habent; vnde & in Ecclesiaste dicitur, *Quis nouit spiritus filiorum Adam, & si ascendat sursum, & si spiritus iumentorum descendat deorsum*, hoc est qui sint prædestinati ad

vitam, qui deputati ad mortem de sapientissimis & idiotis. Hæc de Macrobio dicta sufficiant. Si quis autem me quasi importunum ac violentum expositorem causetur, eo quod minùs propria expositione ad fidem nostram verba philosophorum detorqueam, & hoc eis imponam quod nequaquam ipsi senserunt, attendat illam Caiphæ prophetiam, quam Spiritus sanctus per eum protulit, longe ad alium sensum eam accommodans, quam prolator ipse senserit. Nam & sancti Prophetæ cum aliqua Spiritus sanctus per eos loquatur, non omnes sententias ad quas se habent verba sua intelligunt, sed sæpè vnā tantum in eis habent, cum spiritus ipse, qui per eos loquitur, multas ibi prouideat, quatenus postmodum alias alijs expositionibus, & alias alijs inspirat. Vnde Gregorius in registro ad Ianuarium Episcopum Calaguritanū scribens ait. In intellectu sacre Scripturæ respui nō debet quicquid sacre fidei non resistit. Sicut enim ex vno auro alij murennulas, alij annulos, alij dextralia ad ornamentum faciunt: ita ex vna Scripturæ sacre sententia expositiones etiam per innumeros intellectus, quasi varia ornamenta componunt; quæ tamen omnia ad decorem cœlestis sponsæ proficiunt. Ipse præterea Macrobius, ea quæ de anima mundi à philosophis dicta sunt, mysticè interpretanda esse meminit. Quod etiam iuxta litteram exponi veraciter aut conuenienter nullatenus queant, vt supra meminimus, ipsa nos littera ad expositionem mysticam compellit. Pluribus quoque testimonijs sanctorum didicimus Platoniam sectam Catholicæ fidei plurimum concordare. Vnde non sine causa maximus Plato Philosophorum præ cæteris commendatur ab omnibus, non solum à peritis secularium artium, verum etiam à Sanctis. De quo pater Augustinus in lib. 9. de Ciuit. Dei. Mirantur, inquit, quidam nobis in Christi gratia sociati, cum audiunt vel legunt Platonem, eum de Deo ista sensisse quæ multum congruere veritati nostræ religionis agnoscuntur. Vnde nonnulli putauerunt eum quando perrexit in Ægyptum, Hieremiam audisse, vel Scripturas propheticas in eadem peregrinatione legisse. Si diligenter computetur temporum ratio, quæ chronica historia continetur, Platonem indicat à tempore quo prophetauit Hieremias, centum ferè annos postea natum fuisse. Qui cum octoginta & vnum vixisset ab anno mortis

eius usquequo Ptolomeus Rex Ægypti scripturas Propheticas per septuaginta hæbreos, qui Græcam linguam nouerant, interpretandas habendas curauit, anni reperiuntur fermè nouem. Quapropter in illa peregrinatione sua Plato nec Hieremiam videre potuit, tanto ante defunctum, nec easdem scripturas legit in Græco, quæ nondum fuerant in Græcum translatae; nisi quia fuit acerrimi studij, sicut Ægyptiacas, ita & istas per interpretem didicit. Adeo autem ipsa Platonis dicta verbis Domini atque prædicationi eius consonare videntur, ut sicut idem prædictus doctor in secundo de doctrina Christiana profitetur, quidam lectores & dilectores Platonis ausi sunt in tantam prorumpere insaniam, quod dicerent Domini nostri Iesu Christi sententias, quas mirari & prædicare coguntur, de Platonis libris eum didicisse. Hinc etiam Ptolomæus Rex in Platonis dogma eadem videri, ni fallor, dictus est, quod Deum & mentem, id est patrem & verbum, ex Platonis scriptis didicerat. Vnde septuaginta Interpretes cum ei legem transferrent, Arcanum diuinæ generationis prudenti, ut videri dicunt consilio penitus tacuerunt, ne si id quoque apud Hebræos prædicari audiret, duplicem diuinitatem esse deprehenderet, quod antea tantum vnius Dei cultor extiterat, ne propter Platonicum dogma ab unitate Deitatis deuiauerat, licet ibi plures distingui personas audierit, vnius tamen Deitatis singularitate seruata. Hinc Hieronymus in Prologo Penthatenci meminit dicens, à prædictis septuaginta multa huiusmodi reticere, ut est illud: *Ex Ægypto vocaui filium meum &c.* Ex quo liquidum est Platoniam sectam fidei sanctæ Trinitatis plurimum semper assentiri, & eam diligentius cæteris omnibus Philosophis à Platone, & sequacibus eius distingui ac describi. Vnde & non immeritò in eius laudem Valerius Maximus his prorumpit verbis. Sed Platone paruulo dormiente in cunis, mel apes inseruerunt eius labijs. Qua re audita prodigiorum Interpretes singularem eloquij suauitatem ore eius emanaturam dixerunt. Excellentius autem & conuenientius ad interpretandum esse non dubito, si ad diuinæ deitatis gloriam hoc miraculum referatur, ut hoc ei Deus insigne prælagii conferret, qui diuinitatis suæ per eum diligentius arcana reuelaturus esset. Orportebat quippè, ut summæ Sophiæ, quæ Christus est, verbum videlicet & sapientia Dei Patris,

summus Philosophus cuiusque sequaces plurimum attestarentur. Vnde & iuxta Augustinum Apostolus Atheniensibus loquens, ut supra meminimus, cum rem magnam dixisset, & quæ à paucis posset intelligi, quod *in illo* scilicet, *visimus, mouemur, & sumus*, adiecit, *sicut & vestri quidam dixerunt*. Platonem quippè Atheniensem fuisse constat. Illud autem in quo non mediocriter errasse plato & videtur & dicitur. Illud inquam quod animam mundi factam esse dieit, hoc est initium habuisse, & quod supra Macrobius, cum de anima mundi loqueretur, asseruit Deum & *non* ultra animam esse, quasi superiores dignitate, cum constet inter Catholicos tres personas in diuinitate per omnia sibi coæquales & coæternas sibi esse, si diligentius attendant à veritate nō exorbitat, sicut postmodū ostendemus de processione Spiritus sancti dissentire. Non enim sine causa hic philosophus præ ceteris commendatur ab omnibus tã fidelibus, ut supra meminimus, quàm infidelibus. Cum itaque in omni doctrina philosophiæ platonica secta enituerit, iuvat etiam aliquorum platoniorum testimonia inferre, quæ idem pater Augustinus in VII. Confessionum cōmemorat in scriptis se eorum reperisse. In quibusquidē ferè tota fidei nostræ summa circa diuinitatem verbi apertissima continetur, sicut ipsa postmodum tradita est à summis scriptoribus noui testamenti, Ioanne scilicet & paulo Apostolis. Ait quippè Augustinus ibidem ad eundem sermonem intendens.

XXI.

PROCVRASTI mihi per quemdam hominem immanissimo typo turgidum, quosdam platoniorum libros ex Græca lingua in Latinam versos, & ibi legi non quidem istis verbis, sed hoc idem omnino multis & multiplicibus suaderi rationibus, quod *In principio erat verbum, & verbum erat apud Deum, & Deus erat verbum. Hoc erat in principio apud Deum. Omnia per ipsum facta sunt, & sine ipso factum est nihil. Quod factum est in ipso vita erat, & vita erat lux hominum, & lux in tenebris lucet, & tenebræ eam non comprehenderunt.* Et quia omnis anima, quamuis testimonium perhibeat de lumine, non est tamen ipsa lumen, sed verbum Deus lumen est verum, quod illuminat omnem hominem venientem in hunc mundum. Et quia in hoc mundo erat, & mundus per ipsum factus est, & mundus eum non cognouit. Quia verò in sua propria venit, & sui eum non receperunt

receperunt, quotquot autem receperunt eum, dedit eis potestatem filios Dei fieri credentibus in nomine eius, non ibi legi. Item legi ibi. Quia verbum Deus non ex carne, non ex sanguine, non ex voluntate viri, neque ex voluntate carnis, sed ex Deo natum est. Sed quia verbum caro factum est, & habitavit in nobis, non ibi legi. Indagaui in literis illis, multis modis dictum, quod sit filius in forma patris non rapinam arbitratus esse coequalis Deo, quia naturaliter idipsum est. Sed quia *semetipsum exinauiuit formam serui accipiens, in similitudinem hominum factus & habitu inuentus ut homo. Humilianus semetipsum factus obediens usque ad mortem, mortem autem crucis, propter quod & Deus exaltauit eum à mortuis, & donauit ei nomē quod est super omne nomen, ut in nomine eius omne genu flectatur, cælestium, terrestrium & infernorum, & omnis lingua confiteatur quia Dominus Iesus Christus in gloria est Dei patris, non habent illi Libri.* Quod enim ante omnia tempora, & super omnia tempora incommutabiliter manet vnigenitus filius tuus coeternus tibi, & quia de plenitudine eius accipiunt animæ, ut beatæ sint, & quia participatione manentis in se sapientiæ renouantur ut sapientes sint, est ibi. Quod autē pro impijs mortuus est, non est ibi. At verò ne aliquis sexus inter homines sapientiæ fama cæteris præstantes, fidei nostræ testimonijs desit, illa etiam famosa Sibylla inducatur, quæ nec diuinitatem verbi, nec humanitatem, nec vtrumque aduentum, nec vtrumque iudicium verbi scribendo prætermisit. Primum quidem iudicium quo iniuste Christus est iudicatus in passione, & secundum quod iuste iudicaturus est mundum maiestate, de qua August. contra quinque hereses. Audiamus quid etiam Sibylla vates eorum de eodem dicat. Alium, inquit, dedit Dominus hominibus fidelibus colendum. Item, Ipse tuum cognosce Dominum Dei filium esse. Alio loco filium Dei, Σύμβολον appellat, id est Consiliarium, vel consilium. Et propheta dicit, *Vocabitur nomen eius admirabilis, Consiliarius.* De qua rursus idem Pater Augustinus in vii. r. de Ciuit. Dei. Eo inquit, tempore nonnulli Sibyllam Eritream vaticinatam ferunt, quam quidam magis credunt esse Cumanam, & sunt eius xxviii. versus, qui (sicut eos quidam Latinis versibus est interpretatus) hoc continent.

*Iudicij signum, tellus sudore madescet,
Et cælo Rex adueniet per secla futurus,
Scilicet in carne præsens ut vinceret orbem, &c.*

Quorum versuum quidem primæ literæ Græco iunctæ id sonant. IESVS CHRISTVS FILIVS DEI SALVATOR. Infert etiam Lactantius quædam de Christo vaticinia Sibyllæ.

*In manu, inquit, infidelium postea veniet,
Dabunt Deo alapas manibus incestis,
Et impurato ore inspuent venenatos sputos,
Dabit verò ad verbera Sanctum dorsum,
Suppliciter, & colaphos accipiet, ne quis agnoscat,
Quod verbum vel unde venit, ut inferis loquatur
Et spinea corona coronetur.*

*Ad cibum autem fel, ad sitim acetum dederunt,
Inhospitalitatem hanc monstrabunt men/am,
Ipsa enim insipiens gens tuum Deum non intellexisti.
Ludentem mortalium mentibus, sed spinis
Coronasti, fel miscuisti.*

*Templi velum scindetur, & in medio die
Nox erit tribus diebus somno suscepto,
Et tunc ab inferis regressus ad lucem veniet
Primus resurrectionis principio ostensus.*

Hoc profectò Sibyllæ vaticinium, ni fallor, maximus ille Poëtarum nostrorum Virgilius audierat atque intellexerat, cum in quarta Ecloga futurum in proximo sub Augusto Cæsare, tempore consulatus Pollionis, mirabilem cuiusdam pueri de cælo ad terras mittendi, qui etiam peccata mundi tolleretur, & quasi secundum nouum in mundo mirabiliter ordinaret, præcineret ortum, admonitus ut ipsemet ait Cumæi carminis vaticinio: hoc est Sibyllæ, quæ Cumæa siue Cumana dicitur. Ait quippè sic quasi adhortans quoslibet ad congratulandum sibi, & concinendum seu conscribendum de hoc tanto puero nascituro, in comparatione cuius omnes alias materias quasi infimas & viles reputat dicens,

*Sicelides muse paulo maiora canamus,
Non omnes arbuta iuuant humilesque mirica,
Vltima Cumæi venit iam carminis ætas.
Magnus ab integro seclorum nascitur ordo,*

Iam redit & virgo, redeunt Saturnia Regna,

Iam noua progenies cælo demittitur alto.

Et post pauca .

Teque adeò decus hoc te Consule inibit

Pollio, si qua manent sceleris vestigia nostri,

Irrita perpetua soluent formidine terras.

Item de puero.

Pacatumque reges patrîs virtutibus orbem.

Quæ apertissimam de Incarnatione filij Dei continent prophetiam, ipso fortassis Poeta ignorante, quæ in Sibylla vel in eo Spiritus sanctus loqueretur, sicut de Caipha contigit, dicente, quia *expedit vobis ut unus moriatur homo pro populo, & non tota gens pereat*, ubi & subditur. *Hoc autem à semetipso non dixit.* Facillimè autem ex subsequentiis cōuinci potest hanc Eclogam de nullo veraciter aut conuenienter accipi posse nisi de incarnato vnigenito Dei typicè more prophetico dicantur, cum apertissimè falsa & impossibilia deprehendantur esse, si ad literam exponantur, nec saltem commodè in adulationē ut quibusdam videtur afferri, quæ statim iudicio omnium tāquam incredibilia respuuntur: ut magis contra poetam commoueant ad indignitatem quàm ad beniuolentiam trahant. Sed hæc diligentius alibi nobis ostendenda siue exponēda occurrent, cum de incarnatione scilicet Verbi, magis quàm de diuinitate eius testimonia conferemus. Qui & postmodum in alia Ecloga diuinam Trinitatem non mediocriter innuens, ex cuiusdam ad alium persona dicit,

Trina tibi hæc primum triplici diuersa colore

Licia circundo, terque hæc altaria circum

Effigiem duco, numero Deus impare gaudet.

Vota quippè hîc quidem sortilegi ritus ostendens, quæ maximam vim habeant ad constringendum rebellem, minatur dicens: Tria fila eiusdem substantiæ, id est de lana, sed diuersa triplici colore tibi in effigie videlicet tua circundo, ad te videlicet & constringendum & capiendum, quasi illud Salomonis attendens, *Funiculus triplex difficile rumpitur*. Et tunc inquit, effigiem tui sic ligatam duco ter circum altaria. Denique cur & terna licia dixerit, vel triplicem colorem, siue ternum circuitum altaris, quasi in omnibus ternarij numeri magnam vim attenderet ad celebrationem diuino-

rum sacrorum, adiecit, quia Deus gaudet impare numero. Ac si diceret, Quia Deus hoc numero secundum personarum Trinitatem describi vult suam perfectionem. Quæquidem personæ sunt eiusdem substantiæ, sed proprietatibus diuersæ, vnde tribus lanceis filis diuersorum colorum expressæ videntur.

XXII.

Nunc itaque ad proposita de diuinitate verbi testimonia reuertamur, & cum David & Salomone Regibus Israel, tertium adhibeamus gentium regem ad summi vaticinium regis. Quid enim apertius illo testimonio Nabugodonosor, de filio Dei? *Ecce, inquit, video celos solutos, quatuor ambulantes in medio ignis, & species quarti similis filio Dei.* Iuuat autem & Didimi regis bragmanorum inferre testimonium, vt in quatuor Regū auctoritate, nostræ assertio fidei præmineat. Duorum quidem Iudæorum, & duorum gentilium, David scilicet & Salomonis, Nabugodonosor & Didimi, sintque hi quatuor Reges quasi quatuor rotæ nobilis quadrigæ summi Regis, per quas videlicet fides quatuor Euangelistarum de sancta Trinitate per vniuersum deferatur mundum, & tanto Regum auctoritas sit firmior, quanto potestas similior, & qui eadem dicta populis legesque proferunt, sacræ quoque fidei testimonia tradant.

XXIII.

At itaque Didimus in prima ad Alexandrum Epistola, ait, inquam sic; Inter cetera religionis vel fidei suæ gentis insignia. Non suscipit Deus sacra sanguinea, cultum diligit incruentum, spernit funesta libamina, verbo propitiatur orantibus, quod solum ei cum homine est; suaque numinis similitudine delectatur. Nam verbum Deus est, mundum creauit, hoc regit atque alit omnia, hoc nos veneramur, hoc diligimus, ex hoc spiritum trahimus, si quidem Deus ipse spiritus atque mens est, atque ideo non terrenis diuitijs nec largitate munifica, sed religiosis operibus, & gratiarum actione placatur. Ex his liquidè verbis traditur, tam verbum ipsum Dei, quàm spiritum ab ipso fidelibus infusum esse Deum, quem Rex ille non solum credebat, verumetiam alteri magno Regi scribendo prædicat. Quantæ autem religionis seu abstinentiæ populus bragmanorum fuerit, vt illis Deus supra vniuersas nationes fidei sacræ intelligentiam inspirare deberet, Epistolæ ipse Didimi ad Alexandrum continent. Quibusque

dem Epistolis, si fides exhibenda sit, nulla hominum vita quantumcunque religiosorum innocentie atque abstinentie bragmanorum æquiparanda videtur. Vnde & hæc in exemplum abstinentie beatus quoque Hieronymus nobis proposuit, de quibus inter cætera in secundo contra Iovinianum meminit dicens. Bardesenes vir babilonius in duo dogmata apud Indos gimnosophistas diuidit, quorum vnum appellat bragmanas, alterum Samoneos, qui tantæ continentie sint, vt vel pomis arborum iuxta Gangem fluuium, vel publico ozizæ & farinæ alantur cibo; & cum Rex ad eos venerit, adorare illos solitus sit, pacemque prouinciæ suæ in illorum precibus arbitrari sitam. Ad quos etiam diuina gratia prædicationem Euangelij directam esse, ipsa eiusdem Epistola ad Magnum Oratorem perhibet, his verbis. Pantenus Stoicæ sectæ Philosophus ob præcipuæ eruditionis gloriam à Demetrio Alexandria Episcopo missus est Indiam, vt Christum apud bragmanas & illius gentis Philosophos prædicaret.

SENECA quoque inter vniuersos Philosophos, tam moralis doctrinæ quàm vitæ gratiam adeptus, Spiritum sanctum bonorum omnium distributorem patenter profitetur, ita de ipso ad Paulum Apostolum in quarta scribens Epistola: Profecto me benè acceptum lectionem literarum tuarum quas Galathis, Corinthijs, Achijs misisti. Spiritus enim sanctus in te supra excelsos sublimior, satis venerabiles sensus exprimit. XXIII.

RESTAT denique ad maximum illum Latinorum Philosophorum, Boetium scilicet, descendere: qui omnes ferè liberalium artium disciplinas, scribendo vel transferendo, seu etiam exponendo Latinè tradidit, ac diligenter sanctæ Trinitatis fidè Simmacho socero ac Patricio scribendo edisserens, de vnitæte quoque personæ Christi ac diuersitate naturarum quæ in Christo sunt, diuinæ scilicet & humanæ, ad Ioannem Diaconum (qui postea Papa effectus est) scribendo contra Euticem & Nestorium, optimè disputauit, fidemque nostram, & suam ne in aliquo vacillaret, tam de diuinitate, quàm de diuinitatis incarnatione tractando inexpugnabiliter astruxit. Constat hunc egregium Senatorem Romanum quoque & Consulem atque Patritium tempore prædicti Ioannis Papæ floruisse, à Siluestro Papa vicesimi, & cum in XXV.

illa persecutione Christianorum qua in Ioannem Papam ceterosque Christianos Theodericus sæuijt, vnà cum prædicto Simmacho occubuisse. De quo in gestis Pontificum, necnon & in libro miraculorum B. Benedicti scriptum est, qualiter videlicet ambos Theodericus rex Gothorū interfecerit. In gestis quidem ita scriptum reperies. Rex hereticus Theodericus duos Senatores & Consules & Patritios gladio interfecit, Boetium & Simmachum, quorum etiam abscondi corpora fecit & præcepit. In libro autem miraculorum prædicti sancti ita continetur. Theodericus post Odoacrem Gothorum principatum cum regio nomine suscipiens, homo pestilens Arrianæ sectæ, denique inter cætera facinora Ioannem Papam corporali inedia maceratum necauit: duosque Senatorij ordinis viros & exconsules Simmachum videlicet atque Boetium in carcere gladio transuerberauit. Cum itaque Dominus & per Prophetas Iudæis, & per præstantes Philosophos seu vates Gentibus Catholicæ fidei tenorem annuntiauerit, inexcusabiles redduntur tam Iudæi quàm gentes, si cum hos in cæteris doctores habeant, in salutem animæ cuius est fundamentum fides ipsos non audiant. Et quidem multi ex gentibus, nonnulli ex Iudæis in hoc quoque à doctores populi sui instructi, fidem sanctæ Trinitatis recognouerunt in vno corpore Ecclesiæ quasi duo parietes coniuncti. Ex gentibus quidem primò Græci, ex quibus prædicti Philosophi fuerunt; post Græcos Latini, qui sicut in disciplinis secularium artium imitati sunt Græcos, ita & in vera fidei doctrina ab ipsis exempla sumpserunt. Cum eos scilicet Christianam fidem suscepisse audissent, quos ingeniorum subtilitate præditos, omnibus Philosophiæ rationibus armatos esse cognouerant.

LIBER SECVNDVS.



PER IS Parte superioris, testimonia quædam tam Prophetarum, quàm Philosophorum collegimus, quibus sanctæ Trinitatis fidem astrueremus, vbi quidem dum Philosophorum infidelium assertiones, sicut & sanctorum Patrum, quasi in auctoritatem induximus, multorum nos detra-

II.

Contra eos
qui prohibent
fereles ab in-
fidelibus te-
stimonia sum-
mere.

ctionibus corrodeos parere præsensimus, atque à nonnullis nobis id improprium, quod B. Hieronymo à multis olim legimus obiectum, cum non solum ille & Ethnicorum, verum etiam hæreticorum testimonia suis infereret scriptis. Vnde & aduersus calumnias Magni Oratoris vrbis Romæ Epistolam scribens, ita exorsus ait: Quid quæris quod in opusculis nostris secularium literarum interdum ponamus exempla, & candorem Ecclesiæ Ethnicorum sordibus polluamus, numquam hoc quæres si scripturas sacras legeres, si Interpretes earum reuolueres. Quis enim nesciat, & in Moyse ac Prophetarum voluminibus, quædam assumpta de gentiliū libris, & Salomonem Philosophari & proposuisse nonnulla & aliqua respondisse? Vnde in exordio prouerborum commonet, vt intelligamus sermones prudentiæ, versutiasque verborum, parabolas, & obscurum sermonem, dicta sapientium & enigmata, quæ propriè sunt dialecticorum & Philosophorum. Sed & Paulus Apostolus Epimenidis Poetæ abusus versiculo est, scribens ad Titum.

Cretenses semper mendaces, male bestie, ventres pigri.

In alia quoque Epistola Menandri ponit senarium.

Corrumpunt mores bonos confabulationes male.

Et apud Athenienses in Martis curia disputans Aratum testem vocat. *Ipsius enim & genus sumus.* Pater hoc est Doctor Christiani exercitus, & orator inuictus pro Christo causam agens, etiam Inscriptionem fortuitam arte torquet in argumentum fidei. didicerat enim à vero Dauid, extorquere de manibus hostium gladium, & Golix superbissimi caput proprio mucrone truncare. Legant in Deuteronomio mulieris ca-

ptiux radendum caput, supercilia, omnes pilos & vngues corporis amputandos, & sic eam habendam coniugio. Quid ergo mirum, si & ego sapientiam secularem propter eloquij venustatem, membrorum pulchritudinem, de ancilla atque captiua Israëlitam facere cupio? Si quid in ea mortuum est, Idololatriæ, voluptatis, erroris, libidinum, vel præcido vel rado, & mixtus purissimo corpori, vernaculos ex ea genero Domino. Item Cyprianus vir eloquentiæ pollens, & Martirio Formano narrante mordetur, cur aduersus Demetrianum scribens testimoniis vsus sit Prophetarum & Apostolorum, quæ illa ficta & commentitia esse ducebat, & non potius philosophorum & poetarum, quorum auctoritati vt Ethnicus contraire non poterat? Item Iosephus duos Libros scribit contra Apionem Alexandrinum, & tanta secularium profert testimonia, vt mihi miraculum subeat, quomodo vir Hebræus ab infantia sacris litteris eruditus, cunctam Græcorum Bibliothecam euoluerit. Item extant & Iuliani Africani Libri & Theodorici, viri Apostolicorum signorum, ac virtutum; & Dionysij Alexandrini Episcopi, Anatholii quoque, Pamphili, Pierii, Luciani, Malchionis, Eusebii Cæsariensis Episcopi &c. qui omnes in tantum Philosophorum doctrinis atque sententiis suos referferunt Libros, vt nescias quid in istis primùm admirari debeas, eruditionem an scientiam literarum. Idem ad Vigilantium presbiterum. Eadem absenti significo, quæ præsentì quoque locutus sum, me ita Origenem legisse vel legere, aut Apolinarem, aut cæteros tractatores, quorum in quibusdam libros Ecclesia non recipit, quia operis mei & studii est multos legere, vt ex plurimis multos flores carpam, tam probaturus omnia, quàm quæ bona sunt electurus. Assumo multos in manu, vt ex multis multa cognoscam, secundum quod scriptum est. *Omnia legentes, quod bonum est retinentes.* Vnde satis miror te voluisse Origenis mihi obicere dogmata. Origenes hæreticus quid ad me, qui illum in plerisque hereticum non nego? Errauit de resurrectione corporis, de statu animarum, de Diaboli poenitentia & quod his maius est, filium & Spiritum sanctum in Commentariis Isaia Seraphim contestatus est. Item, Neque enim debemus bona eius recipere, vt mala quoque recipere cogamur. Si ergo quæ bona sunt, transtuli; & mala quæ amputavi vel tacui

vel tacui, vel correxi, arguendus sum, cur non per me Latini bona eius habeant, & ignorent mala? Si hoc crimen est, arguatur Hilarius confessor, qui psalmorum, interpretationem & Homelias in Iob ex libris eius transtulit. Sit in culpa Vercellensis Eusebius, qui omnium psalmorum commentarios hæretici hominis vertit in nostrum eloquium, licet hæretica prætermittens. Hoc quidem & Hieronymus aduersus eorum calumnias reddidit, qui ob id Catholicos tractatores reprehendendos autumant, quod suis scriptis infidelium testimonia vel dicta inferere præsumant, quasi eis auctoritatem tribuant, qui nulla digni sunt auctoritate, & quasi maculare sacras sententias possit veritas per infideles prolata. Nouerat certè vt discretissimus grana à paleis, & Margaritam cæteris quandoque prætiosiores in sterquilinio deprehendere, quàm in ornamento Regio tanquam sapiens aurifaber valeat componere. Tenebat certissimè, & dona Dei per quemcumque malum contaminari non posse, nec diuina sacramenta contractu prauorum inquinari, cum aut in nomine Trinitatis infideles baptisant, aut pessimi quique diuina verba prædicant, aut prophetias loquuntur, & nonnunquam miracula faciunt. Quæcumque enim bona sunt, à Deo esse necesse est, nec ea quorumlibet malicia contaminare potest. Vnde nec prophetiam Balaam gentilis, neque Arioli sacra improbauit auctoritas, qua postmodum magi primitiæ gentium incitati creduntur, vt noua apparente stella nouum statim regem quærerent, nec Sibyllæ vel Virgilij vaticinia spiritualis doctor Augustinus sanctorum prophetijs inferere timuit, attendens illud Apostoli. *Et nemo dicere potest Dominus Iesus, nisi in Spiritu sancto*, nec prophetiam Caiphæ commendare Euangelista veritus est dicens. *Hoc autem à semetipso non dixit, sed cum esset Pontifex anni illius prophetauit.* Nec ipsorum dæmonum testimonia Euangelium reticuit, cum ad eorum expulsionem Domino veniente, eum Iesum Christum, seu filium Dei inelamarent ac confiterentur. Quippè cuius virtutem, siue nascentis, seu morientis, siue resurgentis vel ascendentis & miracula facientis, ipsa etiam insensibilia quodam modo sensisse, vt ei testimonium suo modo præberent, beatus perhibet Gregorius, Angelis quidem & stella statim in ortu ipsius apparentibus, in morte verò sole obscurato, petris & ve-

lo templi scissis, & monumentis sanctorum apertis resurgentium, multisque apparentiū, in resurrectione terræ motu factō cum visione Angelorum, in ascensione nubē cum suscipiente. Cuius quoque potentiam atque sapientiam vniuersus mundi ornatus annunciare non cessat ac prædicare, & suo modo laudare, & commendare, ex ipsa sui mirabili compositione ac dispositione. Vnde Apostolus, *Inuisibilia, inquit, ipsius à creatura mundi per ea que facta sunt, intellecta conspiciuntur. Sempiterna quoque virtus & diuinitas, &c.* Hinc Psalmista insensibilium quoque creaturarum laudibus applaudens, omnes pariter ad laudes Dei creaturas inuitat, quasi ex omnibus optimè conditis laudes Dei a nobis exigat, qui pro nobis in mundo condidit vniuersa. Vnde & à summitate cæli, & solemnitate Angelorū exorsus vsque ad dracones & serpentes atque omnes abyssos, diuinas extendit laudes, cūm dixerit; *Laudate Dominum de terra, dracones & omnes abyssi.* Et iterum. *Serpentes & volucres pennate.* Qui nec aliqua reptilia prætermisit dicens. *Laudabunt illum cæli & terra, mare & omnia reptilia in eis.* Legimus etiam in vita Pauli heremite à beato scripta Hieronymo, Satyrum Beato apparuisse Anthonio, qui aduentum Saluatoris protestans ait sancto viro. Legatione fungor mei gregis, precamur vt pro nobis communem Deum deprecetur, quem in salutem mundi olim venisse cognouimus, & in vniuersam terram exiit sonus eius. Cuius quidem Satyri videlicet confessionem ac testimonium de Christo, longæuus viator admirans & gauisus, quod etiam monstra Christum prædicarent, & vehementer indignatus super duritia & cæcitate Alexandriæ, baculo statim humum percutiens, aiebat. *Væ tibi Alexandria, quæ pro Deo portenta veneraris.* Quid nunc dicturi estis? Bestiæ loquuntur Christum. Ac si apertè clamet dicens, Conteret impudentiam vestram saltem confessio monstrorū. Quæquidē confessio tanto fortasse gloriam mirabilius atque potentiam Dei prædicat, quanto maiori miraculo est habenda, & tanto verior eius assertio videtur, quanto à doctrina hominum remotior est, & tota suggestioni sancti Spiritus imputanda. Vnde & verba Asinæ Balaam, & voces in aere factæ sicut de baptisato vel transfigurato Domino legimus, cum aliquid astantibus annuntiauerunt, tanto facilius ad fidem auditores commouebant, quanto mirabiliores omnibus appare-

bant. Quod de Philosophis quoque & quibusdam gentilibus quantumvis infidelibus, seu nostræ fidei inimicis, manifesta docetur ratione. Quo enim fidei nostræ magis essent aduersi, minùs in laude eius inuenirentur suspecti, & probabilius in laude cuiuslibet est testimonium inimici, quàm amici, sicut è conuerso in crimine. Vnde & cum Iosephi Iudei testimoniũ de Christo vel de Sanctis eius legimus, plurimum ad fidem in eo commouemur, & cum audimus Philonem Iudæum vitam Monachorum Ægypti probasse atque commendasse, plus nobis satisfacit, quàm si quis nostrum eam cominendaret. Ex quo vtrique inter illustres viros à B. Hieronymo connumerari & ascribi meruerunt. Quid etiam magis necessarium ad defensionem fidei nostræ, quàm vt aduersus omnium infidelium importunitatē, ex ipsis habeamus per quod ipsos refellamus? vt si nos impetunt philosophi, per ipsos cōuincantur doctores sui atque philosophi, & si nos impetunt hæretici à quibus sacræ paginæ testimonijs refellantur. Atque ita iuxta Apostolum. *Omne os obstruatur, & subditus fiat omnis mundus Deo.* Quis etiam hæreticos longè deteriores esse gentibus, & quibusdam Philosophis ignoret? Iuxta namque Petri Apostoli assertionem, melius esset his non nosse veritatis viam, quàm post agnitam retrò ire. Si ergo propter infidelitatem gentilium, hi qui aliquibus eorum testimonijs vel dictis vtantur, arguendi sunt: multo amplius illi qui Origenis tot & tantis hæresibus irretiti expositiones atque sententias tam studiosè ad nostram transtulerunt atque induxerunt ædificationem, cum ex infidelitate damnabiliore omnibus, vt dictum est, constet esse hæreticos. Cuius quidem innumeras ac supramodum abhominandas hæreses silentio deperire non sustinuerunt, quasi & in his retractandis aliquam præuiderent utilitatem, ac si ab eis designatis, atque damnatis, cæteri sibi facilius prouiderēt, aut quibus eas rationibus dissoluerent, si quis in eis illos illaquearet addiscerent. Vnde & B. Hieronymus Epistolam ad Auctum Presbyterum direxit, vt hæretica illa quæ in libris Periarcho Origines minima posuerat, ex parte manifestaret. Quis etiã me testimonijs philosophorum inductis ratione arguat, nisi & in culpam mecum sanctos doctores in hoc ipso trahat? Quæ enim superius ex philosophis collegi testimonia, non ex eorũ scriptis, quorum pauca noui, imo ex libris sanctorum patrum

collegi. Nunquid & Apostolum arguere præsumeret, qui (ut ait B. Augustinus in viii. de Ciuit. Dei) Atheniensibus loquens, cum rem magnam de Deo dixisset, & quæ à paucis posset intelligi, Quod in illo scilicet, *uiuimus, mouemur, & sumus*, adiecit, *sicut & benè quidam dixerunt*, Philosophorum videlicet ipsorum, quorum studijs gloriosa illa ciuitas extiterat, testimonium ad persuasionem inducens, de quibus ut in eodem ipse Augustinus præmisit ad Romanos scribens ait, quia *quod notum est Dei manifestum est in illis. Deus enim illis reuelauit &c.* Ex quibus apertè Apostolus docet eis quoque mysterium Trinitatis fuisse reuelatum. Sed hîc quædam verba Apostoli nobis in sequentibus exponenda occurrunt. Nunc autem aduersus tam hæreticorum quam Philosophorum obiectiones, pluribus de fide sanctæ Trinitatis collectis atque expositis testimonijs, superest aperire, quibus rationibus deffendi possit quod testimonijs confirmatum est. Omnis quippè controuersia (ut in Rethoricis suis Tullius meminit) aut in scripto, aut ratione versatur, & Beato attestante Augustino, In omnibus auctoritatem humanæ anteponi rationi conuenit; maximè autem in his quæ ad Deum pertinent, tutius auctoritate quam humano nitimur iudicio. Hinc est illud quod ait. c. i. lib. de moribus Ecclesiæ contra Manichæos. Naturæ quidē ordo ita se habet, ut cum aliud dicimus, rationem præcedat auctoritas; nam infirma ratio videri potest, quæ cum reddita fuerit, auctoritatem postea, per quam formetur, non assumit. Restat itaque nunc nobis post auctoritatum fundamentum, fulcimenta superinducere rationum, maximè ideo ne verboritas inimicorum Christi nostræ insultet simplicitati, qui cum aliquos idiotas aut minus eruditos Christianos inductionum suarum laqueis præpedierint, summæ id sibi gloriæ ascribunt. Quibus quidem non sufficit ut soli moriantur, nisi alios compellant suis erroribus, illo videlicet Iudæorum more, quo eos veritas dicit *mare & aridam circuire, ut faciant profolium vnum.*

II.

OMNIVM autem bonorum quasi fundamentum fidem sanctæ Trinitatis ponimus, ut ab ipsa diuinæ naturæ cognitione omnium bonorum ducatur exordium. Quisquis itaque hoc fundamētum labefactare poterit, nihil fructuosum nobis de his quæ superædificanda sunt reliquit. Vnde & nos pri-

num huic tanto periculo tam auctoritatum quam rationum clipeum opponere curauimus, in eo quidem confisi, qui suos confortat, dicens, *Cum steteritis ante Reges & Praesides, nolite cogitare &c.* Cuiusquidem fretus auxilio, paruulus David immensum Goliath & tumidum proprio ipsius gladio iugulauit. Et nos ergo humanarum gladio rationum, quibus nos tam Philosophi quam haeretici impetunt, in eos conuerso, eorum robur aciesque argumentorum suorum in domino dissipemus, ut iam minus simplicitatem fidelium aggredi praesumant, cum de his confutati fuerint, de quibus praecipue impossibile eis videtur responderi de diuersitate personarum in vna & indiuidua penitus ac simplici diuina substantia, & de generatione verbi seu processione spiritus. De quo quidem nos docere veritatem non promittimus, ad quam neque nos neque mortalium aliquem sufficere credimus: sed saltem aliquid verisimile atque humanae rationi vicinum, nec sacrae fidei contrarium proponere libet, aduersus eos qui humanis rationibus fidem se impugnare gloriantur, nec nisi humanas curant rationes quas nouerunt, multosque facile assentatores inueniunt, cum ferè omnes animales sint homines, ac paucissimi spirituales. Sufficit autem nobis quocumque modo summorum inimicorum robur dissipare, praesertim cum alio modo non possumus nisi has quas nouerunt rationes ex ipsorum artibus afferamus. Absit enim hoc ut credamus Deum, qui malis quoque ipsis benè utitur, non benè etiam omnes artes, (quae eius dona sunt) ordinare, ut haec quoque eius maiestati deseruiant, quantumcumque malè his abutuntur peruersi. Vnde & B. Augustinus, ceteri quoque doctores Ecclesiastici, seculares quoque artes, atque ipsam quoque Dialecticam praecipue sacrae Scripturae admodum necessariam perhibent. Adeo namque praedictus Doctor lib. 11. de ordine, Dialecticam commendare aulus est, ut eam solam scientiam esse profiteri videatur, cum eam solam posse facere dicat scientes. Disciplinam, inquit, disciplinarum, quam Dialecticam vocant, hoc docet docere, hoc docet discere. In hac seipsa ratio demonstrat, atque aperit quae sit quid velit, scit scire: sola scientes facere non solum vult, sed etiam potest. Idem in secundo de doctrina Christiana. Cum inter omnes artes praecipue Dialecticam & Arithmeticam sacrae paginae

necessarias esse profitentur, illam quidem ad dissoluendas
questiones, hanc ad allegoriarum mysteria discutienda, quæ fre-
quenter in naturis numerorum inuestigamus, tanto amplius
Dialecticam extulit, quanto amplius eam necessariam assi-
gnauit, ad omnes videlicet questionum dubitationes termi-
nandas, ait autem sic. Restant ea quæ non ad corporis sensus,
sed ad rationem pertinent, vbi disciplinam disputationis re-
gunt & numeri. Sed disputationis disciplina ad omnia genera
questionum quæ in sanctis libris continentur plurimum valet.
Tamen ibi cauenda est libido rixandi, & puerilis quædam o-
stentatio decipiendi aduersarium. Sunt enim quidem mul-
ta quæ appellantur sophisinata, sicut conclusiones rationum,
& plerumque ita veras imitantes, vt non solum tardos, sed in-
geniosos etiam minus attentos decipiant. Quod genus cap-
tiosarum conclusionum Scriptura, quantum existimo, dete-
statur illo loco vbi dictum est, *Qui sophisticè loquitur, odibilis
est.* Qui rursus in eodem, cum in ipsis Philosophorum dictis ma-
gnam morum ædificationem, & nullam de fide & cultu vnius
Dei doctrinam consideraret, adiecit atque ait. Philosophi
qui vocantur si qua forte & fidei nostræ accommodata dixe-
runt, maximè Platonici; non solum formidanda non sunt,
sed etiam ab eis tanquam iniustis possessoribus, in vsum no-
strum vendicanda. Sicut enim Ægyptus non tantum Idola
habebat quæ populus Israel detestaretur, sed etiã vasa atque
ornamenta de auro & argento, & vestem quæ ipse populus
exiens de Ægypto sibi potius tanquam ad vsum meliorem
clanculo vendicauit præcepto Dei, ipsis Ægyptijs nescienter
accommodantibus ea quibus non benè utebantur. Sic do-
ctrinæ omnes gentilium & liberales disciplinæ vsui veritatis
aptiores, etiam morum quædam præcepta continent, deque ipso
Deo colendo nonnulla vera apud eos inueniuntur. Item in eo-
dem de Philosophis. Dederunt aurum, & argentum, & vestem
suam exeunti de Ægypto populo Dei, nescientes; quemad-
modum illa quæ dabant in Christi obsequium redderentur. No-
uerat itaque iste Ecclesiasticorum maximus Doctor, à Philoso-
phia olim gentili ad veram, quæ Christus est, sophiam conuersus,
quæ in Philosophicis de Deo legerat scriptis, & quã indignum
Philosophicas quoque disciplinas, quæ inter maxima dona
Dei semper in terris effloruerunt, authorem suum atque om-

nium non agnoscere, & ei quoque cui obtemperant omnia, non deseruire. At non deerat & illud quod in Ecclesiastico scriptum est. *Sapientiam omnium antiquorum exquiret sapiens, & in Prophetis vacabit. Narrationem virorum nominatorum conseruabit, & versutias parabolarum simul intreabit. Occulta Prouerbiorum exquiret, & in absconditis parabolorum conuersabitur.* Iuxta quod & Salomon ipse Beato, vt supra meminimus, testante Hieronymo in ipso statim Prouerbiorum exordio commonet vt intelligamus sermones prudentiæ, versutiasque parabolarum, & obscurum sermonem, dicta sapientum & enigmata. Quæ propriè, vt ait Hieronymus, Dialecticorum sunt & Philosophorum, vnde & à sanctis postmodum Patribus, non incongruè liberalium artium studia tamquam sacræ paginæ admodum necessaria plurimum commendantur, cum omnino poetica figmenta Christianis interdiciantur, non solum quia fallacitate referta sunt, & os quod mentitur occidit animam, verum etiam quia inanium fabularum cogitationibus, ad desideria turpitudinum quæ finguntur alliciunt animam, atque à sacræ lectionis studio nos abducunt. De vtrisque autem in promptu sunt sanctorum testimonia nobis. Synodus Eugenii papæ tempore Ludouici. De quibusdam, inquit, locis, ad nos refertur non Magistros neque curam inueniri pro studio literarum. Id circo vniuersis Episcopis subiectisque plebibus & aliis locis, in quibus necessitas occurreret, omnino cura & diligentia adhibeatur, vt Magistri & Doctores constituentur, qui studia literarum libellumque artium habentes, dogmata doceant, quia in his maximè diuina manifestantur atque declarantur mandata. De Poeticis autem figmentis, quos nonnulli Libros Grammaticæ vocare consueuerunt, eo quod paruuli ad eruditionem Grammaticæ lectionis eos legere soliti sint, talia sanctorum sanxit auctoritas. Hieronymus ad Damasium Papam de filio prodigo. Dæmonum cibus est carmina Poetarum secularium, scientia Rethoricorum, pompa verborum. Et post aliqua tamquam Exodi illud ad mentem recurreret, Per nomen externorum Deorum non iurabis, neque audietur ex ore vestro. Absit, inquit, vt de ore Christiani sonet Iupiter omnipotens, & Mehercle, me Castor, & cetera magis omnipotentia quàm numina. At nunc etiam Sacerdotes Dei omisis Euangelis & Prophetis, videmus Comedias legere, ama-

torum Bucolicorum versuum verba cantare, tenere Virgilium; & id quod in pueris necessitatis est, crimen in se facere voluntatis. Idem super Epistolam ad Ephesios. Educate, ait Apostolus, filios in disciplina & correctione Dei, legant Episcopi atque Presbyteri, qui filios suos secularibus literis erudiunt, & faciunt Comedias legere, & amorum turpia scripta cantare. De Ecclesiasticis quoque sumptibus eruditos, & quod in corbonam pro peccato quilibet pauper totam substantiam effundens obrulerat, hæc in Saturnalium sportulam & Minerarum, aut in sumptus domesticos, aut in sordida scorta conuertit. Item idem in Epistola ad Eustochium Virginem. Quæ communio lucis ad tenebras? Quis consensus Christi ad Belial? Quid facit cum Psalterio Horatius, cum Euangelio Maro, cum Apostolo Cicero? Quod verò de Poeticis figmentis, non de Philosophicis documentis, aut liberalium artium studiis, hæc sunt dicta, apertè Isidorus de summo bono libro --- cap. XIII. insinuat dicens: Ideo prohibetur Christianis legere figmenta Poetarum, quia per oblectamenta inuicem fabularum excitant mentem ad incentiuum libidinum. Non enim solum thura offerendo dæmonibus immolatur, sed etiam eorum dicta libentius capiendo. Item, cauendi sunt libri gentilium, & propter amorem sacrarum scripturarum vitandi. Simplicioribus literis non est præponendus succus Grammaticæ artis, meliores enim sunt communes literæ & simplices ad solam vtilitatem pertinentes: illæ verò nequiores sunt quæ ingerunt mentis elocutionem. Meliores sunt Grammatici quam hæretici. Grammaticorum doctrina potest etiam proficere ad vitam, dum fuerint in meliores usus assumpti. Ex Concilio quarto Carthaginensi cap. ix. Episcopus gentilium libros non legat; hæreticorum autem pro necessitate & tempore. Gregorius Desiderio Episcopo. Peruenit ad nos fraternitatem tuam Grammaticam quibusdam exponere, quam tunc ita molestè suscepimus, ac sumus vehementius aspernati, ut ea quæ prius dicta fuerant in gemitum & tristitiam verteremus, quia vno se ore cum Iouis laudibus Christi laudes non capiunt, & quod graue nephandumque sit Episcopum canere, quæ nec laico religiose conueniant, ipse considera. Vnde & Plato ipse, cum ciuitatis nouæ ordinandæ traderet institutionem, poetas à Ciuitate esse deiciendos decreuit, sicut in

secundo

secundo de Ciuit. lib. B. Augustinus his verbis commemorat. An forte, inquit, Platoni potius danda est palma, qui cum ratione formaret, qualis esse ciuitas debeat, tamquam aduersarios ciuitatis Poetas censuit vrbe pellendos? Item post aliqua. Qui scilicet Plato Poetas ipsos, vel pro arbitrio mentientes, vel hominibus miseris, quasi Deorum facta pessima imitanda proponentes, omnino in ciuitate benè instituta viuere noluit, ac si apertè Sanctis ipsis iam illud prædicaret. *Os quod mentitur occidit animam.* Atque illud Apostoli. *Fornicatio & omnis immundicia nec nominetur in vobis, sicut decet sanctos, aut turpitude, aut stultiloquium, aut scurrilitas quæ ad rem non pertinet, &c.* Quid etiam de philosophicis vel de poeticis existimet, musis, & quantum indignetur aliquem alumnum suum ad meretriculas illas vnquam diuertere, in ipso aditu libri Boetij de consolatione Philosophiæ diligenter exprimitur, vbi de ipsa ad consolandum Philosophum accedente, & inspiciente, musa, Philosopho ipsi assistente, ipsemet ait Philosophus. Quæ vbi poeticas musas vidit assistentes, nostro thoro fletibusque meis verba dicantes, commota paulisper ac ternis inflammata luminibus: Quis, inquit, has scenicas meretriculas ad hunc ægrum permisit accedere, quæ dolores eius non modo nullis remedijs fouerent, verùm insuper dulcibus alerent venenis? Hæ sunt enim quæ infructuosis affectuum spinis vberem fructibus rationis segetem necant, hominumque mentes assuefaciunt morbo, non liberant. At si quem profanum, vt vulgo solitum, nobis blanditiæ vestræ detraherent, minus molestè ferrem dum putarem. Nihil quippè in eo nostro opere læderentur. Hunc verò Eleaticis atque Academicis studijs innutritum. Sed abite potius, ô Sirenes vsque in exilium dulces, meisque cum musis curandum sanandumque relinquite. His ille chorus increpitus deiecit humi mæstior vultum, confessusque rubore verecundiam limen tristis excessit. At fortasse inquires, non solùm poetarum, verum etiam liberalium artium lectiones Christianis interdicens, cum B. Hieronymus in Epistola ad Eustochium se grauiter correctum ac verberatum à Domino pro lectione Philosophorum librorum asseuerat. At iam profectò nec Grammaticam à Christiano legi conuenit, sine documentis

cuius nec diuina potest intelligi pagina, nec scriptura aliqua. Sic nec Rethoricā, quæ omnis eloquentiæ tradit ornamenta, quibus maximè sacra scriptura est referta, nec eius decor nisi his diligenter assignatis elucere poterit. Quare igitur inquires propter Ciceronis libros prædictus doctor tam grauiter flagellatus & correctus est, vt sub ostentatione sacramenti cogeretur omnino sæcularium librorum lectioni abrenuntiare? profecto quia non pro vtilitate aliqua, sed pro oblectatione eloquentiæ illius intendebat, neglecto sacre scripturæ studio, cuius quidem vt ipsemet ait, incultus ei sermo horrebat. Ego autem nullius artis lectionem cuiusque religio-
so interdiciendam arbitror, nisi fortè per hoc maior eius aliqua vtilitas præpediatur, sicut in cæteris literis faciendū sci-
mus, vt videlicet minora pro maioribus aut intermittantur, vel penitus omittantur. Quippè cum nulla sit in doctrina falsitas, nulla in verbis turpitudine, nonnulla de scientia vtilitas? quis hoc dicendo aut docendo culpari mereatur, nisi causa venerit supradicta potiori videlicet bono neglecto aut dimisso? Nemo etenim scientiam aliquam malam esse dixerit, etiam illam quæ de malo est, quæ iusto homini deesse non potest. Non vt malum agat, sed vt à malo præcogitato sibi prouideat, quod nisi cognitum teste Boetio vitare non posset. Non est enim malum scire decipere vel adulterari, sed ista committere, quia eius rei bona est cognitio, cuius pessima est actio: & nemo peccat cognoscendo peccatum, sed committendo. Si quæ autem scientia malum esset, utique & malum esset quædam cognoscere. At iam absolui à malicia Deus non posset, quia omnia nouit. In ipso enim solo omnium est plenitudo scientiarum, cuius donum est omnis scientia. Scientia quippè est comprehensio omnium rerum quæ sunt, atque his veraciter cuncta discernit, cui ea quoque quæ non sunt quasi præsentia assistunt. Vnde & enumeratis donis Spiritus eius, ipse *Spiritus scientiæ* esse dicitur. Sicut autem mali quoque scientia bona est, ad euitandam scilicet malum necessaria, ita potestatem etiam mali bonam esse constat ad promerendum necessariam. Si enim peccare non possemus, nihil non peccando promereremur, & ei qui liberum non habet arbitrium, nullum ex his quæ coactus agit debetur præmium. At verò contra, vt ait Propheta, *Qui*

potuit transgredi & non est transgressus, facere mala & non fecit, ideo stabilita sunt bona illius in Domino. Ex his itaque liqui-
 dum est nullam aut scientiam vel potestatem malam esse,
 quantumcumque mala sint exercitia eorum, cum & Deus
 tribuat omnem scientiam, & omnem ordinet potestatem.
 Qui etiam de potestate iniquissimi Pilati aduersus se ait. *Non
 haberes in me potestatem, nisi datum esset tibi de super.* Scientias
 itaque approbamus, sed fallacijs abutentium resistimus. Non
 enim teste Tullio mediocriter errant, qui ex vitio hominis
 scientiam culpant. Sic enim cum de reprehensione ar-
 gumentationum in Rethorica doceret, ait inter cætera. Non
 ad id ad quod instituitur accommodabitur aliqua pars argu-
 mentationis, si res ex vitio hominis vituperabitur: vt si quis
 doctrinam ex alicuius docti vitijs reprehendat. Nullos au-
 tem sacris literis eruditos ignorare arbitror plus in sacra do-
 ctina spirituales viros ex ipso scientiæ studio, quàm ex re-
 ligionis merito profecisse, & quo quisque sanctior ante
 conuersionem suam amplius cum in sancta eruditione sua
 valuisse. Paulus quippè Apostolus licet non maior merito
 quàm Petrus videatur, vel Confessor Augustinus quàm Mar-
 tinus, tanto tamen vterque altero maiorem in doctrina gra-
 tiam post conuersionem habuit, quanto antea maiore lite-
 rarum scientia pollebat. Ex quo præcipuè sæcularium quo-
 que literarum studium diuina dispensatione commendari
 arbitror, non solum propter vtilitatem quam continent, ve-
 rum ne à donis eius alienæ viderentur, si ad nullum eis com-
 modum vteretur. Nouimus tamen & ab Apostolo dictum,
 quia *scientia inflat*, id est superbiam generat. Sed ex hoc præ-
 cipuè bona esse conuincitur quia in malum superbiæ con-
 seium sui trahit; sicut enim nonnulla sunt bona, quæ non
 nisi ex malo proueniunt, ita & nonnulla sunt mala quæ
 ex bono originem trahunt. Pœnitentia quippè, siue cor-
 rectionis satisfactio, cum bona sint ita malum factum co-
 mitantur, vt non nisi ab eo nasci possint. E contrario
 inuidia siue superbia cum sint pessimè à bonis, initium ha-
 bent. Nemo quippè inuidia alterius attenuatur, nisi pro bo-
 nis eius, & nemo nisi ex bonis quæ se habere cognoscit, in su-
 perbiæ extollitur. Vnde & Lucifer ille qui manè oriebatur,
 tanto ad superbiendum pronior extitit, quanto cæteris An-

gelicis spiritibus per sapientiæ vel scientiæ claritatem superior fuit, nec tamen ideo sapientiam eius vel scientiam de naturis rerum cognoscendis quam à Deo acceperat, malam dici conuenit, sed ille superbiendo illa malè vsus sit. Sic & cum quilibet de Philosophia sua vel doctrina superbit, nō ipsam scientiam culpāre debemus propter adiunctum vitium, sed vnumquodque secundum seipsum pensari conuenit, ne fortè indiscretè agentes, propheticam illā maledictionem incurramus. *Va his qui dicunt bonum malum, & malum bonum, ponentes lucem tenebras, & tenebras lucem.* Hæc aduersus illos dicta sufficiant qui suæ imperitiæ solatium quærentes, cum nos aliqua de Philosophicis documētis exempla, vel similitudines inducere viderint, quibus planius quā volumus fiat, statim obstrepunt, quasi sacræ fidei & diuinis rationibus ipsæ naturę rerum à Deo conditarum inimicæ videntur, quarum videlicet naturarum maximam à Deo peritiam ipsi sunt à Deo Philosophi consecuti, vt cum sancti doctores Allegoriarū mysteria in ipsis animalium, vel quarūlibet naturis rerum inuestigent, iuxta ipsorum Philosophorum dicta, has assignant, dicentes quidem hanc huius vel illius naturam esse rei, sicut Physicę scriptores tradiderunt. In tantum verò in ipsa factura delectatur Deus, vt frequenter ipsis rerum naturis quas creauit, se figurari magis quā verbis nostris, quæ nos confinximus aut inuenimus, exprimi velit, vt magis ipsa rerum similitudine, quā verborum nostrorum gaudeat proprietate, vt ad eloquentię venustatem ipsis rerum naturis, iuxta aliquam similitudinem, pro verbis scriptura malit vti, quā propriæ locutionis integritatem sequi. Nemo itaque me culpāre præsumat, si ad propositum nostrum ostendendum, aliquas vel ex nobis vel ex Philosophis similitudines induxero, quibus faciliùs aperire quod desidero, possim. Scriptum quippè est. Fas est ab hoste doceri, & cum intelligentiæ deseruimus modis omnibus curandū est, vt quoad possumus id facile facere studeamus. Vnde est illud Beati consiliū Augustini, in quarto de doctrina Christiana, vbi quidē Christianæ doctrinæ modos exequitur ac docet. Non curante illo, inquit, qui docet quanta eloquentia doceat, sed quanta euidētia. Diligens appetitus aliquando negligit verba cultiora, vnde ait quidā, cum de genere tali elocutionis ageret, esse in eo quandam diligentiam negligentem. Item, quid enim pro-

dest locutionis integritas, quam non sequitur intellectus audientis? cum loquendi omnino nulla sit causa, si quod loquimur non intelligunt, propter quos ut intelligant, loquimur. Qui ergo docet, vitabit verba omnia quæ non decent. Item: insignis est indolis in verbis verum amare, non verba.

Q V I D enim prodest clavis aurea, si aperire quod volumus non potest? aut quid obest lignea, si hoc potest, quando nil quærimus, nisi patere quod clausum est? Sed incassum, inquires, laboramus, si id aperire quærimus, aut quod iam per alios est apertum, ut nostro ulterius labore opus non sit, aut omnino aperiri non potest, ut illud videlicet ineffabile Trinitatis mysterium. Et profectò nihil hoc veriùs. Sed si hoc aperiri non potest ab homine, quid egerunt sancti Patres, qui tot nobis de Trinitate tractatus reliquerunt? Si verò qui de ea tractauerunt, docere quod intendebant potuerunt, & quod clausum erat aperire, quid opus erat vnum post alium scribere, & quod ille iam aperuerat, hunc postea reserare? Quicquid horum quislibet constituat, miror qua me fronte aliquis arguat, si cæterorum de his scribentium providentiam laudet, nisi forte in hoc nostrum iam penitus superfluere tractatum dicat, quod & illorum documenta sufficiant, & nullæ iam ulterius quibus resistendum sit pullulent hæreses, vel nullæ de nostra fide supersint dubitationes, quæ aliquibus rationibus vel ad documentum vel ad defensionem eius egere videantur, atque utinam ita sit. At verò ut innumeram multitudinem infidelium, quæ extra Ecclesiam est, tam Iudæorum scilicet quàm Ethnicorum, præteream, quis ita omnes hæreses repressas profiteri audeat, ut iam nulla apud nos fidei sint schismata, nullæ ulterius futuræ sint dissentiones? Quousque enim paleas cum granis præsens Ecclesia indifferenter continebit, nec messi Domini inimicus homo superfeminare Zizania cessabit? donec videlicet in fine seculi messores Angeli Dei Zizania colligant in fasciculos, & in ignem arduos mittant. Non possunt schismatici, non possunt deesse heretici, nec inter scorpiones & serpentes tutum patebit iter, sed semper ad probationem vel excitationem fidelium habebit mater Ecclesia sub Christi nomine multos quos coleret Anti-Christos, pro quibus ingemiscens quotidie dicat, *Ex nobis exierunt, sed ex nobis non erant, & affectu materno per singulos annos pro eis ut redeant, immolet.*

III.

publicas orationum hostias. Nam oportet, inquit Apostolus, hereses esse, ut qui probati sunt manifesti fiant. Quod maxime in nouissimis temporibus Anti-Christi regno appropinquante, futurum expectamus, quando iuxta Dominicam & Apostolicam sententiam grauiora semper imminere atque excrefcere constat pericula, & refrigefcente charitate, mala omnia amplius pullulare. Vnde & idem Apostolus ad Timotheum. *Hoc autem scito quod in nouissimis diebus instabunt tempora periculosa, & erunt homines seipfos amantes, cupidi, elati, superbi, blasphemii, sine pace, habentes quidem speciem pietatis, virtutem autem eius abnegantes.* Qui & alibi. *Nos, inquit, sumus in quos fines seculorum deueniunt.* Et Petrus in secunda Epistola. *Hoc primum, inquit, scientes quod venient in nouissimis diebus deceptione illusores &c.* Et Ioannes. *Filioli, inquit, nouissima hora est. Et sicut audistis quia Anti-Christus venit, nunc autem Anti-Christi multi facti sunt.* Vnde scimus quia nouissima hora est. Ex nobis enim prodierunt, sed ex nobis non erant. Hinc & in Epistola Iudæ Scriptum est. *Vos autem, charissimi, memores estote verborum quæ predicta sunt ab Apostolis Domini nostri Iesu Christi, qui dicebant vobis, quoniam in nouissimis temporibus venient illusores, hi sunt qui segregant semetipsos & hos quidem arguite iudicatos.* Ac si aperte nos hortaretur dicens, *Prouidete vt tales diiudicare ac rationibus conuincere valeatis, parati semper, vt beatus Petrus meminit, ad satisfactionem omni poscenti vos rationem, de ea quæ in vobis est spe & fide, vt in eo quod detrahunt de vobis, confundantur qui calumniantur vestram bonam conuersationem in Christo.* Idem & coapostolus eius Paulus admonens, *Sermo, inquit, vester in gratia conditus sit sale, vt sciatis quomodo oporteat vos unicuique respondere.* Quæ quidem Apostolorum dicta Beatus diligenter attendens Augustinus, ad Valerium Comitem in libro de nuptijs, & concupiscentia, his scribit verbis. *Quod licet fide robustissima irriseris, bonum est tamen vt etiam noueris defendendo adiuuare quod credimus.* Et Apostolus Petrus paratos nos esse præcepit, *ad satisfactionem omni poscenti nos rationem de fide & spe nostra.* Et Apostolus Paulus. *Sermo, inquit, sit in gratia sale conditus, vt sciatis quomodo oporteat unicuique respondere.* Item in Tractatu de misericordia, nos ad ea quæ nondum capere intelligendo sufficimus, adhortatur dicens, *Petite orando, quærite disputando, pulsate rogando.* Ratione quippè magis heretici sunt quam potesta-

te coercendi, cum iuxta sanctorum Patrum auctoritatem, fideles quoque quibus *omnia cooperantur in bonum*, eorum disputationibus exercitati, vigilantiores atque cautiores reddantur. Vnde Hieronymus super Hieremiam lib. II. Ad tempus, inquit, valet hæresis, ut electi quique manifesti fiant, & probati sint. Augustinus contra Epistolam Parmeniani. Hæretici si in Ecclesia essent, nihilominus errarent: cum autem foris sunt, plurimum profunt, non verum dicendo, quod nesciunt, sed ad verum quærendum carnales, & ad verum accipiendum spirituales Catholicos excitando. Utamur ergo hæreticis, non ut eorum approbemus errores, sed ut Catholicam disciplinam aduersus eorum insidias asserentes vigilantiores & cautiores simus, etsi eos ad salutem reuocare non possumus. Isidorus de summo bono lib. I. cap. XVI. Sancta Ecclesia exercetur sapientia, cum tentatur verbis, exercetur patientia, cum tentatur gladiis, cum prauitatis hereticæ doctrina est propagata Ecclesiæ, nam antea simplici tantum fide vigeat. Hæreticorum ergo occasione propagati sunt Doctores in fide, & per acumen hæresum hodie creuerunt magistri. Vnde & sancti Doctores cum ad exercitationem ut dictum est fidelium adeo necessarias esse hæreticorum disputationes vel inquisitiones attenderent, ratione potius quam potestate eos coerceri sanxerunt, & nos quantæ victoriæ desiderio ad sacræ studium eruditionis sunt potissimum adhortati. Quale est illud Hieronymi ad Nepotianum. Disce inquit, quid doceas, ut possis adhortari in doctrina sacra, & contradicentes reuincere, paratus semper ad satisfactionem omni poscenti ratione de ea quæ in te est spe. Gregorius Bonifacio. Si ita, ut audieram, magnitudo vestra intentione sollicita, de animæ suæ vitæ cogitaret, nequaquam mihi de fide sua per Epistolas, sed per semetipsam posceret respondere, ut & vos de nostra ratione, & nos de vestra credulitate gauderemus. Nam nos licet in omnibus causis, in his præcipue quæ Dei sint, ratione magis constringere homines quam auctoritate festinamus. Idem Dominico Episcopo. Quanquam desideremus omnes hæreticos à Catholicis Sacerdotibus vigore semper rationeque compesci. Idem in pastoralis cap. XXX. Aliter admonendi sunt huius sæculi sapientes, atque aliter hebetes. Illos plerumque rationis argumenta, istos nonnunquam melius exēpla conuertunt.

Illis nimirum prodest ut in suis allegationibus iuncti permaneant, istis verò aliquando sufficit ut laudabilia aliorum facta cognoscant. Nicolaus Papa ad consulta Bulgarorum capit. xli. De eis qui Christianitatis bonum suscipere renuunt, non aliud possumus scribere vobis, nisi ut ad fidem necessariis monitis, & exhortationibus, & ratione eos potius quàm vi convincatis. Isidorus de summo bono lib. ii. Fides nequaquam vi extorquetur, sed ratione atque exemplis suadetur, à quibus autem exigitur violenter, perseverare in eis non possunt exemplo, ut ait quidam, novellæ arboris, cuius si quis cacumē violenter impresserit, denuò dum laxatur in id quod fuerat confestim reuertitur. Hilarius de Trinitate in xii. Oportet eos qui Christum prædicant mundo, irreligiosis mundi imperfectisque doctrinis per scientiam omnipotentiae contraire, iuxta illud Apostoli, *Nostra enim arma non sunt carnalia, sed potentia Deo, ad destructionem munitionum rationis, destruuntia & omnem altitudinem elevatam adversus cogitationem Dei*, fidem non nudam Apostolis atque inopem rationis reliquit. Quæ quamvis potentissima ad salutem sit, tamen nisi per doctrinam instruatur, habebit quidem inter adversa tutum diffugiendi recessum, non etiam retinebit constantem obstudendi, securitatem, eritque ut infirmioribus sunt post fugam castra, non etiam ut castra habentibus adest interrita fortitudo. Constituendæ ergo sunt insolentes adversus Deum disputationes, & destruenda rationum fallacium munimenta, & elevata ad impietatem ingenia conterenda; nec carnalibus armis, sed spiritualibus; nec terrena doctrina, sed celesti sapientia, ut quantæ rerum diuinarum humanarumque discretio est, tantò ultra terrena studia ratio cœlestis excedat. Quomodo ergo audiendi sunt, qui fidem rationibus vel astruendam vel defendendam esse denegant? præsertim cum ipsi Sancti quoque de his quæ ad fidem pertinent ratiocinantes multis exemplorum vel similitudinum rationibus rebelles arguere vel reprimere soleant? Si enim cum persuadetur aliud ut credatur, nil est ratione discutiendum, utrum ita scilicet credi oporteat vel non: quid restat nisi ut æquè tam falsa quàm vera prædicantibus acquiescamus, & illam Fausti hæretici defensionem prætendamus, qua se ab impugnatione fidelium protegere, & ipso per Prophetam ac eorum sententiam nititur confutare? Sic quippè

quippe aiebat, sicut in primo contra Faustum libro Beatus meminit Augustinus, & hæc eneruis fidei confessio in Christo sine teste. Et argumento non credere. Nempè vos ipsi dicere soletis, Idcirco nil esse curiosius exquirendum, quia simplex sit & absoluta Christiana credulitas. Quomodo ergo nunc fidei simplicitatem destruitis, iudiciis ac testibus eam fulciendo? Similem à B. Siluestro oppositionem à Iudeis fieri in vita eius legimus, cum videlicet eos de fide Christi rationibus coartaret. Ita quippe scriptum est: Ioasi rabi dixit. Rationi humanæ non est committenda fides, quæ Deum hunc suadeat credi, quem tu vnum Deum Patrem & Filium & Spiritum sanctum confiteris. Vnum denique simile dictum Beati Gregorij dicitur, quod hi qui suæ solatium imperitiæ querunt, cum ea de fide interrogantur ad quæ respondere non sufficiunt, statim obiciunt illud inquam quod in Homelia Euangeliorum xx. cum de resurrectione corporum loqueretur, ait. Sciendum nobis est quod diuina operatio si ratione comprehenditur, non est admirabilis, nec fides habet meritum, cui humana ratio præbet experimentum. Ex qua profectò sententia, ne videlicet inutilis sit fides & expers meriti, patenter asserunt nil ad Catholicæ fidei misteria pertinens ratione inuestigandum esse, sed de omnibus auctoritati statim credendum esse, quantumcumque hæc ab humana ratione remota esse videatur. Quod quidem si recipiatur, ipsum quoque Gregorium in his quæ antea de dictis eius collegeramus sibi metipsi contrarium reperiemus. Nec sibi tantum sed cæteris omnibus ferè Doctoribus sanctis, qui nos pariter cum ipso ad rationes fidei nostræ perquirendas seu reddendas adhortantur. Alioquin vt supra quoque meminimus, cuiusque populi fides, quantamcumque astruat falsitatem refelli non poterit, & si in tantam deuoluta sit cæcitate vt idolum quod libet Deum esse ac cæli ac terræ creatorē fateatur. Statim quippe qui hoc receperit, cum hinc pulsare eum cœperimus, sicut olim Martyres faciebant, cum Idololatriæ cultum Gentilibus improperebant, respondere poterit, secundum nos ipsos etiam de fide ratiocinandum non esse, nec à nobis alios impeti debere, vnde nos ab aliis censemus impetendos non esse. Nouimus quippe ipsum beatum Gregorium sæpius in scriptis suis eos qui de resurrectione dubitant congruis rerum exemplis vel similitudinibus ratiocinando ipsam

astruere, pro qua tamen superius dixit, fidem non habere meritum cui humana ratio præbet experimentum. Nunquã hic quos rationibus suis in fide resurrectionis edificare volebat, has eius rationes secundũ ipsius sententiam refellere poterat, secundum quam scilicet astruere dicitur, nequaquam de fide humanis rationibus differendum esse, qui nec hoc astruere dicitur, ipse propriè exhibuit factis. Qui nec etiam dixit, non esse ratiocinandum de fide, nec humana ratione ipsam apud Deum habere meritum, ad quam non tam diuinæ auctoritatis inducit testimonium, quàm humanæ rationis cogit argumentum. Nec quia Deus id dixerat creditur, sed quia hoc sic esse conuincitur, recipitur. Distinguitur itaque fides talis à fide Abrahæ, qui contra spem in spem credidit: nec naturæ possibilitatem, sed promittentis attendit veritatem. At numquam si fidei nostræ primordia statim meritũ non habent, ideo ipsa prorsus inutilis est iudicanda, quam postmodum charitas subsecuta, obtinet quod illi defuerat. Numquã multi, cum his quæ prædicabãtur non crederent, ipsarum exhibitione rerum & magnitudine miraculorum credere sunt compulsi. Quod de Apostolo etiam Thoma, cum de resurrectione Domini dubitaret, factum esse cognoscimus. Sic & in Pauli conuersione gestum videmus, qui cum superari ratione non posset, factis ipsis constrictus ad fidem est compulsus, & quanto grauior ipse ante conuersionem fuerit, tanto postmodũ fides eius fortior extitit, vix enim qui loquitur leuiter, credit; firmus in fide permansit. Nec quod leuitate geritur, stabilitate firmabitur. Vnde & in Ecclesiastico scriptum est. *Qui credit citò, leuis est corde, & minorabitur.* Citò autem siue facilè credit, qui indiscretè atque improuidè his quæ dicunt prius acquiescit, quàm hoc ei quod persuadetur ignota ratione quantum valet discutiat, an scilicet adhiberi ei fidem conveniat. Quod etiã diligenter Beatus pensans Hieronymus, cum sanctæ Marcellæ studium & discretionem commendaret, lib. i. in Epistolam Pauli ad Galatas ita meminit. Scio equidem ardorem eius, scio fidem, quam flammam habeat in pectore superare sexum, obliuisci homines, & diuinorum voluminum tympano concrepante, rubrum huius sæculi mare transfretare. Certè cum Romæ essem, numquam tam festina me vidit, vt non de scripturis aliquid interrogaret. Neque enim

Hoc reprehendit Bernard. Clarenvallen. Abb. quia si non de fide in Deum ibi agitur, sed de mutua credulitate.

more Pythagorico quicquid respondebam rectum putabat, nec sine ratione præiudicata apud eam valebat auctoritas, sed examinabat omnia, & sagaci mente vniuersa pensabat, ut me sentirem non tam discipulam habere, quàm iudicem. Nunc verò è contra plurimi solatium suæ imperitiæ querunt, ut cum ea de fide docere nituntur, quæ ut etiam intelligi possint, differere non sufficiunt, illum maximè fidei feruorem commendent qui ea quæ dicantur antequam intelligat credit, & prius his assentit ac recipit, quàm quæ ipsa sint videat, & an recipienda sint agnoscat, seu pro captu suo discutiat. Maximè verò id profitentur, cum ea predicantur quæ ad diuinitatis naturam, & ad sanctæ Trinitatis pertinent discretionem, quæ penitus in hac vita non posse intelligi asseuerant, sed hoc ipsum intelligi vitam dicunt æternā. Iuxta illud veritatis. *Hæc est autem vita æterna, ut cognoscant te Deum verum, & quem misisti Iesum Christum.* Et iterum. *Manifestabo eis meipsum.* Sed profecto aliud est intelligere seu credere, aliud cognoscere seu manifestare. Fides quippè dicitur existimatio non apparentium, cognitio verò ipsarum rerum experientia per ipsam earum præsentiam. Quæquidem duo B. Gregorius distinguit Homelia vi. lib. ii. in Euangelia. Liqueat, inquit, quia fides illarum rerum est argumentum quæ apparere non possunt, quæ enim sunt apparentia fidem non habent, sed agnitionem; proprie quoque de inuisibilibus intellectus dicitur, secundum quod quidem intellectuales & visibiles naturæ distinguuntur. Quisquis etiam in hac vita, ea quæ de Trinitate dicuntur, non posse intelligi arbitratur, profecto in illum Montani heretici labitur errorem, quem Beatus damnans Hieronimus in prologo commentariorum Esayæ sic ait. Neque verè, ut Montanus somniat Prophetæ in extasi sunt locuti, ut nescirent quid loquerentur, & quod alijs erudirent, ipsi ignorarent quid dicerent. Sed iuxta Salomonem qui loquitur in Prouerbijs, *Sapiens intelligit quæ loquitur de corde suo, & in labijs suis portabit scientiam*, & ipsi sciebant quid dicerent. Item quomodo sapienter prophetæ ad instar brutorum animalium, quid dicerent ignorabant? Hinc est & illud Origenis, Epistolam pauli ad Rom. exponentis. Secundum reuelationem mysterij æternis temporibus taciti, &c. Sed requirendum est, utrum id dicam in silentio habitum, ut

omnino nullus agnouerit neque ipsi quidem qui annuntiabant Prophetæ. Mihi quidem valde absurdum videtur, ut dicamus Prophetas ita scripsisse de sacramentis diuinis, ut non intellexerint quæ dicebant, cum scriptura dicat. *Sapiens intelligit quæ de ore eius procedunt, & in latius portat intellectum.* Si verò non intellexerint quæ de ore proprio proferebant, non erant sapientes. Vnde si stultum est Prophetas negare sapientes fuisse, restat ut intellexerint quæ proferebant. Paulus dicit audiuisse *verba quæ non licet homini loqui*, non quod ipse ignoret quod audierit, sed quod alijs pandere quæ sibi sunt indicata non liceret. Ita ergo potest & hoc loco dictum videri sacramentum in silentio habitum, quod scirent quidē Prophetæ, sed hominibus id est vulgo non manifestauerint, sed texerint, secundum præceptum Dei, usquequo tempus adesset, & Verbum caro fieret. Adeo quoque quęcunque prædicantur, ita dici ut intelligi possint Apostolus iubet, ut omnino à prædicatione quiescendum esse præcipiat, si in his quæ prædicanda sunt desit qui prophetare valeat, hoc est ea quæ dicuntur exponere, & eorum intelligentiam aperire. Vnde ipse nos ad spiritualium donorum desiderium exhortans in prima ad Corinth. Epistola, dicit. *Emulamini spiritualia, magis autē ut prophetetis*; hoc est super cætera Spiritus sancti dona, hoc maxime desiderate, ut quæ lingua proferuntur, hoc est in verbis sonant, per intelligentiam videri faciat, & exponere possitis. Quia etenim Prophetæ *videntes* antiquitus dicebantur, hoc loco Apostolus prophetare dicit, visum intelligentiæ ministrare. Qui etiam statim prosequens quanta sit utilitas prophetandi, & quàm excellentius sit prophetare quàm loqui lingua sola, id est verba exponere magis quàm formare, Qui enim loquitur lingua, inquit, nō hominibus loquitur, sed Deo. Nemo enim audit, hoc est intelligit. Quem etiam auditum Dominus requirit dicens. *Qui habet aures audiendi audiat.* Item Apostolus de utilitate prophetandi, subiecit *Nam qui prophetat hominibus loquitur ad ædificationem*, Et iterum. *Qui loquitur lingua semetipsum ædificat, qui autem prophetat Ecclesiam ædificat, volo autem vos omnes loqui linguis, magis autem prophetare. Nam maior est qui prophetat, quàm qui loquitur linguis, nisi forte interpretetur ut Ecclesia ædificationem accipiat. Nunc autem fratres si venero ad vos linguis loquens, quid vobis prodero?* De quo quidem & congruam

statim similitudinem inducens ait. *Quæ sine anima sunt vocantur dantia siue tibia, siue cithara, nisi distinctionem sonituum dederint, quomodo sciatur quod canitur, aut citharizatur? Etenim si incertam vocem det tuba, quis parabit se ad bellum? Ita ergo & vos per linguam nisi manifestum sermonem dederitis, quomodo sciatur id quod dicitur? Eritis enim in æra loquentes. Quasi inutiliter aerem solum exterius lingua verberantes, non cor interius per intelligentiam contingentes. Et rursus. Ego si nesciero virtutem vocis, Deo cui loquor barbarus, & qui loquitur mihi barbarus, sic & vos & omnis qui loquitur lingua oret ut interpretetur. Quid quæso virtutem vocis dicit, nisi eius intelligentiam propter quam est reperia? Quod etiam beatus (ut supra meminimus) attendens Augustinus, Quid prodest, inquit, locutionis integritas quam non sequitur intellectus audientis, cum loquendi omnino nulla sit causa, si quod loquimur non intelligunt propter quos ut intelligant loquimur? Qui etiam tam verborum intelligentiam in Ecclesia necessariam dicit, ut cum ibi aliquæ benedictiones fiunt, non debeat amen responderi nisi ab intelligentibus, qui videlicet discernere possint an benedictionis verba sint, an maledictionis. Quomodo, inquit, dicet Amen super tuam benedictionem, quando quæ dicas nescit? Et rursus. Gratias ago Deo meo, quoniam omnium vestrum lingua loquor. Sed in Ecclesia volo quinque verba sensu meo loqui, ut & alios instruam, quàm decem verborum millia in lingua. Et statim ad perfectionem intelligentiæ sacrorum verborum nos adhortans, Fratres, inquit, nolite pueri effici sensibus, sed malitia paruuli estote, sensibus autem perfecti. Qui etiam eos qui quæ prædicant exponere non sufficiunt, quantæ irrisioni sunt habendi, non reticet dicens. Si ergo conueniat vniuersa Ecclesia in unum, omnes linguis loquantur, intrent autem idiote aut infideles, nonne dicent quod insanitis? Vnde & post aliqua de illo qui prædicat, adiecit, Si autem non fuerit interpretes taceat in Ecclesia, sibi autem loquatur & Deo. Ac si aperte dicat. Non præsumat loqui hominibus, qui ad exponendum quæ dicit, non sufficit; sed magis ad Deum qui expositione non indiget, in suæ fidei confessione verba conuertat, quàm ad hominum doctrinam verba quæ non intelligantur, frustra proferat. Si autem eos qui prædicant, cum illa quæ dicuntur exponere non sufficiunt, cessare*

conuenit à prædicatione, quantomagis cum nec ipsi intelligunt ea quæ proferunt, & tota eorum fides in ore potius quàm in corde consistat, cùm è contrario dicat Apostolus. *Corde creditur ad iustitiam, ore autem confessio fit ad salutem?* Qui enim quod dicit non intelligit, profectò quod dicit ipse, nescit; & docere imprudenter præsumit. Quæ ipse adhuc ignorat inter eos merito computandus, quibus veritas impropere ait. *Cæci sunt duces cecorum.* Et Apostolus, *Nescientes,* inquit, *quæ loquuntur, ne quæ de quibus affirmant.* Adhuc quoque post Euangelicam reuelationem, post tot sanctorum patrum reuelationem, post tot sanctorum patrum reuelationem ---- velamen Moysi super cor habentes, nec adhuc cum Apostolo, *reuelata facie gloriam Domini speculantes,* hoc illi audiât qui sacræ Scripturæ magistri resistentes, verba magis pueros proferre, quàm intelligere docent. Nec ad salutem illius sapientis prouerbium quod pueri didicerunt, eorum conterit impudentiam, legere enim & non intelligere, negligere est. Qui cum in his cæci sunt, quæ de Deo dicuntur, tanto hic eorum error est periculosior, quâto est huius rei doctrina magis necessaria, quæ tanquam omnium bonorum fundamentum collocatur. Quod nisi diligenter fuerit inspectum, nihil securitatis asseret quod fuerit superædificatum. Quid denique magis ridiculosum quam si aliquis alium docere volens, cum requisitus fuerit de his quæ dicit vtrum intelligat, neget seipsum intelligere quæ dicit vel se nescire de quibus loquitur? Quantum cachinnum Philosophis & Græcis sapientiam quærentibus Apostoli mouissent, filiû Dei prædicantes, si in ipso statim prædicationis exordio sic confutari possent, vt qui eos primum prædicare ac docere oportebat ipsi se nescire faterentur? Quod nec fortè de ipsis præsumamus, quibus veritas Spiritum sanctum promittens ait, *Ille vos docebit omnia, & suggeret vobis omnia, quæcumque dixerò vobis.* Audiamus & quantam eis fiduciam de tanto magistro veritas ipsa reliquerit dicens. *Non enim vos estis qui loquimini, sed spiritus patris vestri, qui loquitur in vobis.* De quo & alibi scriptum est. *Et non poterant resistere sapientiæ & spiritui qui loquebatur.* Si qua igitur mysteria de Deo antea disseruimus, hic potius in nobis quàm nos ipsi, hoc agit, & quod nobis est impossibile, ipsi est facile. In quo adeò cuncta consistunt, quæ salubriter profitemur, vt nemo possit dicere Dominus Iesus, nisi in Spiritu sancto. Hoc igitur docente intelligimus, hoc suggerente disseri-

rimus quæ nos ipsi non possumus, ipsa etiam Dei & Trinitatis mysteria. Quæ diligenter beatus distinguens Hieronymus, ipsam verbi generationem, & à nobis disleri non posse, & per nos disleri posse profitetur. Vnde ipse super Ecclesiastem, ut iam supra meminimus, ubi scriptum est, *quis sit spiritus filiorum hominum, si aseat sursum, & spiritus pecoris descendat deorsum in terra*, an sic. Adiciendo *quis* difficultatem voluit demonstrare. Pronomen enim *quis* in scripturis sanctis non pro impossibili, sed difficili ponitur, ut in *Generationem eius* id est Christi, *quis enarrabit?* Idem super Mathæum cum illud exponeret, *Liber generationis Iesu Christi*: In Esaia, inquit, legimus, *Generationem eius quis enarrabit?* Non ergo putemus Euangelium prophetæ esse contrarium, ut quod ille impossibile dicit effatu, hic narrare incipiat, & ibi de generatione diuinitatis, hic de incarnatione dictum est. Et beatus Augustinus hanc ipsam verbi generationem profitens, frustra legi vel exponi, siue intelligi à multis etiam antequam exponatur, intelligi posse asseuerat. Vnde ipse cum ad hanc exponendam veniens, verba illa Ioannis præmisisset, *In principio erat verbum, & verbum erat apud Deum, & Deus erat verbum*, statim exorsus ait (ut supra quoque meminimus) *hoc animalis homo non percipit*. Quid ergo fratres, silebimus hinc? Quare ergo legitur non siletur, aut quare auditur si non exponitur? Sed ut quid exponitur, si non intelligitur? Itaque quoniam rursus esse non dubito in numero nostro quosdam à quibus non solum possit expositum capi, sed & antequam exponatur intelligi, non fraudabo eos qui possunt capere dum timeo superfluum esse auribus eorum qui non possunt capere. Quid enim hoc mirum à fidelibus Christianis, post tot documenta intelligi posse, quæ reuelante Deo à gentilibus quoque reprobis (ut etiam supra dictum est) Paulus intelligi & cognosci manifestè testatur dicens, *Quia quod notum est Dei; manifestum est in illis. Deus enim illis reuelauit &c.* Et rursus. *Quia cum cognouissent Deum, non sicut Deum glorificauerunt &c.* Sed fortassis inquires, quid ergo profuerunt tot sanctorum patrum de fide tractatus, si adhuc aliquæ supersint dubitationes, quibus nondum satisfactum sit? Audi illud Poetæ dictum,

Est quoddam prodire tenus si non datur ultra.

Sufficiebat eis quæstiones quas audiebant, dissoluere, & sui

temporis dubitationes terminare, posterisque exemplum relinquare, cum similibus si forte acciderint, operam dare, bene inquires, si acciderint, & tunc arma sumenda cum hostis imminerit. Annuo tunc quidem esse sumenda, sed ante fabricanda ac præparanda. Quid si hostis esset semper, numquid satis debemus nobis esse nostra obtinere quietè, & non acquisitis aliis amplificare? Atque utinam illud saltem possemus, si istud maximum assequi non possumus! Sed attende obsecro illud quoque poeticum.

--- *Nondum tibi defuit hostis.*

Prætermitto Iudæos & Ethnicos.

IV. AD hereticos venio qui quanto destitiores, tanto peiores, ciuilibus bellis inquietare Ecclesiam non cessant. Atque ut ad nostra veniamus tempora, quibus iam aiunt adeò repressas esse ut iam nullo fidei fundamento sit opus: nullos in tantam olim insaniam prorupisse hereticos quisquam audierit, quanta nouulli contemporaneorum nostrorum debacchati sunt. Tanquelmus quidam laicus nuper in Flandria, Petrus presbyter nuper in Prouincia, ut ex multis aliquos in medium producamus. Quorum quidem alter, Tanquelmus scilicet, in tantam se erexit dementiam, ut se Dei filium vocitari atque decantari, & à seducto populo, ut dicitur, templum ædificari sibi faceret. Alter verò ita ferè omnem diuinorum, sacrorum & Ecclesiasticæ doctrinæ institutionem eneruarat, ut multos rebaptisari cogeret, & venerabile Dominicæ signum crucis remouendum penitus censeret, atque altaris sacramentum nullatenus celebrandum esse amplius astrueret.

V. SED nec magistros diuinorum librorum, qui nunc maxime circa nos pestilentix cathedras tenent, prætereundos arbitramur, quorum vnus in Francia, alter in Burgundia, tertius in pago Andegauensi, quartus in Bituricensi, multa Catholicæ fidei, vel sanctis doctrinis aduersa non solum tenet, verum etiam docent.

VI. PRIMVS quidem ille quem diximus, sine fide venturi multos qui ante incarnationem eius extiterunt, saluandos asserit, Dominum nostrum Iesum Christum in aperto utero virginis fuisse natum, sicut & cæteros homines, nisi quod ipse solus sine virili semine sit conceptus. In ipsa quidem Diuinitatis natura, ac diuinarum personarum distinctione, ita presumptuosus

præsumptuosus assertor inuenitur, vt quia Deus pater genuit filium, profiteatur Deum genuisse seipsum. Quem aperte errorem, imò hæresim B. August. in primo de Trinit. refellit dicens, Qui putat eius potentia Deum vt seipsum ipse genuerit, eo plus errat, quod non solum ita Deus non est, sed nec spiritualis creatura nec corporalis, nulla enim res est omnino quæ seipsam gigant.

ALTER quoque totidem erroribus inuolutus, tres in Deo proprietates, secundum quas tres distinguuntur personæ, tres essentias diuersas ab ipsis personis, & ab ipsa diuinitatis natura constituit, vt scilicet paternitas Dei, vel filiatio siue processio, res quædam sint tam ab ipsis personis, quàm ab ipso Deo diuersæ, qui etiam Dominum Iesum in corpore, more aliorum hominum creuisse denegat, & eius longitudinis corpus in vtero matris, vel in cunis extitisse, cuius postmodum fuit in cruce. Monachos autem atque moniales, post publicum etiam suæ professionis votum, & benedictionis vel consecrationis vinculum, posse matrimonium contrahere, vbi licet sit voti transgressio, nulla tamen fiet initæ copulæ separatio: sed in ipso permanentes matrimonio de transgressione pœnitentiã agunt.

VII.

TERTIVS verò prædictorum, non solum prædictarum personarum proprietates res diuersas à Deo constituit, verum etiam potentiam Dei, iustitiam, misericordiam, iram, &c. huiusmodi quæ iuxta humani sermonis consuetudinem in Deo significantur, res quasdam & qualitates ab ipso diuersas, sicut & in nobis concedit, vt quot ferè vocabula de Deo dicuntur, tot in Deo res diuersas constituat.

VIII.

QUARTVS autem in tantam prorupit insaniam, vt quia res aliter euenire possunt quàm Deus prouiderat, Deum posse falli concedat. Hoc illi attendant qui de fide amplius minime scribendum autumant, cum mille, vt aiunt, hoc tempore hæreses pullulent, quasi ipsi omnium conscientias & fidem cognouerint.

IX.

NUNC ad propositum redeamus, qualiter videlicet in tanta diuinæ substantiæ vnitatem, tres personæ intelligi ac differi queant, vt quæ pronuntiant verba, non abhorreat intelligentia, Tantam quippè diuinæ vnitatem substantiæ ac simplicitatem seu identitatem profiteamur, vt sicut à partibus

X.

ita ab accidentibus immunis omnino perseveret, nec in nullo penitus variari queat, nec in ipsa quicquam esse possit, quod ipsa non sit. Eadem itaque substantia simplex omnino atque indiuidua quæ pater est tam filius quàm Spiritus sanctus; eadem etiam tota est Trinitas, id est tres simul hæ personæ, non ut minus ipsa Trinitas quàm singulæ personæ indiuidua sit prædicanda, nec sit maior totius Trinitatis essentia, id est trium simul personarum quàm singularum, hoc est omnium simul quàm cuiuslibet vnius earum per se. Vnde Augustinus de Trinit. lib. vii. cap. vii. Non quoniam Deus est Trinitas, ideo triplex putandus est, alioquin minor esset in singulis, quàm in tribus pariter. Item cum dicimus tres personas, vnā essentiam, neque ut genus de speciebus, neque ut species de indiuiduis prædicamus. Videtur posse dici, ut tres homines vna natura, sed plus sunt tres homines quàm vnus, sed non est maior essentia, pater & filius quàm solus pater aut solus filius. Item nõ tantum vnus homo, quantum tres homines simul, & plus aliud sunt duo homines quàm vnus homo, ac in Deo non est ita: non enim maior est essentia pater & filius, quàm solus pater aut solus filius, sed tres simul personæ æquales sunt singulis. Exempla sanctorum Augustini & Alpij ad Maximum medicum Cemitanum. Trinitas vnius eiusdemque naturæ atque substantiæ non minor in singulis quàm in omnibus, nec maior in omnibus quàm in singulis, sed in solo patre, vel in solo filio tanta est, quanta est in patre & in filio simul, & tanta in Spiritu sancto, quanta in patre & filio. Cum itaque non sit maior essentia totius Trinitatis, quàm singularum personarum, constat quoque ipsam Trinitatem sicut singulas, indiuiduam esse, hoc est nullas penitus in quantitate suæ essentiæ partes habere. Omne quippe quod partibus constat, ipsis partibus ex quibus, suum esse contrahit, naturaliter posterius dicitur. Summa verò illa Trinitas, quæ vniuersorum supremum principium est, qua ratione posterius aliquo dici potest? Amplius. Omne, inquit Plato, quod iunctum est natura, dissolubile est. Et B. Hilarius in Psal. cxxix. Quisquis ita valet credere, ut Deus corporalis sit, quia ad imaginem eius homo factus compositum Deum statuet esse. Quicquid autem compositum est, necesse est non fuerit æternum, quia compositio habet initium, quo compositum maneat. De sinceritate autem ac puritate diui-

nã substantiã, vt nulla videlicet penitus accidentia, nullas ha-
 beat formas, sicut nec partes, Boetius de Trinitate lib: i. cum
 sumnam eius vnitatem asseueraret, ait. Quocirca hoc verè
 vnum in quo nullus numerus, nullum in eo aliud præter id
 quod est, neque substantium fieri potest: forma enim est,
 formæ verò subesse non possunt. Formam itaque Boëtius lo-
 co hoc appellauit diuinam substantiam secundum hoc quod
 nullarum formarum fundamentum est. Sanctus quoque Au-
 gustinus diuinæ naturæ sinceritatem astruens, lib. xi. de Ci-
 uit. Dei ait. Non propter hoc naturam illam boni simplicem
 dicimus, quia est pater in ea solus, aut filius solus, aut Spiri-
 tus sanctus: id est, aut sola est ista nominis Trinitas sine sub-
 stantia personarum, sicut Sabelliani putauerunt, sed ideo sim-
 plex dicitur quia est hoc quod habet, excepto quod relatiuè
 quoque persona ad alteram dicitur. Nam vtique pater habet
 filium, nec tamen ipse est filius, & filius patrem, nec tamen est
 pater, in quo verò ad semetipsum dicitur non ad alterum, hoc
 est quod habet, sicut ad semetipsum dicitur vnus habendo
 vitam, & eadem vita Christus est, propter hoc vtique natu-
 ra hæc dicitur simplex quod non sit aliud habens, aliud quod
 habet sicut in cæteris rebus. Neque enim vas habens liquo-
 rem, nec corpus color, nec aer lux siue feruor, nec anima est
 sapientia. Hinc est etiam quod priuari possunt rebus quas ha-
 bent, & in alios habitus verti atque commutari. Idem in vii.
 Confessionum ad Deum loquens ait. Nec cogeris inuitus ad
 aliquid, quia voluntas tua non est maior quàm potentia, esset
 autem maior si te ipso tu ipse maior esses. Item voluntas & po-
 tentia Dei Deus est. De incommutabilitate autem atque in-
 variabilitate diuinæ substantiæ, de qua ipsemet per Prophetam
 loquitur, *qui est misit me ad vos*. Et alibi. *Ego sum Deus & non*
mutor, ipsos Philosophos consulat qui scripturarum sacrarum
 documentis contentus non est. Vnde Macrobius cum iuxta
 Plotinum quatuor virtutes Deo assignaret: Fortitudo, inquit,
 illi est, quod sæper idẽ est, nec aliquãdo mutatur, hoc est quod
 supra memoratus Doctor, & Max. Latinorum Philosophorũ
 Boetius, in lib. 3. de cõsolatione Philosophiæ astruit his verbis.

*O qui perpetua mundum ratione gubernas,
 Terrarum cælique sator, qui tempus ab æuo
 Ire iubes, stabiliisque manens, das cuncta moueri.*

Omne quippè quod variatur, siue per alterationem, & quamlibet rei mutationem motum esse constat. Quamquidem incommutabilitatem Dei, immortalitatem ipsius appellamus. Vnde August. de natura summi boni. Vera, inquit, immortalitas, hoc est summa illa incommutabilitas quam Deus habet solus, qui mutari omnino non potest. Idem supra, naturæ corruptibiles iam non incommutabiles sunt, quia nil est unde factæ sunt. Omnis enim mutatio facit non esse quod erat; verè ergo ille est qui incommutabilis est. Cum sit itaque tanta diuinæ substantiæ vnitas, simplicitas, puritas, atque identitas, vt in ea videlicet nulla sit partium aut accidentium seu quarumlibet formarum diuersitas, nulla vnquam variatio, quomodo tres personæ in ea assignari, siue intelligi queant? cum nulla ibi sit rerum multitudo, vbi tantum est vna atque indiuidua penitus substantia: nullus ibi rerum numerus, vt vel tria vel multa dicere possumus, sed eadem penitus substantia simplex omnino atque indiuidua sit, singulæ personæ siue omnes simul, hoc est vnaquæque trium personarum, siue ipsa vt dictum est, Trinitas. Quippè vbi nulla est multitudo rerum, imo penitus nulla multitudo, nulla pluralitas, nulla diuersitas, quomodo multitudo personarum, aut vlla earum diuersitas erit? Qua ratione altera persona ab altera diuersa est, sine etiam ab ipsa Trinitate, cum eadem penitus, vt dictum est trium personarum substantia sit, nec vlla abinuicem vel essentia diuersitate vel accidentium, siue formarum proprietate disiunctæ sunt. Difficile fortasse, imo impossibile est homini hoc disslerere, & ei maximè qui in omnibus quæ astruit per humanas rationes satisfacere contendit, & cum de re aliqua singulariter quicquam discutit, quod ad eius proprietatem pertinet, aliarum id rerum multitudine nititur confirmare, cum videlicet vnaquæque res proprium quiddam habeat, per quod à ceteris omnibus differt, nec facile sit dissimilitudinem in ceteris assignare. Quanto autem excellentia diuinæ naturæ à ceteris quas condidit naturis, longius abscedit, tanto minus congruas similitudines in illis reperimus, quibus satisfacere de ista valeamus. Quam etiam naturam Philosophi Deum ignotum profitentes, in tantam eius excellentiam, omnium mortalium cogitationem excedentem, veriti sunt attingere, vt nec quid ipsa sit diffinire ausi sint, cum summus ille,

ut supra meminimus, Philosophorum Plato, vix quid sit dicere ausus sit: hoc solum de eo sciens, quod sciri qualis sit ab hominibus non possit. Hermes quoque de filio Dei, Cuius, inquit, nomen non potest humano ore narrari. Ecce ille negat ab homine hunc posse sciri, iste verò posse edisseri. Vnde ipsum penitus cum rerum omnium naturas Philosophi distinguere, prætermittentes, quem nec ore disseri, nec mente concipi profitentur, sic eum à numero rerum excluderunt, quasi eum nihil esse astruerent. Cum enim omnem rem aut substantiæ, aut alicui aliorum generalissimorum subijciant, utique & Deum si inter res ipsas comprehenderent, aut substantijs aut quantitatibus, aut cæterorum predicamentorum melius connumerarent, qui nil omnino esse ex ipsis convincitur. Omnes quippè res præter substantias, per se subsistere non possunt, nisi scilicet subiectis sustententur substantijs, ut albedo nulla ratione esse potest nisi in subiecto corpore, aut pietas nisi in anima, aut quælibet res novem predicamentorum, nisi in subiectis substantijs insint. Substantiæ verò in propria natura per seipsas existere aut perseverare possunt, omnibus & alijs rebus destructis. Vnde & substantiæ quasi subsistentiæ esse dictæ sunt, & cæteris rebus, quæ ei assistunt, non per se subsistunt, naturaliter priores sunt. Ex quo liquidum est Deum, qui omnium rerum est initium, & singulare principium, nullo modo in eorum numero contineri quæ substantiæ non sunt. Sed nec substantiæ secundum eos supponitur Deus, licet ipse maximè sit res per se existens, & verum & incommutabilem esse ipse solus à se habeat à quo sunt omnia. De cuius quidem veritate ac simplicitate siue incommutabilitate substantiæ, August. in lib. de Trinitate ait. Sic intelligamus Deum si possumus quantum possumus sine qualitate bonum, sine quantitate magnum, sine indigentia creatorem, sine situ præsentem, sine habitu omnia continentem, sine loco ubique totum, sine tempore sempiternum, sine vlla mutatione sui mutabilia facientem, nihilque patientem. Quisquis Deum ita cogitat, et si non dum potest inuenire omnino quid sit, pietatem tamen caueat quantum potest, aliud de eo sentire quod non sit. Est tamen sine dubitatione substantia, vel si melius hoc ap-

pellatur essentia, quam Græci *ὅτις* vocant. Quod autem nec iuxta Philosophos ipse Deus substantia sit dicendus, facile convinci potest ex ipsis scripturis omnium Dialecticam tractantium, quam nunc latinitas Porphyrij scilicet, Aristotelis & Boetij. Ait quippè Porphyrius in Isagogis, quas ad Cathedrias Aristotelis perscripsit. Ait, inquam, vnamquamque substantiam vna specie participare, pluribus verò accidentibus & separabilibus & inseparabilibus. Aristoteles quoque in Cathedrijs propriū substantiæ assignans ait. Maximè autem proprium substantiæ videtur esse, quod cum sit vnum & idem numero contrariorum est susceptibile. Item, idem de eodem. Quare proprium erit substantiæ quod cum sit vnum & idem numero, susceptibile est contrariorum. Cum itaque Deo ista omnia coaptari non possunt, cuius substantia nec accidentibus variari, nullis omnino formis subiacere potest; liquet nec inter substantias eum Philosophos recepisse. Ea profecto ratione quæ Plato, inter nullam & aliquam substantiam *ὅτις* collocavit, quam omnino adhuc informem conceperit. Neque enim substantia non est Deus si verè subsistere naturam & incommutabilem esse, in ipso attendamus. Nec rursus substantia est, si vtitatā nominis substantiæ appellationem sequamur, cum videlicet accidentibus subiectus esse non possit. Vnde & in illo argumento Deus non esse substantia ostenditur apertè, quo Boetius quamvis Christianus, opinionem Philosophorum secutus, cum de Philosophia tractaret, Themistium scilicet & Tullium in Topicis suis vestigans, probat in quinto Topicorum ipsorum, albedinem non esse substantiā, his verbis: Substantia est, quæ omnibus accidentibus possit esse subiectum, albedo autem nullis accidentibus subiecta est, albedo igitur substantia non est. Ipse quoque Augustinus hanc vtitatam & propriam significationem substantiæ apertè proficitur in VII. de Trinit. lib. cap. IV. & V. his quidem verbis de Deo disputans. Sicut enim ab eo qui est appellatur esse essentia, ita ab eo quod est subsistere, substantiam dicimus. Absurdum est autem ut substantia relatiuè dicatur. Omnis enim res ad se ipsum subsistit; quanto magis Deus? si tamen dignum est ut dicatur subsistere. De his enim rebus intelligi ratione in quibus subiectis sunt ea quæ in aliquo subiecto esse dicuntur, sicut color in corpore. Item, Res ergo mutabiles neque simpli-

ces propriè dicuntur substantia. Item, nephas est autem dicere ut subsistat, & subsistit bonitati suæ, atqui illa bonitas non substantia sit, vel potius essentia, neque ipse Deus sit bonitas sua, sed in illo sit, tamquam in subiecto. Vnde manifestum est Deum abusiue vocari substantiam, ut nomine vsitatori intelligatur essentia, quæ verè ac propriè dicitur, ita ut fortasse Deum solam dici oporteat essentiam. Est enim verè solus quia incommutabilis est, idque suum nomen Moysi enunciauit, cum ait. *Ego sum qui sum*, Et dices ad eos, *Qui est misit me ad vos*, Sed tamen siue essentia dicatur, quæ propriè dicitur, siue substantia quod abusiue, vtrumque ad se nō relatiue dicitur, vnde hoc est Deo esse quod subsistere, & ideo si vna essentia Trinitas, vna etiam substantia. De quo etiam Iob laqueitur. Ipse enim solus est & nemo aduertere potest cogitationes eius. Ex his itaque liquet, nec etiam iuxta sanctos propriè, nec iuxta Philosophos vllomodo Deum substantiam dici. Patet itaque à tractatu Philosophorum, rerum omnium naturas in decem prædicamenta distribuentium, illam summam maiestatem esse exclusam omnino, nec vllō modo regulas aut traditiones eorum ad illam summam atque ineffabilem celsitudinem conscendere, sed creaturarum naturis inquirendis eos esse contentos secundum quod scriptum est. *Qui de terra est, de terra loquitur*, quas nec adhuc comprehendere ac ratione discutere ad illud sufficiunt. Quod summus ille sapientum Salomon considerans ait. *Cunctæ res difficiles, non potest eas homo explicare sermone, & alta profunditas, quis inueniet eam* Et per semet ipsam sapientia. Cogitationes inquit mortalium timidæ, & incertæ prouidentia nostræ, *Corpus enim quod corrumpitur aggrauat animam, et deprimit terrena habitatio sensum multa cogitantem*. Et difficile estimabimus quæ in terra sunt, & quæ in prospectu sunt, inueniemus cum labore quæ in cœlis sunt, aut quis inuestigabit? Quod etiam omnishæc locutio ad creaturarum status maximè accommodata sit, ex ea præcipuè parte orationis apparet, sine qua nulla dicitur constare perfectio orationis, ex ea scilicet quæ verbum appellatur. Hæc quippè dictio temporis designatiua, quæ incepit a mundo. Vnde si huius partis significationem attendamus, per eam cuiusque constructionis sensum infra ambitum contineri vel coerceri temporis, hoc est ad eas res tantum temporaliter inclinari, quas demonstrare,

Volumus temporaliter contingere, nec æternaliter subsistere.
 Vnde cum dicimus Deum priorem esse mundo, siue existere
 ante tempora, quis sensus in his verbis verus esse potest de pro-
 cessione Dei & successione istorum, si hæc verba ad hominum
 institutionem accipiamus, secundum ipsam temporis signifi-
 cationem, secundum tempus priorem esse mundo vel extitisse,
 hoc est in tempore præterito fuisse antequam tempus esset
 aliquid? Oporteret itaque cum ad singularem diuinitatis natu-
 ram quascumque dictiones transferimus, eas in quãdam sin-
 gularem significationem seu etiam institutionem contrahere.
 Atque per hoc quod omnia etiam excedit, necessario propriã
 institutionem excedere. Constat quippè iuxta Boetium ac
 Platonẽ cognatos de quibus loquuntur rebus oportere esse ser-
 mones. Quod rectè Gregorius attendens in prologo Moraliũ,
 ait. Indignum vehemenrer existimo, vt verba cœlestis ora-
 culi restringam sub regulis Donati. Sed nec proprium & vsi-
 tatum nomen Dei ad illam vnicam diuinitatis maiestatem,
 quæ excogitari non valet, nec dum differi, ipsi magni Philoso-
 phi nouerunt accommodare, qui cum Deum cum Marte no-
 minant, quem animali rationi supponunt, de mundo & cœle-
 stibus corporibus illud, vt supra meminimus, accipiunt. Quid
 itaque mirum, si cum omnia ineffabiliter transcendat Deus,
 omnem quoque institutionis humanæ sermonem excedat? Et
 cum eius excellentia omnem longè exsuperet intellectum,
 propter intellectus autem, voces sunt institutæ, quid mirum
 si intellectus transcendat, qui transcendit causas? multo quip-
 pè facilius res excogitari, quàm differi valet. Quid etiam mi-
 rum si in seipso Deus Philosophorum infringat regulas aut
 exempla, quæ in factis suis frequenter cassat? Cum videli-
 cet aliqua noua contra naturam facit, siue supra naturam, hoc
 est super hoc quod prima instructio rerum potest. Numquid
 enim illuminatione cæci, nota illa Philosophorum regula in-
 fringitur qua ab Aristotele dictũ est, Ab habitu quidẽ in priua-
 tionem fit mutatio, in habitu verò à priuatione impossibile est.
 Neque enim cæcus factus rursus videt &c. Numquid & vir-
 ginis partus onmino illi præiudicat propositioni quæ frequen-
 ter à Philosophis in exemplum necessariæ consequentiæ seu
 argumentationis affertur? Si peperit, cum viro concubuit?
 Vt hinc quoque appareat quod ait Apostolus, *Nonne stultus am-
 fecit Deus sapientiam huius mundi.* Quod si vt Philosophos salues
 ea quæ

ea quæ per miracula fiunt à disciplinis vel regulis illorum excipias, aut in his vocabula propriam significationem non obseruare dicas, vt videlicet propriè dicatur visio vel partus qui per miracula fiunt, quantomagis in ipso auctore miraculorum id concedi oporteat, vt illius excellentiæ singularitas aliquid habeat proprium, quod sicut humanas cogitationes ita & humanarum disciplinarum transcendat traditiones? de quibus rectè Apostolus admonet dicens. *Videte ne quis vos decipiat per prophetiam & inanem fallaciam, secundum traditionem hominum, secundum elementa mundi, & non secundum Christum.* Ecce enim secundum ipsius Domini documentum, vt supra meminimus, testimonium Iob eum solū propriè esse profiteri cogimur, quem penitus nihil esse constat, secundum illam sæcularium disciplinam doctorū, quæ omnium rerum, vt dictum est, naturas in decem prædicamenta distribuit. Attendite fratres & verbosi amici quantum ab inuicem dissonent diuinæ & humanæ traditiones, spirituales & animales Philosophi sacrarum & sæcularium literarum disciplinæ: nec tamquā temerarij iudices arguatis, cum talia fides verba protulerit, quorum intelligentia vestris incognita sit disciplinis. Certum quippè est, quoniam vnaquæque scientia atque cuiuslibet artis tractatus proprijs vtitur verbis, & vnaquæque doctrina proprijs locutionibus gaudet, & sæpè eiusdem artis tractatores verba variare delectat, quia semper in omnibus, teste Tullio, identitas mater est satietatis, hoc est fastidium generans, atque in tantum etiam variare, vt sæpè vocem eandem de vna significatione sic ad aliam transferant, vt si vocis identitatem magis quam sensuum diuersitatem sequamur, ipsos sibi contrarios reperiamus. Quantomagis ergo illius singularis, & summi boni tractatores singularia verba quædā habere oportuit, aut ad quandam illa detorquere significationem, quibus id quod singulare est singulariter profertur, nec publicis & vulgaribus locutionibus illud ineffabile, illud incomprehensibile coercetur. De quo si quid de aliqua similitudine de creaturis ad creatorē vocabula transferimus, quæ quidem vocabula homines instituerunt ad creaturas designandas quas intelligere potuerunt, cum videlicet per illa suos intellectus manifestare vellēt. Cū itaque homo vocē inuenerit ad manifestādos intellectus suos, Deū autē minime intelligere sufficiat, rectè illud

ineffabile bonum effari nomine non est ausus. Vnde in Deo nullum propriam inuentionem vocabulum seruare videtur. Sed omnia quæ de Deo dicuntur, translationibus & parabolicis ænigmatibus inuoluta sunt, & per similitudinem vestigantur, ex parte aliqua inductam, vt aliud de ineffabili maiestate credendo, nunc magis quàm intelligendo degustemus. Et quoniam minus plenarias similitudines inuenimus ad illud quod singulare est inducendas, minus de eo satisfacere possumus per similitudines. Quod diligenter Beatus attendens Augustinus in libro contra Felicianum Arrianum, de hoc ipso quærentem, ita scripsit. Felicianus. Nescio quo pacto vna creditur esse substantia, cum non dicatur vna esse persona, velim quæso exemplo mihi faciliore dicta dilucides. August. In rebus quidem incōprehensibilibus exempla non suppetunt disputandi. Tamen in quantum fieri potest, etiam in hac parte non deero. Ecce homo pater habet hominem filium, est cōmune vtrisque quod homo est, vni tamen quod filius, alteri proprium videtur esse quod pater est. Item patrem ingēnitū, filium genitum dico. Eò tantum docens ingenitum patrem, quod non processit ex altero; eò genitum filium, quod etiā existit ex semetipso. Itaque si proprium patri quærimus, sufficit, quia solus non habet patrem, si filij satis est, quia non habet prolem. Quas tamen vt possumus aggrediamur, maxime vt pseudodia lecticorum importunitatem refellamus, quorū disciplinas & nos paululum attingimus, atque adeo in studijs eorum profecimus, vt Domino adiuuante ipsis in hac re per humanas rationes quas solas desiderant satisfacere nos posse confidamus. Habet enim humanas rationes etiam conditor rationis ipse, quibus animalium hominum ora obstruere possit, qui nos per Sapientiam admonet dicens: *Responde stulto iuxta stultitiam suam, ne sibi esse sapiens videatur.* De cuius etiam sapientia in ipso Sapientiæ libro, inter cæteras etiam laudes ipsius, dicitur, *Scit versutias sermonum & dispositiones argumentorum.* Tunc verò probabiliore illis asserimus similitudines, si de ipsis artibus quas frequentant, eas sumere poterimus, & ad singula quæ obijciunt, illas applicuerimus.

XI.

QVÆRVNT autem quomodo in Deo vna penitus permanente substantia vel essentia aliqua, ibi proprietatum sit

diuersitas, secundum quas Trinitas personarum constat. Vel quomodo potest esse, ut cum vnaqueque ibi persona sit Deus, nec tamen vna persona sit alia, non etiam plures dii, sicut & plures personæ sint dicendi. Aut quæ sit denique generatio filij de patre, vel processio Spiritus ab utroque. Quod quidem ut diligentius fiat, præmittendum est quot modis. Idem, & quot modis diuersum, accipiat.

XII.

TRIBVS autem modis vtrumque, & fortasse pluribus dici solet. Idem namque similitudine, idem essentialiter sine numero, idem proprietate dicimus. Idem similitudine, cum easdem res apud omnes esse, sicut & intellectus, Aristoteles asserit, & nos easdem merces in hac & in illa ciuitate reperiri dicimus. Tàm numero autem quàm essentialiter idem sunt, cum sit eadem essentia tàm hoc est quàm illud, ut numerum in se rerum non habeant, nec res plures numero dici queant, ut in Socrate homo, & animal, vel homo & risibile. Proprietate autem seu diffinitione idem sunt, quæ non solum numero sunt eadem, verum etiã nec proprietatibus ullis, nec proprijs discrepant similitudinibus, ut ensis & mucro, vel album & candidum. Quamquidem maximam identitatem iuxta proprium & expressum esse rei Boetius attendens in primo Topicorum, ait. Rursum potest de eo quod est idem, fieri certamen, ut an idem sit vtile quod honestum est. Sed hæc quomodo diffinitioni est aggreganda? quarum enim rerum diffinitio est eadem, ipsæ quidem eadem sunt. Quarum verò diuersa ratio substantiæ est, diuersæ etiam ipsæ sunt. Tribus etiam modis solet diuersum sumi essentialiter, scilicet numero, proprietate, seu diffinitione. Diuersa namque essentialiter dicimus, si eadem essentia quæ est hoc, non sit illud, & si homo est nullius essentia tamquam pars includatur, ut manus & homo. Tunc verò etiam numero sunt diuersa, cum ita tota quantitate suæ essentiæ sunt discreta, ut in computatione sibi queant admisceri, cum videlicet dicitur vnus, duo, tres, &c. Quod tunc quidem fieri potest cū non solum hoc nō est illud, verum etiam nec ipsum, nec aliud de ipso est de substantia alterius, ut hic homo & ille, & etiam in eadē manu hic digitus & ille. Proprietate verò seu diffinitione diuersa sunt, quæ licet habeant de se prædicari, cum essentialiter idem sunt, secundū proprios tamen status, aliud est huius proprium, & aliud

illius, & singula proprijs diffinitionibus & in sensu diuersis sunt terminanda. Proprias verò diffinitiones eorum esse dicimus, quorum, ex integro exprimunt esse, vt substantia corporea corporis, vel aptum ad ridendum risibile, vel habens albedinem albi, quamquam differentiam proprietatis scilicet seu diffinitionis Boetius in libro diuisionum diligenter attendens rationale & bipes, quæ idem numero contingit esse, differre tamen his verbis asserit. Quoniam verò quædam sunt quæ differunt quæ contra se in diuisionibus poni non debent, vt in animali rationale & bipes. Nullus enim dicit animalium, alia sunt rationalia, alia duos pedes habentia, idcirco quod rationale & bipes licet differant, nulla tamen à se oppositione distinguuntur &c. Idem in primo Topicorum cum propositionem, & quæstionem, & conclusionem definisset, & suis singula proprietatibus distinxisset; ostendendo scilicet quod vnumquodque & quantum ex vi & natura propria requireret, idem numero hæc tria esse monstraret, nihilominus tamen ea dicuntur differre secundum proprietates quas assignauerat, ostendit dicens. Idem igitur est propositio quomodo conclusio, sed differunt supradicto modo. Quamquidem differentiam & B. Greg. diligenter considerans lib. Moralium xxi. ait. Hoc inter peccatum distat & crimen, quod omne crimen peccatum est, sed non omne peccatum crimen. Rursus Boetius in prædicto libro Topicorum, vt iam supra meminimus, cum illam quæstionem, vtrum idem sit utile quod honestum, de diffinitione esse docet dicens, secundum hæc quomodo diffinitioni est aggreganda. Quarum enim rerum eadem diffinitio est, ipsæ quidem eadem sunt, quarum verò diuersa substantiæ ratio est, ipsæ etiam sunt diuersæ, patenter ostendit quæcunque diffinitionibus proprijs discrepant, etsi eadem numero illa esse contingat, vt eadem videlicet res aliqua hoc sit & illud, nihilominus tamen illa dici diuersa. Quod & Porphyrius ante in Isagogis suis docuerat dicens: Quorum termini sunt differentes, ipsa quoque sunt differentia. Qui etiam cum ait, Differentiarum alix quidem sunt secundum quas diuidimus genera in species, alix secundum quas ea quæ diuersa sunt specificantur: hoc est alix sunt diuisivæ generum, alix constitutivæ specierum; quomodo has ab illis alias dixit, cum omnis diuisiva sit constitutiva, & è contrario nisi secundum proprietatem.

diuidendi & constituendi quæ diuersæ sunt. Aliud quippè exigit ex eo quod est diuisiua, & aliud ex eo quod est constitutiva, licet modis omnibus eadem sit numero diuisiua & constitutiva differentia. Tale igitur est dicere aliam esse differentiam diuisiuam, & aliam constitutiuam, ac si dicamus alterius proprietatis esse diuisiuam, alterius constitutiuam, licet penitus ea sit diuisiua quæ constitutiva, & è conuerso. Hoc autem modo facile in singulis rebus assignari potest, & vnâ numero atque essentialiter rem permanere, & ipsi plures inesse proprietates, secundum quas aliqua diuersa sunt diffinitione, non numero, & eadem res diuersa in sensu vocabula sortiantur. Verbi gratia. Hic homo & substantia est & corpus, & animatum & sensibile, quod est alias rationale, & mortale quod est homo. Et fortassis albus & crispus, & alijs accidentibus subiectus quæ recipit, & cum ipso idem sit numero, vel essentialiter substantia, quod corpus vel animatum & c. Nihilominus tamen hæc abinuicem proprietatibus suis diuersa sunt, secundum quas scilicet ipsa diuersis terminanda sit diffinitionibus: aliud quippè substantiæ est proprium, & aliud corporis; alius cæterorum & alius substantiæ status dicitur, alius corporis, alius cæterorum. Ad hunc igitur modum cum in singulis rebus vna permanente substantia possint innumerabilia assignari, secundum proprietates suas ab inuicem diuersa, quid mirum si vna permanente diuina essentia, diuersæ quæ in illo sint proprietates, secundum quas distingui tres personæ queant? Sicut enim in vno homine qui simul substantia est & corpus, vel cætera singula quæ prædicta sunt, & fortassis quantum ad diuersos pater & filius, alia est proprietas substantiæ, alia corporis, & cæterorum, & alia est patris & filij: ita & in Deo licet eadem essentia sit Pater & Filius & Spiritus sanctus, alia tamen est proprietas patris secundum quod scilicet generat, alia filij secundum quod generatur, alia Spiritus sancti secundum quod procedit. Quas quidem proprietates plenius expenemus. Si quis forte id quod de rerum identitate, vel proprietatum diuersitate monstramus, non satis ad rem quam proposuimus pertinere dicat, nisi etiam in aliquibus rebus vna permanente essentia, plures quoquo modo personas inesse demonstramus, agnoscat nullam ex toto similitudinem, sed ex parte aliquam induci. Alioquin identitas potius quam similitudo

diceretur, ut tamen & in hoc satisfacere valeamus, diuina nobis ex ipsorum artibus gratia prouidit. Nam & Grammatici cum tres distinguunt personas, primam videlicet quæ loquitur, secundam ad quam loquitur, tertiam de qua tanquam ab utrisque diuersa loquuntur personarum, iuxta quarum proprietates diuersitatem intelligunt, ut eidem rei sic tres istas personas inesse fateantur, ut idem homo & prima sit persona secundum quod loquitur, & secunda secundum quod ad eum aliquis loquitur, & tertia secundum quod de ipso inter aliquas sermo est. Et prima quidem persona, cæterarum principium est quoddam & origo seu causa. Et rursum prima & secunda tertiæ, nisi enim prima sit persona, quæ scilicet loquitur, quomodo erit secunda, ad quam videlicet sermo loquentis dirigatur? aut quomodo tertia erit, de qua scilicet inuicem loquuntur, nisi inuicem illis loquentibus. Vnde & benè quantum ad ipsum existentia gradum seu modos, illa prima dicitur, ex qua ceteræ habent esse, & illa secunda post primam, ex qua simul & ex prima tertia esse habet.

XIII.

Quam etiam similitudinem, si quis ad diuinæ Trinitatis personas inducere velit, non incongruè fortassis aptare poterit, cum videlicet ex Deo patre tam filius quam Spiritus sanctus, & ex Patre simul & Filio simul Spiritus sanctus habeat esse. Secundum quos etiam existentia modos beatus quoque Augustinus, ut iam olim meminimus, supra, secundum à Patre dicit Filium, & Spiritum sanctum nominat tertium. Sicut autem iuxta Grammaticos persona sub disiunctione facilius describitur hoc modo, Persona est qui loquitur siue ad quem loquitur, vel de quo tanquam diuerso loquitur, ita & diuinæ personæ sub disiunctione patentius describi hoc modo videntur. Persona est in illa summa Trinitate Deus Pater vel eius Filius, siue amborum Spiritus sanctus. Sicut etiam ibi nemo Grammaticorum dicit primam personam esse secundam aut tertiam, cum sint earum diuersæ proprietates. Licet eadem res, ut diximus, quæ est prima persona sit secunda vel tertia, ita & in Deo cum eadem essentia quæ est Pater, sit Filius & Spiritus sanctus, nemo orthodoxus dicit vnā personam esse alteram. Quod si post grammaticam quasi puerilem disciplinam ad Philosophicam perfectionem conscendere iuuat, ut scilicet tantum aliquam ad propositum nostrum idoneam su-

mamus similitudinem, nec ibi nobis diuinæ gratiæ suffragium deerit, maximè cum de ipsis Apostolus Philosophis loquens, asserat illos, à creatura mundi per ea quæ facta sunt, intellecta conspiciuntur, sempiterna quoque eius virtus & diuinitas. Vbi quidem cum ait, inuisibilia ipsius, id est Dei, quia etiam ipso nomine spiritus, inuisibilis natura declaratur. Et pluraliter ut dictum est inuisibilia septiformem eius spiritum, hoc est Spiritum sanctum intelligi arbitror, qui nonnunquam etiam pro diuersitate donorum septem spiritus appellant. Sempiterna autem virtus Dei filius intelligi, iuxta quod alibi ait idem Apostolus, *Christum Dei virtutem & Dei sapientiam*. Cum verò ait inuisibilia ipsius vel eius virtus, per hoc quod ipsius & eius Patrem dixerit, ipsum expressit, cuius videlicet tam ipse spiritus quàm filius esse dicitur. Cum autem subdit, & diuinitas, subaudis similiter, intellecta conspicitur, unitatem diuinitatis in tribus illis personis assignari, sin autem intelligatur ut dicatur diuinitas ipsius vel eius, sicut Dei inuisibilia ipsius vel virtus eius, rectè quoque cum dicitur diuinitas ipsius, id est, ipse Deus cuius sunt illa inuisibilia, & illa virtus, Deus pater intelligitur. Quomodo autem Philosophi hanc personarum distinctionem in vna diuinitatis essentia per similitudinem alicuius mundanæ creaturæ, & eorum quæ in ipsa sunt creatura vestigare poterunt atque inuenire? facilè credo poterit assignari in his quæ ex materia & forma, vel ad similitudinem materiæ & formæ dixerunt consistere, verbi causa. *Æs* quidem est inter creaturas, in quo artifex operans, & imaginis regię formam exprimens, regium facit sigillum, quod scilicet ad sigillandas literas, cum opus fuerit, ceræ imprimatur. Est igitur in sigillo illo ipsum æs materia, ex quo factum est: figura verò ipsa imaginis regię, forma eius: ipsum verò sigillum ex his duobus materiæ atque formatum dicitur, quibus videlicet sibi conuenientibus ipsum est compositum atque perfectum. Nil quippè est sigillum quàm æs ita formatum. Id itaque essentialiter est ipsum æs, quod est materia ærei sigilli, & sigillum ipsum cuius est materia, cum tamen in suis proprietatibus ita sint distincta, ut aliud sit proprium æris, aliud ærei sigilli, & quamuis idem sint essentialiter, sigillum tamen est æreum ex ære, non æs ex æreo sigillo, & æs est materia ærei sigilli, non sigillum æris. Nec vllè modo æs materia sui ipsius

Contra hanc
similitudinē
scripsit S. Bern-
nardus Ep.
190.

esse potest, quamuis sit materia sigilli, quod est ipsum æs, non enim æs ex ære fit, sicut sigillum ex ære est constitutum, & quāuis idem sit materia ipsa quod est materiātum, nequaquam tamen in sigillo illo materiātum est materia, vel materia est materiata. Facto autem ex ære sigillo, iam sigillabile est, hoc est aptum ad sigillandum, etsi nondum sit actualiter sigillans. Cum autem per illum sigillari ceram contingit, iam in vna æris substantia tria sunt proprietate diuersa, æs videlicet ipsum, sigillabile, & sigillans. Quæquidem inter se sic se habent, vt ex ære sit factum sigillabile, hoc est sigillum, & ex ære simul & sigillabili contingat fieri sigillans. Et ex ære quippè quod erat primitus ad hoc productum, est ipsum æs vt sigillabile esset, deinde vt quod æs sigillabile iam erat, sigillans fieret. Sic igitur cum eadem sit essentia æris & sigillabilis, & sigillantis, quæ tria proprietate diuersa sunt; ita hæc tria inuicem sibi sunt coniuncta, vt ex ære sigillabile, & ex ære & sigillabili simul, sigillans habeat suum esse. Quæquidem omnia si ad diuinæ Trinitatis doctrinam congruis proportionibus reducantur, facile est nobis ex ipsis Philosophorum documentis, pseudo-Philosophos (qui nos infestant) refellere. Sicut enim ex ære sigillum est æreum, & ex ipso quodammodo generatur, ita ex ipsa Dei patris substantia filius habet esse, & secundum hoc ex ipso dicitur genitus. Vt enim ex suprapositis iam dudum ostēdimus specialiter nomine patris diuina potentia declaratur, sicut nomine filii diuina sapientia significatur. Est autem diuina sapientia, quædam, vt ita dicam, ipsius Dei potentia, quæ videlicet ab omni sibi fallacia vel errore prouidere potest, & ita veraciter cum ista diiudicare, & scrutando penetrare, vt in nullo decipi vel errare possit. Sapientia itaque diuina potentia est illa facultas differendi, per quam *Omnia oculis eius nuda sunt & aperta*, nec quicquam ignorantix illi possit inesse. Sicut enim sanatiuum aut durum ex potentiis quibusdam dici Aristoteles astruit, quod videlicet ipsa incommodis suis resistere valent, ita sapientia ratione quadam potentia dicitur, quia fallaciæ scilicet vel ignorantix resistitur, nec in aliquo per errorem mens cæcata labatur. Sic & visionem potentiam quædam, sicut e contra cæcitatem impotentiam nominamus. Idem quoque de scientia qualibet, quæ visio quædam mentis est, & de ignorantia dici conuenit. Cum igitur sapiētia quædā, vt dictum

vt dictum est, sit potentia: sicut enim æreum sigillum est quoddam æs, liquet profectò diuinam sapientiam ex diuina potentia esse suum habere, ad eam scilicet similitudinem qua sigillū æreū ex ære dicitur esse, quod est eius materia vel species ex genere, quod quasi materia speciei dicitur esse, vt animal hominis. Sicut enim ex eo quod est æreum sigillum exigit necessario vt æs sit, & ex eo quod homo vt animal sit, sed nō ē contrariū. Ita diuina sapientia, quæ est potentia discernendi, exigit quod sit diuina potentia, non ē contrariū. Quippè vt æs tam ad æreum sigillū quàm alia se habet, & animal ad hominem quàm ad alia sit, & potentia diuina tam ad discernendū quàm ad operandum se habet: & sicut æreum sigillum de ipsa æris substantia vel essentia dicitur esse, cum esse videlicet æreū sigillum sit esse æs quoddam, & esse hominem, id est animal rationale --- sit esse animal quoddam, ita & diuina sapientia de diuinæ potentie dicitur esse substantia, cum videlicet esse sapientiam, id est potentiam discernendi, sit esse potentiam quandam, quod est filium de substantia patris esse, vel ab ipso genitum esse. Nam & species ex genere quasi gigni vel creari Philosophi dicunt, secundum hoc scilicet, quod ex ipso, vt dictum est, esse contrahunt. Boetius in libro diuisionū, genus in species quasi in quasdam à se quodammodo procreationes diuidi asserit. Cum autem species ex genere creari seu gigni dicatur, non tamen ideo necesse est genus species suas tempore, vel per existentiam præcedere, vt videlicet ipsum prius esse cōtigerit quàm illas. Numquam etenim genus nisi per aliquam speciem suam esse contingit, vel vllatenus animal fuit, antequam rationale vel irrationale fuerit, & ita quædam species cum suis generibus simul naturaliter existunt, vt nullatenus genus sine illis, sicut nec ipsæ sine genere esse potuerint, sicut quantitas & vnitas, vel numerus & binarius. Sic & diuina sapientia, licet vt dictum est ex diuina potentia omne habeat, quod est filium ex patre gigni, non tamen hanc illa præcesserit, cum nullatenus sine sapientia Deus esse potuerit. Sic & innumerabilia ex alijs gigni vel esse videntur, à quibus tamen tempore nullatenus præceduntur, vt ex Sole splendor aut calor, quæ ad similitudinem Trinitatis nonnulli asserre consueuerunt, vt sit videlicet filius ex patre, sicut splendor ex Sole, & rursus Spiritus ex ipso, sicut ex Sole calor.

B. Bernardus
Epist. 190.
hunc refutat
locum.

Splendor quippè ad sapientiam, quæ tamen est animæ rectè videtur pertinere, & de ipsa Dei sapientia quæ filius eius intelligitur, scriptum est ab Evangelista. *Erat lux vera quæ illuminat omnem hominem venientem in hunc mundum.* Et ab ipso dictum est filio. *Ego sum lux mundi.* Et Apostolus inquit. *Splendor gloriæ eius.* Spiritus verò sanctus, qui amor Dei dicitur, rectè per calorem intelligi videtur, cum in omnibus ipsis amor quo calere pectora dicuntur, frequenter calor siue ignis appelletur. De quo & ipse filius ait. *Ignem veni mittere in terram, & quid volo nisi ut ardeat?* Hoc est amore potius quàm timore corda terrena implere. Et Psalmista neminem absque aliquo divinæ gratiæ dono conspiciens. *Non est, inquit, qui se abscondat à calore eius.* Et hanc profectò de sole similitudinem illam esse existimo, qua in divinæ Trinitatis assignatione Platonem usum esse commemorat, ut iam supra meminimus dudum. Sed quia nec secundum Philosophos, id est ipsa Solis substantia, quod est eius splendor aut calor, sicut eadem est essentia patris & filij: nec calor simul de Sole & splendore est, sicut Spiritus simul ex patre & filio, à quibus ipse procedit, magisque de substantia eius calor esse videtur qui substantialis est igni, ac per hoc ipse magis ad filium qui de ipsa substantia patris est quàm ad Spiritum pertinere, minus fortasse quàm volumus, hæc inducta de Sole similitudo ad propositi nostri demonstrationem sufficit. Quod & quidam nostrum attendentes, cum trium personarum eandem essentiam assignare conarentur, & sicut filium ex patre esse, sic Spiritum ab utrisque, de fonte, & riuo, & stagno familiariorem videntur excogitalse similitudinem. Eadem quippè aqua fontis & riuus primò fit, & post modum stagnum, & sicut riuus ex fonte, sic stagnum ex riuo simul & fonte contrahit esse. Patrem itaque fontem, filium riuo, Spiritum sanctum comparant stagno. Quod ad incarnationem verbi demonstrandam sic attendunt riuum in fistula, quasi filium in carne humana, ac si riuum in fistula cū dicamus verbum incarnatum. Cuius quidem, ni fallor, similitudinis fundamentum Anselmus Cantuariensis à Beato sumpsit Augustino scribente ad Laurentium Papam de hoc ipso, & fontem & eius riuum, quorum est eadem substantia, ac divinæ generationis exemplum. Vbi eadem substantia generantis & geniti inducitur. Sed hæc quoque similitudo ad identi-

tatem substantiæ trium personarum in hoc minus sufficere videtur, quod eadem aqua non est simul fontis, & riui, & stagni, sed per temporis vt dictum est, successionem; sicut est eadē simul essentia patris & filij & Spiritus sancti. Imo eodē tempore alia est essentialiter aqua fontis quàm riui seu stagni, vnde fortassis hæc similitudo illi potius suffragatur hæresi, quæ ita per tempora proprietates personarum commiscet, vt eandē personā dicat quando vult esse patrem, quando vult esse filiū vel Spiritum sanctum. Quod & nos prouidentes, alias quasdam similitudines, tam secundum Grammaticos, quàm secundum Philosophos superius induximus, quas proposito nostro magis conuenire credamus, sed eam præcipuè quæ sumpta est de Philosophis maiori ratione præditis, ac per hoc à doctrina veræ Philosophiæ (quæ Christus est) minus remotis.

XIV.

SUPEREST nunc post generationem filij, de processione Spiritus sancti differere, in quo præcipuè de ipso confidentes, quem Apostolis Dominus promittens. *Ille vos docebit*, inquit, *omnia*, & suggeret vobis omnia, quæcumque dixerō vobis, tanto ampliorem gratiam ab ipso in hoc speramus, quantum id amplius ad ipsum pertinet quod differere cupimus. Spiritus spirādo quasi Spiritus dictus est, vnde veritas, *Spiritus*, inquit, *vbi vult spirat*. Et propheta conuenienti metaphora Spiritum Domini distinguens, Spiritum oris eius ipsum appellat. Ideoque ipso suo nomine procedere ex Deo patre vel filio potius, quàm gigni declaratur. Benignitas quippè ipsa quæ hoc nomine demonstratur, non est aliqua in Deo potentia siue sapientia, cum videlicet ipsum benignum esse non sit in aliquo esse sapientem aut potentem, Sed hæc eius bonitas magis secundum ipsum charitatis effectum siue effectus accipienda est. Charitas autem teste Gregorio, minus quàm inter duos haberi non potest. Nemo enim inquit ad semetipsum charitatem dicitur habere, sed dilectionem in alterū extendit, vt esse charitas possit. Procedere itaque Dei est, sese ad aliquā rem per affectum charitatis quodammodo extendere, vt eam videlicet diligat ac ei per amorem se coniungat. Cum itaque tam filius quam Spiritus sanctus ex patre sit, hic quidem genitus, ille procedens, differt in eo generatio ipsa à processione, quod is qui generatur, ex ipsa patris substantia est, cum ipsa, vt dictum est, sapientia, hoc est ipsum esse habeat, vt sit quæ.

Locus productus à B. Bernard. Epist. 190. post medium.

dam potentia. Ipse verò charitatis affectus, magis ad benignitatem animi quàm ad potentiam attineat, vnde benè filius ex patre gigni dicitur, hoc est ex ipsa patris substantia propriè dicitur esse. Hinc Nicena Synodus quasi exponens hanc generationem filij ex patre ait. Credimus & in vnum Dominum Iesum Christum filium Dei, natum ex patre vnigenitum, hoc est ex substantia patris Deum ex Deo, lumen ex lumine. Non ignorans nonnullos Ecclesiasticorum doctorum astruere Spiritum quoque sanctum ex substantia patris esse, hoc est ab eo sic esse, vt etiam ipse vnus sit substantiæ cum patre, propriè tamen non dicimus ex substantia patris esse: solus filius dicendus est. Spiritus verò quamuis eiusdem substantiæ sit cum patre & filio, vnde etiam Trinitas Omouſios, id est vnus substantiæ prædicatur, minimè tamen ex substantia patris aut filij, si propriè loquimur, esse dicendus est, quod oportet ipsum ex patre vel filio gigni: sed magis ex ipsis habet procedere, quod est Deum se per charitatem ad alterum extendere: quodammodo etenim per amorem vnusquisque à seipso ad alterum procedit, cum propriè, vt dictum est, nemo ad seipsum charitatem habere dicatur, aut sibi ipsi benignus esse, sed alteri. Maximè autem Deus cum nullius indiget erga ipsum benignitatis affectum commoueri non potest, vt sibi aliud ex benignitate impendat, sed erga creaturas tantum, quæ diuinæ gratiæ beneficijs indigent, non solum vt sint, sed vt benè sint. Quo itaque modo Deus à seipso ad creaturas exire dicitur per benignitatis affectum siue effectum, cum hoc ipsum quod benignus est, aut benignè aliquid ex charitate agit, secundum affectum vel effectum quem in creaturis habeat, dicatur. Tunc verò in se per benignitatem remaneret si sibi benignus esse posset, aliquam in se beneficentiam exercendo, & aliquod sibi beneficium impendendo. Ex patre autem simul & filio spiritus procedere habet, quia bonus ipse affectus siue effectus aliud faciendi vel disponendi ex potentia ipsius, & sapientia prouenit: cum ideo scilicet velit Deus aliud & faciat, quia & potest illud adimplere & solerter efficere, nisi enim posset aliud frustra illud velleret, quia efficaciacia careret. Et nisi solerter sciret illud efficere, non haberet egregium effectum. Nonnullos autem aliud velle contingit, quod non sufficiunt adimplere, quod etiam si possunt,

non ita ut oportet perficere sciunt, quorumquidem voluntatem tam impotentia ipsorum quam inscientia irrationabilem facit. Ut igitur bona Dei voluntas erga quælibet facienda vel disponenda omnino ratione prædicta demonstraretur, ex patre & filio, sicut prædictum est, procedere Spiritus sanctus perhibetur. Sicut igitur ex ære sigillum æreum habet esse, & rursum ex ære simul & sigillo, id est, sigillabili sigillans habet esse, sic ex patre solo filius habet esse, & ex patre & filio Spiritus sanctus, ut exposuimus. Et sicut sigillum in forma impressæ sibi imaginis consistit, sic solus in forma Dei esse dicitur, & figura substantiæ eius, sine ipsa patris imago, id est expressa eius similitudo nuncupatur: cum ipse filius tanta patri cognatione, ut ita dicam, sit unitus, ut non solum ipse sit unus cum patre substantiæ, sed insuper, ut dictum, est ex ipsa patris substantia. Ad hanc fortassis similitudinem, æris scilicet & ærei sigilli, quasi videlicet informis & formati, Hilarius respexit cum, ut dudum supra meminimus, filiū à patre formatum dixit, id est eo modo esse suum habere de patre quo res formata ex ipsa suæ materiæ substantia dicitur esse. Non tamen illo modo materiā vel materiātum in Deo concedimus esse, sed in creaturis tantum vel mutabilibus rebus quæ sunt accidentium susceptibiles. Sicut ergo sigillans eo ipso quo sigillans est in alterum quiddam mollius cui imprimitur præcedit, ut videlicet eius imaginis, quæ in ipsa eius substantia iam erat, formam illi tribuat: sic Spiritus sanctus donorum suorum distributione nobis infusus imaginem Dei delet. in nobis reformat, ut iuxta Apostolum conformes efficiamur imaginis filij Dei, id est Christo, *ut sequamur vestigia eius qui peccatum non fecit, & de veteri homine in novum transeamus.* Sicut autem æs & sigillum seu sigillans in suis proprietatibus diversa sunt secundum modos existentiae quos ad invicem habent, ita scilicet ut nullus ipsorum proprietatem alterius communicet, sic & Pater & Filius & Spiritus sanctus. Verbi gratia, Sigillum æreum ex ære est tanquam ex materia materiātum, & æs materia est ærei sigilli, & æreum sigillum materiātum ex ære, & istæ quidem æris & ærei sigilli proprietates ita intermixtæ sunt, ut neque æs sit materiātum ex ære, neque eorum sigillum materia sit æris, cum tamen eadem res sit hoc quod est materia ærei sigilli, vel materiātum ex ære, hoc est æs ipsum.

& æreum sigillum. Sic & in diuinis contingit personis. Secundum id quippè, quod diuina sapientia, vt diximus, ex diuina potentia esse habet, illa pater huius, & hæc filius illius dicitur, & in Deo tantumdem est dicere patrem, quantum si dicamus sapientiam ex patre genitam. Si ergo dicamus ibi filium esse patrem, tale est ac si dicamus ipsam Dei patris sapientiam esse genitorem ipsius sapientiæ patris, hoc est suipfius, vt ipsa scilicet Dei sapientia ex seipsa sit genita, & ex seipsa habeat esse. Similiter si dicamus in patrem esse filium videlicet suipfius tale est ac si dicamus diuinam potentiam seipsam genuisse, Quamuis enim idem essentialiter sit æs, quod æreum sigillum, non tamen ideo quia æreum sigillum ex ære est, æs ex seipso esse dicitur, vel quia ipsum posterius est ex ære, ideo posterius seipso dicitur. Non enim hoc pronomen quod est sui, relationem facere potest rectè, nisi vbi res eadem non essentialitate tantum, sed etiam proprietate nititur. Diuersa autem proprietate sunt æs, & æreum sigillum, vnde non est consequens vt si æreum sigillum sit ex ære, ideo aliud sit ex seipso. Sic & quamuis idem sit pater quod & filius, quia tamen, vt dictum est, proprietatibus suis adinuicem distant, nullatenus procedunt. Quod si filius ex patre sit genitus, vel ex patre habeat, vt dictum est, esse, ideo concedatur filius ex seipso genitus esse vel ex seipso habere esse. Quod diligenter Beatus attendens Augustinus in primo de Trinit. his confirmat verbis. Qui putat eius potentia Deum esse, vt seipsum genuerit, eo plus errat quod non solum Deus ita non est, sed nec spiritalis creatura, nec corporalis. Nulla enim res omnino est, quæ seipsam gignat. Sicut igitur in ære & æreo sigillo absoluta eorum nomina sibi per prædicationem coniunguntur, quando videlicet eorum eandem substantiam esse demonstramus: veluti cum dicimus, æs est æreum sigillum, vel è contrario, & similia, nec tamen eorum relatiua nomina quæ proprietates eorum prædicant, secundum quas hoc ex illo habet esse, sibi coniungi possunt, sicut materia ærei sigilli, & materiaturum ex ære. Nemo etenim dicit, materia ærei sigilli est materia ex ære, vel materiaturum ex ære est materia ærei sigilli, sicut & in diuinis contingit personis. Ipse etenim omnipotens est sapiens siue benignus & è contrario, sed nō ipse pater est filius, scilicet sui, vel est Spiritus sanctus, cum ipse videlicet pater non pro-

cedat ex patre hoc est ex seipso, vel filio, sicut & spiritus ex patre procedit siue filio, non enim quemadmodum bonus Dei affectus ex potentia eius & sapientia, vt dictum est, procedit, ita potentia ipsa siue sapientia ex seipsis procedere possunt, quod esset patrem vel filium esse Spiritum sanctum.

GRÆCI tamen ex patre solo, non etiam filio Spiritum sanctum procedere profitentur, eo scilicet quod veritas in Euangelio integrè continente de processione spiritus loquens, solum patrem commemorat dicens. *Spiritus qui à patre procedit.* Qui etiam super hoc quod à filio cum quoque procedere dicimus, non vehementer, arguunt atque reos anathematisteneri asserunt, quod in principalibus Conciliis quæ apud eos celebrata sunt, ita symbola eorum subiunctis anathematibus sancita sunt, vt nulli de fide Trinitatis aliud dicere, vel aliud prædicare, quàm ibi contineatur, liceat; In quibus quidem symbolis cum in processione spiritus de solo patre commemoretur, quicunque, inquiunt, filium addunt anathema incurrunt. Addunt etiam ad exaggerationem impudentiæ, nostræ testimonium damnationis fidei, quod iuxta traditionem prædictorū Cōciliorū Leo tertius Romæ transcriptū in Tabula argentea posteris reliquit, pro amore, vt ipse met dicit, & cautela orthodoxæ fidei. In quo quidem symbolo ipse quoque in processione spiritus solum cōmemorat patrem, his quidē verbis. Et in Spiritum sanctum Dominū & viuificatōem ex patre procedentē, cum patre & filio coadorandū & conglorificandū &c. In quanta autem reuerētia illa principalia Cōcilia tenēda sint Beatus diligenter aperit Gregorius, qui se ea tanquam quatuor Euāgelia suscipere & venerari profitetur, vnde & eorum verbis, non magis quàm Euangelicis, vel addere aliud vel substrahere permittit; ita Constantino Episcopo Mediolanensi de vno eorum scribens. Nos auctore veritate, & teste conscientia fatemur fidem Calcedonensis symboli illibatam per omnia custodire, nihilque eius diffinitioni addere, nihil substrahere audere. Sed si quis contra eam eiusdem scilicet modi fidem, siue plus minusue ad sapiendum vsurpare appetit, cum omni dilatione postposita anathematizamus, atque à sinu Ecclesiæ matris alienum esse decreuimus. Sed profectò cum interdicitur, ne quis aliter doceat aut prædicet Catholi-

cam fidem quam in prædictis continetur Conciliis, aliter dictum puto non secundum verborum diuersitatem, sed secundum fidei diuersitatem, Ac si dicatur. Aliter; hoc est contrario modo, non diuerso verborum sono, quia & nos Latine dicimus quod illi Græcè. Sicut ergo diuersum pro opposito dicitur, ita diuerso modo quod est aliter pro opposito modo non incongruè sumitur. Alioquin cum vnumquodque illorum Conciliorum proprium composuerit atque instituerit symbolū, sintque ipsa symbola ab inuicem verbis diuersa, ac fortasse quibusdam sententiis, cum vnum nonnumquam contineat quod alterum non habeat, profectò anathematis reus esset, qui vno recepto cetera symbola confitendo recitaret vel reciperet. Eadem ratione rei teneremur ex supplemento Euangelii additi, cum in Deuteronomio Moyses dicat. *Quod precipio tibi hoc tantum Domino facias, nec quicquam addas vel minuas.* Addi itaque prohibuit contrarium aliquid, non quod perfectioni deesset, suppleri. Quamuis etiam possit intelligi, vt omnino prohibeatur homo ex se ipso verbis aliquid supplere. Tunc verò homo ex se aliud adderet, si hoc ex sensu suo, non ex inspiratione spiritus præsumeret, de quo quidem spiritu est scriptū. *Non enim vos estis qui loquimini, sed spiritus patris vestri qui loquitur in vobis.* Multa etiam de miraculis sanctorum, & de his quæ sancti Patres post Apostolos scripserunt prædicamus. Cum tamen Apostolus dicit ad Galathas scribens. *Licet nos aut Angelus de cælo Euangelizaret vobis præter id quod Euangelizamus vobis, anathema sit, sicut prædixi, & nunc iterum dico, Si quis vobis Euangelizauerit præter id quod accepistis, anathema sit.* Quod autem opponunt Græci Euangelicam traditionem ad integram fidei disciplinam sufficere, nec quicquam vltius addendum esse, præter ea quæ in verbis continentur Euangelicis, in se etiam ipsos sententiam proferunt. Cum autem spiritum à solo patre procedere, (non enim Euangelium cum à patre procedere spiritum dicat solo adiungit quod ipsi apponunt, sed tantummodo à patre dicit,) querimus etiam & interrogamus eos cum credant spiritum sanctum à parte procedere, vt trum credant ipsum à solo patre procedere, vel non. Quod si sic, & vera sit hæc fides, vtique ita est quod videlicet à solo patre ipse procedit, & quod ipsi super hoc sentiunt salubriter doceri seu confiteri, non est incongruum, quod non credi sit periculosum

periculosum, præsertim cum dicat Apostolus. *Corde creditur ad iustitiam, ore autem confessio fit ad salutem.* Sin autem non à solo patre spiritum procedere credant, cum cum à patre procedere non dubitant, oportet quod tam à patre quàm filio seu ab alio ipsum procedere assentiant, & quod necesse est credi, salubre sit confiteri, sicut & cætera omnia quæ ad fidem pertinent catholicam. Nec rectæ confessioni officit, si nonnulla confessionis verba in canonicis minimè reperiantur scripturis. Ob hoc enim maximè symbola conciliorum scripturis illis sunt superaddita, ut illa doceant vel disserrant quæ ibi aperte non habentur. Quis enim Trinitatem, vel tres personas in ea sibi coæternas & coæquales, quarum vnaquæque sit Deus in illis scripturis dici meminerit, aut Pilatum Pontium appellari, aut ad inferos animam descendisse Christi, & alia quædam quæ in verbis non continentur canonicis? Multa profecto fidei necessaria post Euangelium ab Apostolis, vel Apostolicis viris addita sunt, quæ ex verbis Evangelicis minimè comprobantur, sicut est illud de virginitate Matris domini etiam post partum iugiter conseruata, & de alijs fortasse multis. His autem aduersus Græcorum obiectionem spiritus responsis, libet etiam ex ipsorum doctoribus testimonia proferre quibus à filio quoque Spiritum sanctum procedere doceant. Athanasius in symbolo fidei, Spiritus, inquit, sanctus, à patre & filio non factus, non creatus, nec genitus, sed procedens: ubi quidem cum præmiserit Spiritum sanctum à patre & filio esse atque subiunxerit, procedens, manifestè docuit eum ab utroque procedere, cum ad utrumque procedere sicut & esse retulerit, præsertim cum non aliter à patre spiritus esse habeat, quàm procedendo. Didimus etiam eorum maximus doctor, in libro de Spiritu sancto, à filio quoque procedere patenter profitetur dicens, Saluator, qui & veritas, ait: *Non enim loquetur à semetipso*, loquetur, hoc est, non sine me, non sine meo & patris arbitrio, quia inseparabilis est à mea & patris voluntate, quia ex se non est, sed ex patre & à me est. Hoc enim ipsum quod subsistit & loquitur à patre & à me est illi. *Ego veritatem loquor*, id est inspiro quæ loquor. Siquidem spiritus veritatis dicere, & loqui in Trinitate non secundum consuetudinem nostram accipiendum, sed iuxta formam incorporalium naturarum & maximè Trinitatis, qua

voluntatem suam ingerit in corda credentium. Item, Spiritus sanctus qui est Spiritus veritatis, spiritusque sapientiæ, non potest audire filio loquente quæ nescit, cum hoc ipsum sit quod profertur à filio, id est procedens Deus de Deo, Spiritus veritatis procedens à veritate, consolator manens de consolatore. Quæquidem veritas quæ sit, à qua ipse procedit, Symbolum Ephesini Concilij (quod etiam Græcorum fuisse constat) manifestè his verbis determinat, Quamuis in sua substantia sit Spiritus filij, & intelligatur in persona proprietas, iuxta id quod Spiritus est, & non filius, non est tamen alienus ab ipso: nam Spiritus appellatur veritatis, & veritas Christus est. Itē Cyrillus Episcopus Alexandrinus in Epist. VIII. Nestorio directæ, quæ sic incipit. Reuerendissimo & Domino Amantissimo, &c. Si est inquit, in substantia Spiritus specialis, vel certè & --- per se secundum quod Spiritus est, & non filius, sed tamen est non alienus ab eo. Spiritus enim veritatis nominatur & profluit ab eo, sicut denique ex Deo patre. Ioannes Chrysostomus Homilia xxvii. de expositione symboli quæ sic incipit. Vniuersalis Ecclesia congaudet. Iste est spiritus procedens de patre & filio, qui diuidit propria dona vt vult. Idem Homilia xxviii. in alia expositione eius symboli quæ sic incipit. Super fabricam totius Ecclesiæ. Itaque credendum est Spiritum sanctum patris esse & filij. Item, Istum Spiritum sanctum dicimus Patri & filio esse coæqualem, & procedentem de patre & filio. Hoc credite ne colloquia mala corrumpant mores vestros bonos. Item, Videte vbique sacramentum Trinitatis, ecce & in Spiritum sanctum credimus, qui Spiritus procedens de patre & filio charitate coniungitur. Augustinus libro quæstionum ad Orosium cap. ii. Spiritus Dominus noster ille Christus post resurrectionem suam, vt ostenderet à se procedere Spiritum sanctum sicut à patre, inflans in discipulos suos ait. *Accipite Spiritum sanctum*. Idem lib. iv. de Trinit. Nec possumus dicere, quod Spiritus sanctus à filio non procedat, nec enim frustra idem spiritus & patris & filij & spiritus dicitur, nec video quid aliud significare voluerit cum sufflans ait. *Accipite Spiritum sanctum*. Neque enim flatus ille corporeus substantia spiritus sancti fuit, sed demonstratio, & à filio procedere spiritum sanctum. Item in libro de Trinit. Sicut vnicum Dei verbum propriè vocamus nomine sapientiæ, cum

fit vniuersaliter, & Spiritus sanctus, & pater ipsa sapientia, ita spiritus propriè vocatur vocabulo charitatis, cum sit & pater & filius vniuersaliter charitas. De vtroque autè procedere sic docetur, quia ipse filius ait *de patre procedit*, & discipulis suis insufflauit, & ait. *Accipite Spiritum sanctum*, vt eum etià de se procedere ostèderet, & ipsa est *virtus quæ de illo exibat & sanabat omnes*, sicut legitur in Euangelio. Quippè cū spiritus quasi spiramen à spirando dictus sit, & æquè ipse tam patris quàm filij spiritus appelletur, quis rectè abneget ab ambobus eum procedere, à quibus tamquam amborum spiritus esse habet, atque spirare? Propriè tamen seu principaliter eum à patre procedere non negamus. Vnde Hieronymus diffinitionem Catholicæ fidei Nicenique simboli exponens ait, Credimus & in spiritum sanctum qui de patre procedit propriè. Item, Spiritum sanctum verum Deum inuenimus in scriptura, & de patre propriè esse. Et iterum, De patre & filio & spiritus propriè & verè procedit. Primum igitur accipe quod de patre est propriè Spiritus sanctus, dicente scriptura. *Verbo Domini cæli firmati sunt, Et spiritu eius omnis virtus eorum*. Et Saluator ait. *Spiritus veritatis qui à patre procedit*. Et B. August. in xv. de Trinit. cap. xviii. Non frustra in hac Trinitate dicitur, verbum Dei nisi filius, nec donum Dei nisi Spiritus sanctus. Nec de quo genitum est verbum, & de quo procedit principaliter spiritus sanctus, nisi Deus pater. Idem de verbis Domini, sermone ix. Et Spiritus sãctus principaliter de illo procedit de quo natus est filius. Ideo autè addidi principaliter, quia & de filio spiritus sãctus procedere reperitur. Sed hoc quoque illi dedit non iam existenti, licet nondum habenti. Sed quicquid vnigenito verbo dedit, gignendo dedit. Sic ergo eum genuit, vt etiam de illo bonum cõmune procederet. Ac si apertè Augustinus his verbis determinet per hoc spiritum sanctum principaliter ex patre, & non principaliter ex filio, quia sic ex patre procedit, quasi primo loco, cum eum pater ab alio non habeat, sed à seipso sicut & à se ipso est, hoc est non ab alio. Filius verò cum à se non sit, sed à patre, etiam ipsum spiritum à patre, habet, à quo per generationem esse habet. Sed quid est quod dictū est, propriè spiritum ex patre procedere? Nūquid propriè ibi dictum sicut hoc loco principaliter? Et fortasse eodem modo dici videri posset, nisi quod ibi interferitur, quod

& filius ex patre natus sit propriè, sicut & spiritus ex patre propriè dicitur esse. Dictum quippè ibidem est, Filius non ex semetipso natus est, sed ex patre natus est propriè: non in tempore, sed semper: non aliundè, sed de vna substantia, non de aliena, sed de sua propria. At verò si eodem modo tam in filio quàm in Spiritu sancto accipitur propriè, cum hîc scilicet propriè nasci ex patre, & ille procedere dicitur propriè ex patre, & tale sit dicere propriè ac si diceretur principaliter, quomodo filium ex patre principaliter nasci dicemus, cum ex eo solo natus sit? Nisi forte cum ibidem statim additum sit, non in tempore, sed per respectum temporalis generationis eiusdem filij ex matre, id dictum est, vt videlicet hæc principalis & prima sit, quæ est æterna, per quam ab æqualitate patris non receditur; illa verò quasi posterior & temporalis, secundum quam minor patre ipse filius dicitur. Possumus etiam dicere in eo filium ex patre propriè natum esse siue genitum, quod naturalis sit eius filius, non adoptiuus, sicut & statim determinatur, cum subditur non aliundè, sed ex sua substantia. Sed & secūdum hoc quod iuxta Philosophos nata siue genita omnia dicuntur, quæ ab aliquo habent esse, propriè filius solus ex patre natus est, quia solus ipse nascendo ex ipsa patris substantia est. Spiritus verò sanctus secundum hoc ex patre solo procedere propriè dicitur, quod ab eo sic procedit, quasi à summo principio, qui videlicet ab alio non est. Inde enim aliquid propriè procedere dicitur, vnde primo venire ac moueri cœpit, sicut locus ex fonte, nō ex riuo, sed per riuum procedere dicitur, in quem scilicet riuum aqua ipsius lacus de fonte prodiens per eum transit ac peruenit in stagnum. Sic & Spiritus sanctus ex patre propriè procedere dicitur, quasi à summa origine, quæ scilicet aliundè non sit, & ab ipso in filiū, quasi in riuum, quia & quod habet filius ab ipso habet à quo & hoc ipsum habet quod ipse est, & per filium ad nos tandem quasi in stagnum huius seculi. Quippè qui omnia in sapientia facit ac disponit, in hac ipsa sapiētia sua Spiritum tribuit suorum distributorem donorum, non improuidè vel inconsideratè. Vnde & B. Hilarius spiritum à patre per filium magis quàm à patre & filio procedere seu esse, sicut & mitti perhibet, ita & ad Deum patrem de Spiritu sancto & filio loquens in XII. de Trinit. libro. In sancto spiritu tuo ex te profecto

& per eum missio. Item, Ex te per eum sanctus Spiritus tuus est. Item; Filium tuum vnà tecum adorem, sanctum Spiritum tuum qui ex te per vnigenitum tuum est, promerear. Et hoc fortasse modo, si à solo patre procedere spiritum Græci intelligant, eo scilicet quod sic ab ipso sit, quasi à summo & non existente ab alio, nulla est sententiæ controuersia, sed verborum diuersitas. Certum quippè est & solam personam patris hoc modo summam debere prædicari, & spiritum quoque ab ipso esse sicut à filio, qui ipsius quoque sicut & filij spiritus dicitur. Quod verò nonnulli mouentur, ex eo quod dicimus filium à patre per generationem esse, & spiritum à patre & à filio per processione, nec tamen ideo patrem per existentiam priorem esse filio, vel patrem & filium Spiritu sancto, potest ex multorum similitudine exemplorum refelli. Solis quippè substantia est & splendida & illuminabilis, id est potens illuminare aliquid, & cum sit splendor ex sole, & illuminabilitas ex sole simul & splendore, nunquam tamen ex his tribus aliquod per existentiam aliquod illorum præcesserit.

Sed & si quis illam Philosophicam Platonice rationis considerationem altius inspiciat, quæ videlicet de Deo opifice ad similitudinem quandam solertis opificis vel artificis agit, præmeditantis scilicet & deliberantis ea quæ facturus est, ne quid inconuenienter componat, & prius singula ratione, quam opere formantis. Ad hunc quippè modum formas Plato & exemplares in mente diuina considerat, quas ideas appellat, & quas postmodum quasi ad exemplar quoddam summi artificis prouidentia operata est, videlicet Spiritum sanctum ex filio quoque siue per filium rectè procedere, cum ex ratione sapientiæ, vniuersa Dei opera administrentur, & ita quodammodo conceptus diuinæ mentis in effectum per operationem prodeat. Effectus autem ad spiritum pertinent, qui ex bonitate conditoris eueniunt, quia spiritus ipse bonitas est. Dicamus itaque Spiritum ex filio quoque procedere, cum ratio diuinæ prouidentie ad effectum benignitatis perducitur, & quod ab æterno faciendum præuiderit temporaliter quando vult facit. Hanc autem conceptionem qua scilicet conceptus mentis in effectum operando prodit, Priscianus in primo constructionum diligenter aperit, dicens; generales & specia-

XVI.

les formas rerū intelligibiliter in mente diuina cōstitisse, an-
tequā in corpora prodiret, hoc est in effecta per operationem,
quod est dicere, ante prouidit Deus quid & qualiter ageret,
quā illud opere compleret. Ac si diceret. Nil imprēmedita-
tē siue indiscretē egit.

XVII.

M A C R O B I V S quoque ipsam animam mundi, etiam quam
putamus Spiritum sanctum intelligi ex Nō, hoc est filio prae-
cipuē esse declarat, cum apertē eam à Nō creatam siue na-
tam, sicut & ipsam Noym à Deo patre esse profitetur, ita ge-
neraliter de origine animæ exorsus. Deus qui prima causa &
est, & vocatur, vnus omnium quæ sunt quæque videntur esse,
princeps & origo est. Hic superabundantis maiestatis fœcun-
ditate de se mentem creauit. Hæc mens quæ Nōs vocatur
qua patrem incipit, plenam similitudinem seruat auctoris.
Animam verò de se creat, posteriora respiciens. Rursum ani-
ma qua patrem intuetur, ac paulatim redigente respectu in
fabricā corporū incorporea ipsa degenerat. Creari autē siue na-
sci hoc loco Macrobius abusiue protulit, sicut & in primo lib.
determinauimus, cū videlicet tam mentē ipsam quā animā
ipsam creatam dixit. Mentem quidē ex Deo, hoc est filium ex
patre, & animam ex mente, hoc est spiritum ex filio, vbi &
vtram natā esse insinuat, cum vtrique patrem assignat, Deum
quidem menti, & rursum mentem ipsam animæ. Creari ita-
que siue nasci esse ex aliquo intelligitur, vt tale sit quod ait,
hoc ex illo nasci siue creari, quasi simpliciter diceret hoc ex
illo esse. Sufficit autem Philosopho ad ostendendam animā
ipsam tam ex patre quam ex filio, memorasse solum hoc loco
filium, quia cum filius ex ipso patre sit, & spiritus ipse, hoc est
anima ipsa ex filio esse assignatur, liquet profectò ipsam quo-
que ex patre esse, scilicet quod & ipsa eam Philosophus à Deo
& Nō iuxta sapientes nominari supra inductus asserit. Quod
verò ait mentem esse ex fœcunditate maiestatis, tale est ac si
diceret, sapientiam ex ipsa omnipotentia esse natam. Propriè
namque maiestas ac reuerentia potentia ascribi solet. Quod
verò dicit, Mens, qua patrem inspicit, similitudinem seruat
auctoris, ita dictum puto, ac si apertē dicat filium ipsum in
omni re in qua similis est patri, æqualem omnino illi esse. Po-
tens quippè est sicut & pater, & tantumdem potens bonus est
sicut & pater & æquè bonus. Sic & in ceteris, in quibus habet

similitudinem cum patre, & æqualitatem habet, non autem in omnibus similitudinem habet cum patre, cum ipse solus sit genitus, & ipse pater sit genitor. Quod quidem ad distinctionem personarum attinet, secundum proprietates earum secundum nos etiam qui solum filium incarnatum credimus, in hoc vno filio minorem patre, non equalem dicemus. Nō postiora respiciens, animam creat, quia Spiritus sanctus qui ex filio est, siue quæcumque anima ab ipso conditore suo ducens exordium, hoc ipsum quod anima est, hoc est vita creaturarum rerum ex respectu quod ipsius creatoris habet, hoc est ex beneficio diuinæ sapientiæ cuncta disponentis, vt in ipso respectu Dei diuinum intelligatur beneficium. Anima quippè ab animando, hoc est viuificando dicta est. Spiritus quidem sanctus (vt in primo libro distinximus) quasi anima est, hoc est animarum nostrarum, & nostræ animæ quasi quædam eius corpora sunt ab ipso scilicet donis suæ gratiæ vegetata. Quas rursus animale vitam nobis certum est impertire patrem suū id est Nō dicit animam indui in ea sua qua intuetur, hoc est ratione utitur, quia ex ratione quam habent maximam similitudinem cum diuina sapientia tenet, cum ratio maximè sit ascribenda sapientiæ, paulatim anima in corpora respicit, quia ad comparationem plenitudinis illius summi boni, modicum est quicquid habemus, quantacumque dona virtutum ab ipso suscepimus. possumus etiam in eo paulatim intelligere dictum esse, quod quibusdam gradibus per interualla temporum, animus ad maxima spiritus suos fideles promoueat, nec sua simul conferat dona: degenerare dicitur anima in ipso sue operationis effectu, ex quo anima dicta est, cum non sit hoc æternum, sed temporale quod operatur. De quo ni fallor, illud facile est absolui, quod Plato animam mundi incepisse voluerit, nec coeternam Deo & menti. Cū enim Spiritū sanctū animam magis quàm spiritum appellauerit, quasi ab animando, hoc est viuificando nos donis suæ gratiæ per incrementa virtutum, non semper ille spiritus anima fuit, id est viuificans; quia dum nondum creaturæ essent, quibus dona sua distribueret, in illas bonorum suorum distributionem non exercebat. Sicut ergo Spiritum sanctum (qui in se est omnino simplex,) multiplicem tamen dicimus, & septem spiritus appellamus, secundum diuersitatem donorum, ita & philosophus

eundem qui in essentia propria æternaliter subsistit, incœpisse quantum ad effecta sua voluit, ex quibus eum animam magis quam spiritum appellauit. Spiritus quippè nomen est naturæ, anima verò officij, ab animando scilicet. Sicut ergo ipsos cœlestes spiritus semper quidem spiritus, sed non semper Angelos esse profiteamur, eo quod Angelus nomen sit officij, non naturæ, & dominum nostrum Iesum Christum secundum humanitatem incœpisse, secundum verò diuinitatem, æternum esse prædicamus: ita & Spiritum sanctum secundum substantiam essentia suæ æternum, secundum effecta verò incœpisse dicamus, quod est dicere effecta potius quàm ipsum incœpisse. Et hunc quidem Philosophi sensum esse arbitror, sub illo animæ typo, quod eam creaturam esse, id est incœpisse perhibet, & quasi temporalem esse, non æternam. Iuxta quod & Macrobius animæ ipsi tam Deum quam Noû, proferre non abhorreret. Vocet itaque Plato Spiritum sanctum animam secundum effectum operum. Nos verò dicamus Spiritum secundum naturalem suæ bonitatis affectum, quem ita ab æterno habuerit, vt ex opere eum impleret quando eum implendum esse prouidit. dicat ille animam incœpisse secundum effecta, nos verò spiritum in affectu suæ bonitatis æternaliter perseuerare. Dicat ille animam incœpisse, nos spiritum omnino æternum esse. Sit processio spiritus secundum affectum æterna, quia scilicet ab æterno sic voluit. Sit processio animæ secundum effectum temporalem. Vtramque spiritus processionem, tam secundum efficaciam scilicet, quàm secundum effectum à sanctis Patribus distinctam esse cognouimus. De processione quidem efficaciar, Beda in Homilia Dominicæ primæ post Ascensionem, ita loquitur. Cùm spiritus gratia datur hominibus, profectò spiritus mittitur à patre, mittitur & à filio: procedit à Patre, procedit & à filio, quia & eius missio, ipsa processio est, quia ex patre procedit & filio. Ipse autem Augustinus vtrumque processionis modum diligenter distinguit, cum eum procedere perhibet, tam secundum hoc quod datur, quàm secundum hoc quod dabilis est. Vnde lib. v. de Trin. Cum ad processionem spiritus peruenisset, ait, procedit non quomodo natus, sed quomodo datus. Quod autem datum est, & ad eum qui dedit, refertur, & ad eos quibus dedit. Sed si non procedit, nisi cum datur, nec procederet vtique prius quàm

quàm esset cui daretur. Nam donum potest esse & antequam detur, donatum autem nisi datum fuerit, nullo modo dici potest. Quid itaque mirum cum duobus modis spiritum procedere dicamus, si secundum alterum processionis modum dicatur spiritus à nobis, & secundum aliterum vocatur anima à Philosophis? Illud ergo spiritus æternaliter, hoc temporaliter habet, vnde & statim in eodem idem annectit dicens. Nec moueat quidem spiritus scilicet cum sit coæternus patri & filio. Dicatur tamen aliud ex tempore, veluti hoc ipsum quod donatum, nam sempiternè spiritus donum, temporaliter autem donatum. Nam & si Dominus non dicitur, nisi cum habere incipit seruum, etiam ista appellatio relatiua ex tempore est deo. Non enim sempiterna creatura est, cui est ille dominus. Item ecce dominum, ecce non sempiternum habet, ne cogamur etiam dicere creaturam sempiternam, quia ille sempiternè non dominaretur, nisi etiam ista sempiternè famularetur, qui etiam in eodem hoc in superiori, c. Spiritum etiam sanctum effecta manifestè vocat, cum ei principium assignat, Ait autem sic. Quod datum est, & ad eum qui dedit refertur, & ad eos quibus dedit. Ita Spiritus sanctus dicitur & Dei qui dedit, & nostri qui accipimus. Vnde scriptum est de Ioanne, quod *in spiritu Helie veniet*. Hoc & de Moïse intelligendum est, cum ait ei Dominus. *Tollam de spiritu tuo, & dabo eis*, hoc est de Spiritu sancto quem tibi dedi. Si ergo & quod datur principium habet eum à quo datur, quia non aliunde accepit illud quod ab ipso procedit, fatendum est patrem & filium principium esse Spiritus sancti, tamen non duo principia, sed vnum principium. Liquet itaque Augustinum hoc loco spiritum accepisse secundum effecta cum dicit, Datum magis quam secundum naturalem suæ bonitatis effectum vel benignitatis. Vnde benè secundum effecta pater & filius priores spiritu dicuntur, & quasi principium eius, quia ex potentia moderante sapientia effectus gratiæ descendit, ex quo etiam spiritus hoc loco appellatur, & prius potentiam & sapientiam esse oportet, vt postea aliud in effectum ducatur. Talè est ergo patrem & filium esse principium Spiritus sancti, ac si dicamus spiritum ex ambo- bus per effectum procedere, hoc est potentia Dei moderante eius ratione ad augmentum perducti. Et hoc quidem modo

si quis nomen spiritus accipiat, secundum scilicet suæ gratiæ effecta, non recte dicitur spiritus æternus, sicut nec Dominus aut creator, quia ut diximus, non semper spiritus secundum effecta existit, unde & benè Euangelista Ioannes ab æternitate Dei inclūdans, cum verbum apud Deum æternaliter ostenderet dicens. *In principio erat verbum, & verbum erat apud Deum, & Deus erat verbum.* Et, *Omnia per ipsum facta sunt*, nullam spiritus mentionem habuisse videtur, quia cum esse æternum astrueret, cum de Deo & verbo eius loquens; patri & verbo solummodo æternitatem ascribit, dicens. *Hoc erat in principio apud Deum.* Qui in eo fortasse quod subiunxit de effectu operum dicens. *Omnia per ipsum facta sunt*, spiritum designasse videtur secundum effecta ipsa quæ sua Deus condidit bonitate, secundum quæ, ut diximus, æternus non est spiritus, id est datus, sicut nec anima mundi quam Plato dicit. Nec mirum locum Euangelistæ maximè cum Platone convenire, cum totam verborum istorum sententiam in libris Platoniorum, Augustinus, ut supra meminimus, inuenerit. Sunt autem nonnulli qui charitatem Dei non solum ad creaturas porrigi, verum etiam ab una persona in alteram, ut videlicet amor patris in filium, vel filij in patrem spiritus ipse sit. Quod apertè Augustinus in xv. de Trinit. astruit his verbis. Deniquè si in donis Dei nil maius est charitate, & nullum maius donum Dei est quam Spiritus sanctus, quid consequentius quam ipse sit charitas quæ dicitur Deus, & ex Deo? Et si charitas quæ pater diligit filium, & patrem diligit filius ineffabiliter, communionem amborum demonstrat, quid convenientius quàm ut ille propriè dicatur charitas, qui spiritus est communis ambobus? Hinc est & illud Hieronymi super septimiū Psalmum. Spiritus sanctus nec pater est, nec filius est, sed dilectio quam habet pater in filio & filius in patre. Quod fortassis ideo maximè dicendum videtur & tenendum, ut videlicet amor quoque patris in filium vel filij in patrem, dicatur Spiritus sanctus, & non tantum amor ad creaturas, quod fortassis aliter videretur Spiritus sanctus posse non esse, ac per hoc non necessario esse ipsam Trinitatem. Posset quippè esse ut nulla creatura vnquam esset, cum nulla ex necessitate sit, ac per hoc consequens videretur, ut iam nec effectus ipsius què videlicet erga creaturas habet ex necessitate sit, ac per hoc spiritus ipse ex

necessitate non sit quem dicimus Dei ipsum affectum esse siue amorem. At verò si amorem Dei non solù erga creaturas, verù etiam vnus personæ erga alteram accipiamus, hoc inconueniens euitamus aperte. Ac fortasse cum creaturæ ipsæ ex necessitate non sint, quia scilicet quantum ad propriam naturam non esse possunt, amor tamen dei erga illas ita necessario habet esse, vt absque illo Deus esse non possit omnino, cum videlicet ipse ex propria natura tam hunc amorem suum quàm quodlibet bonum ita habeat, vt eo carere nullatenus possit, quem nullatenus aut minus bonum quàm est, aut maius bonum posse esse constat. Sed de hoc plenius tractandum postmodum reseruamus, cum de diuina potentia principale tractandi se obstulerit negotiù. donum tamen patris quantum ad filium, vel filij quantum ad patrem nequaquam dicendum esse arbitror spiritum, quia nequaquam dari ei potest, cui abesse non potest, hoc est cui necessario inest, qui necessario vtriusque est spiritus.

Non arbitror autem hoc quoque ab hac quæstione alienum esse, Quomodo scilicet hanc fidem Trinitatis soli Christiani teneant, & non etiam vel Iudei vel Gentiles. Cum enim Deum esse patrem & filium & Spiritum sanctum tale sit, vt diximus Deum esse potentiam, vt dictum est, generantem, & sapientiam genitam, & benignitatem procedentem, cum istud nemo discretus ambigat, siue Iudæus, siue Gentilis, nemini hæc fides deesse videtur, quod & nos quidem concedimus, sequentes Apostolum qui ait. *Quod notum est Dei, manifestum est in illis*, ac si diceret, Quod ad diuinitatem pertinet, ratione perceperunt, quia hoc de Deo ratio naturaliter vnumquemque edoceat. Vnde & superius cum Platoniorum sententias de verbo Dei Augustinus præsentaret, solum quæ ad diuinitatem verbi pertinent se in eis reperisse confirmauit, & nil de incarnationis mysterio, in quo totam salutis humanæ summam consistere certum est, sine quo cætera frustra creduntur. Facile autem conuinci poterit eos quoque qui nostra de fide verba abhorrent, cum videlicet audiunt Deum patrem, & Deum filium, in sensum verborum nobis esse coniunctos. Interrogemus enim eos si sapientiam Dei credant, de qua scriptum est. *Omnia in sapientia fecisti*, & statim respondebunt se credere. Inferamus deindè conue-

XVIII.

nienter eos in hoc ipso filium Dei sicut & nos credere, cum nos videlicet idem intelligamus per verbum siue per filium Dei, quod illi per sapientiam Dei. Quisquis autem filium esse recipit, utique & eum cuius est filius, esse non dubitat, hoc est patrem. Spiritum quoque simili ratione eos credere conuincemus, si eis quid in hoc nomine intelligamus exposuerimus, ipsam scilicet diuinæ gratiæ bonitatē. Hinc autem facile occasionem sumi arbitror, conuertendi ad fidem nostram quoslibet alienos, si huiusmodi inductionibus eos iam communem nobis sensum fidei habere conuicerimus. Quam licet ore non confiteantur, sicut nos, propter ignoratam scilicet verborum nostrorum significationem: corde tamen iam tenent, sicut scriptum est, *Corde creditur ad iustitiam.*

LIBER TERTIVS.



EX PEDITIS his quæ ad singularem Christianæ fidei professionem attinere videntur, de discretionem videlicet trium personarum in vna eademque penitus ac simplici diuinitatis substantia, iuuat in huius summi boni perfectione contemplanda mentis aciem altius imprimere, ac diligentius singula replicando quæcumque aliquid quæstionis habere videntur, verisimilibus & honestissimis rationibus diffinire, ut quo amplius innotuerit huius summi boni perfectio, maiori vnumquemque ad se trahat desiderio. Ac primo de vnitatem diuinæ substantiæ, postmodum de personarum recapitulandum est Trinitate. In superioribus itaque Libellis ad nostræ fidei professionis defensionem elaboratum est, hinc verò ad ipsius amplificationem elaborandum.

I. **P** R I M A igitur sit de ratione credendi vnum Deum discussio, & quod vnum magis quàm plures attineat credi, vbi & prima se ingerit quæstio, an humana etiam ratione diuina celsitudo indagari potuerit, ac per hanc à creatura sua creator recognosci, an potius ipse Deus signo aliquo sensibili suam ei notitiam primum exhibuerit, velut in angelo vel in quocū-

que ei Spiritu primitus apparens, sicut de primis legitur parentibus, quibus in Paradiso locutus fuisse perhibetur. Et fortassis ita primo factum est, ut in aliqua scilicet visibili specie inuisibilis creator ipse homini se revelaret. Si tamen vim ipsam rationis diligentius attendamus (cuius proprium est omnem transcendere sensum, & ea vestigare quæ sensus non valet attingere) profectò quancumque res subtilioris est naturæ, & à sensu remotior, tanto rectius se rationis iudicio, & magis in se rationis studium prouocare debet. Vnde etiam cum per insigne rationis imaginis Dei specialiter homo comparetur, in nihil aliud homo pronius eam figere debuerat, quàm in ipsum, cuius imaginem, hoc est expressiorem similitudinem per hanc obtinebat, & in nullâ fortasse rem percipiendam pronior esse credenda est, quam in eam cuius ipsa amplius adepta sit similitudinem. Facile quippè est ex similibus similia conijci, & quo quisque alteri similior, facilius ex seipso ad eius notitiam pertingere valet, cui est ipse per naturam vicinior. Quod si & in hæc ipsa quoque sensuum experimenta necessaria videntur, ut videlicet à sensibilibus ad intelligibilia duceretur, facile etiam erat, ut omnium optimus conditor atque dispensator Deus, per ea quæ tam mirabiliter & facit & ordinat, ex ipsis suis quantus sit operibus indicaret, quia & per qualitatem operum quæ videntur, absentis artificis industriam diiudicamus. Hoc quidè modo & ipse perhibet Apostolus, Deum sui notitiam reprobis quoque contulisse, iuxta quod ad Romanos scribens, inexcusabilem omnem hominem esse conuincit, & de contemptu sui conditoris esse arguendum, cum eius notitiam lex ipsa naturalis (quæ in ratione consistit) etiam sine scripto ex ipsa operum eius exhibitione omnibus afferret. Ait quippè sic. *Reuelatur ira Dei de celo super omnem impietatem & iniustitiam hominum eorum qui veritatem Dei in iniustitia detinent. Quia quod notum est Dei, manifestum est in illis, Deus enim illis reuelauit. Inuisibilia enim ipsius à creatura mundi, per ea quæ facta sunt, intellecta conspiciuntur, sempiterna quoque eius virtus & diuinitas, ita ut sint inexcusabiles, quia cum cognouissent Deum, non sicut Deum glorificauerunt, aut gratias egerunt. Et post aliqua. Propter quod inexcusabilis es o homo omnis qui iudicas, hoc est, qui rationis vteris iudicio in bonis & malis discernendis, atque in ipsis creatoris & creaturarum discutiendis naturis. Vnde &*

Salomon nonnullos mundi sapientes se vehementer admirari insinuat, quomodo scilicet mundum ratione vestigauerunt, naturamque ipsius per singulas ipsius partes dissere conati sunt, nondum creatorem ipsius animaduertentes, quem facilius ratione percipere poterant. Si enim, inquit, ratione tantum potuerunt scire ut possent existimare seculum, quomodo ipsius mundi Deum & creatorem non facilius inuenerunt? Hoc & ille maximus Latinorum Philosophorum Tullius diligenter intuitus, cum non solum optimè factum, verumetiam optimè disponi mundum conspiceret, prouidentia id potius agi, quam fortuitu confirmans, tam suam in hoc, quam ceterorum rationem exposuit Philosophorum. Vnde est illud in primo Rethoricæ. Melius, inquit, accurantur ea quæ consilio geruntur quam quæ sine consilio administrantur. Domus ea quæ ratione geritur, omnibus est instructior rebus, & apparatus quam ea quæ temerè & nullo consilio administratur. Exercitus is cui est præpositus sapiens & callidus Imperator, omnibus partibus commodius regitur, quam is qui temeritate vel stultitia alicuius administratur. Eadem navigationis ratio est. Hoc itaque proposito & collatione similitudinum conuenienter astructo, assumptionem statim aggregans syllogismi. Nil autem, inquit, omnium rerum melius quam omnis mundus administratur. Nam & signorum, inquit, ortus & obitus definitum quemdam ordinem seruant, & animæ commutationes non modo quadam ex necessitate semper eodem modo fiunt, verum ad utilitates quoque rerum omnium sunt accommodatæ, & diurnæ nocturnæque vicissitudines nulla in re mutatae umquam nocuerunt, quæ signo sunt omnia non mediocri quodam consilio naturam mundi administrari. Quod si melius, inquit, geruntur ea quæ consilio, quam quæ sine consilio administrantur, nil autem omnium rerum melius quam omnis mundus administratur: consilio igitur mundus administratur. Quanta autem ratione cuncta in mundo fiant ac disponantur, maximus omnium Philosophorum Plato diligenter attendens ait. Nihil fit cuius ortum non legitima causa & ratio præcedat, quæ enim quantum ad nos fortuita dicuntur atque inopinatè prouenientia, certis in Deo rationis legibus fixa sunt, atque optimo quoque fiunt consilio. Hæc verò quæ optimè cuncta fiunt ac disponuntur, consilium, alij Deum,

alij natutam ipsam rerum, alij mentem seu animam mundi vocare consueuerunt. Omnes autem id summum bonum esse intellexerunt. Quod professus est Socrates. primus autem omnium Anaxagoras, inter vniuersos Philosophos diuinum animum omnium effectorem naturarum sensibile perhibetur, sicut in viii. de Ciuit. Dei Beatus commemorat Augustinus. Vnde & illud est in Epistolis eiusdem ad Macedonium. Non propterea veritas chara esse debet quia non latuit Anaxagoram, sed quia veritas est, & si nullus eorum cognouisset, facile autem illud quoque ratione conuinci poterat, mundum ipsum etiam & quæ in eo sunt à se ipso non esse, nec per se subsistere: sed ab alio quocumque longè cunctis excellentiore, cuncta optimè tam fieri quam regi. Quippè quod à se ipso est, natura dignius esse constat quàm quod ab alio est. Et omne quod rationis atque intelligentiæ capax est, vniuersis alijs excellentius esse inuenitur. Non enim oportet rationalem substantiam ab alio esse concedi, si ratione carentem à se esse ponamus, nemo enim nostrum est qui se ipsum ignoret à se minimè esse, sed ab alio gigni. Quomodo igitur ea quæ ratione carent, ab alio esse negabimus? Partes itaque mundi quæ naturaliter priores sunt, factas esse conuenit, ac per hoc ab alio mundum exordium ducere atque factum esse. Quippè quem etiam propter hominem factum esse constat, cui singulis suis partibus deseruit, longè indigniorem eo esse conuenit, ac per hoc minimè concedi oportet hunc non esse factum, cum ille factus sit, multo minus etiam conuenit vt suo regimine rationalia quàm nō rationalia nitantur. Hominem autem (quamuis rationalis sit) nequaquam suo regimini sufficere cōstat, cum seipsum quomodo vult in huius vitæ pelago regere non valet. Multo igitur minus regimini proprio committi cōuenit quæ quæse regere possint ratione carere certum est. Id verò est mundus siue singulæ particulæ, & his quidem vel consimilibus rationibus omnia quæ in mundo sunt conditorem siue rectorem habere manifestum arbitror, quem nos Deum dicimus.

DE cuius nunc vnitate superest disputare, vt magis videlicet vnum conditorem ac rectorem mundo præesse conueniat quàm plures: atque vnum potius Deum ac dominum omnium, quàm plures credi oporteat. Certum quippè est omnia

tanto maiori concordia regi, quanto paucioribus cura regiminis eorum commissa est. Nihil autem melius aut maiori concordia regi quàm mundum constat vniuersum, sicut supra Tulliana exposuit ratio. Vni igitur regimini subiectum est. Nihil quippè, vt dictum est, maiori concordia quàm mundus regitur, nec etiam res ea quelibet cui vnus tantum præsidet rector. Nullo itaque modo pluribus rectoribus mundus subiacet, sed vni tantum. Tanto quippè maior in omnibus custoditur concordia, quanto maior tenetur identitas: & tanto amplius à concordia receditur, quanto ab vnitatem magis receditur. Vt ergo summa sit concordia, summa teneatur identitas, ac præcipua conseruetur vnitas. Nil autem cum aliquo ita vt secum idem vel vnum potest, nec ita alij concordare, vt sibi cum à seipso nihil dissimile sit. Ad vnum itaque cuncta spectare ac referri conuenit, vt quod rerum diuersitate agitur, vna ratione concorditer administretur, modo (quem in omnibus oportet) seruato. Sed nec plures ad rerum creationem magis quàm ad generale earum regimen conuenire credendum est, sed ab vno naturas omnes fieri, vt & regi opportunè creditur, vt tanto cōcordius regi valeant, quanto maiori connexæ sunt concordia. Tanto autem maior est earum concordia, quanto amplius vno eodemque penitus semper principio manant, & earum artifex à multiplicitate ac diuersitate recedit. Facta autem sunt primitus, vt optimè postea regerentur, & quæ fiebāt vt regerentur, ad regendum vtique dum fierent, præparabantur. Vt ergo optimè regerentur, facta optimè dum fierent, ad regendum erant præparanda. Quomodo autem optimè præpararentur dum fierent, vt facta postmodum optimè regerentur, nisi summa inuicem concordia, & ipsa sui creatione colligantur, vt eo amplius concorditer atque melius regantur, quanto concordius in ipsa eorum conditione naturæ ipsorum sunt inuicem colligatæ? Ad quam etiam conditionis concordiam, sicut & regiminis, vnitas ipsa atque identitas maxima conditoris proficit, vt hinc quoque vnum eundemque penitus conditorem sicut & rectorem omnium esse constet, quem nos Deum dicimus, ac summum iure profiteamur bonum. Qui quomodo summum diceretur, nisi ceteris omnibus præcelleret bonis? Quod verò omnibus alijs præcellit, vnum perfectò & vnicum esse conuenit, & quod in se perfectum esse conceditur,

ditur, atque ad omnia quæ facienda sunt ex propria voluntate per se sufficiens, ex quo & omnipotens dicitur, cum pars aliquod bonum habere non potest. Neque enim bonum esse poterit, quod superfluum sit. Superfluum autem alius vel creator esset vel rector, si vnus ad omnia æquè sufficiat vt plures. Sufficit autem cum sit summum ac perfectum, atque ad omnia sufficiens, vt dictum est, bonum. Nullo itaque modo plures deos esse, siue credi conuenit. Sed fortassis, inquires, quia quo melius est quodlibet bonum eius, multiplicatio eius melior esset, atque ita illud summum bonum quod dicitur Deus, melius fore multiplicatum quam vnicum, & si ipsum extollere cupimus ac magnificare, magis ipsum multiplex quàm simplex prædicandum esse. Sed ad hoc primò respondendum esse arbitror, quod iuxta hanc rationem, quāto plures prædicauerimus deos, tanto amplius diuinæ gloriæ excellentiæ amplificabimus. Infinitos itaque prædicari oportet deos, vt infinitam eius gloriā magnificemus, præsertim cum nulla sit ratio, qua ad certum numerum aliquem ea reduci queat. Quam iuxta prædictam rationē tantomagis amplificabimus, quanto amplius numerum eius extenderimus. Atque ita plura esse summa bona quàm inferiora conueniret, imò omnino infinita esse, vt nec earum scientia esse possit quorum nullus in natura terminus occurrerit, nec ipse etiam Deus eam per scientiam comprehenderet, quæ nullo naturæ termino comprehendere tur. Præterea si plures sunt dii, quomodo Dominū quemcumque summum bonum dicemus, cum aliud sit maius ipso, ipsa scilicet donorum multitudo, quàm quislibet vnus ex ea multitudine. Sed nec bonum dicendum esset, quod vt iam ostendimus, superfluum esset. Denique omnis multitudo totum quidem est, & omne totum proprijs partibus posterius esse naturaliter constat, atque omne quod simplicius est, tanto si minus esse necesse est, cum omne compositum natura dissolubile sit, & tanto infirmius, quanto dissolutioni magis obnoxium. Quis etiam quodlibet bonum tanto pretiosius esse denegat, quanto rarius; & eo magis gloriosum, quo magis est vnicū? Vnde & plerumque ea quæ minus sunt necessaria alijs, raritate tamen sui eis omnino præferuntur, vt aurum ferro, piper frumento. Commendat itaque diuinæ gloriæ excellentiæ ipsa quoque eius singularitas, quæ operum quoque ipsius

maxima est commendatio, tam in his faciendis, quàm in eis disponendis atque regendis. Nulla propriè tanta fieri concordia vel regi possunt, quanta illa quæ vnus tantum & condit & regit. Hæc quidem ad astruendam diuinæ singularitatem excellentiæ pro rationibus induci satis esse arbitror, quibus & facilè assentiri quemcumque bonum existimo, qui nulli inuidus, omnium rerum commendationi plurimum congaudet. Magis autè honestis quàm necessarijs rationibus vtimur, quoniam apud bonos id semper præcipuum statuitur, quod ex honestate amplius commendatur, & ea semper potior est ratio quæ ad honestatem amplius quàm ad necessitatem vergit, præsertim cum quæ honesta sunt per se placeant, atque nos statim sua vi quadam alliciant. Quàm honestum verò sit ac salubre, omnia ad vnum optimum tam rectorem quàm conditorem spectare, & cuncta potius ratione quàm casu seu fieri, seu regi, nullus est cui propriæ ratio non suggerat conscientiæ. Quæ enim sollicitudo bonorum nobis operum inesset, si quæ nunc amore vel timore veneremur, Deum penitus ignoremus? Quæ spes aut malitiam refrenaret potentum, vel ad bona eos alliceret opera, si omnium iustissimus ac potentissimus frustra crederetur? Ponamus itaque vt dum bonis prodesse ac placere quærimus, obstinatos cogere non possimus, cum ora eorū non necessarijs obstruamus argumentis, ponamus inquā hoc si voluat: sed opponamus quod nolunt, summam eorum impudentiam arguentes, si hoc calumnientur quod refellere nullo modo possunt, & quod plurima tam honestate quàm utilitate commendatur. Inquiramus eos qua ratione malint eligere Deum non esse, quàm esse, & cum ad neutrum cogi necessariò possint, & alterum multis commendetur rationibus, alterum nullis, iniquissimam eorum confundamus impudentiā, qui id quod optimū esse non dubitent, omnibusque etiam tam rationibus quàm auctoritatibus consentaneum sequi respuāt, & contrarium amplectantur. Quod si de occultis rerum naturis, ac de ipso quoque rerum cælestium statu, quas experimentis non possunt discutere, vt certi indè valeant esse auctoritatibus hominum credunt, cur de auctore omnium Deo eisdem non acquiescunt? Sed hæc hætenus aduersus hanc primam & maximam infidelium obstinationem.

N V N C autem ab vnitæte diuinæ substantiæ, quam quasi

fundamentum subiecimus, ad discretionem trium personarum, quæ eidem insunt substantiæ, ordo est commeare, & de diuina potentia seu sapientia vel benignitate, iuxta quæ, ut dictum est, tres distinguuntur personæ ad perfectam & integram summi boni commendationem, superest diligenti examinatione differere: ut quo amplius, ut supra meminimus, huius boni perfectio cognita fuerit, magis ad amorem sui quemque alliciat, præsertim cum nullæ super his fidelium quoque animos difficiles mouere possint quæstiones, & tantò facilius minus eruditos ad maxima trahere scandala atque infideles iuuare, quanto difficiliore ad soluendum videntur. Ac prima nobis de omnipotentia Dei consideratio sit.

QVÆRENDVM itaque primo videtur, quomodo verè dicatur omnipotens, si non possit omnia efficere, aut quomodo omnia possit, si quædam nos possumus quæ ipse non possit: possumus autem quædam, ut ambulare, loqui, sentire, quæ à naturâ diuinitatis penitus aliena sunt, cum necessaria istorum instrumenta habere nullatenus incorporea queat substantia. Quibus quidem obiectis id prædicendum arbitror, quod iuxta ipsos quoque Philosophos, & communis sermonis vsum, numquam potentia cuiusque rei accipitur, nisi in his quæ ad commodum vel dignitatem ipsius rei spectant. Nemo enim hoc potentia hominis deputat, quod ille superari facile potest, imo impotentia & debilitati eius, quod minimè resistere suo potest incommodo, & quicquid ad vitium hominis vergit, magisque personam improbat quàm commendat, impotentia potius quàm potentia ascribendum est. Vnde & Aristoteles in secundo qualitatis genere, vbi scilicet de potentia naturali & impotentia agitur, sanatiuum & durum ad potentiam reducit, & ægrotatiuum & molle ad impotentiam, cum tamen ægrotatiuum dicamus, qui facile ægrôtare potest, hoc est non facile valet huic passioni resistere, & molle quod leuiter secari aut dissipari potest. Sanatiuum verò & durum è contra ad potentiam reducit, cum tamen sanatiuum dicatur, quod non potest facile infirmari, & durum quod non potest leuiter secari. Sicut ergo in supra positis, id est ægrotatiuum & molli illa posse quæ ad incommodum vel debilitatem rei attinent, impotentia est potius quàm potentia, ita & eadem non posse è contrario potentia est ascribendum. Alioquin è

IIII.

conuerso impotentiam diceremus potentiam, & potentiam impotentiam. Nemo itaque Deum impotentem in aliquo dicere præsumat si non possit peccare sicut nos possumus, quia nec in nobis ipsis hoc potentia tribuendum est, sed infirmitati. Vnde & Aug. lib. de Trinit. xv. Magna, inquit, eius potentia est non posse mentiri. Sunt & quædam quæ in alijs rebus potentia deputanda sunt, in alijs verò minimè, & quæ in alijs laudabilia sunt, in alijs reprehensibilia sunt. cum eadem sæpè aliarum rerum dignitatem commendent, aliarum verò minimè; veluti si quis hominum vsum viribus superare possit, hoc magnæ hominis potentia ascribendum est. Vnde ipse ceteris hominibus præcelleret, & commendabilior esset, quod in leone tamen & in elephante pro magno nullus haberet. Inde enim hominem potentem comparatione aliorum hominum diceremus, sed non ita leonem vel elephantem. Sic & in homine quod ambulare valet potentia est ascribendum, quoniam eius necessitudini congruit, nec in aliquo eius minuit dignitatem. In Deo verò (qui sola voluntate omnia complet) hoc omnino superfluum esset, quod in nobis necessarium est, atque ideo non potentia, sed vitio potius tribuendum esset in eo, præsertim cum hoc in multis excellentia ipsius derogaret, vt ambulare videlicet posset. Ex quo etiam moueri localiter posset, & compositionem pedum admittere, & vt mobilis & dissolubilis esset eius corporea & compacta substantia, non absurdè tamen & de his omnibus quæ efficere possumus, Deum potentem prædicabimus, & omnia quæ agimus eius potentia tribuimus, *in quo viuimus, mouemur, & sumus, & qui omnia operatur in omnibus.* Vtitur enim nobis ad efficiendum quæ vult, quasi instrumentis, & id quoque facere aliquo modo dicitur quæ nos facere facit, sicut diues aliquis turrem cōponere per opifices quos adhibet, & posse omnia efficere dicitur qui siue per se, siue per subiectam creaturam omnia quæ vult & quomodo vult operatur. Nam etsi non potest ambulare, tamen facere potest vt ambuletur, hoc est vt alius ambulet, cum ipse ad hoc sui creatione quemque aptum præpararet, & in ipso etiam actu ipsum conseruet & sustentet, & hunc ille actum expleat. Posse itaque Deus omnia dicitur, non quod omnes suscipere possit actiones, sed quod in omnibus quæ fieri velit, nihil eius voluntati resistere queat. Hinc

illud est quod in Enchiridion beatus commemorat Augustinus. Neque enim ob aliud veraciter vocatur omnipotens, nisi quoniam quicquid vult, potest; nec voluntate cuiuspiam creaturæ, voluntatis omnipotentis impeditur effectus. Idem in libro de Spiritu & litera. Non potest facere iniusta, quia est summa iustitia & bonitas. Omnipotens vero est, non quod possit omnia facere, sed quia potest efficere quicquid vult, ita ut nil valeat resistere eius voluntati, quin compleatur, vel aliquomodo impedire eam. Ioannes Chrysostomus Homilia xxviii. de expositione Symboli, quæ sic incipit, Super fabricam totius Ecclesiæ. Credo in Deum Patrem omnipotentem. Omnipotens dicitur, quia posse illius non potest inveniri non posse, dicente Propheta. *Omnia quaecumque voluit fecit.* Ipse est ergo omnipotentia, ut totum quod vult, possit, unde & Apostolus. *Voluntati eius quis resistet?* Et Psalmista. *Quaecumque voluit fecit.* Sed & cum alibi dicat Apostolus, *Deus vult omnes salvos fieri, & neminem perire*, iuxta illud quidem Prophetæ. *Nolo mortem peccatoris, sed magis ut convertatur & vivat.* Et per semetipsam veritas obstinata & damnata dicat civitati. *Quoties volui congregare filios tuos, quasi gallina pullos suos, &c.* Pater itaque divinæ voluntatis vocabulum duobus modis esse sumendum. Alioquin cum Deus omnia quaecumque voluit faciat, & omnes salvos fieri velit, cogemur utique profiteri omnes quandoque salvandos esse. Velle itaque Deus duobus modis dicitur, aut secundum scilicet providentiæ suæ ordinationem, secundum quod scilicet aliquid disponit apud se ac deliberat statuitque in sua providentia, ut sic postmodum compleat, aut secundum consilij adhortationem vel approbationem qua unumquemque ad hoc admonet, quod per gratiam suam remunerare paratus esset. Et iuxta priorem quidem modum, quo Deus velle aliud dicitur, hoc est ex gratia sua ordinare, atque apud se statuere ut fiat aliqua, tam nos quam Apostolos in his quæ fieri vult, nil eius voluntati resistere posse dicimus, nec eam, aliquo impediri casu, cui omnia necesse sit obedire. Secundum autem posteriorem modum multa dicitur velle fieri quæ non fiunt, hoc est multa adhortari quæ certum est ex gratia eius remunerari si fierent, quæ minimè fiunt. Sic quippe unicuique homini consulit de salute sua, & ad hanc:

eam hortatur, cum obediant pauci. Vult itaque Deus peccatorem conuerti, quia ei id consulit, quod esset benignè remuneraturus, quemadmodum ei gratum dicitur in quo eius gratiam experturi essemus, sicut è contrario nolle illa dicitur quæ dissuadet, aut quæcumque punire magis debet, quam dono aliquo remunerare, & in quibus iram ipsius potius quàm gratiam sentiremus, hoc est vindictam potius quàm præmiū.

V.

Q V Æ R E N D V M arbitror vtrum plura facere possit Deus vel meliora quàm faciat, aut ab his etiam quæ facit, vlllo modo cessare posset, nec ea vnquam videlicet faceret, quod siue concedamus, siue negemus, multas fortasse inconuenientium anxietates incurreremus. Si enim ponamus vt plura vel pauciora facere possit, vel ab his quæ facit cessare, profectò multum summæ eius bonitati derogabimus. Constat quippè eam non nisi bona facere posse, si autem bona cum possit, non faciat, & ab aliquibus quæ faciēda essent se retrahat, quis eum tanquam æmulum vel iniquū nō arguat? Præsertim cum nullus eum labor in faciendo aliquid grauet, cuius æquè omnia voluntati sunt subiecta, secundum quod scriptum est. *Dixit & facta sunt, mandauit & creata sunt.* Hinc est illa Platonis verissima ratio, qua scilicet probat Deum nullatenus mundum meliorem potuisse facere, quàm fecerit, sic quippè in *Timæo* suo ait. Dicendum, inquit, cur conditor fabricatorque genituræ omne hoc instituendum putauerit. Optimus erat. Ab optimo porro inuidia longè relegata est, itaque consequenter sui similia cuncta prout cuiusque natura capax beatitudinis esse potuerit, effici voluit. Quamquidem voluntatem Dei originem rerum certissimam si quis ponat, rectè eum putare consentiam. Volens siquidem Deus bona quidem omnia prouenire, mali porro nullius prout eorū quæ nascuntur natura fert reliquit propaginē. Et hæc quidem Platonis verba planè omnia à Deo tam bona fieri perhibere videntur, quantum fieri bona possunt, vel quantum ipse ea bona facere potest. Quam etiam rationem sancti secuti videntur, cum Deum patrē probarent filium tam bonū genuisse quantū potuit, vt ei æqualis esset. Vnde Aug. lib. quæstionū LXXXIII. c. LXIII. Deus inquit, quē genuit, quoniā meliorē se generare non potuit. Nil enim Deo melius debuit æqualē. Si enim voluit, & non potuit, infirmus est; si potuit & noluit, inuidus est. Ad hoc & illud pertinet

Niceni cōcilij quod sicut in primo libro præfati sumus, beatus cōmemorat Hieronymus dicens. Absit ergo in filio Dei aliud plus minusue aut in loco, aut in tēpore, aut in potentia, aut in scientia, aut in æqualitate, aut in subiectione, cū dicitur hoc ut Deitati eius, nō carni ascribantur. Si enim plus minusue aliud inuenitur, excepto hoc quod genuit pater filium, & excepto quod filius non ex semetipso natus est, sed de patre, aut inuidens aut impotens pater, insuper etiam temporalis agnoscitur. Hac itaque ratione qua conuincitur, quia Deus pater tam bonum genuerat filium quantum potuit, cum videlicet aliter reus esset inuidiæ, clarum est omnia quæ facit, quantum potest egregia facere nec, vllum commodum quod conferre possit, substrahere velle. Nihil quippè est quod aut faciat aut dimittat, nisi optima & rationabili causa, licet illa nobis occulta sit. Vnde & illud est Platicum: Omne quod gignitur, ex aliqua causa necessaria gignitur, nil enim fit cuius ortum non legitima causa & ratio præcedat. Hinc & illud est Augustini, Cū omnia in mundo fieri vel disponi diuina prouidentia conuinceret, & nihil casu, nihil fortuitu euenire, sed omnia ex diuino prouenire consilio. Ait quippè sic prædicto quæstionum lib. cap. xxvi. Quicquid casu fit, temerè fit. Quicquid temerè fit, non fit prouidentia. Si ergo casu aliqua fiunt in mundo, non prouidentia vniuersus mundus administratur. Item. Illud bonum cuius participatione sunt bona cetera, non per aliud, sed per semetipsum bonum est. Quod diuinam etiam prouidentiam vocamus. Nihil igitur casu fit in mundo. In tantum autem in omnibus quæ Deus facit, quod bonum est attendit, ut ipso boni pretio potius quàm voluntatis suæ libito, ad singula facienda inclinari dicatur. Hinc est illud Hieronymi super Danielelem in expositione visionis tertiæ, vbi de Deo sic Nabugodonosor loquitur. Iuxta voluntatem enim suam fecit, tam in cælo quàm in terra, & non est qui resistat manui eius, & dicat, Quare fecisti? Et hoc inquit Hieronymus loquitur, quasi homo seculi, non enim quod vult non facit: sed quod bonum est, hoc vult Deus. Nabugodonosor sic locutus est, ut dum potentiam Dei prædicat, iustitiā eius videatur arguere, quod in merito pœnas sustinuerit. Tale ergo est quod ait Hieronymus. Non enim quod vult hoc facit, sed quod bonum est, hoc vult Deus. Ac si di-

ceret. Non ita ut æstimat Nabugodonosor operatur Deus; more videlicet eorum qui in his quæ faciunt, non tam quod bonum est attendunt, quàm ut suæ satisfaciunt voluntati, qualiscumque ipsa sit. De qualibus scriptum est. Hoc volo, sic iubeo, sit pro ratione voluntas. Sed magis velle dicendus est singula ut fiant quia bonum esse ut fierent, vidit. Hoc autem modo unusquisque voluntatem suam sequi prohibetur. Et Christus etiam ipse non sibi placuisse dicitur, quia nihil hoc sine vel intentione agere debemus, quia id volumus, vel quia nobis in hoc placemus, id est quia in hoc delectamur, sed potius quia id à nobis fieri bonum esse censemus. Patet itaque quicquid Deus faciat ac dimittat, iustam ac rationabilem causam subesse, ut sola faciat aut dimittat, quæ fieri vel dimitti oporteat atque ipsum deceat. Quod si quicquid facit, eum facere oportet, iustum est ubique ut faciat quicquid facit, ac sine dubio quicquid facit facere debet. Omne quippè quod iustum est fieri, iniustum est dimitti, & quisquis non facit id quod ratio exigit, æquè delinquit ac si id faciat, quod rationi minimè concordat, Sed fortassis, inquires, quod iustum iniustum est aliud bonum seu rationabile id * quod modo facit, ita bonum esset atque æquum bonum si illud faceret, hoc dimitteret. Atqui si illud æquè bonum esset quod dimisit facere quando istud elegit, nulla ratio profectò fuit cur illud dimitteret, atque istud eligeret. Fuit autem, inquires, quia cum non utrumque fieri oporteret & æquè hoc vel illud fieri bonum esset, quodcumque eorum fieret, rationabiliter factum esset. Sed vix habeat profero rationem, æquè fieri oportebat quod factum non est, sicut quod factum est, & æquè bonum etiam illud fieri sicut hic. Cum verò quid fieri bonum est, & rationabilem hanc causam qua faciendum sit, irrationabiliter profectò agit, qui quod à se fieri debere non ignorat, prætermittit, atque ita iam in suprapositum inconueniens relabemur. Sin autem dicas de altero quod factum non est, quia non erat bonum ut fieret, nisi ita ut alterum cessaret; profectò eadem ratione de altero quod factum est, non erit simpliciter concedendum, ut bonum esset illud fieri, cum æquè concessum sit tam hoc quàm illud fieri bonum esse. Fecit itaque Deus quod nouerat bonum fieri? Absit. Quod si illud solum quod facit fieri ab eo bonum est, profectò illud solum quod facit, facere potest, qui
nihil

nihil facere potest quod non ab eo fieri bonum est. Hac itaque ratione id solum posse facere videtur Deus quod facit, vel illud solum dimittere posse quod dimittit. Cùm videlicet in singulis faciendis vel dimittendis rationabilem habeat causam, cur ab ipso fiant vel dimittantur: nec ipse quicquam, qui summa ratio est, contra id quod ratio congruit, aut velle aut agere queat. Nemo quippè quod à ratione dissidet, velle vel agere rationabiliter potest. Quod diligenter beatus Hieronymus attendere visus est, cùm Eustochium virginem ad observandum sanctæ virginitatis propositum adhortans ait: Virgo Israel cecidit, & non est qui suscitet eam: Audacter loquar, cùm omnia possit Deus, virginem post ruinam suscitare non potest. Quæquidem verba Hieronymi contra calumniatores quidam defendens, inter cetera quæ de vita eius scribebat, ait: Sanctus Hieronymus Eustochio ad meliora studuit hortando mandare. Cùm omnia possit Deus, virginem post ruinam suscitare non potest. Quod non posse Dei non velle alio modo omnimodo dici poterat verbo. Per quendam namque sapientem dicitur Deo: *Tu autem Dominator virtutis cum tranquillitate iudicas, & cum magna reuerentia disponis. Subest enim cum volueris tibi posse.* Ergo ubi non est velle Dei, deest posse. Deus quippe immutabilis naturæ, ita immutabilis est voluntatis. Ex his itaque tam de ratione quàm de scripto collatis, constat id solum posse facere Deum quod aliquando facit. At verò si ponamus id solum quod facit Deus eum facere posse, multa è contrario tam rationi quàm auctoritati contraria videmur incurrere. Quis enim nesciat hunc hominem, qui damnandus est, posse saluari? Aut hunc hominem, qui bonus est, posse meliorem fieri quàm vnquam futurus sit? cùm tamen vtrumque non nisi per Deum contingere queat? Si enim hic damnandus omnino saluari non posset, nec ea facere per quæ à Deo saluaretur; utique arguendus non esset, nec reus constituendus, quòd ea non faceret quæ facere non posset. Sed nec ea benè illi præciperentur à Domino, per quæ saluaretur, cùm ea nullatenus facere possit. Si autem per opera quæ faceret saluari à Deo posset, quis ambigat quin Deus eum saluare possit, qui tamen numquam saluandus est? Quomodo enim à Deo saluari possit, nisi & Deus eum saluare possit? Quippe quid aliud est eum saluari à Deo,

quàm Deum saluare eum? Si ergo possibile est eum saluari à Deo, quomodo non sit possibile Deum saluare eum? Cùm enim antecedens possibile est, & consequens: quia ex possibili non sequitur impossibile, cùm si constet impossibile esse, ex eo impossibile sequitur. Saluari autem à Deo hunc quis neget antecedens ad Deum saluare eum; cùm videlicet ut diximus idē prorsus sit, hunc qui damnādus est, à Deo saluari, & Deū saluare ipsum? Cùm itaq; possibile sit hūc, qui dānandus est, à Deo posse saluari, quis neget possibile esse & Deum saluare eum? Potest itaq; facere Deus quod nequaquā facturū est. Falsumque omnino esse liquet quod iam suprā astruximus, Deum videlicet ea tantū facere posse quæ quandoque faciat. Alioquin nequaquā de eis quæ facit grates ei referendæ essent, cùm ea quæ dimittere non potest, necessitate magis quadam propriæ naturæ compulsus, quàm gratuita voluntate ad hæc facienda inductus agat. Multa etiam concurrunt testimonia, quæ manifestè Deum asserunt plura posse, quæ tamē nunquam cōplet opere. Vnde & veritas ipsa secundum Matthæum, *An putas, inquit, quia non possum rogare patrem meum, & exhibebit modo mihi plus quàm xii. legiones Angelorum?* Ex quibus profecto Domini Iesu verbis patenter innuitur, quia poterat rogare illud tunc quando non rogabat, neque conueniens rogari erat: vel quia poterat tunc ei Pater exhibere legiones illas, per quas ab inimicis liberaretur, quod tunc minimè oportebat, cùm tunc ad patiendum oportunè veniret, sicut antea prædictum fuerat, vel à Deo dispositum. Vnde etiam consequenter annectit, dicēs: *Quomodo ergo implebuntur Scripturæ, quia sic oportet fieri?* Si ergo vel sic tunc oportebat fieri, quomodo poterat rogare tunc filius, ut non fieret illud; vel Pater disturbare tunc ne fieret, quod tunc disturbari minimè bonū esset? imò tunc fieri oportebat, sicut & dispositum & prædictū fuerat. Ut autem in verbis Domini sententiæ veritas teneatur, nec quicquam à ratione dissonum videatur, tale est quod dicitur: *An putas &c.* Ac si apertè diceretur, numquid ignoras quòd si rogarem Patrem de mea liberatione, non id obtinerē absque dilatione, per tot etiam Angelorum legiones, quot vos estis homines mihi tanquam discipuli adhærentes, & in defensionem meam si possetis parati? Summa inquam sententiæ est: Putas orationem meam in hoc quoque efficaciam non habere?

re, si hoc me à Patre porteret postulare? Iuxta quam quidem expositionis sententiam nequaquam concedendum est, quòd vel tunc Dominus orare poterat quod orandum non erat, vel pater ei in hoc subuenire in quo subueniendū non esset. Conditionaliter quippè, ut exposuimus, magis quàm absolutè idē Domini dictum accipiendum est, non quòd videlicet rogare poterat vel impetrare, sed quod impetraret si rogaret, cū s. eius oratio nullatenus cassa fieri possit. Non itaque ex hoc dominico dicto cogi possumus eum aliquid posse facere quod nunquam faciat de quo potius sentiendum videtur id solummodo eum posse facere quod ab eo fieri oportet. Nihil autem ab eo fieri oportet, quod nunquam ab eo fiet. Alioquin optimè bonus non esset, si quid facere dimitteret, quod à se opportunè faciendum esse præsciret. Qui etiam si mala quæ fiunt disturbare, ne quid etiam nisi opportunè faceret, qui nisi importunè facere posset; profecto non video quomodo consentiens peccatis non esset. Quis enim consentire malo dicendus est, nisi is per quem illud opportunè disturbari potest? Cū autem, sicut & beatus meminit Augustinus, mala etiam fieri bonum sit, quæ Deus quoque optimè ordinat: nequaquam ab eo ea disturbari conuenit, ne fiant quæ ipso etiam attestante fieri necesse est, ac dicente: *Necesse est enim veniant scandala. Vt autem &c.* Cū itaque scandala, quæ bonum est fieri, disturbare opportunè non possit, aut omnino etiam non possit, qui nihil contra rationem potest, profecto nullatenus consentire peccatis dicendus est. Primum itaque atque opportunè de Deo dictum est, quòd ei subest posse cū voluerit, ut s. in singulis faciendis ita eius potestas & voluntas se se comitentur, ut quod velit minimè * possit, nec possit etiam tunc facere, quando ut fiat non vult: veluti modo pluuiam facere nō vult, qui hoc idē fieri non vult modo, quia id modo fieri nō conuenire, nec hoc tempus pluuiæ idoneum censet; quadam utique rationabili de causa, licet nobis occulta. Si igitur pluuiam nunc facere possit aut velit, eo utique tempore id facere potest, aut etiam vult, in quo id eum facere non oportet quod ab omni dissonat ratione. Quantum igitur æstimo, cū id tantū Deus facere possit quod eū facere conuenit, nec eū quicquā facere cōuenit quod facere prætermittat: profecto id

* Aduersus eā
scribit S. Ber-
nard. ep. 190.
& ipse Abae-
lardus retra-
ctat in Con-
fessione suę fi-
dei, quæ habe-
tur in calce E-
pistolarum
eius suprà.

solum eum posse facere arbitror quod quandoque facit, licet hæc nostra opinio * paucos aut nullos habeat assentatores, & plurimum dictis Sanctorum, & aliquantulum à ratione dissentire videatur. Hoc quippè, inquit, astimare, multum derogat diuinæ excellentiæ, ut videlicet id solummodo facere possit quod quandoque facit, & id solum dimittere quod dimittit: cum nos etiam ipsi, qui longe impotentiores sumus, multa etiam facere & dimittere possumus, quæ nequaquam facimus vel dimittimus. Quibus quidem respondeo, non idcirco nos potentiores vel meliores aestimari debere, quia quædam facere possumus quæ ille facere non potest, ut comedere, vel ambulare, vel denique peccare; quod à potentia diuinitatis penitus est remotum, & ab eius dignitate prorsus alienum. Quod denique attinet Deum illa etiam posse facere quæ nunquam faciat, vel quæ hunc facere minimè conueniat. Nam & quod nos quædam facere possumus, quæ facere non debemus, infirmitati potius nostræ quam dignitati ascribendum est, qui omnino meliores essemus, si ea quæ tantum facere debemus, facere possemus, nec quicquam inhonestè à nobis fieri posset. Quod tamen malè faciendi vel peccandi potestatem haberemus, non absque ratione hæc à Deo nobis potestas concessa est: ut si comparatione nostræ infirmitatis ille gloriosior appareat, qui omnino peccare non potest: & cum à peccato cessamus, non hoc naturæ nostræ, sed eius adiutrici gratiæ tribuamus, qui ad gloriam sui non solum bona, sed etiam mala disponit. Sunt verò qui idcirco Deum aestimant ea etiam posse facere quæ non facit, quod certum sit nihil ei posse resistere, si ea etiam quæ non facit vellet facere, iuxta illud: *Voluntati enim eius quis resistet?* Vnde & beatus meminit Augustinus, omnipotens Deus non quia omnia potest, sed quia quæcumque vult potest, nec vllatenus voluntatis eius præpediri potest effectus. Ideoque quicquid vellet necessaridò fieret cum vellet, quia videlicet eius voluntas effectui carere nullatenus posset. Sed hac profectò eorum ratione, & quasi sub quadam voluntatis eius conditione eum etiam posse peccare, vel aliquid inhonestè agere, dicere possemus; cum sit certum nihil etiam ei in hoc resistere posse, si & id facere vellet quod non oporteret. Præterea cum dicunt inde eum omnipotentem dici, quia quicquid vult potest, manifestè ita

eius potestatem & voluntatem consociant, ut ubi deest eius velle, desit & posse. Quod autem superius obiectum est, non posse aliquem saluari à Deo, nisi & Deus saluare eum possit, præsertim cum idem sit aliquem à Deo saluari, & Deum saluare eum, non satis nos constringit. Idem quippè est & loquentem tacere, & eum qui loquitur tacere: nec tamen fortasse ita possibile est loquentem tacere, sicut possibile est eum qui loquitur tacere. Vel cum idem sit id quod est album esse nigrum, & albedinem & nigredinem eidem simul inesse: non tamen ut possibile est id quod est album esse nigrum, ita etiam possibile est albedinem & nigredinē simul eidem inesse. Quid ergo mirum, si ponamus idem esse aliquem, qui nō est saluandus, à Deo saluari, & Deum saluare eum? nec tamen ideo recipiamus Deum posse saluare eum, sicut cōcedimus eum posse saluari à Deo. Quippè cum dicimus eum posse à Deo saluari, ad facilitatem humanæ naturæ possibilitatem reducimus, ac si videlicet diceremus naturæ hominis non hoc repugnare, ut ipse saluetur, qui in se ita mutabilis est, ut tam saluationi suæ quàm damnationi consentiat, & tam hoc quàm in illo modo tractabilem se Deo præbeat. Cum autem dicimus Deum illū posse saluare qui minimè saluandus est, ad ipsam diuinitatis naturam possibilitatem reducimus; ut videlicet naturæ Dei nō repugnet quin eum saluet. Quod omnino falsissimum est. Profsus quippè naturæ diuinæ repugnat id eum facere quod eius derogat dignitati, & quod eum facere minimè conuenit. Hoc quidē modo & cum vocem dicimus audibilē, id est potentem ab aliquo audiri, & aliquem posse audire vocem: & agrum posse excoli ab aliquo, & aliquē posse colere agrum, possibilitatem ad diuersa referimus. Ibi quidem ad naturam vocis vel agri, hīc ad naturam rei vel aptitudinē audire vocem, vel colere agrum potentis. Vnde non necesse est, ut cum vox audibilis sit, hoc est apta ex se ad audiendum ab aliquo, aliquis sit iam aptus ad audiendū eam. Omnibus quippè hominibus surdis existentibus, vel profsus etiā non existentibus vox quælibet huius naturæ esset, ut se audibilem homini præberet, nec quicquā in ea præparandum esset, ut ad audiendum idonea esset, quamuis homo nōdum existeret, qui eam audire posset, vel ad eam audiendā aptus esset. Denique illud quod ex Philosophorum traditione obijcitur, quòd cum antecedens pos-

sibile sit, & cōsequens etiā impossibile esse, ex quo impossibile
 sequitur, nil officit quēadmodū in præcedēti libro diximus, si
 regularū suarū documēta naturis creaturarū intellegim⁹ fuisse
 cōtenta. Vnde cū aliquid possibile vel impossibile dicūt, quā-
 tū ad creaturarū naturas hoc intelligunt, vt videlicet id solum
 possibile dicant, quod nullius creaturæ repugnat naturæ. Cū
 autē dicim⁹, possibile est hoc vel illud Deū facere, ad naturā di-
 uinitatis potius quā creaturarū possibile sumim⁹. Sed & cū idē
 sit Iudicē punire istū, & istū puniri à Iudice, nō tamē cōcedi o-
 portet, vt si iustū sit Iudicē punire istū, iustū etiā sit iustū puniri
 à Iudice: cū videlicet hoc nomē iustū, sicut & possibile, in ta-
 libus significationē variet. Cū enim dicitur, quia iustū est vt
 Iudex puniat istū, hoc institutione legis eū debere ostēdimus.
 Sin autē dicamus istum debere puniri à Iudice, hoc eū meruis-
 se dicimus vt puniatur. Sæpe itaque cōtingit vt secundum legis
 sanctionē Iudex debeat aliquē punire, qui tamē nequaquā pro
 meritis suis debeat ab eo puniri. Veluti cū aliqui falsi testes,
 qui tamē à Iudice refelli non possunt, cōtra innocentē aliquē
 surgūt, & secundū leges eū reum cōuincūt qui reus non est, &
 credi faciūt culpā quæ non est. Vnde accidit vt, sicut dictū est,
 Iudex debeat eū punire, qui tamē non debet puniri à Iudice, &
 hoc agere iustū sit Iudici: quod tamē pati non est iustū illi, hoc
 est debitū. Sicut ergo hīc quāuis idē sit Iudicē punire istum, &
 istū puniri à Iudice: non tamē ideo sicut iustū est Iudicē punire
 istū, quē iustē, vt dictū est, secundū legē punit; ita etiā iustū est
 illū puniri à Iudice eadē ratione, quāuis idē sit aliquē saluari à
 Deo & Deū saluare eū, mirandū non est, si cū hoc possibile
 est, illud nequaquā possibile esse cōcedatur. Puto & ex his quæ
 dicta sunt facilē refelli posse quod de prouidētia Dei vel eius
 volūate circa creaturas obijci posse videtur, vt eū ipse videli-
 cet sine his, quæ ab eterno in se habēt, nō esse potuerit, quia nō
 cōuenerit: nō tamē ponamus res quæ prouisæ sunt, vel quas ef-
 se voluit, idē non potuisse non esse, hoc est ex necessitate eas
 contigisse. Et si enim sine prouidētia fuisse nō potuit, quia nō
 oportuit, ipsamque prouidentia rerū euentū consequi necesse
 sit, non tamē idē res prouisas cōcedi oportet non potuisse nō
 esse. Et si cum sine volūate creandi mundū, vel voluntate mi-
 serādi ponamus non potuisse nō esse, non idē cogendi sumus
 vel mundū, vel ea quæ creata sunt, nō potuisse deesse. Ibi quip-
 pē, sicut jam determinatū est, ad naturā Dei: hīc ad naturā crea-

turarū possibile sumitur. Vnde necesse nō est, vt cūm Deus ex propria natura vel prouidētiā rerū, vel bonā de eis volūtātē habere necesse sit; quia hoc ei videlicet maximē cōuenit; non tamē naturæ earū vt ipsæ sint exigit, quæ omnino nō esse possūt. Quod autē nouissimē opponebatur, nullas s. grates Deo referēdas esse pro eis quæ facit, cūm ea nequaquā dimittere possit, & quadā necessitate id potiūs agat quā voluntate, omnino friuolū est. Hic enim quadā naturæ vel bonitatis eius necessitas ab eius volūtate nō est separata, nec coactio dicēda est, quæ etiā nolēs id facere cogatur. Nā & cū ipsum necesse sit immortalē esse, vel immortalis dicatur, nequaquā hinc diuinæ naturæ necessitas ab eius volūtate disiuncta est, cūm & hoc ipse velit esse quod necesse est ipsū esse, id est quod nō potest nō esse. Si autē ita aliquid necessariō ageret, vt vellet nollet, id facere cogeretur; tunc ei profectō nullæ hinc gratiæ deberētur. Cūm verō eius tāta sit bonitas atq; optima volūtas: vt ad id faciendū non inuitū eum, sed spontaneū inclinēt, tanto ampliūs ex propria natura diligēdus est, atque hinc glorificandus, quātō hæc bonitas eius nō ei per accidēs, sed substantiāliter atq; incōmutabiliter inest. Tātō quippē hinc melior existit, quantō in ea firmitus persistit. Nunquid enim alicui subueniēti nobis grates nō haberemus, si tantæ is pietatis esset, vt cūm nos affligi violēter videret, à subueniēdo abstinere non posset, ipsa cū s. pietate ad hoc cōpellente. Quid est enim nos alicui debere grates pro susceptis beneficijs, nisi nos recognoscere eum à nobis bene meruisse, vel laudandū esse pro his, quæ nobis eius benignitas gratis exhibuit? Prædictis itaq; rationibus, vel obiectorū solutionibus, liquēre omnibus reor, ea solūmodo Deū posse facere vel dimittere, quæ quādoq; facit vel dimittit, & eo modo tātū vel eo tēpore quo facit, nō alio. Quibusdā tamē videtur, nonnullā ipsū facere posse alio modo quā faciat, sed cū tamē sēper eligere eū modū faciendi, qui conuenientior sit. Quod etiā penitus à ratione dissidet, vt videlicet incōueniētiōri modo possit facere quā faciat, vel incōueniētiōrē modū eligere, & cōuenientiorē dimittere. Non enim perfectē bonus est, nisi in omnibus perficiēdis à deo volūtātē optimā haberet: vt singula eo modo fieri vellet, quo cōuenientiūs fierēt. At fortassis inquires, quod si eo tēpore quo aliud facit, illud facere possit, & nō videlicet in alio tēpore, constat eum vno tempore posse quod alio non potest, nec semper eum æqualiter posse omnia, nec sempr æqualiter omnipotentē permanere; sed modo eum quandā habere

potentiam, modo ipsam non habere. Sed si diligenter attendamus, semper æquè omnipotens est, & nullo tempore habet aliquam potentiam quam semper non habeat. Sed dicis: Potuit incarnari olim, quod modò non potest: cùm nullatenus id fieri modo conueniat, & sic potentiam habuit olim quam modo non habet. Ad quod respondeo, Cùm dicimus, Potest facere aliquo tempore quod alio facere non potest, duobus modis intelligi valet: vno quidem vt illa determinatio temporis ad facere applicetur, alio falso, si ad posse ipsa coniungatur. Aliud quippè est dicere, possum modo id facere, id est habeo modo potentiam id faciendi, quandocumque aliud possum id facere modo, id est facere in hoc presenti. Nam & determinatio localis relata ad diuersa diuersos efficit successus. Cùm enim homo vbicumque sit, ibi gressibilis sit, id est potentiam habeat ambulandi, etiam cùm in aquis natat: cùm tamē dicitur, potens est ambulare in aquis, si ad actum ambulandi potius quàm ad potentiam hæc determinatio referatur, vt videlicet intelligamus eum habere potentiam hunc actum exercendi etiam in vndas, falsum est: si autem ad potentiam ambulandi etiam inter aquas habitam, è contrario verū est. Si autem verum est eum hac potentia non carrere etiam inter aquas, licet hanc ibi potentiam exercere non possit: ita non est necesse vel Deum vel aliquem in aliquo tempore carere potentia aliquid faciendi, quamuis eo tempore exercere non possit illam potentiam. Nam & infantulus omninò adhuc debilis ad incedendum, gressibilis tamen iam est, & potentiam iam habet ambulandi quandoque, licet non adhuc in tam tenera ætate. Hac itaque ratione potentia incarnandi Deus priuatus non est quam olim exercuit, licet eam exercere modò idcò non possit, quia eam minimè nunc exerceri conuenit. Nec quisquam vnquam aliqua potentia priuatus dicitur, quem certum sit, si vellet, eam exercere posse, nec eius voluntati quinquam resistere valere. Cùm autem indè omnipotens dicatur, vt suprà meminimus, quia semper quicquid velit possit, semper æquè omnipotens est, cùm semper quicquid velit, certum sit eum complere posse, nec eius vnquam voluntatem aliquo impedimento disturbari posse. Qui etiam sicut omnia semper scit quæ aliquando scit, vel semper vult quæ aliquando vult, nec vnquam aliquam scientiam amittit, vel voluntatem

mutat,

mutat, quam vnquam habuit: ita semper omnia potest quæ aliquando potest, nec vnquam aliqua sua potentia priuatur. Et si enim sciuit olim me nasciturum esse, ne tamen sciat me nasciturum esse *, non tamen idè olim aliquid sciuit quod modo non sciat; sed id de natiuitate mea nunc etiam scit, quod sciebat antequam fieret, licet & tunc & nunc hanc eius scientiam diuersis verbis exprimi oporteret. Quippè quod tunc futurum erat modo peractum est, idèque verba commutata sint ad ipsum designandum i; sicut diuersis temporibus loquentes eandem diem modo per hoc aduerbium cras designamus dum adhuc futura est, modo per hodie dum præsens est, modo per heri cum præterita est. Antequam itaque nascerer, cum sciret Deus me nasciturum esse, eo quidem tempore quo nasciturus eram: nunc quoque nihilominus id scit, s. eodem tempore natum esse: sic & idem de eadem natiuitate mea nunc quoque vult quod tunc voluit: vt videlicet tunc fieret, quando eam fieri ab æterno voluit & sciuit. Et attende, quòd sicuti cum dicimus, Deus scit modo id factum esse, vel vult modo id factum esse; illud modò, ad diuersa coniunctum successum enunciationis mutat: ita etiam vt suprà meminimus, cum dico, potest modo id facere, idem aduerbium coniunctum diuersum successum variat. Potest quippè quod dico, Deus scit modo id factum esse, modo illud tam ad scit quàm ad factum esse referri. Ac si videlicet ita dicatur, quomodo scit hoc factum esse, id est modo habet hanc scientiam quòd hoc factum est, vel scit quòd id modo factum est, quæ longè diuersa sunt. Sic & cum dicimus, quod sic modo quia scit illud modo fieri quod non scit postea fieri, si tam modo quàm postea ad scit referantur, falsum est: Ex eo profectò concedendum esset, quòd illud quoque quandoque scit, quandoque etiam non scit. Si vero ad fieri vtrâque coniungantur, verum est quod dicitur: nec indè annuendum est quòd aliud vno tempore sciat quod alio nesciat. Id est cum huiusmodi aduerbijs hæc verba faciunt, vult & potest, similiter cum eis successum variantia. Si enim dicatur, potest Deus id modo facere, & ad verbum, potest, aduerbia referantur, falsissimum est: quia iam vno tempore quandam habet potentiam, quam alio non haberet. Si verò ad facere vtrâque coniungantur, verissimum est. Et sicut non ostenduntur diuersæ scientiæ cum di-

citur de ipso, quia sciuit olim incarnandum esse, ita & cum dicitur, olim potuit incarnari, & modo potest incarnatus esse, possibilitas ostenditur. Non enim cum dicitur per successionem temporis, Deus incarnatur, & Deus incarnatus est, diuersa quæ fecerit ostendimus, sed pro eodem quod semel fecerit, ista dicuntur. Sic & cum dicitur prius, quia possibile est Deum incarnari, & postmodum dicimus quia possibile est ipsum incarnatum esse; nec diuersum factum nec diuersa possibilitas monstratur, sed pro eodem quod prius erat futurum, & modo est præteritum, vtrumque verè dicitur. Liquet itaque Deum, sicut nec scientia vel voluntate mutari, ita nec etiam possibilitate. O ---- itaque quod semel scit, semper scit, & quod semel vult semper vult: ita & quam semel habet potentiam nunquam deponit. Denique, si more hominum dicamus cum aliud posse vno tempore quod alio non possit, propter hoc videlicet solum quod ei conuenit vno tempore id facere quod non conuenit alio; nulla eius in hoc impotentia vel potentia diminutio est intelligenda cum ad potentiam cuiuslibet minimè pertineat quod ei nullatenus conuenit, vt inde commendari possit, imò è contrario, eius derogaret dignitati.

VI.

Cum autem ad potentiam seu firmitatem diuinæ naturæ ipsa eius incommutabilitas pertineat, de ipsa nunc nobis differendum occurrit, præcipuè cum ex quibusdam quæ ipse operatur, sicut & nos ipsi, variari videatur: cum videlicet aliqua modo faciat, modò ab eisdem completis quiescat. Vnde & de ipso scriptum est, quòd completis operibus suis, quæ sex diebus operatus est, septimò requieuit, hoc est ab operando cessauit. Sicut ergo nos faciendo aliud, & postmodum quiescendo, Physica ratio etiam alterari demonstrat: ita etiam ipse hanc alterationis mutationem videtur incurrere. Cui etiam localis motus videtur abesse, cum modo descendere aliquò, vel transire aliquà dicatur, vel egredi quoquam siue inde regredi describatur. Vnde & in Virginem tam verbum Patris quàm Spiritum sanctum descendisse salubriter tradimus, & veraciter prædicamus. In qua etiam virgine Deus homo factus adeò mutari videtur, vt aliud quàm fuerit factus esse dicatur: quod ad illum substantiæ motum præcipuum, quæ à Philosophis generatio dicitur, pertinere vide-

tur. Non omnino igitur incommutabilis videtur Deus, cum ipse ut dictum est, tam alterationis quàm loci, seu etiam generationis motum suscipere videatur. Sed si diligenter attendamus, nec in his nec alijs ullam mutationis variationem incurrit. Quippè cum dicimus eum aliquid facere, non aliquem in operando motum illi inesse intelligimus, vel aliquam in laborando passionem: sicut nobis accidere solet, sed eius sempiternæ voluntatis nouum aliquem significamus effectum. Cum ergo dicimus eum aliquid facere, dicere est iuxta eius voluntatem aliquid contingere, ut in ipso nihil noui contingat, sed nouum aliquid sicut in eius voluntate fixum permanet, fiat. Vnde benè est illud Philosophicum,

---- *Stabilisque manens dat cuncta moueri.*

Qui etiam cum ab operando quiescere dicitur, consummationem operis eius, non eum ab aliquo actionis motu cessare significamus. Nos autem modo operando, modo cessando permutari dicimur, quia in hoc secundum quandam agitationem membrorum, vel passionem mentis aliter quàm prius nosmetipsos habemus, & in nobismetipsis variamur. Eum verò facere aliquid non aliter intelligimus, quàm eum quandam esse causam eorum quæ fiunt: quamuis ea nulla sua agitatione faciat, ut actio propriè dici queat, cum videlicet omnis actio in motu consistat. Ipsa quippè eius dispositio, quam in mente habuit ab æterno, eius actio dicitur, cum ad effectum perducitur. Nec in ipsa noui aliquid accidit, cum per eam nouum aliquod opus contingit, nec ex ipsa variatur Deus, quam in mente semper æqualiter habet. Ita etiam post rei completionem, sicut ante in eodem proposito dispositionis consistens, ut ita id velit completum, sicut ante voluerat complendum. Sicut ergo sol, cum ex calore eius aliqua calefieri contingit, nulla hinc in ipso vel in calore eius mutato fit, quamuis res inde calefacta sit mutata: ita nec Deus cum aliqua eius noua fuerit disponere, ideo mutari dicendus est, quamuis noui operis vel mutationis rerum quædam ipse sit causa vel auctor. Quod autem nec loco moueri possit, qui Spiritus est, tam Philosophorum quàm sanctorum assertionem docemur, sicut de quantitate tractantes ostendimus cum Gramaticam * scriberemus. Id * f. Dialecticæ.

quippe solum quod locale est, localiter moueri potest, vel localiter alicubi teneri, sicut est corpus. Nihil enim locale est, vel localiter contineri potest, nisi quod sui interpositione circumstantium rerum distantiam interualli potest facere: veluti si alicui continuo corpori stilus vel corpusculum aliquod inseratur, statim per eius interpositionem necesse est aliquam interualli distantiam fieri inter particulas circumstantes, quæ post adinuicem continuatæ fuerant. Si verò albedo vel aliquid incorporeum illis inesset particulis, nulla eorum continuatio ideò deperiret. Nullum igitur incorporeum localiter moueri potest, quia nec localiter alicubi esse potest. Maxime verò Deus, qui vbique per substantiam esse conceditur, non habet quo moueatur localiter, cum vbique sit essentialiter. Moueri quippe localiter, id est de loco ad locum transire non potest, nisi vnum deferendo locum migret ad alium. Nullum autem deferit locum motu locali, qui semper substantiæ suæ præsentia in omnibus est locis. Cum itaque Deus in Virginem venire, aut aliquò dicitur descendere, secundum æquam suæ operationis efficaciam, non secundum localem accessiōnem intelligi debet. Quid est enim aliud eum in virginem descendisse vt incarnaretur, nisi eum vt nostram assumeret infirmitatem se humiliasse, vt hæc quidem humiliatio eius videlicet eius intelligatur descensus? Sic & quotiès aliquò descendere vel venire dicitur Deus, non aliquis eius localis accessus, sed aliquis nouæ operationis effectus ostenditur: qui etiam cum in quosdam venire, vel à quibusdam recedere dicitur, iuxta donorum suorum collationem vel subtractionem intelligitur id, non secundum localem eius aduentum vel recessum; qui vbique, vt dictum est, per præsentiam suæ substantiæ semper existens, non habet quo moueri localiter possit. Quod tamen vbique esse per substantiam dicitur, iuxta eius potentiam vel operationem dici arbitror, ac si videlicet diceretur ita ei cuncta loco esse præsentia, vt in eis aliquid operari nunquam cesset, nec eius potentia sit alicubi otiosa. Nam & ipsa loca, & quicquid est in eis, nisi per ipsum conuentur, manere non possunt: & per substantiam in eis esse dicitur, vbi per propriæ virtutem substantiæ aliquid nunquam operari cesset, vel ea ipsa, vt dictum est, seruando, vel aliquid in eis per seipsum ministrando. Nam et si longas manus Reges

habere dicantur, eò quòd potentiam suã in longinquis exerceant locis; non tamen hoc per substantiam suam facere sufficiunt quod per Vicarios agunt. Sicut ergo anima in corpore per substantiam suam, magis quàm per positum localem dicitur esse, eò scilicet quòd per propriæ vigorem substantiæ ipsum viuificet ac moueat, ac ne in putredinẽ dissoluatur custodiat; sicque per operationem vegetandi ac sentiendi singulis membris tota insit vt singula vegetet, & in singulis sentiat, ita Deus non solum in omnibus locis, verumetiam in rebus singulis per aliquam suæ potentiaë efficaciam semper esse dicendus est: & cum vniuersa moueat in quibus est, nec tamen in eis ipse mouetur, sicut nec anima in corpore, cum singula moueat membra, & singulis tota, vt dictum est, simul præsto sit. Denique quod obiectum est Deum fuisse mutatum cum homo factus est, vt aliud fieret quàm prius esset, ac sic motum illum maximum substantiæ iucurrisset, quæ generatio dicitur, facile eũ refelli si sensum magis verborum quàm verba pensemus. Quid est enim dicere Deum fieri hominem, nisi diuinam substantiam, quæ spiritalis est, humanam, quæ corporea est, sibi vnire personam in vnã? Non enim quod spiritale, corporeum fieri potest, sed in illa vnione personæ Christi, in quo simul diuinitas verbi, & anima & caro, tres istæ naturæ conueniunt, ita vnaquæque harum trium substantiarum ibi propriam retinet naturam, vt nulla earum in aliam commutetur; vt nec diuinitas, quæ humanitati coniuncta est, aut anima fiat aut caro, sicut nec anima vnquam potest fieri caro, quamuis in singulis hominibus vna persona sunt anima & caro. Anima quippè spiritalis quædam & simplex essentia est, caro autem humana res, corporea, & ex membris composita. Ideoque nequaquam hæc illa esse potest, quæ nullas omnino partes in quantitate sui recipere potest. Quod & ipse Dominus patenter aperiens dicit: *Palpate & videte, quia spiritus carnem & ossa non habet, sicut me videtis habere.* Sicut ergo anima & caro in vnã ad inuicem coniunctæ personam, in propriis naturis sic discretæ permanent, vt nequaquam hæc in illam commutetur, alioquin duæ res nequaquam dicerentur: ita & diuinitas humanitati coniuncta, hoc est humanæ animæ simul & carni in vnã personam sociata, nequaquam in eius naturam conuertitur; vt videlicet spiritalis illa substantia Dei,

quæ hominem assumpsit, in illam corpoream commutetur substantiam, cum hoc penitus ipsum permaneat ipsa quod priùs erat. Sic quippè assumpsit nostra, ut non dimitteret sua. Mutatio autem in aliud fieri non potest, nisi esse desinat quod priùs fuerat. Priùs autem spiritualis substantia erat, quæ corpore naturæ coniuncta est, & nunc quoque ut spiritualis permanet non corporea facta est. Cum ergo & nunc sicut ante iuxta ipsam veritatis assertionem spiritus sit Deus, nec umquam quod spiritus est corporeum fiat, aut partes recipiat, quomodo propriè vel Verbum dicitur fieri caro, vel Deus homo, cum Verbum ipsum nunc etiam sit spiritus, quia est Deus, sicut & ante incarnationem fuerat? Homo quippè res corporea est, & membris composita ac dissolubilis. Deus verò nec corporea res est, nec partibus constat ut dissolui possit. Deus igitur nec caro, nec homo esse propriè dicendus est. Alioquin & homo è cōtrariò propriè dicendus esset Deus. Vnde aliquid creatum, vel quod non semper fuit concedi oportet Deum esse, cum videlicet constet hominem creaturam esse, atque initium habere. Absit autem ut aliquam rem Deum esse ponamus, quæ non semper extiterit, aut non semper Deus fuerit. Hoc quippè est Deum nouum vel recentem confiteri. A qua quidem peruersitate Deus nos inhibens, ait: *I/rael si audieris me, non erit in te Deus recens.* Ut igitur expositum est, cum dicitur Deus fieri caro, vel Deus homo esse, sic accipiendum est, ut diuina substantia humane sociari in personam vnā intelligatur, non illa effici cui sociatur; sicut nec anima hominis caro fit cui vnitur, nec in eius naturam conuertitur. Quod diligenter beatus aperiens Athanasius, cum vnitatem personæ Christi in duabus consistentis naturis defenderet, ait de ipso: Qui licet Deus sit & homo, non duo tamen, sed vnus est Christus. Vnus autem non conuersione diuinitatis in carnē, sed humanitatis in Deum. Vnus omnino non cōfusione substantiæ, sed vnitatem personæ. Nam sicut anima rationalis & caro vnus est homo, ita Deus & homo vnus est Christus. Tale est autem quod ait, Deus & homo sunt vnus Christus, non duo Christi sicut anima & caro vnus sunt homo, non duo homines. Quamuis enim diuersitas naturarum in Christo sit, diuinæ scilicet & humanæ; sicut in vno homine anima & caro corporeæ sūt & incorporeæ naturæ; non tamen necesse sit esse duos idcirco Christos

esse sicut nec duos homines, aut diuersitatem fieri personarum sicut est naturarum in vnā personam sibi coniunctarum: licet in suis proprietatibus ita discretarum, vt nequaquam altera substantia in alteram conuertatur propter hanc vnionem personæ. Quod consequenter aperit, dicens: Vnus autem non conuersione diuinitatis in carnem, id est in humanitatē: sed per assumptionem humanitatis à Deo factam. Alia quippe est substantia vel natura, quæ assumpta est, quàm assumens: licet non sit alia persona. Quod rursus exponens ait: Vnus omnino per vnionem personæ, non per confusionem substantiæ: hoc est non per commixtionem substantiarum in vnā naturam, vel per conuersionem alterius substantiæ in alteram. Sicut enim in vno Deo tres personæ sunt & vna substantia: ita e contrario in Christo duæ sunt substantiæ, humana scilicet ac diuina, sed vna in duabus substantiis vel naturis persona. Vnde & superius in eodem Symbolo fidei idem Doctor, cum diuersitatem personarum in vna Dei substantia demonstraret, ait: Fides autem Catholica hæc est, vt vnum Deum in Trinitate, &c. neque confundentes personas, &c. Tunc autem personas confunderemus, id est inuicem permiserimus, si hanc esse illam poneremus, sicut e contrario substantiam Dei separaremus, si in eo diuersas esse substantias teneremus. Quod statim diligenter exponens subdit: Alia est enim persona patris, alia filii, &c. Sicut ergo in Deo vna est substantia, sed diuersæ personæ: ita e contrario in Christo vna est persona, sed diuersæ substantiæ, diuina vt dictum est, atque humana, quarum nequaquam vna in alterā est mutata, sed vtraque propriā naturā retinet in illa vnione personæ, & ambæ in naturis suis permanēt impermixtæ. Nā & singulis totis sic diuersæ partes ad compositionem ipsorum conueniunt, vt tamen in suis naturis sint disiunctæ, quæ quadā aggregatione sunt coniunctæ, velut ossa & caro in humano corpore, vel ligna & lapides in vnius domus cōpositione. Sicut ergo ossa in vno homine carni adherentia, in naturā carnis non trāseunt, nec in vna domo lapides lignis aggregati propriā substantiā mutant vt aliud fiant quàm prius erāt, aut caro animæ sociata aliud quàm caro fit, nec prioris substantiæ naturam - - -: ita nec diuinitas humanitati in vnā personā cōiuncta aliud sit quā prius erat, quāuis aliud sibi in vnitae personæ cōiungat. Secūdū quā quidē vnionē perso-

na, cum Deus homo factus dicitur, aut aliud quam primitus fuerit esse conceditur, non hoc ex mutatione substantiæ, sed vnitate personæ intelligendum: quia videlicet Deus hominem sibi in vnā personam coniunxerit, & rem alterius naturæ in hanc vnionem sibi sociauerit. Non est igitur Deus in aliud mutatus quam fuerit, licet aliud sibi, vt dictū est, in hanc vnionem coniunxerit. Nam nec animæ nostræ cum resumptis corporibus eis in vnā personam sociabuntur, ideo aliud quam erant efficiuntur: quamuis ipsum corpus rursus animando viuificetur, & de inanimato ad animationem promoveatur: vt ex hoc corpus ipsum potius per eam quam ipsa propter corpus mutari dicendum sit. Corpus quippè ex ipsa, non ipsa ex corpore in quendam proficit statum, ab ipso calorem & motum suscipiens, cum ipsa in se ipsum persistat immobilis. Multo minus autem Deus homini vnitus, aliud ob hoc fieri dicendus est, cui nihil conferre creatura potest. Vnde ab omni mutabilitate Deum penitus immumem profiteamur esse. Hæc in præsentiarum de diuina potentia, vel quæ ad eam pertinent, dicta sufficere arbitror.

VII.

N V N C de Sapientia ipsius prosequamur. Hanc alij Verbum, alij Rationem, seu Mentem dixerunt; quasi videlicet vim quandam discretionis ad omnia integrè cognoscenda; vt in nullo eius dispositio possit errare, nihil eam penitus possit latere. Vnde & Dei filius, Dei virtus, & Dei sapientia, hoc est, ea vis diuinæ potentiæ, qua cuncta sapit, hoc est veraciter discernit, vt in nullo, vt dictum est, errare possit, nec quicquam eius obsistere queat cognitioni. Hæc quidem eius notitia siue scientia æquæ futura, sicut præsentia vel præterita comprehendit; & æquæ de his sicut de illis certa semper existit, & quæ ad huc naturæ incognita siue fortuita dicuntur, ei iam penitus certasunt ac determinata. Nihil quippè nisi ex diuinæ dispositionis ordinatione contingere potest. Sicut ergo Deus quod de futuro præordinat ignorare non potest, ita nec eorū euentum potest non præscire. Quæ igitur casu, quantum ad nostram certitudinem fieri dicuntur, & non ex libero prouenire arbitrio, quantum ad ipsum nec casue nec sine libero contingunt arbitrio. Cum enim casum Philosophi describentes dicunt, Casus est inopinatus rei euentus, ex confluētibus causis propter aliud inceptis proueniens; inopinatum quantum
ad

ad nos vel creaturarum naturam intelligunt, non quantū ad diuinæ prouidentię dispositionem. Tale quippè est ac si diceretur: Quod casu euenit, ita contingit, vt ex nulla institutione naturæ prænoscere possemus quod futurum esset. Nam & si ecclypsis solis vel Lunæ præter opinionem nostram sæpius accidant; naturaliter tamen hæc, non fortuitu fiunt: & in rerum præfixum est institutione, vnde hæc scire possemus. At verò cum quis agrum fodiens propter agriculturam thesaurum inuenit, & hæc inuentio fortuita dicitur. Hanc quippè ex diuersis causis propter aliud inceptis contingere constat, & ita vt diximus inopinatè. Ex hoc enim quod thesaurus ibi reconditus fuit, & quod ille agrum fodiebat, cotingit thesaurū inueniri. Ad hanc inuentionem hæc dux causæ conuenerunt, licet propter aliud inceptæ. Neque enim qui thesaurum ibi recondidit hanc intentionem posuit, vt ille eum inueniret; nec ille hac intentione fodiebat vt thesaurum quæreret, sed vt agrum coleret. Vtræque itaque causæ, ex quibus illa inuentio contingit, ad illud spectabant; ideòque casu potius ipsa quàm ex libero arbitrio prouenit. In libero quippè arbitrio, eius rei, quæ inde contingit, intentio præcedit, veluti si deliberem ire ad Ecclesiam, & ita exequar ex libertate arbitrij mei, id quod intendebam perficio. Ideòque id non tam casu quàm ratione fieri dicendum est, neutrum tamen horum naturaliter contingit, sed vtrumque pariter ex aliqua nostra voluntate, non ex aliqua institutione naturæ ad hoc nos compellente, vt magis hoc voluntarium quàm necessarium dicatur. Liberum autem arbitrium diffinientes Philosophi dixerunt, liberum de voluntate iudicium. Arbitrium quippè est ipsa deliberatio siue diiudicatio animi, qua se aliquid facere vel dimittere quilibet proponit. Quæ tunc quidem diiudicatio libera est, cum ad hoc quod proposuerit exequendum nulla vi naturæ compellitur, sed æquè in sua potestate habet tam illud facere quàm dimittere. Vbi ergo ratio animi non est, per quam aliud deliberari possit & diiudicari, an faciendum sibi sit vel dimittendum, æquè vtrumque in nostra sit potestate, liberum nequaquam est arbitrium. Etsi enim bruta animalia quædam per voluntatem suam facere possunt vel dimittere; quia tamen iudicio rationis carent, liberum non habent arbitrium. Si quid etiam tale quid velit ac disponit face-

re, quod in eius non sit potestate, vel quod sine dispositione ipsius æquè fieret, in hoc liberum arbitrium non habet. Verbi gratia, sæpe talia nos facere proponimus, quæ decepti nos posse implere confidimus, & nonnūquam nitimur vel desideramus ut ea fiant, quæ non minus fierēt absque nostro proposito. Veluti si qui diutinis pœnis mori cogantur, & morte ipsa cruciatus finire desiderent, & ad hoc nitantur; nequaquam cum id accidit ex libero suo arbitrio assequuntur, quod videlicet non minus contingeret eis etiam nihil inde præmeditantibus. Et hæc quidem liberi arbitrij diffinitio nullatenus in Deum cadit, sed in eos tantum qui voluntatem mutare, & in contraria possunt deflectere: ut videlicet in eorum sit potestate, id quod eligitur tam dimittere quàm facere. Denique & nonnulli liberum ad hoc reduxerunt arbitrium, ut his tantum ipsi concedant quæ & benè facere & malè possunt. Quorum opinionem beatus quoque Hieronymus secutus Homelia illa de filio prodigo inter cætera sic ait. Solus Deus est, in quo peccatū non cadit, cætera cum sint liberi arbitrij in utriūque possunt suam deflectere voluntatem. At verò qui diligentius liberum arbitriū inspexerit, nulli beneficienti hoc deesse dixerit. Maximè autem Deo, & his omnibus qui tanta beatitudine sunt corroborati, ut iā in peccatū labi nō queāt. Quo enim quisque à peccato remotior est, & ad bonū pronior; tanto in eligendo bonū liberius habet iudiciū, quanto ab illa vltima seruitute peccati, de qua scriptū est, *Qui facit peccatū, servus est peccati*, longius absistit. Generaliter itaque ac verissimè liberū arbitrium dicitur, cum quilibet quod ex ratione decreverit, volūtariè ac sine coactione adimplere valebit. Quæquidē libertas arbitrij tam Deo quàm hominibus æquè indubitanter inest, quicumque tunc voluntatis facultate priuati non sunt, atque his præcipuè, ut diximus, qui iam omnino non possunt peccare. Quāvis enim peccare nequeant, aut à bono quod faciunt minimè se retrahere queant, quia non oportet, non ideo tamen id aliquis coactionis necessitate agunt, quod utique si non vellēt, nequaquam facere cogerentur. Quod & diligenter beatus attendens Augustinus lib. XXI. de Ciuit. Dei his astruit verbis: Sicut prima immortalitas fuit quam peccando Adam perdidit, non posse mori; ita primum liberum arbitrium posse non peccare, nouissimum non peccare posse. Item, certè Deus ipse

nunquid quoniam peccare non potest, ideo liberū arbitrium habere negandus est? &c. Quicquid itaque gerimus, siue fortuito, siue præmeditatè, quia id optimè Deo disponere & providere, cur fieri oporteat agimus, ex libero eius, si nō ex nostro, procedit arbitrio: & quamvis ea casu facimus; nihil tamen quantum ad ipsum casu fit, cuius providentia cuncta præcedit, & ex eius dispositione quicquid agimus contingit. Vnde & præfatus Doctor quæst. LXXXIII. c. XXVI. ita meminit. Quicquid casu fit, temerè fit. Si ergo casu aliqua fiūt in mundo, non providentia vniuersus mundus administratur: Itē, illud bonū cuius participatione sunt bona cætera, non propter aliud, sed per semetipsum bonum est. Quod diuinā etiam providentiam vocamus. Nihil igitur casu fit in mundo. Ac si apertè dicat, Nihil fit quod non ex aliqua providentia saltem diuina proueniat, nec tamē ideo penitus eos errare dicimus, qui casu plurima fieri profiteantur, quantū ad nostrā, vt dictum est, incertitudinem. Qui etiam iuxta Philosophos cū ea naturæ incognita dicunt quæ casu proueniunt, hoc est nullā rei naturā ad hoc præcognoscendū sufficere, vt inde certa queat esse; nullatenus hīc diuinæ maiestatis, sed creaturarū tantum naturam attendunt. Qui etiam cum ea quæ per miracula fiunt impossibilia dicunt, vel cōtra naturā fieri profitentur, vt Virginē parere, vel cæcum vlteriùs videre, profecto ad vsitatum naturæ cursum, vel ad primordiales rerū causas respiciunt, non ad excellentiam diuinæ potentix, quam videlicet constat ex propria natura quicquid decreuit posse, & præter solitū ipsas rerū naturas quocūque modo voluerit permutare. Qui si nūc quoque hominē ex limo terræ formaret, vel feminā de costa viri produceret, sicut in primis actum est parentibus: nemo vtique esset qui contra naturā vel præter naturā id fieri non censeret, eo vt dictū est, quod primordialīū causarū institutio ad hoc minimè sufficere posset, nisi Deus præter solitum propria voluntate vim quandam rebus impartiret, vt hoc inde fieri posset, qua videlicet voluntate & ex nihilo cuncta potuit creare. Ex quo liquidum est, vt iam non semel meminimus, Philosophorum Tractatus, per quos maximè rerum naturæ vestigantur, ita creaturarum naturis, & earum vsu quōtidiano contentos esse, vt summam illam diuinæ potentix naturam, quæ vniuersus imperat naturis, & cuius voluntati obtemperare propriè naturam dicendū est, vix aut nunquam attingere au-

deant, sed omnes earū regulas infra eam; aut extra eā penitus consistere. Vnde cū aliquid possibile vel impossibile, idest naturæ consentire vel repugnare dicunt, iuxta solam creaturarum facultatem, non diuinæ potentiae virtutem hæc metiuntur. Ex quo apparet quā verum sit quod suprà meminimus, in illa videlicet Philosophorum regula, cuius possibile est antecedens, & consequens; eos ad creaturarum tantum nomen accommodare. Quod & fortassis ad sequentia prænotari necessarium fuit, vbi videlicet iuxta illam veterem, vt ait Philosophia, querelam, videntur omnia secundum diuinæ prouidentiae incommutabilitatē ex necessitate cōtingere.

DE quo & nunc nobis superest differere, cū hoc maxime ad diuinam constet sapientiam pertinere. Hæc quippè prospiciendo futura, prouidentia dicitur siue præscientia. Ipsum enim Dei prospicere prouidere est, siue præscire futura, hoc est, omnia quæ futura sunt cognoscere antequā fiant, & ita vt de præsentibus vel præteritis, de his quoque ipsum jam certum existere, sicut dudum superius ratione adhibita confirmauimus. Sed si diligenter ipsos quoque Philosophos reuoluamus, præcipuè verò Aristotelem adeo in rationibus argumentorum discretum, vt indè Peripatheticorum, id est Dialecticorum princeps dici mereretur, inueniemus apud eos, qualiter pseudo-Philosophos refellere possimus, & eorum non rationes, sed sophismata dissoluere, quibus de prouidentia Dei adeo simplicium fidem perturbare solent, vt non solum bona, verum etiam mala necessario prouenire astruant, nec ullatenus à nobis peccata posse vitari; sed necessariò vnumquemque quod deliquerit committere: cū & hoc videlicet à Deo constet prouisum esse, cuius prouidentiam constat nullo modo falli posse. Horū igitur muscipulam disrumpentes, telam illam fortissimam inspiciamus, quam in primo *de interpretatione* Aristoteles orditur, vt eam cōtradictionis proprietatē corroboret etiam in propositionibus de futuro, quā generaliter de omnibus præmiserat, dicens videlicet quod omnium affirmationum & negationum alteram esse veram necesse sit, sicut & alteram falsam. Verbi gratia, nauale bellum est cras futurum, & non est futurum cras: affirmatio & negatio sunt diuidentes. Vnde & alteram earum esse veram, & alteram earum rursus necesse est esse falsam, cū videlicet nec ambæ

simul esse veræ, nec ambæ queant simul esse falsæ; nec vlla sit propositio, quam non veram vel falsam necesse sit esse. Vnde hanc vel illam necesse est esse veram: hoc est necesse est esse bellum tale cras fieri. Quæ quidem verba diuersos successus habentia Aristoteles diligenter determinare nos docens, ut videlicet supradictam contradictionis proprietatē conseruare vbique ac defendere possimus, diligenter nos tandē de prædicatione necessarii tam simplici & absoluta, quàm determinata nos instruit. Dicit itaque quia necesse est nauale bellum cras esse futurum vel nō esse futurum. Non tamen ideò vel nauale bellū cras esse futurum necesse est vel nō cras esse necesse. Hæc quippè propositio, nec esse est nauale bellum cras futurū esse futurum, vel non esse cras futurum, duos habet sensus; vnum quidem in quo hypothetica disiuncta est falsa, ac si ita diceremus, necessarii nomen bis ponentes, Necesse est nauale bellum cras esse futurum, vel necesse est non esse cras futurum: alium verò in quo Cathégorica est vera, habens disiunctum subiectum, & quasi disiunctam in subiecto positam, & necessarii nomen semel positum in prædicato. Ac si videlicet ita dicamus, Nauale bellum cras esse futurum, vel non esse futurum; hoc videlicet totum necesse est, hoc est necesse est ut ipsum cras fiat vel non fiat. Et hoc quidem modo necessarii nomen semel positum & absolutè prædicatum veram reddit enuntiationem; & generaliter ad quaslibet affirmationes & negationes earum prædictio ipsius veraciter applicatur: ut videlicet de singulis dicamus, quia hanc vel illam esse veram est necesse, quod Aristoteles intellexit cū proprietatem assignaret contradictionis: non tamen ideò ad alteram earum necessarii prædicationem absolutè possumus applicare, ut veraciter dicamus quia vel hanc necesse est esse veram, vel illam necesse est esse falsam. Ideo autem absolutè addimus, quia determinatam necessarii prædicationem omnibus huiusmodi veris propositionibus applicari, ipse ibidem edocet dicens: Igitur esse quid est quando est, necesse est: & non esse quod non est quando non est necesse est. Sed non ideò simpliciter dici quia necesse sit. Non enim sic determinata necessarii prædictio simplicem infert, ut quia videlicet necesse est esse dum est, ideò concedi oporteat ut & simpliciter dicatur, quia necesse est esse, hoc est omnino inc-

uitabile quin sit. Ex quo quidem tanti Philosophi tanto documento & rationabili, illud supra memoratum, quod de diuina prouidentia obiici solet, facile refelli potest. Constat, inquit, diuinam prouidentiam falli non posse. ***

Cetera desunt.

PETRI ABAELARDI DE BEATA
VIRGINE

PROSA.

Iudocus Clichtoueus in Elucidatorio Ecclesiastico, Lib. IIII.

Author huius Prosa fuisse dicitur Petrus Abaelardus, vir sua tempestate virtutis & doctrina splendore ac gloria insignis. Et certe modulationis huius elegantia ac gratia facile prodit eum omni fariæ eruditionis fuisse plenissimum.



Itit ad Virginem
Non quemuis Angelū,
Sed fortitudinem,
Suum Archangelum.

Amator hominis.

Fortem expediat,
Pro nobis nuntium
Naturæ faciat
Vt præiudicium,
In partu Virginis.

Naturam superet
Natus Rex gloriæ,
Regnet & imperet,
Et Zona scorix
Tollat de medio.

Superbientium
Terat fastigia,
Colla sublimium
Calcans vi propria,
Potens in prælio.

Foras eijciat
Mundanum principem,
Matremque faciat,
Secum participem,
Patris imperij.

Exi qui mitteris
Hæc dona dicere,
Reuela veteris
Velamen literæ,
Virtute nuntij.

Accede nuntia,
Dic aue cominus,
Dic plena gratia,
Dic tecum Dominus,
Et dic ne timeas.

Virgo suscipias,
Dei depositum,
In quo perficias
Casta propositum,
Et votum teneas.

Audit & suscipit
Puella nuntium,
Credit & concipit,
Et parit filium,
Sed admirabilem.

Consiliarium
Humani generis,
Et Deum fortium,
Patremque posteris
In pace stabilem.

Cuius stabilitas
Nos reddat stabiles,
Ne nos labilitas
Humana labiles,
Secum præcipitet.

Sed dator veniæ,
Concessa venia,
Per matrem gratiæ,
Obtenta gratia,
In nobis habitet.

Natura * premitur
In partu Virginis,
Rex regum nascitur,
Vim celans numinis,
Et Rector superum.

Qui nobis tribuat
Peccati veniam,
Reatus diluat,
Et donet patriam
In arce syderum.

Amen.

FINIS.

* Hic quique
Versus non
sunt in Cliché
rouge



ANDREÆ
QVERCETANI
TVRONENSIS,
NOTÆ

Ad Historiam Calamitatum Petri Abaelardi.

Quæ scripserit Petrus Abaelar-
dus apperietur ac demonstrabi-
tur in Notis.



ANDREÆ
QVERCETANI,
TURONENSIS,
NOTÆ

Ad Historiam Calamitatum Petri Abaelardi.



AGISTRI PETRI] Sic aliquot M S. Co- PAG. 3.
dices quos vidimus. Nec omninò malè meo
iudicio. Nam vt Guillelmus Nangius ait,
Auctor hic, *Magister in Dialectica insignis &*
celeberrimus extitit. Vnde & Petrus Abbas
Cluniacensis, de colloquens in Epistola ad

Innocentium Papam, *Magister Petrus*, inquit, *sapientie vestre,*
vt credo, optimè notus, nuper è Francia veniens per Cluniacum transi-
tum fecit. Item in Epistola ad Heloisam Paracliti Abbatissam,
Mitto etiam, sicut mandastis, Magistri Petri absolutionem in charta
scriptam & sigillatam. Et Necrologium vetus Ecclesie S. Victo-
ris Paris. xi. Kal. Maij obiit *Magister Petrus, &c.* Itemque Paracli-
tense Calendarium, viii. Kal. Ianuar. obiit *Petrus Cluniacensis*
Abbas, cuius concessu habet Ecclesia nostra corpus magistri nostri Petri.

ABAE LARDI] Sed de hoc eius cognomento non benè
sibi constant veteres. Etenim S. Bernardus, Otho Frisingen-
sis, Gaufridus, Robertus Autisiodorensis, & alij, *Abailardum*
nominant, quem Auctor Chronici Archiepiscoporum Seno-
nensium *Abailardum*, Canonicus Turonensis anonymus *Abae-*
lardum, Vincentius Beluacensis *Abelardum* dicunt. Nec maior
etiam inter Scriptores Galicos conuenientia. Siquidè Ioan-
nes Clopinellus Magdunensis, Philippo Pulchro Regi coæ-
taneus, *Abayelart* appellat, quem alter incertus Poëta, qui scri-

psit anno MCCCLXXVII. *Abulart*, & *Calendarium Paraclitem Gallicum*, *Abailarz*. Nos hac varietate non obstante, lectionem antiquorum Codicum retinuimus, & cum Guillelmo Nangio, Ioanne Canonico Regulari S. Victoris, ac quibusdam alijs, *Abaelardum* vocauimus.

HISTORIA CALAMITATVM] Genuimus Epistolæ titulus, & ab auctore ipso præfixus, vti nos docet Petrarcha scriptor grauis & eloquens libro II. de vita solitaria, his verbis: *Iungam tot veteribus Philosophis recentiore vnum, nec valde remotum ab ætate nostra, quàm rectè nescio, sed apud quosdam, ut audio, suspecta fidei, at profectò non humilis ingenij, Petrum illum cui Abailardi cognomen est: qui ut in HISTORIA SVARVM CALAMITATVM longa oratione ipse meminit, inuidie cedens, solitudinis Trecentis abdita penetravit, &c.* Hanc autem & ceteras Epistolas fuisse certis Capitulis distinctas, asserit Ioannes Magdunensis qui legerat, his versibus *Vne merueilleuse parolle*

Qui est écrite és Epistres, Qui bien chercheroit és Chapitres.

PAG. 4.

OPPIDO QVODAM ORIVNDVS, QVOD PALATIVM APPELLATVR] Inde & *Palatinũ* se in scriptis suis Dialecticis quæ penes me sunt, nuncupat. Est autem hoc opidum, ut ipse loquitur, in ingressu minoris Britannię, tribus ferè leucis ab vrbe Nanmetica remotum vulgo *Palais*.

SICVT NATVRA TERRÆ MEÆ, ET GENERIS ANIMO LEVIS, ITA ET INGENIO EXTITI AD DISCIPLINAM FACILIS] Haud longè aliter Otho Frisingensis Episcopus lib. I. de rebus gestis Friderici I. Imper. c. XLVII. *Est enim, inquit, prædicta terra, nempe Britannia, Clericorum acuta ingenia & artibus applicata habentũ, sed ad alia negotia penè stolidorũ ferax, quales fuerunt duo fratres Bernardus & Theodoricus viri doctissimi.* Porro Britanorũ gens est illa, quæ, ut Heuricus Antissiodorensis Monachus scribit, - - - inter geminos notissima clauditur amnes,

Armoricana prius veteri cognomine dicta.

Nec attinet hic referre quæ Plinius, Beda Venerabilis, & alij de Britannis Gallię scripsere. Sunt enim omnibus notissima.

PATREM AVTEM HABEBAM] Berengarium nomine, qui postea ad Monasticam professionem conuersus est, ut ipse Petrus scribit infra.

SIC ITAQVE PRIMOGENITVM SVVM] fortè Radulfum, cuius mentio fit in Calendario Paraclitenſi, hoc modo: *11. Non. Septembris obiit Radulfus Magistri nostri Petri germanus.*

DIALECTICARVM RATIONVM ARMATVRAM OMNIBVS
PHILOSOPHIÆ DOCUMENTIS PRÆTVLI] Primi sui in Diale-
ctica Præceptoris nomen prætermisit, quem tamen Otho Fri-
singensis Rozelinum, & Auentinus Rucelinū quendam fuisse
testatur. Othonis verba sic habēt. *Habuit tamen primò præceptorē*
Rozelinū quendā, qui primus nostris tēporibus in Logica sententiā vocū
instituit. Et Auētini l. vi. Ann. Boior. His quoque tēporib. fuisse repe-
rio Rucelinū Britannū, Magistrū Petri Abelardi noui lycei cōditorē, qui
primus scientiā vocum siue dictionū instituit, & nouam philosophandi
viā inuenit. At qui Britannus huic, veteri & anonymo Frācorū
Historico Cōpendiensis dicitur, & Ioānis etiā cuiusdā in Dia-
lectica potentis Sophistæ discipulus astringitur. Sic enim Histo-
ricus ille, qui fragmentum Historiæ Franc. à Roberto ad Phi-
lippū 1. Regē scripsit. In Dialectica quoque hi potentes existerunt
Sophistæ; Ioannes, qui eandem artem Sophisticā vocalē esse differuit, Ro-
bertus Parisiacensis, Roscelinus Cōpendiensis, Arnulfus Laudunensis;
Hi Ioannis fuerūt sectatores, qui etiā quam plures habuerūt auditores.
Nec tamen propterea suspicandū est hunc Auentino contra-
dicere. Fieri nāque potest vt Roscelinus in Britānia natus sit,
ac potestea Clericus in Ecclesia Cōpendiensi fuerit. Et certē
Beccensis Abbas Anselmus, qui tunc florebat, eum Clericum
nuncupat in Epistola ad Fulconem Beluacensem Episcopū,
his verbis: *Audio, quod tamen absq̃ dubietate credere non possum, quia*
Roscelinus Clericus dicit in Deo tres personas esse tres res ab inuicem
separatas, sicut sunt tres Angeli, ita tamen vt vna sit voluntas & pote-
stas: aut patrē & Spiritū sanctū esse incarnatum, & tres Deos verē posse
dici, si vsus admitteret. Vnde & aliquo modo conijcere licet, cur
Petrus noster illius inter Præceptores suos nō meminit. Nā &
Yuo Carnotensis Episcopus insanas aliquot sententias super
quibusdā Christianæ fidei articulis eum defendisse subindicat
Epist. vii. quāquam non exprimit quales illæ fuerint. Sed de
hac re pluribus ante Conciliū Sueffionēse. Nunc tantū addā
ex Auentino, quòd eo ipso Roscelino auctore duo Aristotelicorū &
Peripateticorum genera esse cœperunt: Vnum illud vetus, locuples in re-
bus procreandis, quod scientiam rerum sibi vendicat; quamobrē Reales
vocantur. Alterum nouum, quod eam diſtrahit, Nominales idē nuncu-
pati, quòd auari rerum, prodigi nominum atque notionum, verborum
videntur esse assertores. In hisce duobus generibus diſidium & bellum
civile est. Illius Thomas Aquinas Italus, & Ioannes Duns Scotus, hu-
ius Vvillelmus Occomensis Anglus, antesignani.

AD GVILLELMVM SCILICET CAMPELLENSEM] Guil-
 lelmus hic primò fuit Archidiaconus Ecclesiæ Parisiensis,
 postea Regularis Canonicus, ac demum Episcopus Catalau-
 nensis, vt infrà videbimus. Eo autem præceptore vsum Abae-
 lardum docet & Otho Frisingensis Lib. 1. de reb. gestis Fre-
 derici I. Imper. cap. XLVII.

MELDVNVM CASTRVM, ET SEDEM REGIAM] Melduni
 siue Meliduni castrum & Comitatum tenuit Burchardus
 Corboliensis Comes ex beneficio Hugonis, Roberti, ac Hen-
 ricus I. Regum. Post ipsum Rainaldus eius filius, Episcopus Pa-
 risiensis, ac Cancellarius Franciæ, Melidunensis Comes fuit,
 vt patet ex tabulis Ecclesiæ S. Dionysij de Carcere. Sed hoc
 mortuo, Comitatus redijt ad Philippum I. Henrici I. filium,
 qui Sedem ibi Regiam constituit, vbi & vita functus est, vt
 testatur Sugerius in Vita Ludouici Grossi, Philippi filij, his
 verbis: *Cumque ferè sexagenarius esset, Regem exuens apud Mi-
 lidunum castrum super fluuium Sequana, presente domino Ludo-
 uico extremum clausit diem.*

PAG. 5.

AD CASTRVM CORBOLII, QVOD PARISIACÆ VRBI VI-
 CINIVS EST] Odo Fossatensis Monachus in Vita Burchar-
 di, meminit Haimonis Comitis Corboili siue Corbolij castri,
 qui ad limina S. S. Apostolorum Petri & Pauli orationis gra-
 tia Romam pergens, ibi in eodem itinere finem vitæ accepit.
 Eo defuncto, Burchardus strenuæ iuuentutis miles, vxorem
 eius nomine Elisabetham, nobili & ipsam progenie exortam,
 sibi coniugio copulauit: & in eo copulæ thalamo Rex Hugo
 castrum Melidunum, atque Corboilum, Comitatumque
 Parisiacæ vrbis illi dedit. Postea, Corboliensis Comes
 effectus est Rainaldus, alius à Rainaldo Burchardi filio, qui
 litteris Philippi I. Regis anno MCXVII. subscripsit. Post Rai-
 naldum Odo frater Guidonis Rubei, de quo Charta S. Mar-
 tini de Campis, & B. Mariæ Longipontis. Refertque Suge-
 rius hunc Stephani Comitis lancea percussum interiisse. Quo
 facto, nepos eius Hugo Creciacensis, filius Guidonis, *Corbo-
 lium castrum, cuius se heredem iactabat, abiurauit Regi Ludouico
 Philippi filio, cum omnibus angarijs, tallijs & possessionibus.*
 Denique Ludouicus junior Ludouico Grossi genitus Adelæ
 vxori suæ terram Corbolij reliquit dotalitij nomine. Docent
 enim hoc litteræ Philippi II. Regis Adelæ filij datæ Corbolij

anno MCLXXX. his verbis. *Philippus Dei gratia Francorum Rex. Nouerint vniuersi presentes & futuri, quod Adela mater nostra dnm terram Corboly nomine teneret dotalitij, Petro Clerico suo beati Exuperij Canonico intuitu seruitij sui donauit domum, quam Isabellis & Bertrannus filius eius vendiderunt Helie Indeo, &c. Vnde patet & Corbolum iam tempore nostri Abaelardi sedem quoque Regiam fuisse, sicut Melidunum.*

PRÆCEPTOR MEVS GVILLELMVS ARCHIDIACONVS PARISIENSIS, HABITV PRISTINO COMMVTATO AD REGVLARIVM CLERICORVM ORDINEM SE CONVERTIT] Hanc in Guillelmo commutationem habitus egregie commendat Hildebertus Cenomanensis Episcopus in Epistola i. quã ad eum scripsit: *De conuersione, inquit, & conuersatione tua letatur & exultat anima mea; illum prosequens actione gratiarum, cuius muneris est quod tandem philosophari decreueris. Nondum quippe redolebas Philosophum, cum ex acquisita Philosophorum sententia, scientiamorum tibi minimè depromeres venustatem, &c. Ingressus est autem Regularem Ordinem in Capella quadam S. Victoris extra urbem Parisiacam, vbi cum aliquibus discipulis Monasterium illud cœpit construere, quod postea Ludouicus Grossus Rex munificè consummauit, ac magnis & opulentis redditibus dotauit. Hoc enim testatur imprimis anonymus, sed vetus Author, qui variarum Abbatiarum initia collegit, & institutores earundem annotauit, his verbis. Eodem tempore Magister Vuillelmus de Campellis, qui fuerat Archidiaconus Parisiensis, vir admodum literatus & religiosus, assumens habitum Canonici Regularis, cum aliquibus discipulis suis extra urbem Parisius, in loco vbi erat Capella quadam sancti Victoris Martyris, cœpit edificare Monasterium Clericorum. Assumpto autem illo ad Episcopatum Catalaunensem, venerabilis Gilduinus eius discipulus primus Abbas ibi factus est. Et sic etiam intelligendum quod paulo post Abaelardus subiungit, *Nec tamen, inquit, hic sua conuersionis habitus aut ab urbe Parisiaca, aut à consueto Philosophie studio eum renouauit: sed in ipso quoque Monasterio, ad quod se causa Religionis contulerat, statim more solito publicas exercuit Scholas. De eo autem iam Catalaunensi Episcopo facto nos alibi plura.**

EXTRA CIVITATEM IN MONTE S. GENOVEFÆ] Mons hic, *Lecutitius* siue *Locotitius* olim dictus, extra muros urbis

Parisiacæ fuit vsque ad annum Christi MCCXI. quo Philippus Augustus F. R. urbem totam, vt Rigordus refert, in circuitu circumsepsit à parte Australi vsque ad Sequanam fluium, ex utraque parte maximam terra amplitudinem infra murorum ambitum concludens, & possessores agrorum & vinearum compellens, vt terras illas & vineas ad edificandum in eis nouas domos habitatoribus locarent, vel ipsimet nouas ibidem domos constituerent, vt tota ciuitas vsque ad muros plena domibus videretur. Vnde & Eugenius III. in Litteris ad Odonem Abbatem S. Genouefæ, dicit Ecclesiam illam adhuc extra Parisiacam urbem sitam anno MCL. Eugenius inquit, *Episcopus seruus seruorum Dei Odoni primo Abbati Ecclesie S. Genouefæ, que secus Parisius est.* Idēque repetit adhuc Alexander III. in alijs ad Albericū Abbatem litteris anno MLXIII. datis. Fuisse autē in hac Ecclesia literarū & Scolarū publicarū sedē, etiam antequā de statu Canonicorū seculariū ad regularem Ordinem mutaretur ope atque industria Suggesti S. Dionysij Abbatis, iniungente eidem domino Eugenio Papa III. & illustri Francorum Rege Ludouico VII. Philippi Augusti patre, significant cum Petrus noster, dicens se ibi Scolarum suarum castra posuisse; tum eo antiquior *Hulbodus* qui sicut fert inscriptio vetus posita in Ecclesia S. Ioānis Baptistæ Leodiensis, dum adolescensulus è scolarī disciplina confugisset Parisius sanctæ Genouefæ Canonicis adhesit, tempore Roberti Regis Francorum, & in breui multarum Scolarum instructor fuit, ubi cū aliquandiu à domino Notgero, Leodiensi Episcopo, ignoraretur, tandem canonica Episcopalis sententiæ executione compulsus est redire, pluribus ibi relictis studiorum ac moralitatis insignibus. Quare & in illius rei memoriam ac velut honorificum testimoniū Cancellarius Vniuersitatis Parisiensis ex sola Canonicorum S. Genouefæ Congregatione longo postea tēpore delectus est, & vsque ad Pontificatum Benedicti XI. Papæ, qui primus auctoritatem ac facultatem parem Cancellario Ecclesiæ beatæ Mariæ Virginis concessit.

PAG. 7.

CARISSIMA MIHI MATER MEA LUCIA] Calendarium Paraclitense, XIV. Cal. Nouembris obiit Lucia mater Magistri nostri Petri.

GVILLELMVS IN EPISCOPATV CATALAVNENSI] De Guillelmo hoc siue Vuillelmo jam Catalaunensi Episcopo mentio fit apud Iuonē Carnotensem, Epist. CCLXVIII. apud S. Bernardum

Bernardum Epist. III. & apud Othonem Frising. lib. I. de rebus gestis Frederici I. cap. XLVII. Fuit autem ex Canonico Regulari S. Victoris assumptus ad Episcopatum ann. CHRISTI MCXII. vt conicere est ex electione Gelduini discipuli eius in Abbatem primum Ecclesiæ S. Victoris, quæ celebrata est anno MCXIII. & onus Episcopale sustinuit annis septem ac mensibus sex. Sic enim tabulæ M S. Catalaunensium Episcoporum, *Guillelmus venerabilis rexit Ecclesiam annos septem, menses sex.* Quibus expletis, demum fato cessit anno MCXIX. die XXV. Ianuarii, sicut ex his Calendarii Victorioni verbis discitur, *VIII. Cal. Febr. Anniversarium Vuillelmi Catalaunensis Episcopi, & nostri Canonici.*

MAGISTER ANSELMVS LAVDVNENSIS] Plures eodem prope tempore Anselmi Laudunenses fuerunt. Historia namque Restorationis Ecclesiæ Laudunensis à Canonico quodam eiusdem Ecclesiæ conscripta, meminit Anselmi S. Vincentij Laudunensis Abbatis, qui cum cænobio suo ferè X. & VII. annis præfuisset, & pro utilitate eiusdem Cænobij Romam profectus fuisset, à Clericis Tornacensibus, qui iam quadringentis annis proprio Episcopo caruerant, mirabili euentu, Deo ordinante ibi repertus in Episcopum electus est, & à Domino Papa Eugenio inuitus & reluctans obedientie vinculo constrictus Pontifex consecratus est, sique per eum Tornacensi Ecclesiæ antiqua dignitas restituta anno ab Incarn. Domini MCXLV. Meminit & Anselmi alterius antiquioris, cognomento Becsi, qui se simulando religiosum non parum ab omnibus laudabatur & honorabatur. Vnde & pro religione sua Thesaurus Ecclesiæ Laudunensis ei seruandus traditus est cum alijs custodibus, quoniam antiqua consuetudo erat eiusdem Ecclesiæ, vt septem custodibus ipse thesaurus committeretur, quorum quatuor Ecclesiastici, tres verò essent laici. Sed vt ex fine patuit longè alius erat in corde quam homines viderent in facie. Videns enim multum sibi ab omnibus credi ex auro & lapidibus preciosis quibus cruces festis diebus super altare ponenda fuerant operte, non exiguam partem furtim discerpens aurifici cuidam vendendi causa tradidit. Denique & tertium Anselmum Laudunensem memorat, qui super hoc thesauri furto iam detecto consultus est à reliquis Ecclesiæ Laudunensis Canonicis, & à ciuibus, tanquam vrbs totius lucerna & lumen. Sic enim idem Author de eo loquitur: *Protinus ergo, inquit, generalis Conuentus Canonorum & ciuium conuocatur, quid opus sit fa-*

etō discuitur, & præ omnibus Magister Anselmus tunc temporis totius urbis lucerna consulitur. Ille ut diuine legis peritissimus continuo Iosue replicat Historiam, quomodo scilicet furtum in Hierico nullo sciente factum dominus iussit sorte perquiri, primò per tribus, deinde per families ac domos, ad ultimum singillatim per viros. Instar humus tam subtilis perquisitionis consulit magister Anselmus, ut tanti facinoris auctor iudicio aque perquireretur, ac de singulis urbis parochiis unus infans innocens in vase aque benedictæ repleto poneretur, & quæcumque parochia sorte culpabilis reperiretur, de singulis domibus eiusdem parochiæ unus infans in aqua poneretur; & quæcumque domus deprehensa fuisset, omnes viri vel feminae ad eam pertinentes iudicio aque se purgare cogerentur. Vnde & patet hunc posteriorem Anselmum; illum ipsum esse Magistrum Anselmum Laudunensem, quem Petrus Abaelardus dicit tunc maximam ex antiquitate auctoritatem tenuisse. Fuit autem idem Canonicus & Decanus Ecclesiæ Laudunensis, non Episcopus ut quidam inconsultè satis scripserunt. Quod ante omnes vel citatus iam Scriptor docet his verbis: *Vir sapientissimus Magister Anselmus tunc temporis Ecclesiæ nostræ Canonicus & Decanus per totum pene orbem Latinum, scientiæ & eloquentiæ suæ fama notissimus. Habuitque inter alios lectionum suarum auditores & discipulos, cum Magistrum Guillelmum de Campellis Archidiaconum Ecclesiæ Parisiæ de quò superius, Petrum nostrum Abaelardum qui fuit & ipse postea Magister celeberrimus, Albericū Remensem, & Lotulfum Nouariensem siue Lombardum, de quibus postea: tum præcipuè Guillelmum Cantuariensem Archiepiscopum. Hoc enim testatur etiam præfatus Ecclesiæ Laudunensis Historicus, cum ait: Nos itaque assumpto Domina nostræ feretro atque reliquijs Cantuariam venimus, ubi tunc erat Archiepiscopus dominus Vvilelmus nobis notissimus, quoniam iam dudum pro audienda lectione Magistri Anselmi Laudunum petens multis diebus in Episcopi dōmo manserat, ibique filios Radulphi Cancellarij Regis Anglorum docuerat. Ex quibus verbis colligere est Laudunensem Ecclesiā tunc fuisse quasi magnum undique studiosorum conuentū; quos ē multis urbibus & regionibus Magistro illi Anselmo discipulos doctrinæ celebris fama contrahebat. Quo autem anno decesserit, & ubi sepultus fuerit, dicetur infra.*

loquens, ad grauissimos viros Anselmum Laudunensem, & Guillelmum Campellensem Catalauni Episcopum migrans, ipsorumque dictorum pondus tanquam subtilitatis acumine vacuum iudicans, non diu sustinuit. Inde magistrum induens Parrhisius venit, plurimum in inuentionum subtilitate, non solum ad Philosophiam necessariarum, sed & pro commouendis ad iocos animis hominum utilium, valens.

PAG. 10.

ADVLESCENTVLA QVÆDAM NOMINE HELOISSA, NEPTIS CANONICI CIVVSDAM, QVI FWLBERTVS VOCABATVR] Vir doctus Papyrius Massonus Lib. III. Annal. hanc Heloisam præstanti ingenio formaque puellam, ait fuisse filiam naturalem Ioannis nescio cuius Parisiensis Canonici. Verum id unde sumperit, non est in promptu, nec certè concordat aut ipsius Abaelardi dictis, aut Calendario etiam Paraclitensi quod recenset obitum Fulberti Canonici Heloisæ auunculi, corruptè tamen sub Huberti nomine, his verbis: VII. Cal. Ianuar. obiit Hubertus Canonicus Domini Heloisæ auunculus. Quin & Fulberti Canonici Parisiensis meminit Ordeicus Vticensis Monachus lib. VII. Historiæ suæ Ecclesiasticæ; quæ ut hunc quoque eundem Heloisæ auunculum fuisse credam, ratio potissimum temporis facit. Regnante, inquit, Ludonico Rege, quidam Canonicus nomine Fulbertus Parisius erat, qui os integrum de spina S. Ebrulfi habebat, quod Capellanus de Capella Henrici Regis Francorum subtraxerat, eique iamdudum pro amoris pignore dederat. Timens autem pro diuersis causis illud habere, Fulcone Presbytero Maulie mediante, accersit Guillelmum de Monstero Priorem Maulie, eique reliquias tradidit deferendas Vticensi Ecclesiæ.

PAG. 13.

VBI APVD SOROREM MEAM] Sorori huic Abaelardi nomen Dionysia, quam reperio decessisse II. Nonas Decembris. Sic enim Calendarium Paraclitensis Cœnobij. II. Non. Decem. obiit Dionysia Magistri nostri Petri germana.

DONEC PARERET MASCVLVM, QVEM ASTROLABIVM NOMINAVIT] Heloisa ipsa scribens ad Petrum Abbatem Cluniacensem, Memineritis, inquit, & amore Dei & nostri, Astralabij vestri, ut aliquam ei vel à Parisiensi, vel alio quolibet Episcopo præbendam acquiratis. Et Petrus Heloisæ respondens. Astralabio vestro, vestrique causa nostro, mox ut facultas data fuerit, in aliqua nobilium Ecclesiarum præbendam libens acquirere laborabo. Gestasse verò & Petri prænomen hunc Astralabium, siue Astrolabium, docet Necrologicus liber Paraclitensis in hæc verba. IV. Cal. Nouemb. obiit Petrus Astralabius Magistri nostri Petri filius.

PAG. 16.

QVID TE CLERICVM ATQVE CANONICVM FACIRE OPORTET] Cuius Ecclesiæ fuerit Canonicus Abaelardus nullibi reperi, nisi fortè Senonensis. Id enim habet Chronicum M. S. Archiepiscoporum Senonensium. *Anno MCXLII. inquit, Magister Petrus Abaulart Canonicus primò maioris Ecclesiæ Senonensis obiit. Canonicus fuit, & post uxoratus. Sed Concilium Prouinciale, quod postea Senonis aduersus eum conuocatum est, huic opinioni locum dedisse quidā suspicantur. Vt ut sit, Clericum siue Canonicum fuisse priusquam uxorem duceret, ipsa etiam eius vxore testante, non dubitandum est.*

PAG. 17.

TRANSMISI EAM AD ABBATIAM QVANDAM SANCTIMONIALIUM PROPE PARISIVS, QVÆ ARGENTEO-
LVM APPELLATUR] Argenteoli, siue Argentolij, aut ut veteres appellant, Argentogili Abbatiam Hermenticus & vxor eius Mummana fundarunt in pago Parisiaco super fluuio Sequanæ, primumque Monachos in ea posuerunt. Sed postea Normannorum incursionibus destructam Adalais Regina coniux Hugonis ac mater Roberti Regum, illam à solo reedificauit, & Monialibus ibi Deo sub Regula sancti Benedicti famulaturis assignauit, uti docet Helgaudus Floriacensis Monachus in vita Roberti Regis, *Mater quoque eius, inquit, Adhelaidis admiranda satis in sancta deuotione Regina, construxit Monasterium in territorio Parisiensi, villa quæ dicitur Argentoilus, ubi numerum ancillarum Dei non minimum sub norma sancti Benedicti viuere paratas adunauit, ad laudem & gloriam bonorum omnium inspiratoris, & sub honore sanctæ Dei genitricis & perpetuæ Virginis Mariæ omnipotenti Domino dedicari & consecrari voluit. Imò & Ecclesiarum ac villarum, quas plurimas eidem contulit Monasterio, confirmationem impetrauit à Roberto Rege. Nam in Chartulario M. S. sancti Dionysij, quod vir multiplici nobilitate & eruditione celeberrimus Iacobus Augustus Thuanus asseruat in sua locupletissima Bibliotheca, tale Præceptum indè fecisse Regem eius filium reperi.*

Donum quod fecit ROBERTVS Rex Monialibus
de Argentolio.

Regis regum nutu Francorum Rex ROBERTVS cum nostris fidelibus cunctis Catholicis palam id fieri volumus. A predecessorum nostrorum cultu, circa sacra Religionis iura constituto, nequaquam deniare volentes, hortamur omnes ad finem beatitudinis tendentes, quatenus

summopere in vigilando auxilientur nobis, ad privilegia erga res Dei
Sanctorumque eius corroboranda; ut recipiant ipsi nobiscum remissio-
nem peccaminum pro huiusmodi re digne exequenda. Precibus ete-
nim nostre genitricis, scilicet ADELAIDIS Regine insignis, cui
prorsus nihil denegare, verum omnimodis deuote inservire debemus,
promoti, super quarundam Ecclesiarum villarumque astipulatione
præcepti, quas* Monialibus Deo famulantibus in Monasterio sanctæ
Mariæ ARGENTOLIO, ob animæ suæ, patris quoque nostri, videli-
cet HUGONIS beatæ memoriæ, atque nostre requiem dedit; libenter
eius voluntati paruiimus, & dictis fauentes, petitionem ipsius idonea
ratione persolvere curauimus. Sunt autem res collatæ hæc. In primis ea
quæ possidebat Argentolio Rex HUGO, donans illa Deo sacratis ini-
bi degentibus. Ad hoc Cauenoilus, ubi haberi æstimantur mansa xxx.
cum Ecclesia in honore sancti Petri. Villa quoque Montiliacus cum
mansis vii. & Ecclesia in honore S. Martini. In Aconiaco verò vico
mansa duo. In Otreuilla similiter duo mansa & dimidium. Inter Al-
nedum & Lisiuillam mansum unum. In Villena ergo mansum. In Sa-
trouilla xx. mansa cum duabus piscationibus. In insula Berliscia, &
in ipsa villa Cornella altera piscatio. In Argentolio mercatum & the-
loneum rotarum atque tensamentum vini. In Lupocurte v. mansa.
Villa Trapas quoque, & quicquid ad eam pertinet cū Ecclesia. Anilecor-
tis verò villa, & quicquid ad eam pertinet cū Ecclesia. Barduneii quo-
que villa, & omnia ad eam pertinentia cū Ecclesia. Monsterolum qui-
dem villa, cum Ecclesia. S. Loanius† villa cū Eccl. & molendino uno, &
cū arpenis pratorum xii. Bratheias villa cū omnibus appendicijs suis
& Ecclesijs. Merlant quoque villa. Carisius quoque villa cum tribus
molendinis atque pratis. Hæc omnia supradicta prædictis Monialibus
data ob amorem Dei & reuerentiam beatissimæ Dei genitricis Mariæ
confirmamus auctoritate, quatenus semper sub plenissima defensione,
& emunitatis tuitione rata permaneant. Ita videlicet ut nullus abhinc
ad causas exigendas, aut freda vel tributa, aut mansiones vel para-
tas faciendas, vel fideiussores tollendos, aut homines eius Ecclesiæ tam
ingenuos quàm seruos, super terram earum commanentes, iniuste di-
stringendos, nec ullos redditus aut illicitas occasiones requirendas
nostris & futuris temporibus ingredi audeat, vel ea quæ supra memo-
rata sunt exigere præsumat. Sed liceat ipsis supradicta sub firmitatis
defensione quieto ordine possidere, ad stipendia earum sine tenus ibi
Deo militantium. Et hanc auctoritatem, ut firmior in Dei nomine
habeatur, à fidelibus quoque sanctæ Dei Ecclesiæ & nostris diligentius

* f quas

† S. Loanius

conseruetur, manu propria subter firmauimus, & sigilli nostri impressione signari iussimus. Actum in Pascha apud S. Dionysium. Anno XII. regni ROBERTI gloriosissimi Regis Francorum, Indict. 1. Franco Cancellarius ex Regio preceptorecognoui, atque subscripsi.

Qualiter autē Monialibus illis expulsis, Argentolii Monasteriū rursus ad Monachos redierit, infra pluribus adnotabitur.

EIS VIDELICET CORPORIS MEI PARTIBVS AMPVTATIS] Quomodo castratus de nocte fuerit Abaelardus, & qualiter omnes Parisiensis ciuitatis ordines ad eum mane congregati, stupuerint, aut quanta se affligerint lamentatione, plagam illam corporis eius plangentes, femina præsertim, optimè quoque describit Fulco Diogilli Prior, in Epistola quam ad eum tunc pro consolatione direxit. Membra, inquit, quieti dederas & sopori, nullique malum inferre parabas; cū ecce manus impietatis & ferramentum exitiale sanguinem tuum innoxium gratis fundere non dubitauerunt. Plangit ergo hoc tuum vulnus & damnum venerabilis Episcopi benignitas, quæ quantum licuit vacare iustitiæ st aduit. Plangit liberalium Canoniorum ac nobilium Clericorum multitudo. Plangunt ciues ciuitatis, hoc dedecus repntantes, & dolentes suam urbem tui sanguinis effusione violari. Quid singularum feminarum referam planctum, quæ sic hoc audito lacrimis, more femineo, ora rigarunt propter te militem suum, quem amiserant, ac si singule virum suum aut amicum sorte belli reperissent extinctum? Tantus ergo omnium luctus extitit, ut melius videaris te debere velle perijisse, quam seruasse quod perijt. Felix se nescit amari. Penè tota ciuitas in tuo dolore contabuit. Habes arram veræ dilectionis in te, quam si prius agnouisses, nullas meo iudicio diuitias illi comparabiles estimares. Nec prætermittenda etiam sceleris tam nefandi vindicta siue iustitia, quam in fine subiungit, his verbis: Nam quidam illorum qui tibi nocuerunt, oculorum priuatione, & genitalium abscissione mutilati sunt. Ille autem qui per se factum abnegat, iam ab omni possessione sua, bonorum suorum comportatione exturbatus est.

PAG. 18.

AMBO SACRVM HABITVM SVSCEPIMVS, EGO IN ABBATIA S. DIONYSII] Notior illa S. Dionysii Parisiorum Antistitis Abbatia, quam ut notis aliquibus indigeat. Petrum autē Abaelardū in ea Monachū induisse testatur vel Guil. Nagius in Chron. sub annū Christi MCXLI. & ante eū. Otho Frisingensis Episcopus lib. i. de rebus gestis Frederici I. c. XLVII. his verbis: Vbi, s. Parisius, occasione quadā satis nota non benè tractatus, Monachus in Monaster. S. Dion. effectus est. Ibi die noctūque lectioni

ac meditationi incubās, de acuto acutior, de literato efficitur literatior.

ERAT AVTEM ABBATIA ILLA NOSTRA SECVLARIS AD- PAG. 19.
MODVM VITÆ.] Attamen & non adeò longè antea Reges
Hugo & Robertus reformationem illius procurauerat
per manū venerabilis Odilonis Abbatis Cluniacensis, quem
Fulbertus Carnotensis Episcopus Archangelum cognominat.
asserit enim hoc imprimis Ademarus Lemouicensis Mona-
chus in Chronico, cum ait. *B. Dionysii Cænobium, quod iam pristi-*
nam Monasticam corruerat Regulam, Rex HVGGO regulari honestate
sicut in Ecclesiis Domini rectum erat, honestius restaurauit per manum
venerabilis ODILONIS Abbatis, & alia sanctorum nonnulla Mona-
steria in decorem pristinae discipline reuocauit. asserit & Iotsaldus
Cluniacensis Monachus in vita S. Odilonis, lib. II. cap. IX. in
hæc verba: *Lutetie Parisiorum proximum est Monasterium S. Dio-*
nyssi Martyris gloriosi corporis honore præclarum. Qui locus à Franco-
rū Regibus Hugone & Roberto viro Dei ODILONI fuerat cōmissus, ut
Monachili Ordine, & doctrina regularis vite prouheretur in melius.
In quo Cænobio aliquando Dei famulus cōmanens vite pabulum & sa-
lutis hauriū facundo ore suis auditoribus ministrabat. Gerebat tunc of-
ficiū Præpositura senior IVO amicus homo, qui bene meritum Pa-
trē obseruare, & colere studebat, &c.

CVIVS ABBAS IPSE, QVO CÆTERIS PRÆLATIONE MA-
IOR, TANTO VITA DETERIOR] Abbat huic S. Dionysii no-
men adā, qui cepit regere Monasterium anno MXCIX Sed v-
trū tā in famis vitæ fuerit, uti scribit hic Abaelardus, haud im-
meritò dubitari potest. Nam & pauperū CHRISTI curam ma-
gnam gessisse, patet vel ex his eius Litteris, quas Tabulæ San-
dionysianæ suggesserunt.

DE quinque modiis annonæ datis ab Eleemosynario
pauperibus

In Dei nomine ego ADAM Dei gratia Monasterij Martyris Christi DIO-
NYSII Abbas, patefieri volo vniuersitati fidelium, quod XIII. nostræ præl-
ationis anno, in terra nostra fames adeò prauauit, ut annona quāuis caro
pretio emenda vix posset inueniri: qua inopia pauperes afflicti & penè
exanimis officinis nostris. multipliciter se ingerebant. Fores verò Do-
mus Eleemosynæ quotidie innumeri irrumpebant, quorum afflictioni
ego & fratres nostri cōdolentes in Capitulum cōuenimus, & qualiter
eorū penurie & defectiōni à nobis subueniri posset tractare cepimus.
Hoc nobis tractantibus, frater IOANNES cui Eleemosynam com-
misseramus, surrexit in medio; dixitque quoniam si Domum

Eleemosynaresque sibi adiacentes ab omni exactione ministerialium S. Dionysii, omnique mala consuetudine liberam esse concederemus, ipse quæreretur V. modios annonæ, & daret subuentioni pauperum. Igitur quod petebat concessi fieri consensu totius Capituli, &c. Huius rei sunt testes, in primis ego ADAM Abbas, qui hanc Cartam fieri precepi, deinde dominus Theobaldus Fossatensis Abbas, Alelmus Prior &c. Actum anno ab Incarnatione Domini MCXI. Indict. IV. Epacta IX. CCVI. Cicl. X. Cl. XIV. L. VI. Kal. Aprilis, Die Pasche IV. Non. April. Luna eius XX. Regnante domino Ludouico Philippi Regis filio, anno regni eius IV. mense Maio.

Quinimo, sunt aliæ quoque ibidem litteræ, quibus pietas & affectus eiusdem erga diuini cultus honorem ac amplificationem elucere videntur, hoc modo.

Donatio Adæ Abbatis beati Dionysii, totiusque Conuentus, de Ecclesia S. Petri ad Ecclesiam S. Pauli.

IN nomine sanctæ & indiuiduæ Trinitatis, Patris & Filij & Spiritus sancti amen. ADAM Dei gratia Abbas Monasterij martyrum Christi Dionysii, Rustici & Eleutherij, Omnibus sanctæ & vniuersalis Ecclesiæ filijs tam presentibus quàm futuris. Notum fieri volo omnium vestrum caritati, quòd ego & Capitulum nostrum, scilicet Ecclesia B. Dionysii communi decreto & fauore dedimus, & manu nostra per clauēs Ecclesiæ super altare posuerimus ad dotem Ecclesiæ quando dedicandæ; dedimus, inquam, basilicæ S. Pauli Ecclesiam S. Petri iuxta se sitam liberam & quietam. Dedimus quoque potestatem ponendi in ea Presbyterum & eijciendi, saluo honore Ecclesiæ nostræ. Huius verò donationis nostræ causa est, ut quotannis Canonici sancti Pauli in nocte natalis beati Dionysii cum processione veniant ad Ecclesiam in qua corpore requiescit, ibique Matutinos festinè decantent ante nostros. Radulfo autem Presbytero de Fossa cognomine, qui præfatam Ecclesiam S. Petri per nos tenebat, dedimus plenam præbendam in refectorio in prima mensa, ut eam plenariam habeat quandiu vixerit. Præbendam quoque panis ac vini, quam ijdem Canonici accipiebant in promptuario, concessimus accipi in refectorio. Qui verò dotem ipsam Ecclesiæ abstulerit, & Radulfo prædicto præbendam sibi à nobis datam subtraxerit quandiu vixerit, diuinæ ultioni & nostro subiaceat anathemati. Actum & datum ac roboratum in Capitulo sancti Dionysii. Anno Incarnati Verbi MCXIV. Indict. VII. Epact. XXIII. concurrente IV. anno Hludouici Regis VII. Signum Adæ Abbatis, S. Alelmi Prioris, &c.

Quare

Quare satis mirari non possum cur Abaelardus etiā subi-
ciat se *intolerabiles* Abbatis illius & Monachorum S. Dionysi,
spurcitiis frequenter atque vehementer, modo priuatim, modo publi-
cè redarguentem, omnibus suprà modum onerosum atque odiosum ef-
fecisse. Nisi forsitan eis, quos postea infensissimos habuit, ali-
qua saltem verborum acrimonia parem gratiam referre vo-
luerit.

AD QUAS QUIDEM TANTA SCHOLARIUM MULTITUDO
CONFLVXIT, VT NEC LOCVS HOSPITIIS, NEC TERRA SUFF-
FICERET ALIMENTIS] Nemo breuius infinitam illam Scho-
larium Abaelardi multitudinem expressit, quàm Chronici
Moriniacensis Scriptor cùm ait: *Petrus Abaelardus Monachus &*
Abbas, vir erat religiosus, excellentissimarum Rector Scholarum, ad
quas penè de tota Latinitate viri litterati confluebāt. Sed quod sum-
matim & vno penè verbo complexus est, id Fulco Diogilli
Prior etiam ante clariùs ac specialius exposuerat. Nam in E-
pistola qua consolatus est eum post castrationem, de discipu-
lis & auditoribus, ab Italia, Germania, Hispania, Anglia,
Flandria, cunctisque Franciæ Prouincijs ad eius Scholas con-
fluentibus sic loquitur, *Roma suos tibi docendos trans mittebat alūnos,*
& que olim omnium artium scientiam auditoribus solebat infundere,
sapientiorē te se sapiēte transmissis Scholaribus monstrabat. Nulla ter-
rarum spatia, nulla montium cacumina, nulla concaua vallium, nulla
via difficilē licet obsita periculo & latrone quominus ad te propera-
rent retinebat. Anglorum turbam iuuenum mare interiaccus & vn-
darum procella terribilis non terrebat; sed omni periculo contempto, au-
dito tuo nomine ad te confluebat. Remota Britannia sua animalia erudi-
enda destinabat. Andegauenses eorum edomita feritate tibi famula-
bantur in suis. Pictaui, Vvascones, & Hiberi; Normannia, Flan-
dria, Theutonicus & Sueuus, tuum calere ingenium, laudare & pre-
dicare assidue studebat. Pretereo cunctos Parisiorum ciuitatem habi-
tantes, & intra Galliarum proximas & remotissimas partes, qui sic à
te doceri sitiebant, ac si nihil disciplinæ non apud te inueniri potuisset.
Ingenij claritate & suauitate eloquij, & lingue absolutioris facilitate,
necnon & scientiæ subtilitate permoti, quasi ad limpidissimum Philo-
sophiæ fontem iter accelerabant. Ac ne quis inter alios de Roma-
nis Scholaribus dubitet, id ipsum testatur & S. Bernardus
licet Abaelardo nostro paulò subinfensior, his Epistolæ
exciii. verbis, *Securus tamen est, nempe Petrus Abaelardus,*

quoniam Cardinales & Clericos Curia se discipulos habuisse gloriatur.
 Et alibi Guidonem de Castello Presbyterum Cardinalem,
 qui postea Celestinus I I. Papa fuit, eius quoque auditorem
 fuisse subindicat. Verum ut Pontificibus Maximis & Cardi-
 nalibus Episcopos etiam aliquos eruditiores ac maioris no-
 minis coniungamus, Petrus ille Nouariensis, seu Lombardus,
 à Lombardia patria cognominatus, idēque postea Parisiensis
 Episcopus, & Magister Sententiarum, lectiones eius præ cæte-
 ris amplexatus est. Denique Gaufridum Antissiodorensē, &
 Berengarium Pictaviensem, de quorum scriptis ac doctrina
 dicetur alibi discipulos illius extitisse manifestius est quam ut
 probationibus indigeat.

PAG. 20.

ACCIDIT UT QVENDAM THEOLOGIÆ TRACTATVM DE
 VNITATE ET TRINITATE DIVINA SCHOLARIBVS NOSTRIS
 COMPONEREM] Tractatus hic ille est quem edidimus ad cal-
 cem Operis, & cui varia nomina passim Abaelardus ipse tri-
 buit. In Epistola enim ad Gaufridū Parisiensem Episcopum
Opusculum de fide sancta Trinitatis appellat; in Commentario su-
 per Epistolam ad Romanos, frequenter *Theologiam suam*, &
 in præfatione Operis, *sacrae eruditionis Summam*, siue *divina*
Scriptura Introductionem. Quod autem Opus illud se compo-
 suisse dicit, ut Scholarium petitioni satisfaceret, qui Trinita-
 tem fidei Christianæ fundamentum, humanis & Philosophi-
 cis rationibus ac similitudinibus edisseri requirebant, & plus
 quæ intelligi quàm quæ dici possent efflagitabant; hæc tamē
 sola non fuisse scribendi causa vel inde colligi potest, quod
 Libro I I. ipsius Operis artic. IV. docet, Hæreses non adeo re-
 pressas fuisse suis temporibus, ut iam nullo fidei fundamento
 esset opus: imò nullos in tantam olim insaniam prorupisse hæ-
 reticos, quanta nonnulli contemporaneorum suorum debac-
 chati essent. Et apertius Artic. præcedenti, *Quicquid*, in-
 quit, *horum quislibet constituat, minor qua me fronte aliquis arguat,*
sic ceterorum de his scribentium providentiam laudet. Nisi forte in hoc
nostrum iam penitus superfluum Tractatum dicat, quod & illorum do-
cumenta sufficiant, & nulla iam ulterius quibus resistendum sit pul-
lulent hæreses, vel nulle de nostra fide supersint dubitationes, quæ
aliquibus rationibus vel ad documentum, vel ad defensionem eius
egere videantur. Atque utinam ita sit: At verò ut innumeram multi-
 tudinem infidelium, quæ extra Ecclesiam est, tam Indorum scilicet

quàm Ethnicorum præteream, quis ita omnes hæreses repressas profiteri audeat, ut iam nulla apud nos fidei sint schismata, nulla ulterius future sint dissensiones? Composuit igitur Librum illum cum Scholaribus, cum ad reprimendos diuinorum librorum magistros hæreticos, qui suo tempore multa Catholicæ fidei vel sanctis doctrinis aduersa non solum tenebant, verumetiam docebant, quorumque unus, inquit art. v. in Francia, alter in Burgundia, tertius in pago Andegauensi, quartus in Bituricensi, pestilentia cathedras tenebant. Imo potissimum aduersus hæresim vnius ex illis scripsit, ut ipsemet declarat in Epistola iam citata ad Gaufridum Parisiensem Episcopum, his verbis: *Relatum est nobis à quibusdam discipulorum nostrorum superuenientibus, quod erectus ille & semper inflatus Catholica fidei hostis antiquus, cuius hæresis detestabilis tres Deos confiteri, imo & prædicare Sueffionensi Concilio à Patribus conuicta est, atque insuper exilio punita, multas in me contumelias & minas euomuerit, viso Opusculo quodam nostro de fide sanctæ Trinitatis, maxime aduersus hæresim præfatam, qua ipse infamis est, conscripto. Et lib. II. ipsius Opusculi, art. vij. Alter quoque, inquit, totidem erroribus inuolutus, tres in Deo proprietates, secundum quas tres distinguuntur persone, tres essentias diuersas ab ipsis personis, & ab ipsa Diuinitatis natura constituit, ut scilicet paternitas Dei vel filiatio siue processiones quedam sint tam ab ipsis personis quàm ab ipso Deo diuersæ. Quis autem fuerit hæreticus iste non diu querendum, si quod Anselmus Cantuariensis Archiepiscopus ad Fulconem Beluacensem Episcopum de Roscelino Abaelardi nostri primo præceptore scripsit attendatur. Sic enim inter cætera de peruersis eius circa Trinitatem erroribus à Rainaldo Remensi Archiepiscopo dampnandis loquitur. Audio, quod tamen absque dubietate credere non possum, quia Roscelinus Clericus dicit in Deo tres personas esse tres res ab inuicem separatas, sicut sunt tres Angeli, ita tamen ut una sit voluntas & potestas, aut patrem & Spiritum sanctum esse incarnatum, & tres Deos verè posse dici si usus admitteret, in qua sententia asserit venerabilis memoria Archiepiscopus Lanfrancum fuisse, & me esse. Quapropter dictum est, Concilium à venerabili Remensi Archiepiscopo Rainaldo colligendum esse in proximo. Quoniam ergo puto reuerentiam vestram ibi præsentem futuram, volo ut instructa sit quid pro me respondere debeat, si ratio exegerit. Et paulo post, Quicumque blasphemiam quam supra posui me audisse à Roscelino dici pro*

veritate asseruerit, siue homo, siue Angelus, anathema est, & confirmando dicam, quandiu in hac persisterit pertinacia, anathema sit, omnino enim Christianus non est. Quid Abaelardi dictis conuenientius, aut affinius dici potest? Attamen quod Anselmus addit hunc Roscelinū asseruisse Lanfrancum, & se, in eadem cum eo fuisse sententia, manifestius adhuc conuincit illum ipsum esse contra quem Petrus noster scripsit. Ait enim idem in præfata Epistola ad Gaufridum, *Hic contra egregium illum præconem Christi Robertum Abrosello contumacem ausus est Epistolam consingere, & contra illum magnificum Ecclesie Doctorem Anselmum Cantuariensem Archiepiscopum adeò per contumelias exarsit, ut ad Regis Anglici imperium ab Anglia turpiter impudens eius contumacia sit eiecta, & vix tum cum vita euaserit. Vult cum infamie habere participem, ut per infamiam bonorum suam consoletur infamiam, nec nisi bonum odit, qui bonus esse non sustinet. Qui ob intemperantiam arrogantie suæ ab utroque regno in quo conuersatus est, tam Anglorum scilicet quam Francorum, cum summo dedecore expulsus est, & in ipsa, cuius pudore Canonicus dicitur, beati Martini Ecclesia, numquam* * *ut aiunt, à Canonicis verberatus, morem solitum seruauerit. Quæ verba faciunt & ad interpretationē alterius eiusdem Anselmi loci, qui scribens ad Urbanum II. Papam, refert se cū Beccense Monasterium regeret præsumptā fuisse à quodam Clerico in Francia talem assertionem: Si in Deo tres sunt persone, una tantum res, & non sunt tres res; Ergo Pater cum Filio & Spiritu sancto est incarnatus. Et postea subiungit illum in Concilio à venerabili Remensi Archiepiscopo Rainaldo errorem suum abiurare coactum. Audisse tamen postea præfatæ nouitatis auctorem in sua perseuerantē sententia dicere, se nō ob aliud abiurasse quod dicebat, nisi quia à populo verebatur interfici. Præterea quæ Petrus Abaelardus de Concilio celebrato Suesfionis, & Anselmus de defensione sententiæ post abiurationē factam dixerunt, eadem quoque omnia Iuo Carnotensis Episcopus Roscelino tribuit his Epistolæ VII. verbis; Iuo Dei gratia Carnotensium humilis Episcopus Roscelino nō plus sapere quam oportet sapere, sed sapere ad sobrietatem. Si esses ouis centesima in deserto perdita, sed gregi iam reddita, sicut exarserat in te zelus meus, quamdiu intellexi te auersum & aduersum; sic requiesceret in te spiritus meus si te cognoscerem ad doctrinā sanam conuersum & reuersum. Sed quia scio te post Concilium Suesfionense in auribus quorundam,*

* f. nonnūquam.

quos mecum bene nosti, pristinam sententiam tuam clandestinis disputationibus studiosissime defendisse, & eandem quam abiuraueras, & alias non minus insanas persuadere voluisse, non potest intrare in cor meum, quod adhuc fidem tuam correxeris, quod mores in melius commutaueris. Denique quod Aduentinus de Roscelino, siue Roscelino scribit, eum auctorem fuisse Nominalium, qui auari rerum, prodigi nominum atque notionum, verborum videbantur esse assertores, ab hac etiam altera, quam Abaelardus aduersario suo obtrudis, obiectione non omnino disconuenit: Hic, inquit, sicut pseudo-Dialecticus, ita & pseudo-Christianus, cum in Dialectica sua nullam rem partes habere aestimat, ita diuinam paginam impudenter peruertit, ut eo loco quo dicitur Dominus partem piscis assi comedisse, partem huius vocis, que est piscis assi, non partem rei intelligere coratur. Quare non mirum, si præfatus Abaelardus nomine designare quis iste esset superfluum duxerit, quem tot singulares notæ singulariter notabilem faciebant. Et hæc quantum ad occasionem componendi Tractatus de Trinitate sufficiant.

QVEM QUIDEM TRACTATVM CVM VIDISSENT ET LEGISSENT PLVRIMI, COEPIT IN COMMVNE OMNIBVS PLVRIMVM PLACERE] Cuius autem vel qualis æstimationis fuerit iste Liber, vnicum etiam S. Bernardi testimonium demonstrare potens est. Scribens enim ad Episcopos & Cardinales Curia Romanæ, Legite, inquit, si placet, Librum Petri Abaelardi, quem dicit Theologie. Ad manum est enim; cum, sicut gloriatur, à pluribus lætitetur in Curia. Et Epistola cxcj. Surrexit à mortuis Liber ille, iam iam extendit palmites suos vsque ad mare, & vsque ad Romam propagines eius. Hæc gloriatio hominis illius, quod Liber suus in Curia Romana habet ubi caput suum reclinat. Sed quia Libri sententiarum Petri Lombardi Episcopi Parisiësis id obtinuerunt, ut soli tandem in publicis Theologiæ Scholis legi, vel ab antiquis retro temporibus meruerint, plurimum adhuc ipsam Abaelardi Theologiam commendasse mihi videbor, si dictum Lombardum ea potissimum in componendis illis Libris vltum fuisse palam fecero. Quod præstare nec difficile, nec aliquibus fortassis ingratum fuerit. Id enim ex Eulogio Ioannis Cornubiensis, ipsius Lombardi discipuli discitur, ubi postquam dixit, Magister Petrus Abailardus in Theologia sua sic disse-

xit: Quid est dicere Deum fieri hominem, nisi diuinam substantiam,

que spiritualis est; humanam, quæ corporea est, sibi unire in personam unam? aliquot interpositis lineis adiungit: *Quod verò à Magistro Petro Abaelardo hanc opinionem suam Magister Petrus Lombardus acceperit, eo magis suspicatus suum, quia Librum illum frequenter p[ro]p[ri]e manibus habebat; & fortè minus diligenter singula perscrutans, ut qui ex usu magis, quàm ex arte disputandi peritiam haberet, falli poterat. Vnde & S. Bernardus ignoranter Abaelardo ipsi Librum Sententiarum attribuit in Epistola cxxxix. Nam ut idem Abaelardus in confessione suæ fidei declarat, numquam Liber aliquis, qui Sententiarum dicatur, à se scriptus reperitur. Verum antequam ad alia transeamus, operæ pretium fuerit hic diffusiohem Operum ac scriptorum omnium huius Abaelardi disquisitionem instituire; præsertim cum Trite-mius & alii, qui de eo locuti sunt, pauca tantum illa recenscant, quæ S. Bernardus attigit.*

Blenthus Operum Petri Abaelardi.

COMPOSUIT igitur Abaelardus primò Dialecticam, cuius meminit initio huius Epistolæ, & Libro iii. Theologiæ suæ. Nam ibi malè Grammaticam habet manuscriptus Codex pro Dialectica, his verbis: *Quod autem nec loco moveri possit qui spiritus est, tam Philosophorum quàm sanctorum assertione docemur, sicut de Quantitate tractantes ostendimus cum Grammaticam scriberemus.* Et hæc Dialectica, siue Logica, propediem in Philosophiæ candidatorum gratiam fauente Deo seorsim excudetur. Præterea scripsit Glosas in Ezechielem Prophetam, & amatoria Carmina, quorum etiam pleraque, sicut ipse ait in eadem hac Epistola, suo tempore frequentabantur ac decantabantur in multis regionibus, præsertim ab eis quos similis vita delectabat.

SCRIPSIT quoque Tractatum siue Librum Theologiæ, de quo iam superius. Item Commentarium in Epistolam ad Romanos, cuius meminit S. Bernardus in Litteris suis ad Innocentium Papā. Nec non & alium Librum, quem ut loquitur idem Bernardus, in scripsit, *Scitote ipsam*. Videturque esse Ethica illa, ad quam Abaelardus ipse quasdam quæstiones remittit in Commentario supradicto. Quod & confirmat Guillelmus Abbas S. Theodoricæ sub finem Libri iii. *Dis-*

putationis quam Hugoni Rothomagensi Archiepiscopo nuncupavit, his verbis: *Scrispsit autem idem Petrus aliud Opusculum, quod Scito se ipsum intitulavit, & suam ni fallor Ethicam appellavit*: quia scilicet in eo plurima de moribus, siue ut S. Bernardi verbis utar, de virtutibus & vitiis moraliter disputavit. Nec dubito quin Librum istum legisset etiam anonymus ille Poeta, qui scripsit anno MCCCCLXXXVI. Nam cum Abaelardus in Commentario suo præfato super Epistolam ad Romanos promississet se de libero arbitrio tractaturum in Ethica, sic dictus Poeta definitionem eiusdem liberi arbitrii protulit ex Abaelardo.

*Pierre Abalard en un Chapitre,
Où il parle de franc arbitre,
Nous dit ainsi en verité,
Que c'est une habilité
D'une volonté raisonnable,
Soit de bien ou de mal prenable.
Par grace est à bien faire encline,
Et à mal quand elle descline.*

Verum hæc Ethica, quamvis diligentissimè perquisita, nec inuenta adhuc nec reperta est.

DENIQUE composuit Abaelardus Historiam Calamitatum suarum, de qua mentionem facit Petrarcha: Plures Epistolas ad Heloisam & alios, quarum aliqua memorantur à Ioanne Clopinello Magdunensi: Regulam & institutionem Sanctimonialium: Expositiones in Orationem Dominicam, in Symbolum Apostolorum, in Symbolum Athanasii: Solutiones Problematum Heloisæ: Sermones per anni Circulum, ad Virgines Paraclitenses, & alia quædam Opuscula quæ nunc primum edidimus: Hymnos etiam Ecclesiasticos, qui reperiuntur in Breuiario Paraclitensi. Necnon Apologeticum pro innocentia suæ excusatione, quem ut alium ab Apologia siue Confessione fidei ab eodem vniuersis Ecclesiæ filiis directam, credam, hæc Orthonis verba lib. 1. de rebus gestis Freder. cap. XLIX. mouent, *Post damnationem, inquit, sui dogmatis, de qua nos postea, ad Cluniacense Cænobium se contulit, Apologeticum scribens, predictorum Capitulorum partim verba, ex toto autem sensum negans, qui sic incipit. Ne iuxta Boetianum illud, præmijs nihil af-*

*ferentibus tempus teratur, ad rem ipsam veniendum est, ut innocentiam meam ipsa rerum potius quam verborum excuset prolixitas. Hæc, inquam, verba me mouent; quia non leguntur in præfata fidei confessione quâ inseruimus pag. 330. huius Operis. Nec inconueniens est cum quoque prolixiorē adhuc alteram pro defensione suæ Theologiæ Apologiam texuisse. Quod & confirmare videtur Guillelmus Abbas S. Theodorici libro 1. suæ Disputationis, cum ait, *Per Apologiam suam Theologiam impeiorat, novos veteribus errores adiungit, & eos pertinaciter & contentiose defendere contendit.* Et Paulo ante, *Ac primò requiro, cur sanctæ Religionis & magni nominis Abbatem insimulet falsò finxisse, quia in Theologia sua scripserit filium esse quandam potentiam, Spiritum sanctum nullam.* Idem in Apologia sua, quam contra Abbatem Petrus ipse dirigit, se dixisse denegat; sed quod diuina sapientia quedam sit potentia Patris, non Filius, & quod Amor Patris & Filij sit nonnulla potentia, non Spiritus sanctus, se dixisse profitetur, & verum esse pertinaciter contendit. At nec Apologiam istam hætenus videre contigit. Hæcque sunt nomina ni fallor quæ Petrus Abaelardus scripsit.*

DVO ILLI ANTIQVI INSIDIATORES, ALBERICVS ET LOTVLFVS] utrique Anselmi Laudunensis auditores, ac in Scholis eius præeminētes ceteris, de quibus & Heloisa Epi. 11. & Otho Frisingensis Episcopus lib. 1. de gestis Freder. c. XLVII. ubi egregios viros & nominatos magistros vocat. Iam enim & ipsi tunc Remis scholas regebant. Sed quæ Abaelardus noster Lotulfum Lombardum, ille Leutaldum Nouariensem dicit. Albericus verò, Remensis cognominatus, à sancto etiam Bernardo laudatur Epist. XIII. ad Honorium Papam, in qua & Episcopus Catalaunensis electus post obitum Guillelmi de Campellis asseritur. S. enim Bernardi confirmationem eius ab Honorio postulantis verba sic habent: *De Ecclesia dico, Domine, Catalaunensi, cuius quantum in me est, nec debeo, nec valeo dissimulare periculum. Videmus nimirum, iam iamque imminere sentimus nos, qui vicini sumus, pacem videlicet memoratæ Ecclesiæ grauiter mox esse turbandam, si electioni illustris illius viri, id est magistri Alberici, in quam utique totus tam Clerus quam populus pari voto & voce conuenerant, & conueniunt, vestra pietatis assensum impetrare nequiuertint.* Verum etsi supplex orauit, non exorauit tamen, ut palam est tum ex tabulis Episcoporum Catalaunensium,

launensium, & Abaelardo; tum ex Epist. LVIII. eiusdem S. Bernardi, qua manifestè docet ebalum Guillelmo successisse. Magister autem Albericus paulo post Leodiensi, Canoniceus effectus est, ut constat ex Calendario S. Victoris Parisiensis ac tandem in Magisterio Scholarum iam senescens Archiepiscopatum Bituricensem obtinuit. Nam id notat Chronologus S. Petri Viui Senonensis ad annum MCXXXIX. *Hoc an. inquit, Ulgrinus Bituricensis Archiepiscopus obiit. Succedit Albericus Remensis.* Et appertius adhuc, Anno MCXLI. *Petrus de Castro Bituricensis ordinatur Archiepiscopus, defuncto Alberico Rhemensis magistro.*

DEFUNCTIS MAGISTRIS GVILLELMO, ATQVE ANSELMO] Decessit Guillelmus Campellensis Episcopus anno MCXIX. ut iam suprà notatum est: Anselmus verò Laudunensis anno MCXVI ut scribit Ioannes S. Victoris Canonicus Regularis in Chronico, *Hoc anno, inquit, obiit vir venerabilis Anselmus Laudunensis Decanus, Magister nominatissimus, litterarum scientia clarus, vir morum honestate, & consilij maturitate venerandus, qui inter cetera opera in Psalterio glosas marginales & interlineares ordinavit.* Quibus verbis addit & aliud Chronicon manuscriptum, *Epistolas quoque Pauli, & alias utriusque Testamenti Scripturas pari modo delineando exposuit, & in eis exponendis atque glozandis iuxta antiquorum Patrum scripta usque ad senilem aetatem desudavit.* De quo dixisse fertur Eugenius Papa, quia Deus spiritum eius suscitauerit ne scriptura periret. Ad Pontificales Cathedras pluries vocatus nullatenus acquieuit. Defunctus autem Lauduni, in Ecclesia S. Vincentii sepultus est, ubi & vnus ex discipulis tali Epitaphio moribus ac meritis congruo tumulum eius decorauit.

*Dormit in hoc tumulo celeberrimus ille Magister
Anselmus, cui per diffusè climata mundi
Vndique notitiam contraxit, & vndique laudem
Sana fides, doctrina frequens, reuerentia morum,
Splendida vita, manus diffundens, actio cauta,
Sermo placens, censura vicens, correctio dulcis,
Consilium sapiens, mens prouida, sobria, clemens.
Sed quas larga Dei concessit gratia doses
Idibus inuisis dissoluit Iulius ater.
Qua vivens vixit comitetur gratia functum.*

HHHHhhh

Hic fratrem habuit Radulfum nomine, qui non mediocri quoque sapientia clarus enituit. *Per hos enim fratres, ut in prefato adhuc Chronico legitur, sed maxime per Anselmum, magna ex parte renixit literalis scientia decus, & intelligentia scripturarum.* Quod & confirmat Canonicus ille Laudunensis coetaneus, qui Cathedralis Ecclesiæ ruinam ac restorationem descripsit, his verbis: *Quemadmodum autem olim Dominus urbem Hierusalem destrui, & filios Israel captiuari permittens, ad consolationem tamen paucorum qui remanserant, Hieremiam Prophetam ibidem cum eis reliquit: Sic nobis in tanta calamitate positis duos sapientissimos viros, prefatum scilicet Magistrum Anselmum, germanumque eius Magistrum Radulfum misericorditer reseruauit; qui tam Clericos quàm laicos dulciter consolantes, & diuersis scripturarum sententijs refouentes, ne in tribulationum aduersitatibus deficerent exhortabantur.*

ARCHIEPISCOPVM SVVM RODVLPHVM ADVERSVM ME COMMOVERVNT] Iuo Carnotensis Epist. cxc. Robertus Abbas ad annum mxciv. Petrus Mauricius Abbas Clun. lib. ii. Mirac. cap. v. & alij plerique Radulphum hunc Archiepiscopum Remensem appellant, quem tamen Sugerius in vita Ludouici Grossi, nec non Aimoini Continuator l. v. c. l. Rodulphum cum Abaelardo nostro dicunt, Lisiardus in vita S. Arnulfi Sueff. Episcopi c. xxxvi. & Nicolaus Monachus in vita S. Godefridi Episcopi Ambian. lib. i i i. cap. xxiv. Rudolphum. Erat autem antea Thesaurarius Ecclesiæ Remensis, & Viridis cognominabatur, ut vel ex hoc vno Petri Cluniacensis Abbatis loco disci potest: *Inter quos, inquit lib. i i. Mirac. cap. v. Mathæus, quendam probatoris vite Clericum, Rhemensis Ecclesiæ tunc Thesaurarium eligens, qui Radulfus nomine, Viridis cognomine dicebatur, ei se specialius religiosa familiaritate deuouit. Dehinc raptò eodem Radulpho, & in Remensem Archiepiscopum assumpto, non deseruit quem elegerat.* Assumptus verò est ad Archiepiscopatum post Manassæ matris Bartholomæi Laudunensis Episcopi auunculum. Sic enim in Historia Laudunensis Ecclesiæ legitur, his verbis: *Electus itaque, nempe Bartholomæus, vniuersi totius Cleri ac populi assensu ad Pontificatum urbis Laudunensis, domino Radulpho Remorum Archiepiscopo, qui prefato Manassæ matris eius auunculo successerat, presentatur, & ab eo multisque alijs Episcopis tempore Paschalis Papæ & Lu-*

*donici Regis Francorum celeberrimè consecratus .omibus desolatis no-
nus Pastor transmittitur. Et apud Robertum de Monte breuiter,
Anno MCXIV. in Remensi Metropoli post Manassè illustrem
virum, exturbato Geruasio Radulphus successit, qui Viridis cognomen
habuit.*

ASCITO CONANO PRÆNESTINO EPISCOPO, QVI TVNC LE-
GATIONE FVNGEBATVR IN GALLIA] Conani huius, siue Co-
nonis, Paschalis II. Papæ Legati meminerunt Nicolaus Mo-
nachus in vita S. Godefrid. Episcopi Ambian. lib. IIII. c. IX.
Sugerius in vita Ludouici Grossi, Robertus Autissiodorensis
ad annum MCXV. Guillelmus Malinesburienfis lib. I. de
Gestis Potif. Angl & alij. Extantque etiam aliquot Goffrid.
Vindocinensis Abbatis, & Iuonis Episcopi Carnotensis E-
pistolæ ad eum scriptæ. Chronicon Vrspergēsis Abbatis Cu-
nonem, & aliquis alius Conum nuncupat. Nec fortasse no-
men id aliud est à Conradi nomine. Nam in Chronico Vize-
liacensi reperitur ad annum MXXIV. *Cono, qui & Conradus, Im-
perator Romæ.* Cono autem hic Episcopus Prænестinus bis in
Gallia sedis Apostolicæ Legatione functus est, semel sub Pas-
chali, anno MCXV. quo tria Concilia celebrauit Beluaci, Rho-
mis, & Catalauni. Sic enim docet nos vetus Chronicon S.
Petri Viui Senonensis, *Anno MCXV. inquit, Factum est Con-
cilium Rheimis VI. Cal. April. Item aliud fuerat celebratum apud Bel-
uacum à Conone Prænestino Episcopo Romana Ecclesiæ Legato. Rur-
sus in eodem anno aliud apud Catalaunum V. Id. Aprilis. Secundò
sub annum MCXX. Callixto II. Pontifice, sicut ex Præcepto
Ludouici Senionis Regis de Ecclesia Cergiacy & rebus perti-
nentibus ad eam patet, his verbis: Communicato cum Palatinis
nostris consilio, ad ipsam sanctissimorum Martyrum, scilicet Dio-
nysij & sociorum, Basilicam cum coniuge nostra accelerauimus, &
præsente venerabili Episcopo domino CONONE sanctæ sedis Apostoli-
cæ Legato, quoniam iure & consuetudine Regum Francorum demi-
grantium insignia regni ipsi sancto Martyri tãquam Duci & Protectori
suo referuntur, Coronam patris nostri ei reddidimus, pro dilatione red-
ditionis satisfacimus, & tam pro salute animæ nostræ, quàm pro regni
administratione, coniugis & prolis cōseruatione Ecclesiam de Cergiaco
sicut liberè possidebamus, cum decimis & omnibus ad Ecclesiã pertinē-
tibus Ecclesiæ restituēdo, ipsis sanctis Martyribus cōtulimus. Et infrà,
Actū publicè anno incarnati Verbi MCXX. regni XII. Adelandis autem*

Regine v. concedente Philippo filio nostro. Quod confirmat & præfatus sancti Petri Viui Chronographus, qui refert & alterum ab eo tunc Beluaci celebratum fuisse Concilium. Anno millesimo centesimo vigesimo, inquit, celebratum est Concilium decimo quinto Calendas Nouembris à Domino Conone Irenestino, Legato trium Prouinciarum, Rothomagensis, Senonensis, & Remensis. Ad quod Concilium Daimbertus Archiepiscopus cum suffraganeis & Abbatibus Beluaco inuitatus est. Quare non dubium quin error sit in Tabulis Arroasianis, vbi Cono hic obiisse dicitur anno MCXVII. v. Id. Augusti. Nec minus perspectum est, id quod scribit Abaelardus non ad primam, sed secundam eius legationem debere referri. Nam & antea præmisit obiit Guillemi Campellensis, qui defunctus est anno MCXIX. & paulo post meminit Gaufridi Carnotensis Episcopi, quem constat anno tantum millesimo centesimo decimo sexto Luoni successisse.

SVB NOMINE CONCILII IN SVESSIONENSI CIVITATE]
duplex eodem ferè tempore Concilium Sueffionis conuocatum est, primum à Rainaldo Archiepiscopo Remensi contra Roscelinū anno MCXV. de quo mentio fit ab Iuone Epist. VII. ab Anselmo Beccensi Abbate Epist. ad Fulconem Beluac. Episc. & ab Abaelardo nostro Epistola ad Gaufridum Episcopum Parisiensem, vt iam antea docuimus. Alterum hoc, anno MCXX. præsidente Conone Sedis Apostolicæ Legato, contra præfati Abaelardi Librum de Trinitate, qui & in eo, nulla sibi respondendi facultate concessa, combustus est. Id enim cum Abaelardus ipse postea, tum Otho Frisingēsis Episcopus asserit lib. I. de reb. gestis Frideric. c. XLVII. his verbis, *Sueffionis Prouinciali contra eum Synodo sub præsentia Romane Sedis Legati congregato, ab egregijs viris & nominatis Magistris Alberico Remense, & Leutaldo Nouariensi, Sabellianus hereticus indicatus, Libros quos ediderat propria manu ab Episcopis igni dare coactus est, nulla sibi respondendi facultate, eò quòd disceptandi in eo peritia ab omnibus suspecta haberetur, concessa.* Vndè & succinctè Bernardus Epistola ad Iuonem Cardinalem, de eodem Abaelardo: *Damnatus est, inquit, Sueffione cum Opere suo, coram Legato Romane Ecclesie.*

PAG. 22.

GAVFREDVS CARNOTENSIS EPISCOPVS] nomine II. Iuonis successor, Apostolicæque postmodum Se-

dis Legatus, de quo plura sanctus Bernardus, & qui vitam eius conscripsit Bernardus alter Bonanallis Abbas. Extant etiam aliquot Gauffridi Vindocinensis Abbatis ad eum Epistolæ.

INDE QVASI REVS ET CONVICTVS ABBATI PAG. 25.
SANCTI MEDARDI, QUI ADERAT TRADITVS]
Abbas his forsitan Anselmus ille qui sub annum Christi M.CXXVIII. Abbas sancti Vincentij Laudunensis, ac tandem anno M.CXLV. Episcopus Tornacensis effectus est: de quo iam nos superius ex Historia Laudunensis Ecclesiæ. Monasterium autem sancti Medardi cœptum est à Clothario I. R. F. apud Sueffionas, & à Sigiberto filio eius expletum atque compositum; vti docet Gregorius Turo-nensis Archiepiscopus lib. IV. Hist. Fr. cap. XX. his ver-bis. *Tempore quoque Clotharij Regis sanctus Dei Medardus Epi-scopus, consummato boni operis cursu, & plenus dierum, sanctita-te precipuus, diem obiit. Quem Clotharius Rex cum summo ho-nore apud Sueffionas ciuitatem sepeliuit, & basilicam super eum fabricare cepit, quam postea Sigibertus filius eius expleuit atque composuit.* Refertque sanctus Gregorius Pontifex Maxi-mus, hoc Monasterium à Ioanne III. prædecessore suo ca-put omnium Monasteriorum & Abbatiarum Franciæ con-stitutum fuisse. Sed quia Litteræ quibus id asseritur, val-de suspectæ sunt, & à multis etiam falsitatis arguuntur, li-bet hîc integram Ioannis III. Constitutionem subiicere; quanquam & ipsa suppositionis, aut saltem adulterationis vitio non caret. Meminit enim inter cetera nominis Ar-chiepiscoporum, quod ante Pipini & Caroli Magni seculum in vlu non fuit. Nec stilus quoque conformis esse vide-tur litteris Apostolicis illius seculi. Quinimo neque Mo-nasticarum foundationum confirmationes à Sede Romana requiri, neque anni Dominicæ Incarnationis publi-cis instrumentis apponi, nisi longo post tempore cœperunt vti docet alicubi doctissimus & illustrissimus Cardinalis Ba-ronius. Est autem Constitutio illa siue Priuilegium Ioan-nis III. cuiusmodi.

Totius orbis Principibus Machinam mundi sub Christo Principe Regentibus, presentibus scilicet & futuris, IOANNES meritorum qualitate infimus, sed Christi gratia sanctæ Romanæ sedis Prelatus. Suum esse, quos diuina fidei & Apostolica maiestatis nobilitas religio, constat, ut fructu operum & effectum rerum certa demonstrent obsequia. Ob hoc diuina inspirante gratia, & præcellentissimi Regis CLOTHARRII suadente clementia, Monasterio sanctæ Mariæ & beati Petri, quod est extra Suefforum ciuitatem situm, ubi Dominus MEDARDVS requiescere, & DANIEL Abbas præesse videtur, hoc priuilegium omnimodis indulgemus, ut terras quas filius noster Clotharius ob salutem anime sue dedit, Cromacum scilicet, Attipiacum, & Aluvis possessionem suam in pago Metensi, cum silua qua vulgo dicitur Pasella salis, cum omni integritate teneant atque possideant, cum terris, domibus, & edificijs & altaribus, habeant, teneant, atque possideant. Hoc quoque auctoritate S. Trinitatis & inseparabilis unitatis vice beati Petri Apostoli coram Rege Clothario & omnibus plebeyjs Francorum, scilicet Archiepiscoporum, Episcoporum, Iudicum, & omni populo Christianorum Romanorum Principum decernimus; ut nullus Regum, Antistitum, Iudicum, terras sanctæ Mariæ & Domini Medardi, siue Ecclesiæ vel altaria, thelonea, decimas, nouas, banna & freda exigat. Nec hoc iniusto præiudicio agitur contra auctorem legum vel Canonum, quia nihil de Canonica auctoritate minuitur, quicquid pro quietis tranquillitate & seruitute Dei ad loca venerabilium Sanctorum conceditur. Statuimus etiam, ut velut hac sedes B. Petri libera constat ab omni seruitio Regum, & omnium potentium personarum, ita remota omni consuetudine pessima omnium Regum, Archiepiscoporum, Episcoporum, Archidiaconorum, siue Iudicum, præfata basilicæ Monachi, Deo vacent, liberi, & per omnia Regule sancti Benedicti actibus obediant sine ulla inquietudine. Præsenti quoque priuilegio hæc illis concedimus licentiã, ut defuncto Abbate, quæcunque voluerint Archiepiscopum, vel Episcopum causa ordinandi Abbatem vocent. Similiter faciant de ordinationibus sacerdotum vel Leuitarum, & ceterorum graduum, quas in suo Monasterio celebrent si volunt, absque ulla cõtradictione Archiepiscopi Rhemorum, & Episcopi Suefforum. Præsenti quoque Abbati, & omnibus successoribus suis inter Missarum sollemnia benedictiones concedimus agere, & predicationem ad populum facere, & reueren sanctæ Mariæ Dei genitricis, & B. Petri Apostolorum Principis, & prothomartyris Christi

Stephani & domni Medardi, quorum honore & meritis ipse locus sacra-
tus refulget. Ad quorum altare venerandum & precipuum, omnes Ec-
clesias & altaria, de omnibus terris quæ collata sunt vel conferentur, fa-
cta præceptione regali, & Apostolica auctoritate causa honoris cōcedimus.
Consecrationes quoque fontium, & scrutinij mysteria semper in ipso ce-
lebrentur Monasterio. Chrismatis quoque ac olei ubicumque libuerit ex-
petant benedictionem, nec ullius occasionis causa vel necessitatis à quo-
quam Rectore tantus honor intermittatur, ne tanta sublimitatis locus
vilescat, quem caput constituimus Monasteriorū totius Gallie, nulliusque
ditioni patimur esse subiectum: sed semper sub Regali custodia positus,
huius sanctæ Romanæ sedis Antistiti auctoritate aduocationem B. Pe-
tri habeat. Caveant autem omnes sanctæ Dei Ecclesiæ successores & Re-
gni gubernatores, ne hoc privilegium irritum faciant, quod Apostolica
auctoritate sancitum, & Regum manibus verè firmatum est, & consen-
su BAUDARIDI Episcopi Successorum factum, in super & septuaginta E-
piscoporum tali anathemate solidatum. Quicumque huius nomine aucto-
ritatis contradictor extiterit, vel fratres in præfata Basilica inquietave-
rit, vel de omnibus rebus ipsi loco concessis vel concedendis aliquid ab-
stulerit, vel aliter ordinaverit, in die revelationis Domini sit anathe-
ma maranatha, & à consortio Christianitatis sequestratus, à corpore &
sanguine Domini nostri Iesu Christi alienus existat. Et cuiuscumque
sublimitatis vel dignitatis sit, honore suo in presenti sæculo priuetur,
& in exilium relegetur, & in futuro sæculo cum Iuda traditore Domi-
ni in pœnis æternalibus damnetur, & cum Diabolo & Angelis eius in
inferno inferiori numquam resurgendus demergatur, nisi sanctæ con-
gregationis animos placaverit, & sanctæ Dei Ecclesiæ ministros sibi re-
conciliaverit. Ego Simplicius Notarius sanctæ Romanæ Sedis subscripsi
& sigillaui. Datum in Ecclesia S. Silvestri, v. Idus Martij, anno Do-
minicæ incarnationis DLXII. indiétione x. Ceterum, quanti fe-
cerint & alij Frācorum Reges post Clotharium, insignē illam
S. Medardi Basilicam, vel id imprimis indicat quod Andreas
Marcianensis Monachus scribit, Ludovicum Imperatorem anno
XI. Imperij sui, impetrasse ab Eugenio Papa corpus S. Sebastiani Mar-
tyris, & Successionis in basilica S. Medardi collocasse, in cuius aduen-
tum multa perpetraverit Deus miracula.

DIONYSIVM AREOPAGITAM CORINTHIORVM POTIVS
QVAM ATHENIENSIVM FVISSE EPISCOPVM] Hæc Bedæ sentē-
tia de Dionysio Arcopagita multis etiam hodie non placet,
qui Dionysium Episcopum Parisiensem esse illū Arcopagi-

tam contendunt. Sed quod allegāt de Innocētio III. qui corpus sancti Dionysij, Corinthiorum Episcopi dedit Monachis S. Dionysij Parisiensis, nec ipsorum opinioni plurimum fauere, nec Abaelardi quoque sensum auctoritate Bedæ suffultum omnino conuincere videtur. Rem sic enarrat anonymus, qui de reliquiis Cœnobij S. Dyonyssij scripsit, Anno, inquit, ab incarnatione Domini MCCXV. INNOCENTIVS sanctæ Romanæ Ecclesiæ Papa III. ad urbem generale Concilium conuocauit, ex omni natione quæ sub Cælo est. Pastores & Prælati sanctæ matris Ecclesiæ; Patriarchæ videlicet, Archiepiscopi, Pontifices, & Abbates; & inferioris gradus & ordinis aliæ personæ, quarum non erat numerus: Reges etiam & principes diuersorū populorum vel per se, vel per nuncios affuerunt. Vir autem venerabilis Abbas beati Arcopagite Dionysii HENRICVS nomine cum ceteris interesse non potuit, quia præcœta ætatis imbecillitas non permisit. Misit autem pro se, & pro Ecclesiâ suâ virum religiosum & honestum HEMERICVM Magistrum Priorem cum aliis personis eiusdem Ecclesiæ, qui se loco sui prout oportuniûs possent Domini Papæ præsentare præsentarent. Celebratum est igitur magnum illud Concilium, in quo tractatum est de fide Catholica, de moribus, & de statu vniuersalis Ecclesiæ, & de rebus alijs quas longum est hic & non necessarium enarrare. Soluta Concilio concessa est singulis licentia recedendi. Dominus autem Papa nolens omnibus palam facere beneuolentiam, & gratiam, atque pium dilectionis affectum, quem erga venerabile Cœnobiũ beati Dionysii & tunc habebat, & semper habuerat, vocauit ad se præfatum Hemericum ac socios eius, & in pignus perpetuæ caritatis dedit eis thesaurum impreciablem, corpus videlicet sanctissimi Dionysij Confessoris Corinthiorum Episcopi, ut ipsum secum, cum honore debito in Franciam transferrent, & ex parte sua Ecclesiæ beati Dionysii cum omni reuerentia præsentarent. Tradidit illis præterea suæ largitionis testimoniales litteras sigillo sanctæ Sedis Apostolicæ roboratas. Illi verò cum condignis gratiarum actionibus, tam nobile, tam sanctum, tam denique venerandum suscipientes depositum, gratuita summi Pontificis exhilarati munificentia, quam citius potuerint in Franciam remeauerunt. Testimoniales autem illæ Innocentij litteræ sic ibidem conceptæ sunt.

Authenticum Innocentij Papæ.

Innocentius Episcopus seruus seruatorum Dei, dilectis filijs Abbati & Conuentui S. Dionysii Parisi. salutem & Apostolicam benedictionē.

Verum gloriosus Martyr & Pontifex Dionysius, cultus venerabile corpus in vestra requiescit Ecclesia, sit ille censendus qui Areopagita vocatur ab Apostolo Paulo conuersus, diuersa sunt sententia diuersorum. Quidam autem fatentur Dionysium Areopagitam in Gracia fuisse mortuam & sepultum, aliumque Dionysium extitisse qui fidem Christi Francorum populis pradicauit. Alij verò asserunt illum post mortem B. Pauli venisse Romam, & à S. Clemente Papa in Galliam destinatum, aliumque fuisse qui mortuus est in Gracia & sepultus. Virūque tamen egregium in opere & sermone præclarum. Nos autem neutri volentes præiudicare sententia, sed vestrum cupientes honorare Monasterium, quod immediatè ad Romanam spectat Ecclesiam, sacrum B. Dionysij pignus, quod bonæ memoriæ P. tit. S. Marcelli Presbyter Cardinalis tunc Apostolica sedis Legatus de Gracia tulit in urbem, vobis per dilectos filios Hemericum Priorem & quosdam alios nuncios Monasterij vestri ad generale Conciliū destinatos deuotè dirigimus: Ut cum vtrasque reliquias habueritis, nulla de cetero remaneat dubitatio, quin sacræ B. Dionysij Areopagitæ reliquiæ apud vestrum Monasterium habeantur. Vos igitur eas reuerenter suscipite, hanc nobis vicissitudinem rependentes, ut in orationibus vestris specialis semper ad Deum commemoratio nostri fiat, & secundum oblationem eorundem nunciorum vestrorum anniuersaria obitus nostri memoria sollemniter celebretur. Omnibus autem qui ad has sacras reliquias venerandas deuotè conuenerint, quadraginta dies de iniunctis sibi penitentij auctoritate Apostolica relaxamus. Nulli ergo omnino hominum liceat hanc paginam nostræ concessionis & remissionis infringere, vel ei ausu temerario contraire. Si quis autem hoc attentare præsumpserit, indignationem omnipotentis Dei, & beatorum Petri & Pauli Apostolorum eius se noverit incursum. Data Laterani pridie Non. Ianuar. Pontificatus nostri anno XVIII.

Verum quod attinet ad Abaelardum, cum fratres eius grauiter ei comminarentur, & de eo vindictam sumere vellent, quod eorum Patronum Areopagitam fuisse denegasset, aliquando tandem palinodiam cantare compulsus est. Epistolam enim direxit Adæ Abbati suo, Aduersus eos, qui ex auctoritate Bedæ Presbyteri arguere conabantur Dionysium Areopagitam fuisse Dionysium Corinthiorum Episcopum, & non magis fuisse Atheniensem Episcopum. Quam tamen & per dubitationem conclusit, his verbis: Denique, ut hanc litem variarum sententiarum pacatissimo sine sopire penitus valeamus, facile fortassis, si duos Dionysios Corin-

thiorum Episcopos, extitisse ponamus, & Bedam veracem poterimus tenere, & nihil per opinionem accipere: ita quidem ut unus ex Dionysijs Corinthiorum Episcopis, & Dionysius Areopagita idem sit de quo Beda scribit, & in diuersis temporibus idem Athenis & Corintho præesset Episcopus, & postmodum à S. Clemente Galliarum sit ordinatus Apostolus: alius verò ex Dionysijs Corinthiorum Episcopis, ille fuerit Dionysius, de quo Ecclesiastica Historia & Hieronymus meminerunt. Quicquid sit, non multum curandum est, ut inquit idem Abaelardus, utrum ipse Dionysius Episcopus Parisiensis Areopagita, an aliunde fuerit, dummodo tantam apud Deum adeptus sit coronam.

PAG. 26. AD TERRAM COMITIS THEOBALDI] Theobaldus hic, siue Theobaudus, II. fuit eius nominis, Comes Tricastinæ ciuitatis & Pruuii, qui decessit anno MCLI.

PAG. 27. IN CASTRO PRUVINI MORARI COEPI, IN CELLA VIDEL. QUADAM TRECENSIVM MONACHORVM.] Cellam S. Aygulfi intelligit, quam Theobaldus I. instituit apud Pruuium, & in ea Monachos S. Petri Trecensis posuit anno Christi MXLVIII. ut ex Henrici Regis diplomate patet, his verbis: *Quidam summe nobilitatis Comes Teobaldus nomine nostra serenitatis adiit presentiam, rogans & obnixè postulans, ut sibi in quadam Ecclesia, sancti videlicet Aigulphi sub Pruuiensi oppido sita, quam de nobis beneficosè tenebat, liceret Monachos de Monasterio domni Petri Trecassini Cellensis cognominati primitiue ponere, & ad Dei seruitium perpetualiter, & continuè, quod inibi prius negligenter agebatur, administrandum destinare, &c.* Porro tabulæ S. Genouefæ Parisiensis mentionem etiam faciunt, *nundinarum sancti Aigulfi apud Pruuium*, anno MCCXX. Nec extra rem sunt aliæ quoque Paracletensis Chartularij litteræ, quibus *Frater Felix humilis Abbas Monasterij S. Petri de Cella Trecensis, & Guichardus prior S. Aigulphi de Pruuiino* memorantur sub annum Christi MCCLXXI.

ABBAS AUTEM IN HAC OBSTINATIONE RECEDENS, POST PAUCOS DIES DEFUNCTVS EST.] Adam scilicet, siue Adamus S. Dionysij Abbas, de quo iam superius. Decessit autem anno MCXXIII. ut ex electione successoris eius mox apparebit.

CVI CVM ALIVS SVCESSISSET] Successor hic Adæ fuit Sugeri, tunc absens. Residebat enim apud Callixtum II. Papam, missus à Rege Ludouico Grosso pro quibusdam regni Franciæ negotijs. Quod ipse docet in vita Ludouici Regis dum ait, *Occurrit*

subito puer familiaris, qui meos meque recognoscens, letus & tristis, Domini nostri bonæ memoriæ Abbatis Adæ antecessoris decessum denunciat, communemque de persona nostra pleno Conuentu factam electionem. Electumque eodem quo decessor eius Adam defunctus est anno, nempe MCXXIII. subindicat etiā alibi. Nā in præcepto de hominibus villæ beati Dionysij, quos postea libertati tradidit, annum Christi MCXXV. administrationis sue tertium numerat, his verbis, Actum in Monasterio b. Dionysij in generali conuentu, presidente domino Suggestio venerabili Abbate eiusdem Monasterij, tertio administrationis eius anno, Incarnationis autem Dominicæ MCXXV. die Dominica Idus Martij, Luna VII. Ind. III. Epacta XIV. concurrente III. regnante Ludouico glorioso & illustri Francorum Rege, XVII. administrationis sue anno, & presentem condonationem confirmante. Ego Suggestus Abbas subscripsi. & infra, Ego Gregorius domini Suggestij Abbatis Cancellarius relegi & subscripsi.

CONVENI EVM CVM EPISCOPO MELDENSI] Nondum bene mihi constat quis hic Meldensis Episcopus. Et tamen aut Burchardum, aut Manassemeius successorem affirmare possum. Nā in tabulario S. Martini de Campis inuenio Burchardum adhuc superstitem anno MCXXII. Episcopatus sui tertio, Manassem verò iam cœpisse regere Meldensem Ecclesiam anno MCXXV. quo Ecclesiam de Chosiaco S. Martino dedit, cum candelis de festiuitate B. Mariæ, cum tortellis de festiuitate S. Stephani, cum XVIII. denarijs infra XII. dies Natalis Domini à Presbytero persoluendis, cum decimis tam maioribus quam minoribus ad eandem Ecclesiam, & ad Capellam de Marrolijs pertinentibus. & consilio etiam domini Gaufridi Carnotensis Episcopi, XL. solidos singulis annis à Presbytero de beneficijs eiusdem Ecclesiæ persoluendos.

STEPHANVS QUIPPE REGIS TVNC DAPIFER] Nec hinc certè magis præcisa tēporis illius definitio potest erui. Nam & Stephanus Dapifer, Regis Ludouici litteris etiam anno MCXX. atque MCXXII. subscripsisse legitur in archiuis S. Dionysij. Quare prætermissa disquisitione ista, vidēdum iam potius quis fuerit hic Dapifer siue Senescallus Stephanus. Hugo de Clerijs in cōmentario de Maioratu & Senescalcia Franciæ Comitib. olim Andeg. hereditaria, docet fuisse Stephanum de Garlanda Guillelmi de Garlanda Dapiferi successorem, his verbis: *Guillelmus de Garlanda tunc Franciæ Senescallus recognouit in illo collo-*

quo hominum se debere Comiti Fulconi de Senescalcia Francia, & inde fuit in voluntate Comitis. Post Guillelmum fuit Senescallus Stephanus de Garlanda, qui fecit hominum Comiti. Sed quod Author ille non prodit, alibi didici, nempe Stephanum eundem Guillelmi de Garlanda, nec non Anselmi vel Anselmi Dapiferi, Gillebertique Buticularij fratrem fuisse. Sic enim asseritur in Charta Ludouici Grossi, foundationem B. Mariæ de Gornaio confirmantis, quæ quanquam prolixa, non incongruè tamen hîc apponi poterit, cum præsertim ad illustrandum Authoris nostri locum maximè faciat. Sic igitur se habet.

Charta Ludouici Grossi.

EGO LUDOVICVS Dei dispensante misericordia in Regem Francorum sublimatus, Notum fieri volo cunctis fidelibus tam futuris quàm instantibus, quod Ecclesiam sanctæ Dei genitricis Mariæ, sanctique Ioannis Euangelistæ super Matronam fluvium iuxta Gornaïum castrum sitam, GUIDO Rubens, & uxor eius ADHELIDA pari ab ipso fundamento deuotione construxerunt. Et cum multa illi contulissent beneficia, eam cum omnibus ad ipsam pertinentibus Monachis S. Martini de Campis perpetuo habendam concesserunt. Ut autem eorum dona, quæ prædictæ Ecclesiæ dederunt, ab aliorum beneficijs distinguamus, eadem dona nominatim subscribi præcipimus. Primum eorum donum Monachis S. Martini de Campis, ut dictum est, collatum hoc est. Præfata Ecclesia cum suis clausuris, & cum omni adiacente ambitu, Capella de Gornaio, terra de Luabum, molendinum apud Gornaïum. Apud Russiacum Ecclesia cum atrio, & tertia parte eiusdè villæ. Hæc sunt specialiter Guidonis & uxoris suæ Adelaydæ dona prædictis Monachis ab eisdem collata. Cunctis præterea innotescere volumus, quod ANSELLVS de Garlanda dapifer noster suprædicto Monasterio tribuit apud Russiacum duas eiusdè villæ partes, & sic totam omnino villam concessit Monachis excepto nemore, & ipsum nemus eisdem Monachis & eorum hospitibus ad ardendum & hospitandum, & ad propriæ necessitatis usum. Nusiellum quoque, Ecclesiâ scilicet, & quicquid ad illam pertinet, cum hospitibus, terris, pratis, vineis, cum nemore & molendino, sicut Monachi ea possident, illi donauit. Decimam insuper de Bercorellis, & duas partes decimæ de Bercherijs. Tertiam verò partem cum atrio BALDVINVS de Claciaco Monachis dedit assensu Anselmi Dapiferi nostri. Totam quoque decimam de Ponteuze, & apud Torciacum medietatem decimæ, quæ dicitur S. Mar.

ini, & Ecclesiam Eſſonia cum atrio & decima, Anſelmus eidem Monasterio contulit. Hoſpites verò in eodem atrio commanentes STEPHANVS frater eiusdem Anſelmi ei Monasterio conceſſit. Apud Canoilum quicquid ALBERTVS de Bri, Ecclesiam ſcilicet cum decima, prata, & terram, & nemus Monachis præſati Monasterij conceſſit, ipſo Anſello annuente, ex cuius ſeodo habebat. His & alijs beneficijs bonæ memoriæ Anſellus præſatum ditauit Monasterium, & Chriſtum heredem fecit, fratribus ſuis Stephano, VVILLELMO, ET GILLEBERTO concedentibus In vodo, quod eſt inter Gornaïum & Kalam X V. arpenta pratorum habent, v. de dono noſtro, VII. de dono ALBERICI de Montefirmo, & tria de aliorum fidelium beneficio. Nos autem hæc omnia prædicta dona, Guidonis videlicet Rubei, & vxoris eius, & Anſelli Dapiferi noſtri, & STEPHANI fratris ſui, & Balduini de Claciaco, & Alberici de Montefirmo, & volumus & approbamus, & quantum ad noſtram pertinet maiestatem in perpetuum omnino confirmamus. Terram quoque & nemus de Campo-mulloſo, quem ARNVLVS de Corquerellis, annuente PAGANO de Montegajo, prædictis Monachis dedit, nos eidem Eccleſiæ confirmamus. Eidem etiam Eccleſiæ confirmamus terram, & nemus quod dicitur Raimundi. Actum Pariſius anno Incarnati Verbi MCXXIV. Adchaidis Regine VII.

S. Stephani Dapiferi,

S. Gilleberti Buticularij,

S. Hugonis Conſtabularij,

S. Alberici Camerarij

Data per manum Stephani Cancellarij.

Verum hæc Charta ſcrpulum ingerit, qui paulò diligētius excutiendus eſt. Nam & Stephanum Dapiferum, & Stephanum Cancellarium ſimul ſubſcriptos habet. Cùm tamen Annales Moriniacēſis Cœnobij, quos Teulfus, & aliquot loci illius Monachi ſcripſerunt, eundem faciant Stephanum de Guarlanda Dapiferum cū Stephano Cancellario Regis. Teulfi verba ſunt hæc Annalium libro II. Defuncto Vvillelmo Anſelli Dapiferi germano, Stephanus Cancellarius frater amborum Maior Regiæ domus effectus eſt. Hoc retroactis generationibus fuerat inauditum, ut homo qui Diaconatus fungebatur officio, militiæ ſimul poſt Regem duceret Principatum. Hic vir induſtrius, & ſeculari præditus ſapientia, cum multis Eccleſiaſticorum bonorum redditibus, tum familiaritate Regis, quam ſic habebat, ut ei potius à quibusdam diceretur imperare quàm ſeruire. Temporalis felicitate ſupra ceteros

mortales nostris temporibus effloreat. Tradita verò nepti sua in coniugio *Almarico de Monteforti*, cum honore de *Rupeforti*, qui puella de matrimonio obuenerat, tumefactus oblitusque sui *Adelam* Reginam frequentissimis molestiis sibi reddidit infestam, odiisque crescentibus Rege turbato, depositus ab honore pulsatur à Curia. Ipse verò veluti quidam correptus insania regnum turbare totis viribus enititur, & vi-
 • ri in armis strenui, *Amalrici* dico, fretus auxilijs, patriam hanc bel-
 • lis accendit. Sed cum suos affectus deducere non posset ad effectus, re-
 uersus ad semetipsum Senescalciam, quam iure possidere se dicebas he-
 reditario, dimisit, & cum Rege *Ludouico*, *Adelaide* Regina interue-
 niente, pacificatus est. Ex quibus quantus & qualis fuerit *Stephanus* de *Garlanda* Dapifer facillime potest iudicari. Sed ut
 cum fuisse credam *Stephanum* illum Cancellarium, qui postea
Parisiensis Episcopus factus est, adduci nequeo. Multa enim in
 antiquis & fide dignis monumentis occurrunt, quæ contrarium
 persuadere videntur. Et primò, tabulæ *S. Martini* referunt *Stephanum*
Parisiensem Episcopum, Ecclesiam *S. Dionysij* quæ dici-
 tur de *Carcere*, quam diu manus laica iniuste inuaserat, quæ etiam suo
 tempore ad manus Regias redacta fuerat, ipsam in manibus suis red-
 ditam ex consensu, petitione & voluntate Regis *Ludouici*, annuente
Adelaide Regina, & *Henrico* eiusdem Ecclesie Abbate concedente, in
 perpetuum donasse *S. Martino de Campis* anno Christi *MCXXXIII*.
 In litteris verò *Henrici* Abbatis *S. Germani de Pratis* memo-
 rantur seruientes *Stephani de Garlanda*, qui sub annum adhuc
MCXXXVIII. *Castrum Gurnaicum* cum appendicijs in aduocatione
 tenebat pro *Almarico Eboraci Comite* neptis suæ filio, cui idem castrum
 hereditario jure successerat. Secundo, tumulus *Stephani* *Parisiensis*
 Episcopi, qui decessit anno *MCXL*. cum primò Cancellarium, post
 Episcopum fuisse, nulla Dapiferi vel Senescalli mentione facta,
 demonstrat, hoc modo : *Hic iacet felicitis memorie R. P. & Dominus*
Stephanus, quondam *Francia* Cancellarius, post *Parisiensis* Episcopus, &c. De-
 nique, quod luce meridiana clarius est, Tabulæ *B. Mariæ de Gornaio*
 referunt simul & *Stephanum Parisiensem* Episcopum, & *Stephanum*
Dapiferum Gornaicum tenentem. Quare dubio hoc ita remoto, iam
 subiungendum restat, *Stephano de Garlanda Radulphum*
Peronæ, seu *Viromanduorum Comitem* in Senescalcia succes-
 sisse. Quod aperte testatur *Hugo de Clerijs* cum ait, Post *Stephanum*
 fuit Senescallus, *Radolphus Peronæ Comes*, qui similiter fecit

hominia & seruitium. Post Radulphum Theobaldus Magnus, Comes Blesensis, Dapiferi munere functus est sub Ludouico Iuniorre. Post Theobaldum Magnum Theobaldus alter filius eius, itidem Comes Blesensis, Philippi Augusti Senescallus extitit. Et sic de ceteris.

ASCENSUS EPISCOPI TERRAE] Hatonis scilicet Episcopi Tre- PAG. 28]
censis, posteaque Cluniacensis Monachi, de quo multa Petrus venerabilis Abbas Cluniaci, S. Bernardus, & alij eiusdem æui scriptores in Epistolis.

ORATORIVM QVODDAM IN NOMINE S. TRINITATIS CON-
STRUXI] Tacet hoc loco, quod alibi refert ac sæpe repetit, Ora-
torium illud se, cum in nomine S. Trinitatis fundatum ac dedi-
catum esset, quia tamen ibi profugus ac iam desperatus diuinæ
gratia consolationis aliquantulum respirasset, in memoriam
huius beneficij Paracletum siue Paraclitum nominasse.
Quod asserunt etiam Robertus Autissiodorensis, Chronicon
S. Petri Viui Senonum, & alij. Construxitque illud in pago Tre-
censi, super fluuium Arduzonem siue Ardiconem, in parrochia
Quinceij vicina Nogento super Sequanam. Guillelmus Nāgius
in Chronico: *Construxerat enim Monasterium in Episcopatu Trecenti
iuxta Nogentum super Sequanam, in quodam prato ubi legere solitus fue-
rat.* Et Innocentius II. in litteris ad Heloisam: *Heloise, inquit, Ab-
batissæ, caterisque sororibus in Oratorio, quod in pago Trecenti, in parro-
chia Quinceij supra fluuium Arduconem situm est.* Vocant autem illud
Romani Pontifices, *Paraclitense Cœnobium, Oratorium S. Trinitatis,
Paraclitum, & Oratorium sancti Spiritus.* Sed de eo plura adhuc
postea.

QVOD CVM COGNOVISSENT SCHOLARES, COEPERVNT VNDI-
QUE CONCVRRERE] Franciscus Petrarcha lib. II. de Vita solita-
ria, *Qui, Petrus Abaelardus, inquit, inuidia cedens, solitudinis Trecenti
abditæ penetravit, etsi non sine magno undique studiosorum conuentu,
quos è multis vrbibus solitario illi discipulos doctrinæ celebris fama contra-
xerat, sine requie tamen optata, quam sibi radicatus tenax linor, odiumque
convulserant.*

ALTER REGVLARIVM CANONICORVM VITAM, ALTER MONA-
CHORVM SE RESVSCITASSE GLORIABATVR] Sanctos Nort-
bertum Canonica Præmonstratensium Congregationis insti-
tutorem, & Bernardum Monasticj Cisterciensium Ordinis pro-
motorem præcipuum intelligit. Quorum hic primus Clara-

uallensis Cœnobij Abbas, benedictus est à Guillelmo de Campellis Episcopo Catalaunensi sub annum MCXIV. Episcopatu Lingonensi vacante, sicut in Chronico Victoriano legitur, posteaque trecentorum & amplius Monachorum Pater esse meruit. Ille verò, teste veteri Laudunensis Ecclesiæ Canonico, post paucos annos novi luminis, nouæque conuersionis, nec solum interius, sed etiam exterius cœdoris nouus inuentor & incæptor, dominus scilicet Norbertus, de Lotharingia Franciam adueniens, diuina precedente & comitante gratia in Episcopatu Laudunensi primam illam vineam plantauit, quæ in charitate radicata & fundata iam emisit propagines suas, & vino fortitudinis suæ, quod letificat cor hominis, iam vbertim inebriauit plures Principes & Iudices terræ, iuuenes, & Virgines, senes cum iunioribus. Itaque fortiter inebriati nihil aliud quærant nisi laudare nomen Domini, & cantare ei Canticum nouum. Nec omninò malè loco huic conuenire videtur, quod Auctor Chronici Lemouicensis refert ad annum MCXXX. Sub his, inquit, temporibus Ordo Canonicus Præmonstratensium, & Monasticus Cisterciensium quasi duæ oliuæ in conspectu Dei pietatis lumen & deuotionis pinguedinem mundo ministrabant, & quasi vires fructiferae religionis palmites circumquaque propagabant, & per omnes ferè Christiani orbis terminos bonæ opinionis paulatim odore diffuso nouas Abbantias, ubi antea cultus Dei non fuerat, construebant. Vnde & in Syriam & Palestinam de utroque Ordine fratres missi nonnullas Abbantias edificauerunt. Eratque circa ea tempora pulchra ac decora facies Ecclesiæ diuersorum Ordinum ac professionum circumdata varietate, dum hinc Præmonstratenses, inde Cistercienses Monachi, inde etiam diuersi habitus atque professionis sanctimoniales & mulieres Deo deuote in continentia atque paupertate sub obedientiæ iugo regulariter viuentes, seruire religionis se inuicem prouocarent, & noua certatim diuersis in locis Monasteria fundarent. Vtrique tamen illi duorum eiusmodi Ordinum propagatores fellis & acrimoniæ pleni fuerunt in Abaelardum nostrum, ut vel ex solis aliquot Epistolis liquet quas Bernardus Innocentio Pontifici Romano & Cardinalibus aduersus eum scripsit.

PAG. 32. EST IN BRITANNIA MINORE ABBATIA QVAEDAM S. GILDASII RVIENSIS] Abbatia hæc omnium Britannia. Abbatiarum antiquissima. Nam sanctus ipse Gildasius, siue Gildas, cognomento Sapiens, in maiore Britannia natus, illius prima fundamenta iecit tempore Childerici Regis Merouci filij. Quod ne minus probabiliter dixisse videar, producam testimonium Auctoris

thoris anonymi, sed veteris ac fide digni, qui vitam ac res gestas S. Gildæ scripsit: Cum Dei iussu, inquit, peruenisset Gildas, in *Armo-*
ricam quondam Gallie regionem (tunc autem à Britannis, à quibus posside-
 batur) *Letania dicebatur*, ab eis honorifice & cum gaudio magno susceptus
 est. Et paulò post, *Veniens itaque ad quoddam castrum in monte Reu-*
ysij, in prospectu maris situm, ibi potioris fabricæ construxit Monasterium,
 atque in eo claustra Cænobiali ritu perfecit. Itemque rursus, *Positum*
 est autem corpus sancti viri in Ecclesia, quam ipse in antiquo castro *Rensij*
 construxerat. Vbi per multa annorum curricula seruabatur, & ab vniuer-
 sa Britannorum gente venerabiliter colebatur, quoniam innumerabiles ibi
 fiebant virtutes. Vnde patet & cur Cænobium illud S. Gildæ
 Ruientis nomen obtinuerit. Verùm postea bellis in Britannia
 superuenientibus, interfectoque crudeliter ab impijs religioso
 Comite Brittonum Salomone, non modo locus ipse penitus,
 cum alio nomine Lochmenech, desertus atque destructus est,
 sed etiam habitatores eorum regiones alienas petere compulsi
 sunt, ac nouas in Bituricensi pago sedes eligentes, secum corpus
 pretiosum S. Gildæ detulerunt, & in Dolensi Monasterio po-
 suerunt, vbi Bituricus Princeps Ebbo benigniter eos suscepit
 quod disertè confirmatur ab Auctore Chronici Lemouicen-
 sis, in hæc verba: *Per idem tempus, inquit, nempe versus annum*
Christi DCCCXVII. in Biturica in castro Dolensi fundatum est Cænobium
nobile quod Dolense vocatur, ab Ebbone viro illustri Domino prædicti ca-
stri. Hic deuotus vir post paululum à Britannia plures Monachos fugien-
tes cum multis sanctorum reliquijs religiose suscepit, qui Normannorum ra-
biem mortis metu euaserant. Hi corpus beati Gildasij Abbatis ad Dolen-
se Cænobium detulerunt. Cui Dei electo isdem Ebbo proprium Cæno-
bium iuxta castellum suum ex alia aquæ parte construxit, vbi illius venera-
bile corpus cum multorum sanctorum reliquijs honorabiliter conditum re-
quiescit. Nec tamen propterea Ruiente Monasterium, cum om-
nipotentia Domino placuisset vt restauraretur, illo deinceps ad-
huc S. Gildæ nomine minus gauisum est. Nam Gaufridus tan-
dem Comes, totius Britannia Principatum adeptus, vt refert
idem qui suprà vitæ S. Gildæ Scriptor, rogauit Goslinum Floriacen-
sis tunc Monasterij Abbatem, qui etiam postea Bituricensi Ecclesiæ præ-
fuit Archiepiscopus, vt transmitteret sibi Felicem Monachum ad restaurā-
da Monasteria, quæ erant in sua regione solo tenus destructa. Anno igitur
Incarn. Dominicæ MVIII. missus est Felix à supradicto Abbate ad Gau-
fredum Comitem, qui honorifice ab eo susceptus est, atque prædicta Cæno-

bia, nempe Ruienſe, & Lochinenech, ei donauit cum omnibus appendicijs ſuis: commendauitque illum fratri ſuo Iudicaelj Epifcopo Veneteniſi, in cuius dioceſi ipſa Monafteria erant. Et aliquanto poſt. Cùm autem dubitaret quem potiorẽ locum de duobus ſtatueret ſcẽm Abbatia habere, Ducem Alanum Epifcopumque Veneteniſem ſuper hac re conſuluit. Illi conuocatis nobilebus viris, aliquibus etiam Epifcopis, ſtatuerunt locum S. Gilde qui erat antiquior, & terra fertilitate, frumenti etiam & vini, arborumque pomiferarum abundantior: diuerſorum quoque magnorum piſcium generibus ſuis temporibus affluentior. Atque hæc fortẽ diſuſius quàm oportuit à me relata ſunt, ſed occasione potiſſimum Petri Abaelardi, qui & ipſe Brito, demum ad illam etiam S. Gilde Abbatiã concordĩ fratrum electione cum aſſenſu Principis terræ vocatus eſt, vt proprijs verbis declarat. Et certe quod Abbas fuerit in Britannia, licet tacito Abbatia nomine, teſtatur quoque Guillelmus Nangius cùm ait, Petrus Abaelardus Magiſter in Dialectica inſignis & celeberrimus, primò vxoratus, deinde S. Dionyſij in Francia Monachus, poſt in Britannia, vnde natus fuerat, Abbas conſtitutus.

PAG. 34. ACCIDIT VT ABBAS S. DIONYSII PRAEDICTAM ILLAM ARGENTEOLI ABBATIAM TANQVAM AD IVS MONASTERII SVI ANTIQVITVS PERTINENTEM ACQVIRERET.] Fuit Argentolii Monafterium ab ipſis fundatoribus Abbatia ſancti Dionyſij ſubiectum. Poſtea tamen Carolus Magnus illud Theodrada filia ſua commiſit. Quæ congregatis ibi Sanctimonialibus eo pacto tenuit, vt poſt mortem eius in vſum Eccleſia S. Dionyſij reuerteretur. Quod manifeſtè docet hoc Ludouici & Lotharij Imperatorum Præceptum è Chartulario S. Dionyſij depromptum.

Confirmatio Ludouici & Lotharij Imperatorum, ſuper Eccleſia Argentolij, quam dedit Hermenricus & vxor ſua Mûma * S. Dionyſio.

* al. Nũ-
mana.

IN nomine Domini Dei, & Saluatoris noſtri Ieſu Chriſti, LVDOVICVS ET LOTHARIVS diuina ordinante prouidentia Imperatores Auguſti. Si ea, quæ à Deum timentibus hominibus ad loca diuino cultui dedicata, ſollemni donatione largita vel condonata ſunt, & poſtea qualibet occasione indè abſtracta eſſe noſcuntur, noſtra auctoritate ad ſtatum ſuum reuocamus, & iterum noſtra juſſionis oraculo confirmamus: hoc nobis procul dubio ad eternam beatitudinem adi-

piscendam, seu stabilitatem imperij nostri roborandam pertinere confidimus.
 Ideo notum sit omnium fidelium nostrorum tam presentium, quam & fu-
 turoꝝ industria, quia illustris femina soror videlicet nostra Theodra-
 da Deo sacrata, nostra suggestis mansuetudini, qualiter compertum habuif-
 set, quod Monasterium vocabulo ARGENTOLIVM situm in pago Pari-
 sisco super fluvium Sequanam, quod ipse primò per beneficium domni & ge-
 nitoris nostri KAROLI serenissimi Imperatoris, & postea per nostram lar-
 gitionem tenebat, ad Monasterium beati & gloriosi CHRISTI Martyris
 DIONYSII, ubi presenti tempore vir venerabilis HILDVINVS Abba,
 & sacri Palatii nostri Archicapellanus, Rector præesse videtur, pertine-
 re deberet. Petijtque ut pro mercedis nostræ augmento ad statum pristinum
 illud renocari fecissimus, eo videlicet modo ut memoratum Monasterium
 post suum ab hac luce discessum, si tamen aliud Monasterium ei antea in cõ-
 paratione pro ipso à nobis datum non fuerit, aut propria voluntate eum di-
 mittere non voluerit, ad potestatem Monasterij S. DIONYSII absque vl-
 la contrarietate vel cuiusquam interrogatione reciperetur. Nos ve-
 rò audita illius salubri ac religiosa petitione, prædictum venerabilem
 virum Hilduinum, quia præsens aderat, si quid de hac re compertum
 haberet interrogamus. Qui statim donationem cuiusdam Deam ti-
 mentis ac religiosi hominis nomine ERMENRICI, ac coniugis suæ
 NVMMANÆ, qui præfatum Monasterium in suo proprio construxe-
 rant, & id per testamenti paginam ad Beati Dionysij Martyris Chri-
 sti Monasterium sollemni donatione contulerant, necnon & præceptum
 confirmationis LOTHARII quondam Regis, quod super eandem do-
 nationem conscribere iusserat, nobis petitioni memorata dilectæ sororis
 nostræ Theodradæ annuere, & sicut petebat, per nostram auctoritatem
 prædictum Monasteriũ ARGENTOGILVM ad potestatem S. Diony-
 sij, preciosissimi Christi Martyris renocare. Quapropter hanc nostræ
 auctoritatis cõfirmationem fieri præcipimus, per quam omnimodis de-
 cernimus atque iubemus, ut iam dictum Monasterium Argentogi-
 lum post ipsius dilectæ sororis nostræ ab hac vita discessum ad Mona-
 sterium & potestatem prædicti beatissimi Christi Martyris Dionysij, ad
 quam primitus ob Dei amorem, & ipsorum sanctorum reverentiam
 piamque intercessionem à supradictis Dei fidelibus traditum vel con-
 donatum fuisse noscitur, absque ullius personæ contradictione, aut no-
 stra vel successorum nostrorum interrogatione recipiatur, & in iure ac
 dominatione ipsius Monasterij cum omni integritate vel appendicijs
 suis quicquid ibidem presenti tempore cernitur pertinere renocetur. Et
 si fortè contigerit, ut eadem soror nostra ipsum Monasterium aut spon-

tanea voluntate, ut diximus, aut pro commutatione alterius Monasterij ante finem vite sue dimittere velit: tunc nihilominus absque ulla contradictione, aut expectata consignatione ad prefati beatissimi Martyris Christi Dionysii Monasterium, sicut supra insertum est, perpetualiter ad habendum recipiatur, & in postmodum nullo unquam tempore ulla qualibet dignitate aut potestate predicta persona Rectoribus Monasterij prefati, ac beatissimi Christi Martyris Dionysii aliquam requisitionem facere, aut ullam calumniam ingerere presumat, sed liceat illis sine cuiuslibet iniusta interrogatione prefatum Monasterium Argentogilum, sicut ceteras res ad beati Dionysii potestatem simili modo condonatas ac pertinentes, quieto ordine tenere ac disporre. Et quicquid pro opportunitate atque utilitate ipsius Ecclesie secundum Christiana Religionis Regulam facere voluerint, liberam in omnibus habere potestatem. Et ut hac auctoritas confirmationis sem redditionis nostre per futura tempora inuolabilem atque inconvulsam obtineat firmitatem, manibus proprijs nostris subter eam firmavimus, & annuli nostri impressione signari iussimus.

Signum LUDOVICI serenissimi Imperatoris,

Signum LOTHARII gloriosissimi Augusti.

Durandus Diaconus ad vicem Fridngisi recognovit.

Sed cum Normanni Cœnobium illud diruissent, Adalais Hugonis Regis vxor ipsum restauravit, ac rursus in eo sanctimonialia constituit, quæ inibi vsque ad Suggestij S. Dionysii Abbatis tempora remanserunt. Qualiter autem hic eas inde expulerit, & Abbatiam antiquo sui Monasterij iuri vindicarit sub annum CHRISTI MCXXVII. sic ipse narrat in Libello de rebus à se gestis, Cum etate, inquit, docibili adolescentie mea antiquas armorij possessionum revoluerem chartas, & immunitatum biblos propter multorum calumniatorum improbitates frequentarem, crebro manibus recurrebat de Cœnobio Argentorilensi foundationum charta ab Hermenrico & coniuge eius Numma, in qua continebatur, quod à tempore Pipini Regis, beati Dionysii Abbatis extiterat: sed quadam occasione contractus incommodi in tempore Caroli Magni filij eius alienata fuerat. Prefatus enim Imperator, quandam filiam suam matrimonium humanum recusantem ibidem Abbatissam sanctimonialium constituit, eo pacto ut post mortem eius in usum Ecclesie reverteretur: sed turbatione regni filiorum filij eius, videlicet filij Pij altercatione, quoad usque supervixerat, perfici non potuit. Vnde cum antecessores nostri sapius super hoc laborantes parum profecissent, communica-

locum fratribus nostris consilio, nuntios nostros & chartas antiquas foundationis & donationis & confirmationum priuilegia bone memorie Papae Honorio Romam delegauimus, postulantes ut iustitiam nostram canonico inuestigaret & restitueret scrutinio. Qui, ut erat vir consilij & iustitie tutor, tam pro nostra iustitia quam pro enormitate Monacharum ibidem male uiuentium, eundem nobis locum cum appendicijs suis, ut reformaretur ibi religionis ordo, restituit. Rex uero Ludouicus Philippi charissimus, Dominus & amicus noster eandem restitutionem confirmauit, & quaecunque regalia ibidem habebat auctoritate Regie maiestatis, Ecclesie precepto. Et in vita Ludouici Grossi, Papa Honorius vir grauis & seuerus, qui cum iustitiam nostram de Monasterio Argentoilensi puellarum miserrima conuersatione infamato, tum legati sui Matthaei Albanensis Episcopi, tum Domini Carnotensis, Parisiensis, Sueffionis, Domini etiam Archiepiscopi Rhemensis Rainaldi, & multorum uirorum testimonio cognouisset: precepta regum antiquorum Pipini, Caroli Magni, Ludouici Pij & aliorum, de iure loci praefatis nuntijs nostris oblata perlegisset, curia totius persuasione, tam pro nostra iustitia, quam pro earum fetida enormitate, beato Dionysio & restituit, & confirmauit.

QVAE CVM EXVLES DISPERGERENTVR, HELOISAM CVM QUIBUSDAM ALIIS DE EADEM CONGREGATIONE IPSI ADHAESENTIBVS AD PRAEDICTVM ORATORIVM INVITAVI] Sanctimonialium Argentoilis sic à Monasterio suo dejectarum alia in Cœnobium B. Mariae de Footel, seu de Nemore translatae sunt, ut colligitur ex his Henrici S. Dionysij Abbatis litteris, Henricus Dei gratia Abbas, & Conuentus b. Dionysij. Vniuersis, qui praesentes litteras uiderint, in Domino salutem. Notum facimus, quod cum inter nos ex una parte, & Abbatissam & Moniales de Footel ex altera, tam super possessione quam proprietate Ecclesiae b. Mariae de Argentolio, qui est Prioratus cum suis appendicijs, quaestio uerteretur, auctoritate Apostolica coram Domino Priore S. Victoris Parisiensis, S. Succentore Siluaneensi, & Magistro R. de Orson, Canonico Nouiomensi, pro bono pacis promissimus dictis Monialibus, quod dabimus & assignabimus eis in terris suis in territorio de Trembleyo decimam, quae singulis annis valeat decem libras, infra xv. dies post factam compositionem. &c. Actum anno Domini MCCVII. Ea enim conditione Cœnobium illud ad ius pristinum Abbatis S. Dionysij reductum fuerat, ut Monialibus loca prouideret, ubi possent saluare animas suas. Heloisam uero, quae Prioratum cōuentus habebat, cum quibusdam alijs de eadem congregatione

ipsi adhærentibus, Petrus Abaelardus ad Paraclitum Oratoriū suum inuitauit: eamque ibi Abbatissam cæteris præfecit. Quod testatur etiam Guillelmus Nangius cū ait, *Sed ibi Heloisam, quæ per industriam Sugerij Abbatis S. Dionysij in Francia postmodum electa, venire fecit cum nonnullis monialibus religiosis. Quæ ibi Abbatissa effecta. Et ante eum Robertus Autissiodorensis, Hic, inquit, Abaelardus subtilissimus mirabilisque Philosophus construxerat Cænobium in territorio Trecaßino, in prato quodam ubi legere solitus fuerat: in quo Sanctimoniales plurimas Episcopali auctoritate congregauit, quod Paraclitum nominauit. Quibus sanctimonialibus Heloisam quondam uxorem suam religiosam feminam, & listeris tam Hebraicis, quàm Latinis adprimè eruditam præfecit Abbatissam.*

PAPA INNOCENTIVS II. PER PRIVILEGIUM CORROBORAVIT] Priuilegium hoc datum est anno MCXXXI. extatque suprà cum alijs Pontificum Romanorum ad Heloisam Rescriptis, pag. 346. Quare hîc ipsum repetere superfluum duximus.

PLVS VT ARBITROR VNO ANNO IN TERRENIS COMMODISSVNT MULTIPLICATAE] Circumadiacentes nempe populi misericordes eis atque propitij plurima largiti sunt. Sed ante alios Milo Dominus Nogennij, sicut in Tabulis Paraclitenſibus legitur, in cuius territorio Paraclitense constructum est Oratorium, ei loco donauit culturas tres, vnā inter Brusletum & viam, Alterā iuxta Carman, terciā iuxta viam Triagnelli ad sinistram. Concessit insuper prædicto loco quæcumque homines sui de vniuerso feodo suo ei darent. Dedit etiam vsuarium nemoris sui de Monte Moruei omni tempore ad omnia necessaria ipsius loci, nec non & totum mareschium in riuieris Arductionis loco illi adiacens tam ad hortos faciendos, quàm ad cetera necessaria. Quæ omnia in dedicatione ipsius Oratorij, seu benedictione Cimiterij, & omni modā immunitatem totius loci coram omni populo qui aderat, in manu domini Trecentis Episcopi posuit, & sic in perpetuum confirmauit, præsentibus Hilduino Decano, Hilduino Magno, Stephano Ridel, Rainaldo Carnail. Die insuper illo, quo Sanctimoniales Oratorium ingressæ possederunt, donauit eis piscationem totam Arductionis flumioli penitus immunem à S. Albino vsque Quinceium. Qui etiam pro Comitissa nepte sua in Sanctimoniale suscepit dedit furnū de S. Albino cū vsario nemoris quod Furmis habebat, præsentibus Anfello de Triagnello, Milone Sancto, & Petro fratre suo. Pro anima Hugonis filij sui ibidem sepulti dedit culturam ad Noeiesh cum terciā parte de Guamnouerijs, præsentibus illis qui sepulcræ affuerunt. Simon quo-

quo de Nogennio dedit de alodio suo culturas duas, vnam scilicet in qua ipsum Oratorium constructum est, & aliam in monte Limarsum in presentia Huldini Decani & Milonis de Nogennio. Hubertus de Nogennio dao iugera terre ante ipsum Oratorium per manum Milonis de Nogennio. Atque hæc omnia confirmavit aliquanto post Theobaldus Comes Trecentis, scilicet anno MCXLVI. Laudante filio prefati Milonis Isabel, & Girardo genero suo, Freerio, Iosfrido, Gaucherio, Stephano, nepotibus eius. Ipseque etiam Monialibus illis modium frumenti singulis annis, & totam piscationem in molendinis suis apud Pontes dedit, ut in litteris Domini Eugenij III. Papæ suprâ relatis continetur.

AD hæc, Galo & Adelaudis uxor eius soror Ermeline quæ se Deo & Ecclesiæ Paracliti in Sanctimonialem dedit, laudauerunt & concesserunt Deo, & dictæ Ecclesiæ Paracliti & Sanctimonialibus ibidem Deo seruientibus medietatem molendini de Creuecor, & vineas etiam de Creuecor, & X L. solidos census: & in hoc censu habuerunt Sanctimoniales Paracliti censum Pruuiui, & hoc quod restabat ad percipiendum de X L. solidis ceperunt apud Lizinas. Hæcque concessio facta est apud Pruuium in presentia Comitissæ Theobaldi, & Matildis Comitissæ uxoris eius, & per manum etiam ipsius Comitissæ. Qui Comes, ut hæc stabilis & inconuulsa permaneret, eam sigilli sui auctoritate corroborari precepit anno ab Incarn. Domini MCXXXIII. regnante Ludouico Rege Francorum, Hainrico Archiepiscopo Senonensi Cathedra residente, Hatone verò Episcopo Trecentium existente.

LUDOVICVS quoque ipse Francorum Rex eisdem Sanctimonialibus de Paraclito in perpetuum concessit, ut nunquam de quibuslibet rebus, quas ipsæ vel seruientes ipsarum ad vsus earundem emerent vel pro suis necessitatibus de suis proprijs rebus venderent, aliquam illi vel successoribus suis consuetudinem in tota terra sua persoluerent. Quod ut ratum & inconcussum permaneret, scripto commendari precepit, & ne posset à posteris infringi, sigilli sui auctoritate corroborauit publicè apud S. Germanum in Leya, anno incarnati Verbi MCXXXV. regni sui XXVII. Ludouico filio suo in regem sublimo anno III.

PRÆTEREA Matildis Comitissa, Theobaldi coniux, Abbatiam in loco Pomerij constructam à se, Paraclitenſi Cœnobio subditam esse voluit. Et pro concessione prædicti loci, quem Heloissa ipsa prima Paracliti Abbatisſa religiosorum interuentu virorum ei dederat ad constructionem, dedit Comitissa Ecclesiæ

Paracleti tres modios frumenti per singulos annos in molendino suo Pruini sub Creuecor, laude filiorum suorum Comitum Henrici, Theobaldi, & Stephani, sicut est in Litteris Hugonis Archiepiscopi Senonensis hac de re confectis; quas etiam supra cum Pontificum Romanorum Rescriptis integras retulimus. Insuper confirmauit decimam de S. Martino de Campis & de Boal, quam Gillelmus Clericus eius dedit post decessum Ecclesiæ Paracliti & Sanctimonialibus ibidem Deo seruientibus, anno MCLIV. regnante Ludouico Francorum Rege, Hugone Archiepiscopo Senonensi existente. Nec non & alia plurima bona eidem Cænobio contulit, quæ recitare longum ac fastidiosum foret.

DENIQUE Hato ipse Trecensis Episcopus medietatem omnis decimæ de S. Albino, & medietatem Candelarum in Purificatione Beatæ Mariæ dedit: Milo de Quinceio miles de assensu uxoris suæ Petronille, & filij sui Garnerij, & filia suæ Isabel, quicquid habebat in decima de Quinceio. Ansellus Dominus Trianguli Prioratum Conuentualem Beatæ Mariæ de Triangulo in Trecensi Diocesi, Necnon Ansellus filius eius, medietatem totius nemoris quod vocatur Couldroy in territorio de Marcelliaco. Alij, quorum nomina non reperi, Priorotus de Leualle in eadem diocesi, de Neofortio in Meldensi, & S. Martini de Beaurain in Beluacensi. Manasses Meldensis Episcopus octauam partem magnæ quàm parue decimæ de Melnillo, & medietatem minutæ decimæ de Tillys, & quartam partem minutæ decimæ de S. Maximo. Beucelina Vxor Guerrici de Pontibus, quæ se monialem in Paraclito reddidit, domum cum Cellario Sesamiæ sitam. Nobilis mulier Helia de Villamauro relicta Milonis de Pruino quondam Marescalci Campaniæ decem libras annui redditus de proprio patrimonio suo. Maria Trecensis Comitissa plateam suam Pruini. Demum Agnes de Marigniac pro susceptione sui duas partes minutæ decimæ villæ Marigniacy. Manasses nepos eius tertiam partem, Theobaldus eius filius tertiam partem, laudante Letuifa uxore illius. Atque hi sunt præcipui Paraclitensis Monasterij benefactores: quibus & aliquot alios addere possem. Sed ad ea, quæ notanda supersunt, festinat stylus.

ILLI SORORI NOSTRÆ QUÆ CAETERIS PRÆERAT] Heloisam dicit primam Paracliti Abbatissam, de cuius doctrina & religione sic paucis Petrus Cluniacensis Abbas ad eam scribens,
Necdum

Necdum, inquit, metas adolescentiæ exceſſeram, necdum in iuueniles annos euaseram, quando nomen non quidem adhuc religionis tuæ, ſed honorũ tamen & laudabilium ſtudioꝝ tuorum mihi fama innotuit. Audiebam tunc temporis mulierem, licet necdum ſeculi nexibus expeditam, litteraria ſcientiæ & ſtudio ſecularis ſapientiæ ſummam operam dare. Quo efferendo ſtudio tuo, & mulieres omnes euiciſti, & penè viros vniuerſos ſuperaviſti. Mox verò, iuxta verba Apoſtoli, ut complacuit ei, qui te ſegregauit ab utero matris tuæ, per gratiam ſuam, longè in melius diſciplinariũ ſtudio commutaſti, & pro Logica Euangelium, pro Phyſica Apoſtolum, pro Platone Chriſtum, pro Academia clauſtrum tota iam & verè Philoſophica mulier elegiſti. Religioſam quoque feminam & tam Hebraicis quàm Latinis litteris ad primè eruditam fuiſſe teſtatur Autiſſiodoreſis Monachus, nec non ipſum Paraclitenſe Calendarium Gallicum his verbis, *Heloïſe mere & premiere Abbeſſe de ceans, de doctrine & religion tresreſplendiſſante*. Quod apertius adhuc declarat Abaelardus ipſe ſuis ad eam ſcriptis Epistoſis. Et in exhortatione de litterarum ſtudio ad Virgines Paraclitèſes, Magiſterium, inquit, habetis in Matre, quod ad omnia vobis ſufficere, tam ad exemplum ſcilicet virtutum, quàm ad doctrinam litterarum poteſt: quæ non ſolum Latina, verum etiam tam Hebraica quàm Græcæ non expertis litteraturæ. ſolo hoc tempore illam trium linguarum adeptæ peritiã videtur, quæ ab omnibus in beato Hieronymo tanquam ſingularis gratia prædicatur. Porro locus hic requirere videtur, ut quemadmodum de primis Abbatia Paraclitenſis benefactoribus iam egimus: ita quænam poſt Heloiſam Abbatiffæ illam rexerint nunc adiungamus. Quod tamen ita præſtabimus, ut earum tantum nomina commemoremus, quarum mentionem in Paraclitici Monafterij Tabulis & Calendario reperimus, nec ſeriei etiam ac annorum rationem vbique forſan tenebimus.

ELENCHVS Abbatiffarum Monafterij Paraclitenſis
juxta Nogentum ſuper Sequanam.

I HELOÏSA, neptis Fulberti Canonici Pariſienſis, primò Petri Abaelardi coniux, deinde Monialis & Prioriſſa Argentolij, poſt Oratorij Paraclitici Abbatiffa. quod ab anno MCXXX. ad annum MCLXIV. prudenter atque religioſe rexit.

Sub ea autem fuerunt & duæ Abaelardi neptes, Deo ſacratae, ſcilicet Agnes Prioriſſa, & Agatha: de quibus ita Calendarium Paraclitenſe: II. Cal. Martias obiit Agnes Prioriſſa neptis Magiſtri noſtri Petri. Et alibi, VII. Cal. Iun. obiit Agatha Deo ſacrata neptis Ma-

L L L L I I I

giseri nostri Petri. Itemque Calendarium aliud vetus Gallico sermone scriptum, Agace niece Maistre Pierre gist ou petit Moustier. Nec tamen Agnes illa prima Priorissa censenda. Nam idem Calendarium Gallicum recenset aliam ad Non. Iulias his verbis, Astrane la premiere Priense gist ou petit Cloistre à la porte dou Moustier.

II. HELVILDIS, inter quam & Norpaldum Abbatem Vallis Lucentis controuersia quædam pacificata fuit apud Triangulum in Monasterio Sanctimonialium, mediatore & teste Domino Ansello de Triangulo, & filio eius Garnerio, domina Helisendi vxore Domini Anselli, & sorore eius domina Comitissa.

III. ERMENGARDIS, cuius meminit Calendarium Paraclit. his verbis, *II II. Cal. sept obiit Ermengardis bone memorie Deo sacrata Abbatisa nostra. Et Calendarium Gallicum ad eandem diem, Emmaniarz Abbesse gist ou cuer.*

IIII. HELISINDIS, quæ obiit vii. Idus Octobris.

V. MILESENDIS, cui Garnerius Trecensis Episcopus Ecclesiam parrochialem S. Albini dedit anno mxciv. his litteris, *GARNERIUS Dei gratia Trecensis Episcopus vniuersis Ecclesie filiis presentes litteras inspecturis, salutem in eo, in quem conspiciere, Angeli satiantur. Cum ibi locare beneficia debeamus vbi gratia locum inuenit, vbi meritum dinoscitur respondere, numerantes innumera liberalitatis obsequia, quæ tam domina quàm filia carissima nostra in Christo MILESENDIS, meritis & honestate commendabilis, alii sanguinis ingenuitate spectabilis, Paraclitensis nobis Abbatisa impendere non cessauit: pensantes etiam deuotionem, quam erga nos & nostros habebant tam vniuersa quam singule Sanctimoniales, quæ in eodem Cœnobio Domino famulantur, prædictæ Abbatisæ suisque sororibus dedimus parrochialem Ecclesiam de S. Albino cum pertinentiis eiusdem, & eis eandem de voluntate & assensu dilecti consanguinei nostri GALTERI Archidiaconi eiusdem loci, concessimus iure perpetuo possidendam &c. Actum anno mxciii. Lucius quoque III. Pontifex Romanus ad eius petitionem omnia Paraclitensis Cœnobij bona confirmauit, circiter annum mclxxxii. Obijtque xiv. Cal. Nouembris post annum tatum mxcviii. Sic enim de ea Calend. Paraclit. xiv. Cal. Nouemb. obiit bone memorie Milesendis Abbatisa nostra, anime cuius propicietur Deus. Et Calend. Gallicum, Melissanz Abbesse gist ou cuer au Prestres.*

VI. AELIPDIS, cuius etiam obitum commemorat idem Calendarium hoc modo, *II. Cal. Mart. obiit bone memorie Aelipdis Deo sacrata Abbatisa nostra.*

VII. I. sub annum MCCIII. fortè IACOBA, cuius adhuc obitus sic adnotatur in Calend. Paracl. viii. Idus Mart. obiit *bonae memoriae Iacoba Deo sacrata Abbatisa nostra*. Et in Calendario Gallico, *Madame l'Abbaïsse Iaue gist ou cuer deuant les huis des prones*.

VIII. IOANNA, de qua rursus idem Calendarium ii. Nonas Octobris obiit *bonae memoriae Ioanna Deo sacrata Abbatisa nostra*.

IX. IOANNA altera, commemorata similiter in eodem Calendario sub diem viii. Calend. Ianuar.

X. E. iam Abbatisa anno MCCXXXIV. Minuit numerum Sanctimonialium Prioratus de Bosrenco anno MCCXLIII. mense Maio. Nec dubito quin EVSTACHIA illa sit, cuius obitus diē sic quoque recenset Paraclit. Calendarium, xviii. Cal. Febr. obiit *bonae memoriae Eustachia Abbatisa Deo sacrata nostra*.

XI. MARIA, soror Odonis Rothomagensis Archiepiscopi, quę cœpit regere versus annū MCCXLIX. Extātque literæ Innocentij iv. Papæ Thelaurario Senonensi pro ea directæ, quarū substantia talis est. *Cum Maria monialis de Paraclito in Abbatiam ipsius Monasterij assumpta fuisset, locum quem in eodem Monasterio velut monialis habuerat, Agneti abbatisse Monasterij de Pomeria Senon. diocesis tunc Moniali S. Marie Antistiod. prout ad eam spectare dicitur, conferre curauit. Quia verò dicta Agnete postmodum assumpta in Abbatissam eiusdem Monasterij de Pomeria prefatus locus vacat ad presens, maximè cum ibidem certus numerus Monialium habeatur: Nos obitu venerabilis fratris nostri Archiepiscopi Rothomagensis, qui pro eadem Maria germana sua personaliter Apostolicam gratiam impetravit, ipsius Mariae supplicationibus annuentes, litterarum nostrarum auctoritate sibi duximus concedendum, ut si forte pro infirmitate ac debilitate sui corporis successerit regimini Abbatisse, prædictum locum, aliqua consuetudine seu constitutione contraria non obstante, ad opus suum quoad vixerit valeat retinere. Datum Laterani vii. Cal. Maij, Pontificatus nostri anno xi. Concessit etiam illi idem Innocentius auctoritate sua, quòd in Monasterio ipso Paraclitensi vnā mulierē idoneam in Monialem instituere valeret, non obstante statuto de certo sororum numero, eiusdem Monasterij iuramento, vel confirmatione Sedis Apostolicæ, seu quacumque firmitate vallato. Nec administrationem morte finivit nisi post annū MCCLXXXII. III. Nonas Septembris. Calendarium enim Paraclitense diem obitus eius ita consignatum refert, iii. Nonas Sept. obiit *Maria bonae memoriae Abbatisa nostra*. Et Calendar. Gal-*

licum, ad eandem diem, *Marie Abbessè gist ou cuer au Prestres.*

XII. AGNETA DE BORDIS, cuius quoque diem postremum sic adnotat idem Calendar. XIII. *Cal. Iunias, obiit bonæ memoriæ Agnete de la Borde Abbatissa nostra.*

XIII. CATHARINA DE BARRIS, anno MCCCXX. Obijt iv. Cal. Decembr. quo die Calendarium præfatum illius obitum commemorat his verbis, iv. *Cal. Decembr. obiit bonæ memoriæ Katharina Deo sacrata Abbatissa nostra.* Et Calendar. Gallicum, *Caterine Abbessè gist ou cuer au Prestres.*

XIIII. AALIS DE BARRIS, quæ cum Guidone Abbate Vallis Lucentis quandam discordiam cōposuit anno MCCCXXXVII.

XV. ISABEL, cuius meminit etiam Paraclit. Calendar. hoc modo, III. *Cal. Septembr. obiit bonæ memoriæ Isabel Deo sacrata Abbatissa nostra.*

XVI. GVILLEMETA DE LA MOTHE, obiit xviii. Cal. Ianuar. anno MCCCCXXI. vt refert idem Calendarium. Sepultaque fuit ante maius altare.

XVII. CATHARINA DE COVRCELLES, Abbatissa Paraclitensis, & Beatæ Mariæ ad Moniales Trecens. Hæc struxit claustrum, refectorium, dormitorium, & alia ædificia. Obijtque vii. Idus Iulias, anno MDXIX. quo etiam Iacobus Ragnier Episcopus Trecensis, qui hoc Monasterium reformauerat in muris & craticulis anno MDIX. scilicet annis CCLXXIX. post eius exordium & principium, fato cessit, teste Paraclit. Calendario.

XVIII. CAROLA DE COLIGNY, de qua rursus ipsum Calendarium, ix. *Cal. Maias obiit bonæ memoriæ Karola de Colligny Abbatissa nostra anno Domini MDXXXIII.*

XIX. ANTHONETA DE BONNEVAL, cuius item obitus diem sic commemorat idem Calendarium, ad xxiii. Cal. Iun. *Hæc die Veneris in crastino Ascensionis Domini xx. Maij inter meridiem & primam horam anno eiusdem Domini MDXLVII. obiit sapiens & prudens Domina, Domina Anthoneta de Bonneual huius Cænobij Abbatissa.*

XX. RENATA DE LA TOVR, Religiosa Pisciacensis Cœnobij. Paraclitum non adiit, quia cita morte de medio sublata est xii. Cal. Maij, anno MDXLVIII.

XXI. IOANNA DE CHABOT, obiit xxv. die Iunij, anno MDXCIII. vii. expeditum Calendarium adnotat.

XXII. LEONARDA DE TYRENNE, obiit prima Septembris die, anno Domini MDC.

XXIII. MARIA DE LA ROCHE FOUCAVT, virtutibus & meritis insignis, atque sanguinis profapia commendabilis, quæ prudenter ac piè regit etiam nunc hoc anno MDCXV.

VERVM vt hæ Notæ, quæ ab Abaelardo cœperunt, in eum similiter desinant, paucis nunc adhuc subiūgendū quod ipse in Historia Calamitatum suarum omisit, nempe condēnationem alteram libri sui de Trinitate Senonis factam, de qua sic Ortho Fringensis inter cæteros, lib. 1. de rebus gestis Frider. 1. cap. XLVIII. *Sedente in urbe Roma Innocentio, in Francia verò Lodouico senioris Lodouici filio regnante, Petrus Abaelardus, ab Episcopis Abbatēque Bernardo denuò ad audiētiā apud Senonas euocatur, presentib. Lodouico Rege, Theobaldoq; Palatino Comite, & alijs Nobilibus, de populoque innumeris. Vbi dum de fide sua discuteretur, seditionem populi timens, Apostolicæ sedis præsentiam appellauit. Episcopi verò simul & Abbas missa ad Romanam Ecclesiā legatione, ac eis pro quibus impetebatur Capitulis, damnationis eius sententiā in litteris reportauerunt.*

Idem narrant etiam Continuator Sigeberti, Robertus Autissiodorensis, Guillelmus Nangius, Vincentius Beluacensis, Ioannes S. Victoris Canonicus, Chronici Turonensis Scriptor, & alij. Sed aliter quàm omnes, acriorēque animo Gofridus Claræuallensis Monachus lib. III. vitæ S. Bernardi, cap. v. cū ait. *Fuit in diebus illis Petrus Abailardus Magister insignis, & celeberrimus in opinione scientiæ, sed de fide perfidè dogmatizans. Cuius cū blasphemys plena grauissimis volitare undique scripta cœpissent, profanas nouitates vocum & sensuum viri eruditi atque fideles ad Dei hominem, S. Bernardum, detulerunt qui nimirum solita bonitate & benignitate desiderans errorem corrigi, hominem non confundi, secreta illum admonitione conuenit. Cum quo etiam tam modestè tamque rationabiliter egit, vt ille quoque compunctus ad ipsius arbitrium correcturum se promitteret vniuersa. Cæterum cū recessisset ab eo Petrus idem, consilijs stimulatus iniquis, & ingenij sui virib. plurimòque exercitio disputandi infelicitè fidens, resijt à proposito saniori. Expetens denique Senonensem Metropolitanum, quod in eius Ecclesiā celebrandum foret in proximo grande Concilium, Claræuallensem causatur abbatem suis in occulto detrahare libris. Adde quoque paratam se esse in publico sua defendere scripta, rogans vt*

prædictus Abbas dicturus si quid haberet ad Concilium vocaretur. Factum est ut postulauit. Sed vocatus Abbas venire penitus recusauit, suis hoc non esse renunciatis. Postea tamen magnorum virorum monitis flexus, ne videlicet ex ipsius absentia scandalum populo, & cornua crescerent aduersario, demum pergere acquieuit, tristis quidem, nec sine lacrimis annuens, sicut in Epistola ad Papam Innocentium ipse testatur, in qua plenius lucidiusque negotium omne prosequitur. Affuit dies, & Ecclesia copiosa conuenit, ubi à Dei famulo Petri illius in medium scripta prolata sunt, & erroris capitula designata. Demum illi optio data est aut sua esse negandi, aut errorem humiliter corrigendi, aut respondendi si posset obijciendis sibi rationibus pariter & sanctorum testimonijs Patrum. At ille nec volens resipiscere, nec valens resistere sapientiæ & spiritui qui loquebatur; ut tempus redimeret, sedem Apostolicam appellauit. Sed & postea ab egregio illo Catholice fidei aduocato monitus, vel iam sciens in personam suam nihil agendum, responderet tam liberè quàm securè, audiendus tantum, & ferendus in omni patientia, non sententia aliqua feriendus: hoc quoque omnimodis recusauit. Nam & confessus est postea suis, ut aiunt, quòd ea hora maxima quidem ex parte memoria eius turbata fuerit, ratio caligauerit, & interior fugerit sensus. Nihilominus tamen Ecclesia quæ conuenerat dimisit hominem, multauit abominationem; à persona abstinens, sed dogmata praua condemnans. Quando verò Petrus ille refugium inueniret in sede Petri tam longè dissidens à fide Petri? Et ipsum ergo auctorem eadem sententia cum erroribus suis Apostolicus Prasul inuoluens, scripta incendio, scriptorem silentio condemnauit. Quicquid sit, Berengarius Pictauiensis Abaelardi quondam auditor, hæc videns, nomen ac famam Doctoris ac Præceptoris sui tunc contra omnes tueri ausus est. Scripsitque pro eo Apologiam illam, quam inter eius Opera nunc etiam ex Bibliotheca Regis Christianissimi cudendam curauimus, etsi plenam ingentis acrimoniæ contra S. Bernardum. Quare & ob hoc postea culpatus à multis, se excusauit quòd adolescens, & joco potius quàm seriò scripsisset. Id enim testatur ipsemet in Epistola ad Episcopum Mimatensem, & ex eo Franciscus Petrarcha in Apologia, ubi virum non infacundum vocat, his verbis. Damnauit Bernardus Clarouallensis Abbas Petrum Abaelardum literatum quondam virum. Huic iratus Berengarius Pictauiensis, vir & ipse non infacundus ac discipulus Petri, contra Bernardum Librum unum scripsit non magni quidem corporis, sed ingentis acrimonia. De

quo postmodū à multis increpatus, se excusavit quòd adolescens scrip-
sisset, & quòd sibi viri sanctitas nondum penitus nota esset.

SOLVTO autem illo Cōuentu, qui celebratus est anno MCXL. in-
fœlix Abaelardus incertus quid ageret, Cluniacū se cōtulit, vbi
humaniter exceptus est à Petro Mauricio dicto Venerabili, eius-
que & Cistercēsis abbatis opera paulo post idem & S. Bernardus
collocuti inimicitias posuere. Quod & ipse Cluniacensis Ab-
bas Innocentio II. significavit. Nec tamen propterea Abaelar-
dus Apologeticum pro suæ innocētiæ excusatione scribere de-
stitit. Quod cū innotuisset Guillelmo S. Theodoricī Abba-
ti, qui S. Bernardum intimo diligebat affectu, seque transtule-
rat ad Ordinē Cisterciensem apud Signiacum, vbi feliciter
obiit, Cantici Canticorum reliquit expositionē, vt aduersus eū
stili sui acumen dirigeret. Hoc enim declarat ipse Guillelmus in
Epistola ad Fratres de Monte Dei, his verbis: *Sunt præterea & a-
lia Opuscula nostra, Libellus de sacramento altaris, meditationes nonitijs ad
orandum formandus spiritibus non vsquequaque inutiles, & super Canticū
Canticorum ad illum locum, Paululum cū pertransissem, eum inueni quē
diligat anima mea. Nā contra Petrum Abaelardum**, qui prædictum opus
ne perficerem effecit: neque enim integrum mihi fore arbitrabar tam delicato
intus vacare otio, ipso foris fines fidei nostræ nudo vt dicitur gladio itā cru-
deliter depopulante. Composuit autem tres libros, sub nomine Dis-
putationis Catholicorum Patrum contra dogmata Petri Abaelardi, quos
& sapientissimo Præsuli Hugoni Rothomagensium Archiepis-
copo dedicauit. Suntque illi proculdubio, de quibus Gaufre-
dus Monachus Cisterciensis in Epistola data ad Henricū Car-
dinalem Albanensem, quem sciebat interfuisse Remensi Con-
cilio, vbi Eugenius III. Papa Gislebertum Piætauiensem Episco-
pum absoluerat potius, quàm condemnauerat, hoc modo lo-
quitur; *Audiui etiam quòd super damnatione Petri Abaelardi diligentia
vestra desideret plenius nosse similiter veritatē, cuius libellos piæ memo-
riæ Dominus Innocentius Papa II. in vrbe Roma & in Ecclesia beati Pe-
tri incendio celebri condemnauit, Apostolica auctoritate hæreticum illum
denuncians. Nam & ante plures annos venerabilis quidam Cardinalis &
Legatus Romanæ Ecclesiæ Cono nomine, Regularis quondam Canonicus
Ecclesiæ S. Nicolai de Arnaasia, Theologiam eius Sueſſionē Concilium cele-
brans similiter concremauerat, ipsum Petrum præsentem arguens, & conui-
ctum de hæretica prauitate condemnans. Vnde vestro si placuerit desiderio,
per Libellum de vita S. Bernardi & per eius Epistolas missas ad curiam sa-*

tisfiet. Inueni tamen in Claraualle Libellum cuiusdam Abbatis Nigrorum Monachorum, quo errores eiusdem Petri notantur, quem & olim me vidisse recordor: sed à multis annis, ut custodes Librorum asserunt, studiosè quaesitus, primus quaternio non potuit inueniri. Propter quod propositi nostri est in Franciam destinare ad Monasterium cuius Abbas exiit, qui eundem librum composuit, & si recuperare potero, transcribi facere codicem totum, & mittere vobis. Credo enim quòd vestra inquisitioni sufficere debeat, ut cognoscatis, quæ, quemadmodum, quare sint condemnata. Ac ne quis miretur quod de primo quaternione illi libri dicit, habeo nunc ipsissimum exemplar dono viri docti & humani Nicolai Camusatij Canonici Ecclesiæ Trecentis, in cuius capite scriptum adhuc legitur, *Deest vnus quaternus, qui tennerit obedientiam scriptorum, illum requirat.*

VERVM & Gaufredus etiam ille, primò Abaelardi auditor, indèque Cisterciensis Monachus, Autissiodorensis vulgò cognominatus, aduersus eundem Abaelardum præceptorem suum scripsit. Quod vel ante omnes asserit Helinandus, alter in Frigido Monte Monachus, qui & ipse quædam Gaufridi verba refert in hunc modum, *Huius Petri aliquando fuerat discipulus Gaufredus Autissiodorensis, qui multo tempore fuit Notarius S. Bernardi, qui inter cetera de eodem Petro dixit: Ego mihi aliquando recolo magistrum fuisse illum, qui precium redemptionis nostræ euacuïs, nihil aliud in sacrificio Dominicæ passionis commendabat, nisi virtutis exemplum, & amoris incentiuum. Quod enim Scripturæ perhibent de potestate diaboli precioso illo sanguine humanum genus esse redemptum, in eo solo constare dicebat, quòd exemplum nobis exhibitum est vsque ad mortem pro veritate & iustitia certandi, & adhibuit velut quoddam incentiuum amoris, cum ex impenso amore data est occasio redamandi. Et quidem magna sunt hæc & vera, sed non sola. Benedictus Deus, qui mihi simul & vobis Magistrum dedit postea meliorem, per quem prioris redarguit ignorantiam, & insolentiam confutauit, secundum quem tria specialia in passione sua Christus nobis exhibuit, exemplum virtutis, incentiuum amoris, & sacrificium redemptionis. Quòd tertium euacuanti heretico nihil prodesse tria cetera potuerunt. Hæc & alia multa dictus Gaufredus contra Petrum magistrum suum fortiter & Catholicè scripsit. Eadem verba recitant & Vincentius Beluacensis lib. XXI. Speculi Historialis ca. XVII. & Ioannes Monachus S. Victoris in Chronico sub annum Christi MCXI.*

INTERIM verò Abaelardus in morbum incidit, & valetudinis causa Cabilonum ab Abbate suo Petro missus, ibi in Monaste-

S. Marcellini Cluniacensis Ordinis excessit è vita die XXI. Aprilis anno Christi MCXLII. ætatis suæ LXIII. Hoc enim prodit Calendarium vetus Paraclitense Gallico sermone conscriptum his verbis, *Maître Pierre Abaelard fondateur de ce lieu & instituteur de sainte religion trespassa le XXI. Avril âgé de LXIII. ans.* Nec referre opus est quanta cum austeritate, pœnitentia, deuotione, postremum illum vitæ suæ terminū clausit. Petrus ipse Mauricius Abbas eius id optimè diffuseque descripsit in Epistola ad Heloisam Paracliti Abbatisam, quam nos etiam supra iam inseruimus. Sed non prætereundum quod eum eodem Petro testantur Robertus Autissiodorensis, Guillelmus Nangius, & alij, scilicet, Heloisam illam quondam Abaelardi cōiugem, magnam post eius mortem ei in assiduis precibus fidem seruasse, corpusque eius de loco ubi obierat ad prædictum Paracliti Monasterium transtulisse. Denique & ipsa, sicut in Chronico Turonensi legitur, in aegritudine posita præcepit ut mortua intra mariti tumulum poneretur. Et sic eadem defuncta ad tumulum apertum deportata, marit⁹ eius, qui multis diebus ante eam defunctus fuerat, elevatis brachijs illam recepit, & ita eam amplexatus brachijs suis strinxit.

REFERENDA AD PAG. 1144.

HIs ita breuiter adnotatis, iam superest vt aliqua quæ festinante nimis stylo de Miliduni atque Corboili Comitibus suprâ retuli pag. 1144. hîc iterum diligētius ac attentius disquiram, antequàm in huius velitationis portum me recipiam. Sic igitur ea, quæ dicta sunt ibi, concipienda atque legenda moneo.

MELDVNUM CASTRUM, ET SEDEM REGIAM] Melduni siue Meliduni castrum & Comitatum Hugo Rex Francorum Burchardo Vetulo, Comiti Vindocinensi, ac Lauarзинi Domino concessit in beneficium. Postea Rainaldus Burchardi filius, Cancellaris Franciæ, & Episcopus Parisiensis, Melidunensis Comes extitit sub Roberto Rege, sicut ex tabulis Ecclesiæ S. Dionysij de Carcere palam est. Sed hoc mortuo Comitatus redijt ad Hêricum i Roberti filium, qui Vicecomitem ibi constituit. Nam & in litteris Philippi qui fundationem S. Martini de Campis à patre factam confirmauit, *Vrso Vicecomes Melidunensis* inter alios Aulæ Regiæ milites subscri-

pluit. Denique Philippus ipse Henrici filius sedem Regiā Meliduni posuit, ubi & vita functus est Abaelardi nostri tempore, sicut testatur S. Dionysij Abbas in vita Ludouici Grossi Philippo geniti, his verbis, *Cumque ferè sexagenarius esset, Regem exuens apud Melidunum castrum super fluuium Sequana, presente Domino Ludouico extremum clausit diem.*


PAG. 5.

AD CASTRUM CORBOLII, QVOD PARISIACAE VRBIVICINIVS] Antiquum est & hoc castrum, ac si non Regum, saltem Reginarum Sedes. Quod vt melius intelligatur, veteres etiam Corbolij, siue Corboili, aut Curbolij Comites adnotabo. Et certè antiquissimus, quem legerim, Corboliensis Comes fuit Haino, qui sub annum Christi DCCCXII. vixisse dicitur. Nam Ioannes S. Victoris Monachus, de eo sic ad illum annum scribit, *Eodem tempore corpus B. Guenaili Abbatis à Britannia propter timorem Northmannorum translatum in Gallias, Deique dispositione in castro Corboliensi receptum est à Comite Haimone, & in Ecclesia in honore ipsius à dicto Haimone constructa honorifice collocatum est.* Et Calendarium S. Guenaili, ad diem XXI. Maij, *Anniuersarium sollemne Haimonis Comitùs fundatoris B. Guenaili de Corbolio, qui dedit eidem Ecclesie hospites, quos habemus ultra pontem Sequanae.* Verum si ita est, annorum longa distantia persuadet Haimonē hunc alium ab Haimone illo Corboliensi Comite fuisse, qui sicut refert Odo Fossatensis Monachus, *ad limina SS. Apostolorum Petri & Pauli orationis gratia Romam pergens ibi in eodem itinere finem vite accepit.* Nam id versus initium regni Hugonis accidit. Et eo defuncto Burchardus Vindocini Comes, uxorem eius nomine Elizabetham, nobili & ipsam progenie exortam, sibi coniugio copulauit: ac in eo copulae thalamo Rex Hugo castrum Melidunum atque Corboilum, Comitatumque Parisiaca urbis illi dedit. Quare deinceps Burchardus & ipse se pro Comite Corboliensi gessit. Aut si postremus hic Haimo ille est, qui S. Guenaili siue Guenaldi Ecclesiam construxit, necesse videtur corpus eius sancti seriùs Corbolium allatū fuisse quàm præfatus Ioannes adnotauit. Et hæc opinio mihi eò magis placet, quòd Burchardus Elizabethæ cōiugis eius maritus, in litteris pro S. Guenaldo datis, illius etiam concessionis meminit, quam præfatæ Ecclesiæ fecerat, his verbis: *Notū fieri volumus omnibus fidelibus Clericis & laicis, quòd ego Burchardus Comes Corboilenfis, ob remedium animæ meæ, antecessorum success*

forumque meorum, precibus quoque Guillaudi eiusdem loci Canonici, & Magistri filij mei Rainaldi S. Guenailo terrulas, quas Haimo Comes prius dederat eidem sancto, concessit, &c. Ceterum de Burchardo hoc Corboilensi Comite mentio fit etiam in Calendario S. Guenaili, hoc modo: Item anniuersarium Burcardi Comitis, qui dedit eidem Ecclesie quosdam hospites apud Mundenillam. Postea Corboliensis Comes effectus est Guillelmus, qui detectioni corporum S. Dionysij & sociorum subscripsit tempore Henrici primi Regis. Nec affirmare velim eum Elizabethæ & Haimonis prim. yri sui filium extitisse. Post Guillelmum Rainaldus Comitatum tenuit adfuitque confirmationi foundationis S. Martini de Campis à Philippo I. Rege factæ, sub annum Christi MLXVII. Rainaldo Burchardus II. successit, qui anno MLXXI. claustrum S. Exuperij Corboliensibus Canonicis concessit. Et hic filium habuit Odonem, post se quoque Corbolij castri Comitem, de quo Tabulæ S. Martini de Campis ad annū Mxcvii. Refertque Suggestus in vita Ludouici Grossi, hunc Guidonis Rubei fratruelem fuisse, ac Stephani Comitis lācea percussum interisse. Quo facto, consanguineus eius Hugo Creciacensis Guidonis Rubei filius, Corbolium castrum, cuius se heredem iactabat, Ludouico Grosso Regi Philippi filio, cum omnibus angarijs, salijs & possessionibus abiurare coactus est. Denique Ludouicus iunior Ludouico Grosso siue seniore genitus Adelæ vxori suæ terram Corbolij dotalitij nomine reliquit. Docent enim hoc literæ Philippi II. Regis Adelæ filij Corbolij datæ anno MCLXXX. his verbis: Philippus Dei gratia Francorum Rex. Nouerint vniuersi presentes & futuri, quòd Adela mater nostra dum terram Corbolij nomine teneret dotalitij, Petro Clerico suo beati Exuperij Canonico intuitu seruitij sui donauit domum, quam Isabellis & Bertrannus filius eius vendiderant Helie Iudeo, &c. Sicque patet qualiter Corboilum castrum regia quoque sedes effectum fuerit. Imò & ab hoc tempore Vicecomites etiam ibi sicut Meliduni constituti sunt à Regibus. Nam Tabulæ B. Mariæ de Gornaio Paganum Vicecomitem de Corbolio memorant anno MCCV.

F I N I S.

M M M M m m m ij





I N D E X
RERVM ET VERBORVM
NOTABILIVM, QVÆ IN HOC
OPERE CONTINENTVR.

A



- Alis de Barris Abbatissa Paraclit. [1190](#)
Abba Pater, quid significat. [635](#)
Abbates olim Senes dicti. [144](#)
Abbatissa qualis esse debet [143. 144](#)
& seq.
Adam S. Dionysij Abbas [124](#). qualis vitæ 19. benignus erga pauperes [1153](#). & pius 1154. interfuit Concilio Sueffionensi aduersus Abaelardum 23. quando obiit. [27. 1172](#)
Adæ Abbatis S. Dionysij Charta de quinque modijs frumenti pro pauperibus 1153. de dono Ecclesiæ S. Perri ad Ecclesiam S. Pauli. [1154](#)
Adelais Regina mater Roberti Regis Argentolij Abbatiam restaurauit. [1150. 1151](#)
Adhelaida vxor Guidonis Rubei [1174](#).
in Adultera liberanda cur Dominus dixit, *Qui sine peccato est vestrum, primus in eam lapidem mittat*. [399](#)
[400](#).
Aelipdis Abbatissa Paraclit. [1188](#)
Agatha Monialis, neptis Abaelardi [1187. 1188](#).
Agnes de Marigniaco. [1186](#)
Agnes Priorissa Paraclit. neptis Abaelardi. [1187. 1188](#)
Agneta de Bordis Abbatissa Paraclit. [1190](#).
S. Aigulsi Pruinenfis Cella [27. 1172](#).
Alanus Britaniæ Dux. [1180](#).
Albericus Remensis, Anselmi discipulus 9. 42. Catalaunensis Episcopus electus 1162. & tandem Archiepiscopus Bituricensis. [1163](#)
Altare manufactum in Ecclesia. [467](#)
Amalricus de Monte forti [1176](#).
Gornaii Dominus. [ibid](#)
Amicitia quid. [277](#)
Amor quid. [277](#)
Angelorum ordines. [643](#)
Ansellus de Guarlanda Dapifer. [1174](#)
[1175](#).
Ansellus de Triagnello. [1184. 1186](#)
Anselmus Cantuariensis Archiepiscopus. [335](#)
Anselmus Laudunensis Decanus magister Petri Abaelardi 7. [1147](#).
1148. quàm illustris & celebris, [ibidem](#) & [1164](#). quando obiit 20. [1163](#). vbi sepultus, & eius Epitaphium. [1163](#)
Anselmus Abbas S. Vincentij Laudun. [1147](#)
Anselmus Becssus Thesaurarius Ec-

INDEX RERVM ET VERBORVM.

clesiæ Laudun. Thesaurum fura-
tus. [1147](#)
Anselmus abbas S. Medardi Sues-
sion. [1167](#)
Anthoneta de Bonneual Abbatiſſa
Paraclit. [1190](#)
Apelles, de quo Paul. Apost. quis [9719](#)
Apparitiones Domini resurgētis
quot fuerunt [391. 392. 393. & seq.](#)
Arduzo fluuius [29. 347. 1177.](#)
Argentolij siue Argenteoli Abbatia
[17. 18](#) [57.](#) à quibus fundata [1150. 1180](#)
restaurata à Matre Roberti Regis,
& Monialib. commissa ibid & se.
olim iuris S. Dionysij [1180.](#) à Suge-
rio Abbate vendicata [34. 1182. 1183](#)
Argentolij Sanctimoniales translatæ
in monasteriū B. Mariæ de Footel,
& in oratorium Paraclit. [1183. 1184](#)
in Ascensionis Domini die Sermo
[865.](#) item in octaua. [869](#)
in Assumptione B. Mariæ [Sermo. 908](#)
Astrolabius Abaelardi & Heloise fi-
lius. [13. 1149. 1150](#)

B

Baptismus aquæ paruulis æquè
prodest vt magnis [475. confer-](#)
ri que potest etiam à peccatore. [477](#)
Baptismi aquæ sacramentum defen-
ditur aduersus hereticos. [474](#)
Baptismi sacramentum cur Circun-
cisioni successit. [758](#)
sine Baptismo etiam paruuli saluari
non possunt, nisi martyrium inter-
ueniat. [564.](#)
Bartholomæus Episcopus Laudu-
nensis. [1164](#)
Baudaridus Episcopus Suesſionensis
[1169.](#)
Beatitudines septem tantum [408. 409](#)
S. Benedicti Regula viris tantum
scripta, non feminis. [79. 80](#)
Berengarius Abaelardi pater [7. 1142](#)
Berengarius Pictauiensis Abaelardū
defendit [1192. 1193.](#) eius Apologia
pro eo: [302. 303. & seq.](#)

S. Bernardus Monachorum pater
[1177. 1178.](#)
S. Bernardi Epistolę contra Petrum
Abaelardum [270. 271. & seq.](#)
Bona septem tot beatitudinib. re-
spondentes. [408](#)
Britannia, terra leuis. [41. 1142](#)
Burchardus Meldēsis Episcopus [1173](#)
Burchardus I. Corboliensis Comes
[1144. 1195.](#) item Melidunensis. ibid.
Burchardus II. Corboliensis Comes
[1197.](#)

C

Cabilonensis soli amœnitas [341](#)
Calices duo discipulis dati qua-
liter accipiendi. [397. & seq.](#)
Cancellarius Vniuersitatis Paris. è
domo S. Genouefæ. [1146](#)
Cantica sanctarum feminarum. [433](#)
Cantriciis officium in Monasterio. [155](#)
Cantus & laudes Ecclesiæ defendun-
tur aduersus hereticos. [468](#)
Capilli capitis, eloquia diuina. [420](#)
Caritas quid. [277](#)
a Carnibus non abstinendum & cæ-
teris superflue vescendum. [173](#)
qui à Carnibus abstinendum prædi-
cant, & non ab alijs cibis, arguun-
tur. [180](#)
Carola de Coligny Abbatiſſa Para-
clit. [1190.](#)
Catharina de Barris Abbatiſſa Para-
clit. [1190](#)
Catharina de Courcelles Abbatiſſa
Paraclit. [1190](#)
Cellerariæ officium in Monasterio
[157. 158.](#)
Chaos magnum firmatum inter La-
zarum & diuitem, quid. [402. 403](#)
Cibi Monialium quales. [199](#)
Ciborum comestio num indifferens
[484. 485.](#)
ex Cibis num aliquid reiiciendum, &
cur potissimum. [703. 704](#)
Circuncisio cur in antiquo populo
præcessit [751. 752.](#) cur ea cessante
MMMMmm iij

baptismus ei successit 758. & cur
 Dominus utraque suscepit. 759
 Circumcisionis signum an soli popu-
 lo Israeli & eius vernaculis præce-
 ptum 530. 531. & cur illud Abra-
 ham accepit 560. 561. quid confe-
 rebat aut figurabat 561. 563. & num
 sine eo quis saluari poterat. 564
 in Circumcisione Domini Sermo. 751
 Conanus, seu Cono Prænестinus E-
 piscopus sedis Apostolicæ legatus
 in Galliam 20. 1165. Concilium
 Sueffionense tenuit aduersus Abae-
 lardum. 20. 21. & seq. 1165. 1166
 Concubitus quinam inculpabilis.
 445. 446.
 Concupiscentia quid, & utrum pec-
 catum. 618
 Confessio oris necessaria, & quot
 modis dicitur. 478
 an sine Confessione quis potest sal-
 uari. 480.
 Confirmationis sacramentum. 996 b
 Coniugij siue matrimonij bonum
 444. 445. & seq.
 Consolamentum hæreticorum quid,
 & eius modus. 481
 Continentes a uibus comparati. 441
 Contritio cordis interior necessaria
 478.
 Corbolum castrum Parisijs vicinum
 5. 1144. dotalitii nomine Adelæ Re-
 ginæ datum. 1144. 1145
 Corbolij Comites 1144. 1196. Viceco-
mites. 1197
 Cornu altaris, sacrificium Christi. 795
 Corporis & sanguinis Christi sacra-
 mentum aduersus hæreticos de-
 fenditur. 469. 470. & seq.
 Credere Deo, Credere Deum, &
 Credere in Deum. 371. 372
 Crux per ferculum Salomonis signi-
 ficata. 808
 Crucis patibulum quàm ignominio-
 sum apud Iudæos. 860. 861
 de Cruce Sermo. 860

D

Daniel Abbas S. Medardi. 1168
 Dedicatio Templi Salomonis
 qualiter facta. 921
 in Dedicatione Ecclesiæ Sermo. 921
 Defuncti uiuorum orationibus &
 beneficijs releuantur. 488
 Deus vnus, non duo ut hæretici dice-
 bant. 483
 Deus, timor interpretatur. 687
 Deus an per opera sua recognosci
potest 1103. 1104. vnus potius quàm
 plures credi debet 1105. 1106. quo-
 modo verè dicatur omnipotens
 1107 & seq. utrū plura facere possit
 vel meliora quàm facit 1112. 1113. &
 seq an locomoueri potest. 1124. 1125
 Diaconæ & Diaconissæ. 944
 Diaconorum institutio. 944.
 Dialecticæ disciplinæ laus. 238. 239
 & seqq.
 Dici nomine patiter & nox in Scri-
 ptura comprehenditur. 419
 Dilectio vera & perfecta quæ: 622
 Dilectio Dei & proximi qualiter or-
 dinari debet. 690. 691
 Dilectionis proximi præceptum ante
 aduentum Christi imperfectū. 418
 per Dilectionem proximi num lex
 impleatur. 616. 690. 691
 circa Dilectionem proximi duo sunt
 naturalia regis præcepta. 423
 Dionysia Petri Abaelardi soror. 1149.
 S. Dionysius Areopagita num idem
 qui Corinthius 25. 224. 1169. 1170
 S. Dionysij Corinthij corpus Abbati
 S. Dionysii in Francia donatū ab
 Innocentio III. Papa 1170. 1171
 S. Dionysii Abbatia secularis admo-
 dum vitæ 19. reformatā ab Odilo-
 ne Abbate Cluniacensi. 1153
 Diuersum quot modis essentialiter
 sumitur. 1077
 Dolense Monasterium. 1179

E

Ebbo Bituricus Princeps. 1179
 Ebrietas statū mentis euertit. 432

Electum quid, & eius mystica explicatio. 748.749

de Eleemosyna Sermo. 935

in Epiphania Domini Sermo. 764

Episcopi quales esse debent. 965.b

Epistolæ Apostolorum ad quid utiles

492.493.

Ermengardis Abbatisa Paraclitensis. 1188

Ermentricus, Argentolij fundator. 1181.

Eugenij III. diploma confirmatorium omnium bonorum Paraclitensis Monasterij. 349.350

Eustachia Abbatisa Paraclit. 1189

F

Felix Abbas S. Gildasij. 1179

Felix Abbas S. Petri de Cella Trecentensis. 1172

Ferculi Salomonis expositio. 808. & seqq.

Fides quid 977.979.& seq.

Fides Catholica quæ. 982

quod Fideles ab infidelibus testimonia sumere licite possunt. 1041

Filij nomine Sapientia significatur 985.993. & seq.

Fulbertus Canonicus Paris. Heloizæ auunculus. 10.1149

Fulconis Diogilli Prioris Epistola ad Abaelardum, 217

G

Gaius, de quo Paulus Apost. quis 723.

Garnerius Episcopus Trecentensis. 1189

Gaufredus Comes Britannicæ. 1179

Gaufredus Monachus Cisterciensis aduersus P. Abaelardum scripsit 1194.

Gaufridus Episcopus Carnotensis 22.1166.& 1167.

S. Genouefæ Ecclesia extra urbem Paris. 6.1145.1146. olim Scholarum & litterarum sedes 1146. in Canonicos regulares mutata. 1146

Gentes vnde dicuntur 105. & inuentiones in eas. 512.513

Gentium conuersio. 883

Gertrudis prima Pomerij Abbatisa 355.

S. Gildasij Ruensis Abbatia. 32. à quo primum fundata 1078.1079 & eius restauratio. 1179.1180

S. Gildasij reliquiæ in Dolense Monasterium delatæ 1179

Gozlenus Abbas Floriacensis, deinde Archiepiscopus Bituricensis 1179

Gladij duo in Cœna Domini reperti quid designant. 842

Gornauium castrum. 1174.1175.1176

Gratia quid. 733

de Gratia Dei iniquis denegata questio. 652.653

S. Guenaili Corboliensis fundatio 1196

Guichardus Prior S. Aigulfi de Pruino. 1172.

Guido Rubeus fundator B. Mariæ de Gornaio. 1174

Guillelmus Campellensis Abaelardi Præceptor 4.1144 Parisiens. Archidiaconus 5.1145. Canonicus Regularis in Monasterio S. Victoris ibi.

Episcopus Catalunensis. 57. 1146

1147. quando obiit. 20.1147.1163

Guillelmus Corboliensis Comes 1197

Guillelmus de Guarlanda Dapifer 1173.1174.1175.

Guillelmus Abbas S. Theodorici aduersus Abaelardum scripsit. 1193

Guillemeta de la Mothe Abbatisa Paraclit. 1190

H

Habitus sanctimonialium qualis esse debet. 198

Haimo Corboliensis Comes. 1144 1196

Hato Trecentis Episcopus 1177.1186

Helia de Villamuro. 1186

Helix translatio figura ascensionis Christi. [869.870](#)

Helisindis Abbatisa Paraclitensis. [1188.](#)

Heloym apud Hebræos quid significat. [996.997](#)

Heloisa Fulberti Canonici Parisiensis neptis [10.1149.](#) Abaelardo traditur instituenda, & ab eo adamatur, [10.11.](#) imprægnatur ac parit filium [12.13.](#) dehortatur Abaelardum à nuptijs [13.14.](#) ab eo ducitur in uxorem [16.11.](#) miratur ad Abbatiam Argenteoli [17.](#) ubi fit Sanctimonialis [18.](#) eiicitur, & Paraclitensi Oratorio ab Abaelardo præficatur [34.1183.](#) [1184.](#) vnde sic dicta [72.](#) Hebraicæ, Græcæ, & Latinæ linguæ non inexpers [260.](#) à Petro Venerabili mirifice laudatur [338](#) [339.](#) corpus Abaelardi obtinet ab eo [342.](#) & absolutionem quoque [345.](#) cum eo sepelitur. [1195](#)

Heluindis Abbatisa Paraclit. [1188](#)

Henricus Abbas S. Dionysij. [1170](#)

Hermes, de quo Paulus Apost. quis [720.](#)

Hilarius Abaelardi discipulus plangit recessum Præceptoris sui à Paraclito. [243](#)

Hilduinus Abbas S. Dionysij [26.1181](#)

Huboldus insignis Magister apud S. Genouefam docuit tempore Roberti Regis. [1146](#)

Hugo Creciacensis. [1144](#)

Hugo Senonensis Archiepiscopus [355.1186.](#)

I

Iacoba Abbatisa Paraclit. [1189](#)

Idem quot modis dicitur. [1077](#)

Ieiunia Pentecostes sollemnitatem præcedere debent, & quare [970. b](#)

Ieiuniorum abstinencia. [181.182](#)

Iesus cur filius Dei dicitur [504.](#) &

quod non adoptius in quantum homo. [505](#)

Iesus Christus factus pro nobis sub lege, & maledictus. [778.780](#)

Iesus ad solos Iudæos reuera missus; quod erga Gentiles egit ex gratia superaddidit. [427.428](#)

quod Iesus Christus manducauit, & bibit cum discipulis ante passionē [463.](#)

Iesus Christus quomodo tribus diebus & tribus noctibus in sepulcro [390.391.](#) quoties apparuit post resurrectionem [392.393.](#) & seq.

Incarnatio & passio Christi non simulata, contra quosdam hæreticos. [461.462](#)

de Incarnatione Dominica, Sermo [730.](#)

Infirmariæ officium in Monasterio [155.156.](#)

Innocentius II. Papa [34.39](#)

Innocentij II. diploma pro confirmatione Oratorij Paraclitensis [346.347](#)

Innocentij rescripta contra Petrum Abaelardum. [299.301](#)

Innocentius III. Papa corpus S. Dionysij Corinthij dedit Monachis S. Dionysij in Francia, & eius ea de re authenticum. [1170.1171](#)

Ioanna Abbatisa Paraclit. [1189](#)

Ioanna de Chabor Abbatisa Paraclit. [1190.](#)

Ioannes Cornubiensis Petri Lombardi discipulus. [1159](#)

Ioannis III. Papæ priuilegiū pro Monasterio S. Medardi Sueffion. [1168](#)

S. Ioannes quàm honorabilis inter ceteros Apostolos fuerit [905.906](#) [907.](#)

de S. Ioanne Euangelista Sermo. [905](#)

Ioannes Baptista à bono Angelo nunciatus, contra quosdam hereticos [459.](#)

de S. Ioanne Baptista Sermo. [946](#)

Iudas proditor qualiter & quoties à Christo designatus. [832.833](#)

Iudæi quando sic dici cœperunt, & vnde. [532](#)

Iudicael Episcopus Venerensis. [1180](#)

Iudicium de aliquo prius dubio tripliciter fit. [699](#)

Iurare per cœlum, terram, Hierosolymam, & caput nostrum cur Dominus prohibuit. [419.420](#)

L

Lænas quàm seueriter sancti Patres punierint. [927](#)

Lapidis à Patriarcha Iacob vncti expositio. [923.924](#)

Laudunensis Ecclesia studiorum conuentus. [1148](#)

Lazari suscitatio exposita. 801. & seq.

Lecti Monialium quales esse debent [128.](#)

Lecutirius mons. [1145](#)

Leonarda de Turenne Abbatissa Paraclit. [1191](#)

Leprosum mundatum cur Dominus ad iudicium sacerdotis misit. [401](#)

Lex cur promissionem æternæ vitæ non habuerit. [613](#)

Lex Moyfi ab omnipotenti Deo data, non à Principe malignorum Spirituum. [454](#)

Legis transgressor in vno præcepto, fit omnium reus, qualiter. [387](#)

Liberum arbitriū quid, & de eo plura. [592.593](#)

Libri gentilium quatenus cauendi [1050.](#)

Linguae igneæ super Apostolos descendentes quid designauerunt. [876](#)

ad Litterarum studium exhortatio [251. & seq.](#)

Logica vnde dicta. [241](#)

Lotulfus Nouariensis Anselmi discipulus, [9.42.1162](#)

Lucia Abaelardi mater [7.1146](#)

Ludouici & Lotharij Imper. confir-

matio super Ecclesia Argentolij [1180.](#)

Ludouici Grossi Charta de B. Maria de Gornaio. [1174](#)

Lugdunensis prima sedes Galliarum [250.](#)

M

Magi quinam & vnde venerūt adorare Dominum. [265. 766. & seq.](#)

Manasses Archiepiscopus Remensis [1164.](#)

Manasses [Meldensis Episcopus. 1173](#) [1186.](#)

Manuum impositio. [481](#)

in S. Marcellini Papæ & Martyris die Sermo. [917](#)

S. Marcellini transgressio excusatur [918.919](#)

Maria Trecentis Comitissa. [1186](#)

Maria Abbatissa [Paraclit. 1189. soror](#) Odonis Archiepiscopi Rothom. [ibid.](#)

Maria de la Roche foucaut Abbatissa Paraclit. [1191](#)

Maria Virgo cur benedicta in mulierib. potius quàm in viris ab Angelo dicta est. [734.](#) velleri comparata. [741](#)

Maria Virgo qualiter obiit & in cœlum assumpta fuit. [910. 911. & seq.](#)

de Maria Virgine prosa. [1136](#)

Matildis Comitissa. [1185](#)

Matrimonij defensio contra Tatianum hereticum. [456.457](#)

S. Medardi Abbas [25. Monasterium à](#) quo [conditum. 1167.](#) & priuilegiū

Ioannis Papæ præco. [1167.1168](#)

Meldensis Episcopus. [27](#)

Melidunum castrum, Sedes Regia [4.](#) [1195.](#)

Meliduni Comites. [1144. Vicecomites](#) [1144.1195.](#)

Mens Dei quæ. [987](#)

Milesendis Abbatissa Paraclit. [1188](#)

NNN Nnnn

Milo Nogennij Dominus. [1184](#)
 Milo de Pruino Mareſcallus Cam.
 paniz. [1186](#)
 Milo de Quinceio miles. [1186](#)
 Mimatenſis Epiſcopus. [320](#)
 de Miraculorum gratia vanè ſeſe
 iactantes reprehenduntur. [267](#)
 Miſſæ celebratio quid. [397](#)
 Mites quinam. [414](#)
 Monachi procul ab vrbibus dege-
 re debent [254. 255. 262.](#) & Epiſco-
 pales cathedras refugere [263. 264](#)
 & ſeq.
 Monachorum Principes [249.](#) digni-
 tas [250. genera. 254](#)
 Monastici Ordinis laus & præroga-
 tiua. [228. 229.](#) & ſeqq.
 Mortui tres à Domino ſuſcitari. [797](#)
 peccatorum tria genera designant
 ibid. & [798.](#)
 Moyſi locutus Deus, contra quàm
 ſentiebant hæretici quidam. [451](#)
 Mundus, & quæ in eo ſunt, à Deo
 facta, non à Principe malignorum
 ſpirituum. [452. 453](#)
 Mundi corde qui. [414](#)

N

N Amneti Comes. [39](#)
 Narciffus, de quo Paul. Apoſt.
 quis. [720](#)
 in Natali Domini, Sermo. [736](#)
 S. Nortbertus Canonicoꝝ Regu-
 larium reſtaurator. [1177. 1178](#)

O

O Bedientia quando ſecularibus
 Potestatibus debetur, & quā-
 do non. [633. 634](#)
 Odilo Abbas Cluniacenſis Abba-
 tiam S. Dionyſij reformauit. [1153](#)
 Odo Corbolienſis Comes. [1144.](#)
[1197.](#)
 Odo Rothomagenſis Archiepiſco-

pus. [1189](#)
 Onagri libertas, & eius myſtica ex-
 polito. [246. 247.](#) & ſeq.
 Oratio quantum prodeſt, & qualiter
 fieri debet. [359. 852. 853](#)
 Oratio Dominica quot petitiones
 continet, [245. 359. 360. 854. 856.](#)
 & quidnam illæ ſignificant ibid.
 & ſeqq.
 Orationis Dominicæ expoſitio. [359](#)
[852.](#)
 Orationes ſanctorum pro viuīs, &
 viuorum pro defunctis. [458](#)
 Oratorij ornamenta neceſſaria. [159](#)

P

P Agani vnde dicti. [505](#)
 Palatium oppidum in ingreſſu
 minoris Britanniz. [41142](#)
 Panis quotidianus quis. [363. 364](#)
 Panis ſuperſubſtantialis. [246. 247](#)
 Patacliti Oratorium ab Abaelardo
 conſtructum in Trecenſi pago. [28](#)
[30. 42. 872. 1177.](#)
 Paſcha vetus & nouum. [397.](#) & ſeqq.
 Paſchæ celebratio qualiter ad deuo-
 tionem feminarum [pertineat. 847](#)
[848.](#) & ſeq.
 in Paſchæ die Sermo. [847](#)
 Paſſionis Dominicæ dies cur non ha-
 bet exultationem celebritatis,
 cum paſſionibus ſanctorum feſti-
 uam jocunditatem Eccleſia per-
 ſoluat. [849. 850](#)
 Patris nomine diuina potentia defi-
 gnatur. [985. 988](#)
 S. Paulus vnde nomen hoc aſſumpſit
[497.](#) quam humilis & patiens fue-
 rit [497. virgo](#) & martyr [498. quan-](#)
 tus apud Philoſophos [498. 499](#)
 meritis inter Apoſtolos primus,
 licet ordine vocationis vltimus
[499. 201.](#) ſegregatus in Euan-
 gelio Dei [502.](#) ex tribu Benjamin
[201.](#)
 in S. Pauli conuerſione Sermo. [897](#)

Pauperes spiritu qualiter beati dicuntur. **409**
 de Peccatore pœnitente quantum in cœlo gaudium. **403. 404**
 Peccatorũ tria genera per tres mortuos à Christo suscitatos designata. **798. 799**
 Peccatum in quo propriè accipiendũ **245. 246.**
 Peccatum quot modis dicitur. **591**
 Peccatum originale quid. **597**
 de Peccato originali quæstiones siue obiectiones. **591**
 Peccati actus omnis voluntarius potius quàm necessarius. **ibid.**
 de Peccato in Spiritum sanctũ quæstio. **405. & seq.**
 Peccata per venenum aspidum designata. **546**
 Pentecostes sollemnitas quid dignitatis præ ceteris habeat. **995. b. 996.**
 in Pentecostes die & ferijs sermones **871. 872. & seqq.**
 à Persecutionibus vtrum nos licitè possumus defendere. **685**
 Persona Christi vna. **375. 376**
 Personæ tres qualiter in vnitare diuinæ substantiæ. **1067. 1068. & seqq.**
 Personarum distinctio in vna diuinitatis natura. **985**
 Petrus Abaelardus Palatio oppido Britannię oriundus **4. 1142.** vnde & Palatinis cognominatus **1142. c.** ius parentes **4. 7. 1142. 1146.** præceptores **4. 5. 7. 1143. 1145.** fratres **4. 1142. soror. 13. 1149.** Magister vulgo dictus. **1141.** variæ cognominis sui Abaelardi scripturæ **ibid.**
 Petrus Abaelardus à Magistro suo Guillelmo Campelleni persecutus **4. regit** scholas apud Melidunũ **5.** apud Corbolum **ibid.** apud Parisiacum **ibid.** recedit ad Melidunum **9. r.** egreditur ad montem S.

Genquesæ extra ciuitatem **6. in** patriam reuertitur. **7.** quomodo Laudunum iuit ad Magistrum Anselmum **7.** quomodo sacros cœperit legere libros Scholasticis, & nonas eudere glosas **8.** persecutio Magistri Anselmi in eum **9.** quomodo reuersus Parisius glosas suas, quas Lauduni lege cœperat, consummauit. **9.**
 Petrus Abaelardus in amorem Heloisæ lapsus, quomodo vulnus indetam mentis quàm corporis tulit **10.** primò Clericus & Canonicus **16. 1150. Heloisam** ducit in uxorem **16.** & quomodo castratus est **17. 219. 1152.** fit Monachus in Monasterio S. Dionysij **18. 1152. 1153.** Scholarium ad eum confluentium multitudo. **18. 1155. Libet** Theologiæ suæ **20.** cur conscriptus. **1156. 1157. &** quantæ assimationis fuit **20.** persecutio quam sustinuit à cõdiscipulis, **20.** Concilium contra eum, **ibidem.** & prædicti libri sui combustio. **24**
 Petrus Abaelardus quænam & quot opera composuit **1160.** ad Trecensem solitudinem se confert, vbi & Oratorium construit. **28.** illudque Paraclitũ nominat, & cur **30.** persecutio quorundam in eum **31.** ad Abbatiam S. Gildasii assumitur, & tam à Monachis quàm Principe terræ persecutionem patitur. **32. 33. & seqq.** Heloisam olim coniugem suam Oratorio Paraclitensi præficat. **34.** infamatio turpitudinis in eum **35.** scribit Regulam pro sanctimonialibus Paraclitenfibus. **130. & seqq.** vocatur ad Concilium Senonas. **270. 1191.** Epistola S. Bernardi ad Cardinales & Innocentium contra eum **270. 271. & seqq.** rescriptum Innocentij **299.** defenditur à Berengario discipulo.
 NNNNnnn ij

INDEX

302. 309. 1192. edit confessionem fidei 330. Cluniacum proficiscitur. 335. cum S. Bernardo conciliatur 336. obit apud S. Marcellum. 341. & seq. 1195. corpus eius Heloisa remittitur à Petro Vener. cum epitaphio. 342. & absolutione 345. & in Paraclito sepelitur. 1195
- Petrus Lombardus Theologia Abaelardi vsus in compositione sententiarum. 1159
- Petrus Presbyter hæreticus in Provincia. 1066
- Petrus Venerabilis Abbas Clun. Heloisam miris effert laudibus. 338 339. ei corpus Abaelardi remittit cum epitaphio 342. & absolutione 345.
- Petrus Apostolus Romæ fuit. 494. 495.
- de S. Petro Apostolo Sermo. 892
- Phœnicis avis resurrectio. 851. 852
- Pluuiæ in vellus descendens expositio. 741
- Pœnitentia secunda post naufragium tabula, & quid de ea tenendum. 478.
- Pomerij Abbatia à quo constructa. 355.
- Portariæ seu Ostiariæ officium in Monasterio. 158.
- Pœna cur post peccati condonationem reservatur. 632
- Præcepta legis alia moralia, alia figuralia. 416. 417
- de Prædestinatione quæstio. 641
- Prælationes non ambiendæ. 148
- Prælatorum austeritas arguitur. 150
- Præputium quid, & vnde dicitur. 535
- Præscientia Dei. 1134
- Prisca, de qua Paulus Apost. quæ. 717.
- Processio Spiritus sancti. 1085. 1086 & seq.
- Providentia Dei. 1134. 1135
- Providentiâ mundum regi etiam Philosophi gentium asserunt. 515
- Proximi nomen ad quos se extendat 614. 615.
- Pruini castrum. 27. 1172
- Psalms quid significat. 903
- in Purificatione B. Mariæ Sermo. p. 774.
- Q
- Qvinciacus. 243
- Quinceij parrochia. 346
- Quinceij Dominus. 1186
- R
- Radulfus Abaelardi frater. 1142
- Radulfus frater Anselmi Laudunensis. 1164
- Radulphus Veromanduorum Comes Dapifer. 1176
- Radulfus Remensis Archiepiscopus: vide Rodulfus.
- Rainaldus Corboliensis Comes. 1144. 1197
- Rainaldus Episcopus Paris. Melidunensis Comes 1144. 1195.
- in Ramis Palmarum, Sermones quatuor. 760. & seq.
- Renata de la Tour Abbatisa Paraclit. 1190
- Resurrectio Christi non simulata, contra quosdam hereticos. 462
- Resurrectio mortuorum asseritur aduersus Saducæos. 487. 851
- Rinoceros. typus conversionis S. Pauli. 899. 900.
- Robertus Arbrofello. 335
- Roberti Regis Præceptum de restoratione Abbatie Argentolij 1150. 1151.
- Rodulfus Archiepiscopus Remensis 20. 1164. Viridis cognominatus 1164.
- Romani ad quos scribit Paulus, quorum prædicatione conuersi. 494.

RERVM ET VERBORVM.

Ros quid mysticé. [743](#)
 Roscelinus seu Rozelinus Abaelardi
 — præceptor [1143](#). hæreticus [ibid.](#) au-
 ctor Nominalium [ibid.](#) condem-
 natus in Concilio Sueffionensi
[1157. 1158:](#)
 Ruience monasterium. [1172](#)

S

Sacramentum quid. [979](#)
 Sacrificæ seu Thesaurariæ offi-
 cium in Monasterio. [154](#)
 Sanctificatio viri infidelis in vxore
 fidei qualiter accipi debet. [447](#)
 Sanctimonialium origo [94 95. & seq.](#)
 institutio & Regula [130 131. & seq.](#)
 consecratio [202. 203.](#)
 Sanctorum orationes viuus utiles
[488.](#)
 Sanguis Domini cur noui Testa-
 menti, potius quàm corpus eius,
 dictus est [394. 395. & seq.](#)
 Sanguine Christi qualiter iustificati
 & redempti sumus. [553](#)
 Sapientiæ Dei nomina varia [1130. 1131](#)
 Satisfactio necessaria. [479](#)
 Scriptura sacra speculum animæ
[188.](#)
 Scripturarum intelligentia quàm ne-
 cessaria. [371. 385](#)
 Scapulare Monachorum quid. [435](#)
 Sedis Romanæ præminencia & au-
 ctoritas. [894. 895](#)
 in Septuagesima, Sermo. [783](#)
 Seruorum duo genera [500.](#) & qui-
 nam generaliter serui. [501](#)
 Sion, celsitudo supernæ patriæ. [787](#)
 Sollicitudo quid propriè. [422](#)
 Spes quid. [977](#)
 Spiritus pro ratione & animi discre-
 tione. [429](#)
 quòd Spiritus sanctus ex Patre Filio-
 que procedit. [1085. 1087. & seqq.](#)
 Spiritus sanctus in specie Columbæ
 super Christum descendit. [772](#)

Spiritus sancti vocabulo caritas no-
 tatur. [985. 986. 994](#)
 Spiritus sancti in Apostolos descen-
 sus [873. & seqq.](#)
 ad Spiritum dandum cur ascendit
 Christus cum eum iam in terra
 dedisset. [890](#)
 Stella magos præcedens nouiter ex
 elementis creata. [772](#)
 Stephanus Cancellarius Franciæ, &
 Episcopus Parisiensis. [1175. 1176](#)
 Stephanus Regis Dapifer [27.](#) de
 Guarlāda cognominatus [1174. frater](#)
 Anselm & Guillelmi de Guarlanda
[1174.](#) non Cancellarius, nec Epif-
 copus Parisiensis. [1175. 1176](#)
 S. Stephaniprothomartyris laus. [263](#)
 & seq.
 Sueffionense Concilium aduersus
 Roscelinum [1166.](#) aduersus Abae-
 lardum. [20. 21. & 1166](#)
 Sugerius Abbas S. Dionysij [127. 1172](#)
[1173.](#) quando electus. [1173](#)
 Superfluitas euitanda à Monialibus
[184.](#)
 Susanna speculum castitatis, & qua-
 liter liberata. [928. 930. 931](#)
 de S. Susanna Sermo. [925](#)
 Symbolum fidei ab omnibus Chri-
 stianis sciri debet. [368. 369](#)
 Symboli multiplex acceptio. [362. 370](#)
 Symboli Apostolici expositio [398](#) &
 seq. item Symboli Athanasij [381](#)
 & seq.

T

TAnquelmus hæreticus. [1036](#)
 Templa ab Apostolis ad oran-
 dum & baptizandum constituta
[466.](#)
 in Templis & Ecclesijs orandum
[464. 465.](#)
 Tentationum species quot, & quæ
 nos potissimum tentant. [366](#)
 Terricus Scholarum Magister. [24](#)
 Theobaldus Comes Trecensis [26.](#)

1172. Dapifer Regis. 1177
 Theodrada soror Caroli Magni, Ar-
 gentolij Abbatissa. 1181
 Tribulatio quid. 524
 Tricenarium Missarum: 343
 S. Trinitas aliquot similitudinibus
 exposita 1078. 1079. 1081. &
 seqq.
 de S. Trinitatis fide testimonia Pro-
 phetarum 996. & seqq. Philoso-
 phorum 1003. 1004. & seqq. Sibyl-
 larum. 1035. 1036

V

VElæ virginum ab Episcopo con-
 secrari debent. 183
 Vestes preciosæ à Monialibus fu-
 giendæ. 182
 Vestiarij officium in Monasterio. 157
 S. Victoris Monasterium. 5. 1145
 Victus & vestitus Sanctimonialium
 qualis esse debet. 165. & seq.
 Visio Meliduni Vicecomes. 1195

FINIS.



ERRATA QVÆDAM, ET OBMISSA.

PAg. 421. l. 9. non tam ipsum, *dele vocabulum* non. p. 422. l. 17. cum enim iratus, *lege* reatus. p. 449. l. 21. inordinat, *lege* inordinatam. p. 458. l. 17. ornabant se, *adde* subiecte. p. 602. l. 25. semel iterum, *lege* non iterum. p. 742. l. 4. ab omni, *lege* absque omni. p. 778. l. 4. quem nec, *lege*, quem &. p. 788. l. 3. quiete vix vnus, *lege* quiete viximus. p. 798. l. 14. diuinæ consuetudinis, *lege* diuturnæ. p. 805. l. 28. meritis nequitiam. l. mentis. p. 81. l. 1. 38. condescendendum. l. conscendendum. p. 816. l. 38. inferius, l. interius. p. 818. l. 30. mortuus, l. mortuis. p. 820. l. 3. olei. l. olim. p. 823. l. 18. crucifixu, l. crucifixio. p. 836. l. 2. in quibusdam. l. vt quibusdā. p. 1013. l. 22. in quo. l. sine quo. p. 1027. l. 20. quod itaque, l. quodam. Itaque l. 29. atque animæ, l. animare. l. 30. diuersitas natura l. diuersitate naturæ. p. 1029. l. 27. eam, l. tam. p. 1036. l. 29. secundum nouum l. seculum nouum. p. 1045. l. 16. a quibus l. aliquib. p. 1060. l. 2. & 3. numquam hic l. numquid hi. p. 1064. l. 27. vt qui. l. vt quod. p. 1066. l. 6. debemus, l. debet. p. 1068. l. 17. aliud l. adhuc. p. 1069. l. 18. dicitur vnus. l. viuus. p. 1072. l. quam nunc. l. quam nouit. p. 1077. l. 24. hæc quomodo. l. hæc quæstio. l. 30. homo est nullius, *leg. vid. hoc in illius.* pag. 1079. l. 24. diuersæ quæ. l. diuersæ quædam. pag. 1081. l. 3. *post* asserat illos, *adde* diuinæ Trinitatis rationem inuestigasse, atque inuenisse, vt iam quoque supra meminimus. *Inuisibilia*, inquit, *ipsius à creatura &c.* p. 1084. l. 15. commemorat, l. commemorauit. p. 1087. l. 37. eorum sigillum, l. æreum. pag. 1088. l. 4. *post* dicamus, *adde* suæ sapientiæ genitorem: & tantumdem est dicere filiū, quantum si dicamus, sapientiam &c. l. 16. non essentialitate, &c. *restituere*, essentialiter tantum, sed etiam proprietate intelligitur. l. 18. ideo aliud, l. aliquid. l. 20. *post* distat, *adde* nullatenus procedūt. p. 1089. l. 12. non vehem. l. nos. p. 1092. l. 14. in substantia l. in subsistentia. l. 36. inflans. l. insufflās. p. 1099. l. 14. incipit. l. inspicit. l. 16. *post* intuerur, *adde* induitur. l. 22. vtram. l. vtramque. p. 1098. l. 9. substantiam. l. subsistentiam. p. 1099. l. 8. moueat quidem spiritus scilicet. l. moueat quod spiritus sanctus cum &c. p. 1110. l. 10. vsum l. vrsū. p. 1113. l. 35. non facit. l. hoc facit. pag. 1114. l. 27. profero, l. profecto. l. 29. hanc. l. habet. p. 1117. l. 29. minimè l. maximè. pag. 1119. l. vlt. possibile. l. sic & consequēs & impossibile. p. 1120. l. 4. contenta. l. contemptata. p. 1121. l. 38. aliud. l. aliquid. p. 1122. l. 9. alio falso, l. alio verò. p. 1123. l. 3. ne tamen. l. nec tunc. l. 17. quod sic modo. l. de eo quo fit modo. l. 33. id est l. idem. p. 1124. l. 2. incarnatus esse, *adde* eiusdem. p. 1125. l. 33. noua fuerit disponere, l. noua fiunt dispositione. p. 1128. sed human. l. sed assumptione human. p. 1135. l. 4. fieri, *adde*, vel non cras fieri. l. 11. cras esse, *adde* futurum. *Reliqua benenolus Lector facile supplebit.*

SERIES CARTARVM.

a b c d e, & f, semifolium.

* semifolium.

** folium integrum.

A B & reliquæ literæ vsque ad finem alphabeti.

A a B b & reliquæ etiam ad finem vsque.

A A A alphabetum integrum.

A A a a alphabetum integrum.

A A A a a alphabetum integrum.

A A A a a a alphabetum integrum.

A A A A a a a vsque ad N N N N n n n inclusiue.

† semifolium in quo continentur Errata.

